


Tuhun saá ña najándacoo Jesucristo nu̯ yo:

El Nuevo Testamento en el mixteco de

Silacayoapan



New Testament in Mixtec, Silacayoapan (MX:mks:Mixtec,
Silacayoapan)

Tuhun saá ña najáandacoo Jesucristo nu yo: El Nuevo Testamento en el mixteco de Silacayoapan

New Testament in Mixtec, Silacayoapan (MX:mks:Mixtec, Silacayoapan)

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

7f2d3ecf-6d15-55a5-9081-6e970474df2f

Contents

San Mateo	1
San Marcos	59
San Lucas	93
San Juan	157
Hechos	203
Romanos	261
1 Corintios	284
2 Corintios	308
Gálatas	322
Efesios	331
Filipenses	339
Colosenses	345
1 Tesalonicenses	351
2 Tesalonicenses	356
1 Timoteo	359
2 Timoteo	366
Tito	371
Filemón	374
Hebreos	376
Santiago	393
1 Pedro	399
2 Pedro	406
1 Juan	410
2 Juan	416
3 Juan	417
San Judas	418
Apocalipsis	420

Tuhun vaha nacahyí Mateo sahá ña nacaja Jesucristo

*Chichi naquixi Jesucristo
(Lc. 3:23-38)*

¹ Ña yóho cúu quiví na nasacuu tásáhu jícó Jesucristo, mé a naquixi chichi David xihín chichi Abraham:

² Abraham nasacuu tátá Isaac ta Isaac nasacuu tátá Jacob ta Jacob nasacuu tátá Judá xihín java ga ñani da.

³ Judá nasacuu tátá Fares xihín Zara ta náná ndíví da yóho nasananí ña Tamar. Ta Fares nasacuu tátá Esrom ta Esrom nasacuu tátá Aram.

⁴ Ta Aram nasacuu tátá Aminadab ta Aminadab nasacuu tátá Naasón ta Naasón nasacuu tátá Salmón.

⁵ Ta Salmón nasacuu tátá Booz, da cúu jahyi ñá naní Rahab. Booz nasacuu tátá Obed ta Obed yóho nasacuu da jahyi ñá naní Rut cán. Ta mé Obed yóho nasacuu tátá Isái.

⁶ Ta Isái nasacuu tátá rey David ta rey David yóho nasacuu tátá Salomón, da cúu jahyi ñá nasacuu ñájíhí Urías nu cuítí cán.

⁷ Ta Salomón nasacuu tátá Roboam ta Roboam nasacuu tátá Abías ta Abías yóho nasacuu tátá Asa.

⁸ Ta Asa nasacuu tátá Josafat ta Josafat nasacuu tátá Joram ta Joram nasacuu tátá Uzías.

⁹ Ta Uzías nasacuu tátá Jotam ta Jotam nasacuu tátá Acáz ta Acáz nasacuu tátá Ezequías.

¹⁰ Ta Ezequías nasacuu tátá Manasés ta Manasés nasacuu tátá Amón ta Amón nasacuu tátá Josías.

¹¹ Ta Josías nasacuu tátá Jeconías xihín java ga ñani da. Ta nasacuu da tiempo tá natiin soldado na Israel já nasandaca ñahá da na cán ñuu Babilonia.

¹² Ta tá nasanduu na Israel ñuu Babilonia cán já nacacu Salatiel ta tátá Salatiel nasacuu Jeconías. Ta Salatiel nasacuu tátá Zorobabel.

¹³ Ta Zorobabel nasacuu tátá Abiud ta Abiud nasacuu tátá Eliaquim ta Eliaquim nasacuu tátá Azor.

¹⁴ Ta Azor nasacuu tátá Sadoc ta Sadoc nasacuu tátá Aquim ta Aquim nasacuu tátá Eliud.

¹⁵ Ta Eliud nasacuu tátá Eleazar ta Eleazar nasacuu tátá Matán ta Matán nasacuu tátá Jacob.

¹⁶ Ta Jacob nasacuu tátá José, da nasacuu yí María. Ta María cúu ñá nasacuu náná Jesucristo, mé a nachindahá Ndióxi cacomí a cuéntá sahá ñayivi.

¹⁷ Ña cán quea janda tá nacasáhá cácu jahyi Abraham janda quiahva naxinu coo a quiví nacasáhá cácu jahyi David já nayaha uxu comi generaci6n. Ta tá quiahva nacasáhá cácu jahyi David janda quiahva natiin na Babilonia na Israel já ñéhe ñahá na cuahan na nayaha inga uxu comi generaci6n. Ta nayaha inga uxu comi generaci6n nani nasanduu na Israel ñuu Babilonia janda quiahva naxinu coo quiví nacacu Jesús, mé a nachindahá Ndióxi cacomí a cuéntá sahá ñayivi.

*Tá nacacu Jesús
(Lc. 2:1-7)*

¹⁸ Joho nasahiin tá nacacu Jesucristo: Mé María, ñá cacuu náná Jesús cán sa nasahan ñá tuhun ñá ña tandaha ñá xihín José. Joo tá camaní coo da xihín ñá já nacandaa ini da ña ñúhu jahyi ñá. Ta ña yóho nasacuu a ña nacaja ínimá yí Ndióxi.

¹⁹ Ta José, da cacuu yí María cán cúu dá da cája ndinuhu ña ndaa. Ta nacahan da ña nasahiin ñá xihín inga dataa joo coo naxeen da cahan núu da sahá ñá nuú ñayivi. Sahá ña cán quea nasacu ini da jándacoo jehé da ña.

²⁰ Ta nani cáhvi ini da sahá ña caja da anda jáví naquixi in sani nu dá ta nandaca náha in tátó Ndióxi nu dá. Ta tañu mé sani cán nacahan xihín dá. Já nacachi a já:

—José, da naquixi chichi David, a cáyhvÍ tohún tandahún xihín María jan jáchi nacaja ínimá yí Ndióxi ña ñúhu jahyi ñá.

²¹ Ta tá sa nacacu jahyi María já chican ndó quiví á ná cananí a Jesús jáchi jácacu a ñayivi nuú cuachi tá ná candeé ini na mé a —nacachi a.

²² Tóco ndihi ña yóho nayaha ña ná xinu coo nuú tuhun Ndióxi ña nacahyí in profeta sanahá ndivaha cán ta já nacachi da cán já:

²³ Vaxi quivi cañuhu jahyi in ña tacú, ña a ñaha coo ta xihín.

Ta tá sa nacacu jahyi ña cán já cacu na quivi á cananí a Emanuel.

Ta tuhun yóho cuni cachi a: ín Ndióxi xoho.

²⁴ Ta tá nandicaxí ini José já nacaja da tá ín nacachi táto Ndióxi cán xihín dá. Ta já natandaha dá xihín María.

²⁵ Joo coo nasahin da xihín ña tá quiahva ín in dataa xihín ñajíhí da janda quiahva cacu jahyi María. Ta tá nacacu a cán já nasacu José quivi á cananí a Jesús.

2

Tá naxito nihni na ndichí Jesús

¹ Ta nacacu Jesús in ñuu naní Belén ña ndacaan estado Judea. Ta mé tiempo cán nasacomí rey Herodes cuénta sahá nación Israel. Ta mé tañu já naxinu coo java na ndichí ñuu Jerusalén. Mé na ndichí yóho cúu ná na jácuaha xihín quimi ta naquixi na chí nu cána candii.

² Ta tá naxinu coo na ñuu Jerusalén já nandaca tuhún na ñayivi já nacachi na já:

—Ndájá ín da loho nacacu viti jan, da cacuu rey nuú na Israel. Jáchi naxini nde naqueta quimi nuú nde ta xihín rí yóho sa nacandaa ini nde ña sa nacacu da. Ta viti vaxi nde yóho caja cáhnu nde da —nacachi na ndichí cán ndaca tuhún na.

³ Ta tá naxini johu rey Herodes ña yóho já nacasahá da ndíhi ndivaha ini da ta quiahva já nacasahá ndíhi ini tóco ndihi ñayivi ñuu Jerusalén cán.

⁴ Sahá ña cán quea nacana rey Herodes cán tóco ndihi na sacuahá nuú jutú xihín na jánaha ley Moisés cán. Ta já nandaca tuhún da na saha ndá ñuu cúu nu cáhí tuhun Ndióxi cacu da nasahan Ndióxi tuhun a chindahá a cacomí a cuénta sahá ñayivi.

⁵ Já nacachi na cán já xihín dá:

—Ñuu Belén, ña ndacaan estado Judea cán cúu nuú cáhí tuhun Ndióxi cacu da jáchi quiahva já nacahyí in profeta sanahá tá nacachi da já:

⁶ Vatí ñuu Belén, ña ndacaan estado Judea,

cúu á in ñuu loho ndivaha tañu ñuu náhnu cán joo ín sahá a,

jáchi tañu ñayivi ñuu cán ndindita in da cacomí cuénta sahá na Israel, na cúu cuénta Ndióxi, já nacahyí in profeta sanahá.

⁷ Tá nandíhi já nacana xóo rey Herodes na ndichí cán ta já nandaca tuhún da na cán saha ndá quivi nanaha quimi cán mé rí nu ná.

⁸ Anda já nachindahá da na ñuu Belén. Já nacachi da já xihín ná:

—Cuáhán ndo ñuu Belén cán ta ndaca tuhún vaha ndó ndaja cáa sahá ta loho nacacu jan. Ta tá sa nandíhehe ndó a já quixi ndó caxi tuhun ndó xihín i já ná cahun ri yehé va caja cáhnu i ña —nacachi Herodes xihín na.

⁹ Ta xihín ña yóho naquee na ndichí cuahan tucu na. Ta quimi, rí naxini na nu cuítí cán já ndaca tucu rí na cuahan na. Ta tá naxinu rí chí nuú ín mé a loho cán anda já nasacandichi rí.

¹⁰ Ta cáji ndivaha ini na tá xini na mé quimi cán.

¹¹ Tá nandíhi já naquihvi na ini vehe já naxini na mé a loho cán xihín María, náná a. Ta já nacaxítí na nu á ta já nacaja cáhnu na ña. Ta tá nandíhi já nasuná na yuhú sato ñéhe na ta já najoco na juhun cuáan nuú a xihín jusa vaha xihín in ña támi sahan naní mirra nu mé a loho cán.

¹² Tá nandíhi já naquixi in sani nu ná ta xihín mé sani cán nacachi Ndióxi xihín ná ña ná a ndíco coo na chí nu ín rey Herodes. Sahá ña cán quea nandijama na íchi cuánúhu ná ñuu na.

Tá ñéhe na Jesús cuahan na Egipto

¹³ Ta tá sa naquee na ndichí cán cuahan na já naquixi in sani nuú José ta nandaca náha in táto Ndióxi nu dá. Já cáhí a já xihín dá:

—Cuándacoún ndiquehe ña loho jan xihín María, náná a ta cunún cahun xihín ná chí ñundáhyi nación Egipto. Ta cán coún xihín ná janda quiahva ná caxi tuhun i xuhun. Jáchi caca nuu Herodes ndinducú da ña loho jan ña cahní ñahá da —nacachi táto Ndióxi cán xihín José.

14 Anda já nandacoo José já naquehe da Jesús xihín María, náná a já naqueta ñuu na cuahan na chí Egipto.

15 Ta cán nasanduu na janda quiahva naxihi Herodes. Tóco ndihi ña yóho nayaha já ná xinu coo nuú tuhun nacachi Ndióxi sanahá tá nacahyí in profeta já: “Nasahin jahyi i nación Egipto ta nacana i da ná ndicó coo da”, cáchi tuhun Ndióxi.

Tá nasahnda Herodes chuun ña ná cahní na na valí

16 Ta ndaja coo naxini Herodes cán ña najándahvi na ndichí cán da sahá ña coo naxinu ga na nu dá. Ña cán quea a juú quiahva naxojo ini da. Ta chí nasahnda da chuun ña ná cahní ndihi na taa valí, na ivi cuia chí ninu, mé na ndúu ñuu Belén xihín ñuu válí catáhan xihin á. Jáchi sa nacaxi tuhun na ndichí cán xihin dá ña naxini na mé quimi anda tátuhun ivi cuia.

17 Ta tá nandihí naxihí na valí yóho já naxinu coo nuú tuhun nacahyí profeta Jeremías sanahá ndivaha tá nacahyí da já:

18 Ñuu Ramá jandá joho ndáhvi tácu cáyuhú cóhó ñañáha sácu ñá.

Ta ñá sácu yóho cúu ñá Raquel. Sácu ñá sahá jahyi ñá.

Ta co cúni ñá ndico ini ñá jáchi naxihí jahyi ñá, cáchi tuhun Ndióxi.

19 Joo tá sa naxihí Herodes já naquixi tucu sani nuú José nu ín da nación Egipto cán. Ta nandaca náha in tátó Ndióxi nu dá já cáchi a já xihin dá:

20 —Cuándacoun ta ndiquehe Jesús xihin María, náná a ta cuahán ndicó coo xihin ná chí ñundáhyi Israel. Jáchi sa naxihí va na ndúcú cahní ña loho jan —cáchi tátó Ndióxi.

21 Anda já nandicoo José ta ñéhe da Jesús xihin María, náná a cuahan na ndicó coo na chí ñundáhyi Israel.

22 Joo tá nañehe da tuhun ña nandicojo Arquelao chuun cacuu da rey nu Herodes, tátá da já nayihví José cuhun da chí estado Judea. Ta sahá ña sa nacaxi tuhun tátó Ndióxi tañu sani nu dá sahá ña cán quea nandijama da íchi ta cuahan da chí estado Galilea.

23 Ta naxinu coo na in ñuu naní Nazaret nuú nasanduu na. Ta xihin ña yóho naxinu

coo nuú tuhun nacahyí na profeta sanahá ña cacuu Jesús da ñuu Nazaret.

3

Tá nacasáha Juan, da jácandúta ñayivi cáhan ndojó da yucú íchi cán

(Mr. 1:1-8; Lc. 3:1-9, 15-17; Jn. 1:19-28)

1 Mé tiempo cán Juan, da jácandúta ñayivi naxinu da yucú íchi cuénta estado Judea cán. Ta nacasáha jánaha da ñayivi.

2 Já cáchi da já xihin ná:

—Xíní ñuhú jándacoo ndó ña núu cája ndó ta ndicó coo ini ndó nu Ndióxi jáchi sa nacayati quivi cacomí Ndióxi cuénta sahá ñayivi —cáchi da xihin ná.

3 Mé Juan yóho cúu dá da cuahan profeta Isaías saha tá nacahyí da já:

Vaxi quivi tá cuahan cóhó in da tañu yucú íchi ta cachi da já xihin ñayivi:

“Caja tiaha ndó íchi nuú quixi xitoho í, ta cuná ndó in íchi ndacú nu mé á ña ná ndihvi a ínimá ndó”, cáchi tuhun Ndióxi.

4 Ta jáhma nasandixi Juan yóho nasacuu a ña nacavaha na xihin íji camello ta nasandico in ní jáhndá tóco da. Ta naxixi da tica xihin ñuñu yucú.

5 Ta naqueta ñayivi ndúu ñuu Jerusalén xihin na ndúu estado Judea xihin na ndúu ñundáhyi yati yuta Jordán cán nasaa na nu Juan taa joho na nu cáhan da.

6 Ta tá nanahma na cuachi na nu Ndióxi já najácandúta Juan na ini yuta Jordán.

7 Joo tá naxini Juan ña janda joho xinu coo cuahá na fariseo xihin na saduceo nu dá ña ná jácandúta da na já nacasáha xójo ndivaha ini da ta já nacachi da já xihin ná:

—Mé ndó cúu ndó tátuhun coo jáchi cúu ndó na quini. Cahan ndó ña a jándoho ga Ndióxi ini ndó sahá cuachi ndó tá ná candúta ndó vatí cája tá cája ndó cuachi.

8 Xíní ñuhú caja ndó ña vaha já ná cuni ñayivi ña mé a ndaa táhyi najándicoo ndó ña núu nasacaja ndó jihna.

9 Ta a cahan ndó ña jácau Ndióxi ndohó sahá ña cúu ndó na naquixi chichi Abraham. Jáchi coo saha toho ña jan nu Ndióxi tá co jándacoo ndó cuachi ndó. Jáchi mé a ndaa ná cuhan i xihin ndó ña janda yuu ndúu

nu ñúhu jan cuu caja Ndióxi ña ná nduu a ñayivi quixi chichi Abraham.

¹⁰ Mé ndó cúú ndó tátuhun in yíto, dó sa natiin na hacha cuahan na cahnda na. Ta tóco ndihi yíto, dó co sáhan cuhi vaha nuu, tahnda do ta quee dó nu ñúhu cayi do. Quiahva já caja ri Ndióxi xihin ndó tá co cúni ndó ndicó coo ini ndó nu mé á.

¹¹ Mé a ndaa cája ndúta i ndóhó xihin ticuú ta xihin ña yóho náha ña nandicó coo ini ndó nu Ndióxi. Joo vaxi inga da ta da cán cúú da jándicutú ínimá ndo xihin ínimá yii Ndióxi ta ña cán cacuu a tátuhun ñúhu cayi. Ta da cán ín cuaha chága ndée dá a juú ga yehe. Ta chí coó sahá i ndica xítí i nu dá ña ndaxí i correa ndusa da.

¹² Mé da vaxi cán caxi da ñayivi vaha tañu ñayivi quini. Cúú á tátuhun in dataa tá jáxixi da trigo xihin pala já ná quee xehe á já cacu vaha da ña. Ta xehe nacana cán cuhun a cayi a xihin ñúhu ita ña a ndáhva toho —cáchi Juan xihin na cán.

Tá nacandúta Jesús

(Mr. 1:9-11; Lc. 3:21-22)

¹³ Naquee Jesús chí estado Galilea cuahan yuta Jordán nu ndácaan Juan jácandúta dá ñayivi ña ná jácandúta da mé á.

¹⁴ Joo nu cuítí coo naxeen toho Juan jácandúta dá Jesús. Ña cán quea nacachi da já xihin Jesús:

—Yóhó cúú da ndítahan jácandúta yehe. Ta cáa johó vasún yóho ña ná jácandúta i yohó —nacachi Juan cán xihin Jesús.

¹⁵ Já nanducú nehe Jesús tuhun nu dá já nacachi a já xihin dá:

—Candehé. Quiahva já ndítahan coo ña yóho viti jáchi ndítahan nu yo jáxinu coo i tóco ndihi ña ndaa ña nasacu ini Ndióxi coo —nacachi a.

Xihin ña yóho nacandúsa Juan ta chí najácandúta dá Jesús.

¹⁶ Ta tá nandihí nacandúta Jesús já naqueta ini ticuú cán. Anda já nanuna indiví ta naxini Jesús nanuu ínimá yii Ndióxi jatá ta nasacaá tá quiahva cáa in ndijata.

¹⁷ Tá nandihí já naxini johó a cáhan in a indiví ta já cáchi a cán já:

—Yóhó cúún jahyi maní i ta cáji ndivaha ini i xuhun —nacachi a.

4

Xíto ndojó tiñáhá sacuaḥa Jesús *(Mr. 1:12-13; Lc. 4:1-13)*

¹ Tá nandihí já ndáca ínimá yii Ndióxi Jesús cuahan chí yucú íchí nuú co ndúu ñayivi já ná coto ndojó tiñáhá sacuaḥa mé á.

² Ta cán nasahin a tixi ivi jícó quivi. Ñuu ta ndiví coo naxixi a ta tá nandihí já naxinu joco nu á.

³ Já nacayati tiñáhá sacuaḥa nuú Jesús ña coto ndojó ñahá ri já nacachi rí já xihin á:

—Tá ta jivi ndusa jahyi Ndióxi cúún cahnda chuun ña ná nduu yuu yóho pan —nacachi rí cán xihin Jesús.

⁴ Anda já nacachi Jesús já xihin rí:

—Já cáchi tuhun Ndióxi: “A juú pan cuití cuxu ñayivi já catacu na, vaha. Xíní ñúhú ri a caja na ña sáhdá tuhun Ndióxi nu ná já quea cuu catacu na nu Ndióxi” —nacachi Jesús xihin rí.

⁵ Tá nandihí já ndáca tiñáhá sacuaḥa cán Jesús cuahan xihin rí ñuu Jerusalén, ña yii cán ta já najándaa rí a nu jícó jiní veñuhu cáhnu ndácaan cán.

⁶ Ta já nacachi rí já xihin á:

—Tá ta jivi ndusa jahyi Ndióxi cúún jácana mún chí ninu jáchi já cáchi tuhun Ndióxi: Cahnda Ndióxi chuun nu tátó mé á ña ná candaa na yohó.

Ta ndinehe ndáha na yohó,

já quea ná a ndícuhe sahun tá ná cachi-hin sahun xihin yuu, já cáchi tuhun Ndióxi —nacachi rí xihin Jesús.

⁷ Ta já nanducú nehe Jesús tuhun nu rí já nacachi a já xihin rí:

—Cáchi tucu tuhun Ndióxi já: “A cóto ndojó tohún Ndióxi, xitohún” —nacachi Jesús xihin rí.

⁸ Ta tá nandihí já ndáca tucu tiñáhá sacuaḥa cán Jesús nasahan xihin rí in jiní yucú jícó ndivaha. Ta já nanaha rí ndaja táhan ñuu ndúu ñuyíví nu á ta najánaha rí tóco ndihi ña náhnu ndúu cán nu á.

⁹ Ta já nacachi tucu rí já xihin Jesús:

—Tóco ndihi ña yóho quiahva i nuun tá ná caxítún nuú i caja cáhnún yehe — ñacachi rí quini cán xihín Jesús.

¹⁰ Anda já ñacachi Jesús já xihín rí:

—Satanás, cuáhán caxoo jáchi já cáchi tuhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nuun” —ñacachi Jesús xihín rí cán.

¹¹ Tá nandihí já ñacaxoo tiñáhá sacuaña cán cuahán rí. Ta já ñaxinu java tátó Ndióxi chindeé na Jesús.

Tá ñacasáhá cáxi tuhun Jesús tuhun Ndióxi nuú na estado Galilea (Mr. 1:14-15; Lc. 4:14-15)

¹² Tá ñanehé Jesús tuhun ña ñachicaan na Juan, da jácandúta ñayivi vecaa já ñaquee a cán cuahán chí estado Galilea.

¹³ Joo coo ñacandoo a ñuu Nazaret chí ñaquee a cuahán coo a chí ñuu Capernaum ña ndácaan yuhú tañuhú, dó ndácaan ñundáhyi cuéntá na ñaquixi chichi Zabulón xihín na ñaquixi chichi Neftalí.

¹⁴ Tóco ndihi ña yóho ñayaha ña ná xinu coo nuú tuhun ñacahyí profeta Isaías sanahá tá ñacahyí da já:

¹⁵ Ñayivi ndúu ñundáhyi Zabulón xihín na ndúu ñundáhyi Neftalí, ña ñúhu inga xoo yuta Jordán yati yuhú tañuhú,

ta jári na ndúu Galilea, mé estado nu ndúu ñayivi, na coo cúu chichi Israel,

¹⁶ mé na cán ñasanduu na nuú na ndivaha ta viti ñaxini na in ñaha yehe ndivaha.

Jándiyehé á nu ná ña ná a quívi na, joo catacu na anda ama cáa quívi nu ín Ndióxi, ñacahyí Isaías sanahá.

¹⁷ Ta chí mé tiempo já ñacasáhá Jesús cáhan ndojó a nuú ñayivi ta já cáchi a já xihín ná:

—Xini ñuhú jándacoo ndó cuachi cája ndó ta ndicó coo ini ndó nu Ndióxi jáchi sa ñacayati quívi cacomí a cuéntá sahá ñayivi —ñacachi Jesús.

Tá cána Jesús comí da táva tiyacá ña ná caca tuun da xihín á

(Mr. 1:16-20; Lc. 5:1-11)

¹⁸ Tá xica Jesús cuahán yuhú tañuhú Galilea, nandinehé a ivi taa, da cúu ñani.

In da naní Simón ta cáhan na Pedro xihín dá. Ta da inga cán naní da Andrés. Ndívi da yóho cúu dá da táva tiyacá ta ñúhu na jácana na ñunu ná ini tañuhú cán.

¹⁹ Já ñacachi a já xihín ndívi da:

—Naha quíi ndó candico ndó yehe caca tuun ndó xihín i. Táva ndó tiyacá viti joo caja i ña ná cuu tavá ndó ñayivi tañu cuachi —cáchi a.

²⁰ Ta chí ivi laá najándacoo da ñunu da ta nandico da Jesús.

²¹ Ta nani xica Jesús cuahán chága chí nuu já ñaxini a inga ivi tucu taa, da cúu ñani. In da naní Jacobo ta inga da naní Juan, da cúu jahyi Zebedeo. Ta ndívi mé da yóho ñúhu da ini barco da xihín tátá da ndája vaha da ñunu dá. Ta ñacana Jesús ndívi da yóho.

²² Ta chí ivi laá najándacoo da barco da xihín tátá da ta ñacasáhá xica tuun da xihín Jesús.

Jánaña Jesús nuú cuahá ndivaha ñayivi (Lc. 6:17-19)

²³ Níi cúu estado Galilea ñaxica nuu Jesús cáhan tuhun vaha nuú ñayivi ini veñuhu in in ñuu cán. Cáxi tuhun a nu ná ña sa nandindaa quívi cacomí Ndióxi cuéntá sahá ñayivi ñuyíví. Ta nandaja vaha Jesús na quíhvi tá nuú cuehe ndóho na.

²⁴ Ta níi cúu ñundáhyi cuéntá Siria nandicuíta nuu tuhun sahá ña cája Jesús. Sahá ña cán quea néhe na na quíhvi, na ndóho tá nuú cuehe vaxi na nu á ña ná ndaja vaha mé á na ta néhe na na ñúhu ínima quini ini xinu na nu á ta ndijáa na xihí yihí xihín na quíhvi saha néhe na vaxi na nuú Jesús. Ta nandaja vaha mé á na.

²⁵ Ta cuahá ndivaha ñayivi ndíco na Jesús. Cúu ná na ñaquixi estado Galilea xihín na ndúu uxu ñuu cuéntá Decápolis xihín na ñuu Jerusalén xihín na estado Judea xihín na ñaquixi ñundáhyi chí xoo oriente nu ndácaan yuta Jordán cán.

5

Tá cáhan ndojó Jesús jini yucu

(Lc. 6:20-23)

¹ Tá ñaxini Jesús ña ndíco cuahá ndivaha ñayivi mé á já nandaa jini yucu ta já

naşacoo a cán. Ta naçayati na xíca tuun xihín á nu á.

² Ta já naçasáhá jánaḥa nu tóco ndihi na ndúu cán já naçachi a já xihín ná:

³ —Tahví naçuu ñayivi tá ndícuni na xíní ñúhú na ña chindeé Ndióxi na jáchi na cán cúu na cacomí Ndióxi cuéntá saḥa.

⁴ Tahví naçuu na ndúu cuéḥa jáchi na cán cúu na quiahva Ndióxi tuhun ndéé ini.

⁵ Tahví naçuu na co ndíñehe jícó mé jáchi na cán cúu na ñeḥe táhvi ndiquehe na ña naşahan Ndióxi tuhun a quiahva nu ná.

⁶ Tahví naçuu na xíca ini caja ña cúní Ndióxi. Na cán cúu na caja Ndióxi ña ná xinu nuú ña cúu ini na.

⁷ Tahví naçuu na cándahví ini saḥá ñayivi jáchi na cán cacuu na cándahví ri ini Ndióxi saḥa.

⁸ Tahví naçuu na co ndácaan quini ínima jáchi na cán cúu na cuni Ndióxi.

⁹ Tahví naçuu na ndíhi ini ña ná coo vaha na xihín ñayivi jáchi na cán cúu na cáchi Ndióxi cúu ná jahyi mé á.

¹⁰ Tahví naçuu na ndóho ini saḥá ña cája na ña sáhdá Ndióxi nu ná caja na jáchi na cán cúu na cacomí Ndióxi cuéntá saḥa.

¹¹ Tahví naçuu ndó tá cánaḥá ñayivi xihín ndó ta cája xíxi na xihín ndó saḥá ña cándeé ini ndó yeḥe. Ta tahví naçuu ndó tá jácojo na cuachi jíquí jata ndó saḥá ña cándeé ini ndó yeḥe.

¹² Xíní ñúhú cajji ndivaha ini ndó ta coo vaha ini ndó jáchi ndiquehe ndó in ña vaha ndivaha caja Ndióxi indiví. Xíní ñúhú ndicuhun ini ndó ña quiahva já naçaja xíxi na xihín na profeta, na naşandu şanahá.

Cúu yó tátuhun ñúhu jándiyehé nuú ñayivi ñuyíví

(Mr. 9:50; Lc. 14:34-35)

¹³ Mé ndó cúu ndó tátuhun ñii yívi na. Sa xíní ndó ña cája ñii ña ná ndihaji ñaha xíxi ndó. Ta quiahva já cája ndó xihín ñayivi ñuyíví. Joo tá ná ndihi ña ohva ñii cán a cúu ga ndicó coo a caohva tucu a saḥá ña cán queá jandá cuíta va íchi cuani nihni ñayivi ña jáchi coo chuun toho a.

¹⁴ Jári mé ndó cúu ndó tátuhun ñúhu jándiyehé nuú ñayivi ndúu ñuyíví. Ta mé ñúhu cán cúu á tátuhun in ñuu cánúu jata in yucú jícó ta a cúu toho ndácaan jehé a.

¹⁵ Jáchi co chíñúhu ná in lámpara ta tá nu ndíhi já chíjehé na ña tixi in saḥo. Ña cája na xihín á queá chinúu jícó na ña já ná jándiyehé a nu tóco ndihi na ndúu vehe.

¹⁶ Quiahva já xíní ñúhú ndihi ini ndó caja vaha ndó ña ná cacuu ndó tátuhun in ñúhu cáyi nuú ñayivi. Jáchi tá ná cuni na ña vaha cája ndó já queá cuu caja cáhnu na Ndióxi, tátá yo, ña íin indiví.

Jánaḥa Jesús saḥa ley Moisés

¹⁷ 'A juú caḥán ndó ña naquixi i ñuyíví yóho ña cacu xóo i ña naşahnda ley Moisés xihín ña najánaḥa na profeta, vaha. Co váxi toho i cacu xóo i ña. Vaxi i nu ndó jáxinu coo i tóco ndihi ña cáchi mé ley já ná naḥa i nu ndó ndía cúu ndusa ña.

¹⁸ Mé a ndaa ná caḥan i xihín ndó ña a ndíhi saḥa mé ley nani íin indiví xihín ñuyíví yóho. Ni in túhún toho tuhun, a ndíhi saḥa janda quiahva ná yaha tóco ndihi ña ndítahan yaha.

¹⁹ Saḥá ña cán queá ndá na co cúní caja ña sáhdá ley Moisés vatí cúu á ña loho ndivaha ta ni co cúní na jánaḥa na ñayivi ña ná caja na ña cáchi a já queá cacuu na in na coo cuaha saḥa tañu na cacomí Ndióxi cuéntá saḥa. Joo na cája ña cáchi mé ley ta jánaḥa na ñayivi ña ná caja na ña, mé na cán cacuu na na cáhnu ndivaha tañu na cacomí Ndióxi cuéntá saḥa.

²⁰ Mé a ndaa ná caḥan i xihín ndo ña tá ná caja cuití va ndó tá quiahva cája na jánaḥa ley Moisés xihín na fariseo já queá a cuú ndihvi ndó nuú cacomí Ndióxi cuéntá saḥá ñayivi.

Jánaḥa Jesús ña co ndítahan cojo ini ñayivi (Lc. 12:57-59)

²¹ Mé ndó sa xíní ndo ña naçachi Moisés xihín tásahnu jícó ndo şanahá tá naçachi da já: "A cáhni ndó ndii jáchi ndá na ná cahni ndii tandaa quivi caja vii jutixia saḥa ná."

²² Joo yeḥe cáchi i xihín ndó viti ña ndá na ná caja cueḥe xihín ñani táhan na tandaa quivi caja vii jutixia saḥa ná. Ta jári na cánaḥa xihín ñani táhan na, á cáchi na cúu ná ñayivi tachí já vaxi quivi tá candichi na nu juéxe cáhnu ta cuu cuhun na indayá saḥa.

²³ Saḥá ña cán queá tá ta ñeḥe ndó in ñaha cuahan ndó joco ndó nu ná Ndióxi ta

nani cuahan ndo can ndicuhun ini ndo ña lin in ñani táhan ndó ta co cuni táhan vaha na xihin ndo

24 Já quéa mé jan yati nu náa ndítahan jándacoo too ndo ña ñéhe ndo joco ndo jan. Ta ndítahan quee ndo cuhun ndo ndique táhan máni ndo xihin ñani táhan ndo can. Ta tá ná ndihi já cuu ndicó coo tucu ndo nu náa Ndióxi joco ndo ña najándacoo ndo jan.

25 "Tá sácú in na saha ndo cuhun ndo vecaa ta cuni na candaca na ndohó cuhun ndo nu juéxe, xini ñúhú nducú ndo nda quiahva ndique táhan máni ndo xihin ná nani nuna nu ndo caja ndo ña. Já quéa ná a ndiquiahva na can ndohó ndaha juéxe jáchi cuu ndiquiahva juéxe can ndohó ndaha na policia ta chican na ndohó vecaa.

26 Mé a ndaa cáchi i xihin ndo ña cañuhu ndo can janda quiahva ná chahvi ndo tóco ndihi jiuhún yicá ndo.

Jánaha Jesús sahá cuachi caja in dataa tá cuni da coo da xihin in ña coo cúu ñájíhí da

27 "Mé ndo sa xini ndo ña nasahnda ley Moisés chuun sanahá ta já nacachi a já: "Coto a coo ndo xihin ñájíhí á yí ñani táhan ndo."

28 Joo yehe cáchi i xihin ndo viti ña nda da sándehe in ñañaha ta cáhvi núu ini da xihin ña já quéa cómi tá cómi da cuachi nu Ndióxi jáchi cúu á tátuhun sa lin da xihin ña.

29 "Ña can quéa cáchi i xihin ndo ña tá nduchú núu cuaha ndo quéa jándacava ndohó nuu cuachi, tavá ndo ña jácana xicá ndo ña ná cuhun a jáchi vaha chága ña ná ndihi sahá in nduchú núu ndo a juú ga ña ná cuhun in ní yiquí cuñu ndo ini indayá.

30 Ta tá ndahá cuaha ndo quéa caja ña ná ndacava ndo nuu cuachi, chituhun ndo ña ta jácana xicá ndo ña ná cuhun a jáchi vaha chága ná ndihi saha ndaha ndo a juú ga ña ná cuhun ní yiquí cuñu ndo ini indayá.

Jánaha Jesús ña co ndítahan nuu dataa jándacoo da ñájíhí da

(Mt. 19:9; Mr. 10:11-12; Lc. 16:18)

31 "Ta mé ndo sa xini ndo ña nasahnda ley Moisés chuun sanahá já cáchi a já: "Ndá da cuni jándacoo ñájíhí da ndítahan cavaha da in tutu quiahva da nu ña ta sa lin vaha va cuu jándacoo da ña."

32 Joo yehe cáchi i xihin ndo viti ña ni in túhún toho ta co ndítahan jándacoo da ñájíhí da. Jáchi nda da jándacoo ñájíhí da caja da ña ná caja ña cuachi tá ná tandaha tucu ña. Jári da tandaha xihin ña cómi ri da cuachi nu Ndióxi. Joo tá ná candaa ini da ña lin ñájíhí da xihin inga dataa já quéa cuu ndusa jándacoo da ña.

Jánaha Jesús ña ndítahan caja na tá sahan na tuhun na nuu ñayivi

33 "Mé ndo sa xini ndo ña nasahnda ley Moisés chuun sanahá já cáchi a já: "Xini ñúhú jáxinu coo ndo tóco ndihi ña nasahan ndo tuhun ndo caja ndo tá tává ndo quivi Ndióxi."

34 Joo yehe cáchi i xihin ndo viti ña ná quiahva ndo tuhun ndo nuu ñayivi joo a tává ndo quivi ni in ñaha. A tává ndo quivi indivi jáchi indivi cúu nu lin coo Ndióxi.

35 Ta ni a tává ndo quivi ñundáhyi jáchi ñundáhyi cúu nu sáni mé á ta ni a tává ndo quivi ñuu Jerusalén jáchi cúu á ñuu nacaxi Ndióxi, mé á cúu á rey cáhnu ndivaha.

36 Ta ni a tává ndo quivi yiquí jini ndo tá sahan ndo tuhun ndo nuu ñayivi jáchi co ndéé ndo ndaja yaa ndo á ndaja tuún ndo ni in túhún ijí jini ndo.

37 Tá sahan ndo tuhun ndo nuu ñayivi xini ñúhú cachi ndo: "Ajan, caja i ña." Á tá coo xini ñúhú cachi ndo: "Uhun, a cuu caja i ña." Jáchi tá cachi ndo inga tuhun já caja ndo ña cuni ña quini.

Jánaha Jesús ña ndítahan caja cáhnu ini saha táhan ñayivi

(Lc. 6:29-30)

38 "Mé ndo sa xini ndo ña nasahnda ley Moisés chuun sanahá já cáchi a já: "Tá quiahva caja ñayivi xuhun quiahva já caja ri yóhó va xihin ná. Ta tá ná caní in da nduchú núu já quéa ndítahan caní mún nduchú núu da. Tá ná tavá da nuhún já ndítahan nuun tavá ri yóhó va nuhú da", cáchi ley Moisés.

39 Joo yehe cáchi i xihin ndo viti: A caja ihvi ndo xihin ñayivi, na caja núu xihin ndo. Ta nda na ná caní in xoo sajóho ndo, cata ñee ndo inga xoo sajóho ndo nu ná ña ná caní na a.

⁴⁰ Ta tá cún̄i in na candaca na ndohó cūhūn ndó nū juéxe sahá ña cún̄i na candaa na cotó ndo já quéa quiahva ndó ña nū ná ta janda cotó ndéé ndo quiahva ndó nū ná.

⁴¹ Ta tá vaxi in soldado nū ndó ta tá cahnda da chuun ña ná cojo ndó ñaha da in kilometro, xín̄i ñúhú cojo ndó ña anda ivi kilometro cūhūn ndo.

⁴² Ta ndá na ná caça in ñaha nū ndó quiahva ndó ña nū ná. Ta ndá na xíca tóo ñaha nū ndó, quiahva tóo ndó ña nū ná.

*Xín̄i ñúhú quihvi iní na co cún̄i mí
(Lc. 6:27-28, 32-36)*

⁴³ Mé ndó sa xín̄i ndo ña nasahnda ley Moisés chuun sanahá já cách̄i a já: “Quihvi iní ndó na xín̄i táhan vaaha xih̄in ndó ta candají ndó na co cún̄i táhan xih̄in ndo”, cách̄i ley Moisés.

⁴⁴ Joo yehe cách̄i i xih̄in ndo viti: Ndítahan quihvi iní ndó na co cún̄i táhan xih̄in ndó. Ta cahan vaaha ndó xih̄in na cánahá xih̄in ndó. Ta caja vaaha ndó xih̄in na cándají ndohó. Ta caça tahví ndó nū Ndióxi sahá na caja xíxi xih̄in ndo.

⁴⁵ Jách̄i xih̄in ña yóho náha ña cúu ndó jahyi Ndióxi, tátá yo, mé á íin indiví. Ta mé á caja ña ná cana candii jatá ñayivi quini xih̄in jatá ñayivi vaaha. Ta mé á jácuun javi jatá ñayivi ndaa xih̄in jatá na co caja vaaha.

⁴⁶ A cáhán ndo ña caja Ndióxi cuahá ñamaní xih̄in ndo tá quihvi iní cuití ndó na quihvi iní ndohó va jách̄i janda ñayivi quini, na jataca jiuhún cuéntá impuesto caja na já.

⁴⁷ Ta a cáhán ndo ña nacaja ndó cuahá ña vaaha tá ná cahan Ndióxi cuití ndó xih̄in ñani táhan ndó jách̄i janda ñayivi co xín̄i Ndióxi caja na já.

⁴⁸ Xín̄i ñúhú caja ndaa ndó xih̄in tóco ndihi ñayivi tá quiahva caja ndaa Ndióxi, tátá yo, mé a íin indiví —nacachi Jesús.

6

Jánaḡa Jesús ña ndítahan chindeé yo na ndahví

¹ Já nacachi tucu Jesús já:

—A ndúcú ndó caja vaaha ndó nuú ñayivi sahá ña ná cuni táhyí na ña caja ndó já candoo vaaha ndó nū ná. Jách̄i tá ná caja ndó já coo toho ñaha ñehé táhvi ndó nū Ndióxi, tátá ndo íin indiví.

² Sahá ña cán quéa tá chindeé ndó ñayivi, na ndímaní ñaha nuu, a cáca nuu ndó cahan lándā ndó ña nuú ñayivi tá quiahva cája na co cúu ná tá quiahva ndáa na. Jách̄i na cán sahan na ñaha nuú na ndahví ini veñuhu xih̄in nū táca ñayivi ích̄i já ná cuu cuni táhyí tóco ndihi ñayivi ña vaaha cája na. Jách̄i na cán cún̄i na ña ná caja cáhnu ñayivi na. Mé a ndaa cách̄i i xih̄in ndó ña sa yahvi na cúu mé ña caja cáhnu ñayivi na.

³ Ña ndítahan caja ndó tá chindeé ndó na ndímaní ñaha nuu quéa caja ndó ña ná a cándaa ini ni in ñayivi ña caja ndó

⁴ ta xín̄i ñúhú caja jehé ndó ña. Ta Ndióxi, tátá ndo sándehe a ña vaaha cája ndó xih̄in ñayivi ta mé á quéa chahvi a sahá ña caja ndó jan.

*Jánaḡa Jesús ñayivi ndaja caça tahví na nū Ndióxi
(Lc. 11:2-4)*

⁵ Tá xíca tahví ndo nū Ndióxi a caja ndó tá quiahva cája na co cúu ná tá quiahva ndáa na jách̄i cátoó na candita na veñuhu xih̄in cáyé ña caça tahví na nū Ndióxi ña ná cuni táhyí ñayivi na. Mé a ndaa ná cahan i xih̄in ndo sa yahvi na cúu mé ña xín̄i ñayivi na.

⁶ Joo ndohó, tá xíca tahví ndó nū Ndióxi, tátá ndo íin indiví ndítahan quihvi ndó ini vehe ndó ta chicaji tuun ndó yehé a ta jan cuu caça tahví jehé ndo nū Ndióxi. Jách̄i jan íin Ndióxi, tátá ndo xih̄in ndo taa joho a nū cahan ndo ta caja mé á ñamaní xih̄in ndó.

⁷ Ta tá xíca tahví ndó nū Ndióxi, a cahan tucu tucu ndó mé tuhun ña coo saha jách̄i ñayivi, na co xín̄i Ndióxi cán caja na já. Ta cáhán na taa joho Ndióxi na sahá ña cuaha cahan na joo a juú ña ndaa.

⁸ Joo a caja ndó tá quiahva cája na cán jách̄i Ndióxi, tátá ndo sa xín̄i va mé á ndá quéa xín̄i ñúhú ndo janda tá cámaní caça ndó ña nū á.

⁹ Ña yóho quéa ndítahan cachi ndó tá xíca tahví ndó nū Ndióxi:

Tátá Ndióxi, ña íin indiví,
cáhnu ná cacuu quiv̄i ndó.

¹⁰ Ná tandaa quíi quiv̄i cacomí ndó cuéntá sahá nde.

Ta ná coo tá íin cún̄i mé ndó coo ñuyiví yóho tá quiahva íin indiví caja ndó.

11 Quiahva ndó nuú nde ña ndímaní nuú nde cuxu nde in in quivi.

12 Caja cáhnu ini ndó sahá cuachi nde tá quiahva cája cáhnu ini mé nde sahá ña núu cája ñayivi xihín nde.

13 Ta a quiahva ndó ñamaní ña ná coto ndojó tiñhá saçuaḥa ndeḥe já ná a cája nde cuachi nuú ndó.

Jáchi cómí ndó cuéntá saḥa tóco ndihi ñayivi,

ta cúu cája ndó tóco ndihi ñaha,

ta cáhnu cúu mé ndó anda ama cáa quivi.

Já ná coo, quiahva já cachi ndó tá xica taḥvi ndó nuú Ndióxi.

14 Jáchi tá cája cáhnu ini ndó sahá ña núu cája inga na xihín ndo já quéa caja cáhnu ri ini Ndióxi, tátá ndo, mé a ín indiví sahá ndo.

15 Ta tá co cúni ndo caja cáhnu ini ndó sahá ña núu ñacaja inga na xihín ndó já quéa a cája cáhnu ini Ndióxi sahá cuachi cája ndó.

Jánaha Jesús ndaja ndítahan caja na tá cajuhun na

16 Tá cajuhun ndó a cája ndó tá quiahva cája na co cúu ná tá quiahva ndáa na. Na cán cúni na ña ná cuni táhyí tóco ndihi ñayivi ña xijuhun na sahá ña cán quéa cája cueḥa nuu na já ná ndiñehe jícó ñahá na. Mé a ndaa cáchí i xihín ndo ña sa yaḥvi na cúu ña xíní ñayivi na.

17 Joo ndóhó, tá ná cajuhun ndó ndítahan cuchú nuú ndo ta ndaja víí ndó mé ndó.

18 Já quéa ná a cúni ñayivi ña xijuhun ndó ta in túhún Ndióxi, tátá ndo, mé a ín tuun xihín ndó cándaḥ ini ña mé a ndaa xijuhun ndó ta mé á quéa chaḥvi a sahá ña cája ndó jan.

Indiví cúu nuú ndítahan ndaja tútu ñayivi ña vaḥa

(Lc. 12:33-34)

19 A ndúcu ndó játaca cuahá ndivaḥa ndó ña cuicá canduu nuú ndo ñuyiví yóho jáchi yóho cúu nuú quihvi tiquijí ñaha ndó jándihi rí sahá ta já tívi ndihi ñaha ndó. Ta jári cuu quihvi ta cuíhná caja cuíhná da ña.

20 Vaḥa chága ná játaca ndó ña vaḥa indiví jáchi cán coo quihvi toho tiquijí jándihi rí sahá ñaha ndó. Ta mé cán ni in ñaha coo tívi ta ni ta cuíhná a cúu ndihvi caja cuíhná.

21 Jáchi nuú ñandaja tútu ndo ña ndayahvi nuú ndó, cán coo ri ínima ndo.

Nduchú núu yo cúu á tátuhun lámpara ña jándiyehé nuú xica í

(Lc. 11:34-36)

22 Nduchú núu yo cúu á tátuhun in lámpara jándiyehé nuú yó já xíní yo nuú xica í. Ta tá tívi vaḥa nduchú núu yo já cuu candehé vaḥa í nuú xica í.

23 Joo tá coo tívi nduchú núu yó já quéa xica yó nuú naá ndivaḥa. Ta tá cáhán yo ña cúu yó na xica nuú yeḥe ndivaḥa ta cáa ví yó cája í cuachi já quéa cúu yó tátuhun na xica nuú naá ndivaḥa.

In ñaha cúu Ndióxi ta inga ñaha cúu jjuhún

(Lc. 16:13)

24 Ni in túhún ñayivi a cúu caja chúun nuú ivi xitoho na jáchi candají na in xitoho na ta inga xitoho na quihvi ini chága na. Á tá coo ta caja ndíví vaḥa na chuun nuú in xitoho na ta inga na cán a cája chúun vaḥa na nuu. Ta quiahva já ín ri xihín ndóhó va jáchi a cúu caja cáhnu ndó Ndióxi tá chínúu ndó ínima ndó jatá jjuhún ndo.

Ndaá Ndióxi na cúu cuéntá mé á

(Lc. 12:22-31)

25 Candehé ndo ña cáhan i xihín ndó yóho: A ndícani ini ndó sahá ña cuxu ndó ta ni sahá ña coho ndó ña catacu ndó in in quivi. Ta ni a ndícani ini ndó saḥa jáhma candixi ndó. Jáchi tá tácu ndo, ña jan cúu ña cáhnu chága a juú ga ña cuxu ndó. Ta ín chága saḥa yiquí cuñu ndó a juú ga jáhma ndíxi ndó jan.

26 Candehé ndó laa ndáchí nuú táchi jan: rí jan ni coo xútu rí ta ni a vája sahan rí jáquee rí ta ni coo yáca rí nuú táan vaḥa rí nuní rí. Ta Ndióxi, tátá ndo, mé a ín indiví sahan ña xíxi rí jan nuú rí. Á coo xíní ndó ña ín chága saḥa mé ndó a juú ga laa cán. Sahá ña cán quéa quiahva mé á ña xíní ñúhú ndó catacu ndó.

27 Ta coo saḥa toho ña ndícani nahá ini ndó jáchi a cúu ndaja jícó ndó mé ndó java metro chága sahá ña ndícani ini ndó.

28 Ta ni coo ndítahan ndícani ini ndó saḥa jáhma candixi ndó. Candehé ndo ndá quiahva ndató sahnú itá yucu. Mé ita jan ni coo cája chúun a ta ni coo cávaḥa jáhma á.

²⁹ Joo mé a ndaa ná cahan i xihin ndo ña ñúchí chága ita yóho naca ja Ndióxi a juú ga jáhma vaha ndivaha nasandixi rey Salomón sanahá, da nasahiin cuahá ñaha cuicá.

³⁰ Candehé ndó ndaja ndaa vaha Ndióxi yucu ita vatí in too a viti ta itaan cáyi a jándihi sahá. Ndaja ga ví caja Ndióxi xihin ndóhó ña quiahva mé á tóco ndihi ña xíní ñúhú ndó catacu ndó. Joo mé ndó co cándúsa ndó ña candaa mé á ndohó.

³¹ Ña cán quéa a ndícani ini ndó saha ndá ña cuxu ndó á sahá ña coho ndó á sahá ña candixi ndó.

³² Jáchi na co xini íchi cuéntá Ndióxi, na cán cúu na ndícani cuahá ini saha tóco ndihi ña yóho. Joo cúu ndó cuéntá Ndióxi, tátá ndo in indivi ta xini vaha mé á ña ndímani nu ndó catacu ndó.

³³ Joo ndítahan nu ndó ndiquiahva ndó mé ndó ndáha Ndióxi ña ná cacomí mé á cuéntá saha ndó ta já quiahva mé á ña ndímani nu ndo catacu ndó.

³⁴ A ndícani ini ndó sahá ña quixi nu ndó inga quivi itaan jáchi Ndióxi cuití va xini a ndía vaxi nu ndó quivi itaan ta coo sahá ndicani ini ndó sahá ña ndoho ndó itaan.

7

Co ndítahan candehé ndaa yó ñayivi (Lc. 6:37-38, 41-42)

¹ 'A candehé ndaa ndó ñayivi já ná a candehé ndaa Ndióxi ndohó.

² Jáchi tá quiahva cája ndó xihín inga ñayivi quiahva já caja ri Ndióxi xihín ndóhó va. Sahá ña cán quéa tá quiahva sándehe ndaa ndó ñayivi quiahva já caja ri Ndióxi xihín mé ndó.

³ Jáchi ndá cuéntá quéa sándehe ndó ña núu cája ñani táhan ndó ta co sándehe ndo ndá quiahva náhnu chága ña núu cája mé ndó. Cúu á tátuhun ndácaan in xehé loho nduchú núu ñani táhan ndó nani ndácaan in yito ndúhu cáhnu ini nduchú núu ndo.

⁴ Ta tá a cuú cuni ndó yito cáhnu ndácaan ini nduchú núu mé ndó ndaja caja ndó cachi ndó xihín ñani táhan ndó: "Ñani i, ná tavá loho i xehé ndácaan nduchú núu jan."

⁵ Jándahvi ndó mé ndó xihín ña cája ndó. Xíní ñúhú tavá ndó yito cáhnu ndácaan

nduchú núu mé ndó jan já ná nuna nu ndó cuni vaha ndó já ná cuu tavá ndó xehé loho ndácaan nduchú núu ñani táhan ndó.

⁶ 'A quiahva ndó ña yii cuéntá Ndióxi nuú ñayivi quini. Jáchi tá cája ndó já cúu á tátuhun tá ná quiahva ndó ñaha yii nuú tina ta tiahva náá ndicó coo rí tiin rí ndohó. Ta jári cúu á tátuhun tá ná quiahva ndó ñaha yahvi ndivaha tátuhun perla nu cóchí jáchi cuu cuani nihni rí ña.

Ndaja caja í cacá í ñamani nu Ndióxi (Lc. 11:9-13; 6:31)

⁷ 'Ndá ñaha ndímani nu ndó xíní ñúhú cacá ndó ña nu Ndióxi ta já quiahva mé á ña nu ndo. Ndinducú ndó ña cúni ndo ta ñehé ndó ña caja Ndióxi. Cúu á tátuhun catí ndáha ndo yéhe ta já nuna yéhe nu ndo.

⁸ Jáchi na xíca in ñaha, na cán cúu na ñehé va. Ta na ndúcú ñaha, na cán cúu na ndíñehé ña. Ta na catí ndáha yéhe, na cán cúu na ndínuna yéhe nuu.

⁹ 'Ta ndá ndó, na ndúu jahyi ta tá xíca jahyi ndó pan cuxu a nu ndo, ama cuéhe ri ndó quiahva ndó yuu nu á ña ná caxi a.

¹⁰ Ta ama ná quiahva ri ndó in coo nu á caxi tá xíca tiyacá nu ndó cuxu a. Co cája ndó já.

¹¹ Candehé ndó. Vatí mé ndó cúu ndó ñayivi cája cuachi joo xini vaha ndó quiahva ndó ña vaha nuú jahyi ndó. Ndaja ga ví caja Ndióxi, tátá ndo, mé a in indivi xihín ndo. Quiahva mé á ña vaha nu ndo tá ná cacá ndó ña nu mé á.

¹² 'Candehé ndó. Tá quiahva cúni ndó caja ñayivi xihín ndo quiahva já ndítahan caja ri ndóhó va xihín ná jáchi ña yóho quéa sáhdá ley Moisés xihín ña nacañyí na profeta caja ndó.

Yéhe táhan cúu nuú quihvi na cuhun indivi (Lc. 13:24)

¹³ 'Cúu á tátuhun in ivi yéhe. In yéhe cúu á ña táhan ndivaha ta xíní ñúhú ndinducú ndó ndihvi ndó cán. Jáchi inga yéhe cúu á ña ndíca ndivaha nuú ndihvi na cuhun indayá. Ta cuahá ndivaha ñayivi cúu na xíca íchi ndíca cuahan na indayá nuú ndihi saha ná.

¹⁴ Joo ña cúu íchi ña ndáca ñayivi yéhe táhan nu ndihvi na indivi cúu á íchi táhan

ndivaha ta yáncá ndivaha caca nuu í nu á. Ta chá ndivaha cúu na ndíhvi cán.

Xihín cuihi cúun nuú in yító cuu ndicuni ndá yító cúu dó

(Lc. 6:43-44)

¹⁵ Cuéntá coo ndó xihín na tuhún, na cáchí cáhan na cuéntá Ndióxi jan. Jáchi uun ndivaha cásaá na nu ndo. Joo cúu ná tátuhun ndivahyí quini ndivaha vatí náha na tátuhun ndicachi loho.

¹⁶ Cúu ndicuni ndó na xihín ña cája na. Jáchi ñayivi quini co cája vaha toho na. Cúu á tátuhun tá a cuú cuun uva nuú tohíñú ta ni a cuú jáquee ndó titó ñuhú nuú tohíñú.

¹⁷ Ña cán quéa tóco ndihi yitó vaha ndinuhu cuihi vaha cuití cúun nu do. Joo yitó quini ndinuhu cuihi quini cuití cúun nu do.

¹⁸ Dó cúu yitó vaha cán a cúu toho cana cuihi quini nu do ta ni yitó quini cán a cúu cuun cuihi vaha nu do.

¹⁹ Ta tóco ndihi yító, dó co cána cuihi vaha nuu, tahnda do ta quee dó nu cándaha ñuhu ña cayi do.

²⁰ Sahá ña cán quéa xihín ña cája ñayivi já cuu ndicuni ndó á cúu ná ñayivi vaha á cúu ná na quini.

A juú ndihi toho ñayivi ndihvi na nuú cacomí Ndióxi cuéntá saha ná

(Lc. 13:25-27)

²¹ A juú ndihi toho na cáchí cúu yehe xitoho na cuhun na nuú cacomí Ndióxi cuéntá saha ná. Na cája ña sáhdá Ndióxi, tátá i, mé a in indivi na cán cuití cúu na cacomí mé á cuéntá saha.

²² Jáchi tá ná xinu coo quivi caja vii Ndióxi sahá ñayivi já quéa casahá cahan cuahá ndivaha ñayivi xihín i ta já cachi na já: “Jesús, mé ndó cúu xitoho nde ta xihín quivi mé ndó naxica nuu nde cáhan nde tuhun Ndióxi xihín ñayivi ta xihín quivi mé ndó natavá nde rí quini nasañuhu ínima ñayivi ta xihín quivi mé ndó nacaja cuahá ndivaha nde ña xituhún”, cachi na xihín i.

²³ Ta anda já nducú ñehe e tuhun nu ná já cachi i já xihín ná: “Co xini toho i yo cúu ndóhó. Caxoo ndó nuú i jáchi ndinuhu ña quini cája ndó”, cachi i xihín ná.

Sácú Jesús quiahva sahá ivi da nacavaha vehe

(Mr. 1:22; Lc. 6:47-49)

²⁴ Ndá na xini johó ña cáhan i ta cája na ña, na cán cúu ná tátuhun in dataa, da in xini túni ta nacavaha da vehe da jata in tóto.

²⁵ Ta tá naxinu javi já nasahnu yuta ta naxinu tachí quini jatá vehe cán joo coo nandicava vehe da jáchi tóyí cándichi vehe da jata tóto cán.

²⁶ Joo na xini johó nu cáhan i ta co cája na ña, na cán cúu ná tátuhun in dataa, da co xini túni ta nacavaha da vehe da nuú ñuti.

²⁷ Tá nandihí já naxinu javi já nasahnu yuta ta naxinu tachí quini jatá vehe cán. Anda já nandicava vehe da ta chí nandihí saha chí uun —nacachi Jesús jánaña ñayivi.

²⁸ Ta tá nandihí nacahan Jesús ña yóho já tóco ndihi ñayivi nacatontó na xini johó na ndá quiahva jánaña mé á

²⁹ jáchi tá jánaña mé á nu ná cáhan tá quiahva cáhan in da in saha cahnda chuun ta co cáhan toho a tá quiahva cája na jánaña ley Moisés.

8

Tá ndajaja vaha Jesús in da ndóho cuehe táhyi

(Mr. 1:40-45; Lc. 5:12-16)

¹ Tá nanuu Jesús jata yucu nuú nasanúu a cán já ndico cuahá ndivaha ñayivi jatá cuahan.

² Ta ndaja coo já nacayati in dataa, da ndóho cuehe táhyi nu á. Ta já nacaxítí da nu á já nacachi da já xihín á:

—Cuu ndaja vaha ndó yehe, xitoho i tá cúni ndó —nacachi da xihín Jesús.

³ Tá nandihí já nacani ndaa ndáha Jesús da já nacachi a já xihín dá:

—Cúni ña ná ndivahún ña cán quéa nandivahún viti —cáchi a xihín dá.

Tá nacachi Jesús já chí ivi laá nandindaa cuehe táhyi nandoho da cán.

⁴ Anda já nacachi Jesús já xihín dá:

—Candehé. A cáxi tuhun tohún ña yóho xihín ni in túhún ñayivi. Cuahán ndacún nahun mún nuú jutu. Ta ndítahan jócún ñaha nu Ndióxi tátuhun sáhdá ley Moisés sanahá caja na sa nandivaha. Já ná candaa ini tóco ndihi ñayivi ña sa nandindaa va cuehe nasandohún —nacachi Jesús xihín da cán.

Tá nandaja vaha Jesús in da cajú chuun nuú in jefe soldado

(Lc. 7:1-10)

⁵ Tá nandihvi Jesús ñuu Capernaum já nacayati in da sáhdá chuun nuú soldado naquixi ñuu Roma nu Jesús jáchi cúní da caca da in ñamaní nu á.

⁶ Já nacachi da já xihín á:

—Á co cúní ndó cajú ndó ñamaní ndaja vaha ndó mozo i, datacú jáchi cándúhu da vehe quíhvi da naxihí tuchu yiquí cuñu da ta a juú quiahva cáhivi yiquí cuñu da — nacachi da cán xihín Jesús.

⁷ Já nacachi Jesús já xihín dá:

—Vaha va, cuhun i ndaja vaha i da — nacachi Jesús.

⁸ Anda já nacachi tucu da sáhdá chuun nuú soldado cán já xihín Jesús:

—Candehé ndó. Coó saha toho yehe ña ná ndihvi ndó vehe e. Joo cahnda cuití ndó chuun janda nu íin ndó yóho ta já ndivaha va mozo i.

⁹ Jáchi ndúu java na náhnu chága sáhdá chuun nuú i. Ta ndúu ri soldado sáhdá ri yehe va chuun nuu. Ta tá chindahá i in da ña ná cuhun da nu cúní mí i cuhun da ta cuahan da. Ta tá sáhdá i chuun nuú inga da ña ná quixi da nuú i ta vaxi da nuú i. Ta tá sáhdá i chuun nu mozo i ña ná cajú da ña sáhdá i ta cajú da ña —nacachi da cán.

¹⁰ Tá naxini johó Jesús ña yóho já nacatontó a já nacachi a já xihín na ndico cuahan cán:

—Mé a ndaa ná cahan i xihín ndo ña a ñaha cuni i tañu na Israel in da cándéé cáhnu nahá ini Ndióxi tá quiahva cándéé cáhnu ini da yóho Ndióxi.

¹¹ Candehé ndo ná cahan i xihín ndo ña quixi ñayivi ndijáá ní cúu saha ñuyívi ta cacoo na cuxu na xihín Abraham ta xihín Isaac ta xihín Jacob indiví nu íin Ndióxi cómí a cuénta sahá ñayivi.

¹² Joo cuahá na Israel, na nanditahan nuu coo cán a cóo toho na cán. Ña cajú Ndióxi xihín na cán quéa cuita na jata véhe cuhun na nuú naá ndivaha. Ta cán cuacu ndivaha na janda quiahva chicáhña mé nuhu ná —cáchi Jesús.

¹³ Tá nandihí já nacahan tucu Jesús xihín da sáhdá chuun nuú soldado cán já nacachi a já xihín dá:

—Cuanúhu vehún. Nandivaha mosún tá quiahva cúnun jáchi nacandúsún yehe — nacachi Jesús xihín dá.

Chí mé hora já nandivaha mozo da cán.

Tá nandaja vaha Jesús ña cúu xojo Pedro
(Mr. 1:29-31; Lc. 4:38-39)

¹⁴ Nasahan Jesús vehe Pedro ta tá naxinu a cán cándúhu ña cúu xojo Pedro quíhvi ña jáchi chícaan cáhni ndeé ña.

¹⁵ Anda já natiin Jesús ndáha ña quíhvi cán ta chí nandindaa cáhni ña. Ta já nandacoo ña cán cajú ndívi ña nu ná.

Tá nandaja vaha Jesús cuahá ndivaha na quíhvi

(Mr. 1:32-34; Lc. 4:40-41)

¹⁶ Ta tá nacuaá já ñehe cuahá ndivaha na na quíhvi xihín na ñúhu ínimá quini ini nuú Jesús. Ta xihín in túhún tuhun nacahan mé á natavá ínimá quini ñúhu ínimá ñayivi ta jári nandaja vaha mé á tóco ndihí na quíhvi.

¹⁷ Ta tóco ndihí ña yóho nayaha já ná xinu coo nuú tuhun ña nacahyí profeta Isaías tá nacachi da já: “Mé á nandiquehe ndihí a ña cávitá iní ta naxojo ndihí a cuehe yo”, cáchi tuhun Ndióxi.

Na cúní candico Jesús

(Lc. 9:57-62)

¹⁸ Tá naxini Jesús ña a juú quiahva cándihí táhan ñayivi ndúu na xihín á já nasahnda chuun ña ná cojo cava na inga xoo tañuhú cán.

¹⁹ Joo nacayati in da jánaha ley Moisés nu á já nacachi da já xihín á:

—Maestro, cúní candico i ndohó ndá nacuu nuú cuhun ndo —nacachi da xihín á.

²⁰ Já nanducú ñehe Jesús tuhun nu dá já nacachi a já xihín dá:

—Ndicuii cúu rí ta vañi íin cava ñúhu rí. Ta laa cúu rí ta vañi íin táca ñúhu rí. Joo yehe, da nachindahá Ndióxi nduu ñayivi, chí ni nuú cuju mí i coó va —nacachi Jesús xihín dá.

²¹ Ta inga da sa xíca xihín á nacachi da já xihín á:

—Maestro, quiahva jihna ndó ñamaní nuú i ña ná cuhun i jánduxu tátá i já quixi i candico i ndohó —nacachi da xihín á.

²² Já nacachi Jesús já xihín dá:

—Xíni ñúhú candicún yehe viti jáchi ná cuhun mé ñayivi, na a ñáha cacu ndaa ínima jánduxu na ndii jan —ñacachi Jesús xihín dá.

Tá najácatáji Jesús tachí xihín tañuhú tá ndícojo do

(Mr. 4:35-41; Lc. 8:22-25)

²³ Ta ndaja coo ñaquihvi Jesús ini in barco ta cátahan na xíca tuun xihín á cán cuahan na.

²⁴ Ta nani xíca na nuú tañuhú cán cuahan na ta in náá cuití ñaxinu in tachí quíni ndivaha nuú tañuhú cán. Ta a juú quiahva ndeé ñacasáhá ndícojo ticuúí cán janda quiahva nandichutú ticuúí ini barco cán. Joo cánduhu Jesús ini barco quíji va.

²⁵ Anda já ndáva na xíca tuun xihín á cán ñasahan na ndíñehe na ña. Já ñacayuhú na já cáchi na xihín á:

—Chindeé ndó ndehe, xitoho nde. Jáchi cácoo barco cahá tañuhú cuahan do —ñacachi na xihín á.

²⁶ Anda já nanducú ñehe Jesús tuhun nu ná já ñacachi a já xihín ná:

—Ndá cuéntá quea yíhvi ñahá ndo. Ndá cuéntá quea co cándeé ini ndó yehe —ñacachi a.

Já nandacoo a ta jánani a tachí quíni cán xihín tañuhú cán ta já ñacatáji uun tóco ndihi a cán.

²⁷ Tá ñaxini na xíca tuun xihín á cán ña yóho já ñacatóntó na ta ñacasáhá ndáca tuhún táhan na já cáchi xihín táhan na já:

—Ta ndá da cúú dataa yóho ña janda tachí xihín tañuhú cándúsa nu cáhan da —cáchi xihín táhan na cán.

Tá ñaqueta ivi da ñúhu ínima quini ini nuú Jesús

(Mr. 5:1-20; Lc. 8:26-39)

²⁸ Tá ñaxinu coo Jesús inga xoo tañuhú cán nu ín ñundáhyi cuéntá Gadara já ñaqueta ivi da ñúhu ínima quini ini tañu nu ndúxu ndii. Ta ñacayati da nuú Jesús. Ndívi mé da ñúhu ínima quini ini yóho cúú dá tátuhun quítí, rí cuehe ndivaha. Sahá ña cán quea ni in túhún ñayivi a cuú yaha chí íchi cán.

²⁹ Tá ñaxini da Jesús já ñacasáhá da cáyuhú da nu á já cáchi da já xihín á:

—Ndá cuéntá quea vasún quihvi nuún xihín nde, Jesús, da cúú in túhún jini já jahyi Ndióxi. Á vasún jándoho yachún ini nde tá cámaní yí ndindaa tiempo ndoho ini nde —ñacachi rí quini cán xihín Jesús.

³⁰ Ta ndaja coo yati cán ñasanduu cuahá ndivaha cóchi xíxáhan rí.

³¹ Ta mé rí quini ñúhu ini ndívi dataa cán ñaxica tahví ri nu Jesús já cáchi ri já xihín á:

—Tá ta ná tavún ndehe ini da yóho, quiahva ñamani nuú nde ña ná cuhun nde ndihvi nde ini cóchi ndúu cáa —ñacachi rí xihín Jesús.

³² Anda já ñacachi Jesús já xihín rí:

—Cuahán ndó, dá já.

Chí ñaqueta rí quini cán ini ndívi dataa cán já ñasahan rí nandihvi rí ini cóchi cán. Ta chí ivi laá xínu tóco ndihi cóchi cán cuahan rí núu rí nu ndáyi yuhú tañuhú cán. Ta najáqueta nuu rí mé rí ini tañuhú chí ñacandaa rí ticuúí já ñaxihí ri.

³³ Ta chí a juú quiahva ñayihví da ndáa cóchi chí ñaxinu ndivaha da cuahan da. Ta tá ñaxinu da ñuu já ñacasáhá da ndícani da ndaja cáa ña ñayaha xihín ndívi da ñasañuhu ínima quini ini cán.

³⁴ Anda já ñaqueta tóco ndihi ñayivi ñuu cán cuahan na candehé na Jesús. Ta tá ñaxini na mé á já ñaxica tahví na nu á ña ná quee a cuhun a.

9

Tá nandaja vaha Jesús in da ñaxihí tuchu saha

(Mr. 2:1-12; Lc. 5:17-26)

¹ Tá sa ñayaha tóco ndihi ña yóho já nandaa Jesús jatá in barco ta já ñaxojo cava inga xoo tañuhú cán janda quiahva ñaxinu coo a ñuu mé á.

² Ta cán ñehe na in da quihvi, da ñaxihí tuchu saha ta cánduhu da nu yívi loho ñehe na ñacasaa na nu á. Ta tá ñaxini Jesús ndá quiahva cándeé ini da cán mé á já ñacachi a já xihín da quihvi cán:

—Candehé, jahyi a. A ndícani toho inún jáchi cája cánu ini i sahá cuachún viti —ñacachi Jesús xihín dá.

³ Java táhan da jánaha ley Moisés ñacasáhá da cáhan da já: “Mé da yóho ndája

núu da Ndióxi xihín tuhun cáhan da jáchi ni in túhún toho ñayivi a cuú caja cáhnu ini sahá cuachi.”

⁴ Joo sa ñacandaa ini Jesús ña cáhvi ini da cán sahá ña cán quéa ñandaca tuhún a da já ñacachi a já xihín dá:

—Ndá cuéntá quéa cáhvi núu ini ndó sahá yehe.

⁵ Á cáhán ndo ña ihvi chága cachi i xihín da yóho: “Ñacaja cáhnu ini i sahá cuachún viti.” Á tá coó ta cachi i xihín dá: “Cuándaco ta cuáhán.”

⁶ Candehé vaha ndo ná naha i nu ndo ña ín sahá i, da ñachindahá Ndióxi nduu ñayivi caja cáhnu ini i sahá cuachi caja ñayivi ñuyívi yóho —ñacachi Jesús xihín dá.

Tá nandihí já ñandicahan tucu a xihín da ñaxihí tuchu saha cán:

—Ta viti cáhan i xuhun cuándaco ndiquehe xito lohún ta cuanúhu vehún —ñacachi Jesús xihín dá.

⁷ Chí ivi laá ñandaco da quíhvi cán ta já ñaquee da cuanúhu dá.

⁸ Tá ñaxini ñayivi ndúu cán ña ñacaja Jesús yóho já ñayihví ña ta ñacasáhá caja cáhnu na Ndióxi sahá ña ñasahan ndée mé á nuú ñayivi ña ná cuu caja na ña xitúhún.

Tá ñacana Jesús Mateo ña caca tuun da xihín á
(Mr. 2:13-17; Lc. 5:27-32)

⁹ Tá nandihí já ñaquee Jesús cuahan ta nani xíca cuahan já ñaxini a in dataa nani Mateo, da ín coo nu sácoo da jataca jiuhún cuéntá impuesto. Ta ñacana Jesús da já ñacachi a já xihín dá:

—Naha quí candicún yehe.

Anda já ñandaca ndichi Mateo ta ñacasáhá ndíco da Jesús.

¹⁰ Tá nandihí já ín coo Jesús xíxi a vehe da cán ta cán ñaxinu coo cuahá táhan ña jataca jiuhún cuéntá impuesto xihín java ga ñayivi caja cuachi. Nasaco na xíxi na xihín Jesús ta cán ndúu coo ri ña xíca tuun xihín a cán.

¹¹ Ta tá ñaxini ña fariseo ña ndúu ña cán xíxi na xihín Jesús já ñacasáhá ña ndáca tuhún ña ña xíca tuun xihín Jesús cán já:

—Ndá cuéntá quéa xíxi xitoho ndó xihín ña jataca jiuhún cuéntá impuesto ta xihín

java ga ña caja cuachi —ñacachi ña fariseo cán.

¹² Joo tá ñaxini joho Jesús ña yóho já ñacachi a já xihín ña fariseo cán:

—Ñayivi ín vaha coo xíní ñúhú toho na da caja tátá ñahá joo ña quíhvi, ña cán cúu ña xíní ñúhú da caja tátá ñahá.

¹³ Ta yehe coo vaxi toho i cana i ña sa ín vaha. Vaxi i cana i ñayivi, ña caja cuachi ña ná jándaco na cuachi caja na. Xíní ñúhú cuhun ndo jácuaha vaha ndó ña cúní cachi tuhun Ndióxi tá cáhí a já: “Ña cúní quéa ná candahví ini ndó ñayivi jáchi vaha chága ña yóho a juú ga ña ná joco ndó quítí nuú i”, cáhí tuhun Ndióxi —cáhí Jesús xihín ná.

Cáhan Jesús ndá saha quéa cajuhun na
(Mr. 2:18-22; Lc. 5:33-39)

¹⁴ Tá nandihí ña xíca xihín Juan, da jácandúta ñayivi cán ñaxinu coo na nu Jesús. Já ñacasáhá ndáca tuhún ña mé á já ñacachi na já xihín á:

—Ndávaha coo xíjuhun toho ña xíca xihín yóho nani cuahá ndivaha xíjuhun mé nde xihín ña fariseo —ñacachi ña cán xihín Jesús.

¹⁵ Anda já ñanducú ñehe Jesús tuhun nu ná já ñacachi a já xihín ná:

—Á cáhán ndo canduu cuéha ña ndúu in vicó tándaha nani ín mé da tándaha cán xihín ná. Uhun. Jáchi cájji ini na. Joo xinu coo quívi candaa na da tándaha cán anda jávi casáhá cajuhun na. Ta cáhí i xihín ndo ña vaxi quívi candaa na yehe nuú ña yóho ta anda jávi casáhá ña xíca tuun xihín i cajuhun na —ñacachi Jesús.

¹⁶ Ta nasacu Jesús inga quiahva nu ná já cáhí a já:

—Ama ná jándaha ñayivi jahmá yatá xihín in tuhun jáhma saá jáchi tá nandihí ndíndí a, sáhdá chága ví a jahmá yatá cán ta jándacáhnu chága ví a yávi ña ñandicahmá ña cán.

¹⁷ Ta ni coo táan ña vino saá ini vóso níi yatá jáchi jáchndí mé vino cán níi ta cuíta mé vino cán ta tívi vóso níi caja dó. Sahá ña cán quéa ndítahan taán yo vino saá ini vóso níi saá ná a ndíhi saha vino xihín vóso —cáhí Jesús.

Tá nandaja vaha Jesús jahyi jhí Jairo xihín in ñá nacani ndaa ndáha jáhma á
(Mr. 5:21-43; Lc. 8:40-56)

18 Ta nani cáhan Jesús cándichi a naxinu coo in da sáhdá chuun nuú na Israel. Já nacaxítí da nu á ta já nacachi da já xihín á:

—Jacá naxihí uun ñá loho cúu jahyi jhí i joo tá ná caja ndó ñamaní quixi ndó vehe e ta chinúu ndó ndáha ndó jata ña já nditacu tucu ñá —nacachi da cán xihín Jesús.

19 Anda já naquee Jesús cuahan xihín da cán ta ndáca na xíca tuun xihín á cán cuahan na.

20 Ta ndaja coo cán íin in ñáñáha, ñá ndítahví nji ñá tixi uxu ivi cuja. Ta nacayati ñá chí jata Jesús já nacani ndaa ndáha ñá yuhú jáhma á.

21 Jáchí nacahán ña: “Tá ná cani ndaa cuití ndáha í jáhma Jesús já ndivaha í”, nacahán ña.

22 Joo nandicoto nihni jata Jesús nu ñá ta tá naxini a ñá já nacachi a já xihín ña:

—A cáyihví tohún, jahyi a. Nandivahún jáchí nacandúsún yehe —nacachi Jesús xihín ñá.

Ta chí mé hora já nandivaha ñá.

23 Ta tá naxinu coo Jesús vehe da sáhdá chuun nuú na Israel cán já naxini a ña sa ndúu música cán ña ná cuhun na jánduxu na jahyi da cán. Ta naxini a jandá johó sácu cóhó ñayivi ndúu na.

24 Ta chí já nacachi a já xihín tóco ndihi na cán:

—Cuahán queta ndó jata véhe. Jáchí coo naxihí toho ñá loho yóho. Quíji cuití va ñá —nacachi Jesús xihín ñayivi ndúu cán.

Joo nacasáhá na cán sácu ndaa ñahá na.

25 Ta chí natavá Jesús na jata véhe. Ta tá nacayati a nu ñá cán já natíin a ndáha ñá chí ivi laá nandacoo ñá.

26 Ta níí cúu ñundáhyi cán nandicuítá nuu tuhun sahá ña nacaja Jesús cán.

Tá nandaja vaha Jesús ivi da cuaá

27 Tá naquee Jesús cuahan já ndíco ivi da cuaá jata cuahan da já nacasáhá cáyuhú cóhó da já cáchí da já xihín á:

—Jesús, da naquixi chichi David caja ndó ñamaní candáhví loho ini ndó ndehe —cáchí da cáyuhú da jata Jesús.

28 Ta ndaja coo naquihvi Jesús ini in vehe ta já nacayati ndíví da cuaá cán nu á. Já nacasáhá ndáca tuhún a da cán já nacachi a já xihín dá:

—Á cáhán ndo ña cuu caja i jándiyehé nuu ndo —nacachi Jesús xihín da cán.

—Ajan, xitoho nde. Cándúsa nde ña cuu caja ndó ña —nacachi ndíví da cuaá cán xihín Jesús.

29 Tá nandihí já nacani ndaa ndáha Jesús nduchú núu da cán ta já nacachi a já xihín ndíví da cán:

—Ná coo tá quiahva cúní ndo jáchí cándeé ini ndó yehe —cáchí a.

30 Tá nandihí já nacasáhá sándehe ndíví da cuaá cán. Ta nasahnda Jesús chuun nu dá ña ná a cáxi tuhun da nuú ñayivi sahá ña nacaja mé á xihín dá.

31 Joo tá jacá naqueta uun da cán já nacasáhá da ndícani da nuú ndijáá ñayivi ndúu ñundáhyi cán sahá ña nacaja Jesús xihín dá.

Tá nandaja vaha Jesús in da níhi

32 Nani naquee da cuaá cán cuahan da já nasaa java ñayivi nu Jesús ñéhe na in da níhi, da ndácaan ínimá quini ini.

33 Ta tá natavá Jesús ínimá quini ini da cán chí ivi laá nacasáhá cáhan da. Ta a juú quiahva nacatóntó ñayivi ta já cáchí na já:

—Ni in túhún tañu coo naxini nde in ñaha tátuhun ña yóho ñundáhyi Israel —nacachi na cán.

34 Joo na fariseo cán nacasáhá cáchí na já:

—Rí cúu tiñhá saquaha nu rí quini sáhan rí ndeé rí nuú Jesús yóho ña ná tavá a ínimá quini ini ñayivi —nacachi na fariseo cán.

Táhdá ini Jesús sahá ñayivi

35 Ndijáá ñuu náhnu xihín ñuu válí naxica nuu Jesús jánaha tuhun Ndióxi ini veñuhu na cán. Ta nacaxi tuhun a tuhun vaha xihín ñayivi ña sa nacayati quiví cacomí Ndióxi cuéntá sahá ná. Ta nandaja vaha mé á tá nuú cuehe ndóho ñayivi.

36 Ta tá naxini Jesús ñayivi cuaha cán já natahví ini a sahá ná jáchí ndóho ini na ta cávitá ini na tátuhun ndicachi, rí coo da candaa ñahá.

37 Anda já nacachi Jesús já xihín na xíca tuun xihín a cán:

—Mé á ndaa ndúu cuahá ndivaha ñayivi, na cúní cuni johó tuhun Ndióxi joo chá cuití na cúní cuhun na cahan na ña xihín ñayivi. Cúu á tátuhun ín cuahá ndivaha ní ña xíní ñúhú jáquee joo ndímaní ñayivi jáquee na ña.

³⁸ Sahá ña cán quéa xíní ñúhú caca tahví ndó nu Ndióxi ña ná chindahá mé á chága na cája chúun cuéntá mé á —cáchi Jesús xihín ná.

10

Chindahá Jesús na xíca tuun xihín á ña ná cuhun na cahan na tuhun Ndióxi xihín ñayivi (Mr. 3:13-19; Lc. 6:12-16)

¹ Tá nandíhi já nacana Jesús ndíhuxu ivi na xíca tuun xihín á cán. Ta já nasahan ndée nu ná ña ná cuu tavá na ínima quini ini ñayivi. Ta nasahan ndée nu ná ña ná ndaja vaha na tá nuú cuehe ndóho ñayivi.

² Ña yóho cúu quívi ndíhuxu ivi na cúu apóstol xíca tuun xihín á cán: Da nu cuití cán naní da Simón ta cahan ri na Pedro xihín dá. Ta inga da cán cúu Andrés ñani da. Ta inga da cúu Jacobo xihín ñani da, Juan. Ndívi da yóho cúu dá jahyi Zebedeo.

³ Tañu na cán ndácaan ri Felipe xihín Bartolomé xihín Tomás xihín Mateo, da najátaca jühún cuéntá impuesto. Ta cán ndácaan ri Jacobo, da cúu jahyi Alfeo xihín Lebeo, da cahan ri na Tadeo xihín.

⁴ Ta cán ndácaan ri Simón, da naxíca cuéntá na cananista xihín Judas Iscariote, mé da najicó tuhún Jesús tá nu ndíhí cán.

⁵ Tá nachindahá Jesús ndíhuxu ivi na cán já nacachi a já xihín ná:

—Coto a cuhun ndó chí ñuu ñayivi tóho, na co cúu na Israel. Ta ni a quíhvi ndó ñuu ñúhu chí estado Samaria.

⁶ Vaha chága ná cuhun ndó cahan ndó tuhun Ndióxi xihín na Israel jáchi cúu ná tátuhun ndicachi, rí nandíñúhú.

⁷ Cuahán ndó caxi tuhun ndó xihín ná ña sa nacayati quívi cacomí Ndióxi cuéntá sahá ñayivi.

⁸ Ta ndaja vaha ndó na quíhvi ta jánditacu ndó ndii ta ndaja vaha ndó na ndóho cuehe táhyi. Ta tavá ndó rí quini ñúhu ínima ñayivi. Ta a quéhe ndó yahvi sahá ña cája ndó jáchi coo naxeen ndó ndée ñéhe ndó jan.

⁹ A cañehe toho ndó ni jühun cuáán ni jühun cúxú ni jühún caa cuahá caca nuu ndó.

¹⁰ Ta ni a cañehe ndó yátí cuhun ndó íchi. Ta ni a cañehe ndó inga naha jáhma ndó cuhun xihín ndó. Ta ni a cañehe ndó inga ndusa ndó cuhun ndó. Ta ni garróte a cañehe ndó cuhun ndó. Jáchi nditahan nuú ñayivi quiahva na ña nu ndó.

¹¹ Tá ná xinu coo ndó in ñuu cáhnu á ñuu loho, xini ñúhú ndínducú ndó in ñayivi, na cuu candeé ini ndó ta vehe na jan canduu ndó janda quiahva ná xinu quívi quee ndó cuhun ndó.

¹² Ta tá ná xinu coo ndó vehe jan cahan Ndióxi ndó xihín ná.

¹³ Ta tá ná ndiquehe vaha ñayivi vehe jan ndohó já quéa cachi ndó xihín ná ña ná coo vaha ini na. Joo tá co cúní na ndiquehe vaha na ndohó já quéa a cahan ndó xihín ná ña ná coo vaha ini na.

¹⁴ Ta tá co cúní na ndiquehe vaha na ndohó ta ni co cúní na cuni johó na nu cahan ndó já quéa cuahán queta ndó vehe jan á ñuu jan ta catí ndó ña yácá saha ndó já ná naha ña cuahan cuachí na cán jatá mé va na.

¹⁵ Jáchi mé a ndaa ná cahan i xihín ndó ña tá ná xinu coo quívi caja víi Ndióxi sahá ñayivi ndúu ñuyíví já quéa jándoho chága Ndióxi ini ñayivi ñuu jan a juú ga tá quiahva najándoho a ini na ñuu Sodoma xihín ñuu Gomorra sanahá sahá ña coo nandiquehe na ndohó.

Vaxi quívi caja xíxi ñayivi xihín na xíca cahan tuhun Ndióxi

¹⁶ Candehé ndó. Yehe chindahá i ndohó cuhun ndó tañu ñayivi quini. Cúu ndó tátuhun ndicachi válí tañu ndivahyí ña cán quéa xíní ñúhú cuéntá vaha coo ndó tá quiahva cája coo. Ta xíní ñúhú coo mánsó ndó tá quiahva cája ndijata.

¹⁷ Cuéntá coo ndó jáchi tiin na ndohó ta ndiquiahva na ndohó ndahá na jutixia. Ta caní na ndohó ini veñuhu.

¹⁸ Ta saha mí i cañehe na ndohó cuhun ndó nuú na cúu gobernador á nuú na cómí cuéntá sahá in nación. Ta já ná cuu ndicani ndó sahá i nuú na cán ta xihín nuú na tóho, na co cúu na Israel.

19 Joo a ndícani ini ndó saha ndá tuhun cahan ndó tá ná ndiquiahva ñayivi ndohó ndahá na cán. Jáchí tá ná ndindaa hora cahan ndó xihin ná já quéa quiahva mé va Ndióxi tuhun nu ndó ña ná cuu cahan ndó sahá i nuú na cán.

20 Jáchí a juú jini mé ndó quixi ña cahan ndo. Ínima yii Ndióxi cacuu ña quiahva tóco ndihi ña cahan ndo.

21 Ta java ta jicó túhún da ñani da ta java da jicó túhún da jahyi da ña ná cahní ñahá na. Ta java na ndicuita na caní táhan na xihin tátá na ña ná cahní ñahá na.

22 Ta ndaja táhan ñayivi ndúu ñuyíví yóho candají na ndohó sahá yehe. Joo ndá na ná candico tuun íchi mí i janda ná xinu quivi quivi na, na cán cacuu na cacu ndaa ínima.

23 Tá ná ndicuita na caja xíxi na xihin ndó in ñuu já cunu ndó cuhun ndó inga ñuu. Jáchí mé a ndaa ná cahan i xihin ndo ña tá sa xinu coo tucu yehe, da nachindahá Ndióxi nduu ñayivi já a ñaha caca nuu ndó ndijáá ñuu ndacaan ñundáhyi Israel.

24 Candehé ndo. Ni in túhún toho da xíca jácuaha tiaha chága da nu mé dá jánaha ñahá cán. Ta ni in túhún mozo co cúu dá da cáhnu chága nuú xitoho da.

25 In da jácuaha ndítahan cajii íni da tá sa xíni ndihi da ña xíni maestro da. Ta da cúu mozo ndítahan cajii ini da tá ná xinu da cacuu da cáhnu tátuhun xitoho da. Candehé ndo. Tá ná cachi ñayivi xihin da cúu xitoho ndó ña cúu da Beelzebú, rí cúu tiñahá sacuahá ndaja ga ví cachi na xihin ndohó.

*Yo já ndítahan cayihví yo
(Lc. 12:2-7)*

26 Candehé ndo. A cáyhví toho ndó ñayivi jáchí ni in túhún toho ñaha cája ñayivi a cúu coo jehé nahá jáchí vaxi quivi tá ndáca náha nu á. Ta vatí cahan jehé ñayivi tuhun joo vaxi quivi tá candaa ini ñayivi sahá.

27 Ña cahan yehe xihin ndó nuú naá xíni ñuhú cahan ndó ña ndiví táhyí nani yehe candii. Ta ña cahan jehé e xihin ndo xíni ñuhú ndaa ndó jini véhe cayuhú ndó ña.

28 A cáyhví toho ndó ñayivi, na cuu caja cahní yiquí cuñu ndó jáchí ni in ñaha a cúu caja na xihin ínima ndo. Ndióxi quéa xíni

ñuhú cayihví ndo jáchí mé á cuu jándihi a saha yiquí cuñu ndó ta cuu jácana mé á ínima ndo ini indayá anda ama cáa quivi.

29 Candehé ndo. Laa válí ndáchí ri nu táchi ta núu ndivaha jicó na ri. Joo ni in rí cán co cúyu nu ñuhu ña quivi rí tá co sahan Ndióxi, tátá ndó ñamaní.

30 Ta viti caja ndó cuénta xihin mé ndó. Janda iji jini ndó jan ndáhvi tá in tá in a nu Ndióxi.

31 Ña cán quéa a cáyhví toho ndó jáchí ndiyahvi chága ndo nu Ndióxi a juú ga cuahá ndivaha laa válí.

*Tá cahan cáxi ñayivi ña cúu ná cuénta
Jesús*

(Lc. 12:8-9)

32 Ndá na cáxi tuhun nuú ñayivi ña cuahan na cuénta mí i já quéa cachi mí i sahá na nu Ndióxi, tátá i, mé a íin indiví, ña mé a ndaa cúu ndusa na cán cuénta mí i.

33 Joo ndá na ná cachi xihin ñayivi ña co xíni toho na yehe já quéa ni yehe a ndícuni toho i na ña cúu ná cuénta mí i nu Ndióxi, tátá i, mé a íin indiví.

*Cája Jesús ña sáhdá java táhan ñayivi
(Lc. 12:51-53; 14:26-27)*

34 A cáhán toho ndó ña naxinu i ñuyíví yóho caja i ña ná coo vaha ini ñayivi. Co cája i já. Jáchí ña vaxi yehe caja i quéa ná cahnda java táhan na.

35 Vaxi i jácani táhan i dataa xihin tátá da sahá yehe. Ta vaxi i jácani táhan i in ñañáha xihin náná ña sahá yehe. Ta vaxi i jácani táhan i ña cúu sanu xihin xojo ña sahá yehe.

36 Ta ndaja vehe mé ñayivi ndicuita na caní táhan na sahá yehe.

37 Ta ndá na cúni chága tátá na á náná na a juú ga yehe já quéa coo saha toho na cacuu na cuénta mí i. Ta ndá na quihvi ini chága jahyi yii na á jahyi jihí na a juú ga yehe já quéa coo saha toho na cacuu na cuénta mí i.

38 Ndá na co cúni ndoho ini sahá ña candico na yehe ta co íin tiaha na quivi na sahá i já quéa coo saha toho na cacuu na cuénta mí i.

39 Jáchí ndá na catóo coo chága na ñuyíví yóho, na cán cúu na ndihi saha. Joo na sahan ndeé ini quivi sahá i, na cán cúu

na ñehe táhvi na catacu na anda ama cáa quivi.

*Ña quiahva Ndióxi nuú ñayivi
(Mr. 9:41)*

⁴⁰ Ndá na ndiquehe vaha ndohó, ndiquehe vaha ri na yehe va. Ta ndá na ndiquehe vaha yehe, ndiquehe vaha ri na Ndióxi, mé a nachindahá yehe vaxi i ñuyivi yóho.

⁴¹ Ndá na ndiquehe vaha in profeta vaxi cuénta Ndióxi já quea tá quiahva coo yahvi ndiquehe profeta cán quiahva já coo ri yahvi ndiquehe na cán. Ta ndá na ndiquehe in ta vaha sahá ña cúu dá ñayivi vaha já quea ndiquehe na cán yahvi na tá quiahva cáa yahvi ndiquehe ta vaha cán.

⁴² Ta ndá na ná quiahva ñaha vatí in yáxi ticuú nuú in na cúu jahyi i yóho sahá ña ndíco na íchi cuénta mí i, mé a ndaa ná cahan i xihin ndó ña chahvi Ndióxi sahá ñamaní cája na xihin ná —cáchi Jesús.

11

*Juan, da jácandúta ñayivi nachindahá da java da xica xihin dá nuú Jesús
(Lc. 7:18-35)*

¹ Tá nandihí nanaha Jesús nuú na xica tuun xihin á cán ña ndítahan caja na já naquee a cuahan jánaha nuú ñayivi ta cáxi tuhun a tuhun Ndióxi nuú ñayivi ndúu ñundáhyi cán.

² Mé tiempo já nasandacaan Juan vecaa, mé dá cúu dá da jácandúta ñayivi. Ta cán nañehe dá tuhun sahá ña náhnu cája Jesús. Anda já nachindahá da java na xica xihin dá nuú á

³ ña ná ndaca tuhún na Jesús á jivi ndusa cúu á Cristo, mé a chindahá Ndióxi cacomí a cuénta sahá ñayivi, á ndítahan candati na inga ga quixi.

⁴ Tá nandihí nandaca tuhún da cán Jesús sahá ña yóho já nacachi Jesús já xihin ná:

—Cuáhán ndó ndicani ndó nu Juan tóco ndihí ña naxini ndó cája i xihin tóco ndihí ña naxini johó ndó cahan i.

⁵ Ta ndicani ndó nu dá ña ndínuna nuú na cuaa ta ndícaca na réncó cája i. Ta ndaja vaha i na ndóho cuehe táhyi. Ta jándinuna i johó na johó já ná cuni johó na. Ta jánditacu

u ndii. Ta cáxi tuhun i tuhun Ndióxi nuú na ndahví já ná cuu cacu ndaa ínima ná.

⁶ Tahví nacuu na co jándacoo ña candeé ini na yehe —nacachi Jesús.

⁷ Tá naquee na nachindahá Juan cán cuahan na já nacasáhá Jesús cahan xihin ñayivi já cáchi a já xihin ná:

—Ndía nacahan ndo cuni ndó tá naqueta ndó nasahan ndó sánehé ndo Juan yucú íchí cán. A juú da cán cúu ta láhá já quíji nuu da tátuhun quíji nuu in tóyocó cája tachí.

⁸ Ndía naqueta ndó candehe ndó. A juú da cán cúu ta ndíxi jahmá lándá ndivaha. Sa xini vaha ndó ña co ndúu toho da ndíxi jahmá lándá yucú íchí. Ndá da ndíxi jahmá lándá cúu da ndúu vehe rey cuití va.

⁹ Ndía nasahan ndó candehe ndó cán. A coo nasahan ndó cuni johó ndó nu cahan in da cúu profeta nu ndo. Mé a ndaa da cán cúu dá in profeta ta ín chága saha dá a juú ga inga profeta nasanduu sanahá.

¹⁰ Jáchi mé Juan cúu dá da cahan tuhun Ndióxi saha tá cáchi a já:

Chindahá i in da cánúu cuhun nu mún, já ná caja tiaha da íchi nuú quisún, já nacahyi a sanahá.

¹¹ Candehe ndo ná cahan i xihin ndo. Tañu tóco ndihí ñayivi coo ga inga profeta cáhnu chága a juú ga Juan, mé da jácandúta ñayivi. Joo ndá na sa nandiquiahva mé ndáha Ndióxi ña ná cacomí a cuénta saha ná, vatí cúu ná na coo saha, na cán cúu na cáhnu chága a juú ga Juan.

¹² Janda quivi naxinu Juan, da jácandúta ñayivi ta janda viti ñuhú ndihí ndivaha ini ñayivi ndiquiahva na mé ná ndáha Ndióxi. Ta na sahan tuhun ndeé ini, na cán cúu na ñehe táhvi cacomí Ndióxi cuénta saha.

¹³ Janda tá camani xinú Juan tóco ndihí ña nacahyi na profeta xihin ña nacahyi Moisés cahan ña vaxi quivi cacomí Ndióxi cuénta sahá ñayivi.

¹⁴ Ta tá cuni ndo candúsa ndó ña nacahyi na cán sanahá já cuu candaa ini ndó ña Juan cúu dá da nacahan na cán saha tá nacachi na ña ndítahan quixi tucu profeta Elías ñuyivi yóho.

¹⁵ Na ín johó, ná cuni johó na.

¹⁶ Ná cahan i xihin ndó ndaja ín ñayivi ndúu tiempo viti. Cúu ná tátuhun na valí

sácoo sájíquí nā nuú yahvi ta cáyuhú nā nuú java gā nā valí ndúu cán ta já cáchí nā já:

17 “Nativí nde tótíví nū ndo joo coo naxeen ndó cata sáhá ndo. Ta naxita cuéha ndivaha nde nū ndo ta ni coo nasacu ndó.”

18 Quiahva já lín ñayivi ndúu tiempo viti jáchi tá naquixi Juan, da jácandúta ñayivi ta naxijuhun da ta ni coo naxihi da vino joo nacachi ndó saha dá ña ndácaan ínima quini ini da.

19 Ta tá naxinū yehe, da nachindahá Ndióxi nduu ñayivi ta xíxi i pan ta xíhi i vino já nacasáhá cáchí ndó sahá i ña cúu u in taa ndehé ndivaha ta xíhi ndivaha i. Ta cáchí ndó ña catóo ndivaha i cacuu amigo nā cāja cuachi xihín nā jātaca jjuhún cuéntá impuesto. Joo nā cúní cándaā ini ña ndaa, nā cán cúu nā cándaā ini ña cāja Juan ta cāja ri yehe ña ndaa —nacachi Jesús xihín ná.

Ñayivi sáa ini coo cúní nā cāja na ña cúní Ndióxi
(Lc. 10:13-15)

20 Tá nandihí já nacasáhá Jesús jánani a ñayivi ndúu ndíjáá ñuu nuú nacaja cuaha chága mé á ña xitúhún. Jáchi vatí nacaja cuaha mé á ña xitúhún nū ná coo nandicó coo ini na nū Ndióxi. Ña cán quéa nacachi Jesús já xihín ná:

21 —Ndáhví nahá nacuu ndó, nā ñuu Corazín. Ta ndáhví nahá nacuu ndó, nā ñuu Betsaida. Cuaha ndivaha ña náhnu nacaja i nū ndo joo coo naxeen ndó ndicó coo ini ndó jándacoo ndó cuachi ndó. Sanahá najándihí Ndióxi sahá ñuu Tiro xihín sahá ñuu Sidón sahá cuachi na. Tá ná sahan i cāja i ña náhnu nuú nā cán tá quiahva nacaja i nū mé ndó, sa najándacoo va na cán cuachi na, nduu. Ta chí ivi laá ndaca ndixi na jahmá ndii ta jácuyu na yaa yiquí jíní nā, nduu. Jáchi xihín ña yóho jánahā nā ña nandicó coo ini na sahá cuachi na.

22 Mé a ndaa ná cahan i xihín ndo tá ná xinu quiví cāja víi Ndióxi sahá ñayivi já ndoho chága ini mé ndó, nā ñuu jan a juú ga tá quiahva nandoho ini ñayivi nasanduu ñuu Tiro xihín ñuu Sidón sanahá.

23 Ta viti cahan i xihín ndó, nā ndúu ñuu Capernaum. Janda indivi cúní ndó cuhun ndó joo sahá ña sáa ini ndó cuhun ndó janda indayá, cāja Ndióxi. Jáchi tá ná cāja

i ña xitúhún nuú ñayivi ñuu Sodoma tá quiahva nacaja i nū ndóhó ta ni a ndihi sahá ñuu cán, nduu.

24 Mé a ndaa ná cahan i xihín ndo ña tá ná xinu quiví cāja víi Ndióxi sahá ñayivi já ndoho chága ini mé ndó, nā ñuu jan a juú ga tá quiahva nandoho ini ñayivi nasanduu ñuu Sodoma sanahá —nacachi Jesús.

Tá nacajii ndivaha ini Jesús
(Lc. 10:21-22)

25 Mé tiempo cán nacahan Jesús já nacachi a já:

—Cāja cáhnu i ndohó, tátá Ndióxi, ña cúu xitoho tóco ndihi ñaha ndúu indivi xihín ñuyiví. Jáchi najánaaha ndó ña ndichí ndivaha nuú ñayivi, nā coo cuaha saha nuú java gā nā. Ta nacaja ndó ña ná a cúu cándaā ini nā ndichí xihín nā tácu ini ñaha mé ndó.

26 Já nacaja ndó jáchi já nasacu ini ndó cāja ndó —nacachi Jesús.

27 Anda já nacachi a já xihín nā ndúu cán:

—Nandiquiahva tátá i tóco ndihi ñaha ndahá i ña ná cacomí i cuéntá sahá. Ta ni in túhún toho ñayivi coo xini vaha na yehe, da cúu in túhún jini já jahyi Ndióxi. Mé Ndióxi, tátá i cuití va xini vaha yehe. Ta ni in túhún toho nā coo xini vaha na yo cúu tátá i. In túhún yehe, da cúu jahyi a xini vaha i yo cúu mé á. Ta yehe cúu da caxi ndá ñayivi jánahā i nuu sahá Ndióxi, tátá i já ná cándaā vaha ini na yo cúu mé á.

28 Naha ndihi ndó nuú i, nā sa nacanaá cāja chúun. Taxi ndó ña ndójo ndó jan nuú i ta já yehe cāja i ña ná ndiquehe ndée ndo.

29 Yehe cúní ña ná ndiquiahva ndó mé ndó ndahá i. Ta ña yóho cúu á tátuhun in yúcu chínúu na sahá jiqui tindiQUI. Ta xini ñuhú catiahva ndó cāja ndó tá quiahva cāja yehe. Jáchi coo cama jini i xihín ñayivi ta cúu u taa manso ndivaha. Quiahva já cāja ndó já ñehe iní ndo ndiquehe ndée ndo.

30 Jáchi yúcu chínúu i jata ndo xihín ñaha jácojo i jata ndo cúu á ña cama ñuhú laá —nacachi Jesús.

12

Ña nacaja na xica tuun xihín Jesús in quivi ndiquehe ndée ñayivi
(Mr. 2:23-28; Lc. 6:1-5)

1 Ta ndaja coo in quivi ndíquehe ndée ñayivi xíca Jesús cuahan tañu nuú naxutu na trigo. Ta sahá ña cuíco na xíca tuun xihín Jesús sahá ña cán quéa ñacasáhá na túhún na java yucu jini trigo cán ta tává na trigo sáxí na.

2 Tá naxini na fariseo ña yóho já ñacasáhá na cáhan cuachí na nuú Jesús. Já cáchí na já:

—Candehé. Na xíca tuun xuhun jan cája na chuun ña co ndítahan caja ñayivi quivi ndíquehe ndée yo —ñacachi na xihín Jesús.

3 Já nanducú ñehe Jesús tuhun nu ná já ñacachi a já xihín ná:

—Á a ñáha toho cahvi ndó nuú tuhun Ndióxi nu cáhan sahá ña ñacaja David sanahá tá ñacuico da xihín na xíca xihín dá.

4 Ña ñacaja da quéa ñaquihvi da ini veñuhu Ndióxi ta naxixi da pan ña yii. Ta ni nu mé dá ta ni nuú na xíca xihín dá cán co cáni a nuú cuxu na pan cán. In túhún jutú cuití va cáni a nuú cuxu na pan cán.

5 Ta á a ñáha toho cahvi ndó ña ñacahyí Moisés nu ley tá ñacahyí da ña co cája toho jutú cuachi nu Ndióxi vatí cája chúun da veñuhu quivi ndíquehe ndée ñayivi.

6 Mé a ndaa ná cahan i xihín ndo ña íin chága sahá i, da cándichi yóho a juú ga sahá veñuhu nu cája cáhnu na Ndióxi jan.

7 Mé ndó co cándaa toho ini ndó ña cúní cachi tuhun Ndióxi tá cáchí a já: “Yehe cúní ña ná candahví ini ndó ñayivi jáchi vaha chága ña yóho a juú ga ña ná joco ndó quítí nuú i”, cáchí tuhun Ndióxi. Jáchi tá ná cándaa ini ndó tuhun yóho, nduu ta a chícaan toho ndó cuachi jatá ñayivi, na coo cuachi.

8 Candehé ndó. Yehe, da ñachindahá Ndióxi nduu ñayivi, íin sahá i cahnda i chuun sahá quivi ndíquehe ndée ñayivi —ñacachi Jesús.

Tá nandaja vaha Jesús in da nahichi ndáha

(Mr. 3:1-6; Lc. 6:6-11)

9 Tá nandihí já ñaquee Jesús cuahan já nandihví a veñuhu mé ñuu cán.

10 Ta cán nasandacaan in dataa, da nahichi ndáha. Ta sahá ña ndúcú na fariseo ndúu cán ndá quiahva caja na já ná cuu chicaan na cuachi jatá Jesús sahá ña cán

quéa nandaca tuhún na mé á já ñacachi na já:

—Á sahan Ndióxi ñamaní ndaja vahún na quihvi quivi ndíquehe ndée yo —ñacachi na cán xihín á.

11 Anda já ñacachi Jesús já xihín ná:

—Candehé ndó. Tá íin in ndicachi loho jana ndo ta tá ná ndicava rí ini in táhvi quivi ndíquehe ndée yo, ama ná a cühun ndó tavá ndó rí.

12 Ta ndíyahvi chága ñayivi a juú ga ndicachi. Ña cán quéa sahan Ndióxi ñamaní cája í ña vaha quivi ndíquehe ndée yo —ñacachi Jesús xihín ná.

13 Tá nandihí ñacachi a já xihín dataa, da nahichi ndáha cán já:

—Jándacaa ndáhun —ñacachi a xihín dá.

Tá najándacaa da ndáha dá já nandivaha ndáha dá. Ta cáa tá quiahva cáa inga ndáha da cán.

14 Joo tá ñaqueta na fariseo cán já ñacasáhá na jándique táhan na tuhun na ña cahni na Jesús.

Ña cáhan Isaías sahá Jesús

15 Tá ñañehe Jesús tuhun ña ndúcú na cán cahni ñahá na já ñaquee a cuahan va ta cuahá ndivaha ñayivi ndíco jatá cuahan. Ta ndaja táhan na quihvi nandaja vaha Jesús.

16 Ta ñasahnda Jesús chuun nuú na sa nandivaha cán ña ná a cáxi tuhun na nuú ñayivi yo cúu mé á.

17 Tóco ndihí ña yóho ñayaha já ná xinu coo nuú tuhun ñacahyí profeta Isaías tá ñacahyí da já:

18 Yóho íin da cája chúun cuénta mí i, mé dá ñacaxi i.

Quihvi ndivaha ini i da ta cájii íni i xihín ña cája da.

Ta jáchutu ndaa i ínimá dá xihín ínimá yii mí i, ña ná jánaha da nuú ñayivi ndúu ñuyíví ndá quiahva cája víi i saha ná.

19 Ta ni a cáhan cuachi toho da ta ni a cáyuhú cóhó da,

já quéa a cúní johó ñayivi xíca cállé nu cáhan da.

20 Tá quiahva a jácuachi toho da ndoo, dó sa natahnu,

quiahva já a jácuachi toho da ñayivi, na cávitá ini.

Ta quiahva já ni a ndáhvá toho da tití ñúhu loho, ña sa cúni ndahva janda quiahva ná quee vaha ña ndaa xihín ña ihvi.

²¹ Ta ndaja táhan ñayivi ndúu ní cúu ñuyíví tandaa candee ini na mé dá, nacahyí Isaías sanahá.

Jácojo na cuachi jatá Jesús ña cája chúun a xihín ndée tiñáhá sacuahá

(Mr. 3:20-30; Lc. 11:14-23; 12:10)

²² Java ñayivi ñéhe na in da cuaá ta cúu dá da níhi jáchi ndácaan rí quini ini da. Ta tá nandaja vaha Jesús da já nasandehé da ta nandicañan da.

²³ Tá naxini ñayivi ndúu cán ña yóho já nacatontó ndivaha na já nacasáhá ndáca tuhún táhan na já cáchí na já:

—Á a juú da yóho cúu da naquixi chichi rey David —cáchi xihín táhan na.

²⁴ Tá naxini johó na fariseo ña cáhan ñayivi cán já nacasáhá cáchí mé na fariseo cán já:

—Taa yóho cúu tává da rí quini ñúhu ini ñayivi jáchi mé Beelzebú, rí cúu tiñáhá sacuahá nu rí quini cán sahan rí ndée rí nu dá cája da ña —nacachi na.

²⁵ Ta sa xini va Jesús ña cáhvi ini na cán sahá ña cán quea nacachi a já xihín ná:

—Tá sáhdá java táhan ñayivi ndúu in nación ta ndúu na cuahá táhdá já cásáhá cáni táhan ndaja táhan mé va na já cama chá ndihi sahá nu ndúu na cán. Ta quiahva já vaha ri xihín in ñuu á in vehe tá sáhdá java táhan ndaja táhan mé ná já quea jándihi na sahá ná.

²⁶ Ta quiahva já yáha xihín Satanás, rí cúu tiñáhá sacuahá. Ta tá ná tavá rí inga rí quini ini ñayivi á tá ná cani táhan ndaja táhan mé rí já quea ndihi sahá ndée ña cómi rí.

²⁷ Mé ndó cáchí ndo ña tává i rí quini ini ñayivi xihín ndée Beelzebú, rí cúu tiñáhá sacuahá. Joo tá mé a ndaa cúu ndusa ña cáchí ndo sahá i jan, ndáchí quehe na cúu cuéntá mé ndó jan ndée tavá na rí quini ini ñayivi. Ama ná cachi ndó ña tává ndo rí quini xihín ndée tiñáhá sacuahá. Ña yóho náha ña co cáhvi ndaa ini ndó.

²⁸ Candehé ndo. Yehe tává i ínima quini ini ñayivi xihín ndée ínima yii Ndióxi. Ta xihín ña yóho náha cáxi a ña sa naxinu coo quivi cacomí Ndióxi cuéntá sahá ndó.

²⁹ 'Candehé ndo. Sácu u in quiahva nu ndo. Ni in dataa a cúu ndihvi da caja cuíhná da ñaha vehe in da ndacú joo tá ná cató da da ndacú cán já cuu quehe da ñaha da cán.

³⁰ 'Ndá na coo cuahan xoo i, cúu ná na coo cúni yehe. Jáchi ndá na coo chindee yehe xihín ña cája i, cúu ná na sáji nuu nuú i.

³¹ 'Ña cán quea cáchí i xihín ndo ña cája cáhnu ini Ndióxi sahá tá nuú cuachi cája ñayivi xihín sahá tá nuú tuhun quini cáhan na. Joo tá ná cáhan núu na sahá ínima yii Ndióxi já quea a cája cáhnu toho ini Ndióxi sahá ña nacaja na.

³² Caja cáhnu ini Ndióxi janda sahá ndá na ná canahá xihín yehe, da nachindahá Ndióxi nduu ñayivi joo tá ná canahá na xihín ínima yii Ndióxi já quea a cája cáhnu toho ini Ndióxi sahá ná ni nani tácu na ndúu na ñuyíví yóho ta ni tá cuhun na cavii sahá ná nu Ndióxi.

Xihín cuíhi cúun nuú in yito cuu ndicuní ndá yito cúu dó

(Lc. 6:43-45)

³³ 'Xini ñúhú jándee ndó yitó vaha ña na cuun cuíhi vaha nu do. Jáchi tá ná jándee ndó yitó núu já quea cuíhi núu cuun nu do. Jáchi xihín cuíhi cúun nuú in yito cuu ndicuní ndá yito cúu dó.

³⁴ Mé ndó cúu ndó tátuhun coo jáchi cúu ndó na quini sahá ña cán quea cáhan ndó tuhun quini ta a cuú cana tuhun vaha yúhu ndo. Jáchi yúhu ñayivi cána tóco ndihi ña nandicutú ñúhu ínima ná.

³⁵ In taa vaha cáhan da ndinuhu ña vaha jáchi ndinuhu ña vaha ñúhu ínima dá. Ta in taa quini cáhan da ndinuhu ña núu jáchi ña núu quea ndácaan ínima dá.

³⁶ Mé a ndaa ná cáhan i xihín ndo ña tá ná ndindaa quivi cája vii Ndióxi sahá ñayivi ndúu ñuyíví anda jávi ndiquiahva ñayivi cuéntá nu Ndióxi sahá ndaja táhan tuhun núu nacahan na ñuyíví yóho.

³⁷ Jáchi sahá mé tuhun nacahan ndó jan cája vii Ndióxi sahá ndo. Ta xihín ña jan cachi Ndióxi ña á in cuachi ndó á coo cuachi ndó —cáchi Jesús.

Xíca ñayivi quini ña ná caja Jesús ña xitúhún nu ná

(Mr. 8:12; Lc. 11:29-32)

³⁸ Java na fariseo xihín na jánaha ley Moisés naçahan na xihín Jesús já naçachi na já xihín á:

—Maestro, cuni nde ña ná caja ndó in ñaha xitúhún nuú nde já ná cuni nde —naçachi na xihín Jesús.

³⁹ Já nanducú ñehe Jesús tuhun nuú na cán já naçachi a já xihín ná:

—Ñayivi quini, na cō cuni cándusa Ndióxi, na yóho cúu na cuni cuni ña xitúhún. Joo a cuni toho na ña. Ña cuni ndusa na quea ña ndoho i tá quiahva nandoho Jonás, da nasacuu profeta sanahá.

⁴⁰ Jáchi tá quiahva nasandacaan Jonás uni quivi xihín uni ñuú tixi tiyacá cáhnu tá naçocó rí da quiahva já ndacaan ri yehe, da nachindahá Ndióxi nduu ñayivi tixi ñundáhyi uni quivi xihín uni ñuú.

⁴¹ Ta ñayivi nasanduu Nínive sanahá cán ndacuíta na chican na cuachi jata ndó tá ná xinu quivi caja vii Ndióxi sahá cuachi ñayivi ndúu viti. Jáchi mé na nasanduu ñuu Nínive cán najándacoo na cuachi cája na tá naçahan Jonás xihín ná ña naçachi Ndióxi coo. Ta yehe ín chága sahá i a juú ga Jonás joo cō cándusa ndó yehe.

⁴² Jári tá ná xinu quivi caja vii Ndióxi sahá cuachi ñayivi ndúu tiempo viti anda já ndacuíta in ña nasacomí cuénta sahá ñayivi ndúu chí xoo sur sanahá ta chican ña cuachi jata ñayivi ndúu tiempo viti. Jáchi mé ña cán vatí nasahin xíca ndivaha ña nu rey Salomón sanahá nasahan ña cuni johó ña tuhun ndíchí çahan da. Ta yehe ín chága sahá i a juú ga Salomón joo cō cándusa ndó yehe.

Jánaha Jesús ña cuahá tañu ndíco cōo tucu inima quini ini ñayivi vatí sa naquee rí

(Lc. 11:24-26)

⁴³ “Tá quéta in inima quini ini in dataa já quee rí cuahan rí xíca nuu rí ndijáá yucú íchí ndínducú rí nuú candoo rí. Ta tá cō ndíñehe rí ña já casahá çahvi ini rí já:

⁴⁴ “Coho ndicó cōo tucú ini da nuú nasandacaan í cán jáchi cúu á tátuhun vehé”, çahán rí. Ta tá xinu cōo rí ini da cán já sándehe rí ña ín vii va ini da cán tá

quiahva vii ini vehe tá natihvi á ta nandaca ndójó vaha tóco ndihi ñaha ini a.

⁴⁵ Anda já quee tucu mé rí quini cán cuahan rí quehe rí usa ga rí quini chága a juú ga mé rí já xinu ndihi rí ndihvi rí ini dataa cán. Ta mé da cán ndiquini chága da a juú ga tá nasandacaan in talaá rí ini da. Quiahva já ndoho ri ñayivi quini ndúu tiempo viti —cáchi Jesús.

Nána Jesús xihín ñani a cuni na cuni na a

(Mr. 3:31-35; Lc. 8:19-21)

⁴⁶ Nani çahan yí va Jesús xihín ñayivi já naxinu cōo nana Jesús xihín ñani a ña ná çahan na xihín á cuni na. Joo naçandoo na ndíta na jata véhe.

⁴⁷ Já nasahan in na çaxi tuhun na nuú Jesús já cáchi na já xihín á:

—Jata véhe çaa ín nánún xihín ñanún ta çahan na xuhun cuni na —naçachi na xihín Jesús.

⁴⁸ Joo nanducú ñehe Jesús tuhun nuú na cán já naçachi a já xihín ná:

—Çahan i xihín ndó ndá na cúu ndusa nana i xihín ñani i —naçachi Jesús xihín ná.

⁴⁹ Anda já nanaha ndaha mé á na xíca tuun xihín á cán já naçachi a já:

—Na yóho cúu ná tátuhun nana i xihín ñani i.

⁵⁰ Jáchi ndá na cája ña cuni Ndióxi, tátá i, mé a ín indiví, na cán cúu ná tátuhun ñani i xihín quiahva i xihín nana i —naçachi Jesús xihín na cán.

13

Sácú Jesús quiahva sahá in da sátá tata

(Mr. 4:1-9; Lc. 8:4-8)

¹ Sa mé quivi já naqueta Jesús vehe cán já nasahan nasacoo a yati yuhú tañuhú cán.

² Ta sahá ña nataca cuahá ndivaha ñayivi nu á sahá ña cán quea nandaa mé á jata in barco loho ta nasacoo a jata do cán nani ndúu ñayivi ñutí yuhú tañuhú cán.

³ Anda já naçasahá jánaha cuahá ñaha nu ná ta nasacu a quiahva nu ná já naçachi a já xihín ná:

—In da sátá tata naquee da cuahan da cata da ña.

⁴ Ta tá sátá da ña cuahan da já naçayu java ña íchi ta cán naxinu laa ta nasaxí rí ña.

⁵ Ta java ña nacuyyu a tañu yuu nuú coó cuaha ñuhu. Ta cama chá nanduta mé tata jáchi co cúná ñuhu nuú nacuyyu a.

⁶ Joo tá naqueta candii já najáhichi ñaha sahá ña coó cuaha yóho a chí nandihí sahá.

⁷ Ta java tata nacuyyu tañu tohíñú ta tá nasahnu tohíñú cán já nanditáha ndihi a nacaja tohíñú.

⁸ Ta java tata nacuyyu a nu ñuhú vaha ta já nasahan cuahá ñaha ña jáquee na nu á. Java ña nasahan in ciento a nuú in in tata ta java ña nasahan uní jícó uxu a ta java ña nasahan oco uxu a nuú in in tata.

⁹ Na ín johó, ná cuni johó na —nacachi Jesús.

Ndicani Jesús ndá saha quea nasacu a quiahva nu ná

(Mr. 4:10-12; Lc. 8:9-10)

¹⁰ Na xica tuun xihín Jesús cán nacayati na nu á já nasahá ndaca tuhún na mé á ndá cuénta quea janaha mé á xihín quiahva cuití va nuú ñayivi.

¹¹ Anda já nacachi Jesús já xihín ná:

—Ña coó nacandaa ini ndó jihna ña cán cándaa ini ndó viti jáchi nasuná Ndióxi xíní túní ndo cándaa ini ndó ndá quiahva cacomí mé á cuénta sahá ñayivi. Joo na a ñaha cacomí Ndióxi cuénta saha, na cán cúu na sácú u quiahva nuu.

¹² Jáchi ndá na sa ín ñaha nuu, ñehe táhvi na coo chága ñaha nu ná. Joo na co á ñaha nuu, janda ña chá ín nu ná ndindaa.

¹³ Sahá ña cán quea cahan i xihín ndinuhu quiahva xihín mé ndó jáchi vatí sándehe na joo cúu ná tátuhun na co tívi nuu. Ta vatí xíní johó na joo cúu ná tátuhun na jóho jáchi co cándaa ini na ña cahan i xihín ná.

¹⁴ Ta xihín ña yóho xínu coo nuú tuhun nacachi profeta Isaías sanahá ndivaha ta nacachi da já:

Vatí xíní johó na joo cúu ná tátuhun na jóho jáchi co cándaa ini na ña cahan i xihín ná.

Ta vatí sándehe na joo cúu ná tátuhun na co tívi nuu.

¹⁵ Jáchi nandaji xíní túní tóco ndihi ñayivi ñuu yóho.

Ta ndájí tuun johó na ta ndájí tuun nduchú núu na.

Ña cán quea a cuú cuni johó na,

ta ni a cuú candehé na,

ta ni a cuú cándaa ini na ña xíní johó na.

Ta xihín ña yóho co ndícó coo na nuú i ña ná ndaja vaha i na, nacahyí Isaías sanahá.

¹⁶ Joo tahví nacuu ndó jáchi cándaa ini ndó ña sándehe ndó xihín ña xíní johó ndó.

¹⁷ Mé a ndaa ná cahan i xihín ndo ña cuahá ndivaha na profeta xihín cuahá ndivaha ñayivi vaha naxica ini na cuni na ña xíní ndó yóho viti joo coo naxini na ña ta naxica ini na cuni johó na ña xíní johó ndó yóho joo coo naxini johó na ña.

Ndicani Jesús ña cúní cachi quiahva nasacu a nu ná

(Mr. 4:13-20; Lc. 8:11-15)

¹⁸ Cuni johó ndó ña cúní cachi quiahva nasacu u sahá da sátá tata cán.

¹⁹ Ñayivi, na xíní johó tuhun vaha sahá ña sa nacayati quiví cacomí Ndióxi cuénta sahá ñayivi joo co cándaa ini na ña, na cán cúu ná tátuhun tata ña nacuyyu íchi cán. Jáchi xínu tiñhá sa cuaha ta tává rí tuhun Ndióxi cán ínimá ná.

²⁰ Ta tata ña nacuyyu tañu yuu cán náha ndá quiahva ín ñayivi, na cájii ndivaha ini ndiquehe tuhun Ndióxi.

²¹ Joo sahá ña co ñehe ín yóho a cuhun cúná a sahá ña cán quea chá tiempo cuití va cándusa na tuhun Ndióxi. Jáchi tá casahá ndóho ini na sahá tuhun Ndióxi chí jándacoo va na ña.

²² Ta tata ña nacuyyu tañu tohíñú cán náha ndá quiahva ín ñayivi, na xíní johó tuhun Ndióxi joo co jándacoo na íchi naxica na jihna. Ta casahá ndicani ini na sahá ñaha ñuyiví yóho ta casahá na catóo na canduu cuahá ñaha cuicá nu ná ta casahá ndicají ini na caja na ña núu. Sahá ña cán quea cúu á tátuhun tata ña co cána ñaha jáquee na nuu jáchi coo nasahnu na xihín tuhun Ndióxi.

²³ Joo tata ña nacuyyu nuú ñuhú vaha cán náha ndá quiahva ín ñayivi, na xíní johó tuhun Ndióxi ta cándaa ini na ña ta cája na ña cájii ini Ndióxi xihín. Java na cúu ná tátuhun yucu trigo ña nasahan in ciento a nuú in in tata. Ta java na cúu ná tátuhun tata ña nasahan uní jico uxu a nuú in in tata. Ta java na cúu ná tátuhun tata ña

naṣahaṇ oco uxu a nuú in in a —naçachi Jesús xihin ná.

Sácú Jesús quiahva sahá yucu quini nána tañu trigo

²⁴ Anda já naṣacu Jesús inga quiahva nuú ñayivi ndúu cán já naçachi a já xihin ná:

—Tá ná casahá cacomí Ndióxi cuéntá sahá ñayivi já cacuu a tátuhun tá naṣutu in dataa trigo ña vaha nu ñúhu dá.

²⁵ Joo tá sa ndúu ndihi na quiji na já naṣinu coo in da co cúní táhan xihin dá ta naçihin da tata yucu quini tañu trigo cán já naquee da cuahan da.

²⁶ Ta tá naṣahnu trigo cán ta naçasahá cána yoco a já nanduta ri yucu quini cán.

²⁷ Anda já naṣahaṇ na cája chúun cán cahan na xihín xitoho na já naçachi na já: “Candehé ndo. Tata vaha quéa naçihin ndó nu ñúhu ndo joo co cándaq ini nde ndáchí naquixi yucu quini nanana xihin á yóho”, naçachi na cán xihín xitoho na.

²⁸ Anda já nanducú ñehe da cán tuhun nu ná já naçachi da já xihin ná: “Ndá da co cúní yehe, da cán cúú da naçaja ña yóho”, naçachi da. Anda já naçachi na cája chúun nu dá cán já xihin dá: “Á co cúní ndó ña ná quihvi nde tuhun ndihi nde yucu quini cáa tañu trigo”, naçachi na xihin dá.

²⁹ Anda já naçachi da já xihin ná: “Ná coo mé á jáçhi tiaḥva náá nani túhun ndó yucu quini jan cuu tuhun ndó yucu trigo xihin á.

³⁰ Vaha chá ná quiahva í ñamaní cuahnu a xihin trigo janda quiahva ná ndindaa tiempo jáqueé trigo. Ta tá sa jáqueé já cahnda i chuun nuú na jáquee ña ná tavá xoo na yucu quini jihna ñúhú ta ná cató na ña tá nuhni tá nuhni ña ná chicaan ñúhu ná ña. Ta anda jáví ná játaca na trigo taán vaha na ini yaca ñaha i”, naçachi da —cáçhi Jesús sácú a quiahva nu ná.

Sácú Jesús inga quiahva saha ndiqui mostaza

(Mr. 4:30-32; Lc. 13:18-19)

³¹ Ta naṣacu Jesús inga quiahva nu ná já naçachi a já xihin ná:

—Tá ná xinu coo quivi cacomí Ndióxi cuéntá sahá ñayivi já cúú á tátuhun in ndíqui mostaza ña chíhin in dataa nu ñúhu da.

³² Cúú á ndíqui loho chága nu tóco ndihi ndíqui válí in ñuyiví. Joo sáhnú a janda quiahva ndúu a in yito, dó cáhnú nu ndíhi yito nu xinu coo laa cávaha rí choḥo ri nu ndáha do —cáçhi Jesús.

Sácú Jesús quiahva sahá yusá naçaa
(Lc. 13:20-21)

³³ Ta naṣacu Jesús inga quiahva nu ná já naçachi a já xihin ná:

—Tá ná cacomí Ndióxi cuéntá sahá ñayivi já cacuu a tátuhun tá cává táhan in ñañáha uní táhnda náhnú harina xihín loho yusá naçaa ña ná jánañu a tóco ndihi mé yusa cán —naçachi Jesús.

Sácú Jesús quiahva cuití va nuú ñayivi
(Mr. 4:33-34)

³⁴ Xihín ndinuhu quiahva cuití najánaḥa Jesús tóco ndihi ña yóho nuú ñayivi.

³⁵ Já naçaja Jesús ña ná xinu coo nuú ña naçachi in da profeta sanahá tá naçachi da já:

Xihín ndinuhu quiahva cuití va cahan i xihín ñayivi,
ta cahan i sahá ñaha naçahin jehé nu ná janda mé saha tá cámaní cava sahá sahá ñuyiví —cáçhi tuhun Ndióxi.

Ndicani Jesús ña cúní cachi quiahva naṣacu a sahá yucu quini nanana tañu trigo cán

³⁶ Tá nandihí nandindayí Jesús ñayivi cuaha ndúu cán já naquihvi a ini vehe. Anda já naçativi na xica tuun xihín a cán nu á já naçachi na já xihin á:

—Ná ndicani ndó nuú nde ndía cúní cachi quiahva naṣacu ndó sahá yucu quini nanana tañu trigo cán —naçachi na.

³⁷ Anda já naçachi Jesús já xihin ná:

—Da xútu tata vaha cúú yehe, da naçindahá Ndióxi nduu ñayivi.

³⁸ Ta ñúhu nu xútu u tata cúú á ñayivi ñuyiví. Ta tata vaha cán cúú á yuhú nuú na cómí Ndióxi cuéntá saha. Ta yucu quini cán cúú á yuhú nuú ñayivi quini, na cúú cuéntá rí quini.

³⁹ Ta da co cúní táhan xihín i naṣahaṇ da naṣutu da yucu quini nu ñúhu cán ta cúú dá yuhú nuú tiñáha saçaha. Ta tiempo jáquee na cán cúú á tá ná xinu coo quivi caja

vií Ndióxi sahá ñayivi ndúu ñuyíví. Ta na xíca jáquee cán cúú ná tátō Ndióxi.

⁴⁰ Ta tá quiahva ñacaja na cán xihín yucu quini tá najátaca na ña ta ñachicaan ñúhu na ña quiahva já yaha ri xihín ñayivi ñuyíví yóho tá ná tandaa quíví ndihi sahá ñuyíví.

⁴¹ Ta yehe, da ñachindahá Ndióxi nduu ñayivi chindahá i tátō mí i ña ná cahnda java táhan na ña cómí i cuéntá saha xihín na co cúú cuéntá mí i. Jáchi na cán jácahan na inga na caja na cuachi xihín java ga na cája ña núu.

⁴² Ta jáqueta nuu i na ini indayá ta cán cuacu na anda quiahva chicáñá nuhu na jáchi ndóho ndivaha ini na.

⁴³ Ta anda já na cája ña cúní Ndióxi ndiyihví ndaa na tá quiahva yehe candii nuú cacomí Ndióxi cuéntá saha ná, mé á cúú á tátá na. Ndá na ín johó, ná cuni johó na.

Sácú Jesús quiahva sahá sató jjuhún ndácaan jehé

⁴⁴ Tá ná cacomí Ndióxi cuéntá saha ñayivi cacuu a tátuhun ña yaha xihín in dataa tá ndínehe dá in sató jjuhún ña ndácaan jehé in ñundáhyi. Ta tá ñandihí já chíjahví tucu da ña xihín ñúhu. Ta já cávatá ndivaha da cuhun da jicó da tóco ndihí ña cómí da ña ná cueen da ñundáhyi nuú ñanduxu mé sató jjuhún cán.

Sácú Jesús quiahva sahá in jíqui sándacu na ña yahvi ndivaha

⁴⁵ Tá ná cacomí Ndióxi cuéntá saha ñayivi cacuu a tátuhun tá xíca nuu in da cája ndahví ndúcú da jíqui sándacu na ña yahvi ndivaha.

⁴⁶ Ta tá ndítahan da in jíqui yahvi ndivaha já cuahan da jicó da ndihí ñaha cómí da ña ná cueen da jíqui yahvi ndivaha cán.

Sácú Jesús quiahva sahá in ñunu táva tiyacá

⁴⁷ Tá ná cacomí Ndióxi cuéntá saha ñayivi cacuu a tátuhun in ñunu jácana na nuú tañuhú ta já tীন na tá nuú tiyacá.

⁴⁸ Ta tá sa ñachutú ñunu cán já táva na tiyacá cán yuhú tañuhú ta cán sácoo na ndacahnda java na ri. Ta rí vaha cán táán vaha na ini toyicá na joo rí núu cán xíta ri cája na.

⁴⁹ Quiahva já yaha ri xihín ñayivi tá ná ndihí sahá ñuyíví. Jáchi queta tátō Ndióxi ndacahnda java na vaha tañu na quini.

⁵⁰ Ta ñayivi quini cán chicaan na ini indayá ta cán cuacu na janda quiahva chicáñá nuhu na jáchi ndóho ndivaha ini na —cáchi Jesús.

Tá jánaħa Jesús sahá ña saá xihín ña yatá

⁵¹ Tá ñandihí já ñandaca tuhún Jesús na já ñacachi a já:

—Á cándaā ini ndó tóco ndihí ña cáhan i yóho —cáchi a.

—Ajan, cándaā ini nde ña —ñacachi na cán xihín á.

⁵² Anda já ñacachi Jesús já xihín ná:

—Tá jácuaha in da jánaħa ley Moisés saħa ndaja ndiquiahva da mé dá ndáħa Ndióxi cacomí a cuéntá saħa dá já cúú dá tátuhun in dataa, da ín ñaha ini vehe. Ta xíní vaha da tavá da ñaha da á cúú á ña saá á ña yatá —cáchi a.

Tá cuahan Jesús ñuu Nazaret

(Mr. 6:1-6; Lc. 4:16-30)

⁵³ Tá ñandihí najánaħa Jesús xihín quiahva yóho já ñaquee a cuanúhu a.

⁵⁴ Tá ñaxinu a ñuu mé á já ñacasáħa jánaħa ini veñuhu cán. Ta jandá johó cátoñtó ñayivi ñuu cán já cáchi na já:

—Ta ndájá ñacatiaħa nahá ri da yóho ña xíní da. Ta ndaja cája da ñaha xituhún yóho.

⁵⁵ Á a juú da yóho cúú jahyi da cája chúun xihín yító. Á a juú náná da yóho cúú María. Ta ñani da cúú Jacobo xihín José xihín Simón xihín Judas viti.

⁵⁶ Ta sa mé ñuu yóho ndúu ri quiahva da jan. Ndájá ñacatiaħa nahá da ña jánaħa da nu yo, dá já —ñacachi xihín táhan na cán.

⁵⁷ Ta chí coo ñaxeen na candúsa ñahá na. Sahá ña cán quea ñacachi a já xihín ná:

—Vatí tóco ndihí ñayivi cája cáħnu na in profeta joo na vehe da xihín na ñuu da co cándúsa na da —cáchi Jesús.

⁵⁸ Ta coo ñacaja cuahá Jesús ña xituhún ñuu cán jáchi coo ñacandúsa toho ñayivi cán mé á.

14

Tá ñaxihí Juan, da ñacaja ndúta ñayivi
(Mr. 6:14-29; Lc. 9:7-9)

¹ Mé tiempo cán naxini johó Herodes, da cúu gobernador cán ña ndítuhún na sahá Jesús.

² Anda já nacachi da já xihin mozo da:

—Á a juú Jesús cúu á Juan, da najácandúta ñayivi ta viti nanditacu tucu da. Sahá ña cán quéa ín ndée da cája da tóco ndihi ña cája da yóho —cáchi Herodes.

³ Jáchi janda mé saha natiin Herodes Juan nacató ñahá da ta nachicaan da da vecaa. Ta nacaja da ña yóho sahá Herodías, ña nasacuu ñájíhi Felipe, ñani da.

⁴ Jáchi mé Juan najánani ñahá da sahá ña ín Herodes xihin ña ta já nacachi da:

—Co ndítahan coún xihin ñájíhi ñanún —nacachi Juan xihin dá.

⁵ Ta janda já nanducú Herodes cahní da Juan joo a cuú caja da ña jáchi yíhvi da ñayivi sahá ña cándusa na ña cúu Juan in profeta nachindahá Ndióxi.

⁶ Joo in tañu nani ndácaan Juan vecaa já nacavaha Herodes víco sahá quivi nacacu da. Ta nandaca ndíchí ña cúu jahyi Herodías cán naxita sahá ña nu ndíhi na ndúu víco cán. Ta a juú quiahva nacajii ini Herodes xihin ña yóho.

⁷ Sahá ña cán quéa quivi Ndióxi táva da tá sahan da tuhun da nu ña cán ña quiahva da nu ña ndá ña cúní mé ña caça ña nu dá.

⁸ Tá nandíhi nandaca tuhún jihna ña náná ña já ndáva ña nasahan ña nu Herodes já cáchi ña já xihin dá:

—Viti ñuhú cúní ña ná quiahva ndó yiquí jíní Juan, da jácandúta ñayivi nuú i ini in cohó cáhnu —nacachi ña xihin dá.

⁹ Tá nacachi ña já xihin Herodes já nacacuéha ndivaha ini da. Joo sahá ña sa natavá da quivi Ndióxi tá nasahan da tuhun dá nu ña cán ta sahá ña cúní da candoo vaha da nuú na ndúu víco xihin da cán sahá ña cán quéa nasahnda da chuun ña ná quiahva na ña nu ña.

¹⁰ Chí nasahnda da chuun ña ná chituhun ná yiquí jíní Juan ini vecaa cán.

¹¹ Ta já nachicaan na yiquí jíní da ini in cohó cáhnu já nasahan na ña nu ña cán. Anda já nandiquiahva ña cán ña ndáha náná ña.

¹² Anda jáví naxinu na naxica xihin Juan cán já nasahan na nandiquehe na yiquí

cuñu da ta najánduxu na da. Ta já nasahan na nacaxi tuhun na ña yóho nuú Jesús.

Tá nasahan Jesús ña cuxu uhun mil taa
(Mr. 6:30-44; Lc. 9:10-17; Jn. 6:1-14)

¹³ Tá naxini johó Jesús saha Juan já naquee xóo a ini in barco loho cuahan nuú co ndúu ñayivi. Joo tá naxini johó ñayivi ña cuahan Jesús já naquee na ñuu na ndíco na cuahan sahá na nu ín a.

¹⁴ Ta tá nanuu Jesús barco cán já naxini a cuahá ndivaha ñayivi ta natahvi ini a saha ná. Ta chí nandaja vaha mé á na quíhvi naquixi tañu na cán.

¹⁵ Ta tá sa cáhini cuahan já nacayati na xica tuun xihin a cán nu á. Já cáchi na já xihin á:

—Sa nahini va ta a juú xoo nu ndúu ñayivi quéa yóho. Ndindayí ndó ñayivi ná cuhun na ñuu válí yati jan já ná cueen na ña cuxu na —nacachi na cán xihin á.

¹⁶ Anda já nacachi a já xihin ná:

—Co xíní ñuhú toho quee na cuhun na. Mé ndó quiahva ndó ná cuxu na —nacachi Jesús.

¹⁷ Anda já nacachi tucu na cán já xihin á: —Co mé ñaha va cuxu na yóho. Uhun víxí pan xihin ivi laá tiyacá cuití va ín yóho —nacachi na xihin Jesús.

¹⁸ —Taxi ndó a chóho —nacachi Jesús xihin ná.

¹⁹ Anda já nasahnda Jesús chuun ña ná ndaca nduu ndihi na cán nuú yucu. Anda já natiin a ndíhuhun pan xihin ndíví tiyacá cán já nasandehé a chí indiví já nandiquiahva ndixahvi nu Ndióxi. Tá nandíhi já nasahnda java pan ta nasahan ña nuú na xica tuun xihin á cán ta na cán nandicahnda na ña nuú ñayivi cuaha cán.

²⁰ Ta tóco ndihi na naxixi na janda quiahva nachutú na. Ta tá nandíhi naxixi na já najátaca na ña nacandoo cán ta najácutú na uxu ivi toyicá xihin ña nacandoo cán.

²¹ Ta tóco ndihi na naxixi cán nasacuu na tátuhun uhun mil taa. Co cáhan sahá najíhi xihin na valí.

Tá naxica sahá Jesús nuú tañuhú
(Mr. 6:45-52; Jn. 6:16-21)

²² Ta tá nandíhi já nacaja Jesús ña ná ndíhvi na xica tuun xihin á cán ini in barco

ñā ná cuḥun cuéé nā inga xoo tañuhú cán nani candoo too mé á jándindayí a ñayivi cuaha cán.

²³ Ta tá sa najánduta tóco ndihi ñayivi já nandaa mé á yucu cuahan caça tahví a nu Ndióxi. Tá nandihí já nacuaá ta in túhún mé á ndácaan xíca tahví a nu Ndióxi cán.

²⁴ Ta ndaja coo barco loho, dó cándojo ná xíca tuun xihín á cán sa naxinu coo dó janda mahnú tañuhú cuahan do. Ta ndícojo ndivaha tañuhú jáchi xoo cuahan na vaxi tachi.

²⁵ Joo tátuhun sa cuahan tívi já xíca sáhá Jesús cuahan nuú tañuhú naxinu a nu ná.

²⁶ Ta tá naxini na xíca sáhá Jesús vaxi a nuú tañuhú cán já nacatontó na. Ta nacasáhá na cáyuhú cóhó na sahá ñā yíhvi na já cáchi na já:

—Ínimā quéa vaxi yóho —cáchi na.

²⁷ Joo ivi laá nandicahan Jesús xihín ná já cáchi a já:

—Ndacú coo ini ndó jáchi yehe va cúu u. A yíhvi toho ndó —nacachi a xihín ná.

²⁸ Anda já nacachi Pedro já xihín Jesús:

—Xitoho i, tá ta jivi cúu mé ndó cahnda ndó chuun ñā ná cuu saā i nu ndo ta ná caca i nuú tañuhú —nacachi da xihín Jesús.

²⁹ Ta já cáchi Jesús já:

—Naha quíi —cáchi a xihín dá.

Anda já nanuu Pedro barco cán ta nacasáhá xíca sáhá da nuú tañuhú cuahan da nuú Jesús.

³⁰ Joo tá naxini da tachi ndeé xíco nuú tañuhú cán já nayihví da. Chí ivi laá nacasáhá quéta nuu da cuahan da ini tañuhú. Já nacayuhú cóhó da já cáchi da já xihín Jesús:

—Chindeé ndó yehe, xitoho i —nacachi da xihín á.

³¹ Ta cama chá natiin Jesús ndáha da ta já nacachi a já xihín dá:

—Ndá cuéntá quéa co cándéé chága inún yehe ta nacasáhá cáhvi ivi joho inún —nacachi Jesús xihín dá.

³² Ta tá nandaa ndíví na jata barco já nacatáji tachi cán.

³³ Anda já nacaja cáhnu na ñúhu ini barco cán Jesús já cáchi na já xihín á:

—Mé a ndaa táhyí cúu jivi ndusa ndó in túhún jiní já jahyi Ndióxi —nacachi na xihín á.

Tá nandaja vaha Jesús na quíhvi ndúu ñundáhyi Genesaret

(Mr. 6:53-56)

³⁴ Ta já naxíca loho ga na nuú tañuhú cán já naxinu coo na ñundáhyi Genesaret.

³⁵ Ta tá nandicuni ñayivi ndúu cán mé á já nachindahá na chuun nasahan nuú ndaja táhan ñayivi ndúu ndijáá ñundáhyi cán. Já ñéhe ndihi na na quíhvi nacasaā na nu á.

³⁶ Ta na quíhvi cán naxíca tahví na nu á ñā ná quiahva ñamaní caní ndaa ndáha ná yuhú jahmá níhnu a ta tóco ndihi na nacani ndaa ndáha jahmá a nandivaha na.

15

Ñā cāja quini ínimā ñayivi

(Mr. 7:1-23)

¹ Ndaja coo java na fariseo xihín java na jánaḥa ley Moisés ndúu ñuu Jerusalén cán nacayati na nuú Jesús já nacasáhá cáchi na já xihín á:

² —Ndávaha co cāja na xíca tuun xuhun ñā nacachi tásáhnu jíco yo caja na. Ndávaha xíxi na tá cámaní ndahá na tá quiahva sáhdá ley caja na —nacachi na cán xihín Jesús.

³ Anda já nanducú ñehe Jesús tuhun nu ná já nacachi a já:

—Ta jári ndóhó va, ndá cuéntá quéa jándacoo ndó ñā sáhdá Ndióxi nu ndó caja ndó. Ta ñā cāja ndó quéa ndíco ndó costum-bre mé va ndó.

⁴ Jáchi sáhdá Ndióxi chuun já cáchi a já: “Caja cáhnún tátún xihín nánún.” Ta jári cáchi a: “Ndá na ná chícaan cháhan jata tátá na á náná na, ndítahan quivi na”, cáchi a.

⁵ Joo ndóhó, jánaḥa ndó nuú ñayivi ñā cuu cahan na já xihín tátá na á náná na: “A cuú chindeé e ndohó jáchi sa nasacu xoo i ñaha i quiahva i ñā nu Ndióxi”, cáchi na.

⁶ Tá ná cachi na ñā yóho já quéa co ndúsa ga chindeé na tátá náná na. Quiahva joho cāja ndó ta sácu xoo ndó ñā nasahnda Ndióxi chuun nu ndo ta ndája ndó a tátuhun in ñaha ñā coo saha. Jáchi ndíco

cáhnu ndó ña najándacoo tásáhnú jícó ndo nu ndo.

⁷ Co cúu ndó tá quiahva ndáa ndó. Mé a ndaa nacahan profeta Isaías saha ndo sanahá tá nacañyí da ña nacachi Ndióxi:

⁸ Yuhú ninu uun na cája cáhnu na yehe.

Ta co cája cáhnu na yehe xihín ndinuhu ínimá na.

⁹ Ta mé a uun quea cája cáhnu na yehe, jáchi ña jánaha na nuú ñayivi cuití va cúu á ña quíxi jiní mé va na, nacachi profeta Isaías sanahá ndivaha —nacachi Jesús xihín na cán.

¹⁰ Tá nandihí já nacana Jesús tóco ndihí ñayivi ndúu cán já nacachi a já xihín ná:

—Cuni johó vaha ndó ña cáhan i xihín ndó ta ná candaa ini ndó ña.

¹¹ A juú ñaha xíxi ñayivi ndája quini ínimá ná. Tuhun quini quéta yúhu ná ña jan quea cája quini ñahá —nacachi Jesús.

¹² Tá nandihí já nacayati na xíca tuun xihín Jesús cán nu á já nacachi na já xihín á:

—Chí a váha mé nacuu ini na fariseo tá naxini johó na ña nacachi ndó jan —nacachi na cán.

¹³ Anda já nacachi Jesús já xihín ná:

—Ñayivi, na co ndíquehe vaha tuhun Ndióxi cúu ná tátuhun in yíto, dó coo najánde Ndióxi, tátá i ña ín indiví. Saha ña co cúu dó cuénta mé á já tandaa quivi ña tuhun mé á do anda yóho do.

¹⁴ Saha ña cán quea co ndítahan ndicani ini ndó saha na jan jáchi na cuaá va cúu ná. Ta a cúu toho caja in da cuaá candaca da inga da cuaá cuhun da jáchi ndíví já da ndacava da yávi —nacachi Jesús.

¹⁵ Tá nandihí já nacachi Pedro já xihín Jesús:

—Ndicani loho ndó nuú nde ndaja cáa ña cáchí ndo ña co cája quini toho ña xíxi ñayivi mé ná jáchi co cánda ini nde ña —nacachi Pedro xihín Jesús.

¹⁶ Já nacachi Jesús já xihín ná:

—Á coo toho xíní túní ri ndóhó va, vaha.

¹⁷ Jáchi co cánda ini ndó ña tóco ndihí ñaha xíxi ñayivi a cuú caja quini a na. Jáchi ña xíxi ñayivi co xínu a ini ínimá ná joo xínu coo ña tíxi va na já queta tucu a yiquí cuñu na.

¹⁸ Ña cuu ndaja quini ñayivi cúu ña quíxi ínimá ná tátuhun tuhun cáhan na xihín ña cája na.

¹⁹ Jáchi chí ínimá ñayivi quíxi ña cáhvi núu ini na tátuhun ña cáhvi ini na cahní na ndii. Ta sa mé cán quíxi ña cáhvi ini in dataa coo da xihín ñájihí ñani táhan da á xihín in ña co cúu ñájihí da. Ta sa mé cán quíxi ña ndiáva íní da caja cuíhná da. Ta sa mé cán quíxi ña cávaha jíquí da tuhun sahá ñani táhan da ta jári quíxi ña cána há da xihín Ndióxi.

²⁰ Tóco ndihí ña cáhvi núu ini ñayivi caja na, ña yóho quea ndája quini a na. Joo co cáquini toho ñayivi sahá ña co ndáhá na tá cámaní cuxu na tá quiahva ín costumbre na —nacachi Jesús xihín na xíca tuun xihín á cán.

*Tá nacandee ini in ña tóho Jesús
(Mr. 7:24-30)*

²¹ Tá nandihí já naquee Jesús cuahan chí ñundáhyi cuénta Tiro xihín cuénta Sidón cán.

²² Ta nu xíca cuahan cán naqueta in ñáñaha ñundáhyi Canaan nu á já cáyuhú ña já cáchí ña já xihín á:

—Xitoho i, da naquixi chichi David caja ndó ñamaní candáhví loho ini ndó yehe. Chindee ndó jahyi jíhí i jáchi rí quini ndácaan ini ña —nacachi ñáñaha cán xihín Jesús.

²³ Joo ni in túhún tuhun coo nanducú ñehe Jesús nu ña. Anda já nacativi na xíca tuun xihín a cán nu á já nacachi na já xihín á:

—Taxi ndó ña jan ná quee ña cuhun ña jáchi cáyuhú ña ndáca ña jata yó vaxi ña —nacachi na cán xihín Jesús.

²⁴ Anda já nacachi Jesús xihín ñáñaha cán já:

—Nachindahá Ndióxi yehe vaxi i nuú ñayivi Israel cuití va, mé na cúu tátuhun ndicachi, rí nandiñuhú —nacachi Jesús.

²⁵ Anda já ndáva ña cán naxinu coo ña nacaxítí ña nu Jesús já cáchí ña já xihín á:

—Caja ndó ñamaní chindee loho ndó yehe, xitoho i.

²⁶ Anda já nacachi Jesús já xihín ña:

—A váha toho candaa i pan ndahá na valí ta já cana i ña nuú tina —nacachi Jesús xihín ña cán.

²⁷ Anda já nacachi ña cán já xihín Jesús:

—Mé a ndaa cáhan ndo joo anda tina, rí ndúu tixi mesa xíxi rí ña jácuyu jahyi xitoho rí —ñacachi ñá cán xihín Jesús.

²⁸ Anda já ñacachi Jesús já xihín ñá:

—Mé a ndaa cándeé cáhnu inún Ndióxi. Ná coo a tá quiahva cúní mún —ñacachi Jesús xihín ñá.

Chí mé hora já nandivaha jahyi jíhí ña.

Ndaja vaha Jesús cuahá na quíhvi

²⁹ Tá nandihí já ñaquee Jesús cuahan já naxinu coo a yati yuhú tañuhú Galilea. Já nandaa in jini yucu ta cán nasacoo a.

³⁰ Ta já ñacasáhá natata cuahá ndivaha ñayivi já ñéhe na ña quíhvi saha xihín na cuaá xihín na níhí xihín na réncó ndáha. Ta cuahá ga nuú ña quíhvi ñéhe ña ñacasaa ña nachinduu na ña nu Jesús. Ta nandaja vaha mé á ña.

³¹ Ta xihín ña yóho a juú quiahva ñacatóntó ña tá naxini na ña ñacasáhá ndicahan ña níhí. Ta ñacatóntó ña tá naxini na ña nandivaha ndahá ña réncó ta ndícaca vaha ña quíhvi saha ta quiahva já nandivaha ri ña cuaá. Ta ñacasáhá ña cája cáhnu na Ndióxi, mé a cómí cuéntá sahá ña Israel.

Tá nasahan Jesús ña cuxu comi mil nataa (Mr. 8:1-10)

³² Anda já ñacana Jesús ña xíca tuun xihín á já ñacachi a já xihín ná:

—Táhnda ndivaha ini i sahá ñayivi yóho jáchi sa naxinu uní quívi ndúu na xihín i ta chí coó ga ña cuxu na. Ta co cúní chindahá i ña nuhu ña vehe na jáchi cámani cuxu na ta tiáhva náá cuitá ña ta cuyu na íchi —ñacachi Jesús.

³³ Anda já ñacachi ña xíca tuun xihín a cán já:

—Coó toho ñuu yati va ta ni mí, a cuú quiahva í ña cuxu na jáchi coó toho ñayivi ndúu yóho nuú cueén ña cuxu na —ñacachi ña cán xihín Jesús.

³⁴ Já ñacachi Jesús já:

—Ndaja pan cómí ndo.

Já ñacachi ña cán já:

—Usa pan xihín java tiyacá válí.

³⁵ Anda já ñasahnda Jesús chuun ña ná cacoo ndihí ñayivi nu ñúhu cán.

³⁶ Ta já ñatiin a ndihusa pan cán xihín java tiyacá válí cán já nandiquiahva

ndixahvi nu Ndióxi. Ta já ñasahnda java ña ta ñasahan ña nuú ña xíca tuun xihín á cán ña ná ndicahnda na ña nuú ñayivi cuaha cán.

³⁷ Ta naxixi tóco ndihí na janda quiahva nachutú tixi na. Ta tá najánditaca na ña ñacandoo cán já nachutú usa toyicá xihín ña.

³⁸ Ta ña naxixi cán cúu ná comi mil ta ta co cáhan sahá najihí xihín ña válí.

³⁹ Ta tá nandihí nandindayí Jesús ñayivi já nandihvi a ini barco já naxinu coo a ñundáhyi cuéntá Magdala.

16

Cúni ña fariseo xihín ña saduceo cuni na in ña xituhún caja Jesús

(Mr. 8:11-13; Lc. 12:54-56)

¹ Ta ndaja coo naxinu coo ña fariseo xihín ña saduceo nu Jesús. Ta sahá ña cúní ña coto ndojó cuití ñahá ña sahá ña cán quéa naxica ña nu á ña ná caja in ña xituhún cuéntá indiví já ná candaa ini na á mé a ndaa cúu á ña nachindahá Ndióxi.

² Anda já ñanducú ñehe Jesús tuhun nu ná já ñacachi a já xihín ná:

—Tá nahini já cáchi ndo já: “Tiempo vaha ndivaha cacuu a jáchi ndiyéhe cuahá indiví”, cáchi ndo.

³ Ta naha cáchi ndo já: “Viti ndusa quéa cuun ndeé ndivaha javi jáchi iin víco ndivaha ta iin víco cuahá indiví”, cáchi ndo. Co cúu ndó tá quiahva ndaa ndó. Ndá cuéntá quéa tiáhva ndó ndicuni ndó ndá quéa coo tá sándehe ndó indiví joo co tiáhva ndó ndicuni ndó ndá tiempo cúu á viti.

⁴ Ñayivi quini, ña co cúní candúsa Ndióxi, ña cán cúu ña xíca ña ná caja i ña xituhún nu ná. Joo ni in túhún toho ñaha xituhún a cája ga i nu ná. In túhún ña candehé ña cacuu a ña tandaa quívi ndoho i tá quiahva ñandoho profeta Jonás sanahá ndivaha —ñacachi Jesús xihín ná.

Já ñaquee a cuahan.

Tá sácú Jesús quiahva sahá ña fariseo

(Mr. 8:14-21)

⁵ Ta ndaja coo naxinu coo a inga xoo tañuhú xihín ña xíca tuun xihín á cán ta nandindójo ña cán cañehe na pan cuxu na.

⁶ Tá nandihí já ñacachi Jesús já xihín ná:

—Candehé ndo. Cuéntá coo ndó xihín na fariseo ta xihín na saduceo jan jáchi ña jánaha na cúu á tátuhun yusa naxaa ña cáva táhan na xihín harina cávaha na pan —nacachi Jesús.

⁷ Joo na xíca tuun xihín á cán ndítuhún xihín táhan na ña nacachi Jesús já sahá ña coó pan ñehe na cuahan xihín ná.

⁸ Ta tá nacandaa ini Jesús ña cáhan na já nacachi a já xihín ná:

—Ndá cuéntá quea co cándéé cáhnu ini ndó yehe ta cáhan ndo ña cáchi i ña yóho xihín ndo sahá ña co ñehe ndó pan vaxi ndó.

⁹ A ñaha cándaa ini ndó. Ndítahan ndicuhún ini ndó ña nandaja cuahá i uhún víxi pan tá naxixi uhún mil taa. Ta sa xíni ndó ndaja toyicá najáchutú ndo xihín ña nacandoo cán.

¹⁰ Ta ndítahan ndicuhún ini ndó ña nacaja i xihín usa pan tá nandicahnda i ña naxixi comi mil taa ta sa xíni ndó ndaja toyicá najáchutú ndo xihín ña nacandoo cán.

¹¹ Ndá cuéntá quea co cándaa toho ini ndó ña coó nacachi i ña yóho xihín ndó sahá ña coó pan ñehe ndó vaxi ndó. Joo nacachi i ña cuéntá coo ndó xihín na fariseo ta xihín na saduceo jáchi ña jánaha na cúu á tátuhun yusa naxaa ña cáva táhan na xihín harina cávaha na pan —nacachi Jesús.

¹² Tá nacachi Jesús ña yóho já nacandaa ini na xíca tuun xihín á cán ña a juú toho sahá yusa naxaa cáhan Jesús saha. Ña cuni Jesús cachi a xihín ná quea cuéntá vaha ná coo na xihín ña jánaha na fariseo xihín na saduceo.

Tá cáxi tuhun ndaa Pedro ña cúu Jesús mé á nachindahá Ndióxi cacomí a cuéntá sahá ñayivi

(Mr. 8:27-30; Lc. 9:18-21)

¹³ Tá naxinu coo Jesús ñundáhyi Cesarea cuéntá Filipo já nandaca tuhún a na xíca tuun xihín á cán já nacachi a já xihín ná:

—Ndá da cáchi ñayivi cúu yehe, da nachindahá Ndióxi nduu ñayivi —nacachi Jesús.

¹⁴ Já nacachi na cán já:

—Java na cáchi na ña cúu ndó Juan, da nacaja nduta ñayivi. Ta java na cáchi na ña cúu ndó profeta Elías. Ta java na cáchi

na ña cúu ndó profeta Jeremías. Ta java na cáchi na ña cúu ndó in táhan profeta nasanduu sanahá —nacachi na.

¹⁵ Anda já nacachi Jesús já xihín ná:

—Ta ndóhó ri, ndá da cáchi ndó cúu u —nacachi a.

¹⁶ Anda já nanducú ñehe Simón Pedro tuhún nu Jesús já nacachi da já xihín á:

—Mé ndó cúu Cristo, ña nachindahá Ndióxi cacomí cuéntá sahá ñayivi. Ta cúu ndó in tuhún jini já jahyi Ndióxi, mé a tácu íin indivi —nacachi da.

¹⁷ Anda já nanducú ñehe Jesús tuhún nu dá já nacachi a já xihín dá:

—Tahví nahá cúun, Simón, jahyi Jonás jáchi ni in tuhún ñayivi coó nacaxi tuhún ña yóho xuhún. In tuhún tátá i, mé a íin indivi nanaha ña yóho nuun.

¹⁸ Ta quiahva joho cáchi ri yehe saha yóho: Yohó cúun Pedro ta quivun cuni cachi a tóto. Ta cúun tátuhun yuu nduhu sahá in vehe nuú cavaha i veñuhu mí i jáchi yóho caca nuún cahún sahá i nuú ñayivi já ná quee vaha na xihín tiñahá sacuahá já ná a cuhún na indayá.

¹⁹ Ta caja i xuhún ña ná cuu ndicanún nuú ñayivi ndaja ndiquiahva na mé ná ndaha i cacomí i cuéntá saha ná. Cacuu a tátuhun quiahva i yávi nuun ña ná cunún íchi nuú ndihvi ñayivi cacomí i cuéntá saha ná. Tá co sáhun ñamaní ná ndihvi ñayivi cán já quea a quiahva toho i ñamaní nu ná. Joo tá sáhun ñamaní nu ná ndihvi na cán já quea quiahva ri yehe ñamaní nu ná —cáchi a xihín Pedro.

²⁰ Anda já nasahnda Jesús chuun nuú na xíca tuun xihín á cán ña ná a cáxi tuhún na xihín ni in tuhún ñayivi ña cúu mé á Cristo, mé á nachindahá Ndióxi cacomí cuéntá sahá ñayivi.

Tá cáxi tuhun Jesús ña quivi a

(Mr. 8:31-9:1; Lc. 9:22-27)

²¹ Ta janda mé quivi já nacasahá Jesús cáxi tuhún a xihín na xíca tuun xihín á ña ndítahan nu a cuhún a ñuu Jerusalén. Ta mé cán ndoho ndivaha ini a ndahá na sacuahá veñuhu xihín ndahá na sacuahá nuú jutú xihín ndahá na jánaha ley Moisés. Ta caja xixi ri na cán va xihín á ta cahní ñahá na. Joo tá ná xinu uní quivi nditacu tucu a.

22 Anda já natavá xóo Pedro Jesús já nacasáhá da jánani ñahá da já nacachi da já xihín á:

—Ama ná yaha ña yóho xihín ndó, xitoho i. Ná a quiahva toho Ndióxi ñamani ndoho ndó já —nacachi Pedro xihín Jesús.

23 Joo nacava nuu Jesús sándehe a nu Pedro ta já cáchi a já xihín dá:

—Cuáhán quee Satanás, rí cúu tiñahá sacuaña. Tá quiahva ín na sáji nuu nu ná quiahva já ún nuú i. Jáchi co cáhvi inún tá quiahva cáhvi ini Ndióxi joo cáhvi inún tá quiahva cáhvi ini ñayivi cuéntá ñuyívi yóho —nacachi Jesús xihín dá.

24 Anda já nacachi Jesús já xihín na xíca tuun xihín a cán:

—Ndá na cúni candico yehe ndítahan nu ná ndíhi chága ini na sahá yehe a juú ga saha mé ná. Ta ndítahan coo tiahva na ndoho ini na sahá yehe. Ta coo caja toho a ná quivi na sahá i.

25 Jáchi ndá na catóo coo chága ñuyívi yóho ndíhi saha ná. Joo ndá na sahan ndeé ini quivi sahá i xihín sahá tuhun Ndióxi, ñehe táhvi ná catacu na anda ama cáa quivi.

26 Vatí ná quee vaha in na ñuyívi yóho ta cómi na tóco ndíhi ñaha ñuyívi yóho joo ndá chuun quea tá nu ndíhi ndíhi saha ná indayá. Jáchi ni in ñaha a cúu chahvi in na saha ínima ná ña ná a cúnun na indayá.

27 Jáchi yehe, da nachindahá Ndióxi nduu ñayivi quixi tucu u xihín ndeé Ndióxi, tátá i ta xihín ndeé tátó Ndióxi. Mé tiempo cán náha ndaja cáhnu cúu yehe. Anda já chahvi i nuú in in ñayivi sahá ñaha nacaja na nani nasanduu na ñuyívi yóho.

28 Mé a ndaa ná cahan i xihín ndo ña java na ndúu yóho a quívi toho na janda quiahva ná xinu quivi cuni na quixi tucu yehe, da nachindahá Ndióxi nduu ñayivi cacomí i cuéntá sahá na cúu cuéntá mí i —cáchi Jesús.

17

Tá nandijama nuu Jesús quiahva cáa (Mr. 9:2-13; Lc. 9:28-36)

1 Tá nayaha iñu quivi já nandaa Jesús in yucú jíco ta ndáca táhan Pedro xihín Jacobo xihín ñani da Juan cuahan na xihín á.

2 Ta nu táhyí mé na cán nandijama quiahva cáa. Ta a juú quiahva nandiyéhe nuu á tá quiahva ndiyéhe candii. Ta jáhma ndíxi a nandiyaa cachí ña ta chí a juú quiahva yehe ña.

3 Ta ndaja coo nandaca náha Moisés xihín Elías ta nacasáhá ndítuhún da xihín Jesús.

4 Anda já nandicahan Pedro xihín Jesús já nacachi da já xihín á:

—Vaha cúu ndúu nde yóho, xitoho nde. Tá cúni ndó cavaña nde uni vehe tiahvá válí. In a coo mé ndó ta inga coo Moisés ta inga coo Elías —cáchi Pedro.

5 Ta nani cahan Pedro nanuu in vico jata ná ta nacava nuu a na. Ta a juú quiahva ndató yehe a. Ta tañu vico cán naxini johu na ña cahan in a ta já cáchi a já:

—Da yóho cúu jahyi maní i ta cáji ini i xihín dá. Cuni johu ndó nu cahan da —nacachi mé a cán.

6 Tá naxini johu na xíca tuun xihín Jesús cán ña cahan yóho já nacaxítí na janda quiahva naxinu nuu ná nu ñúhu. Ta a juú quiahva ná yihví na.

7 Anda já nacayati Jesús nu ná ta nacani ndaa ndáha na já nacachi a já xihín ná:

—Cuándacoo ndó. A cáyihví toho ndó —nacachi Jesús xihín ná.

8 Ta tá nandínehe na cán nuu ná já naxini na ña ín in túhún jini mé va Jesús.

9 Ta tá nanuu na jini yucu cán já nasahnda Jesús chuun nu ná já nacachi a já xihín ná:

—A cáxi tuhun ndó ña naxini ndó yóho nuú ni in ñayivi janda quiahva ná nditacu tucu yehe, da nachindahá Ndióxi nduu ñayivi —nacachi Jesús.

10 Já nacachi na cán já xihín á:

—Ndávaha cáchi na jánaña ley Moisés ña ndítahan quixi jihna ñúhú profeta Elías —nacachi na.

11 Já nacachi Jesús já xihín ná:

—Mé a ndaa jihna ñúhú quixi Elías ta ndaja vaha ndíhi da ñaha.

12 Joo mé a ndaa ná cahan i xihín ndo ña sa naquixi va Elías joo coo naxeen na ndicuni na da. Ta nacaja na tá quiahva cúni mé ná xihín dá. Ta quiahva já jándoho

ri na ini yehe, da nachindahá Ndióxi nduu ñayivi —ñacachi Jesús.

¹³ Anda jáví ñacandaá ini na xíca tuun xihín Jesús cán ña cáhan Jesús saha Juan, da najácandúta ñayivi tá ñacachi a ña sa ñaquixi va Elías.

Tá nandaja vaha Jesús in da loho ndácaan ínimá quini ini

(Mr. 9:14-29; Lc. 9:37-43)

¹⁴ Ta tá sa ñanuu na ta ñaxinu coo na nu ndúu cuahá ñayivi cán já ñaxinu coo in dataa ta já ñacaxítí da nu Jesús. Já ñacachi da já xihín á:

¹⁵ —Candáhví loho ini ndó jahyi i, xitoho i jáchi xihí yihí da ta ndóho ndivaha ini da. Ta cuahá tañu ndícava da nu ñúhu ita á ini ticuú.

¹⁶ Ta ñéhe e da ñacasaá i nuú na xíca tuun xihín ndó yóho joo coo ñacuu ndaja vaha na da —ñacachi da xihín Jesús.

¹⁷ Anda já ñacachi Jesús já:

—Ndáhví nahá ñacuu ndó jáchi sa cuahá ndivaha quivi ín i xihín ndo ta a ñaha candeé ini ndó yehe. Cúú ndó ñayivi quini ndivaha chí co ndeé ga ini i xihín ña cája ndó. Taxi ndó taa loho jan chóho —ñacachi Jesús.

¹⁸ Anda já najánani Jesús rí quini ndácaan ini da loho cán. Chí ñaqueta rí cuahan ri ta mé hora já nandivaha da loho cán.

¹⁹ Tá nandihí já ñacahan jehé na xíca tuun xihín Jesús cán xihín á já ñacachi na já:

—Ndávaha coo ñacuu caja nde tavá nde ínimá quini ñasandacaan ini da loho jan —ñacachi na xihín Jesús.

²⁰ Já ñacachi Jesús já xihín ná:

—Coo ñacuu caja ndó jáchi co candeé cáhnu ini ndó yehe. Mé a ndaa cáhí i xihín ndó, loho tীন ndivaha cáa in ndíqui mostaza joo ndúu dó in yító cáhnu. Tá candeé loho ini ndó yehe viti vaxi quivi candeé chága ini ndó yehe. Anda jáví cuu caja ndó in ñaha ihvi ndivaha tátuhun ña cuu cachi ndó xihín in yúcu ña ná caxoo a ta chí caxoo ndusa ña. Tóco ndihí ñaha cuu caja ndó tá ná candeé ini ndó yehe.

²¹ Joo tá cúni ndó tavá ndó ínimá quini tátuhun rí yóho xíní ñúhú cajuhun ndó ta

caça tahví ndó nu Ndióxi —cáhí Jesús xihín ná.

Tá cáxi tuhun tucu Jesús ña quivi a
(Mr. 9:30-32; Lc. 9:43-45)

²² Ta ndaja coo xíca tútú ndihí na xíca tuun xihín Jesús cán cuahan na xihín á chí estado Galilea. Ta já nandicani Jesús nuú na cán ña tandaa quivi ndiquiahva ñayivi mé á ndáha na cahní ñahá, mé a nachindahá Ndióxi nduu ñayivi.

²³ Ta ñacachi a xihín ná ña tá sa ná vaha uní quivi já nditacu tucu a. Tá ñacachi Jesús ña yóho xihín na xíca tuun xihín á cán já ñacacuéha ndivaha ini na.

Tá nachahvi Jesús jjuhún impuesto cuéntá veñuhu cáhnu ñuu Jerusalén

²⁴ Tá ñaxinu coo Jesús ñuu Capernaum xihín na xíca tuun xihín á já ñaxinu coo na játaca jjuhún impuesto cuéntá veñuhu nu Pedro. Já ñacachi na já xihín dá:

—Á co cháhvi toho Jesús, da jánahá ndohó jan jjuhún impuesto cuéntá veñuhu ñuu Jerusalén —ñacachi na xihín Pedro.

²⁵ Anda já ñacachi Pedro já:

—Cháhvi a ña —ñacachi da.

Anda já nandihvi Pedro ini vehe nu ndácaan Jesús joo jihna ñúhú nandicahan Jesús xihín dá já ñacachi a já:

—Ndía cáhvi inún, Simón. Yo já ndítahan nuu cháhvi jjuhún cuéntá impuesto nuú na sáhdá chuun ñuyíví yóho. Á na ñuu mé ná á na ñuu tóho —ñacachi Jesús.

²⁶ Já ñacachi Pedro já:

—Na tóho va sá cháhvi jjuhún cája na —ñacachi Pedro.

Já ñacachi tucu Jesús já:

—Sahá ña cán quéa mé na ñuu co cháhvi toho na.

²⁷ Joo mí co cúni yo ña ná ndicuíta na xoho sahá ña cán quéa cuhún tañuhú. Ta mé cán tavún tiyacá. Ta rí nu cuítí ná tavún jan candehún yúhu rí jáchi jan nditáhún in jjuhún caa. Ta cañehe a cuhún chahvún saha mún ta saha mí i jáchi queta va —ñacachi Jesús xihín Pedro.

18

Ndicani Jesús ndá na cúu na ín chága saha
(Mr. 9:33-37; Lc. 9:46-48)

¹ Mé tañu já nacayati na xíca tuun xihin Jesús nu á já nacasáhá ndáca tuhún ñahá na já nacachi na já xihin á:

—Yo já cacuu da cáhnu chága tá ná tandaa quivi cacomí Ndióxi cuéntá sahá ñayivi — nacachi na xihin Jesús.

² Anda já nacana Jesús in da loho já nasacandichi a da mahñú java na cán.

³ Já nacachi a já:

—Mé a ndaa ná cahan i xihin ndo ña ndítahan ndaja núu ndó mé ndó ta nduu ndó tátuhun na valí já cuu cacomí Ndióxi cuéntá saha ndo.

⁴ Na cúní cacuu na cáhnu chága tá cacomí Ndióxi cuéntá sahá ñayivi ndítahan nduu na tátuhun in na coó saha ta já nduu na tátuhun ta loho yóho.

⁵ Ta ndá na ná ndiquehe in aloho tátuhun da yóho sahá ña cúní na yehe, na cán cúu na ndiquehe ri na yehe viti.

Tá jándacava ñayivi inga na nuú cuachi
(Mr. 9:42-48; Lc. 17:1-2)

⁶ Ta ndá na ná jándacava in na ndahví, na cándéé ini yehe nuú cuachi janda vaha chága ná candico in yuú yojó jico ná ta ná ndihi sahá na cahá tañuhú.

⁷ Ndahví nahá nacuu ñayivi ñuyiví yóho jáchi mé a ndaa in cuahá ndivaha ña núu ñuyiví yóho. Ña cán quea ndácava cuahá ñayivi nuú cuachi joo ndahví nahá nacuu na jándacava inga na nuú cuachi.

⁸ Sahá ña cán quea tá ndáha ndo á saha ndo jándacava ndohó nuú cuachi, chituhun ndó a ta jácana xíca ndó ña ná cuhun a. Jáchi vaha chága ná cuhun réncó ndó á lundu ndó indivi a juú ga ña ná cuhun ní yiquí cuñu ndó indayá nu cáyi ñúhu ita anda ama cáa quivi.

⁹ Ta tá nduchú núu ndo jándacava ndohó nuú cuachi, tavá ndó ña ta jácana xíca ndó ña ná cuhun a. Jáchi vaha chága ná cuhun ndó indivi xihín in tuhún nduchú núu ndo a juú ga ña ná cuhun ndó xihín ndíví nduchú núu ndo indayá nu cáyi ñúhu ita.

Tá sácú Jesús quiahva sahá in ndicachi, ri nandiñuhú
(Lc. 15:3-7)

¹⁰ Coto a quehe núu ndó ni in na cúu cuéntá mí i jáchi cáchí i xihín ndó ña táto

Ndióxi, mé na ndáa na cán ní tiempo ndíta na nu Ndióxi, tátá i indivi.

¹¹ Jáchi yehe, da nachindahá Ndióxi nduu ñayivi naquixi i jáca cu u ñayivi, na cája cuachi.

¹² Cuni johó ndó ná cahan i xihín ndo: Tá cómi in dataa in ciento ndicachi ta tá ndiñuhú in rí já quea ña cája da quea jándacoo da comi jico sahun comi rí cán yucu ta já quee da cuhun da ndinducú da mé rí nandiñuhú cán.

¹³ Ta tá ndiñehe dá ri cajii chága ini da saha rí nandiñuhú cán a juú ga sahá comi jico sahun comi rí sa ndúu nu dá cán.

¹⁴ Ta quiahva já ndoho ri Ndióxi, tátá i jáchi co cúní mé á ña ná ndihi sahá ni in na cándéé ini mé á.

Ndítahan caja cáhnu iní sahá ñani táhan í
(Lc. 17:3)

¹⁵ Tá cája quini ñani táhan ndó xihín ndo já quea tavá xóo ndó da ta cahan ndó xihín dá ña ná ndicuni da ña a váha toho cája da. Ta tá ná tahvi ini da sahá cuachi cája da já quea sa ndiquehe táhan maní tucu ndó xihín dá.

¹⁶ Joo tá co cúní da cuni johó da nu cahan ndo já quea ndítahan nu ndó cana ndó in á ivi chága ñani táhan ndó já ná cacuu na testigo sahá ña cahan ndo.

¹⁷ Ta tá co cúní da cuni johó da nu cahan na cán xihín dá já quea ndítahan cuhun ndó nu tóco ndihi na cúu cuéntá Jesús táca veñuhu. Ta tá co cúní da cuni johó da nu cahan ndihi na cán xihín dá já quea ndítahan caja ndó xihín dá tá quiahva cája ndó xihín in da tóho, da co cándusa Ndióxi á in da játaca jiuhún cuéntá impuesto.

¹⁸ Mé a ndaa ná cahan i xihín ndo ña tóco ndihi ñaha ná cató ndo ñuyiví yóho candico a janda indivi. Ta tóco ndihi ña ná ndaxi ndo ñuyiví yóho janda indivi ndaxi ña.

¹⁹ Ta jári cahan i ña yóho xihín ndó. Tá jándique táhan tuhún ivi ndó ñuyiví yóho ta tá mé a ndaa in cúu ndó sahá ña xíca tahví ndó nu Ndióxi, mé á in indivi já quea quiahva tátá i ña nu ndo.

²⁰ Jáchi nu ndúu ivi á uní na ta táca na cuéntá mí i já quea tañu na cán ndacaan i — nacachi Jesús.

Tá sácú Jesús quiahva sahá in da co cúní caja cáhnu ini da sahá inga da

²¹ Ta ndaja coo nacayati Pedro ndáca tuhún da Jesús já nacachi da já:

—Xitoho i, ndaja tañu xíní ñúhú caja cáhnu ini i sahá ñani táhan i tá caja núu da xihín i. Á ndítahan nuú i caja cáhnu ini i saha dá janda usa tañu —nacachi da xihín Jesús.

²² Já nacachi Jesús já xihín dá:

—A juú janda usa tañu cuití ndítahan caja cáhnu inún sahá ñani táhún. Vaha janda comi ciento comi jíco uxu tañu ndítahan nuun caja cáhnu inún sahá ñani táhún.

²³ Cáchí i ña yóho xihín ndó jáchi tá cómi Ndióxi cuénta sahá ñayivi cúu á tátuhun ña nayaha xihín in rey tá nacasáhá da jataca da cuénta nuú ña yíca nu dá.

²⁴ Mé tañu já ñéhe na in da yíca cuahá millón nu dá nacasa na.

²⁵ Ta sahá ña coo nacuu चाहvi da ña yíca da sahá ña cán quéa nasahnda rey chuun ña ná jíco ña mé dá xihín ñájíhí da xihín jahyi válí da ta janda ñaha da viti ña ná cuu ndiquehe rey cán cuénta da.

²⁶ Anda já nacaxítí da yíca cán nu mé rey já nacasáhá xíca tahví da já cáchí da já: “Caja ndó ñamani, xitoho i candati too chága ndó yehe, ndáhvi i, já चाहvi ndihi i ña yíca i nu ndo”, nacachi da xíca tahví da nu rey cán.

²⁷ Anda já nacandáhvi ini rey cán da ta nacaja cáhnu ini a saha tóco ndihi ña yíca da já najaní a da cuahan da.

²⁸ “Ta tá naqueta da yíca cán cuahan da já nandique táhan da xihín inga da cúu mozo. Ta mé mozo cán yíca da loho va nuú da cán. Ta já nacasáhá da ndáca yihí da cuénta nuú da cúu mozo jácuahnú ñahá da. Já cáchí da já: “Chahvún ña yícún nuú i”, cáchí da cán.

²⁹ Anda já nandacava xítí mé da cúu mozo cán nu dá já nacasáhá xíca tahví da nu dá já cáchí da já xihín dá: “Cajún ñamani candati too chágún yehe, ndáhvi i, já चाहvi ndihi i ña yíca i nuun”, nacachi da cúu mozo cán.

³⁰ Joo coo naxeen da ta ña nacaja da quéa nasahan da nachicaan da da cúu mozo cán vecaa janda quiahva ná cuu चाहvi ndihi da ña yíca da nu dá.

³¹ Ta tá naxini java ga ña cúu mozo cán ña yóho já nandihíhvi ndivaha ini na ta chí ndáva na nasahan ña nacaxi tuhun na nu mé rey cán ndaja cáa ña nacuu.

³² Anda já xójo ndivaha ini mé rey cán chí nacana da da nasayíca cán já nacachi da já xihín dá: “Mozo quini ndivaha cúu yóho. Cuahá ndivaha jihún nasayícún nuú i joo nacaja cáhnu ini i saha tóco ndihi a jáchi naxíca tahvún nuú i.

³³ Quiahva já ndítahan ri nu yóho va caja cáhnu inún sahá ña yíca ñani táhún nuun jáchi já nacaja i xuhun”, nacachi rey cán.

³⁴ Ta sahá ña xójo ndivaha ini mé rey cán xihín dá sahá ña cán quéa nandiquiahva da da yíca cán ndáha ña jácaxáhan ñahá cán janda quiahva ná चाहvi da saha tóco ndihi ña yíca da —cáchi Jesús.

³⁵ Já nacachi tucu Jesús já:

—Quiahva já caja ri Ndióxi, tátá i, mé a íin indiví xihín ndóhó va tá co cája cáhnu ini ndó sahá ñani táhan ndó xihín ndinuhu ini ndó —cáchi Jesús.

19

Jánaqa Jesús nuú ña sa natandaha ña co ndítahan jándacoo táhan na

(Mr. 10:1-12; Lc. 16:18)

¹ Tá nandihí nacachi Jesús ña yóho já naquee a estado Galilea já naxinu coo a estado Judea, ña íin inga xoo yuta Jordán cán.

² Ta a juú quiahva cuahá ñayivi nandico jatá ta nandaja vaha mé á ña quíhvi.

³ Joo ndaja coo java ña fariseo nacayati na nu Jesús sahá ña coto ndojó ñahá ña cúní ña. Já nacachi na já xihín á:

—Á núná nuú in dataa jándacoo da ñájíhí da saha ndá ña nacuu —nacachi ña fariseo cán.

⁴ Anda já nacachi Jesús já:

—Á a ñaha cahvi ndó tuhun Ndióxi nu cáchí a ña janda mé saha tá nacavaha Ndióxi ñayivi nu cuití já nacavaha dataa ta nacavaha ñáñaha.

⁵ Ta nacachi tucu a ña ndítahan nuú dataa jándacoo da tátá da xihín náná da já ndique táhan da xihín ñájíhí da. Já xinu ndiví ña cán cacuu na tátuhun in víxí yiquí cuñu na.

⁶ Sahá ña cán quéa co cúu ga ña ivi yiquí cuñu sahá ña nanduu na tátuhun in túhún

yiquí cuñu na. Sahá ña cán quéa co ndítahan nuú da cán janí táhan da ña najácátahan Ndióxi tá nātandaha ná —ñacachi Jesús.

⁷ Anda já nandaca tuhún tucu na cán Jesús já ñacachi na já:

—Joo já cachi ndó xihín nde: ndá cuéntá quéa nasahnda ri Moisés chuun ña cuu cavaaha in dataa in tutu quiahva da nu ñájíhí da ta xihín ña cán cuu jándacoo da ña —ñacachi na cán xihín Jesús.

⁸ Já ñacachi Jesús já:

—Sahá ña táhyí ndivaha ínimá ndo sahá ña cán quéa sahan Moisés ñamaní nu ndó ña cuu cavaaha ndó tutu quiahva ndó nu ñájíhí ndo ña ná jándacoo ndó ña. Joo tá ñacavaaha Ndióxi ñayivi nu cuítí coo ñacacúni toho a coo ña yóho.

⁹ Cuni johó ndó ná cahan i xihín ndo. Tá ná jándacoo in dataa ñájíhí da ta co cúu á sahá ña ñacaja ña cuachi xihín inga ta ta tá tándaha dá xihín inga ña já quéa cája da cuachi nu Ndióxi. Ta quiahva já ín ri cuachi da ná tandaha xihín ña ñacandoo cán —cáchi Jesús.

¹⁰ Tá ñaxini johó na xíca tuun xihín Jesús cán ña yóho já ñacachi na já:

—Tá ta quiahva já cája janda vaha chága ná a tándaha ñayivi, dá já —ñacachi na cán.

¹¹ Já ñacachi Jesús já:

—A juú ndihi ñayivi candaa ini ña cahan i yóho. Ndinuhu na ndínuna xíní túní cája Ndióxi, na cán cúu na candaa ini ña yóho.

¹² Ndúu java dataa ta a cuú tandaha da jáchi já ñacacu da ta já ta cúu mé va da. Ta java da a cuú tandaha da jáchi já ñacaja ñayivi xihín ná ta já ta cúu mé va na. Ta java da a tándaha da jáchi cúni da ndiquiahva ní da mé dá nu Ndióxi ña ná cacomí a cuéntá saha dá. Ta ndá ndó, na ndínuna xíní túní, candaa ini ndó ña yóho —ñacachi Jesús.

Cája yí Jesús na valí

(Mr. 10:13-16; Lc. 18:15-17)

¹³ Tá nandihí já ñehe na java na valí ñacasaá na nu Jesús ña ná chinúu a ndahá a jiní ná ta já caca tahví a nu Ndióxi saha ná. Joo ndaja coo na xíca tuun xihín á cán ñacasáhá na cája cuehe na xihín na ndáca na valí cán.

¹⁴ Já ñacachi Jesús xihín na xíca tuun xihín á cán já:

—Quiahva ndó ñamaní ná quixi na valí nuú i ta a cáji nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho —ñacachi Jesús.

¹⁵ Tá nandihí já ñachinúu Jesús ndáha á jiní na valí cán. Anda já ñaquee a cuahan.

Ndítuhún in da cuicá xihín Jesús

(Mr. 10:17-31; Lc. 18:18-30)

¹⁶ Ta ndaja coo ñaxinu in dataa nu ín Jesús ta nandaca tuhún ñahá da já ñacachi da já:

—Maestro, mé ndó cúu ndó ta vaha ña cán quéa ndáca tuhún i ndohó ndía ndítahan caja i já ná ñehe táhvi i cuhun i indiví coo i anda ama cáa quivi —ñacachi da xihín Jesús.

¹⁷ Já ñacachi Jesús já xihín dá:

—Ndá cuéntá quéa cáchún xihín i ña cúu u da vaha. Ni in tuhún toho ñayivi coo cúu ná na vaha ñuyivi yóho. In tuhún Ndióxi cuití va quéa vaha. Tá cúnun catacún nu ín mé á já quéa xíní ñuhú cajún ña sáhdá tuhun Ndióxi —ñacachi Jesús xihín dá.

¹⁸ Já ñacachi da cán já:

—Ndá cúu mé ña ndítahan caja i —ñacachi da.

Já ñacachi Jesús já xihín dá:

—Coto a cáhnún ndíi. Coto a cóun xihín ñájíhí á yí ñani táhún. Coto a cája cuíhnún. Coto a cáhun ña tuhún sahá ñayivi.

¹⁹ Ndítahan caja cáhnún tátún xihín nánún. Ta ndítahan quihvi inún ñani táhún tá quiahva quihvi inún mún —ñacachi Jesús.

²⁰ Já ñacachi da yúta cán já xihín á:

—Janda ta loho nasacuu u ñacasáhá i cája i tóco ndihi ña sáhdá Ndióxi caja i. Ndía cúu ga ndítahan caja i —ñacachi da.

²¹ Já ñacachi Jesús já xihín dá:

—Tá ta cúnun cacuún in ta ndacú nu Ndióxi cuáhán jicún tóco ndihi ñahún jan ta ndacahndún jiuún jan nuú na ndahví já ñehe táhvun coo cuahá ñahún indiví. Ta tá nandihí já quisún candicún yehe —ñacachi Jesús.

²² Tá ñaxini johó da yúta cán ña yóho já ñaquee cuéha ndivaha da cuahan da jáchi da cuicá ndivaha cúu dá.

²³ Anda já nacachi Jesús xihín na xíca tuun xihín á cán já:

—Mé a ndaa ná cachi i xihín ndó ña ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuéntá saha ná.

²⁴ Jáchí janda cama chága cuu yaha in camello ini in yávi sahá yítucú a juú ga ña ná ndiquiahva in da cuicá mé dá ndáha Ndióxi ña ná cacomí a cuéntá saha dá — nacachi a.

²⁵ Tá naxini johó na xíca tuun xihín Jesús cán ña yóho já nacatontó ndivaha na ta nandaca tuhún táhan na já cáchí na já:

—Ndá na cúu na cuu cacu ndaa ínima, dá já —cáchí na.

²⁶ Nandicoto nihni Jesús nu ná já nacachi a já xihín ná:

—Ni in na a cúu caja ña yóho joo Ndióxi quéa cuu caja ña jáchí ni in ñaha co ihvi toho nu Ndióxi —nacachi Jesús.

²⁷ Anda já nacachi Pedro já:

—Joo ndehe, najándacoo ndihi nde ñaha nasacomí nde ta ndíco nde ndohó. Ndía ñehe táhvi nde caja ndó —nacachi Pedro xihín Jesús.

²⁸ Anda já nacachi Jesús já xihín dá:

—Mé a ndaa ná cachi i xihín ndo. Tá ná tandaa quivi nduu saá tóco ndihi ñaha já cacoo yehe, da nachindahá Ndióxi nduu ñayivi nuú ndicáhnu ndivaha i. Ta cán cacoo ri ndóhó, na naxica tuun xihín i nuú uxu ivi táyi vaha. Ta cán caja vií ndó sahá ndíhuxu ivi táhnda na naquixi chichi Israel.

²⁹ Ta ndá na najándacoo vehe na á ñani na á quiahva na á tátá na á náná na á ñájíhí na á jahyi na á ñundáhyi na sahá yehe, na cán cúu na ñehe ná cuaha chága ví ñaha. Ta jatá ña cán ñehe táhvi ná catacu na nu Ndióxi anda ama cáa quivi.

³⁰ Ta ndúu cuahá na ín saha ñuyíví yóho viti joo vaxi quivi cacuu na na coó saha nu Ndióxi. Ta ndúu cuahá na coó saha ñuyíví yóho viti joo vaxi quivi cacuu na na ín saha nu Ndióxi —nacachi Jesús.

20

Sácú Jesús quiahva sahá java da sáhdá uva

¹ Já nacachi Jesús já sácú a quiahva:

—Nuú cacomí Ndióxi cuéntá sahá ñayivi cúu á tátuhun ña yóho: Ín in dataa naha chá naquee da cuahan da nducú da mozo caja chúun da cahnda da uva nu ñúhu dá.

² Ta nacandoo da chahvi da in jihún caa naní denario in quivi. Ta já nachindahá da mé mozo cán cuahan da caja chúun da nu ñúhu dá.

³ Tá nandihí já naquee tucu da xihín ñaha ñúhu cán tátuhun caa in naha já nanditahan da java da ndúu núná uun nuú yahvi.

⁴ Já nacachi mé da xihín ñaha ñúhu cán já: “Cuáhán ri ndóhó va cahnda ndó uva nu ñúhu i ta já chahvi i ndohó tá quiahva ndítahan nu ndó quehe ndó”, nacachi da. Já naquee mozo cán cuahan da jáquee da nu ñúhu dá.

⁵ Ta tá nacuu caxivi já naqueta tucu da xihín ñaha ñúhu cán cuahan da ta natiin da java ga da caja chúun xihín dá. Ta tá nacuu caa uní natiin chága da da jáquee nu ñúhu dá.

⁶ Ta tá nacuu tátuhun caa uhun sahini naqueta tucu da ta nuú yahvi cán naxini chága da da ndúu núná uun. Já nacachi da já xihín da ndúu cán: “Ndá cuéntá quéa sa nacuu ndiví yaa ndúu ndó yóho”, nacachi da xihín da ndúu cán.

⁷ Ta nducú ñehe da cán tuhun já cáchí da já: “Co cája chúun nde jáchí coó na quixi ndúcú nde caja chúun nde”, nacachi da cán. Anda já nacachi da xihín ñaha ñúhu cán já: “Cuáhán ri ndóhó va cahnda ndó uva nu ñúhu i. Ta já chahvi i ndohó tá quiahva ndítahan nu ndó quehe ndó”, nacachi da.

⁸ Ta tá sa nacuaá já nacachi da xihín ñaha ñúhu cán xihín da cómí chuun nu mozo cán ña ná caa da da cúu mozo cán já ná quehe yahvi da sahá chuun nacaja da. Ta da naquihvi nacaja chúun nu ndíhí cán, da cán cúu da jihna ñúhú ná quehe yahvi. Tá nandihí cán ná quehe yahvi da naquihvi nu cuítí.

⁹ Anda já nacasaá da naquihvi caja chúun caa uhun sahini já naquee in in da cán in denario.

¹⁰ Ta ndaja coo tá nacani a nuú da naquihvi caja chúun janda naha cán quehe yahvi da já quéa nacahan da ña cuaha chága jihún ndiquehe da nuú da naquihvi

caa uhun sahini cán. Joo quiahva já in denario naquehe ri in in da cán.

¹¹ Sahá ña cán quea nacasáhá da cáhan cuachí da xihín da xihín ñaha ñúhu cán.

¹² Já nacachi da já: “Da nandai cuu caja chúun nu ndíhi cuí yóho in hora cuití nacaja chúun da. Ta tá quiahva nachahvi ndó ndehe, da nacaja chúun ndiví yaa nu nditahví quiahva já nachahvi ri ndó nuú da cáa va”, nacachi da cáhan cuachí da cán.

¹³ Anda já nacachi da xihín ñaha ñúhu cán xihín in táhan mozo cán já: “Candehé, amigo. Co cája quini toho i xuhun. Á a juú in denario nacandoo i chahvi i nuun.

¹⁴ Júhun ña ndítahan quehún ta cuanúhun. Jáchi cúni chahvi i nuú da nacaja chúun in hora cuití va tá quiahva nacandoo i chahvi i nu yóho.

¹⁵ Jáchi núná nuú i caja i ña cúni mí i xihín jjuhún i. Ta co ndítahan cahíhvi inún sahá ña vaha ini i”, nacachi da xihín ñaha ñúhu cán xihín da cáhan cuachí cán —nacachi Jesús sácú a quiahva.

¹⁶ Ta nacachi tucu a já:

—Sahá ña cán quea ndúu cuahá na ín saha ñuyiví yóho viti joo vaxi quivi cacuu na na coó saha nu Ndióxi. Ta ndúu cuahá na coó saha ñuyiví yóho viti joo vaxi quivi cacuu na na ín saha nu Ndióxi —nacachi a.

*Cáxi tuhun tucu Jesús ña quivi a
(Mr. 10:32-34; Lc. 18:31-34)*

¹⁷ Ta tá sa naquee tucu Jesús cuahan chí Jerusalén já íchi cán natavá xóo a ndíhuxu ivi na xíca tuun xihín á cán já nacachi a já xihín ná:

¹⁸ —Candehé ndo. Yóho ndáa í cuahan yó chí Jerusalén nuú ndiquiahva na yehe, da nachindahá Ndióxi nduu ñayivi ndahá na sacuahá nuú jutú xihín nuú na jánaha ley Moisés. Ta na cán cúu na cacu ini sahá ndaja quivi i.

¹⁹ Anda já ndiquiahva na yehe ndahá na tóho ña ná cuacu ndaa na yehe. Ta cani na yehe ta já cata caa na yehe ndica crúxu joo tá ná yaha uní quivi já nditacu tucu u —nacachi Jesús.

*Tá naxíca náná Jacobo xihín Juan ñamaní nuú Jesús
(Mr. 10:35-45)*

²⁰ Anda já nacayati ñájíhi Zebedeo, ña cúu náná Jacobo xihín Juan nuú Jesús. Ta ndáca ña ndiví jahyí ña nacasaá ña nacaxítí ña nu á jáchi cúni ña caça ña in ñamaní nuú Jesús.

²¹ Anda já nacachi Jesús já xihín ña:

—Ndá quea cúni ndó —nacachi a.

Já nacachi ña cán já:

—Ña cúni quea ná caja ndó ñamaní cahnda ndó chuun ña ná cacoo in in jahyí i xoo jíin ndó. In da xoo cuáha ta in da xoo íti jíin ndó indiví tá ná cacomí ndó cuéntá sahá ñayivi —nacachi ña cán.

²² Anda já nacachi Jesús já xihín ña:

—Co cándaá ini ndó ña xíca ndó nuú i —nacachi a.

Anda já nacachi a já xihín Jacobo xihín Juan cán:

—Á cuu ndoho ini ndó tá quiahva ndítahan nuú i ndoho ini i. Jáchi ña vaxi nuú i ndoho ini i cúu á tátuhun coho i in yáxi ndutá ova. Á ín tiahva ndó ndoho ini ndó tá quiahva ndítahan nuú i ndoho ini i anda quiahva ná quivi i —nacachi Jesús xihín ndiví da cán.

—Cuu caja nde ña —nacachi ndiví da cán xihín Jesús.

²³ Anda já nacachi tucu a já xihín dá:

—Mé a ndaa tandaa quivi coho ndó ña ova ñúhu in yáxi, mé ña coho i. Ta tandaa quivi ndoho ndivaha ini ndó tá quiahva ndoho ini i anda quiahva ná quivi i. Joo sahá ña xíca ndó cacoo in ndó xoo cuáha i ta in ndó xoo íti i a juú yehe cúu dá cuu quiahva i ña nu ndo. Jáchi sa nandicaxi Ndióxi na ñehe táhvi cacoo cán —nacachi a.

²⁴ Joo ndaja coo tá naxini johu ndíhuxu chága na xíca tuun xihín Jesús cán ña yóho já nacasáhá na xójo ini na xihín ndiví da cúu ñani cán.

²⁵ Anda já nacana Jesús tóco ndihi na xíca tuun xihín a cán já nacachi a já xihín ná:

—Sa xíni ndó ndaja cája na sáhndá chuun nuú ñayivi ndúu ñuyiví yóho. Ña cája na quea jácandíhi na ñayivi ta cája na tá quiahva cúni mé ná.

²⁶ Joo co ndítahan coo ña cán tañu mé ndó jáchi ndá da cúni cacuu da cáhnu chága tañu ndó xíni ñúhu cacuu da in da cája chúun cuéntá ndihi ndó.

27 Ta ndá da cúní cacuu da nu cuítí tañu ndóhó ndítahan cacuu da da cája ndíví nuú ndíhi ndó.

28 Jáchi ni yehe, da nachindahá Ndióxi nduu ñayivi coo ñaquixi i ñuyíví yóho ña ná caja ndíví ñayivi nuú i. Ña ñaquixi i caja i quéa caja ndíví i nu ná ta ndiquiahva i mí i quivi i já ná cuu cacu ndaa ínimá cuahá ñayivi ná a cùhun ña indayá —ñacachi a.

*Tá nandaja vaha Jesús ivi da cuaá
(Mr. 10:46-52; Lc. 18:35-43)*

29 Ta tá naqueta Jesús ñuu Jericó xihín ña xíca tuun xihín á cán já ndíco cuahá ndivaha ñayivi jatá cásahan ña.

30 Ta ndaja coo yati jíin íchi cán ñasanduu coo ivi da cuaá ta tá ñaxini johó da ña yáha Jesús cuahan já ñacasáhá ndíví da cáyuhú da já cáchí da já:

—Jesús, da ñaquixi chichi David, caja ndó ñamaní candáhví loho ini ndó ndehe —cáchí da.

31 Andá já ñacasáhá cája cuhe ñayivi xihín ndíví da cuaá cán ña ná catáji yúhu dá. Joo ví ga ví cáyuhú da já cáchí da já:

—Jesús, da ñaquixi chichi David, caja ndó ñamaní candáhví loho ini ndó ndehe —ñacachi da.

32 Andá já nandaca ndichi Jesús já ñacana ndíví da cuaá cán. Ta já nandaca tuhún a da já ñacachi a já xihín dá:

—Ndía cúní ndó ña ná caja i xihín ndo —ñacachi a.

33 Já ñacachi ndíví da cuaá cán já:

—Candehé nde cúní nde, xitoho.

34 Andá já ñacandáhví ini Jesús da ta ñacani ndaa ndáha á nuú dá. Chí ivi laá ñanuna nuú da cuaá cán ta ñacasáhá da ndíco da jatá Jesús cuahan da.

21

*Ndihvi Jesús ñuu Jerusalén
(Mr. 11:1-11; Lc. 19:28-40; Jn. 12:12-19)*

1 Ta tá sa ja chá xinu coo ña ñuu Jerusalén já ñaxinu ña in ñuu loho naní Betfagé yati jíin yúcu naní olivo. Ta cán ñasahnda Jesús chuun nuú ivi táhan da xíca tuun xihín á cán.

2 Já ñacachi a já xihín dá:

—Cuáhán ndó ñuu loho ñan ta tá ná xinu coo ndó ñan ndínehe ndo in búrró jíhí ndíco ndaa rí ta xihín mé rí ñan cándichi inga

búrró loho. Ndaxí ndó rí ta cañehe ndó ndíví rí quixi ndó.

3 Ta ndá ña ná cahan xihín ndo já quéa cachi ndó xihín ná ña xíní ñúhú xitoho ndó rí joo tá ná ndíhi chuun rí já nducú ñehe tucu da rí, já cachi ndó xihín ná —ñacachi Jesús xihín ndíví da cán.

4 Tóco ndíhi ña yóho ñayaha já ná xinu coo nuú ña ñacahyí in da profeta já:

5 Joho cachi ndó xihín ña ñuu Jerusalén: “Candehé ndo. Ndáhví uun cáa da cómí cuéntá saha ndó.

Vaxi da nu ndo ta canúu da jatá búrró jíhí, jahyi in rí ndiójo, canúu da vaxi da nu ndo”, cáchí tuhun Ndióxi.

6 Ta ndíví da xíca tuun xihín Jesús cán ñasahan da ñacaja da tá ín ñasahnda Jesús chuun nuú dá.

7 Já ñehe da búrró jíhí cán xihín búrró loho, jahyi rí ñaxinu ña nuú Jesús. Andá já ñachojó ña cotó ndéé ña jatá rí ta ñandaa Jesús jatá rí.

8 Ta mé cuahá ñayivi ndúu cán ñacasáhá ña chinduu na cotó ndéé ña íchi mé nuú yaha Jesús cán. Ta java na ñacasáhá ña sáhdá ña ndahá yíto ta chinduu na do íchi mé nuú yaha Jesús cùhun a.

9 Ta ñayivi cuahan chí nuú ta jári ña vaxi chí jatá ñacasáhá ña cáyuhú ña já cáchí ña já:

—Cája cáhnu í da ñaquixi chichi David yóho. Ndicáhnu ñahá ná cacuu da cómí cuéntá saha yo jáchi cúu dá da vaxi yuhú nuú Ndióxi. Cáhnu ná cacuu Ndióxi —cáchí ñayivi cuaha cán cáyuhú ña cásahan ña xihín á.

10 Ta tá ñandihvi Jesús ñuu Jerusalén cán tóco ndíhi ñayivi ñacasáhá cátontó ndivaha na. Já cáchí xihín táhan na já:

—Ndá da cúu da yóho —cáchí xihín táhan na.

11 Java táhan ña cán cáchí ña:

—Da yóho cúu in profeta, da ñuu Nazaret cuéntá estado Galilea —cáchí xihín táhan na.

Tá ñataxi Jesús ña ndúu jíco ñaha yéhe veñuhu

(Mr. 11:15-19; Lc. 19:45-48; Jn. 2:13-22)

12 Andá já ñandihvi Jesús veñuhu cáhnu cán já ñacasáhá táxi ndíhi a ña ndúu jíco xihín ña ndúu xéen cán. Ta ñaxíco ñehe a

mesa na ndúu ndíjama jiuhún cán ta naxicó ñehe a táyi sác̄o na ndúu jícó ndijata.

13 Já nacasáhá cáchí a já xihín ndihi na cán já:

—Já cáchí tuhun Ndióxi já: “Vehe mí i cacuu a vehe nuú quixi na caca tahví na nu Ndióxi”, cáchí tuhun Ndióxi. Joo ndóhó nandai cuu ndó yóho caja cuihná ndo nuú ñayivi —nacachi Jesús xihín ná.

14 Tá nandihí já nacayati java na cuaá xihín java na rénc̄o nu á ini mé veñuhu cáhnu cán ta nandaja vaha mé á na.

15 Joo xójo ndivaha ini na sacuaḥa nuú jut̄u xihín na jánaḥa ley Moisés tá naxini na ña xitúhún nacaja mé á ta tá naxini johó na ña cája cáhnu na valí cán mé á tá cáchí na já: “Cája cáhnu í da naquixi chichi David.” Sahá ña cán queá xójo ini na

16 ta já nacachi na já xihín Jesús:

—Á xini johún ña cáhan na valí yóho — nacachi na xihín Jesús.

Já nacachi Jesús já:

—Ajan, xini johó i ña cája cáhnu na Ndióxi.

Á coó nacahvi ndó tuhun Ndióxi nu cáchí a já:

Janda na valí ta janda na chíchí nacaja Ndióxi xihín ná,

ña ná cuu caja cáhnu na mé á, cáchí tuhun Ndióxi —nacachi Jesús xihín na cán.

17 Anda já najándaco a na já naqueta jatá ñuu cán cuahan chí ñuu Betania ta cán nasahjin a.

Tá nachicaan Jesús cháhan jata titó ñuhú (Mr. 11:12-14, 20-26)

18 Ta inga quiví itaan tá nandicó coo a cuahan chí Jerusalén já nacasáhá cuico a cuahan.

19 Ta yuhú íchi cán naxini a cándichi in titó ñuhú. Ta chí nasahan sándehe a á ín cuihi nu do caxí a. Joo coó ñaha ná ndíñehe a. Ndáha uun dó cán cuití va ín. Anda já nacachi a já xihín do:

—Ni in túhún ga tañu a cána cuihi nu yóho —nacachi a xihín do.

Chí ivi laá nahichí titó ñuhú cán.

20 Tá naxini na xica tuun xihín Jesús cán ña yóho já nacatóntó na já cáchí na já:

—Ndá cuéntá queá nahichí titó ñuhú cán ivi tuhun —nacachi na xihín Jesús.

21 Ta nanducú ñehe Jesús tuhun nu ná já nacachi a já:

—Mé a ndaa ná cahan i xihín ndo ña tá ná candeé ini ndó yehe ta ni loho co cáhvi ivi johó ini ndó já queá cuu caja ndó ña náhnu chága nuú ña nacaja i yóho. Ta janda cuu cachi ndó xihín in yucu: “Caxoo ta cuahán jáquetún mún ini tañuhú”, ta chí já ndusa coo.

22 Ta tá ná candeé ini ndó yehe nani xica tahví ndo nu Ndióxi ta co cáhvi ivi johó ini ndó já queá ñehe ndó ña xica ndo nu á — nacachi Jesús.

Tá ndaca tuhún na Jesús yo sahan ndée nu á ña jánaḥa mé á nuú ñayivi

(Mr. 11:27-33; Lc. 20:1-8)

23 Tá nandihí já nandihvi Jesús ini veñuhu cáhnu cán ta nani jánaḥa tuhun Ndióxi nuú na ndúu cán naxinu na sacuaḥa nuú jut̄u xihín na sacuaḥa nuú na Israel cán nu á. Já nacachi na já xihín á:

—Yo já sahan ñamaní nuun cajún ña cájún yóho —nacachi na.

24 Anda já nanducú ñehe Jesús tuhun nu ná já nacachi a já:

—Ta ná ndaca tuhún ri yehe va ndohó ta tá ná nducú ñehe ndó tuhun nuú i anda já caxi tuhun i nu ndó yo já nasahan ñamaní nuú i caja i ña cája i yóho.

25 Ta viti cachi ndó xihín i yo já nachindahá Juan ña ná quixi da caja ndúta dá ñayivi. Á Ndióxi nachindahá da á ñayivi nachindahá ñahá —nacachi Jesús ndaca tuhun a na.

Já nacasáhá ndítuhún xihín táhan na já cáchí na já:

—Tá ná cachí ña Ndióxi queá nachindahá Juan ta já nducú ñehe Jesús tuhun nu yo já cachi da xoho: “Ndá cuéntá queá coo naxeen ndó candúsa ndó da, dá já”, cachi Jesús xoho.

26 Ta tá ná cachí ña ñayivi cúu na nachindahá Juan já yihví yo ña ndicuita ñayivi xihín yo. Jáchí tóco ndihi na cándúsa na ña naquixi Juan jáyaha da ña nacahan Ndióxi nuú ñayivi —cáchí na ndítuhún xihín táhan na.

27 Sahá ña cán queá nacachi na já xihín Jesús:

—Co xini toho nde yo já nachindahá Juan.

Anda já nacachi Jesús já xihín ná:

—Ta ni yehe a cáxi tuhún i nu ndo yo já nasahan ñamaní nuú i caja i ña yóho — nacachi Jesús xihín na cán.

Sácu Jesús quiahva sahá ivi da cúu jahyi in dataa

²⁸ Anda já nacachi tucu Jesús xihín na cán já:

—Cuni johó ndó ña nayaha in tañu. Íin in dataa ta nasahin ivi jahyi ta da. Ta nasahan da nuú in táhan da cán já nacachi da já xihín dá: “Jahyi a, cuáhán caja chúun lohún nu ñuhú i nu cáa tó uva”, nacachi da xihín jahyi da.

²⁹ Já nacachi jahyi da já xihín dá: “A cuhun toho i jáchi co xíca ini i cuhun i”, nacachi da. Joo tá nandihí nacahvi ini da ña a váha ná cuu ini da chí já naquee da cuahan da caja chúun da nu ñuhú tátá da.

³⁰ Ta jári nasahan tátá da cáhan da xihín inga jahyi da ta quiahva já nasahnda ri da chuun nuú da cán. Ta da cán nacachi da já xihín tátá da: “Ajan. Cuhun i”, cáchi da. Joo tá nandihí coo nasahan toho da.

³¹ Ta viti cachi ndó xihín i ndá da cúu da nacaja ña cúni tátá da — nacachi Jesús.

Já nacachi na cán:

—Da nu cuítí.

Anda já nacachi tucu Jesús já:

—Mé a ndaa ná cahan i xihín ndo ña íin chága sahá na jataca jiuhún cuénta impuesto xihín najihí xíca jii ña ná cacomí Ndióxi cuénta sahá ná a juú ga ndohó.

³² Jáchi naquixi Juan, da jácandúta ñayivi najánaha da ndohó ndaja ndítahan caja ndó ta coo naxeen ndó candúsa ndó da. Joo na jataca jiuhún cuénta impuesto xihín najihí xíca jii nacandúsa na ña nacahan da. Ta vatí naxini ndó ña yóho joo coo naxeen ndó ndijama ndó ña cája ndó jáchi coo naxeen ndó candúsa ndó mé Juan.

Sácu Jesús quiahva sahá java mozo, da nacaja quini xihín xitoho da
(Mr. 12:1-12; Lc. 20:9-19)

³³ Cuni johó ndó ná cacu u inga quiahva nu ndo. Nasahin in dataa ta najánde cuaha dá tó uva nu ñuhú dá. Ta nasacu da in corra yito nu do. Ta nacavaha da in nuú cuhní mé uva cán ña cavaha vino.

Ta nacavaha da in nu jícó canúu da já cuu candaa da tóco ndihi dó cán.

Anda já nasahan ndojó da ñuhú dá nuú java na caja chúun na ña. Ta já naquee da cuahan xíca da.

³⁴ Ta tá naxinu tiempo jáquee na já nachindahá da java mozo da ña ná cuhun na nuú na ndúu cája chúun ñuhú da cán ña ná ndiquiahva na nu dá ña cáni nu dá ndiquehe da sahá ñuhú dá ña nasahan ndojó da nuú na cán.

³⁵ Joo ndaja coo na cája chúun nu ñuhú cán natiin na in táhan da cúu mozo da cán ta nacani na da. Ta inga táhan da cán nasahní na. Ta inga táhan da cán nandicuíta ñee na xihín yuu.

³⁶ Joo mé da xihín ñaha ñuhú cán nachindahá cuaha chága da mozo da nasahan da nu ñuhú dá. Ta tá quiahva nacaja na xihín mé java mozo nasahan nu cuítí cán quiahva já nacaja ri na xihín tóco ndihi mozo cán.

³⁷ Tá nandihí já nasacu ini da xihín ñaha ñuhú cán chindahá da jahyi da jáchi nacahán da: “Cája i cuénta coo toní ñuhú na xihín jahyi i”, nacahán da xihín ñaha ñuhú cán.

³⁸ Joo tá naxini na cája chúun ndojó ñuhú cán ña vaxi da cúu jahyi da xihín ñaha ñuhú cán já nacachi xihín táhan na já: “Candehé ndo. Yóho vaxi da cúu jahyi xitoho í. Ta tá ná xinu quivi quivi xitoho í ta da yóho cacuu da ndicojo chuun sahá ñuhú yóho. Cóho cahní yó da já ná candoo ñuhú yóho ndáha mí”, nacachi xihín táhan na cán.

³⁹ Ña cán quea natiin na da ta natavá na da janda yuhú cútu ta cán nasahní na da — nacachi Jesús sácú a quiahva.

⁴⁰ Anda já nandaca tuhún Jesús na ndúu cán já nacachi a já:

—Ndía cáhan ndo caja da xihín ñaha ñuhú yóho xihín na cája chúun nu ñuhú dá — nacachi a.

⁴¹ Anda já nacachi na cán já xihín Jesús:

—Ña caja da quea cahní da na quini, mé na nacaja chúun tóo nu ñuhú da cán. Ta já ndiquiahva ndojó da ñuhú da nuú java ga na ña ná caja chúun na nu á. Ta tá jáquee na ndiquiahva na nu dá ña cáni nu dá ndiquehe da sahá ñuhú dá — nacachi na cán xihín Jesús.

42 Já naçachi Jesús já xihín na cán:

—Á a ñaha cahvi ndó tuhun Ndióxi nu cáchí a:

Mé yuu ña najácana da cávaha vehe, ña cán cúú ña nanduu yuu ndúhu sahá vehe ña ín chága saha.

Ña yóho quéa naçaja Ndióxi, ta cúú á in ñaha cáhnu ndivaha nu yo, cáchí tuhun Ndióxi.

43 Ña cán quéa cáhan i xihín ndó ña cacu xoo Ndióxi ndohó ña ná a cácomí ga mé á cuéntá saha ndo. Ta quiahva mé á ñamaní nuú java ga ñayivi ña ná ndihvi na nuú cacomí Ndióxi cuéntá saha ná, mé na ndiquiahva na nu á ña cáni nu á ndiquehe a.

44 Ta cáchí i xihín ndó ña yehe cúú u tátuhun mé yuu cáhan i saha. Ta ndá na ná ndicava jatá yuu cán chí chachi xéhe na. Quiahva já ndihi sahá ñayivi tá co cúni na candúsa na yehe. Ta tá mé yuu cán ná yaha ndicava jatá in na já caji ndihi ñahá. Quiahva já ndihi sahá ñayivi ini indayá tá co cúni na candúsa na yehe —naçachi Jesús.

45 Tá naxini johu na cúú sacuaña nuú jutú xihín na fariseo cán ña yóho, naçandaa táhyí ini na ña saha mé ná cáhan Jesús.

46 Sahá ña cán quéa nanducú na tiin na mé á joo coo naçuu caja na sahá ña nayihvi na ñayivi jáchi cándúsa ñayivi cán ña cáhan Jesús cuéntá Ndióxi.

22

*Sácú Jesús quiahva sahá vicó tándaha
(Lc. 14:15-24)*

1 Tá nandihvi já naçasahá tucu Jesús jánaña ñayivi xihín ndinuhu quiahva. Já cáchí a já xihín ná:

2—Nuú cacomí Ndióxi cuéntá sahá ñayivi cúú á tátuhun ña nayaha xihín in rey tá naçavaha da in víco ña tándaha jahyi ta da.

3 Nachindahá da mozo da ña ná cuhun da cana da na ndítahan quixi. Joo coo naxeen na quixi na mé víco.

4 Anda já nachindahá chága da mozo da ña ná çaxi tuhun da nuú na ndítahan quixi cán ña sa naçaja ndíví da ña cuxu na. Sa naxihí tindiçui xihín java ga quítí, rí nandaha. Sa naçandíví ndihi ñaha cuéntá víco tándaha sahá ña cán quéa ná quixi na.

Ña yóho cúú chuun natahnda nu mozo cán cachi da xihín na ndítahan quixi cán.

5 Joo co ndáa na cán cuhun na. In táhan da cán naçuee da cuahan da candehé da nu ñúhu dá. Ta inga da naçuee da cuahan da caja ndahvi da.

6 Ta java ga na cán nañiin na mozo mé rey cán ta naçaja xíxi na xihín dá janda quiahva naçahní ñahá na.

7 Anda já naxojo ndivaha ini rey cán sahá ña cán quéa nachindahá da soldado da ña ná cuhun na çahní na na naçahní ndii cán ta ná chicaañ ñúhu dá ñuu na.

8 Anda já naçachi tucu rey cán já xihín java ga mozo da: “Sa naçandíví tóco ndihi ñaha ña coo víco joo na naçana i cán coo saha toho na quixi na víco.

9 Ña cán quéa cuahán ndó ndijáá cáyé náhnu ta ndá ñayivi naçuu cana ndó na ná quixi na víco tándaha yóho”, naçachi rey cán naçahnda da chuun nu mozo da.

10 Anda já naçuee mozo da naçahan na ndijáá cáyé ta ndaja cáa mé ñayivi najátaca na. Ñayivi vaha xihín na quini viti naçaca naçaja na. Ta já najácutú na vehe nuú coo víco tándaha cán xihín ñayivi.

11 Anda já nandihvi rey nu ñúhu na cán já naxini da ndácaañ in dataa, da co ndíxi jáhma ña ndíxi na ndúu víco tándaha.

12 Ta naçayati mé rey nu dá já naçachi da já xihín dá: “Amigo, ndaja naçajún naquihvún yóho tá co ndíxi tohún jáhma ña ndíxi na ndúu víco tándaha”, naçachi rey xihín da cán. Joo coo nanducú ñehe da tuhun nu rey.

13 Anda já naçahnda rey chuun nu mozo da. Já naçachi da já xihín ná: “Cató ndó ndáha dá xihín saha dá. Ta jácana ndó da chí jatá nuú naá yávi. Cán cuacu ndivaha da anda quiahva cañá nuhu da”, cáchí da.

14 Jáchi cuahá ndivaha cúú ná naçana Ndióxi ña ná cacomí a cuéntá saha joo chá cúú ná ndiquiahva na ndáha mé á ña ná cuu çaxi a na —naçachi Jesús.

*Ndáca tuhún na Jesús á ndítahan nu ná çahvi na jühún cuéntá impuesto
(Mr. 12:13-17; Lc. 20:20-26)*

15 Tá nandihvi já naçuee na fariseo naçahan na jándique táhan na tuhun na ndaja caja na coto ndojó na Jesús xihín

tuhun cáhan mé á já ná cuu jácojo na cuachi jatá.

16 Ña cán quéa nachindahá na java na cuéntá mé ná xihín java na cuéntá Herodes nuú Jesús já nacachi na já xihín á:

—Maestro, xini nde ña ndinuhu ña ndaa cáhan mé ndó. Ta cándaá ini nde ña jánaħa ndó ña ndaa saħa íchi cuéntá Ndióxi. Ta co quéhe ndó cuéntá tá cáhan núu ñayivi saħa ndó. Ta cándaá ini nde ña tá cáhan ndó saħa in ñaha cája ñayivi cúu á saħa ña sándehe ndó janda ínimá ná.

17 Sahá ña cán quéa cúni nde candaá ini nde ndía cachi ndó saħa ña yóho: Á ndítahan nuú nde chahvi nde jiuħún cuéntá impuesto nuú da cómi cuéntá saħa ñuu Roma. Á chahvi nde ña á a chahvi toho nde ña —nacachi na cán xihín Jesús.

18 Joo sa nacandaá ini Jesús ña cáhvi núu ini na saħa ña cán quéa nacachi a já xihín ná:

—Co cúu ndó tá quiahva ndaa ndó jáchi cúni ndó coto ndojó cuítí ndó yehe.

19 Jánaħa ndó in táhan jiuħún ña chahvi ndó impuesto jan nuú i —nacachi Jesús.

Anda já nasahan na in jiuħún caa naní denario nu á.

20 Tá naxini Jesús ña yóho já nacachi a já xihín ná:

—Yo nahná ta yo quivi quéa ndaa nu á —nacachi a.

21 Já nacachi na cán já xihín á:

—Ñehe a nahná xihín quivi da cómi cuéntá saħa ñuu Roma —nacachi na.

Anda já nacachi tucu Jesús já:

—Ndiquiahva ndó ña cúu ñaha da cómi cuéntá saħa ñuu Roma jan nu dá. Ta ndiquiahva ndó ña cúu ñaha Ndióxi nu á —nacachi a.

22 Tá naxini johó na cán ña yóho já nacatontó na ta najandacoo na a naquee na cuahan na.

Tá ndaca tuhun na Saduceo Jesús á mé a ndaa nditacu ndii

(Mr. 12:18-27; Lc. 20:27-40)

23 Ta sa mé quivi já nasahan java na saduceo cahan na xihín Jesús. Ta mé na saduceo yóho co cándusa na ña nditacu tucu na sa naxihi. Sahá ña cán quéa nandaca tuhún na Jesús já cáchi na já xihín á:

24 —Maestro, nu ley nacahyí Moisés sanahá natahnda chuun ta cáchi a já: “Tá tándaħa in dataa xihín ñájíhi da ta tá xihí da ta coó jahyi da cácu já quéa ndítahan nuú ñani da tándaħa dá xihín ña cuáan nacandoo cán. Ta já ná coo jahyi da cán xihín yuhú nuú ñani da”, cáchi ley Moisés.

25 Ta viti cuni johó ndó ná cacu nde in quiahva nu ndó. Tañu mé nde yóho nasanduu usa ñani. Ta da nu cuítí cán natandaħa dá xihín in ñañaħa. Tá nandíhi já naxihi da. Joo saħa ña coó jahyi da nacacu xihín ñájíhi da saħa ña cán quéa nandiquehe ñani da, da chí ivi jata dá ña cuáan cán.

26 Ta quiahva já nandoho ri da chí ivi cán jáchi naxihi da ta coó jahyi da nacacu xihín ña. Ta janda ndíhusa ñani cán natandaħa xihín ña ta ndíhusa da naxihi ta ni in da coó nacacu jahyi xihín ña.

27 Ta tá nu ndíhi naxihi ri ñañaħa cán va.

28 Ta viti cachi ndó xihín nde tá ná xinú quivi nditacu tucu ndii, ndá da cacuu ndusa yí ña cán jáchi ndíhusa ñani cán natandaħa xihín ña ñuyívi yóho —nacachi na saduceo cán xihín Jesús.

29 Anda já nacachi Jesús já:

—A váha toho cáhan ndó jáchi co xini ndó ndaja cáhan tuhun Ndióxi ta ni co xini ndó ndá quiahva cáhnu cúu ndée Ndióxi.

30 Jáchi mé quivi tá ná nditacu tucu ndii a tándaħa ga ná ta ni a quiahva na jahyi jíhi na tándaħa ná. Cacuu na tá tuhun táto Ndióxi ndúu indivi ta co tándaħa na cán.

31 Joo sa xini yo ña nditacu tucu ndii. Á a ñaha cahvi ndó tuhun Ndióxi nu cáchi a já:

32 “Yehe cúu Ndióxi ña cája cáhnu Abraham ta yehe cúu Ndióxi ña cája cáhnu Isaac ta yehe cúu Ndióxi ña cája cáhnu Jacob viti”, nacachi a. Ta ña yóho cúni cachi a ña tácu yí va Abraham xihín Isaac xihín Jacob vatí sa naxihi yiquí cuñu na —nacachi Jesús.

33 Tá naxini johó ñayivi ndúu cán ña yóho já nacatontó na xihín ña jánaħa Jesús nu ná.

Tá cáhan Jesús ndá ley quéa cáhnu chága
(Mr. 12:28-34)

34 Tá nañehé na fariseo tuhun ña naquee váha Jesús nasahnu a nuú na saduceo já nanditútu ndíhi na.

³⁵ Ta in táhan mé da cán, da jánaḥa ley Moisés nandaca tuhún da Jesús jáchi cúní da coto ndojó da mé á. Já nācachi da já:

³⁶ —Maestro, ndía cúú ña cáhnu chága sáhdá ley Moisés caja í —nācachi da cán xihín Jesús.

³⁷ Já nācachi Jesús já xihín dá:

—Ña cáhnu chága nu ley Moisés cúú ña yóho: “Ndítahan quihvi ini ndó Ndióxi, xitoho ndó xihín tóco ndihi ínimā ndó ta xihín ndinuhu ini ndó ta xihín tóco ndihi xíní túní ndo.”

³⁸ Ña yóho cúú ley nu cuítí ta cúú á ña cáhnu chága nu tóco ndihi ley.

³⁹ Ta tá quiahva íin ña nu cuítí yóho quiahva já íin ri ña chí ivi va ta cáchí a já: “Xíní ñúhú quihvi ini ndó ñani táhan ndó tá quiahva quihvi ini ndó mé ndó.”

⁴⁰ Ta jata ndíví ña yóho tীন tóco ndihi ley Moisés xihín ña najánaḥa na profeta sanahá —nācachi Jesús xihín na fariseo cán.

Ndáca tuhún na Jesús ndáchí naquixi a
(Mr. 12:35-37; Lc. 20:41-44)

⁴¹ Ta nani nanditútú ndihi na fariseo ndúu na nu Jesús cán já nandaca tuhún a na.

⁴² Já nācachi a já xihín ná:

—Ndía cáhvi ini ndó saḥa Cristo. Ndá chichi cáhán ndo vaxi a —nācachi Jesús xihín ná.

Já nācachi na cán já:

—Vaxi a chichi David, da nasacuu rey sanahá —nācachi na cán xihín Jesús.

⁴³ Anda já nācachi tucu Jesús já xihín ná:

—Tá ta mé a ndaa vaxi Cristo chichi David ndá cuéntá quēa nācachi da ña cúú á xitoho da. Jáchi nāchutú ndaa ínimā David xihín ínimā yii Ndióxi tá nācahyí da já:

⁴⁴ Já nācachi Ndióxi xihín xitoho i:

“Cacoo xoo cuáha i yóho janda quiahva ná caja i ña ná cacomún cuéntá saḥa na co cúní yohó”, nācachi Ndióxi, nācachi David.

⁴⁵ Ndávaḥa cáchí na ña vaxi Cristo chichi David tá ta sa mé David nācachi da ña cúú á xitoho da —nācachi Jesús.

⁴⁶ Ta chí ni in na coo nācuu caja nducú ñeḥe na tuhun nu á. Ta janda mé quivi já ni in ga na coo nasahan ndeé ini ndaca tuhún chága na mé á.

23

Chicaan Jesús cuachi jatá na fariseo xihín jatá na jánaḥa ley Moisés

(Mr. 12:38-40; Lc. 11:37-54; 20:45-47)

¹ Anda já nācachi Jesús já xihín tóco ndihi ñayivi ta xihín na xíca tuun xihín á cán já:

² —Na jánaḥa ley xihín na fariseo cúú ná na ndítahan nu ndicani na ña cúní cachi ley Moisés.

³ Ña cán quēa xíní ñúhú caja ndó tóco ndihi ña jánaḥa na nu ndo. Joo a cája toho ndó tá quiahva cája mé ná jáchi co cája na ña jánaḥa mé va na.

⁴ Jáchi cája na ña ná coo ihvi ndivaḥa ley janda quiahva co ndeé ini ñayivi cája na ña. Joo mé ná ni loho tীন co chindeé ñahá na.

⁵ Ta cája na tóco ndihi ñaha ña ná cuni ñayivi na jáchi cátóo na candico listoni náhnu jini ná xihín jico ndáḥa ná nu ndaa tuhun Ndióxi. Ta cátóo na coo lānda chága yuhú jáhma ná a juú ga java ga ñayivi.

⁶ Ta tá cuahan na víco cátóo na coo na nuú vaha cuítí va. Ta tá quihvi na veñuhu cátóo na cacoo na nu sácoo na íin chága saḥa.

⁷ Ta cátóo na ña ná caḥan toní ñúhú ndivaḥa ñayivi xihín ná tá xíca nuu na nuú yahvi. Ta chí a juú quiahva cátóo na ña ná cachi ñayivi 'maestro' xihín ná.

⁸ Joo ndóhó co ndítahan nu ndó nducú ndó ña ná caḥan ñayivi 'maestro' xihín ndo. Jáchi in ñani cúú ndihi ndó ta in tuhún cúú maestro ndo, mé á cúú Cristo.

⁹ Ta a caḥan ndo tátá cáhnu xihín ni in ñayivi ñuyiví yóho jáchi in tuhún Ndióxi cúú á tátá ndo ta mé á íin a indiví.

¹⁰ Ta a nducú ndo ña ná caḥan ñayivi 'jefe' xihín ndó jáchi in tuhún laá va cúú jefe ndo, mé a cúú Cristo.

¹¹ Ndá da cúú da cáhnu chága tañu ndó xíní ñúhú da cája chúun da saḥa ndihi ndó.

¹² Jáchi ndá na ndíñeḥe jícó mé, jánuu ndáḥa Ndióxi na. Joo ndá na jánuu ndáḥa mé nu Ndióxi, jándíñeḥe jícó mé á na.

¹³ 'Ndáhví nācuu ndó, na jánaḥa ley Moisés xihín na fariseo jáchi co cúú ndó tá quiahva ndaa ndó. Jáchi sájí nuu ndó nuú ñayivi já ná a cuú cacomí Ndióxi cuéntá saḥa ná. Ta ni ndóhó co ndíquiahva ndó mé ndó ndáḥa Ndióxi ná cacomí a cuéntá saḥa

ndo. Ta cája ndó ña ná a cúu candaa ini ñayivi ndaja caja na ndiquiahva na mé ná ndáha Ndióxi.

14 Ndáhví nahá nacuu ndó, na jánaha ley Moisés xihín na fariseo jáchi co cúu ndó tá quiahva ndaa ndó. Jáchi cándaa ndó vehe najihí cuaan ta tá nandihí cuahá ndivaha xíca tahví ndo nu Ndióxi jáchi cúni ndó jájahví ndó nuú ña núu cája ndó. Sahá ña cán queá cáhí i xihín ndó ña ndóhó cacuu ndó na ndoho chága ini, caja Ndióxi.

15 Ndáhví nahá nacuu ndó, na jánaha ley Moisés xihín na fariseo jáchi co cúu ndó tá quiahva ndaa ndó. Jáchi a juú quiahva xíca nuu ndó ndúcú ndo in tálaá ñayivi ña ná candico na ña jánaha ndo. Ta tá sa nandaja ndó na cuénta mé ndó já cája chága na cuachi janda cáni a nu ná ndoho chága ini na indayá a juú ga mé ndó.

16 Ndáhví nahá nacuu ndó jáchi cúu ndó tátuhun na cuaá ndáca inga na cuaá. Jáchi jánaha ndó ñayivi ña tá sahan na tuhun na nuú inga ñayivi nani táva na quivi veñuhu cáhnu já queá co ndúsa jáxinu coo na tuhun na. Joo cáhí ndo ña tá táva na quivi jihun cuaan ndacaan veñuhu cáhnu já queá ndúsa jáxinu coo na tuhun na, já cáhí ndo.

17 Joo tóntó ndivaha ndó ta cúu ndó tátuhun na cuaá viti. Jáchi co cándaa ini ndó ña ín chága sahá veñuhu cáhnu a juú ga sahá jihun cuaan jáchi mé jihun cuaan cúu á cuénta Ndióxi sahá ña ndacaan ini veñuhu cáhnu ña cúu cuénta mé á.

18 Ta inga tucu ña jánaha ndó nuú ñayivi cúu ña yóho: Tá sahan in na tuhun na nuú ñayivi nani táva na quivi nu ná Ndióxi já queá co ndúsa jáxinu coo na tuhun na. Joo cáhí ndo ña tá táva ñayivi quivi ña sájoço na cánúu nu ná cán já queá ndúsa jáxinu coo na tuhun na, já cáhí ndo.

19 Joo tóntó ndivaha ndó ta cúu ndó tátuhun na cuaá. Jáchi ín chága sahá nu ná cán a juú ga sahá ña sájoço na cánúu nu ná jáchi ña sájoço na cán cúu á cuénta Ndióxi sahá ña cánúu a nu ná cuénta mé á.

20 Sahá ña cán queá ndá na táva quivi nu ná já queá táva ndihí ri na quivi tóco ndihí ña sájoço na cánúu nu ná cán.

21 Ta ndá na táva quivi veñuhu cáhnu já queá táva ri na quivi Ndióxi jáchi cán ín mé

á.

22 Ta ndá na táva quivi indiví já queá táva ri na quivi Ndióxi xihín quivi nu sáço a sáhdá a chuun.

23 Ndáhví nahá nacuu ndó, na jánaha ley Moisés xihín na fariseo jáchi co cúu ndó tá quiahva ndaa ndó. Mé ndó cávaha ndó uxu táhdá ña jáquee ndó ñundáhyi ndo ta sahan ndó in táhdá ña nu Ndióxi. Já cája ndó anda yucu válí ña támi sahan tátuhun menta xihín anís xihín comino. Joo co cája ndó ña ín chága saha ña sáhdá ley Moisés. Jáchi co cája ndó ña ndaa ta co cándáhví ini ndó ñayivi ta co cándeé ini ndó Ndióxi tá quiahva sáhdá ley caja ndó. Mé a ndaa xíní ñúhu cája ndó tóco ndihí ña yóho joo a jándacoo ndó ña jóço ndó nu Ndióxi in táhdá nuú uxu táhdá ña ñéhe ndó.

24 Mé ndó cúu ndó tátuhun na cuaá ndáca inga na cuaá. Jáchi ndinuhu ini ndó cája ndó ña coo cuahá saha cuénta ley Moisés joo sácu xoo ndó ña ín chága saha nu Ndióxi caja ndó. Cúu ndó tátuhun in da ndíhi ini da tavá da in ndicama loho ndacaan tása da ná a cóco da ri. Joo co íhvi toho nu dá cóco da in camello.

25 Ndáhví nahá nacuu ndó, na jánaha ley Moisés xihín na fariseo jáchi co cúu ndó tá quiahva ndaa ndó. Jáchi ndíhi ini ndó caja ndó costumbre ña ndícata ndó jata vaso xihín jata coho joo ña ñúhu ini a cán najátaca cuíhná ndo sahá ña ndiáva ndivaha ini ndó ña núu.

26 Ndáhví nahá nacuu ndó, na fariseo jáchi cúu ndó tátuhun na cuaá. Ña ndítahan caja ndó nu cuítí queá ndaja vii ndó ínima ndó já cacuu ndó tátuhun in vaso á in coho sa nandicata vaha na jáchi nandivií ini a xihín jata viti.

27 Ndáhví nahá nacuu ndó, na jánaha ley Moisés xihín na fariseo jáchi co cúu ndó tá quiahva ndaa ndó. Cúu ndó tátuhun vehe válí ndíta camasanto nu táan na ndii. Ndató jándicuchu na jata joo chí ini a a juú quiahva quini sahan jáchi ndinuhu lásá ndii ñúhu ini a.

28 Quiahva já cúu mé ndó jáchi ndaa ndó tátuhun ñayivi vaha ndivaha. Joo mé a ndaa co cúu ndó tá quiahva ndaa ndó jáchi ndinuhu ña núu ndacaan ínima ndo.

29 'Ndáhví nahá nacuu ndó, na jánaha ley Moisés xihín na fariseo jáchi co cúu ndó tá quiahva ndáa ndó. Cávaaha ndó vehe válí ndíta camasanto nuú cañuhu lásá na nasacuu profeta sanahá ta jácacutú ndó nuú nanduxu na nacaja ndaa.

30 Ta cáchi ndo já: “Ta tá nasanduu nde tiempo nasanduu tásáhnú jícó yo sanahá ta chí a chindeé toho nde na nasahní profeta, na nasanduu sanahá”, cáchi ndo.

31 Ta xihín ña yóho náha táhyí a ña naquixi ndó chichi na nasahní profeta sanahá.

32 Cuahán ndo jáxinu coo ndó mé cuachi nacasáhá cája tásáhnú jícó ndo sanahá.

33 'Mé ndó cúu ndó tátuhun coo jáchi cája ndó tá quiahva cája coo. A cuú cacu ndaa ínima ndó ta chí tandaa quivi cuhun ndó indayá nu ndoho ndivaha ini ndó.

34 Sahá ña cán quéa yehe chindahá i java profeta nu ndo xihín java na ndichí xihín java na jánaha tuhun Ndióxi nu ndo. Joo java na cahni ndó na ta java na cata caa ndó na ndica crúxu ta java na cani ndó na ini veñuhu ta java na taxi ndó na tá ñuu tá ñuu.

35 Ña cán quéa caça Ndióxi cuéntá nu ndó saha tóco ndihi ñayivi ndaa, na nasahní ndo sanahá. Caça mé á cuéntá saha Abel, da nasacuu da ndaa janda quiahva naxinu coo a nuú caça mé á cuéntá saha Zacarías, da nasacuu jahyi Berequías. Mé da yóho nasahní ndó ini veñuhu tañu nu náa xihín nuú yí ndivaha.

36 Mé a ndaa ná cahan i xihín ndo ña caça Ndióxi cuéntá saha tóco ndihi ndii jan nuú ñayivi ndúu tiempo viti.

Tá sácu Jesús sahá ñayivi ndúu ñuu Jerusalén

(Lc. 13:34-35)

37 'Ndáhví nahá nacuu ndó, na ndúu ñuu Jerusalén. Jáchi sáhní ndó na profeta. Ta ndicuíta ndó cani ndó na xihín yuu na nachindahá Ndióxi nu ndó. Cuahá ndivaha tañu cuni jándataca ndihi i ndohó joo coo naxeen ndó cuni johó ndó. Cúu á tá quiahva cája nduxú tá játa rí jahyi válí rí tixi ndixi rí.

38 Ta viti cuni johó ndó ña cahan i xihín ndo. Vaxi quivi tá janí ndáha mé vehe ndó candoo a.

39 Ta mé a ndaa ná cahan i xihín ndó ña a cuní ga ndó yehe janda quiahva ná xinu coo quivi cachi ndó: “Cáhnú nahá ná cacuu da vaxi cuéntá Ndióxi, xitoho í”, cachi ndó —nacachi Jesús xihín na cán.

24

Cáxi tuhun Jesús ña vaxi quivi ndihi sahá veñuhu cáhnú ndácaan ñuu Jerusalén
(Mr. 13:1-2; Lc. 21:5-6)

1 Ta tá sa naquee Jesús veñuhu cáhnú Jerusalén cán cuahan já nacativi na xíca tuun xihín á nu á ta nacasáhá na cahan na xihín á ndá quiahva cáa veñuhu cán.

2 Joo nanducú ñehe Jesús tuhun nu ná já nacachi a já:

—Mé a ndaa ná cahan i xihín ndo ña janda ni in yuu yóho a cándo jatá inga yuu jáchi vaxi quivi tá nditaní ndihi ña yóho —nacachi Jesús xihín na xíca tuun xihín á cán.

Ña coo tá sa nacayati quivi ndihi sahá ñuyiví
(Mr. 13:3-23; Lc. 21:7-24; 17:22-24)

3 Anda já naquee Jesús cuahan chí yúcu nu cáa yitó olivo xihín na xíca tuun xihín á. Ta nani ndúu na cán nacativi na xíca tuun xihín á nu in coo a cán já nacasáhá ndáca tuhún xóo na a já nacachi na já xihín á:

—Cúni nde ña ná caxi tuhun ndó xihín nde ndá ama coo tóco ndihi ña yóho. Ta ndaja coo tá ná xinu coo quivi quixi tucu ndó ñuyiví yóho. Ta ndaja coo tá ná ndihi saha ñuyiví —nacachi na xihín Jesús.

4 Já nacachi Jesús já:

—Cuéntá coo ndó ná a jándahvi ni in na ndohó.

5 Jáchi cuahá ndivaha na quixi na cuéntá mí i ta cahan na ña tuhún tá cachi na já xihín ndo: “Yehe cúu Cristo, da nachindahá Ndióxi cacomí cuéntá sahá ñayivi”, cachi na. Ta xihín ña yóho cuahá ndivaha ñayivi jándahvi na.

6 Ta jándá johó ñehe ndó tuhun ña ndicuíta ñayivi cani táhan na yóho á cáa. Joo a cáyihví toho ndó jáchi já ndítahan coo. Joo ña yóho coo cuni cachi a ña naxinu coo quivi nu ndihí.

7 Jáchi ñayivi ndúu in nación ndicuíta na cani táhan na xihín na ndúu inga nación.

Ta quixi tama ta quixi cuehe ta ndaja táhan quixi a táan.

⁸ Ta ña yóho cacuu a tondóhó ña casáhá jihna ñúhú vaxi nuú ñayivi jáchi cámanj xinu coo nuú ndoho chága ini na.

⁹ Andá já tiin na ndohó ta ndiquiahva na ndohó ndahá na co cúnj ndohó já ná caja xíxi na xihin ndo. Ta cahni na ndohó ta tóco ndihi ñayivi ndúu ñuyiví candají na ndohó sahá yehe.

¹⁰ Ta mé tañu já cuaha ná jándacoo na ña candee ini na yehe ta ndaja táhan mé ná candají táhan na ta ndaja mé ná jicó túhún táhan na.

¹¹ Ta quixi cuahá ndivaha na tuhún ta cachi na cúu ná profeta cuéntá Ndióxi joo jándahvi na cuahá ndivaha ñayivi.

¹² Ta sahá ña ndicuahá ndivaha ña núu ñuyiví yóho sahá ña cán queá jándacoo cuahá ñayivi ña quíhvi ini táhan na.

¹³ Joo ndá ná ná candico tuun íchi mí j janda ná xinu quivi quivi na, na cán cacuu na cacu ndaa inima.

¹⁴ Ta níi cúu ñuyiví ndicuita nuu tuhun vaha cahan sahá yehe já ná candaa ini ñayivi ndá quiahva cacomí Ndióxi cuéntá saha ná. Andá jáví ndihi saha ñuyiví.

¹⁵ Na cáhvi tutu ná candaa ini na ña cahan. Sanahá nacahyí profeta Daniel sahá in ña quini ña játiví ñahá. Tá ná cuni ndó ña xinu coo ña yóho nuú yij cuéntá Ndióxi

¹⁶ Já queá ndá na ndúu estado Judea xini ñúhú cunu na cuhun na chí yucu.

¹⁷ Ta ndá na cándójó jini véhe, co ndítahan nuu na tavá na ndá ñaha vehe na.

¹⁸ Ta ndá na ndúu yucu, ná a ndícó coo na vehe na ndiquehe na jáhma ná.

¹⁹ Ndáhví nacuu najihí, na ñúhu jahyi mé quivi já. Ta ndáhví nacuu najihí na néhe ndaa na valí táhan ña chíchí yij.

²⁰ Caca tahví ndo nu Ndióxi ña ná a cacuu a tiempo vixi tá ná cunu ndó cuhun ndo. Ta caca tahví ndo nu á ña ná a cacuu a quivi ndiquehe ndée ná.

²¹ Jáchi quivi ndoho ndivaha ini ñayivi cacuu a cán. Jáchi janda tá nacava sahá saha ñuyiví coo ndoho ini na tá quiahva ndoho ini na mé quivi já. Ta tá ná yaha ña jan, a ndícó coo ga ña ndoho ini na quiahva já.

²² Ta tá ná a ndája cuítí Ndióxi tiempo cán ni in ñayivi a cúu cacu ndaa. Joo sahá na sa nacaxi mé á sahá na cán ndaja cuítí mé á tiempo cán.

²³ Ta tá ná cachi in na xihin ndo: “Candehé ndo. Yóho in Cristo, da nachindahá Ndióxi cacomí a cuéntá sahá ñayivi.” Á tá ná cachi na: “Candehé ndo. Caa in da”, cachi na, já queá a cándúsa toho ndó na.

²⁴ Jáchi quixi cuahá na jándahvi ndohó ta ndaja na mé ná tátuhun Cristo. Joo a juú Cristo cúu ná. Ta quixi cuaha ná ta cachi na cahan na cuéntá Ndióxi ta jári caja na cuahá ndivaha ña náhnu xihín ña xitúhún ña ná jándahvi na ñayivi. Ta janda na sa nacaxi Ndióxi jándahvi na tá ná cuu caja na ña.

²⁵ Candehé ndo jáchi sa nacaxi tuhun yachi ndihi i ña yóho xihin ndo.

²⁶ Ña cán queá tá ná cachi na xihin ndo: “Candehé ndo. Yucú íchí caa in Cristo.” Já queá a cuhun ndó jan. Á tá ná cachi na xihin ndo: “Candehé ndo. Ini vehe yóho ndácaan da cúu Cristo.” A cándúsa ndó na.

²⁷ Jáchi tá quiahva yehe tása queá xoo nu cán candii ta xójo cava indivi quiahva já queta yehe, da nachindahá Ndióxi nduu ñayivi.

²⁸ Mé nu candúhu yiquí cuñu ndii cán cacuu nuú ndicutú tiyocó canduu rí.

Ndá quiahva coo tá ná quixi tucu Jesu-cristo

(Mr. 13:24-37; Lc. 21:25-33; 17:26-30, 34-36)

²⁹ Ta ivi laá tá jacá nayaha quivi ndoho nahá ini na cán já canaa nuú candii ta ni a ndíyehe ga yoo ta janda indivi quee quimi cuyu rí nu ñúhu ta janda indivi ña nacavaha Ndióxi ndiquiji nuu.

³⁰ Andá já ndaca náha ña xitúhún indivi já candaa ini ñayivi ña vaxi yehe, da nachindahá Ndióxi nduu ñayivi. Ta ndaja táhan ñayivi ndúu níi cúu sahá ñuyiví ndahyi cóhó na ta já cuni na yehe quixi i tañu vico indivi xihin tóco ndihi ndee e ta cuni na ndá quiahva cáhnu cúu yehe.

³¹ Ta já chindahá i táto mí i ña ná tiví cóhó na trompeta já ná nditaca tóco ndihi

na naçaxi i tañu tóco ndihi ñuu janda ní cúu saha ñuyívi ta janda ní cúu sahá indivi.

³² Jácua ha ndó ña cuni cachi mé quiahva sácú u nu ndó sahá yító tító ñuhú. Jáchí tá yúta ndáha dó cán ta já vaxi núma válí do já candaa ini ndó ña sa naçayati tiempo ihní.

³³ Quiahva já cuu candaa ini ndó ña tá ná cuni ndó ña sa cúu tóco ndihi ña naçachi i xihín ndo yóho já cuu candaa cáxi ini ndó ña sa naçayati tiempo quixi tucu yehe ñuyívi yóho.

³⁴ Mé a ndaa ná cahan i xihín ndo ña yaha tóco ndihi ña yóho ta anda jávi quivi na ndúu tiempo viti.

³⁵ Ta ndihi saha indivi xihín ñuyívi joo a ndíhi toho sahá tuhun naçahan i xihín ndo yóho jáchí coo tá coo tá quiahva naçachi i yóho.

³⁶ Joo ni in túhún toho ñayivi co xini na ndá quivi á ndá hora yaha ña yóho. Ni mé tátó Ndióxi ndúu indivi co xini na ndá quivi coo ña yóho. Ta ni yehe, da cúu in túhún jini já jahyi Ndióxi co xini ndá quivi coo ña yóho. In túhún Ndióxi, tátá i quéa xini a.

³⁷ Tá quiahva nayaha tiempo tá nasahjin Noé sanahá quiahva já yaha ri tá ná tандаa quivi quixi tucu yehe, da nachindahá Ndióxi nduu ñayivi.

³⁸ Jáchí mé tiempo cán tá cámaní cuun javi quini cán já cáxixi ñayivi ta cáxihi na ta tándaha ná ndúu na janda quiahva naquihvi Noé ini barco cáhnu cán.

³⁹ Ta coo naquehe na cuénta janda quiahva na xinu coo javi quini cán ta najánaa dó sahá ndihi na. Quiahva já a quéhe na cuénta saha ndá quivi quixi yehe, da nachindahá Ndióxi nduu ñayivi.

⁴⁰ Mé tiempo já canduu ivi dataa xútu da ta in da ndindita cuhun xihín i ta inga da candoo va.

⁴¹ Ta canduu ivi najihí ndíco na ta in ña ndindita cuhun xihín i ta inga ña candoo va.

⁴² Xini ñuhú coo tiahva vaha ndó jáchí co xini ndó ndá quivi quixi tucu xitoho ndó.

⁴³ Xini ñuhú candaa vaha ini ndó ña tá xini in dataa ndá hora cuni quihvi taa cuhna vehe da já quéa a cúju toho da jáchí candaa vaha da vehe da já ná a quihvi da cuhna vehe da.

⁴⁴ Sahá ña cán quéa ndítahan canduu tiahva ri ndóhó va. Jáchí xinu coo yehe, da nachindahá Ndióxi nduu ñayivi mé hora tá coo cáhán ndo xinu coo i nu ndo.

Da cája chúun vaha ta da coo cája chúun vaha

(Lc. 12:41-48)

⁴⁵ Mé ndó ndítahan nu ndó cacuu ndó tátuhun in da ndíchí jini, da cája chúun vaha nuú xitoho da. Ta najándacoo xitoho da chuun ndáha dá ña ná quiahva da cuxu na java ga cúu mozo xihín da cán. Anda já naquee xitoho da cuahan da.

⁴⁶ Tahví naçuu mé mozo cán tá xinu coo xitoho da ta ndítahan da cája chuun yii va da ña naçandoo nu dá caja da.

⁴⁷ Mé a ndaa ná cahan i xihín ndo ña quiahva xitoho da cán chuun nu dá ña ná cacomí da cuénta saha tóco ndihi ñaha comí xitoho da.

⁴⁸ Joo tá casáha da cája núu da ta cáhán da ña cayancá ndivaha xitoho da ndicó coo da.

⁴⁹ Ta sahá ña cán quéa casáha da cája xixi da xihín java ga na cúu mozo xihín dá. Ta já cáa ga da casáha xixi da ta xíhi da ta já xini da.

⁵⁰ Ta ndaja coo xinu coo xitoho mozo cán mé quivi coo cáhán da ña xinu coo da.

⁵¹ Anda jávi jándoho quini xitoho da cán ini da jáchí coo cúu dá tá quiahva cáa da. Ta ndítahan ndoho da tá quiahva ndoho tóco ndihi na cája já mé nuú cuacu ndivaha na janda quiahva cáhña nuhu ná —naçachi Jesús.

25

Sácú Jesús quiahva sahá ña naçaja uxu najihí, na tacú

¹ Já cáchí tucu Jesús já:

—Tá ná xinu coo quivi cacomí Ndióxi cuénta sahá ñayivi já cacuu a tá quiahva nayaha xihín uxu najihí, na tacú tá nasahan na vicó tándaha. Tá naquehe na candil ña ñuhu síti ini já cuahan na ndique táhan na xihín da tándaha cán.

² Uahun táhan na tacú cán cúu ná na tácu ini ta uahun na cán cúu ná na coo tácu toho ini.

³ Ndíhuhun na coo tácu ini cán natiin na candil ñaha na cuahan na joo coo naquehe

chága na sítí ña jácutú tucu na candil tá sa cúni ndahva ña.

⁴ Joo na tácu ini cán ñehe na candil ñaha na ta ñehe ri na yúyú sítí cuahan na ña jácutú na candil tá sa cúni ndahva ña.

⁵ Ta ndaja coo ñacasáhá cáyancá mé da tándaha cán sahá ña cán quéa nanaá ini ndihi na ta ñaquiji va na.

⁶ Joo tá ñacuu yati java ñuú já tácu cáyuhú java na já cáchí na já: “Candehé ndo. Sa vaxi da tándaha. Cuáhán queta ndó ndiquehe ndó da”, cáchí na cáyuhú na cán.

⁷ Já ñandacoo tóco ndihi na tacú cán ta ñacasáhá na cajú ndíví na candil ñaha na.

⁸ Anda já ñacasáhá ndíhuhun na co tácu ini cán cáhan na xihín ndíhuhun na tácu ini cán já cáchí na já xihín ná: “Caja ndó ñamaní quiahva loho ndó sítí ndo nuú nde jáchí sa ñandihí sítí nde ta jalóho cúni ndahva candil ñaha nde”, cáchí na co tácu ini cán.

⁹ Já ñanducú ñehe ndíhuhun na tácu ini cán tuhun nu ná já cáchí na já: “A cúu toho cajú nde quiahva nde sítí nu ndó jáchí tiahva náá ndimaní dó nu mé nde. Vaha chága cuáhán mé ndó nu cáyahvi dó cuéen ndó do”, ñacachi na tácu ini cán xihín ná. Já ñaquee na co tácu toho ini cán cuahan na.

¹⁰ Joo nani ñaquee ndíhuhun na co tácu ini cán cuahan na cuéen na sítí na já ñaxinu da tándaha cán ta ñandihvi ndíhuhun najihí tácu ini cán ini vehe nu íin vicó tándaha cán ta ñandaji yéhe.

¹¹ Tá ñandihí já ñandai cuu ndíhuhun na ñasahan ñaxeen sítí cán já cáti ndáha ná yéhe ta cáyuhú na já cáchí na já: “Cuná loho ndó yéhe nuú nde, xitoho”, cáchí na cáyuhú na ndíta na jatá véhe.

¹² Anda já ñanducú ñehe da tándaha cán tuhun nu ná já cáchí da já xihín ná: “Co xini toho i yo cúu ndóhó”, ñacachi da cán xihín ná —ñacachi Jesús.

¹³ Já ñacachi tucu Jesús já:

—Sahá ña cán quéa xini ñuhú cuénta vaha coo ri ndóhó va jáchí co xini ndó ndá hora xinu coo quiví cacomí Ndióxi cuénta saha ndo —cáchí Jesús.

*Ña ñacaja in taa xihín jiuhún da
(Lc. 19:11-27)*

¹⁴ Tá já cáchí tucu Jesús já:

—Tá ná xinu coo quiví cacomí Ndióxi cuénta sahá ñayivi já cacuu a tátuhun ña ñayaha xihín in dataa. Tá ñaxinu coo quiví quee da cuhun xicá da já ñacana da java da cajú chúun xihín dá. Ta já ñandiquiahva da jiuhún da ndahá da cán ña ná candaa da ña.

¹⁵ Ta tá quiahva tiahva in in da cañehe da jiuhún quiahva já ñasahan xitoho da nu dá. In táhan da cán ñasahan xitoho da uhun mil nu dá ña ná candaa da ña. Ta inga da cán ñañehe ivi mil. Ta inga da cán ñañehe in mil. Anda já ñaquee xitoho da cuahan xicá da.

¹⁶ Ta ndaja coo da ñandiquiahva xitoho uhun mil ndáha cán ñacaja da ndahvi xihín jiuhún xitoho da ta já ñañehe dá inga uhun mil chága jatá.

¹⁷ Ta jári da ñasahan xitoho ivi mil nu cán ñacaja da ndahvi xihín jiuhún cán ta ñañehe dá inga ivi mil jatá.

¹⁸ Joo da ñasahan xitoho in mil nu cán ñatiin da jiuhún xitoho da ta já ñasahan da ñacaan da in yávi ta já najánduxu da ña.

¹⁹ Ta tá sa ñayaha cuaha tiempo já ñandicó coo xitoho mozo cán. Ta já ñacasáhá cajú víi da cuénta xihín da cán.

²⁰ Ta já ñaxinu da ñañehe uhun mil cán nuú xitoho da ta já ñandiquiahva da inga uhun mil ña ñañehe dá jatá jiuhún cán nuú xitoho da. Ta já cáchí da já xihín xitoho da: “Candehé ndo uhun mil ñasahan ndó nuú i. Joo yóho íin inga uhun mil ñañehé e jatá”, ñacachi da xihín xitoho da.

²¹ Anda já ñacachi xitoho da já xihín dá: “Vaha ndivaha ñacajún. Mozo vaha ndivaha cúu yóhó jáchí chá va ñasahan i nuun ta vaha ñacaja chúun ña. Sahá ña cán quéa cajú i ña ná cacomún cuénta sahá cuaha chága ñaha. Ta viti cuu cóun xihín i ta já ná cajii chága inún”, ñacachi xitoho da.

²² Tá ñandihí já ñaxinu coo ri da ñandiquehe ivi mil cán nuú xitoho da. Já ñacachi da já xihín xitoho da: “Ivi mil ñasahan ndó nuú i joo yóho íin inga ivi mil ñañehé e jatá”, ñacachi da xihín xitoho da.

²³ Anda já ñacachi xitoho da já xihín dá: “Vaha ndivaha ñacajún. Mozo vaha cúu yóhó jáchí chá va ñasahan i nuun ta ñacaja chúun vahún ña. Sahá ña cán quéa cajú i ña ná cacomún cuénta sahá cuaha chága ñaha.

Ta viti cuu coún xihín i ta já ná cajii chága inún”, nācachi xitoho da.

²⁴ Joo tá naxinu coo ri da nañehe in mil ndahá xitoho cán já nacasáhá cáchí da já xihín xitoho da: “Candehé ndo, xitoho i. Sa cándaa vaha ini i ña cúu ndó in taa ndacú ndivaha tuhun. Ta vatí co xútu ndó nuú in ñúhu joo jáquee tá jáquee ndó nu á. Ta játaca ndó ña nuú coo naxutu ndó ña.

²⁵ Sahá ña cán quéa nayihví vi ta nasahan i najánduxu u jiuhún nasahan ndó nuú i tixi ñúhu. Joo yóho íin jiuhún ndo ndiquehe ndó ña”, nācachi da cán xihín xitoho da.

²⁶ Anda já nācachi xitoho da já xihín dá: “Coo cúun in mozo vaha nuú i. Cúun da júsa ndivaha. Sa cándaa vaha inún ña jáquee e nu ñúhu ña co xútu u,

²⁷ ña cán quéa ndá cuéntá quéa coo nasahan tóun jiuhún i banco já ná ndiquehe e jiqui á nuú na cán tá ná ndicó coo i, nduu”, nācachi xitoho da cán xihín dá.

²⁸ Anda já nācachi da xihín java na ndúu cán: “Candaa ndó in mil jan ndahá da jan ta quiahva ndó ña nuú da sa cómi uxu mil jan.

²⁹ Jáchi da cája chúun vaha ñehe chága ví da ñaha já quéa ná coo cuahá chága nu dá. Joo da co cája chúun vaha janda ña chá cómi da ndindaa ndáha dá.

³⁰ Ta mozo a váha toho jan tiin ndó da jácana ndó da nuú naá jata véhe jan. Cán cúu nu ndáhyi ndaa ñayivi janda quiahva cáhñá nuhu ná sahá ña ndóho ndivaha ini na”, nācachi xitoho da, —nācachi Jesús.

Tá ná cavii sahá ñayivi nu Ndióxi

³¹ Já nācachi tucu Jesús já:

—Tá ná xinu quivi quixi yehe, da nachindahá Ndióxi nduu ñayivi ta quixi i xihín tóco ndihi na cúu táto Ndióxi. Anda já cacoo i nu sácoo na sáhdá chuun ta já ndicáhnu ndivaha i.

³² Ta nditaca ñayivi ndúu ndíjää ñuyivi nuú i. Ta já casahá i ndicahnda java táhan i na tá quiahva cája in da ndáa ndicachi tá sáhdá java da ndicachi xihín tijúhu ña ná a cáva táhan rí.

³³ Ta já chinduu u ñayivi cuéntá mí i, na cúu tátuhun ndicachi cán xoo cuáha i. Ta xoo íti i chinduu u na coo cúu cuéntá mí i, na cúu tátuhun tijúhu cán.

³⁴ Ta sahá ña cúu u da cómi cuéntá sahá ñayivi sahá ña cán quéa cachi i já xihín na ndúu xoo cuáha i cán já: “Cuáyaha ndó ná cacomí Ndióxi, tátá i cuéntá saha ndo jáchi cúu ndó na nācāja cuahá mé á ñamaní xihín. Jáchi janda tá cámaní cava sahá saha ñuyivi sa nasacu tiahva mé á nuú canduu ndó ña cacomí a cuéntá saha ndo.

³⁵ Jáchi nasahan ndó naxixi i tá nācuico i. Ta nasahan ndó ticuui nuú i tá nahichí ini i. Ta nandiquehe vaha ndó yehe tá nasacuu u da tóho naxinu i nu ndo.

³⁶ Ta najasá ndo jáhma nuú i tá co ñehé e ña cándixi i. Ta tá nasaquíhvi já nachindeé ndó yehe. Ta tá nasandacaan i vecaa já naxito nihni ndó yehe.”

³⁷ Anda já ndaca tuhún java na nācāja vaha ta já cachi na já xihín i: “Ndá tañu quéa naxini nde ña cuico ndó, xitoho nde ta já nasahan nde ña xixi ndó. Ta ndá tañu naxini nde ña íchi ndó ticuui ta já nasahan nde ticuui nu ndo.

³⁸ Ta ndá tañu nasacuu ndó da tóho ta nandiquehe vaha nde ndohó. Ta ndá tañu naxini nde ña cámaní jáhma candixi ndó ta najasá nde ña nu ndo.

³⁹ Ta ndá tañu quéa naxini nde ña quíhvi ndo ta nachindeé nde ndohó. Ta ndá tañu nasandacaan ndó vecaa ta naxito nihni nde ndohó.”

⁴⁰ Anda já cachi yehe, da cómi cuéntá sahá ñayivi já xihín ná: “Mé a ndaa ná cahan i xihín ndó ña tá nācāja ndó a xihín na cúu cuéntá mí i, na coo saha nuú ñayivi ñuyivi já cúu á tátuhun nācāja ndó a xihín mí i”, cachi i xihín na ndúu xoo cuáha i.

⁴¹ Anda já casahá cachi i já xihín na ndúu xoo íti i cán já: “Caxoo ndó nuú i jáchi cúu ndó na nācatavi cháhan ta cuhun ndó indayá cañuhu ndó anda ama cáa quivi. Jáchi ña jan cúu ña nasacu tiahva Ndióxi ndacaan tiñahá sacuaña xihín tátó mé rí.

⁴² Jáchi coo nasahan ndó ña xixi i tá nācuico i ta ni coo nasahan ndó ticuui nuú i coho i tá nahichí ini i.

⁴³ Da tóho cúu u naxinu coo i tañu ndó ta coo nandiquehe vaha ndó yehe. Ta nandimaní i ña candixi i ta coo nasahan ndó in jáhma loho nuú i. Nasaquíhvi ta nasandacaan i vecaa ta coo naxito nihni ndó yehe”, cachi i xihín na ndúu xoo íti i

cán.

⁴⁴ Anda já nducú ñehe ri na cán tuhun nuú i já cachi na já xihín i: “Ndá tañu quea naxini nde ña cuico ndó ta ndá tañu quea naxini nde ña íchi ini ndó ticuú ta ndá tañu nasacuu ndó da tóho ta ndá tañu nandimaní jáhma ndo ta ndá tañu nasahin quíhvi ndo ta ndá tañu nasandacaan ndó vecaa ta coó nachindee nde ndohó”, cachi na ndúu xoo íti i cán xihín i.

⁴⁵ Anda já cachi i já xihín na co cúu cuénta mí i já: “Mé a ndaa ná cahan i xihín ndo ña tá ta coó nacaja ndó xihín ñani táhan ndó, na coó saha nuú ñayivi ñuyívi já quea coó nacaja ndó ña xihín yehe”, cachi i xihín na co cúu cuénta mí i.

⁴⁶ Ta já yaha ndihi na cán cuhun ná indayá anda ama caa quívi. Ta na nacaja vaha cán yaha na nu Ndióxi catacu na anda ama caa quívi —cáchi Jesús.

26

Ndítuhún jehé na tiin na Jesús

(Mr. 14:1-2; Lc. 22:1-2; Jn. 11:45-53)

¹ Tá nandihí nacahan Jesús tóco ndihí ña yóho xihín ñayivi cán já nacachi a xihín na xíca tuun xihín á cán já:

² —Sa cándaá ini ndó ña tíxi ivi quívi coo vicó pascua ta já ndiquiahva na yehe, da nachindahá Ndióxi nduu ñayivi ndahá na cata caa yehe ndica crúxu —nacachi Jesús xihín na xíca tuun xihín á cán.

³ Anda já na sacuaḥa nuú jutú xihín na jánaḥa ley Moisés xihín na sacuaḥa veñuhu nandique táhan na yéhe Caifás, da cúu sacuaḥa chága nu ndíhi jutú cán.

⁴ Ta najándique táhan tuhun na ndá quiahva caha na tiin jehé na Jesús ña ná cahni ñahá na.

⁵ Já cáchi xihín táhan na já:

—Joo a tীন toho í da tañu mé víco jáchi tiaḥva náá ndivaa ñayivi —nacachi na.

Tá nachojo in ñañaḥa perfume jini Jesús

(Mr. 14:3-9; Jn. 12:1-8)

⁶ Ta ndaja coo ín Jesús ñuu Betania vehe Simón, da cahan na xihín: taa nandoho cuehe táhyi.

⁷ Já naxinu in ñañaḥa nu á ta cánee in yúyú ña alabastro ndáḥa ña. Ta ini mé yúyú cán ñúhu perfume, dó yahvi ndivaha. Ta já

naxinu ña najácuyu ña do jini Jesús nani ín coo a nu mesa cán.

⁸ Tá naxini na xíca tuun xihín Jesús cán ña yóho já nacasáḥa na xójo ini na já cáchi na já:

—Ndá cuénta quea tívi uun perfume yahvi ndivaha yóho.

⁹ Jáchi cuu jíco yó do ta já quehé cuahá jiuḥun saḥa do, nduu ta já cuu jasá yo jiuḥun cán nuú na ndahví —nacachi na cán.

¹⁰ Ta nacandaá ini Jesús ña cáhvi ini na cán ña cán quea nacasáḥa cáchi a já xihín ná:

—Ndá cuénta quea cája cuehe ndó xihín ñañaḥa jan jáchi ña vaha quea nacaja ña yóho xihín i.

¹¹ Jáchi na ndahví ní tiempo canduu na tañu ndó joo yehe a coo tuun toho i xihín ndo.

¹² Jáchi tá najácuyu ña perfume yiquí cuñu i já nacaja tiaḥva ña yehe ná coo tiaḥva vi tá ná casaḥa quívi nduxu.

¹³ Mé a ndaa ná cahan i xihín ndo ña ní cúu ñuyívi nuú caca nuu ñayivi cahan na tuhun vaha saḥa i ndicani na ña nacaja ña yóho xihín i já ndicuhun ini na saḥa ña —nacachi a.

Jíco túhún Judas Jesús

(Mr. 14:10-11; Lc. 22:3-6)

¹⁴ Ta ndaja coo in táhan da uxu ivi xíca tuun xihín Jesús, da naní Judas Iscariote nasahan da cahan da xihín na sacuaḥa nuú jutú.

¹⁵ Ta já cáchi da já xihín ná:

—Ndaja quiahva ndó nuú i tá ná ndiquiahva i Jesús nu ndo —nacachi Judas xihín na sacuaḥa nuú jutú cán.

Anda já nasahan na oco uxu jiuḥun cúxú nu dá saḥa Jesús.

¹⁶ Ta sa mé nani já nacasáḥa Judas ndúcu da ndaja cuu caha da ndiquiahva da Jesús ndáḥa ná.

Tá naxijini ndayí Jesús xihín na xíca tuun xihín á

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷ Mé quívi nuú víco xíxi na pan, ña co quee yusá naxaa xihín cán já naxinu na xíca tuun xihín Jesús cán nu á. Já nacachi na já xihín á:

—Ndáchí cúní ndó cūhūn nde caja ndíví nde cajíni ndó vicó pascua —ñacachi na xihín á.

¹⁸ Anda já ñacachi Jesús já xihín ná:

—Cuáhán ndó ñuu jan ta jan cuni ndó in dataa ta já cachi ndó já xihín dá: “Da jánaḥa ndeḥe cáchí xuhūn: Cūhūn i vehe ndó cajíni i vicó pascua xihín na xíca tuun xihín i jáchí sa nandindaa tiempo cūhūn i viti” —ñacachi Jesús.

¹⁹ Já ñaquee na cán ñasahan na ñacaja na tá íin ñasahnda Jesús nu ná ta cán ñacaja ndíví na ña cajíni na vicó pascua.

²⁰ Ta ndaja coo tá ñacuaá já ñasacoo Jesús nu mesa xihín ndíhuxu ivi na xíca tuun xihín a cán.

²¹ Ta nani xijíni na já ñacasáhá cáchí a já:

—Mé a ndaa ná caḥan i xihín ndó ña in táhan ndó, na xíca tuun xihín i cacuu da jicó túhún yeḥe —ñacachi Jesús xihín ná.

²² Anda já ñacasáhá na cán cácuéḥa ndivaḥa ini na já ñacasáhá tá in tá in na ndáca túhún na Jesús já cáchí na já xihín á:

—Á yeḥe cacuu da jicó túhún ndo, xitoho i —cáchí na ndáca túhún ñahá na.

²³ Anda já nanducú ñeḥe Jesús túhūn nu ná já ñacachi a já xihín ná:

—Da ñaquihvi ndáḥa ini coḥo xíxi i, da cán cúú da jicó túhún yeḥe.

²⁴ Yeḥe cúú da ñachindahá Ndióxi nduu ñayivi ta ndítahan nuú i quivi i tá íin cáchí túhūn Ndióxi. Joo ndáhví nahá ñacuu da jicó túhún yeḥe. Janda vaha chága ná a cácu da, nduu —ñacachi Jesús.

²⁵ Anda já nandicaḥan Judas, mé da jicó túhún ñahá cán já ñacachi da já xihín Jesús:

—Xitoho i, á yeḥe cúú da jicó túhún ndo —ñacachi da xihín á.

—Jivi mún cúú dá —ñacachi Jesús xihín dá.

²⁶ Ta nani xíxi na ndúu na ñatiin Jesús pan já nandiquiahva ndixahvi nu Ndióxi. Tá nandihí já ñasahnda java ña ta nandicaḥnda ña nuú na xíca tuun xihín á cán. Ta já ñacachi a já xihín ná:

—Júhun ndó jáchí ña yóho cúú tátuhun yiquí cuñu i —ñacachi a.

²⁷ Tá nandihí já ñatiin a in vaso nu ñúhu tó uva já nandiquiahva ndixahvi nu Ndióxi já ñacachi a já xihín na xíca tuun xihín á cán já:

—Coho ndihí ndó dó ñúhu ini vaso yóho.

²⁸ Jáchí dó yóho cúú dó tátuhun ñi i, dó cuíta saḥá cuahá ñayivi já ná ndoo cuachi na. Tá ná cuíta ñi i já candaa ini ndó ña najáxinu coo Ndióxi túhūn a ñasahan sanahá.

²⁹ Mé a ndaa ná caḥan i xihín ndo ña a cóho ga i tó uva janda quiahva ná xinu coo quivi coho tucu u inga dó vaha chága xihín ndo tá ná xinu quivi cacomí Ndióxi, tátá i cuéntá saḥá ñayivi —ñacachi a.

Cáxi túhūn Jesús ña chijehé túhūn Pedro ña xini da mé á

(Mr. 14:26-31; Lc. 22:31-34; Jn. 13:36-38)

³⁰ Ta tá nandihí ñaxita na in canto já ñaquee na cuahan na yucu yitó olivo.

³¹ Ta já ñacachi Jesús já xihín ná:

—Mé ñuú viti jándacoo ndihí ndó yeḥe cūhūn ndó saḥá ña ndoho i. Já cáchí túhūn Ndióxi já: “Cahní i da ndáá ndicachi ta xihín ña yóho ndicuíta nuu ndicachi jana dá cūhūn ri”, cáchí túhūn Ndióxi.

³² Joo tá sa ná nditacu tucu u já cūhūn jihna ñúhú yeḥe estado Galilea anda já cūhūn mé ndó —ñacachi Jesús.

³³ Anda já nanducú ñeḥe Pedro túhūn nu á já ñacachi da já xihín á:

—Vatí ná jándacoo tóco ndihí na mé ndó saḥá ña ndoho ndó joo a jándacoo toho i ndohó —ñacachi da xihín á.

³⁴ Anda já ñacachi Jesús já xihín dá:

—Mé a ndaa ná caḥan i xuhūn ña mé ñuú viti tá cámani cana chéle já chijehé túhūn ña xínun yeḥe uní táhnda —ñacachi Jesús xihín dá.

³⁵ Anda já ñacachi tucu da já:

—Vatí ná quivi i xihín ndo joo a chijehé túhūn toho i saḥá ña xini i mé ndó —ñacachi da xihín Jesús.

Ta quiahva já ñacachi tóco ndihí java ga na xíca tuun xihín á cán.

Tá xíca tahví Jesús nu Ndióxi in nuú nani a Getsemani

(Mr. 14:32-42; Lc. 22:39-46)

³⁶ Anda já ñaxinu coo Jesús xihín na xíca tuun xihín á cán in nuú nani a Getsemani. Já ñacachi a já xihín ná:

—Yóho cacoo ndó nani ná cūhūn i cáca cáca tahví i nu Ndióxi —cáchí a.

³⁷ Ta ndáca Pedro xih̄in ndíví da cúu jah̄yi Zebedeo cuah̄an xih̄in á. Ta já nacasáhá cácuéha ndivaha ini a ta a juú quiah̄va táhvi ini a.

³⁸ Anda já nacachi a já:

—A juú quiah̄va cácuéha ini i chí quivi i cúu ini i. Yóho candati tóo ndó yehe ta coto a cúu ndo —nacachi Jesús.

³⁹ Ta já naquee mé a nasahan loho chága chí nuu já nacaxítí a janda quiah̄va naxinu taan nu ñúhu. Ta já cáchí a já:

—Tátá Ndióxi, tá ta ná cuu caja ndó ñamaní ña ná a ndóho i ña ih̄vi ndivaha vaxi nuú i ndóho i. Joo ná coo tá ín cúní mé ndó ta ná a cóo toho ña cúní yehe —cáchí Jesús.

⁴⁰ Tá nandihí já nandicó coo a nuu najándacoo a na xíca tuun xih̄in á cán ta já nandiñehe á na quíji na ndúu na. Anda já nacachi a já xih̄in Pedro:

—Á coó nacuu candita ndó ni in hora.

⁴¹ Xíní ñúhú coo tiāhva ndó ta caça tah̄vi ndo nu Ndióxi já ná a cóto ndojó rí quini ndóho. Jáchí ínimá ñayivi cúní a ndinducú a Ndióxi joo yiquí cuñu na co ín tiāhva caja ña cúní Ndióxi —nacachi Jesús.

⁴² Anda já naquee tucu Jesús táhndá ivi cuah̄an tucu a caça tah̄vi a nu Ndióxi já cáchí a já:

—Tátá Ndióxi, tá ta a cúu va caja ndó ñamaní ná a ndóho ini i ña jan já ná coo tá ín cúní mé ndó coo —cáchí a.

⁴³ Tá nandihí já nandicó coo tucu a nu ndúu na xíca tuun xih̄in á cán ta nandiñehe á na quíji tucu na ndúu na jáchí naquehe a mahnú na.

⁴⁴ Já naquee tucu a nasahan xíca tah̄vi a nu Ndióxi táhndá uní ta sa mé tuhun cán nacahan tucu a.

⁴⁵ Anda já naquixi tucu a nu ndúu na xíca tuun xih̄in á cán já nacachi a já xih̄in ná:

—Vatí cúní ndó cuju ndó ta vatí cúní ndó ndiquehe ndée ndó joo a cúu caja ndó ña viti. Jáchí sa naxinu coo hora ndiquiah̄va na yehe, da nachindahá Ndióxi nduu ñayivi ndahá ñayivi cája cuachi.

⁴⁶ Cuáhán ndacoo ndó ná cohó. Jáchí sa vaxi da jicó túhún yehe —cáchí a.

Tá natiin na Jesús

(Mr. 14:43-50; Lc. 22:47-53; Jn. 18:2-11)

⁴⁷ Ta nani cáhan yíi va Jesús já naxinu Judas, da cúu in táhan uxu ivi na xíca tuun xih̄in á cán. Ta ndáca da cuahá ñayivi, ñehe na machítí xih̄in yító viti. Ta na cán cúu ná na naquixi cuéntá na sacuah̄a nuú jutú xih̄in cuéntá na sacuah̄a veñuhu.

⁴⁸ Ta mé Judas, da ndiquiah̄va ñahá cán sa nacandoo da xih̄in na cán ña tatí yúhu dá sajóho Jesús jáchí nacachi da já xih̄in ná:

—Ndá da ná tatí yuhú u sajóho, da cán cúu dá tiin ndó —nacachi da.

⁴⁹ Chí ivi laá nacativi da nu Jesús já nacahan Ndióxi dá xih̄in á ta já natatí yúhu dá sajóho mé á.

⁵⁰ Anda já nacachi Jesús já xih̄in dá:

—Cama chá cajún ña, amigo.

Anda já nacayati na nu Jesús ta natiin tuun na a.

⁵¹ Joo in táhan da xíca tuun xih̄in Jesús cán, natavá da machítí da ta já nachitúhun da in johó da cúu mozo nuú da sacuah̄a chága nu ndíhi jutú cán.

⁵² Anda já nacachi Jesús já xih̄in dá:

—Chicaan vaha machítí jan jáchí ndá na sáhní xih̄in machítí, xih̄in machítí quivi ri na cán va.

⁵³ Á co cánda inún ña cuu caça tah̄vi i nu Ndióxi, tátá i ña ná chindahá mé á cuah̄a ndivaha tátó mé á ña ná chindeé na yehe.

⁵⁴ Cuu caja i ña joo xíní ñúhú yaha tá yaha ña nacah̄yi nuú tuhun Ndióxi ndóho i —cáchí Jesús.

⁵⁵ Ta já nacachi Jesús já xih̄in na naxinu tiin ñahá cán:

—Cája ndó xih̄in i tátuhun cája na xih̄in ta cuíhná jáchí naqueta ndó vaxi ndó tiin ndó yehe xih̄in machítí ta xih̄in yító viti. Ta ndijáá ní quivi nasah̄in i xih̄in ndo ini veñuhu cáhnu jánah̄a i tuhun Ndióxi nu ndo ta ni in tañu coó natiin ndó yehe.

⁵⁶ Joo tóco ndíhi ña yóho yaha ña já ná xinu coo ña nacah̄yi na profeta sah̄a i ini tuhun Ndióxi sanahá —cáchí a.

Tá nandihí já naxinu ndíhi na xíca tuun xih̄in Jesús cán cuah̄an na ta najándacoo na mé á.

Tá ñehe na Jesús cuah̄an na nuú nataca ndíhi na sacuah̄a

(Mr. 14:53-65; Lc. 22:54-55, 63-71; Jn. 18:12-14, 19-24)

57 Tá natiin na cán Jesús já ñéhe na a cuahān na nuú Caifás, da cúu sacuaḥa chága nu ndíhi jutū. Ta cán sa nanditútú na jánaḥa ley Moisés ndúu na xihín na sacuaḥa veñūhu.

58 Joo ndaja coo nasandico xicá Pedro Jesús anda quiahva naxinu da yéhe vehe da cúu sacuaḥa chága nu ndíhi jutū cán. Ta já nandihvi da nasacoo da nu ndúu soldado cán sándeḥé da ndá quéa caja na xihín Jesús.

59 Ta na sacuaḥa nuú jutū xihín tóco ndihi na cómi cuéntá sahá na Israel natata na cán ndúcú na cuachi jácojo na jatá Jesús já ná cuu cahni ñahá na.

60 Joo coo nañeḥe ná cuachi jíquí ña cuu chinúu na jatá mé á vatí naxinu coo cuahá na naḥaḥan ña tuhún sahá. Anda jáví naxinu coo ivi ga da cáhan ña tuhún sahá.

61 Já nācachi da já:

—Naxini johō nde nācachi da jan já: “Jānditani i veñūhu cáhnu cán ta jácandichi tucu u ña tixi unī quiví”, cáhí da —nācachi na cán chīcaan na cuachi jatá Jesús.

62 Anda já nandaca ndichi da cúu sacuaḥa chága nu ndíhi jutū cán já cáhí da já xihín Jesús:

—Á chí a ndúcú ñehún tuhun nuú nde sahá cuachi jácojo na jatun —nācachi da.

63 Joo ni in tuhun coo nanducú ñeḥe Jesús nu dá. Anda já nācachi da cúu sacuaḥa chága nu ndíhi jutū cán já xihín á:

—Tavún quiví Ndióxi, ña tácu ín indiví ta cachún xihín nde á jivi ndusa yohó cúun Cristo, da cúu in tuhún jiní já jahyi Ndióxi, da nāchindahá mé á cacomí cuéntá sahá ñayiví —nācachi da xihín Jesús.

64 Já nanducú ñeḥe Jesús tuhun nu dá já nācachi a já:

—Ajan, jivi yeḥe cúu u da cáhí ndó jan. Ta viti ná caḥan i xihín ndo ña vaxi quivi tá cuni ndó yeḥe, da nāchindahá Ndióxi nduu ñayiví cacoo i xoo cuáha Ndióxi, mé á ín cuahā ndé. Ta já cuni ndó yeḥe ndicó coo i ñuyiví yohō tañu vico tá ná quixi i chí indiví —nācachi a.

65 Tá naxini johō da sacuaḥa chága nu ndíhi jutū cán ña yohō já nandatá da jáhma dá ña ná candaa ini ñayiví ña xójo ini da. Ta já nācachi da já:

—Ndája núu da yohō Ndióxi. Coó chicuu chága yó ñayiví ná caḥan na xihín yo jáchi sa naxini johō ndihí ña nācanaḥá da yohō xihín Ndióxi.

66 Ta ndaja xini ndó caja í xihín dá viti —nācachi da.

—Anda já nācachi ndihi na cán já:

—Ín cuachi da jan ta ndítahan cuḥun da quivi da —nācachi na cán.

67 Ta já nācasáhá na xihnu ndaa na tójjí na nu á. Ta nācasáhá tuxú na yiquí a. Ta java na cáni jahndá nuu á.

68 Ta já cáhí na já xihín á:

—Caḥan xihín nde yo nācani yohó tá ta mé a ndaa cúun Cristo, da nāchindahá Ndióxi cacomí cuéntá sahá ñayiví —cáhí na xihín á.

Tá nāchijehé tuhun Pedro ña xini da Jesús (Mr. 14:66-72; Lc. 22:56-62; Jn. 18:15-18, 25-27)

69 Ta ndaja coo ín coo Pedro yuhú yéhe da cúu sacuaḥa chága nu ndíhi jutū cán. Já nācativi in ñañáha, ña cája chúun mé vehe cán. Já nācasáhá cáhí ña já xihín dá:

—Yohó cúun in táhan da xica tuun xihín Jesús, da estado Galilea —nācachi ña cán xihín dá.

70 Joo ndaja coo nāchijehé tuhun Pedro nu ndíhi na cán ña xini da Jesús. Já cáhí da já:

—Co xini toho i ndá saḥa cáhūn —nācachi da xihín ña cán.

71 Ta tá sa naqueta da yéhe cán já naxini inga ñañáha da já nācasáhá cáhí ña já xihín tóco ndihi na ndúu cán:

—Naxini i naxica tuun da yohō xihín Jesús, da ñuu Nazaret cán —nācachi ña cán.

72 Ta já nācasáhá tucu Pedro chíjehé tuhun da ña xini da Jesús ta natavá da quiví Ndióxi já cáhí da já:

—Co xini toho i ndá da cúu da jan —nācachi Pedro xihín na cán.

73 Chá va nayaha ña yohō ta nācayati java na ndúu cán nu Pedro. Já nācachi na já xihín dá:

—Mé a ndaa táhyí jivi táhan na xica tuun xihín Jesús cúu ri yohó va jáchi cáhūn tátuhun cáhan na cán —nācachi na xihín dá.

⁷⁴ Anda já načasáhá Pedro cánahá da ta natavá da quivi Ndióxi ña co xini da Jesús. Já cáchi da já:

—Co xini toho i ndá da cúu da jan — nācachi da.

Tá nācachi da já chí ivi laá nācana chéle.

⁷⁵ Anda já nādicuhun ini Pedro ña nācahan Jesús xihin dá tá nācachi a xihin dá: “Tá cámaní cana chéle sa chíjehé tuhún ña xihun yehe uní tañu.” Anda já naqueta da jatá véhe ta a juú quiahva sácu da jáchi cácuéha ndivaha ini da.

27

Tá nāndiquiahva na Jesús ndáha Pilato (Mr. 15:1; Lc. 23:1-2; Jn. 18:28-32)

¹ Tá nativi inga quivi itaan já nāndique táhan ndihi na sacuahā nuú jutū xihin na sacuahā veñuhu ña ndituhún na ndá quiahva jácojo na cuachi jatá Jesús já ná cuu cahni ñahá na.

² Sahá ña cán quēa nācató na mé á ta ñéhe na a cuahan na ndiquiahva na mé á nu Pilato, da cúu gobernador ñuu cán.

Tá naxihi Judas

³ Ta ndaja coo naxini Judas, da najicó tuhún Jesús ña nasacu ini na cán cahni na Jesús. Já nācahvi ini da sahá ña núu nācāja da chí ndáva da cuahan da nducú ñehe da ndíhoco uxu jiuahun cúxú nuú na sacuahā nuú jutū xihin nuú na sacuahā veñuhu.

⁴ Já nācachi da já xihin na cán:

—Cuachi cáhnu ndivaha quēa nācāja i jáchi najicó tuhún i in da coo cuachi.

Já nācachi na cán já xihin dá:

—Co sáhní toho nde mé nde sahá ña yóho. Mún xini ndá quēa nācájún —nācachi na cán xihin dá.

⁵ Anda já nācuilhna Judas jiuahun cán ini veñuhu cáhnu. Ta já naqueta da nācahan da nācata caa da mé dá já nāsahní da mé dá.

⁶ Ta já najátaca na sacuahā nuú jutū jiuahun cán já nācachi xihin táhan na já:

—A váha toho ña ná chicaoan yó jiuahun yóho ini satō nu táan na jiuahun jóco na nu Ndióxi jáchi ndi naxihí sahá ña yóho — nācachi na.

⁷ Ta tá sa nāndituhún váha xihin táhan na já nāxeen na in ñúhu xihin jiuahun cán. Mé

ñúhu cán naní a ñúhu da cávaha ñaha xihin ñundáhyi. Ta ñúhu cán cacuu a nu jánduxu na na tóho.

⁸ Sahá ña cán quēa nāsacu na quivi ñúhu cán ña cananí a yójo nuú naxita ni. Ta já naní a janda viti.

⁹ Ta xihin ña yóho naxinu coo nuú ña nācahyí profeta Jeremías sanahá tá nācachi da já sahá Jesús: “Natiin na ndíhoco uxu jiuahun cúxú jáchi ña jan nāsacuu yahvi nāsacu na Israel chahvi na saha dá.

¹⁰ Ta xihin mé jiuahun cán nāxeen na ñúhu naní a ñúhu da cávaha ñaha xihin ñundáhyi jáchi quiahva já nāsahnda Ndióxi chuun nuú i caja i”, cáchi tuhun Ndióxi.

Tá cándichi Jesús nu Pilato

(Mr. 15:2-5; Lc. 23:3-5; Jn. 18:33-38)

¹¹ Ta ndaja coo cándichi Jesús nu Pilato, da cúu gobernador. Ta já načasáhá da cán ndáca tuhún ñahá da já cáchi da já xihin á:

—Á mé a ndaa cúun in rey, da cómi cuénta sahá na Israel.

—Ajan. Jivi ndusa cúu u tá quiahva cáchi ndó jan —nācachi Jesús xihin dá.

¹² Ta na sacuahā nuú jutū xihin na sacuahā veñuhu nāchicaoan na cuachi jatá Jesús joo ni in tuhun coo nānducú ñehe a nu ná.

¹³ Anda já nācachi Pilato já xihin Jesús:

—Á co xini johō tohún ndaja cuahā nuú cuachi jácojo na jatun —nācachi da.

¹⁴ Joo ni in tuhún tuhun coo nānducú ñehe Jesús nu dá. Chí catóntó ndivaha da cúu gobernador sahá ña co cáhan Jesús.

Sácu ini na ndaja caja na ña ná quivi Jesús

(Mr. 15:6-20; Lc. 23:13-25; Jn. 18:38-19:16)

¹⁵ Tañu mé víco pascua nāsahin costumbre da cúu gobernador cán sá janí da in táhan da ndácaan vecaa. Ndá da cúní ñayivi janí da, da cán cúu da janí da.

¹⁶ Mé tañu já nāsandacaan in da naní Barrabás vecaa. Níi cúu naxita nuu tuhun sahá da yóho.

¹⁷ Ta tá nātaca ndihi ñayivi já nāndaca tuhún Pilato na já nācachi da já xihin ná:

—Yo cúní ndo ña ná janí i. Á Barrabás janí i á Jesús, da cáchi na cúu Cristo, da

nachindahá Ndióxi cacomí cuéntá sahá ñayivi. Yo janí i cúní ndo –nacachi da.

18 Nacachi Pilato ña yóho xihín ná jáchi sa cándaa vaha ini da ña sahá ña cáhiví ini na xihín Jesús sahá ña cán quéea nandiquiahva na mé á nu dá.

19 Ta nani ín coo da nu sácco da sáhdá da chuun vechúun cán já nachindahá ñájíhí da tuhun nu dá já nacachi ñá já: “A quíhvi ndáhun Jesús jáchi cúú dá in taa ndaa. Nnú andá véhe nasani i nacaja Jesús ta ndícani ndivaha ini i sahá”, nacachi ñá.

20 Joo ndaja coo na sacuahá nuú jutu xihín na sacuahá veñuhu cán najácahan na ñayivi ña ná caça na nu Pilato ña ná janí da Barrabás ta ná cahní da Jesús.

21 Anda já nacachi da cúú gobernador cán já xihín ná:

–Yo cúní ndó ña ná janí i.

Anda já nacachi na cán já:

–Barrabás jan va janí ndó –nacachi na xihín dá.

22 Anda já nacachi tucu Pilato já xihín ná: –Ndía cúní ndó caha i xihín Jesús, da cáchi ndo cúú Cristo.

Anda já nacachi tóco ndihi na cán já:

–Cata caa ndó da ndica crúxu.

23 Anda já nacachi tucu Pilato já xihín ná: –Ndá cuachi nacaja da, vaha –nacachi da xihín ná.

Joo xihín ña yóho ví ga ví nacasáhá cáyuhú na já cáchi na já:

–Cata caa ndó da ndica crúxu.

24 Ta tá naxini Pilato ña co yáa na cán ta ví ga ví ndívaá na já natiin da ticuí ta nandahá da nu ndíhi ñayivi cán ta já nacachi da já xihín ná:

–Xihín ña yóho jánahá i nu ndo ña coo cuachi toho ndójo i saha ndá ña ná caha ndó xihín da yóho jáchi coo cuachi toho da yóho. Jata mé ndó ná cuhun ndihi va –nacachi da xihín ná.

25 Anda já nacachi tóco ndihi na cán já:

–Vaha ná candojo nde cuachi ta janda jahyi nde viti ná candojo na cuachi sahá ña ná quivi da –nacachi na cán xihín dá.

26 Anda já najaní Pilato Barrabás. Ta tá nandihí najacaxáhan na Jesús já nandiquiahva da a ndáha ná ña ná cata caa na a ndica crúxu.

27 Anda já ñéhe soldado cuéntá gobernador cán Jesús yuyéhe vechúun. Já najátaca soldado cán java ga táhan da ta cán nacava toyivi da mé á ndúu da.

28 Tá nandihí já natavá na jáhma á. Anda já nachinúu na in jahma cuáhá túun jatá.

29 Ta já nachinúu na in tiyivi íñu jiní á. Ta nachínee na in ndoo ndahá cuáha. Ta já nacasáhá na cáxítí na nu á já sácu ndaa ichi ñahá na já cáchi na já xihín á:

–Cáhnú nahá ná cacuu yóhó, da cúú rey nuú na Israel –nacachi na.

30 Ta nacasáhá xihnu ndaa na tójí na nuú á. Ta já cándaa na ndoo cán ndáha á ta cáni na yiquí jíní a xihín do.

31 Ta tá sa nandihí nasacu ndaa ñahá na já nacandaa na jáhma nachinúu na jatá cán ta najacandixi tucu na a xihín jáhma mé á. Anda já ñéhe na a cuahan na cata caa na a ndica crúxu.

Tá nacata caa na Jesús ndica crúxu

(Mr. 15:21-32; Lc. 23:26-43; Jn. 19:17-27)

32 Ta tá ñéhe na Jesús cuahan na cata caa na a já nanditahan na in da naní Simón, da ñuu Cirene. Ta nacaja ndúsa na xihín dá ña ná ndicojo da crúxu nuú cata caa na Jesús.

33 Ta naxinu coo na xiquí naní Gólgota. Tuhun yóho cúní cachi a: nu ndúu lásá yiquí jíní ndíi.

34 Mé cán nasahan na vino nu á, dó nacava táhan xihín ña ova ña ná coho a do. Joo tá naxito ndojó a do coo naxeen toho a coho a do.

35 Ta tá sa nandihí nacata caa na a ndica crúxu já naqueehe na jáhma á nandicahnda nu táhan na. Joo jihna ñuhú nasajíquí na sahá ta da naquee vaha cán, da cán nandiquehe jáhma á. Xihín ña yóho naxinu coo nuú ña nacyhí profeta sanahá tá nacyhí da já: “Nandicahnda nu táhan mé ná cotó níhnu i ta já nasajíquí na sahá cotó maá i ta da naquee vaha cán nandiquehe da ña”, cáchi tuhun Ndióxi.

36 Ta já nasacco soldado cán ndúu na ndáá ñahá na.

37 Ta jiní ndica crúxu cán nacyhí na ndá saha nacata caa na a já cáchi a já: “Da yóho cúú Jesús, da cúú rey nuú na Israel.”

38 Ta sa mé já nacata caa ri na ivi taa cuihná xihín Jesús: in da xoo cuáha ta inga da xoo íti.

39 Chí cáva jini mé ñayivi yáha cán cánahá na xihín á.

40 Ta já cáhí na já:

—Yóhó cáhún jánditani veñuhu cáhnu cán ta tixi uní víxí quivi cáhún jácandichi tucún ña. Tá ta mé a ndaa cúun jahyi Ndióxi jácacu mún ta cuáhán nuu ndica crúxu jan —nacachi na xihín Jesús.

41 Ta quiahva já nacaja ri na sacuaḥa nuú jutú xihín na jánaḥa ley Moisés xihín na sacuaḥa veñuhu. Sácu ndaa na a já cáhí na já:

42 —Najácau da java ga ñayivi ta viti chí a cuú caja da jácau da mé dá. Tá ta mé a ndaa cúu dá rey nuú na Israel, ná nuu da ndica crúxu viti ñúhú já ná candúsa nde da.

43 Cándéé ini da Ndióxi ta cáhí da cúu da jahyi Ndióxi já queá ná quixi Ndióxi chindeé a da tá ta mé a ndaa quíhvi ini a da —nacachi na cán cánahá na xihín Jesús.

44 Quiahva já cánahá ri ndívi taa cuihná táca in in xoo jin á cán xihín á.

Tá naxihi Jesús

(Mr. 15:33-41; Lc. 23:44-49; Jn. 19:28-30)

45 Tá naxinu coo caxivi ndaa nacanaá níi cúu ñuyívi ta janda caa uní saḥini já nacasáhá nandiyehé tucu.

46 Ta sa mé hora já nacayuhú cóhó Jesús já nacachi a já:

—Elí, Elí, lama sabactani —ña yóho cúni cachi a: Ndióxi mí i, Ndióxi mí i, ndávaḥa najándacoo ndáḥa ndó yehé.

47 Ta java na ndíta cán tá naxini johó na tuhun cáhí a já nacachi na já:

—Cána da profeta Elías —nacachi na cán.

48 Ivi laá xínu in da nasahan da nachindaxi da in ticoto ini vino iyá. Ta nacató da ña nuú in yitó ndoo já nachínee da do yati yúhu Jesús ña ná coho a do.

49 Joo na java ndíta cán nacachi na já xihín dá:

—Cóho candehé yo á quixi Elías jácau a da —nacachi na cán.

50 Anda já nacayuhú cóhó tucu Jesús já naxihi a.

51 Ta ndaja coo nandatá java ndaa jahmá ndeé ña sáji nuu nuú yii ndivaḥa veñuhu

cáhnu ñuu Jerusalén cán. Janda jini á ta janda saḥá nandata. Ta mé hora já nataan ta ndijáa yuu tóto ndúu cán nandata.

52 Ta nanuna cáva nuu nasañuhu na naxihi ta cuahá ñayivi, na nasacuu cuéntá Ndióxi nanditacu tucu na.

53 Ta tá sa nanditacu tucu Jesús já naxinu na naqueta cáva cán ñuu Jerusalén ta cuahá ndivaḥa ñayivi naxini ñahá.

54 Ta da cúu sacuaḥa nuú soldado cuéntá Roma xihín da ndáa Jesús xihín da cán tá naxini da ña nataan ta naxini da java ga ña nayaha cán já nacasáhá yíhvi ndivaḥa da. Já nacachi da já:

—Mé a ndaa táhyí cúu da yóho in túhún jini já jahyi Ndióxi —nacachi da.

55 Ta mé cán nasandita cuahá najihí sándeḥé xicá na Jesús. Mé na cán cúu na nacaja ndívi ñahá nuu Jesús tá nandico na mé á naquixi na janda estado Galilea.

56 Tañu najihí cán nasandacaan María, ña ñuu Magdala xihín María, ña cúu náná Jacobo xihín José. Ta cán nasandacaan ri ña cúu náná ndívi da cúu jahyi Zebedeo.

Tá nachicaan na yiquí cuñu Jesús ini cáva

(Mr. 15:42-47; Lc. 23:50-56; Jn. 19:38-42)

57 Ta ndaja coo nasahin in da cuicá naní José, da ñuu Arimatea. Mé da yóho nasacuu da in táhan da nasaxica tuun xihín Jesús. Ta tá sa nacuaá já naxinu da

58 nasahan da cahan ndahví da xihín Pilato ña ná ndiquiahva da yiquí cuñu Jesús nu dá. Anda já nasahnda Pilato chuun ña ná ndiquiahva na ña nu dá.

59 Ta já nachitivi José cán yiquí cuñu Jesús xihín in jáhma vaha ña vií.

60 Ta já nachicaan da yiquí cuñu Jesús ini in yávi ña saá ndácaan ndica cáva ña jacá nacaán da cuéntá mé dá. Ta tá nandihí já nachijahví da yuhú cáva cán xihín in yuu jáhnda cáhnu ta já naquee da cuahan da.

61 Ta nu yéhe mé cáva cán nasanduu coo María, ña ñuu Magdala xihín inga ña naní María cán.

Tá ndáa java soldado nu ndácaan Jesús

62 Ta ndaja coo sa nandihí nacaja ndívi na ñaha cuéntá quivi ndíquehe ndeé na. Ta inga quivi itaan najátaca táhan na sacuaḥa nuú jutú xihín na fariseo já nasahan na nu Pilato.

⁶³ Já ñacachi na já xihín dá:

—Vaxi nde nu ndo caca loho nde ñamani nu ndó. Jáchi ndicuhun ini nde ña tá nasatacu Jesús, da naxica jándahvi ñayivi cán ñacachi da ña tá sa ná yaha uní quivi já nditacu tucu da.

⁶⁴ Ña cuni nde quéa ná chindahá loho ndo na cuhun candaa nuú nachicaan na yiquí cuñu da cán janda quiahva ná yaha uní quivi. Jáchi tiahva náá xinu coo na naxica tuun xihín dá ñuú ta caja cuíhná na yiquí cuñu da. Ta já casahá cachi na xihín ñayivi ñuu ña nanditacu tucu Jesús tañu na naxihi. Ta xihín ña yóho jándahvi chága na ñayivi a juú ga jihna —ñacachi na.

⁶⁵ Anda já ñacachi Pilato já:

—Cañehe ndó in táhndá soldado. Cuáhán ndó candaa ndó nu ndácaan da tá quiahva xini mé ndó caja ndó —cáchi Pilato xihín ná.

⁶⁶ Anda já ñaquee na cán nasahan na já nachicají vaha chága na nu ndácaan yiquí cuñu Jesús cán. Ta nasacu na sello yuu jáhndá cán ta já nasacu na soldado ña ná candaa da ña.

28

Tá nanditacu tucu Jesús

(Mr. 16:1-8; Lc. 24:1-12; Jn. 20:1-10)

¹ Tá sa nayaha quivi ndiquehe ndée ná ta nativi inga quivi itaan já naxinu María, ña ñuu Magdala xihín inga María cán sándehe na nuú nachicaan na yiquí cuñu Jesús cán.

² In naá cuití ñataan ndeé ndivaha. Nayaha ña yóho jáchi ñanuu in tátō Ndióxi indiví. Ta najátiví a yuu jáhndá nasajahvi nuú nasandacaan yiquí cuñu Jesús cán. Ta já nasacoo a jatá.

³ Ta yéhe mé tátō Ndióxi cán tá quiahva yéhe tasa. Ta jáhma ndíxi a cúu á jahmá yaa cachi.

⁴ Ta a juú quiahva ná yihví soldado ndúu cán ñacaja tátō Ndióxi chí ñacasahá quíji ninu da. Ta já ñacuyu da nu ñúhu tátuhun ndii naxihi.

⁵ Joo ndaja coo tátō Ndióxi cán nandicahan xihín najihí cán já ñacachi a já xihín ná:

—A cáyihví toho ndó. Sa xini vaha i ña ndínducú ndo Jesús, ña ñacata caa na ndica crúxu.

⁶ Coó toho a cán ín yóho jáchi sa nanditacu tucu a tá quiahva ñacachi mé á xihín ndo. Naha ndó candehé ndo nuú nasahin a já cuni ndó ña coó ga ín nuú nasacu na ña.

⁷ Ta cama ndó cuhun ndó caxi tuhun ndó xihín da naxica tuun xihín á ña sa nanditacu tucu Jesús tañu na sa naxihi. Ta viti cánú mé á cuahan estado Galilea. Ta tá cuhun ndó cán já cuni ndó a. Ta ndicuhun ini ndó ña ñacachi i xihín ndo —ñacachi tátō Ndióxi cán.

⁸ Anda já ñaquee mé najihí cán mé nuú nasandacaan yiquí cuñu Jesús. Ta vatí yihví na joo cávatá ndivaha na ta sahá ña cán quéa xinu na cuahan na caxi tuhun na ña yóho nuú na naxica tuun xihín Jesús cán.

⁹ Ta nani cuahan na ivi laá sa ín va Jesús xihín ná. Já ñacachi a já xihín ná:

—Ndióxi ná coo xihín ndo.

Anda já ñacayati na cán nu á já ñanumi na sahá ta ñacaja cáhnu na a.

¹⁰ Anda já ñacachi tucu Jesús já xihín ná: —A cáyihví toho ndó. Cuáhán ndo caxi tuhun ndó xihín na cúu cuénta mí i ña ná cuhun na estado Galilea jáchi cán cuni na yéhe —ñacachi Jesús xihín najihí cán.

¹¹ Ta nani xinu najihí cán cuahan na já ndáva java soldado, da nasandaa nuú nasandacaan Jesús cán naxinu da ñuu Jerusalén já ñacaxi tuhun da ña ñacuu nuú na sacuahá nuú jutú.

¹² Anda já najátaca táhan na sacuahá cán xihín na sacuahá veñuhu já najándique táhan na tuhun na ta já nasahan cuhá ndivaha na jiuhún nuú na soldado cán.

¹³ Já ñacachi na já xihín soldado cán:

—Coto a cáhan ndó ña nanditacu Jesús.

Ña cachi ndó cúu ña yóho: “Na naxica tuun xihín á cán, na cán cúu na ñaquixi ñuú ta ñacaja cuíhná na yiquí cuñu a nani ñaquiji nde”, já cachi ndó xihín ndá na ná ndaca tuhún ndohó.

¹⁴ Ta a cáyihví toho ndó tá ná candaa ini da cúu gobernador sahá ña yóho jáchi cahan mé nde xihín dá ta chindeé nde ndohó ña ná a cája da ni in ñaha xihín ndo —ñacachi na sacuahá cán xihín soldado.

¹⁵ Anda já ñaquee da cúu soldado cán jiuhún ta ñacaja da tá quiahva nasahnda na sacuahá cán chuun nu dá. Ta xihín

ñā yóho nāndicujita nuu tuhun sahá ñā nayaha cán. Ta cáhan nā Israel cán sahá ñā yóho janda quivi víti.

Tá sáhdá Jesús chuun nuú nā naxica tuun xihín á

(Mr. 16:14-18; Lc. 24:36-49; Jn. 20:19-23)

¹⁶ Joo ndíhuxu in nā naxica tuun xihín Jesús cán nasahan nā chí Galilea. Já nādaa na in jini yucu tá quiahva nasahnda mé Jesús chuun nu ná.

¹⁷ Ta tá naxini na mé á já nācaja cáhnu na a. Joo java na cáhvi ivi joho ini na jáchi co cándúsa na ñā nānditacu tucu a.

¹⁸ Anda já nācayati Jesús nu ná já nācachi a já xihín ná:

—Nasahan Ndióxi ndée nuú i caja i ñā náhnu ndivaha indivi xihín ñuyiví yóho.

¹⁹ Sahá ñā cán quēa cuáhán ndo jánahā ndo nuú ñayivi ndúu ndijáá ñuyiví ndaja caja na caca vaha na íchi cuéntá mí i. Ta caja ndúta ndó nā xihín quivi Ndióxi, tátá i ta xihín quivi yehe, da cúú in túhún jini já jahyi mé á ta xihín quivi ínima yíi Ndióxi.

²⁰ Ta jánahā ndó nā ñā ná caja na tóco ndihi ñā nasahnda i nu ndó caja ndó. Ta mé a ndaa coo i xihín ndo ndijáá níi quivi janda quiahva ná xinu coo quivi ndihi saha ñuyiví. Já ná coo —nācachi Jesús.

Tuhun vaha nacahyí Marcos saha Jesucristo

*Tá jácandúta Juan ñayivi yucú íchí
(Mt. 3:1-12; Lc. 3:1-9, 15-17; Jn. 1:19-28)*

¹ Quiahva johó nacava sáhá tuhun vaha cáhan saha Jesucristo, mé a cúu in túhún jini já jahyi Ndióxi.

² Sanahá nacahyí profeta Isaías ña nacahan Ndióxi xihín jahyi a. Já cáchí a já: Chindahá i in da canuú cuhun nu mún, ña ná caxi tuhun da nuú ñayivi saha yóhó ta já ndaja ndacú da íchí nuú yahún.

³ Ta cahan cóhó da tañu yucú íchí ta cachi da já xihín ñayivi: “Caja tiahva ndó íchí nuú quixi xitoho í ta cuná ndó in íchí ndacú nu mé á ña ná ndihvi a ínimá ndo”, nacahyí Isaías.

⁴ Ta ndaja coo in Juan yucú íchí ta nacasáhá cája ndúta dá ñayivi. Ta caxi tuhun da xihín ná ña tá cúní na caja cáhnu ini Ndióxi sahá cuachi na já ndítahan nu ná ndicó coo ini na ta já candúta ná.

⁵ Chí naquixi cuahá ndivaha ñayivi estado Judea xihín ñuu Jerusalén taa johó na nu cáhan da ta tá náhma na cuachi na já nacaja ndúta dá na ini yuta Jordán.

⁶ Ta nasandixi mé Juan yóhó jáhma ña nacavaha na xihín iji camello ta nasandico in níi jáhndá tóco dá. Ta naxixi da tica xihín ñuñu yucú.

⁷ Tá caxi tuhun da nuú ñayivi já cáchí da já:

—Jatá yehe vaxi in da íin cuaha chága ndée dá a juú ga yehe chí coo sahá i ndica xítí i nu dá ña ndaxí i correa ndusa dá.

⁸ Yehe najácandúta i ndohó xihín ticuú joo mé da cán cúu da jándicutú ínimá ndó xihín ínimá yíi Ndióxi —nacachi Juan xihín ná.

*Tá nacandúta Jesús
(Mt. 3:13-17; Lc. 3:21-22)*

⁹ Mé tiempo já naquee Jesús ñuu Nazaret ña ndácaan estado Galilea. Naxinu a nu in Juan ta najácandúta Juan Jesús ini yuta Jordán cán.

¹⁰ Ta tá naquee Jesús ticuú cán já naxini a nandinuna indivi ta nanuu ínimá yíi Ndióxi

jata mé á. Ta cáa ínimá yíi Ndióxi yóhó tá quiahva cáa in ndijata.

¹¹ Ta naxini johó na cáhan in a indivi ta já cáchí a já:

—Yóhó cúún jahyi máni i ta cájii ndivaha ini i xuhun.

*Tá naxito ndojó tiñáhá sacuahá Jesús
(Mt. 4:1-11; Lc. 4:1-13)*

¹² Ivi laá nasahan ínimá yíi Ndióxi ndáca Jesús yucú íchí nu coo ñayivi.

¹³ Ta cán nasahin a ivi jico quivi ta mé tiñáhá sacuahá naxito ndojó rí a. Ta cán ndúu quití quini joo naxinu java táto Ndióxi chindeé na mé á.

Cásahá Jesús cáhan tuhun vaha xihín ñayivi

(Mt. 4:12-17; Lc. 4:14-15)

¹⁴ Tá nandihí nachicaan na Juan vecaa já nasahan Jesús estado Galilea caxi tuhun a nuú ñayivi tuhun vaha saha Ndióxi.

¹⁵ Já cáchí a já xihín ná:

—Sa naxinu tiempo viti ta nacayati quivi cacomí Ndióxi cuénta sahá ñayivi. Ña ndítahan nu ndo quea jándacoo ndó cuachi cája ndó ta candúsa ndó tuhun vaha ña cuu jácacu ndohó —nacachi Jesús.

*Cána Jesús comí na caca tuun xihín á
(Mt. 4:18-22; Lc.: 5:1-11)*

¹⁶ In tañu xíca Jesús cuahan yati yuhú tañuhú Galilea. Ta naxini a in da naní Simón xihín Andrés, da cúu ñani. Ndíví mé da yóhó cúu dá da tává tiyacá ta ñúhu da jácana da ñúnu dá ini tañuhú.

¹⁷ Nacasáhá cáchí Jesús já xihín dá:

—Naha quíi ndó candico ndó yehe caca tuun ndó xihín i. Táva ndó tiyacá viti joo caja i ña ná cuu tavá ndó ñayivi tañu cuachi —nacachi Jesús.

¹⁸ Ta chí ivi laá najándacoo da ñúnu dá ta nandico da Jesús.

¹⁹ Anda já naxica loho ga Jesús chí nuú já naxini a Jacobo xihín ñani da Juan, da cúu jahyi Zebedeo. Ndíví da yóhó ñúhu da ini barco ndája vaha da ñúnu dá.

²⁰ Nacana Jesús ndíví da yóhó ta chí najándacoo da tátá da, Zebedeo cán ini barco xihín java ga da cája chúun xihín dá ta já nacasáhá xíca tuun da xihín Jesús.

*Tá ndácaan ínima quini ini in dataa
(Lc. 4:31-37)*

21 Naxinu coo Jesús xihín na xíca tuun xihín á ñuu Capernaum. Ta tá natandaa quivi ndíquehe ndée ñayivi já naquihvi Jesús ini veñuhu ta nacasáhá jánaha na cán.

22 Ta nacatontó tóco ndihi ñayivi sahá tuhun cáhan mé á jáchi najánaha mé á tátuhun in da íin saha cahnda chuun ta co cáhan tátuhun na jánaha ley Moisés.

23 Ini mé veñuhu cán nasandacaan in dataa, da ndácaan ínima quini ini. Nacasáhá cáyuhú rí cán já cáchí rí já:

24 —Jesús, da ñuu Nazaret. Ndá cuéntá quéa quihvi nuún xihín nde. Á vasún jándihún sahá nde. Sa xini vaha i yohó ta cánda cáxí ini i ña cúun in da yii nachindahá Ndióxi —nacachi rí cán.

25 Ta nacasáhá Jesús jánani a rí quini ndácaan ini da cán. Já nacachi a já:

—Caji yuhun ta janí da yóho.

26 Ta tá quéta rí quini ndácaan ini da cán nasahní yihí rí da ta cáyuhú cóhó rí já naqueta rí ini da cán.

27 Nacatontó tóco ndihi ñayivi chí nacasáhá ndáca tuhún táhan na já cáchí na já:

—Ndía quéa yóho. Ta ndá naquixi tuhun saá jánaha da yóho jáchi cáhan da xihín rí quini tátuhun in da sáhdá chuun ta chí cándúsa rí quee rí cuhun rí —nacachi na.

28 Ta chí cama chá nandicuïta nuu tuhun saha Jesús ní cúu estado Galilea.

*Ta nandaja vaha Jesús ña cúu xojo Simón
(Mt. 8:14-15; Lc. 4:38-39)*

29 Tá naquee na veñuhu já cuahan Jesús xihín Jacobo xihín Juan vehe Simón xihín ñani da, Andrés.

30 Ta ndaja coo cándúhu ña cúu xojo Simón nuú xito nachicaan cáhni ndeé ña. Ta tá naxinu coo na cán já nacaxi tuhun na nuú Jesús ña quihvi ña.

31 Anda já nacayati Jesús nu ña ta natiin a ndáha ña já nandiñehe a ña chí ivi laá nandindaa cáhni á ña. Anda já nacasáhá cája ndívi ña ña cuxu na.

*Ndája vaha Jesús cuahá ñayivi
(Mt. 8:16-17; Lc. 4:40-41)*

32 Tá naqueta nuu candii ta nacuaá já ñehe ndihi ñayivi na quihvi xihín na ñuhu ínima quini ini nacasaá na nu Jesús.

33 Ta tóco ndihi na ñuu nandai cuu na yuyéhe nu íin Jesús.

34 Nandaja vaha Jesús cuahá ñayivi, na ndóho tá nuú cuehe. Ta natavá a cuahá ínima quini ini ñayivi. Joo coo nasahan Jesús ñamaní nu rí quini ña ná cahan rí jáchi xini rí yo cúu Jesús.

*Xíca nuu Jesús jánaha ñayivi estado
Galilea*

(Lc. 4:42-44)

35 Ta naha inga quivi itaan tá camaní yii tivi nandacoo Jesús ta naquee a ñuu cuahan nuú coo ñayivi ña cacá tahvi a nu Ndióxi.

36 Tá nandacoo Simón xihín java ga da xíca tuun xihín Jesús já naxini na ña coo a íin chí naquee na cuahan na ndinducú na mé á.

37 Ta tá nandiñehe ñahá na já cáchí na já xihín á:

—Tóco ndihi ñayivi ndinducú na ndohó.

38 Joo cáchí Jesús já xihín ná:

—Cóho java ga ñuu yati yóho ña ná jánaha i tuhun vaha nuú na cán viti jáchi sahá ña yóho vaxi i —cáchí Jesús.

39 Ta chí naxica nuu Jesús ní cúu estado Galilea cáhan tuhun vaha ini veñuhu in in ñuu cán ta tává a ínima quini ndácaan ini ñayivi.

*Tá nandaja vaha Jesús in da ndóho cuehe
táhyi*

(Mt. 8:1-4; Lc. 5:12-16)

40 Ta ndaja coo nacayati in dataa ndóho cuehe táhyi nuú Jesús ta nacaxití da nu á já nacasáhá cáchí da já:

—Cuu ndaja vaha ndó yehe tá cúni ndó —cáchí da.

41 Ta natahvi ini Jesús saha dá. Anda já nacani ndaa ndáha á da. Já cáchí a já:

—Cúni ña ná ndivahún ña cán quéa nandivahún viti —nacachi Jesús xihín dá.

42 Tá nacachi a já chí ivi laá nandindaa cuehe táhyi ña nandoho da cán. Já nandivií yiquí cuñu da.

43 Tá nandihí najándindayí Jesús da ta nasahnda chuun nu dá já cáchí a já xihín dá:

44 —Candehé. A cáhūn xihín ni in túhūn toho ñayivi ña ñacaja i xuhūn. Cuáhán ndacún nahūn mún nuú jutū. Ta ndítahan jocún ñaha nu Ndióxi tátuhun nasahnda ley Moisés sanahá caja na sa nandivaha. Já ná candaa ini tóco ndihi ñayivi ña sa nandindaa va cuehe nasandohún —ñacachi Jesús xihín dá.

45 Joo tá ñaquee da cuahan da ñacasáhá da ndícani da nuú ndihi ñayivi ña nandaja vaha Jesús da sahá ña cán quea coo ñacuu ga ndihvi tívi Jesús ni in ñuu. Jatá ñuu nuú co ndúu ñayivi nasahiin a ta janda mé cán xínu coo ñayivi, na quíxi nuú ndijáá ñuu xito nihni na mé á.

2

Tá nandaja vaha Jesús in da ñaxihí tuchu saha

(Mt. 9:1-8; Lc. 5:17-26)

1 Tá ñayaha chá quívi já nandico coo tucu Jesús ñuu Capernaum. Ta ñacandaa ini ñayivi ña ín a vehe.

2 Ta chí cama chá nanditútú cuahá ñayivi chí coo vátí ga yuyéhe cándita na. Já ñacasáhá cáxi tuhun Jesús tuhun Ndióxi nu ná.

3 Anda já ñaxínu coo comí ñaa ta ñéhe da in da ñaxihí tuchu saha. Nasaa da nu ín Jesús.

4 Joo ñaxini da ña a cuú xínu da yati nu ín Jesús sahá cuahá ñayivi chútú ndaa nu ín a cán. Chí nandaa da jiní véhe ta ñacasáhá da súná da jiní véhe mé xoo nu ín Jesús. Ta mé cán najánuu da xito loho nu cándúhu da quíhvi chí yávi jiní véhe cán.

5 Tá ñaxini Jesús ña cándeé ini da cán mé á já cáhí a já xihín mé da quíhvi cán:

—Candehé, jahyi a. Sa ñacaja cáhnu ini i sahá cuachún viti —ñacachi Jesús.

6 Joo java na jánaha ley Moisés ndúu coo cán ñacasáhá cáhán na:

7 “Ndá cuéntá quea ndája núu da Ndióxi xihín tuhun cáhan da. Jáchi ni in túhūn toho ñayivi a cuú caja cáhnu ini sahá cuachi. In túhūn jiní Ndióxi quea cuu caja cáhnu ini sahá cuachi”, ñacahán na.

8 Joo sa ñacandaa ini Jesús ña cáhvi ini na cán chí ñacachi a já xihín ná:

—Ndávaha cáhán ndo já.

9 Á cáhán ndó ña ihvi chága cachi i xihín da yóho: “Ñacaja cáhnu ini i saha cuachún viti.” Á tá coo ta cachi i xihín dá: “Cuándacoo, ndiquehe xitún ta caca nuún.”

10 Candehé vaha ndó ná ñaha i nu ndo ña ín sahá i, da ñachindahá Ndióxi nduu u ñayivi caja cáhnu ini i sahá cuachi cája ñayivi ñuyiví yóho —ñacachi Jesús xihín ná.

Anda já ñacachi a xihín mé da ñaxihí tuchu saha cán:

11 —Ta viti cáhan i xuhūn cuándacoo ndiquehe xito lohún ta cuanúhu —ñacachi a.

12 Chí ivi laá nandacoo mé da quíhvi cán ta nandiquehe da xito loho da já ñaquee da cuahan da nuú ndihi na ndúu cán. Anda já ñacatóntó tóco ndihi na ta ñacasáhá cája cáhnu na Ndióxi já cáhí na já:

—Ni in túhūn tañu coo ñaxini nde in ñaha cáhnu tátuhun ña yóho —ñacachi na.

Tá ñacana Jesús Leví, da cáhan na Mateo xihín

(Mt. 9:9-13; Lc. 5:27-32)

13 Tá nandihí já nasahan tucu Jesús yuhú tañuhú cán ta tá ñacayati cuahá ñayivi nu á já ñacasáhá jánaha nu ná.

14 Nani xíca Jesús cuahan ñayaha nu ín in da naní Leví, jahyi Alfeo. Ta ín coo da nu sácoo da játaca jjuhún cuéntá impuesto. Ta cáhí a já xihín dá:

—Naha quí candicun yehe.

Anda já nandaca ndichi Leví ta nandico da Jesús.

15 Tá nandihí nasahan Jesús vehe Leví ta nasacoo a xíxi a xihín cuahá da játaca jjuhún cuéntá impuesto xihín java ga na cája cuachi. Ta sa mé cán nasanduu ri java da xíca tuun xihín Jesús xíxi da tañu na cán jáchi cuahá ñayivi ndico na Jesús.

16 Joo na jánaha ley Moisés xihín na fariseo tá ñaxini na ín coo Jesús xíxi a xihín na cán ñacasáhá cáhí na já xihín da xíca tuun xihín Jesús:

—Ndá cuéntá quea xíxi xitoho ndó xihín na játaca jjuhún cuéntá impuesto ta xihín java ga na cája cuachi —ñacachi na cán.

17 Tá ñaxini joho Jesús ña yóho ñacasáhá cáhí a já:

—Ñayivi ín vaha coo xíní ñuhú toho na da cája tátá ñahá joo na quíhvi, na cán cúu na

xíní ñúhú da cája tátá ñahá. Ta yehe coó vaxi toho i cana i na sa ín vaaha. Vaxi i cana i ñayivi, na cája cuachi ña ná jándacoo na cuachi cája na —nacachi Jesús.

Cáhan Jesús ndá saha quéa cajuhun na (Mt. 9:14-17; Lc. 5:33-39)

¹⁸ In tañu tá xíjuhun na xíca xihín Juan xihín na xíca xihín na fariseo naxinu coo java ñayivi nu Jesús ta nacasáhá ndáca tuhún na mé á já cáchí na já:

—Ndávaha co xíjuhun toho na xíca tuun xihín yóhó joo xíjuhun mé nde, na xíca xihín Juan xihín na xíca xihín na fariseo —nacachi na.

¹⁹ Ta nanducú ñehe Jesús tuhun nu ná já nacachi a já:

—Á cáhán ndo xíjuhun na ndúu víco tándaha nani ín mé da tándaha cán xihín ná. Uñun. Jáchi cáji ín na nani ín mé da tándaha xihín ná. Chí a cuú toho cajuhun na.

²⁰ Joo xinu quivi candaa na mé da tándaha ta anda jáví casáhá cajuhun na. Ta cáchí i xihín ndó ña vaxi quivi candaa na yehe nuú na yóho ta anda jáví casáhá na xíca tuun xihín i cajuhun na —nacachi Jesús.

²¹ Ta nasacu Jesús inga quiahva nu ná já cáchí a já:

—Ama ná jándaha ñayivi jahmá yatá xihín in tuhún jáhma saá jáchi tá nandihí ndíndíí a, sáhdá chága ví a jahmá yatá cán ta jándacáhnú chága ví a yávi ña nandicahmá na cán.

²² Ta ni co táán na vino saá ini vóso níí yatá jáchi jáchandi mé vino cán níí ta cuíta mé vino cán ta tíví vóso níí caja dó sahá ña cán quéa ndítahan taán na vino saá ini vóso níí saá —nacachi a.

Ña nacaja na xíca tuun xihín Jesús in quivi ndíquehe ndée ñayivi (Mt. 12:1-8; Lc. 6:1-5)

²³ In quivi ndíquehe ndée ñayivi nani xíca Jesús cuahan tañu nuú naxutu na trigo xihín na xíca tuun xihín á já nacasáhá tuhún na yucu jiní trigo.

²⁴ Tá naxini na fariseo ña cája na já nacachi na já xihín Jesús:

—Candehé. Ndávaha cája na xíca tuun xuhun chuun ña co ndítahan caja na quivi ndíquehe ndée yo —nacachi na fariseo.

²⁵ Anda já nacachi Jesús já xihín ná:

—Á a ñaha cahvi ndó nuú tuhun Ndióxi nu cáhan sahá ña nacaja David sanahá tá nacuico mé dá xihín na xíca xihín dá.

²⁶ Ña nacaja David quéa naquihvi da veñuhu Ndióxi tá nasacuu Abiatar da sacuhá nuú jutú. Já naxixi da pan yii ña in tuhún jutú cuú da ndítahan nuú cuxu ña cán, nduu. Joo naxixi David ña ta nasahan da ña nuú java ga na xíca xihín dá.

²⁷ Ta nacachi tucu Jesús já xihín ná:

—Candehé ndo. Coó nacavaha Ndióxi ñayivi ndoho ini na sahá quivi ndíquehe ndée ná jáchi nasacu ini a cavaha in quivi já ná cuu ndíquehe ndée ñayivi.

²⁸ Ña cán quéa yehe va, da nachindahá Ndióxi nduu ñayivi ín sahá i cahnda i chuun sahá quivi ndíquehe ndée ñayivi —nacachi Jesús.

3

Tá nandaja vaha Jesús in da nahichi ndáha (Mt. 12:9-14; Lc. 6:6-11)

¹ Naquihvi tucu Jesús ini veñuhu ta cán nasandacaan in dataa, da nahichi ndáha.

² Ta nacasáhá nani na fariseo Jesús sándehe na á ndaja vaha mé á da cán quivi ndíquehe ndée ná já ná cuu chican na cuachi jatá.

³ Anda já cáchí Jesús xihín da nahichi ndáha cán já:

—Cuándaco ta candichi mahñú yóho —nacachi Jesús.

⁴ Anda já nandaca tuhún a na java cán já cáchí a já xihín ná:

—Ndía cáchí ley ndítahan caja í mé quivi ndíquehe ndée ñayivi. Á chindeé yó ñayivi á caja í ña núu xihín ná. Á jácácu na á cahní yó na —nacachi Jesús.

Joo ni in tuhún tuhun coó nacahan na.

⁵ Nacasáhá xójo ini Jesús sándehe a nu ná. Joo táhvi tucu ini a saha ná jáchi cuú ná ñayivi sáá ini. Ta cáchí a xihín mé dataa, da nahichi ndáha cán:

—Jándaca ndáhn.

Tá najándacaa da ndáha dá ivi laá nandivaha ndáha dá.

⁶ Tá nandihí naquee na fariseo veñuhu já nacasáhá na jándique táhan na tuhun na xihín na cuéntá Herodes ña cahní na Jesús.

Tá nanditútu cuahá ñayivi yuhú tañuhú

⁷ Joo nasahan Jesús xihín na xíca tuun xihín á yuhú tañuhú ta cuahá ndivaha ñayivi estado Galilea nandico na nasahan na.

⁸ Tá nacandaá ini ñayivi ña náhnu cája Jesús, naquixi cuahá na estado Judea xihín na ñuu Jerusalén xihín na ñundáhyi Idumea xihín na inga xoo yuta Jordán xihín java na ndúu ñuu válí jin ñuu Tiro xihín Sidón jáchi candehé na Jesús cúni na.

⁹ Sahá ña yóho queá naxica Jesús ñamaní nuú na xíca tuun xihín á ña ná cacu tiahva na in barco nuú ndacaan mé á ña ná a cándíhi ñayivi cuahá cán ña.

¹⁰ Jáchi cuahá ndivaha ñayivi nandaja vaha mé á. Sahá ña cán queá tóco ndihí na quíhvi cáti na jatá ña caní ndaa ndáha ná mé á cúni na.

¹¹ Ta tá naxini na ñúhu ínimá quini ini cán Jesús ivi laá ndícava xítí na nu á ta casáhá cáyuhú cóhó na já cáchí rí quini ndacaan ini na cán já:

—Yóhó cúun da cúu in túhún jiní já jahyi Ndióxi.

¹² Joo jánani Jesús rí cán já sáhdá a chuun nu rí ña ná a cáxi tuhun rí yo cúu mé á.

Tá nacaxi Jesús uxu ivi da caca tuun xihín á

(Mt. 10:1-4; Lc. 6:12-16)

¹³ Tá nandihí já naquee xóo Jesús nasahan in xiquí ta tá nandihí nacana mé á java na xíca xihín á cán, mé na cúni a caxi a ta naxinu na cán nu Jesús.

¹⁴ Ta tañu na cán nandicaxi Jesús uxu ivi da caca tuun xihín á ta tá nandihí já nachindahá mé á da cuhun da cahan da tuhun Ndióxi xihín ñayivi.

¹⁵ Ta nacaja mé á ña cuu ndaja vaha da na quíhvi ta cuu cahnda da chuun nu rí quini ña ná quee rí ini ñayivi.

¹⁶ Ña yóho cúu quívi uxu ivi da nandicaxi Jesús caca tuun xihín á: Simón, da nasacu tucu a quívi cananí Pedro

¹⁷ xihín Jacobo xihín ñani da, da naní Juan, jahyi Zebedeo. Ndívi da yóho nasacu a quívi cananí Boanerges ta mé tuhun yóho cúni cachi a cúu dá tátuhun jahyi in tasa ña cána indiví.

¹⁸ Nacaxi a Andrés xihín Felipe xihín Bartolomé xihín Mateo xihín Tomás xihín Jacobo, da cúu jahyi Alfeo xihín Tadeo xihín Simón, da naxica cuéntá na cananista

¹⁹ xihín Judas Iscariote, mé da najicó túhún Jesús tá nu ndíhi.

Jácho na cuachi jatá Jesús ña cája chúun a xihín ndéé tiñáhá sacuaña

(Mt. 12:22-32; Lc. 11:14-23; 12:10)

Anda já naquihvi Jesús ini in vehe xihín na xíca tuun xihín á.

²⁰ Ta inga tucu nachutú cuahá ñayivi nu ín a janda a cúu cuxu a xihín na xíca tuun xihín á cán.

²¹ Ta tá nañehé na vehe Jesús tuhun sahá ña yóho ivi laá naquixi na ña cañehe na mé á cuhun a cúni na jáchi nacatachi Jesús cáhan na.

²² Jári na jánaha ley Moisés, na naquixi Jerusalén nacasáhá cahan na já cáchí na já:

—Taa yóho ndacaan Beelzebú ini da, rí cúu sacuaña nu rí quini. Ta xihín ndéé mé rí cán tává da rí quini ini ñayivi —nacachi na.

²³ Anda já nacana Jesús ñayivi já nasacu a in quiahva nu ná ja cáchí a já xihín ná:

—A cúu tavá tiñáhá sacuaña mé rí.

²⁴ Jáchi tá sáhdá java táhan na ndúu in ñuu ta cáni táhan ndaja táhan mé va na já queá a ñeñe íni na coo nahá na.

²⁵ Ta tá casáhá sáhdá java táhan na ndúu in vehe ta cáni táhan na já a cúu ga canduu nahá na mé vehe cán.

²⁶ Ta quiahva já tá ná casáhá rí quini ndúu ndáha tiñáhá sacuaña cáni táhan rí xihín mé va rí janda quiahva sáhdá java táhan rí já queá a cúu canduu nahá rí jáchi ndihí saha rí.

²⁷ 'Sácú u inga quiahva nu ndo. Ni in dataa a cúu ndihvi da caja cuíhna da ñaha vehe in da ndacú cán joo tá ná cató da da ndacú já cuu quehe da ñaha da cán.

²⁸ 'Mé a ndaa ná cahan i xihín ndo. Ndióxi cuu caja cáhnu ini a saha tá nuú cuachi cája ñayivi xihín saha tá nuú tuhun quini cáhan na.

²⁹ Joo tá ná cahan núu na saha ínima yii Ndióxi já quea a cája cáhnu ini Ndióxi sahá ña nacaja na ta anda ama cáa quivi candojo na cuachi sahá —nacachi Jesús.

³⁰ Nacachi a ña yoho xihin na cán jáchi cáchi na ña ndacaan ínima quini ini a.

Nána Jesús xihin ñani a cuni na cuni na a (Mt. 12:46-50; Lc. 8:19-21)

³¹ Tá nandihí naxinu náná Jesús xihin ñani a nu íin a joo nacandoo na jata véhe. Ta nachindahá na in na nasahan nacana ñahá.

³² Ta na ndúu coo xihin Jesús cáchi na já xihin á:

—Jata véhe cáa íin nánún xihin ñanún ta ndínducú na yohó —cáchi na xihin Jesús.

³³ Anda já nacachi Jesús já xihin ná:

—Ná cahan i xihin ndo yo já cúu tátuhun náná i xihin ñani i.

³⁴ Anda já nasandehé a nuú na ndúu coo tiyivi xihin á cán já cáchi a já xihin ná:

—Na yoho cúu ná tátuhun náná i xihin ñani i.

³⁵ Jáchi ndá na cája ña cuni Ndióxi, na cán cúu ná tátuhun ñani i xihin quiahvá i xihin náná i —nacachi Jesús.

4

Sácú Jesús quiahva sahá in da sátá tata (Mt. 13:1-9; Lc. 8:4-8)

¹ Nacasahá tucu Jesús jánaña ñayivi yuhú tañuhú ta nataca cuahá ñayivi nu íin a cán. A juú quiahva cuaha cúu ná sahá ña cán quea naquihvi Jesús ini in barco, dó cándichi yuhú tañuhú cán. Ta nasacoo a cán ta tóco ndihí ñayivi nandaca ndita na nuú ñutí yuhú tañuhú cán.

² Já najánaña cuahá ñaha nuú na cán ta nasacu a quiahva nu ná já cáchi a já:

³ —Cuni johó ndó ña yoho: In da sátá tata naquee da cuahan da cata da ña.

⁴ Ta tá sátá da ña cuahan da nacuyu java ña íchi ta naxinu laa ta nasaxí rí a.

⁵ Ta java ña nacuyu a tañu yuu nuú coo cuaha ñuhu. Ta cama chá nanduta mé tata cán jáchi coo cúná ñuhu nuú nacuyu a.

⁶ Joo tá naqueta candii já najáhichi a ña sahá ña coo cuaha yoho a chí nandihí sahá.

⁷ Ta java tata nacuyu a tañu tohíñú ta tá nasahnu tohíñú cán já nanditáha ndihí a

nacaja tohíñú chí coo nasahan mé tata cán ndá ñaha jáquee na nu á.

⁸ Ta java tata nacuyu a nuú ñuhú vaha. Nanduta mé tata cán ta nasahnu a já nasahan cuahá ñaha ña jáquee na nu á. Java ña nasahan oco uxu a nuú in in tata ta java ña nasahan uni jico uxu a ta java ña in ciento a nuú in in tata.

⁹ Anda já nacachi tucu Jesús já xihin ná:

—Na íin johó, ná cuni johó na —nacachi a.

Ndícani Jesús ndá saha quea nasacu a quiahva nu ná

(Mt. 13:10-17; Lc. 8:9-10)

¹⁰ Tá nacandoo Jesús xihin mé na uxu ivi xíca tuun xihin á cán xihin java ga na ndíco ñahá cán já nacasahá ndaca tuhún na Jesús ña ndíca cuni cachi a xihin quiahva nasacu a nuú na cán.

¹¹ Ta cáchi a já xihin ná:

—Ña coo nacandaa ini ndó jihna ña cán cándaa ini ndó a viti jáchi nasuná Ndióxi xini túni ndo cándaa ini ndó ndá quiahva cacomí mé á cuéntá sahá ñayivi. Joo na a ñaha cacomí Ndióxi cuéntá saha, na cán cúu na sácú u quiahva nuu.

¹² Já quea vatí sandehé na joo cúu ná tátuhun na coo tívi nuu ta vatí xini johó na joo cúu ná tátuhun na johó jáchi coo cándaa ini na ña cahan i xihin ná. Ta sahá ña cán quea coo ndíco coo na nu Ndióxi ta ni mé á coo cája cáhnu ini sahá cuachi na.

Ndícani Jesús sahá da sátá tata cán

(Mt. 13:18-23; Lc. 8:11-15)

¹³ Ta já cáchi tucu a já xihin na xíca tuun xihin á:

—Ta tá coo cándaa ini ndó quiahva, ña nasacu u yoho ndaja caja ndó cándaa ini ndó java ga quiahva ña cachi i xihin ndo.

¹⁴ Mé da sátá tata cán cúu dá tátuhun da xíca cahan tuhun Ndióxi xihin ñayivi.

¹⁵ Java ga ñayivi cúu ná tátuhun tata ña nacuyu íchi. Táa johó na tuhun Ndióxi ta tá nandihí naxini johó na ña já vaxi tiñahá sacuaha ta cája rí xihin ná ña ndíndójó na ña.

¹⁶ Ta java ñayivi cúu ná tátuhun tata ña nacuyu tañu yuu jáchi táa johó na tuhun Ndióxi ta cájii ini na ndíquehe na ña.

¹⁷ Ta tá quiahva ndiává yucu sahá ña coo ñuhu cúná yoho a quiahva já ndóho ñayivi

tá casáhá ndicujta ñayivi cája xíxi na xihin ná. Ta tá casáhá ndóho ini na sahá tuhun Ndióxi ña naxini johó na cán chí ivi laá jándacoo va na ña cándeé ini na Ndióxi.

18 Ta java na cúú ná tátuhun tata ña nacuyyu tañu tohíñú jáchi táa johó na tuhun Ndióxi

19 joo ndícani ndivaha ini na sahá ñaha ñuyíví yóho. Cátóó ndivaha na ñaha cuicá chí jándahvi na mé ná xihín ña cán ta xíca ini na coo tóco ndihi ñaha nu ná. Ta cáva nuu táhan ñaha ñuyíví yóho xihín tuhun Ndióxi ini ínimá ná sahá ña cán quéa cávitá ini na ta coo sáhnú na xihín tuhun Ndióxi.

20 Joo ndúu java na xini johó tuhun Ndióxi ta cándúsa na ña. Ta cája chúun vaha na xihín á ta já cuahnu na xihín á. Cúú ná tátuhun tata nacuyyu nu ñuhú vaha. Java na cúú ná tátuhun tata ña nasahan oco uxu a nuú in in a. Ta java na cúú ná tátuhun ña nasahan uní jico uxu a ta java na cúú ná tátuhun ña nasahan in ciento a nuú in in tata —nacachi Jesús xihín na cán.

*Sácú Jesús quiahva sahá in lámpara
(Lc. 8:16-18)*

21 Ta cáchi tucu Jesús xihín ná:

—Coó toho chuun lámpara tá chícaan í ña tixi sato á tixi xito jáchi chuun ña quéa cánúu ña nu jícó já ná jándiyehé ña nu yo.

22 Ni in túhún toho ñaha a cuú coo jehé jáchi xinú quivi já ndáca náha nu á. Ta ni in tuhun nacahan jehé ñayivi a cuú coo jehé nahá jáchi xinú quivi já candaá ini tóco ndihi ñayivi sahá tuhun nasahin jehé cán.

23 Na íin johó, ná cuni johó na —nacachi a.

24 Ta cáchi tucu a já xihín ná:

—Candehé vaha ndó ña taa johó ndó. Tá quiahva cája ndó xihín ñayivi quiahva já caja Ndióxi xihín ndo joo chága ví caja mé á xihín ndo.

25 Jáchi da sa íin ñaha nuu, ñehé táhvi dá coo chága ñaha nu dá joo da coo ñaha nuu, janda ña chá íin nu dá ndindaa —nacachi Jesús.

Jánaha Jesús nu ná ndá quiahva sáhnú tata

26 Ta cáchi tucu Jesús já:

—Tá ndíquiahva ñayivi mé ná ndáha Ndióxi ña ná cacomí a cuénta saha ná já cúú á tátuhun in dataa nachihin tata.

27 Tá nandihí yáha quivi ta quiji da ta ndácoo da já yáha quivi xihín ñuú. Ta já ndúta mé tata cán ta sáhnú a joo mé da nachihin a cán coo xini da ndaja sáhnú a.

28 Sáhnú a jáchi chuun nu mé ñuhú quéa caja ña ná cuahnu ña cán. Jihna ñuhú ndúta mé yucu trigo já cana yóco a ta nu mé yóco a cán ndícutú ndaa ndíqui á.

29 Ta tá nachichi mé ndíqui a cán já quée na cuahan na jáquee na ña jáchi naxinu coo quivi jáquee na ña —nacachi Jesús.

*Sácú Jesús inga quiahva saha ndíqui mostaza
(Mt. 13:31-32; Lc. 13:18-19)*

30 Ta cáchi tucu Jesús já:

—Viti sácú u inga quiahva nu ndo já ná cándaá ini ndó ndá quiahva caja Ndióxi xihín ñayivi tá casáhá a cómí a cuénta saha ná.

31 Cúú á tátuhun in ndíqui mostaza ña chíhin na nuú ñundáhyi. Cúú á ndíqui loho chága nu tóco ndihi ndíqui válí íin ñuyíví.

32 Joo tá nandihí nachihin na a nasahnu a ta nanduu a in yíto, dó cáhnú nu ndíhi yíto. Ta xihín ndahá náhnú dó sácú do cati ta janda laa ndíquehe ndée ri nu cati do —nacachi Jesús.

*Sácú Jesús quiahva cuití va nuú ñayivi
(Mt. 13:34-35)*

33 Najánaña Jesús tuhun Ndióxi nu ná. Ta nasacu cuahá quiahva nu ná tátuhun ña yóho janda quiahva xinú nu mé ná cándaá ini na.

34 Xihín mé quiahva cuití va najánaña Jesús nuú ñayivi joo tá nacandoo Jesús xihín mé na xíca tuun xihín á já ndícani cáxi ndihí a ñaha nuú na cán.

*Tá najácatáji Jesús tañuhú tá ndícojo do
(Mt. 8:23-27; Lc. 8:22-25)*

35 Tá nacuaá mé quivi cán já nacachi Jesús já xihín na xíca tuun xihín á:

—Cóho inga xoo tañuhú yóho.

36 Anda já najándacoo na ñayivi já naquee na cuahan na xihín Jesús ini mé barco nuú sa ndácaan mé á. Ta ndáca táhan java ga barco cuahan dó xihín ná.

37 Ta ndaja coo naxinu in tachi quini ndivaha. Ta nacasaha ndicojo tañuhu ndihvi dó ini barco já nacasaha ndicutú ticuñi ini mé barco cán.

38 Ta chí xoo jata mé barco cán cánduhu Jesús quiji a ta cánuu jini á jata ña yihi jini ná. Já najandacaxi ini na mé á ta cáchi na já xihin á:

—Maestro. Chí co sáhní a mé á ña cuni ndihi saha yo jáchi sácoo barco cahá ticuñi cuahan do —nacachi na.

39 Anda já nandacoo Jesús ta nacasaha jananí a tachi xihin tañuhu viti já cáchi a já:

—Catáji ndo.

Já najáyaá tachi. Já nacandoo táji ní mé cán.

40 Anda já nacachi Jesús xihin na xica tuun xihin á:

—Ndavaha nayihvi nahá ndo. Ndavaha co cándeé ini ndó yehe —nacachi a.

41 A juú quiahva nayihvi mé na cán já nacasaha cahan xihin táhan na:

—Ndá da cúu dataa yóho ña janda tachi xihin tañuhu cándusa nu cahan da —nacachi na cán.

5

Tá nandaja vaha Jesús in da ndacaan ínimá quini ini

(Mt. 8:28-34; Lc. 8:26-39)

1 Anda já naxinu na inga xoo mé tañuhu cán nu íin ñundáhyi cuéntá Gadara.

2 Ta tá nanuu Jesús barco cán já naquee in dataa camasanto já naxinu da nuú Jesús. Mé da yóho cúu dá da ndacaan ínimá quini ini.

3 Ta íin va da nu ndúxu ndii ta ni in na a cuú cató na da ní xihin cadena a cuú cató na da.

4 Vatí cuahá tañu sa nacató na saha dá xihin ndáha dá joo sáhdá da cadena ta jácuachi da ña ta ni in na a cuú caja xihin dá.

5 Ñuú ta ndiví xica nuu da yucu xihin nu ndúxu ndii cáyuhú da xica nuu da ta jándicuehe da mé dá xihin yuu.

6 Joo tá naxini xica da Jesús, ñihi chá nasahan da naxinu da nu íin a já nandicava xítí da nu á.

7 Ta cáyuhú cóhó da já cáchi da já xihin á:

—Ndá cuéntá quéa vasún quihvi nuún xihin i. Yóho cúu Jesús, da cúu in túhún jini já jahyi Ndióxi, ña cánu ndivaha. Xica tahví i nuun ña ná a jándohún ini i —nacachi da.

8 Nacachi da ña yóho xihin Jesús jáchi nacasaha sáhdá mé á chuun nu rí quini cán já cáchi a já:

—Ínimá quini, janí da yóho.

9 Anda já nandaca túhún Jesús mé rí quini cán já cáchi a já:

—Ndaja nanún.

Anda já nanducú ñehe da cán túhun nu á já nacachi da já xihin á:

—Legión naní nde jáchi cuaha cúu nde.

10 Ndáhví mé xica tahví da cán nu Jesús ña ná a táva xica a rí quini cuhun rí.

11 Ta ndaja coo xica nuu cuaha cóchi xixáhan rí yati yucu cán.

12 Saha ña cán quéa naxica tahví mé ínimá quini cán nu Jesús já cáchi rí já:

—Chindahá ndehe ná cuhun nde ndihvi nde cóchi cáa.

13 Anda já nasahan Jesús ñamaní ta chí naquee ínimá quini nasañuhu ini da cán já nandihvi rí ini cóchi xica nuu cán. Ta tóco ndihí cóchi yóho xínu rí cuahan rí nanuu rí nu ndáyi já najáqueta nuu rí mé rí ini tañuhu chí nacandaa rí ticuñi já naxihí rí. Tátuhun ivi mil cóchi nandihí saha.

14 Ta ndaja coo mé da ndáa cóchi cán nayihvi da chí xínu da cuahan da caxi túhun da ña nayaha yóho nuú ñayivi ñuu Gadara xihin nuú java ga na ndúu yati cán. Naquee cuahá ñayivi mé cán candehé na ña nacuu.

15 Tá naxinu coo na nu íin Jesús naxini na íin coo da nasañuhu cuaha rí quini ini cán. Sa nandaca ndixi da jáhma ta sa nandicaxi táhyí ini da. Chí nayihvi na.

16 Ta na naxini ña nacaja Jesús cán nacasaha na ndícani na nuú ñayivi ña nandoho dataa, da nasañuhu rí quini ini cán xihin ña nandoho cóchi viti.

17 Anda já nacasaha na xica tahví na nu Jesús ña ná quee a cuhun a.

18 Tá sa cuahan ndihvi Jesús ini mé barco cán já naxinu da nasañuhu rí quini ini cán já nacasaha da xica tahví da nu á ña ná quiahva ñamaní nu dá cuhun da xihin á.

19 Joo coó nasahan Jesús ñamaní nu dá já ñacachi a xihín dá:

—Cuanúhu vehún ta ndicani nuú na vehún ndaja náhnu ñaha ñacaja Ndióxi xuhun ta ndaja natahvi ini a sahun — ñacachi a.

20 Já ñaquee da cuahan da ta ñacasáhá da ndicani da nuú ñayivi ndúu java ñuu cuéntá Decápolis tóco ndihi ña ñacaja Jesús xihín dá. Chí cátóntó ña táa johó na ña.

Tá ñandaja vaha Jesús jahyi jhí Jairo xihín in ña ñacani ndaa ndáha jáhma á
(Mt. 9:18-26; Lc. 8:40-56)

21 Tá ñandihí ñandihvi Jesús ini mé barco cán já ñaxinu coo a inga xoo tañuhú nuú ñaquixi a. Ta cán ñanditútú cuahá ñayivi nu á mé yuhú tañuhú cán.

22 Já ñaxinu in da naní Jairo, da sáhdá chuun veñuhu. Tá ñaxini da Jesús ñacaxítí da sahá.

23 Ta ndáhví mé ñaxica tahví da nu á já cáchí da já:

—Xíhi jahyí i viti ñuhú. Caja ndó ñamaní ná cohó vehe chinúu ndó ndáha ndó jata ña ná ndivaha ñá já ná catacu ñá — ñacachi da.

24 Anda já ñaquee Jesús cuahan xihín dá. Chí cándíhi táhan mé ñayivi ndíco ña jata cuahan na.

25 Ta tañu ñayivi cán ndácaan in ña quíhvi. Sa ñaxinu uxu ivi cuia ndítahví ñi ña.

26 Nandoho ndivaha ini ña nuú ña cája tátá ñayivi ta sa najátiví ndihi ñá jjuhún ña cátátá ña cúní ña. Joo a cuú ndivaha ñá ta janda cája ndeé chága ví a xihín ña.

27 Tá ñaxini johó ñá saha Jesús já cuahan ñá cayati ñá chí jata tañu tóco ndihi ñayivi cuahan jata mé a cán. Ta ñacani ndaa ndáha ñá jáhma á

28 jáchi ñacahán ña: “Tá ná cani ndaa cuití ndahá yo jáhma á já ndavaha í”, ñacahán ña.

29 Ivi laá nahichí ñi ñá. Ñaxini cáxi ña ñandivaha ñá ta cuahan va cuehe nandoho ñá.

30 Jári Jesús ivi laá ñacandaa ini a ña ñandivaha in ñayivi ñacaja ndée mé á. Já ñacasáhá sándehe a chí jata tañu ñayivi. Já ñacasáhá ndáca tuhún á ña já cáchí a já:

—Ndá ndó ñacani ndaa ndáha jáhma i.

31 Ta ñanducú ñehe mé ña xíca tuun xihín á cán tuhun nu á já cáchí ña já xihín á:

—Sándehe vaha mé ndó ndá quiahva cándíhi táhan ñayivi vaxi na xihín ndó ta cáa ga mé ndó ndáca tuhún ndó ndá ña ñacani ndaa ndáha jáhma ndó — ñacachi na.

32 Joo cáva nuu nuu Jesús sándehe a ndá ña ñacani ndaa ndáha jáhma á.

33 Ta mé ña ñandivaha cán tá ñacandaa ini ñá ña ñayaha já ñacasáhá quíji ñinu ñá sahá ña yíhví ña. Já ñaxinu ñá ñasaxítí ña nu Jesús. Anda já ñacasáhá ña ndicani ñá nu á ndaja cáa ña ñacaja ñá.

34 Anda já ñacachi Jesús já xihín ña:

—Jahyi a, ñandivahún jáchi ñacandúsún yehe. Cuanúhu ta a ndicani ga inún jáchi ñandindaa cuehun — ñacachi Jesús.

35 Cáhan yí va Jesús xihín ñá cán tá ñaxinu java na ñaquixi vehe mé da sáhdá chuun veñuhu cán já ñacachi na já xihín dá:

—Sa ñaxihí va jahyi ndó. A jáquihvi ga ndó da xíca jánahá ñayivi ñan — ñacachi na.

36 Joo ñacaja Jesús tátuhun co xíní johó a nuú ñacahan na. Ñacasáhá cáchí a já xihín da sáhdá chuun veñuhu cán:

—A cáyhívi tohún. Candúsa cuití vún yehe — cáchí a.

37 Ta coó nasahan Jesús ñamaní nuú ña cuaha ndúu cán cuhun ña xihín á. Na nasahan cuití xihín á cúu Pedro xihín Jacobo xihín Juan, da cúu ñani Jacobo.

38 Tá ñaxinu ña vehe mé da sáhdá chuun veñuhu cán já ñaxini a ndíváá ñayivi sácu ndivaha na cáyuhú ña ndúu na cán.

39 Já ñaquihvi a vehe ta já cáchí a já:

—Ndávaha ndíváá nahá ndó ta sácu cuaha ndó. Ta coó ñaxihí toho ñáloho yóho joo quíji cuití va ñá — ñacachi a xihín na cán.

40 Joo ñacasáhá ña sácu ndaa na a. Anda já ñatavá Jesús tóco ndihi ñayivi jata véhe. Na ñaquihvi xihín á ñasacuu tátá náná ña xihín ña xíca tuun xihín á. Ta ñacayati a nu cándúhu mé ñáloho cán.

41 Já ñatiin a ndáha ña ta ñacasáhá cáchí a já xihín ña:

—Talita, cumi — ñacachi a. Mé tuhun yóho cúní cachi a: Náloho cáhan i xuhun cuándacoo.

42 Ivi laá nandacoo ñáloho, ñá ndacaan uxu ivi cuia ta ñacasáhá ña xica nuu ñá. Já ñacatóntó tóco ndihi ñayivi.

43 Joo ñasahnda Jesús chuun nuú na ndúu cán ña ná a cáxi tuhun na ña ñayaha yóho nuú java ga ñayivi. Ta ñasahnda a chuun nu ná ña ná quiahva na ña cuxu mé ñáloho cán.

6

Íin Jesús ñuu a Nazaret (Mt. 13:53-58; Lc. 4:16-30)

1 Naquee Jesús cuanúhu á ñuu a. Já naquee na xica tuun xihin á cuahan na xihin á.

2 Tá naxinu quivi ndiquehe ndée ná já ñacasáhá Jesús jánaña ñayivi ini veñuhu cán. Ta cuahá ñayivi naxini johu nuú ñacahan ta chí ñacatóntó na ta ndáca tuhún xihin táhan na já cáchi na já:

—Ndájá ñacatiahva nahá da yóho ña jánaña dá nu yo. Ndá ñaquixi ña ndíchí jini dá. Ndá ñaquixi ñaha xituhún cája da.

3 Á a juú da yóho cúu da cája chúun xihin yito, da cúu jahyi María. Ta ñani da cúu Jacobo xihin José xihin Judas xihin Simón. Ta quiahva da jan ndúu ñuu yóho xihin mí —cáchi na ndáca tuhún táhan na.

Ta chí coo ñaxeen na candúsa ñahá na.

4 Sahá ña cán quea ñacachi Jesús já xihin ná:

—Vatí tóco ndihi ñayivi cája cáhnu na in profeta joo na vehe da xihin na ñuu da co candúsa na da —ñacachi Jesús.

5 Chí coo ñacuu caja Jesús ña náhnu nuú na cán. Java va na quíhvi cuití va ñachinúu a ndahá jini ná já ñandaja vaha a na.

6 Ta chí ñacatóntó Jesús sahá ña co candúsa na mé á. Sahá ña cán quea ñacachi Jesús cuahan jánaña ñayivi java ga ñuu válí ndúu yati cán.

Tá ñachindahá Jesús uxu ivi na xica tuun xihin á caxi tuhun na nuú ñayivi saha mé á (Mt. 10:5-15; Lc. 9:1-6)

7 Tá najánditaca Jesús ndíhuxu ivi na xica tuun xihin á cán já ñachindahá a na tá ivi tá ivi cañehe táhan na cuhun na. Ta ñasahan ndée nu ná ña ná cuu tavá na ínima quini ñúhu ini ñayivi.

8 Ta ñasahnda a chuun nu ná ña ná a cañehe toho na ñaha cuhun na íchi. In tuhún ña cuu cañehe na cuhun na cúu in garrote, dó tiin ndaa na. Joo a cuú cañehe na ni yátí ni pan ni jiuhún.

9 Ndítahan cayihi na ndusa ta in tuhún cotó na ndítahan candixi na cuhun na.

10 Ta ñacachi a já xihin ná:

—Tá ná xinu coo ndó in vehe, canduu ndó mé vehe jan anda quiahva xinu quivi quee ndó cuhun ndo.

11 Ta ndá ñuu co cúni na ndiquehe vaha na ndohó ta ni co cúni na taa johu na nu cáhan ndo já quea cuahán queta ndó cuhun ndo ta catí ndó ña yacá saha ndo já ná nahá ña cuahan cuachi na cán jata mé va na. Mé a ndaa ná cahan i xihin ndo ña tá ná xinu quivi caja vií Ndióxi sahá ñayivi ndúu ñuyiví já quea jándoho chága Ndióxi ini ñayivi ñuu jan sahá ña coo ñandiquehe na ndohó a juú ga tá quiahva najándoho a ini na ñuu Sodoma xihin Gomorra sanahá —ñacachi Jesús xihin ná.

12 Anda já naquee mé na xica tuun xihin á cuahan na caxi tuhun na nuú ñayivi ña ndítahan nu ná ndicó coo ini na jándacoo na cuachi cája na.

13 Ta ñatavá cuaha ná ínima quini ñasañuhu ini ñayivi ta tá ñaxojo na síti jini ñayivi quíhvi já ñandivaha na.

Tá naxihi Juan, da ñacaja ndúta ñayivi (Mt. 14:1-12; Lc. 9:7-9)

14 Nañehe Herodes, mé da cómi cuénta sahá ñayivi cán tuhun sahá Jesús jáchi ní cúu ñandicuita nuu tuhun sahá. Ta já cáchi Herodes já saha Jesús:

—Á a juú Jesús cúu á Juan, da najácandúta ñayivi ta viti ñanditacu tucu da. Sahá ña cán quea íin ndée da cája da tóco ndihi ña cája da yóho —cáchi da.

15 Ta java na cáchi na já:

—Á a juú da yóho cúu Elías, da ñasacuu profeta.

Ta java na cáchi na já:

—Á a juú da yóho cúu in profeta tátuhun na profeta ñasanduu sanahá ndivaha.

16 Tá naxini johu Herodes ña yóho já ñacasáhá cáchi da já:

—Jivi ndusa da yóho cúu Juan, da najácandúta ñayivi, da ñasahnda i chuun

na chitúhūn ná jico dá joo viti nanditacu tucu da —naçachi da.

¹⁷ Jáchī mé Herodes yóho sa nasahnda da chuun ña ná tiin na Juan, da najácandúta ñayivi ta naçató na da já nachicaan na da vecaa. Naçaja da ña yóho sahá Herodías, ña nasacuu ñájíhí Felipe, ñani mé Herodes jáchī sa naquehe Herodes ña cacuu ña ñájíhí mé dá.

¹⁸ Ta natiin Herodes mé Juan jáchī já nasacaan Juan já xihin dá:

—Co ndítahan cóun xihin ñájíhí ñanún —naçachi da.

¹⁹ Sahá ña cán quéa naxojo ini Herodías xihin Juan. Ta cúni ña cahní ña da joo a cuú caja ña.

²⁰ Jáchī yíhvī Herodes Juan sahá ña xini da ña cúu Juan in taa ndaa, da co cája cuachi. Ña cán quéa coo nasahan Herodes ñamanī nu mé Herodías caja ña ña núu xihin dá. Ta táa johō Herodes nu cáhan Juan vatī cáhvi ivi johō ini da sahá ña xini johō da joo cájii ini da táa johō da nu cáhan da.

²¹ Joo in quivī nanuna nu Herodías cahní ña Juan jáchī naçaja Herodes in víco cuéntá quiví naçacu da. Mé já naçana da da náhnu ndúu nu dá ña ná quixi na cuxu na xihin dá. Ta naçana da tóco ndihi na cúu sacuaḥa nuú soldado xihin tóco ndihi ñayivi in saḥa estado Galilea.

²² Ta ndaja coo ña cúu jahyi jíhí Herodías naquihvi ña nu ndúu na xixi na ta naçasáhá ña xíta sahá ña nuú ndihi na cán. Ta naçatóo Herodes xihín na ndúu xixi xihin dá ndá quiahva naxita sahá ña sahá ña cán quéa naçachi Herodes xihin ña:

—Ndía cúni mún, cacún ña nuú i jáchī quiahva i ña nuun —naçachi da.

²³ Ta nasahan da tuhun da nu ña cán ña quiahva da tóco ndihi ñaha ná caça ña nu dá vatī ñahñu táhvi ndaa ñundáhyi ña cómi da chuun saḥa naçachi da quiahva da nu ña.

²⁴ Já naquee ña cán cuahan ña caxi tuhún ña nu náná ña ña naçachi Herodes xihin ña. Ta naçaca tuhún ña náná ña ndía caça ña nu dá ta já naçachi mé náná ña já xihin ña:

—Caça yiquí jíni Juan, da jácandúta ñayivi —naçachi Herodías.

²⁵ Ta cama chá naquihvi tucu ña cán nu ndacaan Herodes já cáhí ña já xihin dá:

—Viti ñúhú cúni ña ná quiahva mé ndó yiquí jíni Juan, da jácandúta ñayivi nuú i ini in coḥo cáhnu —naçachi ña.

²⁶ Ta ndaja coo naçasáhá naçacuéḥa ndivaha ini Herodes sahá ña naxica ña cán yiquí jíni Juan. Joo sahá ña sa nasahan da tuhun da nu ña ta sa naxini johō tóco ndihi na ndúu xixi xihin dá cán ña naçachi da xihin ña sahá ña cán quéa ndúsa caja da ña cúni ña.

²⁷ Chí ivi laá nachindahá da in soldado vecaa ña ná cañehe da yiquí jíni Juan quixi a.

²⁸ Naxinu soldado cán vecaa já nachitúhūn dá jico Juan já ñehe da ña ini in coḥo cáhnu já nandiquiahva da ña nu ña cán já nandiquiahva ña a nu náná ña.

²⁹ Tá naçandaḥ ini na naxica xihin Juan ña naçaja na xihin dá já nasahan na nandiquehe na yiquí cuñu da já najánduxu na da.

Tá nasahan Jesús ña cuxu uḥun mil taa (Mt. 14:13-21; Lc. 9:10-17; Jn. 6:1-14)

³⁰ Tá nandihī já nandique táhan tucu na xica tuun xihin Jesús xihin á já naçasáhá ndícani na nu á ña naçaja na xihín ña najánaha na.

³¹ Já naçachi Jesús xihin ná:

—Naha ndó ná coḥo ndiquehe ndée loho i nu cáa xóo.

Naçachi a já xihin ná jáchī cuahan vaxi ñayivi xica nuu cuaha chá na mé cán ta chí co sáhan na ñamanī cuxu na.

³² Andá já nandihvi Jesús xihín na xica tuun xihin á ini in barco já naquee na cuahan na in nu cáa xóo.

³³ Joo cuahá ñayivi nandicuni na Jesús tá naquee a cuahan. Já xinu cuahá ñayivi tá nuú ñuu cán cuahan sahá na xoo nuú cuahan Jesús ini barco. Ta jihna ga mé ná naxinu yuhú tañuhú cán a juú ga Jesús.

³⁴ Tá nanuu Jesús barco cán já naxini a cuahá ndivaha ñayivi. Já natahvi ini a saḥa ná jáchī tá quiahva ndúu ndicachi, rí coo xitoho quiahva já ndúu na. Andá já naçasáhá jánaha cuahá ñaha nu ná.

³⁵ Ta tá sa cáhini cuahan naxinu na xica tuun xihin á já cáhí na já:

—Sa nahini va ta a juú xoo nu ndúu ñayivi quéa yóho.

³⁶ Ndindayí ndó ñayivi ná cuhun na ñuu válí xihín nuú yati yóho já ná cueen na ña cuxu na —ñacachi na xíca tuun xihín Jesús.

³⁷ Tá nandihí já nanducú ñehe Jesús tuhun já cáchí a já:

—Mé ndó quiahva ndó ná cuxu na —ñacachi Jesús xihín na cán.

Ta ñacachi na já xihín á:

—Ndá cuu caja nde quiahva nde ña cuxu na yóho jáchí jiuuhún cuahá ndivaha xíní ñúhú nde já cuu cueen nde pan cuxu ñayivi cuaha yóho. Ta ni a quéta toho ivi ciento denario —ñacachi na.

³⁸ Já ñacachi tucu Jesús já xihín na cán:

—Ndaja pan cómí ndo. Cuahán ndo candehé ndo.

Tá ñasahan na sándehe na já cáchí na já xihín á:

—Íin uhun pan xihín ivi tiyacá.

³⁹ Anda já ñasahnda Jesús chuun nu ná ña ná jácacoo na ndihí ñayivi tá táhnda nuú yucu cuí cán.

⁴⁰ Ta ñasacoo na java táhnda in ciento na ta java táhnda ivi jico uxu na.

⁴¹ Anda já natiin Jesús ndíhuhun pan xihín ndívi tiyacá ta sándehe a indiví já nandiquiahva ndixahvi nu Ndióxi. Ta ñasahnda java pan já ñasahan ña nuú na xíca tuun xihín á já ná ndicahnda na ña nuú ñayivi. Tá quiahva já ñasahnda tiyacá já nanditahnda rí nu tóco ndihí ñayivi cán.

⁴² Já ñaxixi tóco ndihí ñayivi cán ta nachutú tixi ndihí na.

⁴³ Ta mé pan xihín tiyacá ña ñacandoo ñaxixi na najácutú na uxu ivi toyicá.

⁴⁴ Ta ñaxixi uhun mil dataa cán.

Tá ñaxica sáhá Jesús nuú tañuhú (Mt. 14:22-27; Jn. 6:16-21)

⁴⁵ Tá nandihí ñacaja Jesús ña ná ndihvi na xíca tuun xihín á ini in barco ña ná cuhun cuéé na inga xoo tañuhú já xinu na Betsaida nani ndíndayí a ñayivi já saa mé á cán ndique táhan xihín ná.

⁴⁶ Ta tá sa nandindayí ndihí a ñayivi ñaque a cuahan yucu caça tahví a nu Ndióxi.

⁴⁷ Tá ñacuaá sa ndácaan barco mahñú tañuhú cán ta Jesús ín yí va nu ñúhu.

⁴⁸ Ta ñaxini a ña ndóho ini na xíca tuun xihín á jáchí a cuú jácaca na barco ini ticuú

jáchí mé xoo nuú cuhun na vaxi tachí. Tá sa cuahan tívi já xíca sáhá Jesús cuahan nuú ticuú xoo nu ndúu na ta tá ñacayati a nu ndúu na jalóho yaha saa cuhun a, nduu.

⁴⁹ Joo tá ñaxini na xíca sáhá Jesús nuú ticuú ñacahán na cuú á in ínimá já ñacayuhú cóhó na.

⁵⁰ Jáchí tóco ndihí na ñaxini ñahá ñayihví na. Joo nandicahan Jesús já cáchí a já:

—Ndacú coo ini ndó jáchí yehe va cuú u. A yíhví toho ndó —ñacachi Jesús.

⁵¹ Tá ñandaa Jesús jatá barco nu cándójó na já najáyaa tachí. Chí ñacatóntó mé na xíca tuun xihín á cán.

⁵² Jáchí a ñaha tacu vaha ini na sahá ña ñacaja Jesús tá ñandaja cuaha mé á pan xihín tiyacá jáchí ñandaji tuun xíní túni ná.

Tá ñandaja vaha Jesús na quíhvi ndúu ñundáhyi Genesaret (Mt. 14:34-36)

⁵³ Ñaxinu na inga xoo tañuhú ta ñacató ndaa na barco yuhú tañuhú cán já ñasaa na ñundáhyi Genesaret.

⁵⁴ Tá quéta Jesús xihín na xíca tuun xihín á ini barco cán ivi laá nandicuni ñayivi mé á.

⁵⁵ Já xínu na cuahan na ndijáá ñuu válí ndúu yati cán ndúcú na ña quíhvi já ñehe na na nuú xito cása na nu Jesús.

⁵⁶ Ta ndá ñuu ñacuu nu quíhvi Jesús cuú á ñuu náhnu á ñuu válí á yucu já quéta ñayivi sácú na ña quíhvi yuhú íchí. Ta já xíca tahví na nu Jesús ña ná quiahva ñamani cani ndaa ndáha ná a vatí loho yuhú jahmá a. Ta ndá na ñacani ndaa ndáha mé á ivi laá nandivaha na.

7

Ña cája quini ínimá ñayivi (Mt. 15:1-20)

¹ In tañu na fariseo xihín java na jánaha ley Moisés, na ñaxixi ñuu Jerusalén ñacayati na nu ín Jesús.

² Ta ñaxojo ini na tá ñaxini na ña ndúu coo java na xíca tuun xihín Jesús xíxi na tá cámani ndahá na tá quiahva ín costumbre na Israel.

³ Jáchí jánaha na fariseo xihín ndihí na Israel ña a cuú cuxu na tá cámani ndahá

vaha na tá quiahva ín costumbre tásáhn̄u jícó na.

⁴ Ta jári jánaḥa na ña tá ndícó coo na sahan na yahvi xíní ñúhú ndahá na tá quiahva ín costumbre na já ná cuu cuxu na. Ta ín cuahá ga nuú ñaha jánaḥa na ndítahan caja na tátuhun ña ndícata na yáxi xíhi na xihín tindohó xihín cohó caa anda xito quijí na viti, ndítahan ndícata na.

⁵ Anda já naçasáhá na fariseo xihín na jánaḥa ley Moisés cáchí na já xihín Jesús.

—Ndávaha co caja na xíca tuun xuhun tá quiahva naçachi tásáhn̄u jícó yo caja í. Návaha xíxi na tá cámaní ndahá na tá quiahva sáhn̄dá ley caja í —naçachi na.

⁶ Já naçachi Jesús já xihín ná:

—Mé a ndaa naçahan profeta Isaías saha ndo jáchi co cúu ndó tá quiahva ndáa ndó.

Já naçahyí da já:

Yuhú ninu uun na cája cáhn̄u na yehe.

Ta co caja cáhn̄u na yehe xihín ndinuhu ínima ná.

⁷ Mé a uun va quea caja cáhn̄u na yehe, jáchi ña jánaḥa na nuú ñayivi cúu á ña quixi jiní mé cuití va na, naçahyí Isaías sanahá.

⁸ Jáchi najándacoo ndó ña nasahnda Ndióxi nu ndó caja ndó ta naçasáhá ndíco cáhn̄u ndó costumbre ña naçaja tásáhn̄u jícó ndo. Ta sahá ña yóho ndícata ndó tindohó xihín yáxi xíhi ndó ta cája ndó cuahá chága costumbre yatá —naçachi Jesús xihín ná.

⁹ Já naçachi tucu a já xihín ná:

—Sahá ña cúni ndo candíco cáhn̄u ndó costumbre mé va ndó sahá ña cán quea najándacoo ndó ña nasahnda Ndióxi caja ndó.

¹⁰ Jáchi já cáchí ley Moisés: “Caja cáhn̄un tátún xihín nánún”, ta jári cáchí a já: “Ndá na ná chicaan cháhan jata tátá na á jata náná na, ndítahan quivi na”, cáchí ley Moisés.

¹¹ Joo ndóhó jánaḥa ndó nuú ñayivi ña cuu cahan na já xihín tátá na á náná na: “A cuú chindeé e ndóhó jáchi sa nasacu xoo i ñaha i quiahva i ña nu Ndióxi”, cáchí na.

¹² Tá ná cachi na ña yóho já quea co ndúsa ga chindeé na tátá na á náná na.

¹³ Quiahva johó caja ndó sácu xóo ndó ña nasahnda Ndióxi nu ndo ta ndája ndó a

tátuhun in ñaha ña coo saha. Jáchi ndíco cáhn̄u ndó costumbre ña najándadacoo tásáhn̄u jícó ndó nu ndo ta quiahva já jánaḥa ndó nuú jahyi ndó. Ta cuahá ga ñaha tátuhun ña yóho cája ndó —naçachi Jesús.

¹⁴ Anda já naçana tucu Jesús ñayivi já naçachi a já xihín ná:

—Cuni johó ndihi ndó nu cáhan i xihín ndo ta candaa ini ndó ña.

¹⁵ Ni in ñaha xíxi ñayivi a cuú caja quini ínima ná. Ña cuu ndaja quini ñayivi cúu ña quixi ínima na tátuhun ña cáhan na xihín ña cája na.

¹⁶ Na ín johó, ná cuni johó na —cáchi Jesús.

¹⁷ Tá nandihí nandihvi Jesús ini in vehe ta naçandoo cuahá ñayivi jata véhe. Já nandaca tuhún na xíca tuun xihín á ña ndía cúni cachi a xihín tuhun naçahan xihín ná.

¹⁸ Ta nanducú ñehe a tuhun nu ná já naçachi a já:

—Á coo toho xíní túni ri ndóhó va, vaha. Jáchi co cándaa ini ndó ña tóco ndihi ñaha xíxi ñayivi a cuú caja quini a na.

¹⁹ Jáchi ña xíxi ñayivi co xínu a ini ínima ná joo xínu coo a tixi na já queta tucu a yiquí cuñu na —naçachi Jesús.

Xihín tuhun yóho naçachi Jesús xihín ná ña cuu cuxu na tóco ndihi ñaha ña xíxi ñayivi jáchi co ndája quini a ínima ná.

²⁰ Ta naçachi tucu Jesús já:

—Ña cuu ndaja quini ñayivi cúu ña quixi ínima ná tátuhun tuhun cáhan na xihín ña cája na.

²¹ Jáchi chí ini ínima ná queta ña cáhvi núu ini na tátuhun ña cáhvi ini in dataa coo da xihín ñájihí ñani táhan da á tá xíca ini da coo da xihín in ñañaha, ña coo cúu ñájihí da á tá cáhvi ini na cahní na ndii.

²² Ta sa mé cán queta ña xíca ini na caja cuíhna na ta jári xíca ini na coo cuahá ndivaha ñaha nu ná. Ta sa mé cán queta ña núu cája na ta cáhan na ña tuhún ta cája na tá nuú cuachi ta cáhiví ini na ta cátóo na cahan na saha táhan na ta cája cáhn̄u na mé ná ta quíhví cája na.

²³ Tóco ndihi ña núu yóho ña cáhvi ini ñayivi caja na, quixi a ínima ná ta ndája quini a na.

*Tá naqandeeé ini in ñá tóho Jesús
(Mt. 15:21-28)*

²⁴ Já naqee Jesús cuahan chí ñundáhyi cuéntá Tiro xihín Sidón. Ta naquihvi a in vehe coo a ta coo cúní a ña ná candaa ini na ñuu ña iin a cán joo coo naquu coo jehé a.

²⁵ Chá va ta naqandaa ini in ñáñáha ña iin Jesús vehe cán. Ta iin in jahyi jíhí ña, ñá ndácaan ínimá quini ini. Ta ndaja coo nasaa ñá ta naqaxítí ña saha Jesús.

²⁶ Ta cúú ñá ñá tóho cuéntá ñundáhyi Sirofenicia. Ta naqica tahví ñá nu Jesús ña ná tavá a ínimá quini ndácaan ini jahyi ñá.

²⁷ Anda já naqachi Jesús já xihín ña:

—Jihna ñúhú ndítahan nuú i chindeé e na Israel anda jáví cuu chindeé e ndohó, na tóho jáchi iin in tuhun ta cáchí a ña a váha toho candaa í pan xíxi na valí ta jácana í ña nuú tina —naqachi Jesús.

²⁸ Anda já naqachi mé ñá tóho cán já xihín Jesús:

—Mé a ndaa cáhan ndó, xitoho. Joo anda tina, rí ndúu tíxi mesa xíxi rí ña jácuu jahyi xitoho rí —naqachi ñá.

²⁹ Anda já naqachi Jesús já xihín ñá:

—Vaha va naqahun. Sahá ña cán quea cáchí i xuhun cuanúhu viti jáchi sa naqueta va ínimá quini nasandacaan ini jahyún —naqachi Jesús.

³⁰ Ta tá naxinu ñá vehe já naxini ñá cándúhu jahyi ñá nuú xito ta sa coo ga ínimá quini cán ndácaan ini jahyi ñá.

Tá nandaja vaha Jesús in da jóho, da a cuú cahan

³¹ Naqee Jesús ñundáhyi cuéntá Tiro ta nayaha chí ñuu Sidón xihín java ga ñuu cuéntá Decápolis cán já naxinu coo a tañuhú Galilea.

³² Cán ñéhe na in dataa naqasaa na nu Jesús. Cúú dá da jóho ta cúú dá da níhi. Ta naxica na nu á ña ná chinúu a ndáha á jini dá já ná ndivaha da.

³³ Já natavá xóo Jesús da tañu ñayivi cán. Já najáquihvi a in nducu ndáha jóho da ta naxihnu a tójií a já naqani ndaa a tójií a yáa dá.

³⁴ Tá nandihí nasandehé a indiví já ndísaa ndísaa ínimá á já naqachi a já xihín dá:

—Efata —naqachi a ta ña yóho cúní cachi: Ná ndinuna.

³⁵ Ivi laá nandinuna jóho mé da jóho cán ta nandivaha yáa dá já naqasáhá cáhan vaha da.

³⁶ Ta nasahnda Jesús chuun nuú ndihí na ña ná a cáxi tuhun na ña yóho nuú ni in ñayivi. Joo tá naqachi a ña yóho já quea ví ga ví cáhan na.

³⁷ Chí cántóto ndihí ñayivi tá xíni jóho na ña ta cáhan xihín táhan na já cáchí na já:

—Vaha ndivaha cája Jesús tóco ndihí ñaha jáchi jánditacu a na jóho ta jándicahan mé á na níhi —naqachi na.

8

*Tá nasahan Jesús ña cuxu comí mil ñayivi
(Mt. 15:32-39)*

¹ Mé já nanditútú tucu cuahá ñayivi ta chí coo mé ñaha cuxu na. Anda já naqana Jesús na xíca tuun xihín á já naqachi a já xihín ná:

² —Táhnda ndivaha ini i sahá ñayivi yóho jáchi sa naxinu uní quívi ndúu na xihín i yóho ta chí coo ga ñaha cuxu na.

³ Ta coo cúní chindahá i na nuhu na vehe na jáchi cámaní cuxu na ta tiqva náá cuitá na ta cuyu na íchi jáchi sa cání ndivaha naquixi java na —naqachi Jesús.

⁴ Anda já naqachi na xíca tuun xihín á cán já:

—Ndaa cáhan ndo. Ta ni mí, a cuú quiahva í ña cuxu na jáchi coo toho ñayivi ndúu yóho nuú cueén ña cuxu na —naqachi na.

⁵ Anda já nandaca tuhún Jesús na já cáchí a já xihín ná:

—Ndaja pan cómi ndo.

Já naqachi na cán já:

—Usa ña.

⁶ Anda já nasahnda Jesús chuun nuú ñayivi ña ná cacoo na nu ñúhu. Já natiin a ndíhusa pan cán. Ta nandiquiahva ndixahvi nu Ndióxi. Já nasahnda java ña ta nasahan ña nuú na xíca tuun xihín á cán ña ná ndicahnda na ña nuú ñayivi cuaha cán.

⁷ Ta jári nasacomí na java tiyacá válí ta nandiquiahva mé á ndixahvi nu Ndióxi saha rí já nasahnda chuun nu ná ña ná ndicahnda na rí.

⁸ Ta naxixi tóco ndihí na ndúu cán anda quiahva nachutú tíxi na ta tá nandihí

najácutú na janda usa toyicá xihín ña ñacandoo.

⁹ Tátuhun comi mil ñayivi naxixi. Ta ta nandihí já najándindayí Jesús na.

¹⁰ Já nandihvi a ini barco xihín na xíca tuun xihín á já ñaquee na cuahan na ñundáhyi cuénta Dalmanuta.

Cúni na fariseo ña ná caja Jesús in ña xitúhún nu ná

(Mt. 16:1-4; Lc. 12:54-56)

¹¹ Anda já naxinu na fariseo nu Jesús já ñacasáhá ndítúhún na xihín á. Ta sahá ña cúni na coto ndojó cuití ñahá na sahá ña cán quéa naxica na nu á ña ná caja in ña xitúhún, ña quixi indivi já ná candaá ini na á mé a ndaa cúu á ña ñachindahá Ndióxi.

¹² Ndísaa ndísaa ini Jesús jáchi ndíhi ini a xihín ná já cáchi a já:

—Ndá saha quéa xíca na yóho ña ná caja i in ña xitúhún. Mé a ndaa ná cahan i xihín ndó ña a cája i ñaha xitúhún nu na yóho — ñacachi a.

¹³ Anda já nandihvi tucu Jesús ini mé barco cán ta najándacoo a na cán já ñaquee a cuahan inga xoo tañuhú.

Tá cahan Jesús sahá ña jánaha na fariseo

(Mt. 16:5-12)

¹⁴ Ta ndaja coo nandindójó mé na xíca tuun xihín a cán cañehe na ñaha cuxu na joo ñasahin in pan cuití va xihín ná ini barco cán.

¹⁵ Anda já ñasahnda Jesús chuun nu ná já cáchi a já xihín ná:

—Candehé ndo. Cuénta coo ndó xihín na fariseo ta xihín na cúu cuénta Herodes jáchi ña jánaha na cúu á tátuhun yúsa naxaa ña cáva táhan na xihín harina cávaha na pan — ñacachi Jesús.

¹⁶ Coó ñacandaá ini na ña cáchi a ña cán quéa ñacasáhá ndítúhún xihín táhan na já cáchi na já:

—Sahá ña coó pan ñehé vaxí sahá ña cán quéa cahan Jesús ña yóho xoho — ñacachi na.

¹⁷ Sa ñacandaá ini Jesús ña cahan na ta já ñacasáhá cáchi a já:

—Mé ndó cáchi ndó ña coó pan ñehé vaxí jáchi co candaá ini ndó ta ni co cája ndó cuénta sahá ña jánaha i. Nandaji tuun xini túni ndo.

¹⁸ Cúu ndó tátuhun na co tívi nuu xihín na coó joho jáchi vatí xini ndó ta xini joho ndó joo co candaá ini ndó. Á co ndícuhun ini ndó ña ñacaja i

¹⁹ tá nandicahnda i ndíhuhun pan nuu uhun mil tao. Ndaja toyicá nanditaca ñacaja ndó xihín ña ñacandoo cán — ñacachi Jesús.

Já nanducú ñehe na tuhún nu á:

—Uxu ivi ña.

²⁰ Ta ñacachi tucu Jesús xihín ná já:

—Ta tá nandicahnda i usa pan nuu comi mil ñayivi, ndaja toyicá nanditaca ñacaja ndó xihín ña ñacandoo — ñacachi a.

Já nanducú ñehe na tuhun nu á:

—Usa ña.

²¹ Anda já ñacachi a já xihín ná:

—Camaní yij va candaá ini ndó — ñacachi a.

Tá nandaja vaha Jesús in da cuáá ñuu Betsaida

²² Tá nandihvi naxinu na ñuu Betsaida já ñehe na in da cuáá ñacasaa na nu Jesús. Já naxica tahví na nu á ña ná cani ndaa ndáha á da.

²³ Ta chí ñatiin a ndáha da cuáá cán já ñatavá a da yuhú ñuu. Ñachindaa tójij a nduchú núu da já ñachinúu a ndáha á jini dá. Já ñandaca tuhún a da á cuu candehé da.

²⁴ Ta já ñacachi da cán já sándehé da:

—Sándehé e java tao joo tá quiahva ndaa yito quiahva já ndaa da xíca nuu da xini i — ñacachi da.

²⁵ Anda já ñachinúu tucu Jesús ndáha á nduchú núu da já ñasandehé ndaa da. Anda jáví nandivaha nduchú núu da ta ñacasáhá sándehé cáxi vaha da tóco ndíhi ñaha.

²⁶ Ta ñachindahá Jesús da cuanúhu da vehe da já ñacachi a já xihín dá:

—A ndíhvún mahnú ñuu ni a ndícanún ña yóho nuu ñayivi ndúu jan — ñacachi a.

Tá cáxi tuhun ndaa Pedro ña cúu Jesús mé a ñachindahá Ndióxi cacomí cuénta sahá ñayivi

(Mt. 16:13-20; Lc. 9:18-21)

²⁷ Tá nandihvi já ñasahan Jesús xihín na xíca tuun xihín á ñuu válí ndacaan Cesarea cuénta Filipino. Nani xíca na cuahan na íchi ñandaca tuhún a na já cáchi a já xihín ná:

—Ndá da cáchí ñayivi cúu yehe —ñacachi a.

²⁸ Já ñacachi na cán já:

—Java na cáchí na ña cúu ndó Juan, da ñacaja ndúta ñayivi. Ta java na cáchí na ña cúu ndó profeta Elías. Ta java na cáchí na ña cúu ndó in táhan profeta ñasanduu sanahá —ñacachi na.

²⁹ Anda já ñandaca tuhún tucu Jesús na já cáchí a já xihín ná:

—Ta ndóhó ri, ndá da cáchí ndo cúu u —ñacachi a.

Anda já ñacachi Pedro já xihín á:

—Mé ndó cúu Cristo, mé a ñachindahá Ndióxi cacomí cuéntá sahá ñayivi —ñacachi da.

³⁰ Anda já ñasahnda Jesús chuun nu ná ña ná a cáxi tuhun na ña yóho nuú ni in ñayivi.

*Cáxi tuhun Jesús ña quivi a
(Mt. 16:21-28; Lc. 9:22-27)*

³¹ Anda já ñacasahá jánaħa Jesús nu ná ña tandaa quiví ndoho ndivaha ini mé á, da ñachindahá Ndióxi nduu ñayivi. Ta na sacuaħa veñuhu xihín na sacuaħa nuú jutu xihín na jánaħa ley Moisés candají na mé á janda quiahva ná cahni ñahá na. Joo tá ná xinu uní quiví nditacu tucu a.

³² Cáxi ndivaha ñacahan Jesús ña yóho xihín ná ta chí anda já ñatavá xóo Pedro Jesús já ñacasahá jánani da a sahá ña ñacachi a xihín ná.

³³ Joo ñacava Jesús ta ñandicoto nihni a nuú na xica tuun xihín á já ñacasahá ndícuehe a xihín Pedro já cáchí a já xihín dá:

—Cuáhán quee Satanás, rí cúu tiñahá sacuaħa. Co ín xini túnun tá quiahva ín xini túni Ndióxi jáchi cáhvi inún tá quiahva cáhvi ini ñayivi ñuyiví yóho —ñacachi a.

³⁴ Anda já ñacana Jesús na xica tuun xihín á xihín java ga ñayivi já ñacachi a já xihín ná:

—Ndá na cuni candico yehe ndítahan nu ná ndihi chága ini na sahá yehe a juú ga saħa mé ná. Ta ndítahan coo tiaħva na ndoho ini na sahá yehe. Ta coo caja toho a ná quivi na sahá i.

³⁵ Jáchi ndá na cátóo coo chága ñuyiví yóho ndihi saħa ná. Joo ndá na saħan ndéé ini quivi sahá i xihín sahá tuhun Ndióxi,

ñeħe táhvi ná catacu na anda ama cáa quivi.

³⁶ Vatí ná quee vaħa in na ñuyiví yóho ta cómi na tóco ndihi ñaha ñuyiví joo ndá chuun quea tá nu ndihí ndihi saħa ná in-dayá.

³⁷ Jáchi ni in ñaha a cúu चाहvi in na saħa inima ná ná a cühun na indayá.

³⁸ Candehé ndo. Mé tiempo viti cája ñayivi cuahá cuachi ta co xéen na caja na ña sáhdá Ndióxi nu ná. Ta ndá na cáchan nuu sahá i xihín sahá tuhun vaħa cáhan i quiahva já cacahan ri nuú yehe, da ñachindahá Ndióxi nduu ñayivi sahá na cán tá ná quixi i cacomí i cuéntá sahá ñayivi. Mé tiempo cán naħa ndaja cáhnu cúu yehe jáchi quixi i xihín ndéé Ndióxi ta xihín ndéé táto yii mé á viti —ñacachi Jesús.

9

¹ Ta ñacachi tucu Jesús já xihín ná:

—Mé a ndaa ná caħan i xihín ndo. Java na ndúu yóho a quiví toho na janda quiahva ná xinu quiví cuni na cacomí Ndióxi cuéntá sahá ñayivi xihín ndéé mé á —ñacachi a.

*Tá ñandijama Jesús quiahva cáa
(Mt. 17:1-13; Lc. 9:28-36)*

² Tá ñayaha iñu quiví já ñandaa Jesús in yucú jícó ta ndáca táhan Pedro xihín Jacobo xihín Juan cuahan na xihín á. Ta nu táhyí mé na cán ñandijama quiahva cáa.

³ Ta a juú quiahva ñandiyehé jáhma ndíxi a chí ñandiyaa cachí ña. Ni in ñayivi ñuyiví yóho a cúu ndicata yaa nahá jáhma tá quiahva yaa ñanduu jáhma á.

⁴ Anda já na xica tuun xihín Jesús ñaxini na Elías xihín Moisés ndúu na ndítuhún na xihín á.

⁵ Ta já ñacachi Pedro já xihín Jesús:

—Maestro, vaħa cúu ndúu nde yóho jáchi já cuo cavaha nde uní vehe tijahvá válí. In a coo mé ndó ta inga coo Moisés ta inga coo Elías —ñacachi da.

⁶ Ñayihví ndivaha na xica tuun xihín Jesús sahá ña cán quea co xini mé Pedro ndía cáa cáhan va da.

⁷ Anda já ñanuu in vico jata ná já najajahvi a na ta tañu vico cán ñaxini joho na ña cáhan in a já cáchí a já:

—Da yóho cúu jahyi maní. Cuni johó ndó nu cáhan da.

⁸ Ta tá nandicoto nihni na sa coó ga na naxini na ta jandá in tühún Jesús naxini na.

⁹ Tá sa cuahan nuu na jini yucu cán já nasahnda Jesús chuun nu ná ña ná a cáxi tühun na nuú ñayivi ña naxini na anda quiahva ná xinu quivi nditacu tucu mé a nachindahá Ndióxi nduu ñayivi.

¹⁰ Sahá ña cán quea nachijehé tühun na sahá joo nanditühún xihin táhan na ndia cuni cachi Jesús tá nacachi a ña nditacu tucu a.

¹¹ Anda já nacasáhá ndáca tühún na mé á já cáchi na já xihin á:

—Ndavaha cáchi na jánaha ley Moisés ña ndítahan quixi jihna ñúhú profeta Elías — nacachi na.

¹² Já nacachi Jesús já xihin ná:

—Mé a ndaa jihna ñúhú quixi Elías ta ndaja vaha ndihi da ñaha. Á co xini ndó ndá quiahva cáchi tühun Ndióxi sahá da chindahá Ndióxi nduu ñayivi. Cáchi a ña ndoho ini da ta candají na da.

¹³ Joo cáxi tühun i nu ndó ña sa naquixi va Elías ta nacaja na tá quiahva cuni mé va na xihin dá ta tá quiahva cáchi tühun Ndióxi ndoho da quiahva já ndoho da — nacachi Jesús.

Tá nandaja vaha Jesús in taa loho ndácaan ínimá quini ini

(Mt. 17:14-21; Lc. 9:37-43)

¹⁴ Tá nandihí já nandicó coo Jesús xihin na cán nu ndúu java ga na xica tuun xihin á cán. Já naxini na cuahá ndivaha ñayivi nacava nuu na na cán. Jári ñúhu java na jánaha ley Moisés cáni táhan yúhu ná xihin na xica tuun xihin Jesús.

¹⁵ Tá naxini ñayivi yóho Jesús chí nacatontó ndihi na já nandava nihni na nasahan na cáhan Ndióxi ná xihin á.

¹⁶ Anda já nandaca tühún Jesús na já cáchi a já xihin ná:

—Ndá saha ndítühún ndó xihin na jan — nacachi a.

¹⁷ In da cándichi cán nanducú ñehe da tühun nu Jesús já cáchi da já:

—Maestro, yóho ñehe e jahyí i nacasaá i nu ndó jáchi ndácaan in ínimá quini ini da ta nandaja níhi ñahá ri.

¹⁸ Ndá nacuu tীন rí da, jándacava rí da nu ñúhu ta já cásahá cána cuyu chiquiñu yúhu dá ta cáhñá nuhu dá. Xihin ña yóho cásahá jácuitá rí da. Ta sa naxica i ñamaní nuú na xica tuun xihin ndó ña ná tavá na mé ínimá quini yóho joo coo nacuu caja na ña — nacachi da.

¹⁹ Já nacachi Jesús já xihin ná:

—Ndáhví nahá nacuu ndó jáchi sa cuahá ndivaha quivi ín i xihin ndo ta a ñaha candee ini ndó yehe. Ta chí co ndeé ga ini i xihin ña cája ndó. Taxi ndó da loho jan chóho — nacachi a.

²⁰ Chí ñehe na da loho cán nasaa na nu Jesús. Ta tá naxini mé rí quini ndácaan ini da loho Jesús ivi laá nacaja rí ña ná quivi yihí da loho cán já tívi núu da nandicava da nu ñúhu xihin chiquiñu cána yúhu dá.

²¹ Anda já nandaca tühún Jesús tátá da cán já cáchi a já xihin dá:

—Á sanahá ndóho jahyún ña yóho — nacachi a.

Já nacachi tátá da cán já:

—Janda tá loho da cája rí já xihin dá.

²² Ta cuahá tañu chicaan rí quini da ini yávi núhu xihin ini ticuiví viti ña cahní ñahá ri cuni ri. Ña cán quea xica tahví i nu ndó ña ná candáhví loho ini ndó ndehe ta chindeé ndó ndehe tá ta cuu caja ndó ña — nacachi da.

²³ Anda já cáchi Jesús já xihin dá:

—Cuu caja i ña tá cándúsún yehe. Jáchi cuu caja i tóco ndihi ñaha xihin ñayivi tá cándee ini na yehe — nacachi a.

²⁴ Ivi laá nacayuhú tátá mé da loho cán já cáchi da já:

—Cándúsa vi joo chindeé ndó yehe ná candúsa chága i — nacachi da.

²⁵ Ta tá naxini Jesús ña nacasáhá chutú cuahá ñayivi já nandicuehe mé á xihin mé rí quini cán já cáchi a já xihin ri:

—Ínimá quini, rí nandaja níhi ta nandaja jóho da loho yóho, sáhdá i chuun nuun ña ná queún cuhun ta a ndicó coo gaún ndihvún ini da — nacachi a.

²⁶ Anda já nacayuhú cóho rí quini cán já nasahní yihí tucu rí da. Chí naqueta rí cuahan rí ta najándacoo rí da loho cán tátuhun in ndii sahá ña cán quea nacasáhá cáchi ñayivi ña sa naxihí va da jan.

27 Joo natiin Jesús ndáha dá já nandíñehe a da. Ta já nandaca ndichi da cán.

28 Ta tá nandihvi Jesús ini in vehe xihín na xíca tuun xihín á já nandaca tuhún jehé na mé á já cáchí na já xihín á:

—Ndávaha coo nacuu caja ndehe tavá nde ínima quini nasandacaan ini da loho jan —nacachi na.

29 Já nacachi Jesús já xihín ná:

—Tá cúní ndó tavá ndo tá ínima quini táhan rí yóho ndítahan cajuhun ndó ta caça tahví ndo nu Ndióxi —nacachi a.

Cáxi tuhun tucu Jesús ndaja coo nuú quivi a

(Mt. 17:22-23; Lc. 9:43-45)

30 Tá naquee na cuahan na nayaha na chí estado Galilea ta co cúní Jesús ña ná candaa ini ñayivi

31 jáchi jánahá Jesús nuú na xíca tuun xihín á cúní a. Ta cáchí a xihín ná ña vaxi quivi ndiquiahva ñayivi mé á, da nachindahá Ndióxi nduu ñayivi ndahá ñayivi ta cahni ñahá na joo tá ná yaha uní quivi nditacu tucu a.

32 Joo coo nacandaa ini na ña cáhan xihín ná ta yíhví na ndaca tuhún na mé á sahá tuhun cáhan.

Ndicani Jesús ndá na cúu na ún chága saha
(Mt. 18:1-5; Lc. 9:46-48)

33 Ta ndaja coo naxinu na ñuu Capernaum ta tá sa ndúu na vehe já nacasáhá ndaca tuhún Jesús na xíca tuun xihín á já cáchí a já xihín ná:

—Ndía ndituhún ndó saha tá vaxi ndó íchi —nacachi a.

34 Joo coo nanducú ñehe na cán tuhun nu á jáchi íchi nuú naquixi na nandituhún cuaha ná saha ndá da cúu da cáhnu chága tañu mé ná.

35 Anda já nasacoo Jesús já nacana ndíhuxu ivi da xíca tuun xihín á já nacasáhá cáchí a já xihín dá:

—Ndá ndó, na cúní cacuu na nu cuítí ndítahan ndaja núu ndó mé ndó cacuu ndó na nu ndíhí ta caja ndíví ndo nu ndíhi na —nacachi a.

36 Tá nandihí já nacana Jesús in da loho já nasacu a da mahñú nu ndúu na já nasañehe ndaa da já nacasáhá cáchí a já:

37 —Ndá na ná ndiquehe vaha in da loho tátuhun da yóho sahá ña quíhvi ini na yehe, ndiquehe ri na yehe viti. Ta ndá na ndiquehe yehe, a juú in tuhún yehe ndiquehe na vaha jáchi ndiquehe ri na tátá i, mé a nachindahá yehe —nacachi a.

Tá ndúu java na ndiquehe saha yo já quea cuahan na xoo í

(Mt. 10:42; Lc. 9:49-50)

38 Anda já nacachi Juan já:

—Maestro, naxini nde in dataa ta cáhan da quivi mé ndó já tává da ínima quini ñúhu ini ñayivi. Joo co xíca nuu da xihín yo sahá ña cán quea nasaji nuu nde nu dá caja da ña —nacachi da.

39 Joo nacachi Jesús já:

—A cáji nuu ndó nu dá jáchi tá cája in na ña xituhún xihín quivi i já quea a cuú caca nuu na cahan núu na sahá i.

40 Jáchi ndá na co ndíndita caja xíxi xoho, mé na cán cuahan na xoo mí.

41 Ta ndá na ná quiahva in ñaha nu ndó vatí in yáxi ticuú sahá ña ndíco ndó yehe mé a ndaa ná cahan i xihín ndo ña chahvi tá chahvi Ndióxi sahá ñamaní cája na xihín ndó —nacachi Jesús.

Tá jándacava ñayivi inga na nuú cuachi
(Mt. 18:6-9; Lc. 17:1-2)

42 Ta cáchí tucu Jesús já:

—Ndá na ná jándacava in na ndahví, na cándéé ini yehe nuú cuachi janda vaha chága ná candico in yuú yojó jico ná ta ná ndihí sahá na cahá tañuhú.

43 Tá ndáha ndo quea jándacava ndohó nuú cuachi chituhún ndó a jáchi vaha chága ná cuhún ndó indiví xihín in tuhún ndáha ndo a juú ga cuhún ndó xihín ndíví ndáha ndo indayá nuú co ndáhva ñúhu cáyi.

44 Ta cán ni ticujú co xíhi ni ñúhu cáyi co ndáhva.

45 Tá saha ndo quea jándacava ndohó nuú cuachi chituhún ri ndó ña jan va jáchi vaha chága ná cuhún réncó ndó indiví xihín in tuhún saha ndo a juú ga cuhún ndó xihín ndíví saha ndo indayá nuú co ndáhva ñúhu cáyi.

46 Ta cán ni ticujú co xíhi ta ni ñúhu cáyi co ndáhva.

47 Tá nduchú nuú ndó quea jándacava ndohó nuú cuachi tavá ndó ña jáchi vaha

chága ná coo cóhó nuu ndó cuhun ndó nuu cacomí Ndióxi cuéntá saha ndo a juú ga ña ná coo ndívi nduchú núú ndo cuhun ndó indayá.

⁴⁸ Ta cán ni co xihí ticujú ta ni ñúhu cáyi co ndáhva.

⁴⁹ Tá quiahva ndívií jjuhún cuáán cája ñúhu cáyi quiahva já ndívií ínima ñayivi xihín ña ndóho ini na. Ta tóco ndihi ñaha jóco na nu Ndióxi chícaan na ñii yívi na já co tívi a.

⁵⁰ Vaha va cája ñii jáchi xihín ñii ndíhaji ña xíxi na joo tá co óhva ña já a cuú caja ohva tucu yó a já ná caja chúun tucú ña. Ndítahan nu ndóhó caja ndó tátuhun cája ñii ta já canduu víi xihín táhan ndó —cáchi Jesús.

10

Jánaha Jesús nuú na sa natandaha ña co ndítahan jándacoo táhan na

(Mt. 19:1-12; Lc. 16:18)

¹ Naquee Jesús ñuu Capernaum cuahan. Já nasahan estado Judea xihín ñundáhyi ín inga xoo yuta Jordán. Cán ñacasáhá nanditaca tucu ñayivi nu á chí jánaha tucu a na tá quiahva ñacaan mé á cája.

² Anda já ñacayati java na fariseo nu Jesús sahá ña coto ndojó ñahá na cúní na. Nacachi na já xihín á:

—Á núná nuú in dataa jándacoo da ñájíhí da —nacachi na.

³ Já nanducú ñehe Jesús tuhun nu ná já cáchí a já xihín ná:

—Ndaja cáchí ley Moisés ña ndítahan caja ndó —nacachi a.

⁴ Anda já nacachi na cán já:

—Tá ná quiahva in dataa in tutu nu ñájíhí da sahá ña cúní da jándacoo da ña já quéa sahan ley Moisés ñamani jándacoo da ña —nacachi na.

⁵ Anda já nacachi Jesús já xihín ná:

—Sahan ley Moisés ñamani yóho nu ndo jáchi táhyí ndivaha ínima ndo.

⁶ Joo janda mé saha tá ñacavaha Ndióxi ñayivi nu cuítí já ñacavaha in túhún ta xihín in túhún ñaha.

⁷ Sahá ña cán quéa ndítahan nuú dataa jándacoo da tátá da xihín náná da já ndique táhan da xihín ñájíhí da.

⁸ Já xinu ndívi na cán cacuu na tátuhun in víxi yiquí cuñu na sahá ña cán quéa co cúu ga na ivi yiquí cuñu sahá ña nanduu na tátuhun in túhún yiquí cuñu.

⁹ Sahá ña cán quéa co ndítahan nuú na cán janí táhan na ña najácatáhan Ndióxi tá natandaha ná —nacachi Jesús xihín ná.

¹⁰ Ta tá nandicó coo tucu na vehe já ñacasáhá tucu na xica tuun xihín á cán ndáca tuhún na Jesús sahá ña ñacahan.

¹¹ Ta nanducú ñehe Jesús tuhun nu ná já nacachi a já:

—Tá ná jándacoo in dataa ñájíhí da ta tándaha dá xihín inga ñáñáha já quéa cája da cuachi nu ñájíhí nuú da jáchi ín da xihín inga ñáha.

¹² Ta tá ná jándacoo in ñáñáha yí ña ta tándaha ña xihín inga da cája ri ña cán va cuachi nu yí ña jáchi ín ña xihín inga dataa —nacachi Jesús.

Cája yíi Jesús na valí

(Mt. 19:13-15; Lc. 18:15-17)

¹³ Anda já ñehe na java na valí ñacasaa na nu Jesús ña ná caní ndaa ndáha á na. Joo mé na xica tuun xihín á cán ñacasáhá na cája cuehe na xihín mé na ndáca na valí cán.

¹⁴ Tá ñaxini Jesús ña cája na já nandicuehe a já cáchí a já xihín na xica tuun xihín á:

—Quiahva ndó ñamani ná quixi na valí nuú i ta a cájí nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho.

¹⁵ Mé a ndaa ná cahan i xihín ndo ndá na co cúní ndiquiahva na mé ná ndáha Ndióxi tátuhun cája na valí yóho já quéa a cúu cacomí Ndióxi cuéntá saha ná —nacachi a.

¹⁶ Anda já ñacasáhá Jesús ñehe ndaa na valí ta chínúu a ndáha á jiní ná já cája yíi á na.

Cáhan in da cuicá xihín Jesús

(Mt. 19:16-30; Lc. 18:18-30)

¹⁷ Tá cuahan tucu Jesús íchi já xinu in dataa ñacasaa da nasaxítí da nu á já cáchí da já xihín á:

—Maestro, mé ndó cúu ndó ta vaha ña cán quéa ndáca tuhún i ndóhó ndía ndítahan caja i já ná ñehe táhvi cuhun i indiví coo i anda ama cáa quivi —nacachi da.

¹⁸ Já nacachi Jesús já xihín dá:

—Ndá cuéntá quéa cáhún xihín i ña cúu u da vaha. Ni in túhún toho ñayivi co cúu ná na vaha ñuyiví yóho. In túhún Ndióxi cuití va quéa vaha.

¹⁹ Sa xini vún ña sáhdá Ndióxi nuun cajún já cáhí a já: “Coto a cóun xihín ñájíhí á yí ñani táhún. Coto a cáhnún ndii. Coto a cája cuíhnún. Coto a cáhún ña túhún sahá ñayivi. Coto a jándahvún ñayivi. Ta caja cáhnún tátún xihín nánún” —ñacachi Jesús xihín dá.

²⁰ Já ñacachi da cán já:

—Maestro, janda tá nasacuu u taa loho ñacasáhá i cája i tóco ndihi ña sáhdá Ndióxi caja i —ñacachi da.

²¹ Nasandehé Jesús nu dá ta táhdá ini a saha dá já ñacachi a já xihín dá:

—Inga ñaha cámani cajún: Cuáhán jicún tóco ndihi ñahún jan ta ndacahndún jjuhún jan nuú na ndahví já ñehé táhvun coo cuahá ñahún indiví. Ta tá nandihí já quisún candicún yehe —ñacachi Jesús.

²² Joo tá naxini johó da cuicá cán ña ñacachi Jesús ivi laá ñacavitá ini da já ñaquee cuéha dá cuahan da jáchi ín cuahá ndivaha ñaha da.

²³ Anda já ñacasáhá sáhdé Jesús nuú na xica tuun xihín a cán já ñacachi a já:

—Ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuéntá saha ná —ñacachi a.

²⁴ Chí ñacatóntó mé na xica tuun xihín á cán sahá tuhun ñacahan joo nandicahan tucu Jesús já cáhí a já:

—Jahyi a, ndaja yáncá cáa sahá in na cándeé ini jjuhún ndiquiahva na mé ná ndáha Ndióxi ña ná cacomí a cuéntá saha ná.

²⁵ Jáchi janda cama chága cuu yaha in camello ini in yávi saha yitucú a juú ga ña ná ndiquiahva in da cuicá mé dá ndáha Ndióxi ña ná cacomí a cuéntá saha dá —ñacachi Jesús.

²⁶ Anda já ñacatóntó ndihi mé na xica tuun xihín á cán tá naxini johó na ña yóho. Já ñacasáhá ndáca tuhún táhan na já cáhí na já:

—Ndá na cúu na cuu cacu ndaa ínima, dá já —ñacachi na.

²⁷ Nandicoto nihni Jesús nu ná já cáhí a já xihín ná:

—Ni in na a cúu caja ña yóho joo Ndióxi quéa cuu caja ña jáchi ni in ñaha co íhvi toho nu Ndióxi —ñacachi a.

²⁸ Anda já ñacachi Pedro já xihín Jesús:

—Joo ndehé najándacoo ndihi nde ña nasacomí nde ta ndico nde ndohó —ñacachi da.

²⁹ Já nanducú ñehé Jesús tuhun nu ná já cáhí a já:

—Mé a ndaa ná cahan i xihín ndo ña ndá na jándacoo vehe na á ñani na á quiahva na á tátá na á náná na á ñájíhí na á jahyi na á ñundáhyi ná sahá yehe xihín sahá tuhun cahan i,

³⁰ na cán cúu na ñehé cuaha chága ví ñaha ñuyiví yóho jatá ña najándacoo na tátuhun vehe na, ñani na, quiahva na, náná na, jahyi na, ñundáhyi ná viti vatí ná ndicuita ñayivi caja xixi na xihín ná. Joo ñehé táhvi ná catacu na anda ama cáa quivi xihín Ndióxi.

³¹ Ta ndúu cuahá na ín sahá ñuyiví yóho viti joo vaxi quivi cacuu na na coo saha nu Ndióxi. Ta ndúu cuahá na coo saha ñuyiví yóho viti joo vaxi quivi cacuu na na ín saha nu Ndióxi —ñacachi a.

*Cáxi tuhun tucu Jesús ña quivi a
(Mt. 20:17-19; Lc. 18:31-34)*

³² Ta ndaja coo cuahan Jesús xihín na xica tuun xihín á chí íchi ndaa cuahan chí Jerusalén. Cánuu Jesús cuahan xihín ná. Ta ñacatóntó na cán ta yíhvi na cuahan na xihín á. Anda já ñatavá xoo tucu a ndihuxu ivi na xica tuun xihín á já ñacasáhá cahan xihín ná ña ndoho a chága chí nuu.

³³ Já ñacachi a já:

—Candehé ndo. Yóho ndaa í cuahan yo chí Jerusalén nuú ndiquiahva na yehe, da nachindahá Ndióxi nduu ñayivi ndahá na sacuaha nuú jutú xihín nuú na jánahe ley Moisés. Na yóho cúu na cacu ini sahá ndaja quivi i. Anda já ndiquiahva na yehe ndahá na tóho.

³⁴ Cuacu ndaa na yehe ta cani na yehe ta cuihna na tójí na nuú i ta já cahní na yehe. Joo tá ná yaha uní quivi nditacu tucu u —ñacachi Jesús xihín ná.

*Tá naxica Jacobo xihín Juan ñamani nu Jesús
(Mt. 20:20-28)*

³⁵ Anda já nacayati Jacobo xihin Juan, jahyi Zebedeo nu Jesús já nacachi da já xihin á:

—Maestro, cuni nde caca nde in ñamaní nu ndo —nacachi da.

³⁶ Já nacachi Jesús já xihin dá:

—Ndía maní cuni ndó caja i xihin ndo —nacachi a.

³⁷ Já nacachi da cán já xihin á:

—Ña xica nde nu ndo quea ná quiahva ndó ñamaní nuú nde cacoo in in nde xoo jíin ndo. In nde coo xoo cuáha ta in nde coo xoo íti jíin mé ndó indiví nuú coo ndó cacomí ndó cuéntá sahá ñayivi —nacachi da.

³⁸ Anda já nacachi Jesús já xihin dá:

—Coo cándaá ini ndó ña xica ndó nuú i. Á cuu ndoho ini ndó tá quiahva ndítahan nuú i ndoho ini i. Jáchi ña vaxi nuú i ndoho ini i cúu á tátuhun coho i in yáxi ndutá ova. Á in tiahva ndó ndoho ini ndó tá quiahva ndítahan nuú i ndoho ini i anda quiahva ná quivi i —nacachi a.

³⁹ Já nacachi da cán já:

—Cuu caja nde ña.

Já nacachi Jesús já xihin dá:

—Mé a ndaa tandaa quivi coho ndó ña ova ñuhu ini yáxi, mé ña coho i. Ta tandaa quivi ndoho ndivaha ini ndó tá quiahva ndoho ini i anda quiahva ná quivi i.

⁴⁰ Joo sahá ña cacoo in ndó xoo cuáha i ta in ndó xoo íti i a juú nuú i quiahva i ña nu ndo. Jáchi sa nandicaxi Ndióxi na ñehe táhvi cacoo cán —nacachi Jesús xihin dá.

⁴¹ Tá naxini johu uxu chága na xica tuun xihin Jesús cán ña yóho já nacasáhá xójo ini na xihin Jacobo xihin Juan viti.

⁴² Joo nacana Jesús na já nacachi a já xihin ná:

—Sa xini ndó ndaja cája na sáhdá chuun nuú ñayivi ndúu ñuyiví yóho. Ña cája na quea jácandíhi na ñayivi ta cája na tá quiahva cuni mé ná.

⁴³ Joo coo ndítahan coo ña cán tañu mé ndó jáchi ndá da cuni cacuu da cáhnu chága tañu ndó xini ñuhú cacuu da in da cája ndíví nuú ndíhi ndó.

⁴⁴ Ta ndá da cuni cacuu ta nu cuítí tañu ndóhó ndítahan cacuu da da cája ndíví nu ndíhi ndó.

⁴⁵ Jáchi ni yehe, da nachindahá Ndióxi nduu ñayivi coo naquixi i ñuyiví yóho ña ná caja ndíví ñayivi nuú i. Ña naquixi i caja i quea caja ndíví i nu ná ta ndiquiahva i mí i quivi i já ná cuu cacu ndaa ínimá cuahá ñayivi ná a cühun na indayá —nacachi a.

Tá nandaja vaha Jesús in da cuáá naní Bartimeo

(Mt. 20:29-34; Lc. 18:35-43)

⁴⁶ Anda já naxinu na ñuu Jericó. Ta tá sa naqueta tucu Jesús cuahan jatá ñuu cán xihin na xica tuun xihin á xihin cuahá ga ñayivi ta mé yuhú íchi cán íin coo in da cuáá naní Bartimeo, jahyi Timeo sáti da.

⁴⁷ Ta tá naxini johu da ña cáyati Jesús, da ñuu Nazaret vaxi da já nacasáhá mé da cuáá cán cáyuhú cóhó da já cáchi da já:

—Jesús, da naquixi chichi David caja ndó ñamaní candáhvi loho ini ndó yehe —nacachi da.

⁴⁸ Joo nacasáhá cuahá ñayivi cája cuehe na xihin dá ña ná caji da yúhu dá. Joo ví ga ví cáyuhú da já cáchi da já:

—Ndóhó, da naquixi chichi David caja ndó ñamaní candáhvi loho ini ndó yehe —nacachi da.

⁴⁹ Anda já nandaca ndichi Jesús já nacachi a já:

—Cana ndó da ná quixi da.

Já nacana na da cuáá cán já cáchi na já xihin dá:

—A ndícani inún. Candichi jáchi cána Jesús yohó —nacachi na.

⁵⁰ Anda já najácana da cotó ndeé da ta nandaca ndichi da já nasaa da nu íin Jesús.

⁵¹ Anda já nandaca tuhún Jesús da já cáchi a já xihin dá:

—Ndía cunún ná caja i xuhun.

Já nacachi mé da cuáá cán já:

—Candehé e cuni, xitoho.

⁵² Já nacachi Jesús já xihin dá:

—Cuu nuhu vún viti. Sa nandivahún jáchi nacandee inún yehe —nacachi a.

Chí ivi laa nandaca ndehé da cuáá cán. Já nandico da Jesús íchi cán cuahan da.

11

Ndíhvi Jesús ñuu Jerusalén

(Mt. 21:1-11; Lc. 19:28-40; Jn. 12:12-19)

1 Tá naxinu na yati ñuu Jerusalén jíin ñuu Betfagé xihín ñuu Betania ña ndíque táhan nuu xihín yúcu yitó Olivo já nasahnda Jesús chuun nuu ivi da xíca tuun xihín á.

2 Já cáchi a já xihín dá:

—Cuáhán ndo ñuu loho ndácaan yati jan. Tá ná xinu coo ndó jan ndiñehe ndó in búrró ndíco ndaa, rí cámaní yíi ndaa na. Ndaxí ndó rí ta cañehe ndó rí quixi ndó.

3 Ta ndá na ná ndaca tuhún ndohó saha rí já quea cachi ndó xihín ná ña xíní ñuhú xitoho ndó rí viti joo tá ná ndihi chuun rí já ndixi tucu rí, já cachi ndó xihín ná — nacachi Jesús xihín da.

4 Ta naquee da cán cuahan da já nandiñehe dá mé búrró cán ndíco ndaa rí jíin yéhe yuhú íchi já nandaxí da rí.

5 Ta ndaja coo java na ndúu cán nacasáhá cáchi na já:

—Ndía cája ndó. Ndávaha ndaxí ndo búrró jana nde jan —nacachi na.

6 Anda já nanducú ñehe mé da xíca tuun xihín Jesús cán tuhun nu ná ta nacachi da tá quiahva nacachi Jesús xihín dá. Anda já nañehe dá ñamaní cañehe da rí cuhun da.

7 Tá nandihí já ñehe da búrró cán nacasaá da nu Jesús já nachojó da cotó ndéé da jata rí já nandaa Jesús jata rí.

8 Ta cuahá ñayivi nacasáhá na chinduu na cotó ndéé na íchi ta java na nacasáhá na sáhdá na ndáha yitó já chinduu na do íchi.

9 Ta na cuahan chí nuu ta jári na vaxi chí jata nacasáhá na cáyuhú na já cáchi na já:

—Cája cáhnu í Ndióxi. Ndicáhnu nahá ná cacuu da cómi cuénta saha yo jáchi cúu dá da vaxi yuhú nuu Ndióxi.

10 Cáhnu ná coo quiví tá casáhá Ndióxi cacomí a cuénta saha yo. Tá quiahva nasacomí David, tátá yo cuénta sahá ñayivi sanahá quiahva já cacomí mé á cuénta saha yo. Cáhnu ná cacuu Ndióxi —cáchi ñayivi.

11 Anda já nandihvi Jesús ñuu Jerusalén ta já naxinu a veñuhu cáhnu cán. Ta tá nandihí nasandehé ndihi a níi xoo cán já naquee a cuahan chí ñuu Betania xihín ndíhuxu ivi na xíca tuun xihín á jáchi sa nahini ta cuahan cuáá va.

Tá nachicaan Jesús cháhan jata titó ñuhú (Mt. 21:18-19)

12 Tá naquee na Betania inga quiví itaan já nacasáhá cuíco Jesús cuahan.

13 Tá naxini xíca a in titó ñuhú vaha dó ndoco ndáha. Nasahan Jesús sándehe a á ín cuíhi nu do joo coo rí ná ñehe a. Ndáha uun va dó cán ín jáchi a juú tiempo coo rí cán queá.

14 Anda já nacahan Jesús xihín titó ñuhú cán já cáchi a já xihín do:

—Ní in ga na a cáxi ga cuíhi nu yóhó — cáchi a xihín do.

Ta naxini johó na xíca tuun xihín á cán tuhun yóho.

Tá nataxí Jesús na ndúu jíco ñaha yéhe veñuhu

(Mt. 21:12-17; Lc. 19:45-48; Jn. 2:13-22)

15 Tá nandihí já naxinu na Jerusalén. Ta tá nandihvi Jesús veñuhu cáhnu cán já nacasáhá táxi a na ndúu jíco cán xihín na ndúu xéen viti. Ta naxíco ñehe a mesa na ndúu ndíjama jiuhún ñayivi ta naxíco ñehe a táyi sácco na ndúu jíco ndíjata.

16 Ta chí coo nasahan ñamaní nuu ñayivi cañehe na ñaha ndihvi na veñuhu.

17 Anda já nacasáhá jánaha nu ná já cáchi a já xihín ná:

—Já cáchi tuhun Ndióxi: “Vehe mí i cacuu a vehe nuú quixi na caca tahví na nuú i saha tóco ndihi ñayivi ñuyiví”, cáchi tuhun Ndióxi. Joo ndóhó nandai cuu ndó yóho caja cuíhna ndo nuu ñayivi —nacachi Jesús xihín ná.

18 Tá mé na sacuaaha nuu jutú cán xihín na jánaha ley Moisés naxini johó na ña yóho já nacasáhá na ndúcú na ndá quiahva cahní na a jáchi yíhvi ñahá na sahá ña catóntó ndihi ñayivi xihín ña jánaha mé á nu ná.

19 Joo tá nacuaá já naquee Jesús ñuu cuahan xihín na xíca tuun xihín á.

Tá nahichi titó ñuhú, dó coo cuíhi nuu (Mt. 21:20-22)

20 Ta naha chá inga quiví itaan nayaha na nu cándichi mé titó ñuhú cán já naxini na ña nahichi do janda yóho do nahichi.

21 Anda já nandicuhun ini Pedro saha mé titó ñuhú já cáchi da já xihín Jesús:

—Maestro, candehé ndó titó ñuhú, dó nacahan cuehe ndó xihín. Sa nahichi dó viti —nacachi da.

22 Já n̄acachi Jesús já xih̄in dá:

—Candee ini ndó Ndióxi.

23 Jáchi mé a ndaa ná cahan̄ i xih̄in ndo ña tá ná cachi ndó xih̄in yúcu yóho: “Caxoo ta cuáhán jáquetún mún ini tañuhú”, ta tá co cáhvi ivi joho ini ndó ta tá candúsa ndó coo tá lín cáchí ndó ta chí já ndusa coo.

24 Sahá ña cán quéea cáchí i xih̄in ndo ña tóco ndihi ñaha xíca tahví ndó nu Ndióxi ta tá candúsa ndó ña sa ñañehe ndó a já quéea ñehe ndusa ndó a.

25 Ta tá ndúu ndó xíca tahví ndo nu Ndióxi xíní ñuhú caja cáhnu ini ndó saha ndá na xójo ini ndó xih̄in já ná caja cáhnu ri ini Ndióxi, tátá ndo ña lín indiví sahá cuachi ndó.

26 Joo tá co cája cáhnu ini ndó sahá ñayivi já quéea ni Ndióxi, tátá ndo ña lín indiví a cája cáhnu ini a sahá cuachi ndó —n̄acachi a.

Tá n̄andaqa tuhún na Jesús ña ndáchí quíxi ndée á ña cája cuahá nuú ñaha
(Mt. 21:23-27; Lc. 20:1-8)

27 Anda já n̄andicó coo tucu na ñuu Jerusalén. Ta tá xíca Jesús chí veñuhu cáhnu cán já n̄acayati na sacuaḥa nuú juṭu xih̄in na jánaḥa ley Moisés xih̄in na sacuaḥa veñuhu nu á.

28 Já n̄andaqa tuhún na Jesús já cáchí na já xih̄in á:

—Yo já sahan̄ ñaman̄i nuun̄ cajún ña cájún yóho —n̄acachi na.

29 Já n̄acachi Jesús já xih̄in ná:

—Ná ndaca tuhún ri yehe va ndohó ta tá ná nducú ñehe ndó tuhun nuú i anda já caxi tuhun i nu ndo yo já nasahan̄ ñaman̄i nuú i caja i ña cája i yóho.

30 Cachi ndó xih̄in i yo já n̄achindahá Juan ña ná quixi da caja ndúta da ñayivi. Á Ndióxi n̄achindahá da, á ñayivi n̄achindahá ñahá. Nducú ñehe qui ndó tuhun nuú i viti —n̄acachi Jesús xih̄in ná.

31 Anda já n̄acasahá ndítuhún xih̄in táhan na cán já cáchí na já:

—Tá ná cachí ña Ndióxi quéea n̄achindahá Juan ta já nducú nehe Jesús tuhun nu yo já cachi da xoho: “Ndá cuéntá quéea coo naxeen ndó candúsa ndó da, dá já”, cachi Jesús xoho.

32 Ta tá ná cachí: “Ñayivi cúu na n̄achindahá Juan”, já ndicujta ñayivi xih̄in yo —n̄acachi na ndítuhún xih̄in táhan na.

Já cáchí na jáchi yíhvi na ñayivi jáchi tóco ndihi ñayivi n̄acahán na saha Juan ña cúu dá da n̄achindahá Ndióxi jáyaha da tuhun cahan̄ mé á nuú ñayivi.

33 Sahá ña cán quéea n̄acachi na já xih̄in Jesús:

—Co xíní toho nde yo n̄achindahá Juan.

Anda já n̄acachi a já xih̄in ná:

—Ta ni yehe a cáxi tuhun i nu ndo yo já nasahan̄ ndee nuú i caja i ña yóho —n̄acachi a.

12

Sácú Jesús quiahva sahá java mozo, da n̄acaja quini xih̄in xitoho

(Mt. 21:33-46; Lc. 20:9-19)

1 Anda já n̄acasahá Jesús sácú a quiahva nuú ñayivi já n̄acachi a já xih̄in ná:

—Nasah̄in in dataa najánde cuaha dá tó uva nu ñuhú dá ta já nasacu da in corra yito nu do. Ta n̄acavaha da in nuú cuhni mé uva cán ña cavaha vino. Ta n̄acavaha da in nu jícó canúu da já cuu candaa da tóco ndihi dó cán.

Tá n̄andihí já nasahan̄ ndojó da ñuhú dá nuú java na caja chúun na ña já naquee da cuahan̄ xíca da.

2 Ta tá n̄axinu tiempo jáquee na já n̄achindahá da in mozo da nuú na cája chúun ñuhú da cán ña ná ndiquiahva na ña cáni nu dá ndiquehe da saha ñuhú da ña nasahan̄ ndojó da nuú na cán.

3 Joo mé na cája chúun tóo ñuhú cán n̄atiin na mozo da cán já n̄acani na da. Tá n̄andihí já n̄anducú ñehe na da nuú xitoho da joo coo ñaha ná sahan̄ na nu dá.

4 Anda já n̄achindahá tucu mé da xih̄in ñaha ñuhú cán inga mozo. Joo da yóho n̄acaja xíxi tucu na xih̄in dá jáchi n̄acani na da xih̄in yuu. Ta najándicehe na jini dá já n̄acasahá canahá na xih̄in dá.

5 Ta mé da xih̄in ñaha ñuhú cán n̄achindahá tucu da inga mozo da ta nasahní na da. Ta n̄achindahá cuahá ga da mozo da nasahan̄ cán. Ta java da n̄acani na ta java da nasahní na.

6 N̄acando in tuhún jahyi mé da xih̄in ñaha ñuhú cán ta quíhvi ndivaha ini da

jahyi da. Joo tá nu ndíhí já nachindahá da jahyi da jáchi cáhán da: “Cája i cuéntá coo toní ñúhú na xihín jahyí i”, naçahán da.

⁷ Joo mé na cája chúun ñúhu cán naçasáhá ndítúhún xihín táhan na já cáhí na já: “Candehé ndo. Yóho vaxi da cúu jahyi xitoho í. Ta tá ná xinu quivi quivi xitoho í ta da yóho cacuu da ndicojo chuun saha ñúhu yóho. Cóho cahni yó da já ná candoo ñúhu yóho ndáha mí”, naçachi xihín táhan na cán.

⁸ Anda já natiin na da cán ta nasahní na da já najácana na yiquí cuñu da jata cútu cán —naçachi Jesús.

⁹ Anda já nandaca tuhún Jesús ñayivi ndúu cán já cáhí a já:

—Á co xini ndó ndía caja da xihín ñaha ñúhu yóho viti. Ña caja da quéa quixi da ta cahni ndihi da na cája chúun too nu ñúhu dá. Já ndiquiahva da ñúhu dá nuú java ga na já ná caja chúun na nu á.

¹⁰ Á co xini ndó ña cáhí tuhun Ndióxi. Ña cáhí a quéa:

Mé yuu ña najácana da cávaha vehe, ña cán cúu ña nanduu yuu ndúhu sahá vehe ña ín chága saha.

¹¹ Ña yóho quéa naçaja Ndióxi ta cúu á in ñaha cáhnu ndivaha nu yo, cáhí tuhun Ndióxi —naçachi Jesús.

¹² Anda já naçasáhá ndúcú na sacuaña tiin na Jesús chicaan na a vecaa jáchi naçandaa ini na ña saha mé ná nasacu a quiahva yóho. Joo sahá ña yíhvi na ñayivi najándacoo na a ta naquee na cuahan na.

Ndáca tuhún na Jesús á ndítahan nu ná chahvi na jjuhún cuéntá impuesto
(Mt. 22:15-22; Lc. 20:20-26)

¹³ Tá nandihí já nachindahá na java na fariseo xihín na cúu cuéntá Herodes nu Jesús ña ná coto ndojó ñahá na xihín tuhun cahan mé á já ná chicaan na cuachi jatá.

¹⁴ Anda já naxinu na nu Jesús já cáhí na já xihín á:

—Maestro, xini nde ña ndinuhu ña ndaa cahan mé ndó. Ta co quéhe ndó cuéntá tá cahan núu ñayivi saha ndo. Ta cándaa ini nde ña tá cahan ndó sahá in ñaha cája ñayivi cúu á sahá ña sándehe ndó janda ínima ná. Ta cándaa ini nde ña jánaña ndó ña ndaa saha íchi cuéntá Ndióxi. Ta viti cuni nde

ndaca tuhún nde ndohó á ndítahan nuú nde chahvi nde jjuhún cuéntá impuesto nuú da cómi cuéntá saha yo ñuu Roma. Á chahvi nde ña, á a chahvi toho nde ña —naçachi na.

¹⁵ Joo sa naçandaa ini Jesús ña co cúu ná tá quiahva ndaa na ña cán quéa naçachi a já xihín ná:

—Cándaá cáxi táhyí ini i ña cuni ndó coto ndojó cuití ndó yehe. Jánaña ndó in táhan jjuhún jan nuú i ná candehé e ña —naçachi a.

¹⁶ Já nasahan na mé jjuhún cán nu á ta tá naxini a ña já naçachi a já xihín ná:

—Yo nahná ta yo quivi quéa ndaa nu á.

Já naçachi na cán já xihín á:

—Ñéhe a quivi xihín nahná da cómi cuéntá saha yo ñuu Roma —naçachi na xihín á.

¹⁷ Anda já naçachi Jesús já xihín ná:

—Ndiquiahva ndó ñaha da cómi cuéntá saha ndó ñuu Roma jan nu dá. Ta ndiquiahva ndó nu Ndióxi ña cúu ñaha mé á —naçachi a.

Chí naçatontó mé na cán sahá ña naçachi Jesús xihín ná.

Ndáca tuhún na saduceo Jesús á mé a ndaa ndítacu ndii

(Mt. 22:23-33; Lc. 20:27-40)

¹⁸ Anda já nasahan java na saduceo cahan na xihín Jesús. Ta mé na saduceo yóho co cándusa na ña ndítacu tucu na sa naxihí. Sahá ña cán quéa nandaca tuhún na Jesús já cáhí na já xihín á:

¹⁹ —Maestro, nu ley naçahyi Moisés sanahá natahnda chuun ta cáhí a já: “Tá tándaha in dataa xihín ñájihí da ta tá coó jahyi ña cácu xihín dá ta tá ná xinu quivi quivi da cán já quéa cáhí ley Moisés ña ndítahan tándaha tucu ñájihí da xihín da cúu ñani mé ndii cán já ná coo jahyi da cán xihín yuhú nuú ñani da”, já cáhí ley Moisés.

²⁰ Ta viti cuni johó ndó ná cacuu nde in quiahva nu ndó. Nasahin usa ñani ta da nu cuití natandaha dá xihín in ñáñáha. Tá nandihí naxihí da joo coó jahyi da ná cacuu xihín ña cán.

²¹ Ta natandaha ñani da, da chí ivi xihín ña cuaan cán. Ta já naxihí ri da cán va ta ni da yóho coó naçacu jahyi xihín ñájihí ñani.

Ta quiahva já nandoho ri ñani da, da chí uni.

²² Anda quiahva naxinu ndíhusa da natandaha xihin ña ta ni in da coo nacacu jahyi xihin ña. Tá nu ndíhí naxihí ri mé va ñá.

²³ Ta viti ndáca tuhún nde ndohó ndá da cacuu ndusa yí ñá cán tá ná xinu quivi nditacu tucu ndii jáchi ndíhusa va ñani da cán natandaha xihin ñá —nacachi na.

²⁴ Anda já nanducú ñehe Jesús tuhun nu ná já cáhí a já xihin ná:

—A váha toho cáhvi ini ndó jáchi co xini ndó ndaja cáhan tuhun Ndióxi ta ni co xini ndó ndá quiahva cáhnu cúu ndée Ndióxi.

²⁵ Jáchi tá ná nditacu tucu ndii a tandaha ga na ta ni a quiahva na jahyi jíhí na tandaha ná. Cacuu na tátuhun táto Ndióxi ndúu indiví ta co tandahá na cán.

²⁶ Joo sa xini yo ña nditacu tucu ndii. Á a ñaha cahvi ndó ña nacahyí Moisés sahá ña nacahan Ndióxi xihin dá tañu tohínú, dó candaha ñúhu cán. Já nacachi a já xihin dá: “Yehe cúu Ndióxi cája cáhnu Abraham ta yehe cúu Ndióxi cája cáhnu Isaac ta yehe cúu Ndióxi cája cáhnu Jacob”, nacachi a.

²⁷ Ta ña yóho cúni cachi a ña tácu yii va Abraham xihin Isaac xihin Jacob vatí sa naxihí yiquí cuñu na. Sahá ña cán quéa co xini ndó ndá saha cáhan ndo —nacachi a.

Tá cáhan Jesús ndía cúu ña cáhnu chága sáhdá Ndióxi caja í
(Mt. 22:34-40)

²⁸ Ta ndaja coo in da jánaha ley Moisés nacayati da nu Jesús jáchi sa naxini johó da ña nacahan Jesús xihin na ndúu cán. Sahá ña xini da ña nanducú ñehe ndaa Jesús tuhun nuú na cán sahá ña cán quéa nandaca tuhún da Jesús já cáhí da já xihin á:

—Ndía cúu ña cáhnu chága sáhdá Ndióxi caja í —nacachi da.

²⁹ Já nacachi Jesús já xihin dá:

—Ña cáhnu chága cúu ña cáhí tuhun Ndióxi yóho: “Taa johó ndó, na Israel. Ín in túhún jini Ndióxi ta mé á cúu xitoho í.

³⁰ Ta ndítahan quihvi ini ndó mé Ndióxi, xitoho ndó xihin tóco ndihi inima ndo ta xihin ndinuhu ini ndó. Ta quihvi ini ndó a xihin tóco ndihi xini túni ndo ta xihin tóco

ndihi ndée ndo.” Ña yóho cúu ña nu cuítí sáhdá Ndióxi caja ndó.

³¹ Tá cúni coo ña nu cuítí já cúni coo ri ña chí ivi va ta cáhí a: “Quihvi ini ndó ñani táhan ndó tá quiahva quihvi ini ndó mé ndó.” Coó ga inga ña sáhdá Ndióxi caja ndó cacuu ña cáhnu chága nuú ña yóho —nacachi a.

³² Anda já nacachi mé da jánaha ley Moisés cán xihin Jesús:

—Vaha chá nacahan ndó, Maestro. Mé a ndaa quéa nacahan ndo ña ín in táláá cuítí Ndióxi ta coó inga ga Ndióxi.

³³ Ta ndítahan quihvi ini mé á xihin tóco ndihi inima yo ta xihin ndinuhu ini ta xihin tóco ndihi xini túni yo ta xihin tóco ndihi ndée yo. Ta ndítahan quihvi ini ñani táhan í tá quiahva quihvi ini mí. Ndiyahvi chága ña yóho a juú ga tóco ndihi ñaha jóco na nu Ndióxi ta ndiyahvi chága ña a juú ga ñaha chícáan ñúhu ná nu náa —nacachi da.

³⁴ Tá naxini Jesús ña nanducú ñehe vaha da cán tuhun nu á já cáhí a já xihin dá:

—Jalóho cúni ña cacomí Ndióxi cuénta sahan —nacachi Jesús.

Tá nandihí cán ni in ga na coo nasahan ndeé ini na ndaca tuhún ga na mé á.

Ndáca tuhún na Jesús ndáchí naquixi a
(Mt. 22:41-46; Lc. 20:41-44)

³⁵ Ndácaan Jesús veñuhu cáhnu jánaha nuú ñayivi já cáhí a já xihin ná:

—Ndávaha cáhí na jánaha ley Moisés ña vaxi Cristo chichi David.

³⁶ Ta sa mé David tá nachutú ndaa ini da xihin inima yii Ndióxi já nacachi da já:

Já nacachi Ndióxi xihin xitoho í:

“Cacoo xoo cuáha i yóho, anda quiahva ná caja i ña ná cacomún cuénta sahá na co cúni yohó”, nacachi Ndióxi sanahá.

³⁷ Ndávaha cáhí na ña vaxi Cristo chichi David joo mé tiempo cán nacachi David ña cúu á xitoho da —nacachi Jesús.

Ta cuaha ndivaha ñayivi cájii ini na taa johó na nu cáhan Jesús.

Chícáan Jesús cuachi jatá na jánaha ley Moisés
(Mt. 23:1-36; Lc. 11:37-54; 20:45-47)

³⁸ Tá jánaha Jesús na já cáhí a já xihin ná:

—Cuéntá coo ndó xihín na jánaha ley Moisés jáchi cátóo na cándixi na jáhma nání caca nuu na. Ta cátóo na cahan toní ñúhú ndivaha ñayivi xihín ná tá xíca nuu na nuú yahvi.

³⁹ Ta tá cuahan na veñuhu cátóo na cacoo na nu sácoo na ín chága saha. Ta tá cuahan na víco nuú vaha cátóo na coo na. Cuéntá coo ndó xihín na yóho.

⁴⁰ Jáchi cándaa na vehe najihí cuáan ta tá nandihí cuahá ndivaha xíca tahví na nu Ndióxi jáchi cúni na jájahvi na nuú ña núu cája na. Mé a ndaa ná cahan i xihín ndo ña mé na jánaha ley Moisés yóho cacuu na na ndoho chága ini caja Ndióxi —cáchi Jesús.

Ña najoco in ña cuáan ndáhví
(Lc. 21:1-4)

⁴¹ In tañu ín coo Jesús ini veñuhu cáhnu cán yati nu ín sato nu táan na jjuhún jóco na nu Ndióxi. Ta sándehe a ndá quiahva táan ñayivi jjuhún ini mé sato cán. Ta naxini a cuahá taa cuicá xínu coo táan cuahá na jjuhún ini mé sato cán.

⁴² Ta mé já naxinu coo in ña cuáan ndáhví ta nataán ña ivi jjuhún ña núu yahvi ini mé sato cán.

⁴³ Já nacana Jesús na xíca tuun xihín á ta já cáchi a já xihín ná:

—Mé a ndaa ná cahan i xihín ndo ña cuahá chága jjuhún nasahan ña cuáan ndáhví yóho a juú ga tóco ndihi java ga na cán.

⁴⁴ Jáchi tóco ndihi na cán nasahan na ña yójó nu ná joo ña cuáan ndáhví yóho nasahan ña nu Ndióxi tóco ndihi ña cómi ña catacu ña —nacachi a xihín ná.

13

Cáxi tuhun Jesús nu ná ña vaxi quivi ndihi sahá veñuhu cáhnu ñuu Jerusalén
(Mt. 24:1-2; Lc. 21:5-6)

¹ Tá naquee Jesús veñuhu cáhnu cán já nacachi in da xíca tuun xihín a cán já:

—Maestro, candehé ndó ndaja náhnu yuu nacavaha na veñuhu yóho ta ndaja jícó ndivaha nacavaha na ña —nacachi da.

² Anda já nacachi Jesús já xihín dá:

—Mé a ndaa náhnu a joo ndá chuun cúu á jáchi ni janda in yuu yóho a cándo jata inga

yuu jáchi vaxi quivi tá nditani ndihi ña yóho —nacachi a.

Ndicani Jesús ña coo tá ná cayati quivi ndihi saha ñuyiví

(Mt. 24:3-28; Lc. 21:7-24; 17:22-24)

³ Anda já nasahan na cán yucu yito Olivo, ña xíto ndaa táhan xihín veñuhu cáhnu cán. Ta tá ín coo Jesús cán já naxinu Pedro xihín Jacobo xihín Juan xihín Andrés já nacahan jehé na xihín á já cáchi na já:

⁴ —Cúni nde ña ná caxi tuhun ndó xihín nde ndá ama coo tóco ndihi ña yóho. Ta ndaja coo tá sa nacayati mé quivi cán —nacachi na.

⁵ Já nacachi Jesús já xihín ná:

—Cuéntá coo ndó ta a quiahva ndó ñamaní jándahvi ni in ñayivi ndohó.

⁶ Jáchi cuahá ndivaha na quixi na cuéntá mí i ta cahan na ña tuhún tá cachi na já xihín ndó: “Yehe cúu Cristo, da nachindahá Ndióxi cacomí cuéntá sahá ñayivi.” Ta xihín ña yóho cuahá ndivaha ñayivi jándahvi na.

⁷ Joo tá nacasahá xini joho ndó ña yóho cáa cúu tondohó, a cáyihví toho ndó jáchi quiahva já ndítahan coo. Joo cámaní yí xinu coo quivi nu ndihí.

⁸ Jáchi ñayivi ndúu in nación ndicuítá na caní táhan na xihín na ndúu inga nación ta caní táhan na in ñuu xihín na inga ñuu. Ta quixi nditáan ndijáá nu ndúu ñayivi já xinu tama ndeé ta já casahá na ndivaa na. Ta tóco ndihi ña yóho cúu á tá cava sahá sahá ña núu vaxi nuú ñayivi jáchi cámaní xinu coo chága nuú ndoho ini na.

⁹ Joo candaa vaha ndó mé ndó jáchi ndiquiahva na ndohó ndahá na cómi chuun ta caní na ndohó ini veñuhu. Ta sahá yehe cañehe na ndohó nuú na cómi cuéntá sahá ñayivi xihín nuú na cúu jutixia ta já cuu cahan ndó sahá i nuú na cán.

¹⁰ Joo jihna ñúhú xini ñúhú ndicuítá nuu tuhun vaha saha mí i nu tóco ndihi ñayivi anda jáví ndihi saha ñuyiví yóho.

¹¹ Ta tá ná cañehe na ndohó cahun ndó nuú na jutixia, a ndicani ini ndó sahá ndá tuhun cahan ndó xihín ná. Mé hora já cahan ndó ña quiahva Ndióxi nu ndó cahan ndo. Jáchi a juú jiní mé ndó quixi ña cahan

ndo. Ínima yíi Ndióxi cacuu ña quiahva tóco ndihi ña cahan ndo.

12 Ta java taá jicó túhún da ñani da ta java da jicó túhún da jahyi da ña ná cahní ñahá na. Ta cuaha ná ndicuita na cani táhan na xihín tátá na ta cahní ñahá na.

13 Ta ndaja táhan ñayivi ndúu ñuyiví yóho candají na ndohó sahá yehe. Joo ndá na ná candico tuun íchi mí i janda ná xinu quiví quivi na, na jan cacuu na cacu ndaa ínima.

14 'Na cáhvi tutu ná candaa ini na ña cahan. Daniel cúu da nacahyí sanahá sahá in ña quini ña jatívi ñahá. Tá ná cuni ndó ña cándichi in a nuú co ndítahan coo a já ndítahan nuú na ndúu estado Judea cunu na cuhun na chí yucu.

15 Ta ndá na cánúu jini véhe mé quivi já co ndítahan nuu na tavá na ñaha vehe na.

16 Ta ndá na ndúu yucu co ndítahan ndicó coo na vehe na ndiquehe na jáhma ná.

17 Ndáhví najihí, mé na ñuhu jahyi mé quivi já. Ta ndáhví na ñehe ndaa na valí táhan ña chíhí yijí.

18 Caça tahví ndo nu Ndióxi ña ná a cacuu a tiempo vixi tá ná cunu ndó cuhun ndo já ná a ndóho chága ini ndó.

19 Jáchi quiví ndoho ndivaha ini ndó cacuu a cán. Jáchi janda tá nacava sahá saha ñuyiví coo nandoho ini na tá quiahva ndoho ini na mé quivi jan. Ta tá ná yaha ña jan, a ndicó coo ga ña ndoho ini na quiahva já.

20 Ta tá ná a ndája cuítí Ndióxi tiempo yóho ni in ñayivi a cúu cacu ndaa. Joo nasacu ini a ndaja cuítí a mé tiempo yóho jáchi quíhvi ini a tóco ndihi na nacaxi mé á.

21 'Ta tá ná cachi in na xihín ndó: "Candehé ndo, yóho ín Cristo, da nachindahá Ndióxi cacomí cuéntá sahá ñayivi", á tá ná cachi na: "Candehé ndo, cáa ín da", cachi na já queá a cándúsa toho ndó na.

22 Jáchi quixi cuahá na jándahvi ndohó ta ndaja na mé ná tátuhun Cristo. Joo a juú Cristo cúu ná. Ta quixi cuaha ná ta cachi na cahan na cuéntá Ndióxi ta jári caja na cuahá nuú ña náhnu xihín ña xitúhún ña ná jándahvi na ñayivi. Ta anda na sa nacaxi Ndióxi jándahvi na tá ná cuu caja na ña.

23 Xíní ñuhú candehé vaha ndó mé ndó jáchi sa nacaxi tuhun yachi ndihi i ña yóho

xihín ndo —nacachi Jesús.

Ndaja coo tá ná xinu coo quiví quixi tucu Jesús

(Mt. 24:29-35,42,44; Lc. 21:25-36)

24 Já cáhí tucu Jesús já:

—Joo tá sa nayaha tóco ndihi ña nandoho ini ñayivi já canaa nuú candii ta a ndíyehe ga yoo.

25 Anda indiví quee quimi cuyu rí nu ñuhu ta quiji nuu indiví ña nacavaha Ndióxi.

26 Anda já cuni na yehe quixi i tañu vico xihín tóco ndihi ndée cáhnu i, da nachindahá Ndióxi nduu ñayivi. Ta cuni na ndá quiahva cáhnu cúu yehe.

27 Ta tá nandihí já chindahá i táto mí i ña ná jánditaca na na sa nacaxi i tañu tóco ndihi ñuu janda níí cúu sahá ñuyiví ta janda níí cúu sahá indiví.

28 'Catiqva ndó ña cúní cachi mé quiahva sácú u nu ndó sahá titó ñuhú. Tá yútá ndáha dó cán ta vaxi núma valí do já candaa ini ndó ña vaxi tiempo ihní.

29 Ta quiahva já cacuu ña yóho tá ná cuni ndó yaha tóco ndihi ña yóho. Jáchi anda jáví candaa ini ndó ña nacayati tiempo quixi tucu yehe ñuyiví yóho.

30 Mé a ndaa ná cahan i xihín ndó ña yaha tá yaha tóco ndihi ña nacachi i xihín ndo ta anda jáví quivi na ndúu tiempo viti.

31 Ta ndihí sahá indiví xihín ñuyiví joo a ndíhi toho sahá tuhun nacahan i xihín ndó yóho. Jáchi coo tá coo va ña.

32 'Joo ni in túhún toho ñayivi coo xini na ndá quivi á ndá hora yaha ña yóho. Ta ni mé tátó Ndióxi ndúu indiví coo xini na ndá quivi coo ña yóho. Ta ni yehe, da cúu in túhún jini já jahyi Ndióxi coo xini ndá quivi coo ña yóho. In túhún Ndióxi, tátá yo queá xini a.

33 'Sahá ña cán queá cañuhu ini ndó sahá ña yóho. Coo tiahva ndó ta caça tahví ndo nu Ndióxi jáchi coo xini ndó ndá quiví xinu coo ña yóho.

34 Jáchi ña yóho cúu á tátuhun in dataa queta cuahan xicá joo tá cámaní quee da cuhun da jándacoo too da vehe da nu mozo da ña ná candaa na ña. Ta sahan da chuun caja in in mozo da. Ta nuú da ndáá yéhe nasahnda da chuun ña ná candaa vaha da ña.

³⁵ Sahá ña cán quéa xíní ñúhú coo tiahva ndó jáchi cō xíní ndo ndá quiví xinu cōo mé da cúu xitoho vehe. Cō xíní ndo á cacuu a tá ñacuaá tōo á cacuu a java ñuú táji á cacuu a tá ñacana chéle á cacuu a tá sa ñativi.

³⁶ Cuéntá coo ndó. A juú tiahva náá xinu cōo da ta ndiñehe dá ndohó ndúu ndó quíji ndo.

³⁷ Ña cáhan i xihin ndó cáhan i xihín ndihi na: Xíní ñúhú coo tiahva ndó saha mé quiví quixi tucu u —ñacachi Jesús.

14

Ndítuhún jehé na tiin na Jesús

(Mt. 26:1-5; Lc. 22:1-2; Jn. 11:45-53)

¹ Tá cámaní ivi quiví caja na vicó pascua xihin víco tá xíxi na pan ña cō quée yusá ñaxaa xihin já ñacasáhá na sacuaḥa nuú jutū xihín na jánaḥa ley Moisés ndúcú na ndá quiahva caja na tiin jehé na Jesús já cuu cahní na a.

² Ta já cáchí xihin táhan na:

—A tíin toho í da mé víco jáchi tiahva náá ndivaḥa ñayivi —ñacachi na.

Tá nachojo in ñañaḥa perfume jini Jesús

(Mt. 26:6-13; Jn. 12:1-8)

³ Ta ndaja coo íin Jesús ñuu Betania vehe Simón, da cáhan na xihin: taa ñandoho cuehe táhyi. Ta naní ndúu coo na nu mesa cán ñaxinu in ñañaḥa ta ñéhe ñá in yúyú alabastro ñachutú jini a xihín perfume, dó támi ndivaḥa sahan ta cúu dó perfume yahvi ndivaḥa. Ta ñatahví ñá yóho mé yúyú cán já nachojó ña do jini Jesús.

⁴ Ta java na ndúu cán ñacasáhá na jáa ná xihin ña já ñacasáhá cáchí xihin táhan na já: —Ndávaḥa ñativi uun perfume yóho.

⁵ Cuu jicó yó do, nduu ta yáha ga nuú uni ciento denario quehé saha dó ta xihín jiuḥún cán cuu chindeé yó na ñahví, nduu —cáchí na.

Sahá ña cán quéa ñaxojo ini na xihin ñañaḥa cán ta ñacahan núu na saha ña.

⁶ Anda já ñacachi Jesús já xihin ná:

—A cáhan ndó xihin ña. A jáquihvi ndó ña.

Ña vaḥa quéa ñacaja ñá yóho xihín i.

⁷ Jáchi na ñahví ní tiempo canduu na tañu ndó ta cuu caja ndó ña vaḥa xihin ná ndá tañu cúni mé va ndó joo yehé a cóo tuun toho i xihin ndo.

⁸ Mé ñá yóho ñacaja ñá janda nuú ñaxinu ndée ñá caja ñá xihín i. Sa ñajándicuchu yachi va ñá yóho yiquí cuñu i xihín perfume, dó támi sahan jan ña ná coo tiahva vi tá ná casaḥa quiví nduxu.

⁹ Mé a ndaa ná cáhan i xihin ndo ní cúu ñuyiví nuú caca nuu ñayivi cáhan na tuhun vaḥa saha mí i já quéa ndicani na ña ñacaja ñá yóho xihín i já ndicuhun ini na saha ña —ñacachi a.

Jicó tuhún Judas Jesús

(Mt. 26:14-16; Lc. 22:3-6)

¹⁰ Ta ndaja coo in táhan da uxu ivi xica tuun xihin Jesús, da naní Judas Iscariote ñasahan da cáhan da xihin na sacuaḥa nuú jutū. Já ñasahan da tuhun da nuú na cán ña ndiquiahva da Jesús ndáḥa ná.

¹¹ Tá ñaxini johó na cán ña ñacachi da xihin ná ñacavatá na ta ñasahan na tuhun na nu mé Judas ña quiahva na jiuḥún nu dá. Ta sa mé nani já ñacasáhá Judas ndúcú da ndaja cuu caja da ndiquiahva da Jesús nu ná.

Tá ñaxijini ndayí Jesús xihín na xica tuun xihin á

(Mt. 26:17-29; Lc. 22:7-23; Jn. 13:21-30; 1 Co 11:23-26)

¹² Mé quiví nuú víco pascua tá xíxi na pan ña cō quée yusá ñaxaa xihin já sahní na ndicachi válí jóco na nu Ndióxi. Já ñandaca tuḥún na xica tuun xihin Jesús mé á já cáchí na já xihin á:

—Ndáchí cúni ndó cuhun nde caja ndíví nde cajini ndó vicó pascua —ñacachi na.

¹³ Anda já ñachindahá Jesús ivi da xica tuun xihin á já cáchí a já xihin dá:

—Cuáhán ndó ñuu jan jáchi jan ndiñehe ndó in dataa ñéhe da in yoo ticuí ta candico ndó da cuhun ndo.

¹⁴ Tá ná xinu da vehe nuú ndihvi da já cachi ndó xihín da cúu xitoho vehe cán já: “Da jánaḥa ndehe cáchí xuhun: Ndáchí íin nuú coo i cajini i vicó pascua xihin na xica tuun xihin i.”

¹⁵ Anda já jánaḥa mé da cán in cuarto cáhnu ña cánúu jini véhe piso ninu. Sa íin tiahva va ña. Cán caja ndíví ndo ña cajini —ñacachi Jesús xihin ná.

¹⁶ Já ñaquee mé na xica tuun xihin Jesús cán cuahan na ta tá ñaxinu na ñuu cán

naſahiiin tá ín cáchí Jesús xihín ná. Já naçaja ndívi ña ña cajíni na vicó pascua mé cán.

17 Tá naçuaá naſinu Jesús xihín ndihuxu ivi ña xíca tuun xihín á.

18 Ta tá ndúu coo na nu mesa xíxi na já naçachi Jesús já xihín ná:

—Mé a ndaa ná cahan i xihín ndo ña in táhan ndó, da ndúu coo xíxi xihín i nu mesa yóho cacuu da jicó túhún yehe —naçachi a.

19 Anda já naçasáhá ña cán cacuéha ini na já naçasáhá tá in tá in na ndáca túhún ña mé á já cáchí ña já xihín á:

—Á yehe cacuu da jicó túhún mé ndó.

Já naçachi inga tucu da já:

—Á a juú yehe cacuu da.

20 Anda já naçachi Jesús já:

—In táhan ndó da cúu uxu ivi, da in ndúu xíxi xihín i ini cohó i, da cán cúu da jicó túhún yehe.

21 Yehe cúu da naçindahá Ndióxi nduu ñayivi ta ndítahan nuú i quivi i tá ín cáchí túhún Ndióxi. Joo ndáhví nahá naçuu da jicó túhún yehe. Janda vaha chága ná a cacuu da, nduu —naçachi a.

22 Nani xíxi na ndúu na ñatiin Jesús pan já nandiquiahva ndixahvi nu Ndióxi. Tá nandihí naſahnda java ña ta naſahan ña nu ná já cáchí a já xihín ná:

—Júhun ndó jáchí ña yóho cúu tátuhun yiquí cuñu i —naçachi a.

23 Tá nandihí ñatiin a in vaso nu ñúhu tó uva já nandiquiahva ndixahvi nu Ndióxi. Ta naſahan mé á do nuú ña cán ta tá in tá in na naſihí na do.

24 Já naçachi a já xihín ná:

—Dó yóho cúu dó tátuhun nij i, dó cuíta sahá cuhá ñayivi. Tá ná cuíta nij i já candaa ini ndó ña najáxinu coo Ndióxi túhún a naſahan sanahá.

25 Mé a ndaa ná cahan i xihín ndo ña a cóho ga i tó uva janda quiahva ná xinu coo quiví coho tucu u inga dó vaha chága tá ná xinu quiví cacomí Ndióxi cuéntá sahá ñayivi —naçachi a.

Cáxi túhun Jesús ña chijehé túhun Pedro ña xini da mé á

(Mt. 26:30-35; Lc. 22:31-34; Jn. 13:36-38)

26 Tá nandihí naſita na in canto já naçaque na cuahan ña yucu yitó Olivo.

27 Anda já naçachi Jesús já xihín ná:

—Tóco ndihí ndó jándacoo ndó yehe ñuú viti jáchí já cáchí túhun Ndióxi já: “Cahní i da ndáá ndicachi ta xihín ña yóho ndicuíta nuu ndicachi jana dá cuhun ri”, cáchí túhun Ndióxi.

28 Joo tá nandihí nditacu tucu u ta já cuhun jihna ñúhu yehe estado Galilea anda já cuhun mé ndó —naçachi a.

29 Anda já naçachi Pedro já xihín Jesús:

—Vatí ná jándacoo ndihí na mé ndó joo a jándacoo toho i ndohó —naçachi da.

30 Anda já naçachi Jesús já xihín dá:

—Mé a ndaa ná cahan i xuhun mé ñuú viti tá cámaní cana ivi chele já chijehé túhún ña xínún yehe uní tañu —naçachi a.

31 Já naçasáhá ndúcú ndéé Pedro cahan da já cáchí da já:

—Vatí ná quivi i xihín ndo joo a chíjehé túhun toho i sahá ña xíní i mé ndó —naçachi da.

Ta mé quiahva já naçachi ndihí ña cán xihín á.

Tá xíca tahví Jesús tañu yitó olivo nani a Getsemani

(Mt. 26:36-46; Lc. 22:39-46)

32 Anda já naſinu ña cán in nuú nani Getsemani já naçachi Jesús já xihín ña xíca tuun xihín á:

—Yóho cacoo ndó nani ná cuhun i cáca caça tahví i nu Ndióxi —naçachi a.

33 Ta ndáca Pedro xihín Jacobo xihín Juan cuahan xihín á. Ta ndaja coo naçasáhá cacuéha ini a ta a juú quiahva táhvi ini a.

34 Já naçachi a já xihín ná:

—Cacuéha ndivaha ini i chí quivi i cúu ini i. Yóho candoo tóo ndó ta coto a cúju ndo —naçachi a.

35 Anda já naçaque Jesús cuahan chága chí nuú já naçaxítí a janda quiahva naſinu coo nuú á nu ñúhu cán. Já naſica tahví a nu Ndióxi ña ná caja mé á ña ná a ndóho a tá quiahva vaxi nu á ndoho a chí nuú.

36 Já cáchí a já xíca tahví a nu Ndióxi:

—Tátá Ndióxi, tóco ndihí ñaha cuu caja ndó. Chindeé ndó yehe ná a ndóho i ña ihvi ndivaha ña vaxi nuú i ndoho i. Joo ná coo tá ín cúni mé ndó ta ná a cóo toho ña cúni yehe —naçachi a.

³⁷ Anda já nandicó coo a nu ndúu na xíca tuun xihín á cán ta já nandiñehe á na quíji na ndúu na. Já nacasáhá cáchí a já xihín Pedro:

—Á quíji vún, Simón. Á coo nacu canditún ni in hora.

³⁸ Xíni ñúhú coo tiahva ndó ta caça tahví ndo nu Ndióxi já ná a cóto ndojó rí quini ndohó. Mé a ndaa ínima ñayivi cúní a ndinducú a Ndióxi joo yiquí cuñu na co ín tiahva caja ña cúní Ndióxi —nacachi a.

³⁹ Anda já naquee tucu a cuahan caça tahví a nu Ndióxi. Ta sa mé tuhun nacahan nu cuítí cán nacahan tucu a chí ivi.

⁴⁰ Ta tá nandicó coo a nandiñehe tucu a na xíca tuun xihín á cán ndúu na quíji na jáchi naquehe a mahnú na. Ta chí co xíni na ndá tuhun nducú ñehe na nu Jesús sahá ña quíji na.

⁴¹ Tá nandicó coo a táhndá uní já nacachi a já xihín ná:

—Vatí cúní ndó cuju ndo ta vatí cúní ndó ndiquehe ndée ndo joo a cúu caja ndó ña viti. Jáchi sa naxinu coo hora ndiquiahva na yehe, da nachindahá Ndióxi nduu ñayivi ndahá ñayivi cája cuachi.

⁴² Cuáhán ndacoo ndó ná cohó. Jáchi sa vaxi da jícó túhún yehe —nacachi a.

Tá natiin na Jesús

(Mt. 26:47-56; Lc. 22:47-53; Jn. 18:2-11)

⁴³ Ta nani cáhan yíi va Jesús cándichi a já naxinu Judas, da cúu in táhan da uxu ivi xíca tuun xihín Jesús cán. Ta xihín mé da cán vaxi cuahá ñayivi ñehe na machiti xihín yíto viti. Mé na vaxi cán cúu ná na vaxi cuénta na sacuahá nuú jutú xihín nuú na jánahá ley Moisés xihín nuú na sacuahá veñuhu.

⁴⁴ Ta mé Judas, da ndiquiahva mé á nuú na cán sa nacandoo da xihín na cán ña tatí yúhu dá sajóho Jesús jáchi nacachi da já xihín ná:

—Mé da ná tatí yuhú u sajóho, da cán cúu dá tiin ndó ta cató tuun ndó da cañehe ndó cuhún ndo —nacachi da.

⁴⁵ Ta tá naxinu da cán chí ivi laá nacayati da nu Jesús já cáchí da já xihín á:

—Maestro, maestro.

Já natatí yúhu dá sajóho a.

⁴⁶ Anda já natiin tuun na Jesús.

⁴⁷ Joo in táhan da xíca tuun xihín Jesús cán natavá da machiti da já nachitúhún dá in johó da cúu mozo da sacuahá nuú jutú cán.

⁴⁸ Anda já nacachi Jesús já xihín na naxinu tiin ñahá cán:

—Cája ndó xihín i tátuhun cája na xihín taa cuíhná jáchi naqueta ndó vaxi ndó tiin ndó yehe xihín machiti ta xihín yíto.

⁴⁹ Ndijáá ní quívi nasahín i tañu ndó jan ta najánañá i ndohó ini veñuhu cáhnu ta ni in tañu coo natiin ndó yehe. Joo tóco ndihi ña yáha yóho xíni ñúhú yaha ña já ná xinu coo nuú ña nacañi sahá i ini tuhun Ndióxi —nacachi a.

⁵⁰ Anda já naxinu ndihi na xíca tuun xihín Jesús cán cuahan na ta najándacoo na mé á.

Tá naxinu in datacú cuahan da

⁵¹ Joo in datacú catíví da in túhún jiní sávana ndíco da jatá na cán cuahan da ta natiin na da.

⁵² Joo najaní da mé dá ta nacandoo sávana da já naxinu lahla da cuahan da.

Nasacu na Jesús nuú nataca ndihi na sacuahá

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Anda já nasañehe na Jesús nasahan na nuú da cúu sacuahá chága nu ndihi jutú. Ta nandique táhan tóco ndihi na sacuahá nuú jutú xihín na sacuahá veñuhu xihín na jánahá ley Moisés.

⁵⁴ Ta nasandico xíca Pedro Jesús anda quiahva naxinu da yéhe vehe da cúu sacuahá chága nu ndihi jutú cán. Já nasacoo da xihín da ndáá veñuhu cáhnu cán xítúní da yati yávi núhu cán.

⁵⁵ Ta na sacuahá nuú jutú xihín tóco ndihi na cómí cuénta sahá na Israel nataca na cán ndúcú na cuachi jácana na jatá Jesús já cuu cahní ñahá na. Joo coo cuachi jíquí ná ñehe ná chínúu na jatá mé á.

⁵⁶ Ta cuahá ná nacasáhá cáhan na ña túhún saha Jesús joo co xínu tuhun cáhan na jáchi a cúu ndique táhan vaha tuhun na.

⁵⁷ Ta nandaca ndichi java da cáhan da tuhun jíquí saha Jesús já cáchí da já:

⁵⁸ —Naxini johó nde nacachi da jan já: “Jánditani i veñuhu cáhnu cán, ña nacavaha ñayivi ta tixi uní quívi jácandichi tucu u inga

ga ña a cuú cavaḥa ndahá ɬaa” —naçachi da.

⁵⁹ Joo ni já coó naçuu ndique táhan tuhun na xihín ña naçachi na cán.

⁶⁰ Anda já nandaca ndichi mé da cúu sacuaḥa chága nu ndíhi jutu tañu na cán já nandaca tuhún da Jesús já cáchi da já xihín á:

—Á chí a ndúcu ñehún tuhun nuú nde sahá cuachi jácojo na jatun —naçachi da.

⁶¹ Joo coó naçahan Jesús ni in tuhun xihín ná já táji níi já va nasahjin a. Mé da cúu sacuaḥa chága nu ndíhi jutu cán naçasáhá ndáca tuhún tucu da a já cáchi da já xihín á:

—Á jivi ndusa yóhó cúun Cristo, da cúu in túhún jiní já jahyi Ndióxi yii, mé da nachindahá Ndióxi cacomí cuéntá sahá ñayivi —naçachi da.

⁶² Anda já naçachi Jesús já:

—Ajan, jivi yehe cúu dá. Ta vaxi quivi tá cuni ndó yehe, da nachindahá Ndióxi nduu ñayivi cacoo i xoo cuáha Ndióxi, mé a iin cuaha ndée. Ta já cuni ndó yehe ndicó coo i ñuyiví yóho tañu vico tá ná quixi i chí indiví —naçachi a.

⁶³ Anda já nandatá da cúu sacuaḥa chága nu ndíhi jutu jáhma da ña ná candaa ini ñayivi ña xójo ini da. Já cáchi da já:

—Ndá chicuu chága yó ñayivi ndicani nu yo. Xihín ña naçahan da yóho cándaa ini ña ndája núu da Ndióxi.

⁶⁴ Á sa naxini johó ndó ña ndája núu da Ndióxi xihín tuhun naçahan da. Ndaja xíní ndó caji í xihín dá viti —naçachi da.

Anda já nandique táhan tuhun ndihi ñayivi ña ndácaan cuachi nu Jesús ña cán queá ndítahan quivi a.

⁶⁵ Java na naçasáhá na xihnu ndaa na tójií nu á ta java na nachicaji na jáhma nu á já naçasáhá cáni na jahnda nuu á já ndáca tuhún ñahá na já cáchi na já xihín á:

—Caḥan xihín nde yo naçani yohó viti —naçachi na.

Ta janda na ndáá veñuhu cáhnu cán viti naçasáhá cáni na jahnda nuu á.

Tá nachijehé tuhun Pedro ña xíní da Jesús (Mt. 26:69-75; Lc. 22:56-62; Jn. 18:15-18, 25-29)

⁶⁶ Ta ndaja coo Pedro iin yii dá xítuní da cán já naxinu in ña caji chúun xihín da cúu sacuaḥa chága nu ndíhi jutu.

⁶⁷ Já naxini ña xítuní Pedro ta nahá vaha nasandehé ña nu dá já cáchi ña já:

—Yóhó cúun táhan da xíca tuun xihín Jesús, da ñuu Nazaret —naçachi ña.

⁶⁸ Joo nachijehé tuhun da ña xíní da Jesús já cáchi da já:

—Uhun. Co xíní toho i da ta co xíní toho yehe ndá saha cáhun —cáchi Pedro.

Anda já naçayati da yuyehé ta ivi laá naçana chéle.

⁶⁹ Tá naxini mé ña caji chúun xihín da cúu sacuaḥa chága nu ndíhi jutu cán ña nasandichi too da yehé cán já naçasáhá ña cáxi tuhun ña xihín tóco ndihi ñayivi nduu cán já cáchi ña já:

—Candehé ndó. Da caji cúu in táhan da xíca tuun xihín Jesús —naçachi ña.

⁷⁰ Naçachi tucu Pedro ña co xíní da Jesús. Chá va nayaha ña yóho ta já naçachi na nduu xítuní cán xihín Pedro:

—Táhan ri da caji va cúu yóhó jáchi cúun da Galilea ta cáhun tátuhun cáhan na cán —naçachi na.

⁷¹ Anda já naçasáhá Pedro cánhá da ta natavá da quivi Ndióxi ña co xíní da Jesús já naçachi da já:

—Ni co xíní mí i ndá ɬaa cúu da jan, da cáhan ndó sahá jan —naçachi da.

⁷² Tá naçachi da já ivi laá naçana chéle ña chí ivi. Anda já nandicuhun ini Pedro ña naçachi Jesús xihín dá tá naçachi a já: “Tá cámaní cana ivi chéle sa chíjehé tuhún ña xínún yehe uní tañu.” Tá nandicuhun ini Pedro ña yóho já naçasáhá sácu ndivaha da.

15

Tá nandiquiahva na Jesús ndáha Pilato (Mt. 27:1-2, 11-14; Lc. 23:1-5; Jn. 18:28-38)

¹ Tá nativi inga quivi itaan já nandique táhan na sacuaḥa nuú jutu xihín na sacuaḥa veñuhu xihín na jánaha ley Moisés xihín ndihi na cómí cuéntá sahá na Israel. Já naçató na Jesús ñéhe na a cuahan na já nandiquiahva na mé á nu Pilato.

² Ta mé Pilato nandaca tuhún da Jesús já cáchi da já xihín á:

—Á mé a ndaa cúun in rey, da cómi cuénta sahá na Israel.

—Ajan. Jivi cúu u tá quiahva cáchi ndo jan —nacachi Jesús xihin dá.

³ Ta najácojo na sacuahá nuú jutú cán cuahá cuachi jata Jesús.

⁴ Já nandaca tuhún tucu Pilato Jesús já nacachi da já xihin á:

—Ndávaha co ndúcú ñehún tuhun nuú i. Candehé ndaja cuahá nuú cuachi jácojo na jatun —nacachi da.

⁵ Joo ni in tuhun coo nacahan Jesús. Tá naxini Pilato ña co ndúcú ñehe Jesús tuhun já nacatontó da sahá ña cája.

Sácú ini na saha Jesús ndaja caja na ña ná quivi a

(Mt. 27:15-31; Lc. 23:13-25; Jn. 18:38-19:16)

⁶ Tañu mé víco pascua nasahiin costumbre Pilato ña janí da in da ndacaan vecaa. Ndá da cúni ñayivi janí da, da cán cúu da janí da.

⁷ Ta ndaja coo mé já ndacaan in da naní Barrabás vecaa xihin java ga da naxica xihin dá. Ndacaan da vecaa sahá ña nasahní da ndii tá nandivaa ñayivi.

⁸ Chí naxinu ñayivi nu Pilato já nacasáhá na cahan na xihin dá ña ná caja da tá quiahva sá caja da.

⁹ Joo nandaca tuhún Pilato na já cáchi da já:

—Á co cúni ndó ña ná janí i da cúu rey nuú ñayivi Israel yóho —nacachi da.

¹⁰ Nacachi Pilato ña yóho jáchi xini da ña nandiquiahva na sacuahá nuú jutú cán Jesús nu da sahá ña cáhivi ini na xihin á.

¹¹ Joo na sacuahá nuú jutú cán nacasáhá na jándinihi na ñayivi ña ná cachi na xihin Pilato ña ná janí da Barrabás.

¹² Tá nandihí já nandaca tuhún Pilato na já nacachi da já xihin ná:

—Ndía cúni ndó caja i xihin da cáchi ndó cúu rey nu ndóhó, na Israel —nacachi da.

¹³ Anda já nanducú ñehe ñayivi cán tuhun nu Pilato já cáchi na já xihin dá:

—Cata caa ndó da ndica crúxu.

¹⁴ Já nacachi Pilato já xihin ná:

—Ndá cuachi nacaja da, vaha.

Joo ví ga ví cáyuhú cóhó na já cáchi na já:

—Cata caa ndó da ndica crúxu.

¹⁵ Ta sahá ña cúni Pilato candoo vaha da nuú ñayivi najaní da Barrabás. Ta tá nandihí najacaxáhan na Jesús já nandiquiahva da a ndáha na cuhun cata caa ñahá na ndica crúxu.

¹⁶ Anda já ñehe soldado Jesús cuahan na yuyehé vechúun cán. Já najánditaca soldado cán java ga táhan da.

¹⁷ Já nacinúu na in jahmá cuahá túun jata Jesús ta nacinúu na in tiyivi íñu jini á.

¹⁸ Tá nandihí já nacasáhá na cáyuhú na já cáchi na já:

—Cáhnu nahá ná cacuu yóhó, da cúu rey nuú na Israel —cáchi na sacú ndaa ñahá na.

¹⁹ Tá nandihí nacasáhá cáni na yiquí jini a xihin in ndoo ta nacasáhá na xihnu ndaa na tójií na nuú á já nacasáhá na cáxítí na nuú á ña cája na tátuhun cája cáhnu na a.

²⁰ Tá nandihí nasacu ndaa na a já natavá na jáhma cuahá túun ña nasanúu jata. Ta najándaca ndixi na a xihin jáhma mé á já nasañehe na a cuahan na cata caa na a ndica crúxu.

Tá nacata caa na Jesús ndica crúxu

(Mt. 27:32-44; Lc. 23:26-43; Jn. 19:17-27)

²¹ Tá ñehe na Jesús cuahan na cata caa na a ndica crúxu já nandique táhan na xihin in da vaxi da ndihvi da ñuu Jerusalén. Mé da cán naní da Simón, da ñuu Cirene, da cúu tátá Alejandro xihin Rufo. Já nacaja ndúsa ná xihin dá ña ná ndicojo da crúxu nuú cata caa na Jesús.

²² Já nasañehe na Jesús nasahan na in xiquí naní Gólgota. Tuhun yóho cúni cáchi a: nu ndúu lásá yiquí jini ndii.

²³ Cán nasahan na vino nu Jesús, dó nacava táhan xihin jusa ña naní mirra. Joo coo naxeen toho a coho a do.

²⁴ Anda já nacata caa na a ndica crúxu. Já nacasáhá soldado cán sáiquí da saha jáhma Jesús ta nacachi xihin táhan da ña ndá da ná quee vaha cuu quehe in in jáhma Jesús.

²⁵ Ta cúu á tátuhun caa in naha tá nacata caa na Jesús ndica crúxu cán.

²⁶ Ta jini ndica crúxu cán nacahyí na ndá sahá nacata caa na a ta já cáchi a já: “Da yóho cúu rey nuú na Israel.”

²⁷ Ta sa mé já nacata caa na ivi taa cuihná xihin Jesús: in da xoo cuaha ta in da xoo íti.

28 Ta xihín ña yóho naxinu coo tuhun Ndióxi tá cáchí a já: “Tañu ña quini nasacu na a.”

29 Chí cáva jini mé ñayivi yáha cán cáhahá na xihín á já cáchí na já:

—Candehé. Yóhó cáchún ña jánditanun veñuhu cáhnu cán ta tixi uní víxí quivi cáchún jácandichi tucún ña.

30 Jácaacu mún. Cuáhán nuu ndica crúxu jan —nacachi na sácu ndaa ichi na.

31 Ta quiahva já cája na sacuahá nuú jutu cán xihín na jánahá ley Moisés sácu ndaa ñahá na. Ta ñacasáhá cáhan xihín táhan na já cáchí na já:

—Nacuu nacaja Jesús jácaacu da java ga ñayivi joo viti a cuú jácaacu da mé dá.

32 Tá ta mé a ndaa cuú dá Cristo, da cuú rey nuú na Israel ná nuu da ndica crúxu viti ñuhú já ná candúsa nde da —cáchí na.

Ta janda da ivi táhan ndácaa ndica crúxu jini á cán cáhahá da xihín á.

Tá naxihi Jesús

(Mt. 27:45-56; Lc. 23:44-49; Jn. 19:28-30)

33 Tá naxinu coo caxivi ndaa nacanaa ní cuú ñuyivi ta janda caa uní sahini já ñacasáhá nandiyehé tucu.

34 Ta sa mé hora já nacayuhú cóhó Jesús já cáchí a já:

—Eloi, Eloi, lama sabactani —nacachi a. Tuhun yóho cuni cáchí a: Ndióxi mí j, Ndióxi mí j, ndávaaha najándacoo ndáha ndó yehe.

35 Ta java na ndíta cán naxini johó na tuhun cáchí a. Já nacachi na já:

—Cuni johó ndó jáchi cána da profeta Elías —nacachi na.

36 Anda já xínu in da nasahan da nachindaxi da in ticoto ini vino iyá. Já nacató da mé ticoto cán nuú in yitó ndoo já nachitivi da do yati yúhu Jesús ña ná coho a do. Já nacachi da já xihín java da cán:

—Cóho candehó á quixi Elías jánuu a da ndica crúxu —nacachi da.

37 Anda já nacayuhú cóhó Jesús já naxihi a.

38 Anda já nandata java ndaa jáhma ndeé ña sáji nuu nuú yíi ndivaha veñuhu cáhnu ñuu Jerusalén cán. Janda jini á ta janda sahá nandata.

39 Ta ndaja coo in dataa, da sáhdá chuun nuú soldado cuéntá Roma nasahiin da nu

ndácaa Jesús cán ta tá naxini da naxihi a já nacachi da já:

—Mé a ndaa táhyí cuú da yóho in túhún jini já jahyi Ndióxi —nacachi da.

40 Ta nasanduu java najihí ta sándehe xicá na Jesús. Tañu na yóho nasandacaan ñá naní María, ñá ñuu Magdala xihín María, ñá cuú náná Jacobo, da loho chá nuú José xihín in ñá naní Salomé.

41 Nasandico najihí yóho jata Jesús ta nachindeé ñahá na tá nasahiin a estado Galilea. Cuahá ga najihí nasanduu cán ta java na cuú ná na nasahan xihín á ñuu Jerusalén jihna tá cámani quivi a.

Tá najánduxu na Jesús

(Mt. 27:57-61; Lc. 23:50-56; Jn. 19:38-42)

42 Tá nacuaá too uun quivi viernexe tá cámani casaá quivi ndiquehe ndeé na Israel já nayaha tóco ndihi ña yóho.

43 Ta ndaja coo íin in da naní José, da ñuu Arimatea, da cuú táhan na cómi cuéntá sahá na Israel. Mé José yóho ndáti da casaá quivi cacomí Ndióxi cuéntá sahá ñayivi ñuyivi yóho. Ta nasahan ndeé ini da cuhun da cahan máni dá xihín Pilato sahá yiquí cuñu Jesús ña ná quiahva mé Pilato ña nu dá.

44 Chí nacatontó Pilato tá nacandaa ini da ña sa naxihi Jesús. Já nacana da da sáhdá chuun nuú soldado da já nandaca tuhún ñahá da á sa naxihi Jesús.

45 Tá nacaxi tuhun da cán nu Pilato ña sa naxihi Jesús já nasahan Pilato ñamaní nuú José ña ná ndiquehe da yiquí cuñu Jesús.

46 Anda já naxeen José in jahmá vaha ta najánuu da yiquí cuñu Jesús ndica crúxu já nachitivi da ña xihín mé jahmá vaha cán. Tá nandihí já nachicaan da mé yiquí cuñu Jesús cán ini in yávi ndácaan ndica cáva. Tá nandihí já nachijahvi da yuhú cáva cán xihín in yuu jáhdá cáhnu.

47 Ta ndaja coo María, ñá ñuu Magdala xihín María, náná José nasandehé na nuú nasacu na yiquí cuñu Jesús ini mé cáva cán.

16

Tá nanditacu tucu Jesús

(Mt. 28:1-10; Lc. 24:1-12; Jn. 20:1-10)

1 Ta tá sa nayaha quivi ndiquehe ndeé na já nasahan María, ñá ñuu Magdala xihín

María, ñá cúu náná Jacobo xihin Salomé viti ñaquee na cuahan na cueen na java nuú ñaha támi sáhan ña chindáá na yiquí cuñu Jesús.

² Ta naha chá mé quivi domingo tá ñaqueta candii já cuahan na nuú ñachicaan na yiquí cuñu Jesús cán.

³ Ta nani xica na cuahan na íchi cán já ndítuhún xihin táhan na ndá quiahva caja na tavá na yuu ndájí nuú ndácaan yiquí cuñu Jesús cán. Já cáchi na já:

—Yo tavá toho yuu ndájí nuu nuú quihvi ini nu ndácaan yiquí cuñu Jesús —cáchi xihin táhan na cásahan na jáchi cáhnu ndivaha mé yuu cán.

⁴ Joo tá ñaxinu na mé cáva cán já ñaxini na ña coó ga yuu ndájí yuhú cáva cán.

⁵ Ta tá ñandihvi na mé cáva cán já ñaxini na cáa íin in dáta ndíxí jahmá yaa ña cáni. Íin coo da xoo cuáha ta cúu dá da yúta. Tá ñaxini ñajihí yóho da cán chí ñayihvi na.

⁶ Anda já ñacahan da cán já cáchi da já:

—A yihvi toho ndó. Xíni yehe ña ndínducú ndo Jesús ña Nazaret, ña ñacata caa na ndica crúxu. Candehé ndo nuú ñasacu na a. Coó ga íin viti jáchi ñanditacu tucu a.

⁷ Ta viti cuáhán ndo caxi tuhun ndó xihín na ñaxica tuun xihín á ta xihín Pedro ña cánuú mé á cuahan estado Galilea. Tá cuhun ndó cán já cuni ndó a tá quiahva ñacachi mé á xihín ndo —ñacachi tátó Ndióxi.

⁸ Já ñaquee na cán xínu na cuahan na jáchi ñayihvi ndivaha na anda quíji ninu na. Coó ñacahan na xihín ni in ñayivi jáchi ñayihvi ndivaha na.

Tá ñaxini María, ñá ñuu Magdala Jesús (Jn. 20:11-18)

⁹ Tá ñandihvi ñanditacu tucu Jesús ta tá ñayivi mé quivi domingo já ñá nu cuítí ñaxini Jesús ñasacuu ñá María, ñá ñuu Magdala, mé ñá ñatavá Jesús usá rí quini ñasandacaan ini ñá.

¹⁰ Ta tá ñaxini ñá mé á já ñaquee ñá cuahan ñá caxi tuhun ñá nuú na ñaxica tuun xihín Jesús ña tácu a. Ta ndúu cuéha ini na ta sácu na ndúu na tá ñasaa ña.

¹¹ Ta ñacaxi tuhun ñá nu ná ña ñanditacu tucu Jesús ta ñaxini ñá mé á joo coó ñaxeen na candúsa na ña.

Tá ñaxini ivi da ñaxica tuun xihín Jesús mé á

(Lc. 24:13-35)

¹² Ta tá ñandihvi já ñandijama Jesús ndá quiahva cáa já ñandaca náha á nuú ivi táhan na cuahan yúcu, na ñaxica tuun xihín á.

¹³ Joo tá ñandicuni na mé á já ñaquee na cuahan na caxi tuhun na xihín na java cán joo coó ñaxeen na candúsa na tuhun ñacahan ndívi na yóho xihín ná.

Sáhdá Jesús chuun nuú na xica tuun xihín á

(Mt. 28:16-20; Lc. 24:36-49; Jn. 20:19-23)

¹⁴ Tá ñandihvi cán ñandaca náha Jesús nuú ndíhuxu in na ñaxica tuun xihín á nani ndúu na xíxi na. Já ñacasáha jánani a na jáchi ñandaja táhyí na ínima ná ta coó ñaxeen na candúsa na ña ñaxini na java cán Jesús tá ñandihvi ñanditacu tucu a.

¹⁵ Já ñacasáha cáchi Jesús já xihín ná:

—Cuáhán ndo ní cúu ñuyiví yóho ta caxi tuhun ndó xihín ndihvi ñayivi tuhun vaha sahá i.

¹⁶ Ta ndá na ná candúsa yehe ta candúta ná já queá cacu ndaa ínima ná ta a cühun na indayá. Joo na coó candúsa yehe, na cán cúu na cühun na ndoho ini na indayá anda ama cáa quivi.

¹⁷ Joo na cándeé ini yehe caja na ña xitúhún. Ta xihín quivi yehe tavá na ínima quini ndácaan ini ñayivi. Ta ndacahan na tuhun saá ña coó ñacatihva na.

¹⁸ Ta tá ná tiin ndáha ná coó ta tá ná coho na ña cúu cahní ñahá, a cáhni toho a na. Ta tá ná chinúu na ndáha ná jiní na quihvi já ndivaha mé na quihvi cán —ñacachi Jesús.

Tá ñandaa Jesús cuahan indiví

(Lc. 24:50-53)

¹⁹ Tá ñandihvi ñacahan Jesús, xitoho í tóco ndihvi tuhun yóho xihín ná anda já ñandindita cuahan indiví ta ñasaco a xoo cuáha Ndióxi, tátá yo.

²⁰ Tá ñandihvi já ñaquee na ñaxica tuun xihín á cán cuahan na caxi tuhun na tuhun vaha sahá Jesús ndijáá ñuu. Ta já ñachindeé Jesús, xitoho í na cán ta náha ña cúu á ña ndaa cáhan na jáchi ñacaja mé á ña cúu cája na cuhá nuú ña xitúhún. Já ná coo.

Tuhun vaha nacahyí Lucas sahá Jesucristo

Ndicani Lucas ndavaha nacahyí da tuhun yóho

¹ Sa xini vahún, Teófilo ña sa cuahá ñayivi ndúcú na cahyí na tá cáa tá ín ña nayaha tañu nde.

² Ta najánaha na nuú nde tóco ndihi ña naxini na janda mé saha. Mé na yóho cúu ná na naxica nuu nacahan na tuhun vaha saha Jesús nuú ñayivi.

³ Ta cuni ri yehe va cahyí i ña jáchi cuéé cuéé nandaca tuhún i ndaja cáa anda mé saha já ná cuu cahyí víi ndihi i ña nu mún, Teófilo, da quíhvi ndivaha ini i.

⁴ Jáchi cuni ña ná candaa vaha inún ndaja cáa ña ndaa ña najánaha na nuun.

Cáxi tuhun in tátō Ndióxi ña cacu Juan, da jácandúta ñayivi

⁵ Mé tiempo cán nasacuu Herodes rey nuú na Judea. Ta nasahin in da cúu jutú naní Zacarías. Ta nasacuu da cuéntá in táhnda jutú naní Abías. Ta ñájíhí da naní ña Elisabet, ña naquixi chichi Aarón, da nasacuu jutú sanahá.

⁶ Mé Zacarías yóho xihin ñájíhí da nasacuu na ñayivi naxica ndaa nu Ndióxi. Ta xihín ndinuhu ini na nacaja na ña sáhnda Ndióxi nuú tuhun mé á caja na. Ta ni in túhún toho ñayivi coó nacuu ñehe ini na cahán núu na saha ná.

⁷ Joo coó toho jahyi na nacacu jáchi coó nacuu canduu jahyi Elisabet cán. Ta mé tiempo já sa nacayatá ndivaha ndíví na.

⁸ Ta ndaja coo in quívi nanditahan nuú mé táhnda jutú xica xihin Zacarías cán caja chúun na cuéntá Ndióxi.

⁹ Tóco ndihi jutú cán nasajíquí na ndá da ná quee vaha ta da cán cacuu da quíhvi chiníhí ini veñuhu cáhnu ndacaan ñuu Jerusalén cán. Ta naquee vaha Zacarías.

¹⁰ Ta nani chiníhí Zacarías cán ini veñuhu já nanditútu ñayivi ndúu na yéhe ñuhu cán ndicahán na Ndióxi.

¹¹ Ta nani chiníhí Zacarías nu náa cán ndacaan da já nacanáha in tátō Ndióxi nu dá

cándichi a xoo cuáha nu náa nu chiníhí da cán.

¹² Tá naxini Zacarías tátō Ndióxi cán, nayíhvi ndivaha da ta ni co xini da ndíá caja da.

¹³ Joo nandicahan tátō Ndióxi cán xihin dá já nacachi a já:

—A yíhvi tohún, Zacarías jáchi sa naxini johó Ndióxi nuú naxica tahvún nu á. Saha ña cán queá caja mé á ña ná cacu in jahyi Elisabet, ñájíhún. Ta cacún quívi dá cananí da Juan.

¹⁴ A juú quiahva cavatún ta cajii inún caja ta loho jan tá ná cacu da. Ta cuahá ga java na cajii ini na caja da tá ná cacu da.

¹⁵ Jáchi da cáhnu cacuu jahyún jan nu Ndióxi. A cóho da ni in túhún toho dó xíhi ñayivi xini na xihin. Ta cacuu da in da jándicutú ndaa Ndióxi xihin ínimá yii mé á janda tá cámaní cacu da.

¹⁶ Ta mé jahyún jan caja da ña ná ndicó coo cuahá na Israel nu Ndióxi, xitoho na.

¹⁷ Ta jihna ñúhú mé Juan cuhun da caja tiahva da ñayivi janda ná quixi mé á chindahá Ndióxi. Tá quiahva nandicutú ndaa ínimá profeta Elías xihin ínimá yii Ndióxi quiahva já ndicutú ndaa ínimá Juan xihin á já ná coo ndéé dá caja da ñaha tátuhun nacaja Elías. Ta caja mé Juan ña ná ndique táhan máni ñayivi xihín jahyi na. Ta caja da ña ná coo johó ñayivi sáa ini já ná caja na ña cuni Ndióxi. Quiahva já caja da cacu tiahva da ñayivi janda quiahva ná xinu quívi quixi da nasahan Ndióxi tuhun a chindahá a —nacachi tátō Ndióxi cán xihin Zacarías.

¹⁸ Anda já nandaca tuhún Zacarías cán tátō Ndióxi já nacachi da já xihin á:

—Ndaja caja i candaa ini i á mé a ndaa táhyí coo tá ín cáhún coo jáchi sa nacayatá ndivaha i ta quiahva já nacayatá ri ñájíhí vi —nacachi Zacarías cán.

¹⁹ Anda já nanducú ñehe tátō Ndióxi cán tuhun nu dá já cáhí a já xihin dá:

—Yehe cúu Gabriel ta chuun Ndióxi xica nuu i cája i. Mé a cán nachindahá yehe ña ná quixi i caxi tuhun i ña yóho xuhun.

²⁰ Joo viti sahá ña coo nacandúsún ña nacachi i xuhun candoo níhun ña ná a cúu cahun janda quiahva ná xinu quívi cacu jahyún. Sa vaxi quívi coo tá ín nacachi i

xuhun coo —nācachi tátō Ndióxi cán xihin dá.

²¹ Joo ndaja coo ñayivi ndíta ndáti yéhe ñuhu cán sa nacasáhá ndíhi ini na sahá ña sa nācanahá ta coó Zacarías cán quéta jata véhe.

²² Joo tá naqueta Zacarías veñuhu coo nācuu cahan da ni in túhún tuhun xihin ná. Xihín ña yóho nācandaa ini na ña naxini da in ñaha nācāja Ndióxi nu náa yij mé á cán. Jandá ndáha uun da cúu nuú na cán jáchi nācandoo níhi dá.

²³ Ta tá sa najáxinu Zacarías quivi cája chúun da veñuhu cán já naquee da cuanúhu dá vehe da.

²⁴ Tá sa nayaha ña yóho já naquee jahyi Elisabet, ñájihí Zacarías cán. Ta tixi uhun yoo coó naquee ñá caca nuu ñá. Ta nācāhán ña:

²⁵ “Nācāja Ndióxi ña yóho xihín i viti já ná a cāndehé ndaa nahá ga ñayivi yehe”, nācāhán ña.

Cáxi tuhun tátō Ndióxi xihin María ña cacu Jesús

²⁶ Tá naxinu iñu yoo ñúhu jahyi Elisabet cán já nāchindahá Ndióxi mé Gabriel, tátō mé á in ñuu naní Nazaret ndácaan estado Galilea.

²⁷ Nāsaḥan tátō Ndióxi yóho Nazaret naxito nihni a in ñá tacú naní María, ñá nātiin tuhun in da naní José ña ná tandaha ñá xihin dá. Mé José yóho naquixi da chichi David, da nāacomí cuéntá sahá ñayivi Israel sanahá.

²⁸ Nāndihvi tátō Ndióxi cán nu ín ñá ta já nācachi a já xihin ña:

—Cāhan Ndióxi yehe xuhun, María jáchi cúun in ñá nañeḥe táhvi nu Ndióxi. Ín Ndióxi xuhun ta nācāja cuaha chága ñamaní xuhun a juú ga xihín java ga najihí —nācachi tátō Ndióxi cán xihin ña.

²⁹ Joo tá naxini María tátō Ndióxi cán já nācatóntó ña táa johó ñá ña cāhan mé a cán xihin ña. “Ta ndá cuéntá quéa cāhan tátō Ndióxi yóho já xihín yo”, nācāhán ña.

³⁰ Anda já nācachi tátō Ndióxi cán já xihin ña:

—A yíhvi tohún, María jáchi cúun in ñá nañeḥe táhvi nu Ndióxi.

³¹ Ta viti quee jahyún ta tá sa nācacu a já cacún quivi á ná cananí a Jesús.

³² Mé jahyún jan cacuu a taa cāhnu. Ta cachi ñayivi saha dá ña cacuu da in túhún jini já jahyi Ndióxi, mé á cāhnu nu ndíhi a. Ta mé Ndióxi, xitoho í caja ña ná cacomí jahyún cuéntá sahá ñayivi tá quiahva nāacomí David, da cúu tāsāhnu jícó da cuéntá sahá ñayivi.

³³ Quixi da cacomí da cuéntá sahá ñayivi Israel ta anda ama cāa quivi cacomí da cuéntá saha ná —nācachi tátō Ndióxi cán xihin María.

³⁴ Anda já nādaḥa tuhún María tátō Ndióxi cán já cáchi ña já xihin á:

—Ndaja coo cacu jahyi i ta ni in túhún toho taa coo ín xihín i —nācachi ñá xihin á.

³⁵ Anda já nāducú ñeḥe tátō Ndióxi cán tuhun nu ñá já cáchi a já:

—Ínima yij Ndióxi quéa quixi jándicutú yohó. Ta ndé Ndióxi, mé á cāhnu nu ndíhi a cán cava nuu a yohó tátuhun caja in vico. Sahá ña cán quéa tá ná cacu jahyún jan cacuu da in da yij nācaxi Ndióxi caja chúun nu mé á. Ta cachi ñayivi saha dá ña cúu dá in túhún jini já jahyi Ndióxi.

³⁶ Ta cáxi tuhun i xuhun ña cacu jahyi Elisabet, ñá cúu táhún cán vatí sa nācayata ña. Ta viti sa naxinu iñu yoo ñúhu jahyi ñá, mé ñá nācachi ñayivi saha ña a cúu coo jahyi ñá.

³⁷ Jáchi Ndióxi cuu caja tóco ndíhi ñaha —nācachi tátō Ndióxi cán xihin María.

³⁸ Anda já nācachi María já:

—Ndióxi cúu xitoho i ta ná caja mé á tá quiahva cúni a xihín i. Ná coo tá ín cáchi ndó coo.

Tá nāndihvi nācachi María cán ña yóho já naquee tátō Ndióxi cán cuahan.

Xíto nihni María Elisabet, ñá cúu táhan ñá

³⁹ Ta mé tañu quivi já já xínu María nāsaḥan ñá in ñuu ndácaan chí yucu cuéntá Judea cán.

⁴⁰ Ta tá naquihvi ñá vehe Zacarías, yij Elisabet cán já nācahan Ndióxi ñá xihin Elisabet.

⁴¹ Ta tá naxini johó Elisabet nācahan Ndióxi María xihin ñá chí nācandita ña loho ndácaan tixi Elisabet cán chí ivi laá nāndicutú ndaa ñá xihin ínima yij Ndióxi.

⁴² Anda já nācayuhú cóhó Elisabet já nācachi ñá já xihin María:

—Ni in túhún toho najihí coó ñacaja máni Ndióxi xihín tá quiahva ñacaja máni á yohó. Ta ñacaja yii mé á jahyún.

⁴³ Ta coó saha toho yehe ná quisún yóho, ñá cúu náná xitoho i coto nihnún yehe.

⁴⁴ Jáchi tá ñaxini johu uun i ña ñacahan Ndiósun xihín i ivi laá ñacanda jahyi i ini tixi i jáchi ñacajii íni a.

⁴⁵ Tahví ñacuún jáchi ñacandúsún ña ñacachi Ndióxi, xitoho í xuhun. Jáchi caja tá caja mé á ña ñacachi a caja —ñacachi Elisabet cán xihín María.

⁴⁶ Anda já ñacachi María já: Cája cáhnu i Ndióxi, xitoho í xihín ínima i.

⁴⁷ Ta cájii ndivaha ini i xihín ña cája Ndióxi, mé a jácacu yehe.

⁴⁸ Jáchi ñandicuhun ini a sahá yehe, ñá ndáhvi, ñá cúu in mozo mé á.

Ta cachi ñayivi ndúu viti xihín ña vaxi quivi canduu ñuyívi yóho ña ñacaja cuaha Ndióxi ñamaní xihín i.

⁴⁹ Jáchi mé Ndióxi, mé a cuu caja tóco ndihi ñaha ñacaja cuahá ña náhnu xihín i.

Ta yii ndivaha quivi mé á.

⁵⁰ Ta níi tiempo táhvi ini mé á saha tóco ndihi ñayivi, ña cája cáhnu mé á.

⁵¹ A juú quiahva náhnu ñaha ñacaja mé á. Nasahnu a nuú ña ndínehe jícó mé.

⁵² Ta ñacandaa mé á chuun ndahá ña náhnu ta najánuu ndáha mé á ña.

Ta ñandínehe jícó mé á ña najánuu ndáha mé ñuyívi yóho.

⁵³ Ta najándicutú ndaa mé á ñaha nuú ña ñandimaní ñaha cuxu.

Ta ñacandaa mé á ña ñasacomí ña cuicá já ñataxí a ña cán ná quee na cuhun ña.

⁵⁴ Náchindeé a ña Israel, ña cája chúun cuéntá mé á.

Ta coó ñandindójó a tahvi ini a saha ná.

⁵⁵ Jáchi quiahva já ñasahan mé á tuhun a caja anda ama cáa quivi xihín Abraham tá xihín tásahnu jícó yo, ña ñaquixi chichi mé dá, já ñacachi María cája cáhnu ñá Ndióxi.

⁵⁶ Ta ñacandoo María ñasahin ña vehe Elisabet tixi uní yoo. Anda já ñaquee ña cuanúhu ña vehe ña.

Tá ñacacu Juan, ña jácandúta ñayivi

⁵⁷ Tá ñandindaa quivi cacu jahyi Elisabet já ñacacu in ña loho.

⁵⁸ Ta tóco ndihi ñayivi ndúu yati xihín ña xihín ña cúu táhan ña ñasahan ña xito nihni na ña. Ta cájii íni ña jáchi ñacandaa ini na ña ñacaja Ndióxi cuahá ñamaní xihín ña.

⁵⁹ Ta tá ñaxinu ña loho cán uná quivi já ñasahan ña ñachicaan ña marca yiqui cuñu a tátuhun íni costumbre ña. Ta ñacahan ña cananí a Zacarías tá quiahva naní tátá a.

⁶⁰ Joo já ñacachi Elisabet já:

—A cananí toho da já. Juan va cananí ña ñacachi ña xihín ña cán.

⁶¹ Anda já ñacachi na cán já xihín ña:

—Ndá cuéntá quea cananí jahyún já ta ni in túhún toho ña vehún coó naní já.

⁶² Anda já ñacuu ndáha ná nu Zacarías cán ña ndáca tuhún ña ña ndaja coo cananí ña loho cán.

⁶³ Anda já ñaxica Zacarías cán in tutu nu ná ta já ñacahyí ña já: “Juan cananí ña.” Tá ñacahvi ña cán ña yóho já ñacatóntó ndihi na.

⁶⁴ Ta chí sa mé hora já ñandicahan tucu Zacarías. Já ñacasahá ña cája cáhnu da Ndióxi.

⁶⁵ Xihín tóco ndihi ña ñayaha yóho ñacatóntó ndihi ña ñasanduu yati xihín Zacarías cán. Ta níi cúu ñuu válí ñúhu chí yucu cuéntá Judea cán ñandicuita nuu tuhun saha tóco ndihi ña ñayaha yóho.

⁶⁶ Ta tóco ndihi ña ñaxini johu ña yóho ñacasahá ndícani ini na sahá. Já ñacasahá ndáca tuhún táhan na já cáchi xihín táhan na já:

—Ndá ña cacuu ña loho yóho tá ná cuahnu da.

Ñacachi na ña yóho jáchi ñaxini táhyí ña ñamaní náhnu cája Ndióxi xihín ña loho cán.

Cája cáhnu Zacarías Ndióxi

⁶⁷ Anda já ñandicutú ínima Zacarías, tátá Juan cán xihín ínima yii Ndióxi. Já ñacasahá ña cahan ña tuhun sahan Ndióxi nu dá cahan ña. Já ñacachi ña já:

⁶⁸ Cáhnu ná cacuu Ndióxi, mé a cúu xitoho ñayivi ñaquixi chichi Israel.

Jáchi ñaquixi a jácacu a mí, ña cúu cuéntá mé á.

⁶⁹ Náchindahá Ndióxi mé a jácacu mí ná a cuhun yó indayá.

Ta íni ndée a caja tóco ndihi ña náhnu.

Ta naquixi a chichi David, da nacaja chúun cuéntá Ndióxi sanahá.

70 Ta janda sanahá ndivaha nasahan Ndióxi tuhun a ña caja mé á ña yóho.

Ta já najáyaha na profeta cán tuhun nacahan Ndióxi nuú ñayivi.

71 Ña nacachi mé á quéa jácacu a mí ndahá na ihvi yo xihin ndaha na co cúmi mí.

72 Ta nacachi a tahvi ini a saha tásahnu jícó yo, na nasanduu sanahá cán.

Ta a ndíndójó toho mé á sahá tuhun yii nasahan nu ná jáchi ña yii cúu tóco ndihi tuhun sahan Ndióxi nuú ñayivi.

73 Ña yóho cúu tuhun nacachi Ndióxi jáxinu coo a nuu tá nasahan mé á tuhun a nu Abraham, da nasacuu tásahnu jícó yo cán.

74 Ta nacachi mé á xihin dá ña jácacu a mí ndahá na co cúmi mí já ná a cáyhvi yo caja chúun í cuéntá mé á.

75 Ta já ná cacuu ñayivi ndaa, na nandiquihva mé caja ña cúni mé á tóco ndihi quivi ndúu ñuyiví yóho, nacachi Zacarías nu ndíhi ñayivi cán.

76 Anda já nasahá da cahan da xihin ña loho jahyi da já cáchi da já xihin á:

Ta yóhó, jahyi a, cachi ñayivi sahun ña cúun in profeta Ndióxi, mé a cúu cahnú nu ndíhi a.

Ta jihna ñúhú cuhún jácahun ñayivi ña ná cacu tiahva na inima ná ndiquehe na mé a chindahá Ndióxi vaxi.

77 Ta xihin ña yóho cuu caxi tuhún xihin ñayivi ña cája cahnú ini Ndióxi sahá cuachi na.

Já ná cuu cacu ndaa inima ná ná a cuhun na indayá.

78 Sahá ña quíhvi ini Ndióxi mí ta sahá ña táhvi ini mé á saha yo sahá ña cán quéa janda indivi nu íin mé á nachindahá a in a cuu chindeé a mí ná ndihvi ichi saá cuéntá mé á.

79 Jáchi vaxi a jándiyehé a nuú ñayivi ndúu nuú naá ña ná caca na íchi nuú cuu coo vaha ini na xihin Ndióxi, nacachi Zacarías xihin jahyi loho da.

80 Já nasahá sáhnú taa loho cán cuahan da. Ta ndíndacú da xihin ñaha Ndióxi viti. Ta nasahin da yucú íchi nuú co ndúu cuahá ñayivi janda quiahva naxinu quivi nasahá jána da nuú na Israel.

2

Tá nacacu Jesús ñuu Belén

(Mt. 1:18-25)

1 Ta mé tiempo cán tá nasacomí Augusto cuéntá sahá ñayivi ndúu ñuyiví já nasahnda da chuun ña ná nditaca quivi ndaja tahan ñayivi cómi da cuéntá saha.

2 Ta mé tañu nu cuítí tá nanditaca quivi ná já nasacuu Cireneo gobernador estado Siria.

3 Ta tóco ndihi ñayivi nanditahan nu ná cuhun na tá ñuu tá ñuu nuú nacacu tásahnu jícó na ná quee quivi ná.

4 Sahá ña cán quéa naquee José ñuu Nazaret cuéntá Galilea cán já nasahan da ñuu Belén ña ndacaan estado Judea nuú nacacu David jáchi naquixi da chichi David.

5 Nasahan María xihin José ñuu Belén quee quivi ná. Mé María yóho cúu ña naxica da cacuu ñajíhi da. Ta sa já ñúhu jahyi ña cuahan ña ñuu Belén.

6 Ta nani nasanduu na ñuu Belén cán naxinu quivi cacu jahyi María.

7 Ta nacacu jahyi nuú ña. Ta nachitiví ña a ticoto já nachindúhu ña a nu xixáhan quítí cán. Mé nu sánduu quítí cán nacacu jahyi María jáchi coo nañehé ná vehe canduu na jáchi sa nacatáñu va vehe nuú canduu ñayivi xinu coo ñuu Belén cán.

Cáxi tuhun tátó Ndióxi xihin na ndaa ndicachi ña nacacu Jesús

8 Nasanduu java na ndaa ndicachi jana ná ñuu yati ñuu Belén cán.

9 Ta in naá cuítí nanaha tátó Ndióxi mé á nu ná. Ta chí nandiyihvi ndaa nu ndúu na cán nacaja Ndióxi ta nayihvi ndivaha na.

10 Joo nandicahan tátó Ndióxi cán xihin ná já nacachi a já:

—A yíhvi toho ndó jáchi tuhun vaha quéa ñehé e vaxi i cahan i xihin ndo. Ta xihin ña yóho cajii ndivaha ini tóco ndihi ñayivi.

11 Jáchi mé quivi viti nacacu in a jácacu a ndohó nuú cuachi ndó ta mé á cán cúu Cristo, xitoho ndó, ña nachindahá Ndióxi cacomí a cuéntá saha ndo. Ta nacacu a ñuu Belén nuú nacacu David sanahá.

12 Tá ná cuhun ndo cán já cuni ndó ña loho cán catíví a ticoto cándúhu á nu xixáhan quítí. Tá ná cuni ndó ña yóho já candaa ini

ndó ña cáhan i ña ndaa xihín ndo —ñacachi táto Ndióxi xihín na ndáá ndicachi cán.

¹³ Ta nani cáhan táto Ndióxi cán naxinu coo cuaha chága táto Ndióxi nu íin a cán. Mé táto Ndióxi yóho naquixi na indivi ta cája cáhnu na Ndióxi já cáhí na já:

¹⁴ Cáhnu ná cacuu Ndióxi íin indivi.

Ta ná coo vaha ini tóco ndihi ñayivi ndúu ñuyiví, mé na cáji ini xihín ñamani cája Ndióxi xihín ná, ñacachi táto Ndióxi cán.

¹⁵ Ta tá sa nandicó coo táto Ndióxi cán cuahan chí indivi já ñacasáhá cáhí xihín táhan na ndáá ndicachi cán já:

—Cóho quí yó ñuu Belén candehé yó ña ñacachi Ndióxi, xitoho í xoho ña ñacuu ñuu Belén cán.

¹⁶ Já xínu na nasahan na ta tá naxinu coo na cán já nandiñehé ná María xihín José xihín mé ña loho cándúhu nu xíxáhan quíti cán.

¹⁷ Anda já ñacasáhá nandicani na ndáá ndicachi cán nu ná ña ñacachi táto Ndióxi xihín ná sahá ña loho cán.

¹⁸ Ta chí catóntó tóco ndihi ñayivi tá xíni johó na ña ndícani na ndáá ndicachi cán nu ná.

¹⁹ Joo nandicuhun ini María tóco ndihi ña nayaha ta ndícani ini ñá sahá.

²⁰ Tá nandihí já ñaquee na ndáá ndicachi cán cuahan na. Ta a juú quiahva cája cáhnu na Ndióxi cuahan na saha tóco ndihi ña naxini johó na xihín saha tóco ndihi ña naxini na jáchi nasahin tá íin ñacachi táto Ndióxi cán xihín ná.

Tá ñéhe na lée loho Jesús cuahan na ndiquiahva na cuénta saha mé á veñuhu cáhnu ñuu Jerusalén

²¹ Tá nayaha una quivi ñacacu lée jahyi María cán já nachicaan na marca yiquí cuñu a tá quiahva íin costumbre na. Ta nasacu na quivi á cananí a Jesús jáchi quiahva já ñacachi táto Ndióxi cán xihín María ña ndítahan cananí a janda tá cámani cañuhu jahyi ñá.

²² Ta nu ley Moisés, ña ñachiyí da sanahá cáhí a ña tá ná ndihi ñacacu jahyi in ñáñáha, a cúu quihvi ña veñuhu anda ná yaha sáhdá ley quivi. Ta tá sa nayaha quivi cán já ñaquehe María xihín José mé lée loho Jesús cán. Já ñéhe na ña cuahan

na ndiquiahva na cuénta sahá nu Ndióxi veñuhu cáhnu ñuu Jerusalén cán.

²³ Ñacaja na ña yóho jáchi já cáhí ley nasahnda Ndióxi sanahá: “Tóco ndihi taa valí, na cúu jahyi nuú najihí, ndítahan ndiquiahva na ña nu Ndióxi.”

²⁴ Ta jári najoco na ña sáhdá ley Moisés coo tá nandihí ñacacu jahyi na. Ta ña yóho cúu ívi ndiyuu á ívi ndijata.

²⁵ Ta ndaja coo mé tiempo cán nasahin in dataa naní Simeón ñuu Jerusalén cán. Ta nasacuu da in taa vaha ndivaha, da cája cáhnu Ndióxi. Ta ndáti da xinu coo quivi chindahá Ndióxi in da chindeé na Israel já ná a ndóho ga ini na. Ta nandicutú ndaa ínimá dá xihín ínimá yíi Ndióxi.

²⁶ Ta mé a cán quéa ñacachi xihín dá ña a quiví toho da janda quiahva ná cuni táhyí da Cristo, mé a nasahan Ndióxi tuhun a chindahá a.

²⁷ Ta mé ínimá yíi Ndióxi ndáca Simeón cuahan da veñuhu mé quivi naxinu María xihín José cán caja na xihín Jesús tá quiahva sáhdá ley Moisés caja na.

²⁸ Tá nandique táhan da xihín ná já natiin da Jesús já nasañehe ndaa da a. Já ñacasáhá da cája cáhnu da Ndióxi já cáhí da já:

²⁹ Tátá Ndióxi, sa cuu quiahva ndó ñamani quivi yaa í viti,

jáchi sa najáxinu coo ndó nuú tuhun ndó, ña nasahan ndó nuú yehe, da cúu mozo ndo.

³⁰ Jáchi naxini í xihín nuú í mé a nachindahá ndó jácacu ndehé.

³¹ Nasacu ndó a ña ná jácacu a ndaja táhan ñayivi.

³² Mé a yóho jándiyehé a nuú na coo naquixi chichi Israel.

Ta saha mé a yóho cahan vaha ñayivi sahá na Israel, na cúu cuénta mé ndo, ñacachi Simeón.

³³ Chí ñacatóntó José xihín María táa johó na ña cáhan Simeón saha Jesús.

³⁴ Tá nandihí naxica tahví Simeón nu Ndióxi saha ná anda já ñacasáhá cáhí da já xihín María, náná Jesús:

—Ñacaxi Ndióxi taa loho yóho ña ná caja da ná cuhun cuahá na Israel ndoho ini na ta caja da ña ná cacu ínimá cuahá na cán. Naquixi da nu Ndióxi joo candají cuaha ná da

³⁵ Já náha táhyí ña cáhvi ini in in na cán. Ta yóhó, María tahvi ndivaha inún sahá ña yóhó ta cacuu a tátuhun tuxú na machiti ínimun —nācachi Simeón xihin María.

³⁶ Ta mé cán nāsahjin ri in ña naní Ana, ña jáyaha tuhun cáhan Ndióxi nuú ñayivi. Ta nāsacuu ña jahyi da naní Fanuel, da naquixi chichi Aser. Mé Ana yóhó nācayatá ña. Tá yúta ña nātandaha ña joo usa laá cuia nāsahjin ña xihin yí ña já naxihí da.

³⁷ Ta viti sa naxinu comi jícó comi cuia íin cuān ña. Nuú ta ndiví íin tuun ña veñuhu cája cáhnu ña Ndióxi. Xíjuhun ña ta xíca tahví ña nu mé á.

³⁸ Mé hora íin Simeón ndítuhún da xihin María já naxinu coo Ana cán. Ta tá nandihí nandiquiahva ña ndixahvi nu Ndióxi já nācasáhá cáhan ña sahá ña loho Jesús cán nuú ñayivi, na ndáti quixi quiví chindahá Ndióxi da chindeé na ñuu Jerusalén. Ta cáhí ña ña jivi mé Jesús cán quēa ndáti na quixi.

Tá nandicó coo na ñuu Nazaret

³⁹ Tá nandihí nācāja José xihin María ña sáhndá ley Moisés cája na cán já cuanúhu na ñuu Nazaret, ña ndácaan estado Galilea cán.

⁴⁰ Ta mé taa loho Jesús sáhnu da ta ndíndacú da. Ta johó ndíndichí ga ví jini dá cuahan da. Ta cuahá ndivaha ñamaní cája Ndióxi xihin dá.

Ndácaan Jesús veñuhu cáhnu ñuu Jerusalén

⁴¹ Tá nu cuia sáhan náná tátá Jesús víco pascua ñuu Jerusalén.

⁴² Ta tá naxinu Jesús uxu ivi cuia já ndáca táhan mé á xihin ná tá cuahan na víco ñuu Jerusalén cán jáchi já nāsahjin costumbre ñayivi cája na tañu víco cán.

⁴³ Ta tá sa nayaha víco cán já nandicó coo José xihin María cuahan na. Joo coo naxini na ña nācandoo Jesús ñuu Jerusalén cán.

⁴⁴ Tañu ñayivi cuaha cán cátahan da vaxi da, nācáhan na. Ta tá sa naxinu ní in quiví xíca na cuahan na já nācasáhá ndínducú na da tañu ñayivi cúu táhan na xihín tañu na xíní táhan xihín ná.

⁴⁵ Joo coo nandihēhe ná da. Anda já nandicó coo tucu na ñuu Jerusalén ndínducú na da.

⁴⁶ Janda quiví uní ví já nandihēhe ná Jesús ini veñuhu cáhnu cán. Cáa íin coo da tañu na jánaħa ley Moisés cán. Táa johó da nu cáhan na ta ndáca tuhún da na sahá java ga ñaha.

⁴⁷ Ta chí catóntó tóco ndihí ñayivi tá xini johó na tuhun ndúcu ñehe da nuú na jánaħa ley Moisés cán jáchi náha ña ndíchí jini dá.

⁴⁸ Tá naxini María xihin José ña ndácaan Jesús tañu na jánaħa ley Moisés cán já nācatóntó na. Anda já nācachi María já xihin Jesús:

—Jahyi maní i. Ndá cuéntá quēa nācájún ña yóhó xihín nde. Yehe xihín tátún a juú quiahva ndícani ini nde xíca nuu nde ndínducú nde yohó —nācachi María xihin Jesús.

⁴⁹ Anda já nācachi Jesús já:

—Ndá cuéntá quēa ndínducú ndó yehe. Á co xini toho ndó ña ndítahan ndihí ini i cája i chuun nāsahnda tátá i, mé á íin indiví nuú i cája i, vaha —nācachi Jesús xihín ná.

⁵⁰ Joo ni María ni José coo nācandaa ini na ña nācachi Jesús cán xihín ná.

⁵¹ Anda já nandicó coo Jesús cuahan xihín ná ñuu Nazaret. Ta nācāja da tóco ndihí ña cúni na. Ta nandicuhun ini María ña nācāja Jesús ini veñuhu cáhnu cán.

⁵² Ta sáhnu Jesús ta cátaçu ini da cuahan. Ta cájii ini Ndióxi xihín ña cája Jesús. Ta quiahva já cájii ri ini ñayivi va xihín ña cája da.

3

Cásáhá Juan cáhan da tuhun Ndióxi xihín ñayivi yucú íchí cán

(Mt. 3:1-12; Mr. 1:1-8; Jn. 1:19-28)

¹ Tá naxinu sahun cuia cómi Tiberio cuéntá sahá ñayivi ñuyiví já nāsacuu Poncio Pilato gobernador nuú na ndúu estado Judea. Ta da naní Herodes nāsacuu gobernador nuú na ndúu estado Galilea. Ta ñani Herodes, da naní Felipe cán nāsacuu gobernador nuú na ndúu Iturea xihín nuú na ndúu Traconite. Ta da naní Lisánias nāsacuu gobernador nuú na ndúu Abilinia.

² Ta Anás xihín Caifás nāsacuu da sacuaħa nu ndíhi jutú. Mé tiempo cán nācahan Ndióxi xihín Juan, da cúu jahyi Zacarías, mé nu íin da yucú íchí cán.

³ Anda já nayaha Juan ndíjää ñuu válí ñúhu yuhú yuta Jordán cán. Ta cáxi tuhun da nuú ñayivi ña ndítahan nu ná jándacoo na ña núu cája na já ná caja cáhnu ini Ndióxi sahá cuachi na ta já ná candúta ná.

⁴ Tóco ndihi ña yóho nayaha tá íin nacachi Isaías tá nacahyí da sanahá:

Vaxi quivi tá cahan cóhó in da tañu yúcu íchí ta cachi da já:

“Caja tiaha ndó íchí nuú quixi xitoho í, ta cuná ndó in ichí ndacú nu mé á ña ná ndihvi a ínimá ndo.

⁵ Tóco ndihi ña cúu táhvi ná ndicutú ndihi a.

Tóco ndihi yúcu xihín xiqui ná ndicava ndaa ndihi a.

Tóco ndihi ichí ndicava ná ndindacú ndihi a.

Ta íchí ña co íin ndaa nu ndindaa ndihi nu á.

⁶ Ta tóco ndihi ñayivi ndúu ñuyiví cuni na ndá quiahva jácaçu Ndióxi ñayivi”, já cáchí tutu nacahyí Isaías sanahá ndivaha.

⁷ Ta nacasáhá ñayivi ndái cuu na nu íin Juan ña ná jácandúta da na joo nacasáhá xójo ndivaha ini da xihín ná já cáchí da já:

—Mé ndó cúu ndó tátuhun coo jáchí cúu ndó na quini. Cáhán ndo ña a jándoho ga Ndióxi ini ndó sahá cuachi ndó tá ná candúta ndo vatí cája tá cája ndó cuachi.

⁸ Xíní ñúhú caja ndó ña vaha já ná cuni ñayivi ña mé a ndaa táhyí najándicoo ndó ña núu nasacaja ndó jihna. Ta a cáhán ndo ña jácaçu Ndióxi ndohó sahá ña cúu ndó na naquixi chichi Abraham. Jáchí coo saha toho ña jan nu Ndióxi tá co jándacoo ndó cuachi ndó. Jáchí mé a ndaa ná cahan i xihín ndó ña janda yuu ndúu nu ñúhu jan cuu caja Ndióxi ña ná nduu a ñayivi quixi chichi Abraham.

⁹ Mé ndó cúu ndó tátuhun in yíto, dó sa natiin na hacha cuahan na cahnda na. Ta tóco ndihi yíto, dó co sahan cuihi vaha nuu, tahnda do ta quee dó nu ñúhu cayi do. Quiahva já caja rí Ndióxi xihín ndóhó tá co cuni ndó ndicó coo ini ndó nu mé á — nacachi Juan xihín ñayivi cán.

¹⁰ Anda já nacasáhá ñayivi cán ndaca tuhún na da já cáchí na já xihín dá:

—Ndía ndítahan nuú nde caja nde.

¹¹ Já cáchí Juan já xihín ná:

—Ndá na ndúu ivi cotó ná quiahva na in a nuú na coó ñaha nuu. Ta ndá na íin ña cuxu ná cahnda java táhan na ña xihín na coó a nuu —cáchí Juan xihín na cán.

¹² Tañu na nandai cuu cán naxinu ri java da játaca jihún cuéntá impuesto ña candúta dá. Ta nandaca tuhún da Juan já nacachi da já:

—Maestro, ndía ndítahan nuú nde caja nde.

¹³ Anda já nacachi Juan já xihín dá:

—Quehe ndó jihún nuú ñayivi tá quiahva sáhdá ley cuití va quehe ndó — nacachi Juan xihín da cán.

¹⁴ Ta jári java da cúu soldado nandaca tuhún da Juan já nacachi da já:

—Ta ndehe ri ndía ndítahan caja nde.

Já nacachi Juan já xihín dá:

—A cándaa ndó ña cómí ñayivi. A jáyihví ndó na sahá ña ná quiahva na ñaha nu ndo. Ta ni a jácojo ndó cuachi jata ná tá coo nacaja na ña. Ta xíní ñúhú coo vaha ini ndó xihín yahvi quehe ndó sahá chuun cája ndó —nacachi Juan xihín da cán.

¹⁵ Tóco ndihi ñayivi ndíhi ini na jáchí cuni na candaa ini na ña á mé Juan cúu Cristo, da nachindahá Ndióxi cacomí cuéntá sahá ñayivi.

¹⁶ Joo nandicahan Juan xihín tóco ndihi ñayivi já nacachi da já xihín ná:

—Mé a ndaa cája ndúta i ndohó xihín ticuú. Joo vaxi inga da ta da cán cúu da jándicutú ínimá ndo xihín ínimá yí Ndióxi ta ña cán cacuu a tátuhun ñúhu cáyi. Ta da cán íin cuaha chága ndée dá a juú ga yehe. Ta chí coo sahá i ndica xítí i nu dá ña ndaxí i correa ndusa dá.

¹⁷ Mé da vaxi cán caxi da ñayivi vaha tañu ñayivi quini. Cúu á tátuhun in dataa tá jáxixi da trigo xihín pala já ná quee xehe á já cacu vaha da ña. Ta xehe nacana cán cuhun a cayi a xihín ñúhu ita ña a ndáhva toho —nacachi Juan.

¹⁸ Quiahva johó nacahan Juan nuú ñayivi tá nacaxi tuhun da tuhun vaha nu ná. Ta cuahá java ga ñaha cahan da xihín ná caja na.

¹⁹ Inga ñaha nacaja da quea najánani da Herodes, da cúu gobernador jáchí nasahin Herodes xihín Herodías, ña cúu ñájíhí ñani

da, Felipe. Ta najánani Juan da sahá java ga ña núu ñacaja da.

²⁰ Joo ñacaja jóhó Herodes mé dá ta coó ñaxeen da coo johó da nu cáhan Juan xihín dá. Ña ñacaja da quéa ñacaja chága da ña núu tá ñachicaan da Juan vecaa.

Tá ñacandúta Jesús

(Mt. 3:13-17; Mr. 1:9-11)

²¹ Tá cámaní ndácaan Juan vecaa, cája ndúta dá ñayivi ta já najácandúta ri da Jesús. Ta nani xíca tahví Jesús nu Ndióxi já ñanuna indiví.

²² Ta ñanuu ínimá yíi Ndióxi jata Jesús. Ta ñasacaa ínimá yíi Ndióxi yóho tá quiahva cáa in ndijata. Tá ñandihí já ñaxini johó na ña cáhan in a indiví já ñacachi a já:

—Yóhó cúun jahyi maní i ta cájii ndivaha ini i xuhun —ñacachi a.

Ña yóho cúu quiví ña ñasacuu tásáhnu jícó Jesús

(Mt. 1:1-17)

²³ Ñasandacaan Jesús tátuhun oco uxu cuiá tá ñacasáhá jánaḥa tuhun Ndióxi nuú ñayivi. Ta ñacahán ñayivi ña ñasacuu a jahyi José. Ta José cán ñasacuu da jahyi Elí,

²⁴ ta tátá Elí ñasanani Matat. Ta tátá Matat ñasanani Leví. Ta tátá Leví ñasanani Melqui. Ta tátá Melqui ñasanani Jana. Ta tátá Jana ñasanani José.

²⁵ Ta tátá José ñasanani Matatías. Ta tátá Matatías ñasanani Amós. Ta tátá Amós ñasanani Nahum. Ta tátá Nahum ñasanani Esli. Ta tátá Esli ñasanani Nagai.

²⁶ Ta tátá Nagai ñasanani Maat. Ta tátá Maat ñasanani Matatías. Ta tátá Matatías ñasanani Semei. Ta tátá Semei ñasanani José. Ta tátá José ñasanani Judá.

²⁷ Ta tátá Judá ñasanani Joana. Ta tátá Joana ñasanani Resa. Ta tátá Resa ñasanani Zorababel. Ta tátá Zorababel ñasanani Salatiel. Ta tátá Salatiel ñasanani Neri.

²⁸ Ta tátá Neri ñasanani Melqui. Ta tátá Melqui ñasanani Adi. Ta tátá Adi ñasanani Cosam. Ta tátá Cosam ñasanani Elmodam. Ta tátá Elmodam ñasanani Er.

²⁹ Ta tátá Er ñasanani Josué. Ta tátá Josué ñasanani Eliezer. Ta tátá Eliezer ñasanani Jorim. Ta tátá Jorim ñasanani Matat.

³⁰ Ta tátá Matat ñasanani Leví. Ta tátá Leví ñasanani Simeón. Ta tátá Simeón ñasanani Judá. Ta tátá Judá ñasanani José. Ta tátá José ñasanani Jonán. Ta tátá Jonán ñasanani Eliaquim.

³¹ Ta tátá Eliaquim ñasanani Melea. Ta tátá Melea ñasanani Mainán. Ta tátá Mainán ñasanani Matata. Ta tátá Matata ñasanani Natán.

³² Ta tátá Natán ñasanani David. Ta tátá David ñasanani Isaí. Ta tátá Isaí ñasanani Obed. Ta tátá Obed ñasanani Booz. Ta tátá Booz ñasanani Salmón. Ta tátá Salmón ñasanani Naasón.

³³ Ta tátá Naasón ñasanani Aminadab. Ta tátá Aminadab ñasanani Aram. Ta tátá Aram ñasanani Esrom. Ta tátá Esrom ñasanani Fares. Ta tátá Fares ñasanani Judá.

³⁴ Ta tátá Judá ñasanani Jacob. Ta tátá Jacob ñasanani Isaac. Ta tátá Isaac ñasanani Abraham. Ta tátá Abraham ñasanani Taré. Ta tátá Taré ñasanani Nacor.

³⁵ Ta tátá Nacor ñasanani Serug. Ta tátá Serug ñasanani Ragau. Ta tátá Ragau ñasanani Peleg. Ta tátá Peleg ñasanani Heber. Ta tátá Heber ñasanani Sala.

³⁶ Ta tátá Sala ñasanani Cainán. Ta tátá Cainán ñasanani Arfaxad. Ta tátá Arfaxad ñasanani Sem. Ta tátá Sem ñasanani Noé. Ta tátá Noé ñasanani Lamec.

³⁷ Ta tátá Lamec ñasanani Matusalén. Ta tátá Matusalén ñasanani Enoc. Ta tátá Enoc ñasanani Jared. Ta tátá Jared ñasanani Mahalaleel. Ta tátá Mahalaleel ñasanani Cainán.

³⁸ Ta tátá Cainán ñasanani Enós. Ta tátá Enós ñasanani Set. Ta tátá Set ñasanani Adán. Ta Ndióxi ñacavaha Adán.

4

Xíto ndojó tiñáhá sacuaḥa Jesús

(Mt. 4:1-11; Mr. 1:12-13)

¹ Tá ñandihí cán ñaquee Jesús yuta Jordán. Ta ñandicutú ndaa ínimá mé á xihín ínimá yíi Ndióxi ta mé a cán ñasandaca Jesús ñasahan yucú íchí nuú co ndúu ñayivi.

² Ta cán ñasahíin Jesús tixi ivi jico quiví ta ñaxito ndojó tiñáhá sacuaḥa mé á. Ta tóco ndihí quiví cán coó ñaxixi a ta tá ñandihí já ñacasáhá cuíco a.

³ Anda já nacachi tiñáhá sacuahá cán já xihín á:

—Tá ta jivi ndusa jahyi Ndióxi cúún, cahnda chuun ña ná nduu yuu yóho pan.

⁴ Anda já nanducú ñehe Jesús tuhun nu ri já nacachi a já:

—Já cáchi tuhun Ndióxi: “A juú pan cuití cuxu ñayivi já catacu na, vaha. Xíní ñúhú caja ri na ña sáhdá tuhun Ndióxi nu ná já quéa ná cuu catacu na nu Ndióxi”, —nacachi Jesús xihín rí cán.

⁵ Tá nandihí já ndáca tiñáhá sacuahá cán Jesús nasahan rí in jiní yucú jícó xihín á já nanaha rí tóco ndihí ñuu ndúu ñuyíví nu á in tóo loho joho.

⁶ Anda já nacachi rí já xihín á:

—Candehé ndaja náhnu cúú ñuu ndúu ñuyíví ta yehe sáhdá i chuun nuú ndaja táhan ña ta cuu jasá i ña nu yóhó jáchi cuu jasá i ña yo nu cúni mí i jasá i ña.

⁷ Ta quiahva i ña nuun tá ná caxítún nuú i caja cáhnún yehe —nacachi rí xihín á.

⁸ Joo nanducú ñehe Jesús tuhun nu ri já cáchi a já:

—Satanás, cuáhán caxoo jáchi já cáchi tuhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nuu” —nacachi Jesús xihín tiñáhá sacuahá cán.

⁹ Tá nandihí já ndáca tucu tiñáhá sacuahá cán Jesús nasahan rí ñuu Jerusalén xihín á. Ta najánda rí a nu jícó jiní veñuhu cáhnu ndácaan cán já nacachi rí já xihín á:

—Tá ta jivi ndusa jahyi Ndióxi cúún jácana mún chí ninu.

¹⁰ Jáchi nuú tuhun Ndióxi ndáa in tuhun ña cáchi a já:

Cahnda Ndióxi chuun nu tátó mé á ña ná candaa na yohó.

¹¹ Ta ndiñehe ndáha ná yohó já quéa ná a ndícuhe sahún tá ná cachihin sahún xihín yuu, cáchi tuhun Ndióxi —nacachi rí xihín Jesús.

¹² Anda já nanducú ñehe Jesús tuhun nu ri já cáchi a já:

—Ín inga tucu nuú nacahyi tuhun Ndióxi ta cáchi a já: “A cóto ndojó tohún Ndióxi, xitohún” —nacachi Jesús xihín rí cán.

¹³ Ña cán quéa naquee xóo tóo tiñáhá sacuahá nu Jesús ta naquee rí cuahan ri

jáchi coo nañehe íní ri ndá quiahva coto ndojó chága rí a.

Tá nacasáhá cáxi tuhun Jesús tuhun Ndióxi nuú na estado Galilea (Mt. 4:12-17; Mr. 1:14-15)

¹⁴ Ta ndaja coo nandicó coo Jesús estado Galilea. Ta ín cuahá ndée a jáchi nandicutú ndaa ínima mé á xihín ínima yii Ndióxi. Ta ndijáá ñayivi ndúu cán nacasáhá na cáhan na saha mé á.

¹⁵ Ta nacasáhá a jánaha tuhun Ndióxi nuú ñayivi ini veñuhu in in ñuu na. Ta tóco ndihí na cáhan vaha na sahá ña cája mé á.

Tá nasahin Jesús ñuu Nazaret (Mt. 13:53-58; Mr. 6:1-6)

¹⁶ Tá nandihí já cuanúhu Jesús ñuu Nazaret nuú nasahnu a. Ta mé quivi ndíquehe ndée ná cán, nasahan mé á veñuhu. Ta nacaja tá quiahva sá caja mé á já nandaca ndichi a cahvi a tuhun Ndióxi nuú ñayivi.

¹⁷ Nasahan na libro nacahyi profeta Isaías nu á ña ná cahvi a ña nuú na ndúu veñuhu cán. Ta tá nasuná a libro cán já nandiñehe á nu ndáa ña cáchi a já:

¹⁸ Chútú ndaa ínima i xihín ínima yii Ndióxi, jáchi nacaxi mé á yehe ña ná cuhun i caxi tuhun i tuhun saá ña vaha nuú na ndahví.

Ta nachindahá mé á yehe ña ná ndaja vaha i na ín cuéha ini.

Ta nachindahá mé á yehe ña ná caxi tuhun i nuú na ndúu ndahá tiñáhá sacuahá ndá quiahva caja na queta na ndáha ri.

Ta nachindahá mé á yehe ña ná cuná i nduchú núú na cuaa já ná cuu candehé na.

Ta nachindahá a yehe ña ná candaa i ña ndóho ini ñayivi.

¹⁹ Ta nachindahá mé á yehe ña ná cáhan i xihín ñayivi ña sa naxinu coo tiempo vaha ndivaha jáchi cúni Ndióxi caja cuahá ñamaní xihín ñayivi, já cáchi ña nacahvi Jesús nuú na cán.

²⁰ Tá nandihí já nachicaji Jesús libro cán já nandiquiahva mé á ña nuú da cája chuun veñuhu cán ta nasacoo a. Na ñúhu veñuhu cán sándehe na nu mé á.

²¹ Sahá ña cán quéa nacachi a já xihín ná:

—Mé quivi viti naxini ndó naxinu coo nuú tuhun nacahyí Isaías sanahá ndivaha —nacachi Jesús xihín na cán.

²² Ta ndijáá ñayivi cán cáhan vaha na saha Jesús ta cátóntó na sahá ña ndató ndivaha tuhun cáhan xihín ná. Já nacasáhá ndáca tuhún táhan na já cáchí na já:

—Á a juú da yóho cúu jahyi José cán —cáchí na cáhan xihín táhan na.

²³ Anda já nacachi Jesús xihín na cán já:

—Cája i cuéntá cuni ndó cachi ndó tuhun yóho xihín i: “Yohó, da cúu doctor ndaja vaha jihna mún.” Ta xihín ña yóho cuni ndó cachi ndó xihín i: “Ña náhnu naxini johó nde nacajún ñuu Capernaum cán, caja ña mé ñuu mún yóho ná cuni nde.”

²⁴ Anda já nacahan chága Jesús xihín ná já nacachi tucu a já:

—Mé a ndaa ná cahan i xihín ndo ña ni in túhún toho ñayivi co ndíquehe vaha na profeta mé ñuu da.

²⁵ Mé a ndaa ná cahan i xihín ndo. Tá nasahjin profeta Elías sanahá já nasanduu cuhá ri na cuáan tañu ñayivi Israel ta nandoho ndivaha ini na jáchi naquixi in joco ndeé ndivaha sahá ña coó nacuun javi tixi uní cuja java.

²⁶ Joo coó nachindahá toho Ndióxi Elías ña ná cuhun da chindeé da na ndúu nación Israel cán. Ña nacaja Ndióxi quea nachindahá a da nuú in ña cuáan nasahjin ñuu Sarepta yati ñuu Sidón cán.

²⁷ Ta quiahva já nasahjin ri tiempo tá nasacuu Eliseo profeta. Mé tiempo cán nasanduu cuhá na nandoho cuehe táhyi nación Israel cán. Joo in túhún da nandaja vaha da cán, da naní Naamán, da naquixi ñuu tóho naní Siria —nacachi Jesús xihín na cán.

²⁸ Tá naxini johó na ñúhu veñuhu cán ña nacachi Jesús xihín ná já naxojo ndivaha ini na xihín á.

²⁹ Já nandicuíta na xihín á ta natavá na Jesús yuhú ñuu. Ta cán najándaa na a jini yucú jíco nu cánúu ñuu cán. Já nacahán na chindahá nihni na a janda ninu.

³⁰ Joo nayaha Jesús cuahan nu ná já naquee a cuahan va.

In da nasandacaan ínimá quini ini (Mr: 1:21-28)

³¹ Anda já naquee Jesús cuahan ñuu Capernaum, ña ndácaan estado Galilea. Ta cán nacasáhá jánaha tuhun Ndióxi nuú ñayivi mé quivi ndíquehe ndée ná.

³² Ta chí cátóntó na tá quiahva jánaha Jesús nu ná jáchi cáhan mé á tátuhun in da íin saha cahnda chuun.

³³ Mé ini veñuhu nu ndácaan Jesús jánaha cán nasandacaan in dataa, da ndácaan in ínimá quini ini. Já nacayuhú ínimá quini cán nu Jesús já cáchí ri já:

³⁴ —Jándacoo táji ndehe, Jesús, da ñuu Nazaret. Ndá cuéntá quea quíhvi nuún xihín nde. A vásún jándihún sahá nde. Sa xini vaha i yohó ta cándaa cáxi ini i ña cúun in da yij nachindahá Ndióxi —nacachi ínimá quini cán xihín Jesús.

³⁵ Anda já nacasáhá Jesús jánani a ínimá quini ndácaan ini dataa cán já nacachi a já xihín ri:

—Caji yuhun ta janí da yóho —nacachi Jesús xihín ri.

Tá nacachi a já chí najándacava rí quini dataa nuú na cán já naqueta rí ini da cán. Ta coó nacaja rí ni in ña núu xihín dá.

³⁶ Tóco ndihi ñayivi nasanduu cán nayihví ndivaha na. Ta já nacasáhá cáchí xihín táhan na já:

—Íin ndivaha sahá tuhun cáhan Jesús yóho jáchi xihín ña cáhan da sáhdá da chuun xihín ndée dá ta tává da ínimá quini ta chí quee rí cuahan ri —nacachi xihín táhan na cán.

³⁷ Ta ní cúu ñuu válí cán nandicuíta nuu tuhun saha Jesús.

Ndája vaha Jesús ña cúu xojo Simón Pedro (Mt: 8:14-15; Mr: 1:29-31)

³⁸ Anda já naquee Jesús veñuhu cán já cuahan vehe in da naní Simón. Tá naxinu a cán já naquihvi a ini vehe da. Ta naxini a ña quíhvi ña cúu xojo Simón cán, ña chícaan cáhni ndeé ña. Chí naxica tahví na nu Jesús ña ná ndaja vaha mé á ña.

³⁹ Anda já nacayati Jesús nu ña já nasahnda chuun nuú cuehe cán ña ná quee a. Já nandindaa ña chícaan cáhni á ña chí ivi laá nandicoo ña já nacasáhá cája ndíví ña ña cuxu na.

*Ndája vaha Jesús cuahá na quíhvi
(Mt. 8:16-17; Mr. 1:32-34)*

40 Tá naqueta nuu candii mé quívi cán já ñéhe ñayivi na quíhvi ndúu nu ná naxinu na nu Jesús. Tá nuú cuehe nasandoho na cán ta tá nachinúu Jesús ndáha á jini in in na já nandivaha na nacaja mé á.

41 Ta cuaha táhan na quíhvi cán nacana ínima quini ini na nacaja mé á. Ta tá quéta rí quini cán já cáyuhú cóhó rí nu Jesús já cáchi rí já:

—Yóhó cúun in túhún jini já jahyi Ndióxi —cáchi rí xihin Jesús.

Joo najánani Jesús ínima quini cán ta co cuni a quiahva ñamaní ña ná cahan rí jáchi xini vaha rí cán ña cúu mé á Cristo, da nachindahá Ndióxi cacomí cuénta sahá ñayivi.

*Jánaḡa Jesús tuhun Ndióxi nuú ñayivi
ndúu estado Galilea
(Mr. 1:35-39)*

42 Tá nativi inga quívi itaan já naquee Jesús ñuu cán ta cuahan in nu cáa xoo. Joo nacasáha ñayivi ndínducú na mé á janda quiahva naxinu na nu ín a jáchi cuni na caji na nuú á ná a jándacoo a na.

43 Anda já nacachi Jesús já xihin ná:

—Ndítahan nuú i cuhun i caxi tuhun i xihin ñayivi ndúu java ga ñuu ña vaxi quívi cacomí Ndióxi cuénta saha ná. Jáchi chuun yóho nachindahá Ndióxi yehe vaxi i —nacachi Jesús xihin na cán.

44 Chí naxica nuu Jesús jánaḡa tuhun Ndióxi nuú ñayivi ini veñuhu estado Galilea cán.

5

*Cája Jesús ña ná cuu tiin cuaha ná tiyacá
(Mt. 4:18-22; Mr. 1:16-20)*

1 In tañu ín Jesús yuhú tañuhú nani Genesaret. Ta a juú quiahva natata ñayivi chí nacasáha cándihi na Jesús jáchi cuni na cuni johu na tuhun Ndióxi.

2 Ta naxini Jesús ivi barco ndíta dó yati yuhú tañuhú cán. Coó da ñuhu ini dó jáchi sa naquee da táva tiyacá ta yati jini va ndícata da ñunu dá.

3 Anda já naquihvi Jesús ini in táhan barco cán, do cúu ñaha Simón. Ta nacachi Jesús xihin Simón ña ná jácaxicá loho da

do. Tá nandihí já nasacoo Jesús ini barco já nacasáha jánaḡa nuú ñayivi janda mé ini barco cán.

4 Ta tá sa nandihí nacahan xihin ñayivi cán já nacachi a já xihin Simón:

—Cañehe barco yóho ná cuhun dó xoo nu cúná chága ticuii ta jácanún ñunun tavún tiyacá —nacachi Jesús xihin dá.

5 Anda já nanducú ñehe Simón tuhun nu Jesús já cáchi da já xihin á:

—Maestro, nini yaa ñuu nacaja chúun nde ña nducú nde tavá nde tiyacá. Ta coó ñaha natavá nde. Joo tá sa cáchi mé ndó já caji i tá ín cáchi ndo cuhun i jácana i ñunu i ini tañuhú —nacachi Simón xihin Jesús.

6 Ta tá nacaja da ña nacachi Jesús xihin dá já a juú quiahva cuahá tiyacá natavá da chí janda ñunu dá cán nacasáha táhnda.

7 Anda já nacuu ndáha dá nuú java ga da táva tiyacá ñuhu ini inga barco ña ná quixi da chindee táhan da xihin dá. Anda já naquixi da cán chindee táhan da xihin Simón. Já najacutú da ndívi barco cán xihin tiyacá chí janda nducú cacoo dó cán cahá tañuhú xihin ña cuahá tiyacá naquee ini dó.

8 Tá naxini Simón Pedro cán ña yóho já nacaxití da nu Jesús já cáchi da já xihin á:

—A cáyati ndó nuú i, xitoho i jáchi cúu u in ta cája cuachi.

9 Já nacachi Simón jáchi nayihví da. Ta quiahva já nayihví da nachindee táhan xihin dá cán sahá ña cuaha nahá tiyacá natavá da.

10 Quiahva já nayihví ri Jacobo xihin Juan, da cúu jahyi Zebedeo. Ndívi da yóho chindee táhan da xihin Simón cán. Ta já nacachi Jesús já xihin Simón:

—A cáyihví tohún jáchi viti casáhún caca nuún tavún ñayivi tañu cuachi tá quiahva nacajún tá natavún tiyacá ini tañuhú —nacachi Jesús xihin dá.

11 Ña cán quea tá natavá da cán barco da yuhú tañuhú cán já najándacoo ndihí da ñaha da ta nandico da Jesús.

Tá nandaja vaha Jesús in da ndóho cuehe táhyi

(Mt. 8:1-4; Mr. 1:40-45)

12 Ta ndaja coo ín Jesús in ñuu ta já naxinu coo in da ndóho cuehe táhyi nu á. Ta

tá naxini da Jesús já nacaxítí da nu á janda quiahva nacani ndaa nuu dá nu ñúhu. Já nacasáhá xíca tahví da nu á já cáchí da já xihín á:

—Cuu ndaja vaha ndó yehe, xitoho i tá cúní ndo —nacachi da xihín Jesús.

¹³ Anda já nacani ndaa ndáha Jesús da já nacachi a já:

—Cúní ña ná ndivahún ña cán quéa nandivahún viti —nacachi Jesús.

Tá nacachi Jesús já chí ivi laá nandindaa cuehe táhyi nandoho da cán.

¹⁴ Anda já nasahnda Jesús chuun nu dá ña ná a ndícani da nuú ñayivi sahá ña nacaja xihín dá. Ña nacachi a xihín dá quéa:

—Cuáhán ndacún jánahun mún nuú jutú. Ta ndítahan jocún ñaha nu Ndióxi tátuhun nasahnda ley Moisés sanahá caja na sa nandivaha. Já ná candaa ini ñayivi ña sa nandindaa va cuehe nasandohún —nacachi Jesús xihín da cán.

¹⁵ Joo ví ga ví nacasáhá ndícuíta nuu tuhun sahá ña cája Jesús. Sahá ña cán quéa táca cuahá ndivaha ñayivi cuni johó na nu cáhan mé á xihín ná. Ta jári táca na jáchi cúní na ña ná ndaja vaha mé á na.

¹⁶ Joo tává xóo Jesús mé á xoo nuú coo ñayivi ta cán sá xíca tahví a nu Ndióxi.

Ndája vaha Jesús in da naxihi tuchu saha (Mt. 9:1-8; Mr. 2:1-12)

¹⁷ In tañu ndácaan Jesús ini in vehe jánahá nuú ñayivi. Tañu na cán nasanduu coo java na fariseo xihín java na jánahá ley Moisés. Tóco ndihi na cúu ná na naquixi ndijáá ñuu válí ñúhu estado Galilea cán xihín ñuu válí ñúhu estado Judea xihín ñuu Jerusalén viti. Ta náha Jesús ña ñéhe a ndée Ndióxi jáchi ndivaha ñayivi cája mé á.

¹⁸ Mé hora já naxinu coo java dataa ta ñéhe da in xito loho nu cándúhu in da quíhvi, da naxihi tuchu saha. Ta cúní da jáquihvi da da cán ini vehe nu ndácaan Jesús cán já chindúhu dá da nu Jesús, nacahán da.

¹⁹ Joo coo nacuu caja da quihvi da jáchi nanditútú ndivaha ñayivi ndúu na yéhe vehe cán. Sahá ña cán quéa nandaa da jini véhe já natavá da teja cándójó cán. Já najánuu da xito loho nu cándúhu mé da

quíhvi cán tañu tóco ndihi ñayivi ñúhu ini vehe cán janda quiahva naxinu xito da quíhvi cán nu ín Jesús.

²⁰ Tá naxini Jesús ña cándeé ini da ñéhe da quíhvi cán mé á já nacachi a já xihín da quíhvi cán já:

—Candehé. Sa nacaja cáhnu ini i sahá cuachún viti —nacachi Jesús xihín dá.

²¹ Anda já nacasáhá na jánahá ley Moisés xihín na fariseo cán cáhán na: “Ndá da cúu da yóho ta ndá cuénta quéa ndája nuu da Ndióxi xihín tuhun cáhan da. Jáchi ni in tuhún toho ñayivi a cúu caja cáhnu ini sahá cuachi. In tuhún jini Ndióxi quéa cuu caja cáhnu ini sahá cuachi”, nacahán na cán.

²² Joo Jesús sa nacandaa va ini a ña cáhvi ini na cán sahá ña cán quéa nacachi a já xihín ná:

—Ndávaha cáhán ndo já.

²³ Á cáhán ndo ña ihvi chága cachi i xihín da yóho: “Nacaja cáhnu ini i saha cuachún viti.” Á tá coo tá cachi i xihín dá: “Ndicoo ta cuanúhu.”

²⁴ Candehé vaha ndo ná nahá i nu ndo ña ín sahá i, da nachindahá Ndióxi nduu u ñayivi, caja cáhnu ini i sahá cuachi ñayivi ñuyiví yóho —nacachi Jesús xihín na cán.

Anda já nacachi tucu a xihín da naxihi tuchu saha cán já:

—Ta viti cáhan i xuhun, cuándacoo ndiquehe xito lohún ta cuanúhu.

²⁵ Tá nacachi Jesús já chí ivi laá nandicoo da nu ndíhi ñayivi ndúu cán jáchi nandivaha saha dá. Ta nandiquehe da xito loho da nuú nasandúhu dá. Anda já cája cáhnu da Ndióxi naquee da cuanúhu dá vehe da.

²⁶ Ta tóco ndihi ñayivi nasanduu cán nacatontó na ta nacaja cáhnu na Ndióxi sahá ña nacaja Jesús. Ta a juú quiahva yíhvi na já nacachi na já:

—Ña náhnu ndivaha va quéa naxiní quivi viti —nacachi na.

Cána Jesús in da nani Leví, da cáhan na Mateo xihín, ña ná caca da xihín á (Mt. 9:9-13; Mr. 2:13-17)

²⁷ Tá nandíhi já naquee Jesús xíca cuahan. Ta cán naxini a in da jataca jiuhún cuénta impuesto. Mé da yóho nani da Leví ta ín coo da nu sácoo na jataca jiuhún

cuéntá impuesto cán. Anda já nacachi Jesús já xihín dá:

—Naha quí candicun yehe —nacachi a xihín dá.

²⁸ Anda já nandaca ndichi Leví cán ta najándacoo da tóco ndihi ñaha cán ta já nacasáhá ndíco da Jesús xíca da.

²⁹ Tá nandihí já nacavaha Leví in víco cáhnu mé vehe da cán ña caja cáhnu da Jesús. Ta cán nataca cuaha táhan na játaca jjuhún cuéntá impuesto ndúu na vehe da. Ta cuahá ga ñayivi nataca ndúu coo nu mesa cán.

³⁰ Joo na fariseo xihín na jánaha ley Moisés nacasáhá na cáhan núu na sahá na xíca tuun xihín Jesús já nacachi na já:

—Ndá cuéntá queá xixi ndó xihín na játaca jjuhún cuéntá impuesto ta xihín java ga na cája cuachi —nacachi na cán xihín na xíca tuun xihín Jesús.

³¹ Anda já nanducú ñehe Jesús tuhun nuú na cán já nacachi a já xihín ná:

—Ñayivi ín vaha co xíní ñúhú toho na da cája tátá ñahá joo na quíhvi, na cán cúu na xíní ñúhú da cája tátá ñahá.

³² Ta yehe coó vaxi toho i cana i na sa ín vaha. Vaxi i cana i ñayivi, na cája cuachi ña ná jándacoo na cuachi cája na —nacachi Jesús xihín na cán.

Ndáca tuhún na Jesús ndá cuéntá queá co xíjuhun da xíca tuun xihín á

(Mt. 9:14-17; Mr. 2:18-22)

³³ Anda já nacasáhá ndáca tuhún tucu na Jesús já cáhí na já xihín á:

—Xíní nde ña xíca tahví ndivaha va na nasaxíca tuun xihín Juan ta jári xíjuhun ndivaha va na cán. Ta quiahva já cája na fariseo. Joo na xíca tuun xihín yóhó jan ní tiempo xixi na pan ta xíhi na vino. Ndá cuéntá queá cája na já —nacachi na cán xihín Jesús.

³⁴ Anda já nanducú ñehe Jesús tuhun nu ná já cáhí a já xihín ná:

—Cúu á tátuhun tá cája na víco tándaha ta ín va mé da tándaha cán xihín ná já queá co ndítahan nu ná cajuhun na. Quiahva já ín ri xihín yehe va. Coó saha cajuhun na xíca tuun xihín i jáchi ín vi xihín ná viti.

³⁵ Joo vaxi quívi ndindaa i nuú na yóho. Anda já casáhá na yóho cajuhun na —nacachi Jesús xihín na cán.

³⁶ Anda já nasacu Jesús quiahva nu ná já nacachi a já xihín ná:

—Ni in túhún toho ñayivi co sáhdá na in túhún jáhma saá já ndicahmá na in jáhma yatá. Jáchi tá ná caja na já játivi na jáhma saá cán. Ta ni co ndíque táhan vaha in jáhma yatá tá jándaha na ña xihín in túhún jáhma saá.

³⁷ Ta ni in túhún toho ñayivi co táan na vino saá ini in ní yatá. Jáchi tá ná caja na já já queá jácandí va vino saá ní yatá cán. Ta xihín ña yóho tivi ní cán ta tivi ri dó cúu vino cán va.

³⁸ Ña ndítahan caja na queá taán na vino saá ini ní saá já ná cuu cañuhu vaha dó cán ta mé ní co cáhndi a.

³⁹ Ta ni in túhún táhan na xíhi vino yatá co xíca na vino saá coho na jáchi cáhí na ña vaha chága xíhi dó yatá —nacachi Jesús xihín quiahva sácú a nuú na cán.

6

Tá na xíca tuun xihín Jesús tuhun na yucu jini trigo quívi ndíquehe ndée ñayivi

(Mt. 12:1-8; Mr. 2:23-28)

¹ In quívi ndíquehe ndée ñayivi nani xíca Jesús cuahan xihín na xíca tuun xihín á já nayaha na tañu nuú naxutu na trigo. Já nacasáhá na cán tuhun na yucu jini trigo cán já tává na trigo já chíníhni ndáha ná a ta sáxí na cáshan na.

² Tá naxini java na fariseo cán ña cája na já nacachi na já:

—Ndávaha cája ndó chuun ña co ndítahan caja ndó quívi ndíquehe ndée yo —nacachi na fariseo cán xihín na xíca tuun xihín Jesús.

³ Anda já nanducú ñehe Jesús tuhun nu ná já nacachi a:

—Á a ñaha cahvi ndó nuú tuhun Ndióxi nu cáhan sahá ña nacaja David sanahá tá nacuico da xihín na xíca xihín dá.

⁴ Ña nacaja da cán queá naquihvi da ini veñuhu Ndióxi ta natiin da pan yíi já naxixi da ña ta nasahan da ña nuú na xíca xihín dá ña ná cuxu na. Joo jutú cuití va cúu na ndítahan nuú cuxu ña cán, nduu.

⁵ Ta yehe va, da nachindahá Ndióxi nduu ñayivi ín sahá i cahnda i chuun sahá quivi ndíquehe ndée ñayivi —nacachi Jesús xihín na cán.

Tá nandaja vaha Jesús in da nahichi ndáha

(Mt. 12:9-14; Mr. 3:1-6)

⁶ Inga tucu quivi ndíquehe ndée ná já naquihvi Jesús ini in veñuhu ta nacasáhá jánahá nu ná. Ta ini mé veñuhu cán nasandacaan in dataa, da nahichi ndahá cuáha.

⁷ Ta ndaja coo na jánahá ley Moisés xihín na fariseo nání na Jesús sándehe na ña á ndaja vaha mé á da cán quivi ndíquehe ndée na. Ta xihín ña yóho cáhan na cuu ñehe íni na jácojo na cuachi jatá.

⁸ Joo sa xini va Jesús ña cáhvi ini na cán. Sahá ña cán quea nacachi a já xihín da nahichi ndáha cán já:

—Cuándaco ta candichi mahnú yóho — nacachi Jesús xihín dá.

Anda já nandaca ndichi da cán nuú Jesús.

⁹ Anda já nacasáhá Jesús cáhan xihín java ga na ndúu cán já nacachi a já xihín ná:

—Cuni johó ndó ná ndaca tuhún i ndohó. Ndía cáhí ley ndítahan caja í mé quivi ndíquehe ndée ñayivi. Á chindeé yo ñayivi á caja í ña núu xihín ná. Á jácacú na á cahni yó na —nacachi Jesús xihín ná.

¹⁰ Anda já nandicoto nihni Jesús nuú ndihi na nacava nuu ndúu xihín á cán. Ta nacachi a já xihín da nahichi ndáha:

—Jándaca ndáhun.

Ta tá najándaca da cán ndáha dá chí ivi laá nandivaha ndáha dá.

¹¹ Joo tóco ndihi na java ndúu cán naxojo ndivaha ini na. Já nacasáhá ndítuhún xihín táhan na ña ndá quea cuu caja na já ná cuu jándihi na saha Jesús.

Tá nacaxi Jesús uxu ivi da cacuu apóstol

(Mt. 10:1-4; Mr. 3:13-19)

¹² Mé tañu já naquee Jesús nasahan in jini yucu caa tahvi a nu Ndióxi. Ta ní cúu ñuu naxica tahvi a nu Ndióxi.

¹³ Ta tá sa nativi já nacana mé á na xica xihín á. Ta tañu na cán nacaxi a uxu ivi da cacuu da in táhnda ta cananí apóstol, da chindahá a caca nuu cáhan tuhun Ndióxi.

¹⁴ Nacaxi a da naní Simón, da nasacu tucu a quivi cananí Pedro. Ta nacaxi a da cúu ñani Pedro, da naní Andrés. Ta nacaxi a Jacobo xihín Juan xihín Felipe xihín Bartolomé

¹⁵ xihín Mateo xihín Tomás xihín Jacobo, da cúu jahyi Alfeo. Ta nacaxi a Simón, da naxica cuénta na cananista.

¹⁶ Ta nacaxi ri a Judas, ñani Jacobo xihín Judas Iscariote, mé da najicó tuhún Jesús tá nu ndíhi.

Jánaha Jesús nuú cuahá ñayivi

(Mt. 4:23-25)

¹⁷ Tá nandihí nanuu Jesús jini yucu xihín na xica tuun xihín á já naxinu a yojó ndaa nasahin a xihín ná. Ta cán nasanduu ri cuahá ndivaha ñayivi táhan na naquixi ndijáá ñuu válí ndúu chí estado Judea xihín na ndúu ñuu Jerusalén xihín na ndúu ñuu Tiro xihín Sidón, ña ndúu yati yuhú tañuhú. Ta tóco ndihí ñayivi yóho naxinu na cuni johó na nu cáhan Jesús. Ta naxinu na jáchi cúni na ña ná ndaja vaha mé á na.

¹⁸ Ta tóco ndihí na nasañuhu ínimá quini ini nandaja vaha ri Jesús na jáchi natavá a ínimá quini nasañuhu ini na.

¹⁹ Ta tóco ndihí ñayivi cúni na caní ndaa ndáha ná Jesús jáchi xihín ndée mé á ndaja vaha tóco ndihí na quihvi.

Jánaha Jesús ndá quiahva cajii chága iní já ná a canduu cuéha yo

(Mt. 5:1-12)

²⁰ Tá nandihí já nasandehé Jesús nuú na xica tuun xihín á já nacasáhá cáhí a já xihín ná:

—Tahvi nacuu ndó, na cándahví jáchi ndóhó cúu na cacomí Ndióxi cuénta saha.

²¹ Tahvi nacuu ndó, na cuíco viti ñuhú jáchi ndóhó cacuu na chutú ndaa tá ná ndihí.

Tahvi nacuu ndó, na sácu viti jáchi ndóhó cacuu na casáhá cuacu tá nu ndíhi.

²² Tahvi nacuu ndó tá cándají ñayivi ndohó ta casáhá táxi na ndohó á canahá na xihín ndo. Ta tahvi nacuu ndó tá quehe núu na ndohó sahá ña cáhan na ña cúu ndó na núu ndivaha. Tá ná caja na tóco ndihí ña yóho xihín ndo sahá ña cándeé ini ndó yehe, da nachindahá Ndióxi nduu ñayivi, tahvi nacuu ndó.

23 Já quéa ndítahan cájii ndivaha ini ndó mé quívi já jáchi sa naxica tahvi Ndióxi in ña vaha ndivaha ín indivi quiahva nu ndo. Jáchi tá quiahva cája xíxi na jan xihin ndó viti quiahva já nacaja xíxi ri tásáhnú jícó na jan xihín na nasacuu profeta sanahá.

24 Joo ndáhví nacuu ndó, na cuicá viti jáchi sa nacajii ndivaha va ini ndó ñuyívi yóho.

25 'Ndáhví nacuu ndó, na nachutú ndaa viti jáchi ndóhó cúu na quixi tama nuu.

'Ndáhví nacuu ndó, na sácu viti jáchi ndóhó cúu na cuacu xihin ña cacuéha ini ndó.

26 'Ndáhví nacuu ndó tá ná casahá ñayivi cahan vaha na saha ndo jáchi quiahva já nacahan vaha tásáhnú jícó na jan sahá na profeta túhún nasanduu najándahvi ñayivi sanahá.

*Xíni ñúhú quihvi ini na co cúní mí
(Mt. 5:38-48; 7:12)*

27 'Tóco ndihi ndó, na xíni johó nu cáhan i yóho, ndítahan quihvi ini ndó na co cúní ndohó. Ta xíni ñúhú caja vaha ndó xihin ndá na cándají ndohó.

28 Xíni ñúhú caça tahvi ndó nu Ndióxi ña ná caja yii á na nachicaan cháhan jata ndo. Ta caça tahvi ndó nu Ndióxi sahá na cánahá xihin ndo.

29 Ta ndá na ná caní in xoo sajóho ndó, cata ñee ndó inga xoo sajóho ndó nu ná ña ná caní na. Ta tá ná candaa na jahmá ndeé ndo quiahva ndó ñamaní ña ná quehe ri na cotó ndo tá já cúní na.

30 A cájihnda ndó nuú na xíca ñaha nu ndo. Ta ndá na cándaa ña cúu ñaha ndó, a ndíndaca ndó ña nu ná.

31 Tá quiahva cúní ndó caja ñayivi xihin ndo quiahva já ndítahan caja ri ndóhó va xihin ná.

32 'Jáchi tá quihvi ini ndó ñayivi sahá ña quihvi ri ini na cán ndohó va, ndía vaha cája ndó jáchi quiahva já cája ñayivi quini.

33 Ta tá cája vaha cuití ndo xihin na cája vaha xihin mé ndó, ndía vaha cája ndó jáchi quiahva já cája ri ñayivi quini va.

34 Ta tá sahan too ndó ñaha ndó nuú ñayivi sahá ña cáhan ndo caja na ñamaní xihin mé ndó, ndía vaha cája ndó jáchi quiahva já cája ri ñayivi quini va.

35 Joo ndóhó, xíni ñúhú quihvi ini ndó na co cúní ndohó. Ta xíni ñúhú caja vaha ndó xihín ñayivi. Ta xíni ñúhú quiahva too ndó ñaha ndó ta a cándati ndó ña ná nducú ñehe na cán ña nu ndo. Tá ná caja ndó já já quéa ñehe táhví ndó ña vaha ndivaha caja Ndióxi ta nduu ndó jahvi Ndióxi, mé a cúu Ndióxi cáhnú ndivaha. Jáchi mé Ndióxi cándahví ini a ndá na co ndíquiahva ndixahvi nu mé á ta cándahví ri ini a ñayivi quini va.

36 Xíni ñúhú tahnda ini ndó sahá ñayivi tá quiahva táhnda ini Ndióxi saha ná.

*Co ndítahan candehé ndaa yó ñayivi
(Mt. 7:1-5)*

37 'A candehé ndaa ndó ñayivi já ná a cája Ndióxi já xihin ndo. A chícáan ndó cuachi jatá inga na já ná a quehe Ndióxi cuénta sahá cuachi mé ndó. Caja cáhnú ini ndó saha ná já ná caja cáhnú ini Ndióxi saha mé ndó.

38 Jasá ndo ñaha nuú ñayivi já ná ñehe ndó ñaha nu Ndióxi. Cúu á tátuhun cája ñayivi tá jáchutú na in ndohó xihín nuní ta quíji nihni na ndohó já ná ndituun a ta jácuuyu chága na nuní já táan na ña ini a janda quiahva xita ña yuhú ndohó cán. Tá quiahva cája mé ndó xihin ñayivi quiahva já caja Ndióxi xihin ndo jáchi tá cuaha sahan ndó nuú ñayivi quiahva já cuaha quiahva ri Ndióxi nu ndóhó va —nacachi Jesús xihín na cán.

39 Tá nandihí já nasacu a quiahva nu ná já nacachi a já:

—A cúu toho caja in taa cuaá candaca da inga da cuaá cuhun da jáchi ndívi já da ndicava da yávi.

40 Ni in túhún toho da xíca jácuaha tiáha chága nu mé da jánahá ñahá cán. Joo tá ná xinu quívi já catiáha vaha da já candaa ini da tóco ndihí ña xíni da najánaha ñahá cán.

41 'Jáchi ndá cuénta quéa sándehe ndó ña núu cája ñani táhan ndó ta co sándehe ndo ndá quiahva náhnú chága ña núu cája mé ndó. Cúu á tátuhun ndácaan in xehe loho nduchú núu ñani táhan ndó nani ndácaan in yító ndúhu cáhnú ini nduchú núu ndo.

42 Ta tá a cúu cuni ndó yító cáhnú ndácaan ini nduchú núu mé ndó ndaja caja ndó cachi ndó xihin ñani táhan ndó: “Ñani i, ná tavá loho i xehe ndácaan nduchú núun

jan.” Jándahvi ndó mé ndó xihín ña cája ndó. Xíni ñúhú tavá ndo yító cáhnu ndácaan nduchú núú mé ndó já ná nuna nu ndó cuni vaha ndó já ná cuu tavá ndó xehe loho ndácaan nduchú núú ñani táhan ndó — ñacachi Jesús.

Tá xini yo cuihi in yito já cándaq iní ndá yito cúú dó

(Mt. 7:17-20; 12:34-35)

⁴³ Anda já ñacasáhá tucu a cáchí já:

—Coó toho yitó vaha cúun cuihi quini nuu. Ta ni coó yitó quini cuu cuun cuihi vaha nuu.

⁴⁴ Jáchí xihín cuihi cúun nuú in in yító cándaq iní ndá yító cúú dó. A vája cúú tuhun sáhdá ñayivi titi ñúhú nuú tohíñú. Ta ni a vája cúú tuhun sáhdá na uva nuú tonáña yúcu.

⁴⁵ In ta vaha cáhan da ndinuhu ña vaha jáchí ndinuhu ña vaha ñúhu ínimá dá. Ta in ta quini cáhan da ndinuhu ña núu jáchí ña núu quéa ndácaan ínimá dá. Jáchí yúhu ñayivi cána tóco ndihi ña nandicutú ñúhu ínimá ná —ñacachi Jesús.

Sácu Jesús quiahva sahá ivi da ñacavaha vehe

(Mt. 7:24-27)

⁴⁶ Cáhan tucu Jesús já cáchí a já:

—Ndá cuéntá quéa cáhan xitoho nahá ndó yehe ta co cája ndó ña sáhdá i nu ndo.

⁴⁷ Ná cahán i xihín ndó ndaja ín da vaxi nuú i cuni johó da tuhun cáhan i ta cája da ña cáchí i.

⁴⁸ Cúú dá tátuhun in dataa ñacavaha vehe. Tá ñacasáhá da távā da sahá vehe da já ñasata cúná da já ná chinúu da vehe da jata tóto. Ta tá ñasahnu cuahá yuta já ñacani ndaa ñihi ticuúí cán jata vehe da. Joo coó nandicava vehe da ñacaja ticuúí cán jáchí tóyíí cándichi vehe da jata tóto cán.

⁴⁹ Joo ndá da xini johó nu cáhan i ta co cája da ña cáchí i, cúú dá tátuhun inga dataa, da ñacavaha vehe nu ñúhu uun. Ta coó ñasata da nuú nanduxu sahá. Ta tá ñasahnu cuahá yuta já ñacani ndaa ñihi ticuúí cán jata vehe da. Ta xihín ña yóho nandicava vehe da ta chí nandihí saha chí uun —ñacachi Jesús.

7

Tá ñandaja vaha Jesús in da cája chúun nuú in jefe soldado

(Mt. 8:5-13)

¹ Tá nandihí ñacahan Jesús xihín ñayivi cán já ñaquee a cuahan chí Capernaum.

² Mé ñuu Capernaum cán ñasahin in dataa, da sáhdá chuun nuú soldado ñaquixi ñuu Roma. Mé da yóho ñasahin in mozo da ta quíhvi ndivaha ini da mozo da. Joo ndaja coo mé mozo da yóho quíhvi ndeé da ta janda ja chá quivi da.

³ Tá ñaxini johó da sáhdá chuun nuú soldado yóho sahá Jesús já ñachindahá da java na sacuahá táhan na ñaquixi chichí Israel já ná caça na ñamaní nuú Jesús quixi a ndaja vaha mozo da cán.

⁴ Tá ñaxinu na cán nuú Jesús ñacasáhá xica tahví ndivaha na nu á já cáchí na já xihín á:

—Ín sahá da sáhdá chuun nuú soldado yóho ña ná chindeé ndó da.

⁵ Jáchí quíhvi ini da tóco ndihi ñayivi ndúu nación Israel ta sa mé da jan cúú da ñasahnda chuun ña ná cavaha na veñuhu nde —ñacachi na cán xihín Jesús.

⁶ Anda já ñaquee Jesús cuahan xihín ná. Joo tá sa jalóho xinu coo na vehe da sáhdá chuun nuú soldado cán já ñachindahá da java amigo da nuú Jesús ná cahán na yuhú nuu da já ñacachi na já:

—A jándihí ndó mé ndó ndihvi ndó vehe e, xitoho i jáchí coó saha toho i ña ná ndihvi ndó vehe e.

⁷ Sahá ña cán quéa coó ñasahan ndeé ini i cuhun i ndinducú u mé ndó. Joo janda nu ín ndó jan cahnda ndó chuun ña ná ndivaha mozo i já ndivaha da.

⁸ Jáchí ndúu java na náhnu chága sáhdá chuun nuú i. Ta ndúu ri soldado sáhdá ri yehe va chuun nuu. Ta tá chindahá i in da ña ná cuhun da nu cúní mí i cuhun da ta cuahan da. Ta tá sáhdá i chuun nuú inga da ña ná quixi da nuú i ta vaxi da nuú i. Ta tá sáhdá i chuun nu mozo i ña ná caha da ña sáhdá i ta cája da ña —ñacachi na.

⁹ Tá ñaxini johó Jesús tóco ndihi ña ñacahan amigo da sáhdá chuun nuú soldado cán xihín á já ñacatontó a xihín dataa cán. Anda já ñasandehé a nu tóco ndihi

ñayivi ndíco cuahan cán já nacachi a já xihin ná:

—Mé a ndaa ná cahan i xihin ndo ña a ñaha cuni i tañu na Israel in da cándee cáhnu nahá ini Ndióxi tá quiahva cándee cáhnu ini da yóho Ndióxi —nacachi Jesús xihin na ndíco jatá cán.

10 Ta tá nandicó coo na cúu mozo da sáhdá chuun nuú soldado cán vehe da já naxini na ña sa nandivaha va da nasaquíhvi cán.

Tá najánditacu Jesús jahyi in ña cuáan

11 Tá sa nayaha ña yóho já naquee Jesús cuahan chí in ñuu naní Naín xihin na xica tuun xihin á. Ta a juú quiahva cuahá ñayivi ndíco cuahan.

12 Tá naxinu coo a yati yuhú ñuu cán já naxini a ñayivi ñehe na in ndii cuahan na jánduxu na. Mé ndii cán nasacuu da in túhún já nu náná da, ña cúu ña cuáan. Ta a juú quiahva cuahá ñayivi ñuu cán ndáca táhan xihin ña cuahan na jánduxu na jahyi ña.

13 Tá naxini Jesús ña já natahvi ini a saha ña. Anda já nacachi a já xihin ña:

—A cuácu gaun.

14 Anda já nacayati Jesús nuú sató ndii cán já nacani ndaa ndáha á do. Anda já nasacuita na ndójo sató ndii cán. Ta nacahan Jesús xihin da cúu ndii cán já nacachi a já xihin dá:

—Yehe cáhan i xuhun, da tacú, cuándacoo —nacachi Jesús xihin dá.

15 Anda já nasacoo da nasacuu ndii cán ta nasahá da cáhan da. Já nandiquiahva Jesús da nu náná da.

16 Tá naxini tóco ndihi ñayivi cuahan cán ña nacaja Jesús já yíhvi na. Ta nasahá na cája cáhnu na Ndióxi já cáhvi na já:

—In profeta cáhnu ndivaha cúu da naxinu coo tañu mí yóho viti.

Ta nacachi tucu na:

—Ndióxi quéa naxinu coo nu yo ña ná chindee a ñayivi cuénta mé á —nacachi na.

17 Ta núu cúu ñayivi cuénta estado Judea xihin na ndúu yati cán nacandaa ini na sahá ña nacaja Jesús cán.

Juan, da jácandúta ñayivi, nachindahá da java da xica xihin dá nu Jesús (Mt. 11:2-19)

18 Ta ndaja coo nañehe Juan, da jácandúta ñayivi, tuhun saha tóco ndihi ña nacaja Jesús yóho jáchi nandicani na xica xihin Juan ña nu dá. Sahá ña cán quéa nacana da ivi táhan da xica xihin da

19 já nachindahá da na nu Jesús ña ná ndaca tuhún na mé á á jivi ndusa cúu á Cristo, mé a chindahá Ndióxi cacomí cuénta sahá ñayivi, á ndítahan candati na inga ga quixi.

20 Tá naxinu na xica xihin Juan nu in Jesús já nacachi na já xihin á:

—Da naní Juan, da xica jácandúta ñayivi, da cán cúu da nachindahá ndehe vaxi nde ndaca tuhún nde ndohó á cúu ndó Cristo, ña chindahá Ndióxi cacomí cuénta sahá ñayivi, á ndítahan candati nde inga ga —nacachi na cán xihin Jesús.

21 Mé hora naxinu coo na cán nu in Jesús já naxini na ndaja vaha Jesús cuahá ñayivi quíhvi, na nasandoho tá nuú cuehe. Ta natavá a ínima quini nasañuhu ínima java na. Ta cuahá ndivaha na cuáa nandinuna nuu nacaja Jesús.

22 Sahá ña cán quéa tá nanducú ñehe Jesús tuhun nuú na xica xihin Juan cán já nacachi a já xihin ná:

—Cuáhan ndó ndicani ndó nu Juan saha tóco ndihi ña naxini ndó cája i xihin tóco ndihi ña naxini johó ndó cáhan i. Ta ndicani ndó nu dá ña ndinuna nuú na cuáa ta ndícaca na réncó cája i. Ta ndája vaha i na ndóho cuehe táhyi. Ta jándinuna i johó na johó já ná cuni johó na. Ta jánditacu u ndii. Ta cáxi tuhun i tuhun Ndióxi nuú na ndahví já ná cuu cacu ndaa ínima ná.

23 Tahví nacuu na co jándacoo ña cándee ini na yehe —nacachi Jesús xihin ná.

24 Tá naquee na nachindahá Juan cán cuahan na já nasahá Jesús cáhan saha Juan nuú ñayivi cán já cáhvi a já xihin ná:

—Ndiá nacahan ndó cuni ndó tá naqueta ndó nasahan ndó sánehé ndo Juan yucú íhí cán. A juú da cán cúu ta láhá já quíji nuu da tátuhun quíji nuu in tíyoó cája tachí.

25 Ndiá naqueta ndó candehé ndó. A juú da cán cúu ta ndíxi jahmá lándá ndivaha. Sa xini vaha ndó ña co ndúu toho da ndíxi jahmá lándá yucú íhí. Ndá da ndíxi jahmá lándá ta cája da ña cuni yiquí cuñu da, mé da cán cúu da ndúu vehe rey cuití va.

26 Ndía nasahan ndó naxini ndó cán. Á coó nasahan ndó cuni johó ndó nu cáhan in da cúú profeta nu ndó. Mé a ndaa da cán cúú dá in profeta ta ín chága saha dá a juú ga inga profeta nasanduu sanahá.

27 Jáchi mé Juan cúú dá da cáhan tuhun Ndióxi saha tá cáchi a já:

Chindahá i in da canúu cuhun nu mún, já ná caja tiahva da íchi nuú quisún, já nacahyi a sanahá.

28 Candehé ndó ná cahan i xihin ndó. Tañu tóco ndihi ñayivi coó ga inga profeta cáhnu chága a juú ga Juan, mé da jácandúta ñayivi. Joo ndá na sa nandiquiahva mé ndáha Ndióxi ña ná cacomí a cuénta saha ná, vatí cúú ná na coó saha, na cán cúú na cáhnu chága a juú ga Juan —nacachi Jesús.

29 Tá naxini johó tóco ndihi ñayivi ndúu cán ña yóho já nandicuni na ña cája ndaa Ndióxi tóco ndihi ñaha. Na nacahán já cúú na najácandúta Juan ta tañu na cán nasañuhu java ri na játaca jiuhún cuénta impuesto.

30 Joo na fariseo xihin na jánahe ley Moisés, na coó najácandúta Juan cán, na cán cúú na naquehe núu na tóco ndihi ñamani cúnj Ndióxi caja xihin ná.

31 Anda já nacachi Jesús já xihin ná:

—Ná cahan i xihin ndó ndaja ín ñayivi ndúu tiempo viti.

32 Cúú ná tátuhun na valí sácoo sájiquí nuú yahvi ta cáyuhú na nuú java ga na valí ndúu cán já cáchi na já: “Nativí ndé tótíví nu ndó joo coó naxeen ndó cata sahá ndó. Ta naxita cuéha ndivaha ndé nu ndó ta ni coó nasacu ndó.”

33 Quiahva já ín ñayivi ndúu tiempo viti jáchi naquixi Juan, da jácandúta ñayivi ta naxijuhun da ta coó naxihi da vino joo nacachi ndó saha dá ña ndácaan ínima quini ini da.

34 Ta tá naxinu yehe, da nachindahá Ndióxi nduu ñayivi ta xíxi i pan ta xíhi i vino já nacasahá cáchi ndó saha i ña cúu u in taa ndehé ndivaha ta xíhi ndivaha i. Ta cáchi ndó ña cátóo ndivaha i cacuu u amigo na cája cuachi xihin na játaca jiuhún cuénta impuesto.

35 Joo na cúnj cándaá ini ña ndaa, na cán cúú na cándaá ini ña cája Juan xihin yehe ña ndaa —nacachi Jesús xihin na cán.

Ín Jesús vehe Simón, da cúú fariseo

36 In táhan da fariseo nacana da Jesús ña ná cuhun a cuxu a vehe da. Anda já nasahan Jesús vehe da já nasacoó a nu mesa.

37 Joo ndaja coo in ñañaaha, mé ña ñuu cán tá nañehe ña tuhun ña naxinu Jesús vehe Simón cán cuxu a já naxinu ña xihin in yúyú alabastro, ña nachutú ndaa xihin sítí támi sahan nacasaá ña nu Jesús. Mé ñañaaha yóho cúú ña in ña cája cuahá cuachi.

38 Ta sácu ña nacaxítí ña saha Jesús ta xihin ticuú nu ña najácuchu ña sahá. Ta tá nandihí já najáhichí ña do xihin íj jini ña. Anda já natatí yúhu ña sahá. Ta nachojó ña sítí támi sahan cán jata saha á.

39 Tá naxini mé da fariseo, da nacana Jesús vehe da cán ña yóho já nacahán da já: “Tá profeta ndusa ná cacuu da yóho ta sa cándaá va ini da ndá ña cúú ña cáni ndaa ndáha saha dá jáchi cúú ña ña cája cuahá cuachi”, nacahán Simón cán.

40 Anda já nacachi Jesús já xihin da fariseo cán:

—Candehé Simón, cuni johó ná cahan i xuhun —nacachi Jesús xihin dá.

Anda já nacachi Simón cán já xihin Jesús:

—Cahan mé á xihin i, xitoho i —nacachi da.

41 Anda já nasacu Jesús in quiahva nu dá já nacachi a já xihin dá:

—Nasanduu ivi dataa ta nasayicá da jiuhún nu mé da sahan tóo a cán. In da nasayicá uhun ciento ta inga da nasayicá ivi jico uxu.

42 Ta ni in da cán co ndéé da chahvi da ña yicá da sahá ña cán quea nacaja cáhnu ini da sahan tóo jiuhún cán sahá ña yicá ndíví da cán. Ta viti cachún xihin i, Simón, ndá da cáhún tixi ndíví da yóho cacuu da da quihvi ini chága mé da, da nacaja cáhnu ini saha cuénta ña nasayicá da cán —nacachi Jesús xihin Simón.

43 Anda já nanducú ñehe Simón cán tuhun nu Jesús já nacachi da já xihin á:

—Cája i cuénta ña quihvi ini chága da nasayicá cuahá jiuhún cán nu dá —nacachi da.

Anda já nacachi Jesús já xihin Simón:

—Mé a ndaa cáhun —nacachi a.

44 Anda já nasandehé Jesús ñá nachojo sítí sahá cán já nacachi a já xihín Simón:

—Candehé vaha ñañáha jan, Simón. Naquihvi i vehún joo coó nasahún ticuúí ndoo sahá i. Joo ñañáha yóho najácuchu ñá sahá i xihín ticuúí nuu ña. Ta tá nandihí já najáhichí ñá sahá i xihín ijí jini ña.

45 Ta yóho, coó natatí yuhún sajóho yehe tá nasaa i vehún. Joo ñá yóho, janda nani naquihvi ñá vehún tátí yuhu ñá sahá i. Ta anda viti ñuhú cája ñá a.

46 Ta ni coó nachojó tohún sítí jini i tá naxinu i vehún. Joo ñá yóho nachojó ñá sítí támi sahán sahá i.

47 Ta cáchí i xuhun, Simón, ña xihín ña cája ñá yóho náha ña mé a ndaa quihvi ini ñá yehe jáchi nacaja cáhnu ini i sahá cuachi ñá vatí cuahá ndivaha cúu á. Joo ndá na cáhán ña chá cuití va cuachi cája cáhnu ini i saha, na cán cúu ri na chá cuití quihvi ini na yehe —nacachi Jesús xihín Simón.

48 Anda já nacasáhá cáchí a já xihín ñañáha cán:

—Sa nacaja cáhnu ini i sahá cuachún viti.

49 Ta tóco ndihí java ga na nataca ndúu coo nu mesa vehe Simón cán nacasáhá cáchí xihín táhan na já:

—Ndá taa cúu da yóho jáchi janda cuachi cája ñayivi cája cáhnu ini da saha —nacachi xihín táhan na cán.

50 Anda já nacachi Jesús já xihín ñañáha cán:

—Nacacu ndaa ínimun jáchi nacandee ínun yehe. Cuanúhu ta a ndícani ga ínun viti —nacachi Jesús xihín ña.

8

Tá java najihí chindeé na Jesús

1 Tá nandihí nayaha ña yóho já nacasáhá Jesús xíca nuu a cuahá ñuu náhnu xihín ñuu válí ña caxi tuhun a xihín ná ña sa nacayati quiví cacomí Ndióxi cuéntá saha ná. Ta ndíco ndíhuxu ivi na apóstol cán mé á.

2 Ta nasandaca táhan java ri najihí xihín á, na natavá mé á ínimá quini ini xihín na nandaja vaha mé á nuú cuehe nasandoho na. Tañu najihí yóho nasandacaan ñá naní María, ñá cáhan na Magdalena xihín. Mé María yóho cúu ñá natavá Jesús usa ínimá quini ini.

3 Ta catáhan ri in ñá naní Juana cuahan ñá xihín na cán. Mé Juana cúu ñá ñájihí da naní Chuza, da cómi cuéntá sahá vehe Herodes. Ta jári in ñá naní Susana naxíca nuu ñá xihín Jesús. Cuaha chága najihí naxíca nuu na xihín á ta nachindeé ñahá na xihín ña cómi na.

Sácú Jesús quiahva sahá in da sátá tata (Mt. 13:1-17; Mr. 4:1-12)

4 Naqueta ñayivi cuahá ñuu jáchi cuni na cuni na Jesús. Ta tá sa nataca cuahá ñayivi nu ín Jesús, nacasáhá cáhan xihín ná. Ta nasacu a in quiahva nu ná já nacachi a já xihín ná:

5 —In da sátá tata naquee da cuahan da cata da ña. Ta tá sátá da ña cuahan da já nacuyu java ña íchi. Ta tá nayaha ñayivi já nachíníhni saha johó na a ta já naxinu laa nasaxí rí ña.

6 Ta java tata cán nacuyu a tañu yuu. Ta tá nanduta mé tata cán, cama chá nahíchi a jáchi íchí ndivaha tañu yuu cán.

7 Ta java ga tata cán nacuyu a tañu tohínú ta tá nanduta ña já nanditáha ndihí a nacaja tohínú, dó nasahnu xihín á cán.

8 Joo java tata nacuyu a nu ñuhú vaha. Ta tá nasahnu a já najáquee na cuahá ñaha nu á. Janda in ciento tata nacana jatá in in nuú tata cán —nacachi Jesús xihín ná.

Ta tá nandihí nandicaní Jesús ña yóho nu ná já nacahan cóhó a nu ná já nacachi a já xihín ná:

—Ndá ndó, na ín johó, ná cuni johó ndó —nacachi Jesús xihín na cán.

9 Anda já nacasáhá na xíca tuun xihín á cán ndáca tuhún na mé á ndíá cuni cachi quiahva nacachi a xihín ñayivi cán.

10 Ta nanducú ñehe Jesús tuhun nu ná já nacachi a já xihín ná:

—Ña coó nacandaa ini ndó jihna, ña cán cándaa ini ndó viti jáchi nasuná Ndióxi xíní túní ndó cándaa ini ndó ndá quiahva cacomí mé á cuéntá sahá ñayivi. Joo sácú u quiahva nuú java ga ñayivi já quea vatí sándehe na joo cúu ná tátuhun na co tívi nuu. Ta vatí xíní johó na, cúu ná tátuhun na jóho jáchi co cándaa ini na ña cáhan i xihín ná —nacachi Jesús xihín na xíca tuun xihín á cán.

Ndicani Jesús ña cuni cachi quiahva nasacu a nuú na cán

(Mt. 13:18-23; Mr. 4:13-20)

11 Anda já nacachi Jesús já xihin ná:

—Ña yóho cuni cachi quiahva nasacu u nuú ñayivi yóho: Mé tata cán cúu á yuhú nuú tuhun Ndióxi, ña xíca java na cáhan na xihin ñayivi.

12 Mé tata ña nandicava íchi cán náha nu yo ndá quiahva in java ñayivi. Xini johu na tuhun Ndióxi joo tá nandihí já vaxi tiñhá sacuahá ta cája rí xihin ná ña ndíndójó na ña já ná a cándúsa na tuhun Ndióxi ña ná a cácu ndaa ínimá ná.

13 Ta tata ña nandicava tañu yuu cán náha nu yo ña ndúu java ñayivi ta xini johu na tuhun Ndióxi ta cájii íni na ndíquehe na ña. Joo sahá ña co ñehe íni yóho á cuhun cúná a sahá ña cán quéa chá tiempo cuití va cándúsa na tuhun Ndióxi. Jáchi tá casáhá ndóho ini na sahá tuhun Ndióxi chí jándacoo va na ña.

14 Ta tata ña nandicava tañu tohíñú cán náha nu yo ña ndúu java ñayivi ta xini johu na tuhun Ndióxi joo co jándacoo na íchi naxica na jihna. Ta casáhá ndicani ini na sahá ñaha ñuyívi yóho ta casáhá na catóo na canduu cuahá ñaha cuicá nu ná ta casáhá ndicají ini na caja na ña núu. Sahá ña cán quéa cúu á tátuhun tata ña co cána ñaha jáquee na nuu jáchi coo nasahnu na xihin tuhun Ndióxi.

15 Joo tata ña nandicava nu ñuhú vaha cán náha nu yo ña ndúu java ñayivi ta xini johu na tuhun Ndióxi xihin ndinuhu ini na ta cája na ña sáhdá a nu ná. Ta sahá ña ndíco cáhnu na Ndióxi ta co jándacoo na mé á sahá ña cán quéa cúu ná tátuhun tata nasahan cuahá ñaha ña cuu jáquee na nuu jáchi sáhnu na xihin tuhun Ndióxi —nacachi Jesús ndicani a nuú na xíca tuun xihin á cán.

Sácu Jesús in quiahva sahá in lámpara
(Mr. 4:21-25)

16 Ni in túhún toho ñayivi co ndícahmi na in lámpara ta anda já chíjahvi na jatá xihin in ñaha. Ta ni co chícaan jehé na ña tixi xito. Ña cája na quéa chínúu jícó na ña já ná yehe a nuú na quíhvi ini vehe cán.

17 Ni in túhún toho ñaha a cuú coo jehé nahá jáchi xinu quivi já ndáca náha nu á.

Ta ni in tuhun nacahan jehé ñayivi a cuú coo jehé nahá jáchi xinu quivi já candaa ini tóco ndihi ñayivi sahá tuhun nasahin jehé cán.

18 'Sahá ña cán quéa ndítahan coo johu vaha ndó nu cáhan i xihin ndo. Jáchi dá in ñaha nuu, ñehe táhvi dá coo chága ñaha nu dá joo dá coo ñaha nuu, janda ña loho in nu dá ndindaa —nacachi Jesús.

Tá naxinu coo náná Jesús xihin ñani a nu in a

(Mt. 12:46-50; Mr. 3:31-35)

19 Anda já naxinu coo náná Jesús xihin ñani a mé nu in a cán. Joo coo nacuu cayatí na nu á jáchi a juú quiahva nachutú ñayivi ndúu na xihin á cán.

20 Anda já nasahan in da caxi tuhun da xihin Jesús já cáchi dá já xihin á:

—Jata véhe cáa in nánún xihin ñanún ta cahan na xuhun cuni na —nacachi dá cán xihin Jesús.

21 Anda já nacachi Jesús xihin tóco ndihi ñayivi ndúu cán já:

—Ndá na xini johu tuhun Ndióxi ta cája na ña cáchi a, na cán cúu ná tátuhun náná i xihin ñani i —nacachi Jesús xihin ná.

Tá najacatáji Jesús tachí xihin tañuhú tá ndícojo do

(Mt. 8:23-27; Mr. 4:35-41)

22 In quivi naquihvi Jesús ini in barco xihin na xíca tuun xihin á. Ta já nacachi a já xihin ná:

—Cóho inga xoo tañuhú yóho.

Anda já naquee na cuahan na.

23 Ta nani xójo cava na tañuhú cán cuahan na já nanaá ini Jesús naquiji á. Ta in náa cuití naxinu in tachí quini ndivaha nuú tañuhú cán ta nacasáhá ndíndita dó ta jáchutú do ini barco cán. Ta chí iyo ndivaha cáa jáchi cuu cacoo barco cahá ticuú.

24 Anda já nasahan na ndíñehe na Jesús já nacachi na já xihin á:

—Maestro, Maestro. Cácoo barco yo cahá ticuú cuahan do —nacachi na xihin á.

Anda já nandico Jesús já nacasáhá janani a tachí xihin ticuú ndícojo cán. Tá nandihí já najáya mé á tachí xihin ticuú chí táji nú uun nacandoo nuú tañuhú cán.

25 Anda já nacachi Jesús já xihin na xíca tuun xihin á:

—Ndaja vaha co cándeé ini ndó yehe —
nācachi a.

Joo nā cán nāyihví nā ta nācatóntó nā. Ta
chí jandá ndáca tuhún táhan na já cáchí nā
já:

—Ndá dā cúú dataa yóho ña anda tachí
xihín tañuhú cándúsa nu cáhan dā —
nācachi xihín táhan nā cán.

*Tá natava Jesús ínimā quini nasañuhu ini
in dataa ñuu Gadara*

(Mt. 8:28-34; Mr. 5:1-20)

²⁶ Tá nandihí já cuahan nā ta naxinu coo
na ñundáhyi cuéntá Gadara, ña cándo inga
xoo tañuhú ta ndícoto nihni táhan xihín
estado Galilea.

²⁷ Tá nanuu Jesús barco cán já nācayati in
dataa, dā ñuu Gadara cán nu á. Mé dā yóho
sa nācanahá ndivaha ñuhu ínimā quini ini
dā. Ta já cáa vichí láhlá dā xíca nuu da. Ta
ni coo ín da vehe. Tañu nu jánduxu nā ndii
cán va ín tuun dā.

²⁸ Tá naxini da Jesús nādicava xítí dā nu
á ta já nācayuhú dā já nācachi da já xihín á:

—Ndá cuéntá quea vasún quihví nuún
xihín i. Yóhó cúún Jesús, dā cúú in tuhún
jini já jahyí Ndióxi, ña cáhnu ndivaha. Xíca
tahví i nuun ña ná a jándohún ini i.

²⁹ Nācachi da ña yóho xihín Jesús jáchí
nācasáhá sáhdá mé á chuun nu ínimā
quini cán ña ná quee rí ínimā dā cán. Ta
cuahá tañu nāsañiin rí dā. Ta vatí nācató
nā ndáha dá xihín saha dá xihín cadena joo
nāsañinda tuhún dá ña nācāja rí quini cán.
Ta já nācāja rí ña ná cunu da cuhun dā chí
yucú íchí nuú co ndúu ñayivi.

³⁰ Nādaça tuhún Jesús mé rí quini cán já
nācachi a já xihín rí:

—Ndaja nanún.

Anda já nāducú ñehe dā cán tuhun nu á
já nācachi da já xihín á:

—Legión naní i.

Nācachi dā cán ña naní dā Legión jáchí
cuahá ndivaha rí quini nāndihví rí ini da.

³¹ Ta mé rí quini ñuhu ini dā cán naxica
tahví rí nu Jesús ña ná a chindahá a rí cuhun
rí nu ndúu ínimā ndii.

³² Ta yati in ndica yucu cán nāsanduu
cuahá ndivaha cóchí xixáhan rí. Saha ña
cán quea naxica rí quini cán ñamaní nu
Jesús ña ná ndihví rí ini cóchí ndúu cán.
Anda já nāsañan Jesús ñamaní nu rí.

³³ Chí naquee rí quini dataa cán cuahan
rí já nāndihví rí ini cóchí cán. Ta tóco ndihí
cóchí yóho xínu rí cuahan rí nanuu rí nu
ndáyi já nājaqueta nuu rí mé rí ini tañuhú
cán ta já nācāndaa rí ticuúí já naxihí rí.

³⁴ Tá naxini mé dataa ndáá cóchí cán ña
yóho já naxinu da cuahan dā caxi tuhun da
ña nāyaha yóho nuú ñayivi ñuu Gadara cán
xihín nuú java ga nā ndúu yati cán.

³⁵ Anda já naqueta ñayivi sándehe nā ña
nācuu cán. Ta tá naxinu coo na nu ín Jesús
cán já naxini na ín coo mé dā nasañuhu
rí quini ini cán saha Jesús. Ta sa nāndaca
ndixi da jáhma ta chí sa nāndicaxí táhyí ini
dā. Tá naxini na ña yóho chí nāyihví nā.

³⁶ Ta nā naxini nuú natavá Jesús rí quini
ini dataa cán, nā cán cúú nā nāndicani ña
nuú nā coo naxini cán.

³⁷ Tá naxini johu nā ñuu Gadara cán
ndaja nāsañiin já naxica tahví ndihí na
nu Jesús ña ná quee a cuhun a jáchí yihví
ndivaha na. Saha ña cán quea nāndihví
tucu Jesús ini barco cán ña ná quee a cuhun
a.

³⁸ Joo tá cámaní quee a cuhun a já
nācasáhá dā naqueta rí quini ini cán xíca
tahví dā nu Jesús ña ná quiahva mé á
ñamaní cuhun dā xihín á. Joo nāsañinda
Jesús chuun nu dá ña ná cándo da. Já
nācachi a já xihín dá:

³⁹ —Cuanúhu vehún. Ta já ndicanún nuú
nā vehún ndaja náhnu ñaha nācāja Ndióxi
xuhun —nācachi Jesús xihín dā cán.

Anda já naquee dā cán cuahan dā. Já
nāndicani da nu tóco ndihí nā Gadara cán
ndaja cáa ña nācāja Jesús xihín dá.

*Tá nandaja vaha Jesús jahyí jíhí Jairo
xihín in ña nācāni ndaa ndáha jáhma á*

(Mt. 9:18-26; Mr. 5:21-43)

⁴⁰ Tá nāndicó coo Jesús inga xoo tañuhú
cán, a juú quiahva cávatá ñayivi naxinu nā
ndiquehe na mé á jáchí mé cán nāsanduu
na ndátí na mé á.

⁴¹ Anda já nācasaa in dataa naní Jairo,
dā sáhdá chuun veñuhu. Mé Jairo yóho
naxinu dā nācaxítí dā saha Jesús já naxica
tahví dā nu á ña ná cuhun a vehe da.

⁴² Jáchí xihí ña loho cúú jahyí jíhí dā ta in
já cúú ña nu dá ta ndácaan ña tátuhun uxu
ivi cuia. Chí naquee Jesús cuahan ta naní

xíca cuahan vehe Jairo cán a juú quiahva cuahá ñayivi ndíco na jatá cuahan na ta chí janda cándíhi na mé á cuahan na.

⁴³ Ta tañu ñayivi cuahan cán ndácaan in ñáñáha ta ndítahví niñá ñá tixi uxu ivi cuia. Ta najándihi ndihi ñá jiuhún ña nuú na cája tátá ñayivi joo ni in na coó nacu caja tátá ñahá.

⁴⁴ Joo nacayati ñá chí jata Jesús ta natiin ñá yúhu jáhma á. Chí ivi laá nasacuijn niñá cán.

⁴⁵ Anda já nacasáha Jesús ndáca tuhún a tóco ndihi ñayivi já nacachi a já xihin ná:

—Ndá ndó nacani ndaa ndáha yehe — nacachi a xihin ná.

Joo ni in na coó nasahan tuhun nu á. Sahá ña cán quéa nacachi Pedro xihin java ga da xica tuun xihin mé á cán já xihin á:

—Maestro, a juú quiahva cándíhi ñayivi mé ndó ta chindahá nihni joho na mé ndó vaxi na ta cáa ga mé ndó ndáca tuhún ndo ndá na nacani ndaa ndáha ndohó — nacachi da cán xihin á.

⁴⁶ Anda já nacachi Jesús já:

—Íin in na nacani ndaa ndáha yehe jáchi nacandaa ini i ña nandivaha in na xihin ndée mí i — nacachi Jesús.

⁴⁷ Joo ndaja coo mé ñá nandivaha cán tá naxini ñá ña nacandaa ini Jesús sahá ña nacaja ñá já nandiquiji ninu ñá xihin ña yíhví ña ta já naxinu coo ña nacaxítí ña nu Jesús. Ta nu ndíhi ñayivi ndúu cán nacasáha ña ndícani ñá nu á ndá cuéntá quéa nacani ndaa ndáha ña mé á chí ivi laá nandivaha ñá.

⁴⁸ Anda já nacachi Jesús já xihin ña:

—Jahyi a, nandivahún jáchi nacandúsún yehe. Cuanúhu. Ta a ndícani ga inún — nacachi Jesús xihin ña.

⁴⁹ Ta nani cáhan Jesús xihin ñá cán já naxinu in da naquixi chí vehe Jairo, da sáhdá chuun veñuhu cán. Já nacachi da cán já xihin dá:

—Sa naxihí va jahyi ndó. A jáquihvi ga ndó da xica jánaha ñayivi jan.

⁵⁰ Joo tá naxini joho Jesús ña nacachi da cán já nacachi a já xihin Jairo:

—A cáyihví tohún. Candúsa cuití vún yehe chí ndivaha va jahyún — nacachi Jesús xihin dá.

⁵¹ Tá naxinu coo Jesús vehe Jairo cán coo naxeen a quiahva ñamaní ña ná quihvi ñayivi ini vehe cán xihin á. Na naquihvi xihin á nasacuu Pedro xihin Jacobo xihin Juan xihin tátá mé ñá loho cán xihin náná ña.

⁵² Jandá joho ndíváa ñayivi sácu ndivaha na ndúu na saha ñá loho cán. Anda já nandicahan Jesús xihin ná já nacachi a já:

—A cuácu ndó. Coó naxihí toho ñá loho yóho. Quiji cuití va ñá — nacachi a xihin ná.

⁵³ Joo nacasáha na cán sácu ndaa na Jesús jáchi xini na ña sa naxihí ñá loho cán ta sa cúu ñá ndí.

⁵⁴ Anda já natiin Jesús ndáha ñá naxihí cán já nacahan cóhó a xihin ña já nacachi a já:

—Ñá loho, cuándaco.

⁵⁵ Chí ivi laá nanditacu ñá loho cán já nandicoo ñá. Ta nasahnda Jesús chuun ña ná quiahva na ña cuxu ñá.

⁵⁶ Chí a juú quiahva nacamóntó tátá náná ñá loho cán sahá ña nacaja Jesús. Joo nasahnda Jesús chuun nu ná ña ná a ndícani na nuú ni in ñayivi sahá ña nayaha.

9

Tá nanchindahá Jesús ndíhuxu ivi na xica tuun xihin á ña ná cuhun na caxi tuhun na tuhun Ndióxi nuú ñayivi

(Mt. 10:5-15; Mr. 6:7-13)

¹ Najánditaca Jesús ndíhuxu ivi na xica tuun xihin á já nasahan ndée nu ná ña ná cuu tavá na tá nuú ínima quini núhu ini ñayivi ta nasahan ndée mé á nu ná ña ná cuu ndaja vaha na tá nuú cuehe ndóho ñayivi.

² Nasahnda Jesús chuun nu ná ña ná caxi tuhun na xihin ñayivi ña sa nacayati quiví cacomí Ndióxi cuéntá saha ná. Ta nasahnda chuun nu ná ña ná ndaja vaha na na quíhvi.

³ Ta nacachi a já xihin ná:

—A cáñehe ndó ñaha cuhun ndó íchi. Ni garróte ni yátí ni pan ni jiuhún a cáñehe ndó cuhun ndo. In tuhún cotó cañehe ndó cuhun xihin ndo.

⁴ Tá ná xinu coo ndó in vehe, canduu ndó vehe jan janda quiahva ná ndindaa quiví quee ndó cuhun ndo.

⁵ Ta ndá ñuu nuú co cúni na ndiquehe vaha na ndohó, cuáhán quee ndó ñuu jan ta catí ndó ña yácá saha ndo já ná ñaha ña cuahan cuachi na cán jata mé va na — ñacachi Jesús xihín ná.

⁶ Anda já ñaquee na cán cuahan na ta nasahan na naxica nuu na ndijáá ñuu válí. Xíca na cáxi tuhun na nuú ñayivi tuhun vaha cáhan saha Jesús, mé a cuu jácacu ñahá. Ta ndája vaha na na quíhvi.

Tá naxihí Juan, da ñacaja ndúta ñayivi
(Mt. 14:1-12; Mr. 6:14-29)

⁷ Ta ndaja coo Herodes, da cúu gobernador cán ñacandaá ini da saha tóco ndihi ña cája Jesús. Ta chí co xíni da ndía cahán da jáchi java na cáchi na xihín dá ña cúu Jesús mé Juan, da najácandúta ñayivi ta viti nanditacu tucu da cáchi java na xihín dá.

⁸ Ta java ri na cáchi na ña cúu Jesús profeta Elías, mé da naxica nuu sanahá ta viti naxinu tucu da nu ná. Ta java na cáchi na ña cúu á in táhan na profeta nasanduu sanahá joo túni quea nanditacu tucu a xíca nuu a, cáchi na.

⁹ Anda já ñacachi Herodes já xihín ná:

—Mí yehe cúu da nasahnda chuun ña ná chituhun ná jico da naní Juan cán. Ta co xíni ndá da cúu da naní Jesús yóho. Jáchi mé a ndaa xíni johó i ña cája cuahá ndivaha da ña náhnu —ñacachi Herodes cán.

Ta chí cúni Herodes cuni da Jesús.

Sáhan Jesús ña cuxu uhun mil taa
(Mt. 14:13-21; Mr. 6:30-44; Jn. 6:1-14)

¹⁰ Tá nandicó coo na ñachindahá Jesús caca nuu cahán tuhun Ndióxi xihín ñayivi cán nu ín mé á já nandicani na nu á saha tóco ndihi ña ñacaja na nuú nasahan na. Anda já ñehe Jesús na nasahan na in nu cáa xóo yati chí ñuu Betsaida cán.

¹¹ Joo tá ñacandaá ini ñayivi ndá xoo cuahan Jesús já ndico na cuahan na. Ta nandiquehe vaha Jesús na ta nandicani a nu ná ña sa ñacayati quívi cacomí Ndióxi cuéntá saha ná. Ta nandaja vaha mé á na quíhvi.

¹² Ta tá sa cáhini cuahan já ñacayati ndíhuxu ivi na apóstol cán nu Jesús já ñacachi na já xihín á:

—Cahan ndó xihín ñayivi ná quee na cuhun na ndiquehe ndéé ná ta ná nducú

na ña cuxu na ñuu válí xihín nuú yati chá yóho nu ndúu ñayivi jáchi coo ñaha mé va nu ndúu yóho —ñacachi na cán xihín Jesús.

¹³ Anda já ñacachi Jesús já xihín ná:

—Mé ndó quiahva ndó ná cuxu na — ñacachi a xihín ná.

Anda já ñacachi na cán já xihín á:

—Uhun víxi pan xihín ivi laá tiyacá cuití va ín nuú nde. Ta ama ná cuhun ri ndehe cueen nde ñaha cuxu tóco ndihi ñayivi ndúu yóho —ñacachi na cán.

¹⁴ Jáchi ñayivi cán cúu ná tátuhun uhun mil taa. Anda já ñacachi tucu Jesús já xihín na xíca tuun xihín á:

—Cacu coo ndó na tá táhnda ivi jico uxu, ivi jico uxu na.

¹⁵ Chí nasacu coo ndíhuxu ivi na apóstol cán na.

¹⁶ Anda já ñatiin Jesús ndíhuhun pan xihín ndívi tiyacá cán já nasandehé a chí indiví já nandiquiahva ndixahvi nu Ndióxi sahá ña cán. Tá nandihí já nasahnda java táhvi a ña já nasahan ña nuú na xíca tuun xihín á cán já nanditahnda ña cuxu ñayivi ndúu cán.

¹⁷ Ta tóco ndihi na ñañehé ñaxixi janda quiahva ñachutú tixi na. Tá nandihí já najáchutú na uxu ivi toyicá xihín ña ñacandoo ñaxixi ndihi na cán.

Tá náhma Pedro ña cúu Jesús mé a ñachindahá Ndióxi cacomí cuéntá sahá ñayivi

(Mt. 16:13-28; Mr. 8:27-9:1)

¹⁸ In tañu tá ñacana xóo Jesús xihín na xíca tuun xihín á ña caça tahví a nu Ndióxi já nandaca tuhún mé á na já ñacachi a já xihín ná:

—Ndá da cáchi ñayivi cúu yehe —ñacachi a xihín ná.

¹⁹ Anda já nanducú ñehe na cán tuhun nu á já ñacachi na já xihín á:

—Java ñayivi cáchi na ña cúu ndó Juan, da najácandúta ñayivi. Ta java na cáchi na ña cúu ndó profeta Elías. Ta cáchi java ga ví na ña cúu ndó in táhan profeta nasanduu sanahá, da nanditacu tucu xíca nuu viti — ñacachi na xíca tuun xihín Jesús cán.

²⁰ Anda já nandaca tuhún Jesús na já ñacachi a já xihín ná:

—Ta ndóhó ri ndá da cáchi ndo cúu u — ñacachi a xihín ná.

Anda já nacachi Pedro já xihín á:

—Mé ndó cúú Cristo, ña nachindahá Ndióxi cacomí cuéntá sahá ñayivi — nacachi da xihín á.

²¹ Joo nacachi Jesús xihín na xica tuun xihín a ña coto a ndícani na ña yóho nuú ni in túhún ñayivi.

²² Anda já nacachi a já xihín na cán:

—Yehe cúú u da nachindahá Ndióxi nduu ñayivi ta ndítahan nuú i ndoho ndivaha ini i. Ta na sacuahá veñuhu xihín na sacuahá nuú jutú xihín na jánahá ley Moisés candají na yehe ta anda já cahní na yehe. Joo tá ná xinú uní quivi já nditacu tucu u —nacachi a xihín ná.

²³ Tá nandihí já nacachi tucu a já xihín ndihí na xica tuun xihín á cán já:

—Ndá na cúní candico yehe ndítahan nu ná ndihí chága ini na sahá yehe a juú ga saha mé ná. Ta ndijáá ní quivi ndítahan coo tiahva na ndoho ini na sahá yehe ta coo caja toho a ná quivi na sahá i.

²⁴ Jáchi ndá na cátóo coo chága ñuyiví yóho ndihí saha ná. Joo ndá na sahan ndeé ini quivi sahá i ñehe táhvi ná catacu na anda ama cáa quivi.

²⁵ Vatí ná quee vaha in na ñuyiví yóho ta cómí na tóco ndihí ñaha ñuyiví joo ndá chuun queá tá nu ndihí ndihí saha ná in-dayá.

²⁶ Ndá na cacahan nuu sahá i xihín sahá tuhun vaha cáhan i quiahva já cacahan ri nuú yehe, da nachindahá Ndióxi nduu ñayivi sahá na cán tá ná quixi i cacomí i cuéntá sahá ñayivi. Mé tiempo cán nahá ndaja cáhnu cúú yehe jáchi quixi i xihín ndée Ndióxi ta xihín ndée tátó mé á viti.

²⁷ Mé a ndaa ná cahan i xihín ndo ña ndúu java na ndíta yóho ta ni a quivi toho na janda quiahva ná xinú quivi cuni na cacomí Ndióxi cuéntá sahá ñayivi —nacachi Jesús xihín na cán.

Tá nandijama Jesús quiahva cáa
(Mt. 17:1-8; Mr. 9:2-8)

²⁸ Ta tá nayaha tátuhun una quivi nacachi Jesús ña yóho xihín ná já ndaa jini in yucu ña caça táhvi a nu Ndióxi. Ta ndáca táhan Pedro xihín Jacobo xihín Juan cuahan na xihín á.

²⁹ Ta nani xica táhvi Jesús nu Ndióxi já nandijama quiahva cáa nuu á. Ta janda jáhna ndíxi a cán nandiyaa cachi ña ta chí a juú quiahva yehe ña.

³⁰ Anda já naxini na ivi taa ndúu da ndítuhún da xihín Jesús. In da cán cúú Moisés ta inga da cán cúú Elías.

³¹ A juú quiahva ndató ndíyehe ndaa nu ndúu na cáhan na xihín Jesús ta ndítuhún na sahá ña jándoho na ini a ñuu Jerusalén ta já quivi a.

³² Ta vatí cúní cuju Pedro xihín java ga na catáhan xihín dá cán nasandita na. Ta naxini na ndá quiahva cáhnu cúú Jesús xihín da ivi táhan ndúu xihín á cán.

³³ Ta tá nacasáhá cáxícá Moisés xihín Elías cán nu Jesús cuahan na já nacachi Pedro já xihín Jesús:

—Maestro, ndaja vaha cúú á ndúu nde yóho jáchi já cuu cavaha nde uní vehe tayahvá válí. In a coo mé ndó ta inga coo Moisés ta inga coo Elías —nacachi da.

Joo chí coo xini mé va Pedro ndía cáa cáhan da.

³⁴ Ta nani cáhan da ndíta na já nanuu in vico jatá ná ta najáahví a na. Ta chí nacasáhá yíhvi na xica tuun xihín Jesús cán tá naxini na nacava nuu vico cán na.

³⁵ Anda já naxini johó na cáhan in a tañu vico cán já nacachi a já:

—Da yóho cúú jahyi maní i. Cuni johó ndó nu cáhan da.

³⁶ Tá nandihí naxini johó na ña cáhí a cán já naxini na ña ín in túhún jini mé va Jesús. Ta mé na xica tuun xihín á cán nasahin táji yúhu ná sahá ña naxini na ta coo nandicaní na sahá nuú ni in túhún ñayivi.

Tá nandaja vaha Jesús in taa loho ndacaan inima quini ini
(Mt. 17:14-21; Mr. 9:14-29)

³⁷ Ta inga quivi itaan tá nanuu Jesús xihín na xica tuun xihín á jini yucu cán já naqueta cuahá ndivaha ñayivi cuahan na ndique táhan na xihín Jesús.

³⁸ Anda já nandicahan cóhó ndivaha in dataa tañu tóco ndihí ñayivi cán já nacachi da já xihín Jesús:

—Maestro, caja ndó ñamaní candehé loho ndó jahyí i jáchi in túhún jini já cúu dá nuú i.

³⁹ Ta ndácaan in ínima quini ini da ta tiiin rí dá ta cája rí xihín dá ña ná ndahyí cóhó da. Ta cája rí ña ná quivi yihí da ta já cána cuyu chiquiñu yúhu dá. A juú quiahva cája xixi rí quini cán xihín dá ta chí cō cūni rí janí rí da.

⁴⁰ Sa naxica tahví i nuú na xica tuun xihín ndo ña ná tavá na mé rí quini cán joo cóo nacuu caja na ña —nacachi da cán xihín Jesús.

⁴¹ Anda já nacachi Jesús já:

—Ndáhví nahá nacuu ndó jáchi sa cuahá ndivaha quivi in i xihín ndo ta a ñaha candee ini ndó yehe. Cúu ndó ñayivi quini ndivaha chí cō ndéé ga ini i xihín ña cája ndó. Taxi ndó taa loho jan chóho —nacachi Jesús xihín ná.

⁴² Ta tá cáyati taa loho cán cuahan da nu Jesús já nacaja rí quini cán ña ná ndicava da nu ñúhu ta cán nacaja rí ña ná quivi yihí tucu da. Anda já najánani Jesús rí quini cán já nandivaha taa loho cán ta nandiquiahva mé á da nu tátá da.

⁴³ Ta tóco ndihi ñayivi nasanduu cán nacatontó na tá naxini na ña náhnu cája Ndióxi.

Ta nani catontó na ndúu na sahá ña náhnu cája Jesús cán já nacasáhá cáhan mé á xihín na xica tuun xihín á. Já nacachi a já xihín ná:

⁴⁴ —Cuni johó vaha ndó ña yóho ta coto a ndíndójó ndó ña. Tiin na yehe, da nachindahá Ndióxi nduu ñayivi ta já ndiquiahva na yehe ndahá java dataa —nacachi Jesús xihín ná.

⁴⁵ Joo ni in táhan na xica tuun xihín á cán cóo nacandaa ini na ndía cūni cachi Jesús. Jáchi cóo nanuna xini túni ná ña ná candaa ini na ña. Ta yihví na ndaca tuhún na mé á ña ná ndicani a ña nu ná.

Ndicani Jesús ndá na cúu na in chága saha (Mt. 18:1-5; Mr. 9:33-37)

⁴⁶ Tá nandihí já nacasáhá na xica tuun xihín Jesús cán ndítuhún xihín táhan na saha ndá da cúu da cáhnu chága tañu mé ná.

⁴⁷ Anda já naxini Jesús ña cáhvi ini na cán já natiin a in taa loho já nasacu ndichí a da jín á.

⁴⁸ Já nacachi a já xihín ná:

—Ndá na ná ndiquehe vaha taa loho yóho sahá ña quíhvi ini na yehe, ndiquehe ri na yehe viti. Ta ndá na ndiquehe yehe, ndiquehe ri na tátá i, mé a nachindahá yehe. Ndá na cóo saha mé tañu tóco ndihi ndó, na cán cúu na in chága saha nu Ndióxi —nacachi Jesús xihín na cán.

Tá ndúu java na ndiquehe saha yo já quéa cuahan na xoo í (Mr. 9:38-40)

⁴⁹ Anda já nacachi Juan já xihín Jesús:

—Maestro, naxini nde in dataa ta cáhan da quivi mé ndó já tavá da ínima quini ñúhu ini ñayivi. Joo cóo xica nuu da xihín yo sahá ña cán quéa nasaji nuu nde nu dá caja da ña —nacachi da cán.

⁵⁰ Anda já nacachi Jesús já xihín dá:

—A cáji nuu ndó nu dá sahá ña cája da ña. Jáchi ndá da cóo ndíndita caja xixi xoho, mé da cán cuahan da xoo mí —nacachi Jesús.

Jánani Jesús Jacobo xihín Juan

⁵¹ Tá nacayati quivi ndíndita Jesús cuhun a indiví cóo nayihví a quehe a íchi cuahan chí ñuu Jerusalén.

⁵² Nachindahá Jesús java na xica xihín á ña ná cuhun cuéé na in ñuu loho ndácaan estado Samaria cán já ná nducú na nuú canduu tóo na chí naquee na cuahan na.

⁵³ Joo cóo naxeen toho na Samaria cán ndiquehe na Jesús jáchi naxini na ña cuahan chí ñuu Jerusalén.

⁵⁴ Tá naxini Jacobo xihín Juan cán ña yóho já nacachi da já xihín Jesús:

—Á cóo cūni ndó, xitoho i ña ná cahnda nde chuun ña ná cuyu ñúhu cáyi indiví já ná jánaá nde sahá ñayivi yóho tá quiahva nacaja profeta Elías sanahá —nacachi na xihín á.

⁵⁵ Anda já nandicoto nihni Jesús nu ná já nacasáhá jánani a na já nacachi a já xihín ná:

—Cō xini ndó ña a váha toho cáhvi ini ndó já.

⁵⁶ Jáchi cóo naquixi toho yehe, da nachindahá Ndióxi nduu ñayivi, ña ná jánaá i sahá ñayivi. Naquixi i ñuyíví yóho

jáchi cúni ña ná cacu ndaa ínima ná —
nācachi Jesús xihín nā cán.

Anda já naquee na cuahan nā inga ñuu
loho.

Nā cúni candico Jesús
(Mt. 8:19-22)

⁵⁷ Ta nani xíca na cuahan nā já nācachi in
dataa já xihín Jesús:

—Cúni candico i ndohó ndá nacuu nuú
cuhun ndo —nācachi da.

⁵⁸ Anda já nanducú ñehe Jesús tuhun nu
dá já cáchi a já xihín dá:

—Ndicuii cúu rí ta vatí ín cáva ñúhu rí.
Laa cúu rí ta vatí ín táca ñúhu rí. Joo yehe,
da nāchindahá Ndióxi nduu ñayivi chí ni
nuú cuju mí i coó va —nācachi a xihín dá.

⁵⁹ Tá nandihí já nācachi Jesús já xihín
inga da:

—Naha quí candico yehe.

Joo nanducú ñehe da cán tuhun nu Jesús
já cáchi da já xihín á:

—Quiahva jihna ndó ñamaní nuú i ña ná
cuhun i jánduxu tátá i já quixi i candico i
ndohó —nācachi da xihín Jesús.

⁶⁰ Anda já nācachi Jesús já xihín dá:

—Ná cuhun mé ñayivi, na a ñáha cacu
ndaa ínima jánduxu nā ndii jan. Joo
yóhó, cuahán caxi tuhun nuú ñayivi ña
sa nandindaa quiví cacomí Ndióxi cuéntá
saha ná —nācachi Jesús xihín dá.

⁶¹ Anda já nācativi inga dataa nu Jesús já
nācachi da já xihín á:

—Jesús, candico i ndohó cúni. Joo
quiahva ndó ñamaní nuú i ná cuhun loho
i ndindayí jihna ñúhú i na vehe e já quixi i
candico i ndohó —nācachi da xihín Jesús.

⁶² Anda já nācachi Jesús já xihín dá:

—Ndá da cásahá ndíco yehe ta já ndicó
coo tucu da cuahan da chí jata, cúu dá da
coó chuun toho cacomí Ndióxi cuéntá saha.
Jáchi da cán cúu dá tátuhun da tiin yata ta
cásahá da xútu da cuahan da joo tá nandihí
ndicoto nihni tucu da chí jata ta chí coó
saha dá cacomí Ndióxi cuéntá saha dá —
nācachi Jesús.

10

*Chindahá Jesús uní jico uxu taa cuhun da
cahan da tuhun Ndióxi xihín ñayivi*

¹ Tá nandihí já nācaxi Jesús inga uní
jico uxu chága dataa. Ta tá ivi tá ivi da
nāchindahá a da cuahan da já ná cuhun
cuéé da cahan da tuhun Ndióxi xihín ñayivi
ndúu tóco ndihí ñuu nuú nasacu ini Jesús
cuhun a coto nihni a ñayivi.

² Anda já nācachi a já xihín ná:

—Mé a ndaa ndúu cuahá ndivaha ñayivi,
na cúni cuni johó tuhun Ndióxi joo coó
cuahá na cúni cuhun cahan ña xihín ná.
Cúu á tátuhun vaha ndivaha nacana ní
nuú utu joo ndímaní na jáquee ña. Ña cán
quéa xíní ñúhú caça tahví ndo nuú da xihín
ñaha utu cán ña ná chindahá chága da na
jáquee nuú utu da. Quiahva já ndítahan
caça tahví ndo nu Ndióxi ña ná chindahá
chága mé á na caca nuu cahan tuhun
Ndióxi xihín ñayivi já ná ndiquehe vaha na
ña.

³ Mé ndó cúu ndó na chindahá i cuhun
caca nuu cahan tuhun Ndióxi. Mé a
ndaa iyo ndivaha cáa nuú cuhun ndo
jáchi cacuu ndó tátuhun ndicachi válí tañu
cuahá ndivahyí.

⁴ Tá naquee ndó cuahan ndo coto a
cáñehe ndó yátí cuhun ndo ni juhún ní
inga ndusa ndó a cáñehe ndó cuhun ndo.
Ta a cácuíta ndó cahan Ndióxi ndó xihín
ñayivi ndique táhan xihín ndó íchi.

⁵ Ta tá ná xinu coo ndó in vehe, jihna
ñúhú cahan Ndióxi ndó xihín na ndúu vehe
cán já cachi ndó já xihín ná: “Ná coo vaha
ini ndó, na ndúu vehe yóho”, cachi ndó
xihín ná.

⁶ Ta tá mé a ndaa ín vaha ini ñayivi
ndúu vehe cán já a cándoó núu toho tuhun
nācachi ndó xihín nā cán. Joo tá co ín vaha
ini na cán já a quéhe ndó cuéntá saha ña
nācachi ndó ña ná coo vaha ini na jan jáchi
a juú na coo vaha ini cúu toho na jan.

⁷ Tá ná xinu coo ndó in vehe nu ndiquehe
vaha na ndohó, canduu ndó mé vehe jan.
Ta a cáca nuu ndó tá vehe tá vehe nducú
ndo nuú coo ndó. Ta ndá ñaha ín nu ná
sahan na nu ndo cuxu ndó á coho ndó, tiin
ndó a ndáha ná. Jáchi ndítahan nuú in dataa
ndiquehe da ña catacu da saha chuun cája
da.

⁸ Ta tá ná xinu coo ndó in ñuu nu ndiquehe
vaha na ndohó, cuxu ndó ndía cúu mé a
sahan na nu ndo.

⁹ Ta ndaja vaha ndó ndá na quíhvi ndúu cán. Ta cachi ndó já xihín ná: “Sa nacayati quiví cacomí Ndióxi cuéntá saha ndo”, cachi ndó xihín ná.

¹⁰ Joo tá ná xinu coo ndó in ñuu nuú co cúni na ndiquehe vaha na ndohó, cuáhán ndó cáyé ñuu cán já cachi ndó já xihín ná:

¹¹ “Janda ña yáca ñatiin ndaa sahá nde ñuu ndó yóho quíji nihni nde ta xihín ña yóho náha nde ña cuahan cuachi ndó jata mé va ndó. Jáchi sa nacaxi tuhun va nde xihín ndo ña sa nacayati quiví cacomí Ndióxi cuéntá sahá ñayivi”, cachi ndó xihín ná —nacachi Jesús xihín na cán.

¹² Anda já nacachi tucu a já xihín ná:

—Tá ná xinu coo quivi caja vii Ndióxi sahá ñayivi já jándoho chága mé á ini ñayivi ñuu jan a juú ga tá quiahva najándoho a ini na ñuu Sodoma sanahá —nacachi Jesús xihín ná.

Cahan Jesús sahá ñuu nu ndúu ñayivi, na co cúni jándacoo cuachi
(Mt. 11:20-24)

¹³ Anda já nacachi tucu Jesús xihín ná já:

—Ndáhví nahá nacuu ndó, na ñuu Corazín. Ta ndáhví nahá nacuu ndó na ñuu Betsaida. Cuahá ndivaha ña náhnu nacaja i nu ndo joo coo naxeen ndó ndicó coo ini ndó jándacoo ndó cuachi ndó. Sanahá najándihi Ndióxi sahá ñuu Tiro xihín sahá ñuu Sidón sahá cuachi na. Tá ná sahan i caja i ña náhnu nuú na cán tá quiahva nacaja i nu mé ndó, sa najándacoo va na cán cuachi na, nduu. Ta chí ivi laá ndaca ndixi na jahmá ndíí ta jácuyu na yaá yíquí jini na, nduu. Jáchi xihín ña yóho jánaha na ña nandicó coo ini na sahá cuachi na.

¹⁴ Joo tá ná xinu quivi caja vii Ndióxi sahá ñayivi já ndoho chága ini mé ndó, na ñuu jan a juú ga tá quiahva nandoho ini ñayivi nasanduu ñuu Tiro xihín ñuu Sidón sanahá.

¹⁵ Ta viti cahan i xihín ndó, na ndúu ñuu Capernaum. Janda indivi cúni ndó cuhun ndó joo sahá ña sáa ini ndó cuhun ndó janda indayá, caja Ndióxi —nacachi Jesús.

¹⁶ Anda já nacachi a xihín na xíca tuun xihín á já:

—Ndá na xini johu nu cahan ndo ta cája na ña cáchi ndo já quea cúu á tátuhun cája na ña cáchi yehe xihín ná caja na. Ta

ndá na cándají ndohó cúu á tátuhun cándají ri na yehe va. Ta ndá na cándají yehe, cándají ri na Ndióxi, mé a nachindahá a yehe quixi i ñuyiví yóho —nacachi Jesús xihín na chindahá mé á cuhun cahan tuhun Ndióxi xihín ñayivi cán.

Anda já naquee na cuahan na.

Tá nandicó coo ndihuni jico uxu na nachindahá Jesús caca nuu cahan tuhun Ndióxi

¹⁷ A juú quiahva cájii ini na uní jico uxu na nachindahá Jesús cahan tuhun Ndióxi cán tá nandicó coo na. Já nacachi na já xihín Jesús:

—Tá cahan nde quivi ndó sáhdá nde chuun nu ínimá quini ta chí xini johu rí ta cája rí ña sáhdá nde nu ri —nacachi na cán xihín Jesús.

¹⁸ Anda já nacachi Jesús já xihín ná:

—Mé a ndaa quea cahan ndó jan. Jáchi naxini i xihín nuu mí i ndá quiahva naquee Satanás, rí cúu tiñahá sacuahá indivi ta nandicava rí nu ñuhu tátuhun in tasa.

¹⁹ Chí nasahan i ndée nu ndóhó ña ná cuu cahnda ndó chuun nuú tiñahá sacuahá. Já cuu cuani nihni ndó jata coo xihín jata líhma ta a ndóho ndó ni in ñaha. Ta nasahan i ndée nu ndo ña ná cuu quee vaha ndó nuú ndihi ña núu cúni tiñahá sacuahá caja rí xihín ndo.

²⁰ Vatí cájii ini ndó sahá ña cándúsa rí quini nu sáhdá ndó chuun nu ri joo ndítahan cajii chága ini ndó sahá ña sa naquee va quivi ndó ña cuhun ndó indivi —nacachi Jesús xihín ná.

Tá nacajii ndivaha ini Jesús
(Mt. 11:25-27; 13:16-17)

²¹ Ta chí mé hora já nacaja ínimá yii Ndióxi ña ná cajii ndivaha ini Jesús. Já nacasahá cáchi a já:

—Cája cáhnu i ndohó, tátá Ndióxi, ña cúu xitoho tóco ndihi ñaha ndúu indivi xihín ñuyiví. Jáchi najánaha ndó ña ndíchí ndivaha nuú ñayivi, na coo cuahá saha nuú java ga na. Ta nacaja ndó ña ná a cúu candaa ini na ndíchí xihín na tácu ini ñaha mé ndó. Já nacaja ndó jáchi já nasacu ini ndó caja ndó —nacachi Jesús.

²² Anda já nacachi a já xihín na ndúu cán:

—Nandiquiahva tátá i tóco ndihi ñaha ndahá i ña ná cacomí i cuéntá sahá. Ta ni in túhún toho ñayivi co xini vaha na yehe, da cúu in túhún jini já jahyi Ndióxi. Mé Ndióxi, tátá i cuití va xini vaha yehe. Ta ni in túhún toho na co xini vaha yo cúu tátá i. In túhún yehe, da cúu jahyi a xini vaha i yo cúu mé á. Ta yehe cúu da caxi ndá ñayivi jánaha i nuu sahá Ndióxi, tátá i já ná candaa vaha ini na yo cúu mé á —nacachi Jesús.

²³ Anda já nasandehé a nuú na xica tuun xihin á cán. Já nacasahá cáchi a já xihin mé cuití na:

—Tahví nacuu ñayivi tá ná cuu candehé na tóco ndihi ña xini mé ndó viti.

²⁴ Mé a ndaa ná cahan i xihin ndo ña cuaha táhan na profeta nasanduu sanahá ta cuaha táhan na nasacomí cuéntá sahá ñayivi sanahá cúni na cuni na tóco ndihi ña xini ndo cája i. Joo coó naxini na ña. Ta cúni na cuni johó na ña xini johó ndó cahan i xihin ndo. Joo coó naxini johó na ña.

Sácu Jesús quiahva sahá in da Samaria, da nacaja vaha

²⁵ Ta ndaja coo in da jánaha ley Moisés nandaca ndichi da cahan da xihin Jesús jáchi cúni da coto ndojó ñahá da. Ta nacachi da já xihin á:

—Maestro, ndía ndítahan caja i já ná cuu catacu u indivi anda ama cáa quivi —nacachi da xihin á.

²⁶ Anda já nanducú ñehe Jesús tuhun nu dá já nacachi a já xihin dá:

—Ndaja cáchi ley Moisés. Ndaja cáchi ley tá cáhvún ña —nacachi Jesús xihin dá.

²⁷ Anda já nanducú ñehe da jánaha ley Moisés cán tuhun nu Jesús já nacachi da já:

—“Quihvi inún Ndióxi, xitohún xihin tóco ndihi inimún ta xihin ndinuhu inún. Ta quihvi inún a xihin tóco ndihi ndéun ta xihin tóco ndihi xini túnun. Ta quihvi inún ñani táhún tá quiahva quihvi inún mún” —nacachi da cán nanducú ñehe da tuhun nu Jesús.

²⁸ Anda já nacachi Jesús já xihin dá:

—Mé a ndaa vaha va nacahun. Cuáhán caja tóco ndihi ña yóho já ñehe táhvún catacún indivi anda ama cáa quivi —nacachi Jesús xihin dá.

²⁹ Joo da jánaha ley Moisés cán cúni da candoo vaha da nuú ñayivi ndúu cán sahá ña cán quéa cáchi da já xihin Jesús:

—Yo já cúu ñani táhan i.

³⁰ Anda já nandicaní Jesús nu dá já cáchi a já xihin dá:

—In tañu naquee in dataa ñuu Jerusalén cuahan da íchi ña nanuu cuahan chí ñuu Jericó. Ta ndaja coo cán naqueta java ta cuihná nu dá. Ta natiin na da ta nacaja cuihná ndihi na ñaha da janda jáhma dá viti naquehe na. Tá nandihí já nacani quini ndivaha na da janda quiahva nasahní tóo na da. Já naquee na cuahan na.

³¹ Ta ña vaha quéa nayaha in jutú mé íchi cán. Joo tá naxini ñahá da já nayaha saa da cuahan va da.

³² Ta sa mé íchi cán nayaha ri in da naquixi chichi Leví ta tá naxini da da nandicuehe cándúhu íchi cán já nayaha saa da cuahan da.

³³ Jári in da Samaria xica cuahan mé íchi cán. Joo tá naxini da da nandicuehe cándúhu íchi cán chí natahvi ini da saha dá.

³⁴ Anda já nacayati da nu cándúhu dá. Já nacaja tátá da nuú nandicuehe da quihvi cán xihin síti xihin vino viti. Ta já nacató da nuú nandicuehe cán xihin ticoto. Tá nandihí najánda da da jata búrró jana dá já ñehe ñahá da cuahan da. Já nanducú da vehe coo tóo da quihvi cán ña ná candaa na da.

³⁵ Ta inga quivi itaan tá nasacu ini da Samaria cán quehe da íchi cuhun da já natavá da ivi jiuhún caa nasahan da nuú da xihin ñaha vehe cán. Já nacachi da já xihin dá: “Cajún ñamaní candaa vahún da quihvi yóho. Ta tá ná chicao chágún jiuhún xihin dá, a ndicani toho inún jáchi chahvi mí vi ña nun tá ná ndicó coo i”, cáchi da Samaria cán —nacachi Jesús.

³⁶ Anda já nandaca tuhún Jesús da jánaha ley Moisés cán já nacachi a já xihin dá:

—Ta viti cachún xihin i tixi ndihuni da nayaha íchi nuú nasanduhú da nandicuehe nacaja ta cuihná yóho, ndá da cúu da nanaha ña mé a ndaa táhyí quihvi ini da ñani táhan da —nacachi Jesús.

³⁷ Anda já nacachi da jánaha ley Moisés já:

—Da natahvi ini sahá da nandicuehe jan, da jan cúu da cája i cuénta nanaha da ña mé a ndaa quihvi ini da ñani táhan da —nacachi da cán.

Anda já nacachi Jesús já xihín dá:

—Ta viti cuáhán ri yóhó va, quihvi inún ñani táhún tá quiahva nacaja da Samaria yóho —nacachi a xihín dá.

Tánaſahan Jesús vehe Marta xihín María

³⁸ Naquehe Jesús íchi xíca cuahan janda quiahva naxinu coo a in ñuu loho. Ta cán nandiquehe vaha in ñá naní Marta mé á vehe ñá.

³⁹ Ta naſahiin in quihvi Marta yóho, ñá naní María. Ta naxinu coo María naſacoo ñá yati saha Jesús jáchi cúní ñá cuni johó ñá nu cáhan mé á.

⁴⁰ Joo ndaja coo a juú quiahva ndíhi ini mé Marta cája ndíví ñá ñaha cuxu na ndacaan ña. Anda já nacayati ñá nu Jesús já nacachi ñá já xihín á:

—Candehé ndo, xitoho i. Á co sándehe toho ndó ña in túhún mí i cája ndíví i ñaha ta ñá cúu quihví i jan co chindeé loho ñá yehe. Cahan loho ndó xihín ña ná chindeé ñá yehe —nacachi Marta cán xihín Jesús.

⁴¹ Anda já nanducú ñehe Jesús tuhun nu ña já cáhí a já xihín ña:

—Marta loho, a juú quiahva ndícani inún ta ndíhi inún jáchi íin ndivaha chuun nuun.

⁴² Joo íin in túhún ñaha ña íin chága saha ta cúu á ña ndítahan cajún. Ta María, ñá cúu quihvun yóho nacaxi ñá ña vaha chága. Ta ni in na a cúu caji nuu nu ñá cuni johó ñá tuhun cáhan i —nacachi Jesús xihín ña.

11

Jánaſa Jesús na xíca tuun xihín á ndaja caja na caça tahví na nu Ndióxi

(Mt. 6:9-15; 7:7-11)

¹ In tañu xíca tahví Jesús nu Ndióxi ndacaan. Ta tá nandíhi naxíca tahví a já nacachi in táhan da xíca tuun xihín á cán já xihín á:

—Jánaſa ndó ndehe, xitoho nde caça tahví nde nu Ndióxi, tátá yo tá quiahva nacaja Juan, da nacaja ndúta ñayivi. Jáchi najánaſa da nuú na naſaxíca xihín dá ndá quiahva caja na caça tahví na nu Ndióxi —nacachi da cán xihín Jesús.

² Anda já nacachi Jesús já xihín na cán:

—Tá ná caça tahví ndo nu Ndióxi já cachi ndó já:

Tátá Ndióxi, ña íin indiví, cáhnu ná cacuu quivi ndo.

Ná tandaa quí quiví cacomí ndó cuénta sahá nde.

Ta ná coo tá íin cúní mé ndó coo ñuyiví yóho tá quiahva íin indiví cája ndó.

³ Quiahva ndó nuú nde ña ndímaní nuú nde cuxu nde in in quivi.

⁴ Caja cáhnu ini ndó sahá cuachi nde tá quiahva cája cáhnu ini nde saha tóco ndíhi ña núu cája ñayivi xihín nde.

Ta a quiahva ndó ñamaní ña ná coto ndojó tiñahá sacuaſa ndehe já ná a cája nde cuachi nu ndo, já cachi ndó caça tahví ndo —nacachi Jesús.

⁵ Anda já nasacu Jesús in quiahva nu ná já nacachi a já xihín ná:

—Cúu á tátuhun tá ná cuhun ndó vehe in amigo ndo java ñuu táji ta já cachi ndó já xihín dá: “Amigo, á a quiahva tóun uní pan nuú i

⁶ jáchi nacasaſa in da xíní táhan xihín i vehe e ta cúu dá da naſahan xíca ta coo ñaha nuú i quiahva i cuxu da”, cachi ndó xihín amigo ndo.

⁷ Ta viti ná caja í cuénta nducú ñehe da ndacaan ini vehe cán tuhun nu ndo já cachi da já: “A jáquihvún yehe jáchi ndájí tuun yehé. Ta ndúu jahyi válí i quíji na xihín i nuú xito ta a cuú caja i ndacoo i quiahva i ndá ñaha nuun”, cachi da cán xihín ndo ná caja í cuénta.

⁸ Mé a ndaa ná cahan i xihín ndo ña vatí co cúní da jan ndacoo da quiahva da ñaha nu ndo sahá ña xíní táhan ndó xihín dá joo ndacoo tá ndacoo da quiahva da ñaha nu ndo sahá ña jáquihvi ndó da. Sahá ña cán quea ndacoo da quiahva da tóco ndíhi ña xíní ñúhú ndo nu ndo.

⁹ Ña cán quea cáhan i ña yóho xihín ndo: Ndá ñaha ndímaní nu ndo xíní ñúhú caça ndó ña nu Ndióxi ta já quiahva mé á ña nu ndo. Ndinducú ndo ña cúní ndo ta ñehe ndó ña caja Ndióxi. Cúu á tátuhun catí ndáha ndo yehé ta já nuna yehé nu ndo.

¹⁰ Jáchi na xíca, na cán cúu na ñehe va. Ta na nducú ñaha, na cán cúu na ndíñehe

va. Ta na cáti ndáha yéhe, na cán cúu na ndínuna yéhe nuu.

11 "Ta ndá ndó, na ndúu jahyi ta tá xíca jahyi ndó pan cuxu a nu ndo, ama cuéhe ri ndó quiahva ndó yuu nu á ña ná caxí a. Ta ama ná quiahva ndó coo caxí a tá xíca cuñu tiyacá caxí a.

12 Ta ama cuéhe ri ndó quiahva ndó líhma caxí jahyi ndó tá xíca ndivi nu ndo.

13 Vatí cúu ndó ñayivi cája cuachi joo xini vaha ndó quiahva ndó ña vaha nuú jahyi ndó. Ta ndaja ga ví cája Ndióxi, tátá ndo, mé a íin indivi xihin ndo. Quiahva mé á ínima yii á nu ndá na ná caca ña nu á —nacachi Jesús.

Chicaan na cuachi Jesús ña ñéhe a ndée tiñáhá sacuaña

(Mt. 12:22-30; Mr. 3:20-27)

14 In tañu táva Jesús ínima quini ini in dataa, da nanduu níhi, nacaja rí quini. Ta tá sa nacana mé rí quini ini da cán nacaja Jesús anda já nandicahan tucu da. Ta chí nacatontó cuahá ñayivi ndúu cán tá naxini na ña yóho.

15 Joo java na nacasáhá cáchi na já saha Jesús:

—Taa yóho cúu táva da rí quini ñuhu ini ñayivi jáchi mé Beelzebú, rí cúu tiñáhá sacuaña nu rí quini cán, sahan rí ndée rí nu dá cája da ña —nacachi na.

16 Ta java ga na cuni na coto ndojó na Jesús sahá ña cán quea naxica na nu á ña ná caxí mé á ñaha xituhún quixi indivi já ná cuni na.

17 Joo xini vaha va Jesús ña cáhvi ini na cán sahá ña cán quea nacachi a já xihin ná:

—Tá sáhdá java táhan ñayivi ndúu in ñuu ta ndúu na cuaha táhdá já cásáhá cáni táhan ndaja táhan mé va na já cama chá ndihi sahá ñuu nu ndúu na cán. Ta quiahva já yáha xihin na ndúu in vehe tá cásáhá sáhdá java táhan na ta cáni táhan na já cama chá ndihi sahá vehe na.

18 Ta quiahva já yáha xihin Satanás, rí cúu tiñáhá sacuaña va. Tá ná cani táhan ndaja táhan mé rí já quea ndihi saha ndée ña cómi ri. Cáhan í ña yóho xihin ndo jáchi cáchi ndo ña táva í rí quini ini ñayivi xihin ndée Beelzebú, rí cúu tiñáhá sacuaña.

19 Joo tá mé a ndaa cúu ndusa ña cáchi ndó sahá í jan, ndáchi quehe na cúu cuéntá mé ndó jan ndée táva na rí quini ini ñayivi. Ama ná cachi ndó ña táva ndó rí quini xihin ndée tiñáhá sacuaña. Ña yóho náha ña co cáhvi ndaa ini ndó.

20 Joo yehe xihin in túhún ndée Ndióxi táva í ínima quini ini ñayivi. Ta xihin ña yóho náha cáxi a ña sa naxinu coo quivi cacomí Ndióxi cuéntá saha ndo —cáchi Jesús.

21 Ta sácú Jesús quiahva nu ná ta xihin ña yóho jánaha ña quee vaha mé á xihin tiñáhá sacuaña. Já cáchi a já:

—Íin in dataa ta tóyí cáa da ta ñéhe da ndá chúun chindee da mé dá. Ta nani ndáa da vehe da mé a ndaa coo toho ñaha ndoho ñaha da jáchi ndáa vaha da ña.

22 Joo tá ná quixi inga taa, da ndacú chága a juú ga mé da cán ta quee vaha da xihin dá já candaa ndihi da ndá chúun ña nacandee ini da mé dá. Ta já caxí mé da ndacú chága cán xihin ñaha da inga cán.

23 "Ndá na coo cuahan xoo í, cúu ná na coo cuni yehe. Jáchi ndá na coo chindee yehe xihin ña cája í, cúu ná na sáji nuu nuú í.

Jánaha Jesús ña cuahá tañu ndicó coo tucu rí quini ini ñayivi vatí sa naquee rí

(Mt. 12:43-45)

24 "Tá queta in rí quini ini in dataa já quee rí cuahan rí xica nuu rí ndijáa yucú íchí ndínducú rí nuú candoo rí. Ta tá coo ndíñehe rí ña já cásáhá cáhvi ini rí já: "Cóho ndicó coo tucu ini da nuú nasandacaan í cán jáchi cúu á tátuhun vehe", cáhan ri.

25 Ta tá xinu coo rí ini da cán já sádehé ri ña íin vii va ini da cán tá quiahva vii ini vehe tá natihvi á ta nandaca ndojó vaha tóco ndihi ñaha ini a.

26 Anda já quee tucu mé rí quini cán cuahan ri quehe rí usa ga rí quini chága a juú ga mé rí já xinu ndihi rí ndihvi rí ini da cán. Ta mé da cán ndiquini chága da a juú tá nasandacaan in talaá rí ini da —nacachi Jesús.

Ndá na cúu na tahvi chága nacuu

27 Ta nani cáhan Jesús tuhun yóho nuú ñayivi já nacayuhú cóhó in ñañáha tañu ñayivi cuaha cán já nacachi ña já:

—Tahvi nacuu ña najáacu yohó, mé ña najácuáhnú yohó —nacachi ña xihin Jesús.

28 Anda já nacachi Jesús já:

—Tahví chága nacuu ñayivi tá xini joho na tuhun Ndióxi ta cája na ña cáchi a — nacachi Jesús.

Xíca ñayivi quini ña ná caja Jesús ña xitúhún cuni na

29 Tá ndítaca cuahá ñayivi nu in Jesús já nacasáhá mé á cáhan xihin ná já nacachi a já:

—Quini ndivaha va ñayivi ndúu tiempo viti. Xíca na ña ná caja i ñaha xitúhún nu ná. Joo coó toho ña cán coo. Ña cuni ndusa na quéa ndoho i tá quiahva nandoho Jonás, da nasacuu profeta sanahá.

30 Jáchi mé ñayivi nasanduu sanahá ñuu Nínive cán nacandaa ini na ña nachindahá Ndióxi Jonás nu ná. Ta quiahva já candaari ini na ndúu viti ña nachindahá ri Ndióxi yehe va, da nanduu ñayivi.

31 Tá ná xinu quiví caja vií Ndióxi sahá cuachi ñayivi ndúu tiempo viti anda já ndicuíta in ña nasacomí cuénta sahá ñayivi ndúu chí sur sanahá ta chicaan ña cuachi jatá ñayivi ndúu tiempo viti. Jáchi mé ña cán vatí nasahin xíca ndivaha ña nu rey Salomón sanahá nasahan ña cuni joho ña tuhun ndíchí cáhan da. Ta yehe in chága sahá i a juú ga Salomón joo co cándusa ndó yehe.

32 Ta jári ñayivi nasanduu Nínive sanahá cán ndicuíta na chicaan na cuachi jatá ndó tá ná xinu quiví caja vií Ndióxi sahá cuachi ñayivi ndúu viti. Jáchi mé na nasanduu ñuu Nínive cán najándacoo na cuachi cája na tá nacahan Jonás xihin ná ña nacachi Ndióxi coo. Ta yehe in chága sahá i a juú ga Jonás joo co cándusa ndó yehe.

Nduchú núu yo cúu á tátuhun in lámpara (Mt. 5:15; 6:22-23)

33 'Ni in túhún toho ñayivi co chicaan ñúhu ná in lámpara ta já quéhe na ña sácú na in nuú jehé. Ni co chicaan na ña tixi sato. Ña cája na quéa chínúu jícó na ña já ná yehe nuú na quihvi ini vehe cán.

34 Nduchú núu yo cúu á tátuhun in lámpara jándiyehé a nu yo já xini yo nu xíca í. Ta tá tívi vaha nduchú núu yo já cuu candehé vaha í nu xíca í. Joo tá co tívi nduchú núu yo já quéa xíca í nu naá ndivaha.

35 Cuénta coo ndó a juú cahán ndo ña cúu ndó na xíca nu yehe ta cáa ví ndó cája ndó cuachi tátuhun na xíca nu naá.

36 Tá ná quiahva ndó ñamaní jándiyehé Ndióxi inima ndo já a cája ga ndó cuachi jáchi a cáñehe ga ndó inima quini. Tá cája ndó ña cuni Ndióxi já cúu á tátuhun in lámpara jándiyehé inima ndo — nacachi Jesús.

Chicaan Jesús cuachi jatá na fariseo xihin jatá na jánaha ley Moisés

(Mt. 23:1-36; Mr. 12:38-40; Lc. 20:45-47)

37 Tá nandihí nacahan Jesús já nacana in da fariseo Jesús ña ná cuhun a cuxu a vehe da. Tá nandihí já nasahan Jesús vehe da já naquihvi a nasacoo a nu mesa xihin java na cán.

38 Joo ndaja coo da fariseo cán chí nacatontó da jáchi naxini da ña coó nandahá Jesús cacoo a cuxu a tá quiahva in costumbre mé na fariseo cán.

39 Anda já nacachi Jesús já xihin da fariseo cán:

—Ndóhó, na fariseo, ndíhi ini ndó cája ndó costumbre ña ndícata ndó jatá vaso xihin jatá coho viti joo co ndíhi ini ndó ndícata ndó ini a. Quiahva já cája mé va ndó jáchi ndíhi ini ndó ndahá ndo tátuhun costumbre ndo joo co ndíhi ini ndó ndaja vií ndo inima ndo nuú nachutú ndaa xihin ñaha quini cáhvi ini ndó.

40 Ndaja tontó jini ndo. Á co xini toho ndó ña tá nacavaha Ndióxi ñayivi já nacavaha mé á yiquí cuñu na ta nacavaha mé á inima ná.

41 Caja ndó ñamaní xihin na ndahví xihin ndinuhu ini ndó já ná coo vií ndó nu Ndióxi.

42 'Ndahví nacuu ndó, na fariseo. Mé ndó tá cáchi ndo sahan ndó ñaha nu Ndióxi já cávaha ndó uxu táhndá ñaha ndó cán. Ta in a sahan ndó nu Ndióxi ta quéhe ndihí ndó ña java cán. Quiahva já cája ndó xihin minu estila xihin yucu lotá ta quiahva já cája ndó xihin tá nuú ñaha cána nu ñúhu ndo. Joo co cája ndó ña ndaa xihin ñayivi. Ta ni co quihvi ini ndó Ndióxi. Joo ña cuni Ndióxi caja ndó quéa ná caja ndaa ndó ta ná quihvi ini ndó a. Ta a ndíndójó ndó quiahva ndó ñaha nu Ndióxi.

⁴³ 'Ndáhví nacuu ndó, na fariseo. Jáchi tá sáhan ndó veñuhu cátóo ndo cacoo ndó nu sácoo na náhnu. Ta cúni ndó ña ná cahan Ndióxi toni ñúhú ndivaha ñayivi xihin ndo tá ndique táhan na xihin ndo íchi.

⁴⁴ 'Ndáhví nacuu ndó, na jánaha ley Moisés. Ta ndáhví nacuu ndó, na fariseo. Jáchi co cúu ndó tá quiahva ndáa ndó. Mé ndó cúu ndó tátuhun yávi nu táan na ndii jáchi núu cája ndó. Vatí xójo cava ñayivi yáha na nuú nanduxu ndii cán joo co xini na ña cúu á in yávi nu ñúhu ndii jáchi coo yuu ñáñi a —nacachi Jesús.

⁴⁵ Anda já nanducú ñehe in da jánaha ley Moisés cán tuhun nu Jesús já nacachi da já xihin á:

—Maestro, xihin tuhun cahan jan jándihivi ri a ndehe va.

⁴⁶ Anda já nacachi Jesús já xihin dá:

—Ndáhví nacuu ri ndóhó va, na jánaha ley Moisés. Jáchi cája ndó ña ná coo ihvi ndivaha ley já ná a cúu cava ñayivi ña. Joo mé ndó cája ndúsa ndó xihin ná ña ná cava na ña vatí ni mé ndó a cúu cava ndó ña.

⁴⁷ 'Ndáhví nacuu ndó jáchi cúu á tátuhun cávaha ndó ñáñi nu jánduxu ndó na profeta, na nasahni tásáhnú jícó ndo sanahá.

⁴⁸ Ta xihin ña yóho náha ndó ña cájii ini ndó xihin ña nacaja tásáhnú jícó ndo sanahá tá nasahni na na profeta. Ta viti cúu á tátuhun chindeé táhan ndó xihin na cán jáchi mé ná nasahni na na profeta ta mé ndó nacavaha ndó nuú nanduxu na.

⁴⁹ 'Xini vaha Ndióxi ñayivi ta ndaa nacahan mé á tá nacachi a já: “Chindahá i java profeta xihin java apóstol nu ndo. Joo mé ndó cahní ndo java na ta java na ndicuita ñee ndó na”, nacachi Ndióxi sanahá.

⁵⁰ Joo viti caça Ndióxi cuénta nuú ñayivi ndúu tiempo viti saha tóco ndihi na profeta, na naxihi ndijáa tiempo janda nani nacava sáha saha ñuyivi.

⁵¹ Caça Ndióxi cuénta nuú ñayivi ndúu tiempo viti sahá na profeta ndii naxihi sanahá. Caça mé á cuénta sahá Abel, da naxihi nacaja Caín cán. Ta caça mé á cuénta sahá ndijáa na profeta naxihi tiempo naquixi cán janda quiahva naxinu coo a nuú caça cuénta sahá ndii Zacarías. Mé da yóho nasahni na da ini veñuhu

sanahá tañu nu náa xihin nuú yii ndivaha. Ña cán quea cahan i xihin ndó ña caça Ndióxi cuénta saha tóco ndihi ndii jan nuú ñayivi ndúu tiempo viti.

⁵² 'Ndáhví nacuu ndó, na jánaha ley Moisés. Jáchi cája ndó ña ná a cúu candaa ini ñayivi ña cáchi tuhun Ndióxi. Ta xihin ña yóho cúu ndó na sáji nuu cuití va jáchi ni co sáhan ndó ñamaní nu ná ña ná candúsa na ña ndaa. Ta mé ndó vatí xini ndó cúu á ña ndaa joo co cája ndó ña cáchi a —nacachi Jesús xihin na jánaha ley Moisés cán.

⁵³ Tá nacachi Jesús ña yóho já naxojo ndivaha ini na jánaha ley Moisés cán xihin na fariseo cán xihin á. Ta já nacasáha na ndaca tuhún cuaha chága na mé á sahá ña cúni na jáquihvi cuití ñahá na.

⁵⁴ Ta nasacu cuaha ná tuhun ihvi nu á jáchi ndúcú na ndá quiahva chicaan na cuachi jatá xihin in tuhun ña ná yaha yúhu á cahan.

12

Jánaha Jesús sahá na co cúu ná tá quiahva ndáa na

¹ Ta nani cahan Jesús cán nacasáha táca cuahá ndivaha ñayivi. Cuaha mil na nacasáha ndái cuu na cán. Janda quiahva cándihi táhan ndaja táhan mé ná xihin á cuahan ná. Nu cuití nacahan Jesús xihin na xica tuun xihin á já cáchi a já:

—Cuénta coo ndó xihin na fariseo jáchi cúu ná tátuhun yúsa naxaa quee xihin harina ña cávaha na pan. Co cúu ná tá quiahva ndáa na.

² Ta ni in túhún toho ñaha a cúu coo jehé nahá jáchi cana tá cana tuhun sahá.

³ Tóco ndihi tuhun nacahan jehé ndó ñuú já vaxi quivi cuni johó ñayivi ña ndiví táhyí. Tóco ndihi ña nacahan jehé ndo tá ndáji yehé já vaxi quivi candaa ini tóco ndihi ñayivi ñuu sahá —nacachi Jesús xihin na xica tuun xihin á.

*Yo já ndítahan cayihvi yo
(Mt. 10:26-31)*

⁴ Anda já nacasáha cahan Jesús xihin ndihi na cán já cáchi a já:

—Candehé ndo, na cúu amigo i. Cúni cahan i xihin ndo ña a cáyivi toho ndó ñayivi, na cuu cahní yiquí cuñu ndó. Jáchi

ñã ñã ñã cúú ndihi va ñã cája na ta a cuú caja na ni in ñãha xihín ínima ndó.

⁵ Ta viti ná cahan i xihín ndó yo já ndítahan ndusa nu ndó cayihví ndó: Ndítahan cayihví ndó Ndióxi jáchi mé a cán queá cuu caja ñã ná quivi ndó ta tá nandihhi cuu chicao ínima ndó ini indayá. Mé a cán queá ndítahan ndusa cayihví ndó.

⁶ Sa xini vaha ndó ñã uhun laa válí yahvi rí jivi jiuhún. Vatí núu ndivaha sáhan ñayivi rí joo co ndíndójó toho Ndióxi saha rí jáchi ndáá mé á rí.

⁷ Quiahva já in ri saha mé ndó nu Ndióxi. Jáchi janda ijí jini ndó ñã ndáhvi tá in tá in a nu Ndióxi. A cayihví toho ndó jáchi ndiyahvi chága ndóhó nu Ndióxi a juú ga cuahá laa válí.

Tá cahan cáxi ñayivi ñã cúú ná cuéntá Jesús

(Mt. 10:32-33; 12:32; 10:19-20)

⁸ Mé a ndaa ná cahan i xihín ndó ñã ndá ñã cáxi tuhun nuú ñayivi ñã cuahan ñã cuéntá mí i já queá cachi mí i, da nachindahá Ndióxi nduu ñayivi saha ná ñã mé a ndaa cúú ndusa ñã cán cuéntá mí i. Já cachi i xihín táto Ndióxi.

⁹ Joo ndá ñã ná cachi xihín ñayivi ñã co xini toho na yehe já queá ni yehe a ndícuni toho i ñã ñã cúú ná cuéntá mí i nu táto Ndióxi.

¹⁰ Ta ndá ñã ná cahan núu sahá yehe, da nachindahá Ndióxi nduu ñayivi, caja cáhnu ini i saha ná. Joo ndá ñã ná cahan núu saha ínima yíi Ndióxi, ñã cán cúú ñã a cája cáhnu ini toho Ndióxi saha.

¹¹ Tá ná tiin na ndohó ñã cañehe na ndohó cahun ndó nahma ndó nuú ñã sacuahá veñuhu á nuú ñã jutixia sahá i, a ndícuni toho ini ndó ñã ndá tuhun queá cahan ndó nuú ñã cán.

¹² Jáchi tá ná xinu coo hora cahan ndó nuú ñã cán, jánahá ínima yíi Ndióxi nu ndó ndá tuhun nducú ñehe ndó nuú ñã cán — ñacachi Jesús xihín ná.

In da cuicá, da ñacaja quíhvi

¹³ In táhan da ndacaan tañu ñayivi cuahá cán ñacahan da xihín Jesús já ñacachi da já xihín á:

—Maestro, cahan loho ndó xihín ñani i ñã ná cahnda java da ñãha ñã najándacoo

tátá nde nuú nde tá naxihí ñã — ñacachi da xihín Jesús.

¹⁴ Anda já nanducú ñehe Jesús tuhun nu dá já ñacachi a já xihín dá:

—A juú juéxe cúú yehe já coo i cahnda java i ñãha ndó, vaha.

¹⁵ Anda já ñacachi tucu a já xihín ñã ndúu cán:

—Cuni johu vaha ndó. Cuéntá coo ndó ñã ná a ndiáva nahá ini ndó canduu cuahá ñãha cuicá nu ndó. Jáchi a juú saha ñã ndúu cuahá ñãha cuicá nu ndó chí cuu catacu nahá chága ndó, vaha — ñacachi Jesús.

¹⁶ Anda já ñasacu a in quiahva nu ná já ñacachi a já xihín ná:

—Ñasahin in da cuicá ta a juú quiahva ñasahnu vaha ñãha nu ñúhu dá.

¹⁷ Anda já ñacasahá mé da cuicá cán ndícuni ini da já ñacahan da já: “Ndáchí taán toho í cuahá nahá ñãha ñacana nu yo yóho jáchi coo ga nuú cañuhu á”, ñacahan da.

¹⁸ Anda já ñacahan tucu da já: “Ñã caja í queá ndícuni ndihi í yáca níi ñãha í já cavaha í ñã náhnu chága. Ta cán taán yo ndihi ñã ñacana nu yo ta cán taán yo tóco ndihi java ga ñã cómi yo.

¹⁹ Anda já cachi i já xihín mí i: Sa cuahá ndivaha va ñãha ñasacu vahún viti. Ta queta ñã cusún tixi cuahá ndivaha cuia. Ta viti jandá ndiquehe ndée cuití vún. Cuxu cuití vún. Coho cuití vún. Ta jandá cajii cuití ini vún, já va cachi i xihín mí i”, ñacahan da.

²⁰ Joo ñacahan Ndióxi já ñacachi a já xihín dá: “Taa quíhvi, sa mé ñúu viti quivi vún. Ta tóco ndihi ñã ñasacu vahún ñã a juú ñã cusún cúú á. Ndá ñã cúú mé va ñã cuxu ñã ñã”, ñacachi Ndióxi xihín dá.

²¹ Quíhvi ndivaha cája ñayivi tá ndája tútú ñã ñãha ñuyívi yóho joo co ñúhu ini na saha Ndióxi ñã ná caja na ñã cúni mé á. Sahá ñã cán queá cúú ná ñã ndahví ndivaha nu mé á — ñacachi Jesús xihín ná.

Ndáá Ndióxi ñã cúú ndusa jahyi mé á

(Mt. 6:25-34)

²² Tá nandihhi já ñacahan Jesús xihín ñã xica tuun xihín á cán já ñacachi a já xihín ná:

—A ndícuni toho ini ndó sahá ñã cuxu ndó catacu ndó ta ni saha jáhma candixi ndó.

23 Jáchí cáhnu chága mé ndó a juú ga ña xíxi ndó xihín ña ndíxi ndó.

24 Candehé ndó rí naní ticacá jan. Co xútu rí ta ni co jáquee rí. Ta ni coó yáca nu táan rí ñaha rí. Joo sáhan va Ndióxi ñaha cuxu rí ña ná catacu rí vatí laa va cúu rí. Ta mé ndó ndiyahvi chága ndó a juú ga laa jan.

25 A ndícani toho ini ndó jáchi coó toho a ñehe ndó ndícani ini ndó. Ni in túhún toho ndó a cúu ndaja jícó ndo mé ndó java metro chága sahá ña ndícani ini ndó.

26 Tá ta ni loho ña yóho a cúu caja ndó, ndía ndóho ndó ndícani nahá ini ndó caja ndó java ga ñaha, dá já.

27 Candehé ndo ndá quiahva ndató sáhnu ita. Co cája chúun a ta ni co cávaha jáhma á. Joo mé a ndaa ná cahan i xihín ndo ña ñúchí chága ita yóho nacaja Ndióxi a juú ga jáhma vaha ndivaha nasandixi rey Salomón sanahá, da nasahiin cuahá ñaha cuicá.

28 Candehé ndó ndaja ndáa vaha Ndióxi yucu ita vatí ín tóo a viti ta itaan cáyi a jándihi sahá. Ta ndiyahvi chága mé ndó a juú ga yucu ita. Joo co cándusa ndó ña candaa mé á ndohó. Ña cán quea xíní ñúhú candeé ini ndó Ndióxi ña quiahva tá quiahva mé á jáhma candixi ndó.

29 Ta a ndícani ini ndó ndaja caja ndó ñehe ndó ña cuxu ndó xihín ña coho ndó.

30 Jáchí ñayivi, na co xíní íchi cuénta Ndióxi, na cán cúu na ndícani cuahá ini saha tóco ndihi ña yóho. Joo cúu ndó cuénta Ndióxi, mé a cúu tátá ndo ta xíní vaha mé a ña ndímaní nu ndó catacu ndó.

31 Joo ndítahan nu ndó ndiquiahva ndó mé ndó ndáha Ndióxi ña ná cacomí a cuénta saha ndo já quiahva mé á nu ndo ña ndímaní nu ndo catacu ndó.

Indiví cúu nu ndítahan ndaja tútu ñayivi ña vaha

(Mt. 6:19-21)

32 A cáyhvi toho ndó jáchi mé ndó cúu ndó tátuhun ndicachi válí janá i. Mé a ndaa chá va cúu ndó joo cáji ini Ndióxi ña cómí a cuénta saha ndo.

33 Jícó ndó ña cómí ndo ta jásá ndó ñaha nuú na ndímaní ñaha nu. Jáchí quiahva já ndaja tútu ndó ñaha vaha indiví nuú cuhun ndo. Jáchí mé cán a ndíhi sahá ña vaha cómí ndo. Ta ni na cuihná a cúu

quihvi na caja cuihná ñaha ndó cán. Ta ni tiquiji a cúu jándihi rí sahá ñaha ndó cán.

34 Jáchí nuú nandaja tútu ndo ña ndayahvi nu ndo, cán coo ri ínima ndo.

Náha Jesús ña xíní ñúhú canduu tiahva ñayivi cuhun na xihín mé á

35 Xíní ñúhú canduu tiahva ndó candati ndó ndá hora ndicó coo tucu u quixi i ndiquehe e ndohó.

36 Xíní ñúhú cacuu ndó tátuhun mozo tá ndáti tiahva da ndicó coo xitoho da, da cuahan víco tándaha. Ndáti tiahva da cuná da yéhe nu dá tá ná xinu coo da caní ndáha dá yéhe.

37 Tahví nacuu mozo tá co quiji da ndúu da tá ná xinu coo xitoho da. Mé a ndaa ná cahan i xihín ndo ña janda mé da cúu xitoho da cán ndiquehe nahá da ta já cacoo da da nu mesa da ta já chicaan da coho cuxu mozo da.

38 Coó caja toho a ña ná xinu coo xitoho da java ñuú táji á tá sa yati tivi, tahví nacuu mozo cán tá ndíta da ndúu da tá naxinu xitoho da nu dá.

39 Candehé ndo jáchi xíní ñúhú candaa ini ndó ña yóho. Tá xíní in dataa ndá hora cúní na cuihná quihvi na vehe da já quea a cúu da jáchi ndáa vaha da vehe da já ná a quihvi na caja cuihná na ñaha vehe da.

40 Quiahva já xínú ñúhú canduu tiahva ri ndóho va jáchi quixi tucu yehe, da nachindahá Ndióxi ndúu ñayivi mé quivi co cáhan ndo quixi i —nacachi Jesús xihín ná.

In mozo vaha xihín in mozo a váha
(Mt. 24:45-51)

41 Anda já nandaca tuhún Pedro Jesús já nacachi da já xihín á:

—Á nuú ndehe cuití nasacu ndó quiahva yóho á nasacu ndó ña nuú ndaja táhan ñayivi ndúu yóho.

42 Anda já nacachi Jesús já xihín dá:

—Ña cahan i yóho cahan i ña xihín da tácu ini, da cája vaha ndusa. Cúu á tátuhun in mozo tá jándacoo xitoho da chuun ndáha dá ña ná quiahva da cuxu na java ga cúu mozo xihín dá cán. Anda já naquee mé xitoho da cuahan da.

43 Tahví nacuu mé mozo cán tá xínu coo xitoho da ta ndíñehe dá da cája da chuun ña nacandoo nu dá caja da.

44 Mé a ndaa ná cahan i xihin ndo ña quiahva xitoho da cán chuun nu dá ña ná cacomí da cuénta saha tóco ndihi ñaha cómí xitoho da.

45 Joo da cúu mozo yóho tá ná casáha da cahan da ña cayáncá ndivaha xitoho da ndicó coo da ta saha ña cán quéa casáha da cája xíxi da xihin java ga na cúu mozo xihin dá cán. Ta já cáa ga da casáha xíxi da ta xíhi da ta já xini da.

46 Ta ndaja coo xínu coo xitoho mozo cán mé quivi co cahan da. Anda javi jándoho quini xitoho da cán ini da jáchi coo nacaja da ña ndítahan caja da. Ta ndoho da yóho tá quiahva ndóho tóco ndihi na sáa ini, mé na co cája ña sáhdá xitoho na nu ná caja na.

47 Tá ná candaa ini mozo ña cúni xitoho da caja da joo co ín tiahva da caja da ña ta ni co cúni da caja da ña sáhdá xitoho da nu dá, da cán cúu da ndoho ndivaha ini.

48 Joo tá ín in mozo ta co cándaa vaha ini da ndá quéa cúni xitoho da caja da ta ndaja coo cája da in ñaha ña co táhan ini xitoho da xihin já quéa chá cuití va ndoho ini da. Tá ná caja Ndióxi cuahá ñamaní xihin in ñayivi já quéa ndítahan caja chúun cuaha ná nu mé á. Ta tá sa cándeé ini ñayivi inga na já quéa ndinuhu ñamaní náhnu chága caa na cán ña ná caja na xihin ná.

Cája Jesús ña sáhdá java táhan ñayivi
(Mt. 10:34-36)

49 Yehe naquixi i ñuyiví yóho cahnda java táhan i ñayivi já ná nahá na cúni cuhun xoo mí i xihin na co cúni cuhun xoo i. Ta ña yóho cúu á tátuhun naquixi i chicaan ñúhu i ñuyiví yóho. Ta cúni ña ná ndihi quí chuun naquixi caja i yóho.

50 Vaxi quivi ndoho ndivaha ini i ta a juú quiahva ndíhi ini i ndáti xínu coo mé quivi jan.

51 A cahan toho ndó ña naxinu i ñuyiví yóho caja i ña ná coo vaha ini ñayivi. Ña vaxi yehe caja i quéa ná cahnda java táhan ná.

52 Jáchi viti xihin chí nuu cacuu a tátuhun canduu uhun ñayivi in vehe joo a cúni táhan na saha yehe jáchi ivi na cacuu cuénta

mí i ta uní na candají yehe. Á tá coo ta uní na quihvi ini yehe ta ivi na candají ri yehe.

53 Ta jári da cúu tátá cani táhan da xihin jahyi da saha yehe. Ta jári ndicuíta dataa cani táhan da xihin tátá da saha yehe. Ta jári najihí cani táhan na xihin jahyi jíhi na saha yehe. Ta jári najihí cani táhan na xihin náná na saha yehe. Ta jári ndicuíta najihí cani táhan na xihin sanu na saha yehe. Ta jári ndicuíta najihí cani táhan na xihin xojo na saha yehe —nacachi Jesús.

Co cúni ñayivi candaa ini na yo cúu Jesús
(Mt. 16:1-4; Mr. 8:11-13)

54 Anda já nacachi tucu Jesús já xihin ñayivi:

—Mé ndó tá xini ndo ndicuíta vico vaxi a ñuu ndó chí xoo nu quéta candii já cáchi ndó ña cuun javi ta chí cúun ndusa dó.

55 Ta tá xini ndo vaxi tachí chí xoo sur já cáchi ndo ña ihní ndivaha coo ta chí ihní ndusa sáhin.

56 Co cúu ndó tá quiahva ndaa ndó. Cándaa vaha ini ndó ña cúu ñuyiví ta cándaa ini ndó cahan ndó ndá quéa coo tá sándehe ndó indiví. Joo co cúni ndó candaa ini ndó ña jánaha i nu ndo.

Ndítahan caja vaha ndó xihin na co cúni ndohó

(Mt. 5:25-26)

57 Ndávaha co táva vaha ndó cuénta ndía quéa vaha ta ndía quéa a váha.

58 Tá sácú ini na saha ndó cuhun ndó vecaa ta ndáca táhan ndó xihin na cán cuahan ndó nuú na jutixia, xini ñúhú nducú ndó ndá quiahva ndique táhan máni tucu ndó xihin ná nani xíca ndó íchi cuahan ndo. Já quéa ná a cáñehe na cán ndohó cuhun ndó nu juéxe jáchi da cúu juéxe cán ndiquiahva da ndohó ndáha policía ta policía cán chicaan da ndohó vecaa.

59 Mé a ndaa ná cahan i xihin ndo ña tá ndácaan ndó vecaa jan chí a cána ndó janda quiahva ná chahvi ndihi ndó ña yíca ndo nuú da cán já janí da ndohó —nacachi Jesús xihin ná.

13

Cahan Jesús ña ndítahan jándacoo ñayivi cuachi cája na

1 Mé tiempo já naxinu coo java na ndicani na nu Jesús sahá ña nasahní Pilato java dataa estado Galilea nani jóco da nu Ndióxi. Ña cán quea cáchi na ña nacatáhan nií da naxihí xihín nií quítí, rí jóco da.

2 Anda já nacachi Jesús já xihín ná:

—Á cáhan ndo ña naxihí da Galilea yóho sahá ña íin chága cuachi da a juú ga java ga na Galilea.

3 A juú a já jáchi quiahva já ndihi ri saha ndóhó va tá ná a jándacoo ndó cuachi cája ndó.

4 Sanahá ndivaha já naxihí sahun uní taa jáchi nandicava in torre naní Siloé jata ná. Á cáhan ndo ña nandicava torre cán jata na yóho jáchi nasahin chága cuachi na a juú ga na ñuu Jerusalén. Joo coo cúu á quiahva já.

5 Mé a ndaa ná cahan i xihín ndo ña quiahva já ndihi ri saha ndóhó va tá ná a jándacoo ndó cuachi cája ndó —nacachi Jesús xihín ná.

Sácú Jesús quiahva sahá in tító ñuhú, dó coo cána cuihi nuu

6 Anda já nasacu Jesús in quiahva nu ná já nacachi a já xihín ná:

—In dataa najánde de da in tító ñuhú nu ñuhú dá. Ta tá nayaha tiempo já nasahan da sándehe da do ña á cána tító ñuhú nu do. Joo coo mé rí nandiñehe dá.

7 Anda já nacachi da já xihín da ndáá ñuhú dá cán: “Candehé, sa naxinu uní cuiá já cuití quixi i ndúcú u tító ñuhú nu yító yóho. Ta coo ñaha cána nu do. Vaha chága ná cahndún do jáchi ndá chuun quea candichi uun dó cája tánu dó nu ñuhú i”, nacachi da xihín da ndáá ñuhú dá cán.

8 Anda já nacachi da ndáá ñuhú dá cán já xihín dá: “Quiahva ndó ñamaní, xitoho i ña ná coo too ga dó cuiá víti ná játayi i ñuhú saha do ta ná chicaan loho i tata saha do.

9 Ta xihín ña yóho jonáa cana cuihi nu do. Ta tá coo ñaha cána nu do já cahnda ndó do tá cúní ndo”, nacachi mozo cán xihín xitoho da —nacachi Jesús.

Mé quivi ndiquehe ndé ñayivi ndája vaha Jesús in ña xica tojo

10 Ta ndaja coo in quivi ndiquehe ndé ná já nasandacaan Jesús veñuhu jána ha tuhun Ndióxi nuú ñayivi.

11 Ta mé ini veñuhu cán nasandacaan in ñañáha, ña quíhvi sahun uní cuiá. In ínima quini cúu rí naquihvi ini ña ta nacaja rí ña ná nditojo ña ta chí ni loho a cuú jándicaa ña mé ña.

12 Tá naxini Jesús ña já nacana mé á ña já nacachi a já xihín ña:

—Ndaja vaha i yohó viti —nacachi Jesús xihín ña.

13 Anda já nachojó a ndáha á jata ña chí mé hora já nandicaa yiquí cuñu ña ta nacasáha ña cája cáhnu ña Ndióxi.

14 Joo mé da cúu sacua ha veñuhu cán nacasáha ndíquehe da jáchi nandaja vaha Jesús ñañáha cán mé quivi ndíquehe ndé ná. Já nacasáha cáchi da cán já xihín ñayivi ndúu ini veñuhu cán já:

—Íin iñu quivi núná nu yó cája chúun í ta tañu quivi já cuu quixi ndó catátá ndo tá cúní ndo. Joo a quíxi ndó catátá ndo quivi ndíquehe ndé yó —nacachi da xihín ná.

15 Anda já nacachi Jesús já xihín da sacua ha veñuhu:

—Coo cúu ndó tá quiahva ndáa ndó. Cája mé ndó chuun quivi ndíquehe ndé yó tá ndaxí ndo tindi quí á búrró jana ndó sahan ndó jácoho ndó rí ticuúí.

16 Ta viti candehé ndo ñañáha yóho. Cúu ña ña naquixi chíchi Abraham ta sa íin sahun uní cuiá naquehe cuehe ña nacaja Satanás, mé tiñáha sacua ha. Ta mé ndó cáhan ndo ña a váha toho nacaja i ña najaní i ñañáha yóho ndáha cuehe ña nandoho ña tixi cuahá cuiá. Joo mé a ndaa nanditahan nuú i janí i ña ndahá cuehe yóho coo caha toho a cúu á quivi ndíquehe ndé yó —nacachi Jesús.

17 Tá nacachi Jesús ña yóho chí a juú quiahva nacacahan nuú na coo cúní Jesús cán. Joo tóco ndihi java ga ñayivi cán cáji ndivaha ini na jáchi naxini na ña cája Jesús ña náhnu ndivaha.

Sácú Jesús quiahva sahá in ndíqui mostaza

(Mt. 13:31-32; Mr. 4:30-32)

18 Tá nandihí já nacachi tucu Jesús já:

—Ná ndicani i nu ndó ndaja íin nu ndíquiahva ñayivi mé ná ndáha Ndióxi ña ná cacomí a cuénta saha ná.

19 Cúu á tátuhun in ndíquí mostaza ña chíhin in dataa nu ñuhú dá. Ta mé ndíquí

loho yóho sáhnú a janda quiahva ndúu a tátuhun in yitó cáhnú nū xínú coo laa chójó rí táca rí nū ndáha do —nācachi Jesús.

Sácú Jesús quiahva saha ndaja cája yusá naxiaa tá quee a xihin harina

(Mt. 13:33)

²⁰ Anda já nācachi tucu Jesús já:

—Ná ndicani i nū ndo ndaja ín nū ndíquiahva ñayivi mé ná ndáha Ndióxi ña ná cacomí a cuéntá saha ná.

²¹ Cúu á tátuhun tá cávaha na pan ta quee yusá naxaa xihin harina. Cúu á tátuhun tá cáva táhan in ñáñaha loho yusá naxaa xihin uní táhnda náhnú harina ña ná jánañu a tóco ndihi mé yúsá cán —nācachi Jesús.

Táhan ndivaha yéhe nuú quihvi ñayivi cuhun na indiví

(Mt. 7:13-14, 21-23)

²² Nandiquehe Jesús íchi cuahan chí ñuu Jerusalén ta ndijáá ñuu náhnú xihín ñuu válí nū yáha jánañá mé á tuhun Ndióxi cuahan.

²³ Ta ndaja coo nandaca tuhún in da Jesús já nācachi da já xihin á:

—Xitoho í, á chá cuití va ñayivi cacuu na cacu ndaa ínima cuhun chí indiví —nācachi da xihin Jesús.

Anda já nanducú ñehe Jesús tuhun já cachí a já xihin dá:

²⁴ —Cúu á tátuhun ín in yéhe táhan loho nuú ndihvi ñayivi indiví. Ña cán quee xíní ñúhú ndó ndihí ini ndó ndihvi ndó chí yéhe loho cán jáchi cuahá ndivaha ñayivi ndítihvi na ña quihvi na joo a cúu quihvi na.

²⁵ Jáchi tá quiahva ín in xitoho vehe quiahva já ín Ndióxi. Jáchi tá ná ndicoo da cúu xitoho vehe cán chícaji tuun da viti yéhe vehe da já xínú coo ndó cándichi ndó jatá véhe cáni ndáha ndó yéhe já cachi ndó já: “Á ndúyu ndó, xitoho i. Á a cája ndó ñamaní cuná loho ndó yéhe ná quihvi nde”, cachi ndó xihin dá. Ta já nducú ñehe da cán tuhun nū ndó cachi da já xihin ndo: “Cuáhán ndo jáchi co xini toho i ndohó.”

²⁶ Ta já casáha mé ndó cachi ndó já xihin dá: “Cuahá tañu sa naxixi nde ta naxihi nde xihin ndo. Ta ní cáyé ñuu nde naxica nuu ndó najánañá ndó ñayivi.”

²⁷ Anda já nducú ñehe da cán tuhun nū ndo já cachi da já xihin ndo: “Sa nācahan

vi xihin ndo ña co xini toho i ndá na cúu ndohó. Caxoo ndihi ndó nuú i jáchi cúu ndó ñayivi cája ndinuhu ña núu.”

²⁸ Ta cán ndusa quee cuacu cóhó ndo ta casáha cahña nuhu ndó xihín ña cojo ini ndó. Jáchi cán cuni ndó Abraham xihin Isaac xihin Jacob xihin tóco ndihi na profeta. Cuni ndó ña ndúu na indiví cán ta cómí Ndióxi cuéntá saha ná. Ta a juú quiahva táhnda ini ndó jáchi tavá xóo Ndióxi ndohó ña ná a ndíhvi ndó nū ndúu na cán.

²⁹ Jáchi xínú ñayivi ndúu ndijáá ñuyívi nū Ndióxi ta ndaca nduu na nuú cacomí Ndióxi cuéntá saha ñayivi.

³⁰ Ta mé quivi cán já cuni ndó java ñayivi, na coo saha mé nuú ñayivi ta nduu na na ín chága saha nū Ndióxi. Ta cán cuni ndó java na ndíñehe jícó mé viti ta a cóo toho saha ná nū Ndióxi —nācachi Jesús.

Táhnda ini Jesús ta sácu a saha ñayivi ndúu ñuu Jerusalén

(Mt. 23:37-39)

³¹ Mé quivi já naxínú coo java na fariseo nū Jesús já nācachi na já xihin á:

—Cuáhán inga ñuu cóun jáchi sácú ini Herodes cahní da yohó —nācachi na xihin á.

³² Anda já nācachi Jesús já xihin ná:

—Cuáhán ndó cahan ndó xihín da cátoó jándahvi ñayivi jan ta cachi ndó xihin dá ña tává i ínima quini ñúhu ini ñayivi ta ndája vaha i na quihvi ta caja tá caja i ña yóho janda quiahva ná xínú coo quivi jándihi i chuun yóho.

³³ Joo sa mé Jerusalén jan quivi vi jáchi jan cúu nū sáhní na profeta. Ta viti ndítahan caca nuu yíi vi íchi xíca i cuahan i yóho —nācachi Jesús.

³⁴ Anda já nācachi tucu Jesús já:

—Ndáhví nahá nacuu ndó, na ndúu ñuu Jerusalén. Jáchi sáhní ndó na profeta. Ta ndícuíta ndó cáni ndó na nachindahá Ndióxi nū ndó xihín yuu. Cuahá ndivaha tañu cuni jánditaca ndihi i ndohó joo coo naxeen ndó. Cúu á tá quiahva cája nduxú tá jataca rí jahyi válí rí tixi ndixi rí.

³⁵ Ta viti cuni johó ndó ña cahan i xihin ndo. Vaxi quivi janí ndáha mé vehe ndó candoo a. Ta mé a ndaa ná cahan i xihin ndo ña a cúní ga ndó yehe janda quiahva

ná xinu coo quivi cachi ndó: “Cáhnú nahá ná cacuu dá vaxi cuéntá Ndióxi, xitoho í” — nacachi Jesús.

14

Tá nandaja vaha Jesús in dá naquihvi cuiñu

¹ Ta ndaja coo in quivi ndíquehe ndée ná já nasahan Jesús naxixi a vehe in dá cúu sacuahá nuú ná fariseo. Ta java ga ná fariseo cán nacasáhá nání ná Jesús ndúu na.

² Ta mé yati nu Jesús cán nasahin in dataa, dá naquihvi cuiñu yiquí cuñu.

³ Anda já nandaca tuhún Jesús ná jánaha ley Moisés xihín ná fariseo já nacachi a já xihín ná:

—Á núná nu yó ndaja vaha í in dá quihvi mé quivi ndíquehe ndée yo, á co núná toho nu yó cája í ña —nacachi Jesús xihín ná.

⁴ Joo táji nasahin yuhú ná cán. Anda já nandaja vaha Jesús dá quihvi cán já nacachi a xihín dá ña ná quee dá cuhun dá.

⁵ Ta já nacachi a já xihín ná fariseo cán:

—Mé ndó tá ndicava búrró á tindiqui jana ndo ini in táhvi chí ivi laá tavá ndó ri. Ta coo caja toho a á cúu á quivi ndíquehe ndée yo —nacachi Jesús.

⁶ Joo coo nacuu nducú ñehe na tuhun nu Jesús.

⁷ Anda já naxini Jesús ña jandá joho ndácaxi na nataca cán nuú vaha cacoo na já najánaha nu ná ndía vaha chága ndítahan caja na. Já nacachi a já:

⁸ —Tá ná cana in na yohó cuhun in víco tándaha, a ndúcú tohún cacoun nu sácoo ná náhnú. Jáchi cuu xinu coo in dá ín chága saha a juú ga yohó.

⁹ Ta dá nacana yohó víco cán cuu cachi da já xuhun: “Quiahva nu ín coun jan ná cacoo dá yohó”, cachi da xuhun. Anda já cacahan nun já queún cuhun cacoun janda nu ndíhí.

¹⁰ Ña ndítahan cajún quéa cacoun janda nu ndíhí. Já quéa tá ná xinu dá nacana yohó nu ín já cachi da já xuhun: “Amigo, cuahán vaha nu ndúu ná náhnú coun.” Xihín ña yoho ndindita jícun nuú ná ndúu coo nu mesa xixi xuhun cán.

¹¹ Jáchi ndá ná cája cáhnú mé, ná cán cacuu ná nanuu ndáha joho. Ta ná co

ndíñehe jícó mé, ná cán cúu ná ndicáhnú — nacachi Jesús.

¹² Anda já nacahan Jesús xihín mé dá nacana nahá cán já nacachi a já xihín dá:

—Tá ná cavaha cuahún ña cajáhnú na á ña cajini na, a cána tohún ná cúu amigún jan ni ná cúu ñanún jan ta ni a cána tohún ná cúu táhún ta ni a cánún ná cuicá ndúu yati xuhun jan. Jáchi tá ná caja ná víco cana ri ná jan va yohó ta xihín ña jan táhnda cuéntá sahá ñamaní nacajún xihín ná cán.

¹³ Ña ndítahan cajún tá ná cavahún in víco quéa canún ná ndahví ta canún ná réncó ta canún ná cuaá.

¹⁴ Ta já cajii ínún jáchi ná cán a cúu toho caja ná chahvi na ñamaní nacajún xihín ná ñuyiví yoho. Joo vaxi quivi tá ná nditacu ñayivi nasañehe ínimá vaha ñuyiví yoho já chahvi Ndióxi ñamaní nacajún jan —nacachi Jesús xihín ná.

Sácú Jesús quiahva sahá in dataa, dá nacana cuaha chá ñayivi ña ná cuhun ná víco vehe da

(Mt. 22:1-10)

¹⁵ Tá naxini joho in táhan dá ín coo nu mesa xihín Jesús cán ña yoho já nacachi da já xihín á:

—Tahví nacuu ná ná ñehe táhvi cuhun indiví ña ná cacomí Ndióxi cuéntá saha ná —nacachi da xihín Jesús.

¹⁶ Anda já nasacu Jesús in quiahva nu dá já nacachi a já xihín dá:

—In dataa nacavaha da in víco cáhnú ta nacana cuahá ndivaha da ñayivi.

¹⁷ Ta tá sa naxinu coo hora cajini na já nasahnda da chuun nu mozo dá ña ná cuhun dá cana da ná ña quixi na ndaca nduu na nu mesa. Já nacachi da já xihín ná: “Naha quí ndo jáchi sa nacandíví ndíhi ñaha”, nacachi mozo xihín ná cán.

¹⁸ Joo tóco ndíhi ná cán nacasáhá ná cáhan ná ña a cúu toho cuhun ná. Ta in táhan dá cán nacasáhá cáhí dá já xihín mé mozo cán já: “Jacá naxeen uun í in ñúhu ta xíní ñúhú cuhun í candehé e nu á. Cáhnú coo ínún”, nacachi da xihín mozo cán.

¹⁹ Ta inga da nacachi da xihín mé mozo cán já: “Jacá naxeen e uhun yúntá tindiqui ta viti cuni cuhun í coto ndojó í ri. Cáhnú coo ínún”, nacachi da xihín mozo cán.

20 Ta inga tucu da naçasáhá cáchí da já: “Já cá naṭandaha vi sahá ña cán quéa a cúu toho cuhun i”, naçachi da xihín mozo cán.

21 Tá nandicó coo mozo cán nuú xitoho da já nandicani ndihi da nuú xitoho da ña naçachi na cán xihín dá. Anda já naçasáhá nandicuehe xitoho da cán já naçachi tucu da já xihín mozo da: “Ta viti cuáhán camún ndijáá cáyé ñuu játacún na ndahví xihín na réncó xihín na cuaá. Cañehún na quisún yóho ná cuxu na”, naçachi xitoho da cán xihín dá.

22 Tá nandihí já naçahan mozo cán já naçaja da ña naçachi xitoho da xihín dá. Ta tá nandicó coo da já naçachi da já xihín xitoho da: “Sa naçaja i tá ín naçahnda ndó nuú i. Joo yójó tá yójó nuú cuu canduu chága na”, naçachi da xihín xitoho da.

23 Anda já naçachi xitoho da já xihín dá: “Cuáhán ndijáá cáyé xihín ndijáá íchi ta xihín ña ndúsa játacún na ña ná quixi na já ná chutú vehe e.

24 Jáchi ni in túhún toho táhan na naçana i quixi vehe e nu cuití cán, a quíxi ga na cajíni na ña naçatáhan vehe e”, naçachi da xihín mozo da —naçachi Jesús.

Ndítahan jándacoo í ndá ña ndáyahvi nu yo tá ta mé a ndaa cúní yo candico yo Jesús (Mt. 10:37-38)

25 Cuahá ñayivi ndíco na jata Jesús cuahan na. Anda já nandicó coo játa nuu Jesús já naçachi a já xihín ná:

26 —Ndá na cúní jácuaha xihín i xíní ñúhú quihvi ini chága na yehe a juú ga tátá na xihín náná na. Ta xíní ñúhú quihvi ini chága na yehe a juú ga ñájíhí na á jahyi na á ñani na á quiahva na. Ta xíní ñúhú quihvi ini chága na yehe a juú ga mé ná.

27 Ta ndá na co ndíco yehe sahá ña yíhvi na quivi na, mé a ndaa coo saha toho na cacuu na cuénta yehe.

28 Tá cúní ndó cavaaha ndó in vehe jícó ña cája ndó quéa tavá vaha ndó cuénta ña á queta jiuhún ndó á a quéta já ná jáxinu ndó ña.

29 Jáchi tá ná a tává jihna ndó cuénta ta casáhá ndó cavaaha ndó vehe ndó joo tá nandihí coo quéta ga jiuhún ndó ña ná jáxinu coo ndó ña já quéa cacahan nuu ndó jáchi casáhá ñayivi cuacu ndaa na ndohó.

30 Já cachi na já xihín ndo: “Taa jan naçasáhá da cavaaha da vehe da joo coo naçuu jáxinu dá ña”, já cachi na cuacu ndaa na ndohó —naçachi Jesús.

31 Anda já naçachi tucu Jesús já:

—Tá ná cani táhan in rey, da cómí uxu mil soldado xihín inga rey, da cómí oco mil soldado já quéa xíní ñúhú ndicani vaha ini da ña á cuu quee vaha da xihín da inga rey cán tá ná quihvi táhan da xihín dá.

32 Ta tá naṭavá vaha da cuénta ña a cuú quee vaha da xihín rey, da cómí oco mil soldado cán janda xícá va ín da já chindahá da java naṭaa ña ná cuhun da caça da ñamani nuú inga rey cán ña ná ndíco va tondóhó.

33 Quiahva já ín ri xihín ndóhó va. Ndá ndóhó, na co cúní jándacoo tóco ndihí ña cómí ndo sahá yehe já quéa coo saha toho ndó cacuu ndó cuénta yehe —naçachi Jesús.

Cahan Jesús ña tá jándacoo ñayivi íchi cuénta mé á cúu ná tátuhun ñi, ña co ohva ga (Mt. 5:13; Mr. 9:50)

34 Anda já naçachi tucu Jesús já:

—Ña vaha ndivaha cúu ñi yívi na joo coo chuun toho a tá co ohva ña.

35 Mé ñi, ña co ohva ga jan ni co váha ña jácana í nu ñúhu yo jáchi co ndáhá toho ñúhu yo cája ña. Ña cája na xihín ñi jan quéa sátá va na ña. Na ín johó, ná cuni johó na —naçachi Jesús.

15

Sácú Jesús quiahva sahá in ndicachi, ri nandiñúhú (Mt. 18:10-14)

1 Cuahá na játaca jiuhún cuénta impuesto xihín cuahá na cája cuachi naçasáhá na cáyati na nu ín Jesús jáchi cúní na cuni johó na nu cahan mé á.

2 Sahá ña cán quéa naçasáhá na fariseo xihín na jánahe ley Moisés cahan núu na sahá. Já cáchí xihín táhan na já:

—Taa jan ndíquehe vaha da ñayivi cája cuachi ta xíxi da xihín ná —cáchí xihín táhan na cán.

3 Anda já naçacu Jesús in quiahva nu ná já naçachi a já xihín ná:

4 —Mé ndó tá cómí ndo in ciento ndicachi ta tá in cuití ndiñúhú in ndicachi jana ndo ña cája ndó quéa jándacoo ndó comí jícó

sahun comi rí cán yúcu ta já quée ndó cuahan ndó ndinducú ndó rí nandiñúhú cán janda quiahva ndíñehe ndó rí.

⁵ Ta tá ndíñehe ndó rí já cávatá ndo já quéhe ndó rí chínúu ndó rí sahá jiqui ndo vaxi ndó.

⁶ Ta tá xínu coo ndó vehe ndó já játaca ndó ñani táhan ndo xihín na xíní táhan xihín ndó. Já casáhá cáchí ndó já xihín ná: “Xíní ñúhú cajii íní ndó xihín i jáchi cájii íní i sahá ña nandiñehé e ndicachi janá i, rí nandiñúhú cán”, cáchí ndó xihín ná.

⁷ Mé a ndaa ná cahan i xihín ndo ña quiahva já ta janda chága ví cájii íní na ndúu indiví tá jándacoo in ñayivi cuachi cája na a juú ga sahá comi jícó sahan comi ñayivi, na cája tá cája ña vaha.

Sácú Jesús quiahva sahá in jiuhún, ña nandiñúhú

⁸ Ta viti ná cahan tucu u inga quiahva xihín ndo. In ñañáha nasahin uxu jiuhún caa ña yahvi ndivaha nu ña. Ta tá ndíñúhú in táhan ña cán já ndicahmi ña ñúhu ta tíhvi ñá vehe ñá jáchi ndíhi ini ñá ndínducú ñá ña ta vií vií ndínducú ñá ña janda quiahva ná ndíñehe ñá ña.

⁹ Ta tá sa nandiñehe ñá ña já játaca ñá ñani táhan ñá xihín na xíní táhan xihín ña já casáhá cáchí ña já xihín ná: “Xíní ñúhú cajii íní ndó xihín i jáchi cájii ini i sahá ña nandiñehé e jiuhún i, ña nandiñúhú”, cachi ñá cán —nacachi Jesús.

¹⁰ Anda já nacachi tucu Jesús já:

—Mé a ndaa ná cahan i xihín ndo quiahva já cájii íní tátó Ndióxi ndúu indiví tá jándacoo in ñayivi cuachi cája na —nacachi Jesús.

Tá najándacoo in dataa tátá da ta naquee da cuahan xícá da

¹¹ Anda já nasacu Jesús in quiahva nu ná já nacachi a já:

—In dataa nasahin ivi jahyi taa da.

¹² Ta da loho chá cán nacachi da já xihín tátá da: “Taá i, á a váha ná ndicahnda va ndó ñaha comí ndo já ná ndiquehe e ña cáni nuú i ndiquehe e”, nacachi da cán xihín tátá da. Anda já nasahnda java tátá da ñaha, in táhnda naqueehe mé dá ta in táhnda naqueehe ñani da.

¹³ Ta chá va quivi nayaha já najicó ndihi da loho chá cán ñaha ña nañehe dá nu tátá da ta xihín jiuhún nacana cán naquee da cuahan xícá ndivaha da chí ñuu tóho. Ta cán nacasáhá da jativí ndaja nacuu joho da jiuhún da ña cája da ña núu.

¹⁴ Ta tá sa najativí ndihi da jiuhún da já naxinu in tama ndeé ndivaha mé nu ín da cán. Já nacasáhá naxinu joco nu dá ta nacasáhá cuico da.

¹⁵ Anda já naquee da nasahan da ndúcú da chuun caja da nuú in dataa mé nu ín da cán. Ta nasahan da cán chuun nu dá ña ná cuhun da candaa da cóchí janá da cán.

¹⁶ Ta tá cúni coo ndiava já cúni coo ña sáxi cóchí cán. Ta chí caxí da ña cán janda quiahva chutú tixi da cúni da. Joo co sahan na ña nu dá.

¹⁷ Anda já nacasáhá da ndícani ini da já nacahán da já: “Cuaha chá mozo táhan na cája chúun nu tátá i chí yójó joho ñaha xíxáhan na ta yóho xíhi va yehe joco ín i.

¹⁸ Ña caja i quea ndicó coo tucu u nu ín tátá i ta já cachi i já xihín ná: Tátá maní i, nacaja i cuachi nu Ndióxi ta nacaja rí cuachi nu ndóhó va.

¹⁹ Ta chí coo saha mí vi cacuu u jahyi ndó sahá ña nacaja i. Ndiqeehe ndó yehe ná cacuu u tátuhun in mozo va ndó, já cachi i cuhun i nu tátá i”, nacahán da.

²⁰ Anda já naqueehe da íchi cuanúhu dá vehe tátá da.

“Ta janda xícá va vaxi da já naxini tátá da mé dá já nandicuni a da. Ta nataví ini a saha dá. Já xínu a nasahan ñehé a da já nanumi a da ta natatí yúhu á sajóho da.

²¹ Anda já nacachi da já xihín tátá da: “Tátá maní i, nacaja i cuachi nu Ndióxi ta nacaja rí cuachi nu ndóhó va. Ta chí coo saha mí i cacuu u jahyi ndó”, nacachi da xihín tátá da.

²² Ta ndaja coo tátá da nacasáhá cahan xihín java ga mozo já nacachi a já xihín ná: “Cama ndó ta tavá ndó jáhma, ña vaha ta jácandixi ndó jahyi i. Ta chicaan ndó in jéhe nducu ndáha dá. Ta chicaan ndó ndusa saha dá.

²³ Ta cañehe ndó chélo, rí ndató nandaha jan já ná quivi rí cuxú jáchi caja i in víco viti.

²⁴ Jáchi jahyi i yóho tá naquee da cuahan da nacahán i naxihí da. Joo viti nandicó

coo da nuú i. Sahá ña cán cúú á tátuhun nanditacu tucu da. Nasacuu da tátuhun da nandiñuhú joo viti nandee va da”, nacachi tátá da cán. Anda já nacasáhá na cája na víco.

²⁵ Joo ndaja coo da cúú ñani da, da sacuahá chága cán, ndácaan da cája chúun da yúcu va. Ta tá nandicó coo da já naxini johó da tívi musica ta cáxita sáhá na.

²⁶ Anda já nacana da in da cája chúun cán já nandaca tuhún ñahá da ndía cúu.

²⁷ Anda já nacachi da cája chúun cán xihín dá: “Cúu víco jáchi nandicó coo ñanún. Ta nasahnda tátún chuun ña ná quivi chélo, rí ndató nandaha cán jáchi cáji iní na ña nacasaá vaha ñanún ta coó a nandoho da”, nacachi da cán.

²⁸ Joo ndaja coo da sacuahá cán najoo da ta chí coó naxeen da quihvi da nu cúu víco cán. Sahá ña cán naqueta tátá da jata véhe já cáhan ndahví a xihín dá ña ná quihvi da.

²⁹ Anda já nacasáhá cáchi da já xihín tátá da: “Taá i, sa cándaá vaha ini ndó ña sa cuahá ndivaha cuia cája chúun i nu ndo ta cája i tóco ndihi ña sáhdá ndó nuú i cája i. Joo ni in tuhún toho tañu coó nasahan ndó ni in tijúhu loho nuú i ña ná cája i in víco loho cuxu u xihín na xíní táhan xihín i.

³⁰ Joo viti nasahní ndó chélo, rí ndató nandaha jan, ña cája ndó víco jáchi nacasaá ñani i jan. Ta mé da jan naxica nuu da najátivi ndaja nacuu da jiuhún ndo xihín najihí xíca jii”, nacachi da cán xihín tátá da.

³¹ Anda já nacachi tátá da já xihín dá: “Candehé jahyi a. Mé a ndaa ní tiempo iún xihín i. Ta ñaha mé vún cúu ndihi ña ín nuú i.

³² Joo mé a ndaa ndítahan nu yó cája i víco ta cajii iní yó viti jáchi nandicó coo ñanún, mé da nacahan yó ña naxihí. Ta viti nacasaá da cúú á tátuhun nanditacu tucu da. Nasacuu a tátuhun nandiñuhú da joo nandiñehe yó da viti”, nacachi a cán xihín jahyi a —nacachi Jesús.

16

Ndindaa chuun ndáha in mozo jáchi coo nacaja vaha da nuú xitoho da

¹ Anda já nasacu tucu Jesús inga quiahva nuú na xíca tuun xihín á. Já nacachi a já xihín ná:

—Nasahiin in taa cuicá ta nasahiin in da ndáa ñaha da. Joo java ñayivi nasahan na chicaan na cuachi jata dá nuú xitoho da ña játivi ndaja nacuu johó da ña cúu ñaha xitoho da.

² Anda já nacana xitoho da mé dá já nacachi da já xihín dá: “Johó cáchi ñayivi naquixi na cáhan na sahún sahá ña cán queá táxi i cuénta nuun ña ndicanún nuú i ndaja cía chuun nacajún jáchi ndindaa chuun ndáhun ta a cácuu gaún da ndáa ñaha i”, nacachi xitoho da cán xihín dá.

³ Anda já nacasáhá da cúu mozo cán ndícani ini da já nacahan da já: “Ndía cája i viti jáchi ndindaa va chuun ndahá i cája xitoho i. Ta co ndée toho i cája i chuun vee. Ta tá ná caca nuu i cuati i ta cacahan va nuú i.

⁴ Sa xíni vi ndía cája i já ná ndiquehe vaha ñayivi yehe vehe na tá ná ndindaa chuun ndahá i cája xitoho i”, nacahan da.

⁵ Anda já nacana da tá in tá in na yíca nuú xitoho da. Ta tá naxinu da nu cuítí cán nu dá já nandaca tuhún ñahá da já nacachi da já xihín dá: “Ndaja yícun nuú xitoho i”, nacachi da xihín da yíca cán.

⁶ Já nanducú ñehe da cán tuhun já nacachi da já: “In ciento lata síti yíca i nuú xitohún”, nacachi da cán xihín dá. Anda já nacachi da cúu mozo cán já xihín dá: “Candehé nu tutu yóho ndáa ndaja yícun nuú xitoho i. Joo cacoo quí jan ta cahyí ña yícun ivi jico uxu lata síti cuítí va”, nacachi mozo cán xihín da yíca nuú xitoho da cán.

⁷ Tá nandihí já nandaca tuhún da inga da yíca nuú xitoho da já nacachi da já xihín dá: “Ta yóhó ri ndaja yícun nuú xitoho i”, nacachi da. Anda já nanducú ñehe da yíca cán tuhun nu dá já nacachi da já xihín dá: “In ciento maquila trigo yíca i nu dá”, nacachi da cán. Anda já nacachi tucu da ndáa ñaha cán já: “Candehé yóho ndáa ndaja yícun. Joo cacoo quí jan ta cahyí ña yícun comi jico maquila trigo cuítí va”, nacachi da ndáa ñaha cán xihín dá.

⁸ Tá nandihí já nacachi xitoho da xihín dá ña mé a ndaa cúu dá in da ndíchí jini jáchi xihín ña nacaja da cán candoo vaha da nuú ñayivi yíca nuú xitoho da vatí coo nacaja vaha da nuú xitoho da —nacachi Jesús xihín quiahva sácú a nuú na xíca tuun

xihin á cán.

Anda já nacachi tucu a já xihin ná:

—Ñayivi cátóo canduu vaha ñuyivi yóho xini vaha chága na ndaja cája na candoo vaha nu táhan na a juú ga na sa xica íchi cuéntá Ndióxi.

⁹ Ñayivi ndúu ñuyivi yóho cája na ña núu xihín ña cómi na. Joo ndóhó, xini ñúhú caja ndó ndinuhu ña vaha xihín ña cómi ndo. Jáchi ña jan quéa cuni Ndióxi caja ndó. Jáchi tá ná xinu quivi quivi ndó já ndiquehe vaha na ndohó indivi sahá ña nacaja vaha ndó xihín ña nasacomí ndo.

¹⁰ Ta ndá da xihín ndinuhu ini ndáa da ñaha da vatí loho cúu á quiahva já caja ri da candaa da ñaha da tá cuaha cúu á. Joo ndá da co ndáa da ñaha da xihín ndinuhu ini da vatí loho cúu á quiahva já a cándaa vaha da ñaha da tá cuaha cúu á.

¹¹ Ta tá co ndáa vaha ndó ñaha ñuyivi yóho já quéa ni Ndióxi a quiahva toho a ñaha cuéntá indivi nu ndo jáchi a catiahva ndó candaa ndó ña.

¹² Ta tá co tiáhva ndó candaa ndó ña nasahan too inga na nu ndo, náha ña a cúu ndiquiahva na ña cacuu ñaha mé ndó nu ndo jáchi a catiahva ndó candaa ndó ña.

¹³ Ni in túhún toho mozo a cúu caja chúun nuú ivi xitoho. Jáchi candají da in xitoho da ta inga xitoho da quihvi ini chága da. Á tá coo ta caja ndívi vaha da chuun nuú in xitoho da ta inga da cán a cája chúun vaha da nuu. Ta quiahva já in ri xihín ndóhó va jáchi a cuú caja cáhnu ndó Ndióxi tá chínúu ndó ínima ndó jatá jjuhún ndo —nacachi Jesús.

¹⁴ Ta nu cáhan Jesús cán ndíta na fariseo, na cátóo ndivaha jjuhún táa johu na nu cáhan mé á. Ta nacasáha na sácu ndaa na Jesús.

¹⁵ Anda já nacachi Jesús já xihin ná:

—Cája ndó tátuhun cúu ndó ñayivi vaha nuú ñayivi joo sa xini vaha Ndióxi ínima ndo. Ndá ña cáhvi ini ñayivi ndáyahvi chága, ña jan quéa co ndáyahvi nu Ndióxi —nacachi Jesús xihin ná.

Ndítahan nuú ñayivi caja na ña nasahnda Ndióxi anda quiahva ná naá saha ñuyivi xihín indivi

¹⁶ Anda já nacachi tucu Jesús já:

—Janda tá cámaní xinu Juan, da nacaja ndúta ñayivi já nasahin ley Moisés xihín ña najánaha na profeta sanahá. Joo viti ndijáá ndícuíta nuu tuhun Ndióxi cuahan ña vaxi quivi cacomí Ndióxi cuéntá sahá ñayivi. Ta ndá na cuni ndiquiahva na mé ná ndáha Ndióxi ndítahan nu ná ndihi ini na ndihvi na íchi cuéntá mé á.

¹⁷ Joo janda quiahva ná naá saha ñuyivi xihín indivi ndítahan nuú ñayivi caja na tóco ndihi ña sáhdá ley. Jáchi janda vaha chága in a ná ndihi sahá ñuyivi xihín indivi a juú ga ña ná ndihi sahá in túhún tuhun ndácaan nu ley Moisés —nacachi Jesús.

Tá jándacoo táhan na sa natandaha (Mt. 19:1-12; Mr. 10:1-12)

¹⁸ Anda já nacachi tucu Jesús já:

—Tá jándacoo in dataa ñájíhí da ta tándaha dá xihín inga ñáñáha já quéa cája da cuachi nu Ndióxi. Ta ndá da tándaha xihín in ñáñáha, ña najándacoo yíi, cája ri da cán va cuachi nu Ndióxi —nacachi Jesús.

Ña nandoho in da cuicá xihín ña nandoho in da naní Lázaro

¹⁹ Ndícani Jesús nuú ñayivi já nacachi a já xihin ná:

—Nasahin in da cuicá ta a juú quiahva vaha jáhma nasandixi da ta chí a juú quiahva ñúchí nacaja cutú da vehe da jáchi ndijáá níi quivi nasacaja da víco nu xixáhan cuicá ndivaha da.

²⁰ Ta nasahin in da ndahví naní Lázaro. Quihvi da ta ndóho da cuehe ndihi táhyi. Ta ndáhví cáa da in coo da nu ñúhu yuyéhé da cuicá cán.

²¹ Ta mé da ndahví yóho cuni da jáchutú da tixi da xihín ña ndícava nu mesa da cuicá cán. Ta xihín ña ndeé quihvi da ndahví yóho chí janda tina xinu coo rí yácó ndaa rí nuú ndihi nanana níi da cán.

²² Ta ndaja coo in quivi naxihí da ndahví cán. Já naxinu táto Ndióxi já ñéhe na da cuahan da coo da indivi nu in Abraham. Ta jári da cuicá cán va naxihí da ta nasahan na najánduxu ná da.

²³ Ta nani ndóho ini da cuicá cán ndácaan da indayá já nandiñehe da nuu dá. Já naxini xicá da Abraham. Ta naxini da in Lázaro xihín dá.

24 Anda já nacasáhá da cuicá cán cáyuhú da já nacachi da já: “Tátá Abraham, candáhvi loho ini ndó yehe. Ta ná chindahá ndó Lázaro ná quixi da yóho quiahva loho da ticuñi jándaxi loho da yaá i jáchi ndóho ndivaha ini i indayá yóho nu cáyi ñuhú ita.”

25 Anda já nacachi Abraham já xihín dá: “Jahyi a, xíní ñuhú ndicuhun inún ña vaha ndivaha nasahún ñuyívi. Ta Lázaro yóho ndáhvi ndivaha nandoho da ñuyívi sahá ña cán queá co ndóho ga ini da yóho viti nani ndóho inún jan viti.

26 Ta a cúu saá toho Lázaro nu iún jan jáchi ín in táhvi cúná ndivaha tañu ndehe, na ndúu xoo chóho xihín ndóhó, na ndúu xoo chí jan. Sahá ña cán queá a cuú cuhun na ndúu xoo chóho chí jan ta ni na ndúu xoo chí jan a cuú quixi xoo chóho”, nacachi Abraham xihín da cán.

27 Anda já nacachi da cuicá cán já xihín Abraham: “Tá ta já ta caja loho ndó ñamani, tátá Abraham ña ná chindahá loho ndó Lázaro ña ná cuhun da vehe tátá i

28 ná cahan loho da xihín na vehe e. Jáchi ndúu uhun ñani i ta co cúni i ña ná quixi na cán yóho ndoho ini na tá quiahva ndóho ini i viti”, nacachi da cuicá cán xihín Abraham.

29 Joo nanducú ñehe Abraham tuhun nu dá já nacachi da já xihín dá: “Sa ín va ley nacahyí Moisés xihín ña nacahyí na profeta nuú na cán. Vaha va ná caja na ña cáchi a”, nacachi Abraham xihín dá.

30 Anda já nanducú ñehe da cuicá cán tuhun nu Abraham já nacachi da já xihín dá: “Mé a ndaa queá cahan ndó jan, tátá Abraham. Joo vaha chága ná chindahá ndó in táhan na sa naxihí já ná cahan na xihín ñani i já ná jándacoo cama na cuachi cája na”, nacachi da xihín Abraham.

31 Anda já nacachi tucu Abraham já xihín dá: “Tá co cúni ñanún caja da ña nacahyí Moisés xihín ña nacahyí na profeta quiahva já a cándusa toho ri na ndiquehe vaha na in ndii tá ná nditacu a cuhun a cahan xihín ñanún”, nacachi Abraham xihín da cuicá cán —nacachi Jesús xihín ñayivi.

Tá jácahan táhan ñayivi caja na cuachi (Mt. 18:6-7, 21-22; Mr. 9:42)

1 Anda já nacachi Jesús já xihín na xíca tuun xihín á:

—Níi tiempo quixi ñaha ña cája ña ná ndicají ini ñayivi caja na cuachi. Joo ndáhvi nacuu na tá ná jándicava na inga na nuú cuachi.

2 Janda vaha chága ná candico in yuú yojó jico ná ta ná ndihi saha ná cahá tañuhú a juú ga ña jándicava na na ndáhvi yóho nuú cuachi.

3 Cuénta coo ndó xihín ña cája ndó.

—Tá ná caja ñani táhan ndó cuachi nu ndo, janani ndó da. Ta tá ná tahvi ini da sahá cuachi nacaja da, caja cáhnu ini ndó saha dá.

4 Ta vatí usa táhdá ná caja da cuachi nu ndo in quivi ta já vaxi tucu da nu ndo usa táhdá ta já casáhá cáchi tucu da xihín ndo ña a ndicó coo ga da caja da ña já ndítahan nu ndó caja cáhnu ini ndó saha dá —nacachi Jesús.

Cúni na xíca tuun xihín Jesús candeé cáhnu chága ini na mé á

5 Tá nandihí já nacachi na xíca tuun xihín Jesús cán já xihín á:

—Vá ná caja ndó ña ná candeé chága ini nde ndohó —nacachi na xihín á.

6 Anda já nacachi Jesús já xihín ná:

—Tá ná candeé ini ndó yehe vatí cúu á tátuhun in ndiquí mostaza cuu cachi ndó xihín in yito cáhnu ña ná cuhun dó candichi dó ini tañuhú ta chí já ndusa coo.

Ña ndítahan caja in da nuú xitoho da

7 Tá ín in mozo ndo ta chindahá ndó da yucu ña ná tiin da yatá á candaa da quiti janá ndo ta tá ná ndicó coo da cán já ama ná cachi ndó xihín dá ña ná yaha da cacoo da nu mesa cuxu da.

8 Ña caja ndó queá cachi ndó já xihín dá: “Jacátahan ñaha ná cajini i ta caja ndívi ná cuxu u. Ta tá sa nandihí naxixi i já cuxu mún tá cúnun”, ña jan va queá cahan ndó xihín mozo ndo.

9 Ta ama ná ndiquiahva ñayivi ndixahvi nu mozo na tá nandihí nacaja da in chuun nasahnda na nu dá caja da.

10 Ta quiahva já ndítahan coo ri xihín ndóhó va. Tá ná ndihi nacaja ndó tóco

ndihi chuun ñasahnda Ndióxi nu ndo já ndítahan nu ndó cachi ndó já: “Mé nde cúu nde mozo coó saha ta ñacaja cuití va nde chuun ndítahan nuú nde caja nde”, já ndítahan cachi ndó —ñacachi Jesús xihín ña cán.

Tá ñandaja vaha Jesús uxu taa ndóho cuehe táhyi

¹¹ Ta nani xíca Jesús cuahan chí ñuu Jerusalén já ñayaha chí xoo nu in lindero ña Samaria xihín ña Galilea.

¹² Ta tá ñaxinu coo a in ñuu loho já ñaqueta uxu taa ndóho cuehe táhyi nu á joo ñasacuita xíca da nu á.

¹³ Já ñacasáhá cáyuhú da nu Jesús já ñacachi da já xihín á:

—Jesús, maestro, candáhví loho ini ndó ndehe —ñacachi da xihín Jesús.

¹⁴ Tá ñaxini Jesús ndíhuxu da cán já ñacachi a já xihín dá:

—Cuáhán ndó ñaha ndó mé ndó nuú ña cúu jutú —ñacachi Jesús xihín dá.

Ta nani xíca ndihi da cuahan da ñandivií yiquí cuñu da ta ñandindaa cuehe da.

¹⁵ Ta ndaja coo in táhan ndíhuxu da cán tá ñaxini da ña ñandivií yiquí cuñu da já ñacavatá ndivaha da. Ta ñacasáhá da cája cáhnu da Ndióxi cáyuhú cóhó da já ñandicó coo da nu Jesús.

¹⁶ Já ñacaxítí da nu á janda quiahva ñaxinu taan da nu ñúhu jáchi ndíquiahva ndivaha da ndixahvi nu á. Ta mé dataa yóho cúu dá da Samaria.

¹⁷ Anda já ñacachi Jesús já xihín dá:

—Uxu cúu da ñandivaha ñacaja i. Joo in da cán coó ñaxeen toho da ndicó coo da ndiquiahva da ndixahvi nuú i.

¹⁸ In túhún da tóho yóho cuití va cúu da ñandicó coo ndíquiahva ndixahvi nu Ndióxi —ñacachi Jesús.

¹⁹ Anda já ñacachi Jesús já xihín dataa cán:

—Candichi ta cuáhán. Ñandivahún jáchi ñacandúsún yehe —ñacachi Jesús.

Ndaja coo tá ná xinu coo quiví cacomí Ndióxi cuénta sahá ñayivi

(Mt. 24:23-28, 36-41)

²⁰ Ta ndaja coo ña fariseo ñacasáhá ña ndáca tuhún ña Jesús ña ndá ama casáhá Ndióxi cacomí a cuénta sahá ñayivi. Anda

já ñanducú ñehe Jesús tuhun nu ná já ñacachi a já xihín ná:

—A cúu cuni ndó nuú cacomí Ndióxi cuénta sahá ñayivi.

²¹ Coó toho ñayivi cachi xihín ndo: “Yóho in a”, á “Cáa in a.” Mé a ndaa ná cahan i xihín ndo sa ñaxinu va quiví ta viti tañu mé ndó ñacasáhá comí Ndióxi cuénta sahá ñayivi —ñacachi Jesús xihín ña fariseo cán.

²² Anda já ñacasáhá cáhí a já xihín ña xíca tuun xihín á:

—Vaxi quiví tá cuni ndó cuni ndó yehe, da ñachindahá Ndióxi nduu ñayivi vatí ná coo i in quiví cuití va. Joo a cóo toho i xihín ndo.

²³ Ta queta ñayivi cachi xihín ndo: “Yóho in da.” Á tá coó ta cachi na xihín ndo: “Cán in da”, cachi na xihín ndo. Joo coto a cühun ndó candehé ndo. A cándico ndó jata ná cühun ndo.

²⁴ Jáchi tá ná xinu ndusa quiví quixi yehe já cuni ndó quixi i tá quiahva quixi tasa. Ta ndijáá ñayivi cuni na ndá quiahva ndiyehé a tá xoo tá xoo. Quiahva já coo tá ná xinu quiví quixi yehe, da ñachindahá Ndióxi nduu ñayivi.

²⁵ Joo jihna ñúhú ndítahan nuú i ndoho ndivaha ini i. Ta a juú quiahva candají ñayivi ndúu tiempo viti yehe.

²⁶ Tá quiahva ñasahin tiempo tá ñasahin Noé sanahá quiahva já coo ri tá ná xinu coo quiví quixi ri yehe, da ñachindahá Ndióxi nduu ñayivi.

²⁷ Jáchi mé tiempo cán xíxi na ta xíhi na ta cája na vicó tándaha janda quiahva ñaxinu quiví ñaquihvi Noé ini barco cáhnu. Já ñaxinu javi quini ndivaha ta najahvi ñuyiví xihín ticují já ñaxihí ndihi ñayivi ñasanduu tiempo cán.

²⁸ Ta quiahva já ñasahin ri mé tiempo tá ñasatacu Lot sanahá. Jandá joho cáxixi ñayivi ta jandá joho cáxixi na ta jandá joho xéen na ñaha ta jandá joho jícó ña ñaha ndúu na jandá joho cáxutu na ta jandá joho cávaha na vehe na.

²⁹ Ta tá ñaxinu quiví najándacoo Lot ñuu Sodoma cán já ñaqueta da cuahan da xihín ña vehe da já ñacuyu ñúhu xihín yuu cáyi chí indiví ta já ñaxihí ndihi ñayivi ñasanduu cán.

30 Quiahva já caja ñayivi mé tiempo já jáchi ndihi ini na catacu na janda quiahva xinu coo quivi quixi tucu yehe ñuyivi yoho, mé da nachindahá Ndióxi nduu ñayivi.

31 "Ta ndá ndó, na ndúu jata véhe ndó mé quivi já a quihvi ndó ini vehe ndó ña tava ndó ñaha cómi ndo. Ta ndá ndó, na ndúu yucu a ndíxi ndó vehe ndó.

32 Ndítahan ndicuhun ini ndó ndaja nandoho ña cúu ñájíhí Lot jáchi nacava jata nuu ña sándehe ña ña najándacoo ña ta já nandihí saha mé ña cán.

33 Ndá na chínúu ínima jata ñaha ñuyivi yoho, na cán cúu na ndihí saha. Joo ndá na ndíquiahva mé ndáha mí i ta in tiaha na quivi na saha i, na cán cúu na catacu anda ama cáa quivi.

34 "Mé a ndaa ná cahan i xihin ndo ña tá ná xinu quivi cán já ndiquehe e na cúu cuénta mí i. Cacu a tátuhun tá ndúu ivi na quiji na in xito ta in na ndiquehe e ta inga na candoo va saha ña coo nacandúsa na mí i.

35 Ta tá ndúu ivi na ndíco na ta in ña ndindita cuhun xihin i ta inga ña candoo va.

36 Ta tá ndúu ivi dataa yucu xutu da ta in da ndindita cuhun xihin i ta inga da candoo va —nacachi Jesús.

37 Tá naxini joho na xica tuun xihin Jesús ña yoho já nandaca tuhún na mé á já nacachi na já xihin á:

—Ta ndachi yaha tóco ndihí ña cáchi ndó xihin nde yoho, xitoho.

Anda já nacachi Jesús já xihin ná:

—Tá quiahva cája tiyocó tá táca ri nu cánduhu in quiti, ri naxihí quiahva já caja ñayivi taca na nuú i tá ná xinu quivi quixi i —nacachi Jesús.

18

Tá naxica in ña cuáan ñamaní nuú da cúu juéxe

1 Nasacu Jesús in quiahva nu ná jáchi xihin quiahva yoho cúni a jánaña nu ná ña ní tiempo xini ñuhú caça tahví na nu Ndióxi ta co ndítahan cuitá ini na xihin á.

2 Já nacachi a já xihin ná:

—In ñuu nasahin in juéxe ta coo nasahin toní ñuhú da xihin Ndióxi ta ni co sáhní da mé dá cúu ñayivi.

3 Ta mé ñuu cán nasahin in ña cuáan. Ta ndijáá ní quivi sahan ña cahan ndahví ña xihin mé juéxe cán ña ná caja vii da saha ña saha in na co cúni táhan xihin ña.

4 Ta sa cuahá quivi ta já cúu va ña sahan ña nu dá ta co cúni da caja vii da saha ña. Joo tá nandihí já nacahan da já: "Vatí coo toní ñuhú i xihin Ndióxi ta ni co sáhní i mí i cúu ñayivi

5 joo já caja tá caja vii i saha ña cuáan yoho jáchi jándihí ndivaha ña yehe saha ña cán ndiquehe e saha ña já ná a quixi ga ña jándihí ña ini i", nacahan da cúu juéxe cán —nacachi Jesús xihin ná.

6 Anda já nacachi Jesús já xihin na ndúu cán já:

—Ña yoho quéa nacachi juéxe, da co ñehe ínima va ha cán.

7 Joo cáhnu ga ví ñaha caja Ndióxi tá ná ndiquehe a saha na cúu cuénta mé á tá xica tahví na nu á ñuu ta ndiví. Jáchi ndati tiaha chindeé a na cúu cuénta mé á.

8 Mé a ndaa ná cahan i xihin ndo ña ivi laa ndiquehe mé á saha ná. Joo in ñaha cúni ndaca tuhún i ndohó. Á ndíñehe e ñayivi cándeé ini na yehe tá ná xinu quivi quixi tucu u ñuyivi yoho —nacachi Jesús xihin ná.

Sácu Jesús quiahva saha in da fariseo xihin saha da jataca jiuhún cuénta impuesto

9 Anda já nasacu Jesús inga quiahva nuú java ñayivi, na ndíñehe jíco mé, na cáhan ña mé cuití na cája ña va ha. Ta já nacasaha cáchi a já xihin ná:

10 —In tañu ivi taa nasahan da veñuhu caça tahví da nu Ndióxi. In táhan da cán cúu fariseo ta inga da cán cúu da jataca jiuhún cuénta impuesto.

11 Ta nani xica tahví da fariseo cán nu Ndióxi cándichi da já cáchi da já: "Tátá Ndióxi, ndíquiahva i ndixahvi nu ndo jáchi co cája i tá quiahva cája java ga ñayivi. Jáchi java na cája cuíhna na ta quini cája na ta cátoó na coo na xihin ñájíhí ñani táhan na. Ta jári ndíquiahva i ndixahvi nu ndo jáchi co cája i tá quiahva cája da jataca jiuhún cuénta impuesto yoho.

12 Jáchi yehe ivi tañu xijuhun i in in semana ta tá cháhvi na yehe saha chuun cája i já cávaha i uxu táhnda ta já jóco i in táhnda nu mé ndó", cáchi da fariseo cán.

13 Joo da játaca jiuhún cuéntá impuesto cán xícá xícá nasandichi da ta chí ni nuu dá co cúni da ndiñehe da indiví sahá ña cáhán da ña coó saha dá caja da ña. Ña cája da quéa cáni da yica ndicá da ta já cáhí da já xíca tahví da nu Ndióxi: “Tátá Ndióxi, candáhví ini ndó yehe jáchi cúu u in da cája cuachi”, cáhí da.

14 Mé a ndaa ná cahan i xihin ndo ña nacaja cáhnu ini Ndióxi sahá da játaca jiuhún cuéntá impuesto já cuanúhu va da joo coó nacaja cáhnu ini a sahá da fariseo cán. Nacaja cáhnu ini Ndióxi sahá da játaca jiuhún cuéntá impuesto jáchi ndá na ndiñehe jícó mé jánuu ndáha Ndióxi na. Joo ndá na jánuu mé nu Ndióxi já jándiñehe jícó mé á na —nacachi Jesús xihin ná.

Cája yii Jesús na valí
(Mt. 19:13-15; Mr. 10:13-16)

15 Ta cuahá ñayivi ñehe na na valí naxinu coo na nu Jesús já ná cani ndaa ndáha á na. Joo tá naxini na xica tuun xihin Jesús cán ña yóho, nacasáha na cája cuehe na xihin mé na ndáca na valí cán.

16 Joo nacana Jesús na já nacachi a já xihin ná:

—Quiahva ndó ñamaní ná quixi na valí nuú i. Ta a cáji nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho.

17 Mé a ndaa ná cahan i xihin ndo ndá na coo cúni ndiquiahva na mé ná ndáha Ndióxi tátuhun cája na valí yóho já quéa a cúu cacomí Ndióxi cuéntá saha ná —nacachi Jesús xihin ná.

Cáhan in da cuicá xihin Jesús
(Mt. 19:16-30; Mr. 10:17-31)

18 In táhan da sáhdá chuun cán nandaca tuhún da Jesús já nacachi da já xihin á:

—Maestro, mé ndó cúu ndó taa vaha ña cán quéa ndáca tuhún i ndohó ndía ndítahan caja i já ná ñehe táhvi i cuhun i indiví coo i anda ama cáa quivi —nacachi da xihin Jesús.

19 Anda já nacachi Jesús já xihin dá:

—Ndá cuéntá quéa cáhún xihin i ña cúu u da vaha. Ni in tuhún toho ñayivi coo cúu ná na vaha ñuyivi yóho. In tuhún Ndióxi cuití va quéa vaha.

20 Sa xini vún ña sáhdá Ndióxi nuun cajún já cáhí a já: “Coto a coún xihin ñájihí á yí ñani táhún. Coto a cáhún ndii. Coto a cája cuíhnún. Coto a cáhun ña tuhún sahá ñayivi. Ta caja cáhún tátún nánún” —nacachi Jesús xihin da cuicá cán.

21 Anda já nanducú ñehe da cán tuhun nu Jesús já nacachi da já xihin á:

—Janda taa loho i nacasáha i cája i tóco ndihi ña sáhdá Ndióxi caja i —nacachi da xihin Jesús.

22 Tá naxini johó Jesús ña nacachi da yóho xihin á já nacachi a já xihin dá:

—Inga ñaha cámaní cajún: Cuáhán jicún tóco ndihi ñahún jan ta ndicahnda jiuhún jan nuú na ndahví já ñehe táhvun coo cuahá ñahún indiví. Ta tá nandihí já quisún candicún yehe —nacachi Jesús xihin dá.

23 Tá naxini johó da cuicá cán ña nacachi Jesús xihin dá já nacacuéha ndivaha ini da jáchi ín cuahá ndivaha ñaha dá.

24 Tá naxini Jesús ña nacacuéha ini da cuicá cán já cáhí a já:

—Ndaja yancá ndivaha cáa já ndiquiahva na cuicá mé ná ndáha Ndióxi ña ná cacomí a cuéntá saha ná.

25 Jáchi janda cama chága cuu yaha in camello ini in yávi saha yítucú a juú ga ña ná ndiquiahva in na cuicá mé ná ndáha Ndióxi ña ná cacomí a cuéntá saha ná —nacachi Jesús.

26 Tá naxini johó ñayivi ndíta cán ña nacachi Jesús já nacachi na cán já:

—Ndá na cúu na cuu cacu ndaa ínima, dá já.

27 Anda já nacachi Jesús já xihin ná:

—Ndióxi quéa cuu caja tóco ndihi ñaha vatí ñayivi a cuú caja na ña —nacachi Jesús xihin ñayivi ndúu cán.

28 Anda já nacachi Pedro já:

—Candehé ndo, xitoho i. Ndehe najándacoo nde tóco ndihi ña nasacomí nde ta ndíco nde ndohó —nacachi da xihin Jesús.

29 Anda já nanducú ñehe Jesús tuhun nu dá já nacachi a já:

—Mé a ndaa ná cahan i xihin ndo ña ndá na jándacoo vehe á tátá náná na á ñani na á ñájihí na á jahyi na sahá ña cúni na ña ná cacomí Ndióxi cuéntá saha ná,

³⁰ nā cán cúú nā ñehe cuaha chága ñaha ñuyíví yóho jata tóco ndihi ña najándacoo na. Ta vaxi quiví já ñehe táhvi ri na catacu na indiví anda ama cáa quivi —ñacachi Jesús.

*Cáxi tuhun tucu Jesús ña quivi a
(Mt. 20:17-19; Mr. 10:32-34)*

³¹ Tá nandihí já ñatavá xóo Jesús ndihuxu ivi nā xíca tuun xihín á cán. Já ñacachi a já xihín ná:

—Viti cohó chí ñuu Jerusalén nuú xinu coo tóco ndihi ña ñacahyí nā profeta sahá yehe, da ñachindahá Ndióxi nduu ñayivi.

³² Jáchi mé ñuu cán tiin na yehe já ndiquiahva na yehe ndahá nā tóho. Cuacu ndaa na yehe. Canahá nā xihín i. Cuihna ndaa na tójií nā yehe.

³³ Cani na yehe. Ta tá nandihí já cahní nā yehe. Joo tá ná yaha uní quivi já nditacu tucu u tañu nā ñaxihí —ñacachi Jesús.

³⁴ Joo nā xíca tuun xihín á cán ni loho coo ñacandaa ini na ña cúní Jesús cachi a xihín ná. Jáchi cúú á ñaha ña coo ñacuu candaa ini na saha.

Tá ñandaja vaha Jesús in da cuaá ñuu Jericó

(Mt. 20:29-34; Mr. 10:46-52)

³⁵ Tá ñacayati Jesús ñuu Jericó cán ta yati jín íchi nū xíca mé á cuahan cán ín coo in da cuaá sáti da.

³⁶ Ta tá ñaxini johó da ña yaha cuahá ñayivi cuahan nā já ñacasáhá da ndáca tuhún da ndía cúu.

³⁷ Anda já ñacachi na já xihín dá:

—Jesús, da ñuu Nazaret, da cán cúú da yaha cuahan yóho —ñacachi na xihín dá.

³⁸ Anda já ñacasáhá da cuaá cán cáyuhú da já cáchi da já:

—Jesús, da ñaquixi chichi David, caja ndó ñamaní candáhvi loho ini ndó yehe —cáchi da.

³⁹ Joo ñayivi, nā cánúú cuahan xihín Jesús cán ñacasáhá nā cája cuehe nā xihín dá ña ná caji da yúhu dá. Joo ví ga ví ñacasáhá da cáyuhú da já cáchi tucu da:

—Ndóhó, da ñaquixi chichi David, caja ndó ñamaní candáhvi loho ini ndó yehe —cáchi da cáyuhú da.

⁴⁰ Anda já ñacandichi Jesús já ñasahnda chuun ña ná cañehe na da cuaá cán nū á. Ta tá ñaxinu da nū á já ñandaca tuhún a da.

⁴¹ Já ñacachi a já xihín dá:

—Ndía cúnun ná caji i xuhun —ñacachi Jesús xihín dá.

Anda já ñanducú ñehe da cuaá cán tuhun nū á já ñacachi da já:

—Ndaca ndehé e cúní i, xitoho i —ñacachi da.

⁴² Tá nandihí já ñacachi Jesús já xihín dá:

—Candehé viti. Nandivahún jáchi candéé inún yehe —ñacachi Jesús xihín dá.

⁴³ Chí ivi laá ñanuna nuú da cuaá cán. Ta chí a juú quiahva cája cáhnu da Ndióxi. Ndioco da Jesús cuahan da. Ta jári tóco ndihi ñayivi tá ñaxini na ña yóho já ñacasáhá na cája cáhnu na Ndióxi.

19

Tá cáhan Jesús xihín in da naní Zaqueo

¹ Tá nandihí já ñandihvi Jesús ñuu Jericó cán já xíca mahñú ñuu cuahan.

² Ta cán ñasahin in da cuicá naní Zaqueo, da cúú da sacuahá nuú nā jātaca jjuhún cuéntá impuesto.

³ Ta cúní da cuni da Jesús joo a cuú cuni ñahá da jáchi cáti cuahá ndivaha ñayivi nū Jesús. Ta mé dá co xínu coo da cuni ñahá da jáchi cúú dá da ndihí.

⁴ Chí xínu da ñacanúú da nuú ñayivi cuaha cán já ñandaa da nuú in yito yati mé jín íchi, mé nuú yaha Jesús cán ña ná cuni ñahá da.

⁵ Ta tá ñayaha Jesús yati saha yito cán já ñandiñehe nuú á nū cánúu da cán. Já ñacachi a já xihín dá:

—Zaqueo, cuánuu quí jáchi cúní coo tóo i vehún quivi viti —ñacachi Jesús xihín dá.

⁶ Anda já ndáva nihni Zaqueo ñanuu da nū yito cán. Já cávatá da ñandiquehe vaha da Jesús cañehe da a cuahan da xihín á vehe da.

⁷ Joo tá ñaxini tóco ndihi java ga ñayivi cán ña yóho já ñacasáhá nā cáhan núu na saha Jesús. Ta cáchi nā ña cuahan mé á coo tóo a vehe in dataa, da cája cuahá cuachi.

⁸ Ta tá sa ndúu ndihi na vehe Zaqueo já ñandaca ndichi Zaqueo já ñacachi da já xihín Jesús:

—Candehé ndo, xitoho i. Cahnda java ndaa i ñaha cómí i ta já ndicahnda i ña nuú na ndahví. Ta ndá na ñacaja cuíhná i ñaha, na cán quiahva i comí táhndá chága ñaha nuú jáchi najándahvi i na —ñacachi Zaqueo cán.

⁹ Anda já ñacachi Jesús já xihín ná:

—Quiví viti cája cáhnu ini Ndióxi sahá cuachi da yóho xihín cuachi na vehe da jáchi xihín ña ñacaja da yóho viti náha ña mé a ndaa cándeé ini da Ndióxi tá quiahva ñacaja Abraham.

¹⁰ Ta yehe, da ñachindahá Ndióxi nduu ñayivi ñaquixi i ndinducú u na xica nuu cája cuahá cuachi jáchi cacu ndaa ínima ná cúní —ñacachi Jesús xihín ná ta já ñaquee a cuahan tucu a íchi chí ñuu Jerusalén.

Tá ñasahan in dataa jiuhún da nuú uxu mozo da

(Mt. 25:14-30)

¹¹ Ta nani xini joho ñayivi ña cáhan Jesús já ñasacu mé á in quiahva nu ná jáchi cáyati chága mé á ñuu Jerusalén cuahan. Ta mé ñayivi ndico cuahan cán ñacahan na ña tá xinu coo a ñuu Jerusalén cán chí ivi laá va casahá Ndióxi cacomí a cuéntá sahá ñayivi vatí a juú a já.

¹² Anda já ñacachi Jesús já xihín ná:

—Ñasahin in dataa, da cúu jahyi in rey. In quiví ñaquee da cuahan xicá da ña ndicojo da chuun cacuu da rey. Tá ñandihi ñasacu ini da nuhu da ñuu da.

¹³ Joo tá cámaní nuhu da já ñacana da uxu mozo da. Ta ñasahan da in in jiuhún nuú in in da cán ta mé jiuhún cán cúu á ña in ndivaha yahvi. Anda já ñacachi da já xihín mozo dá: “Caja ndó ndahvi xihín jiuhún yóho janda quiahva ná xinu quivi ndico coo tucu u quixi i”, ñacachi da xihín mozo da. Já ñaquee da cuanúhu dá.

¹⁴ Ta ndaja coo ñayivi ñundáhyi xicá cándají na da. Sahá ña cán queá ñachindahá na in táhndá táto ña ná cachi na xihín tátá da ña co cúní toho na ña ná cacomí da cán cuéntá saha ná.

¹⁵ Joo já ñandicojo da cán chuun cacuu da rey mé ñundáhyi xicá. Ta tá ñaxinu coo da cán já ñasahnda da chuun ña ná cuhun na cana na mozo da, da ñasahan da jiuhún

nu cán. Jáchi cúní da candaa ini da ndaja jiuhún ñañehe in in da cán jatá jiuhún da.

¹⁶ Tá ñandihi já ñaxinu coo in táhan da ñañehe jiuhún cán nu dá já ñacachi da já: “Candehé ndó, xitoho i. Ñasahan ndó in jiuhún nuú i ta viti ñandu u uxu”, ñacachi da.

¹⁷ Anda já ñanducú ñehe da cúu rey cán tuhun nu dá já ñacachi da já xihín dá: “Vaha ndivaha ñacajún xihín ña yóho. Náha ña mé a ndaa cúun in mozo vaha jáchi ñacaja ndihún tá in ñacachi i xuhún cajún xihín jiuhún i vatí loho queá ñasahan i nuun caja chúun. Ta viti caja i ña ná cacomún cuéntá sahá uxu ñuu”, ñacachi rey cán xihín dá.

¹⁸ Tá ñandihi já ñaxinu coo inga táhan da ñañehe jiuhún cán nu dá já ñacachi da já: “Candehé ndo, xitoho i. Ñasahan ndó in jiuhún nuú i ta viti ñandu a uhun”, ñacachi mozo cán.

¹⁹ Anda já ñacachi da cúu rey já xihín dá: “Vaha ñacajún sahá ña cán queá caja i ña ná cacomún cuéntá sahá uhun ñuu”, ñacachi rey cán xihín dá.

²⁰ Ta tá ñandihi já ñaxinu coo inga táhan da cán já ñacachi da já: “Candehé ndo, xitoho i. Yóho in mé jiuhún ñasahan ndó nuú i. Ñachicaan vaha i ña nu jáhma i

²¹ sahá ña yíhví i ndohó. Jáchi cúu ndó in ta cuehe ndivaha. Ta catóo ndó ndiquehe maní uun ndó ñaha. Ta catóo ndó ña ná caja chúun inga ñayivi já jandá xinu uun ndó ndiquehe ndó ñaha ñañehe ná jatá chuun cája ndó”, ñacachi mozo cán.

²² Anda já ñanducú ñehe da cúu rey cán tuhun nu mozo da já ñacachi da já xihín dá: “Coo cúun in mozo vaha nuú i. Xihín tuhun cáhun chícáun cuachi jatun jáchi co cúnun caja chúun sahá i. Cáchun ña xini vahún cúu yehe in da cuehe ndivaha ta catóo i quehe e jiquí jiuhún i vatí coo ñacaja chúun i sahá.

²³ Sahá ña cán queá ndá cuéntá queá coo ñasahan tóun jiuhún i, dá já. Já queá tá ná ndico coo i já ná ndiquehe e jiquí á nuú na cán, nduu”, ñacachi rey cán xihín mozo da.

²⁴ Tá ñandihi já ñacachi tucu rey xihín java ga ñayivi ndíta cán já: “Candaa ndó jiuhún ndáha dá ta quiahva ndó ña nuú da cómí uxu a jan”, ñacachi da cúu rey cán.

²⁵ Anda já ñacachi na ndíta cán já xihín

rey: “Candehé ndo, xitoho i. Ndá túni quiahva ri nde jiuhún yóho nuú da sa cómí uxu a cáa jáchi sa cuahan va jiuhún cómí da cáa”, nacachi na xihin rey cán.

²⁶ Já nacachi rey cán já: “Mé a ndaa ná cahan i xihin ndo, ña ndá na sa lin ñaha nuu, mé na cán ñehe táhvi ná coo chága ña nu ná. Joo ndá na coo ñaha nuu sahá ña co cája chúun na já quéa janda ña loho cómí na ndindaa”, nacachi rey cán.

²⁷ Ta nacachi tucu da já: “Cuahán ndo quehe ndó ñayivi quini, na co cúní yehe, na coo naxeen ña ná cacomí i cuéntá sahá na cán já ná quixi na. Ta cahní ndó na ná quivi na nuu táhyí i”, nacachi rey cán —nacachi Jesús ndicani a nuú ñayivi.

Ndihvi Jesús ñuu Jerusalén

(Mt. 21:1-11; Mr. 11:1-11; Jn. 12:12-19)

²⁸ Tá nandihí nacachi Jesús ña yóho xihin ná já naquehe tucu a íchi xíca cuahan chí ñuu Jerusalén.

²⁹ Ta tá sa naxinu coo a jini yucu yitó olivo cán nuú ja chá xinu coo a ñuu Betfagé xihin ñuu Betania cán já nasahnda chuun nuú ivi táhan da xíca tuun xihin á cán.

³⁰ Já nacachi a já xihin dá:

—Cuahán ndo ñuu loho ndácaan jan. Ta tá ná xinu coo ndó jan ndiñehe ndó in búrró ndíco ndaa jan, rí a ñaha yíi ndaa na. Ndaxí ndó rí ta cañehe ndó rí quixi ndó.

³¹ Ta ndá na ná ndaca tuhún ndohó ña ndá cuéntá quéa ndaxí ndó rí já cachi ndó já xihin ná: “Mé a cúu xitoho nde xíní ñuhú a rí”, cachi ndó xihin ná —nacachi Jesús xihin da cán.

³² Já naquee ndíví da cuahan da. Ta tá quiahva nacachi Jesús coo chí quiahva já ndusa nasahjin.

³³ Jáchi nani ndaxí da búrró cán ndúu da já nacahan mé na xihin jana rí cán saha rí já nacachi na cán já:

—Ndá cuéntá quéa ndaxí ndó búrró jana nde jan —nacachi na cán.

³⁴ Anda já nanducú ñehe da xíca tuun xihin Jesús cán tuhun nu ná já nacachi da já:

—Ndaxí nde rí jáchi mé a cúu xitoho nde, xíní ñuhú a rí —nacachi da.

³⁵ Já naquehe da rí ñehe da cuahan da nu Jesús. Anda já nachojó ñayivi jáhma ná jata rí já najánda na Jesús jata rí.

³⁶ Ta nani xíca búrró cán cuahan rí xihin Jesús já nachinduu ñayivi jáhma ná íchi nuú yaha rí cán xihin á.

³⁷ Ta yati ñuu Jerusalén, mé nuú ndica yucu nani yitó Olivo cán já nacasahá cáyuhú tóco ndihí na cúu cuéntá mé á cán. Cája cahnú na Ndióxi xihin ña cáji ini na saha tóco ndihí ña nahnú naxini na nacaja Jesús.

³⁸ Já cáchí na já cáyuhú na:

—Ndicahnú nahá ná cacuu da cómí cuéntá saha yo yóho jáchi cúu dá da vaxi yuhú nuu Ndióxi. Viti cáji ini na ndúu indiví. Cahnú ná cacuu Ndióxi —cáchí na cáyuhú na.

³⁹ Anda já nacachi java na fariseo ñuhu tañu ñayivi cán já xihin Jesús:

—Maestro, jananí ndó na ndíco jata ndó yóho ná a cáyuhú cóhó na —nacachi na xihin Jesús.

⁴⁰ Joo nanducú ñehe Jesús tuhun nu ná já nacachi a já xihin ná:

—Mé a ndaa ná cahan i xihin ndo ña tá ná catáji yuhú na yóho janda já yuu ndúu jin íchi jan casahá cayuhú a caja cahnú a yehe —nacachi Jesús.

⁴¹ Tá nacayati chága Jesús ñuu Jerusalén cán ta tá naxini a ñuu cán já nacasahá táhvi ini a sácu a sahá.

⁴² Já nacachi a já:

—Cúni janañá i ndohó ndía ndítahan caja ndó já ná coo vaha inima ndó nu Ndióxi. Joo co cúní toho ndó candaa ini ndó ña. Ta viti a cúu ga candaa ini ndó ña.

⁴³ Jáchi vaxi quivi tá quixi na co cúní ndohó ta caji nuu na nu ndo ta caní táhan na xihin ndo. Ta ni in xoo a cúu cunu ndó jáchi níi cúu caji nuu na cán já ná a quée ndó.

⁴⁴ Ta jándihí na saha ndo jáchi cahní na tóco ndihí ndó, na ndúu cán. Ta ni in yuu a cándo jata inga yuu jáchi ña cuyu cacuu ndihí a. Já ndoho ndó jáchi co candaa ini ndó ña naquixi i jaccu u ndohó já ná a ndihí saha ndo —nacachi Jesús.

Tá nataxí Jesús na ndúu jícó ñaha yéhe veñuhu

(Mt. 21:12-17; Mr. 11:15-19; Jn. 2:13-22)

⁴⁵ Tá naxinu coo Jesús ñuu Jerusalén cán já nandihvi a veñuhu cáhnu ndácaan ñuu cán. Já ñacasáhá táxi a ña ndúu jícó cán xihín ña ndúu xéen cán.

⁴⁶ Jáchi ñacaja cuehe a xihín ná ta já ñacachi a já:

—Já cáhí tuhun Ndióxi: “Vehe mí i cacuu a nuú quixi na caça tahví ña nuú i”, cáhí a. Joo ndóhó nandai cuu ndó yóho cája cuihná ndó nuú ñayivi —ñacachi Jesús.

⁴⁷ Ndijáá níi quivi sáhan Jesús veñuhu cáhnu cán jánaḥa tuhun Ndióxi nuú ñayivi. Joo ña cúu sacuaḥa nuú jutū xihín ña jánaḥa ley Moisés xihín ña sacuaḥá ñuu ndúcú ña ndá quiahva caja na cahni ña Jesús.

⁴⁸ Joo co ñeḥe íni ña ndaja caja na cahni ña Jesús jáchi tóco ndihi ñayivi cuni ña taa joho na nu jánaḥa Jesús.

20

Tá nandaca tuhún ña Jesús ña yo sáhan ñamaní nu á jánaḥa ñayivi

(Mt. 21:23-27; Mr. 11:27-33)

¹ Ta ndaja coo in quivi ndácaan Jesús veñuhu cáhnu jánaḥa ñayivi ndaja cuu cacu ndaa ínimá ná já naxinu ña cúu sacuaḥa nuú jutū xihín ña jánaḥa ley Moisés ta cátaḥan ri ña sacuaḥá veñuhu naxinu coo na xihín ná nu ndácaan Jesús cán.

² Anda já ñacachi na já xihín Jesús:

—Ndá saḥa queá jánaḥún ña yóho. Yo já sáhan ñamaní nuun cajún ña cájún yóho —ñacachi ña cán xihín Jesús.

³ Anda já nanducú ñeḥe Jesús tuhun nu ná já ñacachi a já xihín ná:

—Ndáca tuhún ri yeḥe va ndohó. Cachi ndó xihín i:

⁴ Yo já ñachindahá Juan ña ná quixi da caja ndúta dá ñayivi. Á Ndióxi ñachindahá da, á ñayivi ñachindahá ñahá —ñacachi Jesús xihín ña cán ndáca tuhún a ña.

⁵ Anda já ñacasáhá ndítuhún xihín táhan ña sacuaḥa cán já cáhí ña já:

—Ndía cachi yó xihín Jesús yóho. Jáchi tá ná cáhí ña Ndióxi queá ñachindahá Juan já nducú ñeḥe Jesús tuhun nu yo já cachi a já xoho: “Ndá cuéntá queá coo ñaxeen ndó candúsa ndó da, dá já”, cachi Jesús xoho.

⁶ Ta tá ná cáhí ñayivi va cúu ña ñachindahá Juan já ndicuita ñayivi ta cahni ña mí xihín yuu. Jáchi tóco ndihi ñayivi cándaḥa vaha ini na ña Ndióxi queá ñachindahá Juan jáyaha da tuhun cáhan mé á nuú ñayivi —ñacachi xihín táhan ña cán.

⁷ Sahá ña cán queá ñacachi na xihín Jesús ña co xini toho na yo já ñachindahá Juan ña ná quixi da caja ndúta dá ñayivi.

⁸ Anda já nanducú ñeḥe Jesús tuhun nu ná já ñacachi a já xihín ná:

—Ta ni yeḥe a cáxi tuhun i xihín ndó yo já ñasahan ñamaní nuú i caja i ña yóho —ñacachi Jesús xihín ná.

Sácú Jesús quiahva saḥá java mozo, da ñacaja quini xihín xitoho da

(Mt. 21:33-44; Mr. 12:1-11)

⁹ Tá nandihí já ñacasáhá Jesús cáhan xihín ñayivi ta já ñasacu a quiahva yóho nu ná já ñacachi a já:

—Ñasahiin in dataa ta najándeḥe cuaḥa dá tó uva. Ta tá nandihí já ñasahan ndojó ña mé dó uva cán. Anda já ñaquee da cuaḥan xicá da cuaḥa tiempo.

¹⁰ Ta tá naxinu coo tiempo jáquee na uva nu dó uva ñaha da cán já ñachindahá da in mozo da ña ná cuḥun da ndiquehe da uva, rí ndítahan nu dá ndiquehe da. Joo mé ña cája chúun tóo ñúhu dá cán ñatiin na mé mozo cán ta ñacani na da ta já cáa uun da nandicó coo da ñacaja na.

¹¹ Tá nandihí já ñachindahá mé da xihín ñaha ñúhu cán inga tucu mozo da. Joo quiahva já ñacaja ri na xihín da cán va. Ñacanahá ña xihín dá ta ñacani na da. Ta já cáa uun da ñachindahá tucu na da nuú xitoho da. Coó ñaha ñasahan ña nu dá.

¹² Ta mé da xihín ñaha ñúhu cán ñachindahá tucu da inga mozo da ta quiahva já ñacaja ri na xihín da cán va. Najándicueḥe ña da ta já ñataxi ña da.

¹³ Ta tá nu ndihí já ñacahán mé da xihín ñaha ñúhu cán já: “Ña caja i viti queá chindahá i jahyi maní i jáchi cája i cuéntá coo toní ñúhu ña xihín dá tá ná cuni na da”, ñacahán mé da xihín ñaha ñúhu cán. Ta tá nandihí já ñachindahá da jahyi maní dá.

¹⁴ Joo tá naxini ña cája chúun tóo ñúhu dá cán ña vaxi jahyi da já ñacachi xihín

táhan na cán já: “Candehé ndo. Yóho vaxi da cúu jahyi xitoho í. Ta tá ná xinu quivi quivi xitoho í ta da yóho cacuu da ndicojo chuun saha ñúhu yóho. Cóho cahní yó da já ná candoo ñúhu yóho ndáha mí”, nacachi xihin táhan na cán.

¹⁵ Anda já natavá na da cúu jahyi xitoho cán jata cútú ta cán nasahní na da —nacachi Jesús.

Anda já nandaca tuhún Jesús ñayivi ndúu cán já nacachi a já xihin ná:

—Á co xini ndó ndía caja da xihin ñaha ñúhu viti.

¹⁶ Ña caja da quéa quixi da ta cahní ndihi da na nacaja chúun too nu ñúhu dá. Já ndiquiahva da ñúhu dá nuú java ga na já ná caja chúun na nu á —nacachi Jesús.

Tá naxini johó na ndíta cán ña yóho já nacachi ndihi na já:

—A cándéé Ndióxi coo ña jan já —nacachi na cán.

¹⁷ Joo nasandehé Jesús nu ná já nacachi a já:

—Ta viti cachi ndó xihin i ndía cuni cachi tuhun Ndióxi tá cáhí a já:

Mé yuu ña najácana da cávaha vehe, ña cán cúu ña nanduu yuu ndúhu sahá vehe ña ñin chága saha, cáhí tuhun Ndióxi.

¹⁸ Ta yehe cúu u tátuhun in tóto cáhnu. Ta ndá na ná yaha ndicava jata tóto cán chí chachi ndihi na. Quiahva já ndihi sahá ñayivi tá co cuni na candúsa na yehe. Ta mé tóto cáhnu cán tá ná yaha ndicava jata in ñayivi chícaji ndihi ñahá a cán. Quiahva já ndihi sahá ñayivi ini indayá tá co cuni na candúsa na yehe —nacachi Jesús.

Ndáca tuhún na Jesús á ndítahan nu ná chahvi na jiuhún cuénta impuesto

(Mt. 21:45-46; 22:15-22; Mr. 12:12-17)

¹⁹ Chí sa mé hora já cuni na cúu sacuaña nuú jutú xihin na jánaha ley Moisés cán tiin na Jesús jáchi nacandaa ini na ña saha mé va na cán sácú Jesús mé quiahva nuú ñayivi cán. Joo coo ñatiin na Jesús jáchi ñayihvi na ñayivi ndúu táa johó nu cáhan Jesús cán.

²⁰ Ña nacaja na quéa nachindahá na java dataa ña ná cananí da Jesús. Ta ndája da mé dá ña cúu dá taa vaha ndivaha joo co cúu da tá quiahva ndáa da. Ta xihin ña yóho cuni da cayati da nu Jesús ná candehé

da á yaha yúhu á cahan ndá ñaha ña cuu cuhun da jicó tuhún da mé á nuú da cúu gobernador.

²¹ Sahá ña cán quéa nacayati da nu Jesús ta nandaca tuhún da mé á já nacachi da já xihin á:

—Maestro, cándaa ini nde ña cáhan ndó ta jánaha ndó ña ndaa. Ta cándaa ini nde ña tá cáhan ndó sahá in ñaha caja ñayivi cúu á sahá ña sandehé ndó janda ñinima ná. Ta cándaa ini nde ña jánaha ndó ña ndaa saha íchi cuénta Ndióxi.

²² Sahá ña cán quéa cuni nde candaa ini nde viti á ndítahan nuú nde chahvi nde jiuhún cuénta impuesto nuú da cómi cuénta saha yo ñuu Roma, á co ndítahan toho nuú nde caja nde ña —nacachi na cán xihin Jesús.

²³ Joo sa nacandaa va ini Jesús ña cáhvi núu va ini na sahá ña cán quéa nanducú ñehe a tuhun nu ná já nacachi a já xihin ná:

—Cándaa cáxi táhyí ini i ña cuni ndó coto ndojó cuití ndó yehe.

²⁴ Jánaha ndó in táhan jiuhún jan nuú i. Yo nahná ta yo quivi quéa ndáa nu á —nacachi a xihin ná.

Já nacachi na já:

—Ñehe a quivi xihin nahná da cómi cuénta sahá yo ñuu Roma —nacachi na xihin á.

²⁵ Anda já nacachi Jesús já xihin ná:

—Ndiquiahva ndó ñaha da cómi cuénta saha ndó ñuu Roma jan nu dá. Ta ndiquiahva ndó nu Ndióxi ña cúu ñaha mé á nu á —nacachi Jesús xihin ná.

²⁶ Chí coo nacuu caja na jándahvi na Jesús nuú ñayivi ndúu cán jáchi vii nanducú ñehe ndihi Jesús tuhun nu ná. Ta chí johó cátóntó ndihi ñayivi xihin quiahva nanducú ñehe Jesús tuhun nu ná. Chí nacatáji na cán.

Ndáca tuhún na saduceo Jesús á mé a ndaa nditacu tucu ndii

(Mt. 22:23-33; Mr. 12:18-27)

²⁷ Tá nandihí já naquee java na saduceo cuahan na cahan na xihin Jesús. Ta mé na saduceo co cándúsa na ña ndítacu tucu na sa naxihí. Tá nasaa na nu ñin Jesús já nacachi na já xihin á:

28 —Maestro, nu ley nacahyi Moisés sanahá natandaha chuun ta cáchí a já: “Tá tandaha in dataa xihin ñájíhí da ta tá coó jahyi ñá cacu xihin dá ta tá ná xinu quivi quivi da já quea cáchí ley Moisés ña ndítahan tandaha tucu ñájíhí da xihin da cúu ñani mé ndii cán já ná coo jahyi da cán xihin yuhú nuú ñani da”, já cáchí ley Moisés.

29 Ta viti cuni johó ndó ná cacu nde in quiahva nu ndó. Nasahin usa ñani. Ta da nu cuití cán natandaha dá. Joo nayaha tiempo naxihí da ta coó toho jahyi da nacacu xihin ñájíhí da.

30 Anda já natandaha tucu ñá cuáan cán xihin ñani chí ivi mé ndii cán. Joo naxinu quivi naxihí ri da yóho va ta chí coó jahyi da nacacu xihin ñá cán.

31 Anda já natandaha da chí uní cán xihin ña. Joo ni da cán ni java ga ñani da coó nacuu cacu jahyi xihin ña. Ndihusa da natandaha xihin ña ta ndihusa da naxihí. Joo ni in da coó nacacu jahyi xihin ña.

32 Tá nu ndíhí já naxihí ri mé va ñá.

33 Ña cúní nde candaa ini nde quea, ndá da cacuu ndusa yí ñá cán tá ná xinu quivi nditacu tucu ndii. Jáchi ndihusa va ñani da cán natandaha xihin ña —nacachi na cán ndáca tuhún na Jesús.

34 Anda já nanducú ñehe Jesús tuhun nu ná já nacachi a já:

—Nani ndúu ñayivi ñuyiví yóho cuití va tandaha ná.

35 Jáchi ndá na nanditacu tucu ta ñehe táhvi ná coo na indivi já quea co tandaha na ta ni co sahan toho na jahyi jíhí na tandaha ná.

36 Jáchi mé cán cacuu na tátuhun táto Ndióxi já a quivi ga na. Ta cacuu na jahyi Ndióxi jáchi sa nanditacu na tañu ndii.

37 Ta sa xini yo ña nditacu tucu ndii jáchi já nacachi Moisés sanahá tá nacahyi da sahá ña naxini da tañu tohíñú, dó cándaha ñúhu cáyi cán. Tá nacahan da sahá Ndióxi, nacachi da ña janda viti cája cáhnu Abraham xihin Isaac xihin Jacob mé Ndióxi vatí naxihí na sanahá.

38 Ta ña yóho cúní cachi a ña tácu yí va Abraham xihin Isaac xihin Jacob vatí sa naxihí yiquí cuñu na. Jáchi tóco ndihi

na cúu cuénta Ndióxi, tácu na nu mé á — nacachi Jesús xihin ná.

39 Anda já nacachi java na jánaha ley Moisés cán já xihin á:

—Vaha va nacahan ndó, Maestro.

40 Ta chí coó nasahan ndeé ga ini na ndaca tuhún chága na mé á.

Jánaha Jesús nuú ñayivi ña cúu Cristo taa ta cúu á Ndióxi

(Mt. 22:41-46; Mr. 12:35-37)

41 Anda já nacachi Jesús já xihin ñayivi ndúu cán:

—Ndávaha cáchí ñayivi ña vaxi Cristo chíchi David.

42 Ta ndáa ini Salmos ña nacahyi David já nacachi da já:

Ndióxi quea nacachi já xihin xitoho i:

“Coo xoo cuáha i yóho,

43 janda quiahva ná caja i ña ná ca-común cuénta sahá na co cúní yohó”, nacachi Ndióxi, já nacahyi David sanahá.

44 Ndávaha cáchí na ña vaxi Cristo chíchi David joo mé tiempo cán nacachi David ña cúu á xitoho da —nacachi Jesús.

Cahan Jesús sahá cuachi na jánaha ley Moisés

(Mt. 23:1-36; Mr. 12:38-40; Lc. 11:37-54)

45 Tóco ndihi ñayivi ndúu cán naxini johó na tá nacasahá Jesús cáchí a xihin na xica tuun xihin á já:

46 —Cuénta coo ndó xihin na jánaha ley Moisés jáchi cátóo na cándixi na jahmá nání caca nuu na. Ta cátóo na cahan toni ñúhú ndivaha ñayivi xihin ná tá xica nuu na nuú yahvi. Ta tá cuahan na veñuhu cátóo na cacoo na nu sácco na ín chága saha. Ta tá cuahan na víco cátóo na coo vaha na.

47 Ta cándaa na vehe najihí cuáan. Ta tá nandihí cáni ndivaha cája na xica tahvi na nu Ndióxi jáchi cúní na jájahvi na nuú ña núu cája na. Mé a ndaa ná cahan i xihin ndo ña na jánaha ley Moisés yóho cacuu na na ndoho chága ini caja Ndióxi nu ndíhí — nacachi Jesús.

21

Ña najoco in ña cuáan ndáhví
(Mr. 12:41-44)

¹ Ta ndaja coo ndácaan Jesús ini veñuhu cáhnu cán ta sándehe a ndá quiahva táán na cuicá jiuhún ini sato nu jóco ñayivi jiuhún nu Ndióxi.

² Ta jári naxini a naxinu coo in ña cuáan ndáhví ta nataán ña ivi jiuhún ña núu yahvi ini mé sato cán.

³ Anda já nacachi Jesús já xihín na xíca tuun xihín á cán:

—Mé a ndaa ná cahan i xihín ndo ña cuaha chága jiuhún nasahan ña cuáan ndáhví yóho a juú ga tóco ndihi java ga na cán.

⁴ Jáchi tóco ndihi na java cán sahan na ña yójo nu va na. Joo ña cuáan ndáhví yóho nasahan ña nu Ndióxi tóco ndihi ña cómi ña catacu ña —nacachi Jesús.

Cáxi tuhun Jesús ña vaxi quivi ndihi saha veñuhu cáhnu ndácaan Jerusalén cán (Mt. 24:1-2; Mr. 13:1-2)

⁵ Java ñayivi cán ndítuhún na saha veñuhu cáhnu ñuu Jerusalén ndíta na. Ta ndítuhún na saha yuu ndató ndivaha nacavaha veñuhu cán. Ta cahan na saha ñaha najoco ñayivi nu Ndióxi ndáa cán. Anda já nacachi Jesús já xihín ná:

⁶ —Vaxi quivi ndihi saha tóco ndihi ña ndíta ndó sándehe ndo yóho. Ta ni janda in yuu a cándo jatá inga yuu ña nditani cacuu tóco ndihi ña yóho —nacachi Jesús xihín ná.

Ña coo tá ná cayati quivi ndihi saha ñuyiví (Mt. 24:3-28; Mr. 13:3-23)

⁷ Anda já nandaca tuhún na Jesús já nacachi na já xihín á:

—Maestro, ndá ama coo tóco ndihi ña yóho. Ta ndaja coo tá sa nacayati mé quivi cán —nacachi na xihín Jesús.

⁸ Anda já nacachi Jesús já:

—Cuénta coo ndó ta a quiahva ndó ñamaní jándahvi ñayivi ndohó. Jáchi quixi cuahá ndivaha na cuénta mí i ta cahan na ña tuhún tá cachi na já xihín ndo: “Yehe cúu Cristo, da nachindahá Ndióxi cacomí a cuénta saha ñayivi.” Ta cachi na já: “Viti naxinu coo tiempo ndihi saha ñuyiví”, cachi na xihín ndo. Joo coto a cándusa ndó candico ndó jatá ná cuhún ndo.

⁹ Tá ná cuni joho ndó ña cáni táhan ñayivi ñuyiví yóho, a cáyihví toho ndó. Jáchi ndúsa

já ndítahan coo. Joo cámaní yii va jáxinu coo quivi ndihi saha ñuyiví —nacachi Jesús xihín ná.

¹⁰ Anda já nacahan chága Jesús xihín ná já nacachi a já:

—Ñayivi ndúu in nación ndicuíta na cani táhan na xihín na ndúu inga nación ta cani táhan na in ñuu xihín na inga ñuu.

¹¹ Ta quixi cuahá ña taan tá sa nacayati quivi ndihi saha ñuyiví. Ta quixi tama ndeé. Ta quixi cuehe nuú ñayivi ndúu cuahá ñuu. Ta chí catóntó ndivaha ñayivi cuni na ñaha náhnu chí indiví. Ta yihví ndivaha na tá cuni na java ñaha xituhún ndivaha.

¹² Joo tá cámaní xinu coo quivi coo tóco ndihi ña yóho já ndicuíta ñayivi caja xíxi na xihín ndó, na cándusa yehe. Ta cañehe na ndohó cuhún ndó ini veñuhu na ta cán caja vií na saha ndo saha ña cándeé ini ndó yehe. Ta taán na ndohó ini veca ta já cañehe na ndohó cuhún ndó cavii saha ndó nuú na cúu jutixia xihín nuú na cómi cuénta saha ñayivi. Tóco ndihi ña yóho ndoho ndó saha ña cándeé ini ndó yehe.

¹³ Ta xihín ña yóho cuu ñehe íni ndo cahan ndó saha i nuú na cán.

¹⁴ Ta a ndícani ini ndó saha ndá tuhun cahan ndó saha mé ndó nuú na cán tá ná xinu ndó nu ná.

¹⁵ Jáchi mí i quiahva i tuhun nu ndo ta ndaja ndíchí i jini ndo já ná cuu nducú ñehe vaha ndó tuhun nuú na cán. Ta chí a cuú quee vaha yuhú na cán xihín ndo.

¹⁶ Joo cuahá ñayivi jicó tuhún na ndohó. Ta chí janda tátá ndo á ñani ndó á táhan ndó á na xíní táhan xihín ndo, na cán cacuu na jicó tuhún ndohó cuahá tañu. Ta java táhan ndó, na cándeé ini yehe quivi ndó caja na.

¹⁷ Ta ndijáa ñayivi ñuyiví candají na ndohó saha ña cándeé ini ndó yehe.

¹⁸ Joo ni in ñaha a ndóho ndó anda ni in ijí jini ndó a ndíhi saha.

¹⁹ Ta tá coo nacuita ndo xihín tóco ndihi ña núu caja na xihín ndo já xinu ndó canduu ndó indiví anda ama cáa quivi.

²⁰ Tá ná cuni ndó ña nacava tiyivi soldado jatá ñuu Jerusalén ndúu da, xíní ñuhú candaa ini ndó ña sa naxinu quivi ndihi saha ñuu cán.

21 Ña ndítahan caja ndó mé quivi cán queá cunu ndó cuhun ndó chí yúcu tá ndúu ndó chí estado Judea. Ta ndá ndó, na ndúu ñuu Jerusalén xíní ñúhú jándacoo ndó ñuu jan ta cunu ndó cuhun ndó. Ta ndá ndó, na ndúu yúcu, a ndícó coo ga ndó ndihvi ndó ñuu Jerusalén yóho.

22 Jáchi mé quivi já cacuu a quivi ndoho ini ñayivi já ná xinu coo tóco ndihi nuú ña nacachi tuhun Ndióxi coo sanahá ndivaha.

23 Ndáhví nacuu najihí tá ñúhu jahyi na mé quivi já. Ta ndáhví nacuu na tá ñéhe ndaa na na valí táhan ña chíchí yii. Jáchi ndoho ndivaha ini ñayivi ndúu ñuyíví mé quivi já sahá ña xójo ndivaha ini Ndióxi xihín na cán.

24 Java ñayivi quivi na caja soldado ta java na cató ná já cañehe na na cuhun na ndijáá chí ñuu tóho canduu na jáchi ndihi sahá ñuu Jerusalén yóho. Ta já quixi na ñuu tóho ta casahá na cahnda na chuun nuú ñuu Jerusalén yóho janda quiahva ná xinu coo quivi cacu ini Ndióxi ña ná quee na tóho cán cuhun na.

25 'Anda já cuni ndó ña náhnu ndivaha chí nuú candii xihín nuú yoo xihín nuú quimi viti. Ta ñayivi ñuyíví yóho yihví ndivaha na ta chí a cándaá ini na ndía caja na jáchi quini ndivaha tacu nuú ndicojo tañuhú.

26 Ta chí janda quivi tóo ñayivi xihín ña yihví na jáchi casahá ndicani ndivaha ini na saha tóco ndihi tondóhó vaxi ñuyíví yóho. Jáchi janda mé candii xihín yoo xihín quimi ndiquiji nuu a.

27 Anda já cuni ndó yehe, da nachindahá Ndióxi nduu ñayivi, quixi i tañu víco xihin tóco ndihi ndéé cáhnu i ta chí ndiyihvi ndaa mé nuú quixi i.

28 Tá ná casahá yaha tóco ndihi ña cáchí i xihin ndo yóho, xíní ñúhú ndindeé ini ndó ta ndiñehe ndó nuu ndó jáchi sa nacayati quivi jácacu Ndióxi ndohó cuhun ndó coo ndó indivi —nacachi Jesús xihin ná.

*Sácu Jesús quiahva sahá titó ñúhú
(Mt. 24:32-35; Mr. 13:28-31)*

29 Anda já nasacu a in quiahva nu ná já nacachi a já:

—Xíní ñúhú candehé ndo ndá quiahva cája chúun in titó ñúhú, á ndá yitó nacuu.

30 Tá ná cuni ndó ña janda johu cana núma do já cándaá ini ndó ña nacayati tiempo javi.

31 Ta quiahva já tá ná cuni ndó ña sa cúu yáha tóco ndihi ña cáchí i xihin ndo yóho já cándaá ini ndó ña sa nacayati quivi casahá Ndióxi cacomí a cuénta sahá ñayivi.

32 'Mé a ndaa ná cahan i xihin ndo ña cuni ñayivi ndúu mé tiempo já yaha tóco ndihi ña nacachi i xihin ndo já quivi na.

33 Mé a ndaa ña cúu indivi xihin ñundáhyi yóho ndihi sahá joo tuhun nacahan yehe xihin ndo a ndíhi toho sahá jáchi coo tá coo tá in nacachi i xihin ndó coo.

34 'Cuénta coo ndó. Xíní ñúhú candati tiahva ndó quivi quixi i ndiquehe e ndohó. A cáca nuu ndó yóho cáa ña caja ndó ña cúni yiquí cuñu ndó. A cóho ndó caca nuu ndó. Ta a ndíhi nahá ini ndó ndicani ini ndó sahá ñaha ñuyíví yóho.

35 Tá ná xinu quivi quixi i cacuu a tátuhun tá sácú jehé in dataa in trampa nuú in quiti sahá ña cúni da tiin da ri. Mé quiti cán co xíní rí ndáchí in jehé trampa tiin ñahá cán. Quiahva já co xíní ñayivi ndúu ñuyíví ndá quivi quixi tucu u ñuyíví yóho.

36 Xíní ñúhú canduu tiahva ndó quivi quixi i. Ní tiempo xíní ñúhú caça tahví ndo nu Ndióxi já ná ndindeé ini ndó tá ná quixi tóco ndihi ña yóho nu ndo ta já ná cuu xinu coo vaha ndó indivi já ná cuu coo víi ndo nuú yehe, da nachindahá Ndióxi nduu ñayivi —nacachi Jesús jánaha nuú ñayivi cán.

37 Nini quivi nasahin Jesús ini veñuhu cáhnu jánaha tuhun Ndióxi nuú na cán. Ta tá ñuú já sahan quiji a yúcu yitó Olivo cán.

38 Ndijáá ní quivi naha chá naxinu coo ñayivi veñuhu cáhnu cán jáchi cúni na cuni johu na ña jánaha Jesús nu ná.

22

Jándique táhan na tuhun na ña cahní na Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

1 Ta yati tandaa víco pascua tá xíxi ñayivi pan ña co quee yusá naxiaa xihin.

2 Já nacasahá na sacuahá nuú jutú xihin na jánaha ley Moisés ndúcú na ndaja caja

na cahní na Jesús. A cuú caja na cahní tívi na ña jáchi yíhví na canahá ñayivi xihín ná.

³ Joo ndaja coo tiñahá sacuaḥa nandeta nuu rí ínimá in táhan uxu ívi da xíca tuun xihín Jesús. Mé da cán naní da Judas ta Judas Iscariote cáhan na xihín dá.

⁴ Ta nasahan Judas cahan da xihín na sacuaḥa nuú jutu ta xihín na sacuaḥa nu policia ndáá veñuhu. Ta nanditúhún da xihín ná ña cuu caja da jicó túhún da Jesús ta ndiquiahva ñahá dá mé á nu ná.

⁵ Xihín ña yóho nacajii íní na cán ta nasahan na tuhun na nu Judas ña quiahva na jiuḥún nu dá.

⁶ Ta nacandúsa Judas caja da ña chí nacasáhá da ndúcú da ndaja caja da ndiquiahva da Jesús nuú na cán tá coo ñayivi ndúu xihín á.

Xíjini Jesús vicó pascua xihín na xíca tuun xihín á

(Mt. 26:17-29; Mr. 14:12-25; Jn. 13:21-30; 1 Co 11:23-26)

⁷ Natandaa mé vicó tá xíxi na pan ña coo quée yusá naxiaa xihín. Mé vicó yóho nasacaja na ña tá nu cuía ta sáhní na ndicachi válí jóco na nu Ndióxi.

⁸ Mé quívi já nasahnda Jesús chuun nu Pedro xihín nu Juan já nacachi a já xihín dá:

—Cuáhán ndó caja ndíví ndo ña cajíní vicó pascua —nacachi a xihín dá.

⁹ Anda já nacachi da cán já xihín á:

—Yo vehe cúní ndó cuhun nde ná caja ndíví nde ña cuxú.

¹⁰ Anda já nanducú ñehe Jesús tuhun nu dá já nacachi a já:

—Tá ná quíhvi ndó ñuu Jerusalén jan já cuni ndó in dataa ta ndójo da in yoo ticuú cuahán da. Candico ndó jata dá cuhun ndo janda quiahva cuni ndó ndá vehe quíhvi da.

¹¹ Ta já cuhun ndó cahan ndó xihín mé da xihín ñaha vehe cán já cachi ndó já xihín dá: “Da jánaha ndeḥe cúu da cáchí xuhun: Ndáchí íin nuú coo í cajíní í vicó pascua xihín na xíca tuun xihín í.”

¹² Anda já jánaha mé da cán in cuarto cáhnu ña cánúu jini véhe piso ninu. Sa íin tiaḥva va ña. Cán caja ndíví ndó ña cajíní —nacachi Jesús.

¹³ Anda já naquee ndíví da cán cuahán da. Ta tá íin nacachi Jesús xihín dá coo quiahva já ndusa nasahín. Ta chí nacaja ndíví da tóco ndihi ña cajíní na vicó pascua.

¹⁴ Tá naxinu coo hora cajíní na já nasacoo Jesús xihín tóco ndihi na xíca tuun xihín á nu mesa.

¹⁵ Anda já nacachi Jesús já xihín ná:

—Sa xíca ndivaha ini í cajíní í vicó pascua yóho xihín ndó nani íin tóo í xihín ndo jáchi vaxi quívi quívi í.

¹⁶ Jáchi mé a ndaa ná cahan í xihín ndo janda ná xinú quívi cacomí Ndióxi cuéntá sahá ñayivi anda jáví cajíní tucu u vicó pascua xihín ndo —nacachi Jesús xihín ná.

¹⁷ Anda já natiin a in vaso nu ñúhu tó uva ta ndiquiahva ndixahvi nu Ndióxi. Ta já nacachi a já xihín na xíca tuun xihín á:

—Coho ndó dó ñúhu ini vaso yóho ta cahnda java ndó dó nu táhan ndó.

¹⁸ Jáchi a ndícó coo ga í coho í tó uva janda quiahva ná xinú coo quívi cacomí Ndióxi cuéntá sahá ñayivi —nacachi Jesús xihín ná.

¹⁹ Tá nandihí natiin a pan ta ndiquiahva ndixahvi nu Ndióxi sahá. Anda já nasahnda java ña já nasahan ña nuú na xíca tuun xihín á cán já nacachi a já xihín ná:

—Mé pan yóho cúu á tátuhun yiquí cuñu í jáchi ndiquiahva í mí í quívi í sahá ndihi ndó. Xíní ñúhú caja ndó ña yóho ña ná ndicuhun ini ndó ña naxihí í saha ndo —nacachi Jesús xihín ná.

²⁰ Tá sa nandihí naxijíní na ta já natiin a vaso nu ñúhu tó uva ta já nacachi a já:

—Dó ñúhu ini vaso yóho cúu dó tátuhun ní í jáchi cahní na yeḥe ta cuíta ní í saha ndihi ndó. Ta xihín ña yóho xinú coo nuú tuhun nasahan Ndióxi nuú ñayivi sanahá tá nacachi a jácau a ñayivi.

²¹ ‘Cuni johó vaha ndó ná cahan í xihín ndo. Nu mesa yóho íin coo da jicó túhún yeḥe.

²² Jáchi janda sanahá nasacu ini Ndióxi ña ndítahan ndoho ini yeḥe, da nachindahá mé á nduu ñayivi. Joo ndáhvi nacuu da jicó túhún yeḥe —nacachi Jesús.

²³ Xihín ña nacachi Jesús yóho nacasáhá na xíca tuun xihín á cán ndáca tuhún táhan

na saha ndá da cúú da sácú ini cuhun jicó túhún ñahá.

Ndítúhún ihvi xihin táhan na xica tuun xihin Jesús

²⁴ Tá nandihí já ñacasáhá ndítúhún ihvi xihin táhan da xica tuun xihin Jesús cán sahá ndá da cúú da íin chága saha.

²⁵ Sahá ña cán queá ñacachi Jesús já xihín ndihí da cán:

—Ndijáá ñuyiví sáhdá rey chuun nuú ñayivi tá quiahva cúní mé dá. Ta jári cúní da ña ná cachi ñayivi saha dá ña cúú dá da cája vaha.

²⁶ Joo coó nditahan coo ña cán tañu mé ndó. Ña ndítahan caja ndó queá tá in ndó cúní ndó cacuu ndó da íin chága saha, xíní ñúhú jánuu ndáha ndó mé ndó tátuhun da loho chága nu ndíhi ndó. Ta ndá da cúní cahnda chuun, xíní ñúhú cacuu da tátuhun in da cája ndíví nu mesa xitoho da.

²⁷ Mé ndó sa cándaá vaha ini ndó ña íin chága sahá da íin coo nu mesa a juú ga da cája ndíví ñahá. Joo yehe najánuu ndáha i mí i ta nanduu u tátuhun in da cája ndíví nu ndó.

²⁸ 'Ndóhó cúú ndó na nasanduu tuun xihín i nu tóco ndihí ña ihvi ñaquixi nuú i.

²⁹ Sahá ña cán queá tá quiahva ñacaja tátá i ñamaní xihín i ña ná cacomí i cuéntá sahá ñayivi quiahva já caja i ñamaní xihín ndó

³⁰ ña ná nditútú ndó canduu ndó xihín i tá ná cacomí i cuéntá sahá ñayivi. Ta já ná cuu caja víi ndó sahá na ñaquixi ndíhuxu ivi táhdá na ñaquixi chíchi Israel —ñacachi Jesús xihín ná.

Cáxi tuhun Jesús ña chijehé tuhun Pedro ña xini da mé á

(Mt. 26:31-35; Mr. 14:27-31; Jn. 13:36-38)

³¹ Anda já nandicahan Jesús já ñacachi a já xihín Pedro:

—Simón, cuni johó vahún. Jáchi ñaxica Satanás, mé tiñáhá sacuaña ñamaní ña ná coto ndojó rí tóco ndihí ndó tá quiahva jáxixi na trigo.

³² Joo sa ñaxica tahví i nu Ndióxi saha yóhó, Simón já ná a jándacoún ña cándeé inún yehe. Ta tá sa nandicó coo inún xihín ña cajún jan, ndítahan chindeún java ga na

cándeé ini yehe já ná coo ndacú na íchi cuéntá mí i —ñacachi Jesús xihín dá.

³³ Anda já nanducú ñehe Pedro tuhun nu Jesús já ñacachi da já xihín á:

—Candehé ndo, xitoho i. Yehe sa íin tiahva i cuhun i vecaa xihín ndo. Ta janda ná cahní na yehe xihín ndo tá cúní na jáchi sa íin tiahva ví —ñacachi da xihín Jesús.

³⁴ Já ñacachi Jesús já xihín dá:

—Candehé Pedro ná cahan i ña ndaa xuhun. Mé quiví viti tá camani cana chéle já uní tañu chijehé tuhún sahá i ta cahún ña co xíní tohún yehe —ñacachi Jesús xihín dá.

Cáxi tuhun Jesús ña sa cáyati hora ndoho ini a

³⁵ Tá nandihí já nandaca tuhún Jesús na xica tuun xihín á cán já ñacachi a já xihín ná:

—Jihna ñachindahá i ndohó cuhun ndó cahan ndó tuhun Ndióxi ta ñacachi i xihín ndo ña ná a cáñehe ndó yátí ni jjuhún ta ni inga ndusa a cáñehe ndó cuhun xihín ndo. Á nandimaní ñaha nu ndo tá nasahan ndo já —ñacachi Jesús xihín ná.

Já ñacachi na já:

—Ni in ñaha coo nandimaní nuú nde —ñacachi na.

³⁶ Anda já ñacachi tucu a já xihín ná:

—Joo viti coo ga ña cán coo. Viti cáchi i xihín ndo ña tá íin yátí nu ndo, xíní ñúhú cañehe ndó ña cuhun ndo. Cañehe ndó jjuhún ndo tá ná quee ndó cuhun ndo. Ta tá coo machiti nu ndó, xíní ñúhú jicó ndó jahmá ndeé ndo já cueen ndó machiti ña ná coo tiahva ndó.

³⁷ Jáchi sanahá ñacahyi a nu libro yii Ndióxi ta sahá yehe ñacahan tá ñacachi a já: “Ñacachi ñayivi cúú dá ña quini sahá ña cán queá ñachitáhan na da xihín ñayivi quini.” Tóco ndihí ña ñacahyi nuú tuhun Ndióxi sahá yehe sanahá xíní ñúhú xinu coo a viti —ñacachi Jesús.

³⁸ Anda já ñacachi na xica tuun xihín á cán já:

—Candehé ndo, xitoho nde. Yóho ñehe nde ivi machiti —ñacachi na.

—Sa íin vaha —ñacachi Jesús xihín ná.

Cuahan Jesús Getsemaní caca tahví a nu Ndióxi

(Mt. 26:36-46; Mr. 14:32-42)

39 Tá nandihí já naqúee Jesús cuahan yúcu yító Olivo nu sá sahan tuun a caça tahví a nu Ndióxi. Ta já ndíco ndihí na xíca tuun xihín á cán jatá cuahan na.

40 Ta tá sa naxinu coo na cán já nacachi a já xihín ná:

—Caça tahví ndó nu Ndióxi já ná a ndícava ndó nuú cuachi tá ná coto ndojó tiñáhá ndohó —nacachi Jesús xihín ná.

41 Tá nandihí já natavá xóo Jesús mé á tañu na cán já nasahan tátuhun in quiahva nu xínu coo in yuu tá jáni yó ña xihín ndáha yo. Quiahva já nacaxíca mé á tañu na cán já nacaxítí a xíca tahví a nu Ndióxi.

42 Já nacachi a já:

—Tátá Ndióxi, á cuu caja ndó ñamaní já ná a ndóho i ña ihvi ndivaha ña vaxi nuú i ndoho i. Joo ná coo tá ín cúní mé ndó ná a cóo toho ña cúní yehe —cáchi Jesús xíca tahví a.

43 Anda já nacanáha in tátó Ndióxi indiví já naxinu a sahan tuhun ndeé ini Jesús.

44 Ta nacasáhá ndóho ndivaha ini Jesús jáchi nacacuéha ini a. Sahá ña cán quea nanducú ndeé chága ví a xíca tahví a nu Ndióxi. Ta chí ndícaa mé teen á nu ñúhu ta dó cán cúú dó tátuhun nij cúyu nu ñúhu.

45 Ta tá nandihí naxíca tahví a nu Ndióxi já nandaca ndichi a já naqúee a cuahan nu ndúu na xíca tuun xihín á cán. Ta nanditahan mé á na ndúu na quíji na. A juú quiahva cándí ini na sahá ña cán nanaá ini na naquiji na.

46 Anda já nacachi a já xihín ná:

—Ndá cuéntá quea quíji ndo ndúu ndó. Cuahán ndacoo ndó ta caça tahví ndó nu Ndióxi já ná a ndícava ndó nuú cuachi tá ná coto ndojó tiñáhá ndohó —nacachi Jesús xihín ná.

Tá natiin na Jesús

(Mt. 26:47-56; Mr. 14:43-50; Jn. 18:2-11)

47 Janda cáhan chá va Jesús xihín na xíca tuun xihín á cán cándichi a já naxinu cuahá ndivaha ñayivi nu ín a. Ta in táhan da uxu ivi xíca tuun xihín á, da naní Judas cán, da cán cúú da ndáca ñayivi vaxi da. Ta nacayati da tatí yúhu dá sajóho Jesús.

48 Anda já nacachi Jesús já xihín dá:

—Judas, tatí yúhun sajóho i tátuhun da quíhvi ini yehe. Joo xihín ña cájún

jan ndíquiahvún yehe ndahá na co cúní yehe, da nachindahá Ndióxi nduu ñayivi —nacachi Jesús.

49 Tá naxini tóco ndihí na ndúu xihín Jesús cán ña cúu já nacasáhá ndáca tuhún na mé á já nacachi na já:

—Á cúní ndó, xitoho nde ña ná ndicuítá nde xihín machiti caní táhan nde xihín ná —nacachi na.

50 Joo in táhan da xíca tuun xihín Jesús cán najándicuehe da in da cúu mozo da sacuaaha nuú jutú cán jáchi nachitúhun dá johó xoo cuáha da.

51 Joo já nacachi Jesús já xihín ná:

—Sa ín vaha. A cání táhan ndó xihín ná —nacachi Jesús.

Tá nandihí já nacani ndaa ndáha mé á johó mozo cán já nandaja vaha mé á da.

52 Ta nacasáhá cáhan Jesús xihín na sacuaaha nuú jutú cán xihín na sacuaaha nu policía ndáa veñuhu xihín na sacuaaha veñuhu cán, mé na nacasaá tiin na Jesús já nacachi a já xihín ná:

—Cája ndó xihín i tátuhun cája na xihín ta cuíhna jáchi naqueta ndó vaxi ndó tiin ndó yehe xihín machiti ta xihín yító.

53 Joo coo a ná caja toho ndó xihín i tá nasahin i tañu ndó veñuhu cán. Joo núná nu ndó viti caja núu ndó jáchi nasahan Ndióxi ñamaní ña ná tiin ndó yehe. Jáchi nacuaá viti ta chindeé tiñáhá sacuaaha ndohó caja ndó ña núu —nacachi Jesús xihín na cán.

Tá nachijehé tuhun Pedro ña xini da Jesús (Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Anda já natiin na Jesús. Já ñehe na a cuahan na vehe da cúu sacuaaha nuú jutú cán. Ta xíca xíca ndíco Pedro jata ná cuahan da.

55 Ta tá naxinu coo ñayivi cán yuhú yéhe da cúu sacuaaha nuú jutú cán já nandicahmi na ñúhu nasacoo na xítúní na. Já naxinu coo ri Pedro nasacoo da tañu na cán xítúní da.

56 Joo ndaja coo in ñáñáha cája chún vehe jutú sacuaaha cán naxini ña ín coo da xítúní da yávi núhu cán. Ta nacasáhá sándehe ña nu dá já cáchi ña já:

—Da xíca tuun xihín Jesús cúu ri da ín coo yóho va —nacachi ña cán.

⁵⁷ Joo ñacasáhá Pedro chíjehé tuhún da já ñacachi da já:

—Candehé, ñañáha. Co xini toho i ndá da cúu da ñan —ñacachi Pedro xihin ñá cán.

⁵⁸ Chá va ta ñaxini inga dataa Pedro ta já ñacachi da já xihin dá:

—In táhan da xica tuun xihin Jesús cáa cúu ri yóhó va —ñacachi da cán xihin Pedro.

Anda já ñacachi Pedro já:

—Uhun. A juú toho táhan ña cán cúu yehe —ñacachi da.

⁵⁹ Ta tá sa ñayaha tátuhun in hora já ñacachi inga dataa já:

—Mé a ndaa da xica tuun xihin Jesús cúu ri da yóhó va jáchi cúu dá da estado Galilea.

⁶⁰ Anda já ñacachi Pedro já xihin dá:

—Co xini toho i ndá saha cahun —ñacachi Pedro.

Tá chí mé hora já nani cahan Pedro xihin dataa cán já ñacana chéle.

⁶¹ Anda já ñandicoto nihni Jesús ñasandehé a nu Pedro. Tá ñandicuhun ini Pedro sahá tuhún ñacachi Jesús xihin dá tá cámaní tiin na a tá ñacachi a já: “Mé quivi viti tá cámani cana chéle já uní tañu chíjehé tuhún sahá i ta cahún ña co xini tohún yehe”, ñacachi a xihin dá.

⁶² Anda já ñaqueta Pedro cuahan da já ñacasáhá sácu ndivaha da.

Tá sácu ndaa na Jesús

(Mt. 26:67-68; Mr. 14:65)

⁶³ Ta java dataa, da ndúu ndáa Jesús cán ñacasáhá da sácu ndaa da ña. Ta ñacani ñahá da.

⁶⁴ Náchicaji da nuu á ta ñacani da jahnda nuu á já ñacasáhá da ndaca tuhún da mé á já cáchi da já xihin á:

—Cachi yo já ñacani jahnda nuun —cáchi da xihin á.

⁶⁵ Ta cuahá chága nuú ña núu cahan na xihin á ña cána há na xihin á.

Ndája ndíchi na Jesús

(Mt. 26:59-66; Mr. 14:55-64; Jn. 18:19-24)

⁶⁶ Ta tá sa ñativi já ñataca na sacua ha nuú na Israel cán xihin na sacua ha nuú jutú cán xihin na jána ha ley Moisés cán viti. Já ñéhe na Jesús cuahan na cavií sahá nuú na cán. Ta tá sa ñanditútú ndihi na

cán ndúu na já ñandaca tuhún na Jesús já ñacachi na já xihin á:

⁶⁷ —Caxi tuhún xihin nde á cúun Cristo, da ñachindahá Ndióxi cacomí cuéntá sahá ñayivi —ñacachi na xihin á.

Anda já ñacachi Jesús já xihin ná:

—Tá ajan ná cachi i xihin ndo ta chí a cándusa toho ndó yehe.

⁶⁸ Ta cája i cuéntá a cahan ndó xihin i tá ná ndaca tuhún i ndohó. Ta cája i cuéntá ni a cándusa ndó janí ndó yehe.

⁶⁹ Joo viti sa natandaa quivi cuhun yehe, da ñachindahá Ndióxi nduu ñayivi ta coo i xoo cuáha Ndióxi indivi jáchi iin ndée mé á caja tóco ndihi ñaha —ñacachi Jesús xihin ná.

⁷⁰ Anda já ñacasáhá tóco ndihi na cán ndaca tuhún na mé á já ñacachi na já:

—Á jivi ndusa yóhó cúun in tuhún jiní já jahyi Ndióxi, dá já —ñacachi na.

Anda já ñacachi Jesús já xihin ná:

—Ajan. Jivi cúu u tá iin cáchi ndó ñan —ñacachi Jesús.

⁷¹ Anda já ñacasáhá tóco ndihi na cán cahan na já ñacachi na já:

—Co ndítahan ndinducú chága yó ñayivi cacuu testigo nuú ña cahan da yóhó jáchi sa xini johó í ña cahan da ta chícaan da cuachi jata mé dá —ñacachi na cán.

23

Tá ñandiqui qhva na Jesús ndáha Pilato

(Mt. 27:1-2, 11-14; Mr. 15:1-5; Jn. 18:28-38)

¹ Anda já ñandaca ndichi ndihi na cán já ñéhe na Jesús ñasahan na nu Pilato.

² Ta cán ñacasáhá na chícaan na cuachi jata já ñacachi na já sahá:

—Natiin nde da yóhó jáchi xica nuu da jándivaa da ñayivi ñuu nde. Cáchi da ña co ndítahan toho nuú nde chahvi nde jiu hún cuéntá impuesto nuú da cómi cuéntá saha yó ñuu Roma. Ta cáchi da ña mé dá cúu dá Cristo, da chindahá Ndióxi cacomí cuéntá sahá ñayivi. Ta cáchi da cúu dá in rey —ñacachi na cán xihin Pilato.

³ Anda já ñandaca tuhún Pilato Jesús já ñacachi da já xihin á:

—Á mé a ndaa cúun in rey, da cómi cuéntá sahá na Israel —ñacachi da cán xihin Jesús.

Anda já nacachi Jesús já xihín dá:

—Ajan. Jivi cúú ʘ tá quiahva cáchí ndó jan.

⁴ Anda já nandicahan Pilato xihín na sacuahá nuú jutú cán ta xihín ñayivi ndúu cán já nacachi da já:

—Co ndíñehe mí vî ndá cuachi quéa nacaja da yóho —nacachi Pilato.

⁵ Joo ñayivi cuahá cán nacasáhá cáyuhú cóhó chága na já cáchí na já:

—Mé da jan naxica nuu da jándivaa da tóco ndihi ñayivi estado Judea xihín ña jánaha da nu ná. Ta janda Galilea nacasáhá da jándivaa da ñayivi. Ta viti naxinu da ñuu nde cája da já —nacachi ñayivi cáyuhú na.

Tá ñéhe na Jesús cuahan na nu Herodes

⁶ Tá naxini johó Pilato ña nacachi ñayivi cán já nandaca tuhún da na á cúú Jesús da estado Galilea.

⁷ Ta tá nacachi na ña ndusa cúú Jesús da estado Galilea já nachindahá Pilato Jesús ña ná cuhun a nuú Herodes, da cúú gobernador nuú ñayivi estado Galilea. Jáchi mé tañu já nasahiin tóo da ñuu Jerusalén.

⁸ Tá naxini Herodes Jesús já nacajii íni da jáchi sa janda jihna cuni da Jesús cúni da. Jáchi cuahá tañu nandicani ñayivi nu dá sahá ña cája Jesús. Ta cúni da cuni da ña ná caja Jesús in ñaha xituhún.

⁹ Ta cuahá ndivaha ñaha nandaca tuhún Herodes cán Jesús joo cóo nanducú ñehe a tuhun nu dá.

¹⁰ Ta tañu ñayivi cán ñúhu ri na sacuahá nuú jutú xihín na jánaha ley Moisés ta chí a juú quiahva ndúcú ndéé na chícaan na cuachi jata Jesús.

¹¹ Anda já nacasáhá Herodes cája xíxi da xihín Jesús ta quiahva já cája ri na cúú soldado da cán xihín á. Ta najácandixi na Jesús xihín jahmá lándá tátuhun jáhma sándixi in rey. Nacaja na já xihín á jáchi cúni na cuacu ndaa ñahá na. Tá nandihí já nachindahá tucu Herodes Jesús ña ná cuhun a nu Pilato.

¹² Ta chí mé quivi já nandique táhan máni Herodes xihín Pilato jáchi jihna có cúni táhan toho da, nduu.

Sácú ini na ndaja caja na cahní na Jesús (Mt. 27:15-26; Mr. 15:6-15; Jn. 18:39-19:16)

¹³ Anda já najánditaca Pilato na cúú sacuahá nuú jutú cán xihín na jutixia xihín java ñayivi.

¹⁴ Já nacachi da já xihín ná:

—Mé ndó ñéhe ndó da yóho nacasaá da nuú i. Ta cáchí ndó ña xíca nuu da jándivaa da ñayivi. Joo sa naxini ndó ña nandaja ndíchí i da nu ndó. Ta ni in tuhún toho cuachi táhan ña cáhan ndó saha jan cóo nanditahan i nu dá.

¹⁵ Ta ni Herodes cóo cuachi ná ndiñehe jata dá sahá ña cán quéa nanducú ñehe da da nuú i. Cuni johó vaha ndó: Cóo saha cúú á ña quivi da.

¹⁶ Ña caja i quéa jándoho i ini da. Anda já janí vî da cuhun da —nacachi Pilato cán xihín ná.

¹⁷ Tañu víco pascua cán nasahiin costumbre nu Pilato janí da in táhan da ñúhu vecaa ña ná candoo vaha da nuú ñayivi.

¹⁸ Sahá ña cán quéa nacasáhá cáyuhú tóco ndihi ñayivi nu dá já cáchí na já:

—Cahní ndó da jan ta janí ndó Barrabás nuú nde —cáchí na cáyuhú na.

¹⁹ Mé Barrabás yóho ndácaan da vecaa jáchi najátaca cuahá dá ñayivi ta nandicuita da xihín na sacuahá ñuu Jerusalén cán ta cúú dá da sáhní ndii. Sahá ña cán quéa ndácaan da vecaa.

²⁰ Joo cúni Pilato janí da Jesús sahá ña cán quéa nacahan tucu da xihín ñayivi.

²¹ Joo ví ga ví nacasáhá na cán cáyuhú cóhó na nu dá já cáchí na já:

—Cata caa ndó da ndica crúxu. Cata caa ndó da.

²² Ta anda já nacahan tucu Pilato ña cúú uní xihín ná já nacachi da já:

—Cóo toho ña núu nahá nacaja toho da yóho. A cúú cahnda i chuun ña ná cahní na da jáchi cóo cuachi da. Ña caja i quéa cahnda i chuun ña ná jándoho na ini da. Anda já janí vî da —nacachi Pilato.

²³ Joo ví ga ví ndúcú ndéé na cán cáyuhú na ña ná cata caa na Jesús ndica crúxu. Ta xihín ña ndúcú ndéé na cán cáhan na ta ndúcú ndéé ri na sacuahá nuú jutú cán cáhan na. Sahá ña cán quéa natahnu ini Pilato.

²⁴ Ta nacandúsa da caja da ña cúni na cán xihín Jesús.

25 Ta najani da Barrabás jáchi da cán naçahan mé ná saha ña ná jani dá. Ta mé Barrabás yóho nasandacaan da veca saha ña najándiva da ñayivi ta saha ña nasahni da ndii. Anda já nandiquiahva da Jesús nu ná ña ná caja na tá cuni mé ná xihin á.

Tá naçata caa na Jesús ndica crúxu

(Mt. 27:32-44; Mr. 15:21-32; Jn. 19:17-27)

26 Ta tá ñéhe na Jesús cuahan na cata caa na a já naxini na in da naní Simón, da ñuu Cirene vaxi da ndihvi da ñuu Jerusalén. Ta já najácuhun ndáha ná da ña ná ndacojo da crúxu nuú taca Jesús cán. Ta nandico da Jesús cuahan da.

27 Ta a juú quiahva cuahá ñayivi ndico jatá cuahan na. Ta cuahá najihí sácu ndivaha na ta cáyuhú na cuahan na jatá jáchi táhnda ini na saha.

28 Joo nandicoto nihni Jesús nu ná já naçachi a já xihin ná:

—Najihí, na ñuu Jerusalén, a cuácu toho ndó saha yehe. Saha mé va ndó ta saha jahyi ndó viti ndítahan cuacu ndó.

29 Jáchi vaxi quivi já casahá ñayivi cachi na já: “Tahví naçuu najihí, na coó naçacu jahyi. Ta tahví naçuu na coó jahyí chíhí”, cachi na jáchi ndóho ndivaha ini na.

30 Mé tiempo já casahá ñayivi cachi na já: “Vá ná cuyu yúcu jata yo já ná quiví”, cachi na. Ta cachi na xihin java yúcu: “Chijehé ndó ndehe”, já cachi na saha ña ndóho ndivaha ini na.

31 Candehé ndo ndá quiahva jándoho na ini i ta cúu u tátuhun in yitó cuí, dó tácu. Ta cája xixi na xihin i joo xixi chága caja na xihin ndóhó jáchi cúu ndó tátuhun in yitó íhí —naçachi Jesús xihin na cán.

32 Ta tá ñéhe na Jesús cuahan cata caa na a ndica crúxu já ñéhe ri na ivi da cúu da quini cuahan na cata caa na da já ná quivi da xihin á.

33 Ta tá naxinu coo na in nuú naní lásá yiquí jini ndii cán naçata caa na a ndica crúxu. Ta naçata caa ri na ivi da quini cán va: in da xoo cuáha Jesús ta inga da xoo íti a.

34 Ta tá cáta caa na Jesús ndica crúxu já naçachi a já:

—Tátá Ndióxi caja cáhnu ini ndó saha ña cája ñayivi yóho xihin i. Jáchi co xini na ndia cája na —naçachi Jesús.

Ta ndaja coo java soldado cán naçasahá da sájiquí da saha jáhma Jesús já quea ndá da ná quee vaha ndiquehe da jáhma á.

35 Ta ñayivi ndúu cán sándehe na nu táca Jesús ndica crúxu nani na cúu jutixia nasacuita na ndúu na sácu ndaa ñahá cán já cáchi na já:

—Najáçacu da java ga ñayivi. Ta viti ná jáçacu da mé dá tá mé a ndaa cúu dá Cristo, da naçaxi Ndióxi cacomí cuéntá saha ñayivi —cáchi na sácu ndaa ñahá na.

36 Ta jári java soldado sácu ndaa da Jesús ndúu da. Ta naçayati da cán nu Jesús já naçhiñee da vino, dó iyá yúhu á ña ná coho a do.

37 Ta já cáchi da já cáyuhú da nu á:

—Tá ta mé a ndaa cúun rey, da cómi cuéntá saha na Israel chindeé mún já ná a quívun —cáchi da.

38 Ta naçindaa na in tabla ndica crúxu yati jiní Jesús ta nu mé tabla cán naçahyí na: “Da yóho cúu rey nuú na Israel.” Ta mé ña yóho naçahyí na ña tuhun griego, ña cáhan na nación Grecia xihin tuhun latín, ña cáhan na ñuu Roma xihin tuhun hebrero, ña cáhan na Israel viti.

39 Ta in táhan da quini táca inga crúxu yati jiní á cán naçasahá da cáhahá da xihin á. Já cáchi da já:

—Tá mé a ndaa cúun Cristo, da naçindahá Ndióxi cacomí cuéntá saha ñayivi chindeé mún já ná a quívun. Ta chindeé ndehe já ná a quiví nde —cáchi da.

40 Joo inga táhan da quini táca inga xoo jiní a cán naçasahá da janani da da cáhan xihin Jesús cán já naçachi da já xihin dá:

—Á co yíhví tohún Ndióxi. Jáchi in cúu yo ndóho ini yóho

41 joo mé Jesús yóho coó toho cuachi naçaja da. Ta mé cuití ví ndítahan ndoho ini ña ná chahví saha cuachi naçaja í —naçachi da cán janani da inga da táca cán.

42 Tá nandihí já naçachi da já xihin Jesús:

—Jesús, caja ndó ñamaní ndicuhun ini ndó saha i tá ná casahá ndó cacomí ndó cuéntá saha ñayivi —naçachi da xihin Jesús.

43 Anda já naçachi Jesús já xihin dá:

—Mé a ndaa ná caħan i xuhun ña mé quiví víti cuħún coún xihín i indiví — ñacachi a xihín dá.

Tá naxihí Jesús

(Mt. 27:45-56; Mr. 15:33-41; Jn. 19:28-30)

⁴⁴ Ta tátuhun caxiví já ñacanaá ní cúu ñuyiví. Ta janda caa uní sahini já ñacasáhá nandiyehé tucu.

⁴⁵ Nanaá nuú candii. Ta janda já nandata java ndaa jáhma ndeé ña tácaa veñuhu cáhnu ñuu Jerusalén ña sáji nuu nuú yí ndivaha.

⁴⁶ Anda já ñacayuhú cóhó Jesús já cáchi a já:

—Tátá Ndióxi, ndáħa mé ndó jándacoo i ínima i.

Ta tá ñacachi a ña yóho já naxihí va.

⁴⁷ Ta ndaja coo da sáhdá chuun nuú soldado cuéntá Roma cán tá naxini da tóco ndihi ña nayaha yóho já ñacasáhá cája cáhnu da Ndióxi já ñacachi da já:

—Mé a ndaa táhyí cóo toho cuachi da yóho —ñacachi da.

⁴⁸ Ta tóco ndihi ñayivi ñasanduu cán, na naxini nuú naxihí Jesús jandá johó cáni na yica ndicá na sahá ña táhnda ini na saħa Jesús já cuanúhu va na.

⁴⁹ Joo tóco ndihi na xini táhan xihín Jesús ñacandoo na ndíta xicá na sándehe na. Ta tañu na cán ñasanduu ri najihí táhan na ñaquixi xihín á janda estado Galilea cán.

Tá nachicaan na yiquí cuñu Jesús ini cáva

(Mt. 27:57-61; Mr. 15:42-47; Jn. 19:38-42)

⁵⁰ Ta ndaja coo ñasahin in dataa nani José, da ñuu Arimatea ña ndácaan estado Judea cán. Ta cúu dá in ta vaħa, da cája ña ndaa cuití va. Ta cúu da in táhan na cómi cuéntá sahá na Israel.

⁵¹ Mé José yóho cóo ñatahan ini da xihín ña ñacaja java ga na cán jáchi ndáti da casaa quiví cacomí Ndióxi cuéntá sahá ñayivi.

⁵² Ta ñasahan da caħan ndahví da xihín Pilato ña ná ndiquiaħva da yiquí cuñu Jesús nu dá.

⁵³ Ta chí ñasahan Pilato ñamaní nu dá chí ñasahan da najánuu da yiquí cuñu Jesús ndica crúxu cán. Já ñachitíví ñahá da xihín jáhma vaħa ta já nachicaan ñahá da ini in

yávi ndácaan ndica cáva. Ta ni in túhún toho ndii a ñaha chicaan na ini mé cáva cán.

⁵⁴ Mé quiví cán ñasacuu a quiví cája ndiví ñayivi ñaha vehe na jáchi já chá cacuu a quiví ndiquehe ndeé ná sahá ña cán queá ndihi ini na jáxinu na chuun cája na.

⁵⁵ Ta najihí, na ñasandico jata Jesús janda tá ñaquixi a chí estado Galilea cán ñasahan na sándehe na ndica cáva nuú najáqueta nuu na yiquí cuñu Jesús cán.

⁵⁶ Ta tá ñasaa na vehe na já ñacaja ndiví na perfume xihín java ga ñaha támi saħan ña ná jándicuchu na yiquí cuñu Jesús. Ta inga quiví itaan nandiquehe ndeé ná tá quiaħva ñasahnda Ndióxi caha na janda saħahá.

24

Tá nanditacu tucu Jesús

(Mt. 28:1-10; Mr. 16:1-8; Jn. 20:1-10)

¹ Ta tá sa nayaha quiví ndiquehe ndeé ná ta naha chá quiví domingo já ñaquee tucu najihí cán cuħan na nuú nachicaan na yiquí cuñu Jesús ini cáva cán. Já ñeħe na perfume, dó ñacaja tiaħva na cán. Ta ndáca táhan java ga najihí xihín ná cuħan na.

² Ta tá naxinu cóo na cán já naxini na ña cóo ga yuu ndáji ndaa yuhú cáva nuú ñasandacaan yiquí cuñu Jesús.

³ Anda já ñaquihvi na ini cáva cán joo cóo ga yiquí cuñu Jesús nanditahan na.

⁴ Ta chí nayihví na ta cóo xini na ndia caha na. Ta jonáa va naxini na ndíta ivi dataa yati jin ná. Ta a juú quiaħva ndató yeħe jáhma ndixi da cán.

⁵ Ta chí a juú quiaħva yihví najihí já ñacandayi na janda quiaħva naxinu jiní ná nu ñúhu. Anda já ñacachi dataa cán já xihín ná:

—Coo ndítahan toho ndinducú ndo in da tácu tañu nu sánduu ndii.

⁶ Cóo toho Jesús ín yóho jáchi sa nanditacu va. Xini ñúhú ndicuhun ini ndó ña ñacachi a xihín ndo tá ñasahin a estado Galilea.

⁷ Mé á cúu á da ñachindahá Ndióxi nduu ñayivi ta sa ñacachi a xihín ndo ña ndiquiaħva na mé á ndahá ñayivi quini. Ta ñacachi a xihín ndó ña cata caa na a ndica crúxu ta tá ná xinu uní quiví já nditacu tucu a —ñacachi dataa cán.

⁸ Anda já nandicuhun ini najihí cán ña ñacachi Jesús xihín ná.

⁹ Chí ñaquee na cuahan na já nandicani ndihi na sahá ña yóho nuú ña uxu in ñaxica tuun xihín Jesús xihín nuú java ga ña ndúu cán viti.

¹⁰ Mé najihí cán, ña ñasahan cáxi tuhun ña yóho nuú ña apóstol cán ñasacuu María, ñá ñuu Magdala xihín Juana xihín María, ñá cúu náná Jacobo xihín java ga najihí.

¹¹ Joo ña apóstol, ña ñaxica tuun xihín Jesús cán ñacahán ña ña cuénto uun va queá. Sahá ña cán queá coo ñaxeen na candúsa na ña ñacachi najihí cán xihín ná.

¹² Joo ndaja coo ñaqueta Pedro xínu da cuahan da sánehé da ini cáva nuú ñachicaan ña yiquí cuñu Jesús cán. Ñaxini da jáhma vaha ña ñasativí a cán joo coo toho yiquí cuñu a. Ta chí ñacatónto da ñaquee da cuanúhu dá vehe da.

*Cátahan Jesús cuahan xihín ivi ña cuahan chí ñuu Emaús
(Mr: 16:12-13)*

¹³ Ta mé quivi já ivi táhan ña cúu cuénta Jesús ñaquee na cuahan ña in ñuu naní Emaús. Mé ñuu cán ñéhe táhan tátuhun uxu in kilometro xihín ñuu Jerusalén.

¹⁴ Ta ndítuhún ña cán cásahan ña saha tóco ndihi ña ñacuu ñuu Jerusalén cán.

¹⁵ Ta nani ndítuhún ña cásahan ña já ñacayati Jesús nu ná já ñacasáhá xíca mé á xihín ná cuahan ña.

¹⁶ Ta vatí sánehé ña cán nu Jesús joo coo ñacuu ndicuni na mé á.

¹⁷ Anda já ñandaca tuhún Jesús ña cán já ñacachi a já:

—Ndía ndítuhún ndó cásahan ndo. Ta ndavaha cácuéha ini ndó cásahan ndo — ñacachi a xihín ná.

¹⁸ Já in táhan ña cán, da naní Cleofas ñanducú ñehe da tuhun nu á já ñacachi da já:

—Ní cúu va ñandicuita nuu tuhun sahá ña ñacuu ñuu Jerusalén tañu quivi yóho. In tuhún yóho tañu ña ndúu cán cúu da coo xini ña ñayaha — ñacachi da.

¹⁹ Anda já ñacachi Jesús já xihín ná:

—Ndía ñacuu, vaha.

Já ñacachi ña cán já xihín á:

—Ñaquixi in da naní Jesús chí ñuu Nazaret ta ñasacuu da in profeta cáhnu

ndivaha jáchi cuahá ndivaha ña náhnu ñacahan da. Ta cuahá ndivaha ña náhnu ñacaja da nu Ndióxi xihín nuú ñayivi.

²⁰ Joo ña sacuaña nuú jutú xihín ña jutixia ñuu nde ñatiin na mé Jesús ta já ñandiquiahva na da ña ná cahní ña da ta já ñacata caa na da ndica crúxu.

²¹ Joo mé nde ñacahán nde ña mé Jesús cán cacuu da da ndáti nde chindeé da ndehe, ña Israel yóho já ná a cája xíxi ga ña ñuu Roma xihín nde, ñacahán nde. Joo ñandihí va viti jáchi sa ñayaha uní quivi ñaxihí da cán.

²² Vatí ñaqueta java najihí tañu nde yóho najáyihví ña ndehe jáchi naha chá ñasahan ña nuú ñanduxu Jesús cán.

²³ Ta cáchi ña ña coo ga yiquí cuñu Jesús ndácaan cán. Sahá ña cán queá ñaxinu ña nuú ñasanduu nde ta ñandicani na nuú nde ña ñacanáha java tátó Ndióxi nu ná ta ñacachi na ña tácu va Jesús.

²⁴ Ta java táhan da xíca tuun xihín nde cán ñasahan da sánehé da ini cáva cán ta chí já ndusa cáa tá quiahva cáchi najihí. Ta coo mé Jesús ñaxini na — ñacachi ña cán xihín Jesús.

²⁵ Anda já ñacachi Jesús já xihín ña cán:

—Ñayivi tónto ndivaha cúu ndó. Jáchi yáncá ndivaha já xínu ini ndó candúsa ndó ña ndaa ña ñacahan ña profeta sanahá.

²⁶ Á coo cánda ña ini ndó ña jihna ñúhú ñanditahan nuú da cúu Cristo ndoho ini da ta tá sa ñandihí já ndiñehe jícó Ndióxi da já ndacojo da chuun cacomí da cuénta sahá ñayivi — ñacachi Jesús.

²⁷ Anda já ñacasáhá ndícani a nu ná ña ñacahyi nuú tuhun Ndióxi nu cáhan saha tóco ndihi ña ndítahan ndoho da cúu Cristo. Ñacasáhá ndícani a janda libro ñacahyi Moisés sanahá janda quiahva ñaxinu a nu tóco ndihi libro ña ñacahyi ña profeta sanahá.

²⁸ Ta tá ñaxinu coo na ñuu nuú cuahan ña cán já ñacaja Jesús tátuhun yáha saa cuahan.

²⁹ Joo mé ña cán ñacaja ndúsa ná xihín á ña ná coo tóo a xihín ná. Já ñacachi na já xihín á:

—Yóho candoo ndó coo tóo ndó jáchi sa ñahini cuí va ta ja chá cuaá — ñacachi na xihín á.

Anda já naquihvi Jesús ini vehe ña candoo a xihin ná.

³⁰ Ta tá nasacoo a nu mesa xihin ná já natiin a in pan já nandiquiahva ndixahvi nu Ndióxi sahá. Ta nasahnda java ña já nasahan ña nu ná.

³¹ Ta chí ivi laá nanuna xini túni ná ta já nandicuni na mé á ña cúu á Jesús. Joo ivi laá najándiñuhú a mé á nu ná.

³² Anda já nacachi xihin táhan na já:

—Íchi quéa cáji ndivaha iní tá nandicani Jesús tuhun Ndióxi nu yo tá vaxi íchi xihin á —nacachi xihin táhan na cán.

³³ Chí ivi laá naquehe tucu na íchi ña ndicó coo tucu na ñuu Jerusalén. Tá naxinu na cán nandiñehe ná ña ndítutú ndihuxu in táhan na naxica tuun xihin Jesús cán ndúu na xihin java ga na ndúu cán.

³⁴ Anda já nacachi na cán xihin ndiví na yóho:

—Mé a ndaa táhyi nanditacu tucu Jesús, xitoho í. Ta naxini Simón mé á —nacachi na.

³⁵ Anda já nacasáhá ndiví na cán ndicani na ña nasandaca táhan na xihin Jesús nasahan na. Ta nandicani na ña nandicuni na mé á nani nasahnda java mé á pan ña cuxu na.

Náha Jesús mé á nuú na naxica tuun xihin á
(Mt. 28:16-20; Mr. 16:14-18; Jn. 20:19-23)

³⁶ Ta nani ndítuhún yij ná ndúu na já naxinu coo Jesús nandaca ndichi a mahñú na cán já nacahan Ndióxi á xihin ná já nacachi a já:

—Ná caja Ndióxi ña ná coo vaha ini ndó.

³⁷ Joo nayihvi na cán ta nacahan na ña cúu á in ínimá ndii va.

³⁸ Joo já nacachi Jesús já:

—Ndá cuéntá quéa yihvi ndo. Ta ndá cuéntá quéa co candúsa ndó ña cúu yehe Jesús.

³⁹ Candehé ndó ndahá i ta candehé ndó sahá i. Sa mé yehe cúu vi. Cani ndaa ndáha ndó yehe ta candehé vaha ndó yehe. Jáchi in ínimá ndii coo toho yiquí cuñu a tá quiahva sándehe ndó ña in yiquí cuñu yehe —nacachi Jesús xihin ná.

⁴⁰ Ta nani cáhan Jesús xihin ná já nacasáhá náha ndáha á xihin sahá nu ná.

⁴¹ Joo cámaní yij candúsa na cán ña cúu mé á Jesús jáchi nacatontó na ta cáji ndivaha ini na ña cán quéa nacachi tucu Jesús já xihin ná:

—Ndá ñaha in nu ndó ná cuxu u —nacachi Jesús xihin ná.

⁴² Anda já nasahan na in tuhun tiyacá nayata nu á xihin in ñimá ñuñu nu á.

⁴³ Já natiin a ña ndáha ná já naxixi a ña nani sándehe na a.

⁴⁴ Tá nandihí já nacachi a já xihin ná:

—Sa nayaha tá in nacachi i xihin ndó jihna. Sa naxinu coo tá in nacahyí Moisés xihin na profeta sanahá sahá ña ndítahan ndoho i. Ta jári David tá nacahyí da libro Salmos já nacahan ri da cán va sahá ña ndoho i —nacachi a xihin ná.

⁴⁵ Anda já nacaja Jesús ña ná ndinuna xini túni ná já ná candaa ini na ña cúni cachi tuhun Ndióxi cán.

⁴⁶ Ta nacachi a já xihin ná:

—Janda sanahá nacahyi ña ndítahan quivi yehe, da cúu Cristo, da nachindahá Ndióxi cacomí cuéntá sahá ñayivi. Joo nacahyi ri ña ndítahan nditacu tucu u quivi uní.

⁴⁷ Ña cán quéa ndítahan nuú ñayivi caca nuu na cahan na tuhun vaha sahá i níi cúu ñuyiví já ná ndicó coo ini ñayivi ta jándacoo na cuachi cája na. Anda já caja cáhnu ini Ndióxi sahá ndihí cuachi na. Ta janda ñuu Jerusalén xini ñuhú ñayivi casáhá na cahan na tuhun vaha sahá i ta já cahun na janda ndijáá ñuyiví.

⁴⁸ Ta ndóhó cúu na naxini ndaja cáa ña nandoho i ña cán quéa ndítahan nu ndó cahun ndó caxi tuhun ndó tóco ndihí ña yóho nuú ñayivi.

⁴⁹ Cuni johó vaha ndó jáchi chindahá i ínimá yij Ndióxi já ná cañuhu a ini in in ndó. Jáchi quiahva já nacachi Ndióxi, tátá i tá nasahan tuhun a nu ndo. Joo ndítahan canduu ndihí ndó ñuu Jerusalén yóho janda quiahva ná ndicutú ndaa ínimá ndo xihin nde Ndióxi ña quixi indiví —nacachi Jesús xihin ná.

Tá nandaa Jesús cuahan indiví
(Mr. 16:19-20)

⁵⁰ Anda já ndáca Jesús na cán nasahan na xihin á yuhú ñuu Betania. Ta nandiñehe a ndáha á já naja yí á na.

⁵¹ Ta tá cája yí á na já natavá xóo a mé á já nanda cuahan indiví.

⁵² Tá nandihi naja cáhnu na cán Jesús já cávatá ndivaha na nandicó coo na ñuu Jerusalén.

⁵³ Ta níí tiempo nasanduu tuun na veñuhu cáhnu cája cáhnu na Ndióxi. Já ná coo.

Tuhun vaha nacahyí Juan sahá ña nacaja Jesucristo

Jesucristo cúú á tuhun Ndióxi ta nanduu a ñayivi

¹ Tá nacava sáhá saha ñuyíví sa ín va mé á naní tuhun Ndióxi. Nasahin mé á xihin Ndióxi ta in cúú mé á xihin Ndióxi.

² Ta janda mé saha sa ín va xihin Ndióxi.

³ Ta mé a cán cúú á Jesucristo ta nacaja Ndióxi ña nacava ha mé á tóco ndihi ñaha. Ta ni in túhún toho ñaha ín, a cóo tá ná a cavaha mé á ña, nduu.

⁴ Ta mé á quéa cája ña ná catacu tóco ndihi ñaha ta mé á jándiyéhe a ínima ñayivi já ná ndicuni na yo cúú mé á.

⁵ Mé Jesucristo cúú á tátuhun in ñúhu cáyi ña jándiyéhe a xoo naá ta a cuú ndahva ña.

⁶ Ta ndaja coo nachindahá Ndióxi in dataa naní Juan.

⁷ Naquixi da caxi tuhun da xihin ñayivi ña cúú Jesucristo ña jándiyéhe ínima ñayivi, na ndúu nuú naá já ná cuu candúsa na mé á sahá ña nacahan da.

⁸ Mé Juan yóho coo cúú dá mé á jándiyéhe ínima ñayivi. Naquixi cuití da caxi tuhun da xihin ñayivi ña mé Jesucristo quéa jándiyéhe ínima ñayivi.

⁹ Mé Jesucristo naxinu a ñuyíví yóho ta cúú ndusa mé a ña jándiyéhe ínima tóco ndihi ñayivi.

¹⁰ Naquixi mé a naní tuhun Ndióxi ta nasahin a ñuyíví yóho. Ta xihin ña nacaja Jesucristo nacava ha Ndióxi ñuyíví. Joo ñayivi ndúu ñuyíví yóho cóo naxeen na candaa ini na yo cúú mé á.

¹¹ Naquixi Jesucristo ñuyíví ña nacava ha mé á joo na ñuu mé á cóo naxeen toho na ndiquehe vaha na mé á.

¹² Joo ndá na ná ndiquehe vaha mé á ta candeé ini na mé á já quéa sahan mé á ñamaní nu ná ña ná nduu na na cúú cuéntá Ndióxi.

¹³ Ta na cán cúú na nanduu jahyi mé á. Ta coo cúú á sahá ña nacacu na ñuyíví yóho ta ni coo cúú á sahá ña cuni in taa cacu in jahyi da. Nanduu na jahyi mé á jáchi já nasacu ini mé á coo.

¹⁴ Mé Jesucristo, mé a naní tuhun Ndióxi cán nanduu a in taa ta naquixi a nasahin a tañu nde. Ta tóco ndihi ña nasacaja mé á nasacu a ña ndaa. Ta a juú quiahva quihvi ini a ñayivi. Ta naxini nde ndá quiahva cáhnu cúú mé á jáchi sahá ña cúú mé á in túhún jini já jahyi Ndióxi sahá ña cán quéa nacaja Ndióxi ña ná ndicáhnu ndivaha mé á.

¹⁵ Tá nandicani mé Juan sahá Jesús nuú ñayivi já nacachi da já saha mé á:

—Mé a yóho cúú á ña nacahan i sahá nu ndo tá nacachi i xihin ndo ña vaxi inga a jatá yehe. Ta nacachi i xihin ndo ña ín chága saha mé a cán a juú ga yehe jáchi janda tá camaní yí cacu u sa ín va mé á — nacachi Juan.

¹⁶ Ta sahá ña ín ndivaha ñamaní nu mé á sahá ña cán quéa a juú quiahva ñehe táhvi tóco ndihí nu mé á.

¹⁷ Nacahyí Moisés ley Ndióxi sanahá. Joo Jesucristo, mé á cúú á ña ndaa naquixi a ñuyíví yóho sahá ña quihvi ndivaha ini a mí.

¹⁸ Ta ni in túhún toho ñayivi cóo naxini na Ndióxi. In túhún Jesucristo, mé á cúú in túhún jini já jahyi Ndióxi, mé a cán quéa xini ndá quiahva ín Ndióxi jáchi in cúú á xihin á ta mé a quéa nanaha ña yóho nu yo.

Ndicani Juan nuú ñayivi yo cúú Jesús (Mt. 3:11-12; Mr. 1:7-8; Lc. 3:15-17)

¹⁹ Ta ndaja coo java na sacaha nuú na Israel, na ndúu ñuu Jerusalén cán nachindahá na java jutú xihin java na naquixi chichi Leví nu ín Juan ña ná ndaca tuhún na da á cúú dá da nasahan Ndióxi tuhun a chindahá a ñuyíví.

²⁰ Ta cáxi táhyí nacahan Juan xihin ná ña coo cúú dá da cán ta já nacachi da já:

—A juú toho yehe cúú da nacachi Ndióxi chindahá a cacomí cuéntá sahá ñayivi — nacachi Juan.

²¹ Anda já nandaca tuhún tucu na da já nacachi na já xihin dá:

—Yo já cúú yóhó, dá já. Á a juú yóhó cúú profeta Elías — nacachi na.

—A juú toho yehe cúú profeta Elías — nacachi Juan.

Anda já nacachi tucu na já xihin dá:

—Á a juú toho yóhó cúú profeta da ñacachi Ndióxi chindahá a, dá já —ñacachi na.

Joo ñanducú ñehe Juan tũhun nu ná já ñacachi da já xihĩn ná:

—Ni in túhún toho da cáchĩ ndó ñan co cúú yehe.

²² Andá já ñacachi tucu na já xihĩn dá:

—Ndítahan ndicani lohún nuú nde yo cúú yóhó. Jáchi java ña ñachindahá ña ndehe ña ná quixi nde ndaça tũhún nde yóhó. Ta tá co cúnun caxi tũhún xihĩn nde yo cúú yóhó, ndá cũhun nde quehe nde tũhun nducú ñehe nde nuú ña ñachindahá ndehe cán —ñacachi na.

²³ Andá já ñacachi Juan já xihĩn ná:

—Yehe cúú ña xica nuu tañu yucú íchi ta cáyuhú cóhó i já cáchĩ i já xihĩn ñayivi: “Cuná ndó in íchi ndacú nu mé á ña ná ndihvi a ínimã ndo” —ñacachi Juan xihĩn ná tá quiahva ñacahyí profeta Isaías sanahá.

²⁴ Ta ña ñandaca tũhún Juan cán ñasahan ña jáchi já ñatahnda chuun ñacaja ña fariseo, mé ña sáhnda chuun ñuu Jerusalén cán.

²⁵ Já ñacachi tucu na já xihĩn Juan:

—Ndá cuéntá quéa cája ndúta yóhó ñayivi tá ta co cúún Cristo, da ñachindahá Ndióxi cacomí cuéntá sahá ñayivi. Ta ndá cuéntá quéa jácandútun ñayivi tá ta ni co cúún Elías ta ni co cúún mé profeta, ña ñacachi Ndióxi chindahá a —ñacachi ña cán.

²⁶ Andá já ñacachi Juan já xihĩn ná:

—Yehe cája ndutá i ñayivi xihĩn ticuĩ joo tañu mé ndó ín in da co xini ndo.

²⁷ Ta vaxi in ña jatá yehe ta ín cuaha chága saha dá a juú ga yehe. Ta chí ni coó sahá i ndaxi i correa ndusa dá —ñacachi Juan xihĩn ña ñasahan ndáca tũhún ñahá cán.

²⁸ Tóco ndihi ña yóho ñayaha chí ñuu Betábara ña ndácaan inga xoo yuta Jordán nuú ñacaja ndúta Juan ñayivi.

Jesús cúú á tátũhun in ndicachi rí jóco ña nu Ndióxi

²⁹ Ta inga quiví itaan já ñaxini Juan cáyati Jesús vaxi a nu ín da. Já ñacachi Juan já xihĩn ñayivi ndúu cán:

—Candehé ndo. ña vaxi ñan cúú dá tátũhun ndicachi jóco ña nu Ndióxi. Ta

da ñan cúú ña jándoo cuachi ñayivi ndúu ñuyiví.

³⁰ ña ñan cúú ña cáchĩ i saha ña vaxi in da jatá yehe ta ín cuaha chága saha dá a juú ga yehe. Jáchi ñanda tá cámaní cacu yehe sa ín va mé ña ñan.

³¹ Ta ni mí i coó ñaxini i ndá quiahva cáa da joo ñacasáhá i jácandutá i ñayivi xihĩn ticuĩ já ná candaa ini ña Israel yo cúú mé dá —ñacachi Juan.

³² Ta ñandicani da ña ñaxini da já ñacachi da já:

—Sa xini xihĩn nuu mí i ndá quiahva ñanuu ínimã yii Ndióxi jatá Jesús. Mé ínimã yii Ndióxi cán ñanuu a indivi ta cáa tá quiahva cáa in ndijata.

³³ Mé a ndaa coó ñaxini toho yehe yo cúú mé ña yóho, nduu. Joo Ndióxi, mé a ñachindahá yehe jácandutá i ñayivi xihĩn ticuĩ, mé a cán quéa ñacachi já xihĩn i: “Ndá ña ná cúnun ná nuu ínimã yii mí i ta sacoo a jata dá, ña cán cúú ña jándicutú ini ñayivi xihĩn ínimã yii mí i”, ñacachi Ndióxi xihĩn i.

³⁴ Ta viti mé a ndaa sa xini vi yo cúú mé á ta cáxi tũhun i xihĩn ndo ña mé á cúú á in túhún jini já jahyí Ndióxi —ñacachi Juan.

Tá ñacasáhá java ñayivi ndíco ña Jesús xica na xihĩn á

³⁵ Ta inga quiví itaan ñasahin tucu Juan cán xihĩn ivi ña xica xihĩn dá.

³⁶ Já ñaxini da ña yáha Jesús cuahan já ñacachi Juan já xihĩn ña xica xihĩn dá cán:

—Candehé ndo. ña ñan cúú tátũhun ndicachi, rí jóco ña nu Ndióxi —ñacachi Juan.

³⁷ Tá ñaxini joho ña ndíta xihĩn ña cán ña yóho já ndíco ña jatá Jesús cuahan ña.

³⁸ Tá ñaxini Jesús ña ndíco ña cán jatá já ñandicoto nihni a nu dá já ñacachi a xihĩn ndívi ña cán já:

—Ndía cuni ndo —ñacachi a.

Já ñacachi ña cán já xihĩn á:

—Maestro, ndájá ín vehe ndó já —ñacachi da.

³⁹ Andá já ñanducú ñehe Jesús tũhun nu dá já ñacachi a já:

—Cóho ná cuni ndó, dá já —ñacachi a.

Já ndáca táhan da ñasahan ña xihĩn á sándehe ña nu ín a. Ta ñasacuu a tátũhun caa comi sahini já ñasanduu da xihĩn á.

⁴⁰ In táhan da naxini joho ña nacachi Juan ta ndíco da jatá Jesús cán naní da Andrés, da cúu ñani Simón, da cáhan na Pedro xihin cán.

⁴¹ Mé Andrés yóho ndáva da nasahan da ndínducú da ñani da, da naní Simón cán. Ta tá nandíñehe ñahá da já nacachi da já xihin dá:

—Nanditahan nde da nachindahá Ndióxi cacomí cuéntá sahá ñayivi, mé a cúu Cristo —nacachi da.

⁴² Tá nandíhi já ndáca Andrés cán ñani da nasahan da nu Jesús. Ta tá naxini Jesús da já nacachi a já xihin dá:

—Yóhó cúun Simón, jahyi Jonás. Joo yehe chinúu i quivun cananún Cefas viti —nacachi Jesús.

Quivi Cefas yóho in cúu va xihin Pedro ta cúni cachi a in tóto.

Cána Jesús Felipe xihin Natanael ña ná caca tuun da xihin á

⁴³ Ta inga quivi itaan já naquee Jesús cuahan chí estado Galilea. Ta cán nanditahan mé á da naní Felipe já nacachi a já xihin dá:

—Naha quíi caca tuún xihin i —nacachi a xihin dá.

⁴⁴ Mé Felipe yóho cúu dá da ñuu Betsaida ta mé ñuu cán cúu ri ñuu Andrés xihin Pedro.

⁴⁵ Ta ndaja coo Felipe yóho ndáva da nasahan da nandínducú da Natanael ta tá nandíñehe ñahá da já nacachi da já xihin dá:

—Nanditahan nde da nacahyí Moisés saha nu ley sanahá. Ta jári na profeta nacahyí ri na saha dá. Ta mé dá cúu Jesús, jahyi José, da ñuu Nazaret —nacachi Felipe xihin Natanael cán.

⁴⁶ Anda já nacachi Natanael já:

—Ndá quehe ri ñaha vaha quixi chí ñuu Nazaret jan —nacachi da.

Anda já nacachi Felipe já xihin dá:

—Cóho candehún —nacachi da.

Anda já naquee da cuahan da nu in Jesús.

⁴⁷ Ta tá naxini Jesús nacayati Natanael nu á já nacachi a já:

—Da yóho cúu ndusa in da naquixi chichi Israel ta cúu dá taa cája ña ndaa cuití va —nacachi Jesús.

⁴⁸ Tá naxini joho Natanael ña yóho já nandaca tuhún da Jesús já nacachi da já xihin á:

—Á xini ndó yehe, vaha.

Anda já nacachi Jesús já xihin dá:

—Janda tá cámaní quee Felipe cuhun da cana da yohó já naxini i in coún saha titó ñuhú —nacachi Jesús xihin Natanael.

⁴⁹ Anda já nacasáhá cáchí da já xihin Jesús:

—Maestro, jivi ndusa cúu ndó in tuhún jini já jahyi Ndióxi ta cúu ndó ña cómi cuéntá sahá ñayivi Israel —nacachi da xihin Jesús.

⁵⁰ Anda já nanducú ñehe Jesús tuhun nu dá já nacachi a já:

—Nacandúsún yehe saha ña nacachi i xuhun ña naxini i in coún saha titó ñuhú. Joo náhnu chága ñaha cunún xihin nduchú núun caja i —nacachi Jesús xihin dá.

⁵¹ Anda já nacachi tucu Jesús já:

—Mé a ndaa ná cahan i xihin ndo ña cuni ndó xihin nuu ndó ña nuná indiví. Ta cuni ndó táto Ndióxi ndaa na ta nuu na xinu na nu in yehe, da nachindahá Ndióxi nduu ñayivi —nacachi Jesús.

2

Tá nasahan Jesús in vicó tándaha

¹ Tá nayaha uni quivi já nasahin in vicó tándaha ñuu Caná ña ndácaan estado Galilea cán. Ta nasahan María, náná Jesús mé víco cán.

² Ta jári nacana na Jesús xihin na xica tuun xihin á ta chí nasahan ndihi na mé víco cán.

³ Joo ndaja coo nani cúu víco cán nandíhi va vino xíhi na. Ta tá naxini náná Jesús ña yóho já nacachi ña já xihin Jesús:

—Sa nandíhi va vino xíhi na —nacachi ña xihin á.

⁴ Já nacachi Jesús já xihin ña:

—Co xini ñuhú toho cahan ndó já xihin i jáchi cámaní yíi va ndindaa hora caja i ñaha xituhún —nacachi Jesús xihin ña.

⁵ Tá nandíhi já nacachi náná Jesús já xihin na jácaca vino cán:

—Ndá ñaha ná cahnda Jesús nu ndó caja ndó, caja ndó ña —nacachi ña xihin ná.

⁶ Ta mé vehe nu cúu víco cán nasahin iñu yoo náhnu ña nacavaha na xihin yuu.

Mé yoo cán nasacuu a nu táan na Israel cán ticuúí, dó ndája vií na mé ná tá quiahva sáhdá ley nu ná caja na. Ta tátuhun comi jícó á in ciento litro ticuúí quéta ini in in yoo náhnu cán.

⁷ Tá nandihí já nacachi Jesús já xihín na jácaca vino cán:

—Jácutú ndihi ndó yoo náhnu jan xihín ticuúí.

Ta chí najácutú jíní ndaa na yoo náhnu cán xihín ticuúí.

⁸ Tá nandihí já nacachi tucu Jesús já xihín ná:

—Ta viti tavá loho ndó do ta quiahva ndó do ná coto ndojó da cómí chuun saha víco yóho —nacachi Jesús.

Já ñehe na do nasahan na nuú da cómí chuun saha víco cán.

⁹ Joo sa nacaja Jesús ña ná nduu ticuúí cán vino. Ta naxito ndojó da do joo co xini da ndájá naquixi dó. In túhún na xini cúu na naxini ña nandaja Jesús cán ticuúí ña ná nduu dó vino. Tá naxito ndojó mé da cómí chuun yóho do já nacatontó da ta nacana da mé da tándaha cán.

¹⁰ Já nacachi da já xihín dá:

—Ndijáá ñayivi tá cája na in víco já sahan na vino vaha nu cuítí nuú na táhan cán. Ta tá sa naxihí cuahá na já sahan na dó núu cán. Joo yóhó nasacu vahún vino vaha ta ja víti sahún do nuú na táca víco —nacachi da.

¹¹ Ña xitúhún yóho nacaja Jesús ñuu Caná cuéntá estado Galilea nasacuu a ña xitúhún nu cuítí nacaja Jesús já ná cuni ñayivi ndá quiahva cáhnu cúu mé á. Ta xihín ña yóho nacandeé ini na xica tuun xihín a cán mé á.

¹² Tá sa nayaha ña yóho já naquee a cuahan xihín na xica tuun xihín á chí ñuu Capernaum. Ta ndáca táhan náná a xihín ñani a ndíco na cuahan na xihín á. Ta nasanduu na ñuu Capernaum cán chá quiví cuítí va.

Tává Jesús na ndúu jícó veñuhu cáhnu ñuu Jerusalén

(Mt. 21:12-13; Mr. 11:15-18; Lc. 19:45-46)

¹³ Tá nacayati quiví caja na Israel vicó pascua já naquee Jesús nasahan chí ñuu Jerusalén.

¹⁴ Ta tá naxinu coo a veñuhu cáhnu ndácaan Jerusalén cán já naxini a ña jandá johu ndúu na jícó. Java na jícó tindiquí xihín ndicachi xihín ndijata viti ta java na ndúu coo ndíjama jjuhún.

¹⁵ Ta chí natiin Jesús yóho ta nacavaha in churrú xihín á já nacasáhá táxí ndihi a na ndúu jícó cán. Ta janda tindiquí xihín ndicachi jana ná natavá a ri quee rí cuhun ri. Ta já naxinu coo a nu ndúu na ndíjama jjuhún cán já naxicó ñehe a mesa na já nacuyu ndihi jjuhún na nu ñúhu.

¹⁶ Ta nasahnda a chuun nuú na jícó ndijata cán já nacachi a já:

—Tavá ndihi ndó ña jícó ndó jan. A cája ndó xihín vehe tátá i ña cúu á nu cáyahvi ñaha —nacachi Jesús xihín ná.

¹⁷ Tá nandihí já nandicuhun ini na xica tuun xihín Jesús cán ña cáhí tuhun Ndióxi. Já cáhí a já: “A juú quiahva xójo ini i sahá ña co cája cáhnu ñayivi vehe Ndióxi”, cáhí tuhun Ndióxi.

¹⁸ Tá naxini na Israel cán ña nacaja Jesús ña yóho já nandaca tuhún na mé á já nacachi na já xihín á:

—Xini ñúhú cajún in ñaha xitúhún já ná cuni nde ña mé a ndaa lin sahún tasún na ndúu jícó veñuhu yóho —nacachi na xihín Jesús.

¹⁹ Anda já nanducú ñehe Jesús tuhun nu ná já nacachi a já xihín ná:

—Tá ná jánditaní ndó veñuhu yóho ta tixi uní quiví já jácandichi tucu u ña —nacachi Jesús xihín ná.

²⁰ Anda já nacachi na Israel cán já xihín á:

—Co cándúsa nde ña cáhún jáchí nacaja chúun na ivi jico iñu cuia já naxinu veñuhu jan. Ta yóhó cáhún ña tixi uní víxí quiví jácandichi tucún ña, vaha —nacachi na cán xihín Jesús.

²¹ Joo co cáhan toho Jesús sahá veñuhu cáhnu cán jáchí cáhan mé á saha yiquí cuñu a.

²² Ña cán quéa tá naxihí Jesús ta nanditacu tucu a tixi uní quiví já nandicuhun ini na xica tuun xihín á cán sahá tuhun nacahan mé á nuú na Israel yóho. Ta chí nacandúsa na tuhun Ndióxi ta nacandúsa na tóco ndihi ña nacahan Jesús xihín ná.

Sa xini va Jesús inima ñayivi

²³ Cuahá ñayivi ñuu Jerusalén cán nacandúsa na Jesús nani nasahiin a víco pascua cán sahá ña náhnu xihín ña xitúhún nacaja nu ná.

²⁴ Vatí nacachi na cándúsa na mé á joo coo nacandúsa toho Jesús na jáchi xini vaha mé á ndá inima ñehe in in na cán.

²⁵ Ta co xini ñuhú toho a ña caxi tuhun na xihín á ndá quiahva íin in in ñayivi jáchi sa xini ndihi va mé á inima ná.

3

Nditúhún Nicodemo xihín Jesús

¹ Nasahiin in da xica cuénta na fariseo naní Nicodemo ta cúu dá da sacuahá nuú na Israel cán.

² Ta ñuu naqueta da cuahan da coto nihni da Jesús. Ta tá naxinu coo da nu á já nacachi da já xihín á:

—Maestro, cándaá cáxi ini nde ña nachindahá Ndióxi ndohó vaxi ndó nuú nde ña ná jánaha ndó nuú nde. Jáchi ni in túhún toho ñayivi a cúu caja ña náhnu cája mé ndó tá ta co íin Ndióxi xihín ná —nacachi da xihín Jesús.

³ Anda já nanducú ñehe Jesús tuhun nu dá já nacachi a já:

—Mé a ndaa ná cahan i xihín ndo ña ni in túhún ñayivi a cúu cacomí Ndióxi cuénta saha tá ná a ndicó coo tucu na cacu tucu na —nacachi a.

⁴ Anda já nandaca tuhún Nicodemo Jesús já nacachi da:

—Ndá quiahva cuu cacu tucu na tá sa nacayatá na. Ama ná ndihvi tucu na tixi náná na já cacu tucu na —nacachi Nicodemo xihín Jesús.

⁵ Anda já nacachi tucu Jesús já xihín dá:

—Cahan i ña ndaa xihín ndo. Tá nacandúta ñayivi xihín ticuú ta tá nandicutú ndaa inima ná xihín inima yij Ndióxi já cúu á tátuhun cacu tucu na ta anda já cuu cacomí Ndióxi cuénta saha ná.

⁶ Jáchi ñuyíví yóho cacu jahyi ñayivi ta sa já ñayivi cúu va na. Joo na jándicutú Ndióxi xihín inima yij mé á, na cán cúu jahyi mé á.

⁷ Ta co ndítahan catóntó ndó tá cáchi i xihín ndó ña ndítahan cacu tucu ndihi ñayivi já ná cacomí Ndióxi cuénta saha ná.

⁸ Jáchi cúu á tátuhun tá xicó tachi ndá xoo cúni mé á. Vatí xini johó í xicó tachi joo co xini yo ndá xoo quixi a ta co xini yo ndá xoo cuahan. Quiahva já íin inima yij Ndióxi jáchi vatí co xini ñayivi mé á joo xini na ndá quiahva cája mé á tá ñuhu a ini na —nacachi Jesús xihín Nicodemo.

⁹ Tá nandihí já nacachi Nicodemo já xihín Jesús:

—Co cándaá toho ini i ña cáchi ndo xihín i —nacachi da.

¹⁰ Anda já nacachi Jesús já xihín dá:

—Cúu ndó da jánaha nuú ñayivi Israel ta ndítahan cándaá ini ndó ña yóho, nduu jáchi cúu ndó maestro cáhnu nu ná.

¹¹ Mé a ndaa ná cahan i xihín ndo. Cahan nde sahá ña cándaá ini nde ta sahá ña naxini nde xihín nuú nde joo ndohó co cándúsa ndó ña cahan nde xihín ndo.

¹² Cahan i sahá ñaha ñuyíví yóho xihín ndo ta co cándúsa ndó ña. Ndaja ga ví caja ndó tá ná cahan i sahá ñaha íin indiví.

¹³ Ni in túhún toho ñayivi a ñaha ndaa cuhun chí indiví. In túhún da ndaa indiví cúu da nanuu, da naquixi ñuyíví yóho. Ta da cán cúu yehe, da nachindahá Ndióxi nduu ñayivi.

¹⁴ Sanahá ndivaha nacata caa Moisés in coo, rí nacavaha xihín caa nu yito yucú íchí. Quiahva já cata caa rí na yehe, da nachindahá Ndióxi nduu ñayivi ndica crúxu

¹⁵ Já quéa ná cacu ndaa inima ñayivi já ná a cuhun na indayá tá ná candeé ini na yehe. Ta xihín ña yóho catacu na anda ama cáa quivi.

Quihvi ndivaha ini Ndióxi ñayivi ndúu ñuyíví

¹⁶ Jáchi saha ña naquihvi ndivaha ini Ndióxi ñayivi ndúu ñuyíví sahá ña cán quéa nachindahá mé á in túhún jini já jahyi a ñuyíví yóho. Já quéa tá ná candeé ini na mé á cuu cacu ndaa inima ná já ná catacu na anda ama cáa quivi.

¹⁷ Coó nachindahá Ndióxi jahyi a ña ná quixi da jándihí da sahá na ndúu ñuyíví yóho. Nachindahá a jahyi a jáchi cúni a jácacu a ñayivi.

¹⁸ Ta ndá na sa candeé ini yehe, ña cúu u jahyi Ndióxi, na cán cúu na cája cáhnu ini

Ndióxi saha. Joo na coó naxeen cándúsa ñahá cán, na cán cúu na co cája cáhnu ini Ndióxi saha jáchi coó naxeen na cándúsa na da cúu in túhún jiní já jahyi mé á.

¹⁹ Ta na coó naxeen cándúsa cán sa nasacu va Ndióxi saha ná cuhun na indayá jáchi nacaan na cája na ña núu. Saha ña cán quea naxinu mé á cúu jahyi Ndióxi ñuyivi yóho ta cuni a jándiyéhe a nuú ñayivi. Jáchi cátóo chága na canduu na nuú naá jáchi cája na ña núu.

²⁰ Jáchi tóco ndihi na cája ña núu cándají na ña vaaha, ña cúu tátuhun ña yéhe. Ta co cuni na cayati na nuú ña yéhe cán já ná a ndítivi ña núu cája na.

²¹ Joo na cája ña ndaa, na cán cúu na cayati chága nuú ña vaaha, ña cúu tátuhun ña yéhe já ná nahá ña mé a ndaa cája na ña cuni Ndióxi —nacachi Jesús.

Ndícani tucu Juan sahá Jesús

²² Tá sa nayaha ña yóho já naquee Jesús nasahan chí estado Judea xihín na xíca tuun xihín á. Ta cán nasahin a chá tiempo xihín ná jáchi najácandúta ná ñayivi mé cán.

²³ Ta jári Juan va najácandúta dá ñayivi chí ñuu naní Enón yati ñuu Salim cán jáchi cán ñúhu cuahá ticui. Ta cuahá ñayivi nasahan na cán candúta ná.

²⁴ Tóco ndihi ña yóho nayaha tá cámaní tiin na Juan chicaan na da vecaa.

²⁵ In tañu java na xíca xihín Juan cán nacasahá na ndítuhún ihvi na xihín java na Israel sahá ña yóho: á ndiyahvi chága tá cája ndúta Juan ñayivi á tá cája ndúta na xíca tuun xihín Jesús ñayivi.

²⁶ Tá nandihí já ndáva na xíca xihín Juan nasahan na cáhan na xihín dá já nacachi na já:

—Maestro, dataa, da nandituhún xihín ndó inga xoo yuta Jordán cán, da nacaan mé ndó saha nuú nde cán, viti xíca nuu da jácandúta dá ñayivi ta jandá joho tóco ndihi ñayivi ndíco na da viti —nacachi na cán xihín Juan.

²⁷ Anda já nacachi Juan já xihín na cán:

—Ni in túhún toho ñaha a cúu caja ñayivi tá co sahan Ndióxi ñamaní nu ná caja na ña.

²⁸ Ta sa naxini joho ndó ña naxaxi tuhun yachi vi xihín ndo ña co cúu yéhe da

nasahan Ndióxi tuhun a chindahá a cacomí a cuénta sahá ñayivi. Nachindahá Ndióxi yéhe já ná cacu tiahva i íchi nuú quixi mé da cán.

²⁹ Candehé ndo. Cúu á tátuhun tá cúu in víco tándaha. Ta da cúu amigo da tándaha cán ndáti da casa da. Ta cáji ini da tá xini joho da nu cáhan vatá da tándaha cán jáchi in ñájihí da xihín dá. Ta quiahva já cáji ini i jáchi casahá ñayivi ndíco na jata Jesús viti.

³⁰ Mé Jesús jan ndicáhnu joho ga cuhun a. Ta yéhe ndítahan nuu ndáha joho i cuhun i —nacachi Juan.

Jesús quea naquixi chí indiví

³¹ Mé Jesús naquixi chí indiví ta cáhnu chága mé á nu ndíhi ñaha. Ta ñayivi nacacu ñuyivi yóho cáhan na sahá ñaha ñuyivi cuití va. Joo mé á naquixi chí indiví cán cúu á ña cáhnu chága nu tóco ndihi ñaha.

³² Ta cáhan mé a cán sahá ña naxini xihín nuu a ta cáhan sahá ña naxini joho a. Joo ni in na co cuni candúsa na ña cáhan mé á.

³³ Joo ndá na cándúsa nu cáhan mé á, na cán cúu na cándaá cáxí ini na ña cáhan Ndióxi ña ndaa.

³⁴ Ndióxi quea nachindahá mé á ta cáhan ndinuhu tuhun Ndióxi jáchi co ndáhvi toho cúu ini Ndióxi jándicutú ndaa mé a cán xihín inima yí mé á.

³⁵ Ta Ndióxi, tátá a ña in indiví quíhvi ndivaha ini a in túhún jiní já jahyi a ta nasahan ndée a nuú jahyi a ña ná cuu caja tóco ndihi ñaha.

³⁶ Ta ndá na candeé ini mé a cúu in túhún jiní já jahyi Ndióxi cán, na cán cúu na cacacu anda ama cáa quívi. Joo na co cuni candúsa ñahá cán, na cán cúu na a ñéhe táhvi toho na catacu na xihín Ndióxi. Ña caja Ndióxi xihín ná quea chindahá a na cuhun na indayá anda ama cáa quívi.

4

Ndítuhún Jesús xihín in ñañáha cuénta Samaria

¹ Ta ndaja coo na fariseo nacandaá ini na ña cuaha chága ñayivi ndíco jatá Jesús ta cuaha chága ñayivi jácandúta Jesús a juú ga Juan.

² Vatí a juú mé Jesús jácandúta ñayivi joo na xíca tuun xihín á cán jácandúta ñahá.

³ Ta tá naxini joho Jesús ña cáhan ñayivi sahá já naquee a estado Judea xihín na xíca tuun xihín á cuahan na ndicó coo na chí estado Galilea.

⁴ Ta nuú cuhun a Galilea cán ndúsa yaha ndaa estado Samaria já xinu a nuú cuhun a cán.

⁵ Ta naxinu a in ñuu loho naní Sicar cuéntá mé Samaria cán yati nuú ñundáhyi ña najándicoo tahvi Jacob nu José, jahyi da.

⁶ Ta cán nasahiin in chichoho ña naní chichoho Jacob. Ta cúu á tátuhun caxivi tá naxinu coo Jesús ñuu Sicar cán. Ta chí a váha ga nacanaá a sahá ña cán quea nasacoo a yati yuhú chichoho cán.

⁷ Ta naní íin coo a cán já naxinu in ñañáha cuéntá Samaria tavá ña ticuú ini chichoho cán. Já nacachi Jesús já xihín ñá:

—Quiahva loho ticuú ná coho i —nacachi a xihín ñá.

⁸ Jáchi sa cuahan na xíca tuun xihín á ñuu cueen na ñaha cuxu na.

⁹ Anda já nacatontó ña jáchi coo xíní táhan vaha na Israel xihín na Samaria. Ta nacachi ñá já xihín Jesús já:

—Ndá cuéntá quea xíca yóhó, da Israel, ticuú nuú i cohún ta ña Samaria va cúu yehe —nacachi ñá cán xihín Jesús.

¹⁰ Já nacachi a já xihín ñá:

—Tá ná candaa inún yo cúu yehe, da xíca ticuú nuun ta tá ná candaa inún ndá quiahva íin ña cúní Ndióxi quiahva nuun já cacún ña nuú i. Jáchi yehe cuu caja i ña ná catacún anda ama cáa quivi ta ña yóho cuu a tátuhun ticuú, do a cúu ndihi saha —nacachi Jesús.

¹¹ Anda já nacachi ñá cán já xihín á:

—Candehé ndo. Ni yáxi coo ñehe ndó tavá ndó ticuú ini chichoho yóho ta chichoho cúná ndivaha cúu ña yóho. Ndá cuu caja ri ndó quiahva ndó ticuú cáchi ndo jan nuú i.

¹² Tásáhnú jícó nde, da naní Jacob cán najándacoo chichoho yóho nuú nde. Ta nuú chichoho yóho naxihi da cán ticuú ta sa mé chichoho yóho naxihi ri jahyi da cán ta yóho naxihi ri quítí jana dá. Ama ná cuu quiahva mé ndó ticuú vaha chága a juú ga dó najándacoo Jacob nuú nde —nacachi ñá cán xihín Jesús.

¹³ Anda já nanducú ñehe Jesús tuhun nu ñá já nacachi a já:

—Ndá ñayivi nacuu va xíhi ticuú chichoho yóho já quea ichi tá ichi ini na.

¹⁴ Joo ndá na ná coho ticuú táhan dó sahan yehe, na cán cúu na a ndicó coo ga na ichi ini na anda ama cáa quivi. Jáchi cúu á tátuhun sa mé ini mé va na cana ticuú, dó a ndíhi saha ta catacu na anda ama cáa quivi —nacachi Jesús xihín ñá.

¹⁵ Anda já nacachi ñá cán já xihín Jesús:

—Quiahva mé ndó ticuú, dó coo ndíhi saha jan nuú i ña ná a íchi ga ini i ticuú já ná a quixi ga i yóho tavá i dó coho i —nacachi ñá xihín á.

¹⁶ Anda já nacachi Jesús já xihín ña:

—Cuáhán cana yíun ná quixi da yóho xuhun.

¹⁷ Anda já nanducú ñehe ñá cán tuhun nu á já nacachi ñá já:

—Coó toho yíi i.

Anda já nacachi Jesús já xihín ñá:

—Mé a ndaa coó toho yíun.

¹⁸ Joo nasahiin uhun yíun ta da íin xuhun viti jan coo cúu toho da yíun. Ndaa ndusa cáhun —nacachi Jesús.

¹⁹ Já nacachi ñá já xihín á:

—Jivi ndusa in profeta cúu mé ndó.

²⁰ Tásáhnú jícó nde, na Samaria yóho nacaja cáhnú na Ndióxi yati jini yúcu jan. Joo ndóhó, na Israel cáchi ndo ña ndúsa ndítahan nuú nde cuhun nde ñuu Jerusalén caja cáhnú nde Ndióxi. Ta mé ndó ndaja cachi ndó —nacachi ñá cán xihín Jesús.

²¹ Anda já nanducú ñehe Jesús tuhun nu ñá já nacachi a já xihín ñá:

—Xíní ñúhú candúsún ña cáhan i jáchi mé a ndaa vaxi quivi caja cáhnú ndihi ndó Ndióxi, tátá yo ndá xoo nacuu va. A cúní ñúhú ga ndó cuhun ndo jini yúcu cáa ta ni a cúní ñúhú ga ndó cuhun ndó ñuu Jerusalén caja cáhnú ndó Ndióxi.

²² Joo ndóhó, na Samaria cája cáhnú cuáa ndo Ndióxi jáchi coo xíní ndó a. Joo ndehe, na Israel xíní vaha nde yo cúu Ndióxi cája cáhnú nde. Jáchi chichi mé nde, na Israel nasacu ini Ndióxi quixi mé á jácacu ñayivi.

²³ Ta viti naxinu quivi tá ndítahan caja cáhnú ñayivi Ndióxi, tátá yo xihín ndinuhu ini na tá quiahva cúní ínimá yíi Ndióxi jáchi quiahva já cúní Ndióxi, tátá yo ña ná caja cáhnú ñayivi mé á.

24 A cuú cuni yó Ndióxi jáchi coó toho yiquí cuñu a sahá ña cán queá xíní ñuhú caja cáhnu ñayivi mé á xihín inima ná ta xihín ndiñuhu ini na —ñacachi Jesús xihín ña.

25 Anda já ñacachi tucu ña cán já:

—Sa cándaá cáxi ini i ña vaxi quivi quixi da chindahá Ndióxi cacomí a cuénta sahá ñayivi, mé da cuú Cristo. Ta tá ná quixi da cán já ndicani ndihi da nuú nde ndaja coo —ñacachi ña cán xihín Jesús.

26 Anda já ñacachi Jesús já xihín ña:

—Da cán cuú yehe, da cáhan xuhun viti —ñacachi Jesús xihín ña.

27 Ta nani cáhan Jesús xihín ña naxinu coo na xíca tuun xihín á já ñacatóntó na jáchi naxini na ndítuhún a xihín in ñañáha. Joo ni in túhún na coó nasahan ndeé ini na cuhun na ndaca tuhún ñahá ndá a cúní ña cán, á ndá saha ndítuhún a xihín ña.

28 Tá nandihí já najándacoo ña cán yoo ña ta ñaquee ña cuahan ña ñuu. Ta cán ñacasáhá cáhan ña xihín na ñuu cán já cáchi ña já xihín ná:

29 —Naha quíi ndó. Candehé ndó in dataa, da ñacahan ndihi da tá quiahva ñacaja i. Á a juú da yóho cuú Cristo, da ñacachi Ndióxi chindahá a cacomí cuénta sahá ñayivi —ñacachi ña cán xihín ná.

30 Tá nandihí já ñaqueta ndihi na cán cuahan na xihín ña nu in Jesús.

31 Joo tá cámani xinú coo na nu in Jesús já najácahan na xíca xihín á mé á ña ná cuxu a vatí loho.

32 Anda já ñacachi Jesús já xihín na xíca tuun xihín á cán:

—Sa in va ñaha cuxu u. Ta ndóhó, co xíní toho ndó ndá a queá —ñacachi Jesús xihín ná.

33 Tá nandihí já ñacasáhá na cán ndaca tuhún táhan na já cáchi na já:

—Ndá na sa ñaquixi ñehe va ñaha cuxu a —cáchi xihín táhan na.

34 Sahá ña cán queá ñacachi Jesús já xihín ná:

—Tá quiahva ndíva ha ini ñayivi tá xíxi na quiahva já ndíva ha ini i tá cája i chuun ña ñachindahá Ndióxi yehe caja i ñuyíví yóho. Ta xíní ñuhú caja i ña janda quiahva ná jáxinu coo i ña.

35 Xíní ñuhú ndiñehe ndó nuu ndó candehé ndó ñayivi jáchi cuú ná tátuhun nuú naxutu na trigo. Joo co xíní ñuhú caja ndó tá quiahva cája ñayivi tá ndáti na comí yoo jáquee na trigo. Jáchi viti ñuhú in tiaha ñayivi ndiquehe na tuhun Ndióxi.

36 Ndá na xíca chindeé ñayivi ndiquehe na tuhun Ndióxi, na cán cuú ná tátuhun na xíca jáquee trigo. Ta a cája chúun uun toho na jáchi quehe na yahvi sahá chuun cája na. Ta na ndiquehe tuhun Ndióxi cán cuú na cuhun catacu indivi anda ama cája quivi. Ta sahá na cán cavatá da naxutu xihín da najáquee.

37 Jáchi in in tuhun ta ndaa cáhan ña. Já cáchi a já: “In da xútu ta inga da jáquee jáchi cuú ndívi da da cája chúun nuú in xitoho.”

38 Ta quiahva já ñayaha xihín mé ndó jáchi yehe ñachindahá i ndohó ña ná cuhun ndó chindeé ndó ñayivi ndihvi na íchi cuénta Ndióxi vatí coó nandoho ini ndó caxi tuhun ndó tuhun Ndióxi xihín ná. Jáchi inga na ñacaxi tuhun tuhun Ndióxi xihín na cán joo ndóhó ñehe táhvi ndó chindeé ndó na ndihvi na íchi cuénta Ndióxi —ñacachi Jesús xihín na xíca tuun xihín á cán nani cámani xinú coo ñayivi ñuu cán nu á.

39 Ta cuahá ñayivi ñuu Samaria cán ñacandúsa na Jesús sahá ña ñacahan ñañáha cán xihín ná jáchi ñacachi ña cán já xihín ná: “Ñacachi mé á xihín i ndaja cája tóco ndihi ña ñacaja i.”

40 Sahá ña cán queá tá naxinu coo na Samaria cán nu in Jesús já naxíca tahvi na nu á ña ná coo chága xihín ná. Sahá ña cán queá ñacandoo Jesús ñasahin a ivi quivi xihín na cán.

41 Ta cuahá java ga na Samaria cán ñacandúsa na Jesús sahá tuhun ñacahan mé á xihín ná.

42 Já ñacachi mé na Samaria cán xihín ñañáha cán já:

—Ñacandúsa nde yohó tá ñacahún sahá Jesús nuú nde joo viti cándeé ini nde mé á jáchi naxini johó nde nu cáhan mé á. Ta viti ndusa cándúsa nde ña cuú á Cristo, mé á ñachindahá Ndióxi jácacu a ñayivi ñuyíví —ñacachi na Samaria cán xihín ña.

Tá nandaja va ha Jesús jahyi in da cája chúun cuénta gobierno

⁴³ Tá sa nayaha ivi quivi nasahin Jesús mé Samaria cán já naquee tucu a cuahan chí estado Galilea.

⁴⁴ Jáchí sa nacachi mé Jesús já: “Ni in túhún toho profeta co cája cáhnu na da ñuu da”, nacachi Jesús.

⁴⁵ Joo tá naxinu coo Jesús estado Galilea cán já nandiquehe vaha na cán mé á jáchi sa nasahan ri na cán vicó pascua ñuu Jerusalén ta cán naxini na ña náhnu nacija mé á.

⁴⁶ Anda já naxinu coo tucu Jesús ñuu Caná cuénta Galilea cán nuú nandaja mé á ticuú nanduu dó vino. Ta mé ñuu cán nasahin in dataa, da cája chúun cuénta gobierno. Ta a juú quiahva quíhvi jahyi da cándúhu dá ñuu Capernaum.

⁴⁷ Ta tá naxini johó da cán ña sa naquee Jesús estado Judea ta íin a estado Galilea viti já ndáva da nasahan da nu á já naxica tahví da nu á ña ná cuhun a vehe da ndaja vaha jahyi da jáchi sa ndicáhví da cándúhu dá.

⁴⁸ Tá nandihí já nacachi Jesús já xihín dá:
—Ndúsa caja i ña náhnu xihín ña xitúhún nu ndó já cuu candúsa ndó yehe á tá coo ta coo cúní ndó candúsa ndó yehe —nacachi Jesús.

⁴⁹ Anda já nanducú ñehe da cája chúun cuénta gobierno cán tuhun nuú Jesús já nacachi da já xihín á:

—Á a cuú caja ndó ñamaní cuhun quí ndó vehe e jáchi cúní quivi jahyi i —nacachi da xihín Jesús.

⁵⁰ Anda já nacachi Jesús já xihín dá:

—Cuáhán ndicó coo ndó vehe ndó jáchi nandivaha jahyi ndó —nacachi Jesús xihín dá.

Ta nacandúsa da cán ña nacachi Jesús xihín dá chí naquee da nandicó coo da cuanúhu dá.

⁵¹ Ta tá sa yati xinu coo da vehe da já ndáva nihni na cuú mozo da nasahan na ñehe ná da já nacachi na já xihín dá:

—Sa coo quíhvi ga jahyi ndó viti.

⁵² Anda já nandaca tuhún da cán mozo da já cáchí da já:

—Ndá hora nacasáhá nandivaha jahyi i —nacachi da xihín ná.

Já nacachi na cán já:

—Cuni tátuhun caa in sahini já nandindaa ña chícáan cáhni á da.

⁵³ Xihín ña yóho nacandaa ini da cán ña mé a ndaa nandaja vaha Jesús jahyi da jáchi mé hora cán nacachi Jesús xihín dá ña tácu tá tácu jahyi da. Sahá ña cán quea nacandúsa mé dá xihín na vehe da Jesús.

⁵⁴ Ta xihín ña yóho naxinu ivi ña xitúhún nacija Jesús estado Galilea cán anda nani naquee a Judea já nandicó coo tucu a Galilea.

5

Tá nandaja vaha Jesús in da quíhvi, da ín yuhú ticuú naní Betesda

¹ Tá nayaha ña yóho já naquee Jesús cuahan ñuu Jerusalén nu cája na Israel víco.

² Ta mé nu quíhvi johó na ñuu Jerusalén cán ín in yéhé naní yéhé ndicachi. Ta yati cán nasahin in vehe ta ín uhun yuyéhé nu quíhvi na ini a ta ini mé vehe cán ndácaan in pila cáhnu nu ñúhu ticuú ta naní a Betesda tuhun hebreo.

³ Ta ní ini mé vehe cán nacaníhni na quíhvi ndúu na. Java na cuú ná na cuaá. Java na quíhvi saha. Ta java na naxihí tuhú. Ní cán nacaníhni na ndúu na ndáti na ndicanda ticuú cán.

⁴ Jáchí ndá tañu núu táto Ndióxi ta jándicanda mé á ticuú cán. Ta ndá na ná queta nuu nu cuítí ini mé ticuú cán tá nandihí nandicanda do já ndivaha na ta coo cája toho a ndá cuehe ndóho na.

⁵ Ta tañu tóco ndihí na quíhvi nasanduu cán nasandacaan in dataa, da sa ín oco sahun uní cuía quíhvi da.

⁶ Ta tá naxini Jesús cándúhu dá tañu na quíhvi cán ta tá nacandaa ini a ña sanahá ndivaha quíhvi da já nandaca tuhún a da já nacachi a já xihín dá:

—Á ndivahún cúnun.

⁷ Anda já nanducú ñehe da cán tuhun nu á já nacachi da já:

—Coo ni in ñayivi yóho ña chindeé na yehe queta nuu i ini ticuú tá ndicanda do. Jáchí tá jacá cáhán uun i jáqueta i mí i, sa naquee vaha va inga na nuú i. Ña cán quea a cuú ndivaha i —nacachi da cán xihín Jesús.

⁸ Anda já nacachi Jesús já xihín dá:

—Cuáhán ndacoo nditivún yívun ta cuanúhún —nācachi Jesús xihín da cán.

9 Tá nācachi Jesús já chí ivi laá nandivaha da quíhvi cán já nandiquehe da yívi dá já nācasáhá da xíca da. Ta sahá ña cúu á quívi ndiquehe ndée ná

10 sahá ña cán quéa naqueta java na sacuaḥa nuú na Israel já nācachi na já xihín dá:

—Viti cúu á quívi ndiquehe ndée yo ta co ndítahan toho nuún cojún yívun caca nuún —nācachi na xihín dá.

11 Anda já nanducú ñehe da cán tuhun nu ná já nācachi da já:

—Mé da nandaja vaha yehe cán cúu da naṣahnda chuun nuú i ña ná cojo i yívi cuhún i —nācachi da cán xihín ná.

12 Já nandaca tuhún tucu na Israel cán da já nācachi na já:

—Yo já nācachi xuhún ña ná ndicojún yívun cuhún —nācachi na cán.

13 Joo da cán co xini da yo nandaja vaha ñahá jáchi tá nandaja vaha Jesús da já naquihvi nuu a cán tañu ñayivi cuḥa cán cuḥan.

14 Tá nandihí já nanditahan Jesús da cán ini veñuhu cáhnu já nācachi a já xihín dá:

—Candehé. Sa co quíhvi gaún viti. A ndícó coo gaún cajún cuāchi jáchi tiaḥva náá quixi ña ndeé chága ví ndohún —nācachi Jesús xihín dá.

15 Tá nandihí já ndáva da cán naṣahan da cáxi tuhun da nuú na Israel ña Jesús cúu ña nandaja vaha ñahá.

16 Sahá ña cán quéa nācasáhá na Israel cán cája xíxi na xihín Jesús. Ndúcú na cahní na a sahá ña cája chúun a ndája vaha mé á na quíhvi quívi ndiquehe ndée ná.

17 Anda já nācachi Jesús já xihín ná:

—Cája chúun ta cája chúun Ndióxi, tátá i sahá ña cán quéa cája chúun ta cája chúun ri yehe va —nācachi Jesús.

18 Sahá ña cán quéa ví ga ví cuni na Israel cán cahní na Jesús jáchi cáhí na co cája cáhnu a Ndióxi quívi ndiquehe ndée ná tá quiaḥva cáhí ley. Ta cuni na cahní na mé á jáchi cáhí a ña cúu á in túhún jini já jahyi Ndióxi ta xihín ña yóho ndája mé á tátuhun mé Ndióxi.

Ña cúu cája Jesús sahá ña cúu á in túhún jini já jahyi Ndióxi

19 Já nācachi Jesús já xihín na Israel cán:

—Mé a ndaa ná caḥan i xihín ndo. Yehe cúu u in túhún jini já jahyi Ndióxi ta co cája i ni in ñaha cuéntá mí i jáchi cája i ña xini i cája Ndióxi, tátá i. Ta tóco ndihí ña cája tátá i ña cán cúu ña cája ri yehe va.

20 Jáchi sahá ña quíhvi ini Ndióxi, tátá i yehe sahá ña cán quéa náha mé á nuú i ndaja táhan ñaha cája mé á. Ta janda ñaha náhnu chága ví naḥa mé á nuú i ta chí catóntó ndihí ndó tá ná cuni ndó ña.

21 Jáchi tá quiaḥva cája Ndióxi, tátá i jánditacu a ndii ña ná catacu na quiaḥva já cuu caja ri yehe jánditacu u na cuni mí i catacu.

22 Ta mé Ndióxi, tátá i co cája vii toho a sahá ñayivi. Ña nācacha mé á quéa naṣahan ñamaní nuú i, da cúu in túhún jini já jahyi mé á, ña ná caja vii i saḥa ná.

23 Já quéa ná caja cáhnu ñayivi yehe tá quiaḥva cája cáhnu na Ndióxi, tátá i. Jáchi ndá na co cája cáhnu yehe náha ña co cája cáhnu na Ndióxi, tátá i jáchi mé a cán nāchindahá yehe vaxi i.

24 'Mé a ndaa ná caḥan i xihín ndo. Ndá na táa johó vaha nu cáhan i ta cándusa na Ndióxi, mé a nāchindahá yehe quixi i, na cán cúu na catacu anda ama cáa quívi. Ta a jándoho Ndióxi ini na indayá jáchi cúu á tátuhun sa najánditacu tucu Ndióxi na.

25 Mé a ndaa ná caḥan i xihín ndo ña vaxi quívi ta cúu á tiempo viti tá na co tácu cuni johó na ña cáhan yehe, da cúu in túhún jini já jahyi Ndióxi. Ta ndá na ná ndiquehe vaha tuhun cáhan i xihín ná catacu na anda ama cáa quívi.

26 Jáchi tá quiaḥva cuu caja Ndióxi catacu ñayivi quiaḥva já nācacha mé á ña ná caja ri yehe, da cúu in túhún jini já jahyi mé á, ña ná cuu catacu ñayivi.

27 Ta naṣahan mé á ñamaní nuú i ña ná caja vii i sahá ñayivi ñuyiví jáchi yehe cúu da naquixi indivi nduu in ñayivi.

28 A catóntó ndo sahá ña cáhan i xihín ndo yóho jáchi mé a ndaa vaxi quívi tá cuni johó tóco ndihí na sa naxihí nuú caḥan i xihín ná

29 já queta na camasanto. Ta na nācacha vaha cán nditacu na ta cuhún na catacu na

anda ama cáa quivi. Ta na nacaja ña quini nditacu na ta cuhun na indayá ndoho ini na.

Náha Jesús ña in saha cája tóco ndihi ña cája

³⁰ Tóco ndihi ña cája i a juú in túhún mí i caja ña. Tá quiahva sáhdá Ndióxi, tátá i chuun nuú i ña ná caja vií i sahá ñayivi quiahva já cája vií i saha ná. Ta cája vií ndaa i saha ná jáchi co ndúcú u caja i ña cúní mí i. Ña ndúcú u caja i cúu ña cúní Ndióxi, tátá i caja i jáchi mé á nachindahá yehe quixi i.

³¹ Jáchi tá saha mí i ná caca nuu i cahan i, co nditahan ndiquehe ndó ña cahan i sahá i. Co nditahan nuú i cahan i saha mí i

³² jáchi in inga ña cahan sahá i ta ña cahan mé a cán sahá i cúu á ña ndaa.

³³ Ta mé ndó nachindahá ndo java na nasahan na ndaca tuhún na Juan sahá i. Ta ña ndaa nasacuu tóco ndihi tuhun nanducú ñehe da cán nu ndo.

³⁴ Vatí co ndátí i cándusa ndó yehe sahá ña cahan in ñayivi sahá i joo cuu cacu ndaa inima ndó tá ná candúsa ndó ña cahan Juan sahá i.

³⁵ Jáchi mé Juan, da nacaja nduta ñayivi cán nasacuu da tátuhun in íti, dó jándiyéhe nuu ndo. Joo chá tiempo cuití va nacaji ini ndó xihín tuhun nacahan da.

³⁶ In inga ña cáhnu chága a juú ga ña nacahan Juan sahá i. Ta ña cán cúu á ña náhnu xihín ña xituhún naxini ndó nacaja i. Ta ña yóho náha nu ndo yo cúu yehe ta náha ña cúu á ña ndaa ña nachindahá Ndióxi, tátá i yehe. Jáchi tóco ndihi ña cája i cúu á ña nacachi Ndióxi, tátá i xihín i caja i.

³⁷ Ta Ndióxi, tátá i, mé á nachindahá yehe náha tuhun sahá i. Joo ndóhó, co xíní johó ndó nu cahan mé á ta ni co xíní tívi ndó a.

³⁸ Ta ni coó tuhun mé á ndacaan inima ndo jáchi co cándusa ndó yehe, da nachindahá mé á quixi ñuyívi yóho.

³⁹ Vatí jácuaha vaha ndó tuhun Ndióxi sahá ña ndúcú ndo ndaja cuu catacu ndó anda ama cáa quivi joo co cándaa ini ndó ña mé tuhun Ndióxi cán cúu á ña cahan sahá yehe.

⁴⁰ Ta co cúní ndó quixi ndó nuú i já ná caja i ña ná catacu ndó anda ama cáa quivi.

⁴¹ Co ndúcú toho i ña ná caja cáhnu ndó yehe.

⁴² Sa xíní vaha i inima ndo ta cándaa ini i ña co quíhvi ini ndó Ndióxi.

⁴³ Naxinu i ñuyívi yóho cuéntá Ndióxi, tátá i ta co cúní ndó ndiquehe vaha ndó yehe. Joo tá ná quixi in da cuéntá mé dá já ndiquehe vaha ndusa ndó da.

⁴⁴ Jáchi mé ndó catóo ndó candoo vaha ndó nuú ñayivi cuití va ta co ndúcú ndó candoo vaha ndó nu Ndióxi. Sahá ña cán quea ihvi ndivaha cúu ini ndó cándeé ini ndó in túhún jiní Ndióxi.

⁴⁵ Coto a juú cahan ndo ña jácojo i cuachi jata ndo nu Ndióxi, tátá i. Mé ley nacahyí Moisés, ña cán cúu á chacaan cuachi jata ndó vatí cándeé ini ndó da.

⁴⁶ Tá ta mé a ndaa cándusa ndó ña nacahyí Moisés sanahá já quea cándusa ndó yehe jáchi sahá yehe nacahyí Moisés sanahá.

⁴⁷ Joo sahá ña co cándusa ndó ña nacahyí Moisés sahá i sahá ña cán quea co cándusa ndó ña cahan i xihín ndo —nacachi Jesús xihín na Israel cán.

6

Sáhan Jesús ña cuxu uhun mil taa

(Mt. 14:13-21; Mr. 6:30-44; Lc. 9:10-17)

¹ Tá sa nayaha tóco ndihi ña yóho já naquee Jesús cuahan inga xoo tañuhú Galilea cán. Ta mé tañuhú cán cahan tucu na xihín dó naní do Tiberias.

² Ta cuahá ndivaha ñayivi ndíco jata Jesús cuahan na jáchi naxini na ña náhnu nacaja mé á tá nandaja vaha mé á na quíhvi.

³ Tá nandihí já nandaa Jesús in xiqui ta cán nasacoo a xihín na xica tuun xihín a cán.

⁴ Ta mé tiempo já sa cáyati vicó pascua ña cája mé na Israel cán.

⁵ Ta tá nandicoto nihni Jesús já naxini a ña ndíco cuahá ñayivi jata vaxi na já nacachi a já xihín Felipe:

—Ndájá cájún cuéntá cohó cueen nahá yo ña cuxu tóco ndihi ñayivi yóho —nacachi Jesús xihín dá.

⁶ Nacachi Jesús ña yóho xihín Felipe jáchi cúní a cuni a ndía cachi da cán xihín á. Jáchi sa xíní vaha Jesús ndaa quea caja ña ná cuxu ndihi na cán.

⁷ Andá já nanducú ñehe Felipe tuhun nuú Jesús já nacachi da já xihín á:

—Ni ivi ciento denario ná cañehé, a quéta toho ña cán cueén pan ná quiahva in yuhú in yuhú cuxu in in ñayivi ndúu yóho — nacachi da cán xihín Jesús.

⁸ Andá já nacahan Andrés, da cúu in táhan na xica tuun xihín Jesús, da cúu ñani Simón Pedro. Já nacachi da já xihín Jesús:

⁹ —Yóho in in taa loho ta ñehe da uhun pan cebada xihín ivi tiyacá. Joo ama ná queta ri ña yóho cuxu tóco ndihi ñayivi jan —nacachi Andrés xihín Jesús.

¹⁰ Andá já nacachi Jesús já:

—Cahan ndó xihín ná ña ná cacoo na.

Andá já nasacoo ndihi na cán. Ta a juú quiahva ndató nasahnu yucu nuú nasacoo tátuhun uhun mil taa.

¹¹ Tá nandihí já natiin Jesús pan cán já nandiquiahva ndixahvi nu Ndióxi. Ta tá nandihí já nasahan ña nuú na xica tuun xihín á ta nandicahnda na ña nuú na ndúu coo cán. Ta quiahva já nacaja ri a xihín tiyacá va. Ta naxixi ndihi na janda quiahva nachutú tixi na.

¹² Ta tá nandihí já nacachi Jesús já xihín na xica tuun xihín á cán:

—Jánditaca ndó tóco ndihi ña nacandoo jan já ná a tíví ña —nacachi Jesús xihín ná.

¹³ Sahá ña cán quéa najánditaca na ña ta najándicutú na uxu ivi toyicá xihín ña nacandoo.

¹⁴ Tá naxini ndihi ñayivi cán ña xituhún nacaja Jesús yóho já nacasáhá cáchí xihín táhan na já:

—Jivi ndusa da yóho cúu profeta nacachi Ndióxi chindahá a ñuyíví yóho —cáchí xihín táhan na.

¹⁵ Joo naquee Jesús cuahan in túhún mé á coo a yucu jáchí xini mé á ña nducú ñayivi cañehe ndúsa na mé á jáchí cúní na ndaja na mé á rey nu ná.

*Tá naxica sahá Jesús nuú tañuhú
(Mt. 14:22-27; Mr. 6:45-52)*

¹⁶ Tá sa nacuaá já nanuu na xica tuun xihín Jesús xiquí cán cuahan chí yuhú tañuhú cán.

¹⁷ Ta chí sa nacanaá vaha va ta coo Jesús xinu coo nu ndúu na sahá ña cán quéa nandaa na jatá in barco ta nacasáhá na

jándicaca na do jáchí cúní na cuhun na ñuu Capernaum.

¹⁸ Ta ndaja coo nacasáhá ndícojo ticuú nuú tañuhú cán jáchí nacasáhá xícó in tachí ndeé ndivaha.

¹⁹ Ta tá sa nacaxicá na uhun á ñu kilometro cuahan na xihín barco cán nuú ticuú já naxini na xica sahá Jesús cuahan nuú ticuú já cáyati a nu barco cándójó na cán. Andá já nacasáhá yíhví na ndúu na.

²⁰ Ta tá naxinu coo Jesús nu ná já nacachi a já xihín ná:

—A cáyíhví toho ndó jáchí yehe va cúu u —nacachi a xihín ná.

²¹ Andá já cávatá na najándaa na a jata barco. Ta ivi laá sa naxinu coo na nuú cuahan na.

Ndinducú ñayivi Jesús

²² Tá nativi inga quiví itaan já nacasáhá ñayivi ndinducú na Jesús jáchí naxini na ña coo nandaa toho a in túhún barco nasahin cán xihín na xica tuun xihín a jáchí mé cuítí na cán sa nandaa cuahan.

²³ Ta nani ndúu na yuhú tañuhú yati nuú nandaja cuaha Jesús pan tá nandihí nandiquiahva mé á ndixahvi nu Ndióxi cán já naxinu coo java barco, dó naquixi chí ñuu Tiberias.

²⁴ Ta sahá ña coo nanditahan na Jesús sahá ña cán quéa nandaa na barco cán já naquee na cuahan na ñuu Capernaum ndinducú ñahá na.

Jesús cúu á tátuhun pan xixi ñayivi já tácu na

²⁵ Tá naxinu coo na cán inga xoo tañuhú já nanditahan na Jesús. Ta nacasáhá ndaca tuhún na mé á já cáchí na já:

—Maestro, ndá hora naxinu coo ndó yóho —nacachi na xihín á.

²⁶ Andá já nacachi Jesús já xihín ná:

—Mé a ndaa ná cahan i xihín ndo. Xica ndó ndinducú ndó yehe joo coo cúu á sahá ña nacandaa ini ndó yo cúu yehe. Sahá ña nahnu nacaja i tá nasahan i ña naxixi ndó janda nachutú tixi ndó sahá ña cán quéa ndinducú ndó yehe.

²⁷ Co ndítahan ndihi nahá ini ndó sahá ña cuxu ndó ñuyíví yóho. Ña ndítahan caja ndó quéa ndinducú ndó ndá quiahva catacu ndó anda ama cáa quivi. Jáchí yehe cúu

da n̄achindahá Ndióxi nduu ñayivi ta cuu caja i ña ná catacu ndó anda ama cáa quivi. Jáchí Ndióxi, tátá i náha ña mé a ndaa n̄acaxi a yehe caja i chuun yóho —n̄acachi Jesús xihín na cán.

²⁸ Anda já n̄acachi na cán já xihín á:

—Ndía ndítahan nuú nde caja nde já ná jáxinu coo nde ña cuni Ndióxi —n̄acachi na xihín Jesús.

²⁹ Já n̄acachi Jesús já xihín ná:

—Ña cuni Ndióxi caja ndó quea ná candúsa ndó yehe, da n̄achindahá mé á ñuyívi yóho.

³⁰ Anda já n̄acachi tucu na cán já xihín á:

—Ndá ñaha xituhún chága cuu caja ndó nuú nde viti ña ná cuni nde ña já ná cuu candúsa nde ndohó. Ndá a náhnu quea cuu caja ndó.

³¹ Jáchí mé tásáhnu jícó nde n̄axixi na pan tá n̄axica na yucú íchí nu coo ndúu ñayivi cán. Já cáhí tuhun Ndióxi já: “N̄axixi na pan ña n̄aquixi indivi n̄acaja Moisés” —n̄acachi na cán xihín Jesús.

³² Já n̄acachi Jesús já xihín ná:

—Mé a ndaa ná cahan i xihín ndo. A juú toho Moisés cúu da nasahan pan ña n̄aquixi indivi nu ná. Jáchí Ndióxi, tátá i cúu ndusa ña nasahan pan n̄aquixi indivi nu ná. Ta viti cuni Ndióxi quiahva in ñaha vaha chága nu ndo a juú ga ña nasahan Moisés nuú na cán sanahá.

³³ Jáchí yehe cúu u tátuhun pan ña nanuu indivi n̄acaja Ndióxi ña ná cuu catacu ñayivi anda ama cáa quivi —n̄acachi Jesús xihín na cán.

³⁴ Anda já n̄acachi na cán já xihín á:

—Nini quivi quiahva ndó táhan pan jan nuú nde, xitoho.

³⁵ Já n̄acachi Jesús já xihín ná:

—Yehe cúu u tátuhun mé pan jan. Tá ná ndiquehe ñayivi yehe já ndivaha ini na ta cúu á tátuhun a cuico ga na. Ta ndá na cándúsa na mí i já cúu á tátuhun a íchí ga ini na ticuí.

³⁶ Joo cúu á tá quiahva n̄acachi i xihín ndo: coo cándúsa toho ndó yehe vatí xini ndó yehe.

³⁷ Joo tóco ndihi na vaxi nuú i cája Ndióxi, na cán cúu na cándúsa yehe. Ta ndá na

cándúsa yehe, na cán coo táxi i na ña ná quee na cun na.

³⁸ Jáchí vatí nanuu i indivi nu in Ndióxi joo coo n̄aquixi i caja i ña cuni mí i. Vaxi i caja i ña cuni Ndióxi, tátá i jáchí mé á n̄achindahá yehe.

³⁹ Ta ña cuni Ndióxi quea ña ná a quiahva i ñamaní ndihi sahá na nasahan mé á nuú i. Ña cuni mé á quea ná jánditacu u tóco ndihi na tá ná xinu coo quivi nu ndíhí.

⁴⁰ Ña cuni Ndióxi quea ná catacu ñayivi, na cándeé ini yehe anda ama cáa quivi. Ta yehe, da cúu in tühún jini já jahyi mé á jánditacu u na quivi nu ndíhí cuí —n̄acachi Jesús.

⁴¹ Anda já n̄acasáhá na Israel cán cahan núu na sahá Jesús jáchí sa n̄acachi a ña cúu á tátuhun pan ta n̄acachi a ña nanuu a chí indivi.

⁴² Ta já n̄acachi xihín táhan na cán já:

—Á a juú jahyi José va cúu Jesús yóho. Ta xini vaha va mí yo cúu náná da xihín tátá da. Ta ndá cuéntá quea cáhí ri da ña n̄aquixi da chí indivi, dá já —n̄acachi xihín táhan na cán.

⁴³ Anda já n̄acachi Jesús já xihín ná:

—A cahan núu ga ndó sahá i.

⁴⁴ Jáchí jácahan Ndióxi, tátá i, ñayivi ña ná candúsa na yehe. Ta ni in tühún toho ñayivi a cúu candúsa na yehe tá ta coo jácahan Ndióxi inima ná, mé á n̄achindahá yehe. Ta na cán cúu na jánditacu u quivi nu ndíhí.

⁴⁵ Já n̄acahyí na profeta sanahá: “Jánaha Ndióxi tóco ndihi ñayivi.” Ña cán quea tóco ndihi ñayivi, na xini joho nu cahan Ndióxi ta cája na ña jánaha mé á nu ná, na cán cúu na vaxi nuú i.

⁴⁶ Joo a juú cahan ndo ña cuu cuni java ñayivi Ndióxi, tátá i. Jáchí yehe, da n̄achindahá mé á ñuyívi yóho, cúu in tühún da xini ñahá.

⁴⁷ Mé a ndaa ná cahan i xihín ndo. Ndá na cándeé ini yehe, na cán cúu na catacu anda ama cáa quivi.

⁴⁸ Jáchí yehe cúu u tátuhun pan ña cuu caja ña ná catacu na.

⁴⁹ Sa xini ndó tásáhnu jícó ndo n̄axixi na pan yucú íchí sanahá joo n̄axihí tá n̄axihí na.

⁵⁰ Joo yehe cúu u tátuhun pan ña nanuu chí indiví já quea ndá na cándusa yehe cúu ná tátuhun na xíxi pan ta já a quívi na. Jáchi tá ná cuxu na pan quiahva i nu ná já quea catacu na anda ama cáa quívi.

⁵¹ Yehe cúu u tátuhun mé pan xíxi na. Nanuu i indiví ta a cúu ndihi sahá i. Ta jivi mé yiquí cuñu i cúu á tátuhun pan xíxi na yóho ta vaxi quívi ndiquiahva i ña nu ná já ná cuu cacu ndaa ínima ná. Ta tá ná cuxu na ña já catacu na anda ama cáa quívi — nācachi Jesús.

⁵² Anda já nācasáhá na Israel cán ndítuhún cuehe xihín táhan na já nācachi na já:

—Cáchi da yóho ña cúu yiquí cuñu da tátuhun pan xíxi ñayivi. Ndaja cuu caja ri da quiahva da ña nu yo cuxú —cáchi xihín táhan na.

⁵³ Anda já nācachi Jesús já xihín ná:

—Mé a ndaa ná cahan i xihín ndo. A cuu catacu ndó anda ama cáa quívi tá ta co cándusa ndó yehe. Ta tá cándusa ndó yehe cúu á tátuhun xíxi ndó yiquí cuñu i ta cúu á tátuhun xíxi ndó ñi i.

⁵⁴ Ndá na xíxi na yiquí cuñu i ta xíxi na ñi i, na cán cúu na cacu ndaa ínima ná ta jánditacu u na quívi nu ndihí.

⁵⁵ Jáchi yiquí cuñu i cúu ndusa tátuhun in ñaha vaha ndivaha cuxu na ta ñi i cúu dó tátuhun in dó vaha xíxi na.

⁵⁶ Ndá na ná ndiquehe vaha yehe cúu á tátuhun ndiquehe vaha na in pan cuxu na ta cúu á tátuhun ndiquehe na ticuú xíxi na. Já quea in nduu na xihín i ta já in nduu ri yehe va xihín mé ná.

⁵⁷ Ta sahá ña tácu Ndióxi, tátá i, mé a nāchindahá yehe sahá ña cán quea tácu ri yehe va cája mé á. Quiahva já yaha ri xihín ñayivi jáchi tá ná ndiquehe vaha na yehe já catacu na caja i.

⁵⁸ Jáchi yehe cúu u ndusa tátuhun pan ña nanuu indiví. Ta co cúu á tátuhun ña nayaha xihín tásahnu jíco ndo tá naxixi na pan naní maná yucú íchi cán jáchi tá nāndihi naxihí tá naxihí na cán. Joo ndá na cándeé ini yehe cúu ná tátuhun na xíxi pan ña nāquixi indiví. Ta na cán catacu na anda ama cáa quívi —nācachi Jesús.

⁵⁹ Tóco ndihi ña yóho najánaḥa Jesús nu ná ini veñuhu ñuu Capernaum cán.

Cuu catacu ñayivi anda ama cáa quívi tá ná candee ini na Jesús

⁶⁰ Ta cuahá táhan na xíca xihín Jesús cán tá naxini johu na ña nācahan mé á já nācasáhá cáhan núu na sahá já cáchi na já:

—Yáncá ndivaha candúsa í tuhun cáhan Jesús yóho. A cúu toho caja í xihín á — nācachi na cán.

⁶¹ Tá naxini Jesús ña cáhvi núu ini na xíca xihín a cán já nācasáhá cáchi a já xihín ná:

—Ndihihvi ndó sahá tuhun nācahan i yóho.

⁶² Ndaja ga ví ndihihvi ndó tá ná cuni ndó yehe ndaa i cūhun i indiví nuú nāshāin i jáchi yehe cúu u da nāchindahá Ndióxi nduu ñayivi.

⁶³ Nācahan Ndióxi in ínima nuú in in ñayivi ña ná chindeé a na ndinducú na mé á. Joo yiquí cuñu ñayivi co chindeé toho a na ndinducú na mé á. Ta tóco ndihi ña nācahan i xihín ndo cúu á ña cuu xinu in ínima ndo ña ná catacu ndó anda ama cáa quívi.

⁶⁴ Joo ndúu java ndó cámaní yíi candúsa ndó ña cáhan i xihín ndo —nācachi a.

Nācachi Jesús ña yóho jáchi sa xini mé á anda saha ndá na cúu na co cándusa ñahá. Ta sa xini Jesús ndá da cúu da jíco túhún ñahá.

⁶⁵ Anda já nācachi tucu a já:

—Sahá ña cán quea cáchi i xihín ndó ña ni in túhún toho ñayivi a cuu candúsa na yehe tá co jácahan Ndióxi ínima ná —nācachi Jesús.

⁶⁶ Tá nācachi Jesús ña yóho já quea cuaha táhan na nāxajica xihín a cán nājāndacoo na mé á ta chí co nāxēen ga na caca nuu na xihín á.

⁶⁷ Anda já nāndaḥa tuhún Jesús ndihuxu ivi na xíca tuun xihín a cán já nācachi a já xihín ná:

—Á cūhun ri ndóhó va cūni ndo —nācachi a.

⁶⁸ Anda já nānducú ñehe Simón Pedro tuhun nuú Jesús já nācachi da já:

—Candehé ndo, xitoho i. Yo nuú ga cuu cūhun nde. Tuhun cáhan ndó xihín nde caja ña ná cūhun nde catacu nde anda ama cáa quívi tá ná candúsa nde ña.

⁶⁹ Ta ndeḥe sa nācandúsa va nde ndohó. Ta sa xini vaha nde ña cúu ndó Cristo, ña in

túhún jini já jahyi Ndióxi, ña tácu indivi — ñacachi Pedro cán xihín Jesús.

⁷⁰ Anda já ñacachi Jesús já:

—Mé a ndaa ñacaxi i ndihuxu ivi ndó ña ná caca tuun ndó xihín i. Ta vatí ñacaxi i ndihi ndó joo in táhan ndó cúú dá cuéntá tiñahá sacuaḥa —ñacachi Jesús.

⁷¹ Ñacachi Jesús ña yóho saḥa Judas, jahyi Simón Iscariote jáchi mé Judas cán cúú dá da jicó túhún ñahá chága chí nuu vatí cúú dá in táhan da uxu ivi na xíca tuun xihín Jesús cán.

7

Có cuni na cúú ñani Jesús candúsa na mé á

¹ Tá nayaha ña yóho já ñaxíca nuu Jesús tá ñuu tá ñuu estado Galilea cán. Coó ñaxeen ga cuhun a chí Judea jáchi cán ñacasáhá na ndúcú na mé á cahní na a.

² Joo sahá ña ñacayati víco tá ndúu ñayivi vehe tiyahvá válí cája na Israel

³ sahá ña cán quea ñacachi java ñani Jesús já xihín á:

—Ndía cájún coún yóho. Cuáhán chí Judea já ná cuni na xíca xuhun cán ndaja ndaa ña náhnu cájún.

⁴ Jáchi tá cuni in dataa naḥa da ña náhnu cája da já quea co ndácoo jehé toho da cája da ña. Tá ta mé a ndaa cájún ña náhnu já quea xini ñúhú cajún ña já ná cuni ní cúú ñayivi ndaja náhnu ñaha cájún —ñacachi ñani Jesús xihín á.

⁵ Ñacachi na cán ña yóho jáchi ni mé ñani a cán coó ñacandúsa ñahá.

⁶ Anda já ñacachi Jesús xihín na cán já:

—Cámaní yí ndindaa hora cuhun i. Ta vaḥa ri ndóhó ndá hora ñacuu va cuu cuhun ndó jan.

⁷ Jáchi ñayivi cája ña núu ñuyíví yóho a cuu candají toho na ndóhó joo candají na yehe jáchi cáxí táhyí cáhan i xihín ná ña cája na ña núu.

⁸ Cuáhán mé ndó víco tá cuni ndó cuhun ndo jáchi yehe a cuhun toho i jáchi cámaní yí xinu hora cuhun i —ñacachi a.

⁹ Ña yóho ñacachi Jesús xihín ñani a. Ta ñacandoo mé á estado Galilea cán.

Tá ñaxinu coo Jesús víco vehe tiyahvá cán

¹⁰ Joo tá ñandihí ñaquee ñani Jesús cán cuahan na víco já ñaquee ri Jesús cuahan

mé víco cán. Joo coó ñaxeen a naḥa tívi a mé á nuú ñayivi.

¹¹ Ta mé na sacuaḥa nuú na Israel cán ñacasáhá na ndúcú na Jesús: “Ndá xíca nuu da tañu víco cán”, cáhán na.

¹² Ta jandá johó ndítúhún yaá ñayivi saḥá Jesús xíca nuu na víco cán. Java na cáhí na saḥá Jesús ña cúú dá taa cája vaḥa. Ta java na cáhí na: “Co cúú toho da ta vaḥa jáchi xíca nuu cuití da jándahvi da ñayivi”, cáhí na.

¹³ Joo ni in na co sahan ndeé ini caḥan saḥá nuú na sacuaḥa nuú na Israel cán jáchi yíhví ñahá na.

¹⁴ Ta tá ñatahvi java víco cán já ñaquihvi Jesús ini veñuhu cáhnu ñuu Jerusalén cán já ñacasáhá jánaḥa nuú ñayivi.

¹⁵ Ta tá xini johó na Israel cán nu caḥan Jesús chí catóntó na já ñacasáhá ndáca tuhún táhan na já cáhí na já:

—Ndájá ñacatihva naḥá da yóho ña jánaḥa da nu yo jáchi a juú da ñaxíca jácuaha cúú dá —ñacachi xihín táhan na cán.

¹⁶ Anda já ñacachi Jesús já xihín ná:

—Ña jánaḥa i nu ndo yóho co cúú á ña ñaquixi jini mí i jáchi cúú á ña quíxi nu Ndióxi, tátá i, mé á ñachindahá yehe.

¹⁷ Ta tá mé a ndaa sácú ini ndó cája ndó ña cuni Ndióxi já quea cuu candaa ini ndó á cáhan i cuéntá Ndióxi, á cáhan i cuéntá mí cuití vi.

¹⁸ Jáchi ndá na cáhan cuéntá mé ná já quea ndúcú na ña ná cája cáhnu ñayivi na. Joo ndá na ndúcú ña ná ndicáhnu mé á ñachindahá ñahá cán, na cán cúú ndusa na cáhan ña ndaa ta co cája na ña co ndítahan nu ná cája na.

¹⁹ Mé a ndaa najándacoo Moisés ley nu ndo joo ni in túhún ndo co cája ndó ña cáhí a. Ta viti cuni ndó cahní ndó yehe —ñacachi Jesús.

²⁰ Anda já ñanducú ñehe na cán tuhun nu á já ñacachi na já:

—Rí quini va ndácaan ini yóhó jáchi ni in túhún toho na co ndúcú cahní yohó —ñacachi na cán.

²¹ Anda já ñacachi Jesús já xihín ná:

—Chí catóntó ndivaḥa ndó saḥá in túhún ña cáhnu ñacaja i quívi ndíquehe ndéé yo.

²² Joo candehé ndo. Moisés cúú da ñasahnda chuun nu táshnu jicó yo ña ná

chicaan na marca yiquí cuñu na vatí a juú Moisés natavá sahá, vaha. Mé tásáhnú jícó yo natavá sahá ta mé ndó chícāan tá chícāan ndó marca yiquí cuñu ta valí vatí cúú á quiví ndíquehe ndée yo.

²³ Ta viti cáchí ndo xihín i ndaja cáa ri ña yóho. Mé ndó chícāan ndó marca yiquí cuñu da valí vatí cúú á quiví ndíquehe ndée yo jáchi co cúní ndó yaha nuú ña nasahnda Moisés nu ndó. Ta viti xójo ini ndó xihín i sahá ña nandaja vaha i in níi yiquí cuñu in dataa quiví ndíquehe ndée yo. Ndaja cáa ri ña jan cáa já.

²⁴ Mé ndó ndaja nacuu cáhan núu ndó sahá ñayivi ta co ndítahan toho caja ndó já. Jáchi ndítahan nu ndó candaā ini ndó ña cúú ña ndaa —nacachi Jesús xihín na cán.

Ndícani Jesús ndáchí naquixi a

²⁵ Ta java na ñuu Jerusalén nacasáhá ndáca tuhún táhan na já cáchí na já:

—Á a juú da yóho cúú da xíca na ndúcú na cahní na.

²⁶ Nu ndíhi na cándichi da jánaḥa da ta ni in na co ndáa cúú da. Á tá coó ta janda na jutixia cáa cándúsa na ña cúú dá Cristo, da nachindahá Ndióxi cacomí a cuéntá sahá ñayivi.

²⁷ Joo mí xíní vaha í ndá ñuu naquixi da yóho ña cán quéa xíní yo ña co cúú toho da Cristo jáchi tá ná quixi ndusa Cristo cán ni in na a cándaā ini ndá ñuu quixi da —nacachi na cán cáhan na sahá Jesús.

²⁸ Ta nani jánaḥa Jesús ini veñuhu cáhnu cán já nacasáhá cáhan cóhó a já nacachi a já:

—Mé a ndaa xíní vaha ndó yehe ta xíní ndó ndá ñuu naquixi i. Joo coó vaxi yehe cuéntá mí i. Mé Ndióxi nachindahá yehe vaxi i, mé a cán cája ña ndaa. Joo mé ndó co xíní toho ndó a.

²⁹ Yehe xíní vaha i yo cúú mé á jáchi naquixi i nu íin mé á ta nachindahá mé á yehe vaxi i —nacachi a.

³⁰ Anda já ndúcú na tiin na Jesús chicaoan na a vecaa joo ni in na coó nasahan ndee ini tiin ñahá jáchi cámaní yíi ndindaa hora tiin na a.

³¹ Ta cuaha táhan ñayivi naxini johu nuú nacahan Jesús cán nacandúsa na mé á ta já cáchí na já:

—Á a juú da yóho cúú Cristo jáchi tá ná quixi inga da ama ná caja da ñaha xitúhún chága a juú ga da yóho —nacachi na.

Ndúcú na fariseo chicaoan na Jesús vecaa

³² Tá naxini johu na fariseo ña cáhan núu ñayivi sahá Jesús já nandindeé ini na ta nandindeé ini ri na sacuahá nuú jutú cán chí nachindahá na java soldado cuéntá veñuhu cáhnu cán ña ná tiin na Jesús chicaoan na a vecaa.

³³ Anda já nacachi tucu Jesús já:

—Chá tiempo cuití va coo tóo i xihín ndo ñuyiví yóho jáchi tá nandihí já cuhun tucu u nu íin mé á nachindahá yehe.

³⁴ Anda jáví caca nuu ndó ndinducú ndó yehe joo a ndítahan ndó yehe jáchi a cúu cuhun ndó nuú coo i —nacachi Jesús.

³⁵ Tá naxini johu na Israel cán ña nacachi Jesús já nacasáhá ndáca tuhún táhan na já cáchí na já:

—Ta ndáchí já cuhun ri da yóho ña cáchí da ña a cúu ndítahan í da. Á cuhun xíca da ñuu na tóho nu ndúu na Israel ña ná jánaḥa da nuú na griego.

³⁶ Ndiá cúní cachi da xihín yó tá nacachi da ña ndinducú yó da ta a ndítahan toho í da. Jáchi nacachi da xihín yó ña a cúu coho nuú coo da —nacachi xihín táhan na cán jáchi coó nacandaā ini na ña nacachi Jesús xihín ná.

Jesús cúú á tátuhun yuta ticuúí

³⁷ Ta mé quiví nu ndíhí víco cán nasacuu a quiví cáhnu chága nuú na Israel. Ta mé quiví cán nandaça ndíchi Jesús já nacayuhú a já nacachi a já:

—Ndá ndó íchi ini ticuúí, naha ndó nuú i já ná caja i ña ná ndivaha ini ndó.

³⁸ Jáchi já nacaḥyí a nuú tuhun Ndióxi: “Ndá na ná candeé ini yehe, ini mé ínimá ná cana tátuhun yuta ticuúí, dó caja ña ná catacu na” —nacachi Jesús xihín na cán.

³⁹ Ña cúní Jesús cachi a xihín na yóho quéa tá ná candeé ini na mé á já xinu quiví ndiquehe na ínimá yíi Ndióxi ini ínimá ná. Vatí mé a ndaa a ñaha toho xinu ínimá yíi Ndióxi ini ñayivi jáchi cámaní yíi va ndindita Jesús ndicáhnú ndivaha mé á indiví.

Sa jín sa jín ñaha cáhan ñayivi sahá Jesús

⁴⁰ Java na ndúu tañu ñayivi cuaha cán tá naxini johó na ña yóho já nacasáhá cáchí na já:

—Jivi ndusa da yóho cúu profeta nacachi Ndióxi chindahá a ñuyívi yóho —cáchí na.

⁴¹ Ta java na cáchí na sahá Jesús ña cúu á Cristo, da nachindahá Ndióxi cacomí cuéntá sahá ñayivi. Ta java na cáchí na ña a juú toho a jáchí cáhán na ña a cúu toho quixi Cristo estado Galilea.

⁴² Jáchí cáchí tuhun Ndióxi ña tá ná quixi Cristo ñuyívi yóho cacuu da da quixi chichi David, da nasacomí cuéntá sahá ñayivi Israel sanahá. Ta cáchí tuhun Ndióxi ña cacu da cán ñuu Belén nuú nacacu mé David cán.

⁴³ Ta chí nacasáhá na sáhdá java táhan na sahá ña coó nandique táhan tuhun na saha Jesús.

⁴⁴ Ta java na cúni na tiin na a ña ná cañehe ñahá na cuhun a vecaa. Joo ni in na coó natiin ñahá.

Có cúni na jutixia candúsa na Jesús

⁴⁵ Tá nandihí já nandicó coo soldado cuéntá veñuhu cán nu ndúu na fariseo xihín na sacuahá nuú jutú cán joo coó Jesús ñéhe na ná casaa na. Já nacasáhá na ndúu cán ndáca tuhún ñahá na já cáchí na já:

—Ndá cuéntá quéa coó natiin ndó da —nacachi na cán xihín soldado.

⁴⁶ Anda já nanducú ñehe soldado cán tuhun nu ná já cáchí da já xihín ná:

—Nacatóntó nde naxini johó nde nu cáhan da jáchí ñúchí ndivaha cáhan da ta ni in túhún na coó nacahan tá quiahva cáhan mé dá —nacachi soldado cán.

⁴⁷ Já nacachi na fariseo já xihín dá:

—Á jári ndóhó va najándahvi da jan viti.

⁴⁸ Jáchí janda ni in túhún toho táhan na sacuahá ndúu tañu mé nde coo cándúsa nde da jan. Ta ni in na fariseo coo cándúsa na nu cáhan Jesús jan.

⁴⁹ Joo cháhan va vaxi jatá ñayivi cándeé ini Jesús jan jáchí coo xini na ña cáchí ley Moisés —nacachi na fariseo xihín soldado.

⁵⁰ Anda já nandicahan Nicodemo, da cúu in táhan na fariseo cán, mé dá nasahan da nandituhún xihín Jesús in ñuu. Já nacachi da já xihín na java ga cán:

⁵¹ —Cáchí ley ña a cúu tiin in ta ta já chican ndaja nacuú da vecaa. Ña cáchí

ley quéa ndítahan cuni johó í nuú cáhan da já ná canda iní ndaja cáa ña nacaja da —nacachi Nicodemo.

⁵² Anda já nacaja cuehe na xihín Nicodemo já nacachi na já xihín dá:

—Á da Galilea cúu ri yóhó va. Cuáhán cahvi vaha tuhun Ndióxi já cunún ña coo cána ni in profeta estado Galilea —nacachi na xihín Nicodemo.

⁵³ Tá nandihí já nandicuita nuu ndihí na cán cuánúhu ná vehe na.

8

Cája cánu ini Jesús sahá in ñáñáha

¹ Ta ndaja coo naquee Jesús cuahan chí yucu yitó olivo.

² Ta tá nativi inga quivi itaan já nandicó coo tucu a veñuhu cánu cán. Ta tá nacayati ñayivi nu á já nasaco a ta nacasáhá jánaha nu ná.

³ Ta ndaja coo na jánaha ley Moisés xihín na fariseo ñéhe na in ñáñáha nasaa na nu á. Mé ñáñáha cán nanditahan na ña mé hora cándúhu ña xihín in dataa, da coo cúu yi ña. Ta já ñéhe na ña nasacu ndichi na ña nuú na ndúu cán.

⁴ Já nacachi na já xihín Jesús:

—Candehé ndo Maestro. Nanditahan nde ñáñáha yóho cándúhu ña xihín in dataa, da coo cúu yi ña.

⁵ Ta nu ley najándacoo Moisés nuú nde táhdá chuun ña ná cuun nde yuu najihí cája já. Ta mé ndó ndía cachi ndó —nacachi na.

⁶ Nacachi na cán já xihín Jesús jáchí cúni na coto ndojó cuití ñahá na ta cúni na ñehe iní na jácojo na cuachi jatá Jesús. Tá nandihí já nasaco Jesús já nacasáhá cáhyí a nu ñúhu cán xihín nducu ndáha á.

⁷ Ta sahá ña ndúcú ndéé na cán ndáca tuhún ñahá na nandaca ndichi Jesús já nacachi a já xihín ná:

—Ndá ndó, na coo nacaja cuachi jácana jihna ñúhú ndó yuú jata ña —nacachi a xihín ná.

⁸ Já nasaco tucu a cáhyí a nu ñúhu cán xihín nducu ndáha á.

⁹ Ta tá naxini johó tóco ndihí na cán ña nacachi Jesús já nacasáhá na cácan nuu ná ta tá in tá in na nacasáhá quéé na cuahan na. Ta jihna ñúhú ga na yatá

naçasáhá quée cuahan já ndíco na yúta chága cuahan na. Ta tá sa naquee ndihi na cuahan na já nacandoo mé Jesús xihín ñá cán.

¹⁰ Anda já nandaca ndichi a ta nandaca tuhún a ña já nacachi a já xihín ñá:

—Ndáchí cuahan na jácojo cuachi jatun. Á coó ga na jácojo cuachi jatun viti — nacachi Jesús xihín ña.

¹¹ Anda já nacachi ñá cán já xihín Jesús:

—Mé a ndaa coó ga na.

Anda já nacachi Jesús já:

—Ta ni yehe a chicaan i cuachi jatun. Cuánuhu vehún ta a cája gaún cuachi — nacachi a.

Jesús cúú á tátuhun ñúhu ña jándiyéhe ínimá ñayivi

¹² Já naçasáhá tucu Jesús cáhan xihín ñayivi já cáchí a já xihín ná:

—Yehe cúú u tátuhun ñúhu ña jándiyéhe ínimá ñayivi ta ndá na cándéé ini yehe cúú á tátuhun a cáca ga na nuú naá. Jáchi jándiyéhe e nu ná ta cája i ña ná catacu na anda ama cáa quivi.

¹³ Anda já nacachi na fariseo já:

—Saha mé vún cáhun ta xihín ña jan náhún ña cúnun ndíñehe jícun mún. Ta xihín ña jan náha ña co cáhun ña ndaa — nacachi na.

¹⁴ Anda já nacachi Jesús já xihín ná:

—Tóco ndihi ña cáhan i saha mí i cúú á ña ndaa ta ín sahá vatí mí i cáhan i ña. Jáchi xini vaha i ndá naquixi i ta xini vaha i ndá cuhun i. Joo ndóhó, co xini toho ndó ndá naquixi i ta co xini toho ndó ndá cuhun i.

¹⁵ Mé ndó cátóo ndó cándehé ndaa ndó ñayivi tá quiahva cája ñayivi ñuyivi. Joo yehe co cája toho i já.

¹⁶ Joo tá ná caja vií i sahá ñayivi, caja i ña tá quiahva ndítahan caja i jáchi cája i ña ndaa. Ta a juú in tuhún yehe caja vií saha ná jáchi Ndióxi, tátá i, mé a nachindahá yehe, mé á cán quéea caja vií saha ná xihín mí i.

¹⁷ Nu ley mé ndó cáchí a ña tá in nuú cáhan ivi ñayivi sahá ña nayaha já náha ña cúú á ña ndaa.

¹⁸ Ta viti cuni johó ndó jáchi quiahva já yaha ri xihín yehe va. Jáchi yehe cúú in testigo ta cáhan i saha mí i. Ta inga testigo

cúú Ndióxi, tátá i, mé a nachindahá yehe — nacachi Jesús xihín ná.

¹⁹ Anda já nandaca tuhún na Jesús já cáchí na já xihín á:

—Ndájá ín tátún jan — nacachi na.

Anda já nacachi Jesús já:

—Tá ná cuni ndó yo cúú yehe já cuu canda ri ini ndó yo cúú tátá i. Joo co xini ndo yo cúú yehe ta cáchí ga ví tátá i co xini ndó a — nacachi Jesús.

²⁰ Tóco ndihi ña yóho nacachi Jesús xihín ná nani jánaha ini veñuhu cáhnu yati nuú nasahin sato ndée jiuhún jóco na cán. Joo ni in na coó nasahan ndeé ini tiin ñaha chicaan vecaa jáchi coó nasahan Ndióxi ñamaní sahá ña cámaní yí ndindaa hora tiin na mé á.

Cáhan Jesús xihín ñayivi ña a cúú toho cuhun na nuú cuhun mé á

²¹ Anda já naçasáhá tucu Jesús cáchí a já xihín ná:

—Vaxi quivi quee yehe cuhun i. Ta caca nuu ndó ndinducú ndó yehe joo a ndíñehe ndó yehe jáchi cája tá cája ndó cuachi janda quiahva xinu quivi quivi ndó. Ta sahá ña cán quéea a cúú cuhun ndó nuú cuhun yehe cán — nacachi Jesús.

²² Anda já naçasáhá na Israel cán ndítuhún xihín táhan na já cáchí na já:

—Á cahní da yóho mé dá cuni da ña cán quéea cáchí da xihín yo ña a cúú toho caja í cohó nuú cuhun da — cáchí na.

²³ Já nacachi tucu Jesús já:

—Mé ndó cúú ndó ñayivi ndúu ñuyivi yóho joo yehe cúú u da naquixi chí indivi. Mé ndó cúú ndó cuéntá ñuyivi yóho joo yehe co cúú toho i cuéntá ñuyivi yóho.

²⁴ Saha ña cán quéea nacachi i xihín ndó ña caja ndó cuachi janda quiahva xinu quivi quivi ndó. Jáchi tá co cándusa ndó ña cúú yehe da cáchí i cúú u, da nachindahá Ndióxi, já quéea quivi ndó sahá cuachi ndó — nacachi Jesús.

²⁵ Anda já nandaca tuhún na cán Jesús já nacachi na já xihín á:

—Ta ndá da cúú yóhó, dá já — nacachi na.

Já nacachi Jesús já:

—Janda sahá va nacahan i xihín ndó yo cúú yehe.

26 Ta ña xini johō i cáhan mé á nāchindahá yehe, ña cán cúu ña cáhan i xihín ñayivi ñuyívi. Ta ndinuhu ña ndaa quéa cáhan mé á. Ta mé a ndaa íin cuahá ndivaha ña núu cája ndó ta cuu tavá i sahá nu ndó tá ná caja vií i saha ndo —nācachi Jesús.

27 Joo cóo nācandaa ini na ña cáhan Jesús saha Ndióxi, tátá a tá nācachi a já xihín ná.

28 Sahá ña cán quéa nācachi tucu a já xihín ná:

—Tá nandihí ná cata caa ndó yehe, da nāchindahá Ndióxi nduu ñayivi ndica crúxu já quéa candaā ndusa ini ndó ña yehe cúu u da cáhí i cúu u. Ta ni in túhún ñaha có cája i cuéntá mí i. Ta ña jánaha i nu ndo cúu ña najánaha Ndióxi, tátá i nuú i.

29 Ta mé á nāchindahá yehe có najándacoo ndáha toho a yehe jáchi íin tuun Ndióxi, tátá i xihín i. Ta ní tiempo ña cája i cúu ña cáji ini Ndióxi xihín —nācachi Jesús.

30 Ta chí cuahá ñayivi nācandúsa na Jesús tá naxini johō na tóco ndihí ña yóho.

Nā ndúu ndáha rí quini xihín nā ndúu ndáha Ndióxi

31 Anda já nācahan Jesús xihín java na Israel, na sa nācandúsa ñahá cán já nācachi a já xihín ná:

—Tá ná caja ndó tá íin nācahan i xihín ndo já naha ndó ña mé a ndaa táhyí cúu ndó na cuéntá mí i.

32 Ta já candaā ini ndó ña ndaa ta ña cán caja ña ná a cácuu ga ndó tátuhun in mozo, da ndúu ndáha rí quini —nācachi Jesús.

33 Anda já nācachi na cán já xihín á:

—Na nāquixi chichi Abraham cúu nde. Ta janda ni in túhún tañu cóo nācacu nde mozo. Joo yóhó cáhún xihín nde ña a cácuu ga nde mozo. Ndaja cáa ña cáa rí a já —nācachi na.

34 Já nācachi Jesús já xihín ná:

—Mé a ndaa ná cahan i xihín ndo. Tóco ndihí na sá caja cuachi cúu tá cúu na tátuhun mozo nuú cuachi jáchi cómi a cuéntá saha ná.

35 Ta da cúu mozo nuú in xitoho, cóo saha dá coo nahá da xihín xitoho da jáchi vaxi quivi ndítahan quee da cuhun da. Joo da cúu jáhyi mé da cúu xitoho cán íin saha dá

coo nahá da xihín tátá da jáchi cúu dá da vehe tátá da.

36 Ta quiahva já íin xihín yehe, da cúu jáhyi Ndióxi. Cája i ña ná a cácomí ga cuachi cuéntá saha ndo ta já a cácuu ga ndó tátuhun mozo nuú cuachi cája ndó.

37 Ta sa candaā vaha ini i ña cúu ndó ñayivi nāquixi chichi Abraham. Joo mé ndó cúní ndó cahní ndó yehe jáchi có cúní ndó ndiquehe vaha ndó tuhun cáhan i.

38 Cáhan i saha tóco ndihí ña nanaha Ndióxi, tátá i nuú i. Joo ndóhó cája ndó ña cáhan tátá ndo xihín ndó —nācachi Jesús.

39 Anda já nācachi na cán já xihín á:

—Abraham cúu tátá nde jáchi chichi da cán nāquixi nde —nācachi na.

Já nācachi Jesús já xihín ná:

—Tá jivi ndusa cúu ndó na nāquixi chichi Abraham já quéa caja ndó tá quiahva nācacha da cán, nduu.

40 Joo ndúcú ndó cahní ndó yehe jáchi cáhan i ña ndaa xihín ndo tá cáhí i ña najánaha Ndióxi nuú i. Mé Abraham cóo nācacha toho da já.

41 Joo cája ndó ña núu tá quiahva cája tátá ndo —nācachi Jesús.

Já nācachi na cán já xihín á:

—A juú jáhyi ndáhví toho ñayivi cúu ndehe. Ndióxi cúu ndusa tátá nde —nācachi na.

42 Já nācachi Jesús já:

—Tá Ndióxi ndusa ná cacuu tátá ndo ta quihvi ini va ndó yehe, nduu. Jáchi Ndióxi nāchindahá yehe vaxi i ta íin i yóho viti. Cóo vaxi toho i cuéntá mí i. Ndióxi quéa nāchindahá yehe vaxi i.

43 Joo có candaā ini ndó tóco ndihí ña ndicani i nu ndo ta cúu á sahá ña có cúní ndó cuni johō ndó nu cáhan i xihín ndo.

44 Tátá ndo cúu tiñáhá sacuaaha ta cája ndó ña cúní rí cán jáchi ñúhu ndó ndáha rí. Ta rí sáhní ndii cúu rí cán janda mé saha. Ta ni in túhún tañu cóo nātiin rí ña ndaa já cahan rí ña. Jáchi cáhan rí ña tuhún cuití va ta cuéntá mé rí quixi ndihí ña tuhún.

45 Candehé ndo. Có cúní ndó candúsa ndó yehe jáchi cáhan i ña ndaa xihín ndó.

46 Ni in túhún toho ndó a cúu naha nuú ñayivi ña íin cuachi i. Ta tá cáhan i ña ndaa cuití va xihín ndó ndá cuéntá quéa có candaā ndó yehe, dá já.

⁴⁷ Jáchí ndá na cúu ndusa cuéntá Ndióxi taa johó na ña cúu tuhun Ndióxi. Joo náha cáxi a ña co cúu ndó cuéntá Ndióxi jáchi co cuni ndó cuni johó ndó nu cáhan mé á xihín ndó —ñacachi Jesús.

Janda tá cámaní cacu Abraham sa ín va Jesús

⁴⁸ Anda já nacanahá na Israel xihín Jesús já ñacachi na já:

—Mé a ndaa cúun in da Samaria ta ndácaan rí quini inún —ñacachi na.

⁴⁹ Anda já ñacachi Jesús já xihín ná:

—Coó toho rí quini ndácaan ínima yehe. Ña cája i quea cája cáhnu i Ndióxi, tátá i. Joo quehe núu ndivaha ndó yehe.

⁵⁰ Co cuni toho i ña ná caja cáhnu ndó yehe vatí mé a ndaa cuni Ndióxi ña ná caja cáhnu ndó yehe. Ta mé a cán quea caja vii saha ndó.

⁵¹ Mé a ndaa ná cahan i xihín ndó. Ndá na ná caja ña cáhan i yóho, na cán catacu na anda ama cáa quivi —ñacachi Jesús.

⁵² Já nanducú ñehe na cán tuhun nu á já ñacachi na já xihín á:

—Viti ndusa cándaá ini nde ña ndácaan rí quini inún jáchi cáhún ña tá ná caja nde ña cáhún já quea catacu nde anda ama cáa quivi. Joo xini vaha nde ña naxihí tá naxihí Abraham, tásáhnu jícó nde ta jári na profeta nasanduu sanahá naxihí na.

⁵³ Á cáhnu chága yóho a juú ga Abraham, da nasacuu tásáhnu jícó nde, dá já. Mé Abraham naxihí da ta jári mé na profeta naxihí ri na cán va. Á cájún cuéntá ña cúun da cáhnu chága a juú ga na cán, dá já —ñacachi na xihín Jesús.

⁵⁴ Já ñacachi Jesús já xihín ná:

—Tá ná caja cáhnu i mí i, coó saha toho ña cája i. Joo Ndióxi, tátá i jándicáhnu a yehe. Ta jári mé ndó cáhí ndó ña jivi mé a cán cúu Ndióxi cája cáhnu ndó.

⁵⁵ Joo co xini toho ndó yo cúu mé á. Yehe xini yo cúu mé á. Tá ná cachi i ña co xini toho i mé á, cúu u in da tuhún tátuhun mé ndó. Joo mé a ndaa xini vaha i yo cúu Ndióxi ta cája i ña cáhí mé á.

⁵⁶ Ta mé Abraham, da nasacuu tásáhnu jícó ndó nacajii ín da jáchi ñañehe dá tuhun ña quixi yehe ñuyiví yóho. Ta a juú

quiahva nacajii ini da tá naxini da ña yóho —ñacachi Jesús.

⁵⁷ Anda já canahá chága na Israel xihín á já ñacachi na já xihín á:

—Ni ivi jícó uxu cuia co ndácaan yóho viti. Ta ndaja cúu cáhún naxinún Abraham, da cúu tásáhnu jícó nde —ñacachi na.

⁵⁸ Já nanducú ñehe Jesús tuhun nu ná já ñacachi a já xihín ná:

—Mé a ndaa ná cahan i xihín ndó. Janda tá cámaní cacu Abraham sa ín va yehe jáchi cúu u Ndióxi —ñacachi Jesús.

⁵⁹ Anda já natiin na Israel cán yuu ña janí na jatá. Joo nandacoo jehé Jesús já nayaha tañu na cán ta naquee a veñuhu cáhnu cán cuahan.

9

Caja Jesús ña ná ndinuna nuú in dataa nacacu cuáa

¹ In tañu tá xica Jesús cuahan já naxini a in dataa, da nacacu cuáa.

² Anda já nacasahá na xica tuun xihín Jesús cán ndaca tuhún na mé á sahá da cuáa cán já cáhí na já xihín á:

—Maestro, ndá cuéntá quea nacacu cuáa da yóho. Á nacacu cuáa da sahá cuachi nacaja tátá da á náná da. Á nacacu cuáa da sahá cuachi nacaja mé dá —ñacachi na.

³ Já nanducú ñehe Jesús tuhun nu ná já ñacachi a já xihín ná:

—Coó nacacu cuáa toho da yóho sahá cuachi mé dá ta ni sahá cuachi tátá da á náná da. Nacacu cuáa da já ná nahá i nuú ñayivi ndá quiahva náhnu ñaha cúu cája Ndióxi.

⁴ Jáchi ndítahan caja i chuun, ña nachindahá tátá i caja i nani xica nuu i ñuyiví yóho. Ta cúu á tátuhun ndiví táhyí cúu á viti joo vaxi quivi a coo ga i caja i ña yóho ta já cacuu a tátuhun nacuaá ndivaha. Ta mé tiempo já ni in na a cúu caja chúun.

⁵ Nani ín tóo i ñuyiví yóho cúu á tátuhun jándiyéhe mí i nuú na ndúu ñuyiví yóho —ñacachi Jesús.

⁶ Tá nandihí ñacachi Jesús ña yóho já naxihnu a tójí a nu ñúhu. Ta xihín tójí a cán nacavaha in mbohla loho ndahyi ta nachindaa mé á ña nduchú núu da cuáa cán.

7 Tá nandihí já n̄acachi a já xih̄in dá:

—Cuáhán ch̄icoḥo naní Siloé ta cán cuchún nuún —n̄acachi Jesús xih̄in dá. Mé tuhun Siloé yóho cún̄i cachi a: D̄a n̄achindahá n̄a.

And̄a já n̄aquee mé d̄a cuaá cán n̄asahan d̄a n̄achichí nuú d̄a ta tá n̄andicó coo d̄a cán sa s̄andehé va da n̄acasaa d̄a.

8 Ta ndaja coo java n̄a cúu ñani táhan da xih̄in java n̄a n̄axini ña s̄ati d̄a cán tá n̄axini na ña s̄andehé tucu da já n̄acachi na xih̄in táhan na já:

—Á a juú d̄a yóho cúu d̄a d̄a cuaá s̄aco s̄ati yuhú ích̄i —cáchi xih̄in táhan na.

9 Ta já cáchi java na já:

—Jivi d̄a jan cúu dá.

Ta java na cáchi n̄a:

—A juú toho d̄a jan cúu dá vatí quiahva já cáa da —n̄acachi na.

Joo mé d̄a n̄asah̄in cuaá cán cáhan da xih̄in ná já cáchi d̄a já:

—Jivi yeḥe cúu d̄a n̄asacuu d̄a cuaá cán —cáchi d̄a.

10 And̄a já n̄acasáhá n̄a ndáca tuhún na d̄a já cáchi n̄a já xih̄in dá:

—Ndaja n̄acajún nanuná nuun —cáchi na.

11 Já n̄acachi d̄a cán já:

—Da naní Jesús cúu d̄a n̄acavaha in mbohla loho ndahȳi. Ta n̄achindaa da ña nuú i ta n̄acachi da xih̄in i ña ná cuhun i cuchú nuú i ch̄icoḥo naní Siloé. Ta já n̄asahan i n̄achichí nuú i cán ta xih̄in ña yóho nanuná nuú i. S̄andehé e viti —n̄acachi da.

12 Já n̄andaca tuhún tucu n̄a cán d̄a já cáchi n̄a já:

—Ta ndájá cuahan d̄a n̄andaja vaha yohó viti —n̄acachi na.

—Co x̄in̄i toho i —n̄acachi da xih̄in ná.

Ndaja ndich̄i n̄a fariseo d̄a cuaá, d̄a n̄andivaha cán

13 Tá nandihí ndáca na d̄a n̄asacuu da cuaá cán n̄asahan d̄a nuú n̄a fariseo

14 jách̄i n̄asacuu a quiv̄i ndiquehe ndée n̄a tá n̄andaja vaha Jesús d̄a cuaá cán xih̄in mbohla loho ndahȳi n̄achindaa a nuú d̄a cán.

15 Já n̄andaca tuhún n̄a fariseo cán d̄a ndá quiahva nanuná nuú dá s̄andehé da

viti. Já n̄anducú ñeḥe da tuhun nu ná já n̄acachi da já xih̄in ná:

—N̄achindaa da ndahȳi nuú i ta n̄achichí nuú i ta viti tívi nuú i s̄andehé e —n̄acachi da xih̄in ná.

16 Joo java n̄a fariseo n̄acachi na xih̄in da n̄asacuu d̄a cuaá cán já:

—Da n̄andaja vaha yohó coo vaxi toho da cuénta Ndióxi jách̄i co cája cáhnu da quiv̄i ndiquehe ndée yo —n̄acachi na.

Joo já cáchi java n̄a fariseo já:

—Tá d̄a cája cuachi ná cacuu Jesús jan ta a cúu caja da ñaha xituhún nahá tátuhun ña yóho, nduu —n̄acachi java na.

Chí coo n̄acuu ndique táhan vaha tuhun n̄a fariseo cán sahá ña cán quéa n̄asahnda táhan ndaja táhan mé va na.

17 Já n̄acasáhá ndáca tuhún tucu na d̄a n̄asacuu d̄a cuaá cán já cáchi n̄a já xih̄in dá:

—Ta viti nanuná nuun n̄acaja d̄a jan. Yo já cúu dá cáchún —n̄acachi na.

Já n̄anducú ñeḥe da tuhun nu ná já n̄acachi da já xih̄in ná:

—Yeḥe cáchi i ña cúu dá in profeta —n̄acachi da.

18 Joo coo n̄axeen n̄a Israel cán candúsa na ña n̄asacuu d̄a d̄a cuaá ta ni co candúsa na ña nanuná nuú dá. Sahá ña cán quéa n̄asahan n̄a nacana na tátá náná d̄a.

19 Ta já n̄andaca tuhún n̄a tátá d̄a xih̄in náná d̄a já n̄acachi na já xih̄in ná:

—Á jahȳi ndó cúu d̄a yóho. Á mé a ndaa sa já cuaá já cáa d̄a n̄acacu da. Ta ndá cuénta quéa sa tívi nuú dá viti —n̄acachi na.

20 And̄a já n̄anducú ñeḥe n̄a cán tuhun nuú n̄a Israel cán já n̄acachi na já xih̄in ná:

—Cándaa cáxi ini nde ña jahȳi nde cúu d̄a yóho. Ta x̄in̄i vaha nde ña n̄acacu cuaá d̄a.

21 Joo co x̄in̄i nde ndaja n̄acuu nanuná nuú dá s̄andehé da viti. Ta ni co x̄in̄i nde yo cúu d̄a nasuná nuú dá. Jan ín mé jahȳi nde. N̄andaca tuhún ndó mé dá. Sa quiahva cahan mé d̄a jan xih̄in ndo cúu á jách̄i a juú d̄a loho ga cúu dá jan —n̄acachi tátá d̄a n̄asacuu d̄a cuaá cán xih̄in n̄a Israel cán.

22 N̄acachi na ña yóho jách̄i yíhv̄i n̄a ña ná a quiahva ga n̄a Israel cán ñaman̄i nu ná ndihvi na veñuhu. Jách̄i mé n̄a Israel cán najándique táhan na tuhun na ña a quiahva ga n̄a ñaman̄i nuú ñayivi quihvi

na ini veñuhu tá ta cáhan na ña cúú Jesús da ñachindahá Ndióxi cacomí cuénta sahá ñayivi.

²³ Sahá ña cán quea ñacachi tátá náná da ñasacuu da cuaá cán xihín na Israel ña ndítahan ndaca tuhún na mé dá jáchi a juú ga da loho cúú da jan.

²⁴ Tá nandihí já ñacana tucu na Israel da ñasacuu da cuaá cán já ñacachi na já xihín dá:

—Xíní ñúhú caja cáhnún Ndióxi ta a caja cáhnún Jesús jan jáchi xíní vaha nde ña cúú dá in da caja cuachi —ñacachi na.

²⁵ Anda já ñacachi da cán já xihín na Israel:

—Co xíní toho i á cúú dá da caja cuachi á cúú dá da co caja cuachi. Ña xíní ndusa i quea ñasacuu u da cuaá ta jivi da jan ñasuná nuú i sándehe e viti —ñacachi da xihín ná.

²⁶ Anda já ñacasáhá ndaca tuhún tucu na da já cáchi na já xihín dá:

—Ta ndaja ñacaja da ñasuná da nduchú núún. Ndía ñacaja da xuhún —ñacachi na xihín dá.

²⁷ Anda já ñacachi da ñasacuu da cuaá cán já xihín ná:

—Sa ñacachi vi xihín ndo ndá quiahva ñacaja da ñasuná da nuú i. Joo co cúni ndó candúsa ndó yehe. Ndá cuénta quea ndaca tuhún tucu ndó yehe. Á cuhún ri ndóhó va caca nuu ndó xihín dá cúni ndo, vaha —ñacachi da xihín ná.

²⁸ Já ñacasáhá na Israel cán cáhahá na xihín dá ta já ñacachi na já xihín dá:

—Yóhó va cúú da xíca nuu xihín da jan. Joo ndehe jácuaha nde ley Moisés cuití va.

²⁹ Jáchi cándaqa vaha ini nde ña ñacahan Ndióxi xihín Moisés. Joo mé Jesús jan co cúú dá cuénta Ndióxi ta ni co xíní nde ndájá ñaquixi da jan —ñacachi na xihín da ñasacuu da cuaá cán.

³⁰ Anda já ñacachi tucu da cán já xihín ná:

—Mé a ndaa catóntó vi xihín ña yóho jáchi jivi Jesús jan ñasuná da nuú i ta ndóhó ni co cándaqa ini ndó ndá da cúú dá ta ni co xíní ndo ndájá ñaquixi da.

³¹ Sa xíní yo ña co xíní johó Ndióxi ña xíca tahví ñayivi caja cuachi nu á. Joo xíní johó

mé á nu cáhan ñayivi tá caja cáhnu na mé á ta tá caja na ña cúni a.

³² Ta viti candehé ndo. Janda saha ñuyiví a ñaha cuni johó í ña ndícuná in dataa nduchú núú in da ñacacu cuaá.

³³ Ta Jesús yóho a cúú toho caja cuná a nuú i tá ta co cúú á ña ñaquixi cuénta Ndióxi —ñacachi da.

³⁴ Anda já nanducú ñehe na cán tuhún nu dá já ñacachi na já xihín dá:

—Anda tá ñacacún ñachutú ndaún xihín cuachi. Ta viti chí cúni ri yóhó jáñahún ndehe —ñacachi na Israel cán xihín dá.

Anda já nataxí na da veñuhu cán.

Ñayivi, na sándehe cúú ná tátuhun na co tívi nuu

³⁵ Tá nandihí já ñacandaqa ini Jesús ña nataxí na da ñasacuu da cuaá cán veñuhu. Ta tá nandítahan tucu Jesús da já ñacachi a já xihín dá:

—Á cándee inún da ñachindahá Ndióxi nduu ñayivi —ñacachi Jesús xihín dá.

³⁶ Já ñacachi da já xihín á:

—Cachi ndó xihín i yo já cúú dá ña ná cuu candee ini i da —ñacachi da.

³⁷ Anda já ñacachi Jesús já xihín dá:

—Sa ñaxini vún yehe ta jivi yehe, da cáhan xuhún yóho cúú da ñachindahá Ndióxi nduu ñayivi —ñacachi Jesús.

³⁸ Ta tá ñacachi Jesús ña yóho já ñacaxítí da cán nu á caja cáhnu da a já ñacachi da já xihín á:

—Mé a ndaa cándee ini i ndohó, xitoho i —ñacachi da.

³⁹ Anda já ñacachi tucu Jesús já xihín dá:

—Yehe ñaquixi i ñuyiví yóho já ná ñaha i nuú ñayivi ndá quiahva ndáa ña caja na. Jáchi ndá na cándee ini yehe cúú ná tátuhun na sa nandiyehé nuu. Joo ndá na cáhán ña cúú ná na sa nandiyehé nuu cúú ná tátuhun na cuaá —ñacachi Jesús.

⁴⁰ Ta java na fariseo, na ndíta xihín Jesús cán tá ñaxini johó na ña yóho já nandaca tuhún na mé á já cáchi na já:

—Á co cáhún ña cúú ri ndehe va na cuaá —ñacachi na.

⁴¹ Anda já ñacachi Jesús já xihín ná:

—Tá ná ndicuni ndó ña cúú ndó tátuhun na cuaá ta coo toho cuachi ndó, nduu. Joo tá cáchi ndó ña tívi vaha ndivaha nuu ndo

ta cō xíní ñúhú ndó in na jánaha ndohó sahá ña cán quéa ín tá ín cuachi ndó — ñacachi Jesús xihín ná.

10

Jesús cúú á tátuhun in da ndáá ndicachi

¹ Andá já ñacachi Jesús já:

—Mé a ndaa ná cahan i xihín ndo. Tá ná quihvi in dataa ini in corra nu ñúhu ndicachi joo cō cúni da quihvi da chí yéhe nu quihvi mé rí ta ña cája da quéa ndáva ndojó da corra ri já náha xicá a ña cúú dá da cuíhná.

² Joo mé da quihvi chí yéhe cúú dá da ndáá ndicachi.

³ Ta mé da ndáá yéhe corra nu ñúhu ndicachi cán súna da yéhe ña ná ndihvi da ndáá ndicachi ta jácana da rí cán tá quivi in in rí. Ta mé ndicachi cán ndícuni rí tachí dá já quéta rí cuahan rí caca nuu rí xihín dá.

⁴ Ta tá sa ñaqueta ndihi rí já ndáca da ri. Ta cánuú da nu ri cuahan da já vaha cuahan rí xihín dá jáchi ndícuni vaha rí tachí dá.

⁵ Joo cō ndícō rí jatá ñayivi tóho jáchi cō ndícuni rí tachí ná jáchi cúú ná na tóho. Ña cája rí quéa xínu rí nu ná —ñacachi Jesús xihín na fariseo.

⁶ Ta ña yóho ñasacuu in quiahva ñasacu Jesús nuú na fariseo joo cō ñacandaa ini na ña cúni mé á cachi a xihín ná.

⁷ Andá já ñacachi tucu Jesús já xihín ná:

—Mé a ndaa ná cahan i xihín ndo. Yehe cúú u tátuhun in yéhe nu yáha ndicachi já ndihvi rí corra ri.

⁸ Tóco ndihi na ñaquixi tá cámani xinu i ñuyiví yóho najándahvi na ñayivi ta cúú ná tátuhun na cuíhná. Joo cōó naxeen na cúú cuéntá mí i, na cúú tátuhun ndicachi taa johó na nu cáhan na cán.

⁹ Yehe cúú u tátuhun in yéhe ta ndá na ná quixi nuú i quiahva i ñamani nu ná quihvi na já ná cacu ndaa ínima ná. Cúú á tátuhun núná nuú ndicachi quihvi rí ini corra ri ta núná nuú rí queta tucu rí jáchi ín yucu cuí nu ri xixáhan rí.

¹⁰ Jáchi da cúú da cuíhná cán cája cuíhná da ri ta sáhní da ri ta jándihi da saha ri. Joo yehe ñaquixi i ñuyiví yóho já ná cuu catacu vaha ñayivi ta já ná cuu coo vaha na anda ama cáa quivi.

¹¹ Yehe cúú u tátuhun in da ndáá vaha ndicachi. Jáchi da cán cō yíhví da quivi da sahá ndicachi jana dá.

¹² Joo da quéhe yahvi sahá ña ndáá da ndicachi, ndáá da ri saha yahvi quéhe da cán cuití va. Sahá ña cán quéa tá xíní da vaxi ndivahyí quehe rí in ndicachi, ña cája da quéa xínu da cuahan da ta jándacoo da ndicachi ndáhví cán. Jáchi cō cúú dá da ndáá vaha rí ta ni jana dá cō cúú ndicachi cán. Ta cō sáhní da mé dá tá ná xinu coo ndivahyí ña ná tiin rí ndicachi cán cata nuu ñahá ri.

¹³ Da quéhe yahvi cán jándacoo da ri jáchi cō cúú rí jana mé dá ta cō sáhní da mé dá cúú ndicachi.

¹⁴ Joo yehe cúú u tátuhun in da ndáá vaha ndicachi. Tá quiahva xíní vaha da cán ndá rí cúú ndicachi jana dá quiahva já xíní vaha i ndá na cúú cuéntá mí i. Ta jári xíní vaha mé ná yehe.

¹⁵ Tá quiahva xíní vaha Ndióxi, tátá i yehe ta xíní vaha i mé á quiahva já xíní vaha i na cúú cuéntá mí i. Ta sahá ña yóho ín tiahva i ndiquiahva i mí i quivi i saha ná jáchi cúú ná tátuhun ndicachi jana i.

¹⁶ Joo ndúu java ga ñayivi inga ñuu ta cacuu na cuéntá mí i. Xíní ñúhú ndiquehe e na cán ña ná cuni johó na nu cáhan i. Ta in nduu ndihi na ña ná candaa i tóco ndihi na.

¹⁷ Quihvi ini Ndióxi, tátá i yehe jáchi ndiquiahva i mí i quivi i sahá na cúú cuéntá mí i ta tá ñandihí nditacu tucu u.

¹⁸ Ta ni in na a cúu cahní yehe ndaja ñacuu joo ndiquiahva i mí i quivi i jáchi cúni caja i ña. Núná nuú i ndiquiahva i mí i quivi i ta núná nuú i nditacu tucu u. Ña yóho cúú chuun ñasahnda tátá i nuú i caja i — ñacachi Jesús.

¹⁹ Tá ñaxini johó na Israel cán ña yóho já ñacasáhá na sáhní táhan tucu na.

²⁰ Ta cuaha táhan na cán ñacasáhá cáchí na já:

—Ndá cuéntá quéa táa johó ndó nu cáhan da jan ta da ñacatachi va cúú dá. Tiñahá va ndácaan ini da —cáchí xihín táhan na.

²¹ Joo java na cáhan vaha na sahá Jesús já cáchí na já:

—Ni in toho ñayivi a cúu cahan vaha nahá tátuhun cáhan Jesús yóho tá ndácaan

tiñáhá ini ínima ná. Jáchi ama ná cuu caja ri tiñáhá jándiyehē rí nuú nā cuaá —cáchi java nā cán.

Cándaji na Israel Jesús

²² Naxinu coo quivi cája na víco nu cuía ñuu Jerusalén tá cája cáhnu na quivi naxinu veñuhu cáhnu ñuu Jerusalén. Ta mé tiempo vixi nasacuu a cán.

²³ Ta jivi ini mé veñuhu cáhnu cán nasahin Jesús ta xíca nuu a yati yuyehé naní Salomón.

²⁴ Já nacava tiyivi na Israel cán mé á já nacasáhá ndáca tuhún nā mé á já nacachi na já xihin á:

—Ndaja cáa chí quivi caxi tuhun ndaun xihin nde ña á jivi ndusa cúun Cristo, da chindahá Ndióxi cacomí cuéntá sahá ñayivi. Jáchi in ivi johó cáhun xíní nde ta co cándaa vaha ini nde á jivún á a juú tohún —nacachi nā cán.

²⁵ Anda já nanducú ñehe Jesús tuhun nu ná já nacachi a já:

—Sa nacahan vi xihin ndó joo coo nacandúsa ndó yehē. Tóco ndihi ña náhnu cája i, cája i ña xihin ndée sahan tátá i nuú i ta jivi mé ña náhnu jan náha nu ndó ña cúu u da nachindahá Ndióxi.

²⁶ Joo ndóhó co cándúsa ndó yehē jáchi co cúu ndó tátuhun ndicachi janá i.

²⁷ Joo ñayivi, nā cúu tátuhun ndicachi janá i, nā cán cúu nā ndícuni nu cáhan i ta ndícuni i nā ña cúu ná cuéntá mí i ta já ndíco nā yehē.

²⁸ Ta caja i ña ná catacu na anda ama cáa quivi já ná a ndíhi saha ná. Ta ni in túhún ñayivi a cúu caja candaa nā cán ndahá i tá sa ñúhu na ndahá i.

²⁹ Ndióxi, tátá i nasahan nā cán nuú i ta mé á quéa cáhnu chága nu tóco ndihi ñaha. Ta ni in na a cúu caja candaa nā cán ndáha mé á.

³⁰ Yehē xihin Ndióxi, tátá i in cúu va nde —nacachi Jesús.

³¹ Anda já natiin tucu nā Israel cán yuu cuun na Jesús ña cahni ñahá nā.

³² Anda já nacachi Jesús já xihin ná:

—Cuahá ndivaha ña náhnu nacaja i nu ndó, ña nasahan tátá i ñamaní nuú i caja i nu ndo yóho ta viti cachi ndó xihin i ndá quéa co táhan ini ndó xihin. Ndá

cuéntá quéa vaxi ndó cuun ndó yuu yehē —nacachi Jesús.

³³ Anda já nacachi nā cán já xihin á:

—Co ndúcú toho nde cuun nde yuu yohó sahá ña náhnu cájún. Cuun nde yuu yohó cúni nde jáchi ndája núun Ndióxi. Jáchi cúun in taá tátuhun ndehē ta ndájún mún cúun Ndióxi —nacachi nā cán.

³⁴ Anda já nacachi Jesús já xihin ná:

—Nu ley najandacoo Moisés nu ndo cáchi a ña cúu ñayivi tátuhun Ndióxi sahá ña cúu ná jahyi mé á.

³⁵ Ta sa cándaa vaha ini ña a cuú tahnu ña cáhan tuhun Ndióxi. Ta nacachi Ndióxi xihin nā nandiquehe tuhun mé á ña cúu ná tátuhun Ndióxi.

³⁶ Sahá ña cán quéa ndá cuéntá quéa cáchi ndo ña nandaja núu i Ndióxi sahá ña cáchi i cúu u in túhún jini já jahyi Ndióxi. Jáchi mé Ndióxi nacaxi a yehē ta nachindahá a yehē vaxi i ñuyivi yóho.

³⁷ Sahá ña cán quéa co ndítahan candúsa ndó yehē tá ta co cája i ña náhnu tátuhun ña cája Ndióxi, tátá i.

³⁸ Joo tá cája i ña já quéa xíní ñúhú candúsa ndó ña náhnu xíní ndo cája i vatí co cúni ndó candúsa ndó yehē. Ta xihin ña yóho cuu candúsa ndó ña in cúu Ndióxi, tátá i xihin i ta in cúu yehē xihin mé á —nacachi Jesús.

³⁹ Anda já ndúcú tucu na tiin na a chicaan nā a vecaa joo nachijehé a nu ná cuahan.

⁴⁰ Ta já naquee tucu a cuahan chí inga xoo yuta Jordán nuú nacaja ndúta Juan ñayivi nu cuítí cán. Ta nacandoo Jesús nasahin a cán.

⁴¹ Ta cuahá ñayivi nacasáhá nā xínu na nu á ta já cáchi xihin táhan na já:

—Mé a ndaa coo toho ñaha xitúhún nacaja Juan. Joo tóco ndihi ña nacachi da cán saha Jesús yóho cúu á ña ndaa —nacachi xihin táhan nā cán.

⁴² Ta cuaha ná nacandúsa na Jesús mé nuú nasahin a cán.

11

Tá najánditacu Jesús Lázaro

¹ Ta ndaja coo naquehe cuehe in da naní Lázaro, da ñuu Betania. Ta jivi mé ñuu yóho cúu ri ñuu María xihín Marta, quihvi ña.

² Mé María, ñá cúu quiahva Lázaro yóho cúu ñá ñá naxojo perfume jatá sahá Jesús ta najándihichi ñá do xihín ijí jini ña.

³ Ta mé ñá xihín quihvi ña nachindahá na chuun cuahan nuú Jesús ña cácahvi ndivaha Lázaro, da quihvi ini mé á.

⁴ Ta tá nañehe Jesús tuhun yóho já nacachi a já:

—A juú cuehe cahní ñahá cúu toho ña yóho. Joo xihín cuehe yóho cuu nahá ndá quiahva cáhnu cúu Ndióxi. Ta xihín ña yóho nahá nuú ñayivi ndá quiahva cáhnu cúu yehe, da cúu in túhún jini já jahyi Ndióxi — nacachi a.

⁵ Ta ndaja coo quihvi ndivaha ini Jesús Marta xihín quihvi ña ta quiahva já quihvi ri ini a Lázaro viti.

⁶ Joo tá nañehe Jesús tuhun ña quihvi Lázaro já nacandoo a ivi quivi chága mé nuú nasahin a cán.

⁷ Ta tá nandihí já nacachi Jesús já xihín na xica tuun xihín á:

—Xihín ndo ná cohó tucú chí Judea — nacachi a.

⁸ Anda já nacachi na cán já xihín á:

—Maestro, viti chá va ndúcú ñayivi ndúu cán cahní na ndohó xihín yuu ta cáa tucu ri ndó cuhun ndo cúni ndo — nacachi na.

⁹ Joo sa xini Jesús ña cámaní xinú quivi quivi a sahá ña cán queá nacachi a já xihín ná:

—Candehé ndó. Uxu ivi hora ndáca in quivi ta tá xica nuu na ndivi a cúu toho cachihin saha ná jáchi tívi xicá yehe nu xica na.

¹⁰ Joo ndá na xica nuu ñuú cuu cachihin saha ná jáchi co yehe nu xica na — nacachi Jesús.

¹¹ Tá nandihí já nacachi tucu a já xihín ná:

—Sa naquiji va amigo yo Lázaro viti. Joo vílaa cuhun i ndiñehe e da — nacachi Jesús.

¹² Anda já nacachi na cán já xihín á:

—Maestro, tá ta nanaá ini da naquiji dá já queá ín vaha da, dá já — nacachi na cán.

¹³ Joo ña cúni cachi Jesús queá sa naxihí va Lázaro vatí na xica tuun xihín a cán nacahan na ña cúni mé á cachi a queá

naquiji Lázaro cán tá quiahva quiji tóco ndihí ñayivi.

¹⁴ Anda já nacahan cáxi táhyí tucu Jesús xihín ná já nacachi a já:

—Naxihí va Lázaro.

¹⁵ Joo cáji va ini i ña coo i ná sahin i tá naxihí da jáchi ña yóho chindee a ndohó já ná candúsa chága ndó yehe. Cohó candehé yo Lázaro — nacachi Jesús.

¹⁶ Anda já nacasahá Tomás, da cahan na cuatí xihín cán cahan da xihín java ga na xica tuun xihín Jesús já cáchi da já:

—Cohó ri mí ví quivi xihín mé dá, dá já — cáchi da.

Já naquee na cuahan na.

Cúu cája Jesús ña ná nditacu tucu na sa naxihí

¹⁷ Tá naxinu coo Jesús yati ñuu Betania cán já nañehe á tuhun ña sa naxihí Lázaro ta sa ín comí quivi nachicaan va na da ini in cáva.

¹⁸ Mé ñuu Betania cán ñehe táhan yati a xihín Jerusalén tátuhun uní kilometro ñehe táhan.

¹⁹ Ta cuaha táhan na Israel cán nasahan na ndúu tóo na xihín Marta xihín María tá quiahva jáyaha na ini na sahá ña naxihí Lázaro quiahva na.

²⁰ Ta tá nañehe Marta tuhun ña cáyati Jesús ñuu cán cuahan já ndáva ñá nasahan ñehe ñahá ña. Joo nacandoo María vehe.

²¹ Tá nandique táhan Marta xihín Jesús já nacachi ñá já xihín á:

—Xitoho, tá ná coo ndó yóho ta ni a quivi toho Lázaro quiahva i, nduu.

²² Joo cándaq vaha ini i ña tá ná caça ndó ña cúni mé ndó nu Ndióxi quiahva va mé a cán ña nu ndo — nacachi Marta.

²³ Anda já nacachi Jesús já xihín ná:

—Candehé Marta. A ndícani inún jáchi nditacu tucu va Lázaro, quiahvún jan — nacachi Jesús.

²⁴ Anda já nacachi ñá já xihín á:

—Sa xini vi ña nditacu tucu quiahva i tá ná xinú coo quivi nu ndihí tá ná nditacu tóco ndihí na sa naxihí — nacachi Marta.

²⁵ Já nacachi Jesús já xihín ñá:

—Yehe cúu da cuu caha ña ná nditacu tucu ndii ta cuu caha i ña ná catacu ñayivi anda

ama cáa quívi. Ta ndá na cándeé ini yehe vatí ná quívi na catacu tá catacu na.

²⁶ Ta tóco ndihi na cándeé ini yehe catacu na andá ama cáa quívi ta a ndíhi toho saha ná ini indayá. Á cándúsún ña cáhan i xuhun —ñacachi Jesús.

²⁷ Anda já ñacachi Marta já xihín á:

—Cándúsa i ndohó ña cúu ndó in túhún jini já jahyi Ndióxi ta cándúsa i ña mé ndó cúu Cristo, da nachindahá Ndióxi quixi ñuyívi yóho —ñacachi ña xihín á.

Sácu Jesús saha Lázaro

²⁸ Tá nandihí já ñaquee Marta nasahan ña cana ña María quihvi ña. Ta já ñacahan yaá ña xihín María já ñacachi ña já xihín ña:

—Sa ñaxinu coo Jesús, xitoho í ta íin a yóho. Cuáhán nu íin a jáchi cána yohó —ñacachi Marta xihín quihvi ña.

²⁹ Tá ñaxini johó María cán ña ñacachi quihvi ña xihín ña chí ivi laá ndáva ña nasahan ña nu íin Jesús.

³⁰ Mé Jesús nasandati a cán yuhú ñuu, mé nuú nandique táhan xihín Marta cán.

³¹ Ta ndaja coo mé na Israel, na ndúu jáyaha ini ña cán tá ñaxini na ñaquee númi johó ña cuahan ña já nandicuita na ndíco na jata ña cuahan na. Jáchi ñacahán na cuahan ña cuacu ña nu ndácaan Lázaro, quiahva ña.

³² Ta tá ñaxinu coo ña nu íin Jesús já ñacaxítí ña nu á já ñacasáhá cáchí ña já xihín á:

—Tá ná coo ndó yóho, nduu ta ni a quívi toho Lázaro quiahva i —ñacachi ña.

³³ Ta tá ñaxini Jesús ña sácu cóhó María xihín na Israel, na ndíco nasaa xihín ña cán já natahvi ndivaha ini a janda quiahva nandisaa ini a.

³⁴ Anda já nandaca tuhún a María cán já ñacachi a já xihín ña:

—Ndájá ñachicaan ndó da já —ñacachi Jesús.

—Naha quíi ndó, xitoho i. Candehé ndo nuú nachicaan nde da —ñacachi María.

³⁵ Anda já nasacu Jesús.

³⁶ Tá ñaxini na Israel ña yóho já ñacasáhá cáchí xihín táhan na já:

—Candehé ndo ndaja náha ñaquihvi ini Jesús yóho Lázaro —ñacachi na.

³⁷ Ta java na ñacasáhá cáchí na já:

—Mé Jesús yóho nasuná da nduchú núu na cuaá. Á chí a cuú cuití caja da chindeé da Lázaro já ná a quívi da, nduu —ñacachi java na cán.

Jánditacu tucu Jesús Lázaro

³⁸ Tá nandihí já ñacasáhá táhvi ndivaha tucu ini Jesús ta já ñacayati a nuú ñachicaan na yiquí cuñu Lázaro. Mé nuú ndácaan da cán nasacuu a in ndíca cáva ta in yuu jáhnda cáhnu nasaji nuu yéhe cán.

³⁹ Anda já nandicahan Jesús xihín java na ndúu cán ña ná jácaxoo na yuu ndáji nuu nu ndácaan Lázaro cán. Joo ndaja coo Marta, ña cúu quiahva mé ndii cán ñacasáhá ña cáchí ña já xihín Jesús:

—Candehé ndo, xitoho i. Sa quini cúu sahan ndii quiahva i jan jáchi sa íin comí quívi ñaxihí da —ñacachi ña.

⁴⁰ Anda já ñacachi Jesús já xihín ña:

—Xíní ñúhú ndicuhun inún tá ñacachi i xuhun ña tá ná cándúsún Ndióxi já cunún ndá quiahva cáhnu ñaha cuu caja mé á —ñacachi Jesús.

⁴¹ Tá nandihí já najácaxoo na yuu cáhnu ña nasaji nuu nuú nasandacaan Lázaro. Já nandínehe Jesús nuu á chí indiví já ñacachi a já:

—Tátá Ndióxi, ndíquiahva i ndixahvi nu ndo jáchi ñaxini johó ndó nuú ñacahan i xihín ndo.

⁴² Vatí mé a ndaa cándaa vaha ini i ña níi tiempo xíní johó ndó nu cáhan i xihín ndo. Joo cáhan i ña yóho sahá ña ná cuni johó ñayivi ndúu xihín i yóho já ná cándúsa na ña mé ndó nachindahá ndó yehe vaxi i ñuyívi yóho —ñacachi Jesús ndíquiahva ndixahvi nu Ndióxi.

⁴³ Tá nandihí já ñacayuhú cóhó a já ñacachi a já:

—Lázaro, cuáhán queta.

⁴⁴ Tá nandihí já ñaqueta Lázaro nuú nasandacaan da. Nacava nuu ndáha dá andá saha dá xihín ticoto ta ndáji jáhma nuu dá ñaqueta da vaxi da. Anda já ñacachi Jesús xihín java na ndúu cán ña ná ndaxí na da já ná quee da cuhun da. Ta já ñacaja na.

Jándique táhan na Israel tuhun na ña tiin na Jesús chícacaa na vecaa

(Mt. 26:1-5; Mr. 14:1-2; Lc. 22:1-2)

45 Ta cuaha táhan na Israel, na ndáca táhan nasahan xihín María cán tá naxini na ña najánditacu tucu Jesús Lázaro cán já nacandúsa na mé á.

46 Joo java táhan na Israel cán ndáva na nasahan na cahan na xihín na fariseo ta nandicani na nu ná ña nacaja Jesús.

47 Anda já nacasahá na fariseo xihín na sacuaha nuú jutú cán najátaca na tóco ndihi na sacuaha nuú na Israel já nacachi na já xihín ná:

—Ndía caja í xihín Jesús viti jáchi cuahá ndivaha ñaha xituhún cája da yóho.

48 Xíní ñuhú caji nuu í nu dá jáchi tá ná a caji nuu í nu dá vaxi quiví tá tóco ndihi ñayivi candeé ini na mé dá. Ta xihín ña yóho xinu ini na jutixia ñuu Roma quixi na jándicani na veñuhu í ta jándihi na saha tóco ndihi mí, na Israel —nacachi na.

49 Joo in táhan da ndúu cán naní da Caifás, da nasacuu da sacuaha chága nu ndíhi jutú mé cuía cán, nandicahan da já nacachi da já:

—Mé ndó cúu ndó ñayivi co xíní túni.

50 Jáchi co cándaá ini ndó ña vaha chága ña ná quiví in taa nu ndíhi ñayivi já ná a ndíhi saha tóco ndihi ñayivi. Ña cán quea cahan í ña vaha chága ná quivi Jesús jan já ná a ndíhi saha mí —nacachi Caifás.

51 Joo coo nacahan Caifás ña yóho saha ña naquixi a jini mé dá. Ndióxi quea najacahan ínimá dá ña cáchi da já jáchi mé tiempo já nasacuu da sacuaha chága nu ndíhi jutú ta najacahan Ndióxi ínimá dá ña ná cachi da ña ndítahan quivi Jesús sahá na Israel.

52 Ta a juú sahá in túhún na Israel cuití va vaha jáchi mé Jesús nanditahan quivi a saha tóco ndihi na cúu cuéntá Ndióxi, na ndicuita nuu ndúu ndijáá ñuyíví já ná cuu coo in ñuu.

53 Chí janda mé quiví já nasacu ini na Israel cán cahní na Jesús.

54 Sahá ña cán quea coo naxica nuu tívi ga Jesús tañu na Israel cán. Ña nacaja mé á quea naquee a estado Judea cán já nasahan chí in ñuu naní Efraín, ña íin yati xoo yucú íchí nuú coo ñayivi. Cán nasahjin a xihín na xíca tuun xihín á.

55 Tá nacayati quiví coo vicó pascua cája na Israel já naquee cuahá ñayivi ndúu ndijáá ñuu cán cuahan na chí Jerusalén jáchi cúni na ndaja vii na mé ná, ná coo tiahva na tá quiahva nasahnda ley Moisés nu ná caja na tá camani chá quiví coo vicó pascua.

56 Tá nataca ñayivi ñuu Jerusalén cán nacasahá ndúcú na Jesús. Joo nani ñuhu na veñuhu cahnú cán ndáca tuhún táhan na sahá Jesús já cáchi xihín táhan na já:

—Ndaja xíní ndo á quixi Jesús á a quixi toho a vicó pascua yóho —nacachi xihín táhan na cán.

57 Ta na fariseo xihín na sacuaha nuú jutú nasahnda na chuun ña ndá na ná cuni Jesús já ná cuhun na caxi tuhun na xihín na cán ndájá íin a jáchi cúni na tiin na a chicaan na a vecaa.

12

Tá nachojó in ñañáha perfume sahá Jesús (Mt. 26:6-13; Mr. 14:3-9)

1 Ta tá camani iñu quiví coo vicó pascua já naquee Jesús nasahan ñuu Betania, mé ñuu nu íin Lázaro, da najánditacu tucu mé á cán.

2 Ta cán nacaja ndíví na ña cajini Jesús jáchi cúni na caja cahnú na mé á. Ta mé Marta cúu ñá cája ndíví nu ná. Ta Lázaro cúu in táhan da íin coo nu mesa xíxi xihín Jesús.

3 Ta ndaja coo María nasahan ña quehe ña tátuhun java litro perfume, dó yahvi ndivaha. Jáchi cúu dó dó nacavaha xihín ndinuhu yucu támi sahan naní nardo. Najacyu ñá do jata saha Jesús. Ta tá nandihí já najáhichí ñá sahá xihín íj jini ña. Ta ní ini vehe cán nandicuita nuu jíco perfume cán.

4 Anda já naxini in táhan da xíca tuun xihín Jesús, da naní Judas Iscariote cán ña yóho. Mé Judas yóho cúu dá da jíco túhún Jesús tá nu ndíhi ta já cáchi da já:

5 —Ndá cuéntá quea coo nacayahvi perfume yóho já ná cana jihún jasá yó nuú na ndahví, nduu. Jáchi quiahva na uní ciento denario saha dó, nduu —nacachi Judas cán. Ta in denario cúu ña quehe ñayivi cája chuun na in quiví.

6 Joo coo nacachi Judas ña yóho sahá ña quíhvi ini ndusa da na ndahví, vaha.

Nacachi da já jáchi cúu dá da cuihná ta ndáha mé dá ñúhu ndihi jiuñún ta cája cuihná da ña tá cúní da.

⁷ Anda já nacachi Jesús já xihín dá:

—A cáhnu xihín ña jáchi nasacu vaha ña do ña ná chojó ña do yiquí cuñu i. Jáchi sa xíní ña ña sa nacayati quiví quivi i.

⁸ Ta ní tiempo canduu na ndahví jan tañu ndó ta ndá tañu cúní mé ndó cuu chindeé ndó na. Joo yehe a cóo tuun toho i xihín ndo —nacachi Jesús.

Sácú ini na sacuaḥa nuú jutú cahní na Lázaro

⁹ Cuahá na Israel cán nañehe ná tuhun ña ín Jesús ñuu Betania. Sahá ña cán quea nasahan na cán jáchi cúní na cuni na Jesús ta cúní na cuni na Lázaro, mé da najánditacu tucu Jesús.

¹⁰ Anda já nasacu ini na sacuaḥa nuú jutú cán cahní ri na Lázaro viti.

¹¹ Jáchi saḥa Lázaro cán cuahá na Israel nacasáhá na candeé ini na Jesús. Ta najándacoo na ndíco na jatá na sacuaḥa nuú na Israel.

Tá naquihvi Jesús ñuu Jerusalén

(Mt. 21:1-11; Mr. 11:1-11; Lc. 19:28-40)

¹² Ta inga quiví itaan cuahá ndivaha ñayivi naxinu coo na ñuu Jerusalén nuú coo vicó pascua. Ta tá nacandaḥa ini na ña xínu coo Jesús ñuu Jerusalén cán

¹³ já nasahan na nasahnda na ndáha tó ñuu já ndáva na nasahan na nañehe ñahá na. Ta cáyuhú na já cáhí na já:

—Cája cáhnu í Ndióxi. Cáhnu nahá ná cacuu da cómí cuéntá saḥa na Israel jáchi cúu dá da vaxi yuhú nuu Ndióxi —cáhí na.

¹⁴ Nanditahan Jesús in búrru ta nasanú a ri tá quiahva nacachi tuhun Ndióxi sanahá tá cáhí a já:

¹⁵ A cáyihví toho ndó, na ndúu ñuu Sión. Candehé ndó da cómí cuéntá saḥa ndó jan, cánúu da jatá búrru loho vaxi da, cáhí tuhun Ndióxi.

¹⁶ Ta cóo nacandaḥa ini na xíca tuun xihín Jesús cán ndá cuéntá quea cája ñayivi já xihín á. Joo chága chí nuu tá sa nandindita Jesús cuahan indiví já nacandaḥa ini na ña quiahva já ndáa nuu tuhun Ndióxi sanahá ña caja na xihín Jesús.

¹⁷ Mé ñayivi, na nasanduu xihín Jesús tá nacahan xihín Lázaro ña ná queta da nuú nanduxu da ña nditacu da, mé na cán nandicani na nuú java ga ñayivi ña naxini na nacaja Jesús cán.

¹⁸ Sahá ña cán quea naqueta ñayivi nasahan na ñehe ná Jesús jáchi nañehe ná tuhun saḥa ña cáhnu nacaja mé a cán.

¹⁹ Tá naxini na fariseo ña yóho já nacasáhá cáhí xihín táhan na já:

—Candehé ndo. Ndá cuu caja í quee vaha í xihín da jan. Jáchi tóco ndihi ñayivi cáti na cuahan na xihín da jan —nacachi xihín táhan na fariseo cán.

Java na griego ndínducú na Jesús

²⁰ Tañu ñayivi cuahá naxinu coo cája cáhnu Ndióxi vicó ñuu Jerusalén cán naxinu coo ri java na naquixi chí ñundáhyi cuéntá Grecia.

²¹ Ta mé na griego yóho nacayati na nu Felipe, da ñuu Betsaida cuéntá Galilea cán. Ta já nacasáhá na cahan ndahví na xihín dá já nacachi na já xihín dá:

—Cahan nde xihín Jesús cúní nde —nacachi na.

²² Anda já naquee Felipe nasahan da caxi tuhun da xihín Andrés ta já ndáca táhan ndívi da nasahan da ndícani da ña nuú Jesús.

²³ Anda já nacachi Jesús já xihín dá:

—Sa naxinu coo va tiempo caja cáhnu Ndióxi yehe, da nachindahá mé á nduu ñayivi.

²⁴ Mé a ndaa ná cahan i xihín ndo. Tá quiahva ndihi saḥa in ndiquí trigo tá ndícava ña ini ñundáhyi quiahva já ndítahan nuú i quivi i. Jáchi tá ná a ndíhi saḥa ndiquí trigo cán já in já cacuu va ña. Joo tá ná ndihi saḥa ña cán já nduta ña ta já ndicuahá ndivaha ña.

²⁵ Ndá na catóo chága cája ña cúní mé cuití na a juú ga ña cúní Ndióxi, na cán cúu na ndihi saḥa. Joo na cája ña cúní Ndióxi, na cán cúu na catacu anda ama cáa quiví.

²⁶ Ta ndá na cúní caja chúun cuéntá mí i ndítahan nu ná candico na yehe. Jáchi nuú coo yehe, cán coo ri na cája ña cúní yehe. Ta na cán cacuu na na ndínehe jícó Ndióxi.

Cáxi tuhun Jesús ña quivi a

27 Ta viti ñúhú cácuéha ndivaha ini i. Ta a cuú caca tahví i nu Ndióxi ña ná a quiáhva mé á ñamañi ndoho ini i jáchi sahá chuun yóho naquixi i ñuyívi yóho.

28 Ña ndítahan cachi i quéa: “Tátá Ndióxi, cáhnu ná cacuu mé ndó” —ñacachi Jesús.

Tá ñacachi Jesús ña yóho, ñacahan Ndióxi indiví já ñacachi a já:

—Sa ñandaja cáhnu i mí i ta caja tucu u ña —ñacachi a.

29 Ta ñayivi ndúu cán tá ñaxini johó na ña yóho já ñacachi na ña javi va cána. Ta java na ñacachi na tátó Ndióxi quéa ñacahan.

30 Anda já ñandicahan Jesús xihín ná já ñacachi a já:

—A juú sahá yehe ñaxini johó ndó ña yóho. Joo ñacatácu a já ná cuni johó mé ndó.

31 Ta sa ñatandaa quívi cavií sahá ñayivi ndúu ñuyívi ta sa ñatandaa quívi ndihi sahá ña cája tiñáhá sacuaña, mé rí sáhdá chuun ñuyívi yóho.

32 Jáchi tá ná cata caa na yehe já caja i ña ná casáhá ñayivi níi cúu ñuyívi candeé ini na yehe —ñacachi Jesús.

33 Xihín ña yóho cúni mé á ndicani a nu ná ña quívi a ndica crúxu.

34 Anda já ñacachi ñayivi ndúu cán já xihín á:

—Tá cáhvi nde ley Moisés ñacahyi sanahá já cándaá ini nde ña anda ama cáa quívi catacu da chindahá Ndióxi cacomí cuéntá sahá ñayivi. Yo já cúu da cáhún saha. Tá ta mé a ndaa cúun da ñachindahá Ndióxi nduu ñayivi, da catacu anda ama cáa quívi ndá cuéntá quéa cáhún quívún —ñacachi na xihín Jesús.

35 Já ñacachi Jesús já xihín ná:

—Yehe cúu da jándiyehé ínimá ñayivi ta coo too loho chága i xihín ndo. Sahá ña cán quéa xíní ñúhú caca nuu ndó nani jándiyehé íchi cuhun ndo ta viti núná nu ndó caja ndó ña. Jáchi vaxi quívi quívi i caja na ta anda já cacuu a táuhun canaa yávi ta já a cándaá ini ndó ndá xoo cuhun ndo.

36 Xíní ñúhú candeé ini ndó yehe jáchi cúu u da jándiyehé nu ndó nani íin i xihín ndó. Anda jáví xinu coo ndó cacuu ndó ñayivi cuéntá mí i —ñacachi Jesús.

Tá ñandihí já ñaquee Jesús cuahan chíjehé a nu ná.

Có cándusa na Israel Jesús

37 Vatí ñacaja Jesús cuahá ña xitúhún nuú ñayivi cán joo cóo ñaxeen na candúsa na mé á.

38 Já ñasahíin jáchi ñanditahan xinu coo nuú tuhun ña ñacahyi Isaías sanahá cán tá ñacachi a já:

Tátá Ndióxi, có cúni ña candúsa na tuhun ña cáhan í xihín ná.

Vatí xíní ña ña náhnu cája mé ndó joo cóo cúni ña candúsa na ndohó, já ñacahyi Isaías sanahá.

39 Sahá ña cán quéa cóo ñacuu candúsa ñahá ñayivi cán. Ta inga tucu tuhun ñacahyi Isaías quéa cáchi já:

40 Mé Ndióxi quéa najácuáá ñahá ta cóo ñasuná a ínimá ná,

já ná a cúu cándaá ini na yo cúu mé á, já ná a cúu ndicó cóo na nu mé á ña ná ndaja vaha mé á ña, ñacahyi Isaías.

41 Quiáhva já ñacahan Isaías jáchi ñaxini mé dá ndá quiáhva cáhnu cúu Jesús.

42 Ta cuaha táhan ña Israel cán ñacandee ini na Jesús. Ta janda java ña sacuaña nuú ña Israel cán ñacandee ini na Jesús. Joo cóo ñaxeen na ñaha tuhun na sahá jáchi ñayihví ña taxí ña fariseo cán ña veñuhu.

43 Jáchi cúni ña candoo vaha chága ña nuú ñayivi a juú ga nu Ndióxi.

Táhvi ini ñayivi sahá cuachi na tá xíní johó na nu cáhan Jesús

44 Tá ñandihí já ñacahan cóhó Jesús já ñacachi a já:

—Ndá ña candeé ini yehe já quéa a juú in túhún yehe candeé ini na, vaha. Jáchi candeé ini ri ña Ndióxi, tátá i, mé a ñachindahá yehe vaxi i ñuyívi yóho.

45 Ta ndá ña xíní yehe xíní ri na mé a ñachindahá yehe vaxi i ñuyívi.

46 Yehe ñaquixi i ñuyívi yóho ña ná jándiyehé ínimá ñayivi já quéa ndá ña ná candeé ini yehe, a cánduu ga ña nuú naá.

47 Joo ña xíní johó nu cáhan i ta cóo cája na ña, a juú toho yehe chícaan cuachi jata ná. Joo tuhun cáhan i quéa chícaan cuachi jata ná. Jáchi cóo vaxi i ñuyívi yóho chícaan i cuachi jata ñayivi. Naquixi i já ná cuu cacu ndaa ínimá ná.

48 Ndá ña cándají yehe ta cóo cúni ña caja na ña cáchi i xihín ná, ña cán cúu ña cuhun

indayá jáchi mé tuhun nacahan i cacuu a ña chícáan cuachi jata ná tá ná xinu coo mé quivi nu ndíhi cuí.

⁴⁹ Jáchi co jánaha i ña quíxi jini mé cuití i. Tóco ndihi ña cáhan i ta tóco ndihi ña jánaha i nuú ñayivi cúu á ña nachindahá Ndióxi, tátá i yehe jánaha i nu ná.

⁵⁰ Ta cándaá cáxi ini i ña tóco ndihi ña jánaha Ndióxi, tátá i caja ña ná cuhun na coo na indivi anda ama cáa quivi. Ta tóco ndihi ña cáhan i xihín ñayivi, cáhan i ña tá quiahva nasahnda Ndióxi, tátá i nuú i caja i —nacachi Jesús.

13

Jándoo Jesús sahá na xica tuun xihín á

¹ Táčamaní in quivi coo vicó pascua já sa xini Jesús ña sa naxinu coo quivi quivi a jándoo a ñuyivi yóho já ndaa mé á ndique táhan xihín Ndióxi, tátá a. Níi tiempo naquihvi ini Jesús tóco ndihi na cúu cuéntá mé á ndúu ñuyivi yóho ta coo najándoo mé á ña quihvi ini a na.

² Ta ndaja coo ín Jesús xihín na xica tuun xihín á xijini na. Jihna sa najácahan tiñahá sacuaḥa Judas Iscariote, da cúu jahyi Simón, ña ná jicó túhún da Jesús.

³ Joo sa xini vaha Jesús ña nasahan Ndióxi, tátá a tóco ndihi ndée á nu mé á. Ta sa xini a ña naquixi a nu Ndióxi ta jivi nu Ndióxi ndindita tucu a cuhun a.

⁴ Ta nani xijini na nandacá ndichi Jesús já natavá a cotó níhnu a ta já natiin a in jáhma nachínee a tóco á.

⁵ Tá nandihí já nataán a ticuñi ini in tisahan loho já nacasáhá jándoo a sahá na xica tuun xihín a cán. Ta já najándihichi a saha ná xihín jáhma cánee tóco á cán.

⁶ Ta tá nanditahan ndoo saha Simón Pedro já nandacá tuhún da Jesús já cáchi da já:

—Á mé a ndaa jándoo ndó sahá i, xitoho i —nacachi da.

⁷ Já nacachi Jesús já xihín dá:

—Viti ñúhú co cándaá toho inún ndía queá cája i yóho joo chága chí nuú já candaá inún ndá cuéntá queá cája i já —nacachi Jesús.

⁸ Anda já nacachi Pedro já:

—Chí a quiahva toho mí i ñamaní nu ndó jándoo ndó sahá i —nacachi da.

Anda já nacachi Jesús já xihín dá:

—Tá ná a quiahvún ñamaní jándoo i sahnún já a cúu cacuún cuéntá mí i —nacachi Jesús.

⁹ Anda já nacachi tucu da já xihín Jesús:

—Tá ta já cáchi ndo quiahva va i sahá i jándoo ndó ta quiahva ri ñamaní jándahá ndó yehe ta quiahva ri ñamaní chihin ndó jini i viti —nacachi da.

¹⁰ Anda já nanducú ñehe Jesús tuhun nu dá já nacachi a já xihín dá:

—Tá sa nachichi vaha ñayivi já ndúu víi na ta saha cuití va ndó xini ñúhú ndicata i. Mé ndó, na xica tuun xihín i, sa ndúu víi ndo jáchi sa najándoo i cuachi ndó sahá ña cándeé ini ndó yehe vatí a juú ndihi ndó ndúu víi —nacachi Jesús.

¹¹ Nacachi Jesús a juú ndihi na ndúu víi jáchi sa nacandaá va ini mé á ndá da cúu da jicó túhún ñahá.

¹² Tá nandihí najándoo Jesús saha ná já nacandixi tucu a cotó níhnu a. Já nasacoo tucu a nu mesa já nacachi a já xihín ná:

—Cája i cuéntá co cándaá vaha ini ndó ndá cuéntá queá najándoo i saha ndo. Sahá ña cán queá ndicani i ña nu ndo viti.

¹³ Mé ndó cáchi ndo maestro xihín i ta cáchi ndo cúu u xitoho ndó ta ndaa cáhan ndó jáchi jivi ndusa i.

¹⁴ Ta viti candehé ndó. Yehe cúu u maestro ndo ta cúu u xitoho ndó ta najándoo i saha ndo. Sahá ña cán queá quiahva já ndítahan caja ndó xihín ndaja táhan mé ndó.

¹⁵ Sa nasacu u in quiahva nu ndo ta ndítahan caja ndó tá quiahva nacaja mí i xihín ndo.

¹⁶ Xini ñúhú candaá ini ndó ña ni in túhún toho mozo a cuú cacuu da da cáhnu chága a juú ga xitoho da. Ta mé a ndaa ín chága sahá in da sáhdá chuun a juú ga mé da cuahan caja chúun cán.

¹⁷ Tá nacandaá ini ndó ña cáhan i xihín ndo yóho ta tá ná caja ndó ña já queá cuu cajji ini ndó.

¹⁸ A juú saha tóco ndihi ndó cáhan i jáchi sa candaá vaha ini mí i ndá ndó nacaxi i. Joo sahá in ndó ndítahan xinu coo nuú tuhun Ndióxi tá nacachi a já: “In da sácco tuun xixi xihín i, da cán cúu da nandicuñta xihín i”, cáchi tuhun Ndióxi.

19 Sa cáxi tuhun cuéé e ña yóho xihín ndo já quéa tá sa naxinu ña yóho já candeé ini ndó yehe, ña cúu u da cáchi i cúu u.

20 Mé a ndaa ná cahan i xihín ndo. Ndá na ná ndiquehe vaha in da ná chindahá i, cúu á tátuhun ndiquehe vaha na yehe. Ta ndá na ndiquehe vaha yehe, ndiquehe vaha ri na Ndióxi, mé a nachindahá yehe quixi i ñuyiví yóho —nacachi Jesús.

Cáxi tuhun Jesús ña cúu Judas da jicó tühún ñahá

(Mt. 26:20-25; Mr. 14:17-21; Lc. 22:21-23)

21 Tá nandihí nacachi Jesús ña yóho já nacacuéha ndivaha ini a já nacachi a já:

—Mé a ndaa ná cahan i xihín ndo. In táhan ndó cacuu da cuhun jicó tühún yehe —nacachi Jesús.

22 Tá nandihí já nacasáhá na xíca tuun xihín Jesús cán sándehe nu táhan na. “Yo saha cahan Jesús”, cáhan na.

23 Jíin Jesús cán ín coo in táhan da xíca tuun xihín á, da quihvi ini mé á cán.

24 Saha ña cán quéa nacuu ndáha Simón Pedro nu dá ña ná ndaca tühún da mé á saha ndá da cúu da jicó tühún ñahá.

25 Anda já nacetivi chága da cán jíin Jesús já nacasáhá da ndaca tühún ñahá da já nacachi da já:

—Ndá da cúu dá, xitoho i —nacachi da.

26 Anda já nacachi Jesús já xihín dá:

—Viti ñúhú chindaxi i in tühun pan ta ndá da ná quiahva i tühun pan cán nuu, da cán cúu dá —nacachi Jesús.

Tá nandihí já nachindaxi a in tühun pan já nasahan ña nu Judas Iscariote, da cúu jahyi Simón.

27 Ta tá natiin Judas pan cán chí ivi laá nandihvi tiñahá sacuahá ini da. Já nacachi Jesús já xihín dá:

—Xíni ñúhú ndihí inún cajún ña nasacu inún cajún —nacachi Jesús.

28 Joo ni in tühún java ga na ndúu coo xíxi xihín Jesús cán coo nacandaa ini na ndá cuéntá quéa nacachi Jesús ña yóho xihín Judas.

29 Java na nacahán na ña nasahnda Jesús chuun nu Judas ña ná cuhun da cueen da ñaha cuéntá víco pascua. Ta java na nacahán na ña nasahnda chuun nu dá

ña ná jasá da jiuhún nuú na ndahví jáchi ndáha mé dá ñúhu ndihí jiuhún.

30 Tá nandihí natiin Judas pan nasahan Jesús nu dá chí ivi laá naquee da cuahan da. Ta sa ñuu va quéa cán.

Nditahan quihvi ini táhan na cúu cuéntá Jesús

31 Tá sa naqueta Judas cuahan da já nacasáhá cáchi Jesús já xihín na xíca tuun xihín á:

—Viti ndusa quéa nacasáhá ndicáhnu ndivaha yehe, da nachindahá Ndióxi nduu ñayivi. Ta saha ña caja i ndicáhnu ndivaha Ndióxi, tátá i.

32 Ta tá náha yehe ndá quiahva cáhnu cúu Ndióxi, tátá i quiahva já náha ri Ndióxi ndá quiahva cáhnu cúu yehe, da nachindahá Ndióxi nduu ñayivi. Ta ja chá cámaní coo tóco ndihí ña yóho.

33 Candehe ndo, jahyi mání i. Ja chá cuití tiempo coo i xihín ndo. Anda já ndinducú ndó yehe joo a ndínehe ndó yehe. Nditahan ndicuhun ini ndó tá nacachi i xihín na Israel ña a cúu cuhun na nuú cuhun yehe. Quiahva já cáchi ri xihín ndóhó va: A cúu cuhun ndó nuú cuhun i.

34 Ta viti sáhdá i inga chuun nu ndo ta cúu á ña saá. Ta ña yóho cúu á: Nditahan quihvi ini táhan ndó. Tá quiahva quihvi ini yehe ndohó quiahva já nditahan quihvi ri ini táhan ndó.

35 Jáchi tá ná quihvi ini táhan ndó já candaa ini tóco ndihí ñayivi ña mé a ndaa táhyí cúu ndó cuéntá mí i —nacachi Jesús.

Cáxi tuhun Jesús ña chijehé tühun Pedro ña xíni da mé á

(Mt. 26:31-35; Mr. 14:27-31; Lc. 22:31-34)

36 Anda já nandaca tühún Simón Pedro cán Jesús já nacachi da já xihín á:

—Xitoho i, ndájá cuhun ndó já —nacachi da.

Anda já nacachi Jesús já xihín dá:

—A cúu toho cuhun yóhó nuú cuhun i viti. Joo cacuáchi lohún já xinu coún cán —nacachi Jesús.

37 Anda já nacachi Pedro já xihín Jesús:

—Ndá cuéntá quéa cáchi ndo ña a cúu candico i ndohó cuhun i nuú cuhun ndó

viti. Jáchí sa íin tiahva i quivi i saha ndo — nacachi Pedro.

³⁸ Já nanducú ñehe Jesús tuhun nu dá já nacachi a já xihín dá:

—Mé a ndaa ná cahan i xuhun. Vatí íin tiahvún quivún sahá i joo tá camani cana chéle já uní tañu chijehé tuhún sahá i ta cahún ña co xini tohún yehe —nacachi Jesús xihín Pedro.

14

Ndáca Jesús ñayivi cuhun na nu Ndióxi, tátá a

¹ Já nacachi tucu Jesús já:

—Coto a ndicani ini ndó. Ndítahan candeé ini ndó Ndióxi ta ndítahan candeé ini ndó yehe.

² Mé nu íin Ndióxi, tátá i, cán íin cuahá ndivaha nu núná nu ndó canduu ndó. Tá ná a cóo nuú canduu ndó cán janda mé saha va sa nacaxi tuhun i xihín ndó, nduu. Ta cuhun i cacu tiahva i mé nuú canduu ndó cán.

³ Tá sa ná quee e cuhun i ta tá sa ná caja ndívi i nuú canduu ndó cán já quixi tucu u ndiquehe e ndohó já ná cuhun ndó canduu ndó xihín i mé nuú coo i cán.

⁴ Mé ndó sa xini ndó ndá íchi candico ndó já cuu saa ndó nuú cuhun i —nacachi Jesús xihín na xica tuun xihín a cán.

⁵ Anda já nandicahan Tomás xihín Jesús já nacachi da já xihín á:

—Mé nde co xini toho nde ndájá cuhun ndo, xitoho nde. Ndaja caja ri nde candaá ini nde ndá íchi quehe nde cuhun nde —nacachi da xihín á.

⁶ Já nanducú ñehe Jesús tuhun nu dá já nacachi a já xihín dá:

—Yehe cúu tátuhun íchi ña ndítahan candico ñayivi ta yehe cúu da jánaha ña ndaa. Ta yehe cúu da cája ña ná catacu ñayivi anda ama cáa quivi. Ta in túhún yehe ndítahan candeé ini ñayivi já ná cuu xinu coo na nu Ndióxi, tátá i.

⁷ Tá xini ndó yo cúu yehe já xini ri ndó yo cúu Ndióxi, tátá i. Ta viti xihín chí nuu xini ndó a jáchi sa naxini ndó a —nacachi Jesús.

⁸ Anda já nacachi Felipe já xihín Jesús:

—Xitoho nde, jánaha ndó nuú nde yo cúu tátá ndo já ná cajii ini nde —nacachi da.

⁹ Anda já nacachi Jesús já xihín dá:

—Ndá cuénta quéa cáchún já jáchi janda jihna ndivaha va íin i xihín ndo ta sa ndítahan candaá ini ndó yo cúu yehe. Jáchí ndá na sa xini yo cúu yehe xini ri na yo cúu Ndióxi, tátá i. Saha ña cán quéa ndá cuénta quéa cúni ndó ña ná jánaha i tátá i nu ndo.

¹⁰ Xini ñuhú candúsa ndó ña in cúu va yehe xihín Ndióxi, tátá i ta in cúu va mé á xihín i. Tóco ndihi ña cahan i xihín ndo yóho co cahan i ña sahá ña quixi a jini mé cuití vi. Cahán i ña quixi nu Ndióxi jáchi íin mé á xihín i. Ta chuun cája i quixi a nu Ndióxi jáchi cája chúun mé á.

¹¹ Xini ñuhú candúsa ndó ña in cúu yehe xihín Ndióxi, tátá i ta in cúu Ndióxi, tátá i xihín i. Ta tá co cúni ndó candúsa ndó ña já quéa xini ñuhú candúsa ndó ña sahá ña náhnu naxini ndó nacaja i.

¹² Mé a ndaa ná cahan i xihín ndo. Ndá na candeé ini yehe, cuu caja na ña xituhún tátuhun ña cája mí i. Ta janda ña náhnu chága cuu caja na jáchi cuhun i nu íin Ndióxi, tátá i.

¹³ Ta tóco ndihi ña caça ndó nu Ndióxi, xini ñuhú caça ndó ña xihín quivi mí i já ná caja i ña. Ta ndicáhnu Ndióxi, tátá i xihín ña caja i saha ndo.

¹⁴ Ta caja i ndá ña ná caça ndo nuú i tá ná caça ndó ña xihín quivi mí i.

Sáhan Jesús tuhun a ña chindahá a ínima yii Ndióxi cañuhu a ini ñayivi

¹⁵ "Tá mé a ndaa quíhvi ini ndó yehe, caja tá caja ndó ña sáhdá i nu ndo caja ndó.

¹⁶ Ta caça i nu Ndióxi, tátá i ña ná chindahá mé á ínima yii mé á nu ndo. Ta chindeé mé á ndohó já ná quiahva tuhun ndeé ini ndó ta já cuu coo tuun a xihín ndo.

¹⁷ Joo ñayivi, na co cúu cuénta mí i, a cúu ndiquehe na ña jáchi co candaá ini na yo cúu mé á ta ni co cúni na ndiquehe vaha na ña. Joo ndohó xini vaha ndó a jáchi sa íin a xihín ndo ta ní tiempo cañuhu a ini ndó.

¹⁸ A jándacoo ndáha toho i ndohó jáchi ndicó coo tucu u já coo i xihín ndo.

¹⁹ Ja chá cuití ta a cúni ga ñayivi cuénta ñuyívi yehe. Joo mé ndó cuni tá cuni ndó yehe. Ta sahá ña nditacu tucu u sahá ña cán quéa cuu catacu mé ndó anda ama cáa quivi.

20 Ta mé quivi cán candaa ini ndó ña mé a ndaa in cúu yehe xihin Ndióxi, tátá i. Ta candaa ini ndó ña quiahva já in cúu ndó xihin i ta in cúu yehe xihin mé ndó viti.

21 Ndá na ndiquehe vaha tuhun cáhan i ta cája na ña, náha na xihin ña yóho ña mé a ndaa quihvi ini na yehe. Ta mé Ndióxi, tátá i quihvi ini a ndijáa na quihvi ini yehe. Ta quihvi ri ini yehe na ta nahá i mí i nu ná — nacachi Jesús.

22 Anda já in da naní Judas, da co cúu toho da naní Judas Iscariote, nandaca tuhun da Jesús já nacachi da já xihin á:

—Xitoho nde, ndá cuéntá quea cáchi ndó ña nahá ndó mé ndó nuú nde joo a náha toho ndó mé ndó nuú ñayivi cuéntá ñuyivi —nacachi da.

23 Já nanducú ñehe Jesús tuhun nu dá já nacachi a já xihin dá:

—Ndá na quihvi ini yehe, na cán cúu na cája ña cáhan i. Ta já quihvi ini Ndióxi, tátá i na ta já quixi nde coo nde xihin ná.

24 Joo na co quihvi ini yehe, na cán cúu na quehe núu tuhun cáhan i. Ta mé tuhun cáhan i nu ndó yóho coo cúu á ña quixi jini mí i. Cúu á tuhun Ndióxi, tátá i, mé a nachindahá yehe quixi i ñuyivi yóho.

25 Tóco ndihi ña yóho ndícani i ña nu ndó viti nani íin i xihin ndo.

26 Joo ínima yii Ndióxi, mé a chindahá Ndióxi yuhú nuú i quixi a, chindee a ndohó. Mé a cán quea jánaha tóco ndihi ñaha nu ndo. Ta jándicuhun a ini ndó tóco ndihi ña nacachi i xihin ndo.

27 Tá sa ná quee e cuhun i já caja i ña ná coo vaha ini ndó. Joo a cacuu a tátuhun tá cája ñayivi cuéntá ñuyivi. “Ná coo vaha ini ndó”, cáchi xihin táhan na joo coo íin vaha ini xihin táhan na. Coto a ndícani nahá ini ndó ta coto a yíhví ndo jáchi caja i ña ná coo vaha ini ndó.

28 Sa naxini johó ndó ña nacachi i xihin ndo ña quee e cuhun i ta ndicó coo tucu u já coo i xihin ndo. Ta tá mé a ndaa quihvi ndusa ini ndó yehe já quea cajii ini ndó sahá ña cáchi i cuhun i nu íin Ndióxi, tátá i. Ta íin chága saha mé á a juú ga yehe.

29 Sa ndícani cuée vi ña yóho nu ndo já quea tá ná xinu coo ña cáchi i xihin ndo coo já quea cuu candúsa ndó yehe.

30 Já chá cuití va coo i ñuyivi yóho ndituhún i xihin ndo jáchi sa natandaa hora xinu rí quini, rí cómi cuéntá sahá ñayivi ñuyivi yóho vatí mé a ndaa coo ndee rí caja rí ni in ñaha xihin i.

31 Joo yaha tá yaha ña cúni ri caja rí xihin i. Ta xihin ña yóho candaa ini ñayivi ndúu ñuyivi ña mé a ndaa quihvi ini ndusa i Ndióxi, tátá i ta cája i ña nasahnda mé á nuú i caja i. Candichi ndó. Xihin ndo ná coho — nacachi Jesús xihin na xica tuun xihin a cán.

15

Jesús cúu á tátuhun in tó uva

1 Anda já nacachi tucu Jesús já xihin ná:

—Yehe cúu ndusa tátuhun in tó uva ta Ndióxi, tátá i cúu á tátuhun da ndája vii saha mé tó uva cán.

2 Ta ñayivi cúu ná tátuhun ndáha tó uva cán. Ta ndá na coo xeén caja ña cúni Ndióxi jácaxoo a na nu mé á tá quiahva cája da ndája vii dó cán tá chítuhun dá ndáha tó uva, ña coo cána uva nuu. Joo tá cána cuaha uva nu doo já quea ndája vii da ndáha doo ta ndíjatá da doo já ná cana cuaha chága uva nu doo. Quiahva já cája ri Ndióxi xihin ñayivi, na cája ña cúni mé á.

3 Joo mé ndó sa nandivii va ndó jáchi naxini johó ndó ña jánaha i nu ndo.

4 Xíní ñúhú in cacuu ndó xihin i tá quiahva in cúu yehe xihin ndo. Jáchi in ndáha tó uva a cuu cana uva nu doo tá coo tiiin dó tóco tó uva cán. Quiahva já íin ri xihin ndóhó va. A cúu caja ndó ña cúni Ndióxi tá coo in cúu ndó xihin i.

5 Yehe cúu u tátuhun tó uva ta ndóhó cúu ndó tátuhun ndáha mé tó uva cán. Ta ndá na in cúu xihin i tá quiahva in cúu u xihin ná já quea cuu caja ndihi na ña cúni Ndióxi. Cacuu a tátuhun cána cuaha uva vaha nu ndáha tó uva cán. Jáchi mé a ndaa ni in túhún ñaha a cúu caja ndó tá ná a chindee yehe ndohó.

6 Ta ndá na coo cúni in cacuu xihin i, na cán cúu na jácaxoo Ndióxi. Ta cúu ná tátuhun in ndáha tó uva, dó sa nahichi ta nditaca dó cuhun dó cayi doo.

7 Tá in ná cacuu ndó xihin i ta tá ná caja ndó ña najánaha i nu ndo já cuu caça ndó ndá ña cúni mé ndó nuú i já quiahva i ña nu ndo.

⁸ Mé Ndióxi, tátá i ndicáhnu ndivaha tá ná caja ndó ña cúni a xihín ndinuhu ini ndó. Ta xihín ña yóho náha ndó ña cúu ndó cuéntá mí i.

⁹ Quíhvi ini i ndohó tá quiahva quíhvi ini Ndióxi, tátá i yehe. Xíní ñúhú coo tuun ndó xihín i jáchi quíhvi ini i ndohó.

¹⁰ Tá ná caja ndó tóco ndihi ña sáhdá i nu ndo caja ndó já quea coo tuun ndó xihín i jáchi quíhvi ini i ndohó. Quiahva já cája ri yehe va. Cája i tóco ndihi ña nasahnda Ndióxi, tátá i caja i ta xihín ña yóho íin tuun i xihín á jáchi quíhvi ini a yehe.

¹¹ 'Cáxi tuhun i ña yóho xihín ndo já ná cajii íni ndo tá quiahva cájii íni yehe. Ta xihín ña yóho ndicutú ndaa ínima ndo xihín ña cájii ini ndó.

¹² Cuni johu ndó ña sáhdá i nu ndo yóho: Ndítahan quíhvi ini táhan ndó tá quiahva quíhvi ini yehe ndohó.

¹³ Tá mé a ndaa táhyí quíhvi ini ñayivi ñani táhan na já quea íin tiahva na quivi na saha ná.

¹⁴ Mé ndó cúu ndó amigo i tá cája ndó ña sáhdá i nu ndó caja ndó.

¹⁵ Cáchi i xihín ndo ña cúu ndó amigo i jáchi cáxi tuhun ndihi i xihín ndo ña cáhan Ndióxi, tátá i xihín i. Ta a cáhan ga i xihín ndo ña cúu ndó mozo jáchi in mozo co xíní toho da ndaja cáa ña cája xitoho da.

¹⁶ Mé ndó coo ñacaxi ndó yehe caca nuu i xihín ndo. Joo mí i ñacaxi i ndohó ña ná caca nuu ndó xihín i. Ta najánaha i ndohó ndá quiahva caja ndó já ná cacuu ndó tátuhun in yíto, dó sáhan cuahá cuíhi ña a ndíhi saha. Tá ná caja ndó ña cúni Ndióxi já quiahva tátá i ndá a cúni mé ndó tá ná caca ndó ña xihín quívi mí i.

¹⁷ Ña yóho quea sáhdá i nu ndó caja ndó: Quíhvi ini táhan ndó.

Cándají ñayivi cuéntá ñuyíví Jesús ta cándají ri na na cúu cuéntá mé á

¹⁸ 'Candehé ndo. Tá ná casahá candají ñayivi cuéntá ñuyíví ndohó xíní ñúhú ndicuhun ini ndó ña jihna ñúhú ga ñacandají ri na yehe va.

¹⁹ Tá ná caja ndó tá quiahva cája ñayivi ñuyíví já quea quíhvi ini va na cán ndohó. Jáchi já cája xihín táhan mé na cán. Joo yehe ñacaxi i ndohó ña ná quee ndó tañu na cán.

Sahá ña cán quea co cúni na cán ndohó jáchi co cúu ga ndó na ñuyíví yóho.

²⁰ Coto a ndíndójó ndo ña ñacahan i xihín ndo tá ñacachi i ña ni in túhún toho mozo a cúu cacuu da da cáhnu chága nuú xitoho da. Ta ni mé ndó co cúu ndó na náhnu chága a juú ga yehe. Jáchi tá quiahva ñacaja xíxi na xihín yehe quiahva já caja xíxi ri na xihín ndohó va. Tá ná candúsa na ña ñacahan i xihín ná quiahva já candúsa ri na ña ná cahan ri ndohó va xihín ná.

²¹ Tóco ndihi ña yóho caja na xihín ndo sahá ña cándéé ini ndó yehe. Jáchi co xíní na Ndióxi, tátá i, mé a ñachindahá yehe vaxi i ñuyíví yóho.

²² 'Tá ná a quíxi toho i ñuyíví yóho caxi tuhun i xihín ñayivi, nduu coó toho na jácojo cuachi jata ná, nduu. Joo viti ñaquixi i ñuyíví yóho ta ndítahan nu ná ndiquiahva na cuéntá sahá cuachi na.

²³ Ndá ñayivi cándají yehe, cándají ri na Ndióxi, tátá i.

²⁴ Ñacaja i ña náhnu nu ná joo coo ñacandúsa na yehe sahá ña cán quea ndójo na cuachi. Ta ni in túhún toho ñayivi coo ñacaja ña náhnu tá quiahva ñacaja i nu ná. Vatí naxini na ña náhnu ñacaja i joo cándají na yehe ta cándají na Ndióxi, tátá i.

²⁵ Joo xihín tóco ndihi ña cúu yóho xínu coo nu ley najándacoo Moisés nu ná sanahá tá cáchi a já: "Chí coó saha ná candají na yehe", já ñacachi Moisés sanahá.

²⁶ 'Tá ná quíxi ínima yíi Ndióxi, mé a chindahá i cuéntá Ndióxi, tátá i, mé a cán quea cahan vaha sahá i. Ta jánaha ña ndaa saha Ndióxi ta chindeé a ñayivi.

²⁷ Ta jári mé ndó cahan vaha ndó sahá i jáchi janda saha tá ñacasahá cája chúun i ñuyíví yóho ñasanduu tuun ndó xihín i — ñacachi Jesús.

16

¹ Já ñacachi tucu Jesús já:

—Caxi tuhun i ña yóho xihín ndó já ná a jándacoo ndó ña cándéé ini ndó yehe.

² Jáchi vaxi quívi tá taxi ñayivi ndohó veñuhu. Ta ndá na ná cahni ndohó cahan na ña cája chúun na cuéntá Ndióxi.

³ Caja na ña yóho jáchi co xíní na yo cúu Ndióxi, tátá i ta ni co xíní na yehe.

4 Sa cáxi tuhun cuéé e ña yóho xihin ndo já queá tá ná xinu coo quivi cán já ndicuhun ini ndó ña sa nacaxi tuhun yachi vi xihin ndo ña já coo.

Ña cája ínima yii Ndióxi

'Coo nacaxi tuhun i ña yóho xihin ndo jihna jáchi nasahin i xihin ndo.

5 Ja chá cuhun i coo i xihin Ndióxi, tátá i, mé a nachindahá yehe ñuyivi yóho joo ni in ndó co ndaca tuhun ndó yehe ndájá cuhun i.

6 Ña cája ndó queá cacuéha ndivaha ini ndó sahá ña ndícani i tóco ndihi ña yóho nu ndo.

7 Joo mé a ndaa ná cahan i xihin ndo: Vaha chága ná quee e cuhun i. Jáchi tá ná a quee yehe cuhun i já a cúu quixi ínima yii Ndióxi coo a xihin ndo ta mé a cán chindee a ndohó. Joo tá ná quee e cuhun i já chindahá i mé á quixi a nu ndo.

8 Ta tá ná xinu a cán jánaha cáxi táhyi a nuú ñayivi ña cája na cuachi. Ta jánaha nu ná ndaja ín íchi cuéntá ña ndaa. Ta jánaha nu ná ndá quiahva cavií sahá ñayivi caja Ndióxi.

9 Ta jánaha cáxi táhyi a ña ín cuachi na jáchi co cándéé ini na yehe.

10 Ta jánaha ínima yii Ndióxi ndaja ín íchi cuéntá ña ndaa jáchi quee e cuhun i nu ín Ndióxi, tátá i ta a cúni ga ndó yehe.

11 Ta jánaha cáxi táhyi a ña caja vii Ndióxi sahá cuachi jáchi sa nacaja vii a sahá tiñáhá sacuahá vatí viti ñúhú cómi rí cuéntá sahá ñayivi ñuyivi yóho.

12 Ín cuahá ndivaha ñaha cúni cahan chága i xihin ndo. Joo vatí já va viti jáchi a cándoo ga jiní ndo.

13 Tá ná xinu ínima yii Ndióxi, mé a cúu ña ndaa, mé a cán candaca ndohó íchi cuéntá ña ndaa. Ta a cahan toho a cán ña quixi jiní mé á jáchi cahan mé á ña xini joho a cahan Ndióxi. Ta caxi tuhun a xihin ndo ndá a coo chága chí nuu.

14 Ta mé a cán caja cáhnu a yehe jáchi jánaha nu ndó ña cúni mí i jánaha i nu ndo.

15 Tóco ndihi ñaha jánaha Ndióxi, tátá i cúu ri a ña jánaha yehe va. Sahá ña cán queá cáchi i xihin ndo ña ínima yii mé á caxi tuhun a xihin ndo ña cúni mí i jánaha i nu ndo.

16 'Ja chá cuití coo i xihin ndo ta a cúni ga ndó yehe jáchi quee e cuhun i nu ín Ndióxi, tátá i. Joo tá nandihí já cuni tucu ndó yehe —cáchi Jesús.

17 Anda já nacasáhá java na xica tuun xihin á cán ndaca tuhun táhan na já cáchi xihin táhan na já:

—Ndía cúni ri Jesús cachi a xoho tá cáchi a ña ja chá cuití va ta a cúni ga í mé á ta tá nandihí já cuni tucu mé á. Ta cáchi a ña cúu á sahá ña quee a cuhun a nu ín Ndióxi, tátá a.

18 Ndía cúni ri a cachi a ña ja chá cuití va cuni mé á. Co cándaa vaha toho ini ndía cúni mé á cachi a xihin tuhun yóho —nacachi xihin táhan na.

19 Joo nacandaa ini Jesús ña cúni na ndaca tuhun na mé á sahá ña cán queá nacachi a já xihin ná:

—Nacachi i xihin ndó ña ja chá cuití ta a cúni ga ndó yehe ta tá nandihí já cuni tucu ndó yehe. Ta viti cúni ndo ndaca tuhun ndó yehe ndía cúni cachi ña yóho.

20 Mé a ndaa ná cahan i xihin ndo. Tandaa quivi cuacu ndó ta cacuéha ndivaha ini ndó ta ñayivi ñuyivi yóho cavatá ndivaha na sahá ña ndoho i. Ta vatí cacuéha ini ndó joo in cuití ndajama ña jan ta já cajii ndivaha ini ndó.

21 Cacuu a tátuhun tá xinu coo hora cacu jahyi in ñañáha ta já casáhá ndóho ini ña. Joo tá sa nacacu jahyi ña ndíndójó ndihi ña sahá ña nandoho ini ña jáchi sa nacacu jahyi ña ta cajii ndivaha ini ña xihin á.

22 Quiahva já ndóho ini ndó xihin ña táhnda ini ndó viti. Joo ndicó coo tucu yehe já cuni táhan tucu ta já ndicutú ndaa ínima ndó xihin ña cajii íni ndo. Ta ni in na a cúu caja caji nuu nuú ña cajii íni ndó jan.

23 'Mé quivi cán coo ga ñaha caça ndó nuú i. Jáchi mé Ndióxi, tátá i quiahva tóco ndihi ña xini ñúhú ndo tá ná caça ndó ña nu á xihin quivi mí i.

24 Janda viti a ñaha caça ndó ñaha nu Ndióxi, tátá i xihin quivi yehe. Joo viti xini ñúhú caça ndó ña cúni ndó nu mé á xihin quivi yehe ta já quiahva mé á ña nu ndo. Ta xihin ña yóho cuu ndicutú ndaa ini ndó xihin ña cajii íni ndo.

Naquee vaha Jesús nu tóco ndihi ña núu ñuyívi yóho

²⁵ Xihín quiahva cuití naçahan i ña yóho xihín ndo. Joo tandaa quivi ta a çahan ga i xihín quiahva nu ndo. Ña caja i quéa cáxi táhyi çahan i saha Ndióxi, tátá i nu ndo.

²⁶ Ta mé quivi cán çaca ndó ña cúnj ndó nu Ndióxi, tátá i xihín quivi mí i. Sa núna nu ndó çaca tahví ndó nu á ta ço xini ñuhú ga çaca tahví yehe nu mé á saha ndo.

²⁷ Jáchj sa quíhvj ini tátá i ndohó sahá ña quíhvj ini ndó yehe ta sahá ña naçandúsa ndó ña naçindahá mé á yehe vaxi i.

²⁸ Mé nu ín Ndióxi, tátá i naquee e vaxi i ñuyívi yóho. Ta yachj chá ta jándacoo i ñuyívi yóho já ndicó ço tucu u çuhun i nu ín Ndióxi, tátá i —naçachi Jesús.

²⁹ Anda já naçachi na xica tuun xihín á cán já:

—Viti ndusa quéa çahan cáxi táhyi ndo xihín nde ta ço sácú ga ndó quiahva nuú nde.

³⁰ Ta viti ndusa cándaqa ini nde ña xini ndo tóco ndihi ñaha. Ta ni ço xini ñuhú toho ndó ña ná ndaçá tuhún nde ndohó jáchj sa xini va ndó ña cúnj nde candaqa ini nde. Sahá ña cán quéa cándúsa nde ña naquixi ndó nu ín Ndióxi —naçachi na.

³¹ Já nanducú ñehe Jesús tuhun nu ná já naçachi a já xihín ná:

—Á ja víti ndusa cándúsa ndó yehe.

³² Joo sa naxinu çoo va hora ndicujta nuu ndó ndá naçuu çuhun ndo ta jándacoo in tuhún ndó yehe. Vatí mé a ndaa a cándoo mé toho i jáchj ín Ndióxi, tátá i xihín i.

³³ Cáxi tuhun i ña yóho xihín ndo já ná coo vaha ini ndó sahá ña in cúu ndó xihín i. Mé a ndaa ndoho tá ndoho ini ndó ñuyívi yóho. Joo a cáyhvi toho ndó jáchj yehe naçandé e naçahnu i nu tóco ndihi ña núu ñuyívi yóho —naçachi Jesús xihín na xica tuun xihín á cán.

17

Xica tahví Jesús nu Ndióxi sahá na xica tuun xihín á

¹ Tá nandihj naçachi Jesús tóco ndihi ña yóho xihín na xica tuun xihín á cán já nandínehe a nuú á chí indivi já naçachi a já:

—Tátá Ndióxi, sa naxinu çoo quivi quivi i. Caja ndó ña ndicáhnu ndivaha mí i, da cúu in tuhún jiní já jahyi mé ndó já ná cuu caja cáhnu ri yehe va ndohó.

² Jáchj mé ndó naçahan ndó nuú i ña ná cacomí i cuéntá saha tóco ndihi ñayivi já ná cuu caja i ña ná catacu na anda ama cáa quivi jáchj cúu ná na naçahan ndo nuú i.

³ Ta tá xini na yo cúu mé ndó ta tá xini na yo cúu yehe, da naçindahá ndó ñuyívi yóho já cuu catacu na anda ama cáa quivi. Jáchj in tuhún mé ndó cúu ndusa Ndióxi.

⁴ Sa naçaja cáhnu i ndohó nani ín i ñuyívi yóho ta sa najáxinu çoo ndihi i ña naçahnda ndó nuú i caja i.

⁵ Ta viti xica tahví i nu ndo, tátá Ndióxi ña ná naça ndo nuú ñayivi ndaja cáhnu cúu yehe nu mé ndó jáchj quiahva já in cáhnu naçacuu u xihín ndó janda tá cámaní çava sahá saha ñuyívi.

⁶ Ta naçaxi ndó na cacuu cuéntá mí i taña ñayivi cuéntá ñuyívi yóho. Ta sa naçaxi tuhun i xihín ná yo cúu mé ndó. Naçaxi ndó na ta nandiquiahva ndó na nuú i. Ta naçandúsa na tuhun ndó.

⁷ Ta viti cándaqa ini na ña tóco ndihi ña sahan ndó nuú i quíxi a cuéntá mé ndó.

⁸ Ta sa naçaxi tuhun i xihín ná tóco ndihi ña naçahan ndó nuú i ta nandiquehe vaha na ña. Ta sa naçandaqa ini na ña mé a ndaa naquixi i cuéntá mé ndó. Ta naçandúsa na ña naçindahá ndó yehe.

⁹ Ço xica tahví i nu ndó sahá ñayivi cuéntá ñuyívi yóho. Joo xica tahví i nu ndó sahá na naçahan ndó nuú i jáchj cúu ná cuéntá mé ndó.

¹⁰ Tóco ndihi na cúu cuéntá mí i cúu ná cuéntá mé ndó viti. Ta tóco ndihi na cúu cuéntá mé ndó cúu ri na cuéntá yehe va. Ta ndicáhnu ndivaha mí i sahá ña cája na.

¹¹ A cóo ga i ñuyívi yóho jáchj saa i nu ín mé ndó. Joo na naçaxi ndó yóho canduu tóo na ñuyívi yóho. Tátá Ndióxi, yij ndivaha cúu mé ndó. Xica tahví i nu ndó ña ná candaqa vaha ndó na cúu cuéntá mé ndó jáchj xihín ndéé mé ndó cuu candico na íchj cuéntá mé ndó. Já quéa in ná nduu ndihi na tá quiahva in cúu mé ndó xihín yehe.

¹² Jáchj nani ín i xihín ná ñuyívi yóho ndáa i na xihín ndéé mé ndó. Ta ni in tuhún toho táhan na naçahan ndó nuú i

cacomí i cuéntá saha cán coó nandihí saha. In túhún da nandihí saha cúú da janda sanahá nasahin saha ña ndihí saha dá já ná cuu xinú coo nuú ña nacahyi nuú tuhun Ndióxi sanahá.

¹³ Ta viti quee e ñuyiví yóho saa i nuú ín ndó jan. Joo cáhan i ña yóho xihin ndó nani ín i ñuyiví yóho já ná ndicutú ndaa ini na yóho xihin ña cáji íní na tá quiahva cáji íní mí i.

¹⁴ Sa nacaxi tuhun i tuhun mé ndó nu ná. Joo na cúú cuéntá ñuyiví cándají na na cúú cuéntá mí i jáchi coo cúú ná cuéntá ñuyiví yóho tá quiahva coo cúú toho yehe cuéntá ñuyiví yóho.

¹⁵ Coo xica tahví i nuú ndo ña ná tavá ndo na ñuyiví yóho. Ña cúní quea ná chindeé ndó na já ná a quee vaha tiñahá sacuahá xihin ná.

¹⁶ Tá quiahva coo cúú toho i da cuéntá ñuyiví yóho quiahva já coo cúú ga na cán ñayivi cuéntá ñuyiví.

¹⁷ Ta xica tahví i nuú ndo ña ná ndaja vii ndó na xihin tuhun mé ndó ña jánaha ndó nuú ná jáchi tuhun mé ndó cúú ña ndaa.

¹⁸ Ta tá quiahva nacaja ndó nachindahá ndó yehe tañu na ñuyiví yóho quiahva já chindahá ri yehe va na cúú cuéntá mí i tañu ñayivi cuéntá ñuyiví.

¹⁹ Ta ndiquiahva i mí i caja i ña cúní mé ndó já quea ná cuu ndiquiahva na yóho mé ná ndáha mé ndó sahá ña sa xini na ña ndaa.

²⁰ Ta a juú sahá na yóho cuití va xica tahví i nuú ndo, vaha. Xica tahví ri nuú ndó sahá na ná candúsa yehe chága chí nuú sahá tuhun cahan mé na yóho xihin ná.

²¹ Tátá Ndióxi, xica tahví i nuú ndo ña ná caja ndó ña in ná nduu tóco ndihí na cúú cuéntá mé ndó yóho. Ta caja ndó ña in ná nduu ndihí na xihin yó tá quiahva in cúú ndó xihin yehe ta in cúú yehe xihin mé ndó. Jáchi tá ná caja ndó ña in ná nduu tóco ndihí na já cuu candúsa ñayivi cuéntá ñuyiví ña mé a ndaa nachindahá ndó yehe vaxi i.

²² Nacaja i ña nandicáhnú na cán tá quiahva nandaja cáhnú ndó yehe. Já quea in ná nduu ndihí na tá quiahva in cúú mé ndó xihin yehe.

²³ Ta in cúú yehe xihin ná tá quiahva in cúú mé ndó xihin i já ná xinú coo ndihí na cacuu na tátuhun in víxí ñayivi. Ta já

na cuni ñayivi cuéntá ñuyiví ña mé a ndaa nachindahá ndó yehe vaxi i. Ta já ná cuni na ña quihvi ini ndó na tá quiahva quihvi ini ndó yehe.

²⁴ Tátá Ndióxi, nacaja ndó ña cómi i cuéntá sahá na yóho. Ta cúní ña ná coo na xihin i nuú coo i já ná cuni na ndá quiahva cáhnú cúú u jáchi nacaja ndó ña ná ndicáhnú ndivaha i. Jáchi janda tá camaní cava sahá saha ñuyiví quihvi ini ndó yehe.

²⁵ Tátá Ndióxi, cája ndó ña ndaa. Ta ñayivi cuéntá ñuyiví yóho coo xini toho na ndohó. Joo yehe xini vaha i ndohó ta na cúú cuéntá mí i yóho sa cándaa vaha ini na ña nachindahá ndó yehe.

²⁶ Sa nacaja i ña ná candaa ini na yo cúú mé ndó ta cája i ña ná candaa chága ini na saha ndo. Ta xihin ña yóho candaa ini na ña quihvi ini ndó na tá quiahva quihvi ini ndó yehe ta já in ná nduu na xihin i —nacachi Jesús xica tahví a nuú Ndióxi.

18

Tá natin na Jesús

(Mt. 26:47-56; Mr. 14:43-50; Lc. 22:47-53)

¹ Tá nandihí naxica tahví Jesús nuú Ndióxi já naqueta mé á xihin na xica tuun xihin a cán cuahan chí inga xoo yivi naní Cedrón. Ta yati cán cáa cuaha yitó cuhi nuú naquihvi Jesús xihin na xica tuun xihin á.

² Ta Judas Iscariote, mé da jícó túhún ñahá cán sa xini vaha da nuú sahín Jesús xihin na xica tuun xihin á jáchi cuahá tañu nanditútú ndihí na cán.

³ Ña cán quea ndáca da in táhndá soldado ta ndáca da java policía, na ndaa veñuhu cáhnú ñuu Jerusalén cán. Cúú ná na nachindahá na sacuahá nuú jutú xihin na fariseo. Ta jandá johó ñehe na ñaha ná cani na a cuahan na ta ñehe ri na ití yúsá jándiyéhe na nuú ná.

⁴ Joo sa xini vaha Jesús ndía ndítahan ndoho a sahá ña cán quea naqueta nuú ná já nandaca tuhún a na já nacachi a já xihin ná:

—Yo ndínducú ndo já —nacachi a.

⁵ Já nanducú ñehe na cán tuhun nuú á já nacachi na já xihin á:

—Ndínducú nde Jesús, da ñuu Nazaret —
naçachi na.

—Yehe cúú u da ndínducú ndo —naçachi
a.

Ta tañu na cán ndácaan ri Judas, da
najicó túhún ñahá cán.

⁶ Tá naçachi Jesús: “Yehe cúú u da
ndínducú ndo”, já naçica jata na ta naçuyu
na nu ñúhu.

⁷ Já nandaca tuhún tucu Jesús na já
naçachi a já xihín ná:

—Yo ndínducú ndo já —naçachi a.

Já nanducú ñehe na cán tuhún nu á já
naçachi na já xihín á:

—Jesús, da ñuu Nazaret ndínducú nde —
naçachi na.

⁸ Anda já naçachi tucu Jesús já xihín ná:

—Sa naçachi vi xihín ndo ña yehe cúú u
da ndínducú ndo. Sahá ña cán quea quiahva
ndó ñamaní nuú na yóho ña ná quee na
cuhun na —naçachi Jesús.

⁹ Naçachi Jesús ña yóho já ná a tiin na na
xica tuun xihín a cán já ná xinu coo nuú
tuhún ña naçachi mé á tá naçica tahví a nu
Ndióxi tá naçachi a já: “Tátá Ndióxi, ni in
tuhún toho táhan na nasahan ndó nuú i coo
nandihí saha jáchi nasandaa vaha i na.”

¹⁰ Ta ndaja coo nasañee in machítí nu
tóco Simón Pedro. Já natuhun da ña ta
nachituhun dá johu cuáha in da naní Malco,
da cúú mozo nuú da cúú sacuaça chága nu
ndíhi jutú.

¹¹ Anda já naçachi Jesús já xihín Pedro:

—Chicaan vaha machítí jan. Jáchi sa
nasacu ini Ndióxi, tátá i ndoho ini i tóco
ndihí ña vaxi nuú i ta iin tiahva i ndoho ini
i —naçachi Jesús.

*Ñehe na Jesús cuahan na nuú da sacuaça
chága nu ndíhi jutú*

(Mt. 26:57-58; Mr. 14:53-54; Lc. 22:54)

¹² Tóco ndihí soldado cán xihín da sáhdá
chuun nu dá xihín java na ndáá veñuhu cán
natiin na Jesús ta naçató na a.

¹³ Jihna ñúhú ñehe na a nasahan na nu
Anás, da cúú xojo Caifás, da sacuaça chága
nu ndíhi jutú mé cuia cán.

¹⁴ Mé Caifás yóho cúú dá da naçachi xihín
na Israel ña vaha chága ña ná quivi in taa
nu ndíhi ñayivi já ná a ndíhi saha tóco ndihí
ñayivi.

Chíjehé tuhún Pedro ña xini da Jesús

(Mt. 26:69-70; Mr. 14:66-68; Lc. 22:55-
57)

¹⁵ Ta ndaja coo Simón Pedro xihín inga
táhan da xica tuun xihín Jesús cán ndíco na
jata nu ñehe na a cuahan na. Ta da inga
cán xini táhan vaha da xihín da sacuaça
chága nu ndíhi jutú ña cán quea nañehe dá
ñamaní ndihvi da xihín Jesús yuyehé vehe
jutú cán.

¹⁶ Joo naçandoo Pedro jata véhe yati yehé
cán. Joo da inga cán nandicó coo da já
naçica da ñamaní nu ña ndáá yehé vehe
jutú cán ña ná quiahva ña ñamaní nu Pedro
quihvi da. Sahá ña cán naquihvi Pedro chí
yuyehé vehe cán.

¹⁷ Ta mé ña ndáá yehé cán nandaca
tuhún ña Pedro já naçachi ña já xihín dá:

—Á a juú in táhan da xica tuun xihín Jesús
cúú yóho —naçachi ña.

Anda já naçachi Pedro já xihín ña:

—Coo cúú toho i in táhan da xica tuun xihín
á —naçachi Pedro.

¹⁸ Ta mé ñuu cán vixi xini na cúú mozo
xihín na ndáá veñuhu cán. Sahá ña cán
quea nandicahmi na ñúhu ta nandaca
nduu na xitúni na ta tañu na cán cándichi ri
Pedro xitúni da.

*Ndája ndichí da sacuaça chága nu ndíhi
jutú Jesús*

(Mt. 26:59-66; Mr. 14:55-64; Lc. 22:66-
71)

¹⁹ Tá nandihí já naçasahá da sacuaça
chága nu ndíhi jutú cán ndája ndichí da
Jesús já nandaca tuhún da mé á saha na
naçica tuun xihín á. Ta nandaca tuhún da
mé á saha ña najánaça nuú ñayivi.

²⁰ Anda já naçachi Jesús já xihín dá:

—Coo naçahan jehé toho i xihín ñayivi tá
najánaça i nu ná. Ní tiempo najánaça i
tuhún Ndióxi nu ná ini veñuhu ta quiahva
já najánaça i nu ná nu táca na ini veñuhu
cánu ñuu Jerusalén. Ta ni in tuhún toho
ñaha coo najánaça jehé e nu ná.

²¹ Ta viti cachi ndó xihín i ndá cuénta
quea ndaca tuhún ndó yehe saha ña yóho.
Cuáhan ndó ndaca tuhún ndo ñayivi, na
najánaça i nu cán já ná ndicani na cán nu
ndo ndaja cáa ña najánaça i nu ná. Jáchi xini
vaha na ña naçahan i xihín ná —naçachi
Jesús.

22 Tá ñacachi Jesús ña yóho já ñacani in da ndáá veñuhu cán jahndá nuu á já ñacachi da já xihín á:

—A váha toho ndiñehe yuhun nuú da sacuaḥa chága nu ndíhi jutú —ñacachi da.

23 Anda já ñacachi Jesús já xihín dá:

—Tá co váha ná caja i, caḥan xihín i ndá cúu ña coó ñacaja vaha i. Joo tá ñacaja vaha i ndá cuénta quea cánun yehe —ñacachi Jesús.

24 Tá ñandihí já ñasañehe na Jesús nuú Caifás, da sacuaḥa chága nu ndíhi jutú cán ta sa já ndíco a xihín yóho ñehe na a cuahan na.

Chíjehé tuhun tucu Pedro ña xini da Jesús (Mt. 26:71-75; Mr. 14:69-72; Lc. 22:58-62)

25 Ta ndaja coo ín coo yíi Pedro xítúni da xihín java na ndúu cán. Ta já ñacasáha na cán ndáca tuhún na da já ñacachi na já xihín dá:

—Á a juú táhan da xíca tuun xihín Jesús cúu yóhó —ñacachi na.

Joo ñachijehé tuhun Pedro ña xini da Jesús já ñacachi da já:

—Co cúu toho i in táhan da xíca tuun xihín á —ñacachi da.

26 Joo tá ñandihí já ñandaca tuhún in da cúu mozo nuú da sacuaḥa chága nu ndíhi jutú cán, da cúu in táhan da ñachituhun Pedro johó. Ta ñacachi da já xihín Pedro:

—Cája i cuénta ñaxini i yohó nu cáa cuaha yitó cuihi nuú ñatiin na Jesús cán —ñacachi da.

27 Joo ñachijehé tuhun tucu Pedro ña xini da Jesús ta ivi laá ñacana chéle tá quiahva ñacachi Jesús xihín dá coo.

Ñehe na Jesús cuahan na nu Pilato

(Mt. 27:1-2, 11-14; Mr. 15:1-5; Lc. 23:1-5)

28 Ta tá ñatívi yaa já ñatavá na Jesús vehe Caifás cán já ñehe na a cuahan na vechúun nu ndácaan da cúu gobernador cuénta ñuu Roma. Joo mé na Israel coó ñaxeen na ndihvi na vechúun cán jáchi cáchí ley na ña tá ná ndihvi na vehe na tóho já cuu yuxu na ta já a cúu cajíni na vicó pascua ña coo quiví itaan.

29 Sahá ña cán quea ñaqueta Pilato, da cúu gobernador jatá véhe caḥan da xihín na Israel já ñacachi da já:

—Ndá cuachi ñacaja da yóho —ñacachi Pilato.

30 Já ñanducú ñehe na Israel cán tuhun nu dá já ñacachi na já:

—Ta tá a juú taa quini ná cacuu da yóho ta a cañehe toho nde da quixi da nu ndó, nduu —ñacachi na.

31 Já ñacachi Pilato já xihín ná:

—Mé ndó cañehe ndó da cuhun ndo. Caja vií ndó saḥa dá tá quiahva sáhdá ley mé ndó —ñacachi Pilato.

Já ñacachi na Israel cán já xihín dá:

—Ña cúni nde quea ná cata caa ndó da ndica crúxu jáchi cúu nde na Israel ta co ñehe toho nde ñamaní cahní nde ñayivi —ñacachi na.

32 Ta xihín ña yóho ñaxinu coo nuú ña ñacachi Jesús tá ñacachi a ndá quiahva quivi a.

33 Tá ñandihí já ñandihvi tucu Pilato ini vechúun cán ta ñacana da Jesús já ñandaca tuhún ñahá da já ñacachi da já xihín á:

—Á mé a ndaa cúun in rey, da cómi cuénta saḥa na Israel —ñacachi da.

34 Já ñacachi Jesús já xihín dá:

—Á jini mé ndó ñaquixi ña ndáca tuhún ndó yehe. Á ndáca tuhún ndó yehe saḥa ña ñacachi ñayivi saḥa i —ñacachi a.

35 Anda já ñacachi Pilato já xihín Jesús:

—Co cándaq ini i saḥa ña yóho jáchi co cúu yehe da Israel. Mé ñayivi Israel jan xihín na sacuaḥa nuú jutú cúu na ñandiquiahva yohó ndahá i. Ndía ñacajún, vaha —ñacachi Pilato.

36 Já ñanducú ñehe Jesús tuhun nu dá já ñacachi a já xihín dá:

—Co cómi i cuénta saḥa ñayivi tátuhun cája ñayivi cuénta ñuyiví. Jáchi tá ná cacomí i cuénta saḥa ná tátuhun na ñuyiví já quea cuu caja i xihín na cómi i cuénta saḥa ña ná caní táhan na xihín na Israel ña ná a tíin na yehe. Joo co cómi toho i cuénta saḥa ná tátuhun cája ñayivi cuénta ñuyiví —ñacachi a.

37 Anda já ñacachi tucu Pilato já xihín Jesús:

—Á cúun da cómi cuénta saḥa ñayivi, dá já —ñacachi da.

Já ñacachi Jesús já xihín dá:

—Ñā ndaa quēa cáhan ndó jan. Yehe cúu u da cómi cuéntá sahá ñayivi cuéntá mí i jáchi ñacacu u ñuyivi yóho ñā ná caja i já. Ta naquixi i já ná caxi tuhun i ñā ndaa xihín ñayivi. Ta tóco ndihi na cúu cuéntá ñā ndaa xini joho ñā cáhan i —ñacachi a.

³⁸ Já ñacachi tucu Pilato já xihín á:

—Yo xini ndia cúu ñā ndaa —ñacachi da.

Tá nandihí já ñaqueta tucu Pilato vechúun cahan da xihín na Israel já ñacachi da já xihín ná:

—Chí co ndíñehe mí vi ndá cuachi quēa ñacaja da yóho.

³⁹ Tañu mé víco pascua ín in costumbre ndo ñā ná janí i in da sá ndacaan vecaa. Ta viti cachi ndó xihín i á co cúni ndó ñā ná janí i da cúu rey nuú na Israel —ñacachi Pilato.

⁴⁰ Ta já ñacasáhá tóco ndihi na cán cáyuhú cóhó na já cáchí na já:

—Ajání toho ndó Jesús jan. Vaha chága ná janí ndó Barrabás jan —cáchí na cáyuhú na nu Pilato.

Ta Barrabás cán ñasacuu da in taa cuíhná.

19

Sácú na sahá Jesús quivi a

¹ Andá já ñasahnda Pilato chuun ñā ná jácaxáhan na Jesús xihín churrú.

² Ta da cúu soldado cán najehén da in tiyivi xihín íñu já ñachinúu da a jini á ta ñachinúu da in jáhma cuáhá túun jatá.

³ Tá nandihí já ñacativi da nu á sácú ndaa ichi ñahá da já ñacachi da já xihín á:

—Cáhnú nahá ná cacuu yóhó, da cúu rey nuú na Israel —ñacachi da.

Andá já cáni da nuú á.

⁴ Tá nandihí já ñaqueta tucu Pilato chí jatá já ñacachi da já xihín tóco ndihi na ndúu cán:

—Candehé ndo. Tavá ñehe e Jesús nu ndo já ná candaa ini ndó ñā coó toho cuachi da ndítahan i —ñacachi da.

⁵ Tá nandihí já ñatavá ñehe Pilato Jesús ta sa já cánúu tiyivi íñu jini á. Ta sa já tácaa jáhma cuáhá túun jatá ñaqueta. Andá já ñacasáhá cáchí Pilato já:

—Candehé ndo. Yóho ín da —ñacachi da.

⁶ Joo na sacuaña nuú jutú xihín na ndáa veñuhu tá ñaxini na Jesús já ñacasáhá na cáyuhú cóhó na já cáchí na já:

—Cata caa ndó da ndica crúxu, cata caa ndó da —cáchí na.

Andá já ñacachi Pilato já xihín ná:

—Mé ndó cañehe ndó da cuhun ndo cata caa ndó da ndica crúxu tá cúni ndo. Jáchi yehe co ndítahan i ndá cuachi ñacaja da —ñacachi Pilato.

⁷ Andá já ñacachi na Israel cán já xihín Pilato:

—Nu ley mé nde ndítahan quivi da jáchi cáchí da cúu dá in túhún jini já jahyi Ndióxi —ñacachi na.

⁸ Tá ñaxini joho Pilato cán ñā yóho já nayihví chága ví da.

⁹ Já ñaquihvi tucu Pilato xihín Jesús ini vechúun cán já ñandaca tuhún da mé á já ñacachi da já xihín á:

—Ndá ñuu ñaquisún já —ñacachi da.

Joo coó ñanducú ñehe Jesús tuhun nu dá.

¹⁰ Já ñacachi tucu Pilato já:

—Ndá cuéntá quēa co cúnun nducú ñehún tuhun nuú i. Á co xini tohún ñā cuu cahnda i chuun ñā ná cata caa na yohó ndica crúxu. Ta cuu janí ri yohó ñā ná queún cuhun tá cúni —ñacachi da.

¹¹ Andá já ñanducú ñehe Jesús tuhun nu dá já ñacachi a já xihín dá:

—Ni in túhún toho ñaha co núná nu ndó caja ndó xihín i tá co sahan Ndióxi, tátá i ñamaní nu ndo. Joo mé a ndaa ín chága cuachi nuú da ñandiquiahva yehe ndáha ndó a juú ga ndóhó —ñacachi Jesús.

¹² Andá já ñanducú Pilato ndá quiahva caja da janí da Jesús ñā ná quee a cuhun a. Joo coó ñaxeen na Israel ta ñacasáhá na cáyuhú cóhó na nu dá já cáchí na já:

—Tá ná janí ndó Jesús jan já quēa náha ñā co cúu ndó da ñehe táhan vaha xihín da cómi cuéntá sahá ñayivi ñuu Roma. Jáchi Jesús jan cáchí da ñā cúu dá da cómi cuéntá sahá ñayivi ta xihín ñā yóho jándihihvi da emperador, da cómi cuéntá sahá ñayivi ñuu Roma —ñacachi na.

¹³ Tá ñaxini joho Pilato ñā yóho já ñasahnda da chuun ñā ná tavá na Jesús. Ta ñasacoo mé dá nu sácoo da sáhdá chuun vechúun. Mé nu sácoo da cán naní a Gabata tuhun hebreo. Mé tuhun yóho cúni cachi a nuú ñaquihvi piso yuu.

¹⁴ Nayaha tóco ndihi ñā yóho tá cámaní in quivi coo víco pascua. Ta cúu á tátuhun

caxivi ta nandaca ndichi Pilato já nacachi da já xihín na Israel cán:

—Jan ín da cúu rey nu ndo —nacachi da.

15 Joo na cán nacasáhá tucu na cáyuhú cóhó na nu dá já cáhí na já:

—Cahní ndó da. Ná quivi da. Cata caa ndó da ndica crúxu —cáhí na.

Já nacachi Pilato já xihín ná:

—Ama ná cata caa ri da cúu rey nu ndó ndica crúxu —nacachi Pilato.

Anda já nacachi na sacuahá nuú jutú cán já:

—Da cómí cuéntá sahá ñuu Roma, in túhún da cán cuití va cúu rey nuú nde —nacachi na cán.

16 Anda já nandiquiahva Pilato Jesús nu ná ña ná cañehe na a cuhun na cata caa na a ndica crúxu.

Cáta caa na Jesús ndica crúxu

(Mt. 27:32-44; Mr. 15:21-32; Lc. 23:26-43)

17 Nacinúu na in crúxu joco Jesús já ndójo a do cuahan chí xiqui naní a nu ndúu lásá yiquí jíní ndii. Ta cáhí na Gólgota xihín á tuhun hebreo.

18 Ta cán nacata caa na a ndica crúxu ta nacata caa ri na inga ivi da xihín á, in in da in in xoo jín á. Ta tácaa Jesús mahnú ndíví da cán.

19 Ta nasahnda Pilato chuun ña ná cuhun java na chítivi ndaa na in tabla ndica crúxu yati jini Jesús cán. Ta nu tabla cán nacahyí na: “Da yóho cúu Jesús, da ñuu Nazaret, da cúu rey nuú na Israel.”

20 Ta cuahá na Israel nacahvi na ña nacahyí cán jáchi yati yuhú ñuu Jerusalén nacata caa na Jesús. Ta ña ndáa nu tabla cán nacahyí na ña tuhun hebrero ña cáhan na Israel xihín tuhun latín ña cáhan na ñuu Roma xihín tuhun griego ña cáhan na nación Grecia.

21 Ta tá naxini na sacuahá nuú jutú cán ña yóho já nacachi na já xihín Pilato:

—A cáhyí toho ndó ña cúu da jan rey nuú na Israel. Vaha chága ná cahyí ndó ña cáhí da cúu dá rey nuú na Israel —nacachi na.

22 Já nanducú ñehe Pilato tuhun nu ná já nacachi da já xihín ná:

—Coo tá coo ña sa nasacu u ta a tává toho i ña —nacachi da.

23 Tá nandihí nacata caa mé soldado Jesús ndica crúxu, já natiin da jahmá a ta nandicahnda nu táhan ndicomí dá ña. Ta cotó ndéé a cúu á ña nacavaha ní na ña jini á ta janda sahá ta coo nacucu na ña. Ta natiin da ña

24 ta já nacachi xihín táhan da já:

—Ná a jácuachí toho í jáhma jan já ná coo ní yij va. Ña cuu caja í quea cajiquí yo sahá ta ndá da ná quee vaha, da cán ndiquehe jáhma jan —nacachi xihín táhan da cán.

Nacaja da ña yóho já ná xinu coo nuú tuhun Ndióxi nacahyí sanahá tá nacachi a já: “Nandicahnda nu táhan mé ná jahmá i ta já nasajiquí na sahá cotó ndéé e ta da naquee vaha cán nandiquehe da ña.” Quiahva já nacahyí tuhun Ndióxi sanahá. Ta quiahva já nacaja soldado cán xihín jáhma á.

25 Ta jini mé crúxu nuú nacata caa na Jesús cán nasandichi náná a xihín quihvi ña cán xihín María, ña cúu ñajihí Cleofas xihín María, ña ñuu Magdala.

26 Tá naxini Jesús ña cándichi náná a saha crúxu ta tá naxini a cándichi yehe, da naní Juan, da xica tuun xihín á, da quihvi ndivaha ini mé á chí já nacachi a já xihín náná a:

—Da jan cúu tátuhun jahyí ndó viti —nacachi Jesús.

27 Tá nandihí já nacachi a já xihín mé da xica tuun xihín a cán:

—Candaa vaha ña jáchi cúu ña tátuhun nánún viti —nacachi Jesús.

Tá naxini johó da ña yóho já nandiquehe vaha da María cán ndáa da ña tátuhun náná da.

Tá naxihí Jesús

(Mt. 27:45-56; Mr. 15:33-41; Lc. 23:44-49)

28 Tá sa nayaha tóco ndihí ña yóho já sa xini vaha Jesús ña sa naxinu coo tóco ndihí ña nacachi tuhun Ndióxi coo. Ta naxinu coo nuú ña nacahyí nuú tuhun Ndióxi sahá Jesús sanahá tá nacachi a já:

—Íchi ini i ticuú.

29 Mé cán nasandichi in tindojo nachutú jini xihín vino iyá. Ta najándaxi na in ticoto xihín vino cán já nacató da ña nuú in yito

naní hisopo ta já năchitivi na ña yati yúhu Jesús ña ná coho a dō.

³⁰ Andá já năxihí Jesús mé vino iyá cán já năcachi a já:

—Sa năyaha tóco ndihí ñaha ña ndítahan ndoho i —năcachi a.

Já nănditōo jico á. Năxihí a.

Tá nătuxú nă in yító tátuhun póyá yicá ndícá Jesús

³¹ Ta ndaja coo năsaħan nă Israel cán năxica nă ñamaní nu Pilato ña ná cahnda da chuun ña ná cahnu da lásá saħá da tácaa ndica crúxu cán já ná quivi yachí da. Jáchí coó năxeen nă Israel cán ña ná taca ndii ndica crúxu inga quivi itaan. Jáchí cacuu a quivi ndiquehe ndée ná ta cacuu a in quivi yí ndivaha nu ná.

³² Saħá ña cán quéa năquee soldado năsaħan da já năsaħnu da lásá saħá ndíví da tácaa ndica crúxu jín Jesús cán.

³³ Joo tá năcayati da nu Jesús ña cahnu da lásá saħá, năxini da ña sa năxihí va mé á saħá ña cán quéa coó năsaħnu da lásá saħá.

³⁴ Joo in táhan soldado cán nătuxú da in yító tátuhun póyá yicá ndícá a já năcana nii xihín ticuí cán.

³⁵ Ta yehe cúu u da ndícani ña yóho nu ndo ta năxini i ña xihín nuú i. Ta cúu á ña ndaa. Ta cánda cáxí ini i ña cáhan i ña ndaa já ná candúsa ndó ña ndícani i nu ndo.

³⁶ Jáchí tóco ndihí ña yóho năyaha já ná xinu coo nuú tuhun Ndióxi tá cáchí a já: “Ni in túhún toho lásá da, a cáhnu nă”, já cáchí tuhun Ndióxi.

³⁷ Ta inga tucu cáchí tuhun Ndióxi já: “Cuni tucu na da, da nătuxú nă póyá yicá ndícá”, já năcahyí nă nuú tuhun Ndióxi saħahá.

Tá najánduxu nă Jesús

(Mt. 27:57-61; Mr. 15:42-47; Lc. 23:50-56)

³⁸ Tá sa năyaha tóco ndihí ña yóho já năxinu coo in da naní José, da ñuu Ari-mateo, nu Pilato. Ta năxica da ñamaní nu Pilato ña ná ndiquehe da yiquí cuñu Jesús cañehe da cūhun da. Mé José yóho cúu dá cuéntá Jesús joo coó nănaħa tuhun da saħá jáchí yíhví da nă Israel. Ta ndaja coo năsaħan Pilato ñamaní nu dá ña ná

ndiquehe da yiquí cuñu Jesús. Chí năsaħan da năndiquehe da ña.

³⁹ Ta jári ín in da naní Nicodemo ta ñéhe da tátuhun oco uxu kilo perfume, dó năcavaha xihín ña naní mirra ta xihín ña naní aloes. Mé Nicodemo yóho cúu da da năsaħan nănditúhún xihín Jesús tá ñuu.

⁴⁰ Ña cán quéa nătiin José xihín Nicodemo yiquí cuñu Jesús ta năchitivi nă ña xihín in jáhma vaħa ña năchindaxi da xihín mé perfume cán. Jáchí quiaħva já ín costumbre nă Israel cája na tá jánduxu nă ndii.

⁴¹ Ta yati nuú năcata caa na Jesús cán năsaħiin nu cáa cuħa yitó cuħi. Ta tañu yító cán năsaħiin in yávi ndica cáva nuú cuu chicaan nă ndii. Mé cáva cán năsaħuu a ña saħá jáchí ni in ndii a ñaha chicaan nă ini ña cán.

⁴² Ta cán năchicaan da yiquí cuñu Jesús jáchí yati năsaħiin a. Ta númi dá jáchí sa năcativi quivi ndiquehe ndée nă Israel.

20

Tá nănditacu tucu Jesús

(Mt. 28:1-10; Mr. 16:1-8; Lc. 24:1-12)

¹ Ta tá sa năyaha mé quivi ndiquehe ndée ná ta naha vaħa chá quivi domingo tá cámaní queta candii já năsaħan María, ña ñuu Magdala nuú năchicaan nă yiquí cuñu Jesús cán. Já năxini ña ña năcaxoo yuu cáhnu năsandaji yuhú cáva cán.

² Andá já năxinu ña năsaħan ña nu ín Simón Pedro xihín inga da năxica tuun xihín Jesús, da quíhví ndivaha ini mé á cán. Ta tá năxinu coo ña nu dá já năcachi ña já xihín dá:

—Nătavá nă yiquí cuñu xitoho i ta yo xini ndájá năsacu na ña —năcachi ña.

³ Andá já năqueta Pedro xihín inga da năxica tuun xihín Jesús cán ndáva da cuħan da nuú năsandacaan Jesús.

⁴ In nuú xinu ndíví da cuħan da. Joo nihí chága xinu da inga cán a juú ga Pedro ña cán quéa jhna ñúhú da năxinu coo da nuú năndacaan Jesús cán.

⁵ Andá já năcandayi da sándehe da nuú năsandacaan Jesús cán. Já năxini da ñúhu ticoto năsatíví a cán cuití va. Joo coó năndihví da janda mé ini cáva cán.

⁶ Anda já naxinu coo Simón Pedro ta nandihvi da cán. Ta naxini da mé ticoto nasativí yiquí cuñu Jesús cán.

⁷ Ta naxini da ticoto ña nasativí jini á naxaxoo jín ña cán ta nanditivi vaha ña.

⁸ Anda já nandihvi ri da inga cán, da naxinu jihna ñúhú. Ta tá naxini da ña coo yiquí cuñu Jesús ndácaan já nacandúsa da ña nanditacu tucu a.

⁹ Jáchí coo nacandaá ini na cúu cuéntá mé á ña cáhí tuhun Ndióxi nu cáhí a ña nditacu tucu Jesús.

¹⁰ Tá nandihí já ndáca táhan ndívi da naxica tuun xihín Jesús cán nandicó coo da vehe nuú nasanduu na.

*Tá naxini María, ña ñuu Magdala Jesús
(Mr. 16:9-11)*

¹¹ Ta nani nayaha tóco ndihí ña yóho, nandicó coo María mé nuú nasandacaan yiquí cuñu Jesús. Sácu ña íin ña yuhú cáva cán. Ta nani sácu ña nacandayi ña ndicoto nihni ña ini cáva cán.

¹² Já naxini ña ivi tátó Ndióxi, ña ndíxi jahmá yaa. Ndáa ndúu coo a nuú nasahjin yiquí cuñu Jesús: in a nuú nasahjin jini Jesús ta inga nuú nasahjin sahá.

¹³ Anda já nandaca tuhún tátó Ndióxi cán María já nacachi a já xihín ña:

—Ndá cuéntá queá sácún —nacachi a.

Já nacachi ña já xihín á:

—Sácu u jáchí naquehe na yiquí cuñu Jesús, xitoho i ta coo xini ndájá nasacu na ña —nacachi ña.

¹⁴ Tá jacá nacachi uun ña ña yóho já nandicoto nihni ña já naxini ña in a cándichi a nu ña já va joo coo nandicuni ña ña cúu á Jesús.

¹⁵ Anda já nandaca tuhún Jesús ña já nacachi a já xihín ña:

—Ndá cuéntá queá sácún. Yo já ndínducún —nacachi a.

Ta nacahan María ña mé da cahan xihín ña cúu dá da ndáa mé yitó cuíhi cáa cán. Sahá ña cán queá já nacachi ña já:

—Tá natavún yiquí cuñu Jesús ña nasandacaan ini cáva yóho, caxi tuhún xihín i ndájá nasacún ña já ná cuhun i ndiquehe e ña —nacachi María.

¹⁶ Anda já nacachi Jesús já xihín ña:

—María.

Anda já nacava nuu ña já nandicuni ña Jesús ta nacahan ña tuhun hebreo xihín á já nacachi ña já:

—Raboni —mé tuhun yóho cúni cachi a maestro.

¹⁷ Já nacachi Jesús já xihín ña:

—A tíin tuún yehe. Jáchí a ñaha toho ndindita i cuhun i indivi nu íin Ndióxi, tátá i. Joo cuahán caxi tuhún xihín na cúu cuéntá mí i ña cuhun i nu íin Ndióxi, tátá i, mé a cúu tátá mé ndó viti. Cúu á Ndióxi nu mí i ta cúu ri a Ndióxi nu mé ndó —nacachi Jesús.

¹⁸ Anda já ndáva María, ña ñuu Magdala nasahan ña nandicani ña nuú na naxica tuun xihín Jesús cán ña naxini ña mé á. Ta nandicani ña ña nacachi Jesús xihín ña.

*Tá naxini na naxica tuun xihín Jesús mé á
(Mt. 28:16-20; Mr. 16:14-18; Lc. 24:36-49)*

¹⁹ Ta tá nacuaá mé quivi domingo cán já nanditútú tóco ndihí na naxica tuun xihín Jesús cán. Nuhu tuun na ini vehe ta nachicaji tuun na yéhé jáchí yíhvi na xinu na Israel cán tiin ñahá na. Ta in cuití naxinu coo Jesús nu ná ta nandaca ndichi a mahñú ndaa nu ndúu na cán. Já nacahan Ndióxi a xihín ná já nacachi a já:

—Ná coo vaha ini ndó —nacachi a.

²⁰ Ta tá nacachi a ña yóho já najánaha ndáha á xihín yicá ndicá a nu ná ña ná candaa ini na ña jivi cúu mé á. Ta nacajii íni na tá naxini na a.

²¹ Tá nandihí já nacachi tucu Jesús já xihín ná:

—Ná coo vaha ini ndó. Tá quiahva nacaja Ndióxi, tátá i nachindahá a yehe ñuyiví yóho quiahva já chindahá ri yehe va ndohó cuhun ndo caxi tuhun ndó xihín ñayivi saha mí i —nacachi Jesús.

²² Anda já nativi a nu ná já nacachi a já xihín ná:

—Ndiqehé ndó ínimá yii Ndióxi.

²³ Ta tá ná caja cáhnu ini ndó sahá cuachi ñayivi, na cán cúu na sa nacaja cáhnu ini Ndióxi saha. Ta tá ná a caja cáhnu ini ndó sahá cuachi, na cán cúu na coo nacaja cáhnu ini Ndióxi saha —nacachi Jesús.

Tá naxini xihín nuu Tomás Jesús

²⁴ In táhan da naxica tuun xihín Jesús, da naní Tomás, da cahan na cuatí xihín

cán, coó toho da nasah̄iin xih̄ín n̄a cán tá naquixi Jesús nu ndúu na.

²⁵ Tá n̄andihi já n̄acaxi tuhun n̄a java cán xih̄ín dá já n̄acachi na já:

—Naxini nde Jesús, xitoho í —n̄acachi na.

Já n̄anducú ñehe Tomás tuhun nu ná já n̄acachi da já xih̄ín ná:

—A cándusa toho i ña cáchí ndo j̄anda quiahva ná cuni xih̄ín nuú i ndáha Jesús ta já jáquihvi i nducu ndahá i ini yávi nuú naquihvi clavo n̄acaja n̄a cán. Ta xíní ñúhú jáquihvi i nducu ndahá i ini yávi n̄acaán n̄a yicá ndicá a cán. Anda jáví candúsa i ndohó —n̄acachi da.

²⁶ Tá nayaha un̄a quivi já n̄andique táhan tucu n̄a n̄axica tuun xih̄ín Jesús cán ini in vehe. Ta mé tañu já nasah̄iin Tomás xih̄ín ná. Ta quiahva já nasaji tuun tucu na yéhe vehe nu ñúhu n̄a cán. Anda já in cuití n̄axinu coo Jesús nu ná ta n̄andaça ndichi a mah̄nú n̄a cán ta n̄acahan Ndióxi á xih̄ín ná já n̄acachi a já xih̄ín ná:

—Ná coo vaha ini ndó —n̄acachi a.

²⁷ Tá n̄andihi já n̄acachi a já xih̄ín Tomás:

—Naha quíi jáquihvi nducú ndáhun ini ndahá i ta candehé ini ndahá i nuú naquihvi clavo. Ta jáquihvi nducú ndáhun yicá ndicá i já ná cunún nuú najándicuehe n̄a yehe. A cáhvi ivi j̄oho inún jáchi xíní ñúhú candúsún yehe —n̄acachi Jesús.

²⁸ Anda já n̄acatóntó Tomás já n̄acachi da já:

—Mé ndó cúu xitoho i ta cúu ndó Ndióxi ña cája cáhnu i —n̄acachi da.

²⁹ Anda já n̄acachi Jesús já xih̄ín dá:

—Mé a ndaa cándúsún yehe viti jáchi n̄axinún yehe. Joo cajji ini ñayivi, n̄a cándusa yehe vatí coó i xíní n̄a xih̄ín nuú ná —n̄acachi Jesús.

Cáhan Juan ndá sahá n̄acahyí da libro yóho

³⁰ Cuahá ndivaha java ga ña xitúhún n̄acaja Jesús nuú n̄a n̄axica tuun xih̄ín a cán vatí co ná cahyí a nu libro yóho.

³¹ Joo ña yóho n̄acahyí a já ná candúsa ndó ña cúu Jesús da n̄achindahá Ndióxi cacomí cuénta sahá ñayivi, mé a cúu in túhún j̄ini já jahyi Ndióxi. Ta sahá ña cándeé ini ndó mé á cuu catacu ndó anda ama cáa quivi.

21

Náha Jesús mé á nuú us̄a táhan n̄a n̄axica tuun xih̄ín a cán

¹ Tá sa nayaha ña yóho já nanaha tucu Jesús mé á nuú n̄a n̄axica tuun xih̄ín á nani nasanduu na yati yuhú tañuhú naní Tiberias cán. Ta quiahva j̄oho nasah̄iin a.

² In tañu ndúu tútú Simón Pedro xih̄ín Tomás, da cáhan n̄a cuatí xih̄ín cán. Ta jári ndúu Natanael, da ñuu Caná cuénta Galilea cán xih̄ín ndíví da cúu jahyi Zebedeo cán. Ta nasanduu ri inga ivi ga táhan da n̄axica tuun xih̄ín Jesús.

³ Anda já n̄acahan Simón Pedro xih̄ín tóco ndihi n̄a cán já n̄acachi da já xih̄ín ná:

—Cuhun i tavá i tiyacá —n̄acachi da.

—Cuhun ri ndehe va tavá nde tiyacá xuhun —n̄acachi n̄a cán xih̄ín dá.

Já n̄andihvi ndihi na ini barco cuahan n̄a tavá n̄a tiyacá. Joo coó tiyacá natavá n̄a mé ñúu cán.

⁴ Ta tá sa cuahan ndúcú t̄ivi já n̄acanaha Jesús yuhú ticuú cán. Joo n̄a n̄axica tuun xih̄ín a cán co xíní n̄a ña cúu á Jesús.

⁵ Anda já n̄acayuhú Jesús ndáça tuhún á n̄a já n̄acachi a já xih̄ín ná:

—Á coó toho tiyacá natavá ndo, ñani —n̄acayuhú a.

—Coó mé rí ná tavá nde —n̄anducú ñehe na tuhun nu á.

⁶ Anda já n̄acachi tucu Jesús já xih̄ín ná:

—Jácana tucu ndó ñunu ndó chí xoo cuaha barco jan já tavá ndó ri —n̄acachi a.

Anda já najácana na ñunu ná cán xoo cuaha barco ta tá n̄andihi chí co ndéé n̄a tavá n̄a ñunu cán jáchi a juú quiahva n̄achutú ndaa ña xih̄ín tiyacá.

⁷ Anda já n̄andicahan yehe, da quihvi ndivaha ini mé a cán já n̄acachi i já xih̄ín Pedro:

—Cúu á Jesús, xitoho í —n̄acachi i.

Tá n̄axini j̄oho Simón Pedro ña cúu a cán Jesús já n̄andicandixi da cotó da jáchi coó toho cotó da ndíxi da, nduu. Tá n̄andihi já ndáva da cuahan da jítá da ticuú chí yuhú tañuhú cán.

⁸ Tá n̄andihi já n̄axinu coo java ga n̄a n̄axica tuun xih̄ín Jesús cán xih̄ín barco n̄a chí yuhú tañuhú já ñúhu na ñunu n̄achutú xih̄ín tiyacá cán nasaa n̄a j̄anda yúhu. Jáchi

tátuhun in ciento metro nasandichi barco na yuhú tañuhú cán tá natavá na tiyacá.

⁹ Tá naxinu coo na cán nu ñuhu já naxini na cáyi ñuhu. Ta naxini na cánúu in tiyacá yáta rí nu ñuhu cán. Ta naxini na ña sa íin pan cuxu na viti.

¹⁰ Anda já nacachi Jesús já xihin ná:

—Taxi ndó java tiyacá, rí jacá natavá ndó jan —nacachi a.

¹¹ Anda já ndáva Simón Pedro nasahan da nandaa da jata barco cán já ñuhu da ñunu, ña nachutú ndaa xihin tiyacá náhnu cán, naxinu da janda yuhu. Ta nasacuu rí in ciento ivi jico sahun uni. Ta vatí cuaha ndivaha cúu rí coo natahnda ñunu nuú nasañuhu rí cán.

¹² Anda já nacachi Jesús já xihin ná:

—Naha ndó cajini ndó —nacachi a.

Ta ni in túhún na cán coo nasahan ndeé ini na ndaca tuhún na yo cúu mé á. Jáchi sa nacandaa cáxi ini na ña cúu á Jesús, xitoho na.

¹³ Tá nandihí já natiin Jesús pan cán já nasahnda java ña já nasahan ña nu ná. Ta quiahva já nacaja rí a xihin tiyacá va, nandicahnda rí já nasahan rí nu ná.

¹⁴ Xihin ña yóho naxinu uni tañu nanaha Jesús mé á nuú na naxica tuun xihin á janda naní nanditacu tucu a.

Cáhan Jesús xihin Simón Pedro

¹⁵ Tá nandihí naxijini na já nandaca tuhún Jesús Simón Pedro já nacachi a já xihin dá:

—Simón, da cúu jahyi Jonás á quíhvi ini chágún yehe a juú ga na java yóho —nacachi a.

Já nacachi da cán já:

—Mé ndó cúu ndó xitoho i ta sa xini vaha ndó ña quíhvi ini i ndohó —nacachi da.

Já nacachi Jesús já xihin dá:

—Xini ñuhú candaa vahún na cúu cuénta mí i tá quiahva ndáa vaha pastó ndicachi válí jana dá —nacachi a.

¹⁶ Anda já nacachi tucu Jesús já xihin dá:

—Simón, da cúu jahyi Jonás, á quíhvi inún yehe —nacachi a.

Anda já nacachi da já xihin á:

—Mé ndó cúu ndó xitoho i ta cándaa vaha ini ndó ña quíhvi ini i ndohó —nacachi da.

Já nacachi Jesús já xihin dá:

—Xini ñuhú candaa vahún na cúu cuénta mí i tá quiahva ndáa vaha pastó ndicachi jana dá —nacachi a xihin dá.

¹⁷ Anda já nandaca tuhún tucu a da táhnda uni já nacachi a já xihin dá:

—Simón, da cúu jahyi Jonás, á mé a ndaa quíhvi inún yehe —nacachi a.

Tá naxini mé Simón Pedro cán ña naxinu uni táhnda ndaca tuhún Jesús da sahá ña yóho já nacacuéha ini da já nacachi da já xihin Jesús:

—Jesús, mé ndó xini vaha ndó tóco ndihi ñaha. Mé ndó xini vaha ndó ña quíhvi ini i ndohó —nacachi da.

Já nacachi Jesús já xihin dá:

—Xini ñuhú candaa vahún na cúu cuénta mí i tá quiahva ndáa vaha pastó ndicachi jana dá.

¹⁸ Jáchi mé a ndaa ná cahan i xuhun. Tá nasacuún taa yuta chá já ndicandisún jáhmún ña cúnun ta já cuahún ndá nu cuni mún cuhun. Joo tá ná cayatún já jacaún ndáhun ta inga na jácandixi yohó jáhmún. Ta já tiin ndaa na yohó cuhún xihin ná nuú co cuni mún cuhun —nacachi a.

¹⁹ Xihin ña yóho cuni Jesús ndicani a nu Pedro cán ndá quiahva quivi da ña ná caja cáhnu da Ndióxi. Tá nandihí já nacachi Jesús já xihin dá:

—Xini ñuhú candicún yehe —nacachi a.

Ndáca tuhún Pedro saha Juan nu Jesús

²⁰ Nani xica na cásahan na xihin Jesús já nandicoto nihni Pedro chí jata dá já naxini da táca Juan vaxi da. Mé Juan yóho cúu dá da quíhvi ndivaha ini mé Jesús. Ta sa mé Juan yóho cúu yehe, da nasahiin coo jiin á tá naxijini na vicó pascua. Ta cúu yehe, da nandaca tuhún mé á saha ndá da cúu da jicó túhún ñahá.

²¹ Tá naxini Pedro ndico da yóho jata ná já nandaca tuhún da Jesús já nacachi da já xihin á:

—Ta ndaja coo Juan yóho, xitoho i. Ndaja quivi da —nacachi Pedro.

²² Anda já nanducú ñehe Jesús tuhun nu dá já nacachi a já xihin dá:

—Tá cuni yehe ña ná catacu da janda quiahva ná xinu coo quivi ndico coo i ñuyivi yóho, co ndítahan toho ndihi inún

sahá. Ña ndítahan cajún quéa candicún yehe —nacachi a.

²³ Ta sahá ña nacachi Jesús ña yóho sahá ña cán quéa nandicuíta nuu tuhun tañu tóco ndihi na naxica tuun xihín Jesús cán. Ta cáchi na sahá i ña a quíví toho i. Joo a juú toho ña yóho quéa cúni Jesús cachi a xihín ná. Ña nacachi Jesús quéa tá cúni mé á catacu u janda quiahva ná ndicó coo mé á, co ndítahan toho ndihi ini Pedro sahá ña cán.

²⁴ Ta jivi mé da cáhan na saha cán cúu yehe, da cáhyí tóco ndihi ña yóho. Ta tóco ndihi na xini na ña cúu á ña ndaa.

²⁵ Cuahá ndivaha nuú ñaha nacaja chága Jesús. Tá ná cacu ini i cahyí i tá in tá in ña nacaja mé á, cája i cuénta a quéta toho ñuyíví yóho coo libro cahán sahá ña nacaja mé á. Já ná coo.

Tuhun vaha nacahyí Lucas sahá ña nacaja na apóstol

Nasahan Jesús tuhun a quixi ínimā yíi Ndióxi

¹ Jihna sa nacahyí i in libro ña ná candoo a nu ndóhó, tá Teófilo. Mé libro cán cáhan ndihi a sahá ña nacaja Jesús ta cáhan ndihi a sahá ña najánaḥa mé á tá nacasáhá cája chúun a

² ta janda tá nandaa cuahan indiví. Tá nasahiin a ñuyiví yóho ta cámaní cuhun a indiví já nacaxi Jesús uxu ivi dataa cacuu da apóstol ña ná caja chúun na cuéntá mé á. Ta nacaja ínimā yíi Ndióxi ña ná cuu jánaḥa Jesús nuú na cán ña ndítahan nu ná caja na.

³ Ta tá sa naxihí Jesús ta nanditacu tucu a já naxica nuu a ñuyiví yóho tixi ivi jícó quivi. Ta nanaḥa mé á nuú ndihi na cúu apóstol já ná candaa ini na ña mé a ndaa nanditacu tucu a. Ta najánaḥa nu ná ña cúní Ndióxi cacomí a cuéntá sahá ñayivi.

⁴ Tá cámaní ndaa Jesús cuhun a indiví já nasahiin a xihín na apóstol já nasahnda mé á chuun nu ná já cáchí a já xihín ná:

—Xíní ñuhú candati ndó ñuu Jerusalén yóho anda quiahva xinu ínimā yíi Ndióxi cañuhu a ini ínimā ndo. Jáchi nasahan tátá i tuhun a nu ndo ña quixi ínimā yíi mé á ndacaan ini ínimā ndo ña cán quea najánaḥa i ndohó ña nacachi mé á.

⁵ Mé a ndaa najacandúta Juan ñayivi xihín ticuú joo tixi chá quivi jándicutú Ndióxi ndohó xihín ínimā yíi mé á —cáchí Jesús xihín ná.

Tá nandaa Jesús cuahan indiví

⁶ Ta ndaja coo tá nataca na cán xihín Jesús já nacasáhá ndaca tuhún na mé á já cáchí na já xihín á:

—Jesús, xitoho nde, á viti quea quiahva ndó ñamani nuú nde, na Israel cacomí nde cuéntá saḥa mé nde já ná a cacomí ga gobierno ñuu Roma cuéntá sahá nde —nacachi na xihín á.

⁷ Anda já nanducú ñehe Jesús tuhun nu ná já nacachi a já:

—Co ndítahan toho nu ndóhó candaa ini ndó ndá quivi caja Ndióxi, tátá yo ña jan. Jáchi in tuhún mé á cuití va quea xíni a ndá quivi yaha ña sáhdá mé á coo.

⁸ Joo ndítahan nu ndó candati ndó yóho anda quiahva ná quixi ínimā yíi Ndióxi cañuhu a ini ndó. Já ná nduu ndeé ini ndó ña ná cuu jánaḥa ndó nuú ñayivi sahá i. Anda já ndítahan nu mé ndó cáhan ndó sahá i ñuu Jerusalén yóho xihín estado Judea xihín estado Samaria. Anda já quee ndó cuhun ndó cuahá ñuu xícá níi cúu ñuyiví jánaḥa ndó nuú ñayivi cán saḥa mí i —nacachi Jesús xihín ná.

⁹ Tá nandihí nacahan Jesús ña yóho xihín ná ta nani sádehé cáxí na cán nu Jesús ndíta na já nandaa cuahan indiví. Já naxinu in vico nachijahvi ñahá a chí coo naxini ga na mé á.

¹⁰ Ta nani ndíta na cán sádehé na nuú nandaa Jesús cuahan indiví já nandicoto nihni na ta sa ndíta ivi taa ndíxi jahmá yaa jíin ná.

¹¹ Já nacachi da já xihín ná:

—Taa Galilea, ndávaha sádehé ndó indiví nuú nandaa Jesús cuahan. Jáchi tá quiahva naxini ndó nandindita cuahan indiví quiahva já cuni tucu ndó a ndicó coo tucu a ñuyiví yóho —nacachi ndíví da cán xihín ná.

Nacaxi na Matías caja da chuun ña najándacoo Judas

¹² Tá nandihí nandaa Jesús cuahan indiví já naquee na apóstol yucu naní yitó olivo cán já nandicó coo na ñuu Jerusalén. Ta mé yucu cán candoo a tátuhun in kilómetro jatá ñuu Jerusalén.

¹³ Tá naxinu coo na ñuu Jerusalén cán já nandaa na vehe cánúu jícó jáchi mé vehe cán nasanduu too na. Tóco ndihi na nasanduu cán nasacuu Pedro xihín Jacobo xihín Juan xihín Andrés xihín Felipe xihín Tomás xihín Bartolomé xihín Mateo xihín Jacobo, da cúu jahyi Alfeo xihín Simón, da naxica cuéntá cananista xihín Judas, da cúu ñani Jacobo.

¹⁴ Níi tiempo nasataca ndíhuxu in na yóho xihín ñani Jesús xihín María, náná Jesús xihín java ga najihí caca tahví na nu Ndióxi.

15 Ta ndaja coo in quivi nataca tátuhun in ciento oco na cúu cuénta Jesús. Já nacandichi Pedro mahñú na cán ta já nacachi da já xihin ná:

16 —Candehé ndo, ñani i, na cúu cuénta Jesús. Nasahin tá in nacachi inima yii Ndióxi coo. Jáchi nacaja Ndióxi ña ná cahan rey David ini tuhun mé á saha Judas, da nasandaca na natiin Jesús ñehe na a cuahan na vecaa.

17 Mé Judas yóho nasacuu da da naxica xihin yo ta nacaja chuun da cuénta Jesús xihin yo.

18 Joo najicó tühún da Jesús ta naquehe da jihún sahá ña núu nacaja da. Ta xihin jihún cán naxeen da in ñúhu. Ta tá nandihí já najándicava ndayi da mé dá ta nandata tixi da chí nacana cuyu ndihí xiti da.

19 Tá nañehé ñayivi ñuu Jerusalén tuhun ña sa naxihí Judas cán já nachinúu na quivi mé ñúhu naxeen da cán cananí a Acéldama. Mé tuhun cán cúni cachi a yójo nuú naxita nii jáchi cán naxita nii Judas tá naxihí da.

20 Jáchi já cáchi in Salmo ndácaan ini libro yii Ndióxi tá nacahan saha Judas já cáchi a já:

Ná candoo ndáha vehe da,
ta ni in ñayivi ná a canduu ga ini a.
Ta sa mé cán ndácaan inga tucu Salmo ta cáchi a:

Inga tucu da ná ndicojo chuun nasandojo da, cáchi tuhun Ndióxi.

21 Anda já nacachi tucu Pedro já xihin ná:

—Tañu mí yóho ndúu java na naxica nuu xihin yo tá naxica í xihin Jesús, xitoho í nani nasahin a ñuyívi yóho.

22 Java na yóho nasanduu na xihin yo tá najacanduta Juan Jesús xihin ticuú ta nasanduu na xihin yo janda quiahva nandaa Jesús cuahan indiví. Ña cán quea ndítahan nu yó caxí in da tañu na yóho já ná caca da xihin yo caxi tuhun da nuú ñayivi ña nanditacu tucu Jesús —nacachi Pedro xihin na cán.

23 Sahá ña cán quea nacana ivi da tañu ñayivi cán. Anda já nasacu ini na caxi na in da tañu ndívi da. In da nacana na cán nasananí José ta naní tucu da Barsabás ta inga tucu quivi dá nasacuu Justo. Ta da inga cán nasananí Matías.

24 Anda já naxica tahví ndihí na cán nu Ndióxi já nacachi na já:

—Tátá Ndióxi, sa xini ndó ndia cáhvi ini tóco ndihí ñayivi. Ña cán quea caja ndó ñamaní jánaha ndó nuú nde ndá da cúu da sa nacaxi ndó

25 cacuu apóstol ña ná caja da mé chuun ña najándacoo Judas. Mé Judas nacaja da cuachi cáhnu nu ndo ña cán quea viti in da nu ndítahan nu dá coo da —nacachi na xihin Ndióxi.

26 Anda já nasajiquí na ndá da cuu quee vaha. Naquee vaha Matías chí nandique táhan da xihin na uxu in apóstol cuénta Jesús cán.

2

Tá nanuu inima yii Ndióxi jatá na cúu cuénta Jesús

1 Tá naxinu coo quivi coo víco Pentecostés já nanditaca ndihí na cúu cuénta Jesús ndúu tútú na ini in vehe.

2 In cuití naxini johó na in a níhi naquixi a chí indiví. Tá quiahva níhi xicó tachí ndeé quiahva já níhi a naquixi a. Ta já naxini johó ndihí na ndúu coo vehe cán ña.

3 Anda já naxini na in ñaha ña cáa tá quiahva cáa ñuhú ita. Anda já nanditahnda ña nasandójó a jini in in na cán.

4 Ta nachutú ndaa inima ndihí na cán xihin inima yii Ndióxi. Chí nacasáhá nandicahan na tuhun, ña coo nasatiahva na jáchi já nacaja inima yii Ndióxi.

5 Mé tiempo já nasanduu java na Israel, na cája cáhnu Ndióxi ñuu Jerusalén cán. Mé na Israel yóho naquixi na ndijáá ñuu jatá ñuyívi.

6 Tá naxini johó na cán ña níhi xójo cúu cán já nacasáhá ndítaca na. Joo tá naxinu na nu ndúu na cúu cuénta Jesús cán já nacatontó na jáchi naxini johó na cahan na cúu cuénta Jesús cán mé tuhun cahan na vatí coo cúu ná na ñuu na.

7 Chí nacatontó ndivaha na cán já nacasáhá ndítuhún xihin táhan na já cáchi na já:

—Tóco ndihí na cúu cuénta Jesús yóho cúu ná na naquixi estado Galilea.

8 Ndá cuénta quea cahan na tuhun cahan in in mí.

⁹ Jáchí sa jín sa jín ñuu ñaquixi mí. Java í ñaquixi nación Partia ta java í ñaquixi nación Media ta java í ñaquixi nación Elam ta java í ñaquixi nación Mesopotamia ta java í ñaquixi estado Judea ta java í ñaquixi estado Capadocia ta java í ñaquixi estado Ponto ta java í ñaquixi estado Asia

¹⁰ ta java í ñaquixi estado Frigia ta java í ñaquixi estado Panfilia ta java í ñaquixi nación Egipto ta java í ñaquixi ñuu cuéntá Africa, ña xícá chága a juú ga ñuu Cirene. Ta ndúu java ñayivi ñaquixi ñuu Roma yóho. Ta java na cán cúu ná na ñaquixi chichi Israel ta java na cō cúu ná na ñaquixi chichi Israel joo cája cáhnu na Ndióxi, mé a cája cáhnu mí.

¹¹ Ta sa mé yóho ndúu java ñayivi ñaquixi nación Creta xihín nación Arabia. Ta xini johó ndihí cáhan na cúu cuéntá Jesús yóho tuhun cáhan in in mí. Ta cáhan na sahá ñaha xitúhún cája Ndióxi xihín ná —cáchi ndihi na sándehe cán.

¹² Ta chí cō xini na ndúu sándehe cán ndía cahán na sahá na cúu cuéntá Jesús cán. Jáchí ñacatóntó ndivaha na janda ndáca tuhún táhan mé ná ndúu na já cáchi na já:

—Ndía cuni cachi ña cája na yóho.

¹³ Joo java na ndúu cán ñacasáhá sácu ndaa ñahá na já cáchi na já:

—Na xíhi va cúu na yóho.

Cáhan ndojó Pedro nuú ñayivi

¹⁴ Anda já ñacandichi Pedro xihín ndihuxu in ga na apóstol cán já ñacasáhá cáhan cóhó da xihín tóco ndihi na cán já cáchi da já:

—Cuni johó vaha ndó ña cáhan i xihín ndó, ñayivi Israel, na estado Judea xihín ndihi ndó na tóho ndúu ñuu Jerusalén viti.

¹⁵ Mé ndó cáhán ndo ña ñaxini tóco ndihi ñayivi ndúu yóho. Joo cō cúu ná na ñaxini jáchi jacá caa in naha va queá.

¹⁶ Ña cája na yóho queá ñacachi da naní Joel sanahá tá ñacahan da xihín ñayivi ña ndítahan coo. Mé da cán cúu da ñacachi ña cáchi Ndióxi coo já ñacachi da já:

¹⁷ Tá sa ñacayati quivi ndihi saha ñuyivi yóho já cáchi Ndióxi já:

“Chindahá i ínima yii mí i cañuhu a ini tóco ndihi ñayivi.

Ta tóco ndihi jahyi yii ndo xihín jahyi jhí ndo caxi tuhun na xihín ndó tuhun cahan i xihín ná.

Ta na tacú cuni ndímáhnú na ñaha ñaha i nu ná.

Ta na yatá quixi sani nu ná caja i.

¹⁸ Ta mé tiempo já chindahá i ínima yii mí i ña ná cañuhu a ini na cája chún cuéntá mí i, á cúu ná taa á cúu ná ñaha.

Ta caja i ña ná cahan na sahá i nuú ñayivi.

¹⁹ Ta cuahá ndivaha ña náhnu caja i indivi xihín ñuyivi ta cuni ñayivi ña.

Cuni na ni xihín ñuhu cáyi xihín ñihma ña ndindita tátuhun vico núhú.

²⁰ Ta canaá nuú candii ta ndicuahá ni nuú yoo.

Ña yóho cacuu ña yaha tá sa ñacayati quivi xinu yehe, mé á cúu xitoho na caja vii i sahá ñayivi ñuyivi.

Mé quivi cán cacuu a in quivi cáhnu ndivaha.

²¹ Joo cacu ndaa ínima tóco ndihi na ná ndicahán quivi i”, ñacachi Ndióxi ini libro ñacahyí Joel sanahá —ñacachi Pedro.

²² Anda já ñacachi tucu Pedro já:

—Cuni johó vaha ndó tuhun cáhan i xihín ndó, na Israel. Jáchí cáhan i saha Jesús, mé a ñaquixi ñuu Nazaret. Jáchí ñatahan ini Ndióxi xihín tóco ndihi ñaha ñacaja mé Jesús. Ta ñaxini xihín nuú ndó ña náhnu xihín ña xitúhún ñacaja mé á nu ndo xihín ndée ñasahan Ndióxi nu a. Ta sa cánda vaha ini mé ndó ña yóho.

²³ Joo tá ñatiin ndó Jesús já najáxinu coo ndó ña ñasacu ini Ndióxi coo sanahá ndivaha. Ta mé ndó ñandiquiahva ndó Jesús ndáha taa quini. Ta ñacaja ndó ña ná cata caa na Jesús ndica crúxu.

²⁴ Joo najánditacu Ndióxi Jesús já ná a cóo a nu ndóho ini na sa ñaxihí jáchi ni in ñaha a cúu caja ña ná coo Jesucristo nu ndúu na sa ñaxihí.

²⁵ Sanahá ndivaha ñacahyí rey David sahá Jesús já ñacachi da já:

Xini vaha i ña ní tiempo ín ndó xitoho i, xihín i,

ta ín ndó xoo cuaha i chindeé ndó yehe saha ña cán queá cō yíhví toho i.

²⁶ Sahá ña cán queá ñacajii ndivaha ini i,

ta nacaḥan vatá ndivaha i.

Jáchí vatí ná quivi i cacuu u ndii joo coo vaha ini i.

²⁷ Jáchí caja ndó ña ná nditacu tucu u já ná a cándoo nahá ínima i nu ndúu ínima ndii.

Ta ni a quiahva toho ndó ñamaní tahyi yiquí cuñu i jáchí cúu u jahyi máni ndo.

²⁸ Najánaha ndó nuú i ndaja caja i ña cúní ndo.

Jáchutú ndaa ndó ínima i xihín ña cájji ini i jáchí já ín va ndó xihín i, nacaḥyí David sanahá ndivaha —cáchí Pedro xihín na ndúu cán.

²⁹ Anda já nacaḥi tucu Pedro já xihín ná:

—Candehé ndo, ñani i ná ndicani i nu ndo ña cúní cachi ña yóho. Sa cándaa cáxí ini ña sa naxihí David, da nasacuu tásáhu jícó yo. Ta najánduxu na da ta ín yí va nuú najánduxu na da.

³⁰ Nacaḥi David ña yóho jáchí nasacuu da profeta. Jáchí mé Ndióxi quéa nasahan tuhun a nu dá ta nacaḥi a xihín dá ña quixi Jesucristo chichi mé dá ta nacaḥi a ña cacomí mé Jesucristo cán cuéntá sahá ñayivi Israel.

³¹ Sa nacandaa ini David ña caja Ndióxi chí nuu sahá ña cán quéa nacaḥi da xihín ñayivi ña nditacu tucu Jesús tá nandihí quivi a. Ta nacaḥi tuhun David nu ná ña a jándicoo toho Ndióxi ínima Jesús nu ndúu ínima ndii ta ni a quiahva toho mé á ñamaní tahyi yiquí cuñu mé Jesús cán.

³² Ta viti cándaa ini ña naxinu tuhun nacaḥyí David jáchí naxini tóco ndihí ña najánditacu Ndióxi Jesús.

³³ Ta najándindita cáhnu ndivaha Ndióxi Jesús ta nasacu a ña xoo cuáha mé á. Ta nasahan Ndióxi ínima yí mé á nu Jesús jáchí ña yóho cúu tuhun nasahan Ndióxi sanahá. Ta tóco ndihí ña naxini ndó xihín nuu ndo ta naxini johó ndó yóho cúu á ña naquixi cuéntá Ndióxi.

³⁴ Ta sa xíní yo ña co cáhan David saha mé dá jáchí a juú David cúu da nandaa indiví, vaha. Sa mé David cúu dá da nacaḥi tuhun yóho:

Nacaḥi Ndióxi xihín xitoho i:

“Naha xoo cuáha jín i cacoún,

³⁵ janda quiahva ná cacu u na cándají yohó tixi saḥun”, nacaḥi Ndióxi —já nacaḥyí David sanahá.

³⁶ Anda já nacaḥi tucu Pedro já:

—Ña cán quéa cúní ña ná candaa ini tóco ndihí ndó ña cáhan i xihín ndó, na Israel. Mé Jesús, mé a nacata caa ndó ndica crúxu nandaja Ndióxi ña ná nduu a xitoho ñayivi. Ta nandaja Ndióxi ña ná nduu a ña nacaḥi mé á cacomí cuéntá sahá ñayivi —nacaḥi Pedro xihín na ndúu cán.

³⁷ Tá naxini johó na cán ña nacaḥi Pedro xihín ná i vi laá natahvi ini na já nacasahá ndáca tuhún na Pedro xihín java ga na apóstol cán já cáchí na já xihín ná:

—Ndía ndítahan caja nde, ñani, na cúu cuéntá Jesús.

³⁸ Anda já nanducú ñehe Pedro tuhun nu ná já cáchí da já xihín ná:

—Xíní ñúhú ndicó coo ini ndó ta jándicoo ndó cuachi cája ndó ta candúta ndó cuéntá Jesucristo já quéa ná caja cáhnu ini Ndióxi sahá cuachi ndó ta já ñehe táhvi ndó quiahva Ndióxi ínima yí mé á nu ndo.

³⁹ Jáchí nasahan Ndióxi tuhun a caja ña jáchutú ndaa ínima ndo xihín ínima yí mé á ta quiahva já caja ri a xihín jahyi ndó ta jári xihín na tóho, na ndúu xícá. Jáchí já caja mé á xihín ñayivi nacaḥi mé á —nacaḥi Pedro xihín ná.

⁴⁰ Ta cuahá ndivaha java ga tuhun nacaḥan Pedro xihín ná ta já najacahan da na já nacaḥi da já xihín ná:

—Candee ini ndó Jesús já ná jácau a ndohó já ná a cūhūn ndó indayá nuú cūhūn ñayivi cája cuachi —nacaḥi Pedro xihín ná.

⁴¹ Cuahá ñayivi nandiquehe vaha na tuhun nacaḥan Pedro ta nacandee ini na Jesús. Ta mé quivi já nacandúta tátuhun uní mil ñayivi já nandihvi na íchi cuéntá Jesús. Ta nandique táhan na cán xihín java ga na cúu cuéntá Jesús.

⁴² Ta ndinuhu ini na jácuaha na ña jánaḥa na apóstol nu ná. Ta cándúsa táhan tóco ndihí na ta ndítutú na xícá tahvi na nu Ndióxi. Ta níí tiempo sá taca na ndicahnda java táhan na pan cuxu na.

Ña nacaḥi ñayivi tá nacasahá na ndíco na íchi cuéntá Jesús

43 Mé tiempo já nasahan Ndióxi ñamaní nuú na apóstol cán ña ná cuu caja na cuahá ndivaha ñaha xitúhún xihín cuahá ña náhnu ndivaha ta chí cátóntó tóco ndihi ñayivi tá xini na ña yóho.

44 Ta tóco ndihi na cúu cuéntá Jesús cán in nanduu ndihi na ta ndícahnda java ñaha nu táhan na.

45 Ta jícó na ñaha cómi na ta já ndícahnda na jiuhún na nuú na ndímaní ñaha nuu.

46 Ta ndijáá ní quivi ndítútú na cája cáhnu na Ndióxi veñuhu cáhnu ndácaan ñuu Jerusalén cán. Ta tá ndíque táhan na vehe já ndícahnda java táhan na pan cuxu na ta cávatá ndivaha xihín táhan na cája na já. Ta ni in na co ndíñehe jícó mé.

47 Nacaja cáhnu na Ndióxi ta tóco ndihi ñayivi ndúu ñuu Jerusalén ín vaha ini na xihín na cán. Ta nini quivi nacaja Ndióxi ña nandicuahá na cúu cuéntá Jesús, mé na jácaacu ndaa Ndióxi ínima.

3

Ndivaha in taa réncó cája Pedro

1 In quivi tátuhun caa uní sahini cuahan Pedro xihín Juan veñuhu cáhnu Jerusalén cán. Mé hora já táca ñayivi cuahan na veñuhu caa tahví na nu Ndióxi.

2 Ta mé yuyéhe ñuhu cán ín coo in da naxihí tuchu saha. Ta janda tá nacacu da cáa da já. Ta ndijáá ní quivi ñehe na da cuahan da yuyéhe ñuhu cáhnu naní yéhe ñúchí. Ta cán ín coo da sáti da nuú ñayivi ndihvi ini veñuhu cán.

3 Ta tá naxini da réncó cán cuahan quíhvi Pedro xihín Juan ini veñuhu cán já nacata ñee da ndáha dá nu ná sáti da.

4 Anda já nandícoto nihni Pedro xihín Juan nuú da réncó cán já nacachi Pedro já xihín dá:

—Candehé nuú nde.

5 Anda já nasandehé cáxi da cán nu ná jáchi cáhán da quiahva na jiuhún nu dá.

6 Joo já nacachi Pedro xihín dá já:

—Coó toho jiuhún i quiahva i nuun joo ña ín nuú i ña cán quiahva i nuun. Ín ndivaha ndée Jesucristo, mé á ñuu Nazaret sahá ña cán quéa sáhdá i chuun nuun ña ná candichún cacún —nacachi Pedro xihín dá.

7 Anda já natiin Pedro ndahá cuáha da cán ta nandíñehe da da já nacandichi da chí ivi laá nandihvi ndée saha dá já nanditacu tuchu saha dá.

8 Anda já nacandita mé da nasahin réncó saha cán já nacandichi da ta já nacasáhá da xíca da. Cándita da cája cáhnu da Ndióxi nandihvi da xihín ná ini veñuhu cán.

9 Ta tóco ndihi ñayivi ndúu cán naxini na cándita da cája cáhnu da Ndióxi.

10 Ta a juú quiahva nacatóntó na ta nayihví na sahá ña naxini na cán. Jáchi nandicuni na da cán cúu da da nasacuu réncó, da nasahin coo sáti yéhe ñuhu naní yéhe ñúchí cán.

Cáhan ndojó Pedro nuú ñayivi ndúu yéhe ñuhu cáhnu cán

11 Mé da nasacuu taa réncó cán natiin tuun da Pedro xihín Juan ta chí co cúní da janí ñahá da. Ta tóco ndihi ñayivi nacatóntó na xínu na cuahan na candehé na da réncó cán nu ndíta da yéhe ñuhu, ña naní yéhe Salomón.

12 Tá naxini Pedro nacasáhá táca cuahá ñayivi nu ín da já nacasáhá cáchi da já xihín ná:

—Cuni johó vaha ndó, ñayivi Israel. Cátóntó ndivaha ndó sándehe ndó ndehe jáchi cáhán ndo ña nandaja vaha nde da yóho xihín ndée mé nde. Á tá coó ta cáhán ndo ña nandaja vaha nde da sahá ña ndícahán ndivaha nde Ndióxi.

13 Joo co ín toho a tá quiahva cáhán ndo. Jáchi mé Ndióxi, ña nacaja cáhnu Abraham xihín Isaac xihín Jacob, tásáhnu jícó yo nandaja vaha mé á da yóho. Ta mé Ndióxi cán nacaja ña ná nduu cáhnu ndivaha Jesucristo, jahyi mé á. Joo mé ndó nandiquiahva ndó a ndahá na jutixia. Ta tá cúní Pilato janí da Jesús já nasaji nuu ndó nu dá caja da ña.

14 Mé Jesús cúu á ña yii ndivaha ta ndinuhu ña ndaa cuití va cája. Joo mé ndó nacandají ndó a ta naxica ndó nu Pilato ña ná janí da in da sáhní ndii.

15 Tá nandihí já nasahní ndó Jesús, mé a cúu cája ña ná catacu ñayivi anda ama cáa quivi. Ta vatí naxihí a nasacuu a ndii joo najánditacu tucu Ndióxi mé á. Ta cánda

cáxí ini nde ña cáhan nde ña ndaa xihín ndo.

¹⁶ Ta sa mé Jesús cúu á ña cándéé ini nde. Ta sahá ña cándéé ini nde mé á sahá ña cán quéa nandivaha da cándichi nu ndó yóho. Ta xíni ndó da nandivaha yóho ta cándaá cáxí ini ndó nandihvi ndéé saha dá sahá ña cándéé cáhnu ini nde Jesús.

¹⁷ Candehé ndo, ñani i. Sa xíni vaha nde viti ña tá nasahní ndó Jesús co nacandaá ini ndó ndía nacaja ndó. Ta ni na cúu jefe ndo coo nacandaá ini na ndía nacaja na.

¹⁸ Joo xihín ña yóho najáxinu coo Ndióxi tuhun nasahan nu yó sanahá tá nacachi na profeta cuénta Ndióxi ña ndítahan ndoho ini Jesucristo, mé a nachindahá Ndióxi cacomí cuénta sahá ñayivi.

¹⁹ Sahá ña cán quéa xíni ñúhú jándacoo ndó cuachi cája ndó ta ndicó coo ini ndó nu Ndióxi já ná jándoo mé á cuachi nacaja ndó. Anda já caja Ndióxi ña ná ndivaha ini ndó.

²⁰ Janda jihna nacaxi Ndióxi Jesucristo ná chindahá a ña ná quixi a ñuyiví yóho já ná cacomí a cuénta sahá ñayivi.

²¹ Ta viti íin Jesucristo indiví ndáti a tанда quiví caja Ndióxi ña nduu víi tóco ndihi ñaha. Já ndítahan coo jáchi sanahá ndivaha nacahan Ndióxi xihín na profeta mé á sahá ña yóho ta mé ná nacaxi tuhun na ña nuú ñayivi.

²² Ta ña yóho cúu tuhun nacahan Moisés nu tásáhnu jícó yo já nacachi da já xihín ná: “Tañu mé ndó jan cana in profeta caja Ndióxi, xitoho í tá quiahva nacaja mé á xihín mí i. Ta coto a quéhe núu ndó ni in túhún tuhun cahán mé profeta jan xihín ndo.

²³ Jáchi tóco ndihi ñayivi, na co cuni candúsa tuhun cáhan mé profeta jan ndihi saha ná ta a ñéhe táhvi ga na coo na xihín na ñuu Ndióxi”, nacachi Moisés sanahá — nacachi Pedro xihín ná.

²⁴ Ta nacahan chága Pedro xihín ná já cáchi da já xihín ná:

—Tóco ndihi na profeta nacahan na sahá ña yáha tiempo viti. Ta profeta Samuel cúu da nacasáhá cáhan sahá ña yóho. Ta tóco ndihi java ga na profeta naquixi tá nu ndihí nacahan na cán saha tiempo viti.

²⁵ Nachindahá Ndióxi na profeta sanahá ña ná caxi tuhun na xihín yo ña sáhan

Ndióxi tuhun a nu yó, na Israel. Nacaja vaha mé á saha yo tá nacachi a já xihín Abraham, da nasacuu tásáhnu jícó yo: “Xihín ña caja na quixi chichún chí nuú já caja cuahá ndivaha i ñamani xihín tóco ndihi ñayivi ndúu ndijáá ñuyiví”, nacachi a.

²⁶ Tá najánditacu Ndióxi Jesucristo, jahyi mé á jihna ñúhú ga nu mé ndó, na Israel nachindahá a ña já ná caja yii á ndohó já ná jándicoo ndó cuachi cája ndó —nacachi Pedro.

4

Ndiquehe Pedro xihín Juan saha mé dá nuú na sacuahá veñuhu

¹ Ta janda cáhan chá va Pedro xihín Juan nuú ñayivi cán já naxinu java da cúu jutú xihín da sáhdá chuun nu policia veñuhu cán. Ta tañu na yóho naxinu ri na saduceo.

² Xójo ndivaha ini na jáchi jánaha Pedro xihín Juan nuú ñayivi ña sa nanditacu tucu Jesucristo. Ta xihín ña yóho náha ña vaxi quiví nditacu tucu ndii.

³ Sahá ña cán quéa natiin na cán Pedro xihín Juan ta nataán na da vecaa. Ta cán nacandoo da janda inga quiví itaan jáchi sa nacuaá va.

⁴ Joo cuahá ndivaha ñayivi nacandúsa tuhun nacahan Pedro ta xihín ña yóho nandicuahá chága na cúu cuénta Jesús. Jáchi na nacandúsa cán nasacuu na tátuhun uhun mil dataa.

⁵ Ta ndaja coo na cúu sacuahá nuú ñayivi Israel cán xihín na sacuahá veñuhu xihín na jánaha ley Moisés nandique táhan ndihi na inga quiví itaan.

⁶ Ta tañu na cán ndacaan ri da naní Anás, da cúu sacuahá nuú jutú. Ta tañu na cán nasandacaan ri Caifás xihín Juan xihín Alejandro xihín tóco ndihi na cúu na vehe na sacuahá nuú jutú cán.

⁷ Anda já natavá na Pedro xihín Juan vecaa. Ta ñéhe na da cuahan na nuú nataca na cán ta nasani ndichi na da mahñú na nataca cán ta já nandaca tuhún na da já cáchi na já xihín dá:

—Ndaja nacaja ndó nandaja vaha ndó da nasaquíhvi saha cán. Yo já nasahan ndéé nu ndó ña cúu cája ndó ña yóho —cáchi na ndaca tuhún ñahá na.

⁸ Ta ñacaja Ndióxi ña ná ndicutú ndaa ínima Pedro xihín ínima yii Ndióxi ña cán quéa ñacasáhá da ndúcú ñehe da tühun nu ná já cáchí da já xihín ná:

—Cuni johó vaha ndó, na sacuaḥa ñuu xihín na sacuaḥa veñuhu Israel.

⁹ Nandaca tühún ndó ndeḥe ndaja ñacaja nde nandaja vaha nde da ñasaquíhvi saḥa cán.

¹⁰ Cuni johó ndó ná ndicani nde saḥá ña yóho nu ndo ta já ná cuu candaa ri ini tóco ndihi ñayivi Israel ña mé dataa, da cándichi nu ndo yóho nandivaha da xihín ndée Jesucristo, ña ñuu Nazaret. Mé a cán ñacata caa mé ndó ndica crúxu cán ta tá nandihí já najánditacu ñahá Ndióxi.

¹¹ Ta mé Jesús yóho cúu á ña cáhan tühun Ndióxi saḥa, ña cúu á tátuhun yuu ndúhu, ña ñacandají na cávaha vehe. Ta mé ndó cúu ndó tátuhun na cávaha vehe cán, na ñacandají Jesús. Joo viti ñaxinu a cúu á tátuhun yuu ña ín chága saḥa ñacaja Ndióxi.

¹² Jáchi ni in tühún toho ñayivi ndúu ñuyíví a cúu jácacu mí ña ná a cühun yó in-dayá. In tühún Jesucristo quéa ñachindahá Ndióxi nu yo já ná cacu ndaa ínima yo — ñacachi Pedro xihín ná.

¹³ Tá ñaxini na sacuaḥa cán ña co yíhvi Pedro ni Juan ndíta da cáhan da xihín ná já ñacatóntó na jáchi sa xini na ña coó tiaḥva da tutu. Ta ñaxini na ña cúu dá da ndahví, da ñaxica xihín Jesús.

¹⁴ Ta ni co ñeḥe íní na sacuaḥa cán cachi na xihín Pedro ña cúu dá da tühún jáchi sa nuu táhyí na já va cándichi da nandivaha saḥa cán.

¹⁵ Anda já ñatavá tóo na da cán já ñacasáhá ndítuhún xihín táhan na.

¹⁶ Já cáchí na já:

—Ndía caja í xihín ndíví da yóho viti jáchi sa ñacandaa ini ndihi ñayivi ñuu Jerusalén ña xitühún ñacaja da. Ta ni mí, a cúu cachi ña cúu á ña tühún.

¹⁷ Joo cóho jáyihví yó na ná a cáhan chága na saḥa Jesús nuú ni in tühún toho ga ñayivi. Jáchi co cuni yo ña ná ndicuḥita nuu tühun saḥa Jesús —cáchi na ndítuhún xihín táhan na.

¹⁸ Anda já ñacana tucu na Pedro xihín Juan ta ñasahnda na chuun nu ná ña ná a

jánaha ga na saḥa Jesús ta ni ná a cáhan ga na quívi Jesús.

¹⁹ Anda já ñanducú ñehe Pedro xihín Juan tühun nu ná já cáchí da já xihín ná:

—Cahvi vaha ini ndó, na sacuaḥa. Á cáhán ndó ña vaha chága caja nde ña sáhndá ndóhó á ña sáhndá Ndióxi nuú nde caja nde.

²⁰ Jáchi a cuú jándacoo nde cáhan nde saḥá ña ñaxini nde xihín saḥá ña ñaxini johó nde —cáchi da xihín na sacuaḥa cán.

²¹ Anda já ñacahan cueḥe na sacuaḥa cán xihín dá ña ná a jánaha chága da saḥa Jesús. Joo tóco ndihi ñayivi cája cáhnu na Ndióxi saḥá ña ñacaja da cán. Ña cán quéa najaní ñahá na jáchi coó ñañeḥe íní na ndá quiahva caja xíxi na xihín dá.

²² Ta mé da nandivaha cán ñaxinu chága da nuú iví jícó cuia tá nandivaha saḥa dá.

Xíca tahví na cúu cuénta Jesús nu Ndióxi

²³ Ta tá sa najani Pedro xihín Juan já ñaquee da cuahan da nuú ñasanduu java ga na cúu cuénta Jesús cán. Ta já ndicani na nuú na cán ña ñacahan na sacuaḥa nuú jutú xihín na sacuaḥa veñuhu cán xihín ná.

²⁴ Tá ñaxini johó java ga na cúu cuénta Jesús cán ña ndicani da nu ná já ñacasáhá tóco ndihi na xíca tahví na nu Ndióxi já cáchí na já:

—Tátá Ndióxi. Mé ndó cúu Ndióxi ña ñacavaḥa indiví xihín ñuyíví xihín tañuhú xihín tóco ndihi ñaha.

²⁵ Sanahá ndivaha tá najándicutú ndaa ndó ínima David, tásáhnu jícó nde xihín ínima yii mé ndó já ñacachi ndó já xihín dá ta já ñacahví da:

Ndá cuénta quéa ndívaḥa ñahá ñayivi ndúu ñuyíví ta ndinuhu ña núu cáhvi ini na caja na.

²⁶ Tóco ndihi da cómi cuénta saḥá ñayivi ndúu ñuyíví xihín da sáhndá chuun nuú ñuu nandique táhan na cani táhan na xihín Ndióxi.

Ta cáni táhan na xihín mé a ñacaxi Ndióxi chindahá a cacomí cuénta saḥá ñayivi, ñacachi ndó sanahá.

²⁷ Ta mé a ndaa quéa yóho jáchi ini ñuu yóho najátaca táhan Herodes xihín Poncio Pilato xihín na tóho xihín na Israel viti. Najátaca táhan na caja núu na xihín Jesús, da cúu jahyí yii mé ndó, mé a ñacaxi ndó.

28 Joo xihín ña ñacaja na yóho naxinu coo nuú ña ñasacu ini mé ndó coo janda jihna ndivaha jáchi cuu caja ndó tóco ndihi ña cúni ndó caja ndó.

29 Ta viti candehé ndo, tátá Ndióxi ndá quiahva cúni na caja xíxi na xihín nde. Ta quiahva ndó ñamaní ná candee ini nde ndohó já ná a yíhvi nde cahan nde tuhun vaha saha mé ndó xihín ndá nuú ñayivi nacuu jáchi mé nde cúu nde na cája chúun nu ndo.

30 Ta xíca tahví nde nu ndo ña ná cuu ndaja vaha nde na quíhvi xihín ndée mé ndó. Ta ná caja ndó ñamaní ña ná caja cuahá nde ñaha xituhún xihín cuahá ña náhnu ná cuni ñayivi ña xihín ndée Jesu-cristo, jahyi yíi mé ndó cája nde tóco ndihi ña yóho —cáchi na xíca tahví na nu Ndióxi.

31 Tá nandihí naxíca tahví na nu Ndióxi já naquiji nuu vehe nu ndúu tútú na cán. Ta já nandicutú ndaa ínima ndihi na cán xihín ínima yíi Ndióxi ta nandindeé ini na cahan na tuhun Ndióxi nuú ñayivi.

Sáhná java táhan na cúu cuéntá Jesús ñaha cómi na

32 Cuahá ndivaha nasacuu na cúu cuéntá Jesús cán joo chí in jini ndihi na. Ta ni in tuhún na co cájhnda ñaha nu táhan jáchi cáchi na: “Ñaha tóco ndihí queá.”

33 Xihín ndée sahan Ndióxi nu ná cáxi tuhun na apóstol ña nanditacu tucu Jesús. Ta nacaja Ndióxi cuahá ndivaha ñamaní xihín tóco ndihi na cúu cuéntá Jesús cán.

34 Ta ni in na coo nandimaní ñaha nuu jáchi na in ñaha nuu tátuhun vehe á ñúhu najicó na ña ta ñehe na mé jiuhún cán

35 ta sahan na ña nuú na apóstol já ná ndicahnda mé ná ña nuú in in na xíní ñúhú a.

36 Já nacaja in dataa naní José, da naquixi chichi Leví. Ta cúu dá da nacacu in isla naní Chipre. Mé da yóho nachinúu na apóstol quívi dá naní da Bernabé ta mé tuhun yóho cúni cachi a da sahan tuhun ndeé ini ñayivi.

37 Ta mé da naní Bernabé yóho najicó da ñúhu dá ta já nasahan da mé jiuhún da cán nuú na apóstol.

5

Cája Ananías xihín Safira cuachi nu Ndióxi

1 Joo mé tañu já in da naní Ananías xihín Safira, ñájihí da najicó na in ñundáhyi ná.

2 Joo coo nandiquiahva ndihi da jiuhún ña nacayahvi ñúhu cán nuú na apóstol. Ta nacachi da xihín ná ña cán cúu ndihi va ña naquehe da saha ñúhu. Joo najándique táhan tuhun da xihín ñájihí da ña ná candoo chá jiuhún cán nu ná.

3 Ta tá naxinu coo Ananías ndiquiahva da jiuhún cán nu Pedro já nacachi Pedro já xihín dá:

—Ndá cuéntá quea nasahun ñamaní nu tiñhá saquaha nandihvi rí ínimun, Ananías. Ta nasacu inún jándahvún ínima yíi Ndióxi ta já naquehún táhan jiuhún nachahvi na sahá ñúhu jan.

4 Ñaha mé vún nasacuu ñúhu jan, nduu. Ta tá najicún ña, ñaha mé vún cúu ri jiuhún jan va. Nacahvi inún cajún ña núu yóho ta xihín ña nacajún yóho a juú nu mé nde cuití va nacahún ña tuhún joo nacahún ña tuhún nu Ndióxi —nacachi Pedro xihín dá.

5 Tá naxini johó Ananías ña nacachi Pedro xihín dá ivi laá nandicava da naxihí da sahá cuachi nacaja da nu Ndióxi. Ta tóco ndihi na nacandaa ini sahá ña nayaha yóho nayihví ndivaha na.

6 Anda já naxinu java da tacú já nachitíví na ndii cán já ñehe na a cuahan na jánduxu na.

7 Ta tá sa nayaha tátuhun uní hora já naquihvi ñájihí Ananías nu ndacaan Pedro cán. Joo ni co xíni ña ña nandoho yíi ña.

8 Anda já nandaca tuhún Pedro ña já cáchi da já xihín ña:

—Á mé a ndaa najicó ndó ñúhu ndo ta nachahvi na tá quiahva nacachi yíun xihín í sahá —nacachi Pedro.

Anda já nanducú ñehe ña cán tuhun nu dá já cáchi ña já xihín dá:

—Ajan, quiahva já najicó nde ña.

9 Anda já nacachi Pedro já xihín ña:

—Mé ndó najándique táhan ndó tuhun ndó coto ndojó ndo ínima yíi Ndióxi. Candehé. Jata vehe jan vaxi na nasahan najánduxu yíun. Ta viti cañehe ri na yohó

va cuhun na janduxu na —nacachi Pedro xihin ña.

¹⁰ Tá nacachi Pedro já ivi laá nandicava ñá saha dá naxihi ña saha cuachi nacaja ñá. Tá naxinu coo da tacú, da nasahan najanduxu yíi ñá can já naxini na candúhu ri mé va ñá naxihi ña. Anda já natavá na ña ta najanduxu na ña in xoo mé nuú najanduxu na yíi ña can.

¹¹ Ta tócó ndihi na cúú cuéntá Jesús can xihin tócó ndihi java ga na tá nacandaa ini na saha ña nayaha yóho nayihvi ndivaha na.

Sáhan Ndióxi ndéj nuú na apóstol já ná caja na cuahá ñaha xitúhún

¹² Ta nacaja Ndióxi ña ná cuu caja na apóstol can cuahá ñaha xitúhún xihin cuahá ña nahnu tañu ñayivi can. Ta tócó ndihi na cúú cuéntá Jesús nasataca na yéhé ñuhu cahnu naní yéhé Salomón.

¹³ Ta java ga ñayivi, na co ndico íchi cuéntá Jesús can yíhvi na catáhan na xihin na cúú cuéntá Jesús yóho. Joo ndijáá java ga ñayivi can ín toni ñúhú na xihin na apóstol can.

¹⁴ Ta cuahá ndivaha ñayivi nacasahá candúsa na Ndióxi, taa viti najihí viti.

¹⁵ Ta saha ña nahnu caja na apóstol yóho natavá na na quíhvi jata véhe ta nachinduu na na nuú xito á nu yívi mé nuú yaha Pedro can. Já quéa tá na yaha da vatí candahvi cuití da ná cani ndaa jatá java na can ña ná ndivaha na.

¹⁶ Ta cuahá ñayivi ndúu java ñuu váli ndúu yati can ñéhe na na quíhvi xihin na ñúhu ínima quini ini vaxi na ñuu Jerusalén ta can nandivaha ndihi na.

Jándoho na ini na apóstol

¹⁷ Anda já da cúú sacuaha nuú jutu can xihin na cúú cuéntá Saduceo can nacasahá cahivi ndivaha ini na xihin na apóstol.

¹⁸ Sahá ña can quéa natiin na na apóstol can ta nataán na na veca.

¹⁹ Joo ñuu naxinu coo in táto Ndióxi ta nasuna á yéhé caa can ta natavá á na ta já nacachi a já xihin ná:

²⁰ —Cuáhán ndó veñuhu cahnu ta ndicani ndó nuú ñayivi saha tócó ndihi ña caja Ndióxi, mé á ndijama ñayivi ná ndihvi na íchi cuéntá mé á —nacachi a xihin ná.

²¹ Ña can quéa tá natiivi inga quívi itaan já nandihvi na apóstol veñuhu cahnu can ta nacasahá na janahá na nuú ñayivi can.

Joo da cúú sacuaha nuú jutu can xihin tócó ndihi na sacuaha comí cuéntá saha nación Israel can nasahnda na chuun nu policia can ña ná cuhun na tavá na na apóstol ñúhu veca can ná quíxi na nuú na sacuaha can.

²² Joo tá naxinu coo na cúú policia veca can coo nandiñehe toho ñahá na. Ta já nandicó coo na caxi tuhun na xihin na sacuaha can.

²³ Já cachí na já:

—Tá naxinu nde yéhé caa já naxini nde ndájí tuun a ta ndita soldado ndaá vaha da ña. Joo tá nandihvi nde ini veca sándehe nde coo na apóstol can ná ndiñehé nde.

²⁴ Tá naxini joho na sacuaha nuú jutu xihin da cúú sacuaha nu policia veñuhu xihin java ga na sacuahá veñuhu can ña yóho já nacasahá ndaca tuhun táhan na saha ña nditahan quíxi nu ná chí nu saha ña caja na apóstol yóho.

²⁵ Mé hora já naxinu coo in data ta cachí da já xihin ná:

—Na apóstol nataán ndó veca cuni can, ndita na jatá veñuhu janahá na ñayivi — nacachi da can xihin ná.

²⁶ Anda já nasahan da cúú sacuaha nuú policia xihin java ga policia já natiin tucu da na apóstol nasañehe da na nuú na sacuaha veñuhu can. Joo coo nacaja xíxi na xihin ná jachi nayihvi na ndicuíta ñayivi cuahá can cani na na xihin yu.

²⁷ Ta tá naxinu coo na xihin na apóstol nu ndúu na sacuaha veñuhu can já nasacu ndichi na na nu ná. Anda já nacachi da cúú sacuaha nuú jutu can já xihin ná:

²⁸ —Mé nde nasahnda nde chuun nu ndó ña ná á janahá chága ndó saha Jesús jan. Joo mé ndó sa najandicutú ndó Jerusalén xihin ña janahá ndó jan. Ta cúni ndó jacojo ndó cuachi jatá nde ña nasahní nde Jesús jan — cachí da.

²⁹ Anda já nanducú ñehe Pedro xihin java ga na apóstol can tuhun nu ná já cachí na já xihin ná:

—Nditahan nuú nde caja jihna ñúhú ga nde ña sáhnda Ndióxi nuú nde, á juú ga ña sáhnda ñayivi nuú nde caja nde. Sahá ña

cán queá coó ñajaja nde ña ñacachi ndó xihín nde.

³⁰ Ta mé Ndióxi ñajaja cáhnu tásáhnu jícó yo sanahá ñajaja ña ná nditacu Jesús, mé a ñasahní ndo tá ñacata caa ndó a ndica crúxu.

³¹ Joo ñandiñehe jícó Ndióxi Jesús ta ñasacu a ña xoo cuáha mé á ta ñajaja ña ná nduu Jesús ña cacomí cuéntá sahá ñayivi Israel ta jácacu a ña já ná a cúhün ña indayá. Ta tá ná ndicó coo ini na já caja cáhnu ini Ndióxi sahá cuachi cája na.

³² Ta ñaxini xihín nuú nde tóco ndihi ña yóho ta cáhan nde sahá ta quiahva já cáhan ínimá yii Ndióxi sahá ña yóho. Ta chindahá Ndióxi ínimá yii mé á cañuhu a ini ña cája ña cúni mé á —cáchi ña apóstol xihín ña cán.

³³ Tá ñaxini johó ña sacuaña cán ña ñacachi ña apóstol já ivi laá ñaxojó ndivaha ini na xihín ná chí cúni ña cahni ñahá ña.

³⁴ Joo ndaja coo íin tañu ña cán in ña sacuaña cúu fariseo naní Gamaliel, ña íin toni ñúhú ñayivi xihín. Ta cúu dá ña jánaha ley Moisés nu ná. Ñacandichi ña tañu ña sacuaña cán já ñasahnda ña chuun ña ná tavá xoo na ña apóstol cán jata véhe.

³⁵ Andá já ñacachi ña já xihín ña sacuaña cán:

—Candehé ndo, ñataa Israel. Cuéntá coo ndó a juú caja ndaja ñacuu ndó xihín ña apóstol yóho.

³⁶ Xíní ñúhú ndicuhün ini ndó ña sanahá ñandindita in ña naní Teudas ta ñacachi ña xihín ñayivi ña cúu dá in ña íin cuahá saha. Ta ñasandico tátuhun comi ciento ña jata dá joo ñasahní ña ña ta tá ñaxihí ña já ñandicutita nuu tóco ndihi ñayivi ñaxica jata ña cán ta xihín ña yóho ñanaá sahá ndihi ña ñajaja ña.

³⁷ Tá ñandihí já ñandindita inga tucu ña naní Judas, ña ñaquixi estado Galilea mé tiempo cándahvi ñayivi ñuu. Ta cuahá ndivaha ñayivi ñandico jata ña cán joo ñasahní ri na ña cán va ta tóco ndihi ña ñasandico jata ña ñandicutita nuu ndihi na.

³⁸ Sahá ña cán queá jácahan i ndohó viti ná a quíhvi ndáha ndó ña apóstol yóho. A quíhvi nuu ndó xihín ña cája na jáchi tá jini mé va na ñaquixi ña cája na já queá ndihi va sahá ña cája na yóho.

³⁹ Joo tá Ndióxi ñachindahá ña caja na ña cája na yóho já queá a cúu toho caja ndó jándihí ndó sahá ña cája na. Cuéntá coo ndó jáchi ñahva náá xihín Ndióxi caní táhan ndó —cáchi Gamaliel xihín ña sacuaña cán.

⁴⁰ Tóco ndihi ña sacuaña ñaxini johó nuú ñacahan ña cán, ñatahan ini na xihín ña ñacahan ña. Andá já ñacana na ña apóstol ta já ñacani na ña xihín churú. Ta ñacachi na xihín ná ña ná a cáhan ga ña saha Jesús nuú ñayivi. Andá já ñajani ñahá ña.

⁴¹ Ta cájii ndivaha ini ña apóstol cán ñaqueta na nu ñúhu ña sacuaña cán jáchi ñasahan Ndióxi ñamaní nu ná ndoho ini na sahá Jesús.

⁴² Ta ndijáá níi quivi ini veñuhu cáhnu xihín ini vehe ñayivi cáhan ña ta jánaha ña saha Jesucristo.

6

Cáxi na usá ña cacuu diácono, ña chindeé ña apóstol

¹ Ta mé tiempo cán ndicuañá ndivaha ña cúu cuéntá Jesús. Ta ndaja coo ña cáhan tuhün griego cán ñacasahá cáhan cuachí ña nuú ña Israel. Mé ña cáhan tuhün griego yóho cáchi ña ña co nditahnda in nuú ñaha cája ña Israel tá nditahnda ña cuxu ña cuáan in in quivi.

² Andá já ñandaja tútu ndihuxu ivi ña apóstol cán tóco ndihi ña cúu cuéntá Jesús já ñacasahá cáchi ña já xihín ná:

—Ña ndítahan nu mé nde, ña apóstol queá caxi tuhün nde tuhün Ndióxi nuú ñayivi. Sahá ña cán queá co yáchi nde ndicahnda nde ña cuxu ñayivi.

³ Sahá ña cán queá xíní ñúhú ndinducú mé ndó usá ña tañu ndó já ná caja na chuun yóho. Joo xíní ñúhú cacuu na ñayivi cándeé ini ndó. Ta xíní ñúhú cacuu na ña tácu ini. Ta xíní ñúhú cacuu na ña ñandicutú ndaa ínimá xihín ínimá yii Ndióxi já ná cuu quiahva ndó chuun yóho nu ná.

⁴ Ta ña caja mé nde queá ndinuhu ini nde caça tahví nde nu Ndióxi ta jánaha nde tuhün mé á nuú ñayivi —ñacachi ña apóstol xihín ña cúu cuéntá Jesús cán.

⁵ Ta tóco ndihi na ñatahan ini na xihín ña ñacachi ña apóstol. Sahá ña cán queá ñacaxi na ña naní Esteban. Mé Esteban yóho cúu dá ña cándeé cáhnu ini Ndióxi. Ta

cúu dá da nandicutú ndaa ínima xihín ínima yii Ndióxi. Ta naxaxi na da naní Felipe xihín Prócoro xihín Nicanor xihín Timón xihín Parmenas xihín Nicolás, da naquixi ñuu Antioquía. Mé Nicolás yóho nacasáhá cándúsa da tá quiahva cándúsa na Israel, nduu joo nandiquehe da íchi cuéntá Jesús.

⁶ Tá nandihí já ñehe na cúu cuéntá Jesús cán ndíhúsa na naxinu coo na nu ndúu na apóstol cán. Anda já naxica tahví na nu Ndióxi saha ná. Ta naxinúu na apóstol cán ndáha ná jini in in ndíhúsa na cán ña ná caja na chuun Ndióxi.

⁷ Ta nacasáhá ndícuíta nuu tuhun cáhan saha Jesús chí nandicuahá na cúu cuéntá Jesús ñuu Jerusalén. Ta cuahá na cúu jutú cán nacasáhá cándeé ini na Jesús.

Tín na Esteban

⁸ Ta ndaja coo naja cuaha Ndióxi ñamaní xihín in da naní Esteban cán ta nandicutú ndaa ínima dá xihín ínima yii Ndióxi chí nacasáhá cája da cuahá ñaha náhnu xihín ña xituhún nuú ñayivi.

⁹ Joo in quivi nacasáhá java na cáni táhan yúhu ná xihín mé Esteban. Na cán cúu ná cuéntá veñuhu naní Esclavos Libertos xihín java na ñuu Cirene xihín na ñuu Alejandría xihín na ñuu Cilicia xihín java ga na naquixi ñuu válí ndúu estado Asia nacasáhá cáni táhan yúhu ná xihín dá.

¹⁰ Joo a cúu quee vaha na xihín dá jáchi nasahan ínima yii Ndióxi tuhun ndíchi nuú mé Esteban cán ña ná nducú ñehe da nu ná.

¹¹ Anda já naxahvi na cán java na já ná cahan na tuhun túhún saha Esteban. Ta naxaxi na cán ña naxini johó na ña naxanahá Esteban xihín Moisés ta naxanahá da xihín Ndióxi.

¹² Ta xihín ña yóho najándivaa ná ñayivi xihín na sacuaaha veñuhu xihín na jánaha ley Moisés. Ta já naxini na da já ñehe na da cuahan da nuú ndihí na sacuaaha ñuu cán.

¹³ Ta nducú na da cándúsa cavaaha tuhun túhún sahá Esteban ta já nacasáhá cáchí da cávaha ña tuhún já:

—Cánahá da yóho xihín veñuhu cáhnu Ndióxi yóho ta cánahá da xihín ley Moisés.

¹⁴ Ta naxini johó nde cáchí da ña játaní Jesús veñuhu cáhnu yóho, mé da naquixi ñuu Nazaret ta ndijama da costumbre

najándacoo Moisés nu yo —cáchí da cáhan ña tuhún saha Esteban.

¹⁵ Anda já nandicoto nihni na sacuaaha xihín tóco ndihí na ndúu coo cán nu Esteban já naxini na nandiyéhe nuu dá tátuhun in nuu tátó Ndióxi ndúu indiví.

7

Ndíquehe Esteban saha mé dá nuú na sacuaaha

¹ Anda já nandaca tuhún da cúu sacuaaha nuú jutú cán Esteban já naxaxi da já xihín dá:

—Á ña ndaa cúu ndihí ña cáhan na yóho sahan.

² Anda já nducú ñehe Esteban tuhun nu ná já naxaxi da já:

—A juú toho ña ndaa quéa cáhan na jan sahá i. Joo cuni johó ndó ña ná cahan i xihín ndo, na sacuaaha xihín ñani i. Sanahá ndivaha tá nasahin tásáhnu jícó yo, da nasananí Abraham ñundáhyi Mesopotamia tá cámaní quee da cuhun da coo da ñuu Harán já nanaha Ndióxi mé á nu dá. Ta mé Ndióxi, xitoho í cúu á in Ndióxi cáhnu ndivaha.

³ Ta já naxaxi a já xihín Abraham: “Jándacoo táhún ta jándacoo ñuún ta cuahán inga ñuu nuú naha i nuún coún”, naxaxi Ndióxi xihín dá.

⁴ Anda já najándacoo Abraham ñundáhyi Caldea nuú nasahin da ta já naquee da cuahan da coo da ñuu Harán. Tá nandihí já naxihí tátá da ta janda já nasandaca Ndióxi Abraham naquixi da nu ndúu yó viti.

⁵ Joo coo nasahan Ndióxi ñundáhyi nu dá tá nasahin da yóho. Ni in loho ñúhu coo nasahan mé á nu dá mé tiempo cán. Joo naxaxi a xihín dá ña quiahva ña nu dá chága chí nuu. Ta naxaxi a xihín dá ña nduu a ñaha jahyi da tá ná quivi da vatí cámaní cacu jahyi Abraham mé tiempo já.

⁶ Ta naxaxi Ndióxi xihín dá ña tóco ndihí jahyi da xihín na quixi chichi jahyi da cacuu na tátuhun na tóho jáchi canduu na inga ñuu, ña co cúu ñuu na. Ta cán caja chúun na joo a quehe yahvi na sahá chuun caja na ta jándoho ndivaha na cán ini na tixi comi ciento cuja.

⁷ Naxaxi tucu Ndióxi xihín dá já: “Joo jándoho i ini ñayivi, na caja xixi xihín ñayivi

quixi chichún. Ta tá nandihí caja i ña ná queta na quixi chichún ta quixi na chóho já ná caja cáhnu na vehe.”

8 Ña yóho quea nacachi Ndióxi xihin Abraham tá nasahan tuhun a nu dá. Ta nacachi a xihin dá ña ná chicaoan da marca yiquí cuñu da já ná a ndíndójo da sahá tuhun nasahan Ndióxi nu dá. Ta tá nacacu jahyi Abraham, da naní Isaac já nachicaoan Abraham marca yiquí cuñu da tá naxinu una quivi nacacu da. Ta quiahva já nacaja ri Isaac xihin Jacob, jahyi da tá nacacu da. Ta sa mé quiahva já nacaja ri Jacob xihin uxu ivi jahyi da tá nacacu da. Ta jahyi Jacob yóho cúu tátá uxu ivi táhnda ñayivi Israel.

9 Ta mé jahyi Jacob yóho nasacuu tásáhnu jícó yo joo nachihvi ini na xihin in ñani na, da naní José. Sahá ña cán quea najícó na da cuahan da nación Egipto. Joo nasahin Ndióxi xihin dá.

10 Ta nachindee a da nu tóco ndihí ña nandoho ini da ta nasahan cuaha Ndióxi xini túni dá. Ta nacaja mé á ña ná tahan ini Faraón, mé rey nación Egipto cán xihin ña cája José. Sahá ña cán quea nasacu rey cán José ña ná nduu da gobernador saha tóco ndihí nación Egipto cán. Ta nacaja rey cán ña ná cacomí da cuénta sahá vehe mé rey cán viti.

11 Ta in tañu naxinu tama ndeé ta nacasáha ndóho ndivaha ini tóco ndihí ñayivi ndúu nación Egipto. Ta quiahva já nandoho ri ini na ndúu ñundáhyi Canaán ta chí co ñehe ná ña cuxu tásáhnu jícó yo.

12 Joo tá nacandaá ini Jacob ña ín trigo nación Egipto já nachindahá da jahyi da, na nasacuu tásáhnu jícó yo cán já nasahan na naxeen na ña cuxu na. Ta tá nasahan na nu cuítí yóho coo nandicuni na ñani na José cán.

13 Joo tá nasahan na ña chí ivi chí Egipto cán já najánañá José mé dá nuú ñani da. Ta xihin ña yóho nacandaá ini da cúu rey nación Egipto cán ña cúu José da Israel.

14 Anda já nasahnda José chuun ña ná cañehe na Jacob, tátá da xihin tóco ndihí na vehe da quixi na canduu na ñundáhyi Egipto cán. Ta tóco ndihí na nasahan cán nasacuu na uní jico sahun ñayivi.

15 Já naquee Jacob cuahan da coo da

Egipto xihin tóco ndihí na vehe da. Ta sa mé cán naxihí da ta cán naxihí jahyi da, na nasacuu tásáhnu jícó yo.

16 Já nachicaoan na ndii cán ini cáva mé Egipto cán joo tá nayaha tiempo já natavá na lásá na já ñehe na ña nasahan na nachicaoan na ini cáva mé cama santo ña naxeen Abraham nuú jahyi in da naní Hamor ñuu Siquem cán.

17 Ta tá nacayati quivi xinu coo ña nasahan Ndióxi tuhun a nu Abraham coo já nacasáha cácu cuahá jahyi na naquixi chichi Israel. Já nandicuañá ná nani ndúu na Egipto cán.

18 Anda já nacasáha inga tucu rey cómi da cuénta sahá ñayivi nación Egipto cán ta mé rey saá cán co xini toho da José.

19 Ta mé rey yóho najándahvi da tásáhnu jícó yo cán ta nacasáha cája xixi da xihin ná. Ta nacaja ndúsa dá xihin ná ña ná jándacoo na jahyi na, na jacá nacacu já ná quivi na.

20 Ta mé tiempo já nacacu Moisés ta nasacuu da in ticuáha loho ña natahan ini Ndióxi xihin. Ta najácuahnu tátá náná Moisés yóho mé dá tixi uní yo mé vehe mé na cán.

21 Joo tá naxinu quivi ndítahan nu ná jándacoo na da já nandiquehe ña cúu jahyi rey Egipto cán da já najácuahnu ña da tátuhun jahyi ña.

22 Ta najácuaha Moisés tóco ndihí ña xini na ndíchí nación Egipto cán. Ta nandindíchí ndivaha jini dá. Ta nacaja cuaha dá ña náhnu.

23 Ta tá naxinu Moisés ivi jico cuia já nasacu ini da coto nihni da ñani táhan da, na naquixi chichi Israel.

24 Tá nacasaá da nu ndúu na cán já naxini da cája xixi in da Egipto xihin in da Israel. Ta cuni Moisés ndiquehe da sahá da Israel ña cán quea nasahní Moisés mé da Egipto cán.

25 Jáchi nacahan Moisés ña cuu candaá ini na Israel cán ña chindahá Ndióxi da já ná janí da na ndáha na Egipto cán. Joo coo nacandaá ini na ña yóho.

26 Ta inga quivi itaan tá naxinu coo Moisés nu ndúu na Israel cán já naxini da cáni táhan ivi da naquixi chichi Israel. Anda já nacasáha Moisés sáhnda java táhan da da cán já cáhí da já xihin ná: “Ndaja

ñani mé va ndó, a váha toho cája ndó cáni táhan ndaja táhan mé va ndó.”

27 Anda já nāchindahá nihni da cája xíxi xihín ñani táhan cán Moisés já nācachi da já xihín dá: “Ni in toho na coó nāṣahan chuun nu yóhó cacuún da cacomí cuéntá sahá nde já ná cuu caja viún sahá nde.

28 Á tá quiahva nācájún nāṣahnún da Egipto cán cuni quiahva já cúnun cajún xihín i”, nācachi da cán xihín Moisés.

29 Tá naxini joho Moisés ña yóho já nayihví ndivaha da chí naxinu da cuahan da chí ñundáhyi cuéntá Madián já nāṣahjin da cán tátuhun in da tóho. Ta cán nātandaha dá ta nācacu ivi jahyi ṭa da.

30 “Ta tá sa nayaḥa ivi jico cuia nāṣahjin Moisés Madián cán já nāṣaha in tátō Ndióxi mé á nu dá tañu in tohíñú cándaha ñúhu mé yucú íchí yati yucú naní Sinaí cán.

31 Ta chí nācatóntó Moisés xihín ña naxini da nācaja Ndióxi cán. Ta tá nācayati da sándehe da ña já naxini joho da cáhan Ndióxi xihín dá já cáchi a já:

32 “Yehe cúu u Ndióxi nācaja cáhnu tásáhnú jícún Abraham xihín Isaac xihín Jacob.” Anda já nācasáhá quíji Moisés xihín ña yíhví da ta coó nāṣahan ndeé ini da ndicoto nihni da nu cáhan Ndióxi cán.

33 Anda já nācachi tucu Ndióxi já xihín dá: “Tavá ndusa ṣahun jáchi yí ndivaha cúu nu sánun jan.

34 Sa naxini i ndá quiahva ndáhví ndóho ñayivi cuéntá mí i, na ndúu Egipto ta naxini joho i nu tána na sahá ña jándoho na Egipto jan ini na. Sahá ña cán quéa vaxi i chindeé e na ta yóhó cacuún da chindahá i cuhun Egipto já ná tavún na nu ndóho ini na cán”, nācachi Ndióxi xihín Moisés.

35 ‘Nācandají na Israel cán Moisés ta nācachi na xihín dá: “Coó na nāṣacu toho yóhó ña ná cacomún cuéntá sahá nde já ná cuu caja viún sahá nde.” Joo Ndióxi quéa nāchindahá Moisés ña ná cacuu da da cacomí cuéntá sahá na Israel cán ta já ná jácacu da na. Jáchi já nācachi tátō Ndióxi xihín dá tá nāṣaha mé á tañu tohíñú cándaha ñúhu cán.

36 Ta mé Moisés nāṣahan tucu da mé Egipto cán ta nātavá da tóco ndihi na Israel, na nāṣanduu Egipto cán ta nācaja da cuahá ñaha náhnú xihín ña xitúhún mé Egipto cán.

Ta quiahva já nācaja da xihín tañuhú naní Tañuhú Cuáhá tá nāṣuná da do nuú nayaḥa na Israel cán. Ta quiahva já nācaja da cuahá ña náhnú yucú íchí nuú nāxica na ivi jico cuia cán.

37 Ta mé Moisés nācaxi tuhun da xihín ñayivi já nācachi da já xihín ná: “Tá quiahva nācaja Ndióxi nāchindahá a yehe nu ndo quiahva já chindahá mé á inga da cacuu profeta nu ndo. Ta mé da cán cacuu da in da quixi chichi mé ndó”, nācachi Moisés xihín ná.

38 Ta mé Moisés nāṣahjin da tañu ñayivi Israel, na nāṣacuu tásáhnú jícó yo tá nāxica na yucú íchí cán. Ta xihín mé da cán nācahan tátō Ndióxi jini yucu Sinaí cán. Ta cán nāṣahan Ndióxi ley nu dá já ná naha da ña nu yo ña ná caca vaha í íchi cuéntá Ndióxi.

39 ‘Joo coó nāxéen toho tásáhnú jícó yo cuni joho na nuú nācahan Moisés xihín ná. Ña cán quéa nācandají na da ta nācasáhá ndúcú na ndicó coo na Egipto.

40 Ta nani nāṣahjin Moisés jini yucu Sinaí cán já nācachi na xihín Aarón, ñani Moisés já: “Cúni nde ña ná cavahún tiniñu yúu Ndióxi caja cáhnu nde ta ná canuu a cuhun a nuú nde. Jáchi co cándaḥa ini nde ndia nandoho Moisés, da nātavá ndehe nuú nāṣanduu nde Egipto cán.”

41 Anda já nācavaha na in yoco ñéhe nāhná chelo ta já nāṣahní na quítí najoco na nuú mé yoco cán. Ta nācaji ndivaha ini na xihín yoco ña nācavaha mé na cán.

42 Anda já nājándacoo Ndióxi na já ná caja cáhnu na ndá ña cúni na tátuhun quimi xihín yoo xihín candii. Já nācachi Ndióxi ini libro nācayí na profeta ṣanahá:

Ndóhó, na Israel, a juú nu mí i nāṣahní toho ndó quítí najoco ndó tañu ivi jico cuia nani nāxica nuu ndó yucú íchí jan.

43 Ña nācaja ndó quéa nācaja cáhnu ndó yoco ña nācavaha mé va ndó.

Ta nācachi ndó ña cúu mé yoco cán inga ndióxi naní Moloc.

Ta nāṣañehe ndó ña xihín cáti á tá cuahan ndo.

Ta nacavaha ndó inga tiniñu quimi nacachi ndó cúu á inga tucu ndióxi naní Renfán.

Ta nasañehe ndó tiniñu cán cuahan ndó caja cáhnu ndó coo nacaja cáhnu ndó yehe.

Ña cán queá tavá i ndohó ñundáhyi na Israel ta chindahá i ndohó in ñuu tóho xicá chága a juú ga Babilonia, nacachi Ndióxi xihín na cán —nacachi Esteban xihín na sacuhá ñuu cán.

⁴⁴ Já nacachi tucu Esteban já xihín ná:

—Vatí nacaja cáhnu tásáhnu jícó yo java ga yoco joo nasañehe tá nasañehe na in veñuhu ní quíti cuéntá Ndióxi tá naxica nuu na yucú íchí nuú co ndúu ñayivi cán. Jáchi janda jihna nasahnda Ndióxi chuun nu Moisés tá quiahva coo mé veñuhu ní quíti cán ta nasahnda chuun nu dá ña ná cavaha da ña xihín ní quíti. Ta ini mé veñuhu cán nataán da yuu jáhnda nu ndáa ley nasahan Ndióxi nu dá sanahá.

⁴⁵ Tá sa nayaha cuahá cuia já naxihí Moisés já nandiquehe da naní Josué chuun ña cañehe da cuéntá sahá tásáhnu jícó yo. Ta mé tásáhnu jícó yo nacani táhan na xihín na nasanduu ñundáhyi yóho. Ta nacaja Ndióxi ña ná quee vaha na Israel xihín na cán. Natavá Ndióxi na cán já ná canduu na Israel ñundáhyi yóho ta mé tiempo já na Israel ñehe na veñuhu ní quíti cuahan na. Ta já nasahin a xihín ná janda quívi nasacomí David cuéntá sahá na Israel.

⁴⁶ Nacaja Ndióxi cuahá ñamaní xihín David sahá ña cán queá nasacu ini David cavaha da in nuú coo Ndióxi, mé a nacaja cáhnu Jacob sanahá.

⁴⁷ Joo da nacavaha mé vehe Ndióxi cán nasacuu Salomón, jahyi David.

⁴⁸ Ta sa cándaá ini ña a juú quiahva cáhnu cúu Ndióxi ta co ndácaan toho a ini veñuhu cávaha dataa. Ín in profeta ta nacahyí da ña nacachi Ndióxi já:

⁴⁹ Tátuhun in rey, da ín coo silleta vaha, ta chínúu da sahá dá jatá in táyi loho, quiahva já ín coo i indiví ta chínúu i sahá i jata ñuyívi.

Yehe cómí i cuéntá sahá indiví xihín ñuyívi sahá ña cán queá coo toho vehe cuu cavaha ndó coo yehe,

ta co xíní ñúhú i in vehe nu ndíquehe ndée.

⁵⁰ Jáchi yehe cúu Ndióxi ña nacavaha tóco ndihi ñaha, já nacachi Ndióxi sanahá —nacachi Esteban xihín ná.

⁵¹ Anda já nacachi tucu Esteban já xihín ná:

—Joo mé ndó cúu ndó ñayivi sáa ini ta cúu ndó tátuhun na co xíní Ndióxi. Jáchi co cúní ndó cuni joho ndó ña cáhí Ndióxi xihín ndo ta co cúní ndó candaa ini ndó tátuhun Ndióxi. Ta ní co cúní ndó quiahva ndó ñamaní ndihvi ínima yíi Ndióxi ini ínima ndo. Xíxi ndivaha nasahin ini tásáhnu jícó ndo ta quiahva já caja ri mé ndó viti.

⁵² Mé tásáhnu jícó ndo nacaja xíxi ndivaha na xihín ndihi na profeta ta nasahni ñahá na mé na yóho naquixi na cáxi tátuhun sahá mé a quíxi chí nuu, mé a co caja cuachi. Ta tá naxinu mé a cán já najicó tátuhun ndó a ta nasahni ndó a.

⁵³ Ta mé ndó cúu ndó na nasahan táto Ndióxi ley nuu joo co cúní ndó caja ndó ña cáhí a —nacachi Esteban xihín ná.

Tá nasahni na Esteban

⁵⁴ Tá naxini joho na sacuaha cán tóco ndihi ña nacahan Esteban já naxojo ndivaha ini na xihín dá chí cáhñá nuhu na.

⁵⁵ Joo nandicutú ndaa ínima Esteban xihín ínima yíi Ndióxi ta já nandicoto nihni da indiví já naxini da ndá quiahva cáhnu cúu Ndióxi ta naxini da cándichi Jesús xoo cuaha Ndióxi.

⁵⁶ Anda já nacachi Esteban já xihín ná:

—Candehé ndó. Núná indiví xíní i ta tívi cándichi Jesús xoo cuaha Ndióxi —nacachi Esteban xihín ná.

⁵⁷ Joo nachicaji tuun na cán joho na já ná a cúní joho na ña cáhan Esteban. Ta nacasahá cáyuhú cóhó na cáti na cuahan na caní na da.

⁵⁸ Natavá na mé Esteban yuhú ñuu ta cán nacasahá cúun na yuu dá. Ta mé na najácojo cuachi jata Esteban cán natavá na cotó na ta nachinduu tóo na ña nuú in da tacú naní Saulo cándichi cán.

⁵⁹ Ta nani cúun na cán yuu Esteban já nacasahá mé Esteban xicá tahví da nu Ndióxi já cáhí da já:

—Jesús, mé ndó cúu xitoho i. Ndiquehe ndó ínima i viti.

⁶⁰ Anda já ñacaxítí Esteban já ñacasáhá cáyuhú cóhó da já ñacachi da já:

—Jesús, xitoho i, a quéhe ndó cuéntá sahá cuachi cája na yóho.

Tá nandihí ñacachi Esteban tuhun yóho já naxihí da.

8

Cásahá Saulo cája xixi da xihín na cúu cuéntá Jesús

¹ Ta mé hora ñasahní na Esteban cándichi Saulo sándehe da ta ñatahan ini da xihín na ñasahní Esteban cán.

Ta mé quívi cán ñacasáhá na cája xixi chága na xihín na cúu cuéntá Jesús ndúu ñuu Jerusalén cán. Chí tóco ndihí na cúu cuéntá Jesús nandicujita nuu na ndijáa chí estado Judea xihín estado Samaria. Joo mé na apóstol cuití va coó naxita nuu toho na. Ñacandoo na ñuu Jerusalén.

² Ta java dataa nandiquehe na yiquí cuñu Esteban cuahan na jánduxu na da tá quiahva ín costumbre na ta a juú quiahva ñasacu na saha dá.

³ Ta mé Saulo ñacaja xixi chága da xihín na cúu cuéntá Jesús ta ñaquihvi da vehe tá vehe na ta ñúhu da na ta táva da na jata véhe. Coó caja toho á cúu ná ña á cúu ná ñáha ta já ñéhe da na cuahan na vecaa.

Cáhan na cúu cuéntá Jesús tuhun vaha saha mé á nuú na estado Samaria

⁴ Ta na cúu cuéntá Jesús tá nandicujita nuu na jata ñuu Jerusalén cán ñacaxi tuhun na tuhun vaha sahá Jesús níi cúu nu xíca na cuahan na.

⁵ Ta ndaja coo in da cúu cuéntá Jesús naní Felipe ñaquee da cuahan da chí in ñuu cuéntá Samaria ta cán ñacasáhá da cáhan da saha Jesucristo nuú ñayivi.

⁶ Ñacasáhá ndítutú cuahá ñayivi nu dá ta xihín ndinuhu ini na táa johó na nu cáhan da xihín ná jáchi ñaxini xihín nuu ná cuahá ñáha náhnu cája Felipe.

⁷ Nandaja vaha da cuahá ñayivi, na ñasañuhu ínimá quini ini chí cáyuhú cóhó mé ínimá quini cán tá quéta ini na quíhvi cán. Ta nandaja vaha ri da cuahá na naxihí tuchu ta nandaja vaha ri da na xíca réncó.

⁸ Sahá ña cán quéa ñacajii ndivaha ini ñayivi ñuu cán xihín ña ñacaja da.

⁹ Ta mé ñuu cán ñasahin in da tají naní Simón. Mé Simón yóho ñasacuu da in ña, da najándahvi ñayivi Samaria cán jáchi ñasacachi da ña cúu dá in da ín ndivaha saha.

¹⁰ Ta tóco ndihí mé ñayivi ñuu cán, á cúu ná na ndahví á na náhnu, ñasaxini johó na xihín ndinuhu ini na nuú ñasacahan da, nduu. Ta ñacachi na saha dá ña cája da ña náhnu tá quiahva cája Ndióxi.

¹¹ Ta ñasacandúsa na nuú ñasacahan da xihín ná jáchi tixi cuaha tiempo najándahvi da na xihín ña tají.

¹² Ta ndaja coo ñacasáhá na cándúsa na ñuu cán tuhun vaha cáhan Felipe saha Jesucristo, ña cacomí Ndióxi cuéntá saha ná tá ná candeé ini na Jesucristo. Ta já ñacasáhá na cándúta ná, ña xihín ñáha viti.

¹³ Ta janda mé Simón cán ñacandúsa da ta ñacandúta dá já ñacasáhá xíca nuu da xihín Felipe. Ta chí cátóntó da xini da ña náhnu xihín ña xituhún cája Felipe cán.

¹⁴ Ta tá ñañehé na apóstol ndúu ñuu Jerusalén cán tuhun ña nandiquehe na Samaria cán tuhun vaha cáhan saha Jesús já ñachindahá na Pedro xihín Juan estado Samaria cán.

¹⁵ Ta tá ñaxinu coo Pedro xihín Juan estado Samaria cán já ñaxica ñahví na nu Ndióxi sahá na cúu cuéntá Jesús cán ña ná chutú ndaa ínimá ná xihín ínimá yii Ndióxi.

¹⁶ Jáchi sa ñacandúta ná cuéntá Jesucristo sahá ña candeé ini na mé á joo a ñáha chutú ndaa ínimá ná xihín ínimá yii Ndióxi.

¹⁷ Anda já chójó Pedro xihín Juan ndáha dá jiní in in na cán nani xíca ñahví da nu Ndióxi já ñachutú ndaa ínimá ná xihín ínimá yii Ndióxi.

¹⁸ Tá ñaxini Simón ña ñachutú ínimá na cúu cuéntá Jesús cán xihín ínimá yii Ndióxi tá chinúu na apóstol ndáha ná jiní ná já cuni da cueen da ndée Ndióxi cán.

¹⁹ Já ñacachi Simón já xihín ná:

—Quiahva ndó ndée cómi ndó jan nuú i já ná cacomí ri yehe va ña já quéa ndá na ná chinúu i ndahá i jiní ná cuu ndicutú ndaa ínimá ná xihín ínimá yii Ndióxi.

²⁰ Anda já ñanducú ñehe Pedro tuhun nu dá já cáchi da já xihín dá:

—Ná jándihi Ndióxi saḥun xihín sahá jjuhún cómun jáchi cáhún ña cuu cueún ña jása maní uun Ndióxi nuú ñayivi.

²¹ Coó sahá tohún cajún ña cája nde yóho jáchi co íin vaḥa toho ínimun nu Ndióxi.

²² Xíní ñúhú jándacoún ña núu cáhvi inún jan ta ndítahan caça taḥvún nu Ndióxi já ná candehé mé á á caja cáhnu ini a saḥun jáchi núu ndivaḥa cáhvi inún.

²³ Jáchi náha cáxi ña cáhiví ndivaḥa inún. Cúú á tátuhun mé ña quini naçató a yohó chí cajún ña núu.

²⁴ Anda já nanducú ñehe Simón tuhun nu Pedro já cáchi da já:

—Caça taḥvi ndó nu Ndióxi sahá i já ná a quíxi ña núu cáchi ndó jan nuú i —naçachi da xihín ná.

²⁵ Tá nandihí nandicani Pedro xihín Juan sahá ña naçaja Ndióxi xihín ná. Tá tá nandihí naçahan na tuhun Ndióxi nuú na cân já naçuee na naṣahan na çahan na tuhun Ndióxi, ña cuu jácaacu ñayivi ndijáá ñuu válí ñúhu chí estado Samaria cân. Anda jáví nandicó coo tucu na chí ñuu Jerusalén.

Cáhan Felipe saḥa Jesús nuú in da naquixi nación Etiopía

²⁶ Tá sa nayaha ña yóho já naxinu in táto Ndióxi nu íin Felipe estado Samaria cân ta já cáchi a já xihín dá:

—Cuáhán chí sur nu quée íchi ña quéta ñuu Jerusalén cuahan chí ñuu Gaza —naçachi tátó Ndióxi xihín dá.

Ta mé íchi cân yáha nuú co ndúu ñayivi jáchi íchí ndivaḥa.

²⁷ Anda já naçuee Felipe cuahan da. Ta íchi nu xíca da cuahan da cân nanditahan da in dataa, da naquixi nación Etiopía. Mé da Etiopía yóho cúú dá in taç cáhnu nación dá jáchi cúú dá da cómi cuénta sahá jjuhún ña cúú ñaha ña naní Candace, ña cómi cuénta sahá ñayivi nación Etiopía. Mé da yóho sa naṣahan da ñuu Jerusalén caja cáhnu da Ndióxi.

²⁸ Ta tá cuahan tucu da íchi ndicó coo da Etiopía cân ta nani íin coo da jaṭa carreta já cáhvi da libro naçahyí profeta Isaías.

²⁹ Anda já naçahan ínimayí Ndióxi xihín Felipe já naçachi a já xihín dá:

—Cativi jín carreta cuahan jan.

³⁰ Anda já naçayati Felipe jín carreta cân ta já naxini johó da cáhvi da Etiopía cân libro Isaías. Anda já nandaca tuhún Felipe da já cáchi da já xihín dá:

—Á cándaḥ inún ña cáhvún jan.

³¹ Anda já nanducú ñehe da Etiopía cân tuhun nu Felipe já naçachi da já:

—Ndaja caja i candaḥ ini i ña cáhvi i tá coó na ndicani nuú i ndía cúní cachi a —naçachi da Etiopía cân xihín Felipe.

Anda já naxica da ñamaní nu Felipe ña ná ndaa da jaṭa carreta da já ná cacoo da xihín dá ta ná ndicani da nu dá ña cúní cachi a. Chí nandaa Felipe carreta cân.

³² Ta cáhvi da Etiopía cân tuhun Ndióxi nu cáchi a:

Tá quiahva ñehe na in ndicachi cuahan rí quivi rí quiahva já naṣaṣehe na da cuahan da quivi da.

Ta tá quiahva cája ndicachi tá co ndáhyi rí nani ndíjaṭa na rí quiahva já naçaja mé dá jáchi coo naṣuná da yúhu dá çahan da.

³³ Naçaja xíxi ndivaḥa na xihín dá ta coo naçaja ndaa na xihín dá.

Jáchi janda na naquixi chíchi nuú naquixi mé dá coo nandiquehe na saḥa dá.

Ña naçaja na quéa naṣahní na da já ná a cóo ga da ñuyíví yóho, cáchi tuhun Ndióxi nu cáhvi da Etiopía cân.

³⁴ Anda já nandaca tuhún da Etiopía cân Felipe já cáchi da já xihín dá:

—Ta viti caja ndó ñamaní ndicani ndó nuú i ndía cúní cachi a yóho. Á saḥa mé va profeta yóho çahan da á sahá inga va da çahan da.

³⁵ Anda já naçasáhá Felipe ndicani da nuú da cân ña naçahyí Isaías já nandicani da tuhun vaḥa saḥa Jesús nu dá.

³⁶ Ta tá yáha na cuahan na nu ñúhu ticuíí já naçachi da Etiopía cân já xihín Felipe:

—Yóho ñúhu ticuíí. Á cuu caja ndúta ndó yeḥe —naçachi da xihín Felipe.

³⁷ Anda já naçachi Felipe xihín dá:

—Tá cándéé ini ndó Jesús xihín ndinuhu ini ndó ta cuu va candúta ndo.

Anda já nanducú ñehe da cân tuhun nu Felipe já cáchi da já:

—Cándúsa i ña cúú Jesucristo in túhún jini já jahyi Ndióxi —naçachi da Etiopía cân.

38 Chí ivi laá nasahnda da Etiopía cán chuun ña ná cani ndichi na carreta cándójo na cuahan na cán. Anda já nanuu ndívi da cuahan da nu ñúhu ticuú ta já najácandúta Felipe da Etiopía cán.

39 Tá nandihí naquee na ini ticuú cán já ñehe ínima yii Ndióxi Felipe cuahan da inga xoo chí coo ñaxini táhan chága da xihín da Etiopía cán. Joo cájii ini da Etiopía cán cuahan da íchi.

40 Tá nandicoto nihni Felipe sa ín da in ñuu naní Azoto. Ta tá ñuu tá ñuu cuahan da cáhan da tuhun vaha saha Jesús nuú ñayivi anda quiahva ñaxinu coo da ñuu Cesarea.

9

Ndíquehe Saulo íchi cuénta Jesús (Hch. 22:6-16; 26:12-18)

1 Joo ndaja coo da naní Saulo cája xíxi tá cája xíxi da xihín na cúu cuénta Jesús. Ta sácú ini da ndaja caja da cahní da na. Ta sahá ña cúni da jándihí da saha ná sahá ña cán quéa nasahan da cáhan da xihín da cúu sacuahá nuú jutu

2 ña ná quiahva na in carta nu cáhan ña ñehe dá ñamaní quihvi da veñuhu ñúhu ñuu Damasco já ná ndinducú da na ndíco íchi cuénta Jesús já ná cató da na cañehe da na quixi na cuhun na vecaa ñuu Jerusalén. Co cája toho a á cúu ná taa á ñáha. Chí naquee Saulo ñuu Jerusalén xihín mé carta.

3 Joo nani xíca da cuahan da íchi tá sa yati xinu coo da ñuu Damasco já in náá cuití nandiyihvi ndaa ñúhu jata dá. Mé ñúhu yóho ñaquixi a chí indiví.

4 Chí ivi laá nandicava Saulo nu ñúhu. Anda já ñaxini johó da cáhan in a xihín dá já cáchí a já xihín dá:

—Saulo, Saulo. Ndá cuénta quéa cája xísún xihín i —cáchí a xihín dá.

5 Anda já ñacasáhá ndáca tuhún Saulo já cáchí da já:

—Yo cúu ndó, na cáhan. Ndaja naní ndo —cáchí da.

Anda já nanducú ñehe a cán tuhun nu dá já cáchí a já xihín dá:

—Yehe cúu u Jesús, mé a cája xísún xihín. Ta xihín ña cájún yóho cúu á tátuhun cája xísún xihín mé vún jáchi cájún tátuhun cája

in tindiquí tá sání ndaa rí nu yóco poya ta jándicuehe rí mé va rí.

6 Anda já ñacasáhá quíji Saulo xihín ña yíhví da já ñacachi da já:

—Cáhan ndó xihín i, xitoho i ndía quéa cúni ndó ná caja i —cáchí da.

Anda já nanducú ñehe Jesús tuhun nu dá já cáchí a já xihín dá:

—Cuándacoo ta cuáhán quihvi ñuu Damasco. Ta jan cáhan na xuhun ndía ndítahan cajún —cáchí Jesús.

7 Ta tóco ndihí da cásañan xihín Saulo cán ñayíhví ndivaha da jáchi ñaxini johó da ña cáhan cán vatí coo ñayivi ná xini da.

8 Tá nandihí já nandacoo Saulo nu ñúhu. Joo tá nasuná da nduchú núu da chí coo tívi ga nuú dá. Sahá ña cán quéa jánda tíin ndaa na da cuahan da chí Damasco.

9 Cán nasahín cuáa da tíxi uní quívi ta chí coo ñaxixi da ta ni ticuú coo ñaxihí da.

10 Mé ñuu Damasco cán nasahín in da cúu cuénta Jesús naní Ananías. Ta ndaja coo ñaxini ndímáhnú da Jesús ta ñacahan xihín dá já ñacachi a já:

—Ananías.

Anda já nanducú ñehe da tuhun nu á já cáchí da já:

—Yóho ín i. Ndía cúni ndo, xitoho i.

11 Anda já ñacachi Jesús xihín dá:

—Candichi ta cuáhán cáyé naní a Ndacú Ndaa. Ta vehe da naní Judas cán ndaca tuhún sahá in da naní Saulo, da ñacacu ñuu Tarso. Viti ñúhú xíca tahví da nu Ndióxi ndácaan da.

12 Jáchi ñaxini ndímáhnú da ña quíhvi mún, Ananías vehe nu ndácaan da. Ta ñaxini da ña chínúún ndáhun jini dá ta já cuu candehé tucu da —ñacachi Jesús xihín Ananías.

13 Tá ñaxini johó Ananías ña yóho já ñacachi da já:

—Candehé ndo, xitoho i. Yíhví i cuhun i jáchi sa cuhá ndivaha ñayivi ndícani nuú i sahá mé Saulo jan. Ta ndícani na nuú i ndá quiahva xíxi cája da xihín na cúu cuénta mé á, na ndúu ñuu Jerusalén.

14 Ta viti vaxi da jan ñuu yóho jáchi sa ñaxíca da ñamaní nuú na sacuahá nuú jutu ña ná cuu jataca da tóco ndihí na cája cáhnu mé ndó já ná cañehe da na cuhun na vecaa —ñacachi Ananías.

15 Anda já nacachi Jesús já xihín Ananías: —Cuáhán quíi jáchi sa nacaxi i da ña ná cahan da sahá i nuú ñayivi java ga nación ta quiahva já cahan da sahá i nuú na cómi cuénta sahá na cán. Ta nacaxi i da ña ná cahan da sahá i nuú na naquixi chichi Israel viti.

16 Ta jánaha i nu dá ndá quiahva ndítahan ndoho ini da sahá i —nacachi Jesús.

17 Anda já naquee Ananías cuahan da vehe nu ín Saulo cán. Tá naxinu da cán já nachinuu da ndáha dá jini Saulo já nacachi da já xihin dá:

—Ñani Saulo. Mé Jesús, xitoho í, mé á naxinún nuú naquisún íchi cán, mé á cán quéa nachindahá yehe vaxi i já ná ndinuna nduchú núún já ná cuu candehé tucún. Ta já cúni Ndióxi ña ná ndicutú ndaa ínimun xihin ínima yii mé á —nacachi Ananías xihin Saulo.

18 Chí ivi laa nacasáha cuyu ñaha tátuhun runchu tiyacá nduchú núú Saulo chí nanuna nu dá sándehe tucu da. Anda já nasahan Saulo nacanduta dá.

19 Tá nandihí já naxixi da ta nandihvi tucu ndéé dá ta nasahin too da chá quivi xihin na cúu cuénta Jesús ndúu ñuu Damasco cán.

Cáhan Saulo saha Jesús nuú ñayivi ñuu Damasco

20 Tá nandihí já nacasáha Saulo jánaha da tuhun Ndióxi ini veñuhu ta jánaha da ña cúu Jesús in túhún jini já jahyi Ndióxi.

21 Ta tóco ndihí na táa johu nu cáhan da catóntó na cája da. Já cáchi xihin táhan na já:

—Á a juú da yóho cúu da nandicujita cája xixi xihin na cúu cuénta Jesús ñuu Jerusalén, nduu. Á a juú sa mé da yóho vaxi da tiin da na cúu cuénta Jesús mé ñuu yóho já ná cuhun na nuú na sacuaaha nuú jutu já ná taán ñahá na vecaa —nacachi xihin táhan na.

22 Joo ví ga ví ndindeé ini Saulo cáhan da tuhun Ndióxi. Ta náha da nuú ñayivi ña mé Jesús cúu Cristo, mé á nachindahá Ndióxi cacomí cuénta sahá ñayivi. Janda quiahva já najajaca da xini túni na naquixi chichi Israel ndúu Damasco cán xihin tuhun cáhan da xihin ná.

Xínu Saulo nuú java na Israel jáchi cúni na cahní na da

23 Tá sa nayaha cuahá quivi já najándique táhan na naquixi chichi Israel cán tuhun na ña cahní na Saulo.

24 Joo nacandaa ini Saulo ña ndúcú na cahní na da. Ta mé na ndúcú cahní Saulo cán nasandati na ñuu ta ndiví yéhe ñuu cán janda quiahva ná queta da já ná cahní na da.

25 Joo in ñuu na cúu cuénta Jesús ndúu ñuu Damasco cán nachicaan na da ini in toyicá cáhnu já najánuu na da ndica náma cáhnu ndáji yuhú ñuu cán já nacacu da ta naquee da cuahan da.

Cuahan Saulo ñuu Jerusalén

26 Tá naxinu coo Saulo ñuu Jerusalén já nanducú da ndique táhan da xihin na cúu cuénta Jesús ndúu cán. Joo tóco ndihí na cán nayihví na da jáchi co cándusa na ña sa nandiquehe da íchi cuénta Jesús.

27 Joo nandiquehe Bernabé saha Saulo. Nasahan da najánaha da da nuú na apóstol cán já ná ndique táhan na xihin dá. Ta nandicani Bernabé nu ná ndaja nasahin tá naxini Saulo Jesús íchi nu xica da cuahan da chí ñuu Damasco. Ta nandicani da ña nacahan Jesús xihin Saulo. Ta nandicani da ña coo nayihví Saulo cahan da saha Jesús ñuu Damasco.

28 Anda já nandiquehe na Saulo ta nacandoo da ñuu Jerusalén. Ta nacasáha xica nuu da xihin na apóstol.

29 Ta co yihví da cáhan da sahá Jesús. Ta nandituhún da xihin na naquixi chichi Israel, na cáhan tuhun griego ndúu ñuu cán. Joo mé na cán ndúcú na ndá quiahva caha na cahní na da.

30 Tá nacandaa ini na cúu cuénta Jesús ña ndúcú na cahní na Saulo já ñéhe na da cuahan da ñuu Cesarea. Anda já nachindahá na da cuanuhu dá ñuu Tarso.

31 Anda já nanduu vaha ini tóco ndihí na cúu cuénta Jesús ndúu ndijáá estado Judea xihin estado Galilea xihin estado Samaria. Ta nandindacú chága ví ini na xihin tuhun Ndióxi. Ta xihin ndinuhu ini na cája cáhnu na Ndióxi. Ta chindeé ínima yii mé á na. Ta já nandicuaaha chága na cuahan na.

Ndivaha in da naní Eneas

³² Ta ndaja coo xíca nuu Pedro xító nihni da na cúu cuéntá Jesús ndúu ñuu válí cán. Ta já nasahan ri da xító nihni da na cúu cuéntá Jesús ndúu ñuu Lida.

³³ Cán nanditahan da in dataa naní Eneas, da naxihi tuchu saha. Ta tixi una cuia nasandúhu dá jáchi a cúu caca da.

³⁴ Anda já nacahan Pedro xihin dá já nacachi da já:

—Eneas, viti ndája vaha Jesucristo yohó. Cuáhán ndacoo. Nditivún yivun —cáchi Pedro xihin dá.

Chí ivi laá nandacoo Eneas.

³⁵ Tóco ndihi na ndúu ñuu Lida xihin na ñuu Sarón naxini na da nandivaha yoho ta anda já najandacoo na costumbre yata nasacaja na já nandiquehe na íchi cuéntá Jesús, xitoho í.

Nditacu in ñañaáha naní Dorcas

³⁶ Ta ndaja coo nasahin in ñañaáha, ñá cúu cuéntá Jesús ñuu Jope. Ta mé ñañaáha yoho naní ñá Tabita ta tuhun griego cáchi na Dorcas xihin ñá. Ta mé Dorcas yoho ní tiempo nandihini ini ñá cája ñá ñamaní xihin ñayivi ta nachindeé ñá na ndahví.

³⁷ Ta mé tañu já naquehe cuehe Dorcas ta naxihi ñá. Ta tá sa nandicata na yiquí cuñu ñá já ñéhe na ña nasahan na nachindúhu ná ña piso ninu vehe cán.

³⁸ Ta yati va ñéhe táhan ñuu Jope cán xihin ñuu Lida nu in Pedro. Tá nacandaq ini na cúu cuéntá Jesús ña in yati Pedro já nachindahá na ivi dataa nasahan da cana da Pedro ña ná cuhun quí dá ñuu Jope cán.

³⁹ Anda já ndáca táhan Pedro cuahan da xihin ndívi dataa cán. Tá naxinu coo Pedro ñuu Jope cán já najáquihvi na da ini vehe nu ndácaan mé ndii Dorcas cán. Nataka tiyivi cuahá najihí cuaan ndúu na sácu ndivaha na saha ñá naxihi cán. Ta najánaaha na jáhma ña nacavaha Dorcas nu dá tá nasatacu ñá.

⁴⁰ Anda já nacachi Pedro xihin ndihi ñayivi ndúu cán ña ná quee tóo na jata véhe. Tá sa naqueta na cán já nacaxítí da xíca tahví da nu Ndióxi. Anda já nacasáhá sándehe da ndii cán já nacasáhá cáchi da já xihin ña:

—Cuáhán ndacoo, Tabita.

Tá nacachi da já chí ivi laá nanuna nduchú núu ña nanditacu ñá. Tá naxini ñá Pedro já nasacoo ñá.

⁴¹ Anda já natiin Pedro ndáha ña já nandínehe da ña. Anda já nacana da na cúu cuéntá Jesús xihin na cuaan cán ná quihvi tucu na cán jáchi sa nanditacu ñá.

⁴² Tóco ndihi ñayivi ñuu Jope cán nacandaq ini na ña nanditacu Dorcas chí cuaha ná nacandúsa na Jesús ta nandihvi na íchi cuéntá mé á.

⁴³ Ta chí nacandoo Pedro cuahá quivi ñuu Jope cán. Nacandoo tóo da vehe in da naní Simón, da ndája vii ní quíti.

10

Cáhan Pedro tuhun vaha saha Jesús nu Cornelio

¹ Ta ndaja coo nasahin in dataa naní Cornelio ñuu Cesarea cán. Ta mé Cornelio yoho cúu dá da cómi chuun nuú iñu ciento soldado. Ta mé táhdá soldado yoho naní a Táhdá Italiano.

² Ta mé Cornelio yoho xihin tóco ndihi na vehe da cája cáhnu na Ndióxi xihin ndinuhu ini na. Ta jásá da jjuhún da ña chindeé da na naquixi chichi Israel. Ta ní tiempo xíca tahví da nu Ndióxi.

³ In quivi tátuhun caa uní sahini nani xíca tahví da nu Ndióxi já naxini cáxi táhyí da naquihvi in táto Ndióxi ini vehe nu ndácaan da já nacachi a já xihin dá:

—Cornelio.

⁴ Ta chí nayihví Cornelio sándehe da táto Ndióxi cán. Anda já nacachi da já:

—Ndía cúní ndo, táto Ndióxi.

Anda já nanducú ñehe táto Ndióxi cán tuhun nu dá já cáchi a já xihin dá:

—Xíni johó Ndióxi tá xíca tahvún nu á ta sa xíni a ña nachindeé cuahún na ndahví. Ta táhán ini mé á xihin ña cájún.

⁵ Ta viti cúní Ndióxi ña ná chindahún java dataa ná cuhun da ñuu Jope já ná cana da da naní Simón, da cáhan tucu na Pedro xihin ná quixi da.

⁶ In tóo Pedro vehe inga da naní Simón, da ndája vii ní quíti. Ta yati yuhú tañuhú in vehe da. Ta mé Pedro cán caxi tuhun da xuhun ndía ndítahan nuun cajún —nacachi táto Ndióxi cán.

7 Tá sa naquee táto Ndióxi cán cuahan já nacana Cornelio ivi mozo da ta nacana da in táhan soldado, da cómi da cuénta saha. Ta mé soldado yóho cúu dá in da caja cáhnu Ndióxi. Ta cándeé ini Cornelio da.

8 Ta tá nandihí nandicani Cornelio nu ndíhuni da ña nacachi táto Ndióxi xihín dá já nachindahá ñahá da cuahan da ñuu Jope.

9 Ta inga quiví itaan xíca na cán cuahan na íchi ta sa yati xinu coo na ñuu Jope. Ta cúu á tátuhun caxivi ta mé hora já nandaa Pedro jini véhe caça tahví da nu Ndióxi.

10 A juú quiahva cuíco Pedro chí naxica da ña cuxu da. Ta nani cája ndíví na ña cuxu da já najánañha Ndióxi in ñaha nu dá.

11 Ta ña naxini da quea nandinuna indivi já nanuu in jáhma cáhnu tátuhun in sábaná ña ndíco ndícomí tito ta núu a vaxi ñuyiví yóho xíní da.

12 Ta mé ini jáhma cán ñúhu tá nuú quítí, rí comí saha xihín coo xihín laa viti.

13 Anda já naxini johó da cáhan in a xihín dá já nacachi a já:

—Pedro. Candichi ta cahní quítí jan casún.

14 Anda já nanducú ñehe Pedro tuhun já cáchí da já:

—A caja toho i já, xitoho i jáchi ni in túhún tañu a ñaha caxí i quítí quini tátuhun rí yóho. Jáchi cáchí ley nasahan ndó nuú nde ña ná a caxí toho nde rí —cáchí Pedro xihín á.

15 Anda já nacahan tucu a xihín dá já nacachi a já:

—Sa nandaja vií va Ndióxi rí jan. Saha ña cán quea co ndítahan cachún ña cúu rí rí quini —cáchí a xihín dá.

16 Tixi uní táhndá naxini da ña yóho nacaja Ndióxi. Anda já nandindita tucu jáhma cán cuahan chí indivi.

17 Chí nacasáhá ndícani ini Pedro ndía cúni cachi ña naxini da. Ta xihín ña yóho naxinu coo ndíhuni dataa, da nachindahá Cornelio mé vehe nu ín Pedro cán. Jáchi vaxi da ndaca tuhún da sahá vehe Simón janda quiahva nanditahan da ña.

18 Ndíta ndíhuni da cán yuyéhé vehe Simón ta cáyuhú da ndaca tuhún da sahá in da naní Simón, da cáhan tucu na Pedro xihín.

19 Ta nani ndáca tuhún na yóho ín yii va Pedro jini véhe cán ndícani ini da sahá ña naxini da nacaja Ndióxi cán. Anda já nacahan ínima yii Ndióxi xihín dá já cáchí a já:

—Candehé, nandai cuu uní taa vehe yóho ta ndínducú da yohó.

20 Cuáhán nuu cuhún xihín dá ta a ndícani inún jáchi mí i nachindahá i da vaxi —cáchí a xihín Pedro.

21 Anda já nanuu Pedro já naxinu da nu ndíta dataa nachindahá Cornelio cán. Já nacachi Pedro já xihín dá:

—Yehe cúu Pedro, da vaxi ndó ndínducú ndo ta viti cachi ndó xihín i ndá quea cúni ndo.

22 Anda já nanducú ñehe da cán tuhun nu Pedro já cáchí da já:

—Da naní Cornelio cúu da nachindahá ndehe vaxi nde. Mé Cornelio cúu dá in da cómi cuénta sahá ñnu ciento soldado. Mé dá cúu dá in taa caja ña ndaa. Ta caja cáhnu da Ndióxi. Ta quíhvi ndivaha ini na Israel da. Ta nacahan in táto Ndióxi xihín dá ña ná chindahá da ndehe cana nde ndohó cuhún ndó vehe da já ná cahan ndó xihín dá ndá quea cúni Ndióxi caja da —cáchí da xihín Pedro.

23 Anda já najáyaha Pedro ndíhuni dataa cán ini vehe. Já nacandoo da cán naquiji da ñuu vehe Simón cán. Ta inga quiví itaan já naquee Pedro cuahan da xihín ndíhuni dataa cán. Ta ndáca Pedro java na cúu cuénta Jesús ndúu ñuu Jope cán cuahan na xihín dá.

24 Janda inga quiví itaan já naxinu coo na ñuu Cesarea nu ín Cornelio ndáti da na. Mé Cornelio yóho sa najátaca da tóco ndíhi na vehe da xihín java na ñehe táhan vaha xihín dá ndúu na xihín dá ndáti na saá Pedro.

25 Tá naxinu coo Pedro vehe cán já naqueta Cornelio ndiquehe ñahá da. Ta tá nandihí já nacaxítí Cornelio nu Pedro ña caja cáhnu ñahá da.

26 Joo nasacu ndichi Pedro da já nacachi Pedro já xihín dá:

—Candichi jáchi ñayivi xihín mé vún cúu yehe.

27 Sa já cáhan Pedro xihín dá ndáca táhan da nandihvi da ini vehe. Ta tá nandihvi da

cán já naxini Pedro nanditútú cuahá ñayivi ndúu na cán.

²⁸ Anda já ñacasáhá Pedro cáhan da xihin ná já cáchí da já:

—Sa xini vaha ndó ña cúu yehe in da naquixi chichi Israel. Ta sa xini ndó ña sáhndá ley nuú nde ña ná a catáhan nde xihin ñayivi tóho. Ta ni vehe na ná a ndíhvi nde cáchí ley. Joo viti najánaha Ndióxi nuú i ña co cúu ndehe ñayivi víi chága a juú ga ndóhó, na tóho.

²⁹ Sahá ña cán quéa tá nacana ndó yehe ivi laá naquee e vaxi i. Ta ni coó nandaja ndíhí i da ndáca yehe vaxi i yóho. Ta viti cúni candaa ini i ndá cuéntá quéa nacana ndó yehe vaxi i —cáchí Pedro.

³⁰ Anda já nanducú ñehe Cornelio tuhun nu Pedro já cáchí da já:

—Janda comí quivi tátuhun hora viti, xijuhun i ta xíca tahví i nu Ndióxi ndácaan i vehe e. Ta tá nasandehé e já naxini i in dataa ndíxí jahmá yehe cándichi da nuú i.

³¹ Já nacachi da já xihin i: “Cornelio, sa xini johó Ndióxi nu xíca tahvún nu á. Ta quéhe a cuéntá sahá ñamaní cájún xihin na ndahví.

³² Ña cán quéa chindahá java dataa ná cuhun da ñuu Jope cana da Simón, da cáhan tucu na Pedro xihin ná quixi da cahan da xuhun. Viti lín tóo da vehe in da naní Simón, da ndája víi níi quítí. Ta yati yuhú tañuhú ndácaan vehe da”, nacachi táto Ndióxi cán xihin i.

³³ Sahá ña cán quéa ivi laá nachindahá i mozo i nasaa da nducú da ndohó. Ta vaha nacaja ndó vaxi ndó. Ta viti nanditútú ndíhi nde ndáti nde nu Ndióxi. Ta cúni nde cuni johó nde tóco ndíhi ña nasahnda Ndióxi nu ndó cachi ndó xihin nde —cáchí Cornelio xihin Pedro.

Cáxi tuhun Pedro nuú ñayivi vehe Cornelio

³⁴ Anda já ñacasáhá cáhan Pedro já nacachi da já:

—Viti cándaa ini i ña coó na náhnu chága a juú ga inga na nu Ndióxi jáchí nu mé á in cúu ndíhi ví.

³⁵ Ña cajú mé á quéa ndíquehe vaha ndá ñayivi nacuu tá cándéé ini na mé á ta cajú na ña vaha. Coó cajú toho a á cúu ná na Israel á na tóho.

³⁶ Nacaxi tuhun Ndióxi nuú ñayivi Israel ndá quiahva cuu coo vaha ini na tá cándéé ini na Jesucristo, mé á cúu xitoho toco ndíhi.

³⁷ Sa cándaa ini ndó ndaja nasahiin tá ñacasáhá Juan cáxi tuhun da nuú ñayivi ndúu estado Galilea ña ná ndicó coo ini na nuú cuachi na ta já ná candúta na. Ta nandicutita nuu tuhun ndijáá nu ndúu na Israel.

³⁸ Ta sa cándaa ini ndó ndaja nacaja Ndióxi xihin Jesús, mé a naquixi ñuu Nazaret. Najándicutú ndaa Ndióxi Jesús xihin ínimá yíi mé á ta najándicutú a ña xihin ndéé mé á. Ta mé Jesús naxica nuu a cajú ndinuhu ña vaha xihin ñayivi. Ta nandaja vaha mé á na nasandoho ini nacaja tiñáhá sacuaña. Nacaja Jesús ña yóho jáchí nasahiin Ndióxi xihin á.

³⁹ Ta mé nde, na apóstol cúu na naxini ña nacaja Jesús tóco ndíhi ña yóho tá nasahiin a estado Judea ta tá nasahiin a ñuu Jerusalén. Anda já nasahní na mé á tá nacata caa na a ndíca crúxu.

⁴⁰ Joo tá nayaha uní quivi já najánditacu Ndióxi Jesús ta nacaja Ndióxi ña ná naha Jesús mé á nuú nde.

⁴¹ Coó nanaha toho Jesús mé á nu tóco ndíhi ñayivi. Nuú ndehe, na nacaxi Ndióxi cuití va nanaha Jesús mé á. Jáchí janda jihna nacaxi mé á ndehe ña ná cuni nde ña ta ná cahan nde xihin ñayivi saha mé á. Ta tá sa nanditacu tucu a tañu ndíi cán já naxixi nde xihin á.

⁴² Ta mé á nachindahá ndehe caxi tuhun nde nuú ñayivi saha Jesús ta ná ndicaní nde nu ná ña nasacu Ndióxi mé Jesús ña ná cajú víi a sahá ñayivi. Coó cajú toho a á tácu na á naxihí na.

⁴³ Ta jári na profeta va janda sanahá nacahan na saha Jesús ta nacachi na ña cajú cáhnu ini Ndióxi sahá cuachi ndijáá ñayivi tá ná cándéé ini na mé á —cáchí Pedro xihin ndíhi na ndúu vehe Cornelio cán.

Jándicutú Ndióxi na coó naquixi chichi Israel xihin ínimá yíi mé á

⁴⁴ Ta nani cáhan Pedro cándichi da já naxinu ínimá yíi Ndióxi najándicutú a ínimá tóco ndíhi na táa johó ña cáhan da cán.

45 Ta na cúu cuénta Jesús, na naquixi chichi Israel, na ndáca Pedro vaxi xihin dá cán, nacatontó na tá naxini na nandicutú na tóho cán xihin ínimá yíi Ndióxi.

46 Ta xini na ña cúu á ña ndaa jáchi naxini johó ña cája cáhnu na Ndióxi ta cáhan na inga tuhun ña coó nasatiahva na.

47 Anda já nacachi Pedro já:

—Cája i cuénta ni in túhun toho ñayivi a cúu caji nuu nuú na tóho yóho ña ná candúta ná jáchi sa nandicutú ínimá ná xihin ínimá yíi Ndióxi tátuhun nandicutú mé nde xihin á —cáchi Pedro.

48 Anda já nasahnda Pedro chuun ña ná jácandúta ná na cuénta Jesucristo. Tá nandihí já naxica tahví na cán nu Pedro ña ná candó da chága quívi xihin ná.

11

Ndicani Pedro nuú na cúu cuénta Jesús nduu ñuu Jerusalén sahá ña nayaha vehe Cornelio

1 Tóco ndihi na apóstol xihin na cúu cuénta Jesús nduu estado Judea ñañehe ná tuhun ña nandiquehe ri na coó naquixi chichi Israel tuhun Ndióxi.

2 Ta tá nandicó coo Pedro chí ñuu Jerusalén já nacasáhá in táhnda na cúu cuénta Jesús nduu ñuu cán cáhan nuu na saha dá. Mé na yóho cáhan na ña ndítahan nuú na tóho cahnda loho na yiquí cuñu na tátuhun ín costumbre na Israel.

3 Já cáchi na já xihin dá:

—Ndá cuénta quéa nasahún naxito nihnún na coó naquixi chichi Israel. Tá ndá cuénta quéa naxisún xihin ná. A váha toho nacajún cáhan nde —nacachi na Israel cán xihin Pedro.

4 Anda já nacasáhá Pedro ndicani da tóco ndihi ña nayaha janda saha. Já nacachi da já:

5 —Nasahin i ñuu Jope. Ta nani xica tahví i nu Ndióxi já najánaña mé á in ñaha nuú i. Ta ña naxini i cúu in jáhma cáhnu tátuhun sábaná nanuu chí indiví ta ndícomí xoo tito á nacato. Ta chí janda yati nu ín i naxinu a.

6 Ta tá nasandehé váha i ini a já naxini i ñuhu tá nuú quíti, rí comí saha xihin tá nuú quíti yúcu xihin coo xihin laa ñuhu ini a naxini i.

7 Anda já naxini johó i cáhan in a já nacachi a já xihin i: “Pedro, cuáhán ndacoo cahní quíti jan casún.”

8 Anda já nanducú ñehe e tuhun já nacachi i já: “A cáxi toho i rí yóho, xitoho i jáchi coo xini toho i caxi i quíti quini tátuhun rí yóho”, cáchi i xihin Ndióxi.

9 Anda já nacahan tucu a cán chí indiví já nacachi a já: “Sa nandaja vií va Ndióxi rí jan. Sahá ña cán quéa coo ndítahan cachún ña cúu rí rí quini”, nacachi Ndióxi xihin i.

10 Uní táhnda nayaha ña yóho nacaja Ndióxi. Anda já nandaa tucu tóco ndihi ña cán cuahan tucu a chí indiví.

11 Ta chí sa mé hora já naxinu coo uní taa ndínducú da yehe mé vehe nuú nasahin tóo i cán. Ta da cán naquixi da janda ñuu Cesarea ndínducú da yehe.

12 Ta já nachindahá ínimá yíi Ndióxi yehe cuahan i xihin ná sahá ña cán quéa coo nayihví i cuhun i xihin ná. Ta ndáca i ñnu ñaní yóho nasahan da xihin i. Tá naxinu coo nde ñuu cán já naquihvi nde vehe Cornelio, da nachindahá da cán ndínducú yehe.

13 Ta tá sa ñuhu ndihi nde vehe Cornelio cán já nacasáhá ndicani da nuú nde ña naxini da cándichi in táto Ndióxi ini vehe da ta nacachi a xihin dá já: “Chindahá java taa ná cuhun da ñuu Jope cana da in da naní Simón, da cáhan tucu na Pedro xihin.

14 Ta da cán caxi tuhun xuhun ta xihin ndihi na vehún ndaja caja ndó cacu ndaa ínimá ndó”, nacachi táto Ndióxi xihin Cornelio cán.

15 Ta tá nacasáhá i cáhan i xihin na vehe Cornelio cán já nandicutú ndaa ínimá ná xihin ínimá yíi Ndióxi tá quiahva najándicutú a ínimá mí jihna.

16 Xihin ña yóho nandicuhun ini i ña nacachi Jesús, xitoho i xihin yo tá nacachi a já: “Mé a ndaa najácandúta Juan ndohó xihin ticuú joo vaxi quívi jándicutú Ndióxi ndohó xihin ínimá yíi mé á”, nacachi Jesús.

17 Ta tá sa nasahan Ndióxi ínimá yíi mé á nuú na cán tá quiahva nacaja xihin mí sahá ña nacandúsa i Jesucristo, xitoho i ama ná caní táhan i xihin Ndióxi sahá ña cája mé á xihin na cán —nacachi Pedro.

18 Tá naxini johó na cán ña nacachi Pedro já nacatáji ná ta nacaja cáhnu na Ndióxi já nacachi na já:

—Mé a ndaa sáhan ri Ndióxi ñamaní nuú na tóho ña ná ndicó coo ini na jándacoo na cuachi cája na já ná coo na xihin mé á anda ama cáa quivi —nacachi na cúu cuéntá Jesús, na naquixi chichi Israel cán.

Cuahá na ñuu Antioquía ndiquehe na íchi cuéntá Jesús

¹⁹ Tá nandihí nasahní na Esteban já nacasáhá cája xixi na xihin na cúu cuéntá Jesús. Anda já nandicuíta nuu na cuahan na ta java na naxinu na janda chí estado Fenicia. Java na naxinu na cuahan na chí isla Chipre. Ta java na naxinu na chí ñuu Antioquía. Ta cán nacasáhá cáhan na tuhun Ndióxi nuú na naquixi chichi Israel cuití va. Joo coo nacaxi tuhun na ña nuú na tóho cán.

²⁰ Joo java na cúu cuéntá Jesús, na naquixi chí isla Chipre cán xihin na naquixi ñuu Cirene naxinu coo na ñuu Antioquía ta nacasáhá cáhan na tuhun vaha saha Jesús, xitoho í xihin na coo naquixi chichi Israel ndúu cán.

²¹ Ta nasahan Ndióxi cuahá ndée mé á nu ná. Ta cuahá ndivaha ñayivi najándacoo na costumbre yatá na ta nandiquehe na íchi cuéntá Jesús, xitoho í.

²² Tá nacandaá ini na cúu cuéntá Jesús ndúu ñuu Jerusalén tóco ndihí ña nayaha cán já nachindahá na Bernabé cuahan da janda ñuu Antioquía cán.

²³ Tá naxinu coo Bernabé ñuu Antioquía cán já naxini da ndá quiahva nacaja Ndióxi ñamaní xihin ñayivi ñuu cán chí nacajii ndivaha ini da. Ta nacahan da xihin ná ña ná candico na íchi cuéntá Jesús xihin ndinuhu ini na.

²⁴ Mé Bernabé yóho cúu dá in taa vaha. Ta chútú ndaa ínima da xihin ínima yii Ndióxi ta cándéé cáhnu ini da mé á. Ta cuahá ñayivi nandiquehe na íchi cuéntá Jesús, xitoho í sahá ña nacaja da.

²⁵ Tá nandihí já naquee Bernabé cuahan da ndinducú da Saulo chí ñuu Tarso. Ta tá nandiñehe dá Saulo já ñehe da da cuahan da chí ñuu Antioquía.

²⁶ Ta nasanduú da xihin na cúu cuéntá Jesús mé ñuu cán tátuhun in cuia. Ta najánaha da tuhun Ndióxi nuú cuahá ndivaha ñayivi. Ta mé ñuu Antioquía cán

cúu nuú nu cuití nasacu na quivi ná cananí na na cúu cuéntá Jesús.

²⁷ Ta mé tiempo já naxinu coo java na profeta mé ñuu Antioquía cán. Mé profeta yóho naquixi na chí ñuu Jerusalén ta tiahva na jáyaha na tuhun cáhan Ndióxi nuú ñayivi.

²⁸ Ta in táhan da profeta cán, da naní Agabo nandaça ndichí da tañu na cúu cuéntá Jesús mé vehe nuú nataca na cán. Já nacachi da já:

—Cáxi tuhun ínima yii Ndióxi xihin í ña quixi in tama ndeé ndivaha ndijáá ñuyiví yóho —nacachi da xihin ná.

Ta chí já ndusa nasahin jáchi naquixi in tama ndeé ndivaha tá nasacomí Claudio cuéntá sahá ñayivi ñuu Roma.

²⁹ Anda já na cúu cuéntá Jesús ñuu Antioquía cán najátaca na jiuhún chindeé ñahá na cán. Ta ndá quiahva xinu coo nu mé ná quiahva na, quiahva já sáhan na. Anda já nachindahá na ña nuú na cúu cuéntá Jesús ndúu estado Judea.

³⁰ Ta mé Saulo xihin Bernabé cúu da ñehe jiuhún cán cuahan da ndiquiahva da ña nuú na sacuahá cómi cuéntá sahá na cúu cuéntá Jesús ndúu estado Judea cán.

12

Tá nacasáhá ndóho chága ini na cúu cuéntá Jesús

¹ Ta mé tiempo já nacasáhá Herodes, da cómi cuéntá sahá ñuu Jerusalén cán cája xixi da xihin java na cúu cuéntá Jesús.

² Nasahnda da chuun ña ná cahní na Jacobo, ñani Juan xihin yuchú cáni. Ta já nacaja na.

³ Ta tá naxini Herodes ña nacajii íni na sacuahá veñuhu Israel xihin ña nasahní da Jacobo já natiin ri da Pedro. Ta ña yóho nasacuu a mé tiempo tá cája na Israel víco tá xixi na pan ña co cáva táhan yusá naxaa xihin.

⁴ Tá sa nachicaan Herodes Pedro vecaa já nasahnda da chuun nuú comi táhnda soldado ña ná candaa na da. Ta comi comi taa ndáca in in táhnda cán. Mé Herodes nasacu ini da tavá da Pedro vecaa ndiquiahva da da nuú ñayivi Israel ña ná cahní na da tá sa ná yaha víco.

⁵ Nani ndácaan Pedro vecaa ndáá vaha na da. Joo na cúu cuéntá Jesús xihín ndinuhu ini na xíca tahví na nu Ndióxi saha dá.

Tává Ndióxi Pedro vecaa

⁶ Ta in ñuú sácú ini Herodes tavá da Pedro vecaa inga quiví itaan ña ndiquiahva da da nuú ñayivi, nduu. Joo mé ñuú já nani cándúhu Pedro quíji da tañu ivi soldado ta ndíco jíin ga cadena ndáha dá ta co cáhan sahá java ga soldado ndíta ndáá yéhe vecaa cán.

⁷ Ta in náá cuití naxinu coo in tátō Ndióxi ini vecaa cán chí nandiyihvi ndaa ini a. Anda já naxinu coo mé tátō Ndióxi nu cándúhu Pedro já naquiní a ndáha á yica ndíca da já nandicaxí ini da. Anda já nacachi a já xihín dá:

—Camún ndacoo quíun.

Anda já nacuyu cadena ña nasandico ndáha Pedro.

⁸ Anda já nacachi tucu tátō Ndióxi cán já xihín dá:

—Ndaja tuun níi tisún ta cayihi ndusun.

Ta tá sa nacaja da ña já nacachi tucu tátō Ndióxi já xihín dá:

—Quehe ticachí níhnu chinúú jatun ná cohō candico yehe —cáchi a xihín dá.

⁹ Anda já táca Pedro jata tátō Ndióxi cán cuahan da. Joo co xini da á jivi quea á a juú a. “Sání ví”, cáhan da.

¹⁰ Ta xíca na cáshan na já nayaha na nu ndíta in táhnda soldado. Ta anda já nayaha na nu ndíta inga táhnda soldado. Ta tá sa naxinu coo na yéhe caa cán já nanuna mé va já naquee na vecaa cuahan na. Ta tá sa naxica chá na cáyé cán já naquee tátō Ndióxi cán cuahan ta já nacandoo Pedro cán.

¹¹ Anda já nacandaa ini Pedro ña nayaha. Ta nacachi da já xihín mé dá:

—Viti ndusa cándaa ini i ña mé a ndaa táhyi quea nacaja tátō Ndióxi yóho. Mé Ndióxi nachindahá a tátō á já ná tavá a yehe ndáha Herodes já ná a cáhni da yehe tá quiahva cúni na Israel —nacachi da.

¹² Nani cáhan Pedro xíca da cuahan da vehe María, ña cúu náná Juan, da naní tucu Marcos. Cán nanditútú cuahá na cúu cuéntá Jesús ndúu na xíca tahví na nu Ndióxi saha Pedro.

¹³ Ta tá naxinu coo da vehe María cán já nacasáha cáti ndáha dá yéhe cán. Anda já naxinu coo in ña loho naní Rode ña candehé ña ndá na cándichi jata véhe cán.

¹⁴ Tá naxini johō ña cáhan da já nandicuni ña tachi Pedro. Joo nandindójó ña cuná ña yéhe sahá ña cáji iní ña. Ta já xínu ña nandico coo tucu ña ini vehe caxi tuhun ña xihín na java cán ña cándichi Pedro jata véhe.

¹⁵ Joo tá nandicani ña ña yóho nu ná já nacachi na já xihín ña:

—Tachi va cúu yóho.

—Jivi da —cáchi ña cán ndúcú ndéé ña cáhan ña xihín ná.

—Anda já nacachi na cán já:

—Ndá ínima va da quea jan jáchi vecaa va ndácaan Pedro —nacachi na.

¹⁶ Joo ndaja coo Pedro cáti ndáha yij va da yéhe cán. Já naxinu coo na nasuná na yéhe nu dá ta chí nayihví na tá naxini na da.

¹⁷ Joo nacuu ndáha dá nu ná ña ná a cáhan chaga na. Anda já nacasáha da ndicani da nu ná ndaja nacaja Ndióxi natavá a da vecaa cán. Ta já nacachi da xihín ná:

—Ndicani ndó ña yóho nu Jacobo ta ndicani ndó ña nu tóco ndihi na cúu cuéntá Jesús —nacachi Pedro.

—Anda já naqueta Pedro cuahan da.

¹⁸ Tá nativi inga quiví itaan já nacatontó soldado vecaa cán tá nacandaa ini da ña coo Pedro ín vecaa ta coo naxini da ndáchí cuahan da.

¹⁹ Anda já nasahnda Herodes chuun ña ná ndinducú na da. Joo coo nandinehe ná da. Anda já nacasáha da ndája ndichí da soldado vecaa cán ndáchí cuahan Pedro. Joo coo nacuu cachi na cán ndáchí cuahan da. Sahá ña cán quea nasahnda Herodes chuun ña ná cahni ndihi na soldado da nasandaa yéhe caa cán. Tá nayaha ña yóho já najandacoo Herodes estado Judea cán ta naquee da cuahan da chí Cesarea coo da.

Quiví naxihí Herodes

²⁰ A juú quiahva xójo ini Herodes xihín ñayivi ndúu ñuu Tiro xihín na ndúu ñuu Sidón. Joo ndíví ñuu cán najándique táhan na tuhun na cuhun na cahan na xihín dá. Coo vaha ini na xihín dá cúni na jáchi ñundáhyi rey cán cána tóco ndihi ña xíxi na. Joo jihna

ñúhú nandique táhan máni ná xihín in da naní Blasto. Mé Blasto yóho nasacuu da in da cáhnu cája chúun nu rey cán. Ta nacañan na ña ná cañan ndahví da cán nu rey saha ná.

²¹ Ta nasacu Herodes in quivi nditutu ndihi na nu dá. Ta tá natandaa mé quivi já nasacandixi Herodes jáhma vaha ndivaha da, ña sácandixi rey. Ta nasacoo da nu sácoo rey. Ta já nacañan cóhó da xihín ñayivi.

²² Tá naxinu coo ña cáñan da já nacasáha ñayivi cán cáyuhú na já cáchí na já:

—Ndióxi cúu da yóho ta coo cúu dá ndá taa nacuu —cáchí na cája cáhnu na Herodes cán.

²³ Ta chí sa mé hora já naxinu in táto Ndióxi ta nacaña ña ná quehe Herodes cuehe jáchi coo nacaña cáhnu da Ndióxi ta já nasahan da ñamaní nuú ñayivi ña cáchí na cúu dá ndióxi. Chí sa mé hora já naquihvi ticujú yiquí cuñu da já naxihi da.

²⁴ Ta níi cúu nandicutita nuu tuhun vaha saha Jesús xica cuñan. Ta chí nandicuaña chága na cúu cuénta Jesús.

²⁵ Ta ndaja coo nandiquiñva Bernabé xihín Saulo mé jiuñun nuú na sacuaña veñuhu ndúu ñuu Jerusalén já nandicó coo da cuñan da ñuu Antioquía. Ta ndáca na Juan, da naní tucu Marcos cuñan da xihín ná.

13

Cája chúun Bernabé xihín Saulo cuénta Ndióxi

¹ Ta ndaja coo tañu na cúu cuénta Jesús ndúu ñuu Antioquía cán ndúu na cúu profeta ta ndúu ri na jáñaha tuhun Ndióxi. Ta ña yóho cúu quivi ná: Bernabé xihín Saulo xihín Simón, da cáñan na Taa Tuñun xihín, xihín Lucio, da ñuu Cirene xihín Manaén, da nasahnu xihín Herodes. Mé Herodes yóho cúu dá da cómi cuénta saha ñayivi estado Galilea.

² In quivi nani nanditutu ndihi na ndúu na xijuhun na ta cája cáhnu na Ndióxi já nacañan ínimá yii mé á xihín ná já nacachi a já:

—Tavá jín ndó Bernabé xihín Saulo jáchi sa nacaxi mí i chuun quiñva i nu ná caha na —nacachi a.

³ Ta tá sa nandihí naxijuhun na ta tá nandihí naxica tahví na nu Ndióxi já

nachojó na ndáha ná jini Saulo xihín Bernabé já nandidayí na na cuñan na caha na chuun Ndióxi.

Cáñan Saulo xihín Bernabé tuhun vaha saha Jesús isla Chipre

⁴ Tá nandihí já nachindahá ínimá yii Ndióxi Saulo xihín Bernabé cuñan na ñuu Seleucia. Ta cán nandaa na barco cuñan na isla Chipre.

⁵ Ta ndáca na Juan, da naní tucu Marcos cuñan da xihín ná já ná chindeé da na. Ta tá naxinu coo na ñuu Salamina nu sá ndichí barco cán já nacasáha na cáñan na tuhun Ndióxi nuú ñayivi táca veñuhu na Israel cán.

⁶ Níi cúu isla cán naxica nuu na janda quiñva naxinu coo na ñuu Pafos. Ta cán nanditahan na in da tají naquixi chíchi Israel ta naní da Barjesús. Ta cúu dá in da tuhún jáchi cáchí da xihín ñayivi ña cáñan da cuénta Ndióxi.

⁷ Ta mé da tají yóho nasahin tuun da xihín in da naní Sergio Paulo, da cúu gobernador nuú ñayivi isla Chipre cán. Ta nasacuu da da ndichí jini. Ta mé gobernador yóho nacana da Bernabé xihín Saulo jáchi cuni da cuni joho da tuhun Ndióxi.

⁸ Joo da tají naní Barjesús, da naní tucu Elimas nacasáha da sáji nuu da nuú Bernabé xihín nuú Saulo jáchi coo cuni da ña ná candeé ini gobernador cán Jesús.

⁹ Nandicutú ndaa ínimá yii Ndióxi ini Saulo, da cáñan na Pablo xihín já nacasáha sáñdehé ndaa da nuú da tají cán.

¹⁰ Já nacachi da já xihín dá:

—Yóhó cúun taa quini ta cúun jahyi tiñahá, da xica jáñdahvi ñayivi. Coo cúnun tóco ndihi ña vaha jáchi cúnun caji nuun nuú ñayivi ná a ndiquehe na íchi cuénta Jesús.

¹¹ Ta viti jándoho Ndióxi inún. Jácuáa a yohó ta ni a cúnun nuú candii tixi chá quivi —nacachi Pablo xihín da tají cán.

Tá nacachi Pablo já chí ivi laá nacuaá da cán. Jandá tinn ndaa na da xica da jáchi coo tívi nuu dá.

¹² Tá naxini da cúu gobernador cán ña yóho chí ivi laá nacandúsa da Jesús. Jáchi chí catóntó da xini joho da tóco ndihi ña cáñan na saha Jesús.

Xínu coo Pablo xihín Bernabé ñuu Antioquía ña ndácaan estado Pisidia

13 Nandaa Pablo xihín na xíca xihín dá barco ñuu Pafos cuahan na chí ñuu Perge ña ndácaan estado Panfilia. Joo nasahnda táhan Juan, da naní tucu Marcos xihín ná já nandicó coo da chí ñuu Jerusalén.

14 Tá nandihí já naquee Pablo xihín na xíca xihín dá ñuu Perge já naxinu na ñuu Antioquía ña ndácaan estado Pisidia. Ta mé quívi ndíquehe ndée ñayivi nandihvi na veñuhu já nasacoo na.

15 Ta tá sa nandihí naçahvi na ley Moisés xihín ña naçahví na profeta já naçana na sacuahá veñuhu cán Pablo xihín na xíca xihín dá já naçachi na já xihín ná:

—Ñani i, tá iin tuhun vaha cúni ndó cahan ndó xihín ñayivi yóho cuu candichi ndó cahan ndó xihín ná viti —naçachi na cán xihín dá.

16 Anda já naçandichi Pablo já naçuu ndáha dá nu ná catáji yúhu ná já naçasáhá cáchi da já xihín ná:

—Cuni johó ndó ñayivi Israel xihín tóco ndihí ndó, na cája cáhnu Ndióxi.

17 Mé Ndióxi, mé a cája cáhnu ñayivi nación Israel naçaxi a tásáhnu jícó yo ta naçaja mé á ña ná ndicuahá ndivaha na nani nasacuu na na tóho nación Egipto cán. Joo tá nandihí já natavá mé á na xihín ndée mé á.

18 Ta cáhnu nasahin ini Ndióxi sahá cuachi na tañu ivi jico cuia nani naxica nuu na yucú íchí cán.

19 Ta najándihí Ndióxi sahá usa nación ñayivi nasanduu ñundáhyi Canaán já najáyaha ñundáhyi jan ndáha tásáhnu jícó yo jáchi janda sanahá nasahan mé á tuhun a nu ná ña caja já xihín ná.

20 Anda já nasahnda Ndióxi chuun nu juexe já ná cacomí na cuéntá saha ná tixi comí ciento java cuia janda quiahva naxinu coo tiempo tá naquixi profeta Samuel, da jáyaha tuhun cáhan Ndióxi nuú ñayivi.

21 Anda já naxica tahví na Israel nu Ndióxi ña ná cacu mé á in rey ná cacomí da cuéntá saha ná. Sahá ña cán quéa nasacu Ndióxi in da naní Saúl ná cacuu da rey nu ná. Nasacuu da jahyi Cis, da naquixi chichi

Benjamín. Ta nasacomí Saúl cuéntá saha ná tixi ivi jico cuia.

22 Tá nandihí já natavá Ndióxi Saúl já naçhinúu a David ña ná cacomí da cuéntá saha ná. Já naçachi Ndióxi já saha dá: “Íin vaha ini i xihín David, jahyi Isaí jáchi xini ña caja mé dá tóco ndihí ña cúni”, naçachi Ndióxi saha David.

23 Ta in da naquixi chichi mé David cán cúu Jesús, mé a nasahan Ndióxi tuhun a chindahá jácaçu ñayivi Israel janda sanahá ndivaha.

24 Ta janda tá cámaní quixi Jesús já naxica nuu Juan, da jácandúta ñayivi naçahan da xihín ñayivi ña ndítahan nu ná jándicoo na cuachi cája na ta ná candúta ná.

25 Ta tá sa yati quivi da já naçachi da já xihín ñayivi: “A juú cahan ndó ña cúu yehe da naçindahá Ndióxi cacomí cuéntá saha ñayivi, vaha. Jáchi ja chá xinu inga da iin chága saha a juú ga yehe. Ta da cán cacomí cuéntá saha ndó ta cúu ndusa da cáhnu chága ta chí coo saha mí i caxítí i ndaxí i correa ndusa dá”, naçachi Juan xihín ñayivi cán.

26 Cuni johó vaha ndó, ñani i, na naquixi chichi Abraham xihín tóco ndihí ndó, na cája cáhnu Ndióxi xihín ndinuhu ini. Mé Ndióxi cúni a ña ná candaa ini ndó ña naçindahá mé á Jesús ñuyiví yóho já ná jácaçu a ndohó já ná a cühun ndó indayá.

27 Tóco ndihí na ndúu ñuu Jerusalén xihín na sacuahá coo naçandaa ini na ña naçindahá Ndióxi Jesús ñuyiví yóho. Ta ni coo naçandaa ini na tuhun naçahví profeta saha Jesús tá nasahvi na ña veñuhu tá quívi ndíquehe ndée ná. Sahá ña cán quéa nasahní na Jesús joo xihín ña naçaja na yóho najáxinu coo na ña naçachi profeta sanahá.

28 Ta vatí coo nañehe ná cuachi chicaan na jata Jesús joo naxica na ñamaní nu Pilato ña ná cahnda da chuun ña ná cahní na Jesús.

29 Ta tá sa naxinu coo tóco ndihí ña cáchi tuhun Ndióxi saha mé á coo anda já najánuu na a ndica crúxu já najánduxu na ña.

30 Joo najánditacu Ndióxi Jesús tañu ndii.

31 Ta tixi cuahá quívi nanaha Jesús mé á nuú na nasañehe táhan xihín á tá naquee

a estado Galilea cuahan chí Jerusalén. Ta mé nā cán cúú nā xíca cáhan saha mé á nuú ñayivi viti.

32 'Sahá ña cán quéa cáxi tuhun nde tuhun vaha saha Jesús nu ndóhó viti jáchi janda saha nacachi Ndióxi xihín tásáhnú jícó yo ña já coo.

33 Ta tá najánditacu Ndióxi Jesús najáxinu coo a tuhun nasahan nu yó, nā naquixi chichi nā cán. Jáchi já nacahyi a nu Salmo ivi ta saha Jesús nacahan tá nacachi a já: “Jahyi mí i cúú yóhó. Ta yehe cája ña ná catacún quivi viti”, cáchi tuhun Ndióxi.

34 Joo Ndióxi sa nasahan va tuhun a ña jánditacu a Jesús já ná a táhyi yiquí cuñu a. Jáchi já nacahyi a ini libro yii mé á já cáchi a já: “Nu yóhó quiahva i tóco ndihi ña vaha, ña nasahan i tuhun i nu David quiahva i nu dá”, cáchi tuhun Ndióxi.

35 Já cáchi tucu inga Salmo já: “Mé ndó a quiahva toho ndó ñamaní tahyi yiquí cuñu i jáchi cúú u jahyi máni mé ndo, da cája chúun nu ndo”, cáchi tuhun Ndióxi.

36 Ta sa xini yo co cáhan ña yóho saha ña nacaja David jáchi tá nandihí nacaja da ña nasahnda Ndióxi nu dá já naxihí da ta najánduxu nā da nuú nanduxu tásáhnú jícó da. Ta natahyi yiquí cuñu da cán.

37 Joo yiquí cuñu Jesús coo natahyi toho a jáchi najánditacu Ndióxi ña.

38 Ña cán quéa vaxi nde caxi tuhun nde ña yóho nu ndo, ñani i já ná candaa ini ndó ña cája cáhnú ini Ndióxi sahá cuachi ñayivi sahá ña nacaja Jesús tá naxihí a ndica crúxu.

39 Ta cája cáhnú ini Ndióxi sahá cuachi ñayivi tá candeé ini na Jesús. Jáchi ni in túhún ñayivi a cúu nduu ndaa nu Ndióxi sahá ña sácú vaha na ley Moisés.

40 Joo cuéntá coo ndó a juú ndoho ndó ña nacachi nā profeta sanahá tá nacachi na já:

41 Cuni johó vaha ndó, ndóhó nā sácú ndaa ichi ña cáhan Ndióxi.

Catontó ndo jáchi cama chá ndihi saha ndo. Jáchi yehe cúú Ndióxi ta cája i ña náhnú ndivaha,

joo co cándúsa ndó ña cája i vatí ndicani java na ña nu ndo, nacachi Ndióxi sanahá —nacachi Pablo xihín ná.

42 Ta tá naqueta Pablo xihín nā xíca xihín dá veñuhu nā Israel cán já naxíca ñayivi, nā coo naquixi chichi Israel ñamaní nu dá ña ná cáhan da xihín ná sahá tuhun Ndióxi inga quivi ndiquehe ndeé ná.

43 Tá naquee ndihi na veñuhu cán já cuahá nā Israel xihín cuahá nā tóho, nā cándúsa ley Moisés ta cája cáhnú na Ndióxi nacasahá nā ndico nā jata Pablo xihín jata Bernabé. Ta Pablo xihín Bernabé janaha da nā ña ná candeé cáhnú ini na Ndióxi já ná caja mé á ñamaní xihín ná.

44 Ta tá naxinu coo inga quivi ndiquehe ndeé ná já nataca tátuhun tóco ndihi ñayivi ñuu veñuhu cán ña taa johó na tuhun Ndióxi cuni nā.

45 Joo tá naxini nā naquixi chichi Israel cán ña nataca cuahá ndivaha ñayivi já nacasahá nā Israel cáhiví ini na. Já nacasahá nā cáhan núu na saha Pablo ta nacanahá nā xihín dá.

46 Xihín ña cán nandindeé chaga ini Pablo xihín Bernabé já nacasahá cáchi da já:

—Jihna ñuhú ndítahan nuú nde caxi tuhun nde tuhun Ndióxi nu mé ndó, nā naquixi chichi Israel. Joo sándehe nde ña coo cuni toho ndó ndiquehe ndó ña. Ta cája nde cuéntá ña coo saha ndó cuhun ndó indiví. Sahá ña cán quéa vaha chaga ná cuhun nde cáhan nde tuhun Ndióxi xihín nā coo naquixi chichi Israel.

47 Jáchi já cáa chuun nasahnda Ndióxi nuú nde tá nacachi a já xihín nde:

Nasacu yehe ndóhó ña ná caxi tuhun ndó nuú ñayivi tóho ndúu ndijáá ñuyiví, já ná candaa ini na ndaja caja na ná cacu ndaa ínima ná, nacachi Ndióxi —nacachi Pablo xihín ná.

48 Tá naxini johó nā tóho, nā coo naquixi chichi Israel cán ña yóho chí nacajii ini na já nacasahá nā cáhan na ña cúú ndusa tuhun Ndióxi ña vaha. Ta tóco ndihi nā nacaxi Ndióxi cacu ndaa ínima, nandihví na íchi cuéntá mé á.

49 Já nasahin nuú naxita nuu tuhun Ndióxi ní cúú ñundáhyi cán.

50 Joo nā naquixi chichi Israel cán najándivaa nā java najihí, nā catóo cuhun veñuhu, nā coo cáhan núu ñayivi saha. Ta najándivaa nā java dataa, da íin saha ñuu cán ña ná ndicuita na xihín Pablo xihín

Bernabé viti ta anda quiahva ná tavá na da ñundáhyi cuéntá ñuu cán.

⁵¹ Anda já naquiji nihni Pablo xihín Bernabé ña yácá ndusá saha mé dá já ná nahá nuú na cán ña coó natahan ini da xihín ña cája na Israel cán. Já naquee da ñuu Antioquía cán cuahan da inga ñuu naní Iconio.

⁵² Ta na cúu cuéntá Jesús, na nacandoo ñuu Antioquía cán nandicutú ndaa ínimá ná xihín ínimá yíi Ndióxi ta cájii ndivaha ini na.

14

Cáhan Pablo xihín Bernabé tuhun Ndióxi nuú ñayivi ndúu ñuu Iconio

¹ Tá naxinu Pablo xihín Bernabé ñuu Iconio já nandihvi da veñuhu nu ndítaca na Israel cán. Ta cán naçahan da tuhun vaha saha Jesús nu ná. Ta cuahá ndivaha na Israel xihín na coó naquixi chichi Israel nacandeé ini na Jesús.

² Joo java na Israel, na coó nacandúsa tuhun Ndióxi naçasáhá na cává na jini ñayivi, na coó naquixi chichi Israel ña ná cahan núu na sahá na cúu cuéntá Jesús.

³ Sahá ña cán quéa nasanduu nahá chága ví Pablo xihín Bernabé mé ñuu cán. Ta co ná yihví na cahan chága ví na tuhun Ndióxi jáchi candeé ini na Jesús, xitoho na. Ta nasahan Ndióxi ndée á nu ná ña ná cuu caja na cuahá nuú ña náhnu ta xihín ña yóho nacandaa ini ñayivi ña mé a ndaa táhyi quíhvi ini ndusa Ndióxi ñayivi.

⁴ Joo ñayivi ñuu cán naçasáhá na sáhdá táhan na jáchi java na cuahan na jatá na Israel ta java na cuahan jatá na apóstol cán.

⁵ Anda já na Israel xihín na coó naquixi chichi Israel najándique táhan na tuhun na xihín na jutixia ñuu cán ña ndúcú na canahá quini na xihín na apóstol ta nducú na cahní na da xihín yuu.

⁶ Joo tá nacandaa ini Pablo xihín Bernabé ña sácú ini na cán caja xíxi na xihín dá já naxinu da cuahan da chí estado Licaonia. Naxinu coo da ñuu Listra xihín ñuu Derbe xihín java ga ñuu válí ñúhu ndijáá chí cán.

⁷ Ta cán naçahan ri da tuhun vaha saha Jesús nuú ñayivi ndúu cán va.

Cúun na yuu Pablo ñuu Listra

⁸ Tá naxinu coo da ñuu Listra cán já nandique táhan da xihín in dataa, da a cuú caca. Ta íin coo da cán jáchi cúu dá da quíhvi saha janda tá nacacu da cáa da já.

⁹ Ta íin coo da quíhvi saha yóho táa johu da nu cáhan Pablo. Anda já nandicoto nihni Pablo nu dá ta cándaa ini Pablo ña cuu ndivaha da jáchi candeé ini da quíhvi cán Ndióxi.

¹⁰ Sahá ña cán quéa nacayuhú Pablo nu dá já cáchi da já:

—Cuahán candichi —naçachi Pablo.

Ta chí ivi laá nacandita da ta naçasáhá xíca da.

¹¹ Tá naxini ñayivi ñuu cán ña nandaja vaha Pablo da cán já naçasáhá na cán cáyuhú cóhó na mé tuhun cáhan na ñuu Licaonia, ña co cándaa ini Pablo. Já cáchi na já:

—Ndióxi cúu da yóho ña naquixi indiví túní a ñéhe cuití da nahná ñayivi —cáchi na cáyuhú na tuhun mé ná.

¹² Naçachi na cán ña Bernabé cúu dá in ndióxi naní Júpiter. Ta Pablo cúu dá in ndióxi naní Mercurio cáchi na jáchi mé dá cúu da cáhan chága.

¹³ Ta da cúu jutú nuú veñuhu Júpiter, ña ndácaan yuhú ñuu cán ñéhe da tindiquí xihín cuahá ita jáchi ndúcú ndihi na cán cahní na tindiquí joco na rí nu Pablo xihín nuú Bernabé caja cáhnu na da.

¹⁴ Joo tá nacandaa ini Pablo xihín Bernabé ña ndúcú na cán caja cáhnu na da já nandatá da jáhma dá sahá ña co táhan ini da xihín ña cája na. Ta já naçasáhá na xínu na naquihvi na tañu ñayivi cán. Ta cáyuhú Pablo já cáchi da já xihín ná:

¹⁵ —Candehé ndo. A váha toho ña ndúcú ndó caja ndó yóho jáchi ñayivi xihín mé va ndó cúu ndehe. Ndá cuéntá quéa cúní ndó caja cáhnu ndó ndehe. Ta chuun vaxi nde yóho quéa caxi tuhun nde xihín ndó tuhun vaha saha Jesús. Ta já ndítahan nu ndo jándacoo ndó ña a váha jan. Ta candico ndó Ndióxi tácu, mé á naçavaha indiví xihín ñuyíví xihín tañuhú xihín tóco ndihi ñaha ndúu nuú in in ña cán.

¹⁶ Anda sanahá najándicoo ndáha Ndióxi ñayivi ndijáá nación caja na ndía cúní mé va na caja na.

17 Joo ní tiempo najánaha Ndióxi yo cúu mé á nu ná jáchi ní tiempo ñacaja vaha mé á xihin ná. Mé a chindahá javi nu yo. Ta mé á cája ña ná cana vaha ñundáhyi yo. Ta cája mé á ña ná a cámaní ña cuxú já ná cajii íni yo —ñacachi Pablo xihin na cán.

18 Ta vatí ñacahan Pablo tuhun yóho xihin ná joo ihvi ndivaha já ñacava da jini ñayivi cán ña ná a cáhni na tindiQUI joco na nu dá ña caja cáhnu na da.

19 Tá ñandihí já ñaxinu coo java na Israel, na ñaquixi ñuu Antioquia xihin java na ñaquixi chí ñuu Iconio. Já ñacava na jini ñayivi já ñacati na ñacuun na yuu Pablo. Ta tá sa ñacahan na ñaxihí da já ñuhu na da ñasahan na najácana na da yuhú ñuu.

20 Joo na cúu cuéntá Jesús ñataca na ta ñacava nuu na nu cánduhu Pablo ta já ñandacoo da já ñaquihvi tucu da ñuu cán. Ta inga quivi itaan já ñaquee da xihin Bernabé cuahan da ñuu Derbe.

21 Tá ñaxinu coo ndíví da cán ñuu Derbe já ñacasáha da cáxi tuhun da nuú ñayivi sahá Jesús ta cuaha ná ñandiquehe íchi cuéntá Jesús ñuu cán. Anda jáví ñandicó coo Pablo xihin Bernabé chí ñuu Listra xihin ñuu Iconio já ñaquee da cuahan da chí Antioquia.

22 Ta mé ñuu cán najácahan da na cúu cuéntá Jesús ña ná coo ndacú chága na ta ná a jándacoo na ña cándeé ini na Jesús. Ta ñacachi da ña já ndusa ndoho ndivaha ini na janda quiahva ná xinu coo na cacomí Ndióxi cuéntá saha ná.

23 Tá ñandihí já ñasacu Pablo xihin Bernabé java da sacuaha ña ná cacomí da cuéntá saha na cúu cuéntá Jesús in in ñuu cán. Ta tá ñandihí ñaxijuhun na ta ñaxica tãhvi na nu Ndióxi saha ná já ñandiquiahva da na ndáha Ndióxi ña ná candaa mé á na jáchi cándeé ini na mé á.

Ndicó coo Pablo xihin Bernabé ñuu Antioquia ña ndácaan estado Siria

24 Tá ñandihí já ñayaha Pablo xihin Bernabé chí estado Pisidia janda quiahva ñaxinu coo na ñundáhyi cuéntá Panfilia.

25 Ta ñacahan na tuhun vaha saha Jesús nuú ñayivi ñuu Perge. Anda já ñaquee na cuahan na chí ñuu Atalia.

26 Ta ñuu Atalia cán ñandaa na barco já ñandicó coo na chí Antioquia nuú ñaquee na jihna. Jáchi mé cán cúu nuú ñandiquiahva na da ndáha Ndióxi ña ná caja da chuun mé á. Ta viti sa najándihí da chuun ñatahnda nu dá cán.

27 Tá ñaxinu coo Pablo xihin Bernabé mé ñuu Antioquia cán já najátaca da tóco ndihí na cúu cuéntá Jesús ndúu ñuu cán já ñandicani da tóco ndihí ña ñacaja Ndióxi xihin dá. ñandicani da ndá quiahva ñasahan Ndióxi ñamaní nuú na coo ñaquixi chíchi Israel ña ná ndiquehe na íchi cuéntá mé á.

28 Ta ñacandoo nahá Pablo xihin Bernabé ñuu Antioquia cán xihin na cúu cuéntá Jesús.

15

Nditaca na sacuaha cuéntá Jesús

1 Ta ndaja coo mé tiempo já java dataa, da ñaquixi chí estado Judea ñaxinu da ñuu Antioquia cán. Ta ñacasáha na jánaha na nuú na cúu cuéntá Jesús ña ndítahan nu ná caja na ña cáhí ley Moisés ña ná chicaan na marca yiquí cuñu na já ná cuu jácau Ndióxi na.

2 Joo Pablo xihin Bernabé ñacasáha cáni táhan ndeé yuhu dá xihin na Judea cán saha ña yóho. Ta saha ña ñanditúhún cuaha ná saha ña yóho saha ña cán quea ñasacu ini na cúu cuéntá Jesús cán chindahá na Pablo xihin Bernabé xihin java ga da cúu cuéntá Jesús ña ná cuhun na ñuu Jerusalén já ná nditúhún chága na saha ña yóho xihin na apóstol ta xihin na sacuaha cómi cuéntá saha na cúu cuéntá Jesús ndúu Jerusalén cán.

3 Anda já na cúu cuéntá Jesús ndúu Antioquia ñachindahá na na cán chí ñaquee na cuahan na. Ta nu xica na cuahan na cán ñayaha na chí ñundáhyi Fenicia xihin ñundáhyi Samaria. Ta cán ñandicani na nuú na cúu cuéntá Jesús ndá quiahva ñandiquehe na coo ñaquixi chíchi Israel íchi cuéntá Jesús ta já najándacoo na costumbre yata ñasacaja na jihna. Chí ñacajii ndivaha ini na cúu cuéntá Jesús cán tá ñaxini johu na ña yóho.

4 Tá ñaxinu coo Pablo xihin Bernabé xihin java ga na cán ñuu Jerusalén já

nandiquehe vaha na cúu cuéntá Jesús ndúu ñuu cán na. Ta jári na apóstol xihín na sacuahá veñuhu cán nandiquehe vaha na na. Andá já nandicani Pablo nuú na cán tóco ndihi ña náhnu ñacaja Ndióxi xihín dá.

⁵ Joo java na fariseo, na sa ndiquehe íchi cuéntá Jesús nandaca ndichi na já ñacasáhá cáchí na já:

—Ndítahan nuú na cúu cuéntá Jesús, na coó ñaquixi chichi Israel chicaan na marca yiquí cuñu na. Ta ndítahan nu mí cahan í xihín ná ña ná cacu vaha na ley Moisés — ñacachi na fariseo cán.

⁶ Andá já ñataca na apóstol xihín na sacuahá veñuhu ña ná nditúhún na ndaja coo sahá ña yóho.

⁷ Sa nanditúhún cuahá ndivaha na cán sahá ña yóho. Andá já nandaca ndichi Pablo tañu na cán ta já ñacachi da já:

—Sa xini vaha ndó, ñani i ña ñacaxi Ndióxi yehe jihna ña ná caxi tuhún i tuhun vaha saha Jesús nuú na coó ñaquixi chichi Israel já ná candeé ri ini na cán va Jesús ña ná jácacu Ndióxi na.

⁸ Ta mé Ndióxi, mé a xini ndaja cáa ínimá in in ñayivi, mé a cán quéa najánaña nu yo ña ndiquehe vaha mé á na tóho. Jáchi ñasahan ínimá yii mé á nu ná tá quiahva ñacaja xihín mí, na ñaquixi chichi Israel.

⁹ Ni in tuhún toho í co cúu yo na vaha chága a juú ga inga na nu Ndióxi. Jáchi tá quiahva ñandaja vii Ndióxi mí sahá ña candeé ini Jesucristo quiahva já ñandaja vii ri a na cán va sahá ña candeé ini na Jesucristo.

¹⁰ Ta viti cúu á tátuhun nandindójó ndó ña ñacaja Ndióxi tá ñachindahá Jesucristo quivi a sahá cuachí. Ta viti cuni ndó caja ndúsa ndó xihín na tóho yóho ña ná cacu vaha na ley Moisés. Ta sa cándaá ini ndó ña ni mí ta ni tásahnu jícó yo a cuú caja í cacu vaha í ley cán.

¹¹ Joo ña candeé cáhnu ini quéa ña jácacu maní uun Ndióxi mí sahá ña táhvi ini Jesucristo saha mí. Ta quiahva já táhvi ri ini a sahá na tóho cán va —ñacachi Pedro xihín ná.

¹² Ta xihín ña yóho ñacatáji yúhu tóco ndihi na cán. Ta táa johó na tá ñacasáhá Pablo xihín Bernabé ndicani da nu ná tóco ndihi ña náhnu xihín ña xitúhún ña ñasahan

Ndióxi ñamaní nu dá caja da nuú na coó ñaquixi chichi Israel cán.

¹³ Tá ñandihí ñacahan da cán já ñacasáhá Jacobo cáchí da já:

—Cuni johó ndó ná cahan i xihín ndó, ñani i.

¹⁴ Sa ñacaxi tuhún Simón, da naní tucu Pedro nu yo tá nu cuítí ñacaja Ndióxi ñamaní xihín na tóho ta ñacaxi a na ña ná nduu na ñayivi cuéntá mé á.

¹⁵ Ta in quiahva cáhan ña yóho xihín ña ñacahyí na profeta sanahá tá ñacahyí na ña ñacachi Ndióxi:

¹⁶ Tá sa ñayaha tiempo já ndicó coo tucu ú. Ta tá quiahva ñacaja cáhnu ñayivi yehe tá tiempo ñasacomí David cuéntá sahá ñayivi Israel, quiahva já vaxi quivi caja i ña ná caja cáhnu tucu na yehe.

¹⁷ Caja i já jáchi cuni ña ná ndinducú na tóho yehe ña ná cacuu u xitoho tóco ndihi na,

mé ná cúu ná ñacaxi yehe ná cacuu na cuéntá mí i.

¹⁸ Ña yóho quéa ñacachi Ndióxi sanahá ndivaha tá ñacaxi tuhun a ndaja coo tiempo viti —ñacachi Jacobo xihín na cán.

¹⁹ Já ñacachi tucu Jacobo já xihín ná:

—Sahá ña cán quéa cáhan i ña co ndítahan caja ndúsa yó xihín na tóho cacu vaha na ley Moisés jáchi ñacasáhá ndico na íchi cuéntá Ndióxi viti.

²⁰ Joo ña ndítahan caja í quéa cahyí yo in carta ná cuhun a nuú na cúu cuéntá Jesús ndúu ñuu Antioquía já ná caja na ñamaní ña ná a cáxi na cuñu quíti, rí najoco ñayivi nuú tiniñu yúu. Ta ná a coo na xihín na co cúu ñájihí na á yí ná. Ta coto ná a cáxi na cuñu quíti, rí ñasahnú. Ta coto ná a cáxi na nii.

²¹ Jáchi janda sanahá najánaña na ña yóho nuú ñayivi ndijáá ñuu tá quivi ndiquehe ndée ná tá jánaña na ley Moisés nu ná ini veñuhu —ñacachi Jacobo xihín ná.

²² Andá já na apóstol xihín na sacuahá veñuhu cán xihín tóco ndihi na cúu cuéntá Jesús najándique táhan na tuhun na ña caxi na tañu tóco ndihi na cúu cuéntá Jesús cán java da ná cuhun ñuu Antioquía xihín Pablo xihín Bernabé. Ta da ñacaxi na

cuhun cúu Judas, da naní tucu Barsabás xihín Silas. Ndíví da yóho cúu da ín saha nuú na cúu cuéntá Jesús cán.

23 Ta ña yóho cúu tuhun ndáa nu carta ñehe na cán cuahan na:

“Tóco ndihi ndehe, na cúu apóstol xihín na sacuaḥa veñuhu xihín na cúu cuéntá Jesús ndúu ñuu yóho chindahá nde Ndióxi coo ndóhó, na cúu cuéntá Jesús, na coo naquixi chichi Israel, na ndúu ñuu Antioquía xihín ñundáhyi cuéntá Siria xihín Cilicia jan.

24 Sa nañehé nde tuhun ña naquee java na cúu cuéntá Jesús ñuu yóho nasaa na chí jan tá coo naxica na ñamaní nuú nde cuhun na. Ta najáquihvi na ndohó ta najájana na jiní ndó xihín tuhun cáhan na jáchi cáchi na xihín ndó ña ndítahan nu ndó chicaan ndó marca yiquí cuñu ndó ta ndítahan cacu vaha ndó ley Moisés já ná cuu cacu ndaa ínimá ndo.

25 Sahá ña cán quea ñúhu johu ndihi nde ña ná caxi nde java ñaní já ná catáhan da xihín Pablo xihín Bernabé saa da coto nihni da ndohó.

26 Mé Pablo xihín Bernabé yóho ndúu tiaḥva da quivi da saha Jesucristo, mé a cúu xitoho í.

27 Ta chindahá nde Judas xihín Silas já ná cahan yúhu mé ná xihín ndo já ná ndicani na saha tóco ndihi ña yóho nu ndo.

28 Mé ínimá yii Ndióxi najácahan ndehe ña co ndítahan nuú nde caja ndúsa nde xihín ndó cacu vaha ndó tóco ndihi ña sáhdá ley Moisés. Joo ná cahan nde xihín ndo ndía quea co ndítahan caja ndó:

29 Coto a caxí ndó cuñu quítí, rí najoco na nuú tñiñu yúu. Ta coto a caxí ndo ñii ta a caxí ndó cuñu quítí, rí nasahnú. Ta coto a coo ndó xihín ñájíhí á yí inga na. Tá ná cacu vaha ndó tóco ndihi ña yóho já quea cúu ndó na cája vaha. Ña yóho cúu tuhun cáhan nde xihín ndo ta ná coo Ndióxi xihín ndo.” Ña yóho cáchi carta nachindahá na nuú na ñuu Antioquía cán.

30 Anda já naquee na cán cuahan na ñuu Antioquía. Ta tá naxinu na ñuu Antioquía cán já najátaca na tóco ndihi na cúu cuéntá Jesús cán já nandiquiahva na carta nu ná.

31 Ta tá nandihí nacaḥvi na cúu cuéntá

Jesús mé carta já nacajii ndivaha ini na jáchi nandindeé chága ví ini na nacaja ña cáchi carta cán.

32 Mé Judas xihín Silas cúu da profeta, da jáyaha tuhun cáhan Ndióxi nuú ñayivi. Ta xihín ña yóho nasahan da cuahá tuhun ndeé ini na cúu cuéntá Jesús.

33 Nasanduu na cán chá quivi ta chí nasacu ini Judas xihín Silas ndicó coo da ñuu Jerusalén jáchi cán ndúu na nachindahá ñahá ñuu Antioquía. Já nandindayí na cúu cuéntá Jesús da ña ná coo vaha da tá cuhun da íchi.

34 Joo nasacu ini Silas candoo da ñuu Antioquía cán.

35 Ta nacandoo Pablo xihín Bernabé chága quivi ñuu Antioquía cán ta xihín cuahá java ga na najánaḥa chága na tuhun vaha saha Jesús nuú ñayivi.

Cuahan tucu Pablo cahan da tuhun vaha saha Jesús nuú ñayivi

36 Tá nayaha quivi já nacachi Pablo já xihín Bernabé:

—Cóho coto nihní na cúu cuéntá Jesús ndúu ndijáá ñuu nuú naxica nuu í nacahan yó tuhun Ndióxi jihna já ná candehé yo á ndico yii va na Jesús —nacachi da.

37 Cándúsa Bernabé cuhun da joo cúni da candaca tucu da Juan, da cáhan na Marcos xihín ña cuhun da xihín ná.

38 Joo Pablo nacaḥán da ña vaha chága ná a cánehe na da cuhun da xihín ná jáchi najándacoo da na tá naxinu na estado Panfilia saha ña coo naxeen ga da caca nuu da caja da chuun Ndióxi xihín ná.

39 Nandituhún cuaha ná saha ña yóho joo coo nandique táhan tuhun na saha ña cán quea nasahnda táhan na. Sahá ña cán quea nañehe Bernabé Marcos cuahan xihín dá chí isla Chipre.

40 Ta nacaxi Pablo Silas candaca táhan xihín dá. Ta naxica ḥahví na cúu cuéntá Jesús nu Ndióxi saha dá ña ná chindeé a da nuú cuhun da. Anda já naquee da cuahan da.

41 Nayaha da chí ñundáhyi Siria xihín ñundáhyi Cilicia ta níi cúu nuú cuahan da sahan da tuhun ndeé ini na cúu cuéntá Jesús ña ná candee chága ini na mé á.

16

Cátahan Timoteo xica da xihin Pablo xihin Silas

¹ Ta nayaha Pablo xihin Silas ñuu Derbe anda já naxinu coo na ñuu Listra. Ta cán nandinehe ná in da cúu cuénta Jesús, nani Timoteo, da cúu jahyi in ña cúu cuénta Jesús, ña naquixi chichi Israel. Ta tátá da cúu griego.

² Ta na cúu cuénta Jesús ndúu ñuu Listra xihin na ndúu ñuu Iconio nacañan vaha na saha Timoteo.

³ Cúni Pablo ña ná catáhan Timoteo xihin dá caca nuu da xihin dá sahá ña cán quéa naja Pablo ña nachicañan na marca yiqui cuñu Timoteo tá quiahva cáchi ley Moisés já ná a cahan núu na Israel ndúu ndijáá ñuu válí cán saha dá. Jáchí sa xini vaha ndihi na cán ña cúu Timoteo jahyi in ta griego sahá ña cán quéa coo nachicañan na marca Timoteo tá loho chá da.

⁴ Ta já naquee ndihi na cán cuañan na ta ní cúu ñuu nu xica na cuañan na cáxi tuhun na nuú na cúu cuénta Jesús ña ná caja na ña nacachi na sacuañan xihin na apóstol ndúu ñuu Jerusalén cán.

⁵ Xihin ña yóho nandindacú chága na cúu cuénta Jesús ta cándéé cáhnu chága ini na mé á. Ta in in quivi yaha johó ndicuañan chága ñayivi ndíhvi íchi cuénta Jesús.

Ña naxini Pablo naja Ndióxi tá nasahin da ñuu Troas

⁶ Ta nasaji ínima yii Ndióxi na cán ña ná a cahun na estado Asia cahan na tuhun vaha saha Jesús nuú ñayivi cán. Sahá ña cán quéa nayaha na ñundáhyi cuénta Frigia xihin Galacia cuañan na.

⁷ Já naxinu coo na yuhu estado Misia. Ta chí cán yaha na cahun na ñundáhyi cuénta Bitinia nacañan na. Joo coo nasahan ínima yii Ndióxi ñamaní nu ná caja na ña.

⁸ Anda já nayaha saa na estado Misia janda quiahva naxinu coo na in ñuu nani Troas.

⁹ Ta in ñuu nani ín da mé ñuu Troas cán nasani ndímáhnú Pablo. Ta ña naxini da cúu in ta, da naquixi chí estado Macedonia. Ta cándichi da cahan ndahví da xihin Pablo já cáchi da já: “Naha ndó chí Macedonia yóho ña ná chindeé ndó ndehe.”

¹⁰ Tá nandicani Pablo ña yóho nuú nde chí ivi laá naja tiañva nde ñaha nde jáchi sa nacandaá cáxi ini nde ña mé Ndióxi quéa cána ndehe ña ná cahun nde estado Macedonia cán já ná caxi tuhun nde tuhun vaha saha Jesús nuú ñayivi ndúu cán.

Xinu coo Pablo xihin na xica xihin dá ñuu Filipos

¹¹ Tá nandihí já nanda nde barco ñuu Troas já naquee nde cuañan ndacú nde isla nani Samotracia. Ta janda quivi itaan já naxinu coo nde ñuu Neápolis.

¹² Ta cán nanuu nde mé barco cuañan sahá nde chí ñuu Filipos. Mé ñuu Filipos cán cúu á ñuu ña ín chága saha nuú java ga ñuu válí ñuhu chí Macedonia cán. Ta ndíco a ñuu Roma. Ta nasanduu nde ñuu Filipos cán chá quivi.

¹³ Ta in quivi ndíquehe ndeé ná já naquee nde cuañan nde yuhú ñuu yati yuhú yuta nu sá taca ñayivi xica tahví na nu Ndióxi. Já nasaco nde cán ta nacasahá nde cahan nde tuhun vaha saha Jesús nuú najihí, na táca cán.

¹⁴ In mé ñañáha cán nani ña Lidia ta cúu ña ña ñuu Tiatira. Mé Lidia yóho cúu ña ña jícó jáhma vaha ña color ndíhí. Ta cúu ña in ña caja cáhnu Ndióxi. Ta nani xini johó ña ña cahan Pablo saha Jesús já nasuna Ndióxi xini túni ña já nacandúsa ña ña cahan Pablo cán.

¹⁵ Tá nandihí nacandúta ña xihin na vehe ña ta já cáchi ña já xihin nde:

—Tá ta mé a ndaa ndícuni ndó yehe ña cúu u cuénta Jesús caja ndó ñamaní saa ndó vehe e coo ndó —nacachi ña xihin nde.

Ta naja ndúsa ña xihin nde chí nacandoo too nde vehe ña cán.

¹⁶ Ta ndaja coo in tañu tá cuañan nde nu sá xica tahví nde nu Ndióxi já nanditahan nde in ña tacú, ña ndacañan ínima quini ini. Ta caja ña cán ña ná ndicuni ini ña. Mé ña tacú yóho cúu ña naxeen na. Ta mé xitoho ña cán táva cuaha dá jiuhún sahá ña ndícuni ini ña.

¹⁷ Ta mé ña tacú yóho nacasahá ña ndíco ña jata Pablo xihin jata nde ta cáyuhú cóho ña já cáchi ña já:

—Da caja cáhnu Ndióxi, ña cáhnu ín indivi cúu da cahan yóho. Ta xica da cáxi tuhun

da xihin ndó ndá quiahva cuu cacu ndaa ínimā ndo —cáchi ña cáyuhú ña.

18 Já cuití já cuití cája ña cuahá quivi janda quiahva co ndée ga ini Pablo xihín ña cája ña. Chí nandicoto nihni Pablo nu ña já nacachi da já xihín ínimā quini ndacaan ini ña cán:

—Xihín quivi Jesucristo sáhdá i chuun nuun ña ná queún ini ña loho yóho —cáchi Pablo.

Chí ivi laá naqueta ínimā quini cán cuahan.

19 Joo tá naxini na cúu xitoho ña cán ña a cóo ga cana jühún na caja ña cán já natiin na Pablo xihín Silas já ñéhe na da nasahan na vechúun nuú na jutixia.

20 Tá naxinu coo na cán já nacachi na já xihín da cúu juéxe cán:

—Da naquixi chichi Israel yóho nandai cuu da jándinihi da ñayivi ñuu í.

21 Jáchi jánaha da costumbre mé va da nuú ñayivi. Ta mí a cuú candúsa í ta ni a cúu caja í costumbre da yóho jáchi cúu yó ñayivi ndíco ñuu Roma —nacachi na cán xihín juéxe.

22 Anda já nandicuita ñayivi xihín dá. Já nasahnda juéxe cán chuun ña ná tavá na jáhma Pablo xihín Silas ta ná cani na ndíví da xihín yíto.

23 Tá nandihí nacani quini ndivaha na da já nataán na da vecaa. Ta nasahnda na chuun nuú da ndáa vecaa cán ña ná candaa vaha da da.

24 Tá nahnda chuun yóho nuú da ndáa vecaa cán já nachicaan da Pablo xihín Silas janda sa véhe cuí vecaa cán. Ta já nachicaan da saha dá tañu ivi yíto naní cepo já ná ndituun vaha da.

25 Joo tátuhun java ñuu xíca tahví Pablo xihín Silas nu Ndióxi ta xíta da ña cája cáhnu da mé á nani táa johó java ga na ñúhu ini vecaa cán nu cáhan da.

26 In jonáa cuití nacasáhá táan ndee ndivaha chí janda yuu ndúhu sahá vecaa cán canda. Anda já nanuna tóco ndihí yéhe caa cán ta nacuyu cadena nasandíco tóco ndihí na nasañuhu vecaa cán.

27 Anda já nandicaxí ini da ndáa vecaa cán ta tá naxini da núná yéhe caa cán já natuhun da yuchú caní dá ña cahní da mé

dá jáchi nacahán da sa naquee ndihí na nasañuhu vecaa cán cuahan na.

28 Joo nacayuhú Pablo nu dá já nacachi Pablo já xihín dá:

—A cáhni tohún yohó jáchi yóho ndúu ndihí va nde.

29 Anda já naxíca da ndáa vecaa cán in lámpara já xínu da nandihvi da nu ndúu na vecaa. Ta chí quíji mé dá xihín ña yíhvi da já nacaxítí da nu Pablo xihín nu Silas.

30 Tá nandihí já natavá da na já nacasáhá ndáca tuhún da na já nacachi da já:

—Ndía ndítahan caja i já ná jácacu ndaa Ndióxi ínimā i —nacachi da.

31 Anda já nanducú ñéhe Pablo xihín Silas tuhun nu dá já cáchi da já xihín dá:

—Ndítahan candúsún Jesucristo, xitoho í já ná cacu ndaa ínimun xihín ínimā tóco ndihí na vehún —nacachi da.

32 Anda já nacasáhá Pablo ndícani da tuhun vaha saha Jesús nuú da cán xihín nu tóco ndihí na ndúu vehe da cán.

33 Ta mé hora já nacaja tátá da ndáa vecaa cán nuú nandicuehe jata Pablo xihín jata Silas nuú nacani yíto cán. Ta tá nandihí já nacandúta da ndáa vecaa cán xihín tóco ndihí na vehe da.

34 Tá nandihí já ndáca da Pablo xihín Silas nasahan da xihín dá vehe da. Ta cán nacaja ndíví na ña cuxu Pablo xihín Silas. Ta chí nacajii ndivaha ini da ndáa vecaa cán xihín na vehe da jáchi sa nandiquehe na íchi cuéntá Jesús.

35 Ta naha inga quiví itaan já nachindahá na cúu juéxe cán policia nuú da ndáa vecaa cán ña ná janí da Pablo xihín Silas vecaa.

36 Anda já nacachi da ndáa vecaa cán já xihín Pablo:

—Nasahnda na cúu juéxe chuun nuú i ña ná janí i ndohó cuhun ndo. Sahá ña cán quea cáxi tuhun i xihín ndó cuahán quee ndó ta ná cuhun Ndióxi xihín ndo —nacachi da xihín dá.

37 Joo nacahan Pablo xihín da cúu policia cán já nacachi da já xihín ná:

—A vaha toho nacaja na xihín nde jáchi cúu nde na romano ta na jutixia jan nacani quini na ndehe nu táhyí tóco ndihí ñayivi tá camaní caja víi na sahá nde. Ta tá nandihí já nataán jín ga na ndehe vecaa. Ta viti

cúni na janí jehé na ndehe quee nde cūhun nde. Joo a váha toho cája na já. Sahá ña cán quéa a quéta nde janda quiahva ná quixi mé ná tavá na ndehe já quee nde —ñacachi Pablo xihin da cúu policia cán.

³⁸ Anda já nasahan na cúu policia nandicaní na nuú na cúu juéxe ña ñacachi Pablo xihin ná. Tá ñacandaá ini na cúu juéxe cán ña cúu Pablo xihin Silas da romano chí ñayihví na.

³⁹ Anda já nasahan na naxica na ñamaní nu Pablo xihín nu Silas ña ná caja cáhnu ini da sahá ña ñacaja na. Já ñatavá na da vecaa ta tá nandihí já naxica na ñamaní nu dá ña ná quee da ñuu cán cūhun da.

⁴⁰ Tá ñaquee Pablo xihín Silas vecaa já nasahan na vehe ña naní Lidia. Ta tá nandihí nandique táhan da xihín na cúu cuéntá Jesús ndúu cán já nasahan da tuhun ndéé ini na anda já ñaquee da cuahan da.

17

Ndínihí ñayivi ñuu Tesalónica

¹ Nani xíca Pablo xihín Silas cuahan da íchi ñayaha da chí ñuu naní Anfípolis xihín inga ñuu naní Apolonia anda quiahva naxinu coo na ñuu Tesalónica. Cán nasahin veñuhu nu táca na Israel.

² Ta sahá ña ñacaa Pablo sahan da veñuhu quivi ndíquehe ndéé ná sahá ña cán quéa ñaquihvi da veñuhu cán. Ta tixi uní semana ñacahan da tuhun Ndióxi xihín ná mé quivi ndíquehe ndéé ná.

³ Ta nu libro yii Ndióxi tává Pablo tuhun ndícani da nu ná ña ndítahan nuú Jesucristo ndoho ini a. Ta tá sa nandihí naxihí a já nditacu a jáchi já cáchi libro yii Ndióxi coo. Já ñacachi Pablo já xihín ná:

—Mé Jesús, mé a cáhan i saha nu ndo yóho, mé a yóho cúu Cristo, ña ñachindahá Ndióxi cacomí cuéntá sahá ñayivi —ñacachi Pablo.

⁴ Ta chí ñacandúsa java na Israel ña ñacachi Pablo xihín ná. Anda já ñacatáhan na xihín Pablo xihín Silas xíca nuu na. Ta cuahá ri na griego, na sa cája cáhnu Ndióxi ndúu cán ñacandúsa na ña ñacachi Pablo xihín ná. Ta ñacandúsa ri cuahá najihí, na ín toní ñuhú ñayivi xihín ta nandihvi na íchi cuéntá Jesús.

⁵ Joo na Israel, na co cándúsa Jesús ñacasahá cáhiví ini na. Sahá ña cán quéa najátaca na java ta quini, da coó chuun nu xíca nuu mé cáyé cán. Já ñacasahá na jándinihi na ñayivi mé ñuu Tesalónica cán. Anda já cáti na nasahan na vehe in da naní Jasón. Ta xihín ña ndúsa ñaquihvi na vehe da cán ña ndínducú na Pablo xihín Silas ña tavá na da ndíquiahva na da nuú na sacuaña ñuu cán.

⁶ Joo coó nandínehe ná Pablo xihín Silas cán sahá ña cán quéa janda mé Jasón, da xihín ñaha vehe cán ñuhu na da xihín java ga na cúu cuéntá Jesús cuahan na nuú na jutixia ñuu cán. Tá nandihí já cáyuhú na já cáchi na já xihín na jutixia cán:

—Da naní Pablo xihín da naní Silas xíca nuu da ní cúu ñuyiví jájana da jiní ñayivi. Ta quiahva já cúni da caja da xihín ñayivi ñuu í.

⁷ Ta da naní Jasón yóho nandiquehe vaha da da cán vehe da. Ta xihín ña cája na yóho náha ña co cája na ña sáhdá ley ñuu Roma ta ni co cája cáhnu na da cómi cuéntá sahá ñuu Roma. Jáchi mé na yóho xíca na cáhan na ña ín inga da cómi cuéntá sahá ñayivi. Ta cáchi na cúu dá in da naní Jesús —ñacachi na.

⁸ Tá naxini joho ñayivi xihín na jutixia cán ña yóho chí ñacasahá na ndívaa na.

⁹ Joo ñachahvi Jasón xihín java na cúu cuéntá Jesús cán jiyhún nuú na jutixia cán já najaní ñahá na.

Cuahan Pablo xihín Silas ñuu Berea

¹⁰ Ta tá sa ñacuaá mé ñuu já ñachindahá na cúu cuéntá Jesús cán Pablo xihín Silas já ná cūhun da chí ñuu Berea. Ta tá naxinu coo da ñuu Berea cán já nandihvi da veñuhu na Israel cán.

¹¹ Ta ñasuná chága na Israel cán ínima ná a juú ga na ndúu ñuu Tesalónica chí cáji iní na nandiquehe na tuhun Ndióxi. Ta ndijáá ní quivi ndínducú na nuú tuhun Ndióxi ña á mé a ndaa cúu ña jánaña Pablo nu ná.

¹² Ta cuahá táhan na ñaquixi chichi Israel cán nandiquehe na íchi cuéntá Jesús. Ta cuahá najihí griego, na tácu ini nación cán xihín cuahá nataa griego nandiquehe na íchi cuéntá Jesús.

13 Joo tá nañehé na Israel ñuu Tesalónica tuhun ña ín Pablo ñuu Berea cáhan da tuhun Ndióxi nuú ñayivi chí ivi laá nasahan na jándinihi na ñayivi ñuu Berea cán já ná ndicujta na xihin Pablo.

14 Joo ivi laá na cúu cuénta Jesús cán nachindahá na Pablo cuahan da yati yuhú tañuhú nani nacandoo Silas xihin Timoteo ñuu Berea cán.

15 Ta java na cúu cuénta Jesús ndáca na Pablo ta nasanehe na da janda ñuu Atenas. Ta tá nandicó coo na cán ñuu Berea já ñéhe na chuun ña ná cuhun quí Silas xihin Timoteo ñuu Atenas ná ndique táhan da xihin Pablo.

Ín Pablo ñuu Atenas

16 Nani ndáti Pablo xinu coo Silas xihin Timoteo ñuu Atenas cán já nacasáhá ndíhi ini da jáchi ní cúu ñuu cán nachutú ndaa xihín cuahá tiniñu yúu ndícahán ñayivi ñuu cán.

17 Sahá ña cán quéa nacasáhá Pablo cáhan da tuhun Ndióxi xihín na Israel ini veñuhu na. Ta quiahva já nacahan ri da tuhun Ndióxi xihín java na tóho, na cája cáhnu Ndióxi cán. Ta jári ndijáá ní quivi cáhan da tuhun Ndióxi xihín ñayivi táca nuú yahvi ñuu cán.

18 Ta java taa, da jácuaha íchi cuénta Epicureos xihín da jácuaha íchi cuénta Estoicos nacasáhá ndítuhún na xihin Pablo. Joo java na cán cáchi na saha Pablo ña cuahá ndivaha cáhan da ta coo candaa ini na ndá quéa cáhan da. Ta java na cáchi na já saha dá:

—Á tá coo ta java ga ndióxi xíca nuu da cáhan da saha —cáchi na.

Nacachi na ña yóho saha Pablo jáchi naxíca nuu mé dá cáhan da tuhun vaha saha Jesús ta cáhan da ña nanditacu tucu Jesús.

19 Sahá ña cán quéa ndáca na Pablo cuahan ná in nuú naní Areópago jáchi cán cúu nu ndítaca ñayivi ndítuhún na. Ta tá naxinu coo Pablo cán já nacasáhá ndáca tuhún na da já cáchi na já xihin dá:

—Á cajún ñamaní caxi tuhún xihín nde ndá cúu ña saá ña xícún jánahún nuú ñayivi.

20 Jáchi sa nañehé nde tuhun ña cátontó ñayivi xihín ña jánahún nu ná ta viti cúni

nde candaa ini nde ndía quéa jánahún nu ná —nacachi na xihin Pablo.

21 Nacachi na já xihin Pablo jáchi tóco ndihi ñayivi Atenas xihín na tóho ndúu cán ndijáá ní quivi ndinuhu ini na ndítuhún na ñaha saá, ña naxini johu na jánahá inga na.

22 Anda já nacandichi Pablo tañu na ndúu mé nuú naní Areópago cán já nacachi da já xihin ná:

—Candehé ndó, ñayivi ñuu Atenas. Candaa cáxi ini i ña cúu ndó ñayivi cátóo ndícahán cuahá nuú tiniñu yúu, ña cúu ndióxi ndo ta ndícahán ndó ña xihín ndinuhu ini ndó.

23 Jáchi tá xíca nuu i ñuu ndó já naxini i cuahá nunáa nu cája cáhnu ndó ña. Ta nu xíca nuu i cán naxini i inga nunáa. Ta nunáa cán ndaa in tuhun ta cáchi a: “Naa yóho cúu nu ndícahán nde ndióxi coo xini nde”, já naxini i cáchi a. Ta vatí coo xini ndó Ndióxi ndícahán ndo cán joo cája cáhnu ndó ña. Ta mé Ndióxi cán quéa cúni cahan i saha nu ndó viti.

24 ‘Mé Ndióxi cán quéa nacavaha ñuyíví xihín tóco ndihi ñaha ín ñuyíví yóho. Ta mé á cómi a cuénta saha indiví xihín ñuyíví. Ta coo ndácaan toho mé á ini veñuhu ña nacavaha ndahá ñayivi.

25 Ta ni coo xini ñuhú a chindeé ñayivi mé á jáchi sa mé á quéa cája ña ná catacu mí. Mé Ndióxi quéa sahan tachí yó nu yo ta mé á sahan tóco ndihi ñaha nu yo.

26 ‘Mé Ndióxi cán nacavaha in taa nu cuítí. Ta tóco ndihi ñayivi ndúu ñuyíví naquixi na chichi mé taa, da nacavaha Ndióxi cán. Tá nandíhi já najándicujta nuu Ndióxi ñayivi naquixi chichi da cán ní cúu ñuyíví já natahnda in in nación canduu a. Ta sa nasacu ini Ndióxi ndaja tiempo canduu in in nación ñuyíví yóho ta nasacu ini mé á ndáchí coo in in nación.

27 Já nacaja Ndióxi jáchi cúni a ña ná ndinducú ñayivi mé á ta já ná ndíñehé ná íchi cuénta mé á. Joo mé a ndaa yati va ín Ndióxi nu tóco ndihi ñayivi.

28 Jáchi mé á cája ña ná catacú ta ná canda yiquí cuñu í. Sanahá nacachi java taa cuénta mé ndó já: “Cúu yó na vehe Ndióxi.”

29 Joo tá mé a ndaa cúu yó na vehe Ndióxi co ndítahan cahán yo ña Ndióxi cúu tiniñu yúu ña najándicuchu na xihín jiuñun cuáan á xihín jiuñun cúxú. Ta ni co ndítahan cahán yo ña Ndióxi cúu tiniñu yúu cávaha ndahá ñayivi xihín yuu. Jáchi jini mé va na jan cána ña cávaha na.

30 Jihna nasacu ini Ndióxi ña a jándoho toho a ini ñayivi sahá cuachi nasacaja na jáchi co cánda ini na ña cuni mé á, nduu. Joo viti sáhdá Ndióxi chuun nu tóco ndihi ñayivi ña ná ndicó coo ini na ta ná a cája cáhnu ga na tiniñu yúu.

31 Jáchi sa nasacu Ndióxi in quivi caja vii a saha tóco ndihi ñayivi nduu ñuyivi yóho. Ta sa nacaxi mé á Jesús ña caja vii ndaa mé á saha ná. Ta najánditacu tucu Ndióxi Jesús tá nandihí naxihí a. Ta xihín ña yóho nanaha nuú ñayivi ña mé a ndaa caja vii Jesús saha ná —nacachi Pablo xihín ndihi na cán.

32 Tá naxini joho na cán ña cáchi Pablo ña vaxi quivi nditacu ndii já nacasáhá java na cán sacú ndaa na da. Joo java na cáchi na já xihín dá:

—Vaha chága ná cahún sahá ña jan nuú nde inga tañu —cáchi na xihín dá.

33 Anda já naquee Pablo nu Areópago cán cuahan da.

34 Joo java ñayivi, na nacandúsa ña cáchi da nacasáhá ndicó na da xíca na. Tañu na cán nasandacaan in da naní Dionisio, da cúu táhan na ndítaca Areópago cán. Ta tañu na nacandúsa cán ndacaan ri in ñañáha naní Dámaris. Ta jári java chága na cándúsa nandihvi na íchi cuénta Jesús.

18

Xinu coo Pablo ñuu Corinto

1 Tá nandihí já naquee Pablo ñuu Atenas cán já cuahan da chí ñuu Corinto.

2 Ta mé cán nandique táhan da xihín in da Israel naní Aquila, da nasacuu estado Ponto. Ta jacá cúu saá va naxinu coo Aquila ñuu Corinto cán xihín ñájihí da, ña naní Priscila. Ta ndívi na yóho sa naquee na ñuu Roma ndacaan nación Italia jáchi Claudio, da cómi cuénta sahá na ñuu Roma cán nasahnda da chuun ña ná quee ndihi na Israel cuñun na. Ña cán quea naxinu Aquila xihín ñájihí da ñuu Corinto cán.

Anda já nasahan Pablo naxito nihni da na nu nduu na cán.

3 Ta nacandoo Pablo vehe na cán cája chuun da xihín ná jáchi sa mé chuun ña cája na cán tiahva ri da cán va. Ta chuun nasacaja na quea cávaha na vehe lona, ña ndeé.

4 Ta tá xinu coo quivi ndiquehe ndee ná já sahan da veñuhu na Israel cahan da tuñun Ndióxi xihín ná. Ta já najáxinu da ini na Israel xihín na tóho já nacasáhá na cándúsa na Jesús.

5 Ta ndaja coo najándacoo Silas xihín Timoteo estado Macedonia ta naxinu coo na ñuu Corinto cán. Anda jávi najándacoo Pablo chuun cája da cán já nacasáhá da ndúcú ndeé chága da cahan da tuñun Ndióxi nuú ñayivi. Ta cáxi táhyí cahan da xihín na naquixi chichi Israel ña mé Jesús cúu á ña ndáti na chindahá Ndióxi quixi.

6 Joo na naquixi chichi Israel cán coo nandiquehe na tuñun cahan Pablo ta nacasáhá canahá na xihín dá ta cahan núu na saha Jesús. Anda já naquiji nihni Pablo jáhma dá já ná cánda ini na ña co ndójo ga da cuachi sahá na Israel cán ta já nacachi da já xihín ná:

—Tá ná cuñun ndó indayá ta cómi mé va ndó cuachi sahá. Joo yehe co ndójo ga i cuachi saha ndo jáchi sa nacahan i tuñun Ndióxi xihín ndo ta co cuni ndó cándúsa ndó ña. Viti xihín chí nuu cuñun i cahan i tuñun vaha saha Jesús nuú na coo naquixi chichi Israel —nacachi Pablo xihín ná.

7 Já naqueta da veñuhu na cán cuahan da. Já nasaa da vehe in da naní Justo, da cája cáhnu Ndióxi. Ta yati jin veñuhu cán iin vehe da.

8 Ta in da naní Crispo, da sáhdá chuun veñuhu cán nacandúsa da Jesús, xitoho í xihín tóco ndihi na vehe da. Ta cuaha táhan mé na ñuu Corinto cán nandiquehe na íchi cuénta Jesús ta nacandúta ná tá naxini joho na tuñun Ndióxi nacahan Pablo xihín ná.

9 Ta ndaja coo in nuú naquixi tátuhun in sani nu Pablo ta xihín ña cán nacahan Ndióxi xihín dá já nacachi a já:

—A yíhvún cahún sahá i nuú ñayivi ta coto a catáji yuhun cahan chágun xihín ná saha i.

10 Jáchí íin vi xuhun ta ni in na a cúu tiin yohó ña ná caja xíxi na xuhun. Jáchí sa ndúu cuahá ndivaha ñayivi ñuu yóho, na cacuu cuéntá mí i —ñacachi Ndióxi xihín dá.

11 Sahá ña cán quéa ñasahjin tóo Pablo in cuia java ñuu Corinto cán ta najánaha da tuhun Ndióxi nuú ñayivi cán.

12 Joo mé tiempo cán ñacasáhá cómi in da naní Galión cuéntá sahá ñayivi estado Acaya nu ndácaan ñuu Corinto cán. Já nandique táhan ndihi na Israel ña cúní na caja xíxi na xihín Pablo chí ñatiin na da já ñéhe na da cuahan da vechúun.

13 Ta mé cán ñacasáhá cáchí na já xihín da cúu gobernador cán:

—Da naní Pablo yóho xíca da jácahan da ñayivi ña ndítahan nu ná caja cáhnu na Ndióxi ta co sáhdá ley yo cája íjá —cáchí na cán xihín gobernador.

14 Anda já ndúcú Pablo candichi da cahan da joo mé Galión cán ñacasáhá cáchí da já xihín na Israel cán:

—Tá cuachi ndeé ná caja da yóho já quéa cuu cuni johó i nu cáhan ndo ná ndaja ndichi i saha dá, nduu.

15 Joo co cúní toho i caja víi sahá ña jan jáchí cúu á sahá tuhun cáhan ndo xihín sahá quiví ñayivi Israel xihín saha ley mé va ndó ña cán quéa vaha chága ná caja víi mé va ndó sahá ña yóho —ñacachi da cúu gobernador cán xihín ná.

16 Tá nandihí já ñatavá da na Israel vechúun cán.

17 Anda já ñatiin tóco ndihí na griego cán da naní Sóstenes, da sáhdá chuun veñuhu cán. Ta ñatiin na da mé nu táhyí mé da cúu gobernador cán ñacani na da. Joo coo ñasahní toho Galión mé dá sahá ña ñacaja ná.

Ndicó coo tucu Pablo chí Antioquía

18 Cuahá va quiví ñacandoo tóo chága Pablo ñuu Corinto cán. Anda já nandindayí da na cúu cuéntá Jesús ndúu cán já ñaquee da cuahan da ñundáhyi cuéntá Siria. Ta ndáca da Aquila xihín Priscila cuahan na xihín dá. Ta tá ñaxinu da ñuu Cencrea tá cámaní ndaa da barco cuhun chága da chí nuú já najatá lahla da jiní dá já ná xinu coo nuú tuhun ñacahan da.

19 Ta tá ñaxinu coo da ñuu Efeso xihín na ndáca táhan xihín dá cán já najándacoo da Priscila xihín Aquila. Ta ñaquee da cuahan da chí veñuhu ñuu Efeso cán nuú ñacahan da tuhun Ndióxi nuú na Israel, na táca cán.

20 Tá nandihí já ñacasáhá cáhan ndahví na Israel cán xihín Pablo ña ná candoo tóo da chága quiví xihín ná. Joo coo ñaxeen toho da.

21 Ña ñacaja da quéa nandindayí da na já ñacachi da já xihín ná:

—Ndítahan cuhun i coo i Jerusalén jáchí sa nandindaa quiví vaxi víco. Joo ndicó coo tucu u coto nihni i ndohó tá cúní Ndióxi —ñacachi Pablo xihín ná.

Tá nandihí já ñandaa da barco ñaquee da ñuu Efeso.

22 Ta tá ñaxinu coo da ñuu Cesarea já ñaquee da cuahan da chí ñuu Jerusalén cahan Ndióxi da xihín na cúu cuéntá Jesús ndúu cán. Tá nandihí já ñaquee da cuahan da chí inga ñuu naní Antioquía.

23 Ta tá nandihí ñasahjin da chá quiví cán já ñaquee tucu da cuahan da tá in tá in ñuu válí ñúhu chí estado Galacia xihín estado Frigia ña quiahva da tuhun ndeé ini na cúu cuéntá Jesús ndúu cán.

Cáhan Apolos tuhun Ndióxi nuú na ñuu Efeso

24 Mé tañu já ñaxinu coo in da ñaquixi chichi Israel naní Apolos mé ñuu Efeso cán. Mé Apolos yóho cúu dá da ñacacu ñuu Alejandría. Ta cúu dá in da tiahva vaha tuhun Ndióxi ta tiahva vaha da jánaha da ña nuú ñayivi.

25 Mé Apolos yóho sa najácuaha vaha da íchí cuéntá Jesús, xitoho í ta xihín ndinuhu ini da cáhan da saha mé á nuú ñayivi. Ta cáxí táhyí jánaha da saha Jesús nu ná. Ta ñacahan da xihín ná ña ndítahan candúta ñayivi tá quiahva najácandúta Juan ñayivi jihna. Joo coo xini vaha da tóco ndihí ña najánaha Jesús.

26 Chí já ñaquihvi mé Apolos veñuhu cán cahan da tuhun Ndióxi xihín ñayivi jáchí co yíhví da cahan da xihín ná. Ta ndaja coo ñaxini johó Priscila xihín Aquila nu cáhan da. Ta tá nandihí já ñéhe na da cuahan na já nandicani vaha chága na nu dá ndaja íin íchí cuéntá Ndióxi.

27 Ta tá nasacu ini Apolos cūhun da chí estado Acaya já nāchindeé nā cúú cuéntá Jesús da já ná cuu cūhun vaha da. Ta nācahyí nā in carta nāsaḥan nā nū dá ná quiahva da ña nūú nā cúú cuéntá Jesús ndúu cán já quea ná ndiquehe vaha na da. Ta tá naxinu cōo Apolos yóho estado Acaya cán nāchindeé cuahá ndivaha da nā cúú cuéntá Jesús, nā nācandeé ini mé á sahá ña nātaḥvi ini Ndióxi saḥa ná.

28 Ta nū cáxí táhyí ndihi ñayivi nanaha da ña a juú ña ndaa cúú ña jánaḥa nā Israel nuú ñayivi. Ta xihín tuhun Ndióxi nanaha da nū ná ña mé Jesús cúú Cristo, mé a nāchindahá Ndióxi cacomí cuéntá saḥa ñayivi.

19

Tá in Pablo ñuu Efeso

1 Ta nani in Apolos ñuu Corinto cán já nayaha Pablo chí yucu janda quiahva naxinu cōo da ñuu Efeso. Ta cán nāndiñeḥe dá java nā cúú cuéntá Jesús.

2 Já nāndaḥa tuhún da nā já nācachi da já xihín ná:

—Á nāndicutú ndaa ínimā ndo xihín ínimā yii Ndióxi tá nācandúsa ndó Jesús —nācachi da xihín ná.

Já nānducú ñeḥe nā cán tuhun nū dá já cáxí nā já xihín dá:

—Chí a ñáha mé va candaḥa ini nde saḥa ínimā yii Ndióxi jan —nācachi nā cán xihín Pablo.

3 Anda já nāndaḥa tuhún Pablo nā já cáxí da já xihín ná:

—Ndaja vaha nācandúta ndo, dá já.

Anda já nānducú ñeḥe nā cán tuhun nū dá já nācachi na já:

—Nācandúta nde tá quiahva najánaḥa Juan —nācachi na.

4 Anda já nācachi tucu Pablo já xihín ná:

—Najācandúta Juan ñayivi já ná naha nā nuú ñayivi ña nāndijama na ta cō cāja ga nā cuāchi nāsaḥa na jihna. Joo nācaḥan Juan xihín ná ña ndítahan nū ná candúsa na inga da vaxi jata dá. Ta da nācaḥan Juan cán saḥa cúú Jesús, mé a nāchindahá Ndióxi cacomí cuéntá saḥa ñayivi —nācachi Pablo xihín ná.

5 Tá naxini jōho nā cán ña nācachi Pablo xihín ná chí ivi laá nācandúta ná cuéntá Jesús, mé a cúú xitōho í.

6 Ta tá nāchojó Pablo ndáḥa dá jiní ná já naxinu ínimā yii Ndióxi najāndicutú a ini na. Anda já nācasáḥa nā ndícaḥan nā inga tuhun ña cōo nāsaḥaḥa na. Ta jáyaha na tuhun nācaḥan Ndióxi nuú nā ndúu cán.

7 Ta tixi ndihi nā cán cúú ná tátuhun uxu ivi ta.

8 Ta tixi uní yoo nāsaḥiin Pablo ñuu cán saḥan da veñuhu jánaḥa da saḥa Jesús nuú ñayivi xihín ndinuhu ini da. Ta jáxinu da ini ñayivi ña ná ndihvi na íchi cuéntá Jesús já cuu cacomí mé á cuéntá saḥa ná.

9 Joo java nā cán sáa ini na ta cōo nāxēen na candúsa na nū cáḥan da. Ña nācaja na quea nācasáḥa cáḥan núu na saḥa tuhun vaha cáḥan saḥa Jesús nuú ñayivi. Saḥa ña cán quea nātavá xōo Pablo nā cúú cuéntá Jesús tañu nā cán já nāsaḥan ndaca da nā in vehe escuela nū in in da naní Tiranno ta cán jánaḥa Pablo tuhun Ndióxi nū ná ndijáa níi quivi.

10 Já nāsaḥa Pablo tixi ivi cuia ta xihín ña cāja da naxini jōho ndihi nā ndúu estado Asia tuhun vaha saḥa Jesús, xitōho í. Ta nā naxini jōho tuhun Ndióxi cán cúú ná nā nāquixi chíchi Israel xihín nā tōho viti.

11 Ta nācaja Ndióxi ña ná cuu caja Pablo cuahá ña xitúhún nuú ñayivi ndúu cán.

12 Jáchi janda pañito á jáhma ña cáni ndaa Pablo cán ñeḥe na ña cuahān nā ta jácani ndaa na ña nā quihvi xihín á chí ndívaha na. Ta tá ñúhu ínimā quini ini na janda rí cán queta cuahān.

13 Joo java nā Israel, nā cōo cúú cuéntá Jesús xíca nuu na táva nā ínimā quini ñúhu ini ñayivi. Ta ndaja cōo nasacu ini na caja chúun na quivi Jesús, xitōho í, ña ná táva nā ínimā quini. Já nācachi nā cán já xihín ínimā quini ndácaan ini ñayivi:

—Xihín quivi Jesús ña xíca nuu Pablo cáḥan da saḥa, sáḥndá nde chuun nuun ña ná queún cūhun —nācachi nā cán.

14 Já nācaja ndíḥusa jahyi in da naní Esceva, da cúú da saḥaḥa nuú jutū veñuhu nā Israel ndúu ñuu cán.

15 Joo tá nācachi na ña yóho xihín rí quini ñúhu ini in dataa já nānducú ñeḥe rí cán

tuhun nu ná já cáchí rí já:

—Xíní vî yo cúú Jesús ta xíní ri ndá da cúú Pablo va. Joo mé ndó, co xíní toho î ndohó —nacachi rí quini.

¹⁶ Tá nacachi ínimā quini cán já chí ivî laá nandava dataa ndácaan ínimā quini ini cán jata ndíhūsa nā cán ta nacaja xíxi quini da xihín ná jáchî a juú quiahva ndacú da. Quini nacaja da cán xihín ná anda naxinu lahla ndihi na jata véhe ta chí a váha na nandicuehe nā nacaja ínimā quini cán.

¹⁷ Ta chí nacandaa ini ndihi ñayivi ndúu ñuu Efeso cán sahá ña nayaha yóho vatí cúú ná na Israel á cúú ná na tóho ñañehe ndihi na tuhun. Sahá ña cán queá nayihví na. Ta cuahā ná nacahan nā ña cáhnu cúú quivî Jesús ña cúú xitoho í.

¹⁸ Ta cuahā táhan nā cándúsa Jesús cán nacasáhá nā náhma nā tóco ndihi cuachi nacaja na.

¹⁹ Ta cuahā nā nasacuu nā tají ñehe ndihi na libro ña tají naxinu nā ta nachicaan ñúhu ná ña nuú ndihi ñayivi. Tá najitá nā cuéntá sahá yahvi tóco ndihi libro nacayî cán naxinu a tátuhun ivî jico uxu mil jihun cúxú.

²⁰ Já nacasáhá xíta nuu tuhun vaha saha Jesús. Ta náha ña mé a ndaa ín ndée Jesús caja tóco ndihi ñaha.

²¹ Tá sa nayaha ndihi ña yóho já nasacu ini Pablo cūhun da coto nihni da estado Macedonia xihín estado Acaya. Já quehe tucu da íchî cūhun da janda Jerusalén. Ta nacachi da ña tá sa nasahan da ñuu Jerusalén já yaha da cūhun da chí ñuu Roma.

²² Ta mé Pablo yóho nachindahá da ivî táhan da xíca chindeé táhan xihín dá ña ná cūhun da chí estado Macedonia. Ta da nachindahá da cán cúú Timoteo xihín Erasto ta mé Pablo nacandoo tóo chága da estado Asia.

Ndávaq ñayivi ndúu ñuu Efeso

²³ Mé tiempo já a juú quiahva cuahā ñayivi ñuu Efeso nandivaa nā sahá ña nandihvi cuahā ñayivi íchî cuéntá Jesús.

²⁴ In da naní Demetrio cúú dá da najándivaa nā cán. Mé Demetrio yóho cávaha da tiniñu yúú xihín jihun cúxú ta mé tiniñu yúú cán ndaa tá quiahva cáa in veñuhu cuéntá Diana, ña cúú ndióxi cāja

cáhnu nā ñuu cán. Ta a juú quiahva vaha cána jihún nā cāja chūun xihín dá cán.

²⁵ Sahá ña cán queá mé Demetrio yóho najátaca da tóco ndihi nā cāja chūun xihín dá ta najátaca ri da java ga táhan na cāja mé chuun cávaha tiniñu yúú cán. Já nacachi da já xihín ná:

—Candehé ndo, sa cándaa vaha ini ndó ña vaha ndivaha cána jihún yo xihín chuun cāja í yóho ta ndúu vaha í cāja ña.

²⁶ Joo sa xíní ndo ta ñehe mé ndó tuhun sahá da naní Pablo. Xíca nuu da cáhan da xihín ñayivi ña a juú toho ndióxi cúú ña cávaha ndahá ñayivi. Ta sa cuahā ndivaha ñayivi nacava da jiní. Ta a juú in túhún ñuu Efeso yóho cuití va jáchî sa nacandé da nacava da jiní cuahā nā ndúu chí estado Asia viti.

²⁷ Ta ihvi ndivaha cáa ña yóho jáchî cuu cahnu da nuú chuun cāja í ta nu cána jihún yo queá yóho. Ta janda veñuhu ndióxi yo, ña naní Diana cuu ndihi saha vatí ní cúú cáhan vaha na saha veñuhu ña. Joo xihín ña cāja Pablo yóho tá xíca nuu da cuu casáhá ñayivi cahan núu na saha Diana ta cuu casáhá nā candají nā ña cúú ndióxi yo, mé Diana yóho. Ta mé ña cúú ña ña cáhnu ndivaha ta ñayivi ní cúú estado Asia yóho xihín ñayivi ní cúú ñuyiví cāja cáhnu na ña —nacachi Demetrio cán xihín java ga da cávaha tiniñu yúú cán.

²⁸ Ta tá naxini johó ndihi nā cán ña nacachi Demetrio chí ivî laá najaa quini na já nacayuhú nā já nacachi na já:

—Cáhnu ná cacuu Diana, ña cúú ndióxi ndicahán nā Efeso.

²⁹ Ta xihín ña yóho tóco ndihi ñayivi ñuu cán nacasáhá nā ndivaa nā. Sahá ña cán queá natiin na ivî dataa, da naní Gayo xihín da naní Aristarco. Ndívî da yóho cúú da da estado Macedonia ta xíca nuu da xihín Pablo. Ta mé ñayivi cán natiin na da já ñúhu na da cuahan da vehe nu ndítaca ñayivi cán.

³⁰ Ndúcú Pablo quihvi nuu da tañu ñayivi cán ña cahan da xihín ná cúni da. Joo nā cúú cuéntá Jesús cán coo naxeen na ña ná cūhun da.

³¹ Ta jári java nā jutixia cuéntá estado Asia ndúu cán ta xíní táhan vaha xihín Pablo sahá ña cán queá nachindahá nā

chuun nu dá ña ná a quíhvi nuu da cahan da xihín na cán.

³² Tañu nu táca ñayivi ndívaā nahá cán sa jíin sa jíin ñaha cáyuhú na ndúu na. Jáchi cuahá na nataka cán ni co xini na ndá cuéntá quea nataka na tañu ñayivi cuaha cán.

³³ Joo java ñayivi ndúu cán nandicani na ndaja cáa ña cúu cán nuú in da naní Alejandro. Ta java na Israel ndúu cán nachindahá na Alejandro já ná candichi da cahan da xihín ñayivi cán. Anda já nandínehe Alejandro ndáha dá já ná catáji too yúhu ná já naçasahá ndíquehe da sahá na cúu cuéntá Jesús.

³⁴ Joo tá naxini ñayivi cán ña cúu Alejandro in da Israel chí ivi laá naçasahá tóco ndihi na cán cáyuhú na já cáchi na já:

—Cáhnú ná cacuu Diana, ña cúu ndíoxi ndícahán na Efeso.

Ta coó nacaatáji na tixi ivi hora cáyuhú na mé tuhun yóho.

³⁵ Ta tá sa nacaatáji loho ñayivi já naçasahá da cúu da cáhyi tutu ñuu cán cahan da xihín ñayivi já cáchi da já xihín ná:

—Candehé ndó, na Efeso. Sa cándaā ini ndihi ñayivi ndúu ñuyívi ña ndítahan nuú ñayivi ndúu ñuu Efeso candaa vaḥa na veñuhu ña cúu ndíoxi naní Diana. Jáchi mé ña cúu ña ña cáhnú ndivaha ta indivi naquixi nahná ña nandicava nu yo.

³⁶ Ta ni in na a cúu cachi ña cahan i ña tuhún sahá ña cán quea caja ndó ñamaní catáji ndo ta ndicani vaḥa ini ndó sahá ña cúni ndó caja ndó.

³⁷ Jáchi ndívi da ndáca ndó naçasaa ndó yóho co cája cuíhná da veñuhu Diana ta ni co cahan núu da saha ña.

³⁸ Ta tá co táhán ini Demetrio xihín na cája chúun xihín dá sahá ña cája Pablo já ndítahan nu ná cuhun na vechúun nuú jutixia ta cán cuu ndiquehe in in na saha mé ná jáchi sahá ña cán ndúu juéxe cán caja vii na sahá ñayivi.

³⁹ Joo tá inga ñaha quea cúni ndó caja vii ndó saha, xini ñúhú nditaca ndihí já ná cuu caja vii yó sahá.

⁴⁰ Jáchi cája i cuéntá cuu chicaan na cuachi jata yo sahá ña jándicuita í ñayivi caní táhan na saha tóco ndihi ña nayaha

quíví viti. Jáchi mé a ndaa co xini yo ndá tuhun nducú ñehé tá ná ndaca tuhún na mí ndá cuéntá quea nandivaa nahá yo — nacachi da xihín ná.

⁴¹ Tá nandíhi nacachi da cáhyi tutu cán tuhun yóho xihín ñayivi cán já najánduta da na.

20

Cuahan Pablo estado Macedonia xihín estado Grecia

¹ Tá sa nanduta ndihi ñayivi, na nandivaa nahá cán já nacana Pablo tóco ndihi na cúu cuéntá Jesús jáchi cúni da cahan da xihín ná sahá java ñaha ña ndítahan nu ná caja na. Ta tá nandíhi nacahan da xihín ná já nanumi da na ta nandindayí da na já naquee da cuahan da chí Macedonia.

² Níi cúu estado Macedonia cán naxica nuu da sahan da tuhun ndéé ini na cúu cuéntá Jesús xihín tuhun cahan da. Tá nandíhi já naquee da cuahan da ta naxinu da chí estado Grecia.

³ Ta nacandoo da cán tixi uní yo. Ta tá ja chá quehe da barco cuhun da chí ñundáhyi cuéntá Siria já nañeḥe dá tuhun ña sácu ini na Israel cán cahní na da. Sahá ña cán quea nasacu ini da ña vaḥa chága ná cuhun sahá da já ná yaḥa tucu da chí Macedonia.

⁴ Ta ndáca táhan java na cúu cuéntá Jesús cuahan na xihín Pablo. Ta na cán cúu na yóho: in da naní Sópater, da ñuu Berea xihín Aristarco xihín Segundo, da ñuu Tesalónica xihín Gayo, da ñuu Derbe xihín Timoteo. Ta tañu na cán cuahan ri Tíquico xihín Trófimo, da naquixi estado Asia.

⁵ Tóco ndihi na ndáca táhan xihín Pablo yóho nasahan cuéé na chínuu candati na ndeḥe ñuu Troas.

⁶ Joo ndeḥe, da cúu Pablo xihín Lucas tá sa nayaha víco tá xixi na pan ña co cáva táhan yusá naxaa xihín já nandaa nde barco ñuu Filipos cuahan nde chí Troas. Ta janda quíví uhun já nandique táhan nde xihín ndihi na cán. Ta chí nacandoo too chága nde usa quíví ñuu Troas cán.

Xíto nihni Pablo ñuu Troas

⁷ Ta quíví domingo nataka ndihi nde, na cúu cuéntá Jesús ña cuxu nde pan yíi. Ta sahá ña queta Pablo cuhun da inga quíví

itaan sahá ña cán quéa najánaḥa cuaḥa dá nu ná janda quiahva naxinu java ñuu.

⁸ Tóco ndihi na cúu cuénta Jesús cán nanditutu nde ndúu nde in vehe cánúu jini ninu. Ta chí ndiyihvi ndaa nu ndúu nde jáchi cuaḥa lámpara cáyi.

⁹ Ta ndaja coo in da loho nani Eutico in coo da ventana xini joho da nu cáhan Pablo. Joo sahá ña cuaḥa cáhan Pablo sahá ña cán quéa nanaá ini da loho cán chí naquiji da. Já najani dá nandicava da janda nu ñuhu piso uni. Ta tá nanuu na cúu cuénta Jesús cán nandiñehe na da janda ndii cúu dá.

¹⁰ Anda já nanuu Pablo ta najáca da mé dá jatá da loho cán ta nanumi da da ta já nacachi da já xihin na cúu cuénta Jesús cán:

—A cáyihvi toho ndó jáchi tácu va da yóho —nacachi Pablo chí najánditacu ñahá da.

¹¹ Anda já nandaa tucu Pablo cuaḥan da vehe piso ninu cán. Já nasahnda java da pan yii cán ta naxixi na ña. Anda já nacahan chága da xihin ná janda quiahva nativi. Já naquee da cuaḥan da.

¹² Ta sahá mé da loho, da nandicava cán cájii íni na ndáca vaha na da cuaḥan na jáchi nanditacu da.

Qué Pablo ñuu Troas ta cuaḥan da chí ñuu Mileto

¹³ Nasacu ini Pablo cuhun sahá da anda ñuu Asón. Joo mé nde nandaa nde barco nasahan nde mé ñuu cán jáchi janda cán nacando nde ndique táhan nde xihin dá.

¹⁴ Ta tá nandique táhan nde ñuu Asón cán xihin dá já nandaa da xihin ndihi nde ini barco. Já naquee nde cuaḥan nde ñuu Mitilene.

¹⁵ Casahan nde ini barco ta inga quivi itaan já nayaha nde yati isla Quío ta janda tá nayaha inga tucu quivi já naxinu coo nde ñuu Samos. Ta naquee tucu nde cuaḥan nde janda quiahva naxinu coo nde ñuu Trogilio. Ta cán nandiquehe nde nde ta janda inga quivi itaan naxinu coo nde ñuu Mileto.

¹⁶ Co cuni Pablo cayancá da estado Asia sahá ña cán quéa coo nasahan nde ñuu Efeso. Númi da cuhun da ñuu Jerusalén coo da quivi víco Pentecostés jáchi nasacu ini da coo da víco cán tá ná quiahva Ndióxi ñamaní nu dá.

Cáhan Pablo xihin na sacuahá ñuu Efeso

¹⁷ Ta nani ndúu nde ñuu Mileto cán já nacana Pablo tóco ndihi na sacuahá veñuhu ñuu Efeso cán já ná quixi na.

¹⁸ Ta tá sa nataca na nu ndúu nde já nacachi da já xihin ná:

—Sa xini vaha ndó ndaja nacaja i janda quivi nu cuítí tá naxinu coo i estado Asia yóho.

¹⁹ Nii tiempo nasahin i tañu ndó cán nacaja chúun i cuénta Jesucristo, xitoho í. Ta coo nandinehe jícó i mí i sahá ña nacaja i. Ta cuaḥa tañu nasacu u saḥa ndo. Ta nandoho ini i sahá ña cuni na Israel cahní na yehe.

²⁰ Ta coo najándacoo i cáhan i tuhun Ndióxi xihin ndo jáchi xini vaha i ña jan cuu chindee a ndohó. Ta najánaḥa i ndohó nu táhyí ñayivi ta jari ini vehe ndó.

²¹ Ta najánaḥa i nuú na Israel xihin nuú na toho ña ndítahan nu ná ndicó coo ini na ta jándacoo na cuaḥi cája na. Ta nacachi i xihin ná ña ndítahan candeé ini na Jesucristo, xitoho í.

²² Ta viti cuhun i chí ñuu Jerusalén jáchi cuni ínima yii Ndióxi ña ná cuhun i cán ta co xini ndía cuu ndoho i ñuu cán.

²³ Ña xini ndusa i quéa ña nacaxi tuhun ínima yii Ndióxi xihin i ña ndá ñuu nacuu nuú cuhun i ña jivi i chicaan ñayivi yehe veca á jivi i caja xixi na xihin i.

²⁴ Joo ni in ña yóho co cája toho a nuú i. Ta vatí ná cahní na yehe co yihvi toho i. Jáchi ña cuni mí i quéa cájii íni i jaxinu coo i chuun nasahan Jesucristo nuú i caja i. Ta ña yóho cúu á cáxi tuhun i nuú ñayivi tuhun vaha saḥa mé á ta saḥa ndá quiahva quihvi ini a ñayivi.

²⁵ Sa naxica nuu i tañu ndó ta nacahan i xihin ndó ña vaxi quivi cacomí Ndióxi cuénta sahá ñayivi. Ta viti xini vaha i ña ni in ndó a cuni ga ndó yehe.

²⁶ Sahá ña cán quéa cáxi tuhun i xihin ndó quivi víti ña co ndójo ga i cuaḥi saḥa ndo tá ná jándacoo ndó íchi cuénta Jesús.

²⁷ Jáchi sa nacaxi tuhun i nu ndo tóco ndihi ña sácú ini Ndióxi caja ta coo nachijehé tuhun toho i sahá nu ndo.

²⁸ Sahá ña cán quéa ndítahan candaa vaha ndó mé va ndó ta candaa vaha ndó tóco

ndihi na cúu cuéntá Jesús ná cuahnu chága na xihín tuhun Ndióxi. Jáchí mé ínima yíi Ndióxi nasacu a ndohó ña ná cacomí ndo cuéntá sahá na cúu cuéntá mé á jáchí naxita nji mé á sahá ndihi na tá naxihí a ndica crúxu.

²⁹ Cáhan i ña yóho xihín ndo jáchí sa cándaá vaha ini i ña tá sa ná quee yehe cuhun i já quixi java ñayivi ta cacu ini na jándihi na sahá na cúu cuéntá Jesús. Ta tá quiahva cája ndivahyí jándihi rí sahá ndicachi quiahva já cacúni na jándihi na sahá na cúu cuéntá Jesús.

³⁰ Ta janda mé tañu mé ndó jan va cana java na ta jánaña na ña tuhún nuú ñayivi. Ta nducú na ndiquehe na na sa cúu cuéntá Jesús cuhun na jatá na cán.

³¹ Ña cán quéa cuéntá vaha coo ndó ná a jándahvi na ndohó. Xíní ñúhú ndicuhun ini ndó ña tixi uní cuia coo najándacoo i cahan i xihín ndó ndáa quéa ndítahan nu ndó caja ndó. Ta ñuú ta ndiví nacahan i xihín ndó sahá ña yóho ta chí anda nasacu u saha ndo ña ná caja ndó ña cúni Ndióxi.

³² Viti jándacoo i ndohó, ñani i, ndahá Ndióxi jáchí cáchí tuhun mé á ña quíhvi ini a tóco ndihi ñayivi. Ín ndée Ndióxi caja ndacú a ndohó já ná cuu coo ndó xihín tóco ndihi na nacaxi mé á caja ñamaní xihín.

³³ Ta xíní ñúhú ndicuhun ini ndó ña coo nandiava ini i quehe e jiuhún á jáhma vaha cómi java ga ñayivi.

³⁴ Ña nacaja i quéa nacaja chúun i xihín ndahá i já ná a ndímaní ñaha catacu u ta já ná cuu catacu na xíca xihín i.

³⁵ Ta níi tiempo najánaña i nu ndo ña quiahva já ndítahan nu ndó caja chúun ndó já ná coo ñaha catacu ndó ta já ná cuu chindeé ndó na ndímaní ñaha nuu. Ndítahan ndicuhun ini ndó tuhun nacachi Jesucristo tá nacachi a: “Cáji chága ini na jása ñaha a juú ga na ñehe á”, nacachi Pablo xihín na sacuaña veñuhu ñuu Efeso cán.

³⁶ Tá nandihí nacahan Pablo já nacaxítí da já nacasáhá xíca tahví da nu Ndióxi xihín ndihi na cúu cuéntá Jesús cán.

³⁷ Ta tóco ndihi na cán nasacu na xihín dá ta nanumi na da ta já natatí yúhu ná sajóho da ña ndíndayí na da.

³⁸ Tóco ndihi na nacacuéha ini na saha

Pablo jáchí nacachi da xihín ná ña a cúni ga na da. Tá nandihí já ndáca táhan ndihi na nasahan na xihín dá janda nuú nandaa da barco cán.

21

Cuahan Pablo chí ñuu Jerusalén

¹ Tá nandihí nandindayí nde na cúu cuéntá Jesús cán já nandaa nde barco naquee nde cuahan ndacú nde in ñuu naní Cos. Ta inga quiví itaan já naquee tucu nde cuahan nde chí inga ñuu naní Rodas. Ta já naquee nde cuahan nde chí ñuu naní Pátara.

² Ta mé cán nandique táhan nde xihín in barco, dó cuhun chí estado Fenicia ta chí nandaa nde dó cuahan nde.

³ Ta nani cásahan nde ini dó já naxini nde isla Chipre xoo íti nde. Joo nayaha saa va nde janda quiahva naxinu coo nde ñuu Tiro ndacaan estado Siria jáchí mé cán ndítahan nu ná januu na ñaha ndójo dó.

⁴ Mé ñuu Tiro cán nandítahan nde na cúu cuéntá Jesús ta nacandoo tóo nde xihín ná tixi usa quiví. Ta najacahan ínima yíi Ndióxi na cán ña ná caxi tuhun na xihín Pablo ña ná a cuhun da ñuu Jerusalén.

⁵ Joo tá sa nayaha usa quiví já naquee nde cuahan nde chí ñuu Jerusalén. Ta naqueta tóco ndihi na cúu cuéntá Jesús cán xihín ñájihí na xihín jahyi válí na já ndáca táhan na xihín nde cuahan nde anda yuhú ñuu cán. Ta yatí yuhú tañuhú cán nacaxítí ndihi nde naxíca tahví nde nu Ndióxi.

⁶ Ta tá nandindayí táhan nde já nandaa nde barco ta na cán naquee na cuanúhu ná vehe na.

⁷ Naquee nde mé ñuu Tiro cásahan nde nuú tañuhú janda quiahva naxinu coo nde ñuu Tolemaida. Ta mé cán nacahan Ndióxi nde xihín na cúu cuéntá Jesús ndúu cán. Ta chí nacandoo nde in quiví xihín ná.

⁸ Ta inga quiví itaan já naquee nde cuahan nde janda quiahva naxinu coo nde ñuu Cesarea. Ta cán nasahan nde vehe in da sáxica nuu cahan tuhun Ndióxi xihín ñayivi. Mé da yóho naní da Felipe ta nasacuu da in táhan ndíhusa da chindeé na apóstol veñuhu ñuu Jerusalén. Ta chí nacandoo tóo nde vehe da cán.

⁹ Ta nasahiin comí jahyi jíhí da, na tacú. Ta tiahva ndícomi ná jáyaha na tuhun cáhan Ndióxi nuú ñayivi.

¹⁰ Tá sa nacaja chá quivi ndúu nde vehe da cán já naxinu coo in profeta, da naquixi estado Judea ta naní da Agabo.

¹¹ Mé da yóho nasaa da coto nihni da ndehe nu ndúu nde cán. Ta nani in da xihín nde cán já ñatiin da cinturón ñaha Pablo. Já ñacató da ndáha dá xihín saha dá xihín mé cinturón ta já ñacachi da já:

—Cáchi ínimá yíi Ndióxi ña tá quiahva nacaja i ñacató i mí i quiahva já cató na Israel da xihín ñaha cinturón yóho. Ta já ndiquiahva na da ndahá na tóho —ñacachi Agabo cán xihín nde.

¹² Tá naxini johu nde ña ñacachi Agabo yóho já ñacasáhá nde cáhan ndahví nde xihín Pablo ña ná a cùhun da ñuu Jerusalén. Ta jári na cúu cuéntá Jesús ndúu ñuu Cesarea cán cáhan ndahví na xihín dá ña ná a cùhun da.

¹³ Joo nanducú ñehe Pablo tuhun nuú nde já ñacachi da já:

—Ndá cuéntá quéa sácu cóhó ndo ta cája ndó ña cándíi ini i. Candehé ndo ná cahan i xihín ndo. Coó caja toho a ná cató na yehe jáchi in tiahva i ndiquiahva i mí i quivi i saha Jesús, xitoho í mé ñuu Jerusalén cán —ñacachi da.

¹⁴ Coó nacuu caja nde cava nde jini dá ña ná a cùhun da. Chí coó nacahan chága nde sahá ña yóho xihín dá ta ñacachi nde:

—Ná coo tá quiahva cúni Ndióxi va.

¹⁵ Tá nandihí já nacaja tiahva nde ñaha nde ta já ñaquee nde cuahan nde ñuu Jerusalén.

¹⁶ Ta ndáca táhan java na cúu cuéntá Jesús ñuu Cesarea cán cuahan na xihín nde. Ta tañu na cán ndácaan in da naní Mnasón, da naquixi isla Chipre. Ta anda sanahá ndíco da íchi cuéntá Jesús. Ta sa mé vehe da yóho sácu ini nde canduu tóo nde ñuu Jerusalén cán.

Xíto nihni Pablo da naní Jacobo

¹⁷ Tá naxinu coo nde ñuu Jerusalén já cávatá na cúu cuéntá Jesús cán nandiquehe na ndehe.

¹⁸ Ta inga quivi itaan já ndáca Pablo ndehe nasahan nde coto nihni nde Jacobo.

Ta tá naxinu coo nde cán já naxini nde ña nataca tóco ndihi na sacuahá nuú na cúu cuéntá Jesús cán.

¹⁹ Ta nacahan Ndióxi Pablo xihín ná já ñacasáhá ndícani da nu ná tá in tá in ña náhnu nasahan Ndióxi ñamaní nu dá caja da tañu na tóho, na coó naquixi chichi Israel.

²⁰ Tá naxini johu na cán ña yóho já nacaja cáhnu na Ndióxi. Ta tá nandihí já ñacasáhá cáchi na já xihín Pablo:

—Candehé, ñani i. Sa xini vahún ña cuahá ndivaha táhan na naquixi chichi Israel sa ndíco na íchi cuéntá Jesús viti. Ta tóco ndihi na cáchi na ña ndítahan caja na ña sáhdá ley Moisés.

²¹ Joo ñañehe ná tuhun ña xíca nuún jánahún nuú na Israel, na ndúu ñuu tóho ña co xini ñuhú ga caja na ña sáhdá ley Moisés ta ni marca cán co xini ñuhú chican ga na yiquí cuñu jahyi na. Ta jánahún na ña co ndítahan caja na costumbre najándacoo tásáhnu jícó yo nu yo.

²² Ta co xini nde ndía caja nde viti jáchi nditútú na ndúu Jerusalén yóho tá ná candaa ini na ña nacasaun yóho.

²³ Sahá ña cán quéa cája nde cuéntá ña vaha chága ná cajún ña cáchi nde yóho: Cañehún comí ta ndúu tañu nde yóho já ná cùhun na xuhun. Jáchi sa naxinu coo quivi caja ndícomí da yóho ña nasahan da tuhun da nu Ndióxi caja da.

²⁴ Ná cùhún xihín dá já ná ndaja viún mún xihín dá tá quiahva sáhdá ley Moisés ta já ná chahvún nuú jatá jini dá. Ta xihín ña yóho cuni na Israel ña a juú ña ndaa cúu tóco ndihi tuhun cáhan ihvi na sahun. Ta xihín ña yóho cuni na ña cája tá cajún ña sáhdá ley Moisés.

²⁵ Ta sahá na tóho, na cúu cuéntá Jesús, sa nacahyí nde in carta cuahan nu ná ña ná a jándihí na mé ná caja na ley Moisés. Joo ñacachi nde xihín ná ña ná a cáxi na cuñu quíti, rí najoco na nuú tñiñu yúu. Ta ná a cáxi na ñi ta ni ná a cúxu na cuñu quíti, rí nasahnú. Ta ná a cóo na xihín ta a ñaha, na co cúu yí ná a ñajihí na. Ña yóho cúu tuhun nacahyí nde nu carta cuahan nuú na tóho —ñacachi na sacuahá cán xihín Pablo.

²⁶ Anda já ñaquehe Pablo ndícomí dataa cán ndáca da cuahan xihín dá. Ta inga

quíví itaan já nandaja vií da mé dá nu Ndióxi ta nandivií ndícomí da cán viti. Ta tá nandihí já naquihvi da veñuhu ña caxi tuhun da xihín ná ndá quíví xinú coo ña ndivií na já ná cuu joco in in da cán ñaha nu Ndióxi.

Tín na Pablo veñuhu cáhnu ñuu Jerusalén cuahán da vecaa

²⁷ Tá ja chá xinú coo quíví usa já naxinu coo java da Israel, da naquixi chí estado cuéntá Asia. Ta tá naxini na cán ndácaan Pablo ini veñuhu cáhnu cán já najándivaa na ñayivi já ná ndicuíta na caja xíxi na xihín dá.

²⁸ Ta ñacasáhá cáyuhú na nuú ñayivi já cáchí na já xihín ná:

—Candehé ndó, na Israel. Caja ndó ñamaní chindeé ndó ndehe xihín da yóho jáchí níí cúú nu xíca da yóho cáhan núu da sahá ñayivi Israel ta jánahá da ñayivi ña co ndítahan nu ná candúsa na ley Moisés ta ni co ndítahan nu ná caja cáhnu na veñuhu cáhnu ndácaan Jerusalén yóho. Ta viti cája núu chága da jáchí janda java da tóho, da ñuu Grecia najáquihvi da veñuhu í ta jáyuxu da veñuhu yíi yóho xihín da tóho jan —cáchí ña.

²⁹ Tóco ndihí ña yóho ñacachi taa Israel naquixi Asia cán xihín ñayivi jáchí ñacahán da ña najáquihvi Pablo cán da naní Trófimo, da tóho ñuu Efeso ini veñuhu joo a juú a já. Ñacahán na já jáchí naxini na ndáca táhan Trófimo xihín Pablo xíca nuu da ñuu Jerusalén cán.

³⁰ Xihín ña ñacachi da naquixi Asia yóho nandivaa tóco ndihí ñayivi ñuu Jerusalén já xínu na naxinu coo na natiin na Pablo. Já ñúhu na da ñatavá na da jatá veñuhu cán ta ivi laá ñachicaji na yéhe veñuhu cán.

³¹ Chí ndúcú na cahní na da joo da cúú jefe soldado cán ñañehe dá tuhun ña nandivaa ndihí ñayivi ñuu Jerusalén cán.

³² Anda já najátaca da cúú jefe soldado xihín java ga da náhnu já xínu da naxinu coo da nu ndivaa ñayivi cán. Tá naxini ñayivi cán vaxi da cúú jefe soldado cán xihín java soldado já najáyaá ñahá na chí co cáni ga na Pablo.

³³ Anda já ñacayati da cúú jefe soldado cán nu Pablo já natiin da da cuhun da

vecaa. Ta ñasahnda da chuun ña ná cató na da xihín ivi cadena. Tá nandihí já ñacasáhá ndáca tuhún da ñayivi ña ndá da cúú da yóho ta ndía ñacaja da.

³⁴ Joo sa jíin sa jíin tuhun cáyuhú in in ñayivi cán. Sahá ña cán quéa coo ñacuu candaa ini da cúú jefe soldado cán ndá cuachí quéa jácojo na jata Pablo jáchí a juú quiahva ndivaa na cán ndúu na. Sahá ña cán quéa ñasahnda mé jefe soldado cán chuun ña ná cañehe na Pablo vehe nu ndúu soldado.

³⁵ Ta tá naxinu coo na cán ñacahán na ndaa na cuani vehe soldado cán xihín Pablo joo coo ñacuu ndaa na jáchí chí cándihí táhan ñayivi cúni na caní na Pablo. Sahá ña cán quéa ñasajocó soldado cán Pablo já ndaa na cuani vehe soldado cán xihín dá.

³⁶ Ta tóco ndihí na cán cáyuhú cóho na ndícaa na jata soldado já cáchí na já:

—Cahní ndó da. Ná quivi da —cáyuhú na.

Ndíquehe Pablo saha mé dá nuú ñayivi cán

³⁷ Ta tá sa ndúcú na jáquihvi na Pablo ini vehe soldado cán já ñacachi Pablo já xihín da cúú jefe soldado cán:

—Á quiahva ndó ñamaní nuú i ná cahan i ivi johó tuhun xihín ñayivi yóho.

Anda já nanducú ñehe da cúú jefe soldado cán tuhun nu Pablo já ñacachi da já:

—Á tiahvún cahún tuhun griego, dá já.

³⁸ Á a juú toho yóhó cúú da naquixi nación Egipto viti chá va, da najácahan ñayivi ná ndicuíta na caní táhan na xihín gobierno ta ñasandaca da comi mil da sáhní ndii ñasahan da chí yucú íchí nuú coo ñayivi. Á a juú toho yóhó cúú mé da cán —ñacachi da cúú jefe soldado cán xihín Pablo.

³⁹ Anda já nanducú ñehe Pablo tuhun nu dá já ñacachi da já:

—Jíin va cúú yehe jáchí cúú u in da naquixi chichi Israel ta ñacacu u ñuu Tarso, in ñuu cáhnu ndácaan estado Cilicia. Ta viti á cuu quiahva loho ndó ñamaní nuú i ná cahan i ivi tuhun xihín ñayivi yóho —ñacachi Pablo xihín da cúú jefe soldado cán.

⁴⁰ Anda já ñasahan da cán ñamaní nu Pablo ña ná cahan da xihín ñayivi. Anda

já nandaca ndichi Pablo nuú cuani vehe cán já nandiñehe da ndáha dá nu ná já ná catáji yúhu ná. Ta tá sa nacatáji yúhu ná já nacasáhá cáhan da tuhun hebreo xihín ná.

22

¹ Já nacasáhá Pablo cáchí da já xihín ná:

—Cuni johó ndó nu cáhan i xihín ndóhó, na sacuahá xihín ñani i jáchi cúni ndiquehe e sahá i viti —nacachi Pablo xihín ná.

² Tá naxini johó na cán ña cáhan Pablo tuhun hebreo, mé tuhun cáhan mé ná já nacatáji chága yúhu ná. Anda já nacachi Pablo já xihín ná:

³ —Yehe cúu u da naquixi chichi Israel. Ta nacacu u ñuu Tarso ndácaan estado Cilia. Joo nasahnu u ñuu Jerusalén yóho ta mé yóho najacua vi xihín in da naní Gamaliel. Ta tá quiahva sáhdá ley Moisés, ña nasacu vaha tásáhnú jícó yo quiahva já nandíhi ini i cája i. Níi tiempo nandíhi ini i cája chúun i cuéntá Ndióxi xihín ndinuhu ini i tá quiahva cája mé ndó anda quivi viti.

⁴ Naxica nuu i cája xíxi i xihín na ndíco íchi cuéntá Jesús janda quiahva sáhní i na. Ta cuahá taa, ñáha viti naxica nuu i jataca i na ña ná cuhun na vecaa.

⁵ Ta xini vaha da cúu sacuahá nuú jutú xihín ndihi na sacuahá veñuhu ña cáhan i ña ndaa xihín ndo. Jáchi mé na yóho cúu na nacahyí tutu nasahan na nuú i já ná ndiquiahva i ña nuú ñaní, na naquixi chichi Israel ndúu ñuu Damasco cán. Ta nasahan i cán ndínducú u na cúu cuéntá Jesús ña cañehe e na quixi i ñuu Jerusalén yóho caja xíxi nde xihín ná.

Ndicani Pablo ndaja nacuu nandiquehe da íchi cuéntá Jesús

(Hch. 9:1-19; 26:12-18)

⁶ Joo nani xíca i íchi cuahan i tátuhun caxivi cáa tá sa yati xinu coo i ñuu Damasco cán já in cuití nandiyehé ndaa nu ín i ta mé a yóho naquixi a indiví.

⁷ Chí nandicava i nu ñúhu ta já naxini johó i in a cáhan xihín i já nacachi a já: “Saulo, Saulo ndá cuéntá quéa ndícuítún cája xísún xihín i”, nacachi a xihín i.

⁸ Anda já nacasáhá ndáca tuhún i já cáchí i já: “Ndá na cúu ndóhó ta ndaja naní ndo”, nacachi i xihín á. Anda já nanducú ñehe a tuhun nuú i já cáchí a já: “Yehe cúu Jesús,

da ñuu Nazaret ta xihín yehe ndícuítún cája xísún viti”, nacachi a cán xihín i.

⁹ Ta na cuahan xihín i cán nayihví na tá naxini na ña nandiyehé nu ín i cán. Joo coo naxini johó na ña cáhan xihín i cán.

¹⁰ Anda já nacachi i já xihín Jesús: “Cahan ndó xihín i, xitoho i ndía ndítahan caja i.” Anda jáví nacachi a já xihín i: “Candichi ta cuahán ñuu Damasco nu cáhún cuhun jan. Ta ñuu jan ndicani in da nuun ndía ndítahan cajún”, nacachi Jesús xihín i.

¹¹ Ta chí nacuaá nuú i nacaja ña nandiyihví cán. Sahá ña cán quéa jandá natiin ndaa na ndáca táhan i cán yehe cuahan nde janda quiahva naxinu coo nde ñuu Damasco cán.

¹² Ta mé cán nasahin in da naní Ananías, da cája ña sáhdá ley Moisés xihín ndinuhu ini da. Ta tóco ndihi na Israel ndúu Damasco cán cáhan na saha dá ña cúu dá taa vaha.

¹³ Ta mé Ananías yóho nasaa da naxito nihni da yehe. Já nacasáhá cáchí da já xihín i: “Saulo, ñani i candehé tucu viti.” Tá nacachi da já chí ivi laá nanuna nuú i já naxini i da.

¹⁴ Anda já nacachi da cán já xihín i: “Mé Ndióxi, ña nacaja cáhnú tásáhnú jícó yo, mé a cán quéa nacaxi a yohó já ná candaa inún ndá quéa sácú ini mé á caja xuhun. Ta nacaxi a yohó já ná cunún Jesús, mé a cája ndinuhu ña ndaa. Ta nacaxi a yohó já ná cuni johún nu cáhan Jesús.

¹⁵ Já quéa cuhún cahún saha mé á nu tóco ndihi ñayivi. Já ná ndicanún nu ná saha ña naxinún xihín ña naxini johún.

¹⁶ A candati chágún viti. Cuándaco. Cándéé inún Jesucristo viti chí cuahán candúta já ná ndoo cuachún, caja Ndióxi”, nacachi Ananías xihín i.

Ndicani Pablo ña naxindahá Ndióxi da cahan da tuhun vaha saha Jesús nuú na tóho

¹⁷ Tá nandíhi já nandicó coo i ñuu Jerusalén ta nasahan i veñuhu cáhnú cán caça tahví i nu Ndióxi. Ta nani xíca tahví i cán já naquixi tátuhun in sani nuú i vatí ndíta i.

¹⁸ Ta naxini i Jesús, xitoho i já nacachi a já xihín i: “Camún cuáqueún ñuu Jerusalén yóho jáchi a cándúsa toho na yóho tuhun vaha cahun saha i”, nacachi Jesús xihín i.

19 Anda já nanducú ñehe e tuhun nu Jesús já cáhí i já xihín á: “Candehé ndo, xitoho i. Sa xini vaha tóco ndihi ñayivi ña naxica nuu i ndijáá veñuhu tiin i na candeé ini ndohó ta já nacani i na ta nataán i na vecaa.

20 Ta sa xini na ña tá nasahní na Esteban, mé da naxica nuu cahan tuhun vaha saha mé ndó, in nasacuu u xihín na nasahní ñahá cán. Jáchi táhán ini i cándichi i ndáá i jahmá ñayivi cán nani sáhní na Esteban”, nacachi i xihín Jesús.

21 Anda já nacachi Jesús já xihín i: “Cuáqueún cuhun jáchi chindahá xícá i yohó cuhún cahún sahá i nuú ñayivi tóho, na coo naquixi chichi Israel”, nacachi Jesús xihín i —nacachi Pablo xihín na cán.

Cahan chaga Pablo xihín mé da cúu jefe nu ndíhi soldado

22 Nasanduu táji na Israel cán nani cahan Pablo xihín ná. Joo tá nacahan da sahá na tóho cán já nacasáhá cáyuhú na já cáhí na já:

—Cahní ndó da jan. Ná quivi da. Co ndítahan ga nu dá coo da ñuyiví yóho —cáhi na cán cáyuhú na.

23 Ta sahá ña ndúcú ndeé na cáyuhú na ta jáni na jáhma ná nu táchi ta janda ña yácá jácana nihni na nu táchi.

24 Sahá ña cán quea nasahnda da cúu jefe soldado cán chuun ña ná jáquihvi na Pablo cán ini vehe soldado. Ta tá nandihvi da já nasahnda da chuun ña ná jácaxáhan na da xihín churú ní já ná nahma da ndía nacaja da ta ndá saha quea ndícuíta ñayivi cán xihín dá.

25 Joo tá sa nacató na Pablo ta ndúcú na jácaxáhan na da já nacachi Pablo já xihín in soldado cán:

—Ta viti cahan ndó xihín i á núná nu ndo jácaxáhan ndó in da cúu taa romano tá camaní yii caja vii ndó saha dá tá quiahva sáhdá ley romano jáchi yehe cúu u da romano —nacachi Pablo xihín soldado cán.

26 Tá naxini johó da ña yóho chí ivi laa nasahan da cáxi tuhun da nu da cúu jefe soldado cán já cáhí da já xihín dá:

—Cuénta vaha coo ndó ta coto a cája xíxi ndó xihín da jan jáchi cúu dá taa romano —nacachi in soldado cán.

27 Anda já nacayatí da cúu jefe soldado cán nu Pablo já nacasáhá ndaca tuhún ñahá da já cáhí da já:

—Á ndaa cúun taa romano —cáhi da.

—Ajan, taa romano cúu u —nacachi Pablo xihín dá.

28 Anda já nacasáhá cáhí mé da cúu jefe soldado cán já xihín Pablo:

—Yehe nachahvi i cuahá ndivaha jjuhún já nacuu nanduu u in taa romano —nacachi da cán xihín Pablo.

Ta já cáhí Pablo já xihín dá:

—Joo yehe cúu u taa romano jáchi já nacacu u —nacachi Pablo.

29 Tá naxini johó na cúni jácaxáhan Pablo cán ña yóho chí nayihví na já nacasáhá xíca játá na cáxoo na nu dá. Ta janda mé da cúu jefe soldado cán nayihví da jáchi sa ñatiin na da vatí cúu dá taa romano.

Ndíquehe Pablo saha mé dá nuú na sacuahá Israel

30 Ta inga quivi itaan ñatavá da cúu jefe soldado cán cadena nasandico ndáha Pablo. Ta sahá ña cúni da cán candaa ini da ndá cuachi quea jácojo na jata Pablo sahá ña cán quea najátaca da na sacuahá nuú jutú xihín na sacuahá Israel. Anda já ñehe da Pablo já nasacu da da nuú na cán.

23

1 Anda já nasandehé Pablo nu tóco ndihi na sacuahá nuú na Israel cán já nacasáhá cáhí da já xihín ná:

—Candehé ndo, ñani i. Janda jihna ta janda quivi víti cája i ña cúni Ndióxi ta xini mé á ndaja ndacaan jiní i —nacachi Pablo.

2 Joo da cúu sacuahá nuú jutú naní Ananías cán nasahnda da chuun nuú na ndíta yati xihín Pablo cán ña ná caní na jahndá yuhú dá.

3 Anda já nacachi Pablo xihín Ananías cán:

—Tá quiahva nacani na jahndá yuhú i quiahva já caní Ndióxi yohó, da coo cúu tá quiahva ndáa da. Íun jan ndaja ndíchún yehe jáchi jácojo na cuachi jatá i ña coo sácú vaha i ley. Joo yóho nandava ndojún ña sáhdá ley jáchi nasahndún chuun ña ná caní na yehe —nacachi Pablo xihín Ananías cán.

4 Andá já nacasáhá na ndúu cán cáhan na xihín Pablo já cáchí na já xihín dá:

—Cuéntá coún jáchi cánahún xihín da cúu jutú sacuahá chága nu ndíhi jutú cuéntá Ndióxi —nacachi na xihín Pablo.

5 Andá já nacachi Pablo já:

—Cáhnú coo ini ndó, ñani i jáchi co xíní toho i ña cúu da jan jutú sacuahá chága nu ndíhi jutú cuéntá Ndióxi. Mé tuhun Ndióxi sáhdá chuun já cáchí a já: “A cánahún xihín da cómí chuun sahá ñuu ndó” —nacachi Pablo.

6 Tá nandíhi já nandícuni Pablo ña ndúu java na saduceo ta ndúu ri java na fariseo mé cán. Sahá ña cán quéa nacahan cóho Pablo já nacachi da já:

—Candehé ndo, ñani i. Yehe cúu u in da fariseo ta in fariseo nasacuu ri tátá i. Ta viti cája víi na yóho sahá i sahá ña cándúsa i ña vaxi quiví nditacu tucu ndii —nacachi Pablo.

7 Tá nacachi Pablo já ivi laá nandícuita na fariseo xihín na saduceo ndítuhún xihín táhan na já nasahnda java táhan na.

8 Jáchi na saduceo cán co cándúsa na ña vaxi quiví nditacu tucu ndii. Ta ni co cándúsa na ña ndúu táto Ndióxi. Ta ni co cándúsa na ña ín ínima ñayivi. Joo na fariseo cándúsa va na tóco ndíhi ña yóho.

9 Tóco ndíhi na cán cáyuhú na ndúu na. Sahá ña cán quéa nandaca ndíchi java na jánahá ley Moisés, mé na cuahan xoo na fariseo cán. Já nacasáhá cáchí na já xihín tóco ndíhi ñayivi cán:

—Coó toho cuachi ná caja da naní Pablo yóho. Jáchi ndá ínima yíi quéa nacahan xihín da yóho á tá coó ta ndá táto Ndióxi quéa nacahan xihín da yóho. Sahá ña cán quéa tá ná cahan ihví yó xihín da yóho cúu á tátuhun cáni táhan í xihín Ndióxi —nacachi na jánahá ley Moisés xihín ná.

10 A juú quiahva nacasáhá ndívaá ñayivi cán sahá ña cán quéa nacasáhá yíhví da cúu jefe soldado cán ña tiahva náá tiin na Pablo ta jácuachi na da. Sahá ña cán quéa nasahnda da chuun ña ná quixi soldado tavá da Pablo tañu ñayivi cuaha cán. Ta já ná cañehe tucu na da cuhun da vehe soldado cán.

11 Ta ñuu inga quiví itaan já nacanáha nu Jesús, xitoho í nu Pablo ta nacahan xihín dá já nacachi a já:

—A ndícani inún, Pablo jáchi tá quiahva nacahún sahá i nuú ñayivi ñuu Jerusalén yóho quiahva já cahún sahá i nuú ñayivi ndúu ñuu Roma —nacachi Jesús xihín dá.

Sácú ini na Israel cahní na Pablo

12 Ta inga quiví itaan já najándique táhan java na Israel tuhun na ña cahní na Pablo. Ta nacachi na a cúxu na ta ni ticuú a cóho na janda quiahva ná cahní na Pablo. Ta nacachi xihín táhan na ña cuhun cháhan jata ndá da naxixi á naxihi ticuú nani tácu Pablo.

13 Ta yáha ga nuú ivi jico taa cúu da najándique táhan tuhun caja ña yóho.

14 Tá nandíhi já naquee na nasahan na cahan na xihín da sacuahá nuú jutú cán xihín na sacuahá nuú na Israel cán já nacachi na já xihín ná:

—Tóco ndíhi nde najándique táhan nde tuhun nde cahní nde Pablo. Ta nachicaan nde cháhan jata ndá da ná cuxu nani tácu Pablo.

15 Sahá ña cán quéa caja ndó ñamaní jándique táhan ndó tuhun ndó xihín java ga na sacuahá jan já ná cahan ndó xihín da cúu jefe soldado já ná cañehe tucu da Pablo quixi da nu ndo. Ta cahan loho ndó xihín dá ña cúní ndó caja víi cuéé chága ndó sahá ña nacaja Pablo. Já va cachi ndó xihín da cúu jefe soldado cán ta ndehe canduu tiahva nde cahní nde da tá ná quixi da íchi —nacachi na xihín na sacuahá cán.

16 Joo in taa loho, da cúu jaxi Pablo nañehe dá tuhun ña sácú ini na cahní na Pablo sahá ña cán quéa xínu da nasahan da cáxi tuhun da nu Pablo vehe soldado cán.

17 Tá nandíhi nandícani taa loho cán ña yóho nu Pablo já nacana da in táhan da cúu soldado cán já nacachi da já xihín dá:

—Cajún ñamaní candacún da loho yóho ná cuhun da nuú da cúu jefe nu soldado. Jáchi ín tuhun cúní da yóho cahan da xihín da cán —nacachi Pablo xihín dá.

18 Andá já ndáca soldado cán da cúu jaxi Pablo nasahan da nuú da cúu jefe soldado cán já nacachi da já xihín dá:

—Da naní Pablo ndácaan vehe soldado naxica da ñamaní nuú i ña ná candaca i da

loho yóho quixi i ñehé e da jáchi ín tuhun cúni da cahān da xihin ndo —ñacachi da.

¹⁹ Anda já natiin jefe soldado cán ndahá taa loho cán já natavá xóo da da já ñacasáhá ndáca tuhun ñahá da já ñacachi da já xihin dá:

—Ndía cúnun cahún xihín i —ñacachi da.

²⁰ Anda já ñacasáhá taa loho cán cáxi tuhun da já ñacachi da já:

—Najándique táhan na Israel tuhun na ña caca na ñamani nu mé ndó ña ná cañehe tucu ndó Pablo nuú na sacuahā nuú na Israel cán ña cavií vaha chága saha dá.

²¹ Joo a cándusa ndó caja ndó ña cúni na jáchi yáha chága nuú ivi jico taa ndáti jehé na íchi ña cahní na Pablo. Ta nandique táhan tuhun na ña a cúxu na ni a cóho na ticuú janda quiahva ná cahní na Pablo. Ta viti ndáti na candehé na á caja ndó ña cúni na —ñacachi jaxi Pablo cán xihín da cúu jefe soldado.

²² Ta tá nandihí já ñacachi da cúu jefe soldado cán xihín dá ña ná a ndícani da nuú ni in ñayivi sahá ña sácú ini na Israel caja na xihín Pablo. Chí ñaquee da loho cán cuahān da.

Chíndahá na Pablo cuahān da nuú gobernador nani Felix

²³ Anda já ñacana jefe soldado cán ivi da sáhdá chuun nuú soldado ta ñasahnda da chuun nu dá ña ná caja tiahvā da ivi ciento soldado táhan da xíca sáhá xihín uní jico uxu soldado táhan da cándójó cuáyí. Ta ñatahnda chuun nu dá ña ná caja tiahvā da inga ivi ciento táhan da ñeñe lanza já ná candaca na Pablo cuhūn da ñuu Cesarea cán. Ta ná quee na cuhūn na tátuhun caa in sacuaá.

²⁴ Ta ñasahnda da chuun ña ná caja tiahvā na cuáyí canúu Pablo cuhūn da. Ta ñasahnda da chuun ña ná candaa vaha na Pablo já ná cuu xinū coo vaha da nuú da cúu gobernador nani Felix ñuu Cesarea cán.

²⁵ Ta ñachindahá da in carta cuahān xihín ná já ná ndiquiahva na ña nuú da cúu gobernador cán ta ña yóho cúu mé tuhun ñacahyi nu carta cán:

²⁶ “Yehe cúu Claudio Lisias ta chíndahá i carta yóho nu ndo, tá Felix. Ta nu carta

yóho cáhan Ndióxi yehe xihín ndo, da cúu da cáhnu ñuu Cesarea cán.

²⁷ Candehé ndo, tá Felix. Chíndahá i da yóho nu ndo jáchi natiin na Israel da ta ndúcú na cahní na da. Joo tá ñacandaa ini i ña cúu dá da romano já ñasahān i xihín java soldado ta ñacandaa nde da ndáha na cán.

²⁸ Ta sahá ña cúni candaa ini i ndá cuachi jácojo na jata dá sahá ña cán quéa ñasañehe e da ñasahān i nuú na sacuahā nuú na Israel cán.

²⁹ Já ñacandaa ini i ña jácojo na cuachi jata dá saha ley mé va na. Ta sahá ña coo cuachi ñacaja da nu mí sahá ña cán quéa coo ñaxeen nde ña ná cahní na da ta ni janda vecaa co cáni nu dá cuhūn da, cáhān i.

³⁰ Joo ñacandaa ini i ña sácú ini na Israel cahní na da sahá ña cán quéa chíndahá vaha i da nu mé ndó. Ta ñacachi i xihín na xójo ini xihín dá ña ná saa na nu mé ndó cacu na saha dá ndía ndóho na xihín dá. Ña yóho cúu ndihí ña cáhan i xihín ndo, tá Felix. Ndióxi ná coo xihín ndo”, cáchí carta cuahān xihín Pablo.

³¹ Ta ñacaja mé soldado cán tá ín ñatahnda chuun nu dá. Ta já ñeñe ñuu na Pablo ñasahān na janda ñuu Antípatris.

³² Ta inga quiví itaan já nandicó coo java soldado, da ñasahān sáhá cán chí vehe soldado. Joo java da cándójó cuáyí cán cáthān yíi dá xihín Pablo cuahān da.

³³ Ta tá ñaxinu coo da ñuu Cesarea já nandiquiahva da carta cán nuú da cúu gobernador. Ta nandiquiahva ri da Pablo nuú da cán.

³⁴ Ta tá sa nandihí ñacahvi da cúu gobernador carta cán já ñacasáhá ndáca tuhūn da Pablo saha ndá ñuu ñaquixi da. Ta tá ñacandaa ini da ña cúu Pablo da ñuu Cilicia

³⁵ já ñacachi da já xihín dá:

—Janda quiahva ná xinū coo na jácojo cuachi jatun anda já caja vií i sahún —ñacachi Felix cán xihín Pablo.

Tá nandihí já ñasahnda da chuun ña ná candaa vaha na Pablo nani ndácaan da vechūun Herodes cán.

24

Ndíquehe Pablo saha mé dá nuú da cúu

governador naní Felix cán

¹ Ta tá sa nayaha uhun quivi já naxinu coo da cúu sacuaḥa nuú jutu, da naní Ananías cán. Naxinu coo da ñuu Cesarea xihín java ga na sacuaḥa ta ndáca da in da ndiquehe sahá na Israel naní da Tértulo. Tóco ndihi na yóho nacatáhan na nasahan na sácú na saḥa Pablo nuú gobernador cán.

² Ta tá nandihí já nasahan quehe na Pablo já naxinu da nuú ndihi na cán. Anda já nacasáhá Tértulo cán sácú da saḥa Pablo já nacachi da já:

—Ndíquiaḥva nde ndixahvi nu ndó, tá gobernador jáchi sahá ña ndíchí jini ndó cúu ndáa vaḥa ndó ndeḥe. Ta coo tandóho tañu nde ta tóco ndihi nde ndúu táji nde.

³ Ñayivi ndúu ndijáá ñuu íin toni ñuhú na xihín ndo ta ndíquiaḥva na ndixahvi nu ndo, tá Felix jáchi cája cuaha ndó ñamaní xihín nde.

⁴ Ta viti co cuni nde jáquihvi nde ndohó joo caja ndó ñamaní cuni johó loho ndó ña cuni nde caḥan nde xihín ndo yóho.

⁵ Candehé ndo, tá Felix. Nanditahan nde da naní Pablo yóho xica nuu da jáquihvi da ñayivi. Ta ní cúu xica nuu da sáhdá java táhan da ñayivi naquixi chíchi Israel. Ta mé Pablo yóho cúu dá jini nuú in táhdá ñayivi, na naní nazarenos.

⁶ Ta jivi mé da yóho nanducú da jáyuxu da veñuhu cáhnu nde ndácaan ñuu Jerusalén cán. Sahá ña cán quéa natiin nde da ta nanducú nde caja vii nde saḥa dá tá quiaḥva sáhdá ley mé nde caja nde.

⁷ Joo da cúu jefe soldado, da naní Liasis cán naquihvi da tañu nde ta xihín ña tóyí nacandaa da Pablo ndahá nde.

⁸ Ta nacachi da xihín nde ña ná quixi nde caḥan cuachí nde nu mé ndó saḥa Pablo. Ta viti, tá Felix cuu ndaca tuhún ndó Pablo jan ta já nahma mé va da nu ndo. Ta xihín ña yóho cuu candaa ini ndó ña ndaa caḥan nde sácú nde saḥa dá nu ndo —nacachi Tértulo cán xihín Felix.

⁹ Ta jári na Israel ndúu cán nacachi na ña jivi ndusa ña ndaa queá.

¹⁰ Anda já nandínehe gobernador cán ndáha dá ña ná caḥan Pablo. Ta já cáchi Pablo já:

—Cáji ini i ndiquehe e sahá i nu mé ndó, tá Felix jáchi sa cuahá cuia cája vii ndó saḥa ñayivi Israel.

¹¹ Tá ná ndaca tuhún ndó ñayivi yóho já candaa ini ndó ña sa íin uxu ivi quivi naxinu coo i ñuu Jerusalén caja cáhnu i Ndióxi.

¹² Ta ni in tuhún toho ñayivi co ndítuhún ihvi yeḥe xihín. Ta ni in tuhún toho ñayivi coo najándinihi i veñuhu cáhnu ndácaan Jerusalén cán. Ta ni na táca veñuhu válí ta ni na táca cáyé ñuu Jerusalén cán coo najándinihi i.

¹³ Ta na jácojo cuachi jatá i yóho a cúu caja na nahá na nu mé ndó ña ndaa caḥan na saḥa i.

¹⁴ Ña cuni ndusa i caxi tuhun i xihín ndihi ndó quéa cája cáhnu i Ndióxi, mé a nacaja cáhnu tásáhnu jícó i tá quiaḥva najánaḥa Jesús caja í. Vatí cáchi na Israel yóho ña co xica i íchi ña ndaa. Joo cándusa i tóco ndihi ley nacahyí Moisés ta cándusa i ña nacahyí na profeta sanahá.

¹⁵ Ta tá quiaḥva cándusa na yóho quiaḥva já cándusa ri yeḥe va jáchi cándusa nde ña vaxi quiví nditacu tóco ndihi na sa naxihí. Coó caja toho á cúu ná na vaḥa á na quini.

¹⁶ Sahá ña cán quéa xini Ndióxi ña ndijáá ní quiví cája i ña vaḥa xihín ndinuhu ini i nu mé á xihín nuú ñayivi.

¹⁷ Sa íin chá cuia naxica nuu i java ga ñuu. Anda jáví nandicó coo tucu u ñuu Jerusalén ña quiaḥva i jihún nuú na Israel ta joco i nu Ndióxi ña ndítahan nuú i joco i nu á.

¹⁸ Ta nani cája i mé ña yóho ndácaan i veñuhu cáhnu Jerusalén cán já java da Israel, da naquixi chí estado Asia cán naxini da yeḥe nu ndácaan i ve ñuhu cán. Ta tá nandihí nandaja vii i mí i tá quiaḥva sáhdá ley cája nde, coo ñayivi cuaha nasanduu cán ta ni in tuhún toho na cán coo najándinihi i.

¹⁹ Ta na naquixi chí Asia cán, na cán va cúu na ndítahan cacu saḥa i nu ndo, tá Felix tá íin a ndóho na xihín i.

²⁰ Joo na ndúu yóho coo saḥa toho na cacu na saḥa i nu mé ndó. Á tá coo ná caḥan na tá nandínehe ná cuachi i tá nacaja vii na saḥa i nuú na sacuaḥa nuú na Israel cán, dá

já.

²¹ In túhún ña ñacaja i tá cajú vií ña yóho sahá i queá ñacayuhú u ta ñacachi i: “Cája vií ndó sahá i sahá ña cándúsa i ña vaxi quiví nditacu tucu ndii”, ña cán cúu ndihi va ñacachi i xihín ná —ñacachi Pablo cán xihín ña cúu gobernador cán.

²² Sa xini vaha Felix cán ndaja íin ña jánaha ña cúu cuéntá Jesús cán sahá ña cán queá cúní ña candati tóo da cajú vií ña saha Pablo. Sahá ña cán queá já ñacachi da já xihín ña Israel cán:

—Candati ndó janda quiahva ná casaa ña naní Lisias, ña cúu jefe soldado ñuu Jerusalén já cuu cajú vií i sahá ña yóho —ñacachi Felix.

²³ Tá ñandihí já ñasahnda Felix chuun nuú ña sáhdá chuun nuú soldado cán ña ná chicao tucu na Pablo vecaa. Ta ñasahnda ña chuun ña ná cajú vaha da xihín Pablo ta ná quiahva da ñamaní nuú ña xica xihín Pablo coto nihni na ña ña ná cajú ndíví ña nu dá.

²⁴ Tá ñayaha chá quiví já ñacasaa tucu Felix cán xihín Drusila, ñájihí ña, ña cúu ña Israel. ñacana tucu Felix Pablo ña ná quixi da ta ná ndicani da nu ná ndá quiahva cajú na ndiquehe na íchi cuéntá Jesús.

²⁵ Ta ñandicani Pablo nu ná ña ndítahan nu ná cajú na ña ndaa cuití va ta ndítahan nu ná cahnu ña nuú ña xica ini yiquí cuñu na cajú. Ta ñandicani Pablo nu ná ña vaxi quiví cajú vií Ndióxi sahá cuachi ñayivi. Andá já ñayihví Felix cán já ñacachi da já xihín Pablo:

—Cuáhán viti. Tá núná nuú i já cana tucu u yohó quisún —ñacachi Felix xihín Pablo.

²⁶ Mé Felix yóho ndáti da quiahva Pablo jjuhún nu dá já janí ñahá ña. Sahá ña cán queá cuahá ndivaha tañu ñacana da ña ndituhún ña xihín dá.

²⁷ Ta tixi iví cuia já cuití ñacaja da xihín Pablo janda quiahva ñandicojo ña naní Porcio Festo chuun cacuu da gobernador saá cán. Ta mé Felix cán coó ñaxeen da janí ña Pablo jáchi cúní ña candoo vaha da nuú ña Israel cán.

25

Ndiquehe Pablo saha mé dá nuú gobernador Festo

¹ Tá sa ñayaha uní quiví ñandicojo Festo chuun cúu dá gobernador já ñaquee da ñuu Cesarea cán ñasahan ña chí ñuu Jerusalén.

² Ta tá ñaxinu coo ña cán ñasahan ña sacuaña nuú jutú xihín java ga ña Israel, ña íin chága saha cañan cuachi ña saha Pablo nu Festo.

³ Ta ñamaní cáhnu ñaxica ña nu dá queá ña ná cahnda da chuun ná quixi Pablo chí ñuu Jerusalén yóho. Jáchi mé ña cán ñasacu ini na tiin na Pablo íchi cañí ña ña.

⁴ Joo coo ñacandúsa Festo cajú ña cúní ña sahá ña cán queá ñacachi da xihín ná ña ndáa vaha na Pablo ñuu Cesarea cán. Ta sahá ña sácú ini da cuhun yachi ña mé cán

⁵ sahá ña cán queá ñacachi da xihín ná já: —Ndá ña cúu ña sacuaña nu ndó jan xini ñuhú cuhun ña ñuu Cesarea xihín i já ná cuu cacu na saha Pablo tá íin cuachi ñacaja da —ñacachi Festo xihín ña Israel cán.

⁶ Ta ñasahiin Festo tátuhun uná á uxu quiví cuití va ñuu Jerusalén cán já ñandico coo tucu da chí ñuu Cesarea. Ta inga quiví itaan já ñasacoo da nu silleta nu sácúo ña cajú vií sahá ñayivi. Andá já ñasahnda da chuun ña ná cana na Pablo quixi da nu dá.

⁷ Ta tá ñaxinu coo Pablo nu Festo cán já tóco ndihí ña Israel, ña ñaquixi ñuu Jerusalén cán ñacava nuu na jata Pablo já ñacasahá jácojo cuaha ná cuachi ndeé jata dá. Joo coo ñeñe ná ndaja nahá ña nu Festo cán ña cañan ña ña ndaa saha dá.

⁸ Ta ñacasahá Pablo ndiquehe da saha mé dá já ñacachi da já:

—Ni in túhún toho cuachi coo ñacaja i xihín ley ña Israel ta ni xihín veñuhu cáhnu coo ñacaja i cuachi. Ta ni nuú ña cómi cuéntá sahá ñuu Roma coo ñacaja i cuachi —ñacachi Pablo xihín tóco ndihí ñayivi ndúu cán.

⁹ Ta sahá ña cúní Festo candoo vaha da nuú ña Israel sahá ña cán queá ñandaca tuhún ña Pablo já ñacachi da já:

—Á cándúsún cuhún ñuu Jerusalén já ná cajú vií i sañun cán —ñacachi da xihín Pablo.

¹⁰ Andá já ñanducú ñeñe Pablo tuhun nu dá já ñacachi da já:

—Uñun. Coó saha cúu á cuhun i ñuu Jerusalén jáchi viti ñuhú cándichi i nu mé

ndó ta cúú ndó gobernador romano. Ta mé ndó ndítahan nuu caja vií sahá i jáchi sa cándaá cáxí ini ndó ña coó cuachi toho ñacaja i xihín na Israel jan.

11 Joo tá ñacaja ndusa i cuachi, mé a ndaa co yíhví toho i quivi i sahá cuachi i. Joo a juú toho ña ndaa cúú tóco ndihi cuachi jíquí jácojo na Israel jan jatá i sahá ña cán quéa co ndítahan nu ndó ndiquiahva ndó yehe nuú na yóho. Ta viti xíca i ñamaní nu ndó ña ná chindahá ndó yehe ná cuhun i nuú emperador ñuu Roma ná caja vií mé dá sahá i —ñacachi Pablo xihín Festo cán.

12 Tá ñandihí já ñanditúhún Festo cán xihín na sacuaḥa cája chúun nu dá cán ndaja ndítahan coo caja da. Anda já ñacachi tucu Festo cán já xihín Pablo:

—Vaha dá já. Nu emperador ín ñuu Roma ñacachún cuhun cúnun. Ta cán cuhun cavií sahún —ñacachi Festo xihín Pablo.

Tá ín Pablo nu rey Agripa

13 Tá ñayaha chá quiví já ñaxinu coo in rey naní Agripa xihín ña naní Berenice ñuu Cesarea cán coto nihni na Festo.

14 Ta ñasanduu na chá quiví xihín Festo cán. Ta nani ndúu na cán ñandicani Festo nu rey Agripa ndaja cáa ña ndóho Pablo já ñacachi da já xihín dá:

—Ini vechúun yóho ndácaan in da naní Pablo ta anda tá ñasacuu Felix gobernador já ñatiin na da.

15 Ta tá ñasahan i ñuu Jerusalén já sácú na sacuaḥa nuú jutú xihín na sacuaḥa nuú na Israel sahá dá ña ná quivi da caja i.

16 Anda já ñanducú ñehe e tuhun nu ná ña co sáhan ley ñuu Roma ñamaní ña cahní na ñayivi tá coó na sácú sahá dá ndíta nu táhyí da já ná cuu ndiquehe da sahá dá nu ná.

17 Sahá ña cán quéa tá ñandai cuu na Israel cán ñuu Cesarea yóho já ñandihí ini i já ñasahan i nasacoo i inga quiví itaan nu sácú na caja vií sahá ñayivi. Já ñasahnda i chuun ña ná cañehe na Pablo quixi da nuú i.

18 Tá ñaxinu coo na cán sácú na sahá dá coó ñasacu na cuachi cáhnu sahá dá tá quiahva cáhán i.

19 Joo cáhí na ña co cúní da cándúsa da tá quiahva cándúsa mé ná. Ta sácú na sahá

dá jáchi xíca da jánaḥa dá saḥa Jesús, mé a ñaxihí jihna. Joo jánaḥa Pablo ña tácu yíi va mé Jesús.

20 Ta sahá ña co cándaá ini i ndaja caja i caja vií i sahá ña yóho sahá ña cán quéa ñandaca tuhún i Pablo ña á cándúsa da cuhun da ñuu Jerusalén caja vií i saḥa dá.

21 Joo ñacachi da xihín i ña cúní da cavií saḥa dá nuú da cúú emperador naní Augusto, da ín ñuu Roma cán. Sahá ña cán quéa ñasahnda i chuun ña ná cándaá vaha na da janda quiahva ná cuu chindahá i da nuú emperador já ná caja vií da cán saḥa dá —ñacachi Festo xihín rey Agripa cán.

22 Anda já ñacachi rey Agripa cán já xihín Festo:

—Cúní ri yehe va cuni johó i ndá quiahva cáhan da naní Pablo jan —cáhí Agripa.

Anda já ñacachi Festo já xihín dá:

—Itaan já cuni johún nuú cahan da —cáhí Festo.

23 Ta inga quiví itaan ñaxinu coo rey Agripa xihín Berenice nu ín Festo cán. Ta ndíxi vaha ndivaha na ñandihí na xihín in yíco da cúú sacuaḥa nu soldado xihín ñataa ín saḥa ñuu cán. Ta tá ñasanduu na já ñasahnda Festo chuun ña ná cuhun na quehe na Pablo.

24 Ta tá ñasaa da nu ná já ñacachi Festo já:

—Mé ndó, rey Agripa xihín ndihi ndó, na ñataca ndúu xihín nde yóho. Candehé ndó da naní Pablo cándichi yóho. Cuahá ndivaha táhan na Israel, na ndúu ñuu Jerusalén xihín na ndúu ñuu Cesarea yóho sácú na sahá dá nuú i. Ta a juú quiahva ndúcú ndéé na cáhan na ña ndítahan quivi da caja i.

25 Joo yehe cáhán i ña co ndítahan toho nu dá quivi da jáchi coó cuachi cáhnu ná caja da. Ta sahá ña ñaxíca mé dá cavií saḥa dá nuú emperador Augusto ín ñuu Roma cán sahá ña cán quéa sácú ini i chindahá i da cuhun da cán cavií saḥa dá.

26 Joo co xíní ndía cahyí i nuú da cúú emperador ñuu Roma sahá cuachi sácú na saḥa dá. Sahá ña cán quéa ñasani ndichí i da nuú ndihi ndó xihín nu mé ndó rey Agripa já ná ndaja ndichí ndó da já ná ñehe ín i ndáa cahyí i nu carta chindahá i nu emperador ñuu Roma cán.

²⁷ Jáchí coó saha cúú á chindahá i da ñuu Roma tá a cuú cahyí i ndá cuachi jácojo na jatá dá —nācachi Festo xihín nā cán.

26

Ndiquehe Pablo saha mé dá nu rey Agripa

¹ Anda já nācachi rey Agripa cán já xihín Pablo:

—Viti va sahan nde ñamaní nuun ndiquehún sahun.

Anda já nandinehe Pablo ndáha da já nacasáhá cáchí da já:

² —Cájji íní i ña cuu ndiquehe e saha mí i nu ndó, rey Agripa jáchí a juú quiahva cuahá cuachi jíquí jácojo nā Israel jatá i.

³ Cájji íní i cáhan i nu mé ndó, rey Agripa jáchí cándaā vaha ini ndó ndaja íin costumbre nā Israel. Ta cándaā ini ndó ndá ñaha quéa ndítuhún táhan nde saha. Saha ña cán quéa xíca tahví i nu ndó ña ná caja ndó ñamaní cáhnu coo ini ndó cuni johó ndó ña cáhan i xihín ndo yóho.

⁴ Tóco ndihi nā Israel xíni vaha na ña nācāja i tá nasacuu u da tacú. Ta anda viti xíni nā yehe ta xíni nā ña nācāja i ñuu i xihín ñuu Jerusalén.

⁵ Ta xíni vaha na ña janda yúta i nasacuu u taa fariseo ta chí cuu ndicaní na nu mé ndó tá cuni na. Ta ndehe, nā fariseo cúú nde nā cája ley Moisés xihín ndinuhu chága ini nde a juú ga inga na.

⁶ Ta sahá ña cāndeé cáhnu ini i ña vaxi quiví jánditacu tucu Ndióxi tóco ndihi nā naxihí sahá ña cán quéa nā Israel yóho ñehe na yehe nacasaa nā caja víi nā sahá i nu mé ndó. Ta mé Ndióxi quéa nasahan tuhun a nu tásáhnu jíco nde ña nditacu tucu ndii.

⁷ Tóco ndihi ñayivi táhan nā naquixi chichi ndihuxu ivi jahyi Israel cán ndáti na cuni na nuú jáxinu coo Ndióxi nuú tuhun a. Saha ña cán quéa ñuu ta ndiví cája cáhnu na Ndióxi. Candehé ndo, rey Agripa. Saha ña cándúsa i tá quiahva cándúsa nā cán sahá ña cán quéa jácojo nā Israel cuachi jatá i viti —nācachi Pablo xihín rey Agripa.

⁸ Anda já nācahan Pablo xihín nā Israel ndúu cán já:

—Á mé a ndaa cándúsa ndó ña cuu caja Ndióxi ña nditacu tucu ndii —nācachi Pablo xihín nā Israel ndúu cán.

⁹ Anda já nācachi tucu Pablo xihín rey Agripa já:

—Yehe nācahan i jihna ña ndítahan caja xíxi i xihín nā cúú cuéntá Jesús, mé a naquixi ñuu Nazaret.

¹⁰ Saha ña cán quéa já nācāja i ñuu Jerusalén jihna. Ta nasahan i naxíca i ñamaní nuú nā sacuaḥa nuú jutú já ná quiahva na ñamaní nuú i caja i ña yóho. Ta tá nañehé e ñamaní já nataán cuahá i nā cúú cuéntá Jesús vecaa. Ta tá nasahní ñahá nā, cájji ini i sahá ña cája na já xihín ná.

¹¹ Ta cuahá tañu nācāja xíxi i xihín ná ña ná cáhan ihvi nā saha Jesús, mé a cāndeé ini na. Níi cúú veñuhu naxíca nuu i cája i já xihín ná. Ta janda ñuu tóho nasahan i nandicuita ñee e nā jáchí nasaxojo ndivaha ini i xihín ná.

Ndicani Pablo ndaja nandihvi da íchi cuéntá Jesús

(Hch. 9:1-19; 22:6-16)

¹² In tañu nañehé e ñamaní nuú nā cúú sacuaḥa nuú jutú ñuu Jerusalén ña ná cáhún i ñuu Damasco taán i nā cúú cuéntá Jesús vecaa. Saha ña cán quéa naquee e cuahan i.

¹³ Candehé ndó, rey Agripa. Nani xíca i cuahan i íchi cán cúú á tátuhun caxivi já naxini i nandiyihvi ndaa in ñúhu indiví ta yéhe chága ña a juú ga candii. Ta nācava nuu a jatá i xihín jatá da cāsahan xihín i cán.

¹⁴ Anda já nācuyu ndihi nde nu ñúhu ta já naxini johó nde in a cáhan tuhun hebreo já nācachi a já xihín i: “Saulo, Saulo ndá cuéntá quéa ndicuitún cája xísún xihín i. Candehé. Cája xísún xihín mé vún. Ña cájun xihín i cúú á tátuhun ña cája tindiQUI tá sání ndaa rí nu póyá”, nācachi a cán xihín i.

¹⁵ Anda já nacasáhá ndaca tuhún i já cáchí i já: “Yo cúú mé ndó cáhan xihín i.” Anda já nanducú ñehe a cán tuhun nuú i já nācachi a já: “Yehe cúú Jesús, mé a xíca nuún cája xísún xihín.

¹⁶ Ta viti cuahán ndacoo, candichi. Nanaḥa i mí i nuun já ná caja chúún cuéntá mí i viti já ná ndicanún nuú ñayivi ndaja cáa ña naxinún viti ta já ná ndicanún nu ná java ga ñaha janaḥa i nuun chága chí nuu.

¹⁷ Míi jácacu u yohó já ná a cáhni nā Israel yohó ni nā tóho a cáhni na yohó jáchí nu mé

na tóho cán chindahá i yohó cuhún cahún sahá i viti.

18 Ta jánahún nu ná ndaja caja na jándicoo na íchi naá ndivaha nu xica na viti. Jáchi ndítahan nu ná ndicaca na íchi mí i nu yehe ndivaha. Ta jánahún nu ná ña ná a ndíquiahva ga na mé ná ndahá tiñhá sacuahá. Ña ndítahan caja na queá ndiquiahva na mé ná ndáha Ndióxi ta ná caja na ña cúní mé á. Ta ndítahan candeé ini na yehe já ná caja cáhnu ini i sahá cuachi na. Ta já ná cuu in nduu na xihín na nacaxi i ñehe táhvi ña cúní Ndióxi quiahva nu na”, nacachi Jesús xihín i tá nasahan i íchi ñuu Damasco.

Ndicani Pablo sahá chuun cája da

19 Candehé ndó, rey Agripa. Coó nacaja sáa ini i. Jáchi nacaja i tá íin nasahnda Jesús nuú i caja i.

20 Sahá ña cán queá ivi laá nacasáhá cahán i tuhun vaha saha Jesús nuú ñayivi ñuu Damasco cán. Tá nandihí já naquee e nasahan i cahán i ña xihín na ndúu ñuu Jerusalén xihín na ndúu ndijáá ñuu estado Judea. Ta janda xihín na coó naquixi chichi Israel nacahan i saha Jesús. Ta nacachi i xihín ná ña ndítahan nu ná jándicoo na ña núu cája na ta ná ndicó coo na nu Ndióxi. Ta ndítahan caja na ña vaha já ná nahá ña mé a ndaa táhyí nandiquehe na íchi cuéntá Jesús.

21 Ta sahá ña yóho cuití natiin na Israel yehe nani ndacaan i veñuhu cáhnu ñuu Jerusalén ta viti ndúcú na cahní na yehe.

22 Joo Ndióxi nachindeé a yehe sahá ña cán queá coó najándihí na sahá i. Ta anda viti xica nuu i cahán i tuhun Ndióxi nuú ñayivi ta coó caja toho a á cúu ná na ndahví á cúu ná na íin cuahá saha. Ta tóco ndihí ña jánaha i nu ná coo cúu á ña quixi jiní mí i jáchi cúu á ña nacachi na profeta xihín ña nacachi Moisés coo.

23 Ta ña nacachi na cán queá vaxi quiví quixi Jesucristo ñuyiví yóho ta a juú quiahva jándoho na ini a. Ta cahní na ña ta tá nandihí jánditacu tucu a. Ta mé á cacuu ña nu cuití nditacu nuú tóco ndihí na sa naxihí. Ta mé á jánaha nuú ñayivi ndaja cuu cacu ndaa ínimá ná coo caja toho a á

cúu ná na Israel á cúu ná na tóho —nacachi Pablo xihín rey Agripa cán.

Cúni Pablo ná ndihvi Agripa íchi cuéntá Jesús

24 Tá nacatáji loho Pablo nu cahán da já nacayúhú cóhó Festo nu dá já cáhí da já:

—Nacatachi vún, Pablo. Nayaha ndivaha quiahva najácuahún sahá ña cán queá nacatachun —nacachi Festo cán xihín Pablo.

25 Anda já nacachi Pablo já xihín dá:

—Coó nacatachi toho i, tá Festo jáchi nd-inuhu ña ndaa cahán i xihín ndo.

26 Ta xíní vaha mé rey Agripa yóho ña cahán i ña ndaa. Ta coo yíhvi cahán i nu dá jáchi cándaa ini i ña xíní vaha mé dá ndá saha cahán i jáchi coo cúu á ñaha nayaha nuú jehé.

27 Ta viti cachi ndó xihín i, rey Agripa á cándusa ndó ña nacahan na profeta sanahá. Cája i cuéntá cándusa ndó ña nacachi na —nacachi Pablo.

28 Anda já nanducú ñehe rey Agripa cán tuhun já nacachi da xihín Pablo:

—Ja lóho cuití ta cavún jiní i ña ná nduu u cuéntá Jesús, nduu —nacachi rey Agripa.

29 Anda já nacachi Pablo já xihín dá:

—Á yachi á cuee coo caja toho a. Ña xica tahví i nu Ndióxi queá ná xinú coo mé ndó, rey Agripa xihín tóco ndihí na ndúu yóho cacuu ndó tátuhun mí i jáchi candeé cáhnu ini i Jesús vatí mé a ndaa coo cúní ña ná candico ndáha ndo tátuhun yehe —nacachi Pablo xihín dá.

30 Tá nandihí nacahan Pablo já nandaca ndichi rey Agripa cán xihín Berenice ta nandaca ndichi Festo xihín java ga na nasanduu coo xihín dá cán.

31 Já natavá táhan na ndítuhún na saha Pablo já cáhí xihín táhan na já:

—Coo ndítahan toho nuú da yóho quivi da jáchi coo cuachi ndeé ná caja da ta janda ni vecaa coo ndítahan ndacaan da —cáhí na.

32 Anda já nacachi rey Agripa cán já xihín Festo:

—Tá ná a cahán da yóho ña cúní da cavií saha dá nuú da cúu emperador ñuu Roma ta cuu janí vún da, nduu —nacachi Agripa cán xihín Festo.

27

Chíndahá na Pablo ñuu Roma

¹ Tá ñasacu ini na chindahá na Pablo ná cuhun dá chí nación Italia nu ndácaan ñuu Roma cavií saha dá já nandiquiahva na dá xihín java ga dá ndácaan vecaa cán nuú dá naní Julio, dá sáhdá chuun nu soldado cuéntá Roma. Mé Julio yóho cúú dá dá cómí cuéntá sahá in táhdá soldado naní Augusto. Ta tañu na cuhun xihín Pablo cán cuahan ri yehe, dá naní Lucas.

² Ta tañu nde cán cuahan ri dá naní Aristarco, dá ñuu Tesalónica, ña ndácaan estado Macedonia. Nandaa nde ini barco, dó ñaquixi chí Adramitio. Mé barco yóho cúú dó cuhun ndijáá ñuu válí ñúhu estado Asia cán. Cándójó nde barco cán cuahan nde.

³ Ta inga quiví itaan ñaxinu coo nde ñuu Sidón. Ta cán ñacaja vaha dá naní Julio cán xihín Pablo jáchi ñasahan dá ñamani nu Pablo ña ná coto nihni da ña xíní táhan xihín dá ndúu ñuu Sidón cán já ná caja ndíví na nu dá.

⁴ Ta inga quiví itaan já nandihvi tucu nde barco já ñaquee nde ñuu Sidón cán. Ta sahá ña vaxi tachi xoo nuú cuhun barco cán sahá ña cán quéa ñayaha nde xoo íti isla Chipre jáchi coo xícó cuahá tachi cán.

⁵ Naxojo cava nde anda inga xoo tañuhú ta já ñayaha nde in xoo estado Cilicia xihín estado Panfilia. Anda já ñaxinu coo nde ñuu Mira ndácaan estado Licia.

⁶ Mé ñuu Mira cán nandíñehé dá sáhdá chuun nu soldado cán in barco, dó ñaquixi chí Alejandría ta cuhun do chí Italia. Ta najánda da ndehe jata dó cán já ñaquee tucu nde cuahan nde.

⁷ Cuéé vaha va cuahan nde ta nandoho chá ini nde cuahan nde sahá ña cán quéa cuahá quiví ñacaja nde janda quiahva ñaxinu coo nde ñuu Gnido. Ta sahá ña xícó ndivaha tachi xoo nuú cuhun nde cán sahá ña cán quéa nandijama nde nuú cuhun nde. Ta já ñayaha nde inga xoo isla Creta nuú ñayaha nde ñuu Salmón.

⁸ Cuéé ndivaha cuahan nde já yaha nde yati yuhú tañuhú isla Creta cán. Anda jáví ñaxinu coo nde nuú coo vaha barco naní Puerto Vaha yati ñuu Lasea.

⁹ Sa ñayaha cuahá quiví ta ñacacuáchi nde. Ta iyo ndivaha cáa cuhun nde xihín barco jáchi ñacayati tiempo vixi. Sahá ña cán quéa ñacahan Pablo xihín ndihi na cán já cáchi dá já xihín ná:

¹⁰ —Candehé ndo. Cája i cuéntá iyo ndivaha cáa cohó xihín barco jáchi cuu ndihi saha barco xihín ña ndójo dó cuahan do. Ta janda mí cuu quiví —ñacachi Pablo xihín ná.

¹¹ Joo coo ñaxeen dá sáhdá chuun nuú soldado cán cuni johó da nu cáhan Pablo. Ñacandúsa chága dá nuú ñacahan dá ñehe barco xihín dá xíñaha barco a juú ga nuú ñacahan Pablo.

¹² Ña ñacachi na quéa a cuú candoo na yóho tiempo vixi jáchi xícó ndivaha tachi. Ta tóco ndihi na ñacachi na ña vaha chága ná cuhun nde. Tiahva náá jana quee vaha nde xinú coo nde janda ñuu Fenice cáhan na. Mé ñuu Fenice cán ndácaan isla Creta ta coo xícó ndeé nahá tachi cán. Sahá ña cán quéa ñasacu ini na canduu na cán tiempo vixi.

Tá ñaxicó ndivaha tachi nuú tañuhú

¹³ Tá nandihí já ñacasahá vitá uun xícó tachi sahá ña cán quéa ñacahan na ña cuu va quee nde cuhun nde. Anda já ñaquee nde cuahan nde yati yuhú isla Creta cán xíca nde cuahan nde.

¹⁴ Joo tá nandihí já ñaxinu tachi ndeé jata barco. Mé tachi ndeé cán vaxi a chí xoo norte xihín chí nu cána candii.

¹⁵ Ta ñacasahá ñúhu mé tachi ndeé cán barco cuahan do. Ta sahá ña coo ñacuu caja nde jándicaca nde barco cán xoo nuú vaxi tachi sahá ña cán quéa ñasahan nde ñamani ña ná cañehe a barco cuhun do tá quiahva cúni tachi.

¹⁶ Tá nandihí já ñayaha nde jata in isla loho naní Clauda. Ta mé cán coo ñaxicó nahá tachi ndeé. Anda já ñacasahá nde jánda nde lancha loho, dó jítá barco cáhnu cán. Joo nandoho chá ini nde já ñacuu najánda nde do jata barco cáhnu cán.

¹⁷ Tá nandihí já ñacava nuu na rieta jata mé barco cáhnu já ná coo tóyí do. Tá nandihí já najánuu na jáhma cáhnu sándaca barco cán ña ná cañehe mé tachi do. Ñacaja na ña yóho jáchi yíhví na xinú coo barco

xoo naní Sirte nu yáji tañuhú ta cán cuu cachihin dó ñuti.

18 Ta chí coo nasacuiin tachi ndeé nahá cán inga quivi itaan sahá ña cán quea nacasahá na jácana nihni na ñaha ndójo barco cán ini tañuhú já ná ndicama dó.

19 Ta tá naxinu quivi uni janda mé nde viti nacasahá nde jácana nde ña sácaja chúun barco cán ini tañuhú já ná ndicama chága do.

20 Ta tixi cuahá ndivaha quivi coo naxini nde nuú candii ta ni quimi co tívi. Ta javi nacuun quini ndivaha dó ta a juú quiahva naxico ndivaha tachi. Sahá ña cán quea chí nasahnda vaha ini nde: “Yóho quivi viti”, nacañan nde.

21 Cuahá ndivaha quivi nayaha ta ni in nde co cuni cuxu. Sahá ña cán nandaça ndichi Pablo tañu tóco ndihi na cán já nacasahá cáchi da já:

—Tá ná coo johó ndó tá nacañan i xihin ndo ta ná candoo í ñuu Creta, nduu. Ta ni a ndóho í ña ndóho í yóho viti ta ni a tívi toho ndihi ñaha nasandojo barco yóho, nduu. Joo coo naxeen ndó candúsa ndó ña nacañan i xihin ndo.

22 Joo cáchi i xihin ndó viti ña co ndítahan ndicani ini ndó. Jáchi ni in túhún toho ndó a quivi vatí mé barco ndihi saha do.

23 Jáchi yehe cúu u cuéntá Ndióxi ta cája cáhnu i mé á. Ta mé ñuu janda véhe nanaha in tátó Ndióxi mé á nuú i.

24 Ta já nacachi a já xihin i: “A cáyihví tohún, Pablo. Jáchi ndítahan xinun tá xinun nuú da cúu emperador ñuu Roma cán. Ta saha yóhó jácacu ri Ndióxi tóco ndihi na ñuhu xuhun ini barco jan já ná a quivi na ini tañuhú”, já nacachi tátó Ndióxi xihin i.

25 Sahá ña cán quea a ndicani ga ini ndó jáchi cándeé cáhnu ini i Ndióxi ta cándaá cáxi ini i ña coo tá lin nacachi tátó Ndióxi xihin i.

26 Joo in tachi ndeé caja ña ná tiví barco yóho yati in isla —nacachi Pablo xihin na cán.

27 Sa naxinu sahun quivi xica nde ini barco cán cuahan nde. Ta in ñuu naxinu coo nde in xoo tañuhú naní Adria. Joo tá xoo johó tá xoo cáa ñéhe tachi nde cuahan nde. Joo tátuhun java ñuu já naxini da ñéhe barco cán ña cáyati nde yuhú tañuhú cuahan nde.

28 Anda já nacasahá chíquiahvá na ndá quiahva cúná tañuhú yati yuhu nu ndúu nde cán. Ta quiahva cúná do nasacuu oco sahun in metro. Tá nacasahá cáyati chága barco yuhu cán já nachi quiahva tucu na. Ta cán sa yáji chága ta cúu á oco usa metro quiahva cúná a.

29 Ta sahá ña yíhví na xinu coo barco cani ndaa dó tóto ñuhu yati cán sahá ña cán quea natiin na rieta ña ndico comí caa gáncho cáhnu nu cán. Ta najácana na ña ini tañuhú chí xoo cáha mé barco cán já ná tiin a barco ná a cáca ga dó cuhun do chí nuu. Ta a juú quiahva yíhví na ndáti na ná tiví.

30 Joo ndaja coo java da cája chúun xihin barco cán nacañan da quee jehé da xihin lancha loho cán cuhun da. Sahá ña cán quea nacasahá da ndáxi da lancha loho cán ña jánuu da do nuú tañuhú ta já cuhun da, cáhán da. Ta nacasahá cája da tátuhun táan chága da caa gáncho cán ini tañuhú já ná tiin a barco xoo chí nuu do.

31 Joo naxini Pablo ña cája da sahá ña cán quea naxi tuhun da nuú da sáhdá chuun nuú soldado ta xihin nuú soldado cán já cáchi da já xihin ná:

—Tá ná quee da jan cuhun da já quea ndihi saha ndó ini tañuhú —nacachi Pablo.

32 Anda já nasahan soldado cán nasahnda da rieta ndico lancha loho cán já najándicava da dó ini tañuhú.

33 Ta tá sa yati tiví yaa já najacañan Pablo tóco ndihi na cán ña ná cuxu na vatí loho. Já nacachi da já xihin ná:

—Sa nayaha sahun quivi co xixi ndó ta ni co quiji ndo.

34 Sahá ña cán xica i ñamaní nu ndó ña ná cuxu ndó vatí chá va. Xini ñuhú cuxu ndó já ná coo ndeé ndo chindeé ndó mé ndó já ná cacu ndó. Jáchi cacu ndihí. Ta ni janda in túhún ijí jini yo a ndihi saha —nacachi Pablo xihin ná.

35 Tá nandihí nacachi Pablo ña yóho xihin ná já natiin da in pan ta nu táhyí ndihi na cán nandiquiahva da ndixahvi nu Ndióxi. Tá nandihí já nasahnda java da ña ta nacasahá da xixi da.

36 Xihin ña yóho nandindeé ri ini na java cán ta nacasahá na xixi na.

37 Ta tóco ndihi nde, na nasañuhu ini barco cán nasacuu nde ivi ciento uní jícó sahun in ñayivi.

38 Tá nandihí naxixi nde ña cúní nde já nasata na trigo ini tañuhú já ná ndicama chága jata barco cán.

Cácoo barco cahá tañuhú

39 Joo tá nativi yaa já naxini na ñundáhyi. Joo coo nacuu ndicuni da cája chúun xihín barco cán ndá ñuu cúu á. Ta tá nandihí já naxini na ña ín ñutí nu yájí yuhú tañuhú cán. Anda já nacahán na jácayati na barco yati yuhú cán.

40 Sahá ña cán quéa nasahnda na rieta ndíco barco cán já najani dó. Ta nacandoo caa gáncho ini tañuhú nacaja na. Ta tá nandihí já najánditayi na yitó nuú jahnda ta xihín yitó cán nacasáhá na jándicaca na barco cán nuú tañuhú. Ta najándindita tucu na jahmá cáhnu xoo nu barco cán já ná cuu caca dó xihín tachi. Ta xihín ña yóho nacasáhá barco cán cáyati dó yuhú tañuhú.

41 Ta in cuití naxinu barco cán nu ndíque táhan ivi táhnda tañuhú. Ta sahá ña nacayájí tañuhú nuú ñutí cán sahá ña cán quéa nacatiin nuu barco cán. Ta ni loho ga coo nacuu cuhun do. Joo xihín ña quiahva ndeé ndacú cáni ndaa tañuhú cán xoo cáha do sahá ña cán quéa nacasáhá cháchi dó.

42 Anda já nanducú soldado cahni ndihi da na cuahan vecaa ñuu Roma cán. Jáchi tiahva náá jitá na cuhun na nuú tañuhú ta cunu na cuhun na tá sa naqueta na yuhú tañuhú, cáhán na.

43 Joo da sáhnda chuun nuú soldado cán coo nasahan da ñamani ña ná caja na já jáchi cúní da jáca cu da Pablo. Ña nacaja da quéa nasahnda da chuun nuú na tiahva jitá ticuúí ña ná jácana na mé ná ini tañuhú cán já ná xinu na nu ñúhu.

44 Ta na java, na co tiahva jitá ticuúí cán nacachi da xihín ná ña ná ndaa na jata yitó á jata túhun barco cán já ná xinu na nu ñúhu. Anda jáví naxinu coo vaha tóco ndihi nde nu ñúhu.

1 Tá sa naxinu coo vaha ndihi nde yuhú ñundáhyi cán já nacandaa ini nde ña naní a isla Malta.

2 Ta vaha ndivaha nacaja ñayivi ndúu isla cán xihín nde. Nandicahmi na ñúhu jáchi nacasáhá cúun ga javi ta a juú quiahva vixi xini nde. Chí nacahan na xihín nde ña ná cativi nde catúni nde.

3 Anda já najátaca Pablo java titó íchí, dó quee yávi núhu. Ta tá chójó da títo cán nu ñúhu já naqueta in coo tañu títo cán xinu rí sahá ña ihni ñúhu. Ta natiiin rí ndáha Pablo.

4 Ta tá naxini na isla Malta cán ña ndícaa coo ndáha Pablo já nacasáhá cáchi xihín táhan na já:

—Ndá da sáhní ndii cúu da yóho jáchi vatí coo naxihí da ini tañuhú joo yóho cúní Ndióxi jándihí a saha dá —nacachi na.

5 Joo mé Pablo naquiji nihni da coo ndícaa ndáha dá cán nu ñúhu cándaha cán ta coo ña ná ndoho da.

6 Tóco ndihi na cán ndáti na cuni na ña ná quihvi cuiñu ndáha dá á tá coo ta in cuití ndicava da quivi da, nacahán na. Ndáti na java cán cuni na ndaa ndoho Pablo joo tá sa nacannahá ndáti na coo ñaha ná ndoho toho Pablo cán. Anda já nandijama jini ná ta nacasáhá na cáhan na ña cúu dá in ndióxi.

7 Yati nuú naxinu nde cán nasacuu a ñundáhyi da naní Publio, da cómi cuénta saha isla cán. Ta tixi uní quivi nandiquehe vaha ndivaha da ndehe ta vaha nacaja da xihín nde.

8 Ta ndaja coo quihvi tátá Publio cándúhu dá ndóho da cuehe nii ta chícaan cáhni ñahá. Ta já nasahan Pablo naxito nihni da da ta nacasáhá Pablo xica tahví da nu Ndióxi saha dá ta nachinúu Pablo ndáha dá jini dá tá já nandivaha da.

9 Tá naxini java ga na quihvi ndúu isla cán ña nacaja Pablo já naquixi na nu dá ña ná ndaja vaha da na chí nandivaha na.

10 Ta nandiquiahva na ndixahvi nuú nde ta najasá na cuahá ñaha nuú nde. Tá naxinu coo quivi ndaa nde barco cuhun nde já nasahan na ña xini ñúhu nde cuhun nde.

Xinu coo Pablo ñuu Roma

11 Nasanduu nde tátuhun uní yoo isla cán janda quiahva nandaa nde in barco, dó nasandati yaha tiempo vixi mé isla Malta

cán. Mé barco cán naquixi dó chí Alejandra. Ta nuu do cándaa ivi tiniñu yúu ndióxi cája cáhnu na cán. In a naní a Cástor ta inga a naní Pólux.

12 Naquee nde cuahan nde já naxinu nde in ñuu naní Siracusa ta cán nasanduu nde uní quivi.

13 Ta naquee nde cuahan nde yati yuhu tañuhú janda quiahva naxinu coo nde ñuu Regio. Joo inga quivi itaan já nacasáhá víi uun xícó tachí chí sur sahá ña cán quéa tá sa nayaha ivi quivi já naxinu nde ñuu Puteoli.

14 Ta cán nanditahan nde java na cúu cuéntá Jesús. Ta nacañan na xihín nde ña ná canduu nde in semana xihín ná ta já naja nde. Ta tá nandihí já naquee nde cuahan sahá nde chí ñuu Roma.

15 Ta na cúu cuéntá Jesús ndúu ñuu Roma cán sa nañeñe ná tuhun ña xinu coo nde cán. Sahá ña cán quéa naqueta na vaxi na ñeñe ná ndeñe. Java na naquixi janda ñuu nu sáhiñ yahvi cáhnu naní a Apio ta java na naquixi janda ñuu naní Uní Taberna. Tá naxini Pablo na cán já nacasáhá ndiquiahva da ndixahvi nu Ndióxi ta nandindacú ini da.

16 Ta tá naxinu coo nde ñuu Roma já nandiquiahva da sáhdá chuun nuú soldado cán tóco ndihí da cuahan vecaa cán nuú in da cómi chuun saha mé vecaa ñuu Roma cán. Joo nasahan na ñamani nu Pablo coo jín da vatí nasacu na in soldado ndáá ñahá.

Cáñan Pablo tuhun Ndióxi xihín na ñuu Roma

17 Tá sa naxinu uní quivi naxinu coo nde ñuu Roma cán já nacana Pablo tóco ndihí na sacuañan nuú na Israel ndúu ñuu Roma cán. Ta tá sa nataca ndihí na ndúu na já nacachi da já xihín ná:

—Candehé ndó, ñani i. Ni in túhún toho ñaha núu coo naja yeñe xihín na Israel mé ñuu Jerusalén cán ta ni xihín costumbre naja tásáñu jícó yo. Joo natiin na Israel yeñe ta nandiquiahva na yeñe nuú na cúu cuéntá gobierno ñuu Roma yóho.

18 Ta tá nandihí nandaja ndichí na yeñe já nasacu ini na janí na yeñe jáchi coo nañeñe ná cuachi i sahá ña cuu cahni na yeñe.

19 Joo ndaja coo na Israel coo naxeen na ña ná janí na cán yeñe. Sahá ña cán quéa naxica i ñamani ña ná cavii sahá i nu emperador ñuu Roma yóho. Joo yeñe coo cuni toho i jácojo i cuachi jatá na Israel jáchi cúu ná na naquixi chichi nuú naquixi mí i.

20 Sahá ña cán quéa nacana i ndohó viti jáchi cuni cuni i ndohó já ná ndituhún i xihín ndo. Cuni ndicani i nu ndo ña ndico ndáha i xihín cadena yóho sahá mé a nachindahá Ndióxi jácacu a ndihí yó, na Israel —nacachi Pablo xihín na Israel cán.

21 Anda já nanducú ñeñe na cán tuhun nu Pablo já cáchi na já xihín dá:

—A ñaha quixi carta estado Judea nuú nde ña cáñan sahá ña cájún. Ta ni na cúu táhan na Israel tá nandai cuu na ñuu yóho coo toho tuhun núu ñeñe na ná casaa na nuú nde saha yóho.

22 Joo cuni nde ña ná ndicanún nuú nde ndia cándúsún jáchi níi cúu ñuyiví cáñan núu ñayivi sahá na cúu cuéntá Jesús —nacachi na Israel cán xihín Pablo.

23 Tá nandihí nasacu na in quivi cáñan Pablo xihín ná ta tá naxinu coo mé quivi cán nataca cuahá ndivaha ñayivi mé veñe nu in Pablo cán. Ta naha ta janda sahini najañaha da nu ná ña cuni Ndióxi cacomí a cuéntá sahá ñayivi. Ta xihín ña nacahyí Moisés sanahá ta xihín ña nacahyí na profeta já nandicani da nu ná saha Jesús ña ná candee ini na mé á.

24 Java na cán nacandúsa na ña nacachi Pablo xihín ná joo java na coo naxeen na candúsa na.

25 Ta sahá ña coo nacuu ndique táhan vaha tuhun na Israel cán sahá ña jañaha Pablo sahá ña cán quéa nacasáhá na quée na cuahan na. Tá naxini Pablo ña yóho já nacasáhá cáchi da já xihín ná:

—Mé a ndaa nacahan ínima yii Ndióxi nuú tásáñu jícó yo tá nacahyí Isaías já:

26 Cuahán cáñan xihín ñayivi Israel jan já cachún já xihín ná:

Mé a ndaa táhyí cuni johó ndó joo a cándaa ini ndó.

Ta vatí sandehé ndó in ñaha joo coo ndicuni ndó ña.

27 Jáchi ihvi ndivaha cúu ini ndó ta coo cuni ndó caja ndó ña cáchi i.

Ta cō cún̄i ndó cuni jōho ndó ñ̄a cáhan̄ i xih̄in̄ ndo.

Ta cō cún̄i ndó ndicuni ndó ñ̄a cája ndó cuachi.

Jáchi tá n̄a jándacoo ndó cuachi cája ndó, já quēā cuu caja cáhnu ini i sahā ndo, ta já cuu coo vāha ini ndó, já ñacachi ínimā ȳi Ndióxī xih̄in̄ tásáhn̄u jícō yō.

²⁸ And̄ā já ñacachī tucu Pablo já xih̄in̄ ná:

—Ta viti xín̄i ñ̄uhú candaā ini ndó, ñ̄a Israel ñ̄a sā ñaxini jōho ñ̄a coó ñaquixī ch̄ichi Israel tuhun vāha sahā Jesús. Ta cája i cuéntā candúsa mé ñ̄a cán̄ ñ̄a —ñacachi Pablo xih̄in̄ ná.

²⁹ Tá ñandihi ñacahan̄ Pablo ñ̄a yóho já ñanditúhún̄ cuehē xih̄in̄ táhan̄ ñ̄a Israel cán̄ ta já ñaquee na cuahan̄ ñ̄a.

³⁰ Ñacandoo Pablo ivī ní cuīā vehe nuú ñach̄avī ndojo da. Tá ñandiquehē vāha da tócō ndihi ñ̄a sahan̄ xitō nihni ñahá.

³¹ Ta ni cō yíhv̄ī ñ̄a cáxi tuhun da xih̄in̄ ñ̄ayivī ñ̄a cún̄i Ndióxī cacomí̄ ā cuéntā sahā ná. Ta najánahā ñ̄a tuhun vāha sahā Jesu-cristo, xitoho í ta ni in na coó ñasaji nuu nu dá caja da ñ̄a.

Carta nachindahá Pablo nuú na cúu cuéntá Jesús ndúu ñuu Roma

Cáhan Ndióxi Pablo xihín na cúu cuéntá Jesús

¹ Yehe cúu Pablo ta Jesucristo cúu xitoho i. Naçaxi Ndióxi yehe cacuu u in apóstol cuéntá mé á ta nachindahá a yehe cuhun i cahan i tuhun vaha saha Jesús nuú ñayivi.

² Sanahá ndivaha naçaja Ndióxi ña ná cahyí na profeta mé á tuhun vaha sahá ini libro yii Ndióxi.

³ Mé tuhun vaha yóho cáhan saha Jesucristo, xitoho í, mé a cúu in túhún jini já jahyi Ndióxi. Ta nanduu a in ñayivi naçacu ñuyívi yóho ta naquixi a chichi rey David.

⁴ Ta najánaña ínima yii Ndióxi ñayivi ña cúu Jesús in túhún jini já jahyi Ndióxi, mé a cúu cája tóco ndihi ñaha. Jáchi tá sa naxihi Jesús já nanditacu tucu a ta xihín ña yóho náha ña cúu á in túhún jini já jahyi Ndióxi.

⁵ Ta sahá ña naçaja Jesucristo ndica crúxu sahá ña yóho naçaja Ndióxi ñamaní xihín ndihí. Já nachindahá Ndióxi mí ña ná cuhun í cuéntá mé á cahan í saha Jesús nu tóco ndihi ñayivi ndúu ñuyívi já ná cuu candeé ini na mé á ta já ná caja na ña cúní a.

⁶ Ta mé ndó, na cúu cuéntá Jesús ndúu ñuu Roma jan, naçaxi Ndióxi ndohó cacuu ndó cuéntá mé á.

⁷ Ña cán queá cáhyí i carta yóho nu ndó, na ndúu ñuu Roma jan. Jáchi cúní ndivaha Ndióxi ndohó ta naçaxi a ndohó nduu ndó ñayivi mé á. Ta ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja ña ná coo vaha ini ndó.

Cúní Pablo cuhun da ñuu Roma coto nihni da na cúu cuéntá Jesús ndúu cán

⁸ Ndiquiahva i ndixahvi nu Ndióxi sahá ña naçaja Jesucristo xihín in in ndó jáchi ñayivi ndúu ndijáá ñuyívi xini joho na ña candeé ini ndó Jesús.

⁹ Yehe cája chúun i cuéntá Ndióxi ta ndinuhu ini i cáxi tuhun i tuhun vaha saha Jesús, mé a cúu in túhún jini já jahyi Ndióxi nuú ñayivi. Ta xini vaha Ndióxi ña tóco

ndihi quivi xíca tahví i nu mé á sahá ndihi ndó.

¹⁰ Ta ndijáá níi quivi xíca tahví i nu Ndióxi ña ná quiahva ñamaní nuú i saa i jan coto nihni i ndohó tá cúní a.

¹¹ Jáchi cúní cuni i ndohó já ná çaxi tuhun i xihín ndo ndá quiahva cúní ínima yii Ndióxi caja ñamaní xihín ndo já ná ndindacú chága ndó cuéntá mé á.

¹² Ña cúní queá ná quiahva tuhun ndeé ini táhan í jáchi in candeé ini ndihí Ndióxi.

¹³ Cúní ña ná candaa ini ndó, ñani mí i, na cúu cuéntá Jesús ña sa cuahá tañu sácu ini i saa i coto nihni i ndohó joo ín cuahá ña sáji nuu nuú i sahá ña cán queá cámaní saa i jan. Cúní chindeé e ndohó ña ná caca vaha ndó íchi cuéntá Jesús. Jáchi quiahva já nachindeé e java ga ñayivi, na co cúu chichi Israel.

¹⁴ Joo ndítahan nuú i çaxi tuhun i tuhun Ndióxi nu tóco ndihi ñayivi ndúu ñuu náhnu xihín na ndúu yucú ñuhú. Ta cahan i tuhun Ndióxi xihín na ndíchí jini ta xihín na co ndíchí jini.

¹⁵ Ña cán queá xíca ndivaha ini i saa i nu ndúu ndó ñuu Roma jan cahan i tuhun vaha saha Jesús xihín ndo.

Jáçacu Ndióxi ñayivi sahá tuhun vaha cáhan saha Jesús

¹⁶ Co cáçahan nuú i sahá tuhun vaha cáhan saha Jesús jáchi cúu á ndeé Ndióxi jáçacu a tóco ndihi ñayivi, na candeé ini mé á. Ta jihna ñuhú naçasahá Ndióxi jáçacu a ñayivi naquixi chichi Israel ta viti jáçacu a tóco ndihi ñayivi tá candeé ini na mé á vatí cúu ná na tóho á cúu ná na Israel.

¹⁷ Jáchi náha tuhun Ndióxi nu yo ndá quiahva ndúu ñayivi ndaa nu mé á. Ta cúu á sahá ña candeé ini mé á ta sahá ña yóho cuítí va jáchi coo a inga nuú ña caja í cacuu ñayivi ndaa nu Ndióxi. Já cáchi tuhun Ndióxi já: “Ndá na cúu ñayivi ndaa nu Ndióxi catacu na sahá ña candeé ini na mé á.”

Tóco ndihi ñayivi ndúu ñuyívi cómi na cuachi nu Ndióxi

¹⁸ Janda indiví nu ín Ndióxi xójo ini a xihín tóco ndihi ñayivi cája cuachi ñuyívi yóho ta jándoho a ini na sahá cuachi cája na. Ta sahá ña núu cája na sáji nuu na nuú java

ga ñayivi, na cúní candaa ini ña ndaa saha Ndióxi.

¹⁹ Jándoho Ndióxi ini ñayivi sahá cuachi caja na jáchi sa najánaḥa mé á ña ndaa nu ná ta sa xíní na saḥa mé á joo co cándúsa na ña.

²⁰ Janda sahá ñuyíví xíní ñayivi ña naçavaḥa Ndióxi ñuyíví xihín indiví xihin tóco ndihi ñaha. Ta xihín ña yóho cuu candaa ini na ña íin Ndióxi ta cuu candaa ini na ña íin ndée mé á caja ña cúní a anda ama cáa quívi. Sahá ña cán quea a cúu cachi na ña co xíní na á íin Ndióxi á coo a.

²¹ Vatí cándaa vaḥa ini na ña íin Ndióxi joo co caja cáhnu na mé á tátuhun ndítahan nu ná caja na. Ta ni co ndíquiaḥva na ndixaḥvi nu á. Ña caja na quea cáhvi núu ini na ta coo saḥa toho ña cáhvi ini na. Ta cúu ná tátuhun ñayivi tóntó jini, na xíca nuu nuú naá yávi.

²² Ta vatí cáhí na cúu ná na ndíchí jini joo cúu ná na tóntó jini.

²³ Najándacoo na ña caja cáhnu na Ndióxi, mé a tácu anda ama cáa quívi ta naçavaḥa na tiniñu yúu ña ñeḥe naḥná ṭaa, da xíhi yachi. Ta naçavaḥa na naḥná laa xihín naḥná quítí xihín naḥná coo. Ta naçasáhá caja cáhnu na ña.

²⁴ Sahá ña cán quea najándacoo Ndióxi na ña ná caja na tá nuú ña núu ña cúní na caja na. Anda jáví naçasáhá na caja quini na xihin yiquí cuñu táhan na.

²⁵ Co xeén na candúsa na ña ndaa cáhan saḥa Ndióxi joo naçandúsa na ña tuhún. Ta naçaja cáhnu na ña naçavaḥa Ndióxi ta coo naçaja cáhnu na mé Ndióxi, mé a naçavaḥa tóco ndihi ñaha. Jáchi Ndióxi quea xíní ñuhú caja cáhnu í anda ama cáa quívi. Já ná coo.

²⁶ Sahá ña cán quea najándacoo Ndióxi na ña ná caja na ña xíca ini na caja na, ña co ndítahan caja na. Ta naxinu na janda nuú najándacoo najihí ña quíji na xihin yíi na ta já naçasáhá quíji xihin táhan ndaja jíhí mé va na. Ta ña yóho cúu á ña coo nasacu ini Ndióxi caja na.

²⁷ Ta quiaḥva já naçaja ri dataa. Najándacoo da ña quíji da xihin ñájihí da ta naçasáhá ndicají ini da caja da ña núu xihin táhan mé va da janda quiaḥva naçasáhá quíji xihin táhan mé dá. Chí nuú cacahan nuu yo quea caja xihin táhan da. Ta tá

nandihí já casáhá ndóho ini yiquí cuñu na saḥa ña núu caja na.

²⁸ Naxinu na nuú najándacoo xóo na Ndióxi ta co cúní ga na candaa ini na saḥa. Sahá ña cán quea najándacoo xóo Ndióxi na ña ná cahvi núu ini na ta já caja tá caja na ña co ndítahan nu ná caja na.

²⁹ Nandicutú ndaa ínima ná xihin tá nuú ña núu, ña cúu cuachi. Ta ndiáva íni na quehe na ñaha cómí inga ñayivi ta caja xíxi na xihin ná ta cáhivi ini na ta sáhní na ndii ta cání táhan na ta jándahvi na ñayivi ta cáhvi núu ini na saḥa inga na ta xíca nuu na cáhan tuhún na.

³⁰ Ta cánaḥa quini ndivaḥa na xihin inga na ta cándají na Ndióxi ta yáha yúhu na xihin inga na ta caja ichi ini na ta caja cáhnu na mé va na. Ndiáva íni na ndaja caja chága na cuachi ta sáa ini na caja na ña cúní tátá náná na.

³¹ Co xíní túni na ta co jáxinu coo na tuhun sahan na nuú ñayivi. Co quíhvi ini na ñani táhan na ta co caja cáhnu ini na saḥa ná ta co táhnda ini na saḥa ñayivi.

³² Xíní vaḥa na ña nasahnda Ndióxi nu ná ta xíní na ña ndítahan quívi na saḥa cuachi caja na. Vatí cándaa ini na ña yóho joo xihin ndinuhu ini na caja tá caja na ña núu. Ta janda cájii ini na tá caja java ñayivi mé ña núu.

2

Caja víi Ndióxi saḥa tóco ndihi cuachi

¹ Mé a ndaa cómí ndó cuachi nu Ndióxi. Sándehé ndaa ndó inga ñayivi saḥa cuachi caja na joo chícaan ndó cuachi jaṭa mé va ndó jáchi caja ndó mé cuachi cán.

² Sa xíní vaḥa í ña caja ndaa Ndióxi tá jándoho á ini ñayivi saḥa cuachi caja na.

³ Mé ndó sándehé ndaa ndó cuachi caja java ga ñayivi ta cáhán ndo vaḥa caja Ndióxi tá chíndahá na cuhun na indayá. Joo cáhán ndo ña caja cáhnu ini a saḥa mé ndó vatí caja ndó mé cuachi caja na cán.

⁴ Ndája núu ndó Ndióxi, mé a cúní caja cuahá ñamaní xihin ndo jáchi xíní ndó ña co jándoho yachi Ndióxi ini na caja cuachi. Cúní Ndióxi ña ná ndicó coo ini ndó jándacoo ndó cuachi caja ndó.

⁵ Ihvi ndivaha cúu ini ndó jáchi co jándacoo ndó cuachi cája ndó. Nandicuahá cuachi ndó ta jándoho chága Ndióxi ini ndó tá ná tandaa quiví caja víi a sahá cuachi nacaja ñayivi. Mé quiví já ndaca náha ña cojo ini mé á sahá cuachi ñayivi ta náha ña ín saha mé á jándoho a ini na cán.

⁶ Mé tiempo cán quiahva Ndióxi nuú in in ñayivi ña ndítahan nu ná ndiquehe na sahá ña nacaja na ñuyiví yóho.

⁷ Java ñayivi nacaja na ña vaha xihín ndinuhu ini na ta nacacúni na caja na ña ná cajii ini Ndióxi xihín já ná cachi Ndióxi ña cúu ná ñayivi vaha. Ta nacacúni na coo na nu ín Ndióxi anda ama cáa quiví. Ta mé na cán cúu na cuhun coo xihín Ndióxi anda ama cáa quiví.

⁸ Joo cojo ini Ndióxi tá jándoho a ini na sáa ini, na co cúni cuhun xoo ña ndaa jáchi catóo na cuhun na xoo ña núu.

⁹ Ndoho ndivaha ini tóco ndihi ñayivi cája cuachi ta cacuéha ndivaha ini na. Jihna ñúhú na naquixi chichi Israel ndoho ini já casáhá ndoho ini na coó naquixi chichi Israel.

¹⁰ Joo cajii ini Ndióxi xihín na cája ña vaha ta ndaja cáhnu a na ta caja mé á ña ná coo vaha ini ná. Jihna ñúhú já caja mé á xihín na naquixi chichi Israel já casáhá caja ri a já xihín na coó naquixi chichi Israel.

¹¹ Jáchi co cúu á tátuhun cúni Ndióxi in ñayivi ta cándají a inga na jáchi in cúu ndihi ví nu Ndióxi.

¹² Vatí co cándaa ini ñayivi ña sáhdá ley Moisés joo cuhun tá cuhun na indayá sahá cuachi nacaja na. Ta vatí cándaa ini ñayivi ña sáhdá ley Moisés joo cuhun tá cuhun na indayá sahá cuachi nacaja na.

¹³ Jáchi tá cándaa ini na ña sáhdá ley Moisés ta co cája na ña jáchi co cáchi Ndióxi ña cúu ná ñayivi ndaa nu mé á. Ta tá cája na ña sáhdá mé ley Moisés anda javí cáchi Ndióxi ña cúu ná ñayivi ndaa nu mé á.

¹⁴ Ñayivi, na coó naquixi chichi Israel co xini na ña sáhdá ley Moisés. Cája mé ná ña sáhdá ley Moisés jáchi já xinu ini na caja na ña vatí co xini na mé ley Moisés.

¹⁵ Ña cája mé ná náha nuú ñayivi ña nasacu Ndióxi ley mé á ini xini túni ná. Ta xihín xini túni ná cándaa ini na tá cája na

ña vaha á tá cája na ña núu. Ta quiahva já xihín mé xini túni ná xini vaha na á cája na cuachi á cája na ña vaha

¹⁶ tá ná xinu quiví quiahva Ndióxi chuun nu Jesucristo caja víi a sahá ña nacaja tóco ndihi ñayivi vatí nacaja jehé na ña. Jáchi já cáhan tuhun vaha saha Jesús ña jánaha i nu ndo.

Na naquixi chichi Israel cándusa na ley Moisés

¹⁷ Ta mé ndó cáchi ndo cúu ndó na naquixi chichi Israel, na cándusa ley Moisés. Ta cáchi ndo cája chága Ndióxi ñamaní xihín mé ndó a juú ga xihín java ga ñayivi.

¹⁸ Ta cáchi ndo ña sa xini ndó ña cúni Ndióxi caja ndó ta cáchi ndo ña sa xini ndó caxi ndó ña vaha jáchi sa najacuaha ndó ley Moisés.

¹⁹ Ta cáchi ndó tiahva vaha ndó chindeé ndó ñayivi ña ná ndihvi na íchi Ndióxi ta cáchi ndo ña cúu ndo tátuhun in lámpara jándiyéhe nuú ñayivi xica nuu nuú naá.

²⁰ Ta cáchi ndo ña tiahva ndó jánaha ndó nuú ñayivi, na co xini túni ta cáchi ndo ña tiahva ndó jánaha ndó nuú ñayivi, na cámani catacu vaha ini. Cómi ndo ley Moisés sahá ña cán quea cáhan ndo xini ndó tóco ndihi ña ndaa xihín tóco ndihi ñaha.

²¹ Mé ndó jánaha ndo ley Moisés nuú ñayivi joo jihna ñúhú ndítahan caja ndó ña. Mé ndó jánaha ndo nuú ñayivi ña a váha toho caja cuíhná na joo cúu ndó na cuíhná.

²² Mé ndó jánaha ndo nuú ñayivi ña a váha toho coo in ta xihín in ñañáha, ña co cúu ñájihí da joo ín ndó xihín ñájihí inga na. Mé ndó co cúni ndó yoco ndindojo veñuhu ñayivi, na coó naquixi chichi Israel joo cája cuíhná ndo ña cuicá ñúhu veñuhu na cán.

²³ Cája cáhnu ndó mé va ndó jáchi cómi ndo ley Ndióxi joo co cája cáhnu ndó mé á jáchi co cúni ndó caja ndó ña sáhdá mé ley.

²⁴ Ña cán quea ndaa cáhan tuhun Ndióxi saha ndó tá cáchi a já: “Ñayivi, na coó naquixi chichi Israel cáhan núu na saha Ndióxi sahá ña cája mé ndó, na Israel”, cáchi tuhun Ndióxi.

²⁵ Tá cája ndó ña sáhdá ley Moisés já quea ndiyahvi marca nachicaan na yiquí

cuñu ndó. Joo tá cō cája ndó ña sáhdá ley Moisés já quea cō ndiyahvi toho marca nachicaan na yiquí cuñu ndó.

²⁶ Na cōo naquixi chichi Israel cō chicaan toho na mé marca jan yiquí cuñu na joo tá cája na ña sáhdá ley Moisés já ndiquehe Ndióxi na tá quiahva ndiquehe ri mé á na ín marca yiquí cuñu.

²⁷ Ndá na cája ña cáchi ley vatí cōo naquihvi marca yiquí cuñu na, ín sahá na cán chicaan na cuachi jatá na cō cája ña cáchi ley vatí ín a nu ná ta naquihvi marca yiquí cuñu na.

²⁸ Ña cán quea tá ná caja in na naquixi chichi Israel mé costumbre ña ná cuni cuití va ñayivi ña já quea a juú ña ndaa ña cúu ná cuénta Ndióxi. Ta ndá na chicaan na marca yiquí cuñu na cō cája na mé costumbre cuénta yiquí cuñu cuití va na.

²⁹ Ta ndá na naquixi chichi Israel tá mé a ndaa cúu ná cuénta Ndióxi ta cája na ña cuni mé á cō cúu á sahá ña nasahnda loho na yiquí cuñu na. Cúu á sahá ña nacaja ínimayii Ndióxi ini na. Ta mé na cán jácavatá na ini Ndióxi jáchi xihín ínimayii mé á cája na ña cuni mé á.

3

¹ Sahá ña cán quea ná ndaca tuhún i ndohó ña yóho: Á ín cuahá chága sahá ñayivi naquixi chichi Israel a juú ga sahá java ga ñayivi. Á ndiyahvi nu Ndióxi ña nachicaan na marca yiquí cuñu na.

² Ajan. Ín cuahá sahá ñayivi naquixi chichi Israel ta tá nachicaan na marca yiquí cuñu na ndiyahvi a nu Ndióxi jáchi nasacu ini a jándacoo a tuhun a nuú na naquixi chichi Israel já ná cacomí na cuénta sahá.

³ Ta vatí ná caja java ñayivi, na cándéé ini mé á ña cō cuni mé á caja na joo ama sahá ña cán a ndijama toho Ndióxi jiní á ña ná caja ña núu xihín ná, vaha.

⁴ Cō cája toho Ndióxi já. Ña cája Ndióxi ní tiempo cúu ndinuhu ña ndaa vatí tóco ndihi ñayivi cáhan na ña tuhún. Já cáchi tuhun Ndióxi já:

Xihín tuhun cáhan Ndióxi cándaa iní ña cúu á Ndióxi ña ndaa

ta a cúu quee vaha na chicaan cuachi jíquí jatá jáchi cúu mé á in Ndióxi ndaa, já cáchi tuhun mé á.

⁵ Ta viti ná cáhan i xihín ndó tá quiahva cáhan ñayivi ñuyíví. Cáhan na ña cō cája vaha Ndióxi tá jándoho a mí sahá cuachi jáchi xihín cuachi jándindita jícó chága yó Ndióxi. Ta xihín ña cája í náha ña cúu Ndióxi in Ndióxi ña ndaa ta mí cúu yó ñayivi cuachi.

⁶ Joo cō cáhan vaha na jáchi tá cō cája ndaa Ndióxi, nduu já quea a cúu caja vií mé á sahá ndihi cuachi cája tóco ndihi ñayivi ndúu ñuyíví.

⁷ Já cáchi ñayivi já: “Cóho ná caja yó cuachi já ná cándaa chága ini ñayivi ña cája ndaa Ndióxi ta xihín ña yóho caja cáhnu chága na mé á”, cáchi na. Joo cō cáhan vaha na jáchi tá cáhan yo ña xihín cuachi cája í ndicáhnu chága Ndióxi já quea cō cándaa iní ndá saha quea jándoho Ndióxi ini ñayivi sahá cuachi na.

⁸ Joo java ñayivi cáchi na: “Cóho ná caja í cuachi já ná caja cáhnu ini mé á sahá cuachi já ndicáhnu chága Ndióxi”, cáchi na joo cō cáhan vaha na. Ta java ñayivi cáhan ihvi na sahá yehe ta chicaan na cuachi jatá i ta cáchi na ña jánahe yehe ña yóho nuú ñayivi. Ndítahan jándoho Ndióxi ini tóco ndihi ñayivi, na jánahe ña yóho.

Tóco ndihi ñayivi ndúu ñuyíví comí na cuachi nu Ndióxi

⁹ Ña cán quea a cúu cachi yó ña cúu mí na vaha chága a juú ga inga ñayivi sahá ña naquixi chichi Israel. Jáchi sa najánahe i nu ndo ña mí, na naquixi chichi Israel xihín na cōo naquixi chichi Israel cúu yó ñayivi cája cuachi.

¹⁰ Já cáchi tuhun Ndióxi já: Cōo toho ni in ñayivi cája ña ndaa.

¹¹ Ta cōo toho ni in na cándaa ini ña ndaa, ta cōo ni in na ndínducú Ndióxi.

¹² Nacaxoo na nu Ndióxi já naquehe na ichí núu cuahan na.

Cōo ñayivi cája ña vaha janda ni in tuhún na cōo.

¹³ Quini ndivaha yuhu ná jáchi cúu á tátuhun in yávi ndii ña cámaní ndee ñuhu.

Cúu ná ñayivi tuhún ndivaha.

Tá quiahva cája coo tá tীন rी ñayivi já cája na cán tá cáhan na ña tuhún.

14 Ta mé cháhan cuití cáhan yúhu ná ta xihín ña yóho játahvi na ini ñayivi.

15 Níi tiempo ndícají ini na cahní na ndii ta xíhi ndii cája na.

16 Ta ndá nu xínu na jándoho na ini ñayivi jándacoo ndáhvi ñahá na.

17 Ta co xíni na ndá a queá canduu vaha na xihín ñayivi.

18 Ta ni co cándaá ini na ña ndítahan nu ná cayihví na Ndióxi, cáchí tuhun Ndióxi.

19 Sa xíni yó ña ndítahan nuú na Israel caha na tóco ndihi ña sáhdá ley Moisés jáchi cúu á cuénta na naquixi chichi Israel. Ta xihín ña yóho chícaan ley Moisés cuachi jata mé na cán ta náha ña tóco ndihi ñayivi ndúu ñuyíví cómi na cuachi nu Ndióxi ta a cuú cachi na ña co cómi na cuachi.

20 Ni in ñayivi a cúu nduu ndaa na nu Ndióxi sahá ña cája na tóco ndihi ñaha sáhdá ley Moisés. Ña cája mé ley queá ña ná candaá ini ña cómi yo cuachi nu Ndióxi.

Jácaacu Ndióxi mí jáchi cándeé ini mé á

21 Viti jánaaha Ndióxi nu yo ndá quiahva nduu ndaa yo nu mé á. Ta jári cáchí mé ley xihín na profeta sahá ña yóho. Ta co cúu á sahá ña cája í ña cáchí mé ley

22 joo sahá ña cándeé ini ñayivi Jesucristo já cája Ndióxi ña ná nduu ndaa na nu mé á. Já caha mé á xihín tóco ndihi na cándeé ini Jesucristo jáchi tá quiahva cája Ndióxi xihín na Israel quiahva já cája ri a xihín na co cúu na Israel.

23 Tóco ndihi ñayivi cómi na cuachi nu Ndióxi ta naçaxíca na nu á ta a cuú nduu na ñayivi vaha tá quiahva cúni mé á.

24 Joo naçaja Ndióxi in ñamaní cáhnu xihín yo já ná nduu ndaa yó nu mé á. Ta coo naçahví sahá jáchi naçahvi Jesucristo sahá cuachí tá naxihí a ndica crúxu. Ta viti co cómi ga yó cuachi nu mé á.

25 Naçindahá Ndióxi Jesucristo ña ná cuita ñi a sahá cuachí já ná cuu caha cáhnu ini Ndióxi saha yo tá ná candee ini Jesucristo. Xihín ña yóho náha ña cúu á in Ndióxi ndaa. Tá camaní quivi Jesucristo sahá cuachí já coo naçaquehe Ndióxi cuénta

sahá cuachi. Já naçaja mé á jáchi cáhnu ndivaha ini a.

26 Ta xihín ña yóho náha ña mé a ndaa táhyí cúu á in Ndióxi ña ndaa janda quivi viti. Tóco ndihi na cándeé ini Jesús cúu ná na ndaa nu Ndióxi jáchi najándoo Jesús cuachi na. Ta xihín ña yóho náha ña cúu á Ndióxi ndaa.

27 Ndá sahá cája cáhnu í mí, vaha. Ama ná cuu caha cáhnu í mí sahá ña naçaja í. Jáchi a cúu nduu ndaa yó nu Ndióxi sahá ña naçacu vaha í ley Moisés. Cúu á sahá ña cándeé ini Jesús.

28 Sahá ña cán queá sa xíni yó viti ña nduu ndaa yó nu Ndióxi tá ná candee ini Jesús cuití va. Ta co cúu á sahá ña naçacu vaha í ña sáhdá ley Moisés.

29 Á cája Ndióxi ña yóho sahá na naquixi chichi Israel cuití va, vaha. Uñun. Jáchi jácaacu Ndióxi na naquixi chichi Israel xihín na coo naquixi chichi Israel.

30 Jáchi íin in tálaá Ndióxi ta mé Ndióxi yóho jácaacu a ñayivi tá ná candee ini na mé á vatí cúu ná na Israel á co cúu toho ná.

31 Á cacu xoo í ley Moisés, da já. Uñun. Vatí cándeé ini Jesús joo a cuú cacu xoo í ley Moisés jáchi náha ña cúu á ña ndaa ta ndiyahvi a nu yo.

4

Ña naçaja Abraham sanahá ndivaha

1 Ta ndá saha naçachi Ndióxi sahá Abraham, tásáhnu jícó yo ña nanduu da ña ndaa nu mé á.

2 Co cúu á sahá ña naçaja da ña nanduu da ña ndaa nu Ndióxi já ná a cája cáhnu da mé dá. Ta coo toho ñaha ña cuu caha cáhnu da mé dá saha.

3 Jáchi já cáchí tuhun Ndióxi: “Naçandee ini Abraham Ndióxi sahá ña cán queá nanduu ndaa da nu mé á”, cáchí tuhun Ndióxi.

4 Ta viti ná caha í cuénta cája chúun in ñataa. Ta tá nandihí cháhvi na nu dá ta mé jiuhún cán co cúu á ña jása na nu dá. Cháhvi na nu dá jáchi cáni a nu dá quehe da ña sahá chuun naçaja da.

5 Jáchi a cúu ndaja ndaa ñayivi mé ná nu Ndióxi sahá ña cája na. Tá ná candee ini ñayivi Jesús, mé a naçahvi sahá cuachí

anda jáví ndaja Ndióxi na ñayivi ndaa nu mé á.

⁶ Ta quiahva já nacahan rey David sahá ña yóho tá nacachi da ña tahví nahá nacuu da ndája ndaa Ndióxi vatí coó nacaja da ñaha ña ná cuu ndaja ndaa da mé dá nu Ndióxi.

⁷ Já nacachi David já:

Tahví nahá nacuu ñayivi tá nacaja cahnú ini Ndióxi sahá ña núu nacaja na ta tá najándoo a cuachi na.

⁸ Ta tahví nahá nacuu ñayivi tá coó naquehe Ndióxi cuénta sahá cuachi nacaja na, nacachi David sanahá ndivaha.

⁹ Á tahví nahá nacuu na nachicaan marca yiquí cuñu cuití va. Uñun. Jáchi ndúu ndaa ñayivi nu Ndióxi sahá ña cándéé ini na mé á ta coo cúu á sahá ña nachicaan na marca yiquí cuñu á coó a. Ta sa xini yó ña nacachi Ndióxi ña nanduu Abraham ta ndaa nu mé á sahá ña nacandéé ini da mé á.

¹⁰ Á nacachi Ndióxi ña cúu Abraham ta ndaa nu mé á tá cámaní chicaan da marca yiquí cuñu da á tá nandihí nachicaan da marca yiquí cuñu da. Nacachi a já xihín dá tá cámaní chicaan dá marca yiquí cuñu da.

¹¹ Jihna ñuhú nacandéé ini Abraham Ndióxi anda jáví nacachi a ña cúu Abraham ta ndaa nu á. Tá nandihí já nachicaan da in marca yiquí cuñu da já náha ña mé a ndaa nanduu da ta ndaa nu Ndióxi jáchi nacandéé ini da mé á. Xihín ña yóho naxinu Abraham nanduu da tátuhun tátá tóco ndihí ñayivi, na cándéé ini Ndióxi vatí coó nachicaan na marca yiquí cuñu na. Ta vatí coó nachicaan na mé marca yóho yiquí cuñu na joo cúu ná ñayivi ndaa nu Ndióxi.

¹² Ta quiahva já nanduu Abraham tátá na in mé marca yiquí cuñu. Ta a juú sahá mé marca yóho cuití va jáchi nanduu da tátá na sahá ña cándéé cahnú ini na Ndióxi tá quiahva nacandéé ini Abraham mé á tá cámaní chicaan da marca yiquí cuñu da.

Jáxinu coo Ndióxi tuhun sahan nu yo tá ná cándéé ini mé á

¹³ Sanahá ndivaha nasahan Ndióxi tuhun a nu Abraham xihín nuú na naquixi chichi da. Nacachi Ndióxi ña tandaa quivi ñeñe táhvi ná ña ná nduu ñuyiví ñaha

mé ná. Coó nasahan Ndióxi tuhun a nu Abraham sahá ña nacaja da ña sáhdá ley Moisés. Nasahan mé á tuhun a nu dá sahá ña nacandéé ini da mé á ta já nanduu ndaa da nu Ndióxi.

¹⁴ Joo tá mé a ndaa na nasacu vaha ley cúu na ñeñe táhvi cahun indiví já quea coo chuun cándéé ini Ndióxi, dá já. Jáchi xihín ña yóho jándacoo núu í tuhun nasahan Ndióxi nu yo ña caja mé á xoho.

¹⁵ Ndítahan nu Ndióxi jándoho a ini ñayivi tá coo cája na ña sáhdá ley Moisés. Joo tá coo toho mé ley já quea coo toho cuachi ñayivi nu ley.

¹⁶ Nasahan Ndióxi tuhun a nu Abraham sahá ña nacandéé ini da mé á. Ta sahan mé á tuhun a nu yo tá cándéé ini mé á. Coó a cája toho a á cája í ña sáhdá ley Moisés á coo cája toho í ña jáchi mé a ndaa ndiquehé ña vaha sahan Ndióxi nu yo tá cándéé ini mé á tátuhun nacandéé ini Abraham mé á. Ta cúu á tátuhun nanduu Abraham tátá tóco ndihí na cándéé ini Ndióxi.

¹⁷ Já cáchi Ndióxi já xihín Abraham: “Nacaja i ña ná nduu mún tátá ñayivi ndúu cuahá nación”, já cáchi tuhun Ndióxi sanahá. Mé Abraham cúu dá tátuhun tátá ndihí nu Ndióxi. Nacandéé ini da Ndióxi, mé á cuu jánditacu tucu ndji ta xihín tuhun cahan mé á cája ña ná coo ña coo nasahin jihna.

¹⁸ Vatí coo naxinu nuú tuhun nasahan Ndióxi nu Abraham joo nacandéé tá nacandéé ini da Ndióxi ta nasandati da jáxinu coo mé á tuhun a. Já nanduu da chichi nuú naquixi cuahá ñayivi, na ndúu cuahá nación. Já nayaha jáchi já nacachi Ndióxi xihín dá sanahá: “Ndicuahá ndivaha ñayivi quixi chichún”, nacachi Ndióxi xihín dá.

¹⁹ Ta nacandéé ini Abraham Ndióxi ña cacu jahyi da vatí sa nacayati quivi xinu da in ciento cuja ta vatí sa cándaq cáxi ini da ña jalóho cuití va quivi catacu da ñuyiví yóho xihín Sara, ñájihí da. Ta sa cándaq ini da ña a cuú ga cacu jahyi ná joo nacandéé ini da Ndióxi.

²⁰ Ta coo nacavitá ini da ta coo nandicani ivi johó ini da sahá tuhun nasahan Ndióxi nu dá. Joo nanduu ndeé chága ví ini da já ná cándéé cahnú chága ví ini da Ndióxi ta

naçaja cáhnu da mé á.

²¹ Já naxinu ini da ña mé a ndaa táhyí ín ndée Ndióxi ná jáxinu a tuhun sahan nuú ñayivi.

²² Naçandee ini Abraham Ndióxi sahá ña cán quea naçachi a ña nanduu da ña ndaa nu mé á.

²³ Ta tá cáchí tuhun Ndióxi ña nanduu Abraham ña ndaa nu Ndióxi sahá ña naçandee ini da mé á já quea coo naçahyi ña yóho sahá Abraham cuití va.

²⁴ Naçahyi ri a saha mí jáchi tá ná candee ini Ndióxi, mé á najánditacu Jesús, xitoho í tañu ndii já quea ndiquehe Ndióxi mí ta ndaja mé á mí ña ná nduu ñayivi ndaa nu mé á.

²⁵ Ta nandiquiahva na Jesús ña ná quivi a ndica cruxu sahá cuachi. Ta tá nandihí nanditacu tucu a ña ná nduu ñayivi ndaa nu mé á.

5

Naçaja Ndióxi ña ná nduu ndaa yó nu mé á

¹ Sahá ña cán quea coo ga cuachi jata yo jáchi naçandee ini Ndióxi ta nandique táhan máni yó xihin á sahá ña naçaja Jesucristo, xitoho í.

² Ta sahá ña cándee ini Jesucristo sahá ña cán quea ça Ndióxi cuahá ñamaní xoho. Cándee ini mé á ta cájii ini ndátí cuhun í coo í xihin mé á.

³ Ta quiahva já cájii ini tá ná quixi tondóho nu yo jáchi sa xini yo ña ndindacú chága ini cuénta Ndióxi tá ndóho í tondóho.

⁴ Tá sa nandindacú ini cuénta Ndióxi naçaja tondóho anda jáví táhan ini Ndióxi xihin yo jáchi naxito ndojó mé á mí ta nandindacú chága ini cuénta mé á. Tá natahan ini Ndióxi xihin yo anda jáví candaa vaha ini ña jáxinu coo mé á tuhun naçahan a nu yo.

⁵ Tá ndátí ña naçahan Ndióxi tuhun a quiahva nu yo já a cándo nuu toho Ndióxi xihin yo jáchi najándicutú Ndióxi ínima yo xihín ña quihvi ini a mí. Naçaja Ndióxi ña yóho xihin ínima yii mé á ña naçahan nu yo.

⁶ Sahá ña co ndee yo jácacú mí sahá ña cán quea naxihí Jesucristo saha yo ta coo naçayáncá a quivi a ta ni coo naxihí yachi a.

Naxihí a mé quivi nanditahan quivi a sahá cuachi ñayivi quini.

⁷ Ihvi ndivaha cáa já queta in ñayivi quivi na sahá inga ñayivi vatí cúú ná na vaha. Joo mé a ndaa cuu queta in ñayivi coo tiahva na quivi na sahá in na cúú na vaha ndivaha.

⁸ Náha Ndióxi nu yo ña mé a ndaa táhyí quihvi ini a mí jáchi vatí cúú yó ñayivi ça cuachi joo naxihí tá naxihí Jesucristo saha yo.

⁹ Ta viti sa nanduu ñayivi ndaa nu mé á sahá nii Jesucristo, dó naxita saha yo. Ta sa saha mé á cacu ndaa ínima yo já ná a cójo ini Ndióxi sahá cuachi.

¹⁰ Nasacuu na coo naxini táhan vaha xihin Ndióxi joo sahá ña naxihí in túhún jini já jahyi mé á sahá ña cán quea nandique táhan máni yó xihin á viti. Xihín ña yóho cuu cacu ndaa ínima yo jáchi nanditacu tucu Jesucristo ta sa nandique táhan máni yó xihin Ndióxi viti.

¹¹ Ta a juú ña yóho cuití va vaha jáchi cájii ndivaha ini xihin Ndióxi sahá ña naçaja Jesucristo, xitoho í. Sahá ña cán quea naxinu yó nandique táhan máni yó xihin Ndióxi.

Ña naçaja Adán xihín ña naçaja Jesucristo

¹² Ta sahá cuachi naçaja in ña naní Adán sahá ña cán quea nandihvi cuachi ñuyiví yóho ta tá nandihvi cuachi ñuyiví já naçasahá xihí ñayivi. Tóco ndihí ça í cuachi ta sahá ña yóho nditahan quivi ndihí.

¹³ Tá cámani quiahva Ndióxi ley mé á nu Moisés naçacomí tóco ndihí ñayivi cuachi. Joo co quehe Ndióxi cuénta sahá cuachi jáchi coo toho ley naçahin tiempo já.

¹⁴ Janda tiempo naçahin Adán naçasahá xihí ñayivi sahá cuachi na ta janda naxinu tiempo naçahin Moisés naxihí na vatí coo naçaja na mé cuachi naçaja Adán. Naçacomí Adán cuachi jáchi naquehe núu da ña naçachi Ndióxi xihin dá. Ta mé Adán yóho naçacuu da tátuhun yuhú nuú da quixi tá nu ndihí.

¹⁵ Joo a cuú jándique táhan í cuachi naçaja Adán xihin tóco ndihí ña vaha sahan Ndióxi nu yo. Jáchi sahá cuachi naçaja in túhún ña, xihí cuahá ndivaha ñayivi. Joo ñamaní naçaja Ndióxi xoho sahá ña naçaja in

túhún taa naní Jesucristo cúú á in ñamaní cáhnu ndivaha ña ñéhe táhvi cuahá ndivaha ñayivi.

¹⁶ A cuú jácatáhan í cuachi ñacaja in dataa xihín ñamaní cája Ndióxi xoho jáchi saha in túhún cuachi ñaxinu cháhan jatá ñayivi ta já ñacasáhá xíhi na. Vatí ñandicuahá cuachi ñayivi joo ñacaja Ndióxi ñamaní xihín ná já ñandaja ndaa mé á na ta ñacachi a ña coó ga cuachi na nu mé á.

¹⁷ Sahá cuachi ñacaja in túhún taa naní Adán ñacasáhá xíhi ñayivi. Joo sahá ña ñacaja in túhún taa naní Jesucristo ñéhe táhvi yó ndoo máni uun cuachí nu Ndióxi. Jáchi cáhnu ndivaha ñamaní cája Ndióxi xoho ña cán quea ñéhe ndeé chága íni yo caca í ichi cuéntá Ndióxi sahá ña ñacaja Jesucristo.

¹⁸ Sahá cuachi ñacaja Adán ñacachi Ndióxi ña cómi tóco ndihi ñayivi cuachi nu á. Joo sahá ña ndaa ñacaja Jesucristo ñacachi Ndióxi ña ndá ñayivi ñacuu cuu nduu ndaa na nu mé á jáchi co cómi ga na cuachi nu á.

¹⁹ Sáa ñasahin ini Adán jáchi coó ñaxeén da caja da ña cuni Ndióxi. Ta sahá ña ñacaja Adán cuahá ndivaha ñayivi ñandu na ñayivi cuachi. Joo ñacaja Jesucristo tóco ndihi ña cuni Ndióxi ta xihín ña ñacaja in túhún taa Jesucristo ñandu ndaa cuahá ndivaha ñayivi nu Ndióxi.

²⁰ Tá ñasahan Ndióxi ley nu Moisés já ñacandaa ini ñayivi ña cuaha chága cuú cuachi na. Joo tá ñandicuahá cuachi ñayivi já ñatahvi chága ini Ndióxi saha ná.

²¹ Ñandihvi cuachi ñuyiví ta ñasacomí a cuéntá sahá ñayivi. Ta sahá ña ñacaja na cuachi sahá ña cán quea ñacasáhá xíhi na. Joo ñacaja Ndióxi cuahá ñamaní xihín yo ta ñasacomí a cuéntá saha yo já ná cuu nduú ñayivi ndaa nu mé á ta já ná cuu cacu ndaa ínimá yo anda ama cáa quivi sahá ña ñacaja Jesucristo, xitoho í.

6

Ñaxihí yó nuú cuachi joo tácu yo xoo Jesucristo

¹ Ama ná cachi xihín táhan í: “Cóho caja tá caja í cuachi já ná coo cáhnu chága ini Ndióxi saha yo.”

² Ama ná cachi rí já jáchi cuú yo tátuhun na sa ñaxihí nuú cuachi ta tá sa ñaxihí yó nuú cuachi ama ná cacomí ga cuachi cuéntá saha yo.

³ Tá ñacandúta yo cuéntá Jesucristo cúú á tátuhun in yó ñaxihí xihín Jesucristo.

⁴ Jáchi tá ñacandúta yo já cúú á tátuhun in yó ñanduxu xihín Jesucristo ta ñaxihí yó nuú cuachi. Ta tá ñajánditacu Ndióxi Jesucristo já cúú á tátuhun in yó ñanditacu xihín mé á. Jáchi xihín ndée cáhnu Ndióxi, tátá yo ñanditacu Jesucristo ta sa xihín mé ndée cán cuu caca í ichi saá viti.

⁵ Tá quiahva in ñanduú xihín Jesucristo tá ñaxihí a quiahva já in ñanduú xihín á tá ñanditacu a.

⁶ Tá cámaní cándée íni Jesús já ñacatóo ndivaha í cája í cuachi jáchi ñasahnda cuachi chuun nu yo. Joo sahá ña ñaxihí Jesucristo ndica crúxu sahá ña cán quea ñajándacoo í cuachi cája í ta viti co sáhnda ga cuachi chuun nu yo.

⁷ Jáchi tá sa ñaxihí in dataa co sáhnda ga cuachi chuun nu dá ña cán quea cúú á tátuhun sa ñaxihí yó xihín Jesucristo sahá ña cán quea co sáhnda ga cuachi chuun nu yo viti.

⁸ Ta cúú á tátuhun ñaxihí yo tá ñaxihí Jesucristo ña cán quea xini vaha í ña cuhun yó coo í nu íni mé á anda ama cáa quivi.

⁹ Sa xini yo ña ñanditacu tucu Jesucristo ta a ndicó coo ga quivi a jáchi ni in ñaha a cuú caja ña ná quivi tucu a.

¹⁰ In talaá tañu ñaxihí a sahá cuachí ta viti xihín chí nuu co ndítahan ga nu á quivi a sahá cuachí. Ta viti tácu Jesucristo cuéntá Ndióxi.

¹¹ Ña cán quea ndítahan catacu ndó ñuyiví yóho tátuhun na sa ñaxihí nuú cuachi já ná a cáhnda ga cuachi chuun nu ndo. Nditahan catacu ndó cuéntá Ndióxi ña in ná nduu ndó xihín Jesucristo.

¹² Ña cán quea a quiahva ndó ñamaní nuú cuachi ña ná cacomí a cuéntá sahá yiquí cunu ndó jáchi tá ná ndiquiahva ndó mé ndó ndahá cuachi já quea caja ndó cuachi ña xica ini ndó caja ndó.

13 A ndíquiahva ga ndó yiquí cuñu ndó ndáha cuachi ná a cajú ndó ña núu. Joo vaha chága ná ndiquiahva ndó yiquí cuñu ndó ndáha Ndióxi. Nasacuu ndó tátuhun in ndii nu Ndióxi jáchi nacaja ndó cuachi joo viti cúu ndó tátuhun ñayivi, na nanditacu tucu nacaja Ndióxi. Ndítahan ndiquahva ndó mé ndó ndáha Ndióxi ña ná cajú ndó ña vaha.

14 Co cómi ga cuachi cuénta saha ndó viti jáchi tácu ndo saha ñamaní cajú Ndióxi ta co tácu ndo saha ña sácú vaha ndó ley Moisés.

Ndítahan nu yo ndicaxi ndá ichi candico yo

15 Ama ná cajú rí cuachi saha ña co cómi ga ley Moisés cuénta saha yo. Uhun. A cajú toho í ña jáchi xihín ñamaní cajú Ndióxi xihín yo cánda iní ña cómi mé á cuénta saha yo.

16 Sa xini ndó ña ndíquiahva in mozo mé dá ndáha xitoho da ta cajú da ndá chuun nacuu ña sahan xitoho da nu dá cajú da. Ta viti cuu ndicaxi ndó ndá na cacuu xitoho ndó. Tá ná ndicaxi ndó cajú ndó cuachi já quea cacuu ndó mozo ña quini ta cuhun ndó indayá. Ta tá ná ndicaxi ndó cajú ndó ña cúni Ndióxi já quea cacuu ndó cuénta mé á ta cajú mé á ña ná nduu ndaa ndó nu á viti.

17 Jihna nacaja ndó cuachi cuití va joo ndixahvi Ndióxi jáchi xihín ndinuhu ini ndó cajú ndó ña ndaa, ña nacatiahva ndó cuénta Ndióxi.

18 Nandoo cuachi ndó ta co cúu ga ndó mozo cuénta cuachi viti. Nanduu ndó mozo cuénta Ndióxi ta cajú ndó ña ndaa viti.

19 Najánaha i saha in mozo nu ndó já ná cánda vaha chága ini ndó ña ndaa. Mé ndó nasacuu ndó tátuhun mozo jáchi jihna nandiquiahva ndó mé ndó ndahá cuachi ta mí cuachi nasacuu a tátuhun xitoho ndó. Nacaja ndó tá nuú ña núu, ña nacahvi ini ndó cajú ndó. Joo viti nandiquiahva ndó mé ndó ndahá Ndióxi ta nasacu ini ndó cajú ndó ña ndaa xihín ndinuhu ini ndó jáchi já cáni a nu ndó cajú ndó ña ná cacuu ndó ñayivi yii nu mé á.

20 Tá nasacuu ndó mozo cuachi coo naxeén ndó cajú ndó ña ndaa ña cúni Ndióxi.

21 Ni in ña vaha coo nañehe ndó saha cuachi nacaja ndó. Ta viti cácahan nu ndo

saha mé cuachi nacaja ndó. Ta ndá ñayivi sá cajú cuachi cuhun na coo na indayá anda ama cáa quivi.

22 Joo co cómi ga cuachi cuénta saha ndo viti jáchi nanduu Ndióxi xitoho ndó. Vaha quehe ndó tá ná cajú ndó ña cúni mé á jáchi já xinu coo ndó cacuu ndó ñayivi yii nu Ndióxi ta já cuhun ndó coo ndó xihín mé á anda ama cáa quivi.

23 Jáchi tá cajú í cuachi cúu á tátuhun ndíyica yo nu Ndióxi saha ña nacaja í ta ini indayá chahví saha. Joo ñamaní cajú Ndióxi xoho saha ña naxihi Jesucristo, xitoho í cúu á ña cohó catacú indivi xihín mé á anda ama cáa quivi.

7

Co cómi ga ley cuénta saha yo

1 Candehé ndo ñani mí i, na cúu cuénta Jesús. Sa xini vaha ndó ley Moisés ta sa xini ndó ña cómi ley cuénta saha ñayivi nani tácu cuití va na.

2 Cúu á tátuhun tá natandaha in ñañáha xihín in dataa já quea cáchi ley cúu ña ñájihí da anda ná xinu coo quivi quivi da. Joo cáchi mé ley ña tá sa naxihi da co cúu ga ña ñájihí da.

3 Saha ña cán quea cuu tandaha tucu ña xihín inga ta jáchi co sáhdá ga mé ley chuun nu ña. Ta co cajú ña cuachi nu Ndióxi tá ná tandaha tucu ña jáchi sa naxihi va yii ña. Joo tá ná tandaha tucu ña nani tácu yii ña já quea cajú ña cuachi nu Ndióxi.

4 Ta quiahva já ndóho ri ndóho va ñani mí i, na cúu cuénta Jesús. Cúu á tátuhun naxihi ndó nu ley Moisés ña cán quea co cómi ga mé ley cuénta saha ndo. Ta viti núna nuú Jesucristo cacomí a cuénta saha ndo ña ná cacuu ndó cuénta mé a nanditacu tucu. Ta viti cuu cajú í ña vaha, ña cúni Ndióxi.

5 Tá cámani candeé iní Jesucristo nacaja í ndinuhu ña núu ña nasacahvi iní cajú í. Vatí sa xini yó ña cáchi mé ley joo nacaja chága yó cuachi ña nacahvi iní cajú í. Ña cán quea nanditahan nu yó quiví ná cuhun í ndoho iní indayá, nduu.

6 Joo nacaja Ndióxi ña ná janí yó nuú ña sáhdá ley Moisés ña nasacomí cuénta saha yo. Ta viti núna nu yó cajú í ña cúni mé á jáchi nandijama ínima yii Ndióxi mí saha ña

cán quéa co cómi ga ley, ña ñacahyí ña jihna cuénta saha yo viti.

Cája tá cája í cuachi vatí cándéé iní Jesucristo

⁷ Á cúní cachi ña yóho ña a váha toho ley Moisés. Uñun. Ña váha cúú á jáchi xihín ña cáhan mé ley cándaá váha iní ndá a cúú cuachi. Já cáchí mé ley já: “A ndiáva toho ini ndó cacomí ndó ñaha cómi inga na”, cáchí a. Ña cán quéa cándaá iní viti ña a váha toho tá ná cája í já.

⁸ Tá ná a cóo toho ley, nduu já quéa a cándaá ini í ña cúú cuachi. Ta coó toho cuachi cája í tá coó ley, nduu. Joo viti cándaá ini í ña a váha toho ndiáva ini í cacomí í ñaha ñani táhan í jáchi cáchí ley a cája í ña. Ña cán quéa ñandihvi cuachi ini í ta ñacasáhá cáhvi ini í ndaja cája í cacomí í ñaha inga na.

⁹ Tá cámaní candaá ini í ña cáchí ley Moisés já ñacahán í cúú u da váha. Joo tá ñatandaa quiví ñatacu ini í xihín ña cáchí ley Moisés anda javí ñacandaá ini í ña ñúhu cuachi ini í ta ñacandaá ini í ña cúú u da cája cuachi ta ndítahan nuú í cuhun í indayá sahá.

¹⁰ Tá ná cuu cája ñayivi tóco ndihi ña cáchí ley Moisés já cuhun ña coo na nu íin Ndióxi anda ama cáa quiví. Joo coó ñacuu cája í ña cáchí mé ley sahá ña cán quéa nditahan nuú í cuhun í indayá sahá.

¹¹ Najándahvi cuachi yehe jáchi ñacahán í cuu cuhun í indiví sahá ña cája í ña cáchí ley joo sahá ña coó ñacuu xinu coo í cája í ña sahá ña cán quéa cuhun í indayá.

¹² Ta yíi ndivaha cúú ley Moisés. Ta yíi ndivaha cúú tuhun ñasahnda Ndióxi cája í. Ta cúú á ña ndaa ta cúú á ña váha.

¹³ Ama ná jáqueta nuu ley yehe ini indayá nani cúú á ña váha. Uñun. A cúú cuití cája ley jáqueta nuu a yehe ini indayá. Cuachi quéa ndúcú chindahá yehe cuhun í indayá. Ñañehe íni cuachi cañehe a yehe cuhun í indayá saha ley. Xihín ña yóho cándaá ini í ña quini ndivaha cúú cuachi ta váha ndivaha cúú mé ley.

¹⁴ Sa xíní yo ña cúú ley cuénta Ndióxi joo yehe cúú u in da cája cuachi ta cája í ña núu jáchi mé cuachi cómi a cuénta sahá í.

¹⁵ Co cándaá ini í ña cája í jáchi cúní cája í ña váha joo co cája í ña. Ña cája í quéa mé ñaha ña cándají í.

¹⁶ Tá cája í cuachi ña co cúní cája í já cándaá ini í ña váha cúú ley.

¹⁷ Mé a ndaa co cúní cája í cuachi joo cuachi ndícaan ini í cúú á ña jácahan yehe cája í ña.

¹⁸ Sa xíní ña co ndeé yiquí cuñu í cája ña váha jáchi coó ña váha ndícaan ini í. Vatí cúní cája í ña váha joo co sahan mé á cája í ña.

¹⁹ Cúní cája í ña váha joo co cája toho í ña. Ña cája í cúú á ña núu ña co cúní cája í.

²⁰ Cája í ña co cúní cája í já cándaá ini í ña cuachi ndícaan ini í quéa chindahá nihni a yehe cája í ña núu.

²¹ Cándehé ndo ña yóho: Vatí cúní cája í ña váha joo cája í ña núu jáchi ña cán cuití va xínu ini í cája í.

²² Janda ínimá í xinu coo ña catóo í cája í ña cáhan ley Ndióxi.

²³ Joo ndícaan inga ñaha ini í ta cáni táhan mé ñaha cán xihín xíní túní í. Ta mé ñaha ndícaan ini í cúú á cuachi. Ta cándéé cuachi xihín í já sáhdá a chuun nuú í.

²⁴ Ndáhvi ñahá ñacuu u. Yo cuu jácau yehe ná a cája ga í cuachi ña cañehe yehe cuhun í indayá.

²⁵ Ndíquiahva í ndixahvi nu Ndióxi jáchi xihín ña ñacaja Jesucristo, xitoho í cuu jácau Ndióxi yehe já ná a cája ga í cuachi. Ña cán quéa cándaá ini í ña ndítahan cája í ña sáhdá ley Ndióxi joo cuachi ndícaan ini í sáhdá chuun nuú í.

8

Ndíco í in íchi nu cája í ña cúní ínimá yíi Ndióxi

¹ Ta sahá ña in ñanduú xihín Jesucristo sahá ña cán quéa a chínúu Ndióxi cuachi jata yo viti. Jáchi co cája ga í ña xíca ini yiquí cuñu í. Ña cája í cúú ña cúní ínimá yíi Ndióxi.

² Jáchi xihín ña ñacaja Jesucristo najácau ínimá yíi Ndióxi mí ta ñasahnu a cuachí já ná a cuhun yó indayá.

³ Coó ñacuu cája í tóco ndihi ña sáhdá ley Moisés ña cán quéa coó ñacuu nduu ndaa yó nu Ndióxi xihín mé ley. Ña

cán quéa nacaja Ndióxi inga ñaha tá nachindahá mé á Jesucristo, jahyi a. Nanduu Jesucristo in ñayivi ta tá quiahva cácu ñayivi quiahva já nacacu Jesucristo ñuyiví. Ta tá naxihí mé á ndica crúxu já nachahvi a saha tóco ndihi cuachi sahá ña cán quéa co sáhdá ga cuachi chuun nu yo.

⁴ Ta nacaja Ndióxi ña yóho já ná cuu xinu coo í caja í ña sáhdá ley mé á tá ndáca ínima yii Ndióxi mí. Jín va caja í viti jáchi co ndúu ga yó ndahá cuachi.

⁵ Ñayivi, na cája ña xíca ini yiquí cuñu, na cán cúu na ndícani cuahá ini sahá yiquí cuñu. Joo na cája ña cúní ínima yii Ndióxi na cán cúu ná ndúcú jácavatá na Ndióxi.

⁶ Tá ná ndicani cuahá ini na sahá ña cúní yiquí cuñu na já quéa cuhun na indayá. Joo tá ná ndicani ini na sahá ña cúní ínima yii Ndióxi já quéa coo va ha ini na ta ñehe táhvi ná cuhun na indiví.

⁷ Joo ñayivi ndícani ini saha yiquí cuñu, na cán cúu ná na ihvi Ndióxi jáchi co cúní na caja na ña cáchi ley Ndióxi ta ni a cuú caja na ña.

⁸ Sahá ña cán quéa tá cómí cuachi cuénta saha ná já quéa a cuú caja na ña cájii ini Ndióxi xihín.

⁹ Ta tá mé a ndaa ndácaan ínima yii Ndióxi ini ndó já quéa co ndíco ga ndó íchi cuénta ña núu, ña nasacaja ndó jihna. Ta viti ndíco ndó íchi va ha ta cája ndó ña cúní Ndióxi. Jáchi ndá na co ndácaan ínima Jesucristo ini, na cán co cúu ná cuénta mé á.

¹⁰ Tá ndácaan Jesucristo ini ínima ndo vaxi quivi quivi yiquí cuñu ndó sahá cuachi nacaja ndó. Joo mé a ndaa catacu ínima ndo nu ín Ndióxi anda ama cáa quivi jáchi nanduu ndaa ndó nu Ndióxi nacaja mé á.

¹¹ Nacaja ínima yii Ndióxi ña ná nditacu tucu Jesucristo ta tá ndácaan ínima yii Ndióxi ini ínima ndo já tandaa quivi caja mé á ña ná nditacu tucu yiquí cuñu ndó saha mé ínima yii Ndióxi ndícaan ini ndó.

¹² Candehé ndó ñani mí i, na cúu cuénta Jesús. Co ndítahan nu ndó caja ndó ña núu, ña xíca ini ndó caja ndó.

¹³ Jáchi tá ndinuhu ini ndó caja ndó ña núu, ña xíca ini ndó já quéa ndítahan nu ndó cuhun ndó indayá. Joo tá xihín ndée ínima yii Ndióxi jándihi ndó sahá ña núu xíca ini

ndó caja ndó já quéa vaxi quivi cuhun ndó coo ndó xihín mé á anda ama cáa quivi.

¹⁴ Ndá na nandiquiahva mé ndáha ínima yii Ndióxi ña ná candaca a na, mé a ndaa táhyí cúu ná jahyi Ndióxi.

¹⁵ Nasahan Ndióxi ínima yii mé á nu ndo joo coo nasahan ña nu ndo ña ná catavi nihni a ndohó ta já quixi ña jáyihví a ndohó. Nasahan Ndióxi ínima yii mé á nu ndo jáchi xihín ña yóho ndája Ndióxi ndohó jahyi mé á ta saha mé ínima yii yóho cáhan yó xihín Ndióxi ta cáchi yo: “Tátá maní i.”

¹⁶ Ta cáchi ínima yii Ndióxi xihín ínima yo ña mé a ndaa cúu yó jahyi Ndióxi.

¹⁷ Ta sahá ña cúu yó jahyi mé á sahá ña cán quéa ñehe táhvi mí ví ndiquehé ña nacachi Ndióxi quiahva nu yo. Ta sa mé ña ñehe táhvi yo yóho tahnda java ña xihín Jesucristo. Tá ta mé a ndaa táhyí ndoho iní xihín á já quéa tá nandihí cohó coo í xihín mé á indiví ta cán ndicáhnu í xihín á.

¹⁸ Coó a caja toho a tá ná ndoho ini í ñuyiví yóho jáchi vaxi quivi ndicáhnu ndivaha í xihín Jesucristo caja Ndióxi.

¹⁹ Tóco ndihi ña nacava ha mé á ndátí ndihi a ta ndiáva iní a ña ná tandaa quí quivi cachi Ndióxi ndá ñayivi cúu cuénta mé á.

²⁰ Nacaja Ndióxi ña ná ndoho ini tóco ndihi ña nacava ha mé á. Mé ñaha nacava ha Ndióxi co cúní a ndoho ini a joo sácú ini Ndióxi ña ná ndoho ini tóco ndihi ña nacava ha mé á. Ta ndátí tiaha ndihi ñaha

²¹ anda tandaa quivi caja Ndióxi ña janí ña já ná a cómí ga cuachi cuénta sahá já ná a tívi ga ña. Ta ñúchí ndivaha mé quiví já tá cajii ini tóco ndihi ñaha nacava ha Ndióxi xihín tóco ndihi na cúu jahyi mé á. Jáchi a cómí ga cuachi cuénta saha ná.

²² Sa xíní yo ña janda sanahá ndivaha ta anda viti tána ndivaha tóco ndihi ña nacava ha Ndióxi ta ndóho ndivaha ini a tátuhun ndóho ini in ñáñáha tá ndúcú ndée ña cacu jahyi ña.

²³ Ta quiahva já ndóho ri ini mí ví. Ínima yii Ndióxi cúu ña sahan tiaha mé á nu yo já ná candaa iní ndá quiahva ín ña quiahva mé á nu yo chága chí nuu. Ta tána ndivaha í anda quiahva ná yaha ña ndóho iní. Ta ndátí tandaa quivi ndaja Ndióxi tóco ndihi

mí ná nduú jahyi mé á já ná ndiquehé yiquí cuñu saá.

²⁴ Najácaacu Ndióxi mí jáchi nacandeeé ini mé á vatí coó naxini ña nacachi mé á quiahva nu yo. Tá xini cáxi yo in ñaha já cándaá ini ña co xini ñúhú toho candatí quehé ña jáchi co xini ñúhú candatí ñaha cómi yo.

²⁵ Joo tá ná candatí in ñaha ña co xini yo já queá co ndíhi ini nani ndátí ña.

²⁶ Tá cávitá ini já chindeé ínima yii Ndióxi mí jáchi co tiáhva í ndaja caça tahví yo nu Ndióxi tá quiahva ndítahan caça tahví yó nu á. Joo sa mé ínima yii Ndióxi yóho tána ta cáhan xihín tuhun ña a cuú cahan yo. Já caja mé á tá xica tahví a nu Ndióxi saha yo.

²⁷ Ta sa xini Ndióxi ña cáhvi ini ta sa xini a ña xica tahví ínima yii mé á saha yo. Ña cuni Ndióxi caja saha yo ña jan queá xica tahví ínima yii mé á saha yo, na cúu ñayivi cuéntá mé á.

Ni in ñaha a cúu cahnu a mí tá cándeeé ini Jesucristo

²⁸ Ta sa xini yo ña tóco ndihi ña ndóho í ndaja Ndióxi ña ná nduu a ña vaha tá quíhvi ini mé á. Jáchi mí cúu yó na sa nasacu ini Ndióxi ña ná caja í ña cuni mé á.

²⁹ Ndá ñayivi nacaxi Ndióxi anda saha nacaxi a na ña ná nduu na tátuhun Jesucristo, mé á cúu jahyi Ndióxi. Jáchi cuni Ndióxi ña ná nduu Jesucristo jini nuú ndihi na cúu cuéntá mé á.

³⁰ Ta nacana Ndióxi na nacaxi a ña ná candeeé ini na mé á. Ta nacaja mé á ña ná nduu ndaa na nu á. Ta vaxi quivi caja mé á ña ná ndináhnu ndihi na cán xihín á.

³¹ Ndía cachí sahá ña yóho. Ni in túhún ñaha a cúu cani táhan xoho ta ni a cúu quee vaha xoho jáchi cuahan Ndióxi xoo í.

³² Ta coó nacajíhnda Ndióxi jahyi a jáchi nandiquiahva Ndióxi Jesucristo, jahyi a ña ná quivi a saha yo. Xihín ña yóho cándaá ini ña co ndáhvi cúu ini a quiahva tóco ndihi ñaha nu yo.

³³ Yo já cuu chícáan cuachi jatá na nacaxi Ndióxi. Ni in ñayivi a cúu chícáan cuachi jatá na jáchi sa mé Ndióxi nandaja mé á na ñayivi ndaa nu á.

³⁴ Yo já cuu jácojo cuachi jatá na cúu cuéntá mé á. Ni in ñayivi jáchi naxihí Jesucristo saha yo. Nanditacu tucu a ta ín coo a xoo cuáha Ndióxi indiví xica tahví a nu Ndióxi saha yo.

³⁵ Yo já cuu caji nuu nu Jesucristo quíhvi ini a mí. Ni in ñaha a cúu caja ña jándacoo Jesucristo ña quíhvi ini a mí. Vatí ná ndoho ndivaha ini ta vatí ná quixi ña yíhvi yo ta vatí ná ndicuíta na caja xixi na xoho ta vatí ná quixi joco ta vatí janda jáhma yo ná ndimaní ta vatí tondóho vaxi nu yo á ñayivi ndúcú cahní mí joo ni in ña yóho a cúu caji nuu a nu Jesucristo ña quíhvi ini a mí.

³⁶ Já cáhí tuhun Ndióxi já: Saha Ndióxi sácú ini ñayivi cahní na ndehe ndijáá ní quivi.

Tá quiahva cája na xihín ndicachi, rí cuhun quivi quiahva já cája na xihín nde, cáhí tuhun Ndióxi.

³⁷ Vatí ndóho í tóco ndihí ña yóho joo quee vaha tá quee vaha í caja Jesucristo jáchi quíhvi ini a mí.

³⁸ Sa xini vaha í ña ni in ñaha a cuú caja tavá mí ndáha Jesucristo, mé a quíhvi ini mí. Ta coó a caja toho a á tacute yo á sa naxihí yo. Ni táto Ndióxi ni ña sáhdá chuun nuú ñayivi ta ni ña ndóho ini viti ni ña ndoho ini chí nuu

³⁹ ta ni in ñaha ín indiví ta ni in ñaha ín tixi ñúhu ta ni in ñaha nacavaha Ndióxi a cuú tavá mí ndáha Ndióxi, mé a quíhvi ini mí. Ta najánaaha Jesucristo, xitoho í nu yo ña quíhvi ndivaha ini Ndióxi mí.

9

Ñayivi naquixi chichi Israel cúu na nacaxi Ndióxi

¹ Ña ndaa cúu ña cáhan í xihín ndó viti ta co cávaha í ña túhún jáchi cúu u cuéntá Jesucristo. Sáhdá ínima yii Ndióxi chuun nu xini túní í sahá ña cán queá co cáhan í ña túhún.

² Ín cuéha ndivaha ini í ta já táhvi ndivaha ini í sahá na Israel.

³ Mé a ndaa cuni yehe chindeé e na naquixi chichi nuú naquixi mí í ña ná candeeé ini na Jesucristo. Ta janda ín tiáhva í cacuu u da chícáan na cháhan jatá tá ta xihín ña yóho cuu cacu ndaa ínima ná. Joo a cuú caja í ña.

4 Mé na cán naquixi na chichi Israel ta nacaxi Ndióxi na já ná nduu na ñayivi cuéntá mé á. Najánaḥa Ndióxi nu ná ndá quiahva cáhnu cúu mé á. Ta nasahan tuhun a nu ná ña nasacu ini a caja saḥa ná. Nasahan Ndióxi ley Moisés nu ná ta najánaḥa mé á na ndaja ndítahan nu ná caja cáhnu na mé á. Nacaxi tuhun a xihin ná saḥa ñamaní caja mé á xihin ná chí nuu.

5 Ta ñayivi Israel naquixi na chichi na nasanduu sanahá. Ta nacacu Jesucristo chichi mé na cán ta nanduu a in ñayivi. Chí anda ama cáa quivi ná caja cáhnu yó Jesucristo, mé á cúu Ndióxi, mé á cómi cuéntá saḥa tóco ndihi ñaha. Já ná coo.

6 A juú cahán ndo ña coo najáxinu Ndióxi tuhun a nasahan nuú na Israel. A juú ndihi ñayivi jan cúu na cuéntá Ndióxi vatí naquixi na chichi Israel.

7 A juú tóco ndihi na naquixi chichi Abraham cúu ná cuéntá Ndióxi jáchi janda saḥa nacachi Ndióxi xihin dá: “Ñayivi cuaha quixi chichún cacuu na jahyi Isaac”, cáchi a xihin Abraham.

8 Ña yóho cúni cachi a ña ni in túhún ñayivi co cúu ná jahyi Ndióxi saḥa ña naquixi na chichi Abraham. Na cúu ndusa jahyi Ndióxi cúu ná naquixi chichi Isaac jáchi cuéntá Isaac najáxinu coo Ndióxi tuhun nasahan nu Abraham.

9 Sanahá ndivaha nasahan Ndióxi tuhun a nu Abraham já cáchi a já: “Xinu cuia já quixi tucu u ta cacu jahyi taa ñájhún, Sara.”

10 Candehé ndo ná ndicani i nu ndo ña nayaha chága chinuu. Isaac, da cúu tásáhnú jícó yo nasacuu da tátá ndíví taa valí jahyi Rebeca.

11 Tá cámaní cacu taa cuatí jahyi na já nasacu ini Ndióxi caxi a in a ta cacu xóo a inga vatí a ñaha caja ndíví taa valí ni ña vaha ni ña núu. Já nasacu ini a caja

12 ta já nacachi a xihin Rebeca: “Jahyún, da cacu chí ivi cahnda chuun nuú da cacu nu cuítí.”

13 Ta já cáchi tucu tuhun Ndióxi já saḥa jahyi Rebeca: “Nacaxi i Jacobo, da nacacu chí ivi caja i ñamaní xihin dá joo nasacu xóo i Esaú, da nacacu nu cuítí.” Já nacaja Ndióxi jáchi já nasacu ini a caja.

14 Ama ná cachi rí ña co caja ndaa Ndióxi. A cachi toho í já.

15 Já nacachi Ndióxi xihin Moisés sanahá: “Tahvi ini i saḥa ñayivi joo mí i caxi i yo tahvi ini i saḥa. Ta tahnda ini i saḥa ñayivi, joo mí i caxi i yo tahnda ini i saḥa”, nacachi Ndióxi sanahá.

16 Ña cán quéa co caja Ndióxi ña cúni ñayivi ta a cúu caja ndusa ñayivi xihin á ña ná tahnda ini a saḥa ná jáchi táhnda ini a saḥa ñayivi, na cúni mé á tahnda ini a saḥa.

17 Já cáchi tuhun Ndióxi já xihin da cúu rey nuú nación Egipto: “Nandaja i yohó rey jáchi cúni jánaḥa i nuun ña cuu caja i tóco ndihi ñaha tá cúni já ná candaa ini tóco ndihi ñayivi ndúu ñuyíví ña cáhnu ndivaha cúu yehe”, nacachi Ndióxi.

18 Ña cán quéa tá cúni Ndióxi tahnda ini a saḥa ñayivi já cuu tahnda ini a saḥa ná. Ta tá cúni a ndaja táhyí a ínimá ná já cuu ndaja táhyí a ña.

19 Joo a cuú cachí ña co caja ndaa Ndióxi tá cáchi a ña cómi yo cuachi. Vatí sácú ini Ndióxi ña caja in in ñayivi joo co chindahá a na caja na cuachi.

20 Co ndítahan nuú ñayivi ndaja ndichi na Ndióxi saḥa ña caja mé á. Jáchi sa xini yo ña co ndítahan nuú in quiji cachi a xihin da cávaha ñaha: “Co cátoó i coo i tá quiahva nacavaha ndó yehe.”

21 A cuú cachi quiji cán já jáchi mé da cávaha quiji cán, cávaha da ña tá quiahva cúni mé dá. Xihin in mbohla loho ñuhú quiji cuu cávaha da in quiji cacuu a javí á in quiji cuéntá yávi núhu.

22 Ta quiahva já caja Ndióxi xihin ñayivi. Ín tiaḥva mé á jánaḥa nu ná ña xójo ndivaha ini a saḥa cuachi na. Ta ín tiaḥva mé á jánaḥa nu ná ña cuu caja mé á tóco ndihi ñaha. Joo nacaja ndeé ini Ndióxi ta nasandati a jándoho a ini ñayivi vatí nanditahan nu ná ndoho ini na saḥa cuachi na.

23 Mé a ndaa táhnda ini Ndióxi saḥa ñayivi ta cúni a jánaḥa nu ná ña cáhnu ndivaha cúu mé á ta cúni a jánaḥa nu ná ndá quiahva quihvi ini a na. Anda sanahá ndivaha sácú ini a jánaḥa nu yo ndá quiahva cáhnu cacuu yó nu mé á.

²⁴ Nacaxi a ñayivi tañu na naquixi chichi Israel ta nacaxi mé á ñayivi tañu na coo naquixi chichi Israel. Ta mí cúu yó na nacaxi a.

²⁵ Já nacachi Ndióxi já sanahá ta já nacahyí Oseas ini tuhun Ndióxi:

Tandaa quivi caxi yehe ñayivi, na coo cúu cuéntá mí i ta ndaja i na cuéntá mí i.

Ta na coo naquihvi ini i jihna quihvi ini i na viti.

²⁶ Ta sa mé nu ndúu ñayivi, na coo nasacuu cuéntá Ndióxi,

cán cuhun mé á caxi a na ta caja ña ná nduu na cuéntá mé á jáchi cúu á in Ndióxi tácu, já cáchi tuhun mé á.

²⁷ Ta sahá na naquixi chichi Israel já nacachi Isaías: “Vatí ndicuahá ñayivi Israel tá quiahva cuahá ñuti yuhú tañuhú joo chá va cacuu na cacu ndaa ínima.

²⁸ Jáchi jonáa va jáxinu coo Ndióxi tuhun a ta anda jávi caja vii a saha tóco ndihi ñayivi ndúu ñuyívi”, nacachi Isaías.

²⁹ Ta já nacachi tucu Isaías já sanahá:

Tá quiahva nacaja Ndióxi najándihi a sahá ñayivi ñuu Sodoma xihín ñuu Gomma quiahva já caja Ndióxi jándihi a saha yo, nduu.

Joo sahá ña natahvi ini Ndióxi sahá na Israel sahá ña cán quea coo najándihi a saha ná, já cáchi tuhun Ndióxi.

Nditahan nuú na Israel candeé ini na Jesucristo

³⁰ Ña cán quea ndícani i nu ndo sahá ñayivi, na coo naquixi chichi Israel. Co ndínducú na nduu ndaa na nu Ndióxi joo tá nacasahá na candeé ini na Jesucristo já nacaja Ndióxi ña ná nduu ndaa na nu mé á.

³¹ Joo ñayivi Israel cája na ña sáhdá ley Moisés xihín ndinuhu ini na jáchi cáhán na cuu nduu ndaa na nu Ndióxi sahá ña sácú vaha na ley Moisés. Joo coo nacuu nduu ndaa na nu Ndióxi xihín ña yóho.

³² Já nandoho na Israel jáchi nanditahan nu ná candeé ini na Jesucristo. Xihín ndinuhu ini na cája na ña cáchi ley joo coo nacuu nduu ndaa na nu Ndióxi xihín ñaha cája na. Ña cán quea cúu ná tátuhun in na nacachihin saha xihín yuu cáhnu.

³³ Jáchi cáchi tuhun Ndióxi ña cúu Jesucristo tátuhun yuu cáhnu nu cáchihin saha ñayivi. Já cáchi tuhun Ndióxi já:

Nasacu yehe in yuu tóto cáhnu ñuu Sión ta xihín yuu cáhnu cán cuaha ná cachihin saha.

Joo ndá na ná candeé ini mé a nachindahá i, na cán cúu ná na a cácahan nuu, já nacachi tuhun Ndióxi.

10

¹ Cuni johu vaha ndó, ñani i, na cúu cuéntá Jesús. Jáchi ndinuhu ini i xíca tahví i nu Ndióxi sahá ñayivi Israel ña ná candeé ini na Jesús já ná cuu jácacu Ndióxi na nuú cuachi na.

² Mé a ndaa ná cahan i xihín ndo ña cája cáhnu na Israel Ndióxi xihín ndinuhu ini na joo coo cándaá caxí ini na ña cúní Ndióxi caja na.

³ Jáchi coo xíní na ndaja cája Ndióxi ña ná nduu ndaa ñayivi nu mé á sahá ña cán quea ndúcú na nduu ndaa na nu mé á xihín ña cája mé va na. Ta coo cúní na ndiquiahva na mé ná ndáha Ndióxi ña ná caja na ña nasacu ini mé á caja na.

⁴ Coo xíní na ña naquixi Jesucristo ta naxihí a saha yo já najáxinu coo a caja ña cáchi ley ña ná nduu ndaa tóco ndihi na candeé ini mé á.

⁵ Sanahá ndivaha nacahyí Moisés sahá ñayivi, na cúní nduu ndaa nu Ndióxi xihín ley Moisés. Já cáchi a já: “Ndá na coo cómi cuachi nu Ndióxi, na cán cuu nduu ndaa nu mé á ta jácacu a na”, já nacahyí da.

⁶ Joo tá ná jácacu Ndióxi mí sahá ña candeé ini mé á já quea coo xíní ñuhú cuhun yo indiví jánuu í Jesucristo ña ná nuu a chindeé a mí jáchi sa nacaja mé á ña.

⁷ Ta coo xíní ñuhú cuhun yo nu ndúu ínima ndii ña ná ndiquehé Jesucristo tañu na sa naxihí jáchi mé Jesucristo sa nanditacu tucu a.

⁸ Coo xíní ñuhú cuhun xíca nahá yo ndínducú yo Jesucristo jáchi ín yati ndivaha mé á nu yo jáchi ín a xoho. Ta mé tuhun cahan nde yóho cúu á tuhun cahan saha Jesucristo já ná candeé ini ndó mé á.

⁹ Ta tá cachún ña cúu Jesús xitohún ta tá cándúsún xihín ndinuhu ínimum ña najánditacu Ndióxi Jesús tañu na naxihí já quea cuu cacu ndaa ínimum.

10 Jáchí tá cándéé ini ñayivi Ndióxi xihín ndinuhu ini na já nduu ndaa na caja Ndióxi. Ta tá cáhan na xihín java ga ñayivi ña cándéé ini na mé á já quéea cuu cacu ndaa ínimá ná.

11 Já cáchí tuhun Ndióxi já: “Ndá na ná candeé ini Jesús a xínu toho quivi cahán na ña najándahvi Ndióxi na.”

12 In cúu tóco ndihi ñayivi nu Ndióxi. Tá quiahva jácacu Ndióxi na naquixi chichí Israel quiahva já jácacu a na coó naquixi chichí Israel. Jáchí sa mé Ndióxi cán cúu Ndióxi nu tóco ndihi ñayivi ta co ndáhvi cúu ini a quiahva ñaha nuú na xíca tahví nu mé á.

13 Já cáchí tuhun Ndióxi: “Ndá na ná cacá tahví nu Ndióxi ña ná chindeé a na, na cán cacu ndaa ínimá.”

14 Ta ndaja caja na cacá tahví na nu Jesús tá tá cámaní candeé ini na mé á. Ta ndaja caja na candeé ini na mé á tá a ñaha cuni johó na tuhun vaha cáhan saha Jesús. Ta ndaja caja na cuni johó na tuhun vaha saha Jesús tá cámaní cuhun in na caxi tuhun na ña nu ná.

15 Ta ndaja caja na cuhun na cáhan na tuhun Ndióxi xihín ná tá tá co íin in na chindahá na cuhun na. Já cáchí tuhun Ndióxi já: “Ndaja ñúchí chá tá xínu coo na ñéhe tuhun vaha saha Ndióxi ña ná coo vaha í xihín mé á.”

16 Joo a juú ndihi ñayivi cándúsa tuhun Ndióxi. Ña yóho cúu á tá quiahva nacachi Isaías: “Ndióxi, mé ndó cúu ndó xitoho nde. Chá cuití ñayivi cándúsa tuhun nacahan nde xihín ná.”

17 Jáchí jihna ñúhú cáhan na tuhun vaha saha Jesucristo nuú ñayivi ta xihín ña xíni johó na cán jáxínu ini na xihín á. Anda jáví cásahá na cándéé ini na mé á ta cája na ña cúni a.

18 Á sa naxini johó na tuhun vaha cáhan saha Jesús. Ajan. Sa naxini johó na ña. Jáchí já cáchí tuhun Ndióxi já:

Nasahan na cahán na tuhun Ndióxi nuú ñayivi,
ta níí cúu sahá ñuyívi naxínu tuhun cáhan na, já cáchí tuhun Ndióxi.

19 Á nacandaa ini ñayivi Israel ña yóho. Ajan. Cándaa vaha ini ná ña. Jáchí já nacahyi Moisés sanahá:

Ndióxi quéea nacachi a: Caja i ña ná candúsa na tóho yehe já ná cahihvi ini na Israel.

Ta cojo ini na xihín na tóho sahá ña cája i ña ná candúsa mé na tóho cán yehe, nacachi tuhun Ndióxi.

20 Xihín ña yóho nasahan ndeé ini Isaías cahyi da ña nacachi Ndióxi tá nacachi a já: Mé na co ndínducú yehe, na cán cúu na nandiñehé yehe.

Ta najánaha i mí i nu ná vatí coó nandaca tuhun na sahá i, nacachi tuhun Ndióxi.

21 Joo já nacachi Ndióxi sahá ñayivi Israel: “Níí tiempo cúni ndiquehe vaha i ñayivi Israel joo co cúni na quixi na nuú i jáchí sáá ini na ta co cúni na caja na ña cúni”, nacachi tuhun Ndióxi.

11

Cája Ndióxi ñamaní xihín ñayivi Israel

1 Ta viti ná ndaca tuhún i ndohó ña yóho: Á cáhan ndo ña najándacoo ndáha Ndióxi ñayivi Israel. A juú ña ndaa cúu á jáchí sa mé yehe cúu u da Israel, da naquixi chichí Abraham ta naquixi i chichí Benjamín, da nasacuu jahyi ñání jícó Abraham.

2 Janda mé saha nacachi Ndióxi ña nacaxi mé á na Israel cacuu na cuéntá mé á ta co cándají a na viti. Sa xíni ndó ña nacachi tuhun Ndióxi sahá da nasacuu profeta Elías. Mé da yóho tá naxíca tahví da nu Ndióxi já najácojo da cuachi jatá na Israel.

3 Já nacachi da já: “Cádehé ndo Ndióxi, xitoho i. Sa nasahní na profeta cuéntá mé ndó ta nandicani na nu náa ndo. Ta viti nú laá in túhún yehe cuití va cája ña sáhdá ndo. Ta ndúcú na cahní na yehe”, já nacachi Elías xihín Ndióxi.

4 Ta já nacachi Ndióxi xihín dá: “A juú in talaá yóhó cája ña cúni jáchí ndúu yíi va usa mil ta cája ña cúni ta coó nacaxití na nuú tijnú yúú Baal”, nacachi Ndióxi xihín dá.

5 Quiahva já íin a viti. Ndúu chá na cája ña cúni Ndióxi jáchí nacaja Ndióxi ñamaní xihín ná ta nasacu ini a jácacu a na.

6 Nacaxi Ndióxi na jáchí natahvi ini a saha ná. Coó nasacuu a sahá ña nacaja na jáchí tá ná cacuu a sahá ña cája na já co cúu

ga ñamaní Ndióxi ta ña yóho cúú ña cúní Ndióxi caja.

⁷ Ña cán queá cuahá ndivaha ñayivi Israel coó nanduu ndaa na nu Ndióxi sahá ña ñacaja na jáchi nandaja táhyí na ínima ná. Joo na ñacaxi Ndióxi, na cán cúú na nanduu ndaa nu mé á.

⁸ Já cáhí tuhun Ndióxi já: “Co cúní na candúsa na Ndióxi sahá ña cán queá ñasaji Ndióxi xíní túní ná chí in ndeé. Ta quiahva já ndaa na janda víti jáchi co cándaá ini na ña cáhan Ndióxi xihín ná.”

⁹ Já ñacahyí David sanahá:

Ná cáhan na ña cuahan vaha na ichí Ndióxi sahá cuahá ñaha cómi na, ta ná ndoho ini na sahá cuachi cája na.

¹⁰ Ta ná cuáá na já ná a cúní na, ta ná nditojo jata ná ní tiempo sahá ña vee ndójo na, ñacachi David.

Jácaacu Ndióxi na coó ñaquixi chichi Israel

¹¹ Ta viti ná ndaca tuhún i ndohó ña yóho:

Á cáhan ndo ña a cuú cacu ndaa ínima na Israel. A juú ña ndaa cúú á. Jáchi vatí sáá ini na Israel ta vatí co cúní na candeé ini na Jesús joo xihín ña ñacaja na yóho nanuna nuú na tóho cuni johó na tuhun vaha saha Jesús ta já cuu cacu ndaa ínima ná nu mé á. Ta sahá ña yóho casahá na Israel cahiví ini na xihín na tóho.

¹² Ñacaja Ndióxi cuahá ñamaní xihín tóco ndihi na tóho jáchi ñacaja ña ná cuu ndihvi na íchi cuéntá mé á sahá ña najándacoo na Israel íchi cuéntá mé á. Joo cuaha chága ñamaní caja Ndióxi xihín tóco ndihí tá ná xinu quiví ndiquehe na Israel íchi cuéntá mé á.

¹³ Joo ín in ñaha ña cúní cáhan i xihín ndo, na tóho. Ndióxi queá nachindahá yehe tañu ndohó, na coó ñaquixi chichi Israel ta chuun cáhnu ndivaha queá ndójo i xíní i.

¹⁴ Jáchi ña cúní mí i queá ná cahiví ini na Israel xihín ndo sahá tuhun Ndióxi ta já ná ndinducú mé ná Ndióxi já ná cacu ndaa ínima na Israel nu Ndióxi jáchi mé ná cúú ná chichi nuú ñaquixi mí i.

¹⁵ Ñasacu xóo tóo Ndióxi na ñaquixi chichi Israel jáchi ñasacu ini a jándique táhan máni á tóco ndihi ñayivi ndúu ñuyiví xihín mé á. Ta tá ná xinu quiví casahá na Israel ndiquehe na tuhun Ndióxi cacuu a

in ñaha ñúhí ndivaha. Cacuu a tátuhun casahá nditacu tucu na jáchi viti cúú ná tátuhun na ñaxihí jáchi coó ñaxeén na ndiquehe na tuhun Ndióxi.

¹⁶ Abraham ñasacu da cuéntá Ndióxi ña cán queá jahyi da, na ñacacu chichi da cúú ná ñayivi cuéntá Ndióxi. Abraham, da cúú cuéntá mé á cúú dá tátuhun yóho in yitó olivo. Ta ñayivi ñacacu chichi da cúú ná cuéntá mé á ta cúú ná tátuhun ndáha mé yitó olivo cán.

¹⁷ Cúú á tátuhun ñasahnda Ndióxi java ndáha, dó vaha ta nachitivi ndaa mé á ndáha yitó olivo yúcú mé nuú ñasahin ndáha cán. Ta viti quiahva dó ndeé nu ndáha yitó olivo yúcú cán ña ná catacu dó. Quiahva já ñacaja Ndióxi ñasacu xóo a na Israel ta ñacaja mé á ñamaní xihín mé ndó, na tóho já ná nduu ndó cuéntá mé á. Ta viti cája Ndióxi cuahá ñamaní xihín ndo tá quiahva cája xihín na Israel.

¹⁸ Joo ndohó, na cúú na tóho a cáhan ndo ña vaha chága mé ndó a juú ga na Israel. Co ndítahan cáhan ndo já. Co cúú ndó tátuhun yohó yító jáchi cúú ndó tátuhun ndáha do. Ta tá co yóho dá já queá a cúu catacu ndáha do. Sahá ña cán queá co ndítahan caja cáhnu ndó mé ndó.

¹⁹ A váha cahvi ini ndó ña náhnu chága mé ndó nu Ndióxi a juú ga na Israel sahá ña ñasacu xóo mé á na Israel ta ñasuna a íchi nu ndohó candeé ini ndó mé á.

²⁰ Candehe ndo. Ñasacu xóo Ndióxi na Israel sahá ña coó ñacandeé ini na mé á ta nandacaxi a ndohó sahá ña candeé ini ndó mé á ña cán queá co ndítahan caja cáhnu ndó mé ndó. Ña ndítahan caja ndó queá cayihví ndo Ndióxi.

²¹ Xíní ñúhú ndicuhun ini ndó ña cuu jácaxoo tucu Ndióxi ndohó. Coó ñatahnda ini a jándacoo xóo a na Israel, mé na ñacaxi á. Sahá ña cán queá cachí ga ví mé ndó, na tóho ndaa náha caja Ndióxi cacu xóo tucu a ndohó.

²² Candehe ndo jáchi táhvi ini Ndióxi sahá ñayivi tá candeé ini na mé á joo cuhe ndivaha mé á xihín na sáa ini. Ña cán queá tá co candeé ini ndó mé á ta ni co quihvi ini ndó a já cacu xóo a ndohó tá quiahva ñacaja xihín na Israel.

23 Joo tá ná ndihvi na Israel íchi Ndióxi candeeé ini na mé á já quéa ndiquehe tucu Ndióxi na jáchi cuu caja mé á tóco ndihi ñaha.

24 Nandiquehe Ndióxi ndohó vatí nasanduu xíca ndó nu á ta nandaja mé á ndohó cuénta mé á vatí cúu ndó na tóho. Mé ndó cúu ndó tátuhun ndáha yitó olivo, dó yúcú, dó narchitivi ndaa Ndióxi tóco dó vaha. Ta ña yóho quéa a cúu coo já, nduu. Joo nacaja Ndióxi já xihín ndo. Ta ndaa náha cuu caja tucu Ndióxi xihín na Israel ña ndiquehe tucu a na ta cacu tucu a na nu ndahá yító olivo, dó vaha nuú nasandaa na jihna.

Vaxi quivi tá candeeé ini na Israel Jesús

25 Ñani mí i, na cúu cuénta Jesús. Cúni ña ná candaá ini ndó ña nasacu ini Ndióxi caja chága chí nuu já ná a caja cáhnu ndó mé ndó. Cuahá na Israel nandaja táhyí na ínimá ná ta co cúni na ndiquehe na tuhun Ndióxi. Joo tá sa nandiquehe ndihi na tóho, na nasacu ini Ndióxi jácacu a anda jáví casahá na Israel ndiquehe na tuhun Ndióxi.

26 Anda jáví cacu ndaa ínimá ndihi na Israel. Ta já cáchi tuhun Ndióxi sahá ña yóho:

Ñuu Sión quixi in da jácacu ñayivi Israel, na naquixi chichi Jacob ná a caja ga na cuachi.

27 Ta jándoo i cuachi nacaja na, tá quiahva nacachi i xihín ná caja i, cáchi Ndióxi.

28 Tiempo viti cuahá ndivaha na Israel co cúni na tuhun vaha saha Jesús sahá ña cán quéa co cúni na Ndióxi. Joo caja na ña yóho ña ná nuná nu ndohó, na tóho já ná cuu candeeé ini ndó Ndióxi. Vatí caja na Israel ña yóho joo quíhvi ini tá quíhvi ini Ndióxi na sahá tuhun nasahan nu tásáhnu jícó na.

29 Tá sahan Ndióxi ña cáchi a quiahva nu yo já quéa co ndímani mé á nuú tuhun a ta co ndícó coo a candaá ña sahan nu yo. Ta ni co ndícó coo ini a tá sa nandacaxi a mí.

30 Sáa nasahin ini ndohó, na tóho sanahá joo viti nacaja mé á cuahá ñamani xihín ndó sahá ña sáa ini na Israel.

31 Ta vatí sáa ini na Israel viti joo xihín ña yóho núná nu ndohó, na tóho ndiquehe ndó

ñamani Ndióxi. Joo vaxi quivi tá tahvi ini Ndióxi sahá na Israel tá quiahva natahvi ini a saha ndohó, na tóho.

32 Nachicaji Ndióxi xini túni na Israel xihín na tóho ña ná nduu na na sáa ini. Nacaja Ndióxi ña yóho já ná cuu tahvi in nuú ini a saha tóco ndihi ñayivi.

33 Cáhnu ndivaha cúu tóco ndihi ñaha Ndióxi. Ndichí ndivaha jini mé á ta candaá ini a tóco ndihi ñaha. Ni in ñayivi a cuú ndicani na ña cáhvi ini Ndióxi. Ta ni in na a cuú candaá ini ña caja Ndióxi.

34 Já cáchi tuhun Ndióxi já: “Ni in ñayivi a cuú candaá ini na ña cáhvi ini Ndióxi. Ta ni in ñayivi a cuú jácahan na mé á caja ña ndítahan caja.

35 Coó ñayivi caja ñamani xihín Ndióxi ña ná ndaca na ña nu mé á”, cáchi tuhun Ndióxi.

36 Jáchi Ndióxi quéa nacavaha tóco ndihi ñaha ta ndúu a saha mé á ta ndúu a cuénta mé á. Anda ama caa quivi ná caja cáhnu i Ndióxi. Já ná coo.

12

Tácú yo caja chúun i cuénta Ndióxi

1 Natahvi ini Ndióxi saha ndó, ñani mí i, na cúu cuénta Jesús. Sahá ña cán quéa xíca tahvi i nu ndo ña ná ndiquiahva ndó mé ndó ndáha Ndióxi já ná cacuu a tátuhun joco ndó mé ndó nu Ndióxi. Ta caja ndó tóco ndihi ña cúni Ndióxi caja ndó ña ná cajii ini a. Jáchi xihín ña yóho náha ña mé a ndaa táhyí caja cáhnu ndó Ndióxi ta ña yóho cúu á ña ndítahan nu ndó caja ndó.

2 A caja ga ndó ña núu ña caja ñayivi ñuyiví. Quiahva ndó ñamani nu Ndióxi ña ná ndaja vii a xini túni ndo. Anda jáví candaá ini ndó ña cúni mé á caja ndó. Ta xihín ña yóho cuu caja ndó ña vaha ta cuu caja vatá ndó ini mé á ta cuu caja ndó ña cúni mé á xihín ndinuhu ini ndó.

3 Nacaja Ndióxi ñamani xihín i tá nacaxi a yehe. Ña cán quéa cahan i xihín ndihi ndó ña co ndítahan cahan ndo ña cúu ndó na náhnu ndivaha joo ná cahvi ini ndó ña ndaa saha mé va ndó. Ña ndítahan caja ndó quéa coto ndojó ndo mé ndó jáchi nasacu ini Ndióxi ña ná candeeé ini ndó mé á já ná cuu caja ndó ña cúni a.

4 Candehé ndó tá quiahva íin yiquí cuñu í. In túhún cúu yiquí cuñu í joo cuahá nuú ñaha ndáca ta sa jíin sa jíin chuun cája in in ña ndáca yiquí cuñu í.

5 Quiahva já íin tóco ndihí, na cúu cuéntá Jesús. Sa jíin sa jíin chuun cája in in í joo in va cúu yo xihín Jesucristo. Ta sa jíin sa jíin chuun cája in in í.

6 Sa jíin sa jíin chuun nasahan Ndióxi nuú in in í caja í ta mé á nasacu ini a ndá chuun quea quiahva nuú in in í. Sahá ña cán quea tá nasahan Ndióxi chuun nu ndó jáyaha ndó tuhun mé á nuú ñayivi, caja ndó ña xihín ndée mé á jáchi cándéé ini ndó a.

7 Ta tá nasahan Ndióxi chuun nu ndó ña ná chindeé ndó ñayivi já quea ndítahan nu ndó chindeé vaha ndó na. Ta tá nasahan Ndióxi chuun nu ndó jánaha ndó ñayivi já quea ndítahan nu ndó jánaha vaha ndó na.

8 Tá ta nasacu Ndióxi ini ínimá ndo quiahva ndó tuhun ndeé ini na, caja ndó ña xihín ndinuhu ini ndó. Ta ndá ñaha jása ndo nuú ñayivi xíní ñúhú cajii ini ndó jása ndó ña. Ta ndá ndó ndójo chuun xíní ñúhú coo cuéntá vaha ndó xihín chuun ndójo ndó. Ta ndá ndó cátóo chindeé ñayivi ná cajii ini ndó chindeé ndó na.

Ña ndítahan caja na cúu cuéntá Jesús

9 Xihín ndinuhu ini ndó quihvi ini táhan ndó. Candají ndó ña núu ta caja ndó ña vaha xihín ndinuhu ini ndó.

10 Xíní ñúhú quihvi ini ndó na cúu cuéntá Jesús jáchi cúu ná tátuhun na vehe ndó ta cajii ini ndó tá caja cáhnu táhan ndó.

11 Nducú ndeé ndo ta a cácuu ndó na jusá ta xihín ndinuhu ini ndó caja chúun ndó cuéntá Ndióxi, xitoho í.

12 Xíní ñúhú cajii ini ndó candatí ndó xinu coo tuhun nasahan Ndióxi nu ndo. Quiahva ndeé vaha ini ndó tá ndóho ini ndó ta a jándacoo ndó ña cacá tahví ndo nu Ndióxi.

13 Ndá ñaha ndímani nuú java ga na cúu cuéntá Jesús ná chindeé ndó na. Ta ndiquehe vaha ndó ñayivi xíto nihni ndóho.

14 Cacá tahví ndo nu Ndióxi sahá na cája xíxi xihín ndo ña ná caja Ndióxi ñamani xihín ná. Cacá tahví ndo nu Ndióxi saha ná ta a chícaan ndó cháhan jata ná.

15 Cajii ini ndó xihín na cájii ini ta cuacu ndó xihín na sácu.

16 In nuú quihvi ini táhan ndó. A cája ichi ini ndó. Ña ndítahan caja ndó quea jánuu ndáha ndó mé ndó xihín ñayivi ndáhvi, na co ndíñehe jícó mé. Ta a cáhan ndo ña cúu ndó na ndíchí ndivaha.

17 Tá cája núu na xihín ndó, a ndícó coo ndó caja ndó ña núu xihín ná. Joo nducú ndó quiahva caja ndó ña vaha já ná a cáhan núu ñayivi saha ndo.

18 A nducú ndo cani táhan ndó xihín ñayivi ta ndihí ini ndó coo vaha ndó xihín ndihí na.

19 Ñani mí i, na cúu cuéntá Jesús. Tá cája xíxi na xihín ndo a nducú ñehe toho ndó ña núu nu ná jáchi cojo ini Ndióxi xihín na cája já ta ndítahan nu mé á jándoho a ini na. Já cáchi tuhun Ndióxi: “Yehe ndítahan nuú jándoho i ini ñayivi, na cája ña núu”, cáchi Ndióxi.

20 Vaha chága ná caja ndó ña cáchi tuhun Ndióxi: “Tá cuico ñayivi, na co cúní ndohó quiahva ndó ná cuxu na. Ta tá ichi ini na co cúní ndohó quiahva ndó ticuii nu ná coho na. Tá ná caja ndó ña yóho já quea cacahan nuú na cán sahá ña núu cája na xihín ndó.”

21 A quiahva ndó ñamani quee vaha ña quini xihín ndó. Ña ndítahan caja ndó quea caja ndó ña vaha já ná cuu quee vaha ndó cahnu ndó ña quini.

13

1 Xíní ñúhú coo johó ndó nuú ña cáhan na jutixia xihín ndo. Jáchi sahan Ndióxi ñamani nuú na cán cahnda na chuun nuú ñayivi. Ta mé Ndióxi quea nasacu a na.

2 Ta ndá na co cúní cuni johó nu sáhdá na jutixia cúu ná na sáji nuu nu Ndióxi jáchi Ndióxi quea nasacu a na cán. Ta ndá na co cúní caja ña sáhdá na ndoho ini na.

3 Jáchi coo nasacu Ndióxi na jutixia ña ná jáyihví na ñayivi, na cája ña vaha. Nasacu Ndióxi na ña ná jáyihví na ñayivi, na cája ña núu. Tá co cúní ndó cayihví ndo na jutixia xíní ñúhú caja ndó ña vaha já ná cajii ini na jutixia xihín ndo.

4 Nasacu Ndióxi na jutixia ña ná chindeé na ndohó. Joo tá cája ndó ña núu já quea xíní ñúhú cayihví ndó na jáchi mé na cán cahnda na chuun ña ná chahvi ndó sahá ña

núu cája ndó. Sahá ña cán nasacu Ndióxi na ña ná jándoho na ini na cája ña núu.

⁵ Ña cán quea ndítahan nu ndó caja ndó ña sáhdá na jutixia já ná a jándoho na ini ndó jáchi sa náha mé va xíní túni yo cahan xoho ña xíní ñúhú candúsa í ña sáhdá na jutixia nu yo.

⁶ Sahá ña cán quea चाहवि ndó jiuhún cuéntá impuesto jáchi sa xíní ndó ña ndítahan nu ndó चाहवि ndó ña. Na jutixia cája chúun na cuéntá Ndióxi tá cája na ña xihín ndinuhu ini na.

⁷ Ndiqiahva ndó nuú ñayivi ña ndítahan nu ná ndiquehe na. Chahvi ndó impuesto nuú na játaca ña. Caja cáhnu ndó ñayivi, na ndítahan caja cáhnu ndó ta coo toní ñúhú ndó xihín na ndítahan coo toní ñúhú ndó xihín.

⁸ A cáyicá ndo ñaha nuú ni in ñayivi. Ña ndíyicá ndo quea quihvi ini táhan ndó. Jáchi ndá na quihvi ini ñayivi, na cán cúu na cája ña sáhdá ley Moisés.

⁹ Jáchi tá quihvi ini ndó ñani táhan ndó já quea a ndiáva ini ndó caja ndó ña núu xihín na. Ta a cáhvi ini ndó coo ndó xihín ñájíhí ñani táhan ndó. Ta a cáhni ndó ndíi. Ta a cáhvi ini ndó caja cuíhná ndo ñaha inga na. Ta ni a ndiáva ini ndó cacomí ndo ñaha cómi inga na. Tá quihvi ini ndó ñani táhan ndó já quea cúní cachi a ña cája ndó ña sáhdá ley Moisés tá cáchí a já: “Quihvi ini ndó ñani táhan ndó tá quiahva quihvi ini ndó mé ndó.”

¹⁰ Ndá na quihvi ini ñani táhan, na cán cúu na cája vaha xihín ñani táhan na. Ña cán quea tá quihvi ini ñani táhan í já quea jáxinu yo nuú ña sáhdá ley Moisés.

¹¹ Saha tóco ndihi ña cahan i xihín ndo yóho xíní ñúhú candehe ndo ndá quiahva cáa tiempo ndúu viti. Xíní ñúhú ndicaxí vaha ini ndó caja ndó ña cúní Ndióxi jáchi viti sa nacayati chaga quivi jácacu Ndióxi mí a juú ga tá jacá nacandúsa í tuhun Ndióxi.

¹² Cúu á tátuhun ja chá cúní yaha ñuú ta casahá tivi yaa. Ña yóho cúní cachi a ña sa nacayati quivi quixi tucu Jesucristo. Ña cán quea xíní ñúhú jándacoo í ña núu cája í tátuhun cája ñayivi xíca nuu naá. Ta xíní ñúhú caja í ña vaha já quea quee vaha í

xihín ña núu.

¹³ Ndísáhnú ná coo ini caja í tóco ndihi ñaha tátuhun cúu yó na ndúu nu yéhe. A cácuú ñayivi xíhi ta ni a cája í vicó lándá ndivaha. Ta ni a cáca nuu jii yo xihín ñájíhí ñani táhan í ta a ndiáva ini coo í xihín najíhí. Ta a ndúcú yo caní táhan í xihín ñani táhan í ta ni a cáhivi ini xihín ná.

¹⁴ Ña ndítahan caja í quea caça chaga yo ndeé yo nu Jesucristo, xitoho í já ná cacuu a tátuhun candixí in jahmá caa ña sándixi da cáni táhan. Ta coto a quiahva ndó ñamaní nuú yiquí cuñu ndó caja ña núu.

14

Cò ndítahan candehe ndaa táhan í

¹ Ndiqiehe vaha ndó na cúu cuéntá Jesús vatí co cándaqa vaha ini na ña jánaqa tuhun Ndióxi. Ta a cáni táhan yúhu ndó xihín ná sahá ña cándúsa na.

² Ín java na cúu cuéntá Jesús cáhán na ña cuu cuxu na cuñu, ña najoco na nuú yoco. Joo java na cúu cuéntá Jesús, na saá xihín tuhun Ndióxi cáhán na ña a cúu toho cuxu na cuñu, ña najoco na nuú yoco sahá ña cán quea co xíxi na ña.

³ Na xíxi mé cuñu cán co ndítahan nu ná candehe ndaa na na co xíxi ña ta na co xíxi cuñu cán co ndítahan nu ná candehe ndaa na na xíxi ña. Jáchi ndíqiehe vaha Ndióxi ndívi na cán vatí sa jín cáhán na.

⁴ Ta quiahva já co ndítahan nu ndó candehe ndaa ndó mozo ñani táhan ndó á cája vaha da á co cája vaha da nuú xitoho da. Vaha ri caja vaha da tá vaha ri co cája vaha da jáchi mé va xitoho da cán xíní sahá ña cán. Joo cuu caja Ndióxi ña ná candoo vaha mozo cán nuú xitoho da.

⁵ Java ñayivi cáchí na ña ín quivi náhnú chaga nuú java ga quivi. Ta java na cáchí na ña in cúu tóco ndihi quivi. Ta ndítahan nuú in in na caxi na ña cáhvi ini na sahá ña yóho.

⁶ Tá sácú ini na caxi na in quivi caja cáhnu na Ndióxi ta vaha va cája na. Ta tá cáhán na cuu caja cáhnu na Ndióxi ndá quivi nacuu va ta vaha ri já va. Ta vatí xíxi na cuñu, ña sa najoco na nuú yoco á co xíxi toho na ña joo ndíqiahva na ndixahvi nu Ndióxi sahá ta xihín ña yóho cája cáhnu na mé á.

⁷ Ni in yó cō tácu saha mí ta ni in yó cō xihí saha mí.

⁸ Ta tá tácu yo á tá naxihí yo mé a ndaa cúu yó na cómi Ndióxi cuénta saha ta cúu mé á xitoho í.

⁹ Saha ña cán quéa naxihí Jesucristo ta nanditacu tucu a já nanduu a xitoho ñayivi, na tácu xihín na sa naxihí.

¹⁰ Ña cán quéa a váha toho cája ndó tá sánehé ndaa ndó ñani táhan ndó. A váha cája ndó candají ndó na jáchi vaxi quivi ndique táhan ndihí candita í nu Ndióxi ña cája vií a saha yo.

¹¹ Jáchi já cáchi tuhun Ndióxi já: Yóho ín i cáchi i xihín ndo ña xinu quivi ndica xítí tóco ndihi ñayivi nuú i, ta casahá na cája cáhnu na yehe, ña cúu Ndióxi, cáchi Ndióxi, xitoho í.

¹² Jáchi nditahan nuú in in í ndiquiahva í cuénta saha ña naçaja í nu Ndióxi.

A cája ndó ñaha ña cuu jándicava ñayivi nuú cuachi

¹³ Saha ña cán quéa cō ndítahan candehé ndaa táhan í. A cácu ini ndó cája ndó ñaha, ña cuu jándacava na cúu cuénta Jesús nuú cuachi ta já ná jándacoo na ña cándee ini na Ndióxi.

¹⁴ Saha ña cándee ini i Jesús, xitoho i saha ña cán quéa cánda a váha ini i ña cō cája i cuachi tá xixi i ña najoco na nuú yoco. Joo tá ndúu na cáhán ña a váha toho cuxu na ña já quéa cō ndítahan cuxu na ña jáchi cuu candojo na cuachi saha tá ná cuxu na ña.

¹⁵ Joo tá ndíhivi ñanún, na cúu cuénta Jesús saha ñaha xísún já quéa cúní cachi a ña cándajún na. Cuénta cóun ná a cájún ña ndicava na cán nuú cuachi saha ña xísún jáchi cúu ná na naxihí Jesucristo saha.

¹⁶ Vatí cánda ini ndó ña cuu cuxu ndó ña najoco na nuú yoco joo a cúxu toho ndó ña tá ná cahan núu ñayivi saha ña cája ndó.

¹⁷ Jáchi a juú saha ña xixi ni saha ña xihí cacomí Ndióxi cuénta saha yo. Ña cúní Ndióxi cája í quéa ná canduu ndaa yo nu mé á ta ná coo váha ini xihín ñayivi ta ná cajii iní. Tóco ndihi ña yóho cúu á ña quixi nu ínimá yii Ndióxi.

¹⁸ Tá ná cája ndó ña yóho já quéa cája cáhnu ndó Jesucristo ta cajii ini Ndióxi cája ndó ta candoo váha ndó nuú ñayivi.

¹⁹ Ña cán quéa xíní ñúhú ndinducú yo tóco ndihi ñaha, ña cuu candaca mí canduu táji yo xihín ñani táhan í ta já ná cuu jácuahnu táhan í xihín ñaha Ndióxi.

²⁰ Nasacu ini Ndióxi jácacu a ñayivi saha ña cán quéa coto a cáji nuu ndó nuú ña cúní Ndióxi cája saha ñaha xixi ndó. Mé a ndaa tóco ndihi ñaha cúu á ña váha cuxú. Ña cō váha quéa jándacava í ñayivi nuú cuachi saha ña xixí.

²¹ Váha chága ná a cúxu ndó cuñu ta ni a cóho ndó vino ta ni a cája ndó inga ñaha ña cuu jándacava ñani táhan ndó nuú cuachi.

²² Tá tá cánda cáxi ini ndó ña cō cája ndó cuachi nu Ndióxi, a ndícani ndó ña nuú java ga ñayivi. Jáchi tahví naçuu ñayivi tá xini na cō cája na cuachi nu Ndióxi.

²³ Joo ndá na ndúcú cuxu in ñaha ta cáhvi ivi joho ini na xihín á tá xixi na ña já quéa xinu cuachi jata ná. Jáchi ndá ñaha naçuu ná cája í ta tá tá cándúsa yó ña cúu á cuachi já quéa xinu a cacuu a cuachi nu yo.

15

Chindeé ndó na cáhvi ivi joho ini

¹ Tá ndacú cuahan yó xihín tuhun Ndióxi já quéa cō ndítahan cacu xóo í na vitá xihín tuhun Ndióxi. A ndúcú ndo cája ndó ña jándivaha ini mé cuití va ndó.

² Tóco ndihí xíní ñúhú cája í ñaha ña táhan ini ñani táhan í xihín. Ta xíní ñúhú cája í ña já ná chindeé yó na ña ná canduu váha na ta já ná cuu cuahnu chága na xihín tuhun Ndióxi.

³ Jáchi mé Jesucristo cōo nanducú a cája ña táhan ini mé cuití a. Ña naçaja mé á quéa najaxinu cōo a nuú tuhun Ndióxi tá naçachi a já: “Tuhun núu ña najácana na nu mé ndó naxinu ri a jata yehe viti.”

⁴ Tóco ndihi ña naçahyi nuú tuhun Ndióxi sanahá naçahyi a já ná jána ha nu yo ña cō ndítahan ndicani iní. Ta, náha ña ndítahan quiahva tuhun ndee iní nani ndatí jáxinu Ndióxi tuhun nasahan nu yo.

⁵ Ndióxi quéa sáhan ndee nu yo ña ná coo cáhnu iní ta sa mé á sáhan tuhun ndee iní. Ña cúní Ndióxi quéa chindeé a ndohó cája ndó tá quiahva naçaja Jesucristo ta já in ná nduu xihín táhan ndó.

6 Ta já in ná jándique táhan ndihí caja cáhnu í Ndióxi, mé a cúu tátá Jesucristo, xitoho í.

Xíni johu na coó naquixi chichi Israel tuhun vaha saha Jesús

7 Ndiquehe vaha ndó tóco ndihi na cúu cuéntá Jesús tá quiahva nandiquehe vaha Jesucristo ndohó já ná ndicáhnu Ndióxi.

8 Ndítahan ndicuhun ini ndó ña naquixi Jesucristo chindeé a ñayivi Israel. Ta naquixi a jánaḥa nu ná ña mé a ndaa táhyí jáxiḥu coo Ndióxi tóco ndihi nuú tuhun ña naṣahan nuú tásáḥnu jíco yó jáchi co ndímaní Ndióxi nuú tuhun a.

9 Ta naquixi a jácacu a ñayivi, na coó naquixi chichi Israel ña ná caja cáhnu na mé á sahá ñamaní naṣaja mé á xihín ná. Jáchi já cáchi tuhun Ndióxi:

Yehe xihín na coó naquixi chichi Israel caja cáhnu nde ndohó, Ndióxi, ta yehe cata i nu ndo caja cáhnu i quivi ndo.

10 Ta íin inga tucu nu cáchi a já:

Ndohó, na coó naquixi chichi Israel xini ñuhú ndique táhan ndó cajii ini ndó xihín na naquixi chichi Israel.

11 Anda já naṣachi tucu a já:

Tóco ndihi ndó, na coó naquixi chichi Israel caja cáhnu ndó Ndióxi, xitoho í, ta ná a jándacoo toho ndihi ñayivi caja cáhnu na Ndióxi.

12 Tá naṣahyí Isaías nuú tuhun Ndióxi já naṣahyí da tuhun yóho:

Vaxi quivi cacu in da chichi Isaí, ña ná cacomí da cuéntá sahá ñayivi, na coó naquixi chichi Israel.

Ta mé ñayivi yóho candeé ini na mé da quixi chichi Isaí cán.

13 Ndióxi quéa cája ña ná candeé ini ndó mé á ta já cuu jácacu a ndohó. Ná caja mé á ña ná ndicutú ini ndó xihín ña cájii ini ndó ta ná caja mé á ña ná coo vaha ini ndó jáchi candeé ini ndó a. Xihín ndée ínimá yii Ndióxi ná quiahva mé á cuaha ndée nu ndó candeé chága ini ndó a.

14 Cándehé ndó ñani i, na cúu cuéntá Jesús. Sa xini vaha i ña naṣhutú ndo xihín ña vaha ta cándaḥa vaha ini ndó tuhun Ndióxi. Ta xihín ña jan cuu jánaḥa táhan ndó.

15 Joo tá naṣahyí i carta yóho nu ndo já naṣaja ndeé ini i cáhyí i saḥa java ñaha jáchi co cúni ña ná ndindójó ndo ña. Cáhyí i ña yóho jáchi naṣaja Ndióxi ñamaní xihín i

16 cája chúun i cuéntá Jesucristo cáxi tuhun i tuhun vaha saḥa mé á nuú ñayivi, na coó naquixi chichi Israel. Ta cúu u tátuhun jutú jáchi xica i cáhan i tuhun Ndióxi xihín ná já ná cuu cacu ndaa ínimá ná. Cúu á tátuhun jóco i na nu Ndióxi já ná cajii ini mé á xihín ná ta já ná cuu ndaja ínimá yii mé á ña ná nduu na ñayivi vii nu mé á.

17 Ta sahá ña cándúsa i Jesucristo saḥa ña cán quéa ndivaha ini i caja chúun i cuéntá Ndióxi.

18 Jáchi saḥan ndeé ini i cáhan i saḥa ña naṣaja Jesucristo tá naṣaja chúun mé á yehe ña candaca i na coó naquixi chichi Israel ña ná caja na ña cúni Ndióxi. Ta saḥa ña naṣahan i xihín na cán já naṣini johu na ta naṣaja na ña cáchi tuhun Ndióxi.

19 Ta sa naṣini na ña xituhún xihín ña náhnu ndivaha naṣaja i nu ná xihín ndée ínimá yii Ndióxi. Ta quiahva já naṣaxi tuhun i tuhun vaha saḥa Jesucristo nuú ñayivi ndúu ñuu Jerusalén xihín nu tóco ndihi na ndúu ndijáá ñuu anda estado Ilírico.

20 Ña ndúcú u caja i quéa caḥan i xihín ñayivi ña cúni Ndióxi jácacu a na. Ta sa caḥan i ña yóho nuú ñayivi, na a ñaha cuni johu saḥa Jesucristo jáchi co cúni ndiquehe e chuun ña sa najácaḥa saḥa inga na.

21 Cáhi ini i ña vaha chága ná cuhun i nuú ñayivi, na coó naṣini johu tuhun vaha saḥa Jesús jáchi já cáchi tuhun Ndióxi já:

Vatí coó naṣini johu na tuhun vaha saḥa mé á joo vaxi quivi xinu coo na caḥan xihín ná,

ñá ná cándaḥa ini na ña coó naṣandaḥa ini na jihna, cáchi tuhun Ndióxi.

Sácú ini Pablo cuhun da ñuu Roma

22 Ta saḥa chuun cája i yóho coó naṣuu saa i coto nihni i ndohó vatí sa cuahá tañu naṣacu ini i saa i jan.

23 Joo viti sa najándihi i chuun naṣaja i tañu ñayivi ndúu yóho. Ta sa cáhi ini i saa i coto nihni i ndohó anda sanahá.

24 Sahá ña cán quea sácú ini i saa i coto ni-hni i ndohó tá ná yaha i cuhun i chí España. Ta tá ná ndihi cajii ini i cuni i ndohó anda jávi ndiquehe tucu u íchi cuhun i. Joo cúni ña ná chindeé ndó yehe já ná cuu ndiquehe tucu u íchi cuhun i.

25 Joo viti cuhun i chí ñuu Jerusalén chindeé na cúu cuénta Jesús ndúu cán.

26 Jáchi na cúu cuénta Jesús ndúu estado Macedonia xihín na ndúu estado Acaya nasacu ini na játaca na jihún ta chindahá na ña nuú na cúu cuénta Jesús, na cándahví ndúu ñuu Jerusalén.

27 Mé na tóho yóho nasacu ini na caja na ña ta vaha cája na jáchi cáhán na ña ndítahan nu ná चाहvi na sahá ña najaja na Israel, mé na cúu cuénta Jesús ndúu ñuu Jerusalén xihín ná. Jáchi nasahan na Israel najaxi tuhun na tuhun vaha saha Jesús nu ná. Ta viti ndúcú ñehe na tóho yóho ñamaní najaja na Israel xihín ná. Ña cán quea chindeé ñahá na toho xihín ña cómi na.

28 Ta tá sa najándihi i caja i chuun yóho ta tá sa nandihí ndiquiahva i jihún nataca na tóho nuú na cúu cuénta Jesús ndúu ñuu Jerusalén anda já nuná nuú i cuhun i España ta já yaha i jan coto nihni i ndohó.

29 Ta xini vaha i ña tá ná saa i jan caja Jesucristo cuahá ñamaní xihín ndo sahá tuhun vaha cahan i xihín ndo.

30 Xica tahví i nu ndo ñani mí i, na cúu cuénta Jesús, ña in nuú ná caça tahví yo nu Ndióxi sahá chuun cája i. Jáchi cándeé ini ndó Jesucristo ta quíhvi ini ndo yehe najaja inima yii Ndióxi.

31 Caça tahví ndo nu á ña ná chindeé a yehe ná a cája ñayivi, na co cándúsa Ndióxi ndúu estado Judea ni in ñaha xihín i. Ta caça tahví ndo nu Ndióxi ña ná cándúsa na cúu cuénta Jesús ndúu ñuu Jerusalén cán ndiquehe vaha na jihún ñehe cuahan i nu ná.

32 Já quea tá ná cúni Ndióxi já cajii ini i saa i coto nihni i ndohó ta ndiquehe ndeé e nani xito nihni i ndohó.

33 Ndióxi ná coo xihín ndo ta ná caja mé a ña ná coo vaha ini ndó. Já ná coo.

16

Chindahá Pablo Ndióxi coo na ndúu ñuu Roma

1 Ja chá va casaá ña naní Febe, ña cúu cuénta Jesús nu ndo. Mé Febe yóho najaja chúun ña veñuhu Cencrea.

2 Caja ndó ñamaní ndiquehe vaha ndó ña sahá ña cúu ña cuénta Jesús, xitoho í ta já ndítahan caja na cándeé ini Jesús. Chindeé ndó ña yóho xihín ndihi ñaha ña cámani nu ña jáchi najchindeé ña cuahá ndivaha ñayivi ta najchindeé ri ña yehe va.

3 Chindahá i Ndióxi coo Priscila xihín Aquila jáchi in cúu ná xihín i cája chúun na cuénta Jesucristo.

4 Mé na yóho nasahiin tiaha na quivi na já ná cuu cacu yehe tá najuxi tondohó nuú i. Ta a juú in túhún yehe ndiquiahva ndixahvi nu ná vaha. Tóco ndihi na cúu cuénta Jesús, na coo najuxi chichi Israel ndiquiahva na ndixahvi nu ná.

5 Ta jári chindahá i Ndióxi coo na cúu cuénta Jesús, na ndique táhan vehe Priscila xihín Aquila. Ta cahan Ndióxi ndó xihín Epeneto jáchi quíhvi ndivaha ini i da. Mé dá nasacuu da nu cuítí nandihvi íchi cuénta Jesús estado Acaya.

6 Ta cahan Ndióxi ndó xihín María, ña chindeé cuahá ndohó.

7 Ta chindahá i Ndióxi coo Andrónico xihín Junias. Ndívi da yóho cúu dá da najuxi chichi nuú najuxi mí i. Ta in nasañuhu nde veca xihín dá. Ta cúu dá da nánu tañu na apóstol. Ta jihna ñúhú ndívi mé da yóho najasahá cándúsa da Jesucristo a juú ga yehe.

8 Ta cahan Ndióxi ndó xihín Amplias jáchi quíhvi ndivaha ini i da. Ta in cúu nde cuénta Jesús.

9 Ta chindahá i Ndióxi coo Urbano. In cúu mé dá xihín nde cája chúun da xihín nde cuénta Jesucristo. Ta chindahá i Ndióxi coo Estaquis, da quíhvi ndivaha ini i.

10 Ta chindahá i Ndióxi coo Apeles jáchi cuahá tañu najána ha da nuú ñayivi ña mé a ndaa táhyí cándeé cáhnu ini da Jesucristo. Ta quiahva já chindahá i Ndióxi coo na vehe Aristóbulo.

11 Ta cahan Ndióxi ndó xihín Herodión jáchi in najuxi nde chichi Israel. Ta cahan Ndióxi ndó xihín na vehe Narciso jáchi cándúsa na Jesús, xitoho í.

12 Ta cahan Ndióxi ndó xihín Trifena ta xihín Trifosa, na cája chúun cuénta Je-

sucristo, xitoho í. Ta caḥan Ndióxi ndó xihin Pérsida, jáchi quíhvi ndivaha ini i ña ta cuahá ndivaha naḥaja chúun ña cuéntá Jesucristo, xitoho í.

¹³ Ta caḥan Ndióxi ndó xihin Rufo jáchi cúu dá da cáhnu ndivaha tañu na cúu cuéntá Jesús. Ta caḥan Ndióxi ndó xihin náná da jáchi cúu ña tátuhun náná mí i viti.

¹⁴ Ta chindahá i Ndióxi coo Asíncrito xihin Flegonte xihin Hermas xihin Patrobas xihin Hermes. Ta chindahá i Ndióxi coo tóco ndihi na cúu cuéntá Jesús ndúu xihin na cán.

¹⁵ Ta caḥan Ndióxi ndó xihin Filólogo xihin Julia xihin Nereo ta xihin quiahva da. Ta caḥan Ndióxi ndó xihin Olimpas ta xihin tóco ndihi na cúu cuéntá Jesús ndúu xihin na cán.

¹⁶ Ña cúni quéa ná caḥan Ndióxi xihin táhan ndó ta ná tatí yúhu táhan ndó ta yii caja ndó ña. Tóco ndihi na cúu cuéntá Jesús, na táca veñuhu yóho chindahá na Ndióxi coo ndihi ndó.

¹⁷ Cándehé ndó ñani mí i, na cúu cuéntá Jesús. Xíca tahví i nu ndo ña ná coo cuéntá ndó xihin na cátóo ndicahnda ñayivi, na cúu cuéntá Jesús jáchi sáji nuu na nuú na cája ña cúni Ndióxi. Ña cája na jan quéa cáxoo na nuú ña najánaḥa nde nu ndo. Coto a cátaḥan ndó xihin ná.

¹⁸ Jáchi mé na yóho co cúu ná na cája chúun cuéntá Jesucristo, xitoho í. Ña cája na quéa ndúcú na ña vaha mé cuití va na. Ta xihin tuhun ñúchí ta xihin tuhun vii jándahvi na ñayivi, na co tácu vaha ini.

¹⁹ Tóco ndihi ñayivi xini na ña cája ndó ña cúni Ndióxi ña cán quéa cáji ndivaha ini i. Ña cúni quéa ná naḥa ndó ña ndíchí jini ndo xihin ña vaha cája ndó. Ta a cáñuhu ini ndó caja ndó ña núu.

²⁰ Yachi chá jándihi Ndióxi saḥá Satanás, rí cúu tiñáhá saḥaḥa ta já cuu cañnu ndó ri xihin ndée Ndióxi. Cacuu a tátuhun chiníhni saḥa ndó ri. Ná caja Ndióxi ña ná coo vaha ini ndó. Ta ná caja cuahá Jesucristo, xitoho í ñamani xihin ndihi ndo.

²¹ Chindahá Timoteo Ndióxi coo ndó ta in cúu dá cája chúun da xihin i. Ta chindahá ri Lucio xihin Jasón xihin Sosípater Ndióxi coo ndó. Tóco ndihi da yóho naquixi da chichi Israel nuú naquixi mí i.

²² Yehe naní Tercio ta cáhyi carta yóho ta chindahá ri yehe va Ndióxi coo ndó cuéntá Jesucristo, xitoho í.

²³ Chindahá Gayo Ndióxi coo ndó. Vehe mé dá in i ta sa mé yóho táca na cúu cuéntá Jesús. Ta chindahá ri da naní Erasto Ndióxi coo ndó. Mé Erasto cómi da cuéntá saḥá jiuḥun ñuu yóho. Ta chindahá ri Cuarto, da cúu cuéntá Jesús Ndióxi coo ndó.

²⁴ Ná caja cuahá Jesucristo, xitoho í ñamani xihin ndihi ndó. Já ná coo.

Cája cáhnu Pablo Ndióxi

²⁵ Coho caja cáhnu í Ndióxi jáchi mé á cuu ndaja ndacu a ndohó xihin tuhun vaha saḥa Jesús ña jánaḥa nde nu ndo. Anda sanahá tá cámani cava saḥa saḥa ñuyivi naḥacu ini Ndióxi jácacu a ndohó ta viti naḥinu quivi jánaḥa mé á ña nu ndo. Nahá ndivaha naḥiin jehé tuhun vaha saḥa Jesús.

²⁶ Ta viti cánda iní ña naḥan Ndióxi saḥa Jesús nuú na profeta ta na yóho naḥayí na ña nuú tutu. Ta naḥanda Ndióxi chuun nuú na cúu cuéntá mé á ña ná cuḥun na caxi tuhun na ña nu tóco ndihi ñayivi ndúu ñuyivi. Ta xihin mé ña yóho naḥaja Ndióxi ña ná cuu candeé ini ñayivi mé á ta já ná caja na ña cúni a, mé a tácu anda ama cá quivi.

²⁷ Ta mé cuití va cúu Ndióxi ta mé cuití va ndíchí jini saḥa ña cán quéa ndítahan caja cáhnu yó a anda ama cá quivi saḥa ña naḥaja Jesucristo, xitoho í. Já ná coo.

Carta nu cuití nacahyí Pablo nuú na cúu cuéntá Jesús ndúu ñuu Corinto

*Cáhan Ndióxi Pablo xihín na cúu cuéntá
Jesús ndúu ñuu Corinto*

¹ Yehe cúu Pablo, da nacaxi Ndióxi cacuu apóstol cuéntá Jesucristo jáchi já cúní a caja. Yehe xihín ñani Sóstenes

² chindahá nde Ndióxi coo ndó, na cúu cuéntá Jesús ndúu ñuu Corinto jan jáchi in cúu ndó xihín Jesucristo. Mé Ndióxi nacaxi a ndohó cacuu ndó ñayivi yíi, na nandiquiahva mé ná ndáha mé á. Ta quiahva já nacaxi ri a java ga na ndúu ndíjái ñuu cacuu na cuéntá mé á, na cája cáhnu Jesucristo, xitoho í jáchi cúu ri a xitoho mé ná.

³ Ña cúní queá ná caja Ndióxi, tátá yo xihín Jesucristo, xitoho í cuahá ñamani xihín ndo ta ná caja mé á ña ná coo vaha ini ndó.

*Ñamani cája Ndióxi xoho sahá ña cándéé
ini Jesucristo*

⁴ Níi tiempo ndíquiahva i ndixahvi nu Ndióxi jáchi nacaja mé á cuahá ñamani xihín ndo sahá ña cándéé ini ndó Jesucristo.

⁵ Ta sahá ña in nanduu ndó xihín mé á sahá ña cán queá nacaja Ndióxi cuahá ñamani xihín ndo já ná cuu cahan vaha ndó sahá mé á. Ta já nasuná a xíní túní ndo já ná candaá vaha ini ndó sahá mé á.

⁶ Ta ña nacachi i xihín ndó sahá Jesucristo naxinu a ini ndó ta viti cája ndó ña cúní mé á caja ndó.

⁷ Ta viti nani ndáti ndó quiví quixi tucu Jesucristo, xitoho í ñuyíví yóho ni in túhún toho ñaha a ndímaní nu ndo ña ná caja ndó ña cúní Ndióxi jáchi nasahan mé á tóco ndihi ñaha nu ndo.

⁸ Mé Ndióxi chindeé a ndohó já ná caca tuun ndó íchi cuéntá mé á janda quiví nu ndíhí. Ta já ná a cúu chícaan ñayiví cuachi jata ndo tá ná xinú coo quiví quixi tucu Jesucristo, xitoho í ñuyíví yóho.

⁹ Jáchi cája tá cája Ndióxi ña sahan mé á tuhun a caja. Ta mé á queá nacaxi a mí ña

na in cacuu xihín Jesucristo, xitoho í ña cúu in túhún jiní já jahyi mé á.

Tává xoo java na cúu cuéntá Jesús mé ná

¹⁰ Candehé ndo, ñani mí i, na cúu cuéntá Jesús. Xíca tahví i nu ndo xihín quiví Jesucristo, xitoho í ña ná ndique táhan víi tuhun ndihi ndó ta a cáhndá táhan ndó. Xíní ñuhú cuni táhan vaha ndó ta in túhún ñaha cañuhu ini ndó sahá. Ta quiahva já ndítahan coo jiní ndihi ndó.

¹¹ Candehé ndo, ñani mí i, na cúu cuéntá Jesús. Cáhan i ña yóho xihín ndo jáchi nacaxi tuhun na vehe Cloé xihín i ña ndaja mé ndó cáni táhan ndó.

¹² Jáchi nañehé e tuhun ña java ndó cáchi ndo ña cúu ndó cuéntá yehe, da cúu Pablo. Ta java ndó cáchi ndo ña cúu ndó cuéntá Apolos. Ta java ndó cáchi ndo cúu ndó cuéntá Pedro. Ta java ndó cáchi ndo cúu ndó cuéntá Jesucristo.

¹³ Ta xihín ña yóho ña cája ndó queá sáhndá java táhan ndó. Cándehé ndo. Coó naxihí i, da cúu Pablo ndica crúxu sahá ndo já ná jácacu u ndohó. Ta ni coó nacandúta ndó cuéntá mí i.

¹⁴ Ndixahvi Ndióxi coó najácandúta i ndohó. Jáchi ndájá ga ví cachi ndó cúu ndó cuéntá yehe tá ná jácandúta i ndohó, nduu. Joo da najácandúta i cúu Crispo xihín Gayo cuití va.

¹⁵ Ña cán queá ni in túhún ndó a cúu cachi ndó ña nacandúta ndó cuéntá mí i jáchi coó najácandúta toho i ndohó.

¹⁶ Ta ndícuhun ini i ña najácandúta ri na vehe Estéfanos. Na yóho cuití cúu na ñuhu ini i najácandúta i.

¹⁷ Jáchi coó nachindahá toho Jesucristo yehe ña ná caca nuu i jácandúta i ñayivi. Nachindahá mé á yehe ña ná caca nuu i cahan i tuhun vaha sahá mé á xihín ñayivi já ná cuu cacu ndaa ínima ná. Ta coó toho tuhun ndíchí cahan i xihín ná jáchi coo cúní jánuu ndáha i xihín tuhun cahan i yóho tóco ndihi ña nacaja Jesucristo tá naxihí a ndica crúxu sahá yo.

*Ndíchí jiní Jesucristo ta ún ndéé mé á quixi
nu Ndióxi*

¹⁸ Ñayivi, na xíca cuahan ndihi sahá ná ini indayá, mé na cán cáhan na ña cúu yó na tachí tá cahan yó ña naxihí Jesucristo

ndica crúxu já ná cacu ndaa ínima ná. Joo nu mí, na nasacu ini Ndióxi jácacu a cávatá yo cándaá ini ña xihín ndée Ndióxi naxinu tuhun mé á nu yo.

19 Já cáchi tuhun Ndióxi já:

Jándihi i sahá ña ndíchí jiní ñayivi ñuyíví, ta a quehe e cuénta sahá ña cándaá ini ñayivi, já nacahyi a nuú tuhun Ndióxi.

20 Sahá ña cán queá coó saha toho ñaha ñuyíví yóho nu Ndióxi vatí da ndíchí jiní xihín da tácu ini cáhán da ña cúu dá da ndíchí ndivaha sahá ña xini da cahan da sahá ñaha ñuyíví yóho. Joo nacaja Ndióxi ña ná cacuu a ña coó saha.

21 Sahá ña ndíchí jiní Ndióxi, co cuni mé á ña ná cuu candaa ini ñayivi saha mé á xihín ña ndíchí quixi jiní ñayivi ñuyíví. Ña nacaja mé á queá nachindahá a java ñayivi ña ná cahan na tuhun vaha saha mé á já queá ndá na cándusa ña ta cándéé ini na Ndióxi já cuu cacu ndaa ínima ná. Ta ña yóho cúu á in ña tachí ndivaha nuú ñayivi ñuyíví.

22 Jáchi ñayivi Israel cáchi na ña ndúsa cuni na ña xituhún ndivaha já cuu candúsa na tuhun vaha saha Jesús. Ta na tóho, na ñuu Grecia cuni na ña ná cahan ndíchí ndivaha ñayivi xihín ná já cuu candúsa na ña.

23 Joo mé nde xica nuu nde cáxi tuhun nde nuú ñayivi sahá Jesucristo, mé a naxihi ndica crúxu sahá ñayivi. Joo tá xini joho na Israel ña yóho já ndíhivi na. Ta tá xini joho na tóho ña yóho já cáhán na ña cúu á ña tóntó ndivaha.

24 Joo tóco ndihi na nacaxi Ndióxi cacuu na cuénta mé á, á cúu ná na tóho á cúu ná na Israel, cándaá ini na ña cahan nde sahá Jesucristo, ña lin ndée mé á jácacu a ñayivi. Ta xini vaha na ña ndíchí ndivaha jiní mé á nacaja Ndióxi.

25 Nuú ñayivi ñuyíví ña cája Ndióxi cúu á ña tóntó ndivaha. Joo ña cája Ndióxi cúu á ña ndíchí chága nu ndíhi ñaha cája ñayivi ñuyíví. Ta vatí cáchi ñayivi ña co ndiyahvi ña naxihi Jesucristo ndica crúxu joo yahvi chága ña yóho a juú ga inga ñaha cuu caja ñayivi.

26 Candehé ndo, ñani i, na cúu cuénta Jesús. Nacaxi Ndióxi ndohó cacuu ndo cuénta mé á vatí chá cuití ndó cúu ndó na

ndíchí jiní nuú ñayivi ñuyíví. Ta chá ndó cúu ndó na náhnu nuú ñayivi ta chá cuití ndo cúu ndó na cuicá.

27 Joo nacaxi Ndióxi ñayivi, na cáchi ñayivi ñuyíví cúu ná na tóntó jiní já queá ná cacahan nuú na ndíchí jiní. Mé Ndióxi nacaxi a ñayivi vitá ná cacuu na cuénta mé á já ná cacahan nuú na náhnu ndúu ñuyíví yóho.

28 Ñayivi, na coó saha ñuyíví yóho, na quehe nuú ñayivi saha, na cán cúu na nacaxi Ndióxi. Ta nacaxi a na co ndayahvi toho ñuyíví yóho ña ná nuu ndáha na náhnu cuénta ñuyíví yóho.

29 Ta xihín ña yóho cándaá ini ñayivi ña a cúu ndíñehe jícó na mé ná nu Ndióxi.

30 Mé Ndióxi queá nacaja ña ná in nduú xihín Jesucristo. Ta nacaja mé á ña ná ndindíchí jiní yo. Ta nacaja mé á ña ná canduu ndaa yó nu Ndióxi. Nacaja mé á ña ná nduú ñayivi yíi, na cúu cuénta mé á. Ta mé á najácacu a mí nuú cuachí.

31 Ta já cáchi tuhun Ndióxi já: “Ndá na cuni caja lánda, xini ñuhú caja lánda na sahá ña náhnu nacaja Ndióxi saha ná.”

2

Cáxi tuhun Pablo ña naxihi Jesucristo ndica crúxu sahá cuachi ñayivi

1 Candehé ndó, ñani i, na cúu cuénta Jesús. Tá nasahan i nacahan i ña ndaa cuénta Ndióxi nu ndo, coó nacahan i ña xihín tuhun ndíchí ñuyíví yóho.

2 Joo nasacu ini i cahan i sahá Jesucristo cuití va tañu ndó, mé a naxihi ndica crúxu.

3 Tá nasahin i tañu ndó, coó nandíñehe jícó i mí i. Ña nacaja i queá yíhvi yíhvi cúu u anda quíji ninu i.

4 Ta tá nacasáhá i cáxi tuhun i tuhun vaha sahá Jesucristo nu ndo, coó toho tuhun ndíchí nacahan i xihín ndo ña ná cava i jiní ndó xihín á, vaha. Ña nacaja i queá nacahan i xihín ndo xihín ndée ínima yíi Ndióxi ta mé a najáxinu a ini ndó xihín ndée mé á.

5 Já queá ná candaa ini ndó ña Ndióxi queá cája ña ná candéé ini ndó mé á xihín ndée mé á. Ta co cúu á sahá ña ndíchí quíxi jiní ñayivi ñuyíví yóho.

Ínima yij Ndióxi cája ña ná candaa ini ñayivi saha mé á

⁶ Joo tá ndítuhún nde xihín na sa cándaa vaha ini ñaha Ndióxi já cáhan nde tuhun ndíchí xihín ná. Joo co cáhan nde tátuhun cáhan taa ndíchí ndúu ñuyíví yóho. Ta ni co cúu á tátuhun ña cáhan da ndíchí, da cómí cuéntá sahá ñuyíví yóho. Jáchí yachí ndihi sahá na cán.

⁷ Ña cáhan nde cúu á ña ndíchí cuéntá Ndióxi. Ta cúu á ña nasahin jehé, ña co xini ñayivi saha janda tá camani cava sahá saha ñuyíví. Jáchí janda mé tiempo já nasacu ini Ndióxi ndá quiahva caja jácacu a mí anda ama cáa quivi.

⁸ Ta ni in túhún na náhnu cómí cuéntá sahá ñuyíví yóho co cándaa ini na ña nasacu ini Ndióxi jácacu a mí. Jáchí tá ná candúsa na ña já quéa a cáta caa toho na Jesucristo, xitoho í ndica crúxu, nduu. Jáchí mé Jesucristo cúu á ña cáhnu ndivaha.

⁹ Ta já cáhí tuhun Ndióxi já: Ni in túhún ñayivi a ñaha cuni na ta a ñaha cuni johu na, ta ni a ñaha cahvi ini na, ndá quiahva in ña náhnu sácú ini Ndióxi quiahva nuú ñayivi tá quihvi ini na mé á, cáhí tuhun Ndióxi.

¹⁰ Nacaja inima yij Ndióxi ña ná candaa ini tóco ndihi ña yóho. Jáchí inima yij mé á sándehe a tóco ndihi ñaha ta xini a janda ña cáhvi ini mé Ndióxi.

¹¹ Ni in túhún ñayivi co xini na ña cáhvi ini inga na. Inima in in na cuití va xini a ña cáhvi ini in in na. Quiahva já in ri xihín Ndióxi va. In túhún inima yij mé á xini ndía cáhvi ini a.

¹² Nasahan Ndióxi inima yij mé á nu yo ta co cúu á tátuhun inima ñayivi ñuyíví. Ta nacaja mé á ña ná candaa ini ndaja in ña náhnu sahan mé á nu yo.

¹³ Ta tá cáhan nde sahá ña yóho, cáhan nde tá quiahva najánaha inima yij Ndióxi nuú nde. Ta co cáhan nde ña xihín tuhun ndíchí nacatiahva nde ñuyíví yóho. Quiahva já ndicani nde ñaha Ndióxi xihín na ñuhu inima yij Ndióxi ini.

¹⁴ Tóco ndihi ña yóho cúu á ña tónto ndivaha nuú ñayivi, na co ñuhu inima yij Ndióxi ini. Co ndíquehe vaha na ña ta ni a cúu candaa ini na ndaja in a jáchí na ñuhu

inima yij Ndióxi ini, na cán cúu ndusa na cándaa ini ñaha Ndióxi.

¹⁵ Joo na ñuhu inima yij Ndióxi ini, na cán cúu na cándaa ini ndá ñaha cúu ña vaha ta ndá ñaha co cúu toho ña vaha. Ta xihín ña yóho catónto ñayivi ñuyíví jáchí co cándaa ini na ña cúu cuéntá Ndióxi.

¹⁶ Jáchí cáhí tuhun Ndióxi: “Ni in túhún ñayivi a cúu candaa ini na ña cáhvi ini Ndióxi, xitoho í. Ta ni in túhún na a cúu cachi xihín mé á ña ndítahan nu á caja”, cáhí tuhun Ndióxi. Joo mí, na cúu cuéntá Jesús, cáhvi iní tá quiahva cáhvi ini Jesucristo jáchí ñuhu inima yij Ndióxi ini mí, na cúu cuéntá mé á.

3

Na cája chúun cuéntá Ndióxi

¹ Candehé ndó, ñani i, na cúu cuéntá Jesús. Coó nacuu cahan i xihín ndo tá quiahva cáhan i xihín na nachutú ndaa xihín inima yij Ndióxi. Jáchí mé ndó cúu ndó tátuhun lee loho ña chíhí jáchí a ñaha cuahnu ndó xihín tuhun Ndióxi jáchí cája ndó ña xica ini yiquí cuñu ndó caja tá quiahva cája ñayivi ñuyíví.

² Sahá ña cán quéa tá najánaha i tuhun Ndióxi nu ndo, coo nacuu jánaha i ña ihvi chága nu ndo jáchí a cúu candaa ini ndó ña. Ña nacaja i xihín ndo quéa nasahan i tátuhun leche nu ndo jáchí cúu ndó tátuhun na valí chíhí sahá ña a cúu cuxu ndó ñaha vee. Ta janda viti co in tiahva ndó jácuaaha ndó ña ihvi chága cuéntá tuhun Ndióxi.

³ Jáchí cúu yij va ndó tátuhun ñayivi ñuyíví. Ndaja táhan mé ndó cáhvi ini xihín táhan ndó ta cáni táhan ndó ta sáhdá java táhan ndó. Ta xihín ña yóho cája ndó ña cuni mé cuití ndo tá quiahva cája ñayivi ñuyíví.

⁴ Java ndó cáhí ndo ña cúu ndó cuéntá yehe, da cúu Pablo. Ta java ndó cáhí ndo ña cúu ndó cuéntá Apolos. Ta xihín ña yóho sáhdá java táhan ndó ta náha ndó ña cája ndó tá quiahva cája ñayivi ñuyíví.

⁵ Ndá da cúu Apolos xihín yehe ña ná caní táhan ndó sahá nde. Co ndítahan caja ndó já jáchí mé nde cúu nde da xica nuu cája chúun cuéntá Jesucristo, xitoho í cuití va. Ta sahá chuun cája nde yóho nacuu nacandúsa ndó mé á. Ta ña yóho cúu chuun

nanaha Jesucristo, xitoho í nuú yehe xihín nu Apolos caja nde.

⁶ Ña nacaja nde cúú á tátuhun ña cája na tá xútu na. Ta yehe cúú u tátuhun da nachihin tata jáchi nacaxi tuhun i tuhun Ndióxi nu ndo. Ta Apolos cúú dá tátuhun da naxojo ticuú nuú a cán jáchi najánaha chága da tuhun Ndióxi nu ndo. Joo Ndióxi quea nacaja ña ná cuahnu a jáchi cája mé á ña ná cuu cuahnu ndó xihín tuhun mé á.

⁷ Sahá ña cán quea vatí yehe cúú u da naxutu ta Apolos cúú dá da naxojo ticuú joo ni in túhún nde coo saha. Cáhnu cúú Ndióxi jáchi mé á quea nacaja ña ná cuahnu mé tata naxutu nde cán.

⁸ Xíní ñúhú candaa ini ndó ña in cúú va na chíhin tata xihín na xójo ticuú nu á. Ta tá in tá in chuun nacaja in in na cán quehe na yahvi saha.

⁹ Yehe xihín Apolos in cúú nde cája chúun nde cuénta Ndióxi. Ta mé ndó cúú ndó tátuhun in yójo nuú nasacu Ndióxi ndehe caja chúun nde cuénta mé á.

Ta jári cúú ndó tátuhun in vehe ña cávaha Ndióxi.

¹⁰ Ta yehe cúú u tátuhun da cávaha mé vehe yóho. Ta mé Ndióxi quea nasahan ñamaní nuú i ña ná taán i yuu ndúhu sahá ta ná jácava sahá i ña. Ta inga na xíní ñúhú caja chúun xihín á. Joo ndítahan candehé vaha na ndaja caja na chuun yóho.

¹¹ Jáchi in túhún Jesucristo cúú á tátuhun yuu ndúhu sahá vehe yóho. Ta ni in na a cúu tavá xóo na ña ta já cacu na inga ñaha.

¹² Mé na cávaha vehe nuú yuu ndúhu yóho cuu jáxinu na ña xihín jihun cuáán ta cuu caja na ña xihín jihun cúxú ta cuu caja ri na ña xihín yuu ñúhí. Ta jári cuu caja na ña xihín yító ta cuu caja ri na ña xihín xehe ndiyoho ta janda xihín toñamá cuu caja na ña.

¹³ Joo vaxi quivi quixi tucu Jesucristo coto ndojó mé á chuun nacaja in in ñayivi cuénta mé á. Cacuu a tátuhun coto ndojó a ña xihín ñuhú cáyi já quea ná nahá nu á, á ndihi sahá, á co ndíhi sahá. Ta xihín ña yóho nahá nu á, á vaha nacaja chúun ñayivi cuénta mé á, á a váha toho nacaja na.

¹⁴ Ta tá coo nandíhi sahá ña nacaja na cán já quea चाहvi Ndióxi na sahá chuun

nacaja na.

¹⁵ Joo tá ná cayi ña nacavaha na cán já ndihi saha tóco ndihi chuun nacaja na vatí mé ná cacu ndaa ínima ná. Ta ña yóho cacuu a tátuhun tá jácacu in dataa mé dá tá quéta da ini in vehe tá cáyi a xihín ñúhu ita.

¹⁶ Á co xíní ndó ña cúú ndó tátuhun veñuhu Ndióxi tá ndacaan ínima yii mé á ini ínima in in ndó.

¹⁷ Ta ndá na ná jándíhi na sahá veñuhu Ndióxi yóho já quea jándíhi Ndióxi sahá na cán. Jáchi yii ndivaha veñuhu Ndióxi. Ta mé ndó cúú ndó tátuhun veñuhu Ndióxi cáhan i saha jan.

¹⁸ Candehé ndo. Ndá ndó cáhan ña cúú ndó na ndíhí jini sahá ña xíní ndó ñaha ñuyíví yóho, xíní ñúhú candaa ini ndó ña cúú á tátuhun jándahvi ndó mé ndó. Xíní ñúhú ndaja ndó mé ndó tátuhun na co xíní já quea ná nuná nu Ndióxi jánahá nu ndo ndaa cúú ndusa na ndíhí jini.

¹⁹ Jáchi ña ndíhí quíxi jini ñayivi ñuyíví cúú á ña tóntó ndivaha nu Ndióxi. Já cáhí tuhun Ndióxi já: “Ña cája mé á quea ná cachihin saha ná xihín ña ndíhí quíxi jini mé va na.”

²⁰ Quiahva já cáhí ri tuhun Ndióxi: “Cándaá cáxí ini Ndióxi ña coo sahá ña cáhvi jini na ndíhí ndúu ñuyíví yóho”, já cáhí tuhun Ndióxi.

²¹ Sahá ña cán quea ni in túhún ñayivi co ndítahan ndíhehe jícó na mé ná sahá ña tiahva in ñayivi ñuyíví yóho cája na. Xíní ñúhú ndicuhun ini ndó ña nasahan Ndióxi tóco ndíhi ñaha nu ndo.

²² Nandiquiahva mé á ndehe, da cúú Pablo xihín Apolos xihín Pedro nu mé ndó já ná cuu jánahá nde tuhun Ndióxi nu ndo. Nasahan mé á ñuyíví yóho nu ndo já ná cuu catacu ndó. Ta nasacu ini mé á quivi quivi ndó ta já tandaa quivi cuhun ndó coo ndó xihín mé á. Tóco ndíhi ña yóho nasahan Ndióxi nu ndo.

²³ Ta mé ndó cúú ndó cuénta Jesucristo ta Jesucristo cúú á cuénta Ndióxi.

4

Ndicani Pablo ndaja in chuun cája na apóstol

1 Co ndítahan toho ndaja cáhnu ndó ndehe. Xíní ñúhú quehe ndó cuéntá ña ñatahnda chuun nuú nde caja chúun nde cuéntá Jesucristo jánaḥa nde ña coo ñasaxíní ñayivi jihna, ña ñasacu ini Ndióxi caja.

2 Ta ndá da ndíquehe in chuun, xíní ñúhú ñaha da ña mé a ndaa cuu candeé ini na da, ña mé a ndaa caja tá caja da chuun ñatahnda nu dá caja da.

3 Ta cája i cuéntá ñacaja vaha i chuun ñasahnda Ndióxi nuú i caja i. Sahá ña cán quea co sáhní toho i mí i tá chícaan ndó cuachi jatá i. Ta co ndícani ini i tá java ga ñayivi chícaan na cuachi jatá i. Jáchi cája i cuéntá coo toho cuachi ñacaja i.

4 Tá ná cachi i xihín ndo ña coo toho cuachi ñacaja i, co cúní cachi i ña mé a ndaa co ndójo ga i cuachi. Jáchi xíní vaha Jesucristo, xitoho i á ñacaja vaha i á coo ñacaja vaha i.

5 Sahá ña cán quea co xíní ñúhú ndihi ini ndó candehe ndaa ndó ñayivi. Xíní ñúhú candati ndó janda quiahva ná quixi Jesucristo caja víi mé á sahá ñayivi já ná nditívi ña ñúhu ínimá in in ñayivi. Ta xihín ña yóho cuni tóco ndihi ñayivi ña cáhvi ini na. Anda jáví ndaja cáhnu Ndióxi na ñacaja vaha.

6 Candehe ndo ñani i, na cúu cuéntá Jesús. Sahá ña cúní nde ña ná candaá ini ndó ndía ndítahan caja ndo sahá ña cán quea ndícani i nu ndo saha Apolos xihín saha mí i. Jáchi ín in tuhun ta cáhí a ña co ndítahan nu ndó caja cáhnu ndó in ñayivi nani quehe núu ndó inga na. Ta xihín ña yóho cuu candaá ini ndó ña co ndítahan ndínehe jícó ndo mé ndó sahá ña cúu ndó cuéntá in da jáchi xihín ña yóho jánuu ndáha ndó inga na táhan nde.

7 Jáchi ni in ndó co cúu ndó na náhnu chága a juú ga inga na. Xíní ñúhú candaá ini ndó ña tóco ndihi ña cómí ndo cúu á ña ñasahan Ndióxi nu ndo. Sahá ña cán quea co ndítahan caja cáhnu ndó mé ndó sahá ña ñañehe táhvi ndo nu Ndióxi.

8 Cáhán ndo ña ni in ñaha co ndímaní nu ndo joo co cúu á ña ndaa. Cáhán ndo ña cúu ndó na cuicá joo co cúu á ña ndaa. Ta cáhán ndo cúu ndó na cómí cuéntá sahá ñayivi joo co cúu á ña ndaa. Caja ndó tátuhun co xíní ñúhú toho ndó ndehe. Vá ná cacomí

ndusa ndó cuéntá sahá ñayivi já ná cacomí ri ndehe va cuéntá saha ná xihín ndo.

9 Cúu á tátuhun ñasacu Ndióxi ndehe, na cúu apóstol janda nu ndihí. Cúu nde tátuhun na ndícuíta yíco cuhun quivi. Ta jandá johó sándehe ñayivi ñuyíví ndehe ta sácu ndaa na ndehe. Ta janda mé táto Ndióxi sándehe na ndehe cuahan nde.

10 Sahá ña quíhvi ini nde Jesucristo cúu nde tátuhun ñayivi tóntó ndivaha nuú ñayivi ñuyíví. Joo mé ndó ñandaja ndó mé ndó tátuhun na xíní ndivaha saha mé á. Mé nde cúu nde tátuhun ñayivi vitá nuú ñayivi ñuyíví joo cája ndó tátuhun na ndacú ini. Ndája cáhnu ñayivi ñuyíví mé ndó nani quehe núu na ndehe.

11 Ta janda viti ndóho tá ndóho ini nde. Java tañu coo ña cuxu nde ta coo ticuí coho nde ta ni jáhma candixi nde coo. Ta janda johó cája xíxi ñayivi xihín nde. Ta ni vehe nde coo.

12 Ta a juú quiahva ndúcú ndeé nde cája chúun nde catacu nde. Ta tá chícaan ñayivi cuachi jatá nde já xíca tahví nde nu Ndióxi ña ná caja mé á ñamani xihín ná. Ta cája ndeé ini nde tá cája xíxi na xihín nde.

13 Ta vitá cáhan nde tá ndúcú ñehe nde tuhun nuú ñayivi vatí cáhan núu na sahá nde. Mé nde cúu nde tátuhun xehe nuú ñayivi ñuyíví. Ta cája na xihín nde tá quiahva cája na xihín ñaha coo saha, ña ñacandoo cuhun cuíta. Ta quiahva já cája na xihín nde janda viti.

14 Xíní ñúhú candaá ini ndó ña co cáhyí i ña yóho nu ndo sahá ña cúní jácacahan i nuu ndo. Cáhyí i ña nu ndo jáchi cúu ndó tátuhun jahyi i. Ta jánaḥa i ña nu ndo tá quiahva cája in dataa xihín jahyi da jáchi quíhvi ini i ndohó.

15 Jáchi vatí ná coo uxu mil ñayivi jánaḥa na ndohó sahá Jesucristo joo in túhún yehe cúu tátuhun tátá ndo. Jáchi yehe cúu u da ñacahan tuhun vaha sahá Jesucristo nu ndó nu cuítí ta já ñacandeé ini ndó mé á.

16 Sahá ña cán quea xíca tahví i nu ndó ña ná caja ndó tá quiahva cája i.

17 Sahá ña cán quea chindahá i Timoteo nu ndo jáchi cúu dá tátuhun jahyi maní i ta cája chúun da cuéntá Jesucristo, xitoho i xihín ndinuhu ini da. Ta jándicuhun ini

da ndohó ndá quiahva cája i tañu na cúu cuéntá Jesús ta ndá quiahva jánaħa i nu ná ndijáá veñuhu nu xíca i cuahan i.

¹⁸ Java ndó načasáħa ndo cája lándā ndó jáchi cáħán ndo ña a sáa ga i coto nihni i ndohó.

¹⁹ Joo yachi saa i coto nihni i ndohó tá cúni Ndióxi. Anda já candehé e, á mé a ndaa ín ndée Ndióxi ini na xíca cája lándā jan á yúhu uun na cáħan na.

²⁰ Tá mé a ndaa cómi Ndióxi cuéntá sahá in ñayivi já quea ín ndée mé á ini na caja na ña cúni mé á. Ta coó saħa toho a á tiahva ndivaha na caħan na.

²¹ Ta viti cachi ndó xihín i ndía quea catóo chága ndo. Á catóo chága ndo ña ná saa i jánani i ndohó sahá ña cája ndó ña núu. Á catóo chága ndó ña ná saa i ta vií vií caħan i xihín ndo jáchi najándacoo ndó ña núu cája ndó. Ndiá cúni ndó.

5

Cáħan Pablo sahá in da ín xihín náná queén da

¹ Sa nañehé e tuhun ña ín in da cúu cuéntá Jesús tañu ndó jan ta ín da xihín náná queén da. Ta ña yóho cúu á in cuachi cáħnu ndivaha. Ta ni ñayivi ñuyiví co cája ña yóho.

² Ta vatí ín i cuachi cáħnu yóho tañu ndó joo cáa ga ri ndohó cája cáħnu ndó mé ndó. Xíní ñúhú cacuéħa ini ndó sahá ña yóho. Ta xíní ñúhú tavá ndó da cája cuachi yóho tañu ndó jan.

³ Vatí co ín i xihín ndo jan joo ndícani ndivaha ini i sahá ña cúu jan. Ta cúu á tátuhun ín i xihín ndó jan ña cán quea sa nasacu ini i ña xíní ñúhú caja ndó xihín da cája cuachi jan.

⁴ Játaca táhan ndihi ndó na cúu cuéntá Jesucristo, xitoho í. Ta mé a cán quiahva ndée á nu ndo caja ndó ña cúni mé á. Ta cacuu a tátuhun coo i xihín ndó jan.

⁵ Anda já xíní ñúhú ndiquiahva ndó da jan ndáħa tiñáħa sacuaħa já ná jándoho rí ini yiquí cuñu da viti ta já ná cuu cacu ndaa ínima dá tá ná xinu coo quiví quixi tucu Jesucristo.

⁶ Co ndítahan caja lándā ndo sahá ña cája ndó. Xíní ñúhú ndicuhun ini ndó in tuhun

ña cáħí já: “Chá cuití yúsa naxaa játiví ndihi a java yúsa ña ín vaha.”

⁷ Xíní ñúhú tavá ndo da jan tañu ndó jáchi cúu dá tátuhun yusá naxaa, ña játiví ña ín vaha. Ta xihín ña yóho quee ña núu veñuhu nu táca ndó jan jáchi sahá da jan cuu caquini inga na ta caja na cuachi. Xíní ñúhú canduu vií ndo tátuhun mé pan xíxi na vicó pascua jáchi coo yusá naxaa ñúhu xihín á. Ta Jesucristo nasacuu a tátuhun in ndicachi, rí najoco na nu Ndióxi vicó pascua sahá cuachi ñayivi jáchi naxihí a ndica crúxu sahá cuachí já ná cuu cacu ndaa ínima yo.

⁸ Sahá ña cán quea ndítahan cajji ini sahá ña nacaja Jesucristo. Xíní ñúhú jándacoo í ña núu sa nacaja í jihna, ña cúu tátuhun pan naxaa. Ta xíní ñúhú caja í ña ndaa xihín ndinuhu ini. Ta ña yóho cúu á tátuhun pan ña coo nacava táhan yusá naxaa xihín.

⁹ Nu carta nachindahá i nu ndó jihna ga, nacachi i xihín ndo ña ná a catáhan ndó xihín ñayivi, na ndúu xihín na co cúu yí ná á ñájihí na.

¹⁰ Tá nacachi i ña yóho xihín ndo co cúni cachi a ña xíní ñúhú tavá xóo ndó mé ndó chí in ndee nuú ñayivi ñuyiví yóho jáchi a cuú quee ndó ñuyiví yóho cuhun ndo. Ta mé a ndaa ndúu cuahá na ñuyiví yóho cája na cuahá cuachi xihín yiquí cuñu na ta catóo ndivaha na jiuhún ta cája cuihná na ta cája cáħnu na yoco.

¹¹ Ña cúni cachi i xihín ndo quea co ndítahan catáhan ndó xihín na cáħí cúu cuéntá Jesús nani cája na ña núu xihín yiquí cuñu na, á tá cúu ná na catóo ndivaha jiuhún, á tá cúu ná na cája cáħnu yoco, á tá cúu ná na tuhún, á tá cúu ná na xíhi, á tá cúu ná na cuihná. Ta ni a cacoo ndó cuxu ndó xihín ná tá cája na ña yóho.

¹² Co cáħan i sahá ñayivi ñuyiví jáchi co ndítahan nuú i caja vií i saħa ná. Joo ndítahan nu ndó candehé ndo ndaja cája na cúu cuéntá Jesús ndúu tañu ndó jan.

¹³ Jáchi mé Ndióxi quea caja vií a sahá cuachi ñayivi ñuyiví. Ña cán quea ndítahan nu ndó tavá ndó da cája cuachi tañu ndó jan.

6

Tá sácú saha táhan na cúú cuéntá Jesús nuú na jutixia

¹ Tá cō táhán ini ndó xihín ña cája ñani ndó, na cúú cuéntá Jesús cō ndítahan nu ndó cūhun ndó cacu ndó saha ná nuú na jutixia, na cō cúú cuéntá Jesús. Ña ndítahan caja ndó queá cahan ndó xihín mé na cúú cuéntá Jesús ña ná caja vií na sahá ña cō táhán ini ndó xihín jan.

² Á cō xini ndó tandaa quivi caja vií na cúú cuéntá Jesús saha tóco ndihi ñayivi ñuyivi. Ta tá mé ndó cacuu ndó na caja vií saha tóco ndihi ñayivi ñuyivi, ndá cuéntá queá cō cūni ndó caja vií ndó sahá ña válí cúú tañu mé ndó jan.

³ Ña xini ñúhú caja ndó queá nducú ndo caja vií ndo sahá ña cúú tañu ndó jan. Jáchí xini ñúhú ndicūhun ini ndó ña janda táto Ndióxi caja vií yō saha.

⁴ Sahá ña cán queá tá cáni táhan ndó sahá ñaha válí ñuyivi yóho cō xini ñúhú toho cūhun ndó cavií saha ndó nuú na cō cúú cuéntá Jesús.

⁵ Candehé ndó. Cahan i ña yóho xihín ndo já ná cacahan nuu ndo. Á cō ín in da tácu ini tañu ndó jan ña ná caja vií da saha ndó, vaha. Xini ñúhú ndindita in da tácu ini já ná cuu caja vií da sahá ña cúú tañu ndó jan.

⁶ Joo ña cája ndó queá cáni táhan ndaja táhan mé ndó ta já ndáca táhan ndó cuahan ndó cavií saha ndó nuú na cō cúú cuéntá Jesús. Cō ndítahan toho caja ndó já.

⁷ Sa cuachi cáhnu ndivaha queá cája ndó tá cáni táhan ndaja táhan mé ndó jan. Vaha ná caja ndeé ini ndó tá cō cája vaha in na xihín ndo. Vaha ná caja ndeé ini ndó tá ná caja cuíhna na ñaha ndó. Jáchí cō ndítahan cacu saha táhan ndó nuú na cō cúú cuéntá Jesús.

⁸ Joo ña cája ndó queá ña núu xihín ñani táhan ndó ta janda cája cuíhna ndo ñaha ñani ndó, na cúú cuéntá Jesús.

⁹ Xini ñúhú candaá ini ndó ña cōó saha toho ñayivi cája ña núu jan cūhun na nuú cacomí Ndióxi cuéntá saha ná. A jándahvi ndó mé ndó jáchí na ndúu xihín na cō cúú yí ná á ñájihí na a cūhun toho na nuú cacomí Ndióxi cuéntá saha ná. Ta ni na cája cáhnu yoco ni na ndúu xihín yí á ñájihí inga

na ta ni da cúú taa líhi a cūhun toho na nu Ndióxi.

¹⁰ Ta ni na cuíhna ta ni na cátóo ndivaha jiuhún ta ni na xihí ta ni na ndahnda yūhu ta ni na jándahvi ñahá ta ni in táhan na yóho a cūhun toho na nuú cacomí Ndióxi cuéntá saha ná.

¹¹ Ta táhan na yóho nasacuu ri java ndóhó va, nduu. Joo viti sa nandaja vií Ndióxi ndohó ta naçaxi a ndohó cacuu ndó cuéntá mé á. Nanduu ndó ñayivi ndaa nu Ndióxi sahá ña naçaja Jesucristo, xitoho í ta sahá ña cája ínima yí Ndióxi.

Xini ñúhú candaá iyiquí cuñu í jáchí cúú á ña yí

¹² Ndúu java ñayivi ta cáchí na ña núná nu ná caja na ña cūni mé va na. Vatí mé a ndaa núná nu ná caja na ña cūni mé ná joo xini ñúhú candehé na á vaha, á a váha ña cája na. Jáchí mé a ndaa núná nu yō caja í ña cūni mí joo cō ndítahan quiahva í ñamani ña ná cahnu ña núu yiquí cuñu í.

¹³ Ta cáchí na ña ín tixi yó sahá ña cán queá xini ñúhú cuxú. Ta cáchí na ña xini ñúhú cuxú jáchí ín tixí. Joo vaxi quivi jándihi Ndióxi saha ndívi ña yóho. Ta cōó nasahan Ndióxi yiquí cuñu í nu yō ña ná caja í cuachi xihín á tátuhun ña ná coo í xihín na cō cúú ñájihí yō á yí yō. Nasahan Ndióxi yiquí cuñu í nu yō já ná caja í ña cūni mé á. Ta naçaja mé á ña ná cacomí a cuéntá saha yō.

¹⁴ Ta tá quiahva naçaja Ndióxi najánditacu a Jesucristo, xitoho í quiahva já caja ri a jánditacu a yiquí cuñu í xihín ndeé mé á.

¹⁵ Xini ñúhú candaá ini ndó ña in cúú ndó xihín Jesucristo. Ta tá cuahan ndó cája ndó cuachi xihín najihí xíca jii, cúú á tátuhun ñehe ndó Jesucristo cuahan cája ña núu. Cō ndítahan caja ndó já.

¹⁶ Sa xini vaha ndó ña tá quíhvi nuu in dataa xihín najihí xíca jii já queá ndúu na tátuhun in víxí ñayivi. Jáchí cáchí tuhun Ndióxi já: “Tá ná ndique táhan in dataa xihín in ñáñaha já queá ndúu na tátuhun in víxí ñayivi.”

¹⁷ Ndá na ndiquiahva mé ndáha Jesucristo, xitoho í já queá in ndúu na xihín mé á jáchí ñúhu ínima yí Ndióxi ini na.

18 Cama caxoo ndó nu tóco ndihi ña núu xíca ini yiquí cuñu ndó caja. Co ndítahan coo ndó xihín na co cúu ñájíhí ndo á yí ndo jáchi ni in túhún toho cuachi co cája quini nahá xihín yiquí cuñu ñayivi tátuhun cuachi yóho. Jáchi ndá na íin xihín na co cúu yí ná á ñájíhí na já queá cája na cuachi nuú yiquí cuñu mé va na.

19 Xíní ñúhú ndicuhun ini ndó ña mé yiquí cuñu ndó jan cúu á tátuhun in veñuhu nu ndácaan ínima yí Ndióxi, mé a nasahan Ndióxi nu ndo. Ta viti yiquí cuñu ndó a juú ñaha mé ndó cúu á jáchi cúu á ñaha Ndióxi.

20 Jáchi yahvi ndivaha nachahvi Ndióxi saha ndo tá naxihí Jesucristo ndica crúxu. Sahá ña cán queá ndítahan caja cáhnu ndó Ndióxi xihín yiquí cuñu ndó ta jári xihín ínima ndo jáchi ndívi a cúu á cuéntá Ndióxi.

7

Tá tándaha ñayivi

1 Ta viti cúni nducú ñehé e tuhun nu ndo sahá ña nandaca tuhún ndó yehe nu carta nachindahá ndó nuú i. Cáchi i xihín ndó sahá da cámani tandaha ña vaha cája da tá ná coo tacú da.

2 Joo sahá cuachi cája ñayivi tá ndúu na xihín na co cúu ñájíhí na á yí ná sahá ña cán queá vaha chága ná tandaha ná já ná coo ñájíhí in in ta ta jári najíhí va ná coo yí in in na.

3 Ta in dataa ndítahan ndiquiahva da mé dá nu ñájíhí da ta jári ñañáha ndítahan ndiquiahva ña mé ña nu yí ña jáchi quiahva já sáhdá a coo a.

4 Jáchi in ñañáha, ña natandaha co cómi ga ña cuéntá saha mé ña jáchi yí ña cúu da cómi cuéntá saha yiquí cuñu ña. Ta ni in dataa, da natandaha co cómi ga da cuéntá sahá yiquí cuñu da. Ñájíhí da cúu ña cómi cuéntá sahá yiquí cuñu da.

5 Sahá ña cán queá ndítahan ndiquiahva nu táhan ndó ta a cándají táhan ndó. Ta tá co cúni ndó cuju xitáhan ndó xíní ñúhú cacuu a sahá ña sa najándique táhan tuhun ndó ña a cúju xitáhan ndo sahá ña cúni ndó caça tahví ndó nu Ndióxi chá tiempo. Joo tá nandihí xíní ñúhú ndique táhan tucu ndó jáchi tiahva náa jácahan Satanás, mé tiñáha sacuahá ndohó ña ná caja ndó cuachi sahá

ña a cuú cahnu ndó nuú ña xíca ini yiquí cuñu ndó caja.

6 Tóco ndihi ña cáhan i xihín ndo yóho co cúni cachi a ña xíní ñúhú tándaha ndo vatí cuu tandaha ndo tá cúni ndo.

7 Vatí mé a ndaa cáji íni i tá ná canduu tacú ndihi ndó tátuhun yehe. Joo sa jíin sa jíin nacaja Ndióxi xihín in in í. Java na ñehé táhvi ná tandaha na ta java na ñehé táhvi na canduu tacú na.

8 Ndá na ndúu tacú xihín ndá na ndúu cuaan, ña vaha chága queá ná a tándaha ná ta ná canduu na tátuhun yehe.

9 Joo tá co ndeé ini na cahnu na yiquí cuñu na, vaha chága ná tandaha ná jáchi vaha chága ná tandahá ñayivi a juú ga ña ná ndiava íni na coo na xihín na co cúu yí ná á ñájíhí na.

10 Ta nu ndohó, na sa íin yí á ñájíhí, sáhdá i chuun nu ndó ña ná a jándacoo táhan ndó. Ta ña sáhdá i nu ndo yóho co cúu á ña naquixi jini mí i. Cúu á ña sáhdá Ndióxi caja ndó. Co ndítahan nuú in ñañáha jándacoo ña yí ña.

11 Ta tá ná jándacoo ña da, co ndítahan nu ña tandaha ña xihín inga da. Á tá coo ta ña ndítahan caja ña queá ndique táhan maní tucu ña xihín yí ña. Ta jári in dataa co ndítahan nu dá jándacoo da ñájíhí da.

12 Íin java ga ñaha cúni cahan i xihín ndo. Mí i cáhan i ña vaha caja ndó ña vatí mé a ndaa co cúu á ña nasahnda Ndióxi nuú i jánahá i nu ndo. Ta ña yóho queá ña cahan xihín ndo: Tá íin in da cúu cuéntá Jesús ta íin ñájíhí da, ña co cúu cuéntá Jesús. Ta tá cáji ini ña coo ña xihín dá já queá co ndítahan nu dá jándacoo da ña.

13 Ta tá íin in ña cúu cuéntá Jesús ta íin yí ña, da co cúu cuéntá Jesús. Ta tá cáji ini da coo da xihín ña já queá co ndítahan jándacoo ña da.

14 Jáchi cája yí Ndióxi in dataa sahá ña íin da xihín ñájíhí da, ña cúu cuéntá Jesús. Ta jári cája yí Ndióxi in ñañáha sahá ña íin ña xihín yí ña, da cúu cuéntá Jesús. Jári cája yí Ndióxi jahyi na yóho ná a cacuu na tátuhun na co xíní Ndióxi. Ta xihín ña yóho cuu candaa ini na ndaja íin íchi cuéntá Jesús.

15 Joo tá cúni yí ndo á ñájíhí ndo, na co cúu cuéntá Jesús jan, quee na cuhun na já

quea quiahva ndó ñamaní nu ná caja na ña. Jáchi co ndítahan nu ndó caja ndúsa ndó xihín na co xini Ndióxi cán ña ná coo na xihín ndo. Jáchi cuni Ndióxi ña ná canduu vii ndo.

16 Ta ni co xini ndo á ndiquehe yíi ndó á ñájihí ndo íchi cuéntá Jesús, á a ndiquehe na ña.

17 Ta cáxi tuhun i nu tóco ndihi na cúu cuéntá Jesús ndúu ndijáa veñuhu ña ndítahan coo na tá quiahva ñasahjin na tá ñandihvi na íchi cuéntá Jesús jáchi quiahva já cuni Ndióxi.

18 Ta tá ñaquihvi ndó íchi cuéntá Jesús ta sa ndácaan marca yiquí cuñu ndó coo caja toho a. Joo tá coo marca ñan yiquí cuñu ndó co ndítahan chícaan ndó ña yiquí cuñu ndó.

19 Jáchi coo caja toho a á iin marca yiquí cuñu ndó á coo a. Ña cuni Ndióxi quea ná caja ndó ña sáhdá mé á nu ndo caja ndó xihín ndinuhu ini ndó.

20 Ta ndítahan coo ndó tá quiahva ñasahjin ndó tá ñandiquehe ndó íchi cuéntá Jesús.

21 Ta tá ñasacuu ndó ña ñaxeen xitoho ndó caja chúun ndó tá ñandiquehe ndó íchi cuéntá Jesús já quea co ndítahan ndicani ini ndó sahá. Joo tá ná quiahva xitoho ndó íchi nu ndó ña ná quee ndó cuhun ndo já quea caja ndó ña.

22 Jáchi da cúu cuéntá Jesús cúu dá da ñajaní Ndióxi nuú cuachi da vatí cándo da cája chúun da cuéntá xitoho da, da ñaxeen ñahá. Ta da ñaxica núná mé tá ñandiquehe da íchi cuéntá Jesús cúu dá mozo cuéntá Jesucristo.

23 Jáchi yahvi ndivaha ñachahvi Ndióxi saha ndo tá ñaxihí Jesucristo ndica crúxu ña ná cacomí a cuéntá saha ndo. Sahá ña cán quea a ndíquiahva toho ndó mé ndó ndáha ñayivi ña ná cahnu na ndohó.

24 Candehé ndo ñani mí i, ña cúu cuéntá Jesús. Ndítahan coo ndó tá quiahva ñasahjin ndó tá ñacana Ndióxi ndohó cacuu ndó cuéntá mé á jáchi iin mé á xihín ndo.

25 Ta viti cuni cahan i sahá ña tacú, ña cámaní tandaha. Coo ñacachi toho Ndióxi xihín i sahá ña yóho ña cán quea cahan i ña cáhvi ini mí i sahá. Ta cuu candúsa ndó

ñá cahan i xihín ndo jáchi ñacaja Ndióxi ñamaní xihín i ña cúu u in da tácu ini.

26 Ta cáhan i ña ndítahan coo tacú in dataa jáchi ihvi ndivaha cáa tiempo ndúu viti.

27 Joo tá iin ñájihí ndo, a jándacoo ndó ña. Ta tá coo ñájihí ndo, a ndúcú ndó ña.

28 Joo a juú cuachi quea cája ndó tá ná tandaha ndo. Ta ni a juú cuachi quea cája in ña tacú tá ná tandaha ña. Joo mé a ndaa ná cahan i xihín ndo, yáncá a tá ná tandaha ñayivi jáchi cuahá ndivaha ndoho ini na. Ta co cuni ña ná ndoho ini ndó já sahá ña cán quea cahan i ña yóho xihín ndo.

29 Candehé ndo ñani i, ña cúu cuéntá Jesús. Ña cuni cachi i cúu ña yóho: Sa ñacayati tiempo quixi Jesucristo. Sahá ña cán quea ña iin ñájihí xini ñúhú ndihi ini na caja chúun na cuéntá mé á tá quiahva cája chúun na tacú cuéntá mé á.

30 Ta ndá ña ndúu cuéha ndivaha ndítahan caja na tátuhun ña cájii ini. Ta ña cájii ini ndítahan caja na tátuhun ña ndúu cuéha ndivaha ini. Ta ña xéen ñaha ñuyiví yóho ndítahan caja na tátuhun ñaxeen na ña co cúu ñaha na.

31 Ta ña cómi ñaha ñuyiví yóho, xini ñúhú ndindójó ña sahá ñaha cán. Jáchi vaxi quivi ndihi saha ñuyiví yóho xihín tóco ndihi ñaha iin nu á.

32 Ña cuni yehe quea ña ná a ndicani ñahá ini ndó sahá ñaha ñuyiví yóho. Jáchi tá cámaní tandaha in dataa já quea núná nu dá caja chúun da cuéntá Ndióxi xihín ndinuhu ini da. Ta ndúcú da ndá quiahva caja da ña cájii ini Ndióxi xihín.

33 Joo da sa ñatandaha ndítahan caja chúun da ñuyiví yóho já ná cana ña cuxu ña vehe da. Ta cája da ña cájii ini ñájihí da xihín.

34 In da natandaha co xini da ndía ndihi chága ini da saha, á Ndióxi á ñájihí da. Ta jári ñajihí tá cúu ná ña tacú ndihi ini na caja na ña cuni Ndióxi jáchi ndíquiahva na mé ná ndáha Ndióxi ña ná cacomí a cuéntá saha yiquí cuñu na ta sahá ínimá ná. Joo ñajihí ndúu yíi ndihi ini na sahá chuun vehe na jáchi cuni ña ña ná tahan ini yíi ná xihín ná.

35 Cáhan i ña yóho xihín ndo jáchi cuni chindee e ndohó ta co cahan i ña sahá ña co cuni ña ná tandaha ndo. Ña cuni quea ná

nuná nu ndó caja chúun ndó cuéntá Ndióxi xihín ndinuhu ini ndó ta ná a cáji nuu ni in ñaha nu ndó caja ndó ña cúní Ndióxi.

³⁶ Ta ndá da ín jahyi jíhí ta cáhán da ña ndítahan tandaha ña jáchi sa cuahá cuia ña já cuu quiahva da ña ña ná tandaha ña tá cúní da. A juú toho cuachi cúu ña yóho.

³⁷ Ta tá cáhán ndo ña co ndítahan toho tandaha jahyi ndó ta cáhán ndo ña cáji ini ña ña coo mé ña já quea vaha va cája ndó tá co cája ndúsa ndó xihín ña ná tandaha ña.

³⁸ Vaha cája in dataa tá sáhan da ñamaní nuú jahyi jíhí da ña ná tandaha ña. Joo vaha chága cája da tá co cája ndúsa dá xihín ña ña ná tandaha ña.

³⁹ Ta a cúu tandaha in ñañáha xihín inga dataa nani tácu yí ña. Joo tá naxihí yí ña já quea candoo núná nu ña tandaha tucu ña. Joo ndítahan tandaha ña xihín da cúu cuéntá Jesús.

⁴⁰ Vatí cáhán i ña cají chága ini ña tá ná a tandaha tucu ña. Ña yóho quea cáhvi ini i sahá ña yóho. Ta ínima yí Ndióxi quea jácahan yehe cáhí i ña yóho xihín ndo.

8

Cáhan Pablo sahá ña najoco ñayivi nuú yoco

¹ Ta viti cúní ndicani i nu ndo sahá ña ndítahan caja ndó xihín ña najoco na nuú yoco. Vatí cúu á ña ndaa tá cáhí java na ña xini vaha na sahá ña yóho joo tá cáhán yo cúu yó na xini vaha já quea casáha yo ndínehe jíco yo mí. Joo tá quíhvi ini ñani táhan í já ndindacú chága yó xihín ñaha Ndióxi.

² Tá ndúu java na tañu ndó ta cáhán na ña sa xini na ndaja táhan ñaha, na yóho náha ña cámaní cándaá ini na ña ndítahan candaá ini na.

³ Jáchi mé a ndaa xini vaha Ndióxi ndá na cúu na quíhvi ini mé á.

⁴ Ta viti cáhan i xihín ndo sahá ña najoco na nuú yoco. Cándaa cáxí ini ña coo a cúu toho yoco ndúu ñuyíví. Ta cándaá cáxí ini ña in tálaá Ndióxi cúu ndusa Ndióxi.

⁵ Vatí cáhí ñayivi ña ndúu cuahá ndiόxi ta ndúu cuahá xitoho indiví xihín ñuyíví

⁶ Joo mí cándaá vaha ini ña ín in túhún Ndióxi, mé a cúu tátá yo. Ta mé á quea

naçavaha tóco ndihi ñaha. Ta naçavaha mé á mí ña ná caja cáhnu í mé á. Ta ín in túhún xitoho í ña cúu Jesucristo. Ta mé á quea cája ña ná coo tóco ndihi ñaha ta cája ña ná catacu mí viti.

⁷ Joo a juú tóco ndihi na cúu cuéntá Jesús xini ña yóho. Jáchi java táhan na sa cája cáhnu yoco sanahá cán tá xixi na ña najoco ñayivi nuú yoco cáhán na ña cúu á ña najoco na nuú java ndiόxi. Ta xihín ña yóho cáhán na ña cúu ná na sa nayuxu sahá ña naxixi na ña najoco ñayivi nuú yoco. Ta co xini na á ndítahan cuxu na ña á co ndítahan cuxu na ña.

⁸ Cándehé ndo. Co ndíquehe toho Ndióxi mí sahá ña xixí. Jáchi co cúu yó na ín chága saha tá xixí in ñaha. Ta ni co cúu yó na coo saha tá co xixí ñaha.

⁹ Joo xini ñuhú candehé ndo ña ná a jándicava ndó inga na nuú cuachi sahá ña cája ndó jan. Jáchi vatí xini vaha ndó ña cuu cuxu ndó ña cán joo ndúu java na vitá cuahan íchi cuéntá Jesús.

¹⁰ Cúu á tátuhun sácoo ndó cuxu ndó nu cáyahvi ña najoco na nuú yoco jáchi sa xini ndo sahá ña yóho. Ta nani ín ndó xixi ndó jan yáha in da cúu cuéntá Jesús, da vitá xihín ñaha Ndióxi. Ta sahá ña xini da ndohó já quíhvi da jan xixi da xihín ndo vatí cáhán da cúu á cuachi.

¹¹ Xihín ña cája ndó jan cuu jándicava ndó da vitá xihín ñaha Ndióxi cán nuú cuachi vatí xini vaha ndó ña co cája ndó cuachi tá ná cuxu ndó ña najoco na nuú yoco. Xini ñuhú ndicuhun ini ndó ña naxihí Jesucristo sahá da jan.

¹² Tá jándicava ndó ñani ndó, da vitá xihín ñaha Ndióxi cán nuú cuachi já quea cája ndó cuachi nuú Jesucristo viti.

¹³ Sahá ña cán quea tá ná jándicava i ñani i nuú cuachi sahá ña xixi i cuñu, ña najoco na nuú yoco cája i cuéntá a cúu ga i ña já ná a jándicava i inga da nuú cuachi.

9

Ña núná nuú in na apóstol caja

¹ Mé a ndaa yehe cúu u in apóstol cuéntá Jesucristo sahá ña cán quea núná nuú i caja i ña cája in apóstol. Jáchi mí i sa naxini i xihín nuú i Jesucristo, xitoho í. Ta mé ndó nandíquehe ndó íchi cuéntá mé á sahá

chuun nacaaja i ta ña yóho náha ña mé a ndaa cája chúun i cuéntá mé á.

² Cája i cuéntá ndúu java na ta co ndiquehe na yehe tátuhun in apóstol cuéntá Jesucristo. Joo ndóhó ndítahan ndiquehe ndó yehe jáchi nanduu ndó cuéntá mé á sahá chuun nacaaja i. Ta xihín ña yóho náha ña mé a ndaa cúu u in apóstol cuéntá mé á.

³ Ta ña yóho cúu tuhun ndúcú ñehe e nuú na cáhan núu sahá i jan:

⁴ Ín sahá i ña ná coto ndó yehe.

⁵ Ta tá ná coo ñájíhí i, ña cúu cuéntá Jesús ín sahá i candaca i ña caca nuu i tá quiahva cája Pedro xihín java ga na apóstol xihín ñani Jesucristo, xitoho í.

⁶ Á cáhan ndo ña in túhún yehe xihín Bernabé cúu nde da coo saha ña ná coto na cúu cuéntá Jesús ndehe, vaha.

⁷ Jáchi ni in túhún toho soldado co quehe da jiuhún mé dá ta já xito da mé dá. Jári ndá da xútu yitó uva, cuu caxí da uva cána nu dó cán jáchi já cáni a coo a. Ta jári ndá da ndáá ndicachi cuu coho da leche ndicachi ndáá da cán jáchi já cáni a coo a.

⁸ Ta a juú cahán ndo ña cáhan i ña quíxi jini mé cuití vj jáchi cáchi ley mé Moisés ña yóho viti.

⁹ Já cáchi a já: “A chícáun ñúnu yuhú tindiquí nani cája chúun rí sání rí trigo. Joo xíní ñúhú quiahvún ñamaní nu rí caxí rí a”, cáchi tuhun Ndióxi. Joo co ndíhi ini Ndióxi sahá tindiquí cuití va.

¹⁰ Saha mí ví nacahyí Moisés ña yóho ta saha mí ví cáhan ña yóho tá cáchi a já. Cúu á tátuhun cája da xútu táti xihín da jáquee táti jáchi ndáti ndíví da ndiquehe da táhan nuñi cán sahá ña nacaaja chúun da xihín á.

¹¹ Tá nacahan nde tuhun Ndióxi xihín ndó já cúu á tátuhun nachihin nde tata cuéntá Ndióxi ini ínima ndo. Saha ña cán quea ndítahan nu ndo chindeé loho ndó ndehe xihín ña cómi ndo jáchi najánaha nde tuhun Ndióxi nu ndo.

¹² Ta mé a ndaa ín chága saha mé nde ña ná coto ndó ndehe a juú ga inga na.

Ta vatí ndítahan nu ndó coto ndó ndehe joo coo nacaaja ndúsa nde xihín ndo ña ná caja ndó ña. Ta cuahá tañu cája ndeé ini nde jáchi co cúní nde caji nuu nde ña ná ndicuita nuu tuhun vaha sahá Jesucristo.

¹³ Mé ndó sa cándaa vaha ini ndó ña núná nuú na cája chúun ini veñuhu cuxu na ña jóco ñayivi nu Ndióxi. Ta na cája chúun nu ná Ndióxi veñuhu núná nu ná cuxu na cuñu quítí, rí najoco ñayivi nu Ndióxi.

¹⁴ Ta quiahva já cája chúun nde cuéntá Jesucristo, xitoho í cáhan nde tuhun vaha saha mé á. Ta nasahnda mé á chuun ña ná coto na cúu cuéntá mé á ndehe sahá chuun cája nde.

¹⁵ Joo ni in túhún tañu coo nacaaja ndúsa i xihín ndo ña ná coto ndó yehe vatí cáni nu ndó caja ndó ña. Ta ni co cáhyí i carta yóho nu ndo já ná quiahva ndó ñaha nuú i, vaha. Jáchi mé a ndaa ín vaha ini i cáhan i tuhun Ndióxi xihín ndo ta coo caja toho a ña ná quivi i jóco.

¹⁶ Yehe co ndíñehe jícó i mí i sahá ña xíca nuu i cáhan i tuhun vaha sahá Jesucristo nuú ñayivi jáchi cúu á chuun ndítahan nuú i caja i. Ta ndáhví nahá nacuu u tá ná caja sáa ini i caxi tuhun i ña.

¹⁷ Tá ná cája i chuun yóho sahá ña cúní mí i cuití va já quea cuu quehe e yahvi sahá. Joo co cája toho i já jáchi nacaxi Ndióxi yehe cahán i tuhun mé á sahá ña cán quea ndúsa cája i ña.

¹⁸ Ta sa mé yahvi quehe e sahá chuun cája i quea cáji ini i tá cáhan i tuhun vaha sahá Jesús nuú ñayivi ta co cháhvi na sahá. Ta cáji ini i jáchi co cája ndúsa i xihín ndo ña ná coto ndó yehe tá quiahva cája ndó xihín java ga na cáhan tuhun Ndióxi xihín ndo.

¹⁹ Vatí mí i co cúu u mozo ñayivi joo cája chúun i mí i tátuhun mozo saha tóco ndíhi ñayivi. Jáchi caxi tuhun i tuhun vaha sahá Jesucristo nu ná já ná cuu ndicuaḥa chága na cúu cuéntá Jesús.

²⁰ Tá xíca nuu i tañu na Israel ndája i mí i tátuhun in da Israel jáchi ña cúní quea ná ndiquehe na íchi cuéntá Jesús. Ña cúní cachi i quea tá ín i tañu na cája ley Moisés in cája i xihín ná vatí co ndíco i íchi cuéntá ley Moisés viti. Joo cája i ña sahá ña cúní i ña ná ndiquehe na íchi cuéntá Jesús.

²¹ Ta tá xíca nuu i tañu na co cája ña sáhdá ley Moisés já cája i tá quiahva cája mé ná jáchi cúní ña ná ndiquehe na íchi cuéntá Jesús. Joo co cája i cuachi tá quiahva cája na cán jáchi sáhdá ley Ndióxi chuun

nuú i viti ta cája i ña cúni Jesucristo cuití va.

²² Ta tá xíca nuu i tañu na vitá xihín ñaha Ndióxi já quea jánuu ndáha i mí i jáchi cúni ña ná ndindacú na xihín tuhun mé á. Ña cúni cachi i xihín ndo quea ndája i mí i tátuhun ndá na nacuu va jáchi cúni quee vaha i xihín ná já ná ndihvi na íchi cuéntá Jesús ña ná cacu ndaa ínima ná.

²³ Cája i tóco ndihi ña yóho já quea ná ndicuita nuu tuhun vaha cáhan sahá Jesucristo. Jáchi xihín ña yóho caja cuaha Ndióxi ñamani xihín i.

²⁴ Candehé ndo. Sa xíni vaha ndó ña tá jáquehe táhan java ta tuhun da ña ná cunu da, mé a ndaa tóco ndihi da ndúcú ndéé da xínu da. Joo in túhún da quee vaha. Ta já quehe da ña ndítahan nu dá quehe da. Quiahva já ndítahan caja ri ndóhó va. Xíni ñúhú nducú ndo cuhun vaha ndó íchi cuéntá Jesús janda quiahva ná xinu coo ndó janda nu ndíhi cuí já ná quiahva Ndióxi nu ndo ña ndítahan ndiquehe ndó.

²⁵ Tóco ndihi ñayivi tá cája tiahva na mé ná ña ná cuhun na cunu na, co cúni na caja na ndá ña nacuu jáchi ndáa na mé ná. Tóco ndihi ña yóho cája na sahá ña cúni na quee vaha na ña ná ñehe ná in tiyivi ita sánúu jini ná vatí cama chá íchi ita cán. Joo mí ndúcú ndéé yo cuahan yó íchi cuéntá Jesús jáchi ña ndátí mí quiahva Ndióxi nu yo co ndíhi saha anda ama cáa quivi.

²⁶ Joo co cúu u in da xínu cuáa. Ta ni co cúu u tátuhun in da jácana yiquí nuú tachí. Jáchi ndúcú ndéé e quee vaha i já ná ndiquehe e ña quiahva Ndióxi nuú i.

²⁷ Ña cája i quea cája ndúsa i xihín yiquí cuñu i ña ná caja i ña cúni Ndióxi. Jáchi a juú tiahva náá jándacoo Ndióxi yehe vatí mí i cúu u da najánaha tuhun Ndióxi nuú ñayivi.

10

Cáhan Pablo ña co ndítahan caja cáhnu na yoco

¹ Candehé ndo ñani i, na cúu cuéntá Jesús. Co cúni ña ná ndindójo ndo ndá quiahva nacaja Ndióxi sanahá xihín tásáhnu jícó yo tá nasandaca mé á na yucú íchi cán. Nacaja mé á ña ná xinu in vico núhú xoo nuú cuahan na ña ná candaca a na. Ta

nachindeé a na ña ná cuu cojo cava na tañuhú nani tañuhú cuáhá.

² Ta tóco ndihi na cán in nanduu ndihi na xihín Moisés tá nayaha na tañuhú nani ndaca vico núhú na. Nasacuu a tátuhun nacanduta ná ña ná cacomí Moisés cuéntá saha ná.

³ Ta tóco ndihi na cán naxixi na ña nachindahá Ndióxi, ña naquixi a nu ná chí indivi.

⁴ Ta quiahva já tóco ndihi na cán naxihi na ticuú, dó nasahan mé á nu ná coho na. Mé ticuú cán cúu dó dó nacana tixi in tóto. Ta mé tóto cán cúu á tátuhun yuhú nuu Jesucristo, mé a nasahiin xihín ná nani naxica nuu na yucú íchi cán.

⁵ Joo cuahá ndivaha táhan na cán nacaja na ña núu ña co cáji iní Ndióxi xihín. Sahá ña cán quea naxihi na mé yucú íchi nu xíca na cuahan na cán.

⁶ Tóco ndihi ña nayaha yóho jánaha nu mí ña co ndítahan ndiava iní ña co táhan iní Ndióxi xihín tá quiahva nacaja na cán.

⁷ Sahá ña cán quea coto a juú caja cáhnu ndó yoco tá quiahva nacaja java na cán jáchi já cáchi tuhun Ndióxi já: “Tóco ndihi ñayivi cán nasacanduu na xíxi na ta xíhi na ta já nandicuita na xíta sahá na ña cája cáhnu na yoco”, já nacaja na cáchi tuhun Ndióxi.

⁸ Joo mí xíni ñúhú candaa í mí já ná a cája í cuachi ña quihvi nuu í xihín inga najihí á xihín inga dataa tá quiahva nacaja java na cán. Ta sahá cuachi nacaja na cán naxihi oco uni mil na in túhún quivi.

⁹ Ta co ndítahan nu yo coto ndojó yo Jesucristo, xitoho í ña ná candehé yo á mé a ndaa jándoho a iní sahá cuachi cája í. Jáchi quiahva já nacaja java na cán va ta sahá ña cán naxihi na nacaja cuahá coo.

¹⁰ Coto a cáhan cuhé ndó saha Ndióxi tá quiahva nacaja java tásáhnu jícó yo cán. Jáchi sahá ña nacaja na naxihi na nacaja táto Ndióxi, mé a xíca sáhní ñahá.

¹¹ Tóco ndihi ña nayaha xihín tásáhnu jícó yo cúu á ña náha nu yo ña co ndítahan quehe núu í Ndióxi. Ta nacahyi a nuú tuhun Ndióxi já ná cuni mí, yó nduu tiempo yóho ña co ndítahan caja í tá quiahva nacaja na cán jáchi sa nacayati quivi ndihi saha ñuyiví.

12 Ña cán quéa tá cáhán ndo cuahan vaha ndó íchi cuéntá Ndióxi já quéa xíní ñúhú candaa vaha ndó mé ndó já ná a ndícava ndó nuú cuachi.

13 Candehé ndo. Xíní ñúhú ndicuhun ini ndó ña a juú mé ndó cuití quixi tondóhó nuú jáchi quixi tondóhó jan nu tóco ndihi java ga ñayivi. Ta ndítahan candee ini ndó Ndióxi jáchi a quiahva toho mé á ñamani ña ná quixi tondóhó náhnu nu ndo ña co cándeé ndó xihin. Ña cája Ndióxi quéa chin-deé a ndohó tá ná quixi tondóhó nu ndo já ná cuu caja ndeé ini ndó tá ná ndoho ndó ña.

14 Candehé ndo ñani i, na cúu cuéntá Jesús. Xíní ñúhú jándacoo vaha ndó ña cája cáhnu ndó yoco.

15 Tá quiahva cáhan i xihin ñayivi tácu ini quiahva já cáhan i xihin ndo. Ta mé ndó cándaá vaha ini ndó á ndaa á a ndaa quéa cáhan i xihin ndo.

16 Ná ndiquiahva í ndixahvi nu Ndióxi tá ndicuhun ini sahá ña nacaja Jesucristo tá naxihí a saha yo. Jáchi tá xihí vino ña yij já cúní cachi a ña in nanduú xihin mé á sahá ña naxita nij mé á ndica cruxu saha yo. Ta jári tá xixí pan ña yij ña sáhdá java nu táhan í cúní cachi a ña in nanduú xihin mé á jáchi nandiquiahva yiquí cuñu a saha yo.

17 Ta vatí cuahá ndivaha cúu yó joo in túhún pan sáhdá java í xixí jáchi xihin ña yóho náha ña in cúu ndihí xihin Jesucristo.

18 Xíní ñúhú candehé ndo ndá quiahva cája na Israel jáchi tá sáxi na cuñu quítí, rí najoco inga na nu náa cán já cúu á tátuhun mé ná nasahní na mé quítí cán ta najoco na rí. Quiahva já yáha xihin mé ndó tá sáxi ndó cuñu ña najoco na nuú yoco. Cúu á tátuhun najoco mé ndó ña.

19 Joo xíní ñúhú ndicuhun ini ndó tá cáchí i ña yóho xihin ndo co cúní cachi i ña ín sahá yoco. Ta ni co cúní cachi i ña ín chága sahá cuñu najoco na nuú yoco a juú ga inga cuñu.

20 Ña cúní cachi i xihin ndo quéa tá ná joco ñayivi, na co xíní Ndióxi jan in quítí nuú yoco cúu á tátuhun joco na jan rí nuú tiñahá va. Ta co cája toho na ña nu Ndióxi. Ta cáxi tuhun i ña yóho xihin ndo já ná a cáxi ndó cuñu jan jáchi tá ná cáxi ndó ña

cacuu a tátuhun najoco rí ndóhó va ña nuú tiñahá.

21 Jáchi a cuú cuhun ndo coho ndó ña najoco na nuú rí quini ta já quixi ndó coho ndó ña yij cuéntá Jesucristo, xitoho í. Ta ni a cuú cuxu ndó ña najoco na nuú rí quini ta já cuxu ndó ña yij, ña xixi na tá ndicuhun ini na ña naxihí Jesucristo, xitoho í.

22 A cája ndó ña yóho jáchi cúu á tátuhun cúní ndó jácojo ndó ini Ndióxi. Xíní ñúhú ndicuhun ini ndó ña co cúu ndó na ndacú chága a juú ga Ndióxi.

Sahá ña quíhvi iní ñani táhan í co ndítahan caja í ndá ña nacuu cúní mí caja í

23 Ndúu java na ta cáchí na já: “Núná nu yo caja í ndá ña cúní mí caja í.” Vatí ña yóho cúu á ña ndaa joo a juú ndihi ña cája í cája vaha xoho. Mé a ndaa núná nu yo caja í ndá ña cúní mí joo co chindeé a mí cuahnu í xihin ñaha Ndióxi.

24 Co ndítahan nu yo nducú yó ña vaha mí cuití yo. Ndítahan ndihi iní caja í ña vaha sahá ñani táhan í.

25 Cuu caxí ndó ndijáa cuñu cáyahvi nuú yahvi ta a ndaca tuhún ndo ndájá naquixi a já ná a cáhvi iví johó ini ndó xihin á.

26 Jáchi ñaha Ndióxi, xitoho í cúu ñuyíví yóho xihin tóco ndihi ña ín nu á.

27 Candehé ndo. Tá ná cana in na co cúu cuéntá Jesús ndohó ña ná cuhun ndó cuxu ndó xihin ná, cuahán ndo tá cúní ndo ta cuxu ndó tóco ndihi ña sácú na nu ndó cuxu ndó. Ta a ndaca tuhún ndó na á naquixi a nuú yoco. Cuxu ndó ña jáchi tá ná ndaca tuhún ndo na já cuu casahá ndicani ini ndó xihin á.

28 Joo tá sa nacaxi tuhun yachi na xihin ndo ña cúu á cuñu najoco na nuú yoco já quéa a cúxu toho ndó ña. Jáchi tá ná cuxu ndó ña já quéa caja ndó ña ná a váha cuu ini mé na cán.

29 Cáhan i ña yóho jáchi cúní ña ná caja vaha ndó sahá inga na. Co cáhan i ña saha mé ndó.

Mé a ndaa ndúu java ndó ta cáhán ndo ña co ndítahan ndihi ini ndó sahá ña cáhvi ini inga na jáchi cáhán ndo ña núná nu ndó caja ndó ña cúní ndo.

30 Ta java ndó cáhán ndo ña tá sa nandiquiahva ndó ndixahvi nu Ndióxi

sahá ña xixi ndó já quéa a cuú cahan núu ñayivi sahá ña cája ndó.

³¹ Joo cáchí i xihin ndó ña xini ñúhú candehé vaha í ña cája í ná a jándicava í inga na nuú cuachi. Jáchi janda xihín ña xixi ta xihín ña xihí, xini ñúhú caja cáhnu í Ndióxi.

³² Co ndítahan cacuú na jándicava inga ñayivi nuú cuachi jáchi tá cája í já cúu yó tátuhun yuu cándúhu jácachihin sahá ñayivi. A cája ndó já xihín na Israel ta ni xihín na tóho ta ni xihín na cúu cuéntá Jesús.

³³ Ta tóco ndihi ña cája i, cája i ña ná caji ini ndihi ñayivi xihin. Ta co ndúcú u ña vaha mí i jáchi ndúcú u ña ná caji ini ñayivi já ná cuu cacu ndaa ínimá ná.

11

¹ Xini ñúhú caja ndó tá quiahva cája yehe jáchi quiahva já cája i ña nacaja Jesucristo, xitoho í.

Ña ndítahan nuú najihí caja na tá cája cáhnu na Ndióxi

² Caji íni i xihin ndo, ñani i, na cúu cuéntá Jesús. Jáchi níi tiempo ñúhu ini ndó sahá i ta cája ta cája ndó ña najánaha i nu ndo.

³ Joo cuni ña ná candaa ini ndó ña cúu Jesucristo jini nuú in in taa. Ta quiahva já in in taa cúu dá jini nu ñájihí da. Ta quiahva já Ndióxi cúu á jini nuú Jesucristo.

⁴ Sahá ña cán quéa tá co cándaa in dataa yijini dá nani xica tahví da nu Ndióxi á nani cahan da tuhun Ndióxi nu táca ñayivi já quéa náha ña co cája cáhnu da Jesucristo, mé a cúu jini nu mé dá.

⁵ Ta in ñáñaha tá co chijahvi ña jini ña nani xica tahví ña nu Ndióxi á nani cahan ña tuhun Ndióxi nuú ñayivi veñuhu já quéa náha ña quéhe núu ña yí ña, da cúu jini nu mé ña. Cúu á tátuhun najatá ña jini ña.

⁶ Jáchi tá co chijahvi in ñáñaha jini ña janda vaha chága ví ná jatá táhyí ña jini ña. Joo tá cahan ña ña quini canáha jini ña tá ná jatá táhyí ña jini ña já quéa xini ñúhú chijahvi ña jini ña.

⁷ Co ndítahan toho nuú in dataa chijahvi da jini dá veñuhu jáchi mé dá cúu dá da nacavaha Ndióxi xihín yuhú nuú mé á. Ta mé dá cúu dá da náha ndá quiahva cáhnu

cúu Ndióxi. Ta náha in ñáñaha ña yí ña cúu da jini nu ña.

⁸ Jáchi xini ñúhú ndicuhun ini ndó ña coo natavá toho Ndióxi lásá yiquí ndicá ñáñaha já nacavaha mé á dataa, vaha. Ña nacaja mé á quéa natavá a lásá yiquí ndicá dataa ta já nacavaha mé á ñáñaha.

⁹ Jihna ñúhú nacavaha Ndióxi dataa ta já nacavaha mé á in ñáñaha chindeé ña da.

¹⁰ Ta sahá ña jihna ñúhú ga nacavaha Ndióxi dataa sahá ña cán quéa ndítahan nuú in ñáñaha chijahvi ña jini ña ná náha ña nu tát Ndióxi ña mé a ndaa cája cáhnu ña yí ña.

¹¹ Joo mí, na cúu cuéntá Jesús ndítahan candaa ini ña xini ñúhú táhan taa xihin ñaha.

¹² Vatí nacavaha Ndióxi ñáñaha nu cuítí xihin lásá yiquí ndicá dataa joo viti tóco ndihi dataa cacu da ñuyiví yóho cája najihí. Joo tóco ndihi ñayivi tácu na jáchi já cuni Ndióxi.

¹³ Mé ndó xini ñúhú candehé ndo á vaha á a vaha toho ña ná a chijahvi in ñáñaha jini ña nani xica tahví ña nu Ndióxi veñuhu.

¹⁴ Jáchi sa cándaa vaha ini ña a vaha toho cája dataa tá in nani íj jini dá.

¹⁵ Joo ndisáhnu náha ñáñaha tá in nani íj jini ña jáchi Ndióxi nasahan íj jini ña nu ña já ná chijahvi a jini ña.

¹⁶ Joo tá ndúu java na ta co táhan ini na xihín ña cahan i yóho já quéa co cuni toho i ndituhún ihvi i xihin ná sahá ña yóho. Jáchi xini ñúhú candaa ini na ña ndijáa java ga na cúu cuéntá Jesús cája na tá quiahva cáchí i yóho tá táca na veñuhu.

Jañani Pablo na cúu cuéntá Jesús jáchi co cája ndisáhnu na tá táca na cajini na ña yí cuéntá Jesús

¹⁷ Ta in inga náha cuni cahan i xihin ndó saha ta co táhan ini i xihin á. Jáchi nañehé e tuhun ña co cája vaha ndó tá táca ndo veñuhu.

¹⁸ Candehé ndo. Sa nañehé e tuhun ña sáhdá java táhan ndó tá táca ndo cája cáhnu ndó Ndióxi. Ta cája i cuéntá cándúsa i ña cáchí na saha ndo.

¹⁹ Vatí mé a ndaa náha xica a ña ndítahan cahnda táhan ndó já ná cuu cuni ñayivi ndá

ndó cúú ndusa cuéntá Jesús ta ndá ndó cō cúú cuéntá Jesús.

²⁰ Ta sahá ña sáhdá táhan ndó nu táca ndó jan, náha ña quehe núu ndó ña yíi xíjini ndó ta xihín ña yóho cō cúú ga ña cuéntá Jesucristo, xitoho í.

²¹ Jáchí tá ndíndaa hora cajini ndó tá in tá in ndó sa jihna ñuhú ndo ndáva ndó cuahan ndó quehe ndó ña cajini mé cuití ndo. Ta java ndó ni cō ñehe ndó ña cuxu ndó. Joo java ndó xíhi ndó janda jaxini ndó mé ndó.

²² Vaha chága ná cuxu ndó ta ná coho ndó vehe ndó a juú ga ña ná quixi ndó quehe núu ndó veñuhu Ndióxi. Ta a váha cája ndó jáchí cō ñehe na ndahví ña cuxu na cája ndó ta xihín ña yóho cácan nu ná. A cándati toho ndó ña cajini íni i xihín ña cája ndó yóho jáchí a juú ña vaha queá cája ndó.

Ña ndítahan caja na cúú cuéntá Jesús tá xíjini na ña yíi cuéntá Jesús

(Mt. 26:26-29; Mr. 14:22-25; Lc 22:14-20)

²³ Ña jánaha i nu ndo yóho cúú ña najánaha Jesucristo, xitoho í nuú i. Jáchí mé ñuu tá cámani ndiquiahva na mé á ndáha na ihvi a já natiin a in pan.

²⁴ Tá nandihí nandiquiahva ndixahvi nu Ndióxi já nasahnda java ña ta já nacachi a já xihín ná: “Mé pan yóho cúú á tátuhun yiquí cuñu i ña ndiquiahva i saha mé ndó. Xíni ñuhú caja ndó ña yóho ña ná ndicuhun ini ndó ña naxihí i saha ndo”, nacachi Jesús.

²⁵ Ta tá nandihí naxijini na cán já natiin a in vaso nu ñuhu tó uva. Ta já nacachi a já: “Dó ñuhu ini vaso yóho cúú dó tátuhun níi i, dó cuita saha ndó. Ta xihín dó yóho xinú cō nuú tuhun nasahan Ndióxi nuú ñayivi sanahá tá nacachi a jácacu a ñayivi. Ndijáa tañu tá ná coho ndó mé tó uva, dó yíi ndítahan ndicuhun ini ndó ña naxihí i saha ndo”, nacachi Jesús.

²⁶ Sahá ña cán queá ndijáa tañu tá táca ndo xíxi ndó pan ta xíhi ndó tó uva yóho cúni cachi a ña ndicuhun ini ndó ña naxihí Jesucristo, xitoho í saha ndo. Ta xíni ñuhú caja ndó ña janda quiahva ná quixi tucu mé á ñuyivi yóho.

²⁷ Candehé ndo. Tá ná cuxu ndó pan ta tá ná coho ndó tó uva, ña yíi cuéntá Jesucristo,

xitoho í ta cō íin vií ínima ndo já queá cája ndó cuachi nu mé á ta quehe núu ndó ña naxihí a ndica crúxu saha ndo.

²⁸ Sahá ña cán queá tá cámani casahá cajini ndó ña yíi cuéntá Jesús xíni ñuhú coto ndojó jihna ndó mé ndó á vií ínima ndo nu Ndióxi á cōó vií a.

²⁹ Jáchí tá ná cuxu ndaja nacuu ndó ña yíi cuéntá Jesús já queá náha ña quehe núu ndó mé á. Jáchí ña xíxi ndó jan cúú á tátuhun yiquí cuñu mé á ta dó xíhi ndó jan cúú dó tátuhun níi á. Ta tá ná quehe núu ndó ña já quixi ña ndoho ini ndó caja Ndióxi.

³⁰ Sahá ña cája ndó jan cuaha táhan ndó quíhvi ta cuaha ndó cávitá ndó ta anda java na sa naxihí ná sahá ña naquehe núu na ña yíi cuéntá Jesús.

³¹ Joo tá ná coto ndojó yo mí ña á íin vií ínima yo nu Ndióxi já queá a ndítahan toho nu mé a cúú xitoho í caja vií a sahá cuachí.

³² Joo tá jándoho mé á ini mí cúú á sahá ña cō cúni a ña ná ndoho ini xihín ñayivi ñuyivi tá ná xinú cōo quivi caja vií mé a cúú xitoho í sahá cuachi nacaja na cán.

³³ Candehé ndo, ñani i, na cúú cuéntá Jesús. Ña ndítahan caja ndó cúú ña yóho. Tá ná nditaca ndó cajini ndó ña yíi cuéntá Jesús xíni ñuhú candati táhan ndó janda quiahva ná taca tóco ndihí ndó.

³⁴ Ta tá cuíco ndó já queá xíni ñuhú cuxu ndó vehe ndó já ná a jándoho Ndióxi ini ndó sahá ña cája ndó ña núu tá táca ndo cajini ndó ña yíi jan. Ta caja vií i saha java ga ñaha tá ná saá i coto nihni i ndohó jan.

12

Ña ñehe táhvi ñayivi nu ínima yíi Ndióxi

¹ Candehé ndó, ñani i, na cúú cuéntá Jesús. Cáhyí i ña yóho nu ndo jáchí cúni ña ná candaá ini ndó ndaja íin ña sahan ínima yíi Ndióxi nu yo.

² Mé ndó sa cándaá vaha ini ndó ña tá cámani ndiquehe ndó íchi cuéntá Jesús já nasacuu ndó tátuhun ñayivi cuáá jáchí nasanduu ndó ndáha tá nuú yoco, ña cōó tachí cáhan.

³ Ta viti cúni caxi tuhún i xihín ndo ña ni in ñayivi a cuú chícaan na chahan jata Jesús tá tá ínima yíi Ndióxi queá sahan tuhun nu ná cahan na. Ta tá cáchí na xihín ndinuhu

ini na ña Jesús cúu xitoho na já quea náha ña ínimá yíi Ndióxi quea sáhan tuhun nu ná cahan na.

⁴ Cuahá nuú ñaha ñehe táhvi ñayivi caja na cuénta Ndióxi ta in túhún ínimá yíi Ndióxi sáhan ña nu ná.

⁵ Cuahá nuú chuun cuu caja ñayivi cuénta Ndióxi ta tóco ndihí cája chúun í cuénta mé a cúu xitoho í.

⁶ Ta sa jíin sa jíin cája in in í chuun nasahan Ndióxi nu yó caja í. Joo in túhún mé á quea sáhan ña yóho nuú in in í caja í.

⁷ Ta sáhan Ndióxi in ñaha nuú in in í já náha ña ñúhu ínimá yíi Ndióxi iní ta xihín ña yóho cuu chindee yo tóco ndihi na cúu cuénta Jesús.

⁸ Ínimá yíi Ndióxi yóho quea cája ña ná cuu candaá ini java ñayivi ndaja ín ña vaha xihín ña a váha ta já ndicani na ña nuú ñayivi. Ta sa mé ínimá yíi Ndióxi quea cája ña ná cuu cahan ñayivi ña ndichí ndivaha.

⁹ Ta cája mé ínimá yíi Ndióxi yóho xihín java na ña ná candeé cáhnu ini na mé á. Ta sáhan mé ínimá yíi Ndióxi nuú java na ña ná cuu ndaja vaha na na quíhvi.

¹⁰ Java na ñehe táhvi ná caja na ña xituhún. Ta java na ñehe táhvi ná jáyaha na tuhun nacahan Ndióxi xihín ná nuú ñayivi. Ta java na ñehe táhvi ná ndicuni na ndá na cúu na cája chúun cuénta ínimá yíi Ndióxi ta ndá na co cája chúun toho cuénta mé á. Ta java na ñehe táhvi ná cahan na tuhun ña coo nasatiahva na. Ta java na ñehe táhvi ná nducú ñehe na ña cúní cachi tuhun cahan na cán nuú ñayivi.

¹¹ Ta sa mé ínimá yíi Ndióxi cája tóco ndihi ña yóho ta in túhún mé á sáhan nuú in in ñayivi ña sácú ini a caja chúun vaha na xihín.

In cúu tóco ndihi na cúu cuénta Jesús saha ña candeé ini na mé á

¹² Candehé ndo. Cuahá ndivaha nu ndáca yiquí cuñu í joo in víxí cúu á. Quiahva já ín xihín na cúu cuénta Jesús.

¹³ Ta quiahva já yáha xihín tóco ndihi mí, coo caja toho a á cúu yó na Israel á coo cúu yó na Israel. Ta coo caja toho a á cúu yó na cómí in xitoho cuénta saha, á cúu yó na xíca núná mé. Jáchi cája ínimá yíi Ndióxi ña cúu yó tátuhun in víxí ñayivi saha ña in nanduú

xihín Jesucristo tá nacandúta yó cuénta mé á. Ta in túhún ínimá yíi mé á nasacu a ini ínimá in in í.

¹⁴ Xíní ñúhú ndicuhun iní ña a juú in víxí nu ndáca yiquí cuñu í jáchi cuahá ndivaha nu ndáca yiquí cuñu ñayivi.

¹⁵ Candehé ndo. Cúu á tátuhun tá ná cahan in xoo saha yo já cáchí a já: “Yehe coo cúu toho í ndáha ñayivi saha ña cán quea coo chuun toho í nuú yiquí cuñu na”, cáchí a. Joo coo cája toho ña cahan saha yo yóho jáchi cúu á cuénta yiquí cuñu í.

¹⁶ Ta cúu á tátuhun tá ná cachi in johó í já cáchí a já: “Yehe coo cúu toho í nduchú nuú ñayivi saha ña cán quea coo chuun toho í nuú yiquí cuñu na”, cáchí a. Joo coo cája toho ña cahan johó í yóho jáchi cúu á cuénta yiquí cuñu í.

¹⁷ Jáchi caja mé ndó cuénta ndaja caja í cuni johó í tá níí cúu yiquí cuñu í ná cacuu a nduchú nuú yo. Ta ndaja caja í tahmí ñaha tá níí cúu yiquí cuñu í ná cacuu a johó í.

¹⁸ Joo in in ña ndáca yiquí cuñu í yóho nasacu Ndióxi ña mé nu ndítahan coo a jáchi já nasacu ini a caja.

¹⁹ Xíní ñúhú caja ndó cuénta tá in víxí johó ná candaca níí cúu yiquí cuñu í já quea coo ín ndihi toho yiquí cuñu í.

²⁰ Ta vatí cuahá ndivaha nu ndáca yiquí cuñu in in í joo in víxí cúu yiquí cuñu í. Ta quiahva já ín a xihín na cúu cuénta Jesús.

²¹ Candehé ndo jáchi sácú u in quiahva nu ndo: Nduchú nuú yo a cúu cachi a xihín ndáha yo ña coo xíní ñúhú a ña. Ta ni yiquí jíní yo a cúu cachi a xihín saha yo ña coo xíní ñúhú a ña.

²² Ña yáha xihín yiquí cuñu í cúu ña yóho. Java tañu cáhán yo ña vitá in ñaha ndáca yiquí cuñu í joo ña jan xíní ñúhú chága yó ña.

²³ Ta mé xoo yiquí cuñu í ña cáhán yo coo cuahá saha, ña coo cúní yo ña ná candehé ñayivi, ña cán cúu ña chíjahví vaha í

²⁴ vatí coo xíní ñúhú caja í já xihín ñaha ña cuu candehé ñayivi. Xihín ña yóho cuu candaá iní ndá quiahva nacavaha Ndióxi in in xoo yiquí cuñu í ta cuu candaá iní ndaja candaá vaha chága yó ña cáhán yo coo cuahá saha.

25 Ta xihín ña yóho co sáhdá java táhan yiquí cuñu í jáchi in in xoo yiquí cuñu í ndíhi ini a sahá java ga xoo yiquí cuñu í.

26 Ña cán queá tá ndícuehe in xoo yiquí cuñu í ndijáá java ga ña cán ndíhivi a sahá ña ndóho in xoo yiquí cuñu í. Joo tá vií cája na xihín in xoo yiquí cuñu í já queá cájii ini java ga xoo yiquí cuñu í.

27 Ta tóco ndihi ndó, na cúu cuéntá Jesús cúu ndó tátuhun yiquí cuñu Jesucristo jáchi in nanduu ndihi ndó xihín á ta in in ndó cúu ndó tátuhun in xoo yiquí cuñu a.

28 Ta tá quiahva ín chuun cája in in xoo yiquí cuñu í quiahva já ín chuun caja in in na cúu cuéntá Jesús. Jihna ñúhú naçaxi Ndióxi na apóstol ta já naçaxi a na jáyaha tuhun Ndióxi nuú ñayivi ta já naçaxi a na cája ña xitúhún. Ta já naçaxi a na ndája vaha na quíhvi xihín na chindeé ñayivi xihín na sáhdá chuun nuú java ga ñayivi xihín na cáhan tuhun ña coó nasatiahva na.

29 Joo a juú ndihi na cán cúu apóstol. Ta ni a juú ndihi na cúu ná na jáyaha tuhun cáhan Ndióxi nuú ñayivi. Ta ni a juú ndihi na jáyaha ñayivi. Ta ni a juú ndihi na cája ña xitúhún.

30 Ta ni a juú ndihi na ndája vaha na na quíhvi. Ta ni a juú ndihi na cáhan tuhun ña coó nasatiahva na. Ta ni a juú ndihi na tiahva nducú ñehe ña cúní cachi tuhun cáhan na cán.

31 Joo mé ndó xíní ñúhú ndinducú ndo ña ná quiahva Ndióxi in ña vaha chága nu ndo. Ta viti cúní jáyaha í ña cúu ña vaha chága nu ndo.

13

Ña ndítahan caja í tá quíhvi ini ñayivi

1 Tá ná cuu cahan í tá nuú tuhun cáhan ñayivi ndúu ñuyíví yóho ta tá ná cuu cahan í tuhun cáhan tátó Ndióxi joo tá co quíhvi ini í ñayivi já queá coó saha toho ña cáhan í. Jáchi xihín ña jan cúu u tátuhun in caa jácasá na, á tátuhun in caa xoo tá jácasá na ña. Quiahva já ín í tá co quíhvi ini í ñayivi.

2 Ta ni coó sahá ña ná cacuu u in da jáyaha tuhun cáhan Ndióxi nuú ñayivi tá co quíhvi ini í ñani táhan í. Jáchi tá co quíhvi ini í ñayivi coó caja toho ña ná cuu candaá ini í

tóco ndihi ñaha ta ni coó caja toho a tá xíní tóco ndihi ña xíní da ndichí ta ni coó saha toho tá cándéé cáhnu ndivaha ini í Ndióxi janda quiahva cuu cahan í xihín in yucu ña ná ndicanda ña. Coó saha toho tóco ndihi ña yóho tá co quíhvi ini í ñani táhan í.

3 Ta vatí ná ndicahnda í tóco ndihi ña cómí í ta já quiahva í ña nuú na ndahví coó sahá toho ña cája í tá co quíhvi ini í ñayivi. Ta ni coó caja toho ña ná ndiquiahva í yiquí cuñu í ña ná cayí a sahá ña cáhan í tuhun Ndióxi tá co quíhvi ini í ñayivi.

4 Jáchi tá mé a ndaa táhyí quíhvi ini ñayivi co ndíhi ini xihín ná. Ta tá quíhvi ini na táhvi ini saha ná ta co cáhivi toho ini xihín ná. Ta ni co cája lándá yo nu ná ta ni co cája cáhnu í mí nu ná.

5 Tá quíhvi ini ñayivi ín toní ñúhú yo xihín ná ta co cájihnda yó ñaha nu ná jáchi co nducú yo ña vaha mé cuití yo. Ta ni co xójo ini xihín ná. Ta ni co quehé cuéntá sahá ña núu cája na xihín yo tá quíhvi ini na.

6 Ta tá quíhvi ini ñayivi co cájii toho ini tá cája núu na joo cájii ini tá cája na ña ndaa.

7 Tá quíhvi ini ñayivi ín tiahva í ndoho ini saha ná ta cáhvi ini ña vaha cuití va saha ná. Ta cándúsa í ña cája na ña ndaa. Ta sáhan ndeé ini xihín tóco ndihi ñaha.

8 Tá mé a ndaa quíhvi ini ñani táhan í já queá anda ama cáa quíví a ndíhi sahá ña quíhvi ini na. Joo vaxi quíví a jáyaha ga ñayivi tuhun cáhan Ndióxi xihín ná nuú ñayivi jáchi vaxi quíví ndihi sahá. Ta a cáhan ga na tuhun ña coó nasatiahva na. Ta vaxi quíví ndihi sahá ña ndichí jiní ñayivi. Joo a ndíhi toho saha ña quíhvi ini táhan í.

9 Jáchi chá cuití xíní yó saha Ndióxi ta chá cuití tiahva í jáyaha í tuhun cáhan Ndióxi nuú ñayivi.

10 Joo tá ná xinu coo quíví ndaja Ndióxi ña ná nduu ñayivi vií já queá a cúní ñúhú ga yó ña tóco ndihi java ga ña ndihi saha cán jáchi sa nanduu ñayivi vií nu mé á.

11 Candehé ndo. Tá nasacuu u in taa loho naçahan í tá quiahva cáhan na valí ta quiahva já naçahvi ini í ta quiahva já naçaja í. Joo tá nasahnu í najándacoo í ña cája na valí.

12 Viti co candaá vaha ini ndá quiahva cáa Ndióxi. Cúu á tátuhun tá sándehe yo nuú in yutátá ña co jíñu vaha ga. Joo vaxi

quíví cuní mé á tá quiahva cáa. Viti cuahá ñaha co cándaá iní saha mé á. Joo vaxi quíví candaá iní saha mé á tá quiahva xíní mé á mí viti.

¹³ Íin uní nuú ñaha ña a ndíhi sahá. Ta ña yóho cúú á: ña cándeé iní Ndióxi, ta inga cúú ña ndátí casaa, ta inga cúú ña quíhvi iní Ndióxi xihín ñani táhan í. Ta cúni Ndióxi ña ná caja í ndihuni ña yóho joo ña cáhnu chága cúú ña quíhvi iní Ndióxi xihín ñani táhan í.

14

Tá cáhan ñayivi tuhun ña coó nacatiahva na

¹ Xíní ñúhú ndíhi ini ndó quíhvi ini ndó ñani táhan ndó. Ta xihín ndinuhu ini ndó ndinducú ndo ña sáhan ínimá yíi Ndióxi nu yo. Ña xíní ñúhú ndíhi chága ini ndó ndinducú ndo cúú ña ná cuu jáyaha ndó tuhun cáhan Ndióxi xihín ndó nuú ñayivi.

² Jáchi ndá na nacuu cáhan tuhun ña coó nacatiahva na já queá cáhan na xihín Ndióxi joo co cáhan na xihín ñayivi jáchi co cándaá ini ñayivi ña cáhan na. Ña cáhan na cúú ña naquixi cuéntá ínimá yíi Ndióxi ta cúú á ña co xíní ndíhi ga ñayivi.

³ Joo ñayivi tiahva jáyaha tuhun cáhan Ndióxi xihín ná nuú ñayivi cája na ña ná cuu cuahnu chága na cúú cuéntá Jesús xihín tuhun cáhan Ndióxi. Ta sáhan na tuhun ndeé ini ñayivi ta quiahva já jáxinu chága na ini na cán.

⁴ Ta na ñehe táhvi cáhan tuhun ña coó nacatiahva na sáhnu mé cuití va na xihín tuhun sáhan Ndióxi nu ná cáhan na. Joo na tiahva jáyaha tuhun cáhan Ndióxi nuú ñayivi chindeé na na cúú cuéntá Jesús ña ná cuahnu chága na xihín ñaha cuéntá Ndióxi.

⁵ Mí í cájii íní í tá ná cuu cáhan ndíhi ndó tuhun ña coó nasatiahva ndó. Joo cájii chága ini í tá ná jáyaha ndó tuhun cáhan Ndióxi xihín ndó nuú ñayivi jáchi xíní ñúhú chága ña yóho a juú ga ña ná cáhan ndó tuhun ña coó nacatiahva ndó. Vaha cája ndó ña ná cáhan ndó tuhun ña coó nacatiahva ndó tá íin in na tiahva nducú ñehe ña cúni cachi tuhun cáhan ndo nuú ñayivi já queá ná cuu cuahnu na cúú cuéntá Jesús xihín mé tuhun cán.

⁶ Xíní ñúhú candehé vaha ndó ña cáhan í xihín ndo, ñani mí í na cúú cuéntá Jesús.

Coó saha toho ña cája í tá ná saa í coto nihni í ndohó ta já casahá í cáhan í inga tuhun ña co cándaá ini ndó. Tá ná caja í já ndaja caja ndó candaá ini ndó tuhun Ndióxi. Ña ndítahan caja í queá cáhan í xihín ndo ña najánaha Ndióxi nuú í. Ta ndítahan cáhan í ña ndichí cuéntá Ndióxi. Ta ndítahan cáhan í tuhun nasahan Ndióxi nuú í jáyaha í ña nu ndo. Ta ndítahan jánaha í ña ndaa cuéntá Ndióxi nu ndo.

⁷ Sácú u in quiahva nu ndó sahá in tóyoo xihín dó jácaha. Ndaja caja ñayivi candaá ini na ndá yaa tívi yo tá co tiáhva í tívi vaha í, á tá co tiáhva í jácaha vaha í.

⁸ Ta ndaja caja na soldado cacu tiahva na mé ná ña ná cuhún na caní táhan na tá ta co tiáhva vaha da tívi trompeta tívi da do.

⁹ Quiahva já yaha ri xihín mé ndó jáchi tá co cáhan ndó tuhun ña cuu candaá ini ñayivi ndaja caja ri na cán candaá ini na ña cáchi ndo. Cúú á tátuhun cáhan ndó nu táchi cuití va.

¹⁰ Cája í cuéntá íin cuahá ndivaha nuú tuhun cáhan ñayivi ndijáá ñuyíví. Joo ndijáá tuhun yóho cáxi cáhan nuú ñayivi cáhan na mé tuhun yóho.

¹¹ Joo tá co cándaá ini í ña cáhan inga ñayivi xihín í já cúú u tátuhun in da tóho nu mé ná. Ta na cán cacuu na tátuhun in na tóho nu mí í sahá ña co cándaá ini í tuhun cáhan na.

¹² Sahá ña cán queá tá mé a ndaa cúni ndó ndiquehe ndó ña sáhan ínimá yíi Ndióxi nu ndo já queá xíní ñúhú ndinducú ndó ña ná cuu chindeé ndó na cúú cuéntá Jesús ná cuahnu chága na xihín tuhun Ndióxi.

¹³ Ña cán queá ndá ndó ñehe táhvi cáhan ndó tuhun ña coó nacatiahva ndó já queá xíní ñúhú caça ndó nu Ndióxi ña ná cuu ndicani ndó ña cúni cachi a nuú ñayivi.

¹⁴ Jáchi tá ná casahá cáhan í tuhun ña coó nacatiahva í nani xíca tahví í nu Ndióxi já queá mé a ndaa cája cáhnu í Ndióxi xihín ínimá í joo co cája í ña xihín xíní túní í jáchi co cándaá ini í ña cáhan í.

¹⁵ Ndía caja í. Ña xíní ñúhú caja í queá caça tahví í nu Ndióxi xihín ínimá í ta xihín xíní túní í. Ta quiahva já xíní ñúhú cata í xihín ínimá í ta xihín xíní túní í viti.

¹⁶ Candehé ndó. Ná caja í cuéntá tá ndúu ndó veñuhu ta casahá ndo cáhan ndó tuhun

ñã coó ñacatiahva ndó nani cája cáhnu ndó Ndióxi xihín ínimã ndo ta ndaja coo quíhvi in ñayivi ini veñuhu, ñã co cándaã cuahá ini sahá ñaha cuéntã Ndióxi. Ta xíní johó na ñã cáhan ndo joo a cúu caja na ndiquiahva na ndixahvi nu Ndióxi in nuú xihín ndo jáchi co cándaã ini na tuhun cáhan ndo.

17 Vatí ndató ndivaha cáhan ndo ndiquiahva ndó ndixahvi nu Ndióxi joo co chindeé a ñã cán ná cuahnu na xihín tuhun Ndióxi jáchi co cándaã ini na tuhun cáhan ndo.

18 Ndiquiahva i ndixahvi nu Ndióxi jáchi cáhan cuahã chága i tuhun ñã coó ñasatiahva i a juú ga ndóhó.

19 Joo nani jánaãã i ndohó ini veñuhu cájii chága íni i cahan chá cuití va i tuhun já ná cuu candaa cáxi ini ndó ñã cáhan i. Jáchi ndá chuun queá ná cahan cuahá nahá i tuhun ñã co cándaã ini ndó.

20 Candehé ndo ñani i, ñã cúu cuéntã Jesús. A cáhvi ini ndó tá quiahva cáhvi ini ñã valí. Xíní ñúhú cahvi ini ndó tá quiahva cáhvi ini ñayivi sa tácu ini. Vatí mé a ndaa xíní ñúhú caja ndó tá quiahva cája ñã valí, ñã co cája cuachi.

21 Xíní ñúhú ndicuhun ini ndó ndaja cáchi ley ñacahyi Moisés sanahá tá ñacachi Ndióxi já: “Vatí ná chindahá i ñã cáhan java tuhun tóho nuú ñayivi Israel joo a cúni johó na nuú cahan ñã tóho cán jáchi sáã ini ñã Israel”, ñacachi Ndióxi.

22 Tá cáhan ndó tuhun ñã coó ñasatiahva ndó nani cája cáhnu ndó Ndióxi co chindeé cuahá ñã yóho ñã cúu cuéntã Jesús cuahnu na xihín tuhun Ndióxi vatí mé a ndaa ñã co xíní tuhun Ndióxi cátóntó ñã xihín ñã yóho. Joo tá jáyaha ndó tuhun cáhan Ndióxi xihín ndó nuú ñã cúu cuéntã Jesús já cuu cuahnu chága ñã xihín tuhun Ndióxi vatí co chindeé cuahá ñã yóho ñã cámaní ndihvi íchi cuéntã Jesús.

23 Caja mé ndó cuéntã tá ná taca cuahá ñã cúu cuéntã Jesús ta casahá cáhan ndo tuhun ñã coó ñasatiahva ndó nani cája cáhnu ndó Ndióxi ta ndaja coo quíhvi ñã co xíní tuhun Ndióxi nu ndúu ndó jan. Ta tá ná cuni na ñã sa jín tuhun cáhan ndihi ndó já queá cahan ñã ñã cúu ndó ñã tachí.

24 Joo tá ná jáyaha tóco ndihi ndó tuhun cáhan Ndióxi nuú ñayivi ta ndaja coo quíhvi

in ñã co xíní tuhun Ndióxi. Ta tá ná cuni johó na ñã cáhan ndo já queá tahnda ini na sahá cuachi na ta já casahá ndicani ini na sahá ñã núu cája na.

25 Ta já nahma ñã cuachi na nuú ñayivi ta já ndicava xítí ñã caja cáhnu na Ndióxi. Ta xihín ñã yóho candaa ini na ñã mé a ndaa táhyí íin Ndióxi tañu ndó.

Tóco ndihi ñã cája ndó cuéntã Ndióxi xíní ñúhú caja ndó ñã xihín toní ñúhú

26 Candehé ndó, ñani i, ñã cúu cuéntã Jesús. Tá ná nditaca ndihi ndó caja cáhnu ndó Ndióxi ndítahan nuú java ndó cata ndó salmo ta java ndó jánaãã ndó nuú ñayivi. Ta ndítahan nuú java ndó jáyaha ndó tuhun cáhan Ndióxi xihín ndó nuú ñayivi ta java ndó cahan ndó tuhun ñã coó ñacatiahva ndó. Ta ndítahan nuú java ndó nducú ñehe ndó ñã cúni cachi tuhun cáhan ñã cán. Tóco ndihi ñã cája ndó xíní ñúhú chindeé a ndohó ná cuahnu chága ndó xihín tuhun Ndióxi.

27 Ta ndítahan nuú ivi á uní ñayivi cuití va cahan ñã tuhun ñã coó ñacatiahva na. Joo tá in tá in na caja na ñã. Ta ndítahan canduu ñã tiahva nducú ñehe na ñã cúni cachi tuhun cáhan ñã jan.

28 Ta nu táca ndo tá coó ni in ñã tiahva nducú ñehe ñã cúni cachi tuhun cáhan ñã jan já queá vaãã chága ná a cáhan ñã tuhun ñã coó ñacatiahva na. Ñã vaãã chága queá ná cahan yaã ñã ná cuni johó mé ná xihín Ndióxi cuití va.

29 Ta quiahva já tá jáyaha na tuhun cáhan Ndióxi xihín ná nuú ñayivi ná cahan ivi á uní ñã cuití va. Ta xíní ñúhú cahan ñã nani ndúu tútu java ga ñã veñuhu sãndehé ñã á mé a ndaa cáhan ñã cuéntã Ndióxi.

30 Cája i cuéntã nani jáyaha in na tuhun cáhan Ndióxi xihín ná nuú ñayivi ta jácahan Ndióxi ini inga na ñã ná jáyaha na tuhun cáhan Ndióxi xihín ñã nuú ñayivi já queá xíní ñúhú cacoo ñã nu cuití cán.

31 Xihín ñã yóho tá in tá in ndó cuu jáyaha ndó tuhun cáhan Ndióxi xihín ndó nuú ñayivi. Já cuu catiahva ñã xíní johó ñã yóho ñã ná ndindeé chága ini na xihín tuhun Ndióxi.

32 Ñã jáyaha tuhun Ndióxi nuú ñayivi xíní ñúhú cañehe na quiahva xihín ñã cája na nani ndátí na jáyaha na tuhun cán.

³³ Jáchí cúní Ndióxi ña ná coo vaha iní caja í tóco ndihi ñaha ta ná a jána í nuú cája í ña.

Ta cájii ini mé á tá cája vaha ndó tá quiahva cája java ga na cúu cuéntá Jesús ndúu ndijáá ga ñuu.

³⁴ Nani táca ndo veñuhu co ndítahan nuú najihí cahan na jáchi co cáni a nu ná cahan na. Ta co ndítahan nu ná cacomí na cuéntá sahá na veñuhu jáchi quiahva já sáhdá ley Moisés.

³⁵ Ta tá cúní na candaá ini na sahá ña jána ha na veñuhu xíní ñúhú ndaca tuhún na yíi ná sahá tá cásaá na vehe na. Jáchi co náha vaha tá cahan in ñáñáha nani táca na veñuhu.

³⁶ Xíní ñúhú ndicuhun ini ndó ña a juú ndohó cúu na nandiquehe tuhun Ndióxi nu cuití. Ta a juú ndohó cuití xíní tuhun Ndióxi, vaha.

³⁷ Ta ndá na cáhan ña nachutú ndaa ínima ná xihín ínima yíi Ndióxi ña ná jáyaha na tuhun cáhan Ndióxi xihín ná nuú ñayivi, mé na cán ndítahan nu ná ndicuni na ña cáhan í ña sáhdá Ndióxi nuú í cahan í.

³⁸ Joo tá co cúní na cán cuni joho na ña cáhan í cuéntá Ndióxi já quéa a cúní joho ndó ña cáhan na cán.

³⁹ Candehé ndo, ñani í, na cúu cuéntá Jesús. Xíní ñúhú ndihi ini ndó nducú ndó ña ná jáyaha ndó tuhun cáhan Ndióxi xihín ndó nuú ñayivi. Ta a cájii nuu ndó nuú na cúu cuéntá Jesús tá ñehe táhvi ná nu Ndióxi cahan na tuhun ña coó nasatiahva na.

⁴⁰ Joo tóco ndihi ña cája ndó xíní ñúhú caja ndó ña xihín toní ñúhú já ná a jána ndó nu cája ndó ña.

15

Ndicani Pablo sahá quivi tá nanditacu Jesús

¹ Candehé ndó, ñani í, na cúu cuéntá Jesús. Viti cúní ña ná ndicuhun ini ndó tuhun vaha sahá Jesús ña najána ha í nu ndo. Mé tuhun vaha yóho sa nandiquehe vaha ndó ña ta cándéé vaha ini ndó a janda viti.

² Ta jivi saha mé tuhun vaha najána ha í nu ndo yóho cuu cacu ndaa ínima ndó tá ná caja ndó ña najána ha í nu ndo xihín ndinuhu ini ndó. Joo tá ná a cája ndó ña já quéa mé a uun va quéa nacandúsa ndó ña.

³ Candehé ndó. Ña jihna ñúhú nacaja í quéa najána ha í ndohó ña nacatiahva mí í cuéntá Jesucristo, mé a naxihí ndica crúxu sahá cuachí tá quiahva cáchí tuhun Ndióxi.

⁴ Ta najána ha í ndohó ña najánduxu na mé a joo tá naxinu quivi uní já nanditacu tucu a tá quiahva cáchí tuhun Ndióxi coo.

⁵ Ta já nana ha mé a nu Pedro xihín nuú java ga táhan da uxu ivi naxica tuun xihín a cán.

⁶ Ta tá nandihí já nana ha mé a nu yáha ga nuú uhun ciento na cúu cuéntá mé á. Ta in naxini tóco ndihi na mé á. Ta cuaha táhan na naxini ñaha cán tácu yíi va na vatí java na sa naxihí na.

⁷ Ta tá nandihí já nana ha mé a nu Jacobo ta anda já nana ha mé a nu tóco ndihi na naxica tuun xihín á.

⁸ Ta tá nu ndihí já nana ha ri Jesús mé a nuú í vatí cúu u da nacacu tá sa nayaha mé tiempo tá naxica nuu Jesús ñuyívi yóho.

⁹ Yehe cúu u in apóstol joo ín chága saha tóco ndihi java ga na apóstol a juú ga yehe. Ta ni coó sahá í cahan na apóstol xihín í jáchi naxica nuu í nacaja xixi í xihín na cúu cuéntá Ndióxi jihna.

¹⁰ Joo mé a ndaa cúu u in apóstol jáchi nacamáni Ndióxi yehe. Ta a juú ña uun cúu ñamani nacaja Ndióxi xihín í jáchi cuaha ga chuun cája yehe cuéntá mé á a juú ga java ga na apóstol cán. Vatí mé a ndaa co cája chúun í xihín ndéé mí í. Sahá ña táhvi ini Ndióxi sahá í sahá ña cán quéa chindeé a yehe cája í chuun mé á yóho.

¹¹ Joo co cája toho a á yehe á na java apóstol cán cája chúun chága. Ña vaha quéa tóco ndihi nde jána ha nde sahá Jesucristo ta mé ndó sa nacandúsa ndó ña najána ha nde nu ndo.

Vaxi quivi nditacu tóco ndihi ndii

¹² Tá nacahan nde tuhun Ndióxi xihín ndo najána ha nde ndohó ña nanditacu tucu Jesucristo ta nacandúsa ndó ña. Joo viti java ndó cáchí ndo ña co ndítacu toho na sa naxihí.

¹³ Joo tá cáchí ndo ña co ndítacu toho na sa naxihí cúu á tátuhun co cándúsa ndó ña nanditacu tucu Jesucristo.

¹⁴ Ta tá co cándúsa ndó ña nanditacu tucu Jesucristo já quéa coó saha toho tuhun

Ndióxi ña xíca nde jánaha nde nuú ñayivi. Ta xihín ña yóho mé a uun va cándeé ini ndó mé á.

¹⁵ Ta tá mé a ndaa coó nanditacu Jesucristo já queá cúu nde na cáhan ña tuhún saha Ndióxi jáchi cáchi nde xihín ndo ña mé Ndióxi najánditacu a Jesucristo. Joo tá co ndítacu toho ndii ta ndehe cáchi nde ña nanditacu Jesucristo já queá cúu nde na tuhún.

¹⁶ Jáchi tá co ndítacu ndii já queá cúni cachi a ña coó nanditacu toho Jesucristo.

¹⁷ Ta tá coó nanditacu Jesucristo já queá coó saha toho ña cándeé ini ndó mé á ta cómi yii va cuachi cuénta saha ndó.

¹⁸ Ta xihín ña yóho cúni cachi a ña a cácu ndaa toho ínimá na cúu cuénta Jesús tá ná quivi na.

¹⁹ Tá ndíyahvi ña cúu yó cuénta Jesús nani tácu yo ñuyívi yóho cuití va já queá ndáhvi nahá ñacuú.

²⁰ Joo mé a ndaa nanditacu ndusa Jesucristo. Ta mé á cúu á ña nu cuití nanditacu. Ta vaxi quivi nditacu tóco ndihi yó, na cúu cuénta mé á.

²¹ Candehé ndo. Naquihvi cuachi ñuyívi sahá ña ñacaja Adán, da nasacuu ña nu cuití ta sahá cuachi yóho ñacasahá xihí ñayivi. Ta jivi sahá ña ñacaja Jesucristo tá naxihí a ndíca crúxu cuu nditacu tóco ndihi na sa naxihí.

²² Xihí ñayivi sahá ña ñaquixi na chichi Adán ta cája na ña núu tá quiahva ñacaja Adán sanahá. Ta viti sahá ña cúu yó cuénta Jesucristo catacú anda ama cáa quivi sahá ña ñacaja mé á.

²³ Ta tá ná ndindaa nuú in in na nditacu na já nditacu na caja Ndióxi. Mé Jesucristo queá nanditacu nu cuití. Ta tá ná ndicó coo tucu mé á ñuyívi yóho já caja mé á ña ná nditacu tóco ndihi na cúu cuénta mé á.

²⁴ Anda já ndihi saha tóco ndihi ñaha ñuyívi yóho jáchi jándihi Jesucristo saha tóco ndihi na cómi cuénta sahá ñayivi ñuyívi yóho. Ta ndiquiahva tóco ndihi na cúu cuénta mé á ndáha Ndióxi, tátá a já ná cacomí a cuénta saha ná.

²⁵ Jáchi Jesucristo queá ndítahan nu cacomí cuénta sahá na cúu cuénta mé á janda quiahva ná xinu coo quivi jándihi Ndióxi saha tóco ndihi na coo cúni ñahá.

²⁶ Ta janda nu ndihí jándihi mé á sahá ña ná quivi ñayivi. Ta xihín ña yóho a quivi ga ñayivi.

²⁷ Jáchi mé Ndióxi nandiquiahva tóco ndihi ñaha nuú Jesucristo já ná cacomí a cuénta sahá. Joo tá cáchi tuhún Ndióxi ña cómi Jesucristo cuénta saha tóco ndihi ñaha, coo cúni cachi a ña cómi a cuénta saha Ndióxi viti jáchi mé Ndióxi queá nandiquiahva tóco ndihi ñaha ndáha mé á ña ná cacomí a cuénta sahá.

²⁸ Ta tá sa cómi Jesucristo cuénta saha tóco ndihi ñaha anda já ndiquiahva Jesucristo mé á ndáha Ndióxi ña ná cacomí a cuénta sahá. Jáchi cúu á in tuhún jini já jahyi Ndióxi ta mé Ndióxi queá nandiquiahva tóco ndihi ñaha nuú Jesucristo. Ta Ndióxi cacuu a ña cáhnu chága nu tóco ndihi ñaha.

²⁹ Ndúu java ñayivi ta cándúta ná sahá na sa naxihí já ná cacu ndaa ínimá ná. Joo cáchi na coo cándúsa toho na ña ndítacu ndii. Ta ndá sahá queá cája na já tá coo cándúsa na nditacu ndii. Joo xini vaha í ña nditacu ndii.

³⁰ Ndá chuun queá chícáan yo mí ndijáá níi quivi nuú tondóho nuú cuu cahni na mí tá coo cándúsa í ña nditacu tucu ndii.

³¹ Candehé ndo, ñani i, na cúu cuénta Jesús. Ndijáá níi quivi vaxi tondóho nuú i. Ta jalóho cúni quivi i. Mé ndó cándaa vaha ini ndó ña cájii ini i sahá in nanduu ndó xihín Jesucristo, xitoho í. Sa há ña cán queá ndítahan nu ndo candúsa ndó ña cáhan i xihín ndo.

³² Cuahá tañu naquihvi táhan i xihín ñayivi quini ñuu Efeso. Mé na cán cúu ná tátuhun quití yúcu. Joo coo saha toho ña ndóho ini i yóho tá mé a ndaa coo ndítacu toho ndii. Jáchi tá coo ndítacu toho ndii já queá cuu cohó caja í tá quiahva cáchi java ñayivi tá cáchi na já: “Coho cuxu vaha í ta coho vaha í jáchi yó quivi itaan á iajá cúu yó.”

³³ A quiahva ndó ñamaní jándahvi inga na ndohó. Xini ñuhú ndicuhun ini ndó in tuhún ña cáchi já: “Tá catáhan í xihín ñayivi, na coo cája vaha já queá jativí na mí.”

³⁴ Xini ñuhú ndicáxi vaha ini ndó ta a cája ndó cuachi jáchi ndúu java ndó ta coo xini toho ndó Ndióxi. Cáhan i ña yóho xihín ndo

já ná cacahan nuu ndo sahá ña núu cája ndó.

Ndaja coo tá ná nditacu ndi

³⁵ Cája i cuéntá ña ndúu java ndó ta ndícani ini ndó já cáhán ndo já: “Ndaja caja Ndióxi jánditacu a na sa naxihi. Ndá yiquí cuñu ndiquehe na caja Ndióxi.” Já ndáca tühún java ndó ndícani ini ndó.

³⁶ Joo ña ndícani ini ndó saha jan cúu á ña tóntó ndivaha. Xíni ñúhú cándehé ndo ndá quiahva yáha xihín in tata tá chíhin na ña. Mé tata yóho xíni ñúhú quivi a já ná nduta utu loho nu á.

³⁷ Tá xútu ñayivi, co xútu toho na in yucu. Ña xútu na cúu mé tata ta co cája toho a á cúu á trigo á inga nuú tata.

³⁸ Ta mé Ndióxi quea cája ña ná ñehe táhvi in in a cán ndá quiahva coo a ta ndá javi cañehe in in a.

³⁹ Ta a juú in javi ñehe tóco ndihi ñaha. Sa jíin sa jíin javi in in a. Tátuhun yiquí cuñu in dataa, sa jíin íin yiquí cuñu da xihín yiquí cuñu quíti. Ta yiquí cuñu laa sa jíin íin a xihín yiquí cuñu tiyacá. Sa jíin nacaja Ndióxi xihín in in ña nacavaha mé á.

⁴⁰ Ta quiahva já nacavaha Ndióxi ña ndúu indiví ta jíin va ndáa a. Ta jíin yiquí cuñu ñayivi ñuyíví yóho. Ta sa jíin quiahva ndató ña íin indiví ta sa jíin quiahva ndató ña íin ñuyíví.

⁴¹ Jíin nacaja Ndióxi ña ná yehe candii ta jíin nacaja mé á ña ná yehe yoo. Ta jíin nacaja mé á ña ná yehe quimi ta íin java quimi sa jíin sa jíin yehe rí nuú inga rí.

⁴² Quiahva já yaha ri xihín ñayivi tá ná xinu coo quivi jánditacu Ndióxi na. Jáchi yiquí cuñu yó ña jánduxu na tixi ñúhu cúu á ña ndihi saha. Joo tá ná nditacu tucú já a ndíhi ga saha yo anda ama cúa quivi.

⁴³ Mé yiquí cuñu í jánduxu na tixi ñúhu yóho cúu á tátuhun in ña núu ndivaha jáchi ndihi sahá. Joo tá ná xinu coo quivi ndicoo tucu a caja Ndióxi já cacuu a ña ndató ndivaha jáchi a ndíhi sahá. Ña jánduxu na tixi ñúhu cúu á ña vitá ndivaha joo ña nditacu tucu cacuu a ña ndacú vaha.

⁴⁴ Jáchi tá ná jánduxu na mí tixi ñúhu, ña jánduxu na cúu yiquí cuñu cuéntá ñuyíví yóho. Joo tá ná nditacu tucú já ñehe yó inga yiquí cuñu, ña cúu cuéntá indiví. Jáchi tá íin

yiquí cuñu cuéntá ñuyíví, ña ndíhi saha ta já íin ri yiquí cuñu cuéntá indiví, ña a cuú ndíhi saha.

⁴⁵ Cáchi tühun Ndióxi ña tá nacavaha Ndióxi Adán, da nasacuu ta nu cuítí já nacaja mé á ña ná catacu da. Joo cáhnu chága Jesucristo a juú ga Adán jáchi mé á cája ña ná catacu ñayivi anda ama cúa quivi.

⁴⁶ Ña jihna ñúhú sahan Ndióxi nu yo cúu yiquí cuñu í, ña ndíhi yachi saha. Ta tá nu ndíhi já sahan mé á inga yiquí cuñu nu yo cuéntá indiví ta ña cán cúu á ña co ndíhi saha.

⁴⁷ Mé Adán, da nacavaha Ndióxi nu cuítí nasacuu da da nacavaha mé á xihín ñundáhyi ta cúu dá da ñuyíví yóho. Ta Jesucristo, xitoho í, cúu á inga táhan dataa joo cúu á ña naquixi chí indiví.

⁴⁸ Tá in tá in ñayivi ñehe na yiquí cuñu tátuhun yiquí cuñu Adán jáchi cúu á ña nacavaha Ndióxi xihín ñundáhyi. Joo ñayivi, na ndiquiahva mé ndáha Jesucristo vaxi quivi ndiquehe na inga yiquí cuñu cuéntá indiví, ña co ndíhi saha.

⁴⁹ Ta viti íin yiquí cuñu í tátuhun yiquí cuñu Adán joo vaxi quivi ndiquehé inga yiquí cuñu í cuéntá indiví ta cacuu a tátuhun yiquí cuñu Jesucristo.

⁵⁰ Cándehé ndo, ñani i, na cúu cuéntá Jesús. Cúni caxi tühun i xihín ndo ña a cúu toho cuhun yiquí cuñu í yóho indiví ña ná cacomí Ndióxi cuéntá sahá jáchi mé yiquí cuñu í yóho co cúu á ña cuu catacu anda ama cúa quivi. Joo ña inga, ña quiahva mé á nu yo cán, a ndíhi toho sahá.

⁵¹ Ta viti cúni caxi tühun i nu ndo sahá in ñaha nasahin jehé nuú ñayivi ta ña yóho quea: A juú ndíhi toho í quivi jáchi tá ná xinu coo quivi quixi tucu Jesucristo ñuyíví yóho anda javi ndijama ndíhi tá quiahva ndáa í ta mé Ndióxi quiahva inga yiquí cuñu nu yo.

⁵² Ta in náá cuití yaha ña yóho jáchi cacuu a tátuhun in ndicuaní nuu yo ta já ndahyi trompeta, mé dó ndahyi nu ndíhi cuí cán já nditacu tóco ndíhi na sa naxihi ta a ndíco coo ga na quivi na. Ta mí, tá tácu yo, ña caja Ndióxi xihín yo quea ndijama yiquí cuñu í.

⁵³ Jáchi mé yiquí cuñu í ña ndíhi saha yóho a cuú toho nduu a tátuhun yiquí cuñu ña

quiahva Ndióxi nu yo. Sahá ña cán queá xíní ñúhú ndijama mé á yiquí cuñu í yóho já ná cuu cohó coo í xihín mé á anda ama cáa quivi.

⁵⁴ Ta tá sa nandijama yiquí cuñu í ta nanduu a ña co ndíhi saha anda ama cáa quivi já queá xinu coo nuú tuhun ña nacachi na profeta sanahá: “Vaxi quivi ndíhi sahá ña xíhi ñayivi jáchi nacandee Jesucristo nasahnu a nuú ña xíhi na.

⁵⁵ Ta xihín ña yóho cája cáhnu í mé á jáchi a quivi ga ñayivi sahá ña naquee vaha Jesucristo”, cáchi tuhun Ndióxi.

⁵⁶ Tá cája ñayivi cuachi já quivi tá quivi na sahá ña cája na. Ta cúu á tátuhun tá tiiin líhma na jáchi ndóho ini na sahá cuachi na. Anda sanahá ndivaha sáhdá ley Moisés ña quivi ñayivi sahá cuachi na jáchi ñéhe íni cuachi caja ña ná quivi ñayivi.

⁵⁷ Joo ndixahvi Ndióxi jáchi chindeé a mí ña ná cuu quee vaha í sahá ña nacaja Jesucristo, xitoho í saha yo.

⁵⁸ Sahá ña cán queá ndítahan nu ndó, ñani máni i, na cúu cuénta Jesús, coo ndacú ini ndó xihín tuhun Ndióxi. Ta co xíní ñúhú jándacoo ndó ña cándee ini ndó mé á. Ta ndítahan nu ndó ndíhi ini ndó caja chúun ndó cuénta mé á jáchi sa cánda vaha ini ndó ña a juú ña uun cúu toho chuun cája ndó jáchi íin Jesucristo, xitoho í xihín ndo.

16

Tá ndítaca jiuhún ña jasa na nuú na cúu cuénta Jesús

¹ Ta viti cúni ndicani i nu ndo ndá quiahva ndítahan caja ndó tá jánditaca ndó jiuhún ña jasa ndo nuú na cúu cuénta Jesús ndúu ñuu Jerusalén. Xíní ñúhú caja ndó tá quiahva najánaha i nuú na cúu cuénta Jesús ndúu estado Galacia.

² Ña ndítahan caja ndó queá: tá in in domingo xíní ñúhú tavá xóo ndó táhan jiuhún ña sácú ini ndó jasa ndo jatá ña nandiquehe ndó sahá chuun nacaja ndó. A cándati toho ndó janda quiahva ná saa i jan jáchi xíní ñúhú jánditaca cuéé ndó ña.

³ Ta caxi mé ndó ndá na cúni ndó cañehe jiuhún jan ñuu Jerusalén. Ta tá ná xinu coo i jan chindahá i na ña ná cuhun ñehe na jiuhún ñuu cán. Ta chindahá i in carta xihín

na ña ná quiahva na ña xihín jiuhún jan nuú na cúu cuénta Jesús ndúu mé cán.

⁴ Ta tá cúni Ndióxi já cuhun ri yehe va xihín na jan anda ñuu Jerusalén.

Sácú ini Pablo cuhun da coto nihni da na cúu cuénta Jesús ndúu java ga ñuu

⁵ Saa i coto nihni i ndohó cúni. Joo jihna ñúhú yaha i coto nihni i na cúu cuénta Jesús ndúu estado Macedonia. Ta anda jávi saa i ñuu Corinto jan.

⁶ Ta tá cúni Ndióxi candoo nahá chá i xihín ndo. Á tá coo ta coo i ní tiempo vixi xihín ndo jan. Ta tá sa ná quee e cuhun i inga ñuu já cuu chindeé ndó yehe.

⁷ Co cúni toho i coto nihni númí i ndohó. Ña cúni queá candoo too i coo nahá chá i xihín ndo jan tá cúni Ndióxi.

⁸ Joo candoo too i coo i ñuu Efeso yóho janda quiahva ná yaha vicó Pentecostés.

⁹ Jáchi mé a ndaa núná nuú i cája chúun i cuénta Ndióxi yóho jáchi cuahá ndivaha na ndíquehe vaha na tuhun Ndióxi vatí ndúu cuahá na co cúni yehe sahá chuun cája i yóho.

¹⁰ Tá ná xinu coo Timoteo nu ndúu ndó ñuu Corinto jan, ndítahan ndiquehe vaha ndó da já ná cajii íni da coo da xihín ndo. Jáchi cája chúun da cuénta Jesucristo, xitoho í tá quiahva cája chúun yehe.

¹¹ A cándají ndó da. Ña ndítahan caja ndó queá chindeé ndó da já ná coo vaha ini da quixi da nuú i. Jáchi yehe xihín java ga na cúu cuénta Jesús ndáti nde xinu coo da nu ndúu nde yóho.

¹² Ta viti cúni ndicani loho i nu ndó sahá ñaní, da naní Apolos. Mí i naxica tahví ndivaha i nu dá ña ná saa da xihín java ga na cúu cuénta Jesús coto nihni da ndohó. Joo co cúni da caja da ña viti. Cája i cuénta tá ná núná nu dá já saa da coto nihni da ndohó.

Ndíndayí Pablo na cúu cuénta Jesús ndúu ñuu Corinto

¹³ Cuénta vaha coo ndó. Xíní ñúhú ndacú coo ini ndó jáchi cándee ini ndó Jesús. A yíhví toho ndó. Canduu ndacú ndó íchi cuénta Jesús.

¹⁴ Xíní ñúhú caja ndó tóco ndíhi ñaha sahá ña quíhvi ini ndó ñani táhan ndó.

¹⁵ Candehé ndo ñani i, na cúú cuéntá Jesús. Sa xini vaha ndó sahá na vehe Estéfanos, mé na nu cuítí nandihvi íchi cuéntá Jesús estado Acaya. Sa nandiquiahva na mé ná chindeé na na cúú cuéntá Jesús.

¹⁶ Ña cuni caca i nu ndo cúú ña ná cuni johó ndó ña sáhdá na cán nu ndó caja ndó. Ta xini ñuhú caja ndó tá quiahva cuni ndihi na cán jáchi chindeé na ñayivi ta cája chúun vaha na cuéntá Jesús.

¹⁷ Cájji ini i jáchi naxinu coo Estéfanos xihin Fortunato xihin Acaico nu in i ta nachindeé na yehe. Ta vatí a cuú quixi mé ndó nuú i

¹⁸ joo na yóho sáhan na tuhun ndéé ini i xihin ñaha cuéntá Ndióxi tá quiahva nacija na xihin mé ndó. Mé a ndaa ndítahan nu yo caja cáhnu í na cája tátuhun na yóho.

¹⁹ Na cúú cuéntá Jesús ndúu estado Asia chindahá na Ndióxi coo ndó. Ta jári Aquila xihin Priscila chindahá na Ndióxi coo ndó. Ta jári na cúú cuéntá Jesús táca cája cáhnu Ndióxi vehe na cán chindahá na Ndióxi coo ndó.

²⁰ Tóco ndihi na cúú cuéntá Jesús ndúu chóho chindahá na Ndióxi coo ndó. Ta xini ñuhú cahán Ndióxi xihin táhan ndó ta tatí yúhu táhan ndó ta yii caja ndó ña.

²¹ Yehe cúú Pablo ta xihin ndáha mí i cáhyi i ña yóho nu ndó ta chindahá i Ndióxi coo ndó.

²² Ta ndá na co quíhvi ini Jesucristo já ná cuhun cháhan jatá ná. Cama chá ná quixi Jesucristo, xitoho í.

²³ Ña cuni quéa ná caja cuaha Jesucristo, xitoho í ñamaní xihin ndo.

²⁴ Quíhvi ini i tóco ndihi ndó jáchi tóco ndihí cúú yó cuéntá Jesucristo, xitoho í. Já ná coo.

Carta chí ivi nacahyí Pablo nuú na cúú cuéntá Jesús ndúu ñuu Corinto

*Cáhan Ndióxi Pablo xihín na cúú cuéntá
Jesús ndúu ñuu Corinto*

¹ Yehe cúú Pablo, da nacaxi Ndióxi cacuu apóstol cuéntá Jesucristo jáchi já cúní a caja. Yehe xihín ñani, Timoteo cáhyí nde carta yóho nu ndóhó, na cúú cuéntá Ndióxi ndúu ñuu Corinto ta nu tóco ndihi na cúú cuéntá Ndióxi ndúu estado Acaya.

² Ña cúní quéa ná caja Ndióxi, tátá yo xihín Jesucristo, xitoho í cuahá ñamani xihín ndo ta ná caja mé á ña ná coo vaha ini ndó.

Ndóho ini Pablo

³ Cóho caja cáhnu í Ndióxi, mé a cúú tátá xitoho í, Jesucristo. Jáchi Ndióxi cúú á tátá yo, mé á sá tahví ini saha yo ta cúú á Ndióxi ña chindeé mí tá ndóho iní.

⁴ Mé a cán sahan tuhun ndeé iní nu tóco ndihi ña ndóho iní já quéa ná cuu caja ri mé ví quiahva í tuhun ndeé ini ñayivi tá ndóho ini na. Tá quiahva cája mé á xoho quiahva já ndítahan caja í xihín ñayivi.

⁵ Jáchi tá quiahva ndóho ndivaha iní saha Jesucristo ta sa mé quiahva já sahan cuahá ndivaha mé á tuhun ndeé iní tá ndóho iní.

⁶ Tá ndóho ini mé nde já cuu quixi tuhun ndeé ini mé ndó ta já cuu cacu ndaa ínima ndo. Tá sahan Ndióxi tuhun ndeé ini nde já quéa sahan ri mé á tuhun ndeé ini mé ndó viti. Ta xihín ña yóho cuu coo ndacú vaha ini ndó tá ná quixi ña ndoho ini ndó tá quiahva ndóho ini mé nde.

⁷ Cándéé ini nde ña a jándacoo ndó tuhun Ndióxi jáchi cándaá cáxí ini nde ña tá quiahva ndóho iní quiahva já sahan Ndióxi tuhun ndeé iní.

⁸ Candehé ndó, ñani i, na cúú cuéntá Jesús. Cúní nde caxi tuhun nde nu ndo tá quiahva nandoho ini nde estado Asia. Nasacuu a tondóhó chicáhnu nuú nde ta chí a cándéé ga ini nde nacahán nde, nduu. Ta chí nasahnda ini nde: “Yóho quiví”, nacahán nde.

⁹ Nacahán nde ña jandá ndáti cuití nde quiví nde joo nachindeé ña yóho ndehe jáchi náha nuú nde ña co ndítahan cándéé ini nde mé nde. Jáchi ña ndítahan cándéé ini nde cúú Ndióxi, mé a jánditacu tucu ndii.

¹⁰ Najácaacu Ndióxi ndehe tañu tondóhó ná a quiví toho nde. Ta mé á quéa jácaacu a ndehe nuú ndihi tondóhó vaxi chága chí nuu. Jáchi cándéé ini nde mé á ña chindeé tá chindeé a ndehe nuú ndihi tondóhó.

¹¹ Ta mé ndó chindeé ndó ndehe tá xíca tahví ndó nu Ndióxi sahá nde. Jáchi tá ná caca tahví cuahá ñayivi nu Ndióxi sahá nde, sa mé quiahva já ndiquiahva cuahá ñayivi ndixahví nu Ndióxi sahá ñamani cája Ndióxi xihín nde.

*Ndícani Pablo ndá saha quéa coó
nasahan da ñuu Corinto*

¹² Íin java ñaha cája ña ná coo vaha ini nde ta cúú á ña yóho: cándaá cáxí ini nde ña co cája nde ña núu ta tóco ndihi ña cája nde ñuyiví yóho cája nde ña xihín ndinuhu ini nde. Ta xihín ndinuhu chága ini nde cája nde ña cán tañu mé ndó. Ta ni in ña cája nde co cája nde ña sahá ña ndíchí quixi jiní mé nde jáchi mé Ndióxi quéa táhvi ini sahá nde ta chindeé a ndehe cája vaha nde.

¹³ Tá nacahyí nde carta nu ndo jihna coó nacahyí nde tuhun ña a cuú candaa ini ndó jáchi ndacú ndacú cáhan nde xihín ndo nu carta cáhyí nde. Jáchi cúní nde ña ná candaa vaha ini ndó

¹⁴ Ña co cándaá cuahá ini ndó viti. Ta cúní nde ña ná cajii ini ndó saha mé nde tá quiahva cajii ini nde saha ndo tá ná tandaa quiví quixi tucu Jesucristo ñuyiví yóho.

¹⁵ Sahá ña cándéé ini i ndohó sahá ña cán quéa nasacu ini i coto nihni jihna ñuhú i ndohó ña ná cajii ndivaha ini ndó tá ná cuni ndó yehe ivi tañu.

¹⁶ Jáchi nasacu ini i coto nihni i ndohó tá ná vaha i cuhun i chí estado Macedonia ta já coto nihni tucu u ndohó tá ná ndicó coo i cán. Anda já cuu chindeé ndó yehe quehé e íchi cuhun i chí estado Judea.

¹⁷ Coto a cáhán ndo ña nacahvi ivi johó ini i tá nasacu ini i caja i ña yóho. Ta ni a cáhán ndo ña sácú ivi johó ini i xihín ña cája i tá quiahva cája ñayivi ñuyiví jáchi ndá chuun quéa cáhí i jivi a tá a juú a.

18 Sándehé cáxí Ndióxi ña co jándahvi nde ndohó jáchi co cáchi nde xihín ndo “ajan” tá cúní cachi nde “uhun.”

19 Jáchi co cája Jesucristo já. Co cáchi a “ajan” tá cúní a cachi a “uhun.” Ndinuhu ña ndaa quéa cáhan Jesucristo jáchi mé á cúú á in túhún jini já jahyi Ndióxi, mé a cáhan Timoteo xihín Silvano xihín yehe sahá nu ndo.

20 Jáchi xihín Jesucristo jáxinu coo Ndióxi tóco ndihi tuhun nasahan mé á nu yo. Sahá ña cán quéa tá cája cáhnu í Ndióxi cuu cachi yó “Já ná coo.” Ta tá cáchi yo “Já ná coo” cúú á sahá ña nacaja Jesucristo.

21 Ta mé Ndióxi nandaja ndacú a ndehe ta nandaja ndacú a ndohó. Ta nacaxi a mí cacuú ñayivi cuéntá mé á.

22 Jáchi mé á cúú á xitoho mí ta cómí a cuéntá saha yo. Ta nasacu a ínima yii mé á ini ínima yo já ná candaa vaha ini ndá quiahva ín ñamaní caja Ndióxi xihín yo chí nuu.

23 Sándehé cáxí Ndióxi ña mé a ndaa táhyí cáhan i xihín ndo. A ñaha saa i ñuu Corinto jan tá quiahva nasacu ini i caja i jáchi co cúní jácacuéha i ini ndó.

24 Co cúú á sahá ña cúní nde caja ndúsa nde sahá ña ndítahan candúsa ndó. Jáchi sa xini nde ña sa ndúu ndacú ndó cándéé ini ndó Jesucristo. Ña cúní nde quéa chindeé táhan nde xihín ndo já ná cajii ini ndó.

2

1 Sahá ña cán quéa nasacu ini i ña ná a cühun tucu u coto nihni i ndohó já ná a cacuéha ini ndó.

2 Jáchi tá ná jácacuéha yehe ini ndó a cúu caja ndó jácaji ndó ini i jáchi mé ndó cúú ná jácaji ini i. Joo ndaja caja ndó jácaji ndó ini i tá sa najá cacuéha i ini ndó. A cuú caja ndó ña.

3 Sahá ña cán quéa nacahyí i in carta ña nachindahá i nu ndo cán jáchi co cúní xinu i jan ta jácacuéha ndó ini i sahá ña cája ndó. Jáchi ndítahan jácaji ndó ini i nani ín i xihín ndo. Jáchi xini vaha i ña tá caji ini i já caji ini ri ndóhó va.

4 Joo nani nacahyí i mé carta cán já nacasáhá táhvi ini i ta ndícani ini i janda quiahva nacasáhá sácu u. Coó nacahyí i ña sahá ña cúní ña ná catati ini ndó xihín á

joo cúní ña ná candaa ini ndó ndá quiahva quihvi ndivaha ini i ndohó.

Ndítahan caja cáhnu ini na ndúu ñuu Corinto sahá in da nacaja cuachi

5 Ta mé da nacaja cuéha ini i cán coo nacaja cuéha da ini in túhún yehe tá nacaja da cuachi. Joo cúú á tátuhun nacaja cuéha ri da ini ndihi ndó. Cáhan i ña yóho xihín ndo ña ná a jánani ndivaha ndó da.

6 Jáchi cuaha ndó sa najánani ndó da cán. Vati já va caja xixi ndó xihín dá. Ndáhví da.

7 Ña ndítahan caja ndó quéa caja cáhnu ini ndó saha dá viti ta quiahva ndó tuhun ndeé ini da jáchi a juú tiahva náá cacuéha ini da xihín ña cája ndó xihín dá.

8 Sahá ña cán quéa xica tahví tucu u nu ndo ña ná jánaha ndó nu dá ña mé a ndaa quihvi ini ndó da.

9 Sa nacahyí vi in carta nu ndo nu ndícani i sahá ña yóho. Nacahyí i ña sahá ña nasacu ini i coto ndojó i ndohó á mé a ndaa táhyí cája ndó tá ín nacachi i xihín ndo.

10 Ña cán quéa ndá na ná caja cáhnu ini ndó saha já caja cáhnu ri ini yehe va saha ná. Ta tá ín in ñaha ndítahan caja cáhnu ini i saha já quéa cája i ña saha mé ndó. Ta sándehé cáxí Jesucristo ña cája i.

11 Jáchi tá ná a cája í ña já quéa cándéé tiñahá sacuaha xihín yo jáchi sa xini vaha í ña cúní rí jándahvi rí ñayivi.

Ndícani ini Pablo nani ín da ñuu Troas

12 Tá naxinu coo i ñuu Troas ña caxi tuhun i tuhun vaha saha Jesucristo já nanuná nuú i caja chúun vaha i cuéntá mé á cúú xitoho í.

13 Joo coo nasahin vaha ini i jáchi coo nañehé e ñaní Tito. Sahá ña cán quéa nandindayí i ñaní, na ndúu ñuu Troas já naquee e cuahan i chí estado Macedonia ndinducú u da.

Sáhan Jesucristo ndéé á nu yó quee vaha í

14 Ndíquiahva i ndixahvi nu Ndióxi jáchi sahá ña nacaja Jesucristo quée vaha í níí tiempo. Tá quiahva ndícuíta nuu in jíco támi sahan quiahva já ndícuíta nuu tuhun Ndióxi cája nde já quéa ná cuu candaa ini ñayivi tuhun vaha saha Jesucristo.

15 Jáchi mí cúú yó tátuhun jusa vaha ña támi sahan ña jóco Jesucristo nu Ndióxi. Ta

ndícuíta nuu a tañu na jácaçu Ndióxi sahá ña cándée ini na mé á. Ta jári ndícuíta nuu a tañu na cuhun indayá sahá ña coó nacandúsa na mé á.

¹⁶ Mí cúú yó tátuhun jusa támi sáhan nuú na sa cándaá ini tuhun Ndióxi jáchi xíní na ñéhe yó tuhun ña cuu jácaçu ínimá ná. Ta nuú na co xíní tuhun Ndióxi cúú yó tátuhun in ña quini ndivaha sáhan jáchi cuhun na indayá. Ndá na cúú cajú jáxinu ini ñayivi, da já.

¹⁷ Jáchi xíní Ndióxi ña mé nde co xíca nuu nde cáhan nde tuhun Ndióxi sahá jiuhún ta co jáma nde ña tá quiahva cája cuahá ñayivi. Ña cája nde queá cáhan nde xihín ñayivi xihín ndinuhu ini nde ña sáhan Ndióxi nuú nde cahan nde. Jáchi mé nde cúú nde na nachindahá Ndióxi ta cája chúun nde saha Jesucristo.

3

Cáxi tuhun Pablo sahá tuhun saá ña sáhan Ndióxi nuú ñayivi

¹ Co cáhan nde ña yóho xihín ndo sahá ña cúní nde cajú cáhnu nde mé nde. Jáchi co xíní ñúhú nde caça nde in tutu ña cáchí cúú nde ñayivi ndísáhnu ini nu ndo tá quiahva cája java na.

² Mé va ndó cuu quiahva ndó tuhun vaha sahá nde jáchi tá ná cuni ñayivi tá quiahva nandijama Ndióxi ínimá ndo xihín tuhun nacahan nde xihín ndo já candaá ini na ña nacaja vaha nde tá nacaja chúun nde tañu mé ndó.

³ Jáchi náha cáxí táhyí a ña cúú ndó tátuhun in carta nacahyí Jesucristo ta mé nde jánaha nde ña nuú ñayivi. Co cúú á in carta nacahyí nuú tutu. Cúú á ña nacahyí ínimá yíi Ndióxi, mé a tácu indiví. Ta cúú á in carta ña coó nacahyí nuú yuu jáchi cúú á tátuhun nacahyí a ini ínimá ñayivi.

⁴ Ta cáhan nde ña yóho jáchi cándée cáhnu ini nde Ndióxi sahá ña nacaja Jesucristo.

⁵ Co cúú á sahá ña quíxi jini mé nde cája nde ña. Jáchi Ndióxi queá sáhan ndée á nuú nde cajú nde chuun yóho.

⁶ Ta mé á queá chindeé ndehe cajú chúun nde cuéntá mé á xihín cuéntá tuhun saá nasahan nu yo. Co cája chúun nde saha ley nacahyí nuú tutu joo cája chúun nde saha

ínimá yíi Ndióxi. Mé ley cája ña ná quivi ñayivi joo cája ínimá yíi Ndióxi ña ná catacu ñayivi anda ama cá quivi.

⁷ Tá nacahyí ley Moisés nuú yuu, já nandiyehé ndivaha nuú Moisés janda quiahva coó nacuu ga candehé na Israel nuú dá. Joo nuú nandiyehé nahá cán nacasáhá ndáhva ña janda quiahva nandáhva ña. Candehé ndó. Vati nandiyehé ndivaha nuú naquixi mé ley, ña cuu chindahá ñayivi cuhun na indayá

⁸ joo ndaja ga ví ndiyehé chága nuú quixi tuhun vaha cáhan saha Jesús nuú ñayivi jáchi sáhan ínimá yíi Ndióxi tuhun yóho nu yo.

⁹ Candehé ndo. Vati ndató nasahin tá naquixi mé ley ña cuu chindahá ñayivi indayá joo ndaja ga ví ndató coo tá cáxi tuhun í xihín ñayivi ña coó ga cuachi na nu Ndióxi.

¹⁰ Jáchi coó sahá ga ña ndató mé ley naquixi jihna cán tá ná jácatáhan í ña xihín ña ndató chága nasahan Ndióxi nu yo viti.

¹¹ Ta tá ndató nasahin nuú naquixi ña nandihí saha cán ndaja ga ví ndató chága coo ña sáhan Ndióxi nu yo yóho jáchi a ndihí toho sahá.

¹² Ta sahá ña ndáti tiahva nde coo ña yóho sahá ña cán queá co yíhvi nde cáhan nde ña xihín ñayivi.

¹³ Co cája nde tá quiahva nacaja Moisés tá nachijahvi da nuú dá xihín in jáhma ña ná a cúní na Israel ña sa cuahan ndáhva ña nandiyehé nuú dá cán.

¹⁴ Joo mé na Israel cán coó nacandaá ini na ndá cuéntá queá nachijahvi Moisés nuú dá. Ta janda viti ndájí yíi xíní túní ná jáchi vati cáhvi na tuhun Ndióxi ña nacahyí sanahá joo co candaá ini na ña jáchi najahvi xíní túní na ta a cúu nuná. Jesucristo cuití va cuu jándinuna xíní túní ná tá cándée ini na mé á.

¹⁵ Mé na Israel ndájí yíi xíní túní ná janda viti jáchi tá cáhvi na ña nacahyí Moisés co candaá ini na ña. Cúú ná tátuhun in na jáhvi jáhma nuú.

¹⁶ Joo tá ná ndicó coo ini ñayivi nu Ndióxi já ndinuna xíní túní ná. Cúú á tátuhun ndicava jáhma nasandaji nuú ná.

¹⁷ Jáchi ínimá yíi Ndióxi cúú á xitoho í. Ta nu íin mé á, cán núná xíní túní ñayivi.

18 Ta viti cúú yó tátuhun in yutátá nuú cuu cuni ñayivi tá quiahva cáhnu cúú Ndióxi. Jáchí cō ndájí gā xíní túní yō viti sahá ña ñacasahá ndíjama Ndióxi mí viti ná nduú tá quiahva cáa Jesucristo. Ta tá quiahva cáhnu cúú mé á quiahva já loho loho nduu cáhnu yó tá quiahva cáa mé á. Já cája xitoho í, mé a cúú ínima yíi Ndióxi.

4

1 Sahá ña cán quéa ín ndacú ini nde cáhan nde tuhun Ndióxi xihín ñayivi jáchi sahá ña ñatahvi ini Ndióxi sahá nde sahá ña cán quéa ñasahan mé á chuun yóho nuú nde.

2 Mé nde ñasacu xóo nde tóco ndihi ña núu cája jehé ñayivi. Ta cō sácú ini nde jándahvi nde ñayivi tá cáhan nde tuhun Ndióxi xihín ná. Ña cája nde quéa cáhan nde ndinuhu ña ndaa ta xihín ña yóho sándehe cáxí Ndióxi tá quiahva náha nde nuú ñayivi ña cája nde ña vaha.

3 Tá cō cándaq ini ñayivi tuhun vaha sahá Jesús ña cáhan nde xihín ná, cúú á sahá ña xíca na íchi cuahan indayá.

4 Jáchi sahá ña cō cándusa na ña cáhan nde xihín ná sahá ña cán quéa ñandaji xíní túní ná ñacaja tiñahá, mé rí cúú xitoho ñuyíví yóho ña ná a cúní na ndá quiahva ndató ndíyehē tuhun vaha cáhan saha Jesucristo, mé a cáhnu ndivaha, mé a cúú á yuhú nuú Ndióxi.

5 Mé nde cō xíca nuu nde cáhan nde saha mé va nde. Ña cája nde quéa xíca nuu nde cáhan nde saha Jesucristo, mé á cúú xitoho í. Ta cáhan nde xihín ndo ña cája chúun nde nu ndo sahá ña cúní nde Jesús.

6 Jáchi ñasahnda Ndióxi chuun ña ná queta ña yéhe tañu ña naá cán. Ta mé a cán quéa ñacaja ña ná ndíyehē ínima yō xihín tuhun Ndióxi já quéa ná cuu candehé yō ndá quiahva yéhe nuú Jesucristo, ña náha ndá quiahva cáhnu cúú Ndióxi.

Ndá quiahva cuu canduú tá cándéé iní Jesucristo

7 Joo tóco ndihi ña ndáyahvi ña ñasahan Ndióxi nu yō yóho cúú á ña ndácaan yiquí cuñu í vatí yiquí cuñu í cúú á tátuhun in quíi ndahyi. Ñasahan Ndióxi ña ndáyahvi nu yō já quéa ná cuu cuni ñayivi ña ín ndéé

Ndióxi cája tóco ndihi ñaha ta cō cúú á ndéé mí.

8 Ta vatí vaxi cuahá tondóho nu yō joo jáyaha tá jáyaha Ndióxi mí. Ta vatí ndicani ndivaha iní joo cō jándihi ñahá yō mí.

9 Ta vatí ndícuíta ñee na mí joo cō jándacoo ndáha toho Ndióxi mí. Ta vatí jándicava na mí joo cō jándihi na sahá yō chí uun.

10 Ta ndá ñacuu nu xíca nuu í a íhvi toho cahní na mí tá quiahva ñacaja na xihín Jesús. Ta xihín ña ndóho yiquí cuñu í náha ña tácu yíi va Jesucristo ta ín a xóho.

11 Jáchi ndijáá ní quívi ndúcú na cahní na mí sahá Jesucristo. Joo xihín ña yóho núná nu yō jánaaha í nuú ñayivi ña ndácaan ndéé mé á ini yiquí cuñu í nani ndúú ñuyíví yóho.

12 Ta sahá ña xíca nuu nde cáhan nde tuhun Ndióxi xihín ndo sahá ña cán quéa ndúcú na cahní na ndehe. Joo sahá ña ndóho ini nde yóho cuu cacu ndaa ínima ndóho anda ama cáa quívi.

13 Jáchi já cáchí tuhun Ndióxi: “Sahá ña ñacandéé ini í Ndióxi sahá ña cán quéa ñacahan í cuéntá mé á.” Ta quiahva já cája rí ndehe va sahá ña cándéé ini nde Ndióxi. Ña cán quéa cō yíhvi nde cahan nde saha mé á nuú ñayivi.

14 Jáchi cándaq cáxí ini nde ña tá quiahva najánditacu Ndióxi Jesucristo, xitoho í quiahva já jánditacu a mí coo í xihín mé á. Ta já ndóho xihín ndehe xinu cōo í nu ín mé á.

15 Ñasacu ini Ndióxi ndoho ini nde tóco ndihi ña yóho saha mé ndó. Ña cán quéa tá ná caja Ndióxi cuahá ñamaní xihín cuaha chága ñayivi já nduu cuahá na ndiquiahva ndixahvi nu á ña ná ndicáhnu mé á.

16 Sahá ña cán quéa cō cáta iní xihín ña ndóho í vatí sa cáyatá yiquí cuñu í. Joo ndíyuta iní in in quívi yáha.

17 Cama chá yáha tóco ndihi ña válí ndóho iní ñuyíví yóho joo tá ñandihí ñandoho iní já vaxi cuahá ndivaha ña náhnu chága cuéntá mé á nu yō ta anda ama cáa quívi a ndíhi sahá.

18 Ta cō ndítahan nu yō quehé cuéntá sahá ña sándehe yó viti. Ña ndítahan caja í quéa cahvi iní sahá ña a cúú cuní xihín nuú yō. Jáchi vaxi quívi ndihi saha tóco ndihi ña

sándehe yó viti joo ña a cuú cuní coo a anda ama cáa quiví.

5

¹ Jáchí sa cándaá iní ña cúu yiquí cuñu í tátuhun vehe nu ndácaan ínima yó. Mé vehe nu ndácaan ínima yó yóho cúu á ña vaxi quiví ndihi sahá. Ta anda jávi nasacu ini Ndióxi quiahva nu yó inga yiquí cuñu nuú coo ínima yó indiví. Ta mé nuú coo ínima yó cán a ndihi sahá anda ama cáa quiví jáchí nacavaña Ndióxi ña.

² Nani ndácaan ínima yó yiquí cuñu í yóho já ndóho iní ta tána í jáchí xíca quí iní ndiquehé inga tucu yiquí cuñu saá cuéntá indiví.

³ Jáchí jácandixi Ndióxi mí xihín yiquí cuñu saá cuéntá indiví já ná a cácuú tátuhun na coó jáhma.

⁴ Jáchí nani ndácaan ínima yó ini yiquí cuñu í yóho tána í ta táhnda iní vatí co cúu á sahá ña cúní yó jándacoo í yiquí cuñu í. Cúu á sahá ña ndiáva cáhnu iní coo ínima yó ini in yiquí cuñu saá. Anda jávi jándacoo í yiquí cuñu í ña ndihí saha ta ndiquehé yiquí cuñu saá ña cuu cañehé anda ama cáa quiví.

⁵ Jáchí mé Ndióxi queá nasacu tiahva mí ndiquehé in yiquí cuñu saá jáchí mé á queá nasahan ínima yíi á nu yó já ná candaá vaha iní ndá quiahva in ña sácú ini Ndióxi quiahva nu yó chí nuu.

⁶ Sahá ña cán queá in ndeé iní jáchí cándaá iní ña nani ndácaan ínima yó yiquí cuñu í yóho ndúu xíca yó nu Jesucristo, xitoho í.

⁷ Ta vatí co xíní yó mé á joo xíca í íchi cuéntá mé á sahá ña cándéé iní mé á.

⁸ Ta co yíhví ga yó quiví viti jáchí cúní chága í jándacoo í yiquí cuñu í yóho já ná cuu cohó coo í xihín Jesucristo, xitoho í indiví.

⁹ Sahá ña cán queá níi tiempo ndúcú yó caja í ña táhán iní mé á xihín. Vatí tácu yó á naxihí yó cúní tá cúní yó cája í ña táhán iní mé á xihín.

¹⁰ Jáchí vaxi quiví tá ná ndique táhan ndihí candita í nuú Jesucristo ndiquiahva tá in tá in í cuéntá nu mé á sahá ña nacaja í xihín yiquí cuñu í ñuyíví yóho, á cúu á ña vaha á cúu á ña núu.

Nandique táhan máni yó xihín Ndióxi sahá ña nacaja Jesucristo

¹¹ Cája cáhnu í Jesucristo xihín ndinuhu iní ta cándaá iní ña vaxi quiví cohó candita í nu mé á. Sahá ña cán queá ndihi ini nde jácahan nde ñayivi ña ná ndicó coo ini na. Ta xíní vaha Ndióxi ña cája nde ta cúní nde ña ná candaá ini ri mé va ndó ña.

¹² Ña cáhan nde yóho co cúu á sahá ña cúní tucu nde ndiñehe jícó nde mé nde. Ña cúní nde queá ná coo vaha ini ndó xihín ña cája nde já ná cuu nducú ñehe ndó tuhun nuú na xíca ndiñehe jícó mé, na xíca cáhan lándá ta coó ña vaha quíxi ínima ná.

¹³ Vatí cúu nde na tachí nuú ñayivi joo cúu á sahá ña cája nde chuun Ndióxi. Ta tá co cúu nde na tachí já queá cúu á sahá ña vaha mé ndó.

¹⁴ Ta sahá ña quíhví ini Jesucristo ndehe sahá ña cán queá ndúsa cája nde ña cúní mé á. Jáchí cándaá cáxí ini nde ña naxihí Jesucristo saha tóco ndihi ñayivi ta in nanduú xihín Jesucristo tá naxihí a.

¹⁵ Naxihí Jesucristo saha tóco ndihí ña ná a cácacú ga í saha mé cuití yó. Joo cúní a ña ná catacú saha mé a naxihí saha yó ta tá ndihi nditacu tucu a.

¹⁶ Sahá ña cán queá co sándehe ndaa ga nde ñayivi tá quiahva cája ñayivi ñuyíví. Vatí nacahan núu nde saha Jesucristo sanahá joo co cája ga nde já viti.

¹⁷ Jáchí tá in nanduú xihín Jesucristo já nanduú tátuhun ñayivi saá. Ña cán queá ndihi sahá ña yatá ta nanduú ñayivi saá nacaja Ndióxi.

¹⁸ Ta tóco ndihi ña yóho cúu á ña cája Ndióxi jáchí najándique táhan máni á mí xihín mé á sahá ña nacaja Jesucristo. Ta najándacoo a chuun yóho nuú nde ña ná jándique táhan máni nde tóco ndihi ñayivi xihín mé á.

¹⁹ Ta nasahan ñamaní nuú ñayivi ndique táhan máni ná xihín á sahá ña nacaja Jesucristo. Ta coo naquehe Ndióxi cuéntá sahá cuachi nacaja na. Ta ña yóho cúu chuun natáhnda nuú nde nacaja Ndióxi ña ná caxi tuhun nde nuú ñayivi ña cúní mé á ndique táhan máni á xihín ná.

²⁰ Mé nde cúu nde na nachindahá Jesucristo ta xíca nde cáhan nde saha mé á. Ta

viti cúú á tátuhun xíca tahví Ndióxi nu ndo tá cáhan mé nde. Ta viti xíca tahví nde nu ndó saha Jesucristo ña ná ndique táhan máni ndó xihin mé á.

²¹ Mé Jesucristo coó ñacaja ni in cuachi joo sahá mí ñacaja Ndióxi ña ná ndoho Jesucristo tátuhun in da ñacaja cuachi. Ta sahá ña ñacaja mé á co quehe ga Ndióxi cuénta sahá cuachi ñacaja í ta nanduú ñayivi ndaa nu mé á tátuhun cúni mé á.

6

¹ Ta sahá ña in cúú ndó xihin nde cája chúun yó cuénta Ndióxi sahá ña cán quea xíca tahví nde nu ndo ña ná a quehe núu ndó ñamaní cája Ndióxi xihin ndo.

² Jáchi já cáchi tuhun Ndióxi já:

Tá natandaa tiempo caja i ñamaní xuhun já naxini johó i nuú ñacahun.

Ta tá naxinu quivi jácacu u yohó já nachindeé e yohó, cáchi tuhun Ndióxi.

Candehé vaha ndó. Viti ñúhú cúni Ndióxi caja cuahá ñamaní xihin ndo. Ta viti ñúhú cúni a jácacu a ndohó.

³ Ta ni in túhún ña núu co cája nde já ná a cáhan núu ñayivi sahá chuun cája nde.

⁴ Ña cája nde quea jánaña nde nuú ñayivi ní tiempo ña cúú nde na cája chúun cuénta Ndióxi. Jáchi sahan ndeé ini nde tá ndóho ini nde. Ta tá ndímaní ñaha nuú nde ta tá vaxi tondóho nuú nde co ndíhi ini nde.

⁵ Jáchi ñacani na ndehe ta nataán ná ndehe vecaa ta ndívaa na xoo nde. Ta a juú quiahva najácaja chúun na ndehe ta java tañu co quíji nde ta java tañu vaxi joco nuú nde.

⁶ Joo jánaña nde nuú ñayivi ña cúú nde ñayivi cuénta Ndióxi jáchi ndúu víi nde ta cándaá ini nde ña ndaa ta ín cáhnu ini nde xihin ñayivi ta cúú nde na vaha ini. Ta sahá ña ndácaan ínima yíi Ndióxi ini nde ta sahá ña quíhvi ini ndusa nde ndohó

⁷ ta sahá ña cáhan nde ña ndaa xihin ndeé nasahan mé á nuú nde sahá ña cán jánaña nde nuú ñayivi ña cája chúun nde cuénta mé á. Ta sahá ña cúú nde ñayivi ndaa nu Ndióxi sahá ña cán quea quíhvi nuu nde cáni táhan nde xihin rí quini tá cúni rí caja xíxi rí xihin nde.

⁸ Java tañu cája cáhnu ñayivi ndehe ta java tañu cáhan ihvi na xihin nde. Java tañu cáhan vaha na sahá nde ta java tañu cáhan núu na sahá nde. Ta java tañu tá quiahva cája na xihin na tuhún quiahva já cája na xihin nde vatí cáhan nde ña ndaa.

⁹ Ta java tañu cája na tátuhun co xini na ndehe vatí xini vaha na ndehe. Ta mé a ndaa cúú nde tátuhun na sa xíhi vatí tácu yíi va nde. Cája xíxi na xihin nde joo co sáhní na ndehe.

¹⁰ Ta java tañu ndúu cuéha ini nde joo ní tiempo cájii ini nde. Ta java tañu cándahví ndivaha nde joo já cuahá ndivaha na cúú ná tátuhun na cuicá viti jáchi ñacaxi tuhun nde tuhun Ndióxi nu ná. Ta ndaa nde tátuhun na coó ñaha nuu joo ín ndíhi ñaha cuénta Ndióxi nuú nde.

¹¹ Ñani mí i, na ndúu ñuu Corinto jan. Tá cáhan nde xihin ndo co chíjehé tuhun nde nu ndo jáchi quíhvi ini nde ndohó xihin ndinuhu ini nde.

¹² Vatí co quíhvi ini ndó ndehe tá quiahva quíhvi ini nde ndohó joo co jándacoo nde ña quíhvi ini nde ndohó.

¹³ Sahá ña cán quea xíca tahví i nu ndo tá quiahva cája in dataa tá xíca tahví da nuú jahyi da. Ña cúni quea ña ná quíhvi vaha ini ndó yehe tá quiahva quíhvi ndivaha ini i ndohó.

Co ndítahan quíhvi nuu na cúú cuénta Jesús xihin ñayivi cuénta ñuyívi

¹⁴ Cuénta coo ndó ná a ndique táhan ndó xihin na co cúú cuénta Jesús jáchi coó in cúú na xihin ndo. Jáchi ndaja cuu ndique táhan ña vaha xihin ña núu. Ta ndaja cuu ndique táhan ña yehe xihin ña naá. Ni in ña yóho a cúu coo já.

¹⁵ Ta ama cuéhe Jesucristo coo a xihin Satanás, mé rí quini. Ta quiahva já ama ná cuu ndique táhan in na ndíco íchi cuénta Jesús xihin in na co cúú cuénta mé á.

¹⁶ Ta ama ná cuu cachi ndó ña in cuu nu cája cáhnu na Ndióxi xihin nu cája cáhnu na yoco. Jáchi mí cúú yó tátuhun veñuhu Ndióxi, mé á tácu indiví. Ta já ñacachi a já: Ndacaan i ínima na cúú cuénta mé i ta caca nuu i xihin ná.

Yehe cacuu u Ndióxi ña caja cáhnu na,

ta mé ná cacuu na ñayivi, na cacomí i cuénta saha, cáchi Ndióxi.

17 Sahá ña cán quea já nacachi Ndióxi, xi-toho í já xihin ná:

Tavá ndo mé ndó tañu ñayivi quini jan.

Caxoo ndó nu ná ta a cája ndó ña núu ña cája na já ná cuu ndiquehe vaha i ndohó.

18 Ta já yehe cacuu u tátá ndo,

ta mé ndó cacuu jahyi ta i xihin jahyi jíhí i, cáchi Ndióxi, mé a cúu cája tóco ndihi ñaha.

7

1 Candehé ndó ñani máni, na cúu cuénta Jesús. Ña yóho cúu tuhun nasahan Ndióxi nu yo. Sahá ña cán quea co ndítahan nu yo caja í in ña núu ña cuu jácaquini yiquí cuñu í á ínima yo. Ña ndítahan caja í quea cayihví yo Ndióxi ta cacu iní ndaja ví yo mí já ndiquiahva í mí ndáha mé á.

Cáji ini Pablo jáchi nandico coo ini na ndúu nuu Corinto

2 Xíca tahví nde nu ndo ña ná a cáji nuu ga ndó nu ínima ndo ta ná quihví ini ndó ndehe. Jáchi ni in ndó coo nacaja xixi nde xihin ta ni in ndó coo najátivi nde ta ni in ndó coo najándahvi nde.

3 Co cáhan i ña yóho xihin ndo sahá ña cuni candehé ndaa i ndohó, vaha. Jáchi janda jihna va nacachi i xihin ndo ña ñúhu ndó ínima i. Ta vaha ri catacu u ta vaha ri quivi i joo quihví ini tá quihví ini i ndohó.

4 Mé a ndaa cándéé cáhnu ndivaha ini i ndohó ta cáji ini i xihin ña cája ndó. Ta tá ndícutu ini i saha ndo já ndíndacú ini i ta ndícutu ndaa ini i xihin ña cáji ini i vatí ndóho ini i.

5 Janda naní naxinu nde estado Macedonia chí a cúu canduu vaha nde jáchi ndáchi nacuu ndáca náha tondóho nuu nde. Jáchi ndijáa quixi ñaha jáquihvi ndehe janda quiahva yíhví nde ndúu nde yóho.

6 Joo sahan Ndióxi tuhun ndeé ini ñayivi ndúu cuéha ini. Ña cán quea nasahan tuhun ndeé ini nde jáchi naxinu Tito nu ndúu nde yóho.

7 Ta a juú sahá ña naxinu da yóho cuití va, vaha. Nandihvi tuhun ndeé ini nde jáchi nacajii ndivaha ini mé dá nacaja ndóho. Ta nandicani da nuu nde ña xíca ndivaha

ini ndó cuni ndó ndehe ta anda quiahva táhnda ini ndó sahá nde. Ta nacachi da xihin i ndá quiahva ndícani ini ndó sahá i ta xihin ña yóho nacajii chága ví ini i.

8 Vatí nacacuéha ini ndó xihin carta nacahví i nu ndo joo viti co táhnda toho ini i ña nachindahá i ña nu ndo. Vatí natahnda ini i tá naxini i ña nacacuéha ini ndó tixi chá tiempo

9 joo cáji ini i viti. Co cúu á sahá ña nacaja cuéha carta cán ndohó. Cáji ini i jáchi tóco ndihi ña nacaja cuéha ini ndó cán nanducú ñehe a ndohó nu Ndióxi. Mé ndó nacaja ndeé ini ndó tá quiahva cuni Ndióxi. Sahá ña cán quea cánda ini nde ña coo nacaja núu nde xihin ndo.

10 Jáchi tá cácuéha ini ta tá cája ndeé ini tá quiahva cuni Ndióxi caja í já quea chindeé a mí ndico coo ini. Ta xihin ña yóho jáca cu a mí ta coo ñaha ndítahan tahnda ini saha. Joo tá cácuéha ini ñayivi ñuyíví co ndíco coo ini na sahá ña cán quea ndihi saha ná indayá.

11 Candehé ndó ndaja nacaja ndeé ini ndó tá nacacuéha ini ndó tá quiahva cuni Ndióxi. Joo tá coo ña yóho ná vaha ta a jándacoo toho ndó cuachi nasacaja ndó, nduu. Joo viti a juú quiahva naxojo ini ndó saha mé cuachi ta nayihví ndo sahá. Ta tá nandihvi já naxica ini ndó cuni ndó yehe ña ná chindeé e ndohó. Ta anda já nasahin tiahva ndó jándoho ndó ini da nacaja cuachi cán. Ta xihin ña yóho náha ña co táhan ini ndó xihin cuachi nacaja da cán.

12 Ña cán quea tá nacahví i carta cán nu ndo coo nacaja i ña sahá da nacaja cuachi cán. Ta ni coo nacaja i ña sahá ñayivi nandoho ini sahá cuachi nacaja da. Nacahví i ña jáchi xihin ña yóho cuu jánaha ndó nu Ndióxi ndá quiahva quihví ini ndó ndehe.

13 Ta ña yóho quea sahan tuhun ndeé ini nde.

Joo nandindeé chága ví ini nde ta nacajii ini nde tá naxini nde ña cáji ini Tito. Jáchi mé ndó nachindeé ndó da ña ná ndivaha ini da.

14 Jáchi mí i sa nacachi i xihin Tito ña cáji ini i xihin ña cája ndó ta coo nacandoo nuu i nu Tito xihin ña nacachi i xihin dá saha ndo. Joho nacandoo vaha johó i nu dá jáchi

tá quiahva cáhan nde ña ndaa xihín ndo quiahva já nacahan ndaa nde xihín mé dá. Ta ña cáchí nde queá cájii ini nde xihín ña cája ndó.

¹⁵ Ta cásahá quíhvi ini chága da ndohó tá ndícuñun ini da ña nacaja ndó ña cúni mé dá. Ta nasahin toní ñúhú ndó xihín dá ta nandiquehe ndó da xihín ndinuhu ini ndó.

¹⁶ Ta cájii ndivaha ini i jáchi cuu candee ini i ndohó sahá ña cája vaha ndó.

8

Játaca na jiuñun quiahva na nuú na ndahví

¹ Ta viti cúni nde ndicani nde nu ndóhó, ñani i ndá quiahva cája Ndióxi ñamaní xihín na cúu cuéntá Jesús ndúu estado Macedonia.

² Vatí a juú quiahva cuahá tondóhó quíxi nu ná joo cájii tá cájii ndivaha ini na. Ta vatí cúu ná ñayivi cándahví ndivaha joo ín vaha ndivaha ini na jóco ná jiuñun tátuhun na cuicá.

³ Cáhan ndaa i nu ndo ña cájii ini na jásá na ña ín nu ná ta janda java na coó cuahá nu ná sáhdá java na ña.

⁴ Ta xihín ndinuhu ini na naxica tahví na nuú nde ña ná quiahva nde ñamaní nu ná ñehe táhvi ná chindeé na na cúu cuéntá Jesús ndúu Jerusalén.

⁵ Chí nayaha quiahva najasá na ñaha na chí coó nacahan nde caja na já. Jáchi jihna ñúhú nandiquiahva na mé ná ndáha Ndióxi, xitoho í ña ná caja na ña cúni mé á. Anda já nandiquiahva na mé ná ndáha mé nde ná chindeé na ndehe.

⁶ Sahá ña cán queá naxica tahví nde nu Tito ña ná saa tucu da nu ndó jan já ná jáxinu coo da nuú chuun nacasahá cája da jihna ña játaca da ña jóco maní uun ndó.

⁷ Jáchi mé ndó yójó johó ndó nu ndíhi ña cája ndó. Yójó ndó xihín ña cándee ini ndó Ndióxi. Ta yójó ndó xihín tuhun cáhan ndo cuéntá Ndióxi. Ta yójó ndó xihín ña xini ndo. Ta yójó ndó xihín ña ndíhi ini ndó cája ndó ña vaha xihín ñayivi. Ta quiahva já yójó ndó xihín ña quíhvi ini ndó ndehe. Ta quiahva já ndítahan cayojó ndo nuú ña jásá ndo nuú na ndahví.

⁸ Ña cáhan i xihín ndo yóho co cúu á in chuun sáhdá i nu ndo. Ña cúni queá ná candaa ini ndó ndá quiahva chindeé na cán ñayivi xihín ndinuhu ini na. Ta tá cája ndó tá quiahva cája na cán já queá jánaha ndó ña mé a ndaa quíhvi ini ndó ñayivi.

⁹ Jáchi sa cándaa vaha ini ndó ña natahvi ini Jesucristo, xitoho í saha yo. Ta vatí nasacomí a tóco ndíhi ñaha joo najándacoo a ña ta nandaja ndahví a mé á ña ná cuu nduu ndó tátuhun na cuicá ndivaha. Ta nacaja mé á ña yóho jáchi quíhvi ndivaha ini a ndohó.

¹⁰ Cája i cuéntá ña vaha chága ná jáxinu coo ndó ña nacasahá cája ndó ava. Jáchi jihna ñúhú mé ndó nacasahá ndó játaca ndó jiuñun jan ta nacaja ndó ña xihín ndinuhu ini ndó.

¹¹ Candehé ndo. Xini ñúhú jáxinu coo ndó ña nacasahá cája ndó jan. Ta ná caja ndó ña xihín ndinuhu ini ndó tá quiahva nacaja ndó janda tá mé saha. Ta xini ñúhú quiahva ndó ña cuu jásá ndo

¹² Jáchi ndá na cúni jásá ñaha já ndíquehe vaha Ndióxi ndá ña cuu jásá na. Sahá ña cán queá xini ñúhú quiahva ndó ña cuu quiahva ndó jáchi co xica Ndióxi nu yo quiahva í ña co cómi yo.

¹³ A cáhan ndo ña co ndítahan nuú na cán caja chúun na nani cája chúun mé ndó ña ná chindeé ndó na.

¹⁴ Ña cúni Ndióxi queá ná a ndímaní ni in ñaha nu táhan ndó. Jáchi ña ndímaní nuú na cán, ín cuahá nu ndóhó viti ña ná cuu chindeé ndó na. Joo inga tañu ña ndímaní nu ndóhó, coo a nuú na cán ta já cuu chindeé na cán ndohó. Ta quiahva já canduu in nuú xihín táhan ndó.

¹⁵ Já cáchí tuhun Ndióxi já: “Ni coo nacayojó a nuú na najátaca cuahá. Ta ni coo nandímaní á nuú na najátaca chá ña.”

Tito xihín na xica xihín dá

¹⁶ Ndíquiahva i ndixahvi nu Ndióxi jáchi nacaja mé á ña ná ndíhi ini Tito saha ndo tá quiahva ndíhi ini mí i saha ndo.

¹⁷ Jáchi nacandúsa da caja da ña nasahnda i nu dá. Ta sa ndícani ini ri mé dá saha ndo ta sahá ña cán queá cúni da coto nihni da ndohó cuéntá mé dá viti.

18 Ta chindahá i in dataa, da cúu cuéntá Jesús saa da xihín Tito jan. Ta tóco ndihi ñayivi ndúu java ga veñuhu cáhan vaha na sahá da cán ta sahá ña cája chúun vaha da cáxi tuhun da tuhun vaha saha Jesús nuú ñayivi.

19 Ta mé na cúu cuéntá Jesús, na táca ndijáa veñuhu yóho nandacaxi na da ña ná caca da xihín nde cañehe nde jiuñun cuñun nde ñuu Jerusalén. Ta tá cája nde ñamani xihín ñayivi cán já quéa jánaha nde ña mé a ndaa táhyi cúni nde chindeé nde na. Ta xihín ña yóho cája cáhnu nde Ndióxi.

20 Jáchi co cúni nde ña ná cahan núu ñayivi sahá ña cája nde xihín jiuñun cuaha cán, ña najátaca ndó.

21 Sahá ña cán quéa ndihi ini nde cája nde ña vaha. Ta a juú nu Ndióxi cuití va ndihi ini nde cája nde ña vaha jáchi cúni nde caja nde ña vaha nuú ñayivi viti.

22 Ta xihín mé ñaní, da chindahá i nu ndó jan chindahá i inga tucu da cúu cuéntá Jesús. Mé da yóho cuahá ndivaha tañu nanaha da ña íin ini da caja da ña vaha xihín ñayivi. Ta viti xíca chága ini da caja da ña jáchi cándeé ini da ña a jándacoo núu ndó da.

23 Ta ndá na ná ndaca tuhún ndohó saha Tito ndítahan cahan ndó xihín ná ña cúu dá da xíca xihín mí i. Ta cahan ndó ña in nuú cája chúun da xihín i chindeé nde ndohó. Ta tá ná ndaca tuhún na ndohó sahá java ga na cúu cuéntá Jesús cuahan xihín dá ndítahan cahan ndó ña cúu ná na nachindahá na cúu cuéntá Jesús táca veñuhu chóho. Ta cahan ndó xihín ná ña cúu ná na cája cáhnu Jesucristo.

24 Ta xíní ñúhú jánaha ndó nuú na cán ña mé a ndaa táhyi quíhvi ini ndó na já ná candaa ini na táca veñuhu cán ña íin sahá nde cájii ini nde xihín ndo.

9

Sa nataca jiuñun cuñun nuú na cúu cuéntá Jesús

1 Co xíní ñúhú cahyí chága i nu ndo sahá jiuñun ña jataca ndó chindeé ndó na cúu cuéntá Jesús ñuu Jerusalén.

2 Jáchi sa xíní ví ña íin vaha ini ndó caja ndó ña. Ta ndivaha ini i tá cáxi tuhun i nuú na ndúu estado Macedonia ña mé ndó,

na ndúu estado Acaya jan nasacu ini ndó chindeé ndó ñayivi jandá ava. Ta cuahá na ndúu estado Macedonia nandindeé ini na chindeé na ñayivi sahá ña vaha ini mé ndó.

3 Joo chindahá i na cúu cuéntá Jesús yóho nu ndo já quéa ná a cándo nuú i jáchi nacahan vaha i saha ndo nuú na yóho. Ta ña cúni quéa ña ná coo tiañva ndó ndiquiahva ndó jiuñun ña najátaca ndó jan tá quiahva nacachi i xihín ná.

4 Jáchi tiañva náá java na ndúu estado Macedonia saa na xihín i ta cuni na ña co ndúu tiañva ndó xihín mé jiuñun. Tá ná yaha ña yóho ta já cacahan ndivaha nuú nde caja ndó xihín ña jan sahá ña nasandeé cáhnu ini i ndohó ta sa mé quiahva já cacahan ri nuú ndohó va.

5 Ta saha mé ña jan quéa nacahan i ña xíní ñúhú caca i ñamani nuú na cúu cuéntá Jesús yóho ña ná cuñun na coto nihni jihna ñúhú na ndohó. Ta já ná chindeé na ndohó nu jataca ndó jiuñun ña nasahan ndó tuhun ndó quiahva ndó jan. Já quéa ná coo tiañva jiuñun cán tá ná saa i ña ná naha ña sahan ndó jiuñun jan sahá ña íin maní ini ndó ta co sahan ndó ña xihín ña ndúsa.

6 Xíní ñúhú ndicuhun ini ndó ña yóho: Da xútu loho, chá va jáquee da. Da xútu cuaha, cuaha jáquee da.

7 Tá in tá in ndó xíní ñúhú quiahva ndó tá quiahva nasacu ini ndó quiahva ndó. A quiahva cajihnda joho ini ndó ñaha ta ni a quiahva ndó ña xihín ña ndúsa. Jáchi quíhvi ini Ndióxi na cájii ini jasá ñaha.

8 Ta cuu quiahva Ndióxi cuahá ndivaha nuú ña vaha nu ndó já quéa ná a ndímaní ni in ñaha nu ndo. Jáchi joho cayojó joho a nu ndo já ná cuu chindeé ndó na ndímaní ñaha nuú nani ná cacuu a nuú ña vaha.

9 Jáchi já cáchi tuhun Ndióxi já: Cuahá ndivaha ñaha jasá Ndióxi nuú na ndahví,

ta já coo ña vaha cája mé á xihín ñayivi anda ama cáa quívi, cáchi tuhun Ndióxi.

10 Jáchi Ndióxi quéa sahan tata nuú in dataa já ná cutu da ña. Ta mé a cán sahan ña cuxu da viti. Ta quiahva já caja Ndióxi xihín ndo. Quiahva mé á ña xíní ñúhú ndo já ná cuu chindeé chága ví ndó ñayivi. Ta já quéa ñeñe táhvi ndó canduu vaha ndó sahá ñamani cája ndó.

11 Ta já xinu ndó cacomí ndo cuahá ndivaha nuú ña cuicá ta xihín ña yóho cuu chindeé cuaha ndó ñayivi xihin á. Ta mé jjuhún játaca ndó jan tá ndiquiahva nde ña nuú na ñuu Jerusalén já quea ndiquiahva na cán ndixahvi nu Ndióxi sahá.

12 Jáchi mé jjuhún játaca ndó cán tá ná ndiquiahva nde ña nuú na cúu cuénta Jesús cán já quea chindeé a na xihín ña ndímani nu ná. Ta xihín ña yóho ndiquiahva ndivaha na cán ndixahvi nu Ndióxi.

13 Ta já caja cáhnu na Ndióxi jáchi xihín ña cája ndó yóho náha ña co quehe nuú ndó tuhun vaha cáhan sahá Jesucristo. Jári caja cáhnu na Ndióxi sahá ña vaha íin ini ndó xihin ná. Jáchi chindeé ndó na xihín ña jásá ndó nu ná ta chindeé ri ndó java ga ñayivi.

14 Ta ndiquiahva na ndixahvi nu Ndióxi saha ndo jáchi xihín ña cája ndó náha cáxi a ña cája cuaha Ndióxi ñamani xihin ñayivi.

15 Ndixahvi Ndióxi jáchi najasá mé á in ña cáhnu ndivaha nu yo ta ni co ñehe yó tuhun ndá quiahva ndicaní ña.

10

Cáhan Pablo saha mé dá

1 Yehe cúu Pablo ta cúni caça i ñamani nu ndo. Joo cúni cahan vií i ña nu ndo tá quiahva cáhan vií Jesucristo xoho. Ndúu java na tañu ndó ta cáchi na ña tá íin i tañu ndóhó já cúu u in ta uun ini. Joo cáchi na tá íin xicá i já cúu u da co yíhvi cahan ndacú xihin ndo.

2 Ta viti xicá tahví i nu ndo ña ná a cája ndó ni in ñaha ña cuu jánani i ndohó saha. Tá ná saa i coto nihni i ndohó jan co cúni jánani i java ndó, na jácojo cuachi jatá nde, na cáchi ña cája nde tóco ndihi ñaha tá quiahva cája ñayivi ñuyíví. Jáchi mé a ndaa sácú ini i saa i quihvi táhan i xihin na jan.

3 Vatí cúu yó ñayivi ndúu ñuyíví joo co cája nde tá quiahva cája ñayivi ñuyíví.

4 Jáchi ña chindeé ndehe co cúu á ña chindeé ñayivi ñuyíví. Joo ña chindeé ndehe cúu ndee Ndióxi ña sáhan mé á nuú nde já ná cuu jándihi nde sahá ña cája tiñahá sacuaça.

5 Ta quiahva já jándihi nde sahá ña cája ihvi xihin Ndióxi ta xihin ndee mé á jándihi nde sahá ña cáhan ñayivi, na cája cáhnu mé

jáchi co xini na Ndióxi. Ta tóco ndihi ña cáhvi ini nde ndiquiahva nde ña ndáha mé á já ná caja nde tóco ndihi ña cúni Jesucristo.

6 Ña cán quea tá ná nahá ña íin tiahva ndó caja ndó tóco ndihi ña nasahnda nde nu ndó já quea cacu ini nde jánani nde ndá na nacuu, na co cúni caja ña sáhdá Jesucristo.

7 Mé ndó co xini ndó ndá quiahva cáa íinima ñayivi jáchi sándehe ndó ña cáa chí jata cuití va. Joo tá mé a ndaa táhyí cáhan java ndó ña cómi Jesucristo cuénta saha ndo xini ñuhú quehe ndó cuénta ña cúu ri ndehe va na cómi Jesucristo cuénta saha.

8 Co cáchan nuú i caja cáhnu loho i mí i sahá chuun nasahan Ndióxi nuú i. Jáchi nacaja mé á ña ná cahnda i chuun nu ndo jáchi mé Jesucristo, xitoho i nasahan chuun nuú i ña ná jácuahnu i ndohó tá quiahva cúni mé á. Ta co cúni a ña ná jándihi i saha ndo.

9 Co cúni ña ná cáhan ndo ña jáyihví i ndohó xihin carta chindahá i nu ndo.

10 Ndúu java na ta cáchi na ndacú ndivaha yuhú u cahan i nu carta cáhyí i. Joo tá íin i xihin ndo co náha i ña cúu u da jáyihví ndóhó jáchi tá cásahá cáhan i xihin ndo co náha i ña cúu u da ndítahan coo toní ñuhú ñayivi xihin.

11 Joo na xicá cáhan ña yóho xini ñuhú candaa ini na ña tá quiahva ndacú yuhú i tá cáhan i xihin carta tá íin xicá i quiahva já caja i tá ná xinu coo i tañu ndó jan.

12 Mé a ndaa co sáhan i íinima i jácatáhan i mí i xihin na cája cáhnu mé jan. Joo ndía cáa mé cája na jan tá jácatáhan ndaja táhan mé va na ta xihin ña yóho náha ña tóntó ndivaha cája na.

13 Co cája cáhnu i mí i jáchi co ndítahan nuú i caja i ña. Cáhan cuití va i sahá chuun nasahan Ndióxi nuú i caja i cuénta mé á ta mé á quea nachindahá yehe saa i anda nu ndúu ndó jan.

14 Co cája cáhnu i mí i tá cáhan i sahá chuun nasahan Ndióxi nuú i caja i. Jáchi mé nde cúu nde na nu cuití nasahan nacahan nde tuhun vaha saha Jesucristo nu ndo.

15 Sahá ña cán quea candaa vaha ini ndó ña co cáhan nde sahá chuun najácava sahá inga na. Ta ni co yáha nde cája cáhnu nde mé nde sahá chuun cája nde yóho. Ña cúni

nde quéa ná candeé chága ini ndó Jesucristo nani caja chúun chága nde tañu ndó tá cúni Ndióxi.

16 Ta cúni nde cahan nde tuhun vaha saha Jesús nuú ñayivi, na ndúu xicá chága nuú ñuu Corinto jan. Joo co cúni nde quihvi nuu nde nuú sa nacaja chúun inga na já ná a cája lándá nde sahá chuun nacaja inga na.

17 Ta já cáchi tuhun Ndióxi já: “Ndá na cúni caja lándá, xini ñúhú caja lándá na sahá ña náhnu nacaja Ndióxi xihin ná.”

18 Jáchi co táhán ini Ndióxi xihin na ndiñehe jícó mé joo ndiñehe jícó Ndióxi ñayivi tá táhán ini a xihin ña cája na.

11

Cáhan Pablo saha na co cúu apóstol

1 Xica tahvi i nu ndo ña ná a quéhe ndó cuénta sahá ña cája i tá ná caja i tátuhun in ta tachí. Caja ndó ñamaní xihin i.

2 Ndióxi quéa nacaja ña ná quihvi ndivaha ini i ndohó sahá ña cán quéa co cúni ña ná jándacoo ndó íchi cuénta mé á. Cája i tátuhun cája da cuíñú jáchi nasacu ini i ndiquiahva vii i ndohó ndáha Jesucristo tátuhun cája in dataa ndiquiahva da jahyi jhí da, ña cúu ña tacú ndinuhu nuú da cacuu yí ña.

3 Á co ndicuhun ini ndó ndaja nacaja tiñhá sacuaña tá najándahvi rí ña naní Eva sanahá. Ta viti yíhvi i ña ná jándahvi java ñayivi ndohó tá quiahva najándahvi rí mé ñá. Jáchi viti candeé ini ndó Jesús ta cája cáhnu ndó mé á xihin ndinuhu ini ndó. Joo yíhvi i jándacoo ndó ña jan.

4 Jáchi mé ndó sahan ndó ñamaní ña ná saa ndá ñayivi nacuu va vatí jánaña na ña tuhún saha Jesucristo. Co jánaña na ndohó tá quiahva najánaña mé nde nu ndo jáchi jín va cáhan na saha ínima yí Ndióxi ta jín va cáchi na jácacu Ndióxi ñayivi. Joo nandiquehe vaha ndó na.

5 Ta cáhán ndo ña cúu ná na apóstol, na náhnu ndivaha joo xini vaha i ña co cúu ná na vaha chága a juú ga yehe.

6 Vatí co tiahva i cahan vii i joo ín vaha xini túni i jánaña i tuhun Ndióxi nu ndo. Ta xini vaha ndó ña yóho jáchi cuahá tañu najánaña vaha i tuhun Ndióxi nu ndo.

7 Java tañu cáhán i ña coó nacaja vaha i jáchi coó naquehe e yahvi nu ndo tá nacahan i tuhun Ndióxi xihin ndo. Ta java tañu cáhán i ña coó nacaja vaha i tá najánuu i mí i já ná cuu ndindita jícó ndohó.

8 Mé a ndaa cúu á tátuhun nacandaa joho i jiuñun nuú java na cúu cuénta Jesús ta naquehe e yahvi i nuú na cán ña ná quixi i caja chúun i tañu mé ndo.

9 Ta tá naxini ñúhú i in ñaha tá nasahin tañu ndó jan coó najáquihvi toho i ndohó sahá ña naxini ñúhú i. Jáchi mé na cúu cuénta Jesús, na naquixi Macedonia nasahan na nuú i ña naxini ñúhú i catacu u. Mí i coó naxeen toho i jáquihvi i ndohó. Ta a cája toho i ña viti.

10 Cáhan i ña ndaa xihin ndo jáchi ín Jesucristo xihin i. Ta ni in ñaha a cáji nuu toho nuú i cahan i ña yóho nuú na ndúu estado Acaya.

11 Coto a cáhán ndo ña co quihvi ini i ndohó sahá ña cáhan i quiahva já xihin ndo. Jáchi xini vaha Ndióxi ña quihvi ndivaha ini i ndohó.

12 Joo a jándacoo toho i caja i ña cája i yóho já ná a quiahva i ñamaní nuú na cán ndiñehe jícó na mé ná. Jáchi cáchi na cája chúun na cuénta Ndióxi tá quiahva cája ndehe. Joo co cúu á ña ndaa.

13 Mé a ndaa co cúu toho na jan apóstol cuénta Jesucristo vatí ndája na mé ná tátuhun apóstol. Ta jándahvi na ñayivi tá cáchi na ña cúu ná na apóstol.

14 Joo co ndítahan catóntó yo sahá ña yóho jáchi janda Satanás, mé tiñhá sacuaña ndája rí mé rí tátuhun in tát Ndióxi, ña yehe ndivaha.

15 Ta jari na ndico jata rí cán co yancá toho na ndája na mé ná tátuhun ñayivi cája ña vaha. Joo vaxi quiví ndiquehe na yahvi sahá ñaha nacaja na.

Ndoho ini Pablo saha ña cúu dá apóstol

16 Ta ná cahan tucu u ña yóho xihin ndo: coto a cáhán ndo ña cúu u da nacatachi. Joo tá cáhán ndo ña cúu u da nacatachí i quiahva loho ndó ñamaní nuú i ña ná cahan i xihin ndó tátuhun in da tachí já ná cuu ndiñehe jícó loho i mí i.

17 Tá cáhan lándá i yóho co cúú á tuhun nasahan Ndióxi nuú i. Cáhan i ña tátuhun in da nacatachi cuítí va.

18 Ta sahá ña ndúu cuahá na catóo ndiñehe jícó mé sahá ña cája na ñuyíví yóho sahá ña cán quéa ná caja ri yehe va quiahva já.

19 Mé ndó cáhan ndo cúú ndó ñayivi ndíchí ndivaha jini joo cáji ini ndó taa joh ndó nu cáhan ñayivi tachí cán xihin ndo.

20 Ta ni co sáhní ndo mé ndó tá cája ndúsa na cán xihin ndo caja ndíví ndó nu ná vatí quéhe na ñaha cómi ndo. Ta jándahvi na ndohó ta quéhe núu na ndohó janda cáni na jahnda nuu ndo.

21 Á cáhan ndo ña ndítahan cacahan nuú i sahá ña coo nasahan ndeé toho ini nde caja nde tá quiahva cája na jan xihin ndo.

Joo tá co sáhní na jan mé ná cája lándá na, caja ri yehe va já vatí cáhan i ña yóho tátuhun in da tachí.

22 Ta tá cáhan lándá na jan ña cúú ná na hebreo, mé a ndaa da hebreo cúú ri yehe va. Ta tá cáhan lándá na jan ña cúú ná na Israel, mé a ndaa da Israel cúú ri yehe va. Ta tá cáhan lándá na jan ña naquixi na chichi Abraham, mé a ndaa da naquixi chichi Abraham cúú ri yehe va.

23 Ta tá cáhan lándá na jan ña cúú ná na cája chúun cuéntá Jesucristo, mé a ndaa yehe cúú da cája chúun chága cuéntá mé á. Vatí cáhan i tátuhun in da tachí joo mé a ndaa cuaha chága cája chúun yehe a juú ga na jan. Cuaha chága tañu nachicaan na yehe vecaa a juú ga na jan. Ta cuaha chága tañu nacaja xíxi na xihin yehe a juú ga na jan. Ta cuahá ndivaha tañu sa yáti quivi i a juú ga na jan.

24 Ta uhun tañu najácaxáhan na Israel yehe xihin churú. Ta in tá in táhnda cán najáxinu na churú jatá i oco sahun comi tañu.

25 Ta uní tañu najácaxáhan na yehe xihin vara ta in tañu nacati na nacun na yuu yehe. Ta sa uní tañu nasacoo barco, mé dó cuahan i cán cahá tañuhú. Ta nasánúu i nuú tañuhú in ñuú ta in ndiví.

26 Ta ndóho ndivaha ini i nu xíca nuu i jáchi cuahá tañu ndúcú tani i xihin yuta. Ta janda taa cuihná a íhvi queta nuú i. Ta naxíca iyo i tañu na ñuu i xihin tañu na tóho.

Ta tá ín i ñuu náhnu á ín i yúcu á ín i tañuhú já vaxi tá vaxi tondóho nuú i. Ta janda tañu na cáchi cúú cuéntá Jesús vatí co cúú na naquixi tondóho nuú i.

27 Ta cánaa i cája chúun i janda ndíhíhvi ndivaha i. Ta cuahá tañu co quíji vaha i. Ta cuahá tañu naquixi joco nuú i ta naquixi ña íchi ini i ticuúí ta janda ínima uun i ín i jáchi co ñehe e ña cuxu u. Ta cuahá tañu ndóho ini i sahá ña vixi xíní i jáchi coo jáhma candixi i.

28 Ta vatí ndóho i ña yóho xihin java ga ñaha joo ndícani tá ndícani ini i saha tóco ndihi na cúú cuéntá Jesús, na táca ndijáá veñuhu.

29 Jáchi tá cuítá ini ñayivi já cúú á tátuhun cuítá ri ini yehe va xihin ná. Ta tá ndícava in na nuú cuachi cája inga na já quéa xójo ndivaha ini i xihin na najándicava ñahá cán.

30 Ta tá ín in ñaha ña cuu cahan lándá i saha já ná cahan lándá i sahá ña náha ña coo cuahá ndeé mí i.

31 Ta Ndióxi, tátá Jesucristo, xitoho í, mé a ndítahan caja cáhnu í anda ama cáa quivi xíní vaha ña cáhan i ña ndaa xihin ndo.

32 Jáchi in tañu nasahin i ñuu Damasco ta ndaja coo da cúú gobernador, da nacaja chúun nu rey Aretas nasahnda da chuun ña ná chicaji na yéhe ñuu cán já ná cuu tiin na yehe.

33 Joo java na cúú cuéntá Jesús najánuu na yehe ini in toyicá chí ventana mé corra yuu ndájí ñuu cán já nacuu najácau na yehe.

12

Ña naxini Pablo nacaja Ndióxi

1 Ni in ñaha co ñehe e tá ndiñehe jícó i mí i. Joo já ndítahan nuú i ndicani i nu ndo sahá ña naxini i cuéntá indiví, ña najánaña Ndióxi nuú i ta sahá ña nacachi mé á xihin i coo.

2 Sa ín uxu comí cuia nayaha ña yóho. Najándaa Ndióxi yehe, da cándéé ini i Jesucristo nasahan i indiví uní nu ín mé á. Co xíní yehe á nandaa yiquí cuñu i xihin i á nacandoo a ñuyíví yóho. In túhún Ndióxi xíní.

3 Joo xíní vaha i ña yehe cúú da nasahan cán vatí co xíní i á nandaa yiquí cuñu i á

naçandoo a ñuyíví yóho. Ndióxi cuití va xíni.

⁴ Joo xíni vaha i ña nasahan i nu ndató ndivaha indiví. Ta mé cán naxini joho i tuhun, ña co ndiñehé e ndaja ndicani i ña nuú ñayivi ta ni co sahan Ndióxi ñamani nuú i ndicani i ña nu ná.

⁵ Cuu ndiñehé jícó i mí i sahá ña naxini i yóho joo a cája toho i ña. Vaha chága ná caja lánda i sahá ña coó toho ndée mí i.

⁶ Ta tá ná cacu ini i ndiñehé jícó i mí i já queá a cacuu toho i da tachí jáchi ña ndaa táhyí cacuu tuhun çahan i. Joo co cája toho i ña jáchi cúní ña ná çahán ñayivi ña ndaa cuití va sahá i ta sahá ña naçaja i xihín sahá ña naçahan i.

⁷ Ta sahá ña co cúní Ndióxi ña ná caja cáhnu i mí i sahá ña naxini i sahá ña cán queá naquixi in ña ndóho i. Cúú á tátuhun in íñu sa cáñee nuú yiquí cuñu i xíni i, ña quixi nuú tiñáhá sacuaça cája xíxi rí xihín i já ná a cája cáhnu i mí i.

⁸ Ta sa uní tañu naxica tahví i nu Ndióxi, xitoho í ña ná tavá a ña ndóho i yóho.

⁹ Joo nanducú ñehé mé á tuhun nuú i já naçachi a já: “Sa quiahva cúú mé a quihví ini i yohó jan va jáchi ña cúú cája i xihín ñayivi náha cáxi chága tá co ndée ná”, naçachi Ndióxi. Ña cán queá cájii ini i cúú u in da cámaní ndée já queá náha ña xihín ndée Jesucristo cája i tóco ndihi ñaha.

¹⁰ Sahá ña quihví ini i Jesucristo, cájii tá cájii ini i tá cávitá ini i, á tá cánahá na xihín i, á tá cámaní ñaha nuú i, á tá ndúcú na yehe ña caja xíxi na xihín i. Jáchi tá cávitá ini i já ndíndacú chága i xihín ndée Ndióxi.

Ndicani ini Pablo sahá na cúú cuéntá Jesús ndúu ñuu Corinto

¹¹ Tá quiahva cája da tachí já cája i joo ndóho cúú na naçaja ndúsa xihín i caja i ña. Jáchi mé ndó cúú na ndítahan çahan vaha sahá i, nduu. Joo já coó toho chága sahá na çahán ndó cúú apóstol jan a juú ga yehe vatí mé a ndaa nu Ndióxi coó saha toho i.

¹² Jáchi xihín ña náhnu naçaja i nu ndo jan ta xihín ña xituhún naxini ndó naçaja i jan najánaha i nu ndo ña mé a ndaa táhyí cúú u in apóstol. Coó nandíhi ini i tá naçaja i ña xituhún jan nu ndo.

¹³ Ta tá quiahva naçaja i xihín java ga na cúú cuéntá Jesús quiahva já naçaja ri xihín ndóho va. In tuhún ña coó naçaja i xihín ndó queá coó najáquihvi toho i ndóho sahá ña xíni ñúhú i catacu u tá quiahva naçaja i xihín java ga na cúú cuéntá Jesús. Á çahán ndo ña vaha chága ná caja ndúsa i xihín ndó quiahva ndó nuú i ña xíni ñúhú i.

¹⁴ Ta viti sa íin tiahva i saa i coto nihni i ndóho ña chí uní. Ta ni viti a jáquihvi toho i ndóho jáchi co xíca toho ini i quehe e ña cómí ndo. Ña cúní queá ná quihví ini ndó yehe tá quiahva quihví ini i ndóho. Jáchi mé ndó cúú ndó tátuhun jahyi i sahá ña najánaha i tuhun Ndióxi nu ndo. Ta ndá naçuu na valí co xíto na tátá na joo mé tátá na cúú na xíto mé na valí.

¹⁵ Ta cájii ini i jándihi i tóco ndihi ñaha cómí i já ná chindeé e ndóho. Ta janda ndiquiahva i mí i já ná cacu ndaa ínima ndo. Cája i cuéntá tá quihví chága ini i ndóho já co cúú chága ini ndó xihín i.

¹⁶ Mé a ndaa coó najáquihvi toho i ndóho. Joo ndúu java na tañu ndó ta cáchi na ña naçaja ndúsa i xihín ndo já najándahvi tá najándahvi i ndóho.

¹⁷ Á çahán ndó ña najándahvi i ndóho tá naçindahá i java ñayivi nu ndo jan. A juú a já.

¹⁸ Jáchi naxica tahví i nu Tito ña ná saa da coto nihni da ndóho jan. Ta naçindahá i inga da cúú cuéntá Jesús xihín dá. Á najándahvi da ndóho, vaha. Sa xíni vaha i ña coó najándahvi da ndóho. Ta tá quiahva cája Tito quiahva já cája ri yehe va jáchi in ínima ñehé nde xihín dá.

¹⁹ Á çahán ndo ña sa naçasáhá çahan chíjín tucu nde xihín ndo viti. Co cúú á já. Jáchi sándehe cáxi Ndióxi ña çahan nde ña yóho xihín ndo tá quiahva cúní Jesucristo. Ta cája nde tóco ndihi ña yóho jáchi quihví ini nde ndóho ta cúní nde ña ná cuahnu chága ndó xihín tuhun Ndióxi.

²⁰ Yíhvi i jáchi tá ná saa i coto nihni i ndóho co cúní i ndiñehé e ndóho cája ndó ña núu, ña co cátóo i. Ta sa mé quiahva já yíhvi i ña cuni ndó yehe caja i ña co cátóo ndo. Yíhvi i jáchi tiahva náá caní táhan ndó, á çahihví ini xihín táhan ndó, á cojo ini xihín táhan ndó, á ndacahnda táhan ndó, á

cahan ndó ña tuhún sahá ñani táhan ndó, á candehé ndaa táhan ndó, á ndiñehe jíco ndo mé ndó, á sa jíin sa jíin cája in in ndó.

²¹ Ta yíhví i ña tá ná saa i coto nihni i ndohó jan caja Ndióxi ña ná cacahan nuú i saha tóco ndihi ña cája ndó jan. Ta yíhví i cuacu u sahá cuahá na cája cuachi, na sa janda jihna nacasahá cája cuachi ña a ñaha jándacoo na cája na xihín yiquí cuñu na. Ta cuacu u jáchi a ñaha jándacoo na ña ndúu na xihín na co cúu ñájíhí na á yí ná. Ta ni a ñaha jándacoo na tóco ndihi ña núu, ña xíca ini yiquí cuñu na caja.

13

Jáxinu coo Pablo tuhun cahan da xihín na ñuu Corinto

¹ Ta xihín ña yóho xinu uni táhnda saa i coto nihni i ndohó. Ta xíní ñúhú ndicuhun ini ndó ña sáhnda tuhun Ndióxi chuun nu yo ta cáhí a ña tá ná cahan iví a uni tes-tigo sahá cuachi nacaja in ñayivi anda javí candaa ini ndó ña mé a ndaa íin cuachi na.

² Tá quiahva nacahan i xihín ndo tá naxito nihni i ndohó ña chí iví quiahva já cahan i xihín ndo viti vatí íin xíca i. Ta tá quiahva nacahan i xihín na nacaja cuachi jihna jan quiahva já cahan i xihín ndihi ndó viti. Ta tá ná casaa tucu u coto nihni i ndohó jan já quea a táhnda ga ini i saha ndo sahá cuachi cája ndó.

³ Ta xihín ña yóho candaa ini ndó ña mé a ndaa táhyí cahan i ña sáhnda Jesucristo cahan i. Cúni ña ná candaa ini ndó ña co cahan chíjín toho Jesucristo xihín ndo. Ña cája mé á xihín ndo quea náha nu ndo ña íin ndée mé á cája ña cúni a.

⁴ Mé Jesucristo quea nacata caa na ndica crúxu tátuhun in da co ndée. Joo viti tácu mé á saha ndée Ndióxi. Ta tá quiahva vitá nasahin yiquí cuñu a quiahva já vitá ndúu yó viti. Joo sahá ña in nanduú xihín mé á já cuu catacú xihín ndée a. Ta xihín ña yóho cája chúun nde tañu mé ndó.

⁵ Xíní ñúhú candehé vaha ndó mé ndó á mé a ndaa táhyí cándée cáhnu ini ndó Ndióxi. Xíní ñúhú coto ndojó ndó mé ndó. Ta tá mé a ndaa táhyí cúu ndó cuéntá Jesús xíní ñúhú ndicuhun ini ndó ña ndacaan Jesucristo ini ínimá ndo á tá coo yúhu uun va ndó cúu ndó cuéntá Jesús.

⁶ Ta ndátí i xinu quiví candaa ini ndó ña coo najándahvi nde ndohó.

⁷ Xíca tahví nde nu Ndióxi ña ná a cája ndó ni in ña núu. Ta co cúu á sahá ña cúni nde cahan vaha ñayivi sahá nde, vaha. Ña cúni nde quea ná a jándacoo ndó caja ndó ña vaha vatí ná cahan ñayivi ña coo nacaja vaha nde xihín ña najánaha nde nu ndo.

⁸ Co xíní ñúhú nde janani nde ndohó nani cája ndó ña ndaa joo tá cája ndó ña núu já quea xíní ñúhú janani nde ndohó.

⁹ Ta cájii ini nde tá ndaa nde tá quiahva ndaa na vitá ini tá cúu á sahá ña ndacú ini mé ndó cuéntá Ndióxi. Ta a jándacoo toho nde caca tahví nde nu Ndióxi saha ndo ña ná xinu coo ndó cacuu ndó ñayivi coo cuachi nu mé á.

¹⁰ Jihna ñúhú cáhyí i carta yóho nu ndo já saa i coto nihni tucu u ndohó. Jáchi tá ná saa i jan co cúni cahan ihvi nahá i xihín ndo vatí nasahan Ndióxi chuun yóho nuú i. Ta coo nasahan mé á ña nuú i ña ná jándihi i saha ndo. Nasahan mé á chuun yóho nuú i já ná cuu ndaja ndacú u ndohó cuéntá mé á.

¹¹ Candehé ndo, ñani i, na cúu cuéntá Jesús. Xihín tuhun yóho jáxinu coo i tuhun cahan i xihín ndo. Ná coo Ndióxi xihín ndó. Ta ná ndindacú chága ndó já ná nduu ndó ñayivi ndaa. Ta quiahva tuhun ndée ini táhan ndó. Coo vaha ndó xihín ñani táhan ndó já quea coo Ndióxi xihín ndo. Mé a cán quíhví ini a ndohó ta cúni a ña ná coo vaha ini ndó.

¹² Cahan Ndióxi xihín táhan ndó ta tatí yúhu táhan ndó ta yíi caja ndó ña.

¹³ Tóco ndihi na cúu cuéntá Jesús chindahá na Ndióxi coo ndó.

¹⁴ Ná tahví ini Jesucristo, xitoho í saha ndo jáchi quíhví ini Ndióxi ndohó. Ta ná coo tuun ínimá yíi mé á xihín ndo. Ña yóho quea cúni ña ná caja Ndióxi xihín ndo. Já ná coo.

Carta nachindahá Pablo nuú na cúu cuéntá Jesús ndúu ñundáhyi Galacia

Chindahá Pablo Ndióxi coo na cúu cuéntá Jesús ndúu ñundáhyi Galacia

¹ Yehe cúu Pablo, da cáhyi carta yóho nu ndo. Naçaxi Ndióxi yehe cacuu u in apóstol ta a juú toho ñayivi naçaxi yehe. Ta ni coo nachindahá ñayivi yehe jáchi Jesucristo xihin Ndióxi, tátá yo, mé a najánditacu Jesucristo, mé a cán quea naçaxi a yehe cacuu u in apóstol.

² Yehe xihin tóco ndihi java ga na cúu cuéntá Jesús ndúu xihin i yóho, chindahá nde carta yóho nu ndóho, na ndúu ñundáhyi cuéntá Galacia jan.

³ Ña cuni nde quea ná caja Ndióxi, tátá yo xihin Jesucristo, xitoho í cuahá ñamani xihin ndo ta ná caja mé á ña ná coo vaha ini ndó.

⁴ Xini ñuhú ndicuhun ini ndó ña nandiquiahva Jesucristo mé á quivi a saha cuachi cája í ta xihin ña yóho najáçacu a mí nuú ña núu cája ñayivi ñuyívi. Ta nayaha ña yóho jáchi já cuni Ndióxi, tátá yo.

⁵ Cáhnu ndivaha ná cacuu Ndióxi anda ama cáa quivi. Já ná coo.

Coo ga inga tuhun cahan sahá Jesucristo ña cuu jáçacu a mí

⁶ Mé a ndaa naçatontó ndivaha i jáchi cama chá naçasahá ndo cáxoo ndó nu Ndióxi, mé a naçana ndóho cacuu ndó cuéntá mé á sahá ña quíhvi ini Jesucristo ndóho. Ta viti naçasahá ndo xini joho ndó inga tuhun ña cáchi ñayivi cuu jáçacu a ndóho.

⁷ Mé a ndaa coo toho inga tuhun ña cuu jáçacu a ñayivi. In túhún va cúu tuhun Ndióxi ta cahan sahá Jesucristo. Joo ndúu java ñayivi ta cuni na jájana na jini ndo ta cuni na ndijama na tuhun vaha cahan sahá Jesucristo, mé a jáçacu mí.

⁸ Joo tá vaxi in na ta jánaha na inga tuhun ña cáchi na cuu jáçacu a ndóho ta coo cúu á tuhun vaha ña najánaha nde nu ndó já quea ná cuhun cháhan jata ná ta coo caja toho a

ndá ñayivi cúu ná janda mí i á janda in táto Ndióxi ná quixi indivi.

⁹ Sa naçachi i ña yóho xihin ndó jihna ta viti ndicó coo tucu u cahan i ña xihin ndo: tá jánaha in ñayivi inga tuhun ña cáchi na cuu jáçacu a ndóho ta coo cúu á tuhun najánaha nde nu ndo já quea ná cuhun cháhan jata ná.

¹⁰ Co ndúcú u candoo vaha i nuú ñayivi. Ña cuni quea candoo vaha i nu Ndióxi jáchi tá cuni candoo vaha i nuú ñayivi já cuni cachi a ña coo cúu ga i da cája chúun cuéntá Jesucristo xihin ndinuhu ini i.

Ndicani Pablo ndaja nanduu da apóstol

¹¹ Candehé ndó ñani mí i, na cúu cuéntá Jesús. Mé tuhun naçahan i xihin ndó coo naquixi a jini ñayivi ñuyívi.

¹² Ta coo nandiquehe e ña nuú ñayivi. Ta ni in túhún toho ñayivi coo najánaha na ña nuú i jáchi Jesucristo quea najánaha ña nuú i.

¹³ Cája i cuéntá sa naxini joho ndó sahá ña naçaja i jihna tá nasandico i costumbre na Israel. Jáchi naxojo ndivaha ini i xihin na cúu cuéntá Jesús mé tiempo cán. Ta naçaja xixi ndivaha i xihin ná ta nasacu ini i jándihi i saha ná.

¹⁴ Ta mí i nasacuu u da naçayojó chága cája costumbre na Israel nuú ndihi na ñuu i, na nasahnu xihin i. Jáchi nasativi i xihin ndinuhu ini i costumbre tásahnu jícó nde.

¹⁵ Joo Ndióxi naçaxi a yehe janda tá cámani cacuu u ñuyívi yóho ta sahá ña cuni a caja ñamani xihin i sahá ña cán quea naçana mé á yehe. Ta tá naxinu coo quivi nasacu ini mé á

¹⁶ já najánaha Ndióxi Jesucristo, jahyi a nuú i já ná cuu çaxi tuhun i tuhun vaha saha mé á nuú na coo naquixi chichi Israel. Ta mé tiempo cán coo nasahan i cahan i xihin ni in ñayivi sahá ña najánaha Ndióxi nuú i.

¹⁷ Ta ni coo nasahan i ñuu Jerusalén cahan i xihin na cúu apóstol nu cuítí a juú ga yehe. Ña naçaja i quea ivi laá naquee nasahan i ñundáhyi cuéntá Arabia. Ta tá nandihí nandicó coo i chí ñuu Damasco.

¹⁸ Ta tá sa nayaha uni cuia já nasahan i ñuu Jerusalén ndicuni táhan i xihin Pedro ta nasahin i sahun quivi xihin dá.

19 Ta cán naxini ri da cúu Jacobo, ñani Jesucristo joo coó naxini toho i na java ga cúu apóstol cán.

20 Sándehé cáxi Ndióxi ña co jándahvi toho i ndohó. Ña ndaa quéa cáhyi i nu ndó yóho.

21 Tá nandihí já naquee e cuahan i chí ñundáhyi cuéntá Siria xihin Cilicia.

22 Joo mé tiempo cán na cúu cuéntá Jesús ndúu estado Judea a ñáha cuni na yehe, nduu.

23 Joo naxini johó na ña cáhan java ñayivi sahá i: “Da nacaja xixi xihin yo jihna, da cán cúu da xica nuu cáhan tuhun Ndióxi xihin ñayivi viti. Da nacúni jándihí sahá tuhun Ndióxi jihna, da cán cúu da jánaha ñayivi cándéé ini na mé á”, cáchi na.

24 Ta viti cája cáhnu na Ndióxi sahá ña nandijama mé á yehe.

2

Na apóstol ndiquehe vaha na Pablo.

1 Tá sa nayaha uxu comí cuia já nasahan tucu u ñuu Jerusalén. Nasahan Bernabé xihin i ta nasañehe ri i Tito nasahan da xihin nde.

2 Ta nasahan i jáchi nanaha Ndióxi nuú i ña ndítahan cuxun i. Ta tá nataka jiin ndihí na náhnu, na cómi cuéntá sahá na cúu cuéntá Jesús ñuu Jerusalén cán, já nacasáhá i ndícáni i nu ná ndaja cáa tuhun vaha saha Jesús ña jánaha i nuú na coó naquixi chichi Israel. Nacaja i ña yóho jáchi coó nacúni ña ná cachi na náhnu cán ña coó saha toho ña jánaha i.

3 Ta nandiquehe vaha na ndehe ta ni coó nacaja ndúsa na xihin Tito, da nasahin xihin i ña ná chicaan da marca yiquí cuñu da vatí co cúu dá da naquixi chichi Israel.

4 Joo java na, na co xica ndaa íchi cuéntá Jesús, nandihvi jehé na tañu nde ña ná candehé na ndá quiahva núná nuú nde cája cáhnu nde Ndióxi sahá ña cándéé ini nde Jesús. Jáchi nanducú na cája ndúsa na xihin nde ña ná ndicó coo nde caja nde tóco ndihí ña sáhdá ley Moisés.

5 Joo coó nacandúsa toho nde tuhun cáhan na xihin nde jáchi cúni nde cándaa ini ndó ña ndaa cáhan saha Jesucristo, ña cuu jácacu ndaa ínimá ndó tá ná candéé ini ndó mé á.

6 Joo mé na náhnu, na cómi cuéntá sahá na cúu cuéntá Jesús cán coó nacachi na xihin i ña ná ndijama i ña jánaha i nuú ñayivi. Cáchi i ña cúu ná na náhnu vatí co cája toho a nuú i ndá quiahva náhnu chuun ndójo na jáchi in cúu tóco ndihí nu Ndióxi.

7 Táhán ini na náhnu cán xihin ña cája i jáchi nandicuni na ña mé Ndióxi quéa nasahan chuun yóho nuú i ña caca nuu i cahan i tuhun vaha sahá Jesús nuú na coó naquixi chichi Israel. Ta sa mé Ndióxi quéa nasahan chuun nu Pedro ña ná cuxun da cahan da tuhun vaha sahá Jesús nuú na naquixi chichi Israel.

8 Ta sa mé Ndióxi, mé a nachindahá Pedro cahan da tuhun mé á nuú na naquixi chichi Israel, mé a yóho cúu ri ña nachindahá yehe cahan i tuhun mé á nuú na coó naquixi chichi Israel.

9 Jacobo xihin Pedro xihin Juan cúu ná na náhnu cómi cuéntá sahá na cúu cuéntá Jesús ñuu Jerusalén cán. Ta nandicuni na cán ña nacaja Ndióxi cuahá ñamaní xihin i tá nasahan mé á chuun yóho nuú i. Sahá ña cán quéa natiin na ndahá yehe xihin ndáha Bernabé ta xihin ña yóho náha ña in cúu nde cája chúun nde xihin tuhun Ndióxi. Ña cája na cán quéa cája chúun na xihin na naquixi chichi Israel nani ndehe cája chúun nde xihin na coó naquixi chichi Israel.

10 Ta in túhún ñamaní naxica na nuú nde caja nde quéa ña ná a ndíndójo nde chindeé nde na ndahví. Ta ña yóho cúu ndusa ña ndíhi ini i cája i.

Pablo jánani da Pedro ñuu Antioquía

11 Joo tá nandique táhan i xihin Pedro ñuu Antioquía já nu táhyí da najánani i da jáchi coó nacaja vaha da.

12 Ña nacaja da quéa naxixi da xihin na coó naquixi chichi Israel tá cámaní xinu coo java na Israel, na nachindahá Jacobo. Joo tá naxinu coo na Israel cán já nacasáhá tává jiin Pedro mé dá nuú na coó naquixi chichi Israel ta ni co xixi ga da xihin ná. Jáchi nayihví da ndia cachi na Israel, na jánaha ña co ndítahan cuxu na xihin na co cúu na Israel.

13 Ta xihin ña yóho nachijehé Pedro ña cáhvi ini da sahá na cán. Ta java na cúu cuéntá Jesús, na naquixi chichi Israel cán

naçasáhá cája na tá quiahva cája Pedro. Ta janda Bernabé naca ja da tá quiahva cája na cán.

¹⁴ Anda já naxini i ña co xíca na íchi cuéntá ña ndaa xihín ndinuhu ini na tá quiahva sáhdá tuhun Ndióxi cája na sahá ña cán quea najánani i Pedro nu táhyí tóco ndihi ñayivi ndúu cán. Já nacachi i já xihin dá: “Yóhó cúun da Israel joo naçasáhá cájún tá quiahva cája na coó naquixi chichi Israel jáchi co cájún ña sáhdá ley Moisés viti. Sahá ña cán quea co ndítahan nuún caja ndúsa tohún xihín na coó naquixi chichi Israel ña ná caja na ña sáhdá ley Moisés”, nacachi i xihin dá.

Jácaacu Ndióxi ñayivi sahá ña cándéé ini na mé á

¹⁵ Janda quivi nacacú cúu yó na Israel ta co cúu yó tátuhun na toho, na cáchi yo cája cuachi sahá ña co cája na ña sáhdá ley Moisés.

¹⁶ Joo sa cándaa vaha ini ña co ndúu ndaa ñayivi nu Ndióxi sahá ña cája na ña sáhdá ley Moisés. Jáchi nduu ndaa na nu Ndióxi sahá ña cándéé ini na Jesucristo cuití va. Ta sa saha mé ña cán nacandéé ini Jesucristo já nanduu ndaa yó nu Ndióxi ta co cúu á sahá ña cája í ña sáhdá ley Moisés jáchi ni in na a cuú nduu ndaa na nu Ndióxi sahá ña cája na ña sáhdá ley Moisés.

¹⁷ Cándehé ndo. Sahá ña cúni yo canduu ndaa yo nu Ndióxi sahá ña cándéé ini Jesucristo cuití va sahá ña cán quea co cája ga í ña sáhdá ley Moisés. Joo cáchi java ñayivi ña ndójo í cuachí sahá ña co cája í ña cáchi mé ley. Vatí co cája í ña cáchi ley Moisés, co cúni cachi ña yóho ña jácahan Jesucristo mí caja í cuachi. Ña yóho co cúu á ña ndaa jáchi co jácahan Jesucristo mí caja í cuachi.

¹⁸ Joo mé a ndaa caja í cuachi tá ná casáhá tucu candéé ini ley Moisés ña ná jácaacu a mí jáchi sa najándacoo í ña tá nacandéé ini Jesucristo.

¹⁹ Ta viti cúu á tátuhun naxihi yehe cuéntá ley jáchi co cómi ga ley cuéntá sahá i jáchi sahá ña cándéé ini i Jesucristo sahá ña cán jácaacu Ndióxi yehe ña ná catacu u cuéntá mé á.

²⁰ Cúu á tátuhun naxihi i ndica crúxu xihín Jesucristo tá naxihi a. Sahá ña cán quea co cája i tá quiahva cúni mé vi jáchi

Jesucristo quea ndicaan ini i ta mé a cán quea ndaca yehe. Ta viti tóco ndihi ña cája i ñuyiví yóho cája i ña jáchi cándéé ini i Jesucristo, jahyi Ndióxi, mé á naxihi ndica crúxu sahá i sahá ña quihvi ini a yehe.

²¹ Ta co cúni quehe núu i ñamaní cája Ndióxi xihín i jáchi tá ná cuu nduu ndaa yo nu Ndióxi sahá ña cája í ña sáhdá ley Moisés já quea mé a uun va quea naxihi Jesucristo, nduu.

3

Vaha chága candéé ini Jesús a juú ga cándéé ini ña sáhdá ley Moisés

¹ Á jána va jiní ndó, na ndúu ñundáhyi Galacia. Yo já najándahvi ndohó ña ná jándacoo ndó ña ndaa. Jáchi tá nacahan nde tuhun Ndióxi xihin ndo já nandicani cáxi nde nu ndo ndá quiahva naxihi Jesucristo sahá cuachi.

² Cuni johó ndó ná ndaca tuhún i ndohó: Á nandihvi ínimá yii Ndióxi ini ínimá ndo sahá ña naca ja ndó ña sáhdá ley Moisés. Co cúu toho a já. Nasacuu a sahá ña nacandúsa ndó tuhun vaha sahá Jesucristo ña nacahan nde xihin ndo.

³ Mé a ndaa táhyí cúu ndó na najana jiní. Jáchi tá naçasáhá ndó xíca ndó íchi cuéntá Jesús já nasandaca ínimá yii Ndióxi ndohó. Ta viti cúni ndó ndicó coo ndó caja ndó ña sáhdá ley Moisés jáchi cáhan ndo ña cuu xinu coo ndó cacuu ndó ñayivi ndaa nu Ndióxi sahá ña cája ndó. Joo a cuú toho a.

⁴ Xíní ñúhú ndicuhun ini ndo ndá quiahva nandoho nahá ini ndó sahá tuhun Ndióxi. Á mé a uun va nasacuu ña nandoho ndó jan. Cája i cuéntá uhun.

⁵ Jáchi sáhan Ndióxi ínimá yii mé a nu ndó ta cuahá ndivaha ña náhnu cája mé á tañu ndó ta co cúu á sahá ña cája ndó ña sáhdá ley Moisés. Cúu á sahá ña cándéé ini ndó mé á.

⁶ Cáchi tuhun Ndióxi ña nanduu Abraham taa ndaa nu mé á sahá ña nacandéé ini da Ndióxi.

⁷ Sahá ña cán quea ndítahan cándaa ini ndó ña ndá na cándéé ini Ndióxi, mé na cán cúu ndusa na tátuhun na naquixi chichi Abraham.

8 Jáchí sa janda jihna nacachi tuhun Ndióxi ña vaxi quivi casahá Ndióxi jácau a ñayivi, na coo naquixi chichi Israel tá ná candeé ini na mé á. Ña cán quéa nacahan Ndióxi tuhun vaha yóho xihín Abraham já nacachi a já: “Saha mún tandaa tiempo caja cuahá i ñamaní xihín ñayivi canduu ndijáá ñuyiví”, cáchi a.

9 Sahá ña cán quéa tá quiahva nacaja Ndióxi cuahá ñamaní xihín Abraham quiahva já cája ri a xihín tóco ndihi ñayivi tá candeé ini na mé á tá quiahva nacaja Abraham.

10 Joo ndá ñayivi ndúcú nduu ndaa nu Ndióxi sahá ña cája na ña cáchi ley Moisés já quéa cuahan cháhan jata ná. Jáchí cáchi tuhun Ndióxi já: “Cháhan va cuahan jata tóco ndihi na coo xinu coo cája tóco ndihi cuí ña cáchi ley ña nacahyí Moisés.”

11 Ta cáxi táhyí cahan ña yóho xihín yo ña a cuú nduu ndaa ñayivi nu Ndióxi sahá ña sácú vaha na ley Moisés. Já cáchi tuhun Ndióxi já: “Ndá na cuú ñayivi ndaa nu Ndióxi catacu na sahá ña candeé ini na mé á”, cáchi a.

12 Joo jín va cáchi ley Moisés jáchí cáchi a ña tá cúní na nduu ndaa na nu Ndióxi saha ley Moisés xini ñuhú caja na tóco ndihi cuí ña cáchi mé ley. Ta coo cahan mé ley sahá ña candeé ini na Ndióxi.

13 Joo najácau Jesucristo mí já ná a xinu coo cháhan jata yo caja ley. Jáchí naquixi cháhan jata mé á saha mí tá naxihí a ndica crúxu. Jáchí cáchi tuhun Ndióxi: “Cháhan cuahan jata ndihi na xihí ndica crúxu.”

14 Ta sahá ña nacaja Jesucristo tá naxihí a ndica crúxu sahá ña cán quéa tóco ndihí vatí cuú yó na Israel á na coo cuú na Israel, ñehe táhvi yo ñamaní Ndióxi tá candeé iní mé á. Jáchí já nasahan Ndióxi tuhun a nu Abraham jihna. Ta viti quiahva mé á ínimá yíi á nu yo tá candeé iní mé á jáchí já nasahan Ndióxi tuhun a nu yo.

Ña cáchi ley Moisés xihín ña cáchi tuhun nasahan Ndióxi nuú Abraham

15 Ñani mí i, na cuú cuéntá Jesús, candehe ndo ná cahan i xihín ndo ndá quiahva cája ñayivi tá sahan na tuhun na nuú inga ñayivi. Tá cávaha na in tutu ta tá nandihí nacahyi na quivi ná nu á já quéa ni in túhún

toho ñayivi a cuú ndijama na ña sa nacahyi cán ta a cuú chicaan chága na tuhun nuú mé tutu.

16 Candehe ndo. Nasahan Ndióxi tuhun a nuú Abraham ta nuú in da quixi chichi da. Joo coo nacahan Ndióxi sahá cuahá ñayivi quixi chichi da. Nacahan Ndióxi sahá in talaá jahyi da ta mé a cán cuú á Jesucristo.

17 Ña cúní cachi i quéa: Nasahan Ndióxi tuhun a nuú Abraham ta nasacuu a tátuhun nacahyi Ndióxi quivi á nuú in tutu. Sahá ña cán quéa a cuú jándihí ley Moisés sahá tuhun nasahan Ndióxi nuú Abraham. Jáchí jihna ñuhú nasahan Ndióxi tuhun a nuú Abraham ta tá sa nayaha comí ciento oco uxu cuia já nasahan Ndióxi ley nuú Moisés. Ta mé ley yóho a cuú toho ndijama tuhun nasahan Ndióxi nuú Abraham. Ta mé ley a cuú ndaja núu a tuhun nasahan Ndióxi nu dá jihna.

18 Joo ña sahan Ndióxi nuú ñayivi coo quixi a sahá ña sácú vaha na ley Moisés. Jáchí tá ná quixi a quiahva já coo cuú ga sahá ña nasahan Ndióxi tuhun a ña caja mé á ña. Ña nayaha quéa nacacúní Ndióxi caja ñamaní uun xihín Abraham ta coo nasacuu a sahá ña nasacu vaha da ley Moisés.

19 Ta viti, á ndaca tuhún ndó ndá saha nasahan Ndióxi ley nuú Moisés. Nasahan Ndióxi ña jáchí cúní a ña ná candaá ini ñayivi ndá quiahva sáá ini na caja na ña cúní Ndióxi. Ta nasacu ini a candoo ley janda quiahva ná xinu coo mé a quixi chichi Abraham cán. Jáchí mé a cán quéa nasahan Ndióxi tuhun a quixi. Ta táto Ndióxi quéa nacahan ley yóho xihín Moisés ta najayaha da ña nuú ñayivi.

20 Joo tá nasahan Ndióxi tuhun a nuú Abraham coo naxini ñuhú toho a ñayivi jáyaha na ña. Ta coo nacaja chúun a táto mé á jáchí in túhún Ndióxi nacaja mé á ña.

Ña cúní ley caja i

21 Jihna ñuhú nasahan Ndióxi tuhun a nuú Abraham anda jávi nasahan ley nuú Moisés. Á cúní cachi ña yóho ña coo ndique táhan ley Moisés xihín tuhun nasahan Ndióxi nuú Abraham. Coo cuú a já. Jáchí tá ná cuu jácau ley Moisés ñayivi já quéa cuu nduu ndaa na nu Ndióxi sahá ña sácú vaha na ña sahdá mé ley. Joo coo cuú a já.

22 Jáchí cáchí tuhun Ndióxi ña mé cuachi cándíhi a tóco ndihi ñayivi. Joo tá ná candee ini Jesucristo já cuu ndiquehé ña ñasahan Ndióxi tuhun a quiahva nu tóco ndihi ñayivi sahá ña cándee ini na mé á.

23 Tá cámani quixi Jesucristo já ñasacomí ley cuénta saha yo ta ñasandaca mí janda quiahva ñaxinu quivi ñanaha Ndióxi nu yo ña ndítahan candee ini Jesucristo.

24 Ñasandaca ley mí tá quiahva cája in dataa xihín jahyi válí da anda quiahva ña quixi Jesucristo, mé á ñacaja ña ná canduu ndaa yo nu Ndióxi sahá ña cándee ini mé á.

25 Ta viti co cómi ga ley cuénta saha yo jáchí cómi Jesucristo cuénta saha yo tá cándusa í mé á.

26 Ta in ñandu ndó xihín Jesucristo sahá ña cándee ini ndó mé á ta já ñandu ndó jahyi Ndióxi.

27 Ta tá ñacandúta ndo já in ñandu ndó xihín Jesucristo ta ñandu ndó tá quiahva in mé á.

28 Ta co cája toho a tá cúu ndó ña ña quixi chichi Israel, á co cúu toho ndó ña. Ta co cája toho a á cúu ndó ña ñaxeen ñayivi cajúun nu ná, á co cúu toho ndó ña. Ta co cája toho a á cúu ndó ña á ñaha. Jáchí tá ñacandúsa ndó Jesucristo já in ñandu tóco ndihi ndó jáchí in ñandu ndó xihín mé á.

29 Ta sahá ña cómi Jesucristo cuénta saha ndo sahá ña cán quea cúu ndó tátuhun ña ña quixi chichi Abraham. Ta sahá ña cán quea ñehe táhvi ndó ña ñacachi Ndióxi quiahva nuú da cán tá ñasahan tuhun a nuú Abraham sanahá.

4

1 Ña cúní cáchí i cúu ña yóho: Cúu á tátuhun tá sahan in dataa tóco ndihi ña cómi da nuú jahyi da. Joo nani cúu dá ña loho já a cuú cacomí da cuénta sahá ña ñandiquehe da ndaha tátá da. Cúu dá tátuhun mozo vatí tandaa quivi cacomí da cuénta saha tóco ndihi ñaha tátá da.

2 Jáchí ndúu java ñayivi, ña cómi tóo cuénta saha mé dá ta saha tóco ndihi ña ñajándacoo tátá da nu dá janda quiahva ná xinu coo quivi ñasacu ini tátá da.

3 Quiahva já yáha ri xihín mé ví. Jáchí jihna ñasacuú tátuhun ñavalí. Ñasacomí ley ña Israel cuénta saha yo tátuhun cája xitoho xihín mozo da.

4 Joo tá ñaxinu coo quivi ñasacu ini Ndióxi já ñachindahá mé á Jesucristo, jahyi a. Ta in ñañaha ñuyivi yóho ñasacuu ña ñajácacu ñaha. Ta ñacaja mé á ña sáhdá ley Moisés.

5 Ta ñaxihi a ndica crúxu já ná cuu chahvi a saha cuachi ña ná janí yó nu ley ña ñasacomí cuénta saha yo. Ta xihín ña yóho ñacuu ñanduú jahyi Ndióxi.

6 Ta sahá ña ñanduú jahyi mé á sahá ña cán quea ñachindahá Ndióxi ínima jahyi a ña ná ndicaan mé á ini ínima yo já quea ná cuu çahan yó xihín Ndióxi já cachi yó já: “Tátá maní i.”

7 Ta viti co cúu ga yó tátuhun mozo jáchí co cómi ga ley cuénta saha yo ta ñanduú jahyi Ndióxi viti. Ta viti cuu ñehe táhvi yó quehé ña ñasacu ini mé á quiahva nuú ña cúu cuénta mé á sahá ña ñacaja Jesucristo.

Ndícani ini Pablo sahá ña cúu cuénta Jesús ñundáhyi Galacia

8 Jihna ga tá coo ñacandaa ini ndó saha Ndióxi já ñacaja cáhnu ndó java ga ndióxi ña co cúu toho ndióxi joo ñasacomí a cuénta saha ndo.

9 Ta viti sa xini ndó Ndióxi joo vaha chága ná cachi i ña sa xini Ndióxi ndohó. Ta ndivaha cúní ndó ndicó coo tucu ndó cajú ndó tá quiahva ñacaja ndó jihna. Jáchí co ndiyahvi toho ña ñacaja ndó cán ta ni a cuú chindee a ndohó.

10 Joo cája tucu ndó víco ta xihín ña yóho cája cáhnu ndó java quivi xihín yo xihín cuia.

11 Ndícani ndivaha ini i saha ña cája ndó jan. Jáchí viti co cándaa ini i á mé a uun va ñasacuu chuun ñacaja i tañu ndó jan.

12 Candehé ndó, ñani mí i, ña cúu cuénta Jesús. Xíca táhvi i nu ndo ña ná cajú ndó tá quiahva cája i viti. Jáchí ñajándacoo i cája i ña sáhdá ley tá ñandihvi i íchí cuénta Jesús. Vaha ndivaha ñacaja ndó xihín i tá ñasahin i xihín ndó jan.

13 Ta cája i cuénta ndícuñun ini ndó ña quíhvi ndivaha i tá nu cuítí ñasahan i caxi

tuhun i tuhun vaha sahá Jesús tañu ndó jan.

14 Ta sahá cuehe nandoho i nacuu candají ndó yehe, nduu. Joo coo nacaja ndó ña. Ña nacaja ndó quea nandiquehe vaha ndó yehe ta nacaja ndó xihín i tá quiahva ná caja ndó xihín in tát Ndióxi á xihín Jesucristo.

15 Ta nacajii ndivaha ini ndó mé tiempo cán. Jáchí xini vaha i ña nasahii tiahva ndó tavá ndó nduchú nuú ndo quiahva ndó ña nuú i, nduu tá ná cuu caja ña ná ndivaha i.

16 Joo viti nanduu u tátuhun in da ihvi ndo sahá ña cáhan i ña ndaa sahá Jesucristo xihín ndo.

17 Ndúu java ñayivi tañu ndó jan ta co jánaha na ña ndaa nu ndo. Cája cuaha ná ñamani xihín ndo joo a juú ña vaha quea cuni na xihín ndo. Ña cuni na quea ná jácaxoo táhan í ta ná ndihi ini ndó saha ña jánaha mé ná.

18 Co cuni cachi i ña a váha toho ndihi ini sahá ñayivi. Vaha va ná caja í ña nú tiempo ta xihín ndinuhu ini. Joo ñayivi jan ndihi ini na saha ndó tá ín yehe tañu ndó cuití va.

19 Candehé ndó, jahyi a. Nacasáhá ndihihvi tucu ini i saha ndo. Tá quiahva ndihihvi in ñañáha tá sáhdá a tixi ña cácu jahyi ña quiahva já ndihihvi ini i saha ndo. Ta ndoho tá ndoho chága ini i saha ndo janda quiahva ná caja ndó ña cuni Jesucristo.

20 Viti ñuhú cuu ini i coo i jan já ná cuu cahan vaha chága i xihín ndo jáchí janda nu ín i yóho ndícani ndivaha ini i saha ndo.

Ña nacaja Agar xihín ña nacaja Sara sanahá

21 Candehé ndo. Mé ndó, na cuni ndiquiahva tucu ndáha ley Moisés, xini ñuhú candehé vaha ndó ña cáhí mé ley cán.

22 Cáhí a ña nacacu ivi jahyi taa Abraham. In jahyi da nacacu xihín Agar, ña cúu mozo ñájíhí da ta inga jahyi da nacacu xihín Sara, ña cúu ñájíhí vaha da.

23 Tá nacacu jahyi taa Abraham xihín Agar cán, nacacu a tá quiahva cácu tóco ndihi ñayivi. Joo jahyi taa da, da nacacu xihín ñájíhí vaha da, ña naní Sara cán

nacacu a jáchí nasahan Ndióxi tuhun a nu dá ña ná cacu a.

24 Candehé ndo ña náha ña yóho nu yo. Ndívi najihí yóho cúu ná tátuhun ivi tuhun nasahan Ndióxi nu yo. In táhan tuhun yóho cúu á ley nasahan Ndióxi nuú Moisés jini yucu naní Sinaí cán. Ta Agar cúu yuhú nuú ley yóho. Ta jahyi ña cán tá nacacu a nanduu a mozo. Ta na ndíco ley cúu ná tátuhun jahyi Agar jáchí cómí ley cuénta saha ná.

25 Ta Agar cúu ña yuhú nuú ley ña nasahan Ndióxi nuú Moisés yucu naní Sinaí, ña ndacaan chí ñundáhyi Arabia cán. Ta jari mé ña cúu ña yuhú nuú Jerusalén, ña cúu jini nu tóco ndihi na cája ña sáhdá ley Moisés. Ta mé ña xihín na ndúu cán cúu ná tátuhun mozo jáchí cómí ley cuénta saha ná.

26 Joo ín inga ñuu Jerusalén, ña ín indivi cán. Ta ñayivi ndúu cán co cúu toho na mozo jáchí cúu ná tátuhun jahyi Sara, ñájíhí vaha Abraham. Ta mí cúu yó tátuhun na ndúu ñuu cán jáchí cádeé ini Jesucristo.

27 Já cáhí tuhun Ndióxi já: Xini ñuhú cajii ini ndó najihí, na a cuú cacu jahyi.

Cayuhú ndó xihín ña cajii ini ndo, vatí a náha cahnda tixi ndó cacu jahyi ndó. Jáchí najihí, na najándacoo tóo yí canduu chága jahyi na a juú ga najihí ndúu yí, cáhí tuhun Ndióxi.

28 Candehé ndo, ñani i, na cúu cuénta Jesús. Cúu yó tátuhun Isaac, jahyi Sara cán sahá ña cádeé ini Jesús jáchí cúu yó jahyi nasahan Ndióxi tuhun a quiahva nuú Abraham.

29 Joo tá quiahva nacaja da cúu jahyi Agar sanahá tá nacasáha da cája xíxi da xihín da cúu jahyi Sara quiahva já ín a viti jáchí na sácú vaha ley Moisés cája xíxi na xihín na cádeé ini Jesucristo.

30 Joo cuni johó ndó ña cáhí tuhun Ndióxi tá nacahan Ndióxi xihín Abraham: “Tavá ña cúu mozo jan ná quee ña cuhun ña xihín jahyi ña. Jáchí da cúu jahyi mozo jan a cúu ñehe táhvi dá ndiquehe da ña quiahva i nuú da cúu jahyi ñájíhí vahún jan”, nacachi Ndióxi sanahá.

31 Candehé ndó, ñani i, na cúu cuénta Jesús. Co cúu yó tátuhun jahyi ña cúu

mozo jan jáchi co cómi ga ley cuénta saha yo. Viti cúu yó tátuhun jahyi Sara, ña cúu ñájíhi vaha Abraham cán jáchi co ndúu ga yó ndáha ley Moisés saha ña cándéé iní Jesucristo.

5

Sa najani yo ndáha ley Moisés nacaja Jesucristo

¹ Co ndúu ga yó ndáha ley Moisés saha ña nacaja Jesucristo. Ta viti cándéé ini ndó mé á saha ña cán quéa xini ñuhú canduu ndacu ndo ta co ndítahan nu ndó ndicó coo ndó caja ndó ña sáhdá mé ley cán.

² Cuni johó ndó ña cahan i xihin ndo. Tá ná cándéé ini ndó ña cuu nduu ndaa ndó nu Ndióxi saha ña chicaan na marca yiquí cuñu ndó já quéa cuni cachi a ña quéhe nú ndó ña nacaja Jesucristo tá naxihi a ndica crúxu saha ndo.

³ Candehé ndó ná cahan tucu u xihin ndo. Tá cuni ndó canduu ndaa ndó nu Ndióxi saha ña chicaan ndó marca yiquí cuñu ndó já quéa ndítahan nu ndó caja ndó tóco ndihi cuí ña sáhdá ley Moisés.

⁴ Mé ndó cúu ndó na cuni canduu ndaa nu Ndióxi saha ña sácú vaha ndó ley Moisés. Ta viti nacaxoo ndó nu Jesucristo ta nacaxoo ndó nu ñamani cuni Ndióxi caja xihin ndo.

⁵ Joo mé nde xini vaha nde ndúu ndaa nde nu Ndióxi saha ña cándéé ini nde Jesucristo. Ta ndáti tiahva nde jáchi chindeé ínimá yíi Ndióxi ndehe.

⁶ Jáchi tá in nanduú xihin Jesucristo já quéa coo caja toho a á naquihvi marca yiquí cuñu í á coo a. Ña ndiyahvi ndusa quéa ña cándéé iní Jesucristo jáchi xihin ña yóho cuu quihvi iní ñani táhan í.

⁷ Sa vaha ndivaha va cuahan ndó xihin ña cándéé ini ndó Jesús. Yo já nandijama jini ndo ña ná a cándusa ga ndó ña ndaa.

⁸ A juú toho Ndióxi nandijama jini ndo jáchi mé a cán quéa nacana ndohó ña ná cacuu ndó cuénta mé á.

⁹ Xini ñuhú ndicuhun ini ndó in tuhun ta já cáchi a “Vatí loho yusá naxaa ná cava táhan í xihin yusá cuaha cán jatívi ñahá a.” Quiahva já cája na cuni ndijama jini ndó jan.

¹⁰ Joo cándéé ini i Jesucristo, xitoho í saha ña cán quéa xini vaha i ña a cándusa ndó na jan ta ndicó coo ndó cahvi ini ndó tá quiahva cáhvi ini yehe. Ta jándoho Ndióxi ini na xica jájaca xini túni ndó jan ta coo caja toho a ndá na cúu ná.

¹¹ Joo yehe jánaha i nuú na cúu cuénta Jesús ña co ndítahan ga chicaan na marca yiquí cuñu na ta saha ña cán quéa ndicuita na Israel xihin i. Tá ná jánaha i nuú ñayivi ña ndítahan chicaan na marca yiquí cuñu na já quéa a ndicuita ga na cán xihin i. Joo mé a ndaa cándají na cán yehe jáchi jánaha i nuú ñayivi ña cuu cacu ndaa ínimá ná saha ña cándéé ini na Jesucristo cuití va, mé a naxihi ndica crúxu saha yo.

¹² Saha ña cuni na cán caja ndusa na xihin ndó chicaan ndó marca yiquí cuñu ndó saha ña cán quéa cája i cuénta vaha chága ná chituhun ndihi mé ná yiquí cuñu na ta ná jándacoo táji ná ndohó.

¹³ Candehé ndó, ñani i. Co ndúu ga ndó ndáha ley Moisés nacaja Jesucristo. Joo co cuni cachi ña yóho ña najani ndo já ná cuu caja ndó ndá ña núu ña xica ini yiquí cuñu ndó caja. Jáchi nacana Ndióxi ndohó ña ná quihvi ini táhan ndó ta ná chindeé táhan ndó.

¹⁴ Joo tóco ndihi ña cúu ley Moisés in cáchi ndihi a tá cáchi a já: “Quihvi inún ñani táhún tá quiahva quihvi inún mún.”

¹⁵ Joo cuénta coo ndó jáchi tá cásahá ndo cája xixi xihin táhan ndó ta cája quini xihin táhan ndó já quéa xinu quivi jándihi saha táhan ndó.

Ña cuni ínimá yíi Ndióxi caja í xihin ña cuni yiquí cuñu í caja í

¹⁶ Candehé ndo, ñani i. Ndítahan caja ndó ña cuni ínimá yíi Ndióxi ta co ndítahan caja ndó ña xica ini yiquí cuñu ndó caja.

¹⁷ Jáchi tóco ndihi ña núu ña cuni yiquí cuñu yó caja í cáni táhan xihin ña vaha ña cuni ínimá yíi Ndióxi caja í. Ta a cuú cuni táhan ínimá yíi Ndióxi xihin ña núu jáchi co ndíque táhan vaha ña núu xihin ña vaha saha ña cán quéa a cuú caja í ndá ña nacuu cuni yó caja í.

¹⁸ Ta tá ná ndiquiahva ndó mé ndó ña ná candaca ínimá yíi Ndióxi ndohó já quéa a cácomí ga ley Moisés cuénta saha ndo.

19 Ta cō yáncá toho ndícuní ndá na cúu na cája ña núu ña cúní mé ná caja na. Jáchi ña cája na cúu ña yóho: ndúu na xihín na cō cúu ñájíhí na á yíí ná ta cája na tá nuú ña núu xihín yiquí cuñu na. Ta ndícají ini na cuju na xihín ñáha á ña.

20 Cája cáhnu na yoco xihín tiniñu yúu ta cája na ña tají. Ta cándají táhan na. Ta cáni táhan na ta ndácaan ña cuiñú jini ná. Ta cama chá jáa xihín táhan na. Ta cáhvi ini na saha mé cuití va na. Ta cátóo na jácani táhan na ñayivi já ná canduu jín na. Ta xihín ña yóho sáhdá táhan na ñayivi.

21 Cúu ná ñayivi ihvi ini ta cúu ná na sáhní ndíi ta cúu ná na xíhi. Ta a juú quiahva ndehé na ta cuahá ndivaha java ga táhan ña yóho cája na. Joo mé ndó cuni johó ndó ná cahan tucu u ña sa nacachi i jihna xihín ndo: Ndá na cája já a ñehé táhvi toho na cacomí Ndióxi cuéntá saha ná.

22 Joo tá ndícaan ínimá yíi Ndióxi ini já queá cája mé á ña ná quihvi ini táhan í ta cája ña ná cají ini ta cája ña ná coo vaha ini ta cája ña ná a cójo cama ini ta cája ña ná chindeé yó ñayivi ta cája ña ná cacuu ñayivi vaha ini ta cája ínimá yíi Ndióxi yóho ña ná cacuu ñayivi, na cō cáhvi ivi johó ini.

23 Ta cája ña ná cacuu ñayivi, na cō ndíñehe jícó mé, na cúu sáhnú mé. Ta ni in túhún toho ley a cuú chícāan cuachi jatá ñayivi tá sácú vaha na tóco ndíhi ña cáhí túhun yóho.

24 Tóco ndíhi na cómí Jesucristo cuéntá saha, sa najándacoo na ña núu nasacahvi ini na caja na xihín yiquí cuñu na. Ta cúu ná tátuhun na sa naxihí nuú cuachi nasacaja na.

25 Cō cája ga yó cuachi nacaja í jihna sahá ña ndácaan ínimá yíi Ndióxi ini. Ta xíní ñúhú quiahva í ñamaní nu mé á ña ná candaca a mí nuú ndíhi ña caja í.

26 Ta cō ndítahan ndíñehe jícó yo mí ta ni cō ndítahan jácani táhan í ñayivi ta ni cō ndítahan cahihvi ini xihín táhan í.

6

Ndítahan nuú na cúu cuéntá Jesús chindeé táhan na

1 Candehé ndó, ñani í. Tá naxini ndó nandicava in na cúu cuéntá Jesús nuú cuachi já queá ndítahan nu ndóhó, na

nachutú ndaa ínimá xihín ínimá yíi Ndióxi, chindeé ndó na já ná ndicaca vaha na íchi cuéntá Jesús. Joo víí víí cahan ndó xihín ná jáchi ndítahan cahvi ini ndó ña vaxi quiví tá cuu ndicava ri ndóhó va nuú cuachi.

2 Xíní ñúhú chindeé táhan ndó tá ndóho ini ndó. Ta xihín ña yóho jáxinu coo ndó ña sáhdá Jesucristo nu ndó caja ndó.

3 Tá ndúu java na tañu ndó ta cáhán na cúu ná na náhnu ndivaha vatí cō cúu á ña ndaa já queá jándahvi na mé va na.

4 Tá in tá in ndó ndítahan candehé ndó ndá quiahva cája ndó já ná cuu cají ini ndó tá cája vaha ndó. Ta cō ndítahan ndíñehe jícó ndo mé ndó sahá ña cáhán ndo ña vaha chága cája mé ndó a juú ga inga ga na.

5 Jáchi tá in tá in ndó ndítahan nu ndó candehé ndó ña cája ndó, á cúu á ña vaha á cúu á ña núu.

6 Tóco ndíhi ndó, na jácuaha túhun Ndióxi ndítahan nu ndó chindeé ndó na jáñaha ndóhó xihín ña cómí ndo.

7 Jándahvi ndó mé ndó tá cáhán ndo ña cuu jándahvi ndó Ndióxi jáchi a cuú jándahvi ñayivi Ndióxi. Sa xíní ndó tá xútu ndó in tata nu ñúhu já queá vaxi quiví tá jáquee ndó mé ñaha naxutu ndó.

8 Tá cája ñayivi ña núu ña cúní mé cuití na já queá vaxi quiví cuhun na indayá sahá ña núu nacaja na. Joo tá cája na ña vaha ña cají ini ínimá yíi Ndióxi xihín já queá ñehé táhvi na cuhun na coo na xihín Ndióxi anda ama cáa quiví, caja ínimá yíi Ndióxi.

9 Sahá ña cán queá a cánaá yó cája í ña vaha jáchi tá ná a jándacoo í cája í ña cúní Ndióxi já queá vaxi quiví quiahva Ndióxi nu yo ña ndítahan ndíquehé sahá ña táhan ini mé á xihín ña nacaja í.

10 Sahá ña cán queá tá núná nu yó caja vaha í xihín tóco ndíhi ñayivi cóho caja í ña. Tá cachí ga ví tá cúu ná na cándéé ini Jesús.

Ndítahan Pablo na cúu cuéntá Jesús

11 Candehé ndó ndaja náhnu letra cáhyí i nu ndo xihín ndáha mí i viti.

12 Cúní ña ná candaá ini ndó sahá java ga ñayivi, na cúní caja ndúsa xihín ndo ña ná chícāan ndó marca yiquí cuñu ndó. Cája na ña yóho jáchi cúní na candoo vaha na nuú na Israel. Ta yíhvi na ndicuita ñayivi

xih̄in ná sahá ña cándúsa na Jesucristo, mé a naxih̄i ndica crúxu sahá cuachí.

¹³ Joo mé na chíc̄aan marca yiquí cuñu cán co sácú vaha na tóco ndihi ña sáhndá ley Moisés. Joo cúni na ña ná chíc̄aan ndó marca yiquí cuñu ndó já ná cuu cah̄an lánd̄a na nuú na Israel sahá ña nacaja ndúsa ná xih̄in ndo.

¹⁴ Joo yehe, ni in túhún toho ñaha co cúni cah̄an lánd̄a i saha. Ña cúni caja i queá cah̄an i sahá Jesucristo, mé á naxih̄i ndica crúxu. Ta sahá ña cándeé ini i Jesucristo sahá ña cán queá cúu á tátuhun naxih̄i i nuú ña núu ñuyíví yóho. Co cúni ga i cája i ña cája ñayivi ñuyíví ta co cúni na cán catáhan na xih̄in i.

¹⁵ Ta co ndiyahvi nu Ndióxi á naquihvi marca yiquí cuñu í á coó a. Ña ndiyahvi ndusa queá ña nanduú ñayivi saá sahá ña cándeé ini Jesucristo.

¹⁶ Cúni ña ná coo vaha ini ndó, na cája ña cáhan i yóho. Ta ná caja Ndióxi cuahá ñaman̄i xih̄in ndó ta xih̄in tóco ndihi na cúu cuéntá mé á.

¹⁷ Ta viti xih̄in chinuu co cúni ga i ña ná jáquihvi ga ñayivi yehe. Jáchi tóco ndihi yanda ndáá a nu yiquí cuñu i náha ña mé a ndaa cúu u da cája chúun cuéntá Jesucristo.

¹⁸ Nani i na cúu cuéntá Jesús, ña cúni queá ná caja Jesucristo, xitoho í cuahá ñaman̄i xih̄in ndihi ndó. Já ná coo.

Carta nacahyí Pablo nuú na cúu cuéntá Jesús ndúu ñuu Efeso

Chíndahá Pablo Ndióxi coo na cúu cuéntá Jesús ndúu ñuu Efeso

¹ Yehe cúu Pablo, da nacaxi Ndióxi cacuu apóstol cuéntá Jesucristo. Cáhyí i carta yóho nuú na cúu cuéntá Ndióxi ndúu ñuu Efeso, na cándéé ini Jesucristo.

² Ña cúní quéa ná caja Ndióxi, tátá yo xihín Jesucristo, xitoho í cuahá ñamaní xihín ndó ta ná caja mé á ña ná coo vaha ini ndó.

Ñehe táhvi yó cuahá ñamaní cája Ndióxi sahá ña cándéé ini Jesucristo

³ Cóho caja cáhnu í Ndióxi, mé a cúu tátá Jesucristo, xitoho í. Cóho caja cáhnu í mé á jáchi cuahá ndivaha ñamaní nacaja xoho. Ta tá nuú ña vaha quíxi indivi nasahan ndihi mé á nu yo jáchi in cúu yo xihín Jesucristo.

⁴ Janda tá camaní cava sahá saha ñuyívi já nacaxi Ndióxi mí ña ná cacuu cuéntá mé á sahá ña nacaja Jesucristo. Ta nasacu ini a ndaja mí ña ná cacuu ñayivi yii, na coo ga cuachi nu mé á.

⁵ Quíhvi ndivaha ini a mí sahá ña cán quéa sa nasacu ini mé á ña ná quivi Jesucristo saha yo já ná nduú jahyí mé á. Já nacaja jáchi já cúní a coo.

⁶ Sahá ña cán quéa ndítahan nu yo caja cáhnu í Ndióxi níi tiempo jáchi cuahá ndivaha ñamaní cája mé á xihín yo tá nacaja mé á ña in nanduú xihín Jesucristo, jahyí máni á.

⁷ Nacaja Ndióxi ñamaní cáhnu xihín yo tá naxita nii Jesucristo ndica crúxu saha yo. Anda jáví cuu jácacu a mí ta cuu caja cáhnu ini a sahá cuachí.

⁸ Mé a ndaa nacaja cuahá ndivaha Ndióxi ñamaní xihín yo. Nacaja mé á ña ná ndindíchi jiní yo já ná candaá ini tuhun mé á.

⁹ Ta nasahan ñamaní nu yo ña ná candaá ini ña nasacu ini mé á caja jáchi janda sanahá nasahin jehé a nu yo joo viti sa

cándaá ini ndá saha nachindahá mé á Jesucristo.

¹⁰ Ta vaxi quivi coo ña nasacu ini mé á coo. Ta mé quivi cán caja Ndióxi ña ná cacomí Jesucristo cuéntá saha tóco ndihi ñaha ndúu ñuyívi xihín ña ndúu indivi jáchi tóco ndihi ñaha xinu a canduu a ndáha Jesucristo.

¹¹ Ta coo tá quiahva nasacu ini Ndióxi coo jáchi cája mé á tóco ndihi ña sácú ini a caja. Janda sanahá ndivaha nasacu ini a caxi a mí cacuu ñayivi ñehe táhvi ndiquehé ña vaha, ña quíxi nu íin mé á sahá ña in nanduú xihín Jesucristo.

¹² Sahá ña cán quéa ndítahan nuú nde caja cáhnu nde Ndióxi ña ná nahá ndaja cáhnu cúu mé á jáchi jihna ñuhú nde nacasáhá cándéé ini nde Jesucristo.

¹³ Ta quiahva já nacaja ri ndóhó va jáchi tá naxini johó ndó ña ndaa sahá Jesucristo já nacandéé ini ndó mé á. Mé tuhun yóho najánaña nu ndo ndá quiahva najáca cu mé á ndohó. Ta tá nacandúsa ndó a já in nanduú ndó xihín á ta cúu á tátuhun nanani marca Ndióxi ndohó ña náha ña mé a ndaa cúu ndó cuéntá mé á. Ta mé marca yóho cúu ínima yii mé á ña nasahan tuhun a nu ndó quiahva nu ndo.

¹⁴ Ta ndácaan ínima yii mé á ini ínima yo sahá ña cán quéa candaá vaha ini ña vaxi quivi ndiquehé ña vaha, ña quiahva Ndióxi nu yo jáchi sa nasahan mé á tuhun a caja ña. Ta sa já ndácaan ínima yii mé á ini ínima yo janda quiahva ná xinu quivi jácacu a mí nuú cuachí. Sahá ña cán quéa cóho caja cáhnu í mé á ña ná nahá ndaja cáhnu cúu mé á.

Xíca táhvi Pablo nu Ndióxi ña ná quiahva mé á ña ndíchi jiní na cúu cuéntá Jesús

¹⁵ Ta sahá ña sa candaá vaha ini i ña cándéé ini ndó Jesucristo, xitoho í ta sahá ña sa candaá ini i ña quíhvi ini ndó tóco ndihi na cúu cuéntá Ndióxi

¹⁶ sahá ña cán quéa co jándacoo i ña ndíquiahva i ndixahvi nu Ndióxi saha ndo. Ta co ndíndójó i caca táhvi i nu Ndióxi saha ndo.

¹⁷ Ta tá xíca táhvi i nu Ndióxi, mé a cúu tátá Jesucristo, xitoho í, mé a cúu Ndióxi cáhnu ndivaha já xíca táhvi i nu á ña ná quiahva ínima yii mé á nu ndó. Anda já

caja mé á ña ná ndindíchí jini ndo já ná nahá ndaja cáa Jesucristo. Ta xihín ña yóho candaa vaha chága ini ndó saha mé á.

¹⁸ Ta xíca tahví i nu Ndióxi ña ná jándiyehé a xíní túní ndo já ná candaa ini ndó sahá ña vaha caja mé á chága chí nuu xihín ndo. Ta ñúchí ndivaha coo tá ná xinu quíví ndiquehe Ndióxi ndohó cuhun ndó coo ndó xihín mé á anda ama cáa quívi sahá ña cúu ndó cuéntá mé á.

¹⁹ Ta xíca tahví i nu á ña ná candaa ini ndó ña co vája xinu coo nu ndíhi ndée Ndióxi jáchí iin ndivaha ndée mé á. Ta iin mé ndée yóho tañu mí, na cúu cuéntá mé á. Ta sa mé ndée yóho quéa nacaja chúun Ndióxi

²⁰ tá najánditacu a Jesucristo. Anda jávi nasacu coo a ña xoo cuáha mé á indiví.

²¹ Ta nacaja Ndióxi ña ná nduu Jesucristo jini nu tóco ndihi na iin ndée cahnda chuun ñuyíví yóho xihín na iin ndée cahnda chuun indiví. Sáhnda Jesucristo chuun nu tóco ndihi na cán vatí cúu ná na ndúu tiempo viti á cúu ná na vaxi chága chí nuu.

²² Tóco ndihi ñaha ndúu indiví xihín ñuyíví nandiquiahva Ndióxi ña ndáha Jesucristo ña ná cacomí mé á cuéntá sahá. Ta sa mé á cúu á jini nu tóco ndihi na cándéé ini mé á.

²³ Ta tóco ndihi na cúu cuéntá Jesucristo cúu ná tátuhun yiquí cuñu mé á sahá ña nandicutú ndaa ínima ná xihín mé á. Ta mé a cán jáchutú a tóco ndihi na ndúu ñuyíví xihín indiví.

2

Najácacu Ndióxi mí jáchí quíhvi ini a mí

¹ Ta jihna nasacuu ndó tátuhun na sa naxihí jáchí nasacaja ndó cuahá cuachí. Joo viti cúu ndó tátuhun na nanditacu tucu jáchí Ndióxi najácacu ndohó.

² Ta nasacaja ndó tá quiahva cája ñayivi ñuyíví yóho. Ta nasacaja ndó ña cúni tiñáhá sacuahá, rí cúu jini nu tóco ndihi rí quini. Ta mé rí cán cómi rí cuéntá sahá ñayivi, na co cája ña cúni Ndióxi.

³ Ta quiahva já nasanduú jihna jáchí nasacaja í ña xíca ini mí ví ta nasacaja í tóco ndihi ña núu, ña nasacahvi ini caja í. Ta saha tóco ndihi ña núu nacaja í yóho nanditahan nu yo jándoho ndivaha Ndióxi

ini tá quiahva cája mé á xihín java ga na co cúni candúsa mé á.

⁴ Joo natahvi ndivaha ini Ndióxi saha yo ta naquihvi ini ndivaha mé á mí.

⁵ Ta vatí nasacuu tátuhun ndii ta coo nasacu ndique táhan máni yó xihín Ndióxi sahá cuachi nasacaja í joo natahvi ini Ndióxi saha yó sahá ña cán quéa najácacu a mí sahá ña nacaja Jesucristo.

⁶ Vatí nasacuu tátuhun ndii sahá cuachi nasacaja í joo tá nanditacu Jesucristo já nasacuu a tátuhun nanditacu yó xihín mé á nacaja Ndióxi. Ta nacaja mé á ña ná cacoo í xihín Jesucristo tá ná xinu coo í indiví.

⁷ Nacaja Ndióxi ña yóho jáchí nasacu ini a jánaha nu yo viti xihín chága chí nuu ña quíhvi ndivaha ini a mí ta táhvi ndivaha ini a saha yo sahá ña nacaja Jesucristo.

⁸ Ta sahá ña natahvi ini Ndióxi saha ndo nañehé táhvi ndó cacu ndaa ínima ndo jáchí cándéé ini ndó mé á. Ta co cúu á sahá ña cája mé ndó jáchí cúu á ñamaní nacaja Ndióxi xihín ndo.

⁹ Ta coo najácacu a ndohó sahá ña vaha cája ndó jáchí co cúni a ña ná caja cáhnu ndó mé ndó.

¹⁰ Jáchí nacavaha Ndióxi mí tá quiahva cúni a ña in ná nduú xihín Jesucristo já ná caja í ndinuhu ña vaha, ña nasacu ini a caja í anda jihna.

Ín vaha ini sahá ña nacaja Jesucristo xoho

¹¹ Candehé ndó, na tóho, na cúu cuéntá Jesús. Ná ndicuhun ini ndó ndaja nasacuu ndó jihna. Nacachi na Israel saha ndó ña coo yahvi toho ndó jáchí coo nachicaan na marca yiquí cuñu ndó.

¹² Ndítahan ndicuhun ini ndó ña mé tiempo cán co xini toho ndó Jesucristo. Ta ni coo nasacuu ndó na Israel, na nacaxi Ndióxi. Ta ni coo nasacuu ndó ñayivi nasahan Ndióxi tuhun a nuu. Nasandu uun ndó ñuyíví yóho jáchí coo nasaxíni ndo Ndióxi ta ni coo nacahán ndo cuhun ndó indiví.

¹³ Vatí coo nasacuu ndó na cúu cuéntá Ndióxi joo viti nacayati ndó nu á ta já in nandu ndó xihín Jesucristo sahá ña naxihí a ndica crúxu saha ndo.

¹⁴ Ta nacaja Jesucristo ña ná coo vaha ini na Israel xihín na tóho. Ta nacaja ña

in nanduu na cuéntá mé á. Jáchi najándihi á sahá ña nasaji nuu nuú na cán ña ná ndique táhan máni xihín táhan na.

¹⁵ Ta tá naxihí Jesucristo najáxinu coo a nu ley ña nasahnda chuun nu yo sahá ña nanditahan caja í. Ta nandaja mé á ña in nanduu na Israel xihín na coo naquixi chichi Israel. Ta tá nandihí já nandaja mé á ña nanduu na cuéntá mé á já nanduu vaha ini xihín táhan na.

¹⁶ Tá naxihí Jesucristo ndica crúxu já nacaja mé á ña ná ndique táhan máni xihín táhan na ta já nandihí sahá ña cáni táhan na. Anda já najándique táhan máni á na xihín Ndióxi ta já in nanduu na.

¹⁷ Ta naquixi Jesucristo caxi tuhun a tuhun vaha nu yo ña ná coo vaha iní xihín Ndióxi. Ta coo caja toho a á cúu ná na tóho, na nasacuu xíca nu á tátuhun mé ndó, á cúu ná na Israel, na nasanduu yati nu á tátuhun mé nde jáchi nasahan mé á tuhun vaha nu tóco ndihí.

¹⁸ Ta sahá ña nacaja Jesucristo cuu cayatí nu Ndióxi viti. Coo caja toho a á cúu yó na naquixi chichi Israel á coo cúu yó na naquixi chichi Israel jáchi ínima yíi mé á queá chindeé a mí cayatí nu Ndióxi.

¹⁹ Sahá ña cán queá coo cúu ga ndó na tóho, na naquixi xíca jáchi in nanduu ndó xihín na cúu cuéntá Ndióxi viti ta cúu ndó na vehe mé á.

²⁰ Ta viti tóco ndihí, na cúu cuéntá mé á cúu yó tátuhun in vehe. Ta na apóstol xihín na profeta cúu ná tátuhun yuu ndúhu sahá vehe jan jáchi najánaha na tuhun Ndióxi nu ndó nu cuítí. Ta Jesucristo cúu á tátuhun yuu ndúhu cuahan titó vehe jan ña sáhan ndée vehe jan.

²¹ Ta nacaja Jesucristo ña nandique táhan vaha tóco ndihí na cúu cuéntá mé á. Ta nandaja mé a mí ña loho loho ná nduú tátuhun in veñuhu yíi nu sá ndacaan Ndióxi, xitoho í.

²² Sahá ña in nanduu ndó xihín Jesucristo sahá ña cán queá nandique táhan máni xihín táhan ndó. Ta nacaja Ndióxi ña ná nduu ndó tátuhun in vehe nu in Ndióxi jáchi ndacaan ínima yíi mé á chí ini ndó.

3

Nachindahá Ndióxi Pablo cahan da

tuhun mé á nuú na coo naquixi chichi Israel

¹ Yehe cúu Pablo ta sahá ña xíca nuu i cahan i tuhun vaha sahá Jesucristo nuú na coo naquixi chichi Israel saha ña cán queá ndacaan i vecaa viti.

² Ta sa cándaq ini ndó ña sahá ña natahvi ini Ndióxi saha ndó sahá ña cán queá nasahan mé á chuun yóho nuu i ña ná cahan i tuhun Ndióxi xihín ndo.

³ Jihna nachijehé Ndióxi ña nasacu ini a caja joo viti najánaha mé á nuú i ña nasacu ini a caja. Ta sa nacahan chá i sahá ña jan tá nacahyí i carta nu ndo.

⁴ Tá ná cahvi tucu ndó ña já cuni ndó ña mé a ndaa táhyí sa cándaq ini i ña nasahin jehé sahá Jesucristo.

⁵ Coo nacandaq ini ñayivi ña yóho jáchi nasahin jehé ña. Joo viti nacaja ínima yíi Ndióxi ña ná cándaq ini na apóstol xihín na profeta, na cúu cuéntá mé á sahá ña yóho.

⁶ Ta ña nasahin jehé jihna cúu ña yóho: xihín ña nacaja Jesucristo ña in nanduu na cúu chichi Israel xihín na coo cúu chichi Israel já ná ñehe ná ña vaha ña nasacu ini Ndióxi quiahva nuú na cúu jahyi mé á. Jáchi in nanduu na Israel xihín na tóho ta in cúu ná ndáti na ñehe ná ña nacachi Ndióxi quiahva nu ná sahá ña nacaja Jesucristo.

⁷ Joo nacaja Ndióxi ñamaní xihín i ta xihín ndée mé á xíca nuu i cahan i tuhun vaha saha mé á nuú ñayivi.

⁸ Nacaja Ndióxi ñamaní xihín i jáchi nasahan mé á chuun yóho nuu i ña ná cahan i tuhun vaha sahá Jesucristo nuú na coo naquixi chichi Israel. Vatí cúu u tátuhun in da coo saha tañu na cúu cuéntá Jesús joo nacaja mé á ñamaní xihín i ña ná ndicani i nuú na tóho ndá quiahva nahnunahá cája Jesucristo xihín ná.

⁹ Ta nasahan Ndióxi chuun nuu i ña ná jánaha i tuhun vaha ña nasahin jehé nuú ndihí ñayivi. Ta anda sanahá nasahin jehé a nacaja Ndióxi, mé a nacavaha tóco ndihí ñaha.

¹⁰ Nacaja Ndióxi ña yóho jáchi sahá ña in nanduu na Israel xihín na tóho anda jáví náha nu tóco ndihí na sáhdá chuun nuú na nduu indiví ndá quiahva ndichí ndivaha jini mé á.

¹¹ Sanahá ndivaha nasacu ini Ndióxi ña yaha chága chí nuu. Ta viti xihín ña nacaja

Jesucristo, xitoho í naxinu coo nuú ña nasacu ini mé á coo anda ama cáa quivi.

¹² Ta sahá ña in nanduu xihin Jesucristo sahá ña cán quea co yihvi ga í cayati nu Ndióxi. Ta xini vaha í ña ndiquehe mé á mí jáchi candeé ini mé á.

¹³ Sahá ña cán quea xica tahvi i nu ndo ña ná a cávita ini ndó sahá ña ndóho ini i. Jáchi sahá ña nacahan i tuhun Ndióxi nu ndo sahá ña cán quea ndóho ini i viti já ná cuu canduu vaha mé ndó. Ta xini ñuhú cajii ini ndó sahá ña cája i saha ndo.

Quihvi ini Jesucristo ñayivi

¹⁴ Sahá ña cán quea ndaca xiti i nu Ndióxi, mé a cúu tátá Jesucristo, xitoho í tá cáhvi ini i ndá quiahva nahnu cája mé á.

¹⁵ Jáchi mé á cúu tátá tóco ndihi na nduu indivi xihin tóco ndihi na nduu ñuyivi yóho sahá ña cúu ná na vehe mé á.

¹⁶ Ta cúni mé á caja cuahá ndivaha ñamaní xihin yo sahá ña cán quea xica tahvi i nu á ña ná chindahá inima yii á nu ndo já ná quiahva tuhun ndeé ini ndó ta já ná coo ndacú ini ndó.

¹⁷ Ta xica tahvi i nu Ndióxi ña ná ndacaan Jesucristo inima ndo sahá ña candeé ini ndó mé á ta ná coo ndeé ini ndó sahá ña quihvi ini a ndohó. Ta tá quiahva tin yohó yito ñundáhyi quiahva já ndítahan coo ndó xihin Jesucristo.

¹⁸ Ta anda javí mé ndó xihin tóco ndihi na cúu cuéntá Jesús cuu candaa ini ndó ndá quiahva quihvi ini a ndohó.

¹⁹ Ta xica tahvi i nu Ndióxi ña ná candaa ini ndó ndá quiahva quihvi ini Jesucristo ndohó já quea ná ndicutú ndaa inima ndó xihin Ndióxi. Joo mé a ndaa a cuú xinu coo ndó candaa ini ndó ndá quiahva quihvi ini a ndohó.

²⁰ Ta viti cáhnu nahá ná cacuu Ndióxi, mé a in ndivaha ndeé cája cuahá nuú ñaha jáchi cája cuaha chaga mé á ñamaní xihin yó a juú ga nuú ña cáhvi ini caca yó nu á jáchi chindeé Ndióxi mí xihin ndeé mé á.

²¹ Cóho ndihí, na cúu cuéntá Jesús ña ná caja cáhnu í Ndióxi sahá ña nacaja Jesucristo. Viti xihin ndijáá ní quivi ta anda ama cáa quivi ná caja cáhnu í mé á. Já ná coo.

4

Cája inima yii Ndióxi ña in nanduu tóco ndihi na cúu cuéntá Jesús

¹ Yehe ndacaan i vecaa sahá ña cája chúun i cuéntá Jesucristo, xitoho í. Sahá ña cán quea xica tahvi i nu ndo ña ná caja ndó ña cúni Ndióxi caja na cúu cuéntá mé á. Jáchi nacaxi a ndohó sahá ña cán quea ndítahan caja ndó tá quiahva cúni mé á.

² Coto a cája cáhnu ndó mé ndó. Vií caja ndó xihin ñayivi. A cójo cama ini ndó xihin ná. Ta tá yaha nu cája xihin táhan ndó caja cáhnu ini saha táhan ndó jáchi quihvi ini táhan ndó.

³ Xini ñuhú ndinducú ndo in ná nduu ndó jáchi chindeé inima yii Ndióxi ndohó caja ndó ña. Ta coto a ndacahnda táhan ndó já ná coo vaha ini xihin táhan ndó.

⁴ Tóco ndihi mí, na cúu cuéntá Jesús naxinu coo í cúu yó tátuhun in tuhún ñayivi. Jáchi in in tuhún inima yii Ndióxi ini ta in tuhún cúu ri ña ndátí quiahva Ndióxi nu yo sahá ña nacaxi a mí ndiquehé ña.

⁵ In tuhún jini Jesucristo, xitoho í quea in. Ta in tuhún jini mé á ndítahan candeé ini jáchi in nacanduta yo cuéntá mé á.

⁶ Ta in in tuhún Ndióxi, mé a cúu á tátá tóco ndihí. Ta mé a cán cómi a cuéntá saha tóco ndihí. Ta sahan mé á ndeé yó caja í ña cúni a. Ta ndacaan inima mé á ini tóco ndihi ñayivi cuéntá mé á.

⁷ Joo tá in tá in mí ñahehe táhvi yo nasacu ini Jesucristo quiahva nu yo.

⁸ Sahá ña cán quea cáchi tuhun Ndióxi já: Naquee vaha mé á xihin na ihvi a ta nasandaca mé á na tá nandicó coo a nandaa indivi.

Anda já nasahan tahvi nuú in in ñayivi, nacachi tuhun Ndióxi.

⁹ Tá cáchi a ña nandaa Jesucristo indivi já cúni cachi a ña nu cuítí nanuu a indivi anda ñuyivi yóho.

¹⁰ Ta mé Jesucristo, mé á naquee indivi cán ta nanuu a ñuyivi yóho nandaa tucu a cuahan janda nu jicó cuí indivi ta já najándicutú a ñuyivi xihin indivi xihin ña nacaja mé á.

¹¹ Ta tá nasahan tahvi nuú in in ñayivi já ñahehe táhvi java na cacuu na apóstol ta java na cacuu na profeta ta java na caca nuu na cahan na tuhun Ndióxi ña

cuu jácacu ñayivi. Ta java na nañehe táhvi ná cacuu na na cómi cuéntá sahá na cúu cuéntá mé á ta java na cacuu na na jánaħa tuħun Ndióxi nuú ñayivi.

12 Já naċaja Ndióxi xihín na cán já ná canduu tiaħva na ċaja chún na cuéntá mé á ta já ná cuu ċaja na jácuahnu na na cúu cuéntá Jesús.

13 Já quéa ná xinu ċoo ndihí in canduu xihín na cúu cuéntá Jesús sahá ña cándeé iní mé á. Já ná cuu xinu ċoo í candaa vaħa chága iní sahá Jesucristo, mé a cúu in túhún jini já jahyi Ndióxi. Ta xihín ña yóho cuu ndindaċú yo cuéntá mé á janda quiaħva cuahnu vaħa í jáxinu ċoo í ndicutú ndaa yó xihín mé á.

14 Ná a cácuu ga í tátuhun na valí, na ċo tácu ini, na ndíjama jini tá tóo. Ta tá nandihí ndíċo na jatá ña jánaħa inga na janda quiaħva jándahvi na na. Ta mé na jándahvi ñahá yóho xini vaħa na ndá quiaħva cája na cañehe na na ċuhun na in íchi ña ċo cúu ichí vaħa.

15 Ña ndítahan ċaja í quéa ċahan ndaa xihín táhan í xihín ndinuhu iní sahá ña quíhvi ini táhan í ta já cuahnu í xihín Jesucristo, mé a cúu jini nu tóco ndihí na cúu cuéntá mé á janda quiaħva ná nduú tá quiaħva cáa mé á.

16 Sahá ña cúu mé á jini nu yo sahá ña cán quéa cuu ndique táhan vaħa í xihín java ga na cúu cuéntá Jesús. Ta ñúchí ndivaħa ndique táhan na cúu cuéntá mé á tá cája in in na ña cúni mé á. Ta xihín ña yóho cuu canduu vaħa í ta cuu ndindaċú chága yo cuéntá mé á ta já cuu quíhvi ini táhan í.

Ña saċa cája í viti

17 Ña yóho quéa cáxi tuħun i xihín ndo. Xíċa tahví i nu ndó cuéntá Jesucristo, xitoho í ña ná a cája ga ndó ċaċhi tá quiaħva cája ñayivi ñuyívi jáċhi ċoo yahvi toho tá nuú ña núu cáhvi ini na ċaja na.

18 Mé na cán nandaji xini túni ná. Ta ċo cúu ná na jácacu Ndióxi jáċhi naċicaji na xini túni ná nu mé á ta nandaja táhyí na ínima ná.

19 ċo cáċahan nuu ná jáċhi nayaha va quiaħva cája na ña núu xihín ndinuhu ini na. Ta ċo sáji nuu na nuú yiquí ċuñu na tá cúni a ċaja tá nuú ña núu.

20 Joo tá nandiquehe ndó íchi cuéntá Jesús já najánaħa nde ndohó ña ná caxoo ndó nuú ċaċhi tátuhun ña yóho.

21 Jáċhi naċini joho ndó saħa mé á ta nandiquehe ndó tuħun ndaa, ña najánaħa nde nu ndo, ña cáħan saħa mé á.

22 Sahá ña cán quéa ndítahan nu ndó jácaxoo ndó nu tóco ndihí ña núu naċaċaja ndó jihna. Jáċhi ċaċhi quéa naċaja ndúsa xihín ndó ña ná ċaja ndó ña núu ta jáċiví a ndohó sahá ña nandiava iní ndo ċaja ndó ña núu, ña jándahvi ndohó.

23 Xini ñúhú cacuu ndó na nanduu saċa ínima xihín xini túni sahá ña cúu ndó cuéntá Jesús.

24 Ta xihín ña yóho cuu xinu ċoo ndó cacuu ndó tátuhun ñayivi saċa, na cáa tá quiaħva cáa mé á. Ta náħa ña mé a ndaa táhyí cúu ndó ñayivi ndaa, na nandivií nu mé á.

25 Sahá ña cán quéa a cáħan ga ndó ña tuħún. Ña ndítahan nu ndó ċaja ndó quéa cáħan ndó ña ndaa xihín ñani táhan ndó jáċhi in nanduu ndihí cuéntá Jesucristo.

26 Ta tá jáa ndo xihín ñayivi coto a cája ndó ċaċhi jáċhi xini ñúhú yaħa yaċhi ña xójo ini ndó xihín ná. Ta tá sa nahini sa ċo ndítahan ndáċaħan ga ña xójo ini ndó xihín ná.

27 Ta a quiaħva ndó ñamaní nuú tiñáhá saċuaħa ña ná ċaja rí ña cúni rí xihín ndo.

28 Ndá na naċaċaja ċuíhná jihna coto ná a cája ċuíhná ga na viti. Ndítahan ċaja chún vaħa na ña ná cuu chindeé na na cámaní ñaha nuu.

29 A cáħan ga ndó tuħun núu. Ña ndítahan nu ndó quéa chindeé ndo ñayivi xihín tuħun cáħan ndó. Ta já cuu cuahnu na xihín á ña ná ñehe ná ñamaní nu Ndióxi.

30 A cája ndó ña ná cacuéħa ínima yii Ndióxi xihín ndo jáċhi mé ínima yii Ndióxi cán quéa náħa ña mé a ndaa cúu ndó cuéntá mé á. Cúu á tátuhun nanani marca Ndióxi ndohó ña náħa ña a jándacoo toho a ndohó janda quiaħva ná xinu ċoo quívi tá chí in ndeé va jácacu Ndióxi ndohó.

31 Xini ñúhú tavá xóo ndó tóco ndihí ña núu, ña ċo saħan ñamaní nu ndó canduu vaħa xihín táhan ndó. Ta ċo ndítahan jaċa ndo xihín ñayivi ta ni ċo ndítahan ċojo ini ndó. Ta ċo ndítahan cayuhú nu táhan ndó

ta ni a cánahá ndó xihín ná. Ña ndítahan caja ndó queá tavá xóo ndó mé ndó nu tóco ndihi ña núu.

³² Ña ndítahan caja ndó queá ná caja vaha xihín táhan ndó ta candáhví ini táhan ndó. Ta caja cáhnu ini saha táhan ndó tá quiahva naçaja cáhnu ini Ndióxi saha ndó sahá ña naçaja Jesucristo saha ndo.

5

Ña ndítahan caja na cúu jahyi Ndióxi

¹ Mé ndó cúu ndó jahyi máni Ndióxi sahá ña cán queá ndítahan ndihi ini ndó caja ndó tá quiahva cája mé á.

² Xíní ñúhú quihví ini ndó ñani táhan ndó tá quiahva naçaja Jesucristo. Naquihví ini a mí ta nandiquiahva mé á quivi a ndica crúxu saha yo tátuhun in quítí, rí nasahní na jocó na nu Ndióxi. Ta mé a ndaa nasacuu a ña naçajii ini Ndióxi xihín.

³ Co cúni cuni johó i ña cája ndó cuachi tátuhun tá íin in ñayivi xihín ñájíhí á yí ñani táhan na á tá cája na ña núu xihín yiquí cuñu na á tá chínúu na ínimá ná jatá jiuhún na. Co ndítahan nu ndó caja ndó ña yóho jáchi cúu ndó na cúu cuéntá Ndióxi viti.

⁴ Coto a cáhan ndó ña núu ña coó saha. Ta ni a ndítuhún jiquí xihín táhan ndó xihín tuhun núu. Jáchi co cája vaha toho ña yóho xohó. Ña ndítahan caja ndó queá ndiquiahva ndó ndixahvi nu Ndióxi.

⁵ Jáchi sa cándaá ini ndó ña ndá na ndúu xihín na co cúu ñájíhí na á yí ná, á tá cája na ña núu xihín yiquí cuñu na á tá cúu ná na chínúu ínimá jatá jiuhún, mé na cán a ñéhe táhvi toho na cacomí Jesucristo xihín Ndióxi cuéntá saha ná. Jáchi na chínúu ínimá jatá jiuhún cúu ná tátuhun na cája cáhnu yoco.

⁶ A cándúsa ndó caja ndó cuachi cája na jan jáchi cúni na jándahvi na ndohó xihín ña tuhún. Jáchi cúu ná ñayivi saá ini, na jácojo ini Ndióxi. Ta tandaa quívi jándoho a ini na cán.

⁷ Sahá ña cán queá co ndítahan ndique táhan ndó caja ndó ña núu xihín na jan.

⁸ Mé ndó nasanduu ndó nuú naá ndivaha jihna joo sahá ña in nanduu ndó xihín Jesucristo ndúu ndó nu yéhe viti. Sahá ña cán queá ndítahan caja vaha ndó

já ná naha ña mé a ndaa cúu ndó ñayivi mé á, na xíca nu yéhe.

⁹ Jáchi tóco ndihi na ndúu nu yéhe cája na ndinuhu ña vaha ta xíca ndacú na íchi cuéntá ña ndaa.

¹⁰ Xíní ñúhú jácuaha ndó caja ndó ña cájii ini Ndióxi xihín.

¹¹ A catáhan ndó xihín ñayivi ndúu nuú naá yávi ta a cája ndó ña núu xihín ná, ña co ndáyahvi. Ña ndítahan caja ndó queá jánani ndó na ta naha tuhun ndó sahá ña núu cája na.

¹² Jáchi chínúu cacahan nuu yo ndituhún yo sahá ña cája jehé na jan.

¹³ Joo tá ná xínu quívi canáha ndihi ña cája na jan já candaá ini tóco ndihi ñayivi ña naçaja jehé na. Jáchi tóco ndihi ña ñúhu jehé quee ndihi a nu yéhe.

¹⁴ Sahá ña cán queá já cáchi tuhun Ndióxi já:

Xíní ñúhú ndicáxi inún jáchi cúun tátuhun da quíji tañu na naxihí.

Ta tá ná ndicáxi inún já jándiyéhe Jesucristo ínimun já ná a cájún cuachi, cáchi tuhun Ndióxi.

¹⁵ Xíní ñúhú candehé vaha ndó ndá quiahva ndítahan caja ndó. A cája ndó tá quiahva cája ñayivi co xíní túní. Ndítahan cacuu ndó ñayivi ndíchí jini.

¹⁶ Xíní ñúhú ndihi ini ndó caja ndó ña cúni Ndióxi jáchi quini ndivaha cáa tiempo viti.

¹⁷ Coto a cája ndó ña tóntó. Xíní ñúhú ndicani vaha ini ndó sahá ña cúni Ndióxi, xitoho í caja ndó.

¹⁸ A jáxini ndó mé ndó jáchi co cája vaha ña jan xihín ndo. Ña ndítahan caja ndó queá quiahva ndó ñamani nu Ndióxi ña ná jándicutú a ínimá ndo xihín ínimá yíi mé á.

¹⁹ Ta tá ná ndituhún ndo xíní ñúhú ndinuhu ini ndó caja cáhnu ndó Ndióxi, xitoho ndó xihín tuhun cáhan ndó. Xíní ñúhú cata ndó salmo xihín himno xihín canto, ña sahan ínimá yíi Ndióxi nu ndo. Joo xíní ñúhú cacuu a ña quíxi ínimá ndó cája cáhnu ndó Ndióxi.

²⁰ Níi tiempo ndítahan ndiquiahva ndó ndixahvi nu Ndióxi, tátá yo saha tóco ndihi ñaha. Ta cáhan ndó quívi Jesucristo, xitoho í tá ná caja ndó ña.

Ña ndítahan caja na sa natandaha

21 Ndítahan nu ndó candúsa táhan ndó já ná cuu ndicáhnu Ndióxi sahá ña cája ndó.

22 Ndóhó, najihí ndúu yí ndítahan candúsa ndó yí ndo tá quiahva cándúsa ndó Jesucristo, xitoho í.

23 Jáchi yí ndó cúu da cómi cuénta saha ndo tá quiahva cómi Jesucristo cuénta sahá na ndico íchi mé á. Ta tóco ndihi na cúu cuénta mé á cúu ná na ndáca tátuhun yiquí cuñu mé á. Ta mé á quea jácacu a na nuú cuachi.

24 Tá quiahva cája na cúu cuénta Jesús cándúsa na ña sáhdá mé á nu ná quiahva já ndítahan caja najihí ndúu yí. Xíní ñúhú caja ndihi na ña cúni yí na caja na.

25 Ta ndóhó, da ndúu ñájihí, xíní ñúhú quihvi ini ndó na tá quiahva naquihvi ini Jesucristo na cúu cuénta mé á tá naxihí a saha ná.

26 Nacaja Jesucristo ña yóho jáchi cúni mé á ña ná nduu na cúu cuénta mé á ñayivi vii sahá ña nandoo na xihín ticuí ta sahá ña sácú vaha na ña cáchi tuhun Ndióxi.

27 Sahá ña cán quea cuu cayati na nu Ndióxi sahá ña cúu ná ñayivi vii cuénta mé á, na naquee vaha xihín ña núu, na co jácaquini mé xihín cuachi. Ta viti cúu ná ñayivi yí nu mé á jáchi co cája ga na cuachi.

28 Ndítahan nuú in dataa quihvi ini da ñájihí da tá quiahva quihvi ini da yiquí cuñu da jáchi in nanduu na. Tá quihvi ini da ñájihí da já quea quihvi ini da mé dá.

29 Jáchi ni in túhun toho ñayivi co cándají na yiquí cuñu na. Ña cája na quea sáhan na ña cuxu a ta ndáa vaha na ña ta quiahva já ndáa Jesucristo na cúu cuénta mé á.

30 Jáchi tóco ndihí mí, na cúu cuénta Jesús cúu yó java na ndáca yiquí cuñu mé á.

31 Sahá ña cán quea cáchi tuhun Ndióxi já: “Tá ná tandaha in dataa já ndítahan quee xoo da nu tátá náná da já ná ndique táhan da coo da xihín ñájihí da. Ta já ná nduu ndíví na tátuhun in túhun jiní ñayivi”, cáchi tuhun Ndióxi.

32 Mé a ndaa yáncá ndivaha cándaa iní tóco ndihi ña yóho. Joo náha nu yo ndá quiahva cúu yó tátuhun yiquí cuñu Jesucristo tá in nanduu xihín á.

33 Xíní ñúhú ndicuhun ini ndó ña ndítahan quihvi ini in in ndó ñájihí ndo tá quiahva quihvi ini ndó mé ndó. Ta jári ndóhó, najihí xíní ñúhú caja cáhnu ndó yí ndo.

6

1 Ndóhó, na valí xihín na tacú, xíní ñúhú coo johu ndó nu sáhdá tátá náná ndo chuun nu ndo. Jáchi ña yóho quea cúni Ndióxi caja ndó.

2 Xíní ñúhú caja cáhnu ndó tátá ndo ta caja cáhnu ndó náná ndo jáchi jihna ñúhú nasahnda Ndióxi ña yóho nu yó caja í. Ta jatá ña yóho nasahan mé á tuhun a nu yo tá cáchi a já:

3 “Tá ná cajún ña yóho já cuahnu yatún ta quixi cuahá ña vaha nuun.”

4 Ta ndóhó, na ndúu jahyi, a jácojo ndó ini jahyi ndó. Ña ndítahan caja ndó quea jánaha vaha ndó nu ná ña ndítahan caja na. Ta jánaha ndó nu ná ndá quiahva caca na íchi cuénta Ndióxi, xitoho í.

5 Ta ndóhó, na naxeen na caja chúun nu ná xíní ñúhú coo johu ndó nu cáhan xitoho ndó, na cómi cuénta saha ndo ñuyiví yóho. Ta ndítahan caja cáhnu ndó na ta cayihví ndó na. Joo xíní ñúhú caja ndó ña xihín ndinuhu ini ndó jáchi cúu á tátuhun cája chúun ndó nuú Jesucristo.

6 Ndítahan nu ndó caja chúun vaha ndó nu ná ta a juú tá ndíta cuití na sádehé na nu cája chúun ndó sahá ña cúni ndó candoo vaha ndó nuú na cán, vaha. Ndítahan caja chúun ndó xihín ndinuhu ini ndó nuú xitoho ndó jáchi cúu á tátuhun cája chúun ndó nuú Jesucristo. Sahá ña cán quea ndítahan caja ndó ña cúni Ndióxi xihín ndinuhu ini ndó.

7 Xíní ñúhú cajii ini ndó ta ndinuhu ini ndó tá cája chúun ndó. Ta ndítahan caja ndó cuénta ña cája chúun ndó nu Ndióxi ta co cája chúun ndó nuú ñayivi cuití va.

8 Jáchi sa cándaa ini ndó ña vaxi quivi xinu yó nuú Jesucristo, xitoho í ndiquehé yahvi sahá ña vaha nacaja í ñuyiví yóho. Ta coo caja toho a á cúu yó xitoho á cúu yó na cája chúun nuú xitoho.

9 Ta jári ndóhó va, na cúu xitoho mozo naxeen ndó jan ndítahan nu ndó caja vaha ndó xihín ná ta co ndítahan jáyihví ndó na

xihín tuhun cáhan ndó xihín ná. Ndítahan ndicuhun ini ndó ña íin Jesucristo indivi ta cúu á xitoho mé ndó ta sa mé á cán cúu xitoho na cája chúun xihín ndo. Ta co sáhní toho a cán mé á saha ndá ñayivi íin chága saha a juú ga inga na jáchi in cúu ndihí nu mé á.

Ndaja caja í quee vaha í xihín ña quini

¹⁰ Ta viti xíní ñuhú caja ndacú ndo mé ndó xihín ndée cáhnu Jesucristo, xitoho í jáchi in nanduu ndó xihín mé á viti.

¹¹ Xíní ñuhú caja chúun ndó xihín tóco ndihi ndée sáhan Ndióxi nu ndo já ná cuu quee vaha ndó xihín tiñáhá sacuaḥa tá cúní rí jándahvi rí ndohó.

¹² Jáchi a juú xihín ñayivi, na íin yiquí cuñu cáni táhan í, vaha. Ña cáni táhan í xihín cúu tátó tiñáhá sacuaḥa, rí xíca nuu nu táchi indivi ta rí cán cúu rí rí cómí cuéntá sahá ñayivi ndúu nuú naá yávi ñuyíví yóho.

¹³ Sahá ña cán quea xíní ñuhú caja chúun ndó xihín tóco ndihi ndée sáhan Ndióxi nu ndó já quea ná cuu quee vaha ndó xihín rí quini tá ná xinu rí caní táhan rí xihín ndo. Ta xihín ña yóho cuu candita ndacú ndó tá sa nandihí nacani táhan ndó xihín rí.

¹⁴ Ta candita ndacú ndó xihín ña ndaa ña sáhan Ndióxi nu ndo jáchi cúu á tátuhun in cinturón pañi tixi sáhan ndée ndácaan tóco ndo. Ndicuhun ini ndó ña cúu ndó ñayivi ndaa nu Ndióxi. Sahá ña cán quea cúu á tátuhun ndíxi ndó cotó caa.

¹⁵ Xíní ñuhú canduu tiahva ndó cahan ndó tuhun vaha sahá Jesús xihín ñayivi jáchi tuhun yóho quea cája ña ná coo vaha ini na xihín Ndióxi. Sahá ña cán quea cúu á tátuhun yíhi ndó tuhun Ndióxi.

¹⁶ Xíní ñuhú candeé ini ndó Ndióxi já quea ná cuu quee vaha ndó caji nuu ndó nuú ña núu cúní tiñáhá sacuaḥa chindahá rí nu ndo. Sahá ña cán quea cúu á tátuhun ñéhe ndó in caa jáhnda ña chícají a ndohó. Ta xihín mé ña yóho cuu candaji nuu nu ndo nuú ña ñéhe ñuhú ita jácana mé rí cán nu ndo.

¹⁷ Ndicuhun ini ndó ña najácaacu Ndióxi ndohó nuú cuachi sahá ña cán quea cúu á tátuhun ñuhu ndó yijíní caa. Tá ná cahan cáxí ndó tuhun sáhan ínimá yji Ndióxi nu ndó já quea cúu á tátuhun ñéhe ndó machiti, ña cúu tuhun Ndióxi.

¹⁸ A jándacoo ndó caça tahví ndó nu Ndióxi. Níi tiempo xíní ñuhú caça tahví ndo nu mé á. Joo ndítahan caça ndó ña jánaḥa ínimá yji mé á nu ndo caça ndo. Xíní ñuhú canduu tiahva ndó ta a cáva ini ndó ta xíní ñuhú caça tahví ndó saha tóco ndihi na cúu cuéntá Ndióxi.

¹⁹ Ta caça tahví ndó nu Ndióxi saha mí í viti já ná chindeé Ndióxi yehe cahan í xihín ñayivi tuhun mé á ta caça tahví ndó nu á ña ná quiahva mé á ndée a nuú í já ná cuu cahan í tuhun mé á ña coo nasaxíní na jihna, nduu. Jáchi ña yóho quea cuu jácaacu a na nuú cuachi.

²⁰ Ndióxi quea nachindahá a yehe cuhun í cahan í tuhun yóho ta sahá ña xíca í cáhan í tuhun yóho ndácaan í vecaa viti. Caça tahví ndó sahá í já ná a cáyhvi í cahan í sahá Jesús nuú ñayivi ndúu yóho tá quiahva ndítahan nuú í caja í.

Ndíndayí Pablo ñayivi, na cúu cuéntá Jesús

²¹ Ñani máni yo, da naní Tíquico mé a ndaa cúu dá da chindeé táhan xihín í chuun Jesucristo, xitoho í. Ta mé dá cán cañehe da tuhun sahá í tá ná saḥa da nu ndo já ná candaa ini ndó ndátahvi yáha í.

²² Sahá ña cán chindahá í da nu ndo já ná caxi tuhun da nu ndó ndá quiahva yáha nde ndúu nde yóho ta xihín ña yóho ná cuu quiahva da tuhun ndeé ini ndó.

²³ Ña cúní quea ná caja Ndióxi, tátá yo xihín Jesucristo, xitoho í ña ná coo vaha ini tóco ndihi ndó, na cúu cuéntá Jesús. Ta ná caja mé á ña ná quihvi ini táhan ndó sahá ña candeé ini ndó mé á.

²⁴ Ta ná jándicutú ndaa mé á ñamaní jata tóco ndihi na quihvi ini Jesucristo, xitoho í xihín ndinuhu ini na. Já ná coo.

Carta nachindahá Pablo nuú na cúu cuéntá Jesús ndúu ñuu Filipos

Carta nacahyí Pablo nuú na cúu cuéntá Jesús ndúu ñuu Filipos nani nasandacaan da vecaa

¹ Yehe cúu Pablo ta cája chúun i xihín Timoteo cuéntá Jesucristo. Ta cáhyí nde carta yóho nu tóco ndihi na cúu cuéntá Jesús, na ndúu ñuu Filipos jáchi in nanduun na xihín Jesucristo. Ta cáhyí ri nde carta yóho nuú na sacuaḥa nuú na cúu cuéntá Jesús xihín nuú na chindeé mé na sacuaḥa veñuhu.

² Xíca tahví i nu Ndióxi, tátá yo xihín nuú Jesucristo, xitoho í ña ná caja cuaha mé á ñamaní xihín ndo ta ná caja mé á ña ná coo vaha ini ndó.

Xíca tahví Pablo nu Ndióxi saḥá na cúu cuéntá Jesús

³ Ndíquiaḥva ndivaha i ndixahvi nu Ndióxi tá ndícuḥun ini i saḥa ndo.

⁴ Níí tiempo tá xíca tahví i nu Ndióxi saḥa ndihi ndo cájii ini i.

⁵ Jáchi janda tá nandiquehe ndó íchi cuéntá Jesús ta janda viti nachindeé ndó yehe cáhan i tuhun Ndióxi xihín ñayivi.

⁶ Nacasahá Ndióxi cája ña ná nduu ndó ñayivi ndaa nu mé á ta xini vaha i ña jáxinu coo a ña janda quiaḥva ná xinu coo quiví quixi tucu Jesucristo ñuyiví yóho.

⁷ Cája i cuéntá vaha ndivaha va ndíquiaḥva i ndixahvi nu Ndióxi saḥa ndo jáchi mé a ndaa quihvi ndivaha ini i ndohó. Tá quiaḥva cája Ndióxi ñamaní xihín i quiaḥva já cája ri a ñamaní xihín mé ndó. Ta coo caja toho a tá ndacaan i vecaa. Ta coo caja toho a tá ná ndiquehe vaha i saḥa tuhun Ndióxi nuú na jutixia á tá caxi tuhun i xihín ñayivi ña mé a ndaa cúu á tuhun Ndióxi, ña cúu jácaacu ñayivi.

⁸ Ta cándaa cáxi ini Ndióxi ña quihvi ndivaha ini i ndohó tá quiaḥva quihvi ini Jesucristo ndohó.

⁹ Xíca tahví i nu Ndióxi ña ná xinu ini ndó quihvi chága ini ndó ñayivi. Ta ná

ndindíchi chága jini ndó ta ná coo chága xini túni ndo.

¹⁰ Já ná cuu caxi ndó ña vaha chága níí tiempo ta xihín ña yóho cacuu ndó ñayivi ndaa, na co ndójo cuachi tá ná xinu quiví quixi tucu Jesucristo.

¹¹ Ndítahan caja ndó ña vaha xihín ndinuhu ini ndó jáchi xihín ña yóho janaḥa ndó nuú ñayivi ña mé a ndaa cúu ndó cuéntá Jesús ta xihín ña yóho ndicáḥnu ndivaha Ndióxi.

Ná caja í ña cúni Jesucristo xihín ndinuhu ini i

¹² Candehé ndó, ñani mí i, na cúu cuéntá Jesús. Cúni ña ná cándaa ini ndó ña ndóho i vecaa yóho. Mé a ndaa saḥá ña ndacaan i vecaa yóho naḥini johu cuaha chága ñayivi tuhun vaha saḥá Jesucristo.

¹³ Tóco ndihi soldado, na ndúu vehe rey yóho xihín java ga ñayivi sa cándaa ndihi ini na ña ndacaan i vecaa saḥá ña ndíco i íchi cuéntá Jesucristo.

¹⁴ Ta saḥá ña nacandaa ini cuahá na cúu cuéntá Jesús ña ndacaan i vecaa yóho, nandindeé ini na caca nuu na caḥan na tuhun Ndióxi xihín ñayivi ta co yihví na caja na ña jáchi cándeé cáḥnu chága ini na Ndióxi viti.

¹⁵ Mé a ndaa ndúu java na xíca nuu cáhan tuhun Ndióxi nuú ñayivi saḥá ña cáhivi cuití ini na. Ta java na cája na ña jáchi cúni na cayojo na nuú i. Joo mé a ndaa java na cáhan na tuhun Ndióxi saḥá ña cúni na caja na ña vaha.

¹⁶ Joo java na cáhan na tuhun Ndióxi saḥá ña vaha mé cuití va na ta co cája na ña xihín ndinuhu ini na. Ña cúni na caja na quea jáquihvi chága na yehe nani ndacaan i vecaa yóho.

¹⁷ Joo mé a ndaa java na cáhan na saḥá Jesucristo jáchi quihvi ndusa ini na yehe ta sa cándaa ini na ña nasacu Ndióxi yehe yóho ña ná ndiquehe e saḥá tuhun vaha cáhan saḥá Jesucristo.

¹⁸ Joo co sáñni toho i mí i ndá saḥa cája na ña jáchi cájii ini i tá cáhan na saḥá Jesucristo nuú ñayivi. Ta cájii chága ini i

¹⁹ Jáchi cándaa ini i ña quee vaha i nu tóco ndihi ña ndóho i yóho saḥá ña chindeé ínima

Jesucristo yehe ta sahá ña xíca tahví ndó nu Ndióxi sahá i.

²⁰ Cándéé ini i ña a cándoó núu i. Ta ndáti tiahva i chindeé Ndióxi yehe já ná cuu cahan i sahá Jesucristo nuú ñayivi. Xihín ña cahan i yóho jánaħa i ndá quiahva cáhnu cúu Jesucristo. Ta co cája toho a á tácu u á naxihí i jáchi caja cáhnu tá caja cáhnu i Jesucristo.

²¹ Ta nani tácu u íin i ñuyíví yóho cája cáhnu i Jesucristo xihín ndinuhu ini i. Ta tá ná quivi i já vaha chága ví jáchi cuhun i coo i xihín mé á.

²² Ta co cándaħa ini i ndía vaha chága jáchi tá ná catacu u já cuu ñeħe chága íni i cahan i sahá Jesucristo xihín ñayivi.

²³ Ivi joho cáhvi ini i ña á vaha chága ná catacu u á vaha chága ná quivi i. Jáchi tá ná quivi i ivi laá xinu coo i coo i xihín Jesucristo. Ta vaha chága ná cuhun i coo i cán a juú ga ña ná coo i ñuyíví yóho.

²⁴ Joo saħa mé ndó xíní ñúhú coo tóo chága i ñuyíví yóho.

²⁵ Ta viti cándaħa vaha ini i ña coo chága i ñuyíví yóho ña ná chindeé e ndohó catiahva chága ndó tuhun Ndióxi já ná cajji chága ini ndó sahá ña cándéé ini ndó mé á.

²⁶ Sahá ña cán quea cuu cajji ini ndó sahá ña coo tucu u xihín ndó ta cuu caja cáhnu ndó Jesucristo sahá ña yóho.

²⁷ Cúni ña ná ndihi ini ndó caja ndó tá quiahva cáchi tuhun vaha cahan sahá Jesucristo. Já quea tá ná saa i á tá ná a saa toho i coto nihni i ndohó cúni ñehé e tuhun ña in cúu ndihi ndó ta ndúu ndacu ndo cuéntá Ndióxi. Ta cúni ñehé e tuhun ña in cúu ndó ndúcú ndéé ndo cahan ndó tuhun vaha sahá Jesucristo nuú ñayivi ña ná cándéé ini na mé á.

²⁸ Ta coto a quiahva ndó ñamaní nuú na ihvi ndo jan ña ná jáyihví na ndohó. Jáchi xihín ña yóho cándaħa ini na cán ña xíca na cuahan na nuú ndihi saħa ná. Joo mé ndó cándaħa ini ndó ña xíca ndó íchi nuú cacu ndaa ínimā ndo caja Ndióxi.

²⁹ Jáchi sahá ña naçaja Jesucristo ñeħe táhvi ndó cándéé ini ndó mé á. Ta quiahva já ñeħe táhvi ri ndó ndóho ini ndó sahá ña cándéé ini ndó mé á.

³⁰ In nuú ndóho ini sahá Jesucristo. Sa naxini ndó ndá quiahva nandoho ini i ji-

hna. Ta sa ñeħe ndó tuhun ndá quiahva ndóho ini i viti.

2

Nanduu Jesucristo ñayivi vatí cúu á Ndióxi

¹ Xíní vaha i ña sahan Jesucristo tuhun ndeé ini ndó ta quihvi ini a ndohó. Xíní vaha i ña in nanduu ndó jáchi ndacaan ínimā yii Ndióxi ini ínimā ndo. Xíní vaha i ña quihvi ini táhan ndó ta táhnda ini saħa táhan ndó.

² Sahá ña cán quea ndítahan caja ndó ña ná cajji ndivaha ini i sahá ña in cúu ndihi ndó ta sahá ña quihvi chága ini táhan ndó. Ta sahá ña in nanduu ndó naçaja ínimā yii Ndióxi já in nanduu xíní túni ndo nuú ña cúni ndó caja ndó.

³ Coto a ndúcú cuachi xihín táhan ndó. Ta coto a ndíñeħe jícó ndo mé ndó. Ndítahan coo ndisáħnu ini ndó. Ta ndítahan caħán ndo ña cáhnu chága inga ñayivi a juú ga mé ndó.

⁴ Ta co ndítahan ndihi ini ndó sahá ña vaha mé ndó cuití va. Xíní ñúhú ndihi ri ini ndó sahá ña vaha inga na.

⁵ Xíní ñúhú cahvi ini ndó tá quiahva naçacahvi ini Jesucristo.

⁶ Jáchi tá quiahva íin Ndióxi quiahva já íin Jesucristo. Ta vatí cúu á Ndióxi joo coo nandaja cáhnu a mé á vatí cuu caja ña, nduu.

⁷ Ña naçaja Jesucristo quea naçacu xóo a tóco ndihi ña cáhnu cúu mé á cán ta naquixi a naçacu a ñuyíví yóho tá quiahva cacu ñayivi. Ta naçacuu a in dataa, da cája chúun cuéntá xitoho da.

⁸ Tá nandihí nanduu a ñayivi já najánuu a mé á janda quiahva naçahan mé á quivi a ndica crúxu nuú naxihí a tátuhun da cája cuachi quini.

⁹ Sahá ña cán quea najándindita jícó ndivaha Ndióxi Jesucristo ta naçahan in quivi á nu á ta quivi Jesucristo yóho quea cáhnu chága nu tóco ndihi quivi.

¹⁰ Sahá ña cán quea tóco ndihi na ndúu indiví xihín na ndúu ñuyíví cuni joho na quivi Jesucristo ta já ndaca xítí na nu á. Ta janda na ndúu tixi ñúħu ndaca xítí na nuú Jesucristo ña caja cáhnu na mé á.

11 Anda jáví cahan in in na cán ña cúú Jesucristo xitoho na ta xihín ña yóho ndícáhu ndivaha Ndióxi, tátá yo.

Na cúú cuéntá Jesús cúú ná tátuhun ñúhu, ña jándiyehé ñuyíví yóho

12 Candehé ndó ñani mí i, na cúú cuéntá Jesús. Tá quiahva nacandúsa ndó caja ndó ña nasahnda i nu ndo tá nasahin i tañu ndó jan quiahva já ndítahan candúsa chága ndó yehe viti nani in xíca i nu ndo. Xíní ñúhú ndíhi ini ndó caja ndó ña cúni Ndióxi jáchi najáca a ndohó. Ta xíní ñúhú cayihví ndó Ndióxi nani cája cáhnu ndó a xihín ndinuhu ini ndó.

13 Jáchi Ndióxi quéa cája ña xíca ini ndó cája ndó ña vaha ta chindeé a ndohó cája ndó ña táhan ini mé á xihín.

14 Ta a cahan cuachí ndo saha tóco ndihi ña cája ndó. Ta ni a ndítuhún ihvi xihín táhan ndó.

15 Já ná nahá ña cúú ndó ñayivi vií, na coó cuachi. Ndítahan caja ndó tá quiahva cája na cúú jahyi Ndióxi, na co cáquini xihín cuachi ña cája ñayivi quini cuéntá ñuyíví yóho. Cúú á tátuhun ndíyihvi ndaa ndó xihín ña vaha cája ndó tá quiahva ndíyihvi ndaa quimi indiví.

16 Jáchi cahan ndó tuhun vaha sahá Jesucristo nuú ñayivi já ná cuu catacu na anda ama cáa quívi. Tá ná caja ndó ña yóho já quéa cajii ini i xihín ndó tá ná xinu quívi quixi tucu Jesucristo. Jáchi xihín ña yóho candaa ini i ña a juú ña uun nasacuu chuun nacaja i.

17 Ta vatí ná ndiquiahva i mí i quivi i saha ndo joo cajii tá cajii ini i. Jáchi tá ná quivi i cúú á tátuhun catáhan i xihín ña jocho ndó nu Ndióxi sahá ña candeé ini ndó mé á. Ta sahá ña yóho cajii ini i ta in nuú cajii ini ndihí.

18 Sahá ña cán quéa ndítahan cajii ini mé va ndó já ná cajii ini ndihí.

Sácú ini Pablo chindahá da Timoteo xihín Epafrodito nuú na ñuu Filipos

19 Ta cúni Jesucristo, xitoho í chindahá yachi i Timoteo nu ndo ña ná cañehe da tuhun saha ndó nuú i. Anda jáví cajii ini i tá ná candaa ini i saha ndo.

20 Mé a ndaa quíhvi ini da ndohó ta coó ga inga da ñúhu ini saha ndo tá quiahva ñúhu ini yehe saha ndo.

21 Jáchi java ga na cúú cuéntá Jesús ndícani ini na sahá ñaha mé va na ta co ndícani ini na sahá ñaha cuéntá Jesucristo.

22 Joo sa xíní ndó ña cúú Timoteo ta vaha ndivaha ta sa candaa ini ndó ndá quiahva chindeé da yehe nu xíca i cahan i tuhun Ndióxi xihín ñayivi. Cúú dá tátuhun jahyi i jáchi chindeé cuahá da yehe.

23 Sahá ña cán quéa sácú ini i chindahá i da nu ndo tá sa nacandaa ini i ndaja cá sahá i.

24 Ta candeé ini i ña quiahva Ndióxi ñamaní nuú i saa yachi mé vi coto nihni i ndohó jan.

25 Cája i cuéntá xíní ñúhú chindahá i ñani Epafrodito ña ná ndicó coo tucu da nu ndo jáchi mé ndó nachindahá ndó da nuú i ña ná chindeé da yehe. Ta mé a ndaa cuahá ndivaha nachindeé da yehe janda quiahva nandoho ini da xihín i.

26 Joo viti xíca ndivaha ini da cuni ndihi da ndohó. Ndícani ini da saha ndo jáchi nañehé ndó tuhun ña sa naquihvi da.

27 Ta mé a ndaa nandoho da cuehe ta jalóho quivi da, nduu. Joo nacaja Ndióxi ñamaní xihín da ta já nandivaha da. Ta xihín ña yóho nacaja ri mé á ñamaní xihín yehe ña ná a cácuéha chága ví ini i jáchi sa in cuaha ña ndóho i viti.

28 Sahá ña cán quéa chindahá númí i da ña ná saa quí dá nu ndo já ná cajii ini ndó cuni tucu ndó da ta xihín ña yóho ndivaha ri ini yehe va.

29 Ndítahan cajii ini ndó ndiquehe ndó da jáchi cúú dá ñani ndó da cúú cuéntá Jesús. Ta ndítahan coo toní ñúhú ndó xihín tóco ndihi na cája tá quiahva cája mé dá.

30 Jáchi mé a ndaa jalóho quivi da sahá chuun nacaja da cuéntá Jesucristo. Cuahá ndivaha tondóho naquixi nu dá sahá ña nachindeé da yehe jáchi nacaja mé dá ña a cúú caja mé ndó yóho sahá i.

3

Ña ún chága saha nu Ndióxi

1 Candehé ndó ñani mí i, na cúú cuéntá Jesús. Xíní ñúhú cajii ini ndó xihín ña cája Ndióxi. Co cája toho a nu mí i cáhyí ivi tucu u ña sa nacahyí i nu ndó jihna jáchi chindeé a ndohó.

² Cuéntá coo ndó xihín ñayivi quini, na xíca cája ña núu jan. Jáchi jánaha na ña ndítahan cahnda ndó yiquí cuñu ndó ña ná chícaan ndó marca yiquí cuñu ndó já ná cacuu ndó cuéntá Ndióxi.

³ Joo mí co cándusa í ña cúu yó cuéntá Ndióxi sahá ña sáhdá yo yiquí cuñu í vatí mé a ndaa cúu yó tátuhun na naquihvi marca yiquí cuñu sahá ña cája cáhnu í Ndióxi jáchi ndácaan ínima yí mé á ini ínima yo. Ta viti cájji ini yo sahá ña cúu yó cuéntá Jesucristo. Co cándeé ini ña cája í

⁴ vatí mí í cuu cachi í ña cándeé ini í ñaha naçaja í, nduu. Jáchi nasacaja í ña cáhí ley xihín ndinuhu chága ini í a juú ga inga na.

⁵ Jáchi tá naxinu una quiví nacacu u já nachicaan na marca jan yiquí cuñu í. Ta mí í cúu u da Israel, da naquixi chichi Benjamín. Ta tátá náná í naquixi na chichi Israel ta cáhan nde tuhun hebreo. Ta nasandico í táhan da cúu fariseo, da sácú vaha ley Moisés. Ta naçaja í tóco ndihi ña nasahnda ley Moisés.

⁶ Nasandico cáhnu ndivaha í ichi cuéntá na fariseo cán sahá ña cán quéa nacasahá nandicuíta í cája xíxi í xihín na cúu cuéntá Jesús. Xihín ndinuhu ini í naçaja í tóco ndihi ña cáhí ley sahá ña cán quéa ni in na coo nacuu chícaan na cuachi jatá í saha ley Moisés.

⁷ Tóco ndihi ña yóho nasacuu a ña náhnu ndivaha nuú í. Joo viti coo sahá ga ña cán nuú í jáchi nacasahá cándeé ini í Jesucristo.

⁸ Ta mé a ndaa yahvi chága ña cándeé ini í Jesucristo a juú ga tóco ndihi ña naçaja í jihna. Sahá ña cúni candaá chága ini í sahá Jesucristo, xitoho í sahá ña cán quéa najándacoo í tóco ndihi ña naçaja í cán. Ta tóco ndihi ña cán cúu á tátuhun xehe ta coo sahá toho a nuú í viti jáchi cúni candico chága í Jesús.

⁹ Ta cúni cacuu u in da in ná nduu xihín Jesucristo. Joo co ndati í nduu ndaa í nu mé á sahá ña sácú vaha í ley Moisés jáchi xini vaha í ña cája Ndióxi ña ná nduu ndaa í nu mé á sahá ña cándeé ini í Jesucristo cuití va.

¹⁰ Ña cúni quéa candaá chága ini í sahá Jesucristo. Ta cúni ña ná chutú ndaa ínima í xihín ndée Ndióxi, mé ndée ña naçaja ña nanditacu tucu Jesucristo. Ta cúni ndoho ini í tá quiahva nandoho ini mé á tá naxihi

a ndica crúxu.

¹¹ Já quéa ndati í xinu coo quiví nditacu u tá ná nditacu na sa naxihi.

Ndítahan nducú ndée yo janda quiahva ná xinu coo í ndiquehé ña quiahva Ndióxi nu yo

¹² Co cúni cachi í ña sa naquee vaha vi. Ni co cúni cachi í ña sa naxinu coo í cúu u in taa ndaa tátuhun cúni Ndióxi. Ña cája í quéa ndíhi ini í jáxinu coo í cacuu u in da cája tá quiahva cúni Jesucristo jáchi sahá ña cán najácacu a yehe.

¹³ Candehé ndo ñani í, na cúu cuéntá Jesús. Co cúni cachi í ña sa nanduu u tá quiahva cúni mé á. Ña cája ndusa í quéa ndíndójó í sahá ña nasacaja í jihna ta ndíhi ini í jáxinu coo í cája í ña sácú ini Ndióxi caja í.

¹⁴ Já caja í janda quiahva ná xinu coo í ndiquehe e ña sácú ini Ndióxi quiahva nuú í sahá ña naçaja Jesucristo. Jáchi cána Ndióxi yehe cuhun í coo í indivi xihín mé á.

¹⁵ Tóco ndihi mé ndó, na sa nandindacú xihín ña cándeé ini ndó Ndióxi, xini ñúhú cahvi ini ndó tá quiahva cahvi ini yehe. Ta tá co cahvi ini ndó tá quiahva cahvi ini yehe já quéa jándiyéhe Ndióxi xini túni ndo ña ná cajji ini ndó xihín á.

¹⁶ Joo ndítahan nu yo caja í ña ndaa, ña coo najándacoo í cája í anda viti.

¹⁷ Candehé ndo ñani í, na cúu cuéntá Jesús. Ndítahan candehé ndo ndá quiahva cája yehe ña ná caja ndó ña. Ta ndítahan candehé ndo ndá quiahva cája java ga na sa najánaha nde jáchi nacatiahva na cája na tá quiahva cája mé nde.

¹⁸ Sa cuahá ndivaha tañu naçachi í ña yóho xihín ndó ta viti táhvi ticuú nuú í cáhan tucu u ña xihín ndo. Ndúu cuahá ñayivi ta cáhí na cúu ná cuéntá Jesús joo cája na tátuhun na co cándusa ña naxihi Jesucristo ndica crúxu.

¹⁹ Joo vaxi quiví ndihi saha ná anda ama cáa quiví sahá ña núu cája na jáchi a juú quiahva ndíhi ini ná sahá ña xíxi na. Ta ndíñehe jícó na mé ná sahá ña núu cája na ta chí coo a cáchan nuu ná. Ñaha ñuyiví yóho cuití va cahvi ini na saha.

²⁰ Joo mí cúu yó ñayivi cuéntá Ndióxi, na canduu indivi xihín mé á. Ta ndati tiaha í

ña quixi Jesucristo, xitoho í chí indiví, mé á jácaacu mí.

²¹ Ta ndijama mé á yiquí cuñu í, ña nacavitá já ná nduu a tátuhun yiquí cuñu mé á jáchi cáhnu ndivaha cúu á. Ta ndijama mé á mí xihín ndée a jáchi mé á sáhndá chuun nu tóco ndihi ñaha xihín ndée á.

4

Xíní ñúhú cajji ini ndó xihín ña cája Ndióxi xihín ndo

¹ Candehé ndo ñani mí i, na cúu cuéntá Jesús. Xíca ndivaha ini i cuni i ndohó jáchi quíhvi ini i ndohó. Ta cájji ndivaha ini i xihín ndo jáchi co cácahan nuu i saha ndo. Cúni ña ná candico ndacú ndo íchi cuéntá Jesucristo, xitoho í.

² Xíca tahví i nu Evodia xihín nu Síntique ña ná ndique táhan vaha na jáchi in quíhvi cúu ná cuéntá Jesús.

³ Ta xíca tahví i nu mún, da cája chúun tuun xihín i ña ná cajún ñamaní cahún xihín ndíví quiahva i jan ña ná ndique táhan mání ná. Jáchi ndíví na jan nachindeé cuahá na yehe tá naxica nuu i nacahan i tuhun Ndióxi, mé tuhun cúu jácaacu ñayivi. Ta quiahva já nachindeé ri ñaní, da naní Clemente yehe. Ta java ga da cúu cuéntá Jesús nachindeé táhan na xihín i. Sa ndáa va quivi ná nu libro nu ndáa quivi tóco ndihi na catacu anda ama cáa quivi.

⁴ Níi tiempo ndítahan cajji ini ndó xihín ña cája Ndióxi xihín ndo. Á sa xíní joho ndó. Níi tiempo ndítahan cajji ini ndó.

⁵ Ta xihín ña yóho candaa ini tóco ndihi ñayivi ña cúu ndó ñayivi vaha ini. Sa nacayati quivi quixi tucu Jesucristo, xitoho í.

⁶ A ndícani nahá ini ndó sahá ni in ñaha. Ña ndítahan caja ndó quéa caça tahví ndo nu Ndióxi níi tiempo ta ndícani ndó nu mé á ndaja cáa ña ndóho ndó. Caça tahví ndó nu á ta a ndíndójo ndo ndiquiahva ndó ndixahvi nu mé á.

⁷ Anda já caja Ndióxi ña ná coo vaha ini ndó ta cáhnu chága ña yóho a juú ga tóco ndihi ña cuu candaa ini ñayivi. Ta tá ná caja Ndióxi ña ná coo vaha ini ndó já quéa chindeé a ndohó já ná ndíndacú ínima ndo

xihín xíní túni ndo sahá ña in nanduu ndó xihín Jesucristo.

Xíní ñúhú cahvi ini ndó caja ndó ndinuhu ña vaha

⁸ Jandá ña yóho cuití va cúni cahan i xihín ndo, ñani i, na cúu cuéntá Jesús. Xíní ñúhú cahvi ini ndó sahá ña ndaa ta sahá ña cuu coo toní ñúhú ndó xihín. Ta xíní ñúhú cahvi ini ndó sahá ndaja caja ndó ña ndaa. Ta xíní ñúhú cahvi ini ndó sahá ñaha víi. Ta xíní ñúhú cahvi ini ndó sahá ñaha cuu cajji íni ñayivi xihín, ña cuu cahan vaha na saha. Ta xíní ñúhú cahvi ini ndó sahá ña vaha cuu caja ndó ña ná cuu caja cáhnu ñayivi Ndióxi saha.

⁹ Caja ndó tóco ndihi ña najánaaha i nu ndó caja ndó. Ndítahan caja ndó ña naxini joho ndó nacahan i xihín ña naxini ndó nacaja i. Ta ná coo Ndióxi xihín ndo ta mé á quéa caja ña ná coo vaha ini ndó.

Na cúu cuéntá Jesús ndúu ñuu Filipos chindeé na Pablo

¹⁰ Cájji ndivaha ini i ta ndíquiahva i ndixahvi nu Jesucristo, xitoho í jáchi nandicuhun tucu ini ndó sahá i. Co cúni cachi i ña sa nandindójo ndó sahá i, vaha. Ña cúni i cachi i quéa co núná nu ndo chindeé ndó yehe.

¹¹ Co cahan i ña yóho xihín ndó sahá ña ndímaní ñaha nuú i jáchi sa nacatiahva i cájji íni i xihín ña íni nuú i.

¹² Sa xíní coo ndáhvi ndivaha i ta sa xíní i coo cuahá ndivaha ñaha nuú i. Nacatiahva i coo ndée ini i nu tóco ndihi ña quíxi nuú i. Sahá ña cán quéa íni vaha ini i vatí íni cuahá ña cuxu u á coó a. Ta vatí yójo ñaha nuú i á ndímaní ña nuú i íni vaha ini i.

¹³ Sahan ndée ini i nu tóco ndihi ña quixi nuú i jáchi Jesucristo quéa chindeé a yehe caja i ña.

¹⁴ Joo vaha nacaja ndó jáchi nachindeé ndó yehe tá nandoho ini i sahá ña nandímaní nuú i.

¹⁵ Sa xíní ndó ña in túhún mé ndó, na cúu cuéntá Jesús ndúu ñuu Filipos jan cúu ndó na nachindeé yehe tá naquee e cahan i chí Macedonia cahan i tuhun Ndióxi, ña cuu jácaacu ñayivi. Ta nacaja ndó ña yóho jáchi nacamaní ndó yehe sahá ña nachindeé e ndohó xihín tuhun Ndióxi.

¹⁶ Jáchi tá ñasah̄iin i ñuu Tesalónica cán já ñachindahá ta ñachindahá ndó ñaha ñandimaní nuú i. Ta a juú in tañu cuití va ñacaja ndó ña.

¹⁷ Cọ cáhan i ña yóho xih̄in ndọ sahá ña cún̄i ñehe cuití v̄i ñaha. Ña cún̄i quéea ná chah̄vi Ndióxi sahá ñaman̄i ñacaja ndó.

¹⁸ Ta viti coó ga ñaha ndíman̄i nuú i. Janda yójó johó a nuú i viti xih̄in tóco ndihi ña ñachindahá ndó xih̄in Epafrodito ñéhe da ñaquixi da nuú i yóho. Tóco ndihi ña ñachindahá ndó nuú i yóho cúú á ña cájīi ndivaha ini Ndióxi xih̄in. Cúú á tátuhun jóco ndó in ña támi sáhan nu mé á.

¹⁹ Ta Ndióxi, mé a cája cáhnu i chindeé a ndohó ná a ndíman̄i ga ni in ñaha nu ndọ. Jáchi cuahá ndivaha ña cuicá cómi Ndióxi ta quiah̄va mé á ña nu ndọ sahá ña cúú ndó cuéntá Jesucristo.

²⁰ Cáhnu ná cacuu Ndióxi, tátá yo anda ama cáa quiv̄i. Já ná coo.

Ndín̄ayí Pablo na cúú cuéntá Jesús

²¹ Sahá ña in cúú yó cuéntá Jesucristo chindahá i Ndióxi coo tóco ndihi na cúú cuéntá mé á cán. Ta ñaní, na cúú cuéntá Jesús ndúu xih̄in i yóho chindahá na Ndióxi coo ndó.

²² Ta jári java ga na cúú cuéntá Ndióxi ndúu chí yóho chindahá na Ndióxi coo ndó. Ta na chindahá chága ví Ndióxi coo ndó cúú na cája chúun vehe da cómi cuéntá sahá ñuu Roma.

²³ Ná caja Jesucristo, xitoho í cuahá ñaman̄i xih̄in tóco ndihi ndó. Já ná coo.

Carta nachindahá Pablo nuú na cúu cuéntá Jesús ñuu Colosas

Chíndahá Pablo Ndióxi coo na cúu cuéntá Jesús ñuu Colosas

¹ Yehe cúu Pablo, da nandicaxi Ndióxi cacuu u apóstol cuéntá Jesucristo. Ta yóho ín Timoteo, ñaní, da cúu cuéntá Jesús.

² Chíndahá nde carta yóho nu ndo, na cúu cuéntá Ndióxi ndúu ñuu Colosas jan. Jáchi cúu ndó na cúu cuéntá Jesucristo, na cándeé cáhnu ini mé á. Ña cúní nde quéa ná caja cuaha Ndióxi, tátá yo ñamaní xihín ndo ta ná caja ña ná coo vaha ínima ndo.

Xíca tahví Pablo sahá na cúu cuéntá Jesús cán

³ Níi tiempo ndiquiahva nde ndixahvi nu Ndióxi, mé a cúu tátá Jesucristo, xitoho í tá xíca tahví nde nu mé á saha ndo.

⁴ Jáchi sa ñañehé nde tuhun ña cándeé ini ndó Jesucristo ta ñañehé nde tuhun ña quíhvi ini ndó tóco ndihi na cúu cuéntá mé á.

⁵ Ta cája ndó ña yóho jáchi sa ñacandaa ini ndó ña ndaa sahá Jesucristo ta ndáti ndó ndiquehe ndó ña quiahva Ndióxi nu ndó indiví. Ta janda naní ñaxini johó ndó tuhun vaha cáhan sahá Jesucristo já ñacasáhá cúní ndó cuhun ndó indiví.

⁶ Mé tuhun vaha ñaxini johó ndó sahá Jesucristo yóho ñacasáhá ndícuíta nuu a nuú ñayivi ta cuahá na sa cándúsa ña ndijáá níi cúu saha ñuyíví. Ta tóco ndihi na cán cája na tá quiahva ñacaja mé ndó tá ñaxini johó ndó ña quíhvi ini Ndióxi ndohó ta já ñacandaa ini ndó ña mé a ndaa táhyí quíhvi ini Ndióxi ndohó.

⁷ Ña yóho quéa najánaaha da naní Epafra nu ndo. Mé a ndaa quíhvi ini nde da jáchi in cúu da cája chúun da xihín nde ta mé a ndaa ñacaja chúun da nu mé ndó xihín ndinuhu ini da tá najánaaha da ndohó tuhun Ndióxi.

⁸ Ta tá ñaquixi da yóho já ñacaxi tuhun da xihín nde ña cája ínima yíi Ndióxi ña quíhvi ini ndó na cúu cuéntá Jesús.

⁹ Ta janda naní ñacandaa ini nde saha ña cája ndó já ñacasáhá xíca tahví nde nu Ndióxi saha ndó ndijáá níi quívi. Ta xíca tahví nde nu á ña ná naaha nu ndo ña cúní mé á caja ndó. Ta xíca tahví nde nu á ña ná quiahva mé á ndaja táhan ña ndichí nu ndo ta ná caja mé á ña ná candaa ini ndó tóco ndihi ñaha cuéntá mé á.

¹⁰ Já quéa ná cuu caja ndó tá quiahva ndítahan caja ndó jáchi cúu ndó ñayivi cómí Ndióxi cuéntá saha. Níi tiempo xíní ñuhú caja ndó ña cájii ini mé á xihín. Ta quiahva já xíní ñuhú naaha ndó ña cája tá cája ndó ña vaha xihín ñayivi ta quiahva já xíní ñuhú candaa chága ini ndó saha Ndióxi.

¹¹ Ta quiahva já xíca tahví nde nu Ndióxi ña ná ndaja ndacú a ndohó xihín ndeé cáhnu ndivaha mé á já quéa cuu caja ndeé ini ndó tajá a ndíhi ini ndó tá ná quixi cuahá tondóhó nu ndo. Ta cajii ini ndó

¹² ndiquiahva ndó ndixahvi nu Ndióxi jáchi ñasacu tiaha mé á ndohó ña ná ndiquehe ndó ña ñasacu ini mé á quiahva nu tóco ndihi na cúu cuéntá mé á tá ná xinu coo na nu yéhe ndivaha nuú cacomí mé á cuéntá saha ná.

¹³ Ñasanduu yó nuú naá ndivaha ta cán ñatavá Ndióxi mí ndáha ña quini ta ñandiquiahva mé a mí ndáha Jesucristo, jahyi máni á ña ná cacomí a cuéntá saha yo.

¹⁴ Ta mé Jesucristo najácacu a mí tá ñaxihí a ndica cruxu ta ñacaja cáhnu ini a sahá cuachí.

Jesucristo cúu á jini nu tóco ndihi ñaha

¹⁵ Ta Jesucristo cúu yuhú nuu Ndióxi, ña a cuú cuni tívi ta janda tá cámaní casáhá cavaha Ndióxi ñuyíví yóho sa ín jahyi a, Jesucristo.

¹⁶ Ta sa mé Jesucristo ñacavaha tóco ndihi ñaha ndúu ñuyíví yóho xihín ña ndúu indiví. Ta mé á ñacavaha tóco ndihi ña xíní xihín nuu yo xihín ña a cuú cuní. Ta ñacavaha mé á tátó Ndióxi, ña cómí chuun cuéntá Ndióxi ta ñacavaha java ga tátó a, na ín cuaha ndeé cahnda chuun. Tóco ndihi ña yóho ñacavaha Jesucristo ña ná cacuu a ñaha mé á.

¹⁷ Ta sa ín va mé á tá cámaní cava sahá saha tóco ndihi ñaha ta cája mé á ña ná cuu canduu tóco ndihi ñaha indiví xihín ñuyíví.

18 Ta cúú á jini nu tóco ndihi na cúú cuéntá mé á, na cúú tátuhun yiquí cuñu a. Ta mé a cán caja ña ná ndihvi ñayivi íchi mé á catacu na xihin ndée a jáchi anda saha nasahjin mé á ta jihna ñúhú nanditacu tucu a tañu na sa naxihi. Ta xihin ña yóho naxinu coo a nanduu a jini nu tóco ndihi ñaha.

19 Tá quiahva cáa Ndióxi quiahva cáa ri Jesucristo jáchi já cuni Ndióxi coo.

20 Ta cuni ri Ndióxi ndique táhan máni tucu a xihin tóco ndihi ña nacavaha. Ña cán quéa naxihi Jesucristo ndica cruxu já ná cuu ndique táhan máni tóco ndihi ña ndúu ñuyivi xihin indivi xihin Ndióxi.

21 Mé ndó nasanduu xíca ndo nu Ndióxi ta naxini ihvi ndó a jáchi ndinuhu ña núu nasacahvi ini ndó caja ndó, nduu. Joo viti najándique táhan máni Ndióxi ndohó xihin mé á

22 sahá ña nacaja Jesucristo, jahyi a tá naxihi yiquí cuñu a ndica cruxu. Já nacaja mé á ña ná cuu xinu ndó canduu vii ndó nu á. Ta nandiquiahva mé á ndohó ndáha Ndióxi já ná cacuu ndó ñayivi vii, na coo ga cuachi nu á.

23 Joo xini ñúhú candeé cáhnu ini ndó Jesús ta a jándacoo xóo ndó ña ndati ndó quiahva Ndióxi nu ndo. Jáchi tá naxini johó ndó tuhun vaha sahá Jesucristo já nacandaa ini ndó ña cuu jácaacu a ndohó. Ta sa mé tuhun yóho ndicuita nuu ndijáá níi cúú saha ñuyivi ta yehe cúú da chindeé táhan jándicuita nuu a nuú ñayivi.

Cája chuun Pablo cuéntá na cúú cuéntá Jesús

24 Ta viti cájii ini i jáchi ndóho ini i saha ndo ta ña cája i quéa jáxinu coo i ña nasacu ini Jesucristo ndoho i sahá na cúú cuéntá mé á, na cúú tátuhun yiquí cuñu a.

25 Nandaja Ndióxi yehe ña ná nduu u in da caja chuun nuu na cúú cuéntá Jesús. Jáchi nasahan mé á chuun yóho nuú i ña ná chindeé e ndohó sahá ña jánahá cáxi i tuhun Ndióxi nu ndo.

26 Ta jandá tá nacava sahá saha ñuyivi nasahjin jehé a nuú ñayivi joo viti najánaha Ndióxi nuú na cúú cuéntá mé á ña nasahjin jehé jihna.

27 Ta viti sácú ini Ndióxi nahá nuú na cúú cuéntá mé á ndá quiahva nahnu ñamaní cuni caja mé á xihin na tóho. Ta ña nasahjin jehé cúú ña yóho: ndácaan Jesucristo ini inima ndo ta xihin ña yóho vaxi quivi ndicáhnu ndó xihin mé á.

28 Cáxi tuhun nde nuú ndihi ñayivi sahá Jesucristo. Ta jácahan nde na ña ná a cája na cuachi. Ta xihin ndinuhu ini nde jánahá nde nu ná ña ndítahan caja na já ná nduu na ñayivi ndaa nu Ndióxi sahá ña nacaja Jesucristo.

29 Ta ña yóho cúú chuun ndúcú ndée e caja i xihin ndée cáhnu sahan Jesucristo nuú i.

2

1 Cuni ña ná candaa ini ndó ña ndúcú ndée e xíca tahvi i nu Ndióxi saha ndó xihin sahá na cúú cuéntá Jesús ndúu ñuu Laodicea. Ta quiahva já ndúcú ndée e xíca tahvi i nu Ndióxi sahá na cúú cuéntá Jesús, na a ñaha cuni táhan xihin i.

2 Ndúcú ndée e xíca tahvi i nu Ndióxi saha ná já ná ndihvi ndée Ndióxi ini inima na ta in ná nduu na sahá ña quihvi ini táhan na. Ta xíca tahvi i nu Ndióxi ña ná candaa vaha ini ná ña ndaa sahá Jesucristo, ña mé a ndaa ndiyahvi ndivaha. Jáchi ña nasahjin jehé jihna najánaha Ndióxi nu ná viti ta ña yóho cúú Jesucristo.

3 Ta mé Jesucristo cándaa ini a tóco ndihi ñaha. Cándaa ini a ndía quéa ña núu ta ndía quéa ña vaha ta cuni mé á ña ná candaa ri ini mé ví ña jan.

4 Cáxi tuhun i ña yóho xihin ndó ná a jándahvi inga na ndohó jáchi ndúu java na ta ndató ndivaha cáhan na joo cúú ná na jándahvi ñayivi.

5 Ta vatí coo in mí i xihin ndo nu ndúu ndó jan joo ñúhu ini i saha ndo níi tiempo. Ta cájii ini i tá xini i ña ndúu vii xihin táhan ndó. Ta cájii ini i sándehe e ña coo jándacoo ndó ña candeé ini ndó Jesucristo.

6 Tá nandiquehe ndó íchi cuéntá Jesús já nanduu mé á xitoho ndó. Ta viti ndítahan nu ndó caca nuu ndó xihin á ndijáá níi quivi.

7 Xini ñúhú cativi tuun ndó Jesucristo já ná quiahva mé á ndée á nu ndo. Xihin tuhun Ndióxi ña najánaha nde nu ndó jan

ndítahan candeé chága ini ndó Jesucristo. Ta ná a jándacoo ndó ña ndíquiahva ndó ndixahvi nu mé á.

Íchi saá xíca í viti

⁸ Cuéntá coo ndó ná a jándahvi na ndohó xihín ña tuhún cúní nā jánaḥa nā nu ndo. Jáchi náḥa ña quíxi a nu Ndióxi joo cúú á ña quíxi jiní mé va na cuití va. Ta cáhan nā saḥá ña jánaḥa ñayivi ñuyíví ta co cúú á ña jánaḥa Jesucristo nu yo.

⁹ Tá quiahva cáa Ndióxi quiahva já cáa Jesucristo vatí nanduu a in ñayivi.

¹⁰ Ta nandicutú ndaa mé ndó xihín mé á jáchi in nanduu ndó xihín Jesucristo, mé a sáhdá chuun nu tóco ndihi nā cómí cuéntá saḥá indiví xihín ñuyíví yóho.

¹¹ Ta saḥá ña in nanduu ndó xihín Jesucristo saḥá ña cán quéa nanduu ndó ñayivi cuéntá mé á ta cúú á tátuhun nachicaan Ndióxi marca ndohó ta co cúú á tátuhun marca chícāan ñayivi yiquí cuñu na. Ña cája Jesucristo quéa jácaxoo a mí nuú cuachi já quéa ná a cája ga yó ña.

¹² Jáchi tá naandúta ndo cuéntá Jesucristo já nasacuu a tátuhun naxihí ndó ta nanduxu ndó xihín Jesucristo jáchi najándacoo ndó cuachi naçaja ndó. Ta tá nanditacu mé á nasacuu a tátuhun nanditacu ri mé va ndó xihín á saḥá ña cán quéa cúú ndó ñayivi saá viti jáchi naçandéé ini ndó ña in ndée Ndióxi caja ña ná nditacu Jesucristo.

¹³ Jihna nasacuu ndó tátuhun ndii saḥá cuahá cuachi naçaja ndó ta saḥá ña coo naçeen ndó caja ndó ña sáhdá Ndióxi. Ta nasacaja ndó tá quiahva cúní mé va ndó jáchi nasacomí cuachi cuéntá saḥa ndo. Joo viti naçaja Ndióxi ña ná ñeḥe táhvi ndó catacu ndó xihín Jesucristo ta naçaja cáhnu ini a saḥa tóco ndihi cuachi ndó.

¹⁴ Nasacomí yo cuachi nu Ndióxi jáchi naquehe núu í ña nasahnda mé á caja í. Ta ndácaan cuachi jata yó naçaja ley joo najándoo Ndióxi cuachí tá naxihí Jesucristo ndica crúxu saḥa yo.

¹⁵ Ta tá naxihí a ndica crúxu já naquee vaha mé á xihín tiñáhá saçuaḥa ta naquee vaha mé á xihín rí quini, rí sáhdá chuun nuú ñayivi ñuyíví. Ta saḥá ña najácacahan Jesús nuu ri nuú ñayivi saḥá ña cán quéa a

cuú chinúu ga rí cuachi jata yó viti. Xihín ña naçaja Jesucristo yóho najánaḥa Ndióxi nu yo ña a cuú ga caja tiñáhá saçuaḥa ni in ñaha xoḥo.

Ndítahan ndinducú yo ñaha in indiví

¹⁶ A quéhe ndó cuéntá saḥá ñayivi tá ná candeḥé ndaa na ndohó saḥá ña xíxi ndó á saḥá ña xíhi ndó. Ta ni a quéhe ndó cuéntá tá sándeḥé ndaa na ndohó saḥá ña co cája ndó víco cája mé ná ta ni saḥá ña co cája ndó víco quiví cája cáhnu na yoḥo saá. Ta ni a quéhe ndó cuéntá tá sándeḥé ndaa na ndohó saḥá ña co cája cáhnu ndó quiví ndíquehe ndée nā.

¹⁷ Saḥá tá cámaní cacu Jesucristo já nasahnda Ndióxi chuun nuú ñayivi ña ná caja na ley Moisés joo coo chuun a viti jáchi sa najáxinu coo Jesucristo tóco ndihi ña nasahnda ley Moisés.

¹⁸ A cándúsa ndó ñayivi tá cáchí nā xihín ndó ña cuḥun ndó indayá saḥá ña co cája ndó ña cáchí mé ná. Cája cáhnu na táto Ndióxi ta saḥá ña jan ndája toḥo ndivaha na mé ná. Ta cáchí nā naçahan tívi Ndióxi xihín ná saḥá ña cán quéa ndíñeḥe jíco ndivaha na mé ná. Xíní túní nā yóho cúú á xíní túní ñayivi ñuyíví cuití va.

¹⁹ Jáchi co xíca tuun nā jan xihín Jesucristo, mé a cúú jiní nu mí. Mé á sahan ndée á nu yo cuahnu í ta jándique táhan mé á mí xihín á tá quiahva nasacu ini Ndióxi.

²⁰ Tá naxihí Jesucristo ndica crúxu já cúú á tátuhun naxihí ndó nuú cuachi, jáchi co cómí ga ñaha ñuyíví yóho cuéntá saḥa ndó viti. Saḥá ña cán quéa co ndítahan nu ndó caja ndó tá quiahva cája ñayivi ñuyíví yóho. Co ndítahan caja ndó ña cáchí nā xihín ndo tátuhun ña yóho:

²¹ “A tীন toho ndó ña jan. A cáxí toho ndó ña cáa. A cáni ndaa ndáḥa ndó ña yóho”, cáchí nā xihín ndó.

²² Tóco ndihi ña yóho ndihi saḥa. Tóco ndihi ña cája na yóho cúú á ña sáhdá ñayivi ñuyíví cuití va ta co cúú á ña naquixí nu Ndióxi.

²³ Jáchi tóco ndihi ña jánaḥa nā jan cúú á ña quíxi jiní mé va na vatí ndáa nā tátuhun nā ndíchí jiní. Ta jánaḥa na ña ndítahan caja cáhnu ñayivi Ndióxi xihín costumbre naçavaha mé va na. Ta náḥa nā tátuhun

ñayivi tohó joo ndíñehe jícó na mé ná. Ta jánaħa na ña xíní ñúhú jándoho í yiquí cuñu í joo coó saħa toho ña yóho jáchi coo chíndeé a mí jándihi saħa ña xíca ini yiquí cuñu í caja.

3

1 Tá nanditacu Jesucristo tañu na sa naxihí cúú á tátuhun nanditacu ndó xihín mé á. Saħa ña cán quea xíní ñúhú ndin-ducú ndo ñaha cúú cuéntá Ndióxi, mé ñaha quíxi indiví nu ín coo Jesucristo xoo cuáha Ndióxi.

2 Xíní ñúhú cáhvi ini ndó saħa ñaha cúú cuéntá Ndióxi ta coo xíní ñúhú ndicani ini ndó saħa ñaha ñuyíví yóho.

3 Jáchi mé ndó cúú ndó tátuhun na sa naxihí tá naxihí Jesucristo. Saħa ña cán quea coo xíní ñúhú ndiava ini ndó cacomí ndó ñaha ñuyíví yóho jáchi cuhun ndó coo ndó xihín Jesucristo indiví nu ín Ndióxi.

4 Ta saħa ña naçaja Jesucristo saħa ña cán quea tácu yo viti ta tá ná canáħa nuu Jesucristo ñuyíví yóho já ndacanáħa nuu ndó xihín á. Tá quiahva ndiyeħe ndivaha mé á quiahva já ndiyeħe ri ndóhó va ta ndicáħnu ndó xihín mé á.

Jihna naxica í ichí cuachi joo viti xica í ichí saá

5 Ndítahan jácaxoo ndó nuu cuachi, ña cája ñayivi ñuyíví. Coto a cóo ndó xihín ñayivi, na coo cúú ñájihí ndo á yí ndo. Ta ni a cája ndó ña núu xihín yiquí cuñu ndó ta ni a cája ndó ña núu, ña xíca ini yiquí cuñu ndó caja. Ta ni a chínúu ndó ínima ndó jatá jjuhún ndo jáchi cúú ndó tátuhun na cája cáħnu yoco tá cája ndó já.

6 Jáchi vaxi quiví jándoho Ndióxi ini na cája ña yóho saħa ña coo xéén na caja na ña cúni Ndióxi.

7 Ta janda mé ndó tá naxica nuu ndó ichí cuachi já naçaja ndó ña jan.

8 Joo viti xíní ñúhú jándacoo ndó tóco ndihi ña jan: a cójo ga ini ndó xihín ñayivi ta ni a cája ga ndó ña xíca ini yiquí cuñu ndó caja ta a cája ga ndó ña núu ta ni a canáħa ga ndó xihín ñani táhan ndó ta a cáħan ga ndó tuhun quini.

9 Ta a cáħan túhún xihín táhan ndó jáchi coo cúú ga ndó na nasacuu ndó jihna ta tóco

ndihi ña núu nasacaja ndó jihna jan coo cómi ga cuéntá saħa ndó viti.

10 Jáchi viti sa nanduu ndó ñayivi saá, na loho loho ndivií chága ínima na cája Ndióxi janda quiahva ná xinu coo ndó nduu ndó tá quiahva cáa Jesucristo ta já candaa vaha chága ini ndó a.

11 Jáchi viti coo saħa ga á tá cúú yó na Israel á tá coo cúú yó na Israel, á tá cúú yó na naquihvi marca yiquí cuñu í á tá coo naquihvi marca yiquí cuñu í, á tá cúú yó na toho á tá coo cúú toho í na. Ta ni coo saħa toho a á tá cúú yó na yucú ñúhú ta ni coo saħa toho a á tá cúú yó na cómi xitoho cuéntá saħa, á tá cúú yó na xíca núná mé. Joo ña ín saħa quea tá ná ndiquiahva ndó mé ndó ndáħa Jesucristo ña ná cacomí a cuéntá saħa ndo jáchi tóco ndihi na cán cúú ná na ndácaan Jesucristo ínima.

12 Quíhvi ini Ndióxi ndohó ta naçaxi a ndohó ña ná cacuu ndó ñayivi cuéntá mé á. Ta tá quiahva naħanda ini Ndióxi saħa ndo quiahva já xíní ñúhú taħnda ini ndó saħa ñayivi. Xíní ñúhú caja vaha ndó xihín ná. Coto a cája cáħnu ndó mé ndó. Xíní ñúhú coo víi ini ndó xihín ñayivi ta a ndíhi ini ndó xihín ná.

13 Xíní ñúhú coo cáħnu ini xihín táhan ndó. Ta caja cáħnu ini saħa táhan ndó tá yáħa nu cája xihín táhan ndó. Tá quiahva naçaja Jesucristo, xitoho í tá naçaja cáħnu ini a saħa ndó quiahva já ndítahan caja cáħnu ini saħa táhan ndó.

14 Xíní ñúhú ndicutú ndaa ndó xihín ña quíhvi ini táhan ndó já quea ná cuu canduu in nuu xihín táhan ndó ta já a cúu caħnda java táhan ndó.

15 Ta ná caja Ndióxi ña ná coo vaha ini xihín táhan ndó já ná caja ndaa ndó xihín ná. Jáchi nasacu ini mé á ña ná caja ndó já ta naçaxi a ndohó nduu ndó tátuhun yiquí cuñu a. Ta ndítahan ndiquiahva ndó ndixahvi nu Ndióxi ní tiempo.

16 Ta ná ndicutú ndaa ínima ndó xihín tuhun vaha cáħan saħa Jesucristo. Ta xihín tuhun yóho xíní ñúhú jánaħa táhan ndó ta xíní ñúhú quiahva tuhun ndeé ini táhan ndó ña ná candaa vaha ini ndó ña. Ta xihín ndinuhu ini ndó xíní ñúhú ndiquiahva ndó ndixahvi nu Ndióxi. Cata ndó salmo xihín

himno xihin canto ña sahan inima yii Ndióxi nu ndo.

¹⁷ Ta tóco ndihi ña cajú ndó xíní ñúhú cajú ndó ña cuéntá Jesucristo, xitoho í. Ta xíní ñúhú ndiquiahva ndó ndixahvi nu Ndióxi, tátá yo sahá ña nacaja Jesucristo, xitoho í.

Ndá quiahva ndítahan canduu na cúu cuéntá Jesús

¹⁸ Ndóhó, najihí ndúu yí, xíní ñúhú coo johó ndó nu cahan yí ndó xihin ndó jáchi já ndítahan cajú najihí, na cúu cuéntá Jesús.

¹⁹ Ta jári ndóhó, dataa, xíní ñúhú quihvi ini ndó ñájihí ndó ta co ndítahan cajú ndó ndaja nacuu xihin ná.

²⁰ Ta jári ndóhó va, na valí xíní ñúhú taa johó ndó tóco ndihi ña sáhdá tátá náná ndó nu ndó jáchi ña yóho quéa cajú ini Ndióxi xihin.

²¹ Ta jári ndóhó va, na ndúu jahyi, a jácojo quini ndó ini jahyi ndó já quéa ná a cávitá ini na cajú na ña vaha.

²² Ta ndóhó, na naxeen xitoho cajú chúun uun va ndó, xíní ñúhú cajú ndó tóco ndihi ña sáhdá xitoho ndó, na ndúu ñuyiví yóho nu ndó. Ta a juú tá ndíta cuití na sándehe na nu cajú chúun ndó sahá ña cúní ndó candoo vaha ndó nuú na cúu xitoho ndó cán. Ña xíní ñúhú cajú ndó quéa cajú chúun ndó xihín ndinuhu ini ndó nu ná jáchi cúu ndó na cajú cáhnu Ndióxi.

²³ Ndítahan cajii ini ndó cajú ndó tóco ndihi ñaha. Ta ndicuhun ini ndó ña nu Ndióxi cajú ndó ña ta co cúu á nuú ñayivi cuití va.

²⁴ Jáchi sa cánda ini ndó ña chahvi Jesucristo nu ndó sahá tóco ndihi ña cajú ndó. Ta ñehe táhvi ndó cuhun ndó indivi jáchi cajú cáhnu ndó Jesucristo, mé á cúu ndusa xitoho ndó.

²⁵ Joo ndá na cajú ña núu tandaa quivi ndoho ini na sahá ña núu nacaja na jáchi cajú Ndióxi ña ná chahvi in in na sahá ña nacaja na.

4

¹ Ta jári ndóhó va, na cúu xitoho co ndítahan jándoho nahá ndó na naxeen ndó cajú chúun nu ndó jan. Ndítahan cajú vaha ndó xihin ná jáchi vaxi quivi ndiquiahva ri

ndóhó va cuéntá nuú Ndióxi, xitoho ndó, ña in indivi.

² A jándacoo ndó cajú tahví ndó nu Ndióxi xihín ndinuhu ini ndó. Ta ndítahan coo tiahva vaha ndó ndiquiahva ndó ndixahvi nu mé á.

³ Cajú tahví ndó nu Ndióxi sahá nde ña ná cuná mé á ichi nuú nde cahan nde tuhun vaha sahá Jesucristo, mé tuhun nasahin jehé anda viti. Ta saha mé ña yóho ndacaan i vecaa viti.

⁴ Cajú tahví ndó nu Ndióxi ña ná cuu cahan cáxi i tuhun Ndióxi nuú ñayivi tá quiahva ndítahan nuú i cajú i.

⁵ Co ndítahan cajú ndó ña yóho á ña cáa nuú na co cúu cuéntá Jesús. Ta xíní ñúhú ndihi ini ndó cahan ndó tuhun Ndióxi xihin ná.

⁶ Tóco ndihi ña cahan ndó xíní ñúhú cacuu a ña vaha, ña cuu cajii ini Ndióxi xihin. Ta xíní ñúhú canda ini ndó ndaja cajú ndó nducú ñehe vaha ndó tuhun nuú ñayivi.

Ndindayi Pablo na ndúu ñuu Colosas

⁷ Chindahá i da naní Tíquico nu ndó jan já ndicani da sahá i nu ndó. Mé da cúu ñani máni yo ta xihín ndinuhu ini da in cúu dá cajú chúun da xihín i.

⁸ Chindahá i da saa da nu ndó já ná caxi tuhun da xihin ndó ndá quiahva ndóho nde yóho. Ta chindahá i da já ná quiahva da tuhun ndeé ini ndó.

⁹ Ta chindahá ri ñani máni yo Onésimo, da ndíco cáhnu ichi cuéntá Jesús cuahan xihin dá ta mé Onésimo yóho cúu da ñuu ndó jan. Ta mé dá xihin Tíquico caxi tuhun da nu ndó ndaja cándoo nde janda viti.

¹⁰ Aristarco, da ndacaan vecaa xihín i chindahá da Ndióxi coo ndó. Ta jári Marcos, da cúu ñani cuachí Bernabé chindahá da Ndióxi coo ndó. Ta sa nacaxi tuhun i xihin ndó ndá quiahva ndítahan cajú ndó xihin Marcos tá ná saa da coto nihni da ndóhó. Xíní ñúhú ndiquehe vaha ndó da.

¹¹ Ta jári da naní Jesús, da naní tucu Justo chindahá da Ndióxi coo ndó. Janda ndihuni na yóho cuití va cúu na cuéntá Jesús, na naquixi chichi Israel cajú chúun na xihín i tá xíca nuu nde cahan nde nuú ñayivi ña cómi Ndióxi cuéntá saha ná. Ta mé a ndaa nachindeé cuaha ndihuni na cán yehe.

¹² Ta jári Epafras, da ñuu ndó jan chindahá da Ndióxi coo ndó. Mé da cán cúú dá da caja chúun cuéntá Jesucristo. Ta ní tiempo xíca tahví da nu Ndióxi saha ndó xihín ndinuhu ini da já ná candita ndacú ndó ta ná ndiquiahva ní ndo mé ndó caja ndó ña cúni Ndióxi.

¹³ Ta xíní i xihín nuú i ndá quiahva ndíhi ini Epafras xíca tahví da nu Ndióxi saha ndo ta sahá na cúú cuéntá Jesús ndúu ñuu Laodicea xihín na ndúu ñuu Hierápolis viti.

¹⁴ Lucas, da cúú doctor maní yo chindahá da Ndióxi coo ndó. Ta jári Demas chindahá da Ndióxi coo ndó.

¹⁵ Cahān Ndióxi ndó xihín na cúú cuéntá Jesús, na ndúu ñuu Laodicea ta cahān Ndióxi ndó xihín ña naní Ninfas ta xihín tóco ndíhi na cúú cuéntá Jesús táca vehē ña.

¹⁶ Ta tá nandíhi nahavi ndó carta yóho caja ndó ñamaní chindahá ndó ña ná cuhun a nuú na cúú cuéntá Jesús, na ndúu ñuu Laodicea ña ná cahvi rí na cán va ña. Ta jári ndítahan nu ndó cahvi ndó carta ña nahindahá i nuú na cán.

¹⁷ Ta caja ndó ñamaní caxi tuhun ndó nu Arquipo ña xíní ñúhú ndíhi ini da caja chúun vaha da chuun nahān Ndióxi nu dá caja da.

¹⁸ Ta yehe, da cúú Pablo cáhyí i java tuhun yóho nu ndó xihín ndahá i ña ná chindahá i Ndióxi coo ndó. Xíní ñúhú ndicuhun ini ndó ña ndacaan i vecaa. Ta ña cúni quéa ná caja cuaha Ndióxi ñamaní xihín ndo. Já ná coo.

Carta nu cuití nacahyí Pablo nuú na cúú cuéntá Jesús ñuu Tesalónica

Pablo xihín da xica xihín dá chindahá da Ndióxi coo na cúú cuéntá Jesús ñuu Tesalónica

¹ Yehe cúú Pablo, da cáhyí carta yóho xihín Silvano xihín Timoteo ta chindahá i ña nuú ndihi ndó, na cúú cuéntá Jesús ndúu ñuu Tesalónica. Ta in nanduu ndó xihín Ndióxi, tátá yo ta in nanduu ndó xihín Jesucristo, xitoho í. Ná caha Ndióxi, tátá yo xihín Jesucristo, xitoho í cuahá ñamaní xihín ndihi ndó ta ná caha mé á ña ná coo vaha ini ndó.

Cándeé cáhnu ini na Tesalónica Jesús

² Já cuití ndíquiahva nde ndixahvi nu Ndióxi sahá ndihi ndó. Ta co ndíndójó nde xica tahví nde nu mé á saha ndo.

³ Ndíquiahva nde ndixahvi nu Ndióxi, tátá yo saha ndo jáchi cándeé cáhnu ini ndó mé á. Ta sahá ña quíhvi ini ndó mé á sahá ña cán quéa cája chúun vaha ndó cuéntá mé á. Sahá ña cándeé ini ndó Jesucristo ña quixi tucu a ñuyíví yóho sahá ña cán quéa cája ndeé ini ndó tá ndóho ini ndó.

⁴ Cuni johó vaha ndó, ñani mí i, na cúú cuéntá Jesús. Sa xini nde ña quíhvi ini Ndióxi ndohó ta naçaxi a ndohó cacuu ndó cuéntá mé á.

⁵ Tá naçaxi tuhun nde tuhun vaha sahá Jesús nu ndó a juú tuhun uun naçahan nde xihín ndo. Naçahan nde mé tuhun xihín ndeé ña naçahan ínimá yíi Ndióxi nuú nde. Ña cán quéa sa xini ndo ña ndaa cuití va naçahan nde xihín ndo. Ta sa xini vaha ndó ña naçaja ndaa nde tá naçanduu nde xihín ndo jáchi cúní nde chindeé nde ndohó.

⁶ Andá jáví naçasáhá ndó cája ndó ña naçaja mé nde xihín ña naçaja Jesucristo. Jáchi nandiquehe vaha ndó ña najánaha nde nu ndo. Ta vatí nandoho ndivaha ini ndó joo naçavatá ndo naçaja ínimá yíi Ndióxi.

⁷ Ta tá nandihí nanduu ndó na jánaha nu tóco ndihí na cúú cuéntá Jesús, na ndúu estado Macedonia xihín estado Acaya ña ndítahan caha na.

⁸ Ta a juú Macedonia xihín Acaya cuití va vaha jáchi ndijáá ñuu nandicuita nu tuhun vaha sahá Jesús naçaja ndó. Ña cán quéa sa xini tóco ndihí ñayivi ña cándeé cáhnu ini ndó Ndióxi. Ña cán quéa ndá ñuu cása nde cáxi tuhun na cán nuú nde saha ndo chí co xini ñuhú ga nde çahan nde saha ndo nu ná.

⁹ Ta viti tóco ndihí na cán cáxi tuhun na nuú nde ndaja nandiquehe vaha ndó tuhun naçahan nde xihín ndo tá naçanduu nde xihín ndó ñuu Tesalónica cán. Ta cáxi tuhun na ndaja nandijama ndó tá nandicoo ndó ña cája cáhnu ndó yoco jáchi viti cája cáhnu ndó Ndióxi cuití va. Ta cáxi tuhun na ndaja nandicoo coo ini ndó ta naçasáhá ndo cája chúun ndó cuéntá Ndióxi, mé a cája ña ndaa cuití va, ña tácu a íin a indiví viti.

¹⁰ Ta cáxi tuhun na nuú nde ndá quiahva ndáti ndó ndicoo coo Jesucristo quixi a indiví, mé a cúú jahyí Ndióxi. Ta Ndióxi najánditacu a Jesús, mé á jáçacu mí ná a ndóho ini tá ná xinu quíví caha víi Ndióxi sahá cuachi ñayivi.

2

Chuun naçaja Pablo tá naçahin da ñuu Tesalónica

¹ Ta sa xini ndihí ndó, ñani mí i, na cúú cuéntá Jesús ña coo naçasaa uun va nde ñuu Tesalónica jan jáchi nandiquehe vaha ndó tuhun Ndióxi.

² Joo tá cámani saa nde ñuu ndó jan sa xini ndo ndaja naçaja xixi na ñuu Filipos xihín nde ta naçanahá na xihín nde. Joo tá naçasaa nde ñuu ndó naçahan ndeé ini nde naçaja Ndióxi já naçaxi tuhun nde tuhun vaha saha Jesús nu ndo vatí ndúu cuahá na co cúní ndehe.

³ Ta coo naçahan nde ña tuhún xihín ndo jáchi tuhun ndaa cuití va cúú ña najánaha nde nu ndo. Ta coo naçahvi núu ini nde ta coo najándahvi nde ndohó.

⁴ Joo naçaxi Ndióxi ndehe ta naçahnda mé á chuun nuú nde ña ná çaxi tuhun nde tuhun vaha saha Jesús nuú ñayivi. Ta vatí co táhán ini ñayivi xihín ña çahan nde joo coo nandijama toho nde ña. Jáchi Ndióxi quéa sándehe ínimá yo ta táhán ini a xihín ña çahan nde.

⁵ Sa xini vaha ndó nacahan ndaa nde xihin ndo ta coó nacahan chíjín nde xihin ndo. Ta coó najándahvi nde ndohó sahá juhún. Joo xini ndaa táhyí Ndióxi ña ndaa cuití va nacahan nde xihin ndo.

⁶ Ta sa xini vaha ndó ña ni tañu mé ndó ta ni tañu java ga ñayivi coó nandinducú nde ña ná caja cáhnu ñayivi ndehe vatí ín saha nde cahnda nde chuun nu ndo jáchi cúu nde na apóstol nachindahá Ndióxi nu ndo.

⁷ Joo nacaja vií nde xihin ndo tá quiahva ndáa vaha in ñañáha jahyi ña.

⁸ Ta cuni ndivaha nde ndohó ña cán queá nacaxi tuhun nde tuhun vaha sahá Jesús nu ndo. Ta ín tiahva nde quivi nde saha ndo jáchi quíhvi ini nde ndohó.

⁹ Ñani nde, na cúu cuéntá Jesús, á co ndícuhun ini ndó ndá quiahva nacaja nde tá nasanduu nde xihín ndo cán. Nuú tá ndiví nacaja chúun nde já ná cuu chahvi nde sahá ña xixi nde. Jáchi co cuni nde jáquihvi nde ndohó nani cáxi tuhun nde tuhun vaha sahá Jesús nu ndo.

¹⁰ Ta sa xini ndaa táhyí ndihi ndó, na cúu cuéntá Jesús ña nacaja vaha nde xihin ndo ta cuu cahán ndó saha nde. Ta xini táhyí Ndióxi ña nacaja ndaa nde xihin ndo ta nacaja vií nde xihin ndo ña cán queá a cuú chican ñayivi cuachi jatá nde.

¹¹ Sa xini vaha ndó ndaja najácahan nde in in ndó ta ndaja nasahan nde tuhun ndeé ini ndó ña ná candico cáhnu ndó íchi cuéntá Jesús. Tátuhun cája in dataa xihín jahyi da já nacaja nde xihin ndo.

¹² Ta nasahnda nde chuun nu ndo caja ndó ña cuni Ndióxi jáchi cúu ndó cuéntá mé á. Mé Ndióxi, mé a sáhdá chuun indiví, mé a cán queá nacaxi a ndohó cahnda ndó chuun xihin á. Mé á cúu á in Ndióxi cáhnu ndivaha ta ndaja cáhnu mé á ndohó xihin á.

¹³ Ña cán queá níi tiempo ndíquiahva nde ndixahvi nu Ndióxi jáchi nandiquehe vaha ndó tuhun Ndióxi ña nacaxi tuhun nde nu ndo. Tá naxini johó ndó ña já nacandaa ini ndó ña cúu á tuhun Ndióxi ta co cúu á tuhun ñayivi ñuyíví. Ta mé a ndaa cúu á tuhun Ndióxi jáchi tá naxini johó ndó ña já queá najándicoo ndó cuachi cája ndó sahá ña cándéé ini ndó Jesús.

¹⁴ Anda jáví mé ñayivi ñuu ndó nacasáhá na jándoho na ini ndohó, ñani mí i ta nacaja xixi na xihin ndó. Ta quiahva já nandoho na cúu cuéntá Jesús estado Judea. Jáchi na Israel, na ndúu estado Judea nacaja xixi na xihin ná.

¹⁵ Jihna nasahní java na Israel na profeta cuéntá Ndióxi. Ta quiahva já nasahní java ri na Israel Jesucristo, xitoho í. Ta viti java na Israel cája xixi na xihín nde ta naxí na ndehe veñuhu. Co cájii ini Ndióxi xihin ná jáchi cándají na tóco ndihi ñayivi.

¹⁶ Ta coó nasahan na ñamaní nuú nde caxi tuhun nde tuhun vaha sahá Jesús nuú ñayivi, na coó naquixi chíchi Israel ña ná jácacu Ndióxi na. Ta sahá ña yóho nandicuahá cuachi na nu Ndióxi ta sahá ña cán queá xójo ini a xihin ná ta viti naxinu coo hora jándoho a ini na.

Cúni Pablo coto nihni tucu da ñayivi ñuu Tesalónica

¹⁷ Ñani mí i, na cúu cuéntá Jesús, tá nandihí naquee nde ñuu ndó jan já nandicuhun ini nde saha ndo. Nñuhu ini nde saha ndo vatí co xini nde ndohó xihin nuú nde. Ta ndiáva ini nde ndicó coo nde ñuu ndó coto nihni nde ndohó.

¹⁸ Nasacu ini nde saa nde nu ndo. Ta yehe, da cúu Pablo cuahá tañu nacacúni saa i ñuu ndó joo tiñáhá sacuaña nasaji nuu rí nuú i sahá ña cán queá coo nacuu saa i jan.

¹⁹ Ndá saha queá cándéé ini nde ndohó ta ndá saha queá cájii ini nde ta ndá saha queá coo vaha ini nde tá tandaa quivi quixi tucu Jesucristo ñuyíví yóho. Sahá ña ndicó ndo íchi cuéntá Jesucristo, xitoho í sahá ña cán queá cájii ini nde.

²⁰ Mé a ndaa ín vaha ini nde ta cájii ini nde cája ndó.

3

¹ Ta sahá ña cuni ndivaha i candaa ini i ndaja ndúu ndó cán sahá ña cán queá nasacu ini i candoo in táláá mí i ñuu Atenas.

² Ta nachindahá i ñani Timoteo, mé da cája chúun xihin nde cuéntá Ndióxi cáxi tuhun da tuhun vaha sahá Jesucristo nuú ñayivi. Nachindahá i da saa da coto nihni da ndohó já queá jácahan da ndohó ña ná coo ndacú chága ínima ndó nu Ndióxi ta ná

chindeé da ndohó candeé cáhnu chága ini ndó Ndióxi.

³ Jáchi cúní nde ña ná coo ndacú ini ndó ná a jándicoo ndó íchi cuéntá Jesús vatí cája xíxi ñayivi xihín ndo. Jáchi sa xíní vaha ndó ña ndítahan nu yo ndóho tá ndóho iní sahá Jesucristo.

⁴ Á co ndícuhun ini ndó tá nasanduu nde xihín ndo nacaxi tuhun nde nu ndo ña vaxi quívi ndohó iní sahá mé á. Ta viti sa xíní ndó ña nayaha ña nacahan nde xihín ndo.

⁵ Sahá ña coo ñañehé e tuhun saha ndo sahá ña cán quéa nachindahá i Timoteo nu ndo ná cañehe da tuhun saha ndó quixi a nuú i já ná candaá ini i á mé a ndaa táhyí ndíco cáhnu ndó íchi cuéntá Jesús. Jáchi nayihví i ña jándahvi tiñáhá sacuaaha ndohó. Ta tá ná quee vaha tiñáhá sacuaaha xihín ndo, nduu já quéa mé a uun quéa nacahan nde tuhun Ndióxi xihín ndo.

⁶ Joo viti chá va ñaquixi Timoteo yóho tá nandihí naxito nihni da ndohó jan. Ta ñañehe dá tuhun vaha saha ndo ña candeé ini ndó Jesucristo ta quíhvi ini táhan ndó. Ta cáchí da ña ñúhu ndivaha ini ndó sahá nde. Ta xíca ndivaha ini ndó cuni ndó ndehe tá quiahva xíca ndivaha ini nde cuni nde ndohó.

⁷ Cándehé ndó, ñani i. Vatí ndóho ndivaha ini nde yóho joo nasahan ndeé ini nde jáchi ñañehé nde tuhun ña candeé cáhnu ini ndó Jesús ta ndíco cáhnu ndó íchi cuéntá mé á.

⁸ Ta nandivaha ini nde jáchi cándaá ini nde ña ndacú in ini ndó xihín Jesucristo, xitoho í.

⁹ Ta co ñehe ga nde ndá quiahva ndiquiahva nde ndixahvi nu Ndióxi saha mé ndó jáchi cájii ndivaha ini nde nacaja ndó.

¹⁰ Chí ñuu ta ndiví xíca tahví nde nu Ndióxi ña ná quiahva ñamaní nuú nde saa nde coto nihni nde ndohó jáchi cúní nde xinu coo nde jánaha chága nde tuhun Ndióxi nu ndo já ná candeé cáhnu chága ini ndó mé á.

¹¹ Ña cán quéa xíca tahví nde nu Ndióxi, tátá yo xihín Jesucristo, xitoho í ña ná chindeé a ndehe saa nde nu ndo coto nihni nde ndohó.

¹² Ta ná caja Ndióxi ña ná quíhvi chága ini táhan ndó. Ta ná chutú ndaa ini ndó

xihín ña quíhvi ini ndó tóco ndihí ñayivi tá quiahva quíhvi ini nde ndohó.

¹³ Ta ná caja Ndióxi ña ná coo ndacú ínima ndo nu mé á. Ta ná jándoo a ínima ndo já ná coo vií a nu mé á tá ná quixi tucu Jesucristo ñuyiví xihín ndihí na cúu cuéntá mé á.

4

Ña ndítahan nu yo caja í já ná tahan ini Ndióxi xihín yo

¹ Cuni johó vaha ndó ñani mí i, na cúu cuéntá Jesús. Jihna najánaha nde ndohó ndaja ndítahan caja ndó já ná tahan ini Ndióxi xihín ndo. Ta xíní nde já cája ndó anda viti. Xihín ndeé sahan Jesucristo nuú nde xíca tahví nde nu ndo ta sáhdá nde chuun nu ndo ña ná a jándicoo ndó caja ndó ña najánaha nde nu ndo.

² Sa xíní vaha ndó ña sáhdá nde chuun nu ndó jáchi nasahnda Jesucristo, xitoho í chuun nuú nde cahan nde ña yóho xihín ndo.

³ Ña cúní Ndióxi quéa ná coo vií ínima ndó nu mé á ta ná a cája ndó cuachi ña coo ndó xihín najihí á taa, na co cúu ñájihí ndo á yíi ndo.

⁴ Ña cúní Ndióxi quéa ná tandaha ndó xihín in talaá ñañáha. Ta ná coo vií ndó xihín ña ta ná caja cáhnu ndó ña.

⁵ Ta ná a ndiáva ini ndó caja núu ndó xihín ná tá quiahva cája ñayivi, na co xíní Ndióxi.

⁶ Co ndítahan caja ndó cuachi xihín ñájihí ñani táhan ndó jáchi xihín ña yóho jándahvi ndó yíi ña. Ta jándoho ndivaha Ndióxi ini tóco ndihí na cája já. Ta sa xíní vaha ndó ña yóho jáchi nacaxi tuhun nde ña nu ndó jihna.

⁷ Jáchi coo nacana Ndióxi mí ña ná caja í cuachi. Nacana mé á mí jáchi cúní a ña ná cacuu ñayivi yíi, na in vií ínima.

⁸ Ta ndá na co cúní cuni johó ña jánaha nde já quéa cándaá ini ndó ña a juú ndehe cuití va cándají na. Jáchi quéhe núu na Ndióxi sahá ña co cája na ña cúní mé á. Ta Ndióxi quéa nasahan ínima yíi mé á nu yo cañuhu a iní.

⁹ Sa najánaha va Ndióxi ndohó ndá quiahva ndítahan quíhvi ini táhan ndó, na

cúu cuéntá Jesús. Sahá ña cán quea nu carta yóho co ndítahan cahyí tucu u ña nu ndo.

¹⁰ Ta sa xini vi ña mé a ndaa quihvi ini ndó tóco ndihi na cúu cuéntá Jesús ndúu estado Macedonia. Joo xica tahvi i nu ndó, ñani mí i ña ná quihvi chága ini ndó na.

¹¹ Xini ñuhú nducú ndo coo vaha ini ndó xihín ndihi ñayivi. Ta nducú ndo coo ndisáhnú ini ndó. Ta ndítahan nu in in ndó caja ndó chuun mé ndó jáchi já najánaha nde nu ndó jihna.

¹² Ta tá ná caja chúun vaha ndó já quea cahan vaha ñayivi, na co cúu cuéntá Jesús saha ndo. Ta tá ná caja chúun vaha ndó já quea a ndímaní ni in ñaha nu ndo catacu ndó.

Vaxi quivi quixi tucu Jesucristo ñuyívi yóho

¹³ Ta viti cuni nde ndicani nde nu ndó, ñani i, na cúu cuéntá Jesús ña ná canda vaha ini ndó ña ndaa saha ñayivi, na sa naxihi. A cacuéha ini ndó saha ná tá quiahva cája ñayivi, na co cándee ini Ndióxi.

¹⁴ Tá quiahva cándúsa nde ña naxihi Jesucristo ta nanditacu tucu a quiahva já cándúsa nde ña jánditacu tucu Ndióxi na sa naxihi, na nasandee ini mé á tá nasatacu na. Caja Ndióxi ña ná quixi na cán xihín Jesús tá ná quixi tucu a ñuyívi yóho.

¹⁵ Ña cán quea cahan nde ña yóho xihin ndo ta cúu á ña najánaha Jesucristo, xitoho í nuú nde. Tá ná quixi tucu mé á ñuyívi yóho ndiquehe a mí já quea a cühun toho jihna ñuhú na tácu ñuyívi yóho jáchi jihna ñuhú ndindita na sa naxihi.

¹⁶ Jihna ñuhú nuu Jesucristo quixi tucu a ñuyívi yóho. Ta mé já cayuhú a cahnda a chuun nuú ndihi ñayivi. Já cayuhú táto sacuaña Ndióxi ta ndahyi trompeta Ndióxi. Já nditacu nu cuítí na sa naxihi, na cándúsa Jesucristo.

¹⁷ Anda jáví tóco ndihi mí, na tácu ndique táhan í xihín na nanditacu nu cuítí ta cañehe Ndióxi mí tañu vico. Já ndique táhan í xihín Jesucristo, xitoho í nu táchi ta já coo í xihin mé á anda ama cáa quivi.

¹⁸ Sahá ña cán quea ndítahan nu ndó quiahva tuhun ndeé ini táhan ndó xihín tuhun yóho.

5

¹ Candehé ndo, ñani i, na cúu cuéntá Jesús. Co xini ñuhú cahyí i nu ndo saha ndá ama quixi tucu Jesucristo ñuyívi yóho.

² Jáchi canda vaha ini ndó ña mé quivi co cáhan yo quixi Jesucristo ñuyívi yóho já quixi mé á. Tá quiahva jonáa cuití va xinu in da cuihná tá ñuú quiahva já jonáa xinu Jesucristo ñuyívi yóho.

³ Tá ná cahan ñayivi sa ndúu vaha ndivaha na ta ni in ñaha a cúu yihvi na anda jáví jonáa xinu ña ndoho ndivaha ini na. Tá quiahva jonáa xinu ña sáhdá a tixi in ñañáha tá cuni cacu jahyi ná quiahva já xinu quivi ndihi saha ná. Ta ni in na a cuú cacu toho.

⁴ Joo mé ndó, ñani mí i, na cúu cuéntá Jesús co ndúu ga ndó nuú naá saha ña canda ini ndó ña quixi tucu Jesucristo ñuyívi yóho. Ta vatí catónto ndo tá ná xinu in da cuihná nu ndo joo co ndítahan catónto ndo tá ná quixi tucu Jesucristo.

⁵ Jáchi tóco ndihi ndó, na cándee ini Jesucristo ndúu ndó nu yéhe saha ña xica ndó íchi cuéntá Jesús. Co xica toho ndó íchi nuú naá nu xica ñayivi ñuyívi, na co cándee ini Jesucristo.

⁶ Sahá ña cán quea ndítahan coo tiaha í candatí quixi Jesucristo ta a cúju yo tá quiahva cája java ga ñayivi. Ña ndítahan caja í quea cañuhu táhyí ini xihin tóco ndihi xini túni yo candatí xinu Jesucristo.

⁷ Jáchi na quiji, quiji na tá ñuú ta na xíhi, xíhi na tá ñuú.

⁸ Joo mí sa xica í nu yéhe ta ndítahan cañuhu táhyí ini. Ndítahan nu yó chindeé yo mí. Tá cándee ini Jesucristo ta tá quihvi ini táhan í já cúu á tátuhun ndíxi yó cotó caa. Tá ndatí quixi tucu Jesucristo jácacu a mí já cúu á tátuhun ñuhu ndó yijini caa.

⁹ Jáchi coo nacaxi Ndióxi mí ndicuehe a xihin yo jáchi naxihi Jesucristo, xitoho í saha cuachí saha ña cuni a jácacu a mí ná a cühun yó indayá.

¹⁰ Naxihi Jesucristo saha yo ta tá tácu yo á sa naxihi yo mé quivi quixi tucu a ñuyívi yóho já quea cañehe a mí cohó coo í xihin mé á anda ama cáa quivi.

¹¹ Ña cán quea quiahva tuhun ndeé ini táhan ndó ta chindeé táhan ndó tá quiahva

sa cája ndó.

Ndícani Pablo nuú na cúú cuéntá Jesús ña ndítahan caja na

12 Ta viti xíca tahví nde nu mé ndó, na cúú cuéntá Jesús ña ná caja cáhnu ndó ñayivi, na cája chúun tañu ndó jáchi ndáca na ndohó íchi cuéntá Jesucristo, xitoho í ta jánaḥa na tuhun Ndióxi nu ndo.

13 Ndítahan coo toní ñúhú ndo xihín ná ta quihvi ini ndó na xihín ndinuḥu ini ndó jáchi cája chúun na cuéntá Ndióxi tañu ndó. Coo vaḥa ini ndó xihín ñani táhan ndó.

14 Xíca tahví nde nu ndó ña ná jánani ndó ndá na cō cūni caja chúun. Quiahva ndó tuhun ndeé ini ndá na cácuéḥa ini. Chindeé ndó ñayivi, na vitá ini xihín tuhun Ndióxi. Ta coo cáhnu ini ndó xihín ndihi ñayivi.

15 Candehé ndo. A ndúcú ñehe ndó ña núu cája inga na xihín ndo. Ta ndinducú ndo caja vaḥa xihín táhan ndó ní tiempo ta quiahva já caja ndó ña vaḥa xihín tóco ndihi ñayivi.

16 Ná coo vatá ini ndó ní tiempo.

17 Ta caça tahví ndó nu Ndióxi ní tiempo.

18 Ndá naḥuu ña ndóho ndó ndítahan nu ndo ndiquiahva ndó ndixahvi nu Ndióxi sahá jáchi ña yóho cūni Ndióxi caja mé ndó, na cúú cuéntá Jesús.

19 A cáji nuu ndó nuú ña cūni ínima yii Ndióxi caja xihín ndo.

20 A quéhe núu ndó ñayivi, na jáyaha tuhun, ña nasahan Ndióxi nu ná caḥan na xihín ndo.

21 Coto ndojó ndo tóco ndihi ña cáḥan na xihín ndo. Caxi ndó ña vaḥa

22 ta caxoo ndó nu tóco ndihi ña núu.

23 Ta Ndióxi, mé a cája ña coo vaḥa ini ndó, ná caja yii ndihi a ndohó. Ná caja yii á ínima ndo xihín yiquí cuñu ndó já ná coo vii ndo tá ná xinu quiví quixi tucu Jesucristo, xitoho í.

24 Jáchi sa naçaxi Ndióxi mí ta a jándicoo a mí anda quiahva jáxinu cōo a tóco ndihi ña naçachi a.

Jáxinu cōo Pablo ña cáḥan da ta ndíndayí da na

25 Ñani mí i, na cúú cuéntá Jesús, caça tahví ndo nu Ndióxi sahá nde.

26 Caḥan Ndióxi ndó xihín ndihi na cúú cuéntá Jesús ta tatí yuhū táhan ndó ta yii caja ndó ña.

27 Candehé ndo, ñani i, na cúú cuéntá Jesús. Sáhdá i chuun nu ndó cuéntá Jesucristo, xitoho í ña ná caḥvi ndó carta yóho nuú ndihi na cúú cuéntá Jesús ndúu xihín ndó jan.

28 Ná caja Jesucristo, xitoho í cuahá ñamaní xihín ndo. Já ná coo.

Carta chí ivi nacahyí Pablo nuú na cúú cuéntá Jesús ñuu Tesalónica

Pablo xihín da xíca xihín dá chíndahá da Ndióxi coo na cúú cuéntá Jesús ñuu Tesalónica

¹ Yehe cúú Pablo, da cáhyí carta yóho xihín Silvano xihín Timoteo ta chíndahá i ña nuú ndihi ndó, na cúú cuéntá Jesús ndúu ñuu Tesalónica. Ta in nanduu ndó xihín Ndióxi, tátá yo ta in nanduu ndó xihín Jesucristo, xitoho í.

² Ná caja Ndióxi, tátá yo xihín Jesucristo, xitoho í cuahá ñamaní xihín ndihi ndó ta ná caja mé á ña ná coo vaha ini ndó.

Caja vií Ndióxi sahá na cája cuachi tá ná quixi tucu Jesucristo ñuyíví yóho

³ Ndijáá níi quiví ndítahan nuú nde ndiquiahva nde ndixahvi nu Ndióxi sahá ndóhó, na cúú cuéntá Jesús. Ta íin sahá cája nde já jáchi nini quiví cándéé chága ini ndó Jesús ta quíhvi chága ini táhan ndó na cúú cuéntá Jesús.

⁴ Sahá ña cán queá cájii ini nde cáhan nde sahá ndo nuú java ga na cúú cuéntá Jesús ndá nacuu nu táca na jáchi cándéé ini ndó Jesús ta sahan ndeé ini ndó tá ndóho ini ndó sahá ña cája xíxi ñayivi xihín ndo.

⁵ Jánaha Ndióxi nu yo ña ndaa cája mé á tá cája vií a sahá yo. Ta sahá ña yóho sácú tiahva mé á ndohó cuhun ndó indiví cacomí a cuéntá sahá ndó jáchi ndóho ini ndó cuéntá mé á viti.

⁶ Ta ndaa cája Ndióxi tá jándoho a ini ñayivi, na cája xíxi xihín ndó viti.

⁷ Ta sahá ña ndóho ini ndó ná caja mé á ña ná ndiquehe ndée ndo tá quiahva caja mé á ña ná ndiquehe ndée ri ndehe va mé quiví quixi tucu Jesucristo ñuyíví yóho. Ta quixi a xihín tátó ndée mé á ta cuni yó a ña quixi a indiví tañu ñúhu ita.

⁸ Quixi a jándoho a ini na co cándéé ini Ndióxi ta ni co cándúsa na tuhun vaha sahá Jesús, xitoho í, mé a cuu jácacu mí.

⁹ Ta ndá na co cándéé ini Jesucristo já queá ndoho ndivaha ini na anda ama cáa quiví ini indayá ta a coo ga na nu Ndióxi.

Ta tavá jíin Ndióxi na já ná a cúní ga na nuú á anda ama cáa quiví. Ta a cúní ga na ña náhnu cája Ndióxi xihín ndée mé á.

¹⁰ Tá ná quixi tucu Jesucristo ñuyíví yóho já caja cáhnu ndivaha tóco ndihi na cúú cuéntá Jesús mé á nuú quixi a. Ta já catóntó ndivaha tóco ndihi na sahá ña náhnu ndivaha caja Jesucristo. Ta quiahva já caja cáhnu ri ndóhó va Jesucristo mé quiví cán jáchi cándéé ini ndó tuhun vaha sahá Jesús ña nacahan nde xihín ndo.

¹¹ Ña cán queá ndijáá níi quiví xíca tahví nde nu Ndióxi sahá ndo ña ná cacuu ndó ñayivi ndaa tá quiahva cúní mé á jáchi sahá ña yóho nandicaxi a ndohó. Ta xíca tahví nde nu Ndióxi sahá ndo ña ná quiahva mé á ndée á nu ndo já ná cuu jáxinu coo ndó ña vaha ña cúní ndó caja ndó nani cája chúun ndó cuéntá mé á sahá ña cándéé ini ndó mé á.

¹² Ta sahá ña vaha cája ndó, caja cáhnu ñayivi Jesucristo. Anda jáví ndiñehe jíco Jesucristo ndohó jáchi cúú ndó cuéntá mé á ta cája ndó ña cúní mé á. Mé a ndaa cúní Ndióxi xihín Jesucristo, xitoho í caja cuahá ñamaní xihín yo.

2

Cáhan Pablo sahá da ihvi Jesucristo, mé da quixi chí nuu

¹ Cuni johó vaha ndó, ñani mí i, na cúú cuéntá Jesús jáchi cáxi tuhun i xihín ndo sahá mé quiví quixi tucu Jesucristo ñuyíví játaca mé a mí ndique táhan í xihín á. Xíca tahví i nu ndó

² ña ná a cándúsa ndó java ñayivi tá cáchí na ña sa naxinu quiví ndicó coo Jesucristo ñuyíví. A ndícani ga ini ndó sahá ña cáchí na jáchi a juú ña ndaa cúú á. Tá ná cachi na cán ña nacahan Ndióxi xihín ná á tá ná cachi na ña nacachi mé nde ña nandindaa mé quiví cán á tá ná cachi na cán ña nacahyí nde in carta nu ná já queá a cándúsa toho ndó na jáchi a juú ña ndaa cúú á.

³ A cándúsa ndó ña cáchí na cán jáchi cúní na jándahvi na ndohó. Ta viti cáhan nde ña ndaa xihín ndo sahá mé quiví quixi tucu Jesucristo. Jáchi jihna ñúhú casahá cuahá ndivaha ñayivi nduu na na ihvi Ndióxi ta jándicoo na íchi cuéntá mé á. Anda jáví

casaa in da quini, da cája cuahá ndivaha nuú cuachi. Joo vaxi quivi tá jándihi Ndióxi saha dá ini indayá.

⁴ Ta mé da quini yóho, da cúu da ihvi Ndióxi cándají da mé á ta cándají da tóco ndihi ña cúu cuéntá mé á. Anda jáví casaa da veñuhu cáhnu ndácaan ñuu Jerusalén cacao da cán tátuhun Ndióxi. Ta cachi da xihín ñayivi ña cúu dá Ndióxi.

⁵ Á co ndícuñun ini ndó tá nasahin i xihín ndo já cuití naçahan i ña yóho xihín ndo.

⁶ Ta viti sa cándañ ini ndó ndía sáji nuu nuú da ihvi cán ña ná a xínu coo da mé quivi ña co ndítahan nu dá xínu da.

⁷ Vatí cámaní jánañ da ihvi mé dá nuú ñayivi joo cája chúun jehé da viti ñuhú jándihi da sahá ñaha Ndióxi cúni da. Ta viti ín in a sáji nuu nuú da ihvi ta co sahan ñamaní jánañ da ihvi mé dá nuú ñayivi. Joo vaxi quivi caxoo ña sáji nuu nuú da ihvi cán.

⁸ Ta anda jáví jánañ da mé dá nuú ñayivi. Ta cahni Jesucristo mé da ihvi cán xihín tachí yúhu a tá ná quixi a ñuyivi yóho. Ta jándihi a saha dá xihín ña ndiyihvi ndaa nuú quixi a.

⁹ Tá cámaní quixi tucu Jesucristo ñuyivi já casaa mé da ihvi xihín cuahá ndivaha ndée ña nasahan tiñahá sacuañ nu dá. Ta jándahvi da ñayivi jáchi caja da cuahá ñaha náhnu, ña co cúu ña ndaa.

¹⁰ Ta caja da tóco ndihi nuú cuachi jáchi cúni da jándahvi da ñayivi, mé na xica íchi cuahan indayá. Cuñun na indayá jáchi coo naheen na candúsa na ña ndaa saha Jesucristo ta coo naheen na quihvi ini na ña ndaa, ña cuu jácañ ñahá.

¹¹ Ña cán quéa quiahva Ndióxi ñamaní jándahvi da ihvi cán na já ná candúsa na ña tuhún.

¹² Já quéa jándoho Ndióxi ini tóco ndihi na cán jáchi coo naçandúsa na ña ndaa ta ndinuhu cuachi naçatoo na cája na.

Naçaxi Ndióxi ndohó ña ná jácañ a ndohó

¹³ Ta ndijáá ní quivi ndítahan nuú nde ndiquiahva nde ndixahvi nu Ndióxi saha ndó, na cúu ñani nde cuéntá Jesús sahá ña quihvi ini a ndohó. Jáchi janda tá cámaní

cañ sahá saha ñuyivi naçaxi Ndióxi ndohó ña ná jácañ a ndohó. Jáchi nañdaja víi ínima yíi mé á ínima ndo sahá ña cándeé ini ndó ña ndaa saha Jesús.

¹⁴ Cúni Ndióxi ña ná cándeé ini ndó mé á ña cán quéa naçindahá a ndeñe çaxi tuhun nde tuhun vaha saha Jesucristo nu ndo. Naçaxi Ndióxi ndohó ña ná in nduu ndó xihín Jesucristo, xitoho í. Cáhnu ndivaha cúu mé á ta ndaja cáhnu a mí xihín á.

¹⁵ Ñani mí i, na cúu cuéntá Jesús coo ndacú ini ndó xihín ña cándeé ini ndó Jesucristo. A ndíndójó ndo tiin tuun ndó ña ndaa ña najánañ nde nu ndo tá nasanduu nde xihín ndó. Ta tiin tuun ndó ña naçahyí nde nu ndó viti.

¹⁶ Jesucristo, xitoho í xihín Ndióxi, tátá yo, mé a quihvi ini mí ná quiahva tuhun ndeé ini ta anda ama cáa quivi a ndihi sahá. Ta viti ndatí tiañva caja Ndióxi cuahá ñamaní xihín yo.

¹⁷ Ta xica tahví nde nu Ndióxi ña ná jachutú a ínima ndó xihín ndeé mé á. Ta ná chindeé a ndohó cañ ndó tuhun vaha ta caja ndó ña vaha cuití va.

3

Cúni Pablo ña ná cañ tahví na nu Ndióxi saha dá

¹ Candehé ndó, ñani i, na cúu cuéntá Jesús. Nu ndihí cañ i tuhun yóho xihín ndo. Cañ tahví ndo nu Ndióxi sahá nde. Ta cañ tahví ndo nu mé á ña ná ndicuita nuu yachi tuhun vaha saha Jesús ndijáá ñuu ta ná ndiquehe vaha ñayivi mé tuhun vaha tá quiahva nandiquehe ndó ña.

² Ta cañ tahví ndó nu Ndióxi sahá nde ña ná jácañ a ndeñe ndahá ñayivi quini. Vatí ndúu cuahá na co cándeé ini Jesucristo

³ joo jáxínu coo Ndióxi tuhun mé á. Já quéa quiahva mé á tuhun ndeé ini ndó ta candaa mé á ndohó já ná a cája tiñahá sacuañ ña núu xihín ndo.

⁴ Cándeé ini nde Jesucristo ta cándeé ini nde ndohó ña cája tá cája ndó ña najánañ nde nu ndo.

⁵ Ná chindeé Ndióxi ndohó candaa ini ndó nda quiahva quihvi ini á ndohó. Ta ná chindeé a ndohó caja ndeé ini ndó tá

ndóho ini ndó tá quiahva ñacaja ndeé ini Jesucristo tá ñandoho ini a.

Xíní ñúhú caja chúun í catacú

⁶ Cuni johoh vaha ndó, ñani mí i, ña cúu cuéntá Jesús. Nasahnda Jesucristo chuun nu yo sahá ña cán queá sáhndá nde chuun nu ndo ña ná caxoo ndó nuú ña cúu cuéntá Jesús tá cájúsá ña caja chúun na tá quiahva najánaha nde nu ndó.

⁷ Ta sa xíní ndó ña ndítahan nu ndó caja ndó tá quiahva ñacaja mé nde tá nasanduu nde xihín ndo jáchi coo ñacajúsá nde caja chúun nde.

⁸ Nachahvi nde sahá ña ñaxixi nde cán. Ñacaja chúun vaha nde ñuú ta ndiví já ñañehé nde jiyuhún catacu nde já ná a ndóho ni in ndó sahá ña ñaxito ndó ndehe.

⁹ Vatí íin sahá nde cachi nde xihín ndo ña ná coto uun ndó ndehe joo coo ñacaja nde já. Ña ñacaja nde queá ñacaja chúun vaha nde já najánaha nde nu ndo ndá quiahva ndítahan nu ndó caja ndó.

¹⁰ Á co ndícuhun ini ndó chuun nasahnda nde nu ndo tá nasanduu nde xihín ndo. Já ñacachi nde já: Ndá ña co cúni caja chúun, ná a cúxu toho na, ñacachi nde.

¹¹ Jáchi ñañehé nde tuhun ña ndúu java ña jusá tañu ndó ta co cúni ña caja chúun na ta xíca nuu na játaca na tuhun sahá ñayivi.

¹² Ta sáhndá nde chuun nuú ña ñan ta jácahan nde ña xihín ndeé nasahan Jesucristo, xitoho í nuú nde ña ná caja chúun ndísáhnua na já ná ñehe ná ña cuxu na.

¹³ Candehé ndo, ñani i, ña cúu cuéntá Jesús. A cánaá ndó caja ndó ña vaha.

¹⁴ Tá ná canduu java ña tañu ndó ta co cúni ña caja na ña cáchí nde xihín carta yóho já queá xíní ñúhú candehé vaha ndó ndá ña cúu ná ta a cáca nuu ga ndó xihín ná já ná cacahan nuu ná sahá ña cája na.

¹⁵ Joo a cája ndó cuéntá ña cúu ná ña ihvi Jesucristo. Xíní ñúhú jácahan ndó ña ña ná caja vaha na jáchi cúu ná ñani ndó, ña cúu cuéntá Jesús.

Ndíndayí Pablo ñayivi Tesalónica

¹⁶ Ta Jesucristo, xitoho í, mé a íin vaha ini ná quiahva mé á nu ndo ña ná coo vaha ini ndó ndaja táhan quivi. Ta ná coo vaha ini

ndó xihín ndá ñaha ñacuu vaxi nu ndo. Ná coo Jesucristo, xitoho í xihín ndihí ndó.

¹⁷ Yehe cúu Pablo ta chíndahá í Ndióxi coo ndó ta cáhyí i quiví i xihín ndáha i já ná candaa vaha ini ndó ña mé a ndaa yehe cúu da ñacahyí i ña yóho nu ndo.

¹⁸ Ná caja Jesucristo, xitoho í cuahá ñamani xihín ndo. Já ná coo.

Carta nu cuití nacahyí Pablo nuú Timoteo

Chíndahá Pablo Ndióxi coo Timoteo

¹ Yehe cúú Pablo, da cúú in apóstol cuéntá Jesucristo sahá ña nasahnda Ndióxi xihín Jesucristo chuun yóho nuú i. Ta Ndióxi cúú á ña jácacu mí ta Jesucristo cúú á ña ndátí quixi.

² Cáhyí i carta yóho nu mún, Timoteo jáchi cúun tátuhun jahyi maní i sahá ña cándéé inún Jesucristo. Ta cúni ña ná caha Ndióxi, tátá yo xihín Jesucristo, xitoho í cuahá ñamaní xuhun. Ta ná tahvi ini a sahun ta ná caha ña ná coo vaha inún.

Ndícani Pablo sahá na coo jánahá ña ndaa

³ Tá jalóho cámani quee e ñuu Efeso quixi i estado Macedonia yóho já naxica tahvi i nuun ña ná candoún ñuu Efeso jan. Ta viti xica tahvi tucu u nuun ña ná coún cán. Jáchi ndúu java ñayivi cán ta jánahá na ña tuhún nuú ñayivi. Ta ndítahan nu mún cahndún chuun nu ná ña ná a jánahá ga na ña tuhún.

⁴ Ta ná a táa johu na cuento nani, ña cahan sahá chichi naquixi tásáhnu jícó yo. Jáchi ndítuhún uun va na sahá ña yóho ta co chindeé a na cándéé ini na Ndióxi, mé á nasacu ini jácacu a mí.

⁵ Ndítahan cahún ña yóho xihín ná jáchi cúni Ndióxi ña ná quihvi ini táhan í xihín ndihi inima yo ta cúni a ña ná caha í ña vaha cuití va ta cúni a ña ná cándéé ini mé á xihín ndinuhu ini.

⁶ Joo java ñayivi najándicoo na ña ndaa ta najátivi na ña caha na jáchi ña quihvi cuití va ndítuhún xihín táhan na.

⁷ Vatí cúni na cán jánahá na ley Moisés joo co cándaq ini na ña jánahá na ta ni co cándaq ini na ña cahan mé ley.

⁸ Joo sa xini yo ña mé ley Moisés cúú á ña vaha tá ná caha chúun vaha í ña tá quiahva cúni Ndióxi.

⁹ Xini ñuhú ndícuahun ini ña ni in ley co chícaan cuachi jatá ñayivi vaha. Joo chícaan cuachi jatá ñayivi quini, na sáa ini jáchi co caha na ña cúni Ndióxi. Ta chícaan cuachi jatá ñayivi núu, na caha cuahá nuú cuachi. Ta chícaan cuachi jatá ñayivi co

cája cáhnu Ndióxi, na cánahá xihín mé á. Ta chícaan cuachi jatá ñayivi sáhní tátá náná na xihín jatá tóco ndihi na sáhní ndji.

¹⁰ Ta chícaan cuachi jatá ñayivi ndúu xihín ta a náha, na co cúu yi ná á ñájhí na. Ta chícaan cuachi jatá ta líhi, da quihvi nuu xihín inga ta. Ta chícaan cuachi jatá na caha cuíhna ñayivi sahá ña cúni na jícó ñahá na. Ta chícaan cuachi jatá ñayivi cahan ña tuhún, mé na janda quivi Ndióxi táva na tá cahan na ña tuhún. Ta chícaan cuachi jatá tóco ndihi ñayivi tá co caha na ña ndaa, ña jánahá Ndióxi nu yó caha í.

¹¹ Ta nasahnda Ndióxi chuun nuú i ña ná jánahá i ña ndaa yóho nu ndo jáchi cúni a jácacu a tóco ndihi ñayivi. Cáhnu ndivaha cúú mé á ta ndítahan caha cáhnu í mé á.

Ndíquiahva Pablo ndixahvi nu Ndióxi jáchi táhnda ini a saha dá

¹² Ndíquiahva i ndixahvi nu Jesucristo, xitoho í jáchi nacaxi a yehe caha chúun i cuéntá mé á ta nasahan mé á tuhun ndée ini i ña ná caha i ña xihín ndinuhu ini i.

¹³ Vatí jihna nacahan ihvi i saha Ndióxi ta nacaja xixi i xihín á ta nacanáhá i xihín á joo nacaxi a yehe. Ta natahnda ini a sahá i tá cámani cándéé ini i Jesucristo jáchi coo nacandaq ini i ña nacaja i.

¹⁴ Nacaja Ndióxi cuahá ñamaní xihín i tá nacaja ña ná cándéé ini i mé á. Ta nacaja mé á ña nachutú ndaa ini i xihín ña quihvi ini i na cúu cuéntá mé á sahá ña in nanduu u xihín mé á.

¹⁵ Ña yóho cúú á ña ndaa ta ndítahan nuú ndihi ñayivi candúsa na ña cáhí i yóho: naquixi Jesucristo ñuyivi yóho jácacu a ñayivi, na caha cuachi. Ta yehe cúu u da yójó nu ndihi na caha cuachi.

¹⁶ Ta sahá ña yóho natahvi ini Ndióxi sahá i já ná cuu nahá Jesucristo ndaja cáhnu coo ini mé á. Ta vatí nacaja cuaha chaga i cuachi a juú ga java ga ñayivi joo já nasacuu u yuhú nuú tóco ndihi na vaxi chaga chí nuu ña ná cándéé ini na mé á ta já coo na xihín mé á anda ama cáa quivi.

¹⁷ Ña cán quéa cóho caha cáhnu í Ndióxi anda ama cáa quivi jáchi mé á cómi a cuéntá saha yo anda ama cáa quivi. Ta mé Ndióxi a cuú quivi a ta ndíchí ndivaha jini á ta in a

indiví vatí a cuú cuní a. Cáhnu ndivaha cúu mé á. Já ná coo.

¹⁸ Candehún Timoteo, da cúu tátuhun jahyi mí i. Jándacoo i chuun yóho nu mún jáchi quiahva já nacachi profeta sahún jihna. Ta xíní ñúhú quiahva ndeé inún cajún ña jáchi cúu á tátuhun cáni táhún xihín ña núu.

¹⁹ A jándacoún ña cándéé inún Jesucristo ta xihín ndinuhu inún cajún ña ndaa. Jáchi java ñayivi coó nacaja na ña xíní na cúni Ndióxi caja na ta chí nandihí sahá ña cándéé ini na Jesucristo.

²⁰ Ivi táhan da cán cúu Himeneo xihín Alejandro. Nandiquiahva i da cán ndáha tiñahá sacuahá va já ná candaá ini da ña a cuú quehe núu da Ndióxi xihín tuhun cáhan da.

2

Ndaja caja í caca tahví yo nu Ndióxi

¹ Ña xíní ñúhú chága caja ndó quéa caca tahví ndó nu Ndióxi sahá ndihí ñayivi ña ná tahví ini a sahá ná. Ndiquiahva ndó ndixahvi nu Ndióxi sahá ñamaní caja mé á xihín ndó.

² Ta sa mé quiahva já ndítahan caca tahví ndó nu Ndióxi sahá tóco ndihí na cómi cuéntá sahá yo. Jáchi tá cajú í ña yóho já cuu coo vaha iní xihín ndihí ñayivi ta já coo toní ñúhú xihín táhan í. Ta já nuná nu yo caja cáhnu í Ndióxi.

³ Tá xíca tahví yo nu Ndióxi sahá ndihí ñayivi já quéa cajú í ña vaha ta cáji ini Ndióxi, mé á jácacu mí.

⁴ Jáchi cúni a jácacu a tóco ndihí ñayivi ña ná candaá ini na ña ndaa sahá mé á.

⁵ Jáchi íin in tálaá Ndióxi. Ta íin in tálaá Jesucristo, mé á cúu á ta ta cajú mé á ña ná ndique táhan máni ñayivi xihín Ndióxi.

⁶ Ta nandiquiahva Jesucristo mé á quivi a sahá cuachi tóco ndihí ñayivi. Xihín ña yóho náha Ndióxi nu yo ña nandindaa tiempo tá cúni a jácacu a tóco ndihí ñayivi.

⁷ Sahá ña cán quéa nacaxi Ndióxi yehe cacuu u apóstol ña ná caxi tuhun i tuhun vaha sahá Jesús nuú na tóho, na coo cúu na Israel. Jáchi cúni Ndióxi ña ná candaá ini na ña ndaa já ná cuu cándéé ini na Jesús. Cáhan i ndinuhu ña ndaa xihín ndo ta coo cáhan i ña tuhún xihín ndo.

⁸ Ña cúni quéa ná caca tahví nataa nu Ndióxi tóco ndihí nu táca ndo. Ta ndítahan nu ná coo vií ínimá ná já ná cuu ndiñehe na ndáha ná nu Ndióxi. Ta ndítahan nu ná jándicoo na ña xójo ini na ta ná a cáni táhan yúhu ná.

⁹ Jári coo ndítahan nuú najihí candixi na jahmá lándá. Ta ná a cajú lándá ná xihín ijí jini ná. Ta ná a ndíhi ini na caja cutú na mé ná xihín ñaha jjuhun cuáán á xihín jíqui yahvi tátuhun perla. Ta ná a cándixi na jahmá yahvi ña cajú lándá ná xihín.

¹⁰ Vaha chága ná caja na ndinuhu ña vaha tá quiahva ndítahan nuú najihí, na cúu cuéntá Jesús caja na.

¹¹ Ndítahan nuú najihí canduu táji ná cuni johó na tuhun Ndióxi ta coto ná a ndiñehe jícó na mé ná.

¹² Ta coo sáhan i ñamaní nuú najihí ña ná jánahá na nu táca ñayivi. Ta ni coo sáhan i ñamaní nu ná ña ná cacomí na cuéntá sahá dataa. Joo ndítahan nu ná coo táji ná.

¹³ Jáchi jihna ñúhú nacavaha Ndióxi Adan ta anda jáví nacavaha mé á Eva.

¹⁴ Ta a juú Adan cúu da najándahvi tiñahá sacuahá, vaha. Joo najándahvi tiñahá sacuahá Eva ta já nandicava ña nuú cuachi.

¹⁵ Sahá ña cán quéa nacaja Ndióxi xihín najihí ña ná ndoho ini na tá cacu jahyi na. Joo jácacu Ndióxi na tá ná a jándacoo na ña cándéé ini na mé á. Ta já ndítahan nu ná quihvi ini na ñayivi. Ta ná a cajú lándá ná ta ná ndiquiahva vií na mé ná ndáha Ndióxi.

3

Ndaja ndítahan caja na sacuahá nuú na cúu cuéntá Jesús

¹ Ta ña ndaa cúu tuhun yóho: ndá da cúni cacuu da sacuahá nuú na cúu cuéntá Jesús, ña vaha quéa cúni da.

² Jáchi ndítahan nuú da sacuahá caja da ndinuhu ña ndaa já ná a ñehe íni ñayivi cáhan núu na sahá dá. Ta in túhún ñajihí da ndítahan coo. Ta ndítahan cacuu da da tácu ini ta ndítahan nu dá cañehe vaha da quiahva ta ndítahan cacuu da da íin toní ñúhú ñayivi xihín. Ta ndítahan nu dá cáji ini da ndiquehe vaha da ñayivi vehe da. Ta

xíní ñúhú cacuu da da tiahva vaha jánaha da ñayivi.

³ Co ndítahan cacuu da da xihí ta co ndítahan cacuu da da ndúcú cuachi xihín ñayivi. Joo ndítahan coo vii da xihín ñayivi ta ná a cáni táhan da xihín ná. Ta co ndítahan cacuu da da ndiáva ini quehe cuahá da jjuhún.

⁴ Ta ndítahan nuú da sacuaḥa cacomí vaha da cuéntá saḥa na vehe da. Ta ndítahan nuú jahyi da coo johu na nu cáhan tátá na xihín ná ta ná coo toní ñúhú na xihín dá.

⁵ Jáchi tá ta a cúu cañehe vaha da cuéntá saḥá na vehe da já queá a cúu caja da cacomí da cuéntá saḥá na cúu cuéntá Jesús.

⁶ Ta mé da sacuaḥa co ndítahan cacuu da da jacá nandihvi íchi cuéntá Jesús. Jáchi tiahva náá casahá da ndiñehe jícó da mé dá ta saḥá ña yóho jándoho Ndióxi ini da tá quiahva naçaja mé á xihín tiñáhá sacuaḥa.

⁷ Mé da sacuaḥa nuú na cúu cuéntá Jesús yóho ndítahan cacuu da da íin toní ñúhú ñayivi, na co cúu cuéntá Jesús xihín. Jáchi tiahva náá ndicava da ndáha tiñáhá sacuaḥa ta xihín ña yóho çahan núu ñayivi ñuyiví saḥa dá.

Ndaja ndítahan caja na tá ná chindeé na na sacuaḥa veñuhu

⁸ Ta ndá da cúni cacuu da chindeé na sacuaḥa veñuhu ndítahan nu dá cacuu da da íin toní ñúhú ñayivi xihín. Ta xíní ñúhú cacuu da da cáhan ndinuhu ña ndaa. Co ndítahan cacuu da da xihí ta co ndítahan nu dá cacuu da da ndiáva ini coo cuahá jjuhún nuu.

⁹ Ta xíní ñúhú tiin tuun da ña ndaa ña nanaha Ndióxi nu yo ta ña yóho cúu á ña ndítahan candeé ini mé á. Ta ná a cáhvi ivi johu ini da.

¹⁰ Jihna ñúhú xíní ñúhú coto ndojó ndo mé da cúni chindeé na sacuaḥa veñuhu. Ta tá co cája da cuachi nu Ndióxi já queá cuu chindeé da na sacuaḥa veñuhu.

¹¹ Ta jári najihí viti ndítahan cacuu na na íin toní ñúhú ñayivi xihín. Co ndítahan cacuu na na ndahnda yúhu. Ná cacuu na na ndísáhnú ini ta ná caja chúun na xihín ndinuhu ini na.

¹² Ta mé da chindeé na sacuaḥa veñuhu ndítahan nu dá cacuu da da coo inga ñaha

xihín ta in túhún ñájihí da ndítahan coo. Ta ndítahan nu dá cacomí vaha da cuéntá saḥa jahyi da xihín saḥa ndihi na vehe da.

¹³ Jáchi tá ná chindeé vaha da yóho na sacuaḥa veñuhu já casahá cahvi vaha ini ñayivi saḥa dá ta xihín ña yóho ñeḥe ini da çahan chága da saḥá ña candeé ini da Jesucristo.

Cáhan Pablo saḥa ndá a cúu mé Jesucristo

¹⁴ Vatí ndúcú u saa yachi i jan joo cáhyí i carta yóho nuun.

¹⁵ Jáchi tá ná cacuáchi loho i saa i jan já queá sa cándaḥa inún xihín carta yóho ndaja ndítahan caja mí, na cúu na vehe Ndióxi. Mé a ndaa cúu yó cuéntá Ndióxi, mé á tácu ta ndítahan nu yo quiahva ndeé ini ndiquehé saḥá ña ndaa cáhan saḥa Jesucristo.

¹⁶ Jáchi mé a ndaa cáhnu ndivaha cúu ña náha Ndióxi nu yo:

Naquixi Jesucristo ñuyiví yóho ta nasacuu a ñayivi.

Ta naçahan ínima yii Ndióxi saḥa mé á ña coo naçaja ni in cuachi.

Ta naxini tátø Ndióxi Jesús.

Ta ndijáá ñuyiví naçaxi tuhun na tuhun vaha saḥa mé á ta cuahá ndivaha ñayivi naçandeé ini na mé á ta tá nandihí nandaa cuahán indiví.

4

Cáhan Pablo saḥa na co jánaha ña ndaa

¹ Cáhan cáxi ínima yii Ndióxi ña vaxi quivi jándacoo java ñayivi ña candeé ini na Jesús. Ta casahá na candico na na jándahvi ñahá, na jánaha ña naquixi nuú tiñáhá sacuaḥa.

² Ta mé na jánaha ña tuhún yóho co cúu ná tá quiahva ndaa na. Jáchi cúu ná ñayivi túhún, na nandaji xíní túni xihín ña núu.

³ Ta jánaha na yóho ña a cuú tandaha ñayivi ta jánaha na ña a cuú cuxu ñayivi java ñaha, ña naçavaha Ndióxi cuxú. Joo cúni Ndióxi ña ná cuxú ña jan tá ná ndiquiahva í ndixahvi nu mé á saḥa jáchi candeé ini mé á ta xíní vaha í ña ndaa.

⁴ Jáchi tóco ndihi ña naçavaha Ndióxi cúu á ña vaha ta ni in ñaha co ndítahan candají yo. Joo ná ndiquehe vaha í ña ta ná ndiquiahva í ndixahvi nu Ndióxi saḥa.

⁵ Jáchí tá ná caca tahví yo nu Ndióxi já caja yíí mé á ña xihín tuhun mé á.

Ña ndítahan caja da cája chúun vaha cuéntá Jesucristo

⁶ Tá ná jánahún ña yóho nuú na cúu cuéntá Jesús já queá caja chúun vahún cuéntá mé á. Ta quiahva ndeé inún tá jácuaha chágún ña ndaa sahá Jesucristo já ná candico cáhnu chágún íchi cuéntá mé á.

⁷ Coto a táa johún cuento ña cáhan ñayivi ñuyíví jáchi coó saha toho ña jan. Ña ndítahan cajún queá jácuaha chágún ndá quiahva caja cáhnún Ndióxi.

⁸ Tá ná caja chúun cuaha í xihín yiquí cuñu í já queá chindeé a mí ñuyíví yóho cuití va. Joo tá ná caja cáhnu í Ndióxi já queá chindeé chága yó mí jáchi xihín ña yóho cuu coo vaha ini ñuyíví yóho ta sa xihín mé ña yóho cuu coo vaha í xihín Ndióxi tá ná cuhun yó coo í xihín mé á.

⁹ Ta ña yóho cúu á ña ndaa ta xíní ñúhú candúsa í ña.

¹⁰ Ta sa saha mé ña ndaa yóho cája chúun vaha í jáchi cándéé ini Ndióxi, mé á tácu. Mé a cán cúní a jácacu a tóco ndihi ñayivi ta mé a ndaa jácacu a tóco ndihi na cándéé ini mé á.

¹¹ Ta xíní ñúhú jánahún nuú ñayivi tóco ndihi ña cáhí í xuhun yóho ta xíní ñúhú cahndún chuun nu ná ña ná caja na ña.

¹² Coto a quiahvún ñamaní nuú ñayivi quehe núu na yohó sahá ña cúun da yúta. Joo xihín ña cajún xíní ñúhú jánahún nuú na cúu cuéntá Jesús ndá quiahva ndítahan caja na ta ndá quiahva ndítahan cahan na. Ta xíní ñúhú jánahún nu ná ndá quiahva ndítahan quihví ini na ñayivi ta ndá quiahva ndítahan cándéé ini na Ndióxi. Ta víí uun cajún tóco ndihi ñaha já ná a cáhvi núu ini ñayivi sahun.

¹³ Nani ndátún saa í jan xíní ñúhú cahvún tuhun Ndióxi nuú na cúu cuéntá Jesús nu táca na. Ta quiahvún tuhun ndeé ini na ta jánahún na.

¹⁴ Coto a ndíndójún sahá ña nasahan Ndióxi nuun tá naxíca tahví na cúu profeta nu mé á sahun tá nachojó na sacuaaha ndáha ná jinun.

¹⁵ Xihín ndinuhu inún caja chúun cuéntá Ndióxi já ná cuu cuni tóco ndihi ñayivi ndá quiahva xíca vahún xihín ñaha Ndióxi.

¹⁶ Cuéntá vaha coún xihín mún ta cuéntá vaha coún xihín ña jánahún nuú ñayivi. Ta xíní ñúhú coo ndacu inún xihín ndihi ña cajún. Jáchí tá ná cajún ña yóho já queá cacu ndaa ínimun ta jári cacu ndaa ínima na xíní johu nu cáhun.

5

Jánaqa Pablo nu Timoteo ndaja ndítahan caja da xihín na cúu cuéntá Jesús

¹ Co ndítahan jánanún da sáhnu. Ña ndítahan cajún queá jácahun dá tá quiahva cáhun xihín tátún. Ta xíní ñúhú cajún xihín da yúta chága tá quiahva cajún xihín ñanún.

² Ta xihín na sáhnu xíní ñúhú cajún tá quiahva cajún xihín nánún. Ta xihín na tacú xíní ñúhú cajún tá quiahva cajún xihín quiahvún. Víí uun cajún xihín ná ta a cáhvi núu inún saha ná.

³ Xíní ñúhú chindeé ndó na cuaan tá co ndíni cúu na tá ta coó na vehe na.

⁴ Joo tá íin in ña cuaan ta ndúu jahyi ña á ndúu jahyi ñání ña já queá ndítahan nuú na cán chindeé na ña. Jáchí táhan ini Ndióxi xihín ñayivi tá chindeé na tátá náná na ta xihín ña yóho चाहvi na ñamaní nacaja tátá na xihín ná tá najácuahnu ñahá na.

⁵ Jáchí mé ña cuaan ña mé a ndaa coó na vehe ña chindeé na ña mé ña cán cúu ña cándéé chága ini ña Ndióxi. Ta nuú ta ndiví xíca tahví ña nu mé á ña ná chindeé a ña.

⁶ Joo ña cuaan, ña cája ña núu ña cúní mé cuití ña, ña cán cúu ña tátuhun ndíí vatí tácu ña.

⁷ Ña cúní queá ná cahndún chuun yóho nuú na cán já ná a ñehe íni yo jánaní na.

⁸ Jáchí ndá na co chindeé na táhan na ta ni co chindeé na na vehe na já queá náha cáxí a ña co cándéé ini na Jesucristo ta janda núu chága cája na a juú ga na co cúu cuéntá Jesús.

⁹ Tá ndúu na cuaan ta tá cúní na chindeé na na sacuaaha veñuhu já queá cahyún quiví ná nuú tutu. Xíní ñúhú cacuu na na naxinu uní jícó cuia á chága ta xíní ñúhú cacuu na na nasahiin xihín in túhún yí.

10 Mé na yóho xíní ñúhú cacuu na na cáhan vaha ñayivi sahá ña vaha cája na. Tátuhun tá nasandaa vaha na jahyi na á tá nandiquehe vaha na ñayivi xínu coo vehe na. Ta xíní ñúhú cacuu na na cája ndíví nuú na cúu cuéntá Jesús. Ta ndítahan coo tiahvha na chindeé na ñayivi tá ndóho ini na. Tá cája na ña yóho xihín java ga ñaha vaha já cuu quehe ndó na ná chindeé na na sacuahá veñuhu.

11 Joo a cáhyí tohún nuú tutu jan quiví na cuáan, na yúta chá jáchi tiahvha náa casáhá ndiava ini na tandahá tucu na ta anda jáví jándicoo na chuun cája na cuéntá Jesucristo.

12 Ta xihín ña yóho cája na cuachi nu Ndióxi jáchi coo najáxinu coo na tuhun nasahan na nu Ndióxi.

13 Ta jári casáhá xíca nuu na tá vehe tá vehe ta ndúu na na jusá. Ta a juú ña cán cuití va vaha jáchi casáhá na ndahnda yúhu ná ta quíhvi nuu na nuú co ndítahan coo na ta casáhá cáhan na ña co ndítahan cahán na.

14 Sahá ña cán queá cáchí i xuhun ña vaha chága ná tandahá najihí cuáan, na yúta ta ná cacu jahyi na ta ná candaa vaha na vehe na. Ta xihín ña yóho a quiáhva toho na ñamaní nuú na ihvi yo cahán núu na saha ná.

15 Jáchi ndúu java najihí cuáan ta sa nacaxoo na nu íchi cuéntá Jesús ta nacasáhá na ndíco na tiñáhá sacuahá.

16 Joo ndóho, na cúu cuéntá Jesús tá ín ña cuáan nu ndo ndítahan chindeé mé ndó ña já queá ná nuná nuú java ga na cúu cuéntá Jesús chindeé na na cuáan, na coo na vehe.

17 Na sacuahá, na cája chúun vaha na veñuhu ta cómi na cuéntá sahá na cúu cuéntá Jesús, na cán cúu na ndítahan ndiquehe cuahá chága yahvi sahá chuun cája na. Ta chága ví tá xíca nuu na jánahá na tuhun Ndióxi nuú ñayivi.

18 Jáchi já cáchí tuhun Ndióxi já: “A chícáun ñunu yuhú tindiqui nani cája chúun rí sání rí trigo. Joo xíní ñúhú quiáhvún ñamaní nu rí caxí rí ña.” Ta ín inga tucu nu cáchí a: “Da cája chúun ndítahan quehe da yahvi sahá chuun cája da.”

19 A cándúsa tohún na chícáan cuachi jatá in da sacuahá veñuhu tá ta co ndúu ivi á

uni testigo na sahan tuhun sahá ña nacaja da cán.

20 Joo ndá na co cúni jándacoo cuachi cája na já queá xíní ñúhú jánanún na nu táhyí ndihi na cúu cuéntá Jesús já queá ná cayihví na java cán caja na cuachi.

21 Nu Ndióxi ta xihín nu Jesucristo xitoho í ta xihín nu táto Ndióxi sáhdá i chuun nu mún Timoteo ña ná cajún ña nacahyí i yóho. Tá jánanún in da cúu cuéntá Jesús sahá cuachi cája da xíní ñúhú jánanún da vatí cúu dá da xíní táhan vaha xuhun.

22 Coto a chójó yahún ndáhún jiní in da cúni cacuu da sacuahá nuú na cúu cuéntá Jesús. Jáchi nu cuití xíní ñúhú ndicani vaha inún sahá ña cájún. Jáchi tá ná caja da cán cuachi já queá cahán java ñayivi ña ín vaha inún xihín cuachi cája da. Coto a cájún ña núu.

23 Ta sahá ña já cuití quíhvi tisún sahá ña cán co ndítahan cohún ticují uun va. Joo ndítahan coho lohún vino.

24 Ndúu java ñayivi ta náha cáxí táhyí cuachi cája na nuú ñayivi vatí cámaní nahma na ña. Joo ndúu java ga ñayivi ta ñúhu jehé cuachi na joo vaxi quiví tá ndacanáha cuachi na.

25 Ta sa mé quiáhva já ndacanáha cáxí táhyí ña vaha cája java ñayivi. Ta vatí ná caja jehé na ña vaha joo vaxi quiví ndacanáha nuú ña vaha nacaja na.

6

1 Ta ndúu na cúu cuéntá Jesús ta cómi xitoho na cuéntá saha ná já queá xíní ñúhú caja cáhnu na xitoho na xihín ndinuhu ini na já ná a cáhan núu ñayivi sahá quiví Ndióxi ta ni ná a quehe núu na ña jánahá nde.

2 Ta tá ndúu java na ta xitoho na cúu dá cuéntá Jesús já queá xíní ñúhú caja cáhnu na xitoho na sahá ña cúu da cán da candeé ini Jesús. Ña ndítahan caja na cán queá caja ndíví vaha chága na nu sáhdá xitoho na caja na jáchi xíní ñúhú ndicuhun ini na ña tá cája ndíví vaha na nuú da cán já queá cája ndíví vaha na nuú ñani máni ná, da cúu cuéntá Jesús. Ña yóho queá xíní ñúhú jánahún nuú ñayivi ta xíní ñúhú cahndún chuun nu ná ña ná caja na ña.

Ñayivi, na jánahá ña co cúu ña ndaa

³ Ta ndá ñayivi tá jánaha na ña co cúu ña ndaa, ña co ndíque táhan vaha xihín tuhun naçahan Jesucristo, xitoho í nu yó ta ni co ndíque táhan vaha xihín tuhun Ndióxi

⁴ Já quea na cán cúu ná na ndínehe jícó ndivaha mé ta co xini na ni in ñaha. Ndiáva ini na cani táhan yuhu ná ta cásahá cáhivi ini na xihín ñayivi ta ndícuehe xihín táhan na. Cánahá na xihín ñayivi ta co cándéé ini táhan na.

⁵ Ta co jándacoo na ña cani táhan na sahá ña najaca xini túni na ta nandindójó na ña ndaa. Ta cuni na ndicuicá na xihín ña jánaha na nuú ñayivi sahá Jesús. Candehún. Xini ñuhú caxoún nuú na cán.

⁶ Vatí mé a ndaa tá ndico yó ichi cuénta Jesús cúu yó na cuicá ndivaha nani in vaha ini xihín ña cómi yo.

⁷ Jáchi coó ñaha ñehé tá naquixí ñuyiví yóho ta ni coó ñaha cuu cañehé coho tá ná quiví.

⁸ Sahá ña cán quea tá in ña cuxú ta tá in ña candixí já quea ndítahan coo vaha ini.

⁹ Joo na cuni ndicuicá co cándéé na cahnu na nuú ña cuni yiquí cuñu na ta já ndícava na nuú cuachi. Ta xihín ña yóho cásahá ndícají ini na caja na cuahá nuú ña núu. Ta caja ña yóho ña ná ndihi saha ná.

¹⁰ Ta sahá ña catóo ndivaha ñayivi jiuhún sahá ña cán quea quixi cuahá ña núu jini ná. Ndúu java na najándacoo na ña cándéé ini na Jesús sahá ña catóo na jiuhún. Ta sahá ña yóho naçasahá ndóho ini na janda nuú co ndéé ga ini na.

Ndítahan nuú na cúu cuénta Jesús candico cáhnu na mé á

¹¹ Candehún, Timoteo, da cúu cuénta Ndióxi. Xini ñuhú caxoún nuú tóco ndihi ña núu já ná candico cáhnún ichi cuénta ña ndaa. Cajún ña vaha, ña cuni Ndióxi ta cándéé inún Jesús. Xini ñuhú quihvi inún ñani táhún. Quiahva ndéé inún tá ndóho inún ta vii cajún tóco ndihi ñaha.

¹² Xini ñuhú candico cáhnún ichi ña cándéé inún Jesús. Coto a jándacóo inún ichi ña cañehé yóho cuhún coún indivi xihín Ndióxi. Jáchi saha mé ña jan naçana Ndióxi yóho tá naçaxi tuhún nuú cuahá ñayivi ña cándéé inún Jesucristo.

¹³ Nu Ndióxi, mé á caja ña tácu tóco ndihi ñaha ndúu ñuyiví, xihín nu Jesucristo, mé á coó nayihví cahan ña ndaa tá nasandichi a nu Poncio Pilato, nu ndíví a cán sáhdá i chuun nu mún, Timoteo

¹⁴ ña ná cajún xihín ndinuhu inún tóco ndihi ña sáhdá Ndióxi nuun. Ta coto a ndíjama tohún ña jáchi quiahva já ñehé ini ñayivi jananí na yóho. Ta xini ñuhú cajún ña yóho janda quiahva ná tandaa quivi quixi tucu Jesucristo, xitoho í.

¹⁵ Ta tá ná xinu coo quivi nasacu ini Ndióxi já caja mé á ña ná coo tóco ndihi ña yóho. Jáchi in tuhún Ndióxi cúu á ña yii ta cúu á xitoho nu tóco ndihi ñaha. Ta mé á cúu á jini nuú in in da cómi cuénta sahá ñayivi ndúu ñuyiví. Ta mé á cúu á xitoho nuú ndihi da cúu xitoho nuú ñayivi ndúu ñuyiví.

¹⁶ Mé á cúu á in tuhún jini Ndióxi, ña a cúu quivi. Ta ni in ñayivi a cúu cativi yati nu in mé á jáchi yéhe ndivaha nu in mé á. Ta ni in ñayivi ndúu ñuyiví coó naçini na mé á jáchi a cuú cuni ñayivi Ndióxi. Ndítahan caja cáhnu í mé á anda ama cáa quivi jáchi a ndihi toho sahá ña sáhdá mé á chuun. Já ná coo.

¹⁷ Ndítahan nu mún, Timoteo cahndún chuun nuú na cómi cuahá ñaha cuicá ñuyiví yóho ña ná a cácuu na ñayivi catóo ndínehe jícó mé. Ta xini ñuhú cahndún chuun nu ná ña ná a cándéé ini na ñaha cuicá cómi na jáchi cuu ndihi saha tóco ndihi ñaha cómi na. Ña ndítahan caja na quea cándéé ini na Ndióxi, mé á quiahva tóco ndihi ñaha nu yo já ná cajii ini yo.

¹⁸ Cahndún chuun nu ná ña ná caja vaha na ta ná cayojó joho ña vaha caja na. Ta xini ñuhú coo tiahva na cahnda java na ña cómi na xihín java ga ñayivi.

¹⁹ Jáchi xihín ña yóho ñehé táhvi ná coo cuahá ñaha cuicá na indivi tá ná tandaa quivi cuhún na coo na xihín Ndióxi anda ama cáa quivi.

²⁰ Candehún Timoteo. Xini ñuhú quehe cuénta vahún ña jánaha i nuun. Coto a cuni johún tuhun ña cahan ñayivi ñuyiví jáchi coó saha toho a ta ni co xini na ña cahan na saha.

²¹ Jáchi java na cán cáhí na xini ndivaha na joo najándacoo na ña cándéé ini na

Ndióxi.

Ná c̄aja Ndióxi cuahá ñam̄ani xihín ndihi
ndó. Já ná coo.

Carta ivi nacahyí Pablo nuú Timoteo

Chindahá Pablo Ndióxi coo Timoteo

1 Yehe cúu Pablo ta cúu u da apóstol, da cája chúun cuéntá Jesucristo. Nacaxi Ndióxi yehe ta nachindahá mé á yehe caxi tuhun i tuhun vaha sahá Jesucristo nuú ñayivi. Jári nasahan Ndióxi tuhun a nuú ñayivi ña cán queá tá cándéé ini na mé á já queá cuhun na coo na xihin mé á anda ama cáa quivi.

2 Cáhyi i carta yóho nu mún, Timoteo jáchi cúun tátuhun jahyi mí i ta quihvi ndivaha ini i yohó. Ná caja cuaha Ndióxi, tátá yo xihin Jesucristo, xitoho í ñamani xuhun ta ná tahnda ini a sahun ta ná caja mé á ña ná coo vaha inún.

Jácahan Pablo Timoteo ña ná ndicani da nuú ñayivi sahá Jesucristo

3 Ndiquiahva i ndixahvi nu Ndióxi saha mún, Timoteo jáchi ndicuhun ini i yohó tá xica tahvi i nu Ndióxi ñuu ta ndivi. Cája chúun vaha i cuéntá mé á tátuhun nacaja chúun tásahnu jícó i sanahá. Ta xini ña iin vaha inima i nu Ndióxi.

4 Ndicuhun ini i ndaja nasacu ndivahún ta natahnda inún sahá i tá naquee e cán vaxi i yóho. Jári yehe va cuni ndivaha i cuni tucu u yohó já ná chutú ndaa ini i xihin ña cájji ndivaha ini i.

5 Ndiquiahva i ndixahvi nu Ndióxi tá ndicuhun ini i ña mé a ndaa cándéé inún Jesucristo. Nu cuití nacandéé cáhnu ini ná chéhun, Loida xihin nánún, Eunice Jesucristo ta quiahva já xini vaha i ña cándéé cáhnu inún mé á.

6 Ña cán queá jácahan i yohó ña ná ndicuhun inún caja chúun chágun xihin ña ñañehe táhvun nu Ndióxi tá nachinúu i ndahá i jinun.

7 Jáchi co cuni Ndióxi ña ná cayihvi yo. Já queá nasahan inima yii á nu yo já ná nduu ndéé ini ta ná quihvi ini táhan í ta ná cahnu yo mí cañehe vaha í quiahva xihin á.

8 A cácahan toho nuun cahun tuhun vaha sahá Jesucristo, xitoho í. Ta a cácahan nuun saha mí i vatí ndácaan i vecaa sahá Jesucristo. Joo ña ndítahan cajún queá quiahva

ndeé inún tá ná ndoho inún sahá Jesucristo jáchi sahan Ndióxi ndéé mé á nuun.

9 Najácaacu Ndióxi mí ta nacaxi a mí ña ná cacuu ñayivi yii cuéntá mé á. Ta a juú sahá ña nacaja vaha í joo nacaxi a mí jáchi nasacu ini a caja ñamani xoho anda tá cámaní cava sahá saha ñuyivi. Sahá ña cán queá nachindahá a Jesucristo quivi a sahá cuachí.

10 Ta anda viti naxinu coo ña nasacu ini a jáchi naquixi Jesucristo ñuyivi yóho ta naxihi a ndica cruxu. Ta sahá ña nacaja mé á co ndítahan yihvi yo quivi jáchi cuhun í coo í xihin mé á anda ama cáa quivi tá ná cándéé ini tuhun vaha cáhan sahá Jesucristo.

11 Nacaxi Ndióxi yehe ná cacuu u in apóstol cuéntá mé á ña ná jána i tuhun vaha sahá Jesús nuú ñayivi, na coo naquixi chichi Israel.

12 Ta vatí ndóho ini i sahá ña yóho joo co cácahan toho nuú i jáchi xini vaha i yo cúu Jesucristo, mé a cándéé ini i. Nandiquiahva i mí i ndaha mé á ta xini vaha i ña candaa mé á yehe anda quiahva ná tandaa quivi quixi tucu a ñuyivi yóho.

13 Ta jácahan i yohó ña ná candico cáhnún ichi ndaa, ña najána i nuun. A jándicoún ña cándéé inún Jesucristo ta a jándicoún ña quihvi inún ñayivi jáchi in nanduú xihin Jesucristo sahá ña cándéé ini mé á.

14 Sahá ña ndácaan inima yii Ndióxi ini in in yó ta sahá ña chindeé a mí sahá ña cán queá xini ñuhú cacu vahún ña nasahan Ndióxi nuun.

15 Sa xini vahún ña najándicoo tóco ndihi na cúu cuéntá Jesús ndúu estado Asia yehe. Tañu mé na cán ndácaan Figelo xihin Hermógenes.

16 Cuni ña ná tahvi ini Ndióxi sahá Onesíforo xihin na vehe da jáchi cuahá tañu nachindeé da yehe ta já nandivaha ini i. Ta coo nacacahan nuu da sahá ña ndácaan i vecaa.

17 Ña nacaja da queá nandinducú da yehe tá nasaa da ñuu Roma yóho ta coo nandiquehe ndéé dá anda quiahva nandinehe dá yehe.

18 Ná tahvi ini Ndióxi sahá da cán tá ná ndindaa quivi quixi tucu Jesucristo ñuyivi

yóho. Ta sa xíní vahún ña nachindeé da yehe tá nasahin i ñuu Efeso.

2

Ná quiahva ndeé iní tá ndóho iní sahá Jesucristo

¹ Ta mún, Timoteo cúun tátuhun jahyi mí i ña cán queá jácahan i yohó ña ná coo ndacú inún xihin ndée ña nasahan Jesucristo nuun.

² Sa xíní johún tuhun vaha naçaxi tuhun i nuú cuahá ñayivi. Ta viti ndítahan nu mún jánañún ña cán nuú java ñayivi, na cúu ñayivi ndísáñu ini já ná cúu jánañá ná ña nuú java ga ñayivi.

³ Quiahva ndeé inún tá ndóho inún sahá Jesucristo jáchi cúun tátuhun in soldado vaha cuéntá mé á.

⁴ Jáchi in soldado cája cuití da ña sáñdá jefe da nu dá ta co cája da inga ga ñaha jáchi cúni da ña ná tahan ini jefe da sahá ña cája da. Tá quiahva cája mé soldado yóho quiahva já ndítahan nu yo caja í.

⁵ Jári sa xíní vaha ndó ndaja cája da sájiquí pelota. Tá co sájiquí vii da já queá a cuú quee vaha da. Quiahva já cúu á xihin mí jáchi tá co cája í ña cúni Ndióxi já queá a cuú quee vaha í.

⁶ Tá ndíhi ini in da xútu já queá ndítahan nu dá jáquee da nu cuítí ñaha nañutu da. Ta quiahva já ndítahan ndíhi iní caja chúun í cuéntá Jesucristo já queá cuu ndiquehé ña quiahva Ndióxi nu yo.

⁷ Ndicaní vaha inún saha tóco ndíhi ña naçahan i xuhun ta já chindeé Ndióxi yohó candaá vaha inún tóco ndíhi ña cáchi i xuhun.

⁸ Xíní ñúhú ndicuhun inún Jesucristo, mé á naquixi chichi David. Najánditacu Ndióxi mé á tá nañihí a. Ta viti cáxi tuhun i tuhun vaha saha mé á nuú ñayivi.

⁹ Ta ndóho ndivaha ini i sahá tuhun cáhan i nuú ñayivi. Naçató na yehe xihín cadena ta nachicaan na yehe vecaa tá quiahva cája na xihín in da quini. Joo a cuú caja na ña yóho xihín tuhun Ndióxi jáchi cuahá chága ñayivi cáhan na sahá Jesús viti.

¹⁰ Ña cán queá ín tiahva i ndoho ini i sahá ñayivi, na naçaxi Ndióxi cacuu na cuéntá mé á. Jáchi cúni Jesucristo jácaçu a ndíhi

na cándée ini mé á já ná coo na xihin mé á anda ama cáa quivi. Ta ñúchí ndivaha cán.

¹¹ Ña cáchi mé ña yóho cúu á ña ndaa:

Tá ná quiví sahá Jesucristo já queá cuu canduú xihin mé á anda ama cáa quivi.

¹² Tá ná caja ndeé iní ña ndóho iní sahá Jesucristo já queá vaxi quivi cahnda í chuun xihin mé á.

Tá ná cachí ña co cúu yo cuéntá Jesucristo já queá cachi mé á ña co xíní toho a mí.

¹³ Vatí ná ndindójo yo sahá Jesucristo joo a ndindójo toho mé á saha yo, jáchi mé a ndaa jáxinu coo mé á tuhun sahan nu yo caja.

Táhán ini Ndióxi xihín da cája chúun vaha cuéntá mé á

¹⁴ Ña yóho ndítahan jándicuhun inún ñayivi. Cahndún chuun nu ná ña ná a cáni táhan yúhu ná saha ndá tuhun cúu ña vaha chága jáchi coo saha cúu á. Joo ña cája na cán queá játiví na xíní túni mé ñayivi xíní joho ña cán.

¹⁵ Ndinuhu inún caja chúun vahún cuéntá Ndióxi já ná tahan ini mé á xuhun. Tá ná cajún ña yóho já queá a cácahan nuun jáchi ndinuhu ña ndaa najánañún nuú ñayivi.

¹⁶ A quíhvi nuún ndituhún xihín ñayivi tá ndituhún quíhví na jáchi quéta nuu chága na tañu cuachi tá ndituhún quíhví na.

¹⁷ Ta java tañu ña cáhan xihin táhan na jan jándihíhvi a ñani táhan na jáchi tá quiahva jándíhi cuehe táhyi sahá yiquí cuñu ñayivi quiahva já jándíhi tuhun cáhan na sahá ñayivi. Já nandoho Himeneo xihín Fileto.

¹⁸ Naçaxoo ndíví da nu íchi ña ndaa ta viti jánañá da ña tuhún jáchi cáchi da ña sa nayaha va quivi tá nditacu tucu na sa nañihí. Jájana da jiní java ñayivi ña ná a cándée ga ini na Jesús.

¹⁹ Joo Ndióxi cáhan ña ndaa ta a cuú ndijama mé á ña naçahan. Ta já cáchi tuhun Ndióxi sahá ñayivi cuéntá mé á: “Xíní Ndióxi ndá na cúu na cuéntá mé á.” Já cáchi tucu tuhun Ndióxi já: “Tá ná cachi ñayivi ña cándée ini na Jesucristo, xitoho na já queá

ndítahan nu ná jándicoo na cuachi cája na”, cáchí tuhun Ndióxi.

²⁰ Ta viti ná cacu u in quiahva nuun: ini in vehe cáhnu ín ñaha jiuhun cuáán xihín ñaha jiuhun cúxú. Jári ñúhu ri ñaha ñacavaħa xihín yító ta ñúhu ri ñaha ñacavaħa xihín ndahyi. Ta java ña cán ín javí a ta java ña cán ín chuun a ndijáá ní quívi.

²¹ Tá najándicoo í cuachi cája í já quéa cacuú ñayivi vii nu Ndióxi. Ta cacuú tátuhun in coħo vaħa jáchí cuu caja chúun í cuéntá Ndióxi ta já cuu coo tiaħva í caja í tóco ndihi ña vaħa.

²² Cama chá caxoún nuú cuachi ña ndiáva ini da tacú caja da. Ta candico cáhnún íchí cuéntá ña ndaa ta candeé ínún Ndióxi ta quíhvi ínún ñayivi ta coo vaħa ínún xihín ná. Tá ná cajún ña yóho in cacuún xihín tóco ndihi na cúu cuéntá Jesús, na ín vii ínima nu Ndióxi jáchí xíca na nu Ndióxi ña ná chindeé a na.

²³ A quíhvi nuún nditúhún quíhvún xihín ñayivi jáchí tá ná cajún ña yóho já quéa vaxi quívi tá casáhá cani táhan na xuhun.

²⁴ Ta ndá da ndico íchí cuéntá Jesús co ndítahan nu dá nducú da cuachi xihín ñayivi. Ña ndítahan caja da quéa caja vaħa da xihín tóco ndihi ñayivi ta ná cacuu da in da tiaħva jánaħa vaħa ñayivi ta ná coo cáhnu ini da xihín ná.

²⁵ Ta co ndítahan nu dá ndiñeħe jícó da mé dá nani jánaħa da nuú ñayivi, na sáá ini xihín tuhun Ndióxi jáchí tiaħva náá caja Ndióxi ña ná ndicó coo ini na ta já candaa ini na ña ndaa saħá Jesucristo.

²⁶ Jáchí tá ná ndicó coo ini na já quéa jani ná ndáħa tiñáhá sacuaħa jáchí nasacomí mé rí cuéntá saħa ná ña ná caja na ña cúní mé rí.

3

Ña tандаа caja ñayivi tá jalóħo cúní ndihi saħá ñuyívi

¹ Ta ndítahan candaa vaħa ínún, Timoteo ña tá ná cayati quívi quíxi tucu Jesucristo ñuyívi yóho já quéa ndoho ndivaħa ini na cúu cuéntá Jesús.

² Jáchí vaxi quívi tá caja ñayivi cuahá ndivaħa cuachi. Cuahá ñayivi cajihnda ná ta quíhvi ndivaħa ini na jiuħún na. Ta já

caja cáhnu na mé ná ta ichí ndivaħa coo ini na ta candají na Ndióxi ta a cúní joho na nuú caħan tátá náná na xihín ná. Ta ni ndixahvi a ndiquiahva na nu Ndióxi ta ni a caja cáhnu na mé á.

³ Ta a quíhvi ini táhan na ta ni a caja cáhnu ini saħa táhan na. Ta caħan jíquí na saħa java ga ñayivi ta catúhún na. Ta a cuú caħnu na nuú ña xíca ini na caja na. Xíxi coo ini na xihín ñayivi ta candají na tóco ndihi ña vaħa.

⁴ Jícó túhún táhan na. Ta cacuu na ñayivi cama jini. Ta caja ichí ndivaħa ini na. Catóo chága na cáji ini na xihín ñaha ñuyívi yóho a juú ga xihín ñaha Ndióxi.

⁵ Ta caja na tá quiahva cája na cúu cuéntá Ndióxi joo chijeħé tuhun na saħa Ndióxi, mé á saħan ndée nu ná caja na ña cúní mé á.

Caxoún nuú ndihi na cája cuachi yóho.

⁶ Jáchí tañu na jan ndúu java ñayivi, na quíhvi veħe tá veħe jándaħvi na najihí quíhvi xihín ña jánaħa na. Ta mé najihí yóho ndójo cuahá ndivaħa na cuachi jáchí nayaha quiahva cája na tá nuú ña núu xíca ini na caja na.

⁷ Ta mé najihí yóho jácuaha ta jácuaha na joo co xínu coo nu ná candaa ini na ña ndaa.

⁸ Saħa ndivaħa nasanduu ivi da tají. In da naní da Janes ta inga da naní da Jambres. Tá quiahva nasaji nuu da cán nuú Moisés quiahva já sáji nuu java ñayivi nuú ña ndaa viti. Ña núu ndacaan xíní túni na ta coo naxeen na candeé ini na Jesucristo.

⁹ Joo vaxi quívi tá a cúu ga jándaħvi na ñayivi jáchí mé quívi cán candaa cáxi ini ñayivi ndaja tóntó ñacaja na cán. Já nandoho Janes xihín Jambres saħa jáchí nacandaa cáxi ini ñayivi ña ñacaja núu da xihín Moisés.

Sáhdá tucu Pablo chuun nuú Timoteo

¹⁰ Joo sa xíní vahún tá quiahva ñacaja i tá najánaħa i nuun. Ta sa xínun ña cája i catacu u xihín ña nasacu ini i caja i chága chí nuu. Ta sa xínun ndaja candeé ini i Jesús. Ta sa mé quiahva já xíní vahún ña co xójo ini i xihín ñayivi. Ta sa xíní vahún ña quíhvi ini i tóco ndihi ñayivi. Ta xínun ndaja nasahan ndeé ini i

11 tá naca ja xíxi na xihín i ta ndaja najándoho na ini i tá nasahíin i ñuu Antioquía xihín ñuu Iconio xihín ñuu Listra. Joo nachindeé Ndióxi yehe ta natavá mé á yehe nu tóco ndihi ña nandoho i.

12 Ta mé a ndaa ndoho tá ndoho ini ñayivi tá cúní na candico cáhnu na íchi cuéntá Jesús.

13 Ta ñayivi quini, mé na jándahvi ñayivi cája chága ví na cuachi ta co xíní na ndájá xinu coo nuú ndihi cuachi cája na. Xíca na jándahvi na ñayivi ta janda mé na cán najándahvi ñayivi.

14 Joo jácahan i yohó, Timoteo ña ná a jándicoún ña ndaa, ña nacatiahvún tá najácuahún xihín nde jáchi xíní vahún ña cúu á ña ndaa. Ta sa xíní vahún ndá ñayivi cúu nde.

15 Ta cándaa vaha inún tuhun Ndióxi jáchi anda tá lohún najácuahún ña. Ta mé tuhun Ndióxi cuu jána ha yohó cajún ña cúní mé á ta cuu jáca cu a yohó jáchi cándeé inún Jesucristo.

16 Nacahyí ñayivi tóco ndihi tuhun Ndióxi yóho jáchi najácahan Ndióxi ínima ná ña ná caja na ña. Ta mé tuhun Ndióxi yóho chindeé a mí jáchi jána ha mí caja í ña cúní Ndióxi ta jánani ri a mé ví tá co cája vaha í. Ta jándicaca vaha mí tá co xíca vaha í íchi cuéntá Ndióxi. Ta sa mé quiahva já jána ha mí ña ná cacuú ñayivi ndaa, na co cája cuachi.

17 Já queá ná cuu nduu ndacu chága ini na cándeé ini Ndióxi xihín tuhun mé á ta xihín ña yóho cuu coo tia hva na caja na tá nuú ña vaha.

4

1 Vaxi quivi quixi tucu Jesucristo ñuyiví yóho cacomí a cuéntá sahá yo ta mé já caja ví a sahá na tácu xihín sahá na sa naxihí. Sahá ña cán queá nu Ndióxi xihín nuú Jesucristo, xitoho í sáhdá i chuun nu mún, Timoteo

2 ña ná coo tia hvún cahun tuhun Ndióxi nuú ñayivi ní tiempo tá núná nuún á tá coo. Ta ndítahan nuun cavún jiní na cája cuachi ta jácahún na ña ná caja na ña cúní Ndióxi. Ta ndítahan quiahvún tuhun ndeé ini na. Ta víi víi jána hún tuhun Ndióxi nu ná ní tiempo.

3 Jáchi vaxi quivi tá a cándusa ga ñayivi cuni johó na tuhun ña ndaa. Joo ndihi ini na nducú cuahá na maestro, da jána ha ña xíca ini mé ná taa johó na.

4 Ta a cándusa na taa johó na ña ndaa jáchi cájii chága ini na taa johó na ña tuhún cuéntá ñayivi ñuyiví.

5 Sahá ña cán queá sáhdá i chuun nu mún, Timoteo ña ná cañehe vahún quiahva xihín ña cajún. Ta quiahva ndeé inún tá ná ndoho inún. Caxi tuhún tuhun vaha sahá Jesús nuú ñayivi xihín ndinuhu inún. Ta xíní ñuhú jáxinu coún tóco ndihi chuun nasahan Ndióxi nuun cajún.

6 Sa ín tia hva i joco i mí i nu Ndióxi. Sa xíní ví ña sa nacayati quivi quivi vi.

7 Nacaja chúun vaha i cuéntá Ndióxi tátuhun cája chúun vaha in soldado nu jefe da. Najáxinu coo ndihi i chuun nasahan Ndióxi nuú i tátuhun cája in da xínu tá sa naquee vaha da. Ta nandico cáhnu i íchi ña cándeé ini i Jesús.

8 Ta viti ndáti i casaa quivi caja víi Jesucristo, xitoho í saha tóco ndihi ñayivi. Mé tiempo cán ndiquehe e ña quiahva mé á nuú i sahá ña naca ja i ña ndaa. Ta quiahva já caja Jesucristo, mé á cúu ña ndaa xihín java ga ñayivi, mé na cájii ini ndáti na casaa quivi quixi tucu a ñuyiví.

Cáhan Pablo cuéntá mé da viti

9 Ndihi inún quixi camún coto nihnún yehe.

10 Najándicoo Demas yehe jáchi nacatóo chága da ñaha ñuyiví yóho ta cuahan da ñuu Tesalónica viti. Ta naquee Crescente cuahan da estado Galacia ta já naquee Tito cuahan da chí estado Dalmacia.

11 In túhún Lucas ín da xihín i. Ndinducún Marcos ná quixi da xuhun tá ná quisún yóho jáchi cuu chindeé vaha da yehe xihín chuun cája i yóho.

12 Sa nachindahá i Tiquico ñuu Efeso.

13 Tá ná quisún yóho cajún ñamani cañehún cotó ndeé e ña najándicoo i ñuu Troas vehe Carpo. Ta jári libro va cañehún ña quisún yóho. Ta a ndíndójún cañehún ní quítí ña nacahyí i nuun.

14 Á co ndícu hun inún Alejandro, da cája chúun cáni caa. Cuahá ndivaha ña núu

naçaja da xihín i joo vaxi quivi tá चाहvi da sahá, caja Jesucristo, xitoho í.

¹⁵ Cuéntá coún xihín dá jáchi cándají ndivaha da tuhun Ndióxi, ña jánaha yó nuú ñayivi.

¹⁶ Tá nandiquehe e sahá i nu cuítí nuú na jutixia ni in ñayivi coó nachindeé yehe. Tóco ndihi na najándicoo na yehe. Ná caja cáhnu ini Ndióxi sahá ña naçaja na cán.

¹⁷ Joo Ndióxi quéa nachindeé a yehe ta nasahan ndée á nuú i ña ná cuu çaxi tuhun i tuhun vaha sahá Jesús ná cuni johó tóco ndihi na coó naquixi chichi Israel. Tá nachindeé Ndióxi yehe já cúú á tátuhun naçacu yehe yuhú león.

¹⁸ Ta cándeé ini i ña jáçacu a yehe nuú ndihi ña núu. Ta candaa vaha Ndióxi yehe anda quiví çuhun i indiví coo i xihín mé á nu çahnda Ndióxi chuun anda ama cáa quivi. Cóho caja cáhnu í mé á anda ama cáa quivi. Já ná coo.

Ndíndayí Pablo na cúú cuéntá Jesús

¹⁹ Chindahá i Ndióxi coo Prisca xihín Aquila xihín na vehe Onesíforo.

²⁰ Naçandoo Erasto ñuu Corinto. Ta naçandoo Trófimo ñuu Mileto jáchi quíhvi da.

²¹ Ndihi inún quisún yóho tá cámaní xinu coo tiempo vixi. Eubulo xihín Pudente xihín Lino xihín Claudia chindahá na Ndióxi coún. Ta jári ndihi na cúú cuéntá Jesús ñuu yóho chindahá na Ndióxi coún.

²² Ná coo Jesucristo, xitoho í xuhun. Ná caja Ndióxi cuahá ñamaní xihín ndihi ndó.

Carta nachindahá Pablo nu Tito

Cáhan Ndióxi Pablo xihin Tito

¹ Yehe cúú u Pablo, da cajúa chúun cuéntá Ndióxi ta cúú u in apóstol cuéntá Jesucristo. Nachindahá Ndióxi yehe caxi tuhun i tuhun vaha saha mé á nuú ñayivi ña ná candee ini na mé á. Ta já ná candaa ini na ña ndaa saha mé á jáchi nandicaxi a na.

² Ta ndáti tiahva na chun na coo na xihin mé á anda ama cáa quivi jáchi já nasahan Ndióxi tuhun a nu yo tá camani cava sáhá saha ñuyivi. Ta co cáhan Ndióxi ña tuhun.

³ Ta viti naxinu coo quivi nasacu ini Ndióxi jánaha nuú ñayivi ndá quiahva cuu candee ini na mé á. Ta viti ndójo i chuun ña nasahnda Ndióxi nuú i ña ná caxi tuhun i tuhun vaha saha Jesucristo nuú ñayivi, mé a jaca mi.

⁴ Chindahá i tutu yóho nu mún, Tito, da cúú tátuhun jahyi mí i jáchi in nuú candee ini Jesucristo. Ta xica tahvi i nu Ndióxi, tátá yo xihin nuú Jesucristo, xitoho í, mé a jaca mi ña ná cajúa cuahá ñamani xuhun ta ná cajúa ña ná coo vaha inún.

Chuun nacaja Tito isla Creta

⁵ Najándicoo i yohó isla Creta jan ña ná jáxinu coun chuun ña najándicoo ñahnu i jan. Ndítahan ndicasún na sacuaña nuú na cúú cuéntá Jesús in in ñuu tá quiahva nandicani i nuun cajún.

⁶ Ta mé da sacuaña yóho ndítahan cacuu da ñayivi vaha, da a cúú ñehe ini ñayivi janani na sahá ña cajúa da. Ta ndítahan nu dá cacuu da da coo inga ñaha xihin ta in tuhún ñajihí da ndítahan coo. Ta ndítahan nuú jahyi da candee ini na Ndióxi. Ta co ndítahan nuú jahyi da cajúa na ña núu joo ndítahan nu ná candúsa na cajúa na ña cáchi náná tátá na já ná a cúú chicaan ñayivi cuachi jata ná.

⁷ Jáchi ndá da cúú da sacuaña cajúa chúun da cuéntá Ndióxi sahá ña cán quea ndítahan cacuu da in ñayivi ndaa. Ta co ndítahan nu dá cajúa ichi ini da ta ni co ndítahan nu dá

cajúa cama ini da xihin ñayivi. Ta ni ná a cacuu da da xihí ta ni ná a catóo da cani táhan da xihin ñayivi ta ni ná a catóo da ñehe cuahá dá jjuhún.

⁸ Ña ndítahan nu dá cajúa da quea cajii ini da ndiquehe vaha da ñayivi vehe da ta ná cajúa da ña vaha cuití va ta ná cacuu da da ndísahnu ini, da cañehe vaha quiahva. Ta ndítahan nu dá cajúa da ña ndaa cuití va ta ná candico cáhnu da ichi cuéntá Ndióxi ta ná candaca vii da yiquí cuñu da ná a cajúa da cuachi.

⁹ Ta ndítahan nu dá cativi tuun da ña ndaa sahá Jesucristo, ña nacatiahva da já quea cuu chindee da ñayivi xihin ña ndaa jánaha da nu na. Ta xihin mé tuhun vaha yóho cuu jáxinu da ini java ga ñayivi, na cáhan núu sahá tuhun Ndióxi.

¹⁰ Jáchi cuahá ñayivi co cúni na cajúa na ña cáchi tuhun Ndióxi. Ta tañu na yóho ndúu cuahá na Israel. Coó saha toho tuhun cáhan na ta xihin ña yóho jándahvi na ñayivi.

¹¹ Yuhú na yóho ndítahan chicají jáchi xica na jájaca na jini ñayivi ta janda tóco ndihi na ndúu vehe nacava na jini ná xihin ña co cúú ña ndaa já ná ñehe cuahá na jjuhún jata ñayivi jándahvi ñaha na.

¹² Ta tañu na yóho nasahin in profeta ta já nacachi da já sahá ñayivi ñuu da, na ndúu isla Creta cán: “Na ndúu Creta cáhan na ña tuhún níi tiempo. Yucú na ta ndehé na ta júsa ndivaha na cajúa chúun na”, nacachi da.

¹³ Ta ña ndaa cúú ña nacahan da cán saha ná. Ña cán quea ndítahan nuun janani vahún na ña ná candee cáhnu ini na Jesús

¹⁴ ta ná a táa johu na cuéntó ña ndicani ñayivi Israel nu ná jáchi ña quíxi jini mé va na quea. Ta ná a táa johu na nu cáhan ñayivi, na nacaxoo nuú ña ndaa.

¹⁵ Ta tá ndacaan vii xini túni ñayivi já quea tóco ndihi ñaha cúú á ñaha vii nu ná. Joo tá co cándúsa ñayivi Ndióxi ta ndacaan ña núu xini túni na já quea tóco ndihi ñaha cúú á ña núu nu ná jáchi co in vii inima ná xihin xini túni na.

¹⁶ Vatí cáchi na yóho ña candee ini na Ndióxi joo xihin ña núu cajúa na náha ña mé a ndaa co candee ini na mé á. Sáa ndivaha ini na ta a xeén toho na cajúa na ña ndaa sahá ña cán quea ni in ñaha vaha a cuú cajúa na.

2

Ndítahan jánaḥa yo tuhun vaḥa saḥá Jesús nuú ñayivi

¹ Ta ndítahan nu mún, Tito jánaḥún ñayivi ndaja caja na ña ndaa, ña cáchí tuhun Ndióxi caja na.

² Jánaḥún na sacuaḥa ña ndítahan cacuu na ñayivi ndisáḥnu ini, na ín toní ñúhú ñayivi xihín, na ñéhe vaḥa quiaḥva xihín ñaha. Ta ndítahan candeeé vaḥa ini na Ndióxi ta ndítahan quihvi ini na ñayivi ta ndítahan coo ndacú ini na já ná cuu candeeé ini na tá ná ndoho ini na.

³ Ta quiaḥva já ndítahan coo toní ñúhú najihí sacuaḥa xihín ñayivi. Ta co ndítahan cacuu na najihí túhún ta ni ná a cacuu na na xihí. Jáchi ndítahan nu ná cacuu na na ín toní ñúhú ñayivi xihín saḥá ña vaḥa cája na.

⁴ Ta ndítahan jánaḥa na najihí yúta ña ná quihvi ini na yíi ná xihín jahyi na.

⁵ Ta ndítahan caḥnu na mé ná ta ndítahan cacuu na ñayivi vii ta ná candaa vaḥa na vehe na ta ná caja na ña vaḥa cuití va. Ta ndítahan candúsa na caja na ña sáḥndá yíi ná nu ná. Tá cája na tóco ndihi ña yóho já queá a ñéhe ini ñayivi caḥan núu na saḥa tuhun Ndióxi.

⁶ Ta quiaḥva já ndítahan jácaḥún da tacú ná coo ndisáḥnu ini da.

⁷ Xihín ña cájún jánaḥún nu ná ndaja caja na ña vaḥa. Ta xini ñúhú jánaḥa ndisáḥnu ña yóho nu ná ta ná cajún ña xihín ndinuhu inún.

⁸ Ta ná caḥún ña vaḥa cuití va já queá a cúu chicaan ñayivi cuachi jatun. Ta xihín ña yóho cacahan nuu na co cúni yohó jáchi a cúu caḥan ihvi ná saḥa ndihi ndó, na cúu cuéntá Jesús.

⁹ Ta jácaḥún ndá na cája chúun xihín xitoho na ña ná caja na tóco ndihi ña sáḥndá xitoho na nu ná jáchi xini ñúhú coo toní ñúhú na xihín ná ta ná a nducú ñéhe ichi na tuhun nuú xitoho na.

¹⁰ Ta ná a cája cuíḥná na nu ná joo ná cacuu na ndinuhu ñayivi ndaa. Ta xihín ña yóho náha ndá quiaḥva ndató ndivaḥa cúu tuhun Ndióxi, ña caḥan saḥa mé á jácaḥu a mí.

¹¹ Najánaḥa Ndióxi mí ña cúni a caja cuahá ñamaní xihín ñayivi ta ín tiaḥva mé á jácaḥu a tóco ndihi ñayivi.

¹² Ta jánaḥa mé á nu yo ña ndítahan jándicoo í tóco ndihi ña núu, ña xica ini caja í ñuyiví yóho. Jáchi ndítahan nu yo caḥnu í mí ta ná caja í ña ndaa cuití va ta ná candico caḥnu í ichi cuéntá Ndióxi.

¹³ Ta cájii ini nani ndáti tiaḥva í xinu coo quivi ndicó coo tucu Jesucristo xihín ndee á. Ta cúu á Ndióxi caḥnu ta jácaḥu a mí.

¹⁴ Nandiquiaḥva Jesucristo mé á quivi a saḥá ndihí jáchi cúni a jácaḥu a mí ná a cája ga yo ña núu. Ta cúni a jándoo a tóco ndihi cuachí já ná nduú ñayivi cuéntá mé á ña ná ndihi ini caja í ña vaḥa.

¹⁵ Ndítahan jánaḥún tóco ndihi ña yóho nuú ñayivi ta jácaḥún na ña ná caja na ña naḥayíi yóho. Ta ndítahan nu mún jánanún ñayivi cája cuachi jáchi ín saḥun caḥndún chuun nu ná. Coto a quiaḥvún ñamaní nuú ñayivi quehe núu na yohó.

3

Ña ndítahan caja na cúu cuéntá Jesús

¹ Xini ñúhú jándicuhun inún na cúu cuéntá Jesús ña ná coo johó na nu sáḥndá na jutixia nu ná. Ta ná coo tiaḥva na caja na ndá ña naḥuu nani cúu á ña vaḥa.

² Ta xini ñúhú caḥún xihín ná ña ná a caḥan núu na saḥá inga ñayivi ta ná a cáni táhan na xihín inga na joo vii caja na xihín ná. Ta ná a ndíñehe jícó na mé ná nuú ndihi ñayivi.

³ Jáchi ndítahan ndicuhun ini ña tá cámaní ndihvi ichi cuéntá Jesús já naḥaja í cuahá nuú cuachi. Quihvi naḥaja í ta coo naḥaja í ña cúni Ndióxi. Naḥandúsa í ña tuhún, ña naḥachi na jándahvi mí. Ta naḥaja í tá nuú ña núu jáchi nandiaḥa ini yo caja í ña ta mé cuachi naḥanda chuun nu yo. Tóco ndihi quivi naḥaja í ña núu ta naḥacuú ñayivi ihvi ini. Naḥandají ñayivi mí ta ndaja mí naḥandají táhan í viti.

⁴ Andá jávi Ndióxi, mé a jácaḥu mí najánaḥa nu yo ña táhvi ini a saḥa yo ta quihvi ini a mí.

⁵ Saḥá ña cán queá najácaḥu a mí. Ta coo naḥaja ña saḥá ña vaḥa naḥaja í. Joo najácaḥu a mí jáchi táhnda ini a saḥa yo.

Najándoo a cuachí ta xihín ña yóho ñacaja ínimá yíi Ndióxi ña ñanduú ñayivi saá, ña xíca íchí saá viti.

⁶ Naxihí Jesucristo saha yo ña ná jácacu a mí ta xihín ña yóho ñachutú ndaa ínimá yo xihín ínimá yíi mé á.

⁷ Nacaja Ndióxi ñamani uun xihín yo ña ná canduu ndaa yó nu mé á sahá ña cán quéa ndáti tiahva í cuhun yo coo í xihín mé á anda ama cáa quívi.

⁸ Ta tóco ndihi ña cáhyí í yóho cúú á ña ndaa. Sahá ña cán quéa cúni ña ná ndinuhu inún jánahún ña yóho nuú ñayivi, ña cúú cuéntá Jesús ña ná ndihi ini na caja na ña vaha. Jáchi ña ñacahyí í yóho cúú á ña vaha ta cuu chindee a tóco ndihi ñayivi.

⁹ Joo coto a quíhvi nuún nditúhún xihín ñayivi cáhan tuhun quíhvi, ña ndícani sahá chíchi tásáhnú jícó yo. Ta a ndíhvi ndó caní táhan yúhu ndó xihín ná saha ley Moisés jáchi coo saha toho ña yóho ta mé a uun va quéa caní táhan ndó xihín ná.

¹⁰ Tá íin in ña cúú cuéntá Jesús ta tá cúni ña caní táhan na xihín java ga ña cúú cuéntá Jesús, xíní ñúhú jánanún ña ña ná a cája ga ña ña yóho. In á ívi tañu cuití va cahún xihín ña ta tá coo cúni ña cuni johó na ña cáhun xihín ná já quéa tavún ña ña ná cuhun ña.

¹¹ Jáchi sa xíní vahún ña ñandeta nuu ña núu xíní túni ná ta sa xíní vaha na ña cája na cuachi.

Sáhdá Pablo chuun nu Tito

¹² Tá ná chindahá í Artemas á Tíquico nuun já quéa ndihi inún cuhun ñuu Nicópolis jáchi cán cája í cuéntá coo í tiempo vixi.

¹³ Xíní ñúhú ndinducún ndaja cuu chindeún Apolos xihín Zenas, mé da tiahva ley. Quiahvún ñaha nu ná já ná a ndímani ñaha tá ná quee na cuhun ña viaje ña.

¹⁴ Ta ndítahan nu ndihi ña cúú cuéntá Jesús jácuaha na ndaja caja na ña vaha xihín java ga ñayivi. Ta ndítahan nu ná chindee ña ndá ñayivi ñacuu na ndímani ñaha nu. Tá ná caja na ña yóho já quéa a coo uun va na ñuyíví yóho.

Ndíndayí Pablo Tito

¹⁵ Tóco ndihi ña ndúu xihín í chindahá ña Ndióxi coún ta chindahá nde Ndióxi coo ndihi ña cúú cuéntá Jesús cán jáchi xíní

vaha í ña quíhvi ini na ndehe sahá ña cándeé íní Jesús. Ná caja Ndióxi cuahá ñamani xihín ndihi ndó. Já ná coo.

Carta naçahyí Pablo nuú Filemón

Chíndahá Pablo Ndióxi coo Filemón

¹ Yehe cúú ʋ Pablo ta ndácaan i vecaa yóho saha ña cúú ʋ cuéntá Jesucristo. Yehe xihin Timoteo, ñani í, da cúú cuéntá Jesús cáhyí nde carta yóho nu mún, Filemón. Quihvi ini nde yohó ta in cúún xihín nde sahá ña cája chúún cuéntá Jesucristo.

² Ta jári cáhyí nde carta yóho nuú na cúú cuéntá Jesús táca vehún jan xihín nu Apia, ñá cúú quiahva í sahá ña cándeé ini ñá Jesús. Ta quiahva já cáhyí nde carta yóho nu Arquipo jáchi in cúú da ndóho ini da cája chúun da cuéntá Jesucristo.

³ Ndióxi, tátá yo xihín Jesucristo, xitoho í ná caja cuahá ñamaní xihín ndo ta ná caja ña ná coo vaha ini ndó.

Cándeé cáhnu ini Filemón Jesucristo

⁴ Tá xíca tahví i nu Ndióxi sahun co ndíndójó i ndiquiahva i ndixahvi nu mé á saha mún.

⁵ Jáchi nañehé e tuhun ña cándeé inún Jesucristo, xitoho í ta quihvi inún mé á xihín ndihi na cúú cuéntá mé á.

⁶ Ta xíca tahví i nu Ndióxi ña ná ndicanún nuú java ñayivi ndá quiahva cándeé inún mé á. Ta xihín ña yóho cuu candaá vaha ini na ndaja náhnu ñamaní cája Ndióxi xihín tóco ndihi mí, na cándeé ini Jesucristo.

⁷ Cájji ini i ñani mí i ta sahan tuhun ndeé ini i jáchi quihvi inún na cúú cuéntá Jesús. Ta jári sahan tuhun ndeé ini cuahá na cúú cuéntá Jesús jáchi quihvi inún na.

Xíca Pablo ñamaní nu Filemón saha Onésimo, da naxeen Filemón caja chúun nu dá

⁸ Yehe cúú ʋ in apóstol Jesucristo ña cán queá in sahá i cahnda i chuun nuun cajún ña ndítahan nuun cajún.

⁹ Joo co cája i ña. Ña cája i queá xíca i ñamaní nuun jáchi quihvi ini i yohó. Xíní ñúhú ndicuhun inún ña cúú ʋ Pablo, da sahnu, da ndácaan vecaa saha Jesucristo.

¹⁰ Ta viti xíca i ñamaní nuun saha Onésimo, da nanduu tátuhun jahyi mí i cuéntá Jesús nani ndácaan i vecaa yóho.

¹¹ Jihna ga nasacuu Onésimo da coo chuun nuun joo viti in chuun da nu ndívi yo.

¹² Ta viti chíndahá i da nuun. Ndiqeehe vahún da saha mí i jáchi quihvi ndivaha ini i da.

¹³ Cúni ña ná candoo da yóho xihín i já ná cuu chindeé da yehe nu mún. Jáchi ndácaan i vecaa yóho sahá ña cáhan i tuhun vaha sahá Jesucristo nuú ñayivi.

¹⁴ Joo nasacu ini i chíndahá i da nuun jáchi tiahvva náá a vaha cúú inún xihín i tá ná candoo da yóho xihín i. Jáchi tá ná cajún ñamaní xihín i cúni ña ná cájji inún cajún ña ta co cúni caja ndúsa i xuhun.

¹⁵ Cája i cuéntá naçaxoo too Onésimo nuun joo viti ndicó coo da ná coo da ní tiempo xuhun.

¹⁶ A cája gaún cuéntá ña cúú dá da naxeún. Joo vaha chága viti jáchi cúú da ñani mání yohó cuéntá Jesucristo. Quihvi ndivaha ini i da joo xíní ñúhú quihvi ini chágun da jáchi cája chúun da nuun ta cúú da ñanún cuéntá Jesús viti.

¹⁷ Ta tá mé a ndaa quihvi inún yehe já queá ndiquehe vahún da tá quiahva ndiquehe vahún yehe tá ná xinu coo i nu inún jan.

¹⁸ Ta tá naçaja da in cuachi nuun á tá yíca da nuun já queá ndacún ña nuú i ta já chahvi i sahá.

¹⁹ Yehe cúú ʋ Pablo ta cáhyí i ña yóho xihín ndáha i já ná candaá inún ña sahan i tuhun i nuun ña chahvi i ña. Xíní ñúhú ndicuhun inún ña yícun nuú i jáchi nandihvún íchi cuéntá Jesús sahá tuhun naçahan i xuhun.

²⁰ Inga tucu xíca i ñamaní nuun ña ná ndiquehe vahún Onésimo jáchi cúún ñani mí i, da cúú cuéntá Jesús. Tá ná cajún ña yóho sahá ña cándeé inún mé á já queá quiahvún tuhun ndeé ini i.

²¹ Candaá vaha ini i ña cajún ña xíca i nuun cajún sahá ña cán queá cáhyí i carta yóho nuun ta candaá ini i ña yaha chága cajún nuú ña xíca i nuun.

²² Inga tucu xíca i ñamaní nuun ña ná caja tiahvún in vehe loho nuú coo i. Jáchi sahá ña xíca tahví ndihi ndó nu Ndióxi ña ná saa i coto niñni i ndohó sahá ña cán queá cája i cuéntá caja mé á ñamaní xihín i saa i jan.

Ndínḡyí Pablo Filemón

²³ In da naní Epafra, ḡ ndácaḡan vecḡa xihín ì saḡ Jesucristo chíndahá ḡ Ndióxi coún.

²⁴ Chíndahá Marcos xihín Aristarco xihín Demas xihín Lucas Ndióxi coún. Mé na yóho cája chúun na xihín ì cuéntá Jesucristo.

²⁵ Ná caja Jesucristo, xitoho í cuḡhá ñamanì xihín ndihi ndó, na ndúu jan. Já ná coo.

Hebreos, mé carta cuahan nuú na Israel

*Nachindahá Ndióxi Jesucristo ña ná quixi
a jáyaha tuhun Ndióxi nu yó*

¹ Cuahá ndivaha tañu ñacahan Ndióxi sanahá xihín tásáñnu jícó yó. Ta cuahá ndivaha nuú ñacahan xihín ná tá najáyaha na profeta tuhun cáhan mé á nuú ñayivi.

² Joo tiempo nu ndíhí yóho nachindahá mé á Jesucristo, in túhún jini já jahyi a ña ná jáyaha tuhun Ndióxi nu yó viti. Ta ñacaja Ndióxi ña ñacavaha Jesucristo ndijáá ñaha ñuyiví xihín ñaha indiví. Ta najándaco Ndióxi tóco ndihi ñaha yóho ndáha mé á.

³ Ta mé á quéa náha ndá quiahva cáhnu cúu Ndióxi jáchi yehe a tá quiahva yehe Ndióxi. Ta tá quiahva cáa Ndióxi quiahva já cáa ri Jesucristo, jahyi a. Ta xihín tuhun cáhan yúhu mé á cómi a cuéntá saha tóco ndihi ñaha jáchi in ndivaha ndée tuhun mé á. Ta ñandaja vií mé a mí nuú ndihi cuachí ta já ñasaco a indiví xoo cuáha Ndióxi, tátá a.

*Cáhnu chága Jesucristo a juú ga táto
Ndióxi*

⁴ Ta Jesucristo, mé jahyi Ndióxi ñaxinu a ñandu a ña cáhnu chága a juú ga táto Ndióxi. Ta ñacaja Ndióxi ña ná ñehe táhvi á ña cáhnu chága quivi naní a a juú ga quivi táto mé á.

⁵ Jáchi a ñaha cachi Ndióxi xihín ni in túhún toho táto mé á tá quiahva ñacachi a xihín jahyi a já:

Jahyi yehe cúu yóhó,

ta viti cáchí i ña ñandu u tátún, cáchí a.

Ta ni coó ñacachi Ndióxi xihín ni in túhún toho táto á tá quiahva ñacachi a xihín jahyi a já:

Yehe cacuu u tátún,

ta yóhó cacuún in túhún jini já jahyi yehe, cáchí a.

⁶ Joo tá jalóho cúni chindahá Ndióxi Jesucristo, jahyi a ñuyiví yóho já ñacachi a já:

Ndítahan nu tóco ndihi táto mí i caja cáhnu na jahyi i, ñacachi a.

⁷ Já ñacachi Ndióxi já saha táto mé á:

Tá quiahva cama chá xícó tachí quiahva já cama chá cuahan táto mí i.

Ta yehe ña tá quiahva yehe ñuhú cáyi ita, já ñacachi Ndióxi.

⁸ Joo tá ñacahan Ndióxi sahá jahyi a já ñacachi a já:

Yóhó cúun Ndióxi ta cacomún cuéntá sahá ñayivi anda ama cáa quivi,

ta cáhndún chuun xihín ña ndaa.

⁹ Ta a juú quiahva cátóun ña vaha ta ñacandajún ña núu.

Sahá ña cán quéa ñacaxi i yóhó jáchi yehe cúu u Ndióxi ta cúu u tátún.

Ta najácutú ndaa i yóhó xihín ña cáji inún já ná cajji chága inún a juú ga ña xica xuhun, ñacachi a.

¹⁰ Ta jári já ñacachi a já xihín jahyi a:

Ñacavahún tóco ndihi ñaha tá ñacava sahá saha ñuyiví ta cúun xitoho nuú ña cán.

Ta xihín ndáhun ñacavahún indiví.

¹¹ Ta vaxi quivi tá ndihi saha tóco ndihi ña yóho joo mún coo tá coún anda ama cáa quivi.

Ta tóco ndihi ña ñan cayatá ña tá quiahva cayatá jáhma ndíxi na.

¹² Tá quiahva sáñnu ñayivi jáhma quiahva já chicanún ñuyiví xihín indiví.

Ta tá quiahva ndijama ñayivi jáhma ndíxi na quiahva já ndijama ña ñan cajún.

Joo mún a ndijama tohún jáchi coo tá coún anda ama cáa quivi,

ta a ndijama tohún ta a ndíhi toho sahun, ñacachi Ndióxi xihín Jesucristo.

¹³ A ñaha cachi Ndióxi xihín ni in túhún toho táto mé á tá quiahva ñacachi a xihín jahyi a já:

Naha quí cacuún xoo cuáha i yóho,

janda quiahva ná cahnu i nu tóco ndihi na coo cúni yóhó ta janda ná chinduu u ña sahun ñan, ñacachi Ndióxi xihín Jesucristo.

¹⁴ Jáchi tóco ndihi táto Ndióxi cúu ná na tácu ta ín ínimá ná joo coo toho yiquí cuñu na. Cája chúun na cuéntá Ndióxi ta mé á chindahá a ña ñuyiví ña ná chindee ña ñayivi, ña ñacaxi Ndióxi cacu ndaa ínimá.

2

Naquixi Jesucristo jácacu a mí

1 Sahá ña cán quea ndítahan nu yó taa johó í ña ndaa, ña naxini johó í já ná a cáxoo í íchi cuéntá Ndióxi.

2 Nacahan tátó Ndióxi tuhun nasahan mé á nu ná ta cúu á ña ndaa joo coó naxeen ñayivi cacu vaha na ña. Sahá ña cán quea najándoho Ndióxi ini na tá quiahva ndítahan ndoho ini na sahá cuachi nacaja na.

3 Joo mí, ndaja caja í cacu ndaa ínima yo tá ta coo táa johó í tuhun cáhan sahá Jesús, mé a jácacu mí. Ta ña yóho cúu á ña cáhnu ndivaha jáchi jihna ñúhú ga mé Jesucristo, xitoho í nacaxi tuhun a ña yóho nuú ñayivi. Ta na nataa johó nu cáhan mé á, na cán sáhan na tuhun na nu yo ña cúu á ña ndaa.

4 Ta náha Ndióxi ña cúu á ña ndaa jáchi cája mé á cuahá ndivaha ña náhnu xihín ña xítúhún ndivaha. Ta nachindahá Ndióxi ínima yíi mé á nuú na cúu cuéntá Jesús ña ná caja na ña xítúhún tá quiahva nasacu ini mé á caja na.

Nanduu Jesucristo in ñayivi

5 Coó nasahan toho Ndióxi ñamaní nu tátó mé á ña ná cacomí na cuéntá sahá ñuyíví saá, ña vaxi chága chí nuu.

6 Jáchi já cáchi tuhun Ndióxi já: Tátá Ndióxi, coó saha toho ñayivi ta coó ña náha cúu ná. Joo mé ndó ñúhu ini ndó saha ná ta ndíhi ini ndó saha ná.

7 Tá nacavaha ndó ñayivi nandaja ndó na nanduu na ña náhnu ndivaha.

Ta tátó mé ndó cuití va cúu ná nasayojó loho nu ná tixi chá tiempo.

Ta tóco ndihi ña nacavaha ndó nandiquiahva ndó ña ndahá ñayivi,

8 já ná cacomí na cuéntá sahá, cáchi tuhun Ndióxi.

Ta mé a ndaa ni in ñaha coó nacandoo xoo jáchi nasacu ini Ndióxi cacomí ñayivi cuéntá saha tóco ndihi ñaha joo cámani yíi va xinu coo mé quívi cán.

9 Vatí cámani yaha ña yóho joo xini yo ña nandoho Jesús. Tixi chá tiempo nacaja Ndióxi ña ná nuu ndáha chága mé á nu tátó Ndióxi jáchi saha ña quíhvi ini Ndióxi mí saha ña cán quea nasacu ini a ña ná quivi Jesucristo saha ndihi ñayivi. Ta viti nandindita mé á nanduu a ña cáhnu

ndivaha saha ña nandoho a tá naxihi a ndica crúxu.

10 Tóco ndihi ñaha ña nacavaha Ndióxi cúu á cuéntá mé á saha ña nacachi mé á ña ná coo a. Ta nasacu ini a ña ná ndoho ini Jesucristo quivi a saha yo. Ta xihín ña yóho najáxinu coo a nuú chuun natahnda nu á ña ná jácacu a mí. Jáchi ña cúni Ndióxi cúu ña ná canduu ndihí, na cúu cuéntá mé á nu íin a.

11 Nandaja vii Jesucristo mí ta saha ña yóho cúu yó jahyi Ndióxi. Ta viti Ndióxi cúu tátá ndihí ta cúu á tátá Jesucristo. Ña cán quea coo cácan toho nuú Jesucristo cahan ñani a mí ta cahan quiahva mí viti.

12 Jáchi nacahyi ini tuhun Ndióxi ña nacahan Jesús xihín tátá a. Ta nacachi a já: Ndicani i nuú ñani i saha mé ndó. Ta nu ndítutú na cata i caja cáhnu i ndohó, cáchi Jesús.

13 Ta cáchi tucu a já:

Yehe cándeé ini i Ndióxi, tátá i.

Ta cáchi tucu a já xihín Ndióxi:

Yóho íin i xihín ndihi jahyi ndó, na nasahan mé ndó nuú i cacomí i cuéntá saha, cáchi Jesús.

14 Sahá ña íin yiquí cuñu ñayivi, na cúu jahyi Ndióxi saha ña cán quea nanduu Jesús in ñayivi ta nasahin yiquí cuñu a tátuhun mí. Ta tá naxihi yiquí cuñu a já nacandee a nasahnu a nuú tiñahá sacuahá, rí cája ña xihí ñayivi.

15 Ta xihín ña yóho najácaacu a tóco ndihi na nasayihvi quivi jáchi ní tiempo nasanduu na ndáha tiñahá sacuahá saha ña yíhvi na.

16 Jáchi mé a ndaa coo naquixi Jesucristo ña ná chindeé a na cúu tátó Ndióxi. Ña naquixi mé á caja quea chindeé a ñayivi, na cándeé ini Ndióxi tá quiahva nacandee ini Abraham Ndióxi.

17 Ña cán quea naxini ñúhú Jesús nduu a in ñayivi cácu ñuyíví yóho tátuhun mí. Ta xihín ña nandoho a naxinu a nanduu a in jutú sacuahá nu Ndióxi indiví. Ta naxihi a ndica crúxu saha cuachí jáchi cája ndaa mé á tóco ndihi ñaha ta táhvi ini a saha yo. Ta xihín ña yóho nacaja cáhnu ini a saha cuachí.

18 Ta saha ña nandoho ini mé á ta saha ña naxito ndojó rí quini mé á saha ña cán quea

xíni a ndá quiahva ndóho ini. Ña cán quéa cuu chindeé a ndaja táhan na ndóho ini, na xíto ndojó tiñahá sacuahá.

3

Cáhnú chága Jesús a juú ga Moisés

¹ Candehé ndo, ñani i, na cúu cuénta Jesús. Mé ndó cúu ndó na nacaxi Ndióxi cacomí a cuénta saha. Candehé ndó Jesucristo, mé á cúu á tátuhun apóstol, ña nachindahá Ndióxi cacuu jutú sacuahá saha yo nu Ndióxi sahá ña cándéé ini mé á.

² Ta xihín ndinuhu ini a nacaja chúun a cuénta Ndióxi, mé a nacaxi ñahá. Jáchí tá quiahva nacaja Moisés tóco ndihi ña cúní Ndióxi tañu na cúu cuénta mé á quiahva já nacaja Jesús tóco ndihi ña cúní Ndióxi, tátá a.

³ Joo ndítahan ndicáhnú chága Jesús a juú ga Moisés jáchí cáhnú chága Jesús a juú ga Moisés. Cúu á tátuhun tá cávaha in dataa in vehe ta ndítahan ndicáhnú chága mé dá a juú ga vehe da.

⁴ Ndúsa coo in da cávaha vehe já cuu cávaha ña joo tóco ndihi ñaha íin a jáchí nacavaha Ndióxi ña.

⁵ Ña cán quéa nacaja chúun Moisés cuénta Ndióxi xihín ndinuhu ini da tañu ñayivi mé á. Ta chuun nacaja da quéa cáxi tuhun jini da xihín ná ña cúní Ndióxi cahán xihín ná chága chí nuu.

⁶ Joo jiin va chuun nacaja Jesús, mé á cúu in tuhún jini já jahyi Ndióxi jáchí comí a cuénta sahá na cúu cuénta mé á xihín ndinuhu ini a. Cuénta mé á cúu mí tá ndacu coo ínima yó ta tá ná cándéé ini mé á. Ta xíni ñúhú cajji ini candatí anda quixi mé á.

Cúní Ndióxi ña ná ndihvi na cúu cuénta mé á nuú ndiquehe ndéé ná

⁷ Candehé ndó ndá quiahva cáchí ínima yji Ndióxi ini tuhun mé á tá cáchí a já:

Tá ná cuni johó ndó ña cáhan Ndióxi xihín ndó quivi víti,

⁸ a cája sáa ini ndó xihín á tá quiahva nacaja na Israel tá naxica nuu na yucú íchí cán.

Jáchí nandiñehe yúhu ná nu Ndióxi ta ihvi ndivaha nasacuu ini na xihín Ndióxi.

⁹ Ta já cáchí Ndióxi já:

“Mé yucú íchí jan naxito ndojó tásáhnú jícó ndó yehe,

vati naxini na ña náhnú ndivaha nacaja i tixi ivi jico cuia.

¹⁰ Sahá ña cán quéa naxojo ini i xihín tóco ndihi na cán,

ta nacachi i saha ná ña cúu ná na cáhvi ivi, johó ini,

ta sáa ini na caca na íchí cuénta mí i.

¹¹ Sahá ña cán quéa naxojo ini i xihín ná, ta nasahan i tuhun i ña a quiahva toho i ñamaní nu ná

ndihvi na nuú ndiquehe ndéé na xihín i”, nacachi Ndióxi xihín na Israel.

¹² Ña cán quéa cuénta vaha coo ndó, ñani i já ná a cáñehe ndó ínima quini ña jácaxoo ndó nu Ndióxi, ña tácu, sahá ña co cúní ndó candúsa ndó mé á.

¹³ Ña ndítahan caja ndó quéa quiahva tuhun ndeé ini táhan ndó nini quivi. Ta a quiahva ndó ñamaní yaha quivi víti tá núná nu ndó caja ndó ña cúní Ndióxi. Jáchí co cúní a ña ná jándahvi ña núu ñuyiví yóho ndohó ta já ná ndisáa ini ndó nu Ndióxi.

¹⁴ Jáchí tá ná cándéé ndusa ini mé á janda quiahva ná xinú quivi nu ndihí cuí tá quiahva nacaja i janda saha já quéa cúní cachi a ña in nanduú xihín Jesucristo.

¹⁵ Jáchí quiahva já cáchí tuhun Ndióxi: Tá xíni johó ndó ña cáhan Ndióxi xihín ndo quivi víti,

a cája sáa ini ndó xihín á tá quiahva nacaja na Israel tá nandiñehe yúhu ná nu Ndióxi yucú íchí cán, cáchí a.

¹⁶ Jáchí sa xíni ndó ndá na nandiñehe yúhu nu Ndióxi tá naxini johó na ña nasahnda mé á nu ná. Na cán cúu na tóco ndihi na nasandaca Moisés tá naqueta na nación Egipto.

¹⁷ Ta xihín mé na cán naxojo ini Ndióxi tixi ivi jico cuia jáchí nacaja na cuachi nu mé á ta sahá ña cán quéa nacuyu na naxihi na yucú íchí cán.

¹⁸ Ta sahá ña coo naxeen na caja na ña cúní Ndióxi sahá ña cán quéa nasahan Ndióxi tuhun a ña a quiahva toho a ñamaní nu ná canduu na nuú ndiquehe ndéé na xihín á.

¹⁹ Ta mé a ndaa cánda iní ña coo nacuu ndihvi na nuú nasacu ini Ndióxi coo na sahá ña co naxeen na candúsa na mé á.

4

¹ Sahá ña cán quéa viti sáhan yíi va Ndióxi ñamaní nu yó yaha í nuú nasacu ini mé á ndiquehe ndée yo xihín á. Joo xíní ñúhú cuéntá vaha coo ndó jáchi tiahva náa a xínu coo java ndó ndihvi ndó cán.

² Jáchi tá quiahva naxini johó na Israel tuhun Ndióxi quiahva já naxini johó í tuhun mé á, ña cáchi a cúni jácacu Ndióxi ñayivi. Joo coo nacandúsa na cán ña sahá ña cán quéa coo chuun a nu ná.

³ Joo mí cúu yó na cándéé ini Ndióxi ta sahá ña yóho tandaa quívi xínu coo í ndihví nuú ndiquehe ndée yo xihín á. Ta já cáchi Ndióxi já sahá ña yóho:

Naxojo ini í xihín na co cándúsa yehe, sahá ña cán quéa nasahan í tuhun í ña ná a ndihvi toho na nuú nasacu ini í ndiquehe ndée ná xihín í, cáchi a.

Nacachi Ndióxi ña yóho vatí sa nacaja tiahva mé á nuú ndihvi na ndiquehe ndée na anda tá nacava sáha saha ñuyívi.

⁴ Ndáa ini tuhun Ndióxi ña nacaja mé á quívi usa. Já cáchi a já:

Quívi usa nandiquehe ndée Ndióxi nuú chuun nacaja tá nacavaha tóco ndihi ñaha, cáchi tuhun Ndióxi.

⁵ Ta já cáchi tucu a já sahá na co cándúsa Ndióxi:

A ndihvi toho na canduu na nuú ndiquehe ndée ná xihín í, nacachi a.

⁶ Ta coo nandihvi toho na nacahan Ndióxi xihín nu cuítí cán jáchi coo naxeen na candúsa na mé á. Joo núná yíi va nuú java ñayivi ndihvi na ndiquehe ndée ná xihín mé á.

⁷ Jáchi nasacu Ndióxi inga quívi ta cúu á quívi viti ta já cuu ndihvi ñayivi ndiquehe ndée na xihín mé á. Sanahá ndivaha nacahan Ndióxi xihín rey David sahá ña yóho ta nacahyí da ña ta já cáchi a já:

Tá xíní johó ndó ña cáhan Ndióxi xihín ndó quívi viti a cája sáa ini ndó xihín á, cáchi tuhun Ndióxi.

⁸ Ta sa xíní yo ña coo najándihvi Josué ñayivi nu ndiquehe ndée na xihín Ndióxi jáchi nacahan Ndióxi sahá inga quívi vaxi chága chinuu.

⁹ Sahá ña cán quéa sa xíní yo ña cámani xínu coo quívi ndiquehe ndée na cúu cuéntá mé

á tá quiahva nandiquehe ndée mé á quívi usa.

¹⁰ Jáchi ndá na ná ndihvi ndiquehe ndée nu ín mé á cán já quéa ndiquehe ndée ná nuú chuun nacaja na tá quiahva nandiquehe ndée Ndióxi nuú chuun nacaja mé á.

¹¹ Sahá ña cán quéa ndítahan ndihi iní ndihví nuú ndiquehe ndée yo cán. Ta ná a cája í tá quiahva nacaja na Israel cán tá coo naxeen na candúsa na nuú nacahan mé á xihín ná.

¹² Ín cuaha ndée tuhun Ndióxi ta cúu á tátuhun ña tácu. Ta ín chága ndée tuhun Ndióxi a juú ga in yúchu ña ivi yúhu. Ta tá quiahva quívi yúchu ña ivi yúhu tá sáhdá yiquí cuñu quiahva já quívi tuhun Ndióxi janda maá ini ínima ñayivi xihín xíní túni ná ta já xínu a ini na. Ta náha ndá quiahva cáhvi ini na.

¹³ Jáchi xíní Ndióxi tóco ndihi ñaha ta a cúu chijehé yo ña cáhvi iní jáchi sándehe mé á tóco ndihi ñaha nacavaha mé á. Ta vaxi quívi nahma yo nu mé á tóco ndihi ña nacaja í.

Jesús cúu á jutú sacuahá nuú ndihí indiví

¹⁴ Mé Jesús cúu á jutú sacuahá nuú ndihí sahá ña cán quéa co ndítahan jándacoo í ña cándéé iní Jesús, mé a cúu in túhún jini já jahyi Ndióxi. Ta nandihvi a indiví nu ín Ndióxi.

¹⁵ Ta cándahví ini Jesús mí jáchi cúu á jutú sacuahá nu yo ta cándaá ini a ña cúu yó ñayivi vitá ndivaha ini. Jáchi tá naxica nuu a ñuyívi yóho naxito ndojó tiñhá sacuahá mé á xihín tá nuú ñaha tá quiahva cája rí xihín mí joo ni in túhún cuachi coo nacaja mé á.

¹⁶ Ña cán quéa a cáyihví toho í cayatí nu ín coo Ndióxi, mé a quívi ini a mí jáchi táhvi ini a saha yo ta chindeé a mí tá ná caca í ñamaní nu á.

5

¹ Tóco ndihi da cúu jutú sacuahá chága nu ndihí jutú cúu dá da sá caxi na tañu ñayivi Israel já ná cahan cuachi da sahá ñayivi nu Ndióxi. Ta jári jóco da ñaha nu Ndióxi ta sáhní da quítí nu ná sahá cuachi na.

² Ta sahá ña cúu dá da vitá ini, da ñuyívi yóho sahá ña cán quéa cuu cándahví ini da

ñayivi, na co xini ña sáhdá Ndióxi. Ta cuu candáhví ini da na cája cuachi.

³ Ta sahá ña vitá ini da sahá ña cán queá ndítahan cahní da quítí joco da rí nu Ndióxi sahá cuachi mé dá xihín sahá cuachi ñayivi viti.

⁴ Ta ni in da cán a cúu chinúu da mé dá cacuu da jutú sacuaña chága nu ndíhi jutú. Jáchi xini ñuhú cacuu da da ñacana Ndióxi caja chúun cuéntá mé á tá quiahva ñacaja Ndióxi sanahá tá ñacana mé á Aarón ña ná caja chúun da cuéntá mé á.

⁵ Quiahva já ñayaha xihín Jesucristo jáchi coo ñachinúu a mé á ña ná nduu a jutú sacuaña. Ndióxi queá ñachinúu ñahá tá ñandaja cáhnu a Jesús. Ta já ñacachi Ndióxi já xihín á:

Jahyi yehe cúu yóhó,

ta viti cáchí i ña ñanduu u tátún, cáchí a.

⁶ Ta inga nu cáhan tuhun Ndióxi já cáchí a já:

Anda ama cáa quivi cacuún jutú,

ta cajún tá quiahva ñacaja in jutú, da ñasananí Melquisedec sanahá, cáchí a.

⁷ Nani ñasahiin Jesucristo ñuyíví yóho a juú quiahva ñaxica tahví a nu Ndióxi. Ta java tañu ñasacu a ta java tañu ñacayuhú a nu Ndióxi, mé a cúu chindeé ñahá ña ná a quíví toho a. Ta sahá ña ñasacaja Jesús tóco ndíhi ña sáhdá Ndióxi, tátá a sahá ña cán queá ñaxini johó Ndióxi nu cáhan mé á.

⁸ Ta vatí cúu Jesucristo in túhún jini já jahyi Ndióxi joo xihín ña ñandoho ini a ñuyíví yóho ñacatiahva coo johó a nu cáhan Ndióxi, tátá a xihín á.

⁹ Ta xihín ña yóho najáxinu coo mé á ñacaja tóco ndíhi ña ñatahnda nu á caja. Janda jáví ñacuu jácau a mí ña ná coo í xihín mé á anda ama cáa quivi tá ná caja í ña sáhdá mé á.

¹⁰ Ta ñandicojo a chuun ñacaja Ndióxi ña ná nduu a jutú sacuaña tátuhun mé jutú, da ñasananí Melquisedec.

Cuéntá coo ndó ná a jándacoo ndó ña cándéé ini ndó Jesús

¹¹ Íin cuahá ndivaha ñaha cúni ndicani i nu ndo sahá ña yóho joo yáncá ndivaha ndicani i ña nu ndo jáchi coo cúni ndo taa johó ndó nu cáhan i.

¹² Anda jihna ñandihvi ndó íchi cuéntá Jesús ta viti sa ndítahan nu ndó jánaña ndó tuhun Ndióxi nuú ñayivi. Joo co cája ndó já jáchi ñacavitá ndo ta tucu tucu jácuaha ndó ña co íhvi toho. Ta viti cúu á tátuhun co ndeé ini ndó cuxu ndó ña xixi ñayivi náhnu joo ña cája ndó queá xíhi yíi va ndó leche tátuhun na valí va.

¹³ Ta tá quiahva xíhi na valí leche quiahva já cája rí na co tiáhva ndícuni ndía cúu ña vaha ta ndía cúu ña núu.

¹⁴ Joo ñayivi, na cándañ vaha ini tuhun Ndióxi cúu ná tátuhun ñayivi náhnu, na tácu ini, na xixi cuñu va jáchi sá tiáhva na ndícuni na ndía cúu ña vaha ta ndía cúu ña núu.

6

¹ Sahá ña cán queá ña ndítahan caja í queá ndindacú chága yo xihín ñaha Ndióxi janda quiahva ná xinu coo í cacuú ñayivi tácu ini xihín ñaha Ndióxi. Co ndítahan jácuaha tucu ña najácuaha í tá jacá ñandihví íchi cuéntá Jesús jáchi ndítahan catiahva í ña jan. Ndítahan cándañ ini ña cacu ndaa ínima yo sahá ña cándéé ini Jesucristo cuití va ta co cúu á sahá ña cája í ña vaha.

² Ta sa cándañ ini ña ndítahan candúta na cúu cuéntá Jesús. Ta sa cándañ ini ndaja cája í chinúu ndáha yó jini ñayivi tá xica tahví yó nu Ndióxi saha ná. Ta sa cándañ ini ña vaxi quivi nditacu tucu tóco ndíhi ndíi ña ná caja víi Ndióxi saha ná.

³ Sahá ña cán queá cáchí i xihín ndó: Coho ndindacú chága yo xihín ñaha Ndióxi, tá ná quiahva Ndióxi ñamaní nu yo.

⁴ Ta a cuú ga ndicó coo ñayivi nu Ndióxi tá sa najándacoo na ña ñasandéé ini na mé á. Jáchi sa najándiyéhe Ndióxi ínima ná ña ná cándañ ini na saha mé á ta sa xini na ndá quiahva ín ñaha Ndióxi. Ta janda ínima yíi Ndióxi sa ñandacañ ínima ná.

⁵ Ta sa ñacandañ ini na tuhun vaha cáhan sahá Jesucristo ta sa ñacandañ ini na ndá quiahva náhnu caja Ndióxi chága chí nuu.

⁶ Joo tá ná jándacoo na jan ña cándéé ini na Ndióxi já queá a cuú ga ndicó coo na nu mé á jáchi xihín ña cája na cúu á tátuhun cata caa tucu na Jesucristo, jahyi Ndióxi ndica crúxu ta já sácu ndaa na mé á nuú ñayivi.

⁷ Jáchí sa xíní ndo ndaja íin ñundáhyi nu cúun vaha javi ta ndíndahyi a. Ta tá ná cana cuahá ñaha nuú naxutu ñayivi cán já quéa cúni cachi a ña cája Ndióxi ñamaní xihín ñundáhyi cán.

⁸ Joo tá ná nana tohíñú xihín tochiñmá nu ñúhu cán já quéa coó saha toho a ta ña yóho cúni cachi a ña co cája toho Ndióxi ñamaní xihín á ta vaxi quivi cayi a caja Ndióxi.

Vaxi quivi coo í xihín Ndióxi tá co jándacoo í ichi cuéntá mé á

⁹ Candehé ndó, ñani maníi, na cúu cuéntá Jesús. Vatí cahan nde ña yóho xihín ndo joo cándee ini nde ndohó ña cája tá cája ndó ña vaha ña ndítahan caja na cándee ini Jesús.

¹⁰ Ta xíní nde ña cája Ndióxi ña ndaa cuití va ta a ndíndójó toho mé á sahá ña vaha nacaja ndó tá nachindee ndó na cúu cuéntá Jesús jáchi xihín ña yóho náha ña quíhvi ini ndusa ndó mé á. Ta mé a ndaa janda viti chindee ndó na cán.

¹¹ Ta a juú quiahva cúni nde ña ná ndihi ini in in ndó chindee ndo na cúu cuéntá Jesús anda quivi nu ndíhí. Ta xihín ña yóho vaxi quivi tá quiahva Ndióxi nu ndo tóco ndihi ña ndáti ndó quiahva mé á nu ndo.

¹² Co cúni nde ña ná cajúsá ndo caca ndó ichi cuéntá Jesús. Ña cúni nde quéa ná ndihi ini ndó caja ndó tá quiahva cája na cándee ini Ndióxi, na coó najándacoo ña cándee ini na mé á ta xihín ña yóho ñehe táhvi ná ña nasahan Ndióxi tuhun a quiahva nu ná.

¹³ Tá nasahan Ndióxi tuhun a nu Abraham sanahá já natavá a quivi mé á tátuhun testigo jáchi coó inga ga ña cáhnu chága a juú ga mé á.

¹⁴ Ta tá nasahan mé á tuhun a nu dá já nacachi a já xihín dá: “Mé a ndaa caja cuahá i ñamaní xuhun ta caja i ña ná ndicuahá ndivaha na quixi chichún.” Já nacachi Ndióxi xihín Abraham tá nasahan tuhun a nu dá.

¹⁵ Ta coó nandíhi ini Abraham nani nasandati da jáxinu coo Ndióxi tuhun a ta chí ñehe dá ña nasahan Ndióxi tuhun a quiahva nu dá.

¹⁶ Tá sahan ñayivi tuhun na nuú inga ñayivi já tává na quivi in na cáhnu chága a juú ga mé ná ña ná cacuu na testigo. Jáchi

cája ndúsa in testigo xihín ná jáxinu coo na ña nasahan na tuhun na caja na.

¹⁷ Sahá ña cán quéa natavá Ndióxi quivi mé á jáchi cúni a janaha cáxi a nuú ñayivi ña a ndíjama toho a tuhun nasahan nu ná ta ndúsa jáxinu coo a tuhun a nuú na ñehe táhvi ndiquehe a.

¹⁸ Ta cándaq iní ña nasahan Ndióxi tuhun a nu yó ta natavá a quivi á cacuu a testigo ta xihín ndívi ña yóho sa xíní ví ña a cuú ndijama Ndióxi ta ni a cuú cahan mé á ña tuhún. Ta xihín ña yóho sahan mé á tuhun ndeé iní jáchi cándee iní mé á ta sa nandiquiahva í mí ndáha mé á ña ná jácacu a mí.

¹⁹ Sahá ña cán quéa cátivi tuun í xihín Ndióxi ta cándee iní ña quiahva mé á nu yo ña sahan tuhun a quiahva nu yo. Ta sahá ña cándee cáhnu iní mé á sahá ña cán quéa co yíhvi toho í cayatí nu mé á jáchi sa nandíhvi Jesús nuú yíi ndivaha indiví.

²⁰ Ta cúni Jesús chindee a mí ña ná xinu coo í nu ín a cán sahá ña cán quéa nandíhvi jihna ñúhú ga cán a juú ga mí. Ta cuu caja Jesús ña yóho jáchi nanduu a jutú sacuaña nu Ndióxi ta anda ama cáa quivi cája mé á chuun yóho tá quiahva nacaja da naní Melquisedec sanahá ndivaha.

7

Chuun nacaja Melquisedec sanahá

¹ Mé Melquisedec yóho nasacuu da rey nuú ñayivi ñuu Salem ta nasacuu da jutú nu Ndióxi, mé á cúu ña cáhnu chága a juú ga inga ga. In tañu tá nandíco coo Abraham nasahan da nacani táhan da xihín java rey ta najándihi da sahá na cán já naqueta Melquisedec ichi nuú vaxi Abraham ta já nacaja yíi dá Abraham.

² Ta mé Abraham nandaja da uxu táhndá tóco ndihi ña nacandaa da ndáha java rey tá naquee vaha da xihín na cán. Ta já nasahan da in táhndá nuú Melquisedec. Ta quivi Melquisedec yóho cúni cachi a rey, da cája ña ndaa. Ta sahá ña cómi da cuéntá sahá ñuu Salem, ña cúni cachi a nuú ín vaha ini ñayivi sahá ña cán quéa cúu dá rey, da cája ña ná coo vaha ini ñayivi.

³ Ta ni in ñayivi co xíní na saha tátá náná mé Melquisedec yóho ta co ndaa nuú tutu

quiví tásáhnú jícó dā. Ta cō xíní nā ndá tañu nācacu da ta ni cō xíní nā ndá tañu naxihí dā. Joo ña xíní nā quéa cúú dá jutú anda ama cáa quiví tá quiahva cúú Jesucristo jutú anda ama cáa quiví, mé a cúú in túhún jiní já jahyi Ndióxi.

⁴ Ta viti cuu candehé ndó ndaja cáhnú nasacuu Melquisedec jáchi jandá mé Abraham, da nasacuu tásáhnú jícó yō nasahan da nuú Melquisedec in táhndá nuú uxu táhndá ñaha ña nacandaa da ndáha rey, da naquee vaha da xihín cán.

⁵ Ta sa xíní ndo ña cáchí ley Moisés ña ín saha nuú jutú, nā naquixi chichi Leví ndiquehe na in táhndá nuú uxu táhndá ña cómí nā Israel. Jáchi mé jutú cán cája chúun na nu Ndióxi cuéntá táhan na nā Israel vatí in cúú tóco ndihi na sahá ña naquixi ndihi na chichi Abraham.

⁶ Vatí coó naquixi Melquisedec yóho chichi Leví joo naqueehe tá naqueehe da in táhndá nuú uxu táhndá ñaha nu Abraham, da nasahan Ndióxi tuhun a nuú ña caja cuahá ñamaní xihín. Tá nacaja yí Melquisedec Abraham

⁷ náha ña mé a ndaa cáhnú chága da cája yí ñayivi a juú ga nā nacayí cán. Ta ni in na a cuú cachi na ña cō cúú ña yóho ña ndaa.

⁸ Ta sa xíní yō ña cáhnú chága Melquisedec a juú ga jutú, nā naquixi chichi Leví, nā quéhe in táhndá nuú uxu ñaha jáchi cúú ná ñayivi, nā ndihi saha. Joo cáhan tuhun Ndióxi sahá Melquisedec tátuhun tácu yí va da.

⁹ Ta náha ña cáhnú chága Melquisedec a juú ga Leví, da cúú tásáhnú jícó tóco ndihi jutú, nā quéhe in táhndá nuú uxu a cán. Jáchi cúú á tátuhun nachahvi Leví in táhndá nuú uxu a tá nachahvi Abraham ña nu Melquisedec.

¹⁰ Jáchi tá naqueehe Melquisedec in táhndá nuú uxu ñaha nu Abraham, cúú á tátuhun nasanehe Abraham tóco ndihi nā vaxi chichi da ini yiquí cuñu da jáchi cámaní yí cacu na mé tiempo já.

¹¹ Ta tóco ndihi jutú, nā naquixi chichi Aarón, naquixi na chichi Leví viti. Ta vatí nacaja na chuun Ndióxi ña jáyaha na ley Moisés nuú ñayivi joo a cuú nduu ndaa ñayivi nu Ndióxi xihín mé ley. Sahá ña cán quéa nachindahá Ndióxi Jesucristo ñuyiví

yóho já ná cacuu a inga jutú, ña ná caja tá quiahva nacaja Melquisedec sanahá. Ta coó nacaja mé á tá quiahva nacaja Aarón, da nasacuu tásáhnú jícó jutú cán.

¹² Ta tá nachindahá Ndióxi in jutú saá xíní ñuhú a ndijama ri a ley va.

¹³ Ta mé jutú saá cúú Jesucristo, xitoho í, mé a cáhan tuhun Ndióxi saha. Ta coó naquixi Jesucristo chichi Leví ta ni coó naquixi a chichi Aarón. Jín va chichi naquixi a ta ni in da ta naquixi chichi cán a ñaha cacuu da jutú.

¹⁴ Joo cándaa vaha ini ñayivi ña naquixi Jesucristo chichi Judá ta cō cúú á chichi nu sá cana jutú ta ni coó nacahan Moisés sahá nā quíxi chichi Judá tá nacahan da sahá nā cacuu jutú.

¹⁵ Ta cándaa vaha chága iní ña yóho jáchi sa xíní yō ña mé jutú saá ña cúú Jesucristo nandiquehe a chuun tátuhun nacaja Melquisedec sanahá.

¹⁶ Ta coó nanduu a jutú sahá ña nacacu a chichi Leví nu sá cacu jutú. Joo nanduu a jutú sahá ña cúú cája tóco ndihi ñaha ta sahá ña tácu a anda ama cáa quiví.

¹⁷ Jáchi tá cáhan Ndióxi saha Jesucristo já cáchí a já:

Yóho cúun jutú anda ama cáa quiví,
tátuhun mé jutú, da nasananí Melquisedec
jáchi cájún chuun tá quiahva nacaja
mé dá, cáchí tuhun Ndióxi.

¹⁸ Sahá ña cán quéa nacandoo xóo ley Moisés jáchi coó chuun a ta a cuú chindeé a ñayivi.

¹⁹ Ta ni coó nacuu caja mé ley Moisés ña ná nduu ndaa ñayivi nu Ndióxi. Joo viti cájii iní jáchi xihín ña nacaja Jesucristo já cuu nduu ndaa yó nu Ndióxi ta já cuu cayatí nu mé á.

²⁰ Ta tá nacaja Ndióxi ña nanduu Jesucristo jutú já nasahan tuhun a ta nasacu a mé á cúú á testigo sahá.

²¹ Joo tá nanduu nā naquixi chichi Leví cán jutú coó nasahan Ndióxi tuhun a saha ná tá quiahva nacaja xihín Jesucristo tá nanduu a jutú. Ta já nacachi Ndióxi ini tuhun mé á:

Yehe cúú Ndióxi ta nasahan i tuhun i nu
yóho tá a ndijama toho i tuhun cáhan
i:

“Nāchinúu i yohó cacuún jutú anda ama cáa quiví.

Ta cajún chuun tá quiahva nacaja Melquisedec sanahá”, cáchí Ndióxi.

²² Sahá ña nandicojo Jesucristo chuun nasahan Ndióxi nu á sahá ña cán queá cándéé iní ña jáxinu coo Ndióxi tuhun nasahan nu yo. Ta vaha chága ña yóho a juú ga ley Moisés.

²³ Ta ndaja coo nasanduu cuahá jutú, na naquixi chichi Leví cán jáchi naxihí ndihi na ta nacandoo chuun na nuú inga na.

²⁴ Joo tácu Jesucristo anda ama cáa quiví ña cán queá a jándacoo toho a chuun a nuú inga ga.

²⁵ Ña cán queá anda ama cáa quiví ín tiahva Jesucristo jácacu a mí tá ná cayatí nu Ndióxi sahá ña nacaja Jesucristo tá naxihí a ndica crúxu. Ta ín mé á nu Ndióxi xíca tahví a nu mé á sahá na cándéé iní mé á.

²⁶ Mé a ndaa xíní ñuhú yo Jesucristo ña ná cacuu a jutú sacuahá nu Ndióxi saha yo. Jáchi mé á cúu á ña yí ndivaha ta ni in cuachi coo nacaja mé á ta ni in cuachi a cúu chícāan yó jatá. Ta co xíca nuu ga mé á tañu na cája cuachi jáchi ín a indiví nu ndicáhu ndivaha mé á.

²⁷ Co xíní ñuhú caja Jesucristo tá quiahva nacaja java ga jutú sacuahá, na naquixi chichi Leví. Jáchi nini quiví nasahní na cán quítí jóco na rí nu Ndióxi sahá cuachi ñayivi. Ta nu cuítí nacaja na ña sahá cuachi mé va na ta anda jáví nacaja na ña sahá cuachi ñayivi. Joo jíin va nacaja Jesucristo jáchi in túhún tañu cuití va najoco a mé á tá naxihí a ndica crúxu sahá cuachi tóco ndihi ñayivi.

²⁸ Tá nacaja na ña cáchí ley Moisés já nasacu na in dataa, da cája cuachi ña ná cacuu da jutú sacuahá. Joo tá nandihí já nachinúu Ndióxi Jesucristo, jahyí a ña ná cacuu a jutú sacuahá, ña cája ña ndaa anda ama cáa quiví. Ta nasahan Ndióxi tuhun a nu yo ña jáxinu coo a tóco ndihi ña cáchí a.

8

Jesús cúu á jutú sacuahá saha yo indiví

¹ Nacachi nde ña yóho ña ná candaá ini ndó ña cúu Jesucristo jutú sacuahá saha

yo nu Ndióxi ta ín coo a xoo cuáha Ndióxi indiví nu ndicáhu ndivaha mé á.

² Cúu á jutú sacuahá cája ndiví a veñuhu indiví ña nacavaha Ndióxi ta co cúu á ña nacavaha ñayivi.

³ Ndítahan nu tóco ndihi na cúu jutú sacuahá cahní na quítí nu Ndióxi ta jóco na ñaha nu á. Ña cán queá ndítahan ri nu Jesucristo jóco a ñaha nu Ndióxi.

⁴ Tá ná caca nuu Jesucristo ñuyiví yóho, nduu já queá a cacuu toho a jutú, nduu. Jáchi sa ndúu cuahá ndivaha jutú ñuyiví yóho ta jóco na ñaha nu Ndióxi tá quiahva sáhdá ley Moisés.

⁵ Joo ña cája mé ndihi jutú ñuyiví yóho cúu á tátuhun yuhú nuu ña cája Jesucristo indiví. Ta candaá iní ña cúu á tátuhun yuhú nuu ña ín indiví jáchi sanahá ndivaha tá nasahnda Ndióxi chuun nu Moisés ña ná cavaha da veñuhu xihín ní quítí já nacachi Ndióxi já xihín da: “Cuénta coún ndaja cavahún veñuhu xihín ní quítí jan. Jáchi xíní ñuhú coo a tá quiahva cáa ña nanaha i nuún jiní yúcu cán”, nacachi Ndióxi xihín Moisés.

⁶ Joo Jesucristo, mé á cúu jutú sacuahá saha yo indiví nandicojo a in chuun ña vaha chága a juú ga chuun cája jutú ñuyiví. Vaha chága ña nacaja Jesucristo a juú ga ley Moisés jáchi jándique táhan máni a mí xihín Ndióxi ta xihín ña yóho xínu coo tuhun nasahan Ndióxi nu yó jihna.

⁷ Tá ná cuu caja ley Moisés ña jácacu a mí ná a cühun toho í indayá, nduu já queá co xíní ñuhú quivi Jesucristo jándique táhan máni a mí xihín Ndióxi, nduu.

⁸ Joo xíní vaha Ndióxi ña mé ley Moisés a cuú jácacu a ñayivi sahá ña cán queá já nacachi a já:

Vaxi quiví tá quiahva i tuhun saá nuú ñayivi Israel ta nuú na naquixi chichi Judá.

⁹ Jíin va cúu tuhun saá quiahva i nu ná, jáchi co cúu toho a tuhun nasahan i nu tásáhu jícó na sanahá ndivaha, tá natiin ndahá i na ta natavá i na nuú nasanduu na nación Egipto.

Ta sahá ña coo najáxinu coo na tóco ndihi ña nasahnda i nu ná caja na sahá ña cán queá najándacoo i na.

10 Ta vaxi quivi tá quiahva i tuhun saá nuú ñayivi Israel.

Ta caja i ña ná candaá vaha ini na ley mí i ta cañuhu a ini ínimá ná ña ná caja na ña cúni mí i.

Ta yehe cacuu Ndióxi caja cáhnu na, ta mé na cán cacuu ñayivi cacomí i cuéntá saha.

11 Ta a cúní ñúhú ga na jánaħa ñani táhan mé ná ña ná candaá ini na saħa Ndióxi, jáchi tóco ndihi ñayivi anda na valí anda na sáħnu candaá ini na yo cúu yehe.

12 Ta caja cáhnu ini i saħa ndaja táhan ña núu ñacaja na, ta a ndícuhun ga ini i saħa cuachi na, cáchi Ndióxi.

13 Tá ñacahan Ndióxi saħa tuhun saá ña quiahva mé á nuú ñayivi já queá náħa ña coó chuun ga mé tuhun ñacahan nu ná jihna ta cama chá ndihi saħa.

9

Veñuhu ñuyivi xihín veñuhu indivi

1 Tá ñacahan Ndióxi tuhun a nuú na Israel sanahá ndivaha já ñacahnda chuun saħa ndaja caja cáhnu na mé á ini veñuhu ña cávaha na ñuyivi yóho.

2 Ta ndácaan ivi cuarto ini mé veñuhu cán. Ta ña ndácaan ini cuarto nu cuití cúu in candelero xihín in mesa nu cándójó pan yii. Ta mé cuarto nu cuití yóho naní a in nuú yii.

3 Ta ín in jahmá ndeé ña ndájí nuu táhan tañu ndívi cuarto yóho. Ta cuarto ndácaan maá naní a nuú yii ndivaha.

4 Ta mé cán ín in nu náa ña ñacavaha xihín jiuhun cuáan nu chíníhmá jutú jusa vaha. Ta jári cán ín sató arca ñaha Ndióxi ta tóco ndihi jata mé sató arca ñandicuchu xihín jiuhun cuáan. Ta chí ini sató cán ndácaan in tindoħo jiuhun cuáan nu ñúhu maná ña ñaxixi na Israel tá ñaxica nuu na yucú íchí cán. Ta jári ndácaan mé yító ñaha Aarón, dó ñasaa núma sanahá. Ta chí ini arca cán ndácaan ri ivi yuu jáhnda nu ndaa ley ñacahan Ndióxi nuú Moisés.

5 Ta jiní mé sató arca cán ndíndójó ña cúu yuhú nuu táto Ndióxi naní a querubines. Cándójó a cán ña ná ndicuhun ini ñayivi ña ín Ndióxi cán caja cáhnu ini a saħa cuachi na. Ta mé táto Ndióxi cán ndícaā ndixi a

cándójó a jata arca. Joo a cúu ndicani chága yo saħa ña yóho viti.

6 Já ñacahin tiaħva tóco ndihi ñaha veñuhu. Ta ndijáá níi quivi ñandihvi jutú cuarto nu cuití cán caja ndívi na ñaha caja cáhnu na Ndióxi.

7 Joo in tañu tá nu cuía in túhún da cúu jutú sacuaħa ñaquihvi da cuarto maá cán. Ta ñéhe da níi quiti ña joco da nu Ndióxi saħa cuachi mé dá xihín saħa cuachi ñayivi.

8 Ta xihín ña yóho jánaħa ínimá yii Ndióxi nu yo ña a cúu ndihvi ndá ñayivi ñacuu cuarto maá nuú yii ndivaha jáchi sa ín va cuarto nu cuití.

9 Ta tóco ndihi ña yóho cúu á tátuhun yuhú nuu nuú ña ín tiempo viti. Ta sa xini yo ña a cúu ndaja víi ñayivi ínimá ná xihín ña joco na nu Ndióxi tá sáħní na quiti ña quiahva na níi rí nu mé á.

10 Jáchi tóco ndihi ña ñacaja na cán ñacacuu a cuéntá ña sáxi na xihín ña xíhi na ta ñacacuu a cuéntá ndaja ñandaja víi na mé ná xihín ticuítí. Joo já ñanditahan caja na janda quiahva tandaa quivi ndijama Ndióxi tóco ndihi ñaha jáchi a cúu ndaja víi na ínimá ná xihín ña yóho.

11 Ta ndaja coo ñaquixi Jesucristo ñuyivi yóho ta ñandu a jutú, da sacuaħa chága nu yo. Ñaquixi a ña ná quiahva mé á ña vaha Ndióxi nu yo. Joo viti ín a indivi caja chúun a tátuhun jutú veñuhu ña vaha chága cán. Cúu á veñuhu ña coó ñacavaha ñayivi ta co cúu á ñaha ñuyivi.

12 In tañu cuití va ñandihvi a nuú yii ndivaha ta coó ñasañehe a níi tijúhu ni níi chélo ña joco a nu Ndióxi. Nii mé á cúu dó ñaxita ndica crúxu saħa yo ña ná cacu ndaa ínimá yo anda ama cáa quivi.

13 Jihna ñacaja ñayivi ña ñacachi ley Moisés ta nu yiquí cuñu na ñaxihnu ndaa jutú níi tindiquí á níi tijúhu ta ñaxihnu ndaa ri da na xihín yaa chélo, rí ñacahmi na nu náa. Ta xihín ña yóho ñandivií yiquí cuñu na nu Ndióxi.

14 Joo ndiyahvi chága níi Jesucristo a juú ga níi quiti. Jáchi tá ñaxihí Jesucristo já ñandivií ínimá yo já ná a caja ga yo ña co ndiyahvi cán ta ná caja í tóco ndihí ña cúni Ndióxi. Ñacaja ínimá yii Ndióxi, mé a tácu a

anda ama cáa quivi ña ná ndiquiahva Jesucristo mé á ndáha Ndióxi já naxihi a ndica crúxu saha cuachi vatí coó toho cuachi mé á.

15 Ta sahá tuhun saá nasahan Ndióxi nu yo sahá ña cán quea cáhan Jesucristo xoo mí nu Ndióxi. Ta sahá ña nacaja Jesucristo tá naxihi a ndica crúxu cája cáhnu ini Ndióxi sahá cuachi nacaja í tá nasandico yó ley Moisés. Ta nandacaxi Ndióxi ñayivi, na cúní candúsa mé á já ná ndiquehe na ña vaha Ndióxi ña a ndíhi toho saha jáchi já cáa tuhun nasahan Ndióxi nu ná.

16 Cúu á tátuhun tá cávaha in dataa tutu cuénta ña ñehe táhvi ná candoo ñaha nu ná. Joo xíní ñuhú candaa ini na ña mé a ndaa naxihi da jándacoo ñaha cán anda jávi ndiyahvi mé tutu cán.

17 Jáchi nani tácu da co ndiyahvi toho tutu nacavaha da sahá ñaha ndicoo táhvi da. Janda quiahva ná quivi da já ndiyahvi a.

18 Ña cán quea tá nu cuítí nasahan Ndióxi tuhun a nuú ñayivi nacaja mé á ña ná quivi quítí ta xihín nii rí cán nandoo cuachi ñayivi.

19 Jáchi tá nandíhi nacahan Moisés ley nasahan Ndióxi nuú ñayivi Israel já natiin da in yíto, dó nani hisopo ta nacató da loho cachi cuhá nu do. Ta nachindaxi da dó cán xihín nii chélo xihín ní tjúhu, dó nacava táhan xihín ticuú. Ta naxihnu ndaa da do nu libro nu ndaa ley Moisés. Ta naxihnu ndaa da dó nuú ñayivi Israel.

20 Anda já nacachi da já xihín na Israel: “Xihín nii quítí yóho jáxinu coo Ndióxi tuhun a ña nasahnda nu ndó caja ndó”, nacachi Moisés.

21 Ta quiahva já naxihnu ndaa Moisés nii quítí nuú veñuhu nii quítí xihín nuú tóco ndíhi ñaha ñuhu cán ña cája chúun na cája cáhnu na Ndióxi.

22 Jáchi cáhí ley Moisés ña xihín nii cuití va ndivií ndaja táhan ñaha, vatí a juú ndíhi a. Ta janda quiahva ná cuita nii já cuu caja cáhnu ini Ndióxi sahá cuachi ñayivi.

Nandoo cuachi xihín nii Jesucristo

23 Sahá ña cán quea nanditahan nu Moisés ndaja vií da ñaha veñuhu ñuyiví yóho xihín nii quítí. Ta mé ñaha cán cúu á yuhú nuú ña ín indiví. Joo ñaha ín indiví

ndivií a xihín nii, dó vaha chága a juú ga nii quítí.

24 Ta veñuhu ñuyiví cúu á yuhú nuú cuití va ña ín indiví. Coó nandíhvi Jesucristo nuú yii ndivaha veñuhu, ña nacavaha ñayivi. Joo nandíhvi mé á indiví ta cán ín a viti ta cáhan mé á xoo mí nu Ndióxi.

25 Jáchi da cúu jutu sacuahá nandíhvi da tá nu cuía nuú yii ndivaha veñuhu joco da nii quítí nu Ndióxi. Joo ña nacaja Jesucristo quea ndiquiahva a mé á quivi a saha yo ta in tañu cuití va naxita nii á ndica crúxu.

26 Jáchi tá ná nditahan nuú Jesucristo quivi a cuahá tañu já quea janda mé saha tá nacava sahá saha ñuyiví casahá quivi a, nduu. Joo a juú a já jáchi tá jalóho cúní ndíhi saha tiempo viti já nacasaá Jesucristo ñuyiví yóho ta in tañu cuití va naxihi a sahá cuachi ñayivi.

27 Quiahva já yáha xihín ñayivi jáchi in táláa tañu quivi na ta anda jávi nditahan candíchi na nu Ndióxi caja vií mé á sahá ña nacaja na tá nasandu na ñuyiví yóho.

28 Ta quiahva já in tañu cuití va naxihi Jesucristo ndica crúxu jándoo a cuachi cuahá ñayivi. Ta tandaa quivi quixi tucu mé á ñuyiví yóho joo a quiví ga ña jáchi quixi a ndiquehe a na ndáti tiahva cuhun coo xihín mé á indiví.

10

1 Ta mé ley nacahyí Moisés yóho nasacuu a tátuhun in candahvi mé ña ndaa ña coo chága chínuu. Nasacuu a yuhú nuú uun ña vaha ña vaxi nu yo. Jáchi mé ley yóho coó nacuu caja ndaja vií a ínima ñayivi vatí ná cayati na nu Ndióxi tá nu cuía sá sáhní na quítí joco na nu Ndióxi.

2 Jáchi tá ná cuu ndivií ínima ná sahá ña cája na ña cáhí ley Moisés já quea in tañu cuití va joco na nii quítí nu Ndióxi, nduu. Ta xihín ña yóho ndoo cuachi na ta a ndícani ga ini na sahá cuachi na, nduu.

3 Joo tá nu cuía tá sá sáhní na quítí joco na nii rí nu Ndióxi já quea ndicuhun ini na ña cómi na cuachi nu Ndióxi.

4 Jáchi a cuú jándoo na cuachi na xihín ní tndiquí á xihín ní tjúhu.

5 Ña cán quea tá jalóho cúní casaá Jesucristo ñuyiví yóho já nacachi a já xihín Ndióxi, tátá a:

Cō cúnī ndó ña ná cahní ñayivi quítī joco na rí nu ndo ta ni cō cúnī ndo ña ná joco na java ga ñaha nu ndo.

Sahá ña cán queá nasahan ndó in yiquí cuñu nuú i já ná ndiquiahva i ña nu ndo.

6 Cō cájī ini ndó tá ná cahmi na quítī nu náa joco na rí nu ndo. Ta ni cō táhán ini ndó tá ná joco na java ga ñaha nu ndo ña ná jándoo na cuachi na.

7 Sahá ña cán queá já nacachi i já xihín ndo: “Tátá Ndióxi, yóho ín i ta ín tiahva vi caja i ndá ña nacuu cúnī ndo.

Jáchi quiahva já ndáa ini tuhun mé ndó sahá i”, nacachi Jesucristo.

8 Nu cuití nacachi Jesucristo ña cō cúnī Ndióxi ña ná cahní ñayivi quítī quiahva na nī rí nu á. Ta ni cō táhán ini a tá ná cahmi na quítī nu náa ña ná ndivií ínima ná. Ta nacachi a ña yóho vatí sáhdá ley Moisés caha ñayivi já.

9 Joo tá nandihī nacachi Jesucristo já xihín Ndióxi: “Yóho ín i ta ín tiahva vi caja i ndá ña nacuu cúnī ndo”, nacachi a. Ña cán queá nasacu xoo Ndióxi ña nacaja na jihna ta viti ndíquehe vaha mé á ñayivi sahá ña naxihī Jesucristo ndica crúxu.

10 Nacaja Jesucristo ña nasacu ini Ndióxi caha sahá ña cán queá nacandoo vii uun tóco ndihī mí jáchi in tálaá tañu nandiquiahva Jesucristo yiquí cuñu a tá naxihī a sahá cuachi.

11 Jihna ga ña nacaja ndihī jutū cúú á ña nini quivi sándita da nu náa jóco da quítī nu Ndióxi. Ta vatí cuahá tañu sá cája da já joo a cuú jándoo da cuachi ñayivi xihín ña yóho.

12 Joo in tañu cuití va naxihī Jesucristo sahá cuachi tóco ndihī ñayivi já ná cuu cacu ndaa ínima ná anda ama cáa quivi. Anda jáví nasacoo a xoo cuáha Ndióxi, tátá a indiví.

13 Ta cán ín coo a viti cándati a janda quiahva ná cacu Ndióxi na cándají mé á tixi sahá.

14 Jáchi in tálaá tañu naxihī Jesucristo ndica crúxu ta xihín ña yóho nandaja vii a ínima ñayivi, na nacaxi mé á.

15 Ta sa xini yo ña cúú ña yóho ña ndaa jáchi já cáchi ínima yī Ndióxi já:

16 Vaxi quivi tá quiahva i tuhun saá nuú ñayivi Israel ta quiahva johu coo a.

Caja i ña ná candaá vaha ini na ley mí i ta caja i ña cañuhu a ini ínima ná.

17 Ta já cáchi tucu a já:

Caja cáhnu ini i sahá ndaja táhan ña núu nacaja na ta a ndícuñun ga ini i sahá cuachi na, cáchi tuhun Ndióxi.

18 Ta sahá ña nacaja cáhnu ini Ndióxi sahá cuachi ñayivi sahá ña cán queá cō xini ñuhú ga cahní na quítī ña joco na rí nu mé á sahá cuachi na.

Xini ñuhú cayatí nu Ndióxi

19 Candehé ndo, ñani i, na cúú cuéntá Jesús. A cáyihví toho í viti ndihví nu ín Ndióxi, mé nuú yī ndivaha jáchi naxihī Jesucristo sahá cuachi.

20 Ta tá nandiquiahva mé á yiquí cuñu a já naxihī a ta xihín ña yóho nasuná a íchi saá já ná cuu cayatí nu ín mé á.

21 Ta mé Jesús cúú á jutū sacuaha saha yo nu Ndióxi jáchi cómi a cuéntá sahá ndihí, na cúú cuéntá mé á.

22 Ña cán queá xini ñuhú cayatí nu ín Ndióxi xihín ndinuhu iní jáchi cándeé iní mé á. Cúú á tátuhun nandoo yiquí cuñu í tá naxihī Jesucristo ndica crúxu. Ta viti cō ndítahan ndicani iní sahá cuachi nacaja í jáchi najándoo mé á cuachi.

23 A jándacoo í ña cándeé iní Ndióxi ta ná candati tiahva í janda ná vaha ña cáchi mé á jáchi xini vaha í ña jáxinu cōo Ndióxi tuhun nasahan nu yo.

24 Ta ndítahan nu yo ndinducú yo ndaja caha í chindeé táhan í já ná quihvi chága iní ñani táhan í. Ta ndítahan caha chága yó ña vaha.

25 Cō ndítahan toho caha í tá quiahva cája java na cúú cuéntá Jesús, na cō cúnī nditaca xihín ndihī java ga na cúú cuéntá Jesús. Ña ndítahan caha í queá jácahan chága táhan í ña ná taca í xihín java ga na cúú cuéntá Jesús jáchi sa xini yo ña vaxi quivi quixi tucu Jesucristo ñuyiví yóho.

26 Tá sa candaá vaha iní ña cō ndítahan caha í cuachi ta chínee tucú mí cuahan í cája í cuachi vatí sa candaá iní ña ndaa, a cuú ga ndoo cuachi nu Ndióxi.

27 Ta cáyihví yo candatí janda quiahva ndoho ndivaha iní caha Ndióxi. Jáchi jácana

mé á ñayivi nu ñúhu cáyi ita, mé nu ndihi sahá na ihvi mé á.

²⁸ Jáchí ndá na Israel, na co cúni caja ña sáhndá ley Moisés já quea ndítahan quivi na tá ná cacu ivi á uní testigo sahá na nu juéxe. Ta ni in na a cándáhví ini ñahá.

²⁹ Joo ndaja ga ví ndítahan ndoho ini na quehe núu Jesús, mé in túhún jini já jahyi Ndióxi. Jáchí cúu á tátuhun sáni nihni na a ta co sáhní toho na mé ná ña naxihí a jándoo a cuachi na tá quiahva nasahan Ndióxi tuhun a caja. Cánahá na xihín ínima yí Ndióxi, mé a cája cuahá ñamaní xoho.

³⁰ Cándaa vaha iní yo cúu mé a nacachi ña yóho: “Yehe jándoho i ini ñayivi, na cája cuachi. Ta caja i ña ná chahvi na sahá cuachi na”, cáchí a. Ta já cáchí tucu Ndióxi, xitoho í já: “Yehe caja ví i sahá na cúu cuéntá mí i”, cáchí a.

³¹ Mé a ndaa ndáhví nahá nacuu tá ná tiin Ndióxi mí ña ná chahví sahá cuachí jáchí mé á cúu á Ndióxi, ña tácu indiví.

³² Ndítahan ndicuhun ini ndó ña nayaha tá jacá nacandeeé ini ndó Jesús. Vatí nandoho ndivaha ini ndó nacaja java ñayivi joo nasahan ndeeé ini ndó.

³³ Java tañu nasacu ndaa ichi na ndohó nuú ñayivi ta java tañu nacaja xixi na xihín ndo ta java tañu nacatáhan ndó xihín java ga na tá nandoho ri ini na sahá Jesús.

³⁴ Ta táhnda ini ndó sahá na cúu cuéntá Jesús ñúhu vecaa. Ta coo nacahan cuachí ndo ta janda cájii ini ndó vatí nacaja cuíhna na ñaha ndó jáchí cándaa vaha ini ndó ña cómi ndó ña vaha chága indiví ta a ndíhi toho sahá ña cán.

³⁵ Ña cán quea a jándacoo ndó ña cándeeé ini ndó Jesús jáchí tandaa quivi quiahva cuahá Ndióxi ña vaha nu ndo tá cándeeé ini ndó mé á.

³⁶ Ndítahan nu ndó quiahva ndeeé ini ndó caja ndó ña cúni Ndióxi já quea ndiquehe ndó ña vaha nasahan mé á tuhun a quiahva nu ndo.

³⁷ Jáchí já cáchí tuhun Ndióxi já:

Jalóho cúni ta já quixi mé a ndítahan nuu quixi ta a cáyáncá toho a.

³⁸ Joo ndá na cúu ñayivi ndaa nu mí i catacu na sahá ña cándeeé ini na yehe.

Ta tá co cúni ga na cándeeé ini na yehe ta já ndicó coo na caja na cuachi já quea a cájii iní i xihín ná, já cáchí Ndióxi.

³⁹ Joo a cája toho í tá quiahva cája java ñayivi jáchí co cúni na cándeeé ga ini na Jesús ta tandaa quivi cuhun na indayá. Joo mí cúu yó na cándeeé iní Jesús ta tandaa quivi coo í nu íin mé á.

11

Ndítahan nu yó cándeeé iní Ndióxi

¹ Tá ná cándeeé iní Ndióxi já quea cúni cachi a ña sa xini vaha í ña vaha tá vaha ña ndátí yó vaha. Ta vatí co xini yó ña ndátí joo cándeeé iní ña já coo.

² Jáchí sahá ña nacandeeé ini tásáhnú jícó yo Ndióxi sanahá ndivaha sahá ña cán quea cájii ini Ndióxi xihín ná.

³ Ta sahá ña cándeeé iní Ndióxi sahá ña cán quea cándaa vaha iní ña nacahan Ndióxi ta já nacavaha mé á ñuyiví xihín indiví. Jihna coo nasahiin ni in ñaha joo viti náha nuú ña nacavaha mé á.

⁴ Ta sahá ña nacandeeé ini da naní Abel Ndióxi sahá ña cán quea natahan ini Ndióxi xihín ña nacaja da tá najocó da ñaha nu á. Ta coo natahan ini a xihín ña najocó da naní Caín, da cúu ñani Abel jáchí coo nacandeeé ini Caín mé á. Sahá ña cán quea nandiquehe Ndióxi ña najoco Abel nu á ta xihín ña yóho nanduu da da ndaa nu á. Ta vatí naxihí Abel joo xihín ña nacaja da sanahá jánaha da nu yo ndaja ndítahan nu yó cándeeé iní Ndióxi.

⁵ Ta sahá ña nacandeeé ini da naní Enoc Ndióxi sahá ña cán quea coo naxihí toho da. Joo nasanehe Ndióxi da indiví ta coo nacuu ndiñehé ñayivi mé dá jáchí nandaa da cuahan da indiví nacaja Ndióxi. Ta cáchí tuhun Ndióxi já nacaja mé á jáchí táhán ini a xihín ña nacaja Enoc nani nasahiin da ñuyiví yóho.

⁶ Tá co cándeeé iní Ndióxi já quea co táhán ini Ndióxi xoho. Jáchí ndá na cúni cayati nu Ndióxi xini ñúhú cándúsa na ña íin mé á indiví ta xini ñúhú cándúsa na ña quiahva mé á ña vaha nuú ñayivi tá ndinducú na mé á.

⁷ Ta sahá ña nacandeeé ini da naní Noé Ndióxi sahá ña cán quea nataa johó da tá nacaxi tuhun Ndióxi xihín dá ña ndoho ini

ñayivi chága chí nuu vatí coó nasanaha nu á. Naçandúsa Noé Ndióxi ta chí naçasahá da cávaha da in barco cáhnu nuú cuu çacu ndaa mé dá xihín na vehe da. Ta sahá ña naçandeé ini da Ndióxi sahá ña cán queá nanduu da ta ndaa nu mé á. Ta xihín ña naçaja da najáchojo da cuachi jatá ñayivi ñuyíví jáchi náha cáxi a ña coó naçandúsa na caja na ña cáchi Ndióxi.

⁸ Ta sahá ña naçandeé ini da naní Abraham Ndióxi sahá ña cán queá naçandúsa da ña naçahan Ndióxi xihín dá. Ta chí naçaque da ñuu da ta cuahan da in ñundáhyi, ña naçahan Ndióxi tuhun a quiahva nu dá. Najándacoo da ñuu da vatí coó nasaxíni da ndaja naní mé ñuu nuú cuhun da.

⁹ Ta sahá ña candeé ini Abraham Ndióxi sahá ña cán queá naxinu coo da ñundáhyi ña naçahan Ndióxi tuhun a quiahva nu dá. Joo nandiñehe dá java ñayivi ndúu cán chí naçahin da tá quiahva ndúu na tóho. Vehe tienda naçahin da xihín na vehe da. Ta quiahva já naçahin Isaac xihín Jacob jáchi naçahan Ndióxi tuhun a nu mé dá xihín nuú na vehe da.

¹⁰ Naçaja Abraham ña yóho jáchi ndáti da coo da in ñuu ña ín indiví, ña naçavaha Ndióxi nuú coo a anda ama cáa quívi.

¹¹ Ta jári naçandeé ini Sara, mé ñájíhi Abraham Ndióxi sahá ña cán queá naçaja Ndióxi ña naçuu quee jahyi ña vatí sa naçayatá ña. Ta tá nandihi já naçacu jahyi ña ta naçacuu a sahá ña naçandeé ini ña jáxinu coo Ndióxi tuhun naçahan nu ña.

¹² Sahá ña cán queá vatí naçayatá ndivaha Abraham ta naçayati quívi quívi da joo naçacu jahyi da xihín ña ta nanduu da tásáhnu jícó na Israel. Ta cuahá ndivaha na cúu chichi da janda a cuú candahvi na. Cúu á tátuhun quimi ña ín indiví á tátuhun ñutí yuhú tañuhú jáchi a cuú candahvi a.

¹³ Tóco ndihi na naquixi chichi Abraham yóho vatí naxihi na joo naçandeé tá naçandeé ini na Ndióxi. Ta vatí coó naxini na ña naçahan mé á tuhun a quiahva nu ná joo naçacuu a tátuhun naxini na ña. Jáchi naçandeé ini na ña naçachi Ndióxi xihín ná ta naçajii íni na. Ña cán queá naçachi na ña ndúu tóo cuití na ñuyíví yóho ta cúu ná tátuhun na tóho jáchi coó ñuu na ñuyíví yóho.

¹⁴ Cándaa ini ña ndá na cáchi já cúni cachi a ña ndinducú na inga ñuu nuú canduu na.

¹⁵ Ta coó naçahnda ini na sahá ñuu naçaque na cán jáchi cuu ndicó coo na, nduu joo coó naçacúni na caja na ña.

¹⁶ Joo ña ndúcú na cúu in ñuu ña vaha chága, ña ín indiví. Ta naçaja tiahva Ndióxi mé ñuu indiví nuú cuu coo na já queá a cáçahan nuu mé á cachi a ña cúu ná cuéntá mé á.

¹⁷ Ta sahá ña naçandeé ini Abraham Ndióxi sahá ña cán queá naçahin tiahva da cahni da Isaac, jahyi da joco ñahá da nu Ndióxi tá naxito ndojó Ndióxi da. Já naçaja Abraham vatí naçahin in túhún jiní jahyi da ta sa naçahan Ndióxi tuhun a nu Abraham

¹⁸ tá naçachi a já xihín dá: “Cacu jahyún, da cananí Isaac ta xihín da cán ndicuahá ndivaha chichún chága chí nuu”, naçachi Ndióxi.

¹⁹ Sa naçandaa vaha ini Abraham ña cuu caja Ndióxi ña ná nditacu tucu Isaac tá sa naxihi da. Ta vatí coó naçahní toho Abraham Isaac joo cúu á tátuhun naxihi da ta nanditacu tucu da jáchi naçahin tiahva da cahni da da sahá ña naçandeé ini da Ndióxi.

²⁰ Ta sahá ña naçandeé ini Isaac Ndióxi sahá ña cán queá naçahan da tuhun da nu ndívi jahyi da, da naní Jacob xihín da naní Esau ña caja cuaha Ndióxi ñamaní xihín ndívi da chága chí nuu.

²¹ Ta sahá ña naçandeé ini Jacob Ndióxi sahá ña cán queá tá jalóho cúni quívi da já queá naçachi da ña caja cuaha Ndióxi ñamaní xihín ivi jahyi ñaní da, da cúu jahyi da naní José. Anda jávi naçaja cáhnu da Ndióxi nani tñin ndaa da garrote da.

²² Ta sahá ña naçandeé ini José Ndióxi sahá ña cán queá tá jalóho cúni quívi da naçahan da xihín na Israel sahá mé quívi tá ná quee na nación Egipto cuhun na. Ta naçahnda da chuun nu ná ña ná cañehe na lasa yiquí cuñu mé dá cuhun ña xihín ná.

²³ Ta sahá ña naçandeé ini náná tátá Moisés Ndióxi sahá ña cán queá tá nandihi naçacu da já naçicaan jehé na da tañu uní yoo. Náha ña cúu dá in lee ñúchí ndivaha ta chí coó nayihví toho na tuhun naçahan rey cán tá naçahnda da chuun ña quívi ndihi tavalí jacá naçacu nuú na Israel.

24 Ta sahá ña ñacandeé ini Moisés Ndióxi sahá ña cán quéa tá ñasahnu da najándacoo da vehe rey Egipto vatí najácuahnu ña cúu jahyi jíhí rey cán da tátuhun jahyi ñá.

25 Ta ña ñacaja da quéa ñasahan da ñandoho ini da xihín na cúu cuéntá Ndióxi. Jáchi co cúni da cáji ini da cája da cuachi vatí chá tiempo.

26 Ta ñacahan da ña vaha chága ná ndoho ini da saha Jesucristo, mé a chindahá Ndióxi cacomí cuéntá sahá ñayivi a juú ga ña ná cacomí da cuahá ñaha cuíca nación Egipto cán. Jáchi ñacahvi ini da sahá ñamaní caja Ndióxi xihín da chága chí nuu.

27 Ta sahá ña ñacandeé ini Moisés Ndióxi sahá ña cán quéa najándacoo da nación Egipto ta coó ñayihví da ña ná ndicuehe rey Egipto cán xihín dá. Ta ñasahan ndeé ini da jáchi ñaxica da tátuhun in da xíca xihín Ndióxi vatí coó ñaxini da mé á.

28 Ta sahá ña ñacandeé ini Moisés Ndióxi sahá ña cán quéa ñasahnda da chuun ña ná caja na Israel vicó pascua. Ñasahnda da chuun ña ná cahní na ndicachi ta já cuihna ndaa na ñi rí yuyehé vehe na Israel ña ná a quíví jahyi ñaa na, da ñacacu nu cuítí tá ná vaha tátó Ndióxi, mé a cája ña ná quivi ñayivi.

29 Ta sahá ña ñacandeé ini na Israel Ndióxi sahá ña cán quéa ñayaha na maññú ndaa tañuhú naní tañuhú cuahá. Ñasacuu a tátuhun xíca na nu ñundáhyi íchí uun. Joo tá ñacasahá na Egipto yáha na mé tañuhú cán já quéa coó ñacuu caja na ña. Ñacandaa na ini ticují ta já ñaxihí ndihi na.

30 Ta sahá ña ñacandeé ini na Israel Ndióxi sahá ña cán quéa ñacava nuu na ñuu Jericó tañu usá quíví ta já ñacuyu ndihi námá ñuu cán.

31 Ta sahá ña ñacandeé ini ña xíca jii naní Rahab cán Ndióxi sahá ña cán quéa coó ñaxihí ña xihín ndihi ñayivi ñuu Jericó, na coó ñacandúsa Ndióxi. Najácaacu Ndióxi Rahab cán jáchi sa ñandiquehe vaha ña java ñaa Israel tá ñacasaa da nu cuítí sándehe da ñuu cán.

32 Ndá chága cahan i xihín ndo. Sa ñacahan cuahá i xihín ndo joo cámani cahan i sahá da naní Gedeón xihín da naní Barac xihín da naní Sansón xihín da naní

Jefté xihín da naní David xihín da naní Samuel xihín java ga na ñasacuu profeta.

33 Sahá ña ñacandeé ini na cán Ndióxi sahá ña cán quéa ñaquee vaha na tá ñacani táhan na xihín java nación ta ñasacomí vaha na cuéntá sahá ñayivi ta ñandiquehe na ña vaha ñasahan Ndióxi tuhun a quiahva nu ná. Java na ñachicaji na yúhu león.

34 Ta java na ñandahva na ñúhu cáyi ña ná a cáyi toho na. Ta java na ñacacu na ndahá ñayivi, na ñacacúni cahní ñahá xihín machiti. Ta java na vatí vitá ini na joo ñandihvi ndée ná. Ta java na ñaquee vaha na tá ñacani táhan na xihín na ihvi na.

35 Ta java ñajihí ñacandeé ini na Ndióxi ta sahá ña cán quéa ñaxini na ña ñanditacu tucu na vehe na ñacaja Ndióxi.

Joo java na ñandoho ndivaha ini na janda quiahva ñaxihí na. Ta coó ñacandúsa na cacu xoo na Ndióxi jáchi ñacandaa vaha ini na ña cuhun na coo na in ñuu vaha chága nu íin mé á.

36 Java na ñandoho ini na tá ñasacu ndaa íchí ñahá na ta ñacani ñahá na. Ta java na ñasandico na xihín cadena ta ñachicaan na na vecaa.

37 Ta java na ñaxihí na jáchi ñacuun ñayivi yuu ná ta java na ñaxihí na tá ñasahnda túhun ñahá na. Ta java na ñaxito ndojó ñayivi na ña ná caja na cuachi. Ta java na ñaxihí xihín machiti. Ta java na ñasandíxi na xihín ní ndicachi xihín ní tijúhu cuítí va jáchi coó toho jiuhún na. Ñacaja xíxi ñayivi xihín ná ta najándoho na ini na.

38 Ñaxica ndáhví na nu íchí ndivaha ta ñaxica nuu na yucú ñúhú ta ñasanduu na tíxi cáva xihín yávi nu ñúhu. Mé a ndaa cúu ná ñayivi vaha ndivaha ta co ndítahan nu ná ndoho ini na ñuyíví yóho.

39 Ta cáji ini Ndióxi xihín tóco ndihi na cán jáchi ñacandeé ini na mé á. Joo cámani ndiquehe na ña ñasahan mé á tuhun a quiahva nu ná.

40 Jáchi cúni Ndióxi ña ná candati na cán anda tandaa quíví ndiquehe tóco ndihí ña vaha chága quiahva Ndióxi nu yo.

12

Ná candeé ini Jesús cuítí va

1 Mé ñayivi cuaha cán naquee vaha na jáchi nacandee ini na Ndióxi. Ta jánaha na nu yo ndaja caja í ña ná quiahva ndeé ini tá ná ndoho ini. Ña cán quea ná jándacoo í tóco ndihi cuachi cája í, ña tíin tuun mí. Ta ná jácaxoo í tóco ndihi ña sáji nuu nu yo caja í ña cúni Ndióxi. Ta ná candico yó íchi Ndióxi xihín ndinuhu ini tá quiahva ndítahan caja í.

2 Ta ná candehé cáxi yo nuu Jesús jáchi mé á cán cája ña ná casahá candeé ini Ndióxi ta cája ña ná candeé ini mé á anda tandaa quivi quivi. Nandoho ini Jesús tá naxihi a ndica cruxu ta coo nacacahan nuu á vatí cacahan nuu ñayivi quivi na quiahva já. Jáchi nacandaa ini a ña tá ná ndihi ndoho ini a já tandaa quivi cajii ndivaha ini a. Ta viti íin coo a xoo cuaha Ndióxi indiví.

3 Xíni ñúhú ndicuhun ini ndó ndaja nacaja Jesús jáchi a juú quiahva nandoho ini a ndahá ñayivi cája cuachi. Sahá ña cán quea a jándacoo ndó ña candeé ini ndó Jesús ta a cácuitá ínimá ndó tá ndóho ini ndó.

4 Jáchi cámani yii va cahní na cája cuachi ndohó sahá ña co xeén ndó caja ndó cuachi.

5 Á nandindójó ndó tuhun nacahan Ndióxi xihín ndo sahá ña cúu ndó jahyi mé á. Já cáhí tuhun Ndióxi já:

Jahyi maní i, a quehe núu ndó Ndióxi tá jándoho a ini ndó ña ná ndacaca vaha ndó.

Ta a cáva ivi joho ini ndó tá jánani mé á ndohó.

6 Jáchi já cája Ndióxi xihín na quíhvi ini a.

Jándoho a ini na já ná jándacoo na ña núu ta já nduu na jahyi mé á, cáhí tuhun Ndióxi.

7 Quiahva ndeé ini ndó tá cája Ndióxi ña ná ndoho ini ndó. Jáchi tá quiahva cája in da taa xihín jahyi da quiahva já cája mé á xihín ndo. Jáchi tóco ndihi dataa jácaxáhan da jahyi da já ná ndacaca vaha da.

8 Ta tá co jándoho Ndióxi ini ndó já quea co cúu ndó jahyi mé á. Cúu ndó tátuhun jahyi ndáhví na. Joo tá ná jándoho Ndióxi ini ndó já cándaá ini ndó ña mé a ndaa cúu ndó jahyi mé á.

9 Tá nasacuú na valí nacaja cáhnu yó tátá yo vatí najácaxáhan na mí. Joo íin chága saha caja cáhnu í Ndióxi, tátá yo, mé á íin indiví

vatí jándoho a ini mí jáchi xihín ña yóho cuu coo í xihín mé á anda ama cáa quivi.

10 Tá valí yo najándacaca vaha tátá yo mí tá najánani na mí jáchi já vaha xíni na vatí mé ñuyívi yóho cúu á nu ndúu tóo cuití ví. Joo tá jánani Ndióxi, tátá yo, mí cúu á ña vaha chága jáchi xihín ña yóho ndaja yii á mí tá quiahva íin yii mé á.

11 Mé a ndaa co táhán ini tá jánani na mí jáchi cáhivi yo xihín á. Joo tá nandihí já coo vaha ini jáchi nacatiahva í ndaja caca vaha í sahá ña nandoho ini ta xihín ña yóho cacuu ñayivi ndaa nu mé á.

Ndítahan nu yó taa joho í nu cáhan Ndióxi

12 Ña cán quea ndicuita ndó ta a jándacoo ndó mé ndó.

13 Ta ndinducú ndó ichí ndacú já ná cuu chindeé ndó ñayivi, na cáva ivi joho ini ña ná a ndícó coo na nuu cuachi.

14 Xíni ñúhú ndinducú ndó ndaja caja ndó coo vaha ini ndó xihín tóco ndihi ñayivi. Jándacoo ndó cuachi cája ndó ta ndinuhu ini ndó caja ndó ña cúni Ndióxi já ná cuu coo ndó nu íin mé á.

15 Cuénta coo ndó ná a jándacoo ni in ndó íchi cuénta Ndióxi jáchi cúni a caja cuahá ñamani xihín ndo. Cuénta coo ndó ná a cácuu ndó tátuhun in yucu ova ña jativí ña xixi na jáchi na cája cuachi cája quini na ta jativí na java ga na cúu cuénta Ndióxi.

16 Coto a quíhvi nuu ndó coo ndó xihín in na co cúu yíi ndo á ñájihí ndo. Coto a quehe núu ndó ñaha Ndióxi tá quiahva nacaja Esaú. Jáchi in quivi cuico ndivaha da ta najicó da tóco ndihi ñaha ndítahan ndiquehe da nu tátá da sahá ña ná cuxu da in cohó cuití va.

17 Joo cándaá ini ña tá nandindaa nuu dá ndiquehe da ñaha ndáha tátá da coo nacuu ndiquehe da ni in ñaha. Jáchi najicó da ña nuu ñani da sahá ña ná cuxu da in cohó. Ta vatí nasacu ndivaha da joo coo nacuu caja da ndijama da tuhun da ña sa nasahan da nuu ñani da.

18 Ta mé ndó coo nacayati ndó nu Ndióxi tá quiahva nacaja na Israel sanahá. Mé na cán nataca na saha in yucu naní Sinaí xihín da naní Moisés. Ta nacayí ñúhu cán ta ñanaá ndivaha ta naxicó ndivaha tachí naxini na.

19 Ta naxini johō na nativi trompeta ta nacaḥan Ndióxi xihin ná. A juú quiahva nayihví na tá naxini johō na nu cáhan Ndióxi chí naxica tahví na nu á ña ná a cáhan ga xihin ná.

20 Jáchī coó nacandeeé ini na táa johō na ña sáhdá Ndióxi nu ná tá nacachi a já: “Tá ná cani ndaa in ñayivi á in quítī yúcu Sinaí yóho já queá xíní ñúhú cuun ndó yuu ná á tuxú ndó na xihin póyá anda ná quivi na”, cáchī Ndióxi.

21 Ta a juú quiahva nayihví na sahá ña naxini na cán. Ta anda Moisés viti nayihví ndivaha da ta já nacachi da já: “Quíji ninu i xihín ña yíhvī i”, cáchī da.

22 Joo ña nacaja mé ndó queá sa nacayati ndó in nuú naní Sión, mé nu ín Ndióxi, mé a tácu indiví. Mé ñuu cán cúú á tátuhun inga Jerusalén, ña ín indiví ta ndúu cuaha mil táto Ndióxi cán.

23 Sa nataca ndó cán caja cáhnu ndó Ndióxi xihin tóco ndihi ñayivi, na mé a ndaa cúú jahyi Ndióxi, mé na ndaa quivi nu libro Ndióxi indiví. Ta sa nacasaa ndó nu Ndióxi, mé a cája vii saha tóco ndihi ñayivi. Ta nataca ndó xihin tóco ndihi ñayivi, na sa naxihī sanahá, mé na sa nanduu ndaa nu Ndióxi nacaja mé á.

24 Ta sa nacayati ndó nuú Jesús, mé a cáhan xoo mí nu Ndióxi. Jáchī sahá ña nacaja Jesús tá naxita nīi á ndica crúxu sahá ña cán queá nasahan Ndióxi tuhun a nu yo ña ná ndoo cuachí. Joo jíin va nacaja Ndióxi tá naxita nīi Abel sanahá ndivaha jáchī najándoho a ini ñani da, da naní Caín sahá ña nasahní ñahá da.

25 Cuéntá coo ndó já ná a quehe núu ndó nu cáhan Ndióxi xihin yo. Jáchī ñayivi cán, na coó naxeen cája ña cáchī Ndióxi nachahvi na sahá ña núu nacaja na mé ñuyívī yóho. Ta já caja ri Ndióxi xihin mí tá ná quehe núu í tuhun mé á jáchī janda indiví ín mé á cáhan xoho.

26 Mé tiempo cán najátaan Ndióxi ñuyívī yóho tá nacaḥan mé á. Joo já cáchī a já viti: “Vaxi quivi ta játaan tucu i ñuyívī ta mé tiempo cán jáquiji nuu i indiví viti”, cáchī a.

27 Tá nacachi Ndióxi ña inga tucu játaan mé á ñuyívī yóho já cándaá ini ña ndihi sahá ñaha nacavaha mé á. Ta tóco ndihi ñaha, ña

a cúú quiji nuu, ña cán coo a anda ama cáa quivi.

28 Ñehe táhvi yo coo í nuú cacomí Ndióxi cuéntá saha yo ta mé cán a cúú quiji nuu a. Sahá ña cán queá ná ndiquiahva í ndixahvi nu Ndióxi ta ná caja cáhnu í mé á xihín ndinuhu ini jáchī cáji ini mé á xihín ña yóho.

29 Jáchī mé a ndaa Ndióxi cúú á tátuhun ñúhu ña cáyi ña jándihi sahá ñaha. Ña cán queá caja mé á ña ná ndihi saha tóco ndihi cuachi.

13

Ná caja i ña táhan ini Ndióxi xihin

1 A jándacoo ndó ña quíhvi ini ndó na cúú cuéntá Jesús jáchī cúú ná tátuhun ñani ndó á quiahva ndó.

2 A ndíndójó ndo ndiquehe vaha ndó na tóho tá ná casaa na vehe ndó jáchī xihín ña yóho java na nandiquehe vaha na táto Ndióxi vatí coó nacandaa ini na ña.

3 A ndíndójó ndo sahá ñayivi ñúhu vecaa ta xíní ñúhú tahnda ini ndó xihín ná jáchī xíní ñúhú cacuu a tátuhun ndacaan mé ndó vecaa xihín ná. Ta a ndíndójó ndo sahá ñayivi, na cája xíxi na xihín ta xíní ñúhú tahnda ini ndó xihín ná jáchī cuu ndoho ini ri ndóhó va tá quiahva ndóho ini na cán.

4 Vaha va cája ndó tá tándaha ndo ta xíní ñúhú caja cáhnu ndó yí ndo á ñájíhí ndo. Ta a ndúcú toho ndó coo ndó xihín inga na jáchī jándoho Ndióxi ini ndá na quíhvi nuu coo xihín na coo cúú yí na á ñájíhí na.

5 A ndiáva ini ndó cacomí ndó cuahá jjuhún. Ndítahan cajji ini ndó xihín ña cómi ndo jáchī já cáchī Ndióxi já: “A jándacoo toho i ndóhó ta ni a ndíndójó i saha ndo”, cáchī a.

6 Sahá ña cán queá cuu candeé ini Ndióxi ta cuu cachí já:

Mé á cúú Ndióxi, xitoho i ta chindeé a yehe. Ta a cáyihví toho i ndá ñaha ndúcú ñayivi caja na xihín i.

7 A ndíndójó ndo sahá na nasacomí cuéntá saha ndo ta ni sahá na nacaxi tuhun tuhun Ndióxi nu ndo. Candehé ndó ndaja nacaja na ñuyívī yóho jáchī nacandeeé ini na Ndióxi anda quiahva naxihī na. Ta ndítahan nu mé ndó candeé ini ndó a tá quiahva nacaja na cán.

8 Co ndíjama toho Jesucristo. Tá quiahva ñasacu a sanahá ndivaha quiahva já cúu rí a anda viti ta quiahva já coo a anda ama cáa quivi.

9 A quiahva toho ndó ñamaní nuú ñayivi ña ná jándahvi na ndohó xihín ña jánahá na nu ndo. Jáchi cúu á sahá ñamaní cajú Ndióxi xohó ña ndíndacú ínimá yo. Ta co cúu á sahá ña jánahá java ñayivi tá cáchí na ña a cúu cuxú java ñaha ña ná nduu ndaa ínimá yo. Mé a ndaa ña yóho co chindeé a mí.

10 Tá naxihí Jesucristo ndica crúxu já najoco a mé á nu Ndióxi saha yo. Joo jín va nacaja jutú cuéntá na Israel sanahá tá najoco na quítí nu Ndióxi.

11 Jáchi da cúu jutú sacuahá ñasañehe da nij rí naxihí cán ini veñuhu nuú yí ndivaha ta já najoco da dó nu Ndióxi sahá cuachi ñayivi. Joo ñatavá da yiquí cuñu rí jatá ñuu nu sáhmi na rí.

12 Ta quiahva já naxihí Jesús jatá ñuu Jerusalén. Ta naxita nij a ña ná jándo a cuachi ñayivi.

13 Ña cán quéa cóho nuú Jesús. Cúu á tátuhun cuhun í jatá ñuu ta a cácahan nuú yó ndoho iní xihín mé á.

14 Jáchi ñuyiví yóho coó toho ni in nuú cuu coo í anda ama cáa quivi. Joo ndínducú yo inga ñuu nuú cuu coo í chága chí nuu.

15 Cóho caja cáhnu í Ndióxi ní tiempo ta chindeé Jesús mí caja í ña. Ta ña yóho cúu á tátuhun ña jóco yo nu mé á sahá ña nacaja tá naxihí a ndica crúxu. Cóho caja cáhnu í mé á xihín yúhu yo jáchi cúu yó cuéntá mé á.

16 A ndíndójó ndo caja vaha ndó ta ná chindeé ndo ñani táhan ndó xihín ña cómi ndo. Jáchi ña yóho cúu á tátuhun ñaha jóco ndo nu Ndióxi ta cájii ini mé á xihín á.

17 Candúsa ndó na cómi cuéntá saha ndo ta caja ndó ña cúni na. Jáchi ñasahan Ndióxi chuun yóho nu ná. Ta tandaa quivi nditahan ndicani na nu Ndióxi sahá ña nacaja na. Caja ndó ña cúni na já ná cajii ini na ta ná a cóo cuéha ini na jáchi a cuú quee vaha ndó já.

18 Caca tahví ndo nu Ndióxi sahá nde jáchi ñandivií ínimá nde ta cúni nde caja vaha nde ní tiempo.

19 Caja ndó ñamaní caca tahví ndo sahá í ña ná quiahva Ndióxi ñamaní nuú í saa yachi í nu ndó coto nihni í ndohó.

Xihín tuhun yóho ndihi carta yóho

20 Ña cúni quéa ná quiahva Ndióxi ña ná coo vaha iní. Mé a cán najánditacu tucu a Jesucristo, mé a cúu xitoho í. Ta sahá ña nacaja Jesucristo tá naxita nij a ndica crúxu sahá ña cán quéa ñasahan Ndióxi tuhun a nu yo ta a ndíhi toho sahá. Ta mé Jesús cómi a cuéntá saha yo tá quiahva in pastó cómi da cuéntá sahá ndicachi jana dá.

21 Ta ná caja Ndióxi ña ná ndíndacú ínimá ndó já ná cuu caja ndó tóco ndihi ña cúni a. Ta sahá ña nacaja Jesucristo ná caja Ndióxi xihín yo ndá ña nacuu ña táhan ini mé á xihín. Ná caja cáhnu í Jesucristo anda ama cáa quivi. Já ná coo.

22 Xíca tahví í nu ndo ña ná coo cáhnu ini ndó xihín tuhun cáhan í xihín ndo, ñani í, na cúu cuéntá Jesús. Jáchi carta loho cuití va ñacahyí í nu ndo já ná ndíndacú ínimá ndo.

23 Ta cáxi tuhun í xihín ndo sahá Timoteo, mé da ñasandacaan veca joo sa najani dá viti. Tá ná casaa yachi da yóho já saa da xihín í coto nihni nde ndohó.

24 Cahán Ndióxi ndó xihín tóco ndihi na jánahá tuhun Ndióxi nuú ñayivi ta cahán Ndióxi ndó xihín tóco ndihi na cúu cuéntá Jesús. Tóco ndihi na cúu cuéntá Jesús, na ndúu nación Italia yóho chíndahá na Ndióxi coo ndó.

25 Ná caja cuaha Ndióxi ñamaní xihín tóco ndihi ndó. Já ná coo.

Carta nacahyí Santiago nuú na cúú cuéntá Jesús

Cáhan Ndióxi Santiago xihín na cúú cuéntá Jesús

¹ Yehé cúú Santiago, da cája chúun cuéntá Ndióxi ta cája chúun i cuéntá Jesucristo, xitoho í. Chíndahá i Ndióxi coo na Israel, na cúú cuéntá Jesús, mé na nandicuíta nuu ndúu níi cúú ñuyiví.

Ndaja caja í candaq íni ña cúní Ndióxi caja í

² Cuni johó vaha ndó, ñani mí i, na cúú cuéntá Jesús. Ndítahan cájii ini ndó tá vaxi tá nuú ña ndóho ini ndó.

³ Jáchí sa xíní ndo ña tá ndóho ini ndó sahá ña cándéé ini ndó Jesucristo já queá catiahva chága ndó quiahva ndeé ini ndó sahá ña ndóho ini ndó.

⁴ Quiahva ndeé ini ndó tá ndóho ini ndó anda quiahva ná xínu coo ña cúní Ndióxi já queá cacuu ndó ñayivi ndaa nu mé á. Ta cuahnu vaha ndó xihín tuhun a ta ni in ñaha a cámani ga nu ndo.

⁵ Tá co candaq ini ndó ña cúní Ndióxi caja ndó já queá xíní ñúhú caça tahví ndó nu mé á ta quiahva mé á cuahá ña candaq ini ndó. Jáchí co ndáhví cúu ini a quiahva ña nuú ndihi ñayivi.

⁶ Joo tá xíca tahví ndo nu Ndióxi xíní ñúhú candeé ini ndó mé á ta a cáhvi ivi johó ini ndó jáchí mé na cáhvi ivi johó ini, na cán cúu na tátuhun tañuhú tá ndácojo do cája tachí. Ta co ín táji do jáchí xíca dó tá xoo yóho tá xoo cáa cája tachí.

⁷ Jáchí tá ná cahvi ivi johó ini na já queá a cáhán na ña quiahva Ndióxi ñaha nu ná.

⁸ Mé na cáhvi ivi johó ini co xíca ndaa na ta tucu tucu ndíjama na íchí nu xíca na.

⁹ Ta na cúú cuéntá Jesús tá cúu ná na ndahví ndítahan cájii ini na jáchí na náhnu cúu ná nu Ndióxi.

¹⁰ Ta na cuicá, na cúú cuéntá Jesús ndítahan cajii ini na jáchí co yáhvi toho jiyuhún na nu Ndióxi. Jáchí tá quiahva ín itá yucu yachí íchí a ta ndicava ña quiahva já yachí quivi na cuicá.

¹¹ Jáchí tá naxínu coo candii ta nacahihni já queá cama ndivaha íchí mé yucu ta ndicava ita nu á. Já ndihi va ña ñúchí ndaa jáchí nandihí sahá. Quiahva já ndoho na cuicá jáchí jonáa va ndihi saha ná ta jándicoo na ña cája na.

Tá ndóho ndó tondóhó

¹² Ndaja tahví nacuu na sahan ndeé ini tá ndóho ini na jáchí tá nandihí nasahan ndeé ini na já queá ñehé táhvi ná coo na xihín Ndióxi anda ama cáa quivi. Jáchí nasahan Ndióxi tuhun a nu yo ña tá cúní yo mé á já queá coo í xihín á anda ama cáa quivi.

¹³ Tá ná ndicají ini ndó caja ndó ña núu já queá a cáhán ndo ña xíto ndojó Ndióxi ndohó. Jáchí a cúu caja Ndióxi ña núu ta co cúní a ña ná caja ñayivi ña núu.

¹⁴ Joo tá cája ndó ña núu cúu á sahá ña xíca ini ndó caja ndó ña ta xihín ña yóho ndicava ndó nuú cuachi.

¹⁵ Jáchí sahá ña núu xíca ini ñayivi caja na sahá ña cán cásahá na cája na cuachi. Ta tá sa nandicuhá cuachi na já queá cuhun na chahvi na sahá ña cája na ini indayá anda ama cáa quivi.

¹⁶ Cúní ndivaha i ndohó, ñani mí i na cúú cuéntá Jesús. A jándahvi ndó mé ndó.

¹⁷ Jáchí tóco ndihi ña vaha quíxi a indiví nu ín Ndióxi ta mé á sahan ña vaha nu yo. Já ín va Ndióxi jáchí cája tá cája ña vaha cuítí va. Ta co ndíjama toho Ndióxi. Ta mé Ndióxi, tátá yo nacavaha ña ndíyéhe ín indiví. Ta ndá tañu ndíjama táhan ña ín indiví joo Ndióxi co ndíjama toho a.

¹⁸ Jáchí cúní Ndióxi jácaçu a mí sahá ña cándúsa í tuhun mé á ña cúu ña ndaa. Jáchí cúní Ndióxi ña ná cacuu na nu cuítí tañu tóco ndihi ñaha nacavaha mé á.

Ndaja caja í ndiquehe vaha í tuhun vaha cáhan sahá Jesús

¹⁹ A ndíndójó ndo ña cáhan i xihín ndo jáchí cúní ndivaha i ndohó, na cúú cuéntá Jesús. Ndítahan nu ndó cuni johó vaha ndó tá cáhan inga na xihín ndo. Ta a cácamá ini ndó nducú ñehé ndó tuhun ña cáhan inga na xihín ndo. Ta a cójo ini ndó xihín ná.

²⁰ Jáchí tá xójo ini ndó xihín inga na já queá cája ndó ña co cúní Ndióxi.

²¹ Ña cán queá cacu xóo ndó ndihi ña núu ta jándicoo ndó ndihi cuachi cája ndó

jáchi ndúu cuahá na cája tá nuú cuachi tañu ndó. Joo xíní ñúhú jánuu ndáha ndó mé ndó nu Ndióxi ta ndiquehe vaha ndó tuhun mé á ña naçahan na xihín ndo jáchi tá ná candúsa ndó ña já quea jácacu Ndióxi ndohó.

²² Xíní ñúhú candúsa ndó caja ndó tuhun Ndióxi jáchi co yáhvi toho a tá xíní johu uun va ndó ña. Ta xihín ña yóho jándahvi ndó mé ndó.

²³ Ndá na co cándúsa caja ña cáchi tuhun Ndióxi cúu ná tátuhun in da sándehe nu nuú yutátá.

²⁴ Tá nandihí nasandehé da nuu dá já quee da cuahan da ta cama chá ndindójó da ndaja cáa nuu dá.

²⁵ Joo mé ñayivi tá jácuaha na tuhun Ndióxi ta co ndindójó na caja na ña cáchi a já quea caja yíi Ndióxi tóco ndihí ña cája na jáchi ña ndaa cúu tuhun Ndióxi. Tá cája í ña sáhdá tuhun Ndióxi nu yo caja í já quea co sáhdá ga cuachi chuun nu yo ta já ndinuhu iní caja í ña cúni Ndióxi.

²⁶ Cúu á tátuhun tá íin in dataa tañu ndó ta cáhan da cája da ña cúni Ndióxi joo co ndáa da yúhu dá tá cáhan da sahá ñani táhan da já quea jándahvi da mé va da ta coo saha toho ña cája da nu Ndióxi jáchi co cája da ña cáchi tuhun Ndióxi.

²⁷ Jáchi tá mé a ndaa nandihvi in da íchi cuéntá Jesús já cúu dá taa ndaa nu Ndióxi, tátá yo. Ta chindee da na cuaan ta chindee da na sánchó tá ndóho ini na. Ta cándee ini da Ndióxi ta táva da mé dá nuu cuachi jáchi co cája da ña núu tá quiahva cája ñayivi ñuyíví.

2

A cája ichi ini ndó xihín na ndahví

¹ Cuni johu vaha ndó, ñani mí i, na cúu cuéntá Jesús. Mé ndó cándee ini ndó Jesucristo, xitoho í, mé a cúu ña cáhnu ndivaha. Ndítahan quihvi ini ndó na ndahví tá quiahva quihvi ini ndó na cuicá.

² Ña ndítahan caja ndó cúu ña yóho: Tá ná taca ndó caja cáhnu ndó Ndióxi ta vaxi in da cuicá ndihvi da nu táca ndo ta ndíxi da jáhma vaha ndivaha ta ndacaan jéhe jiuhun cuaan nducu ndáha dá. Ta mé tañu já vaxi in da ndahví, da ndíxi jáhma núu ña yata.

³ Ta ndíquehe vaha ndó mé da cuicá ta cáchi ndó xihín dá: “Silleta vaha coo ndó”, cáchi ndó xihín da cuicá. Joo xihín da ndahví cáchi ndó já: “Candichi ndó jan á coo ndó nu ñuhu yóho”, cáchi ndó xihín da ndahví.

⁴ Tá cája ndó ña yóho já quea cája ichi ini ndó xihín da ndahví ta cája cáhnu ndó da cuicá sahá jiuhun da. Ta cáhvi núu ini ndó jáchi cáhan ndo ña íin chága sahá da cuicá a juú ga da ndahví.

⁵ Cúni ndivaha i ndohó, ñani i, na cúu cuéntá Jesús. Ña cán quea cúni ña ná canda vaha ini ndó ña naçaxi Ndióxi na ndahví ndúu ñuyíví yóho ná cacuu na na náhnu nu Ndióxi tá cándee ini na mé á. Jáchi nasahan Ndióxi tuhun a nuú ndihí na cán ña ná cacúni na mé á já quea ñehe táhvi ná cuhun na indiví coo na xihín mé á anda ama cáa quivi.

⁶ Joo mé ndó cája ichi ini ndó xihín na ndahví. Á co ndícuhun ini ndó ña mé na cuicá cúu ná na cája xixi xihín ndó ta ñuhu na ndohó cuahan na nuú na jutixia chícāan na cuachi jata ndo.

⁷ Jáchi mé na cuicá cáhan núu na saha Jesucristo ta mé ndó cúu ndó cuéntá mé á.

⁸ Sáhdá tuhun Ndióxi chuun nu yo já cáchi a já: “Tá quiahva quihvi ini ndó mé ndó quiahva já ndítahan quihvi ini ndó ñani táhan ndó”, cáchi tuhun Ndióxi. Tá ná caja ndó ña cáchi a yóho já quea cája vaha ndó jáchi ña yóho cúu á ley cáhnu nu Ndióxi.

⁹ Joo cája ndó cuachi nu Ndióxi tá ndíquehe vaha chága ndó na cuicá a juú ga na ndahví. Ta xihín ña yóho chícāan ley Moisés cuachi jata ndo.

¹⁰ Jáchi vatí nasacu vaha in ñayivi ndihí ley Moisés joo sahá in ñaha coo naçaja na sahá ña cán quea ndójo na cuachi saha tóco ndihí ley.

¹¹ Jáchi sa mé Ndióxi cáchi a já: “A quihvi nuu ndó xihín ñájíhí ñani táhan ndó”, ta já cáchi tucu a já: “A cáhni ndó ndji”, cáchi a. Ña cán quea cája ndó cuachi nu Ndióxi tá sáhní ndo ñayivi vatí co quihvi nuu ndó coo ndó xihín ñájíhí ñani táhan ndó.

¹² Ndítahan caja vaha cuití va ndó ta cahan ndaa cuití va ndó jáchi vaxi quivi

caja vií Ndióxi saha yó xihin ley mé á ña jácacu mí.

13 Tá cō táhnda ini ndó sahá ñayivi já queá a táhnda ini Ndióxi saha ndó tá ná casaá quivi caja vií a sahá cuachi ñacaja ndó. Joo tá natahnda ini ndó sahá ñayivi já queá quee vaha ndó tá ná caja vií Ndióxi sahá ña ñacaja ndó ñuyiví yóho.

Tá cándéé ini Ndióxi já cajú í ña cúní mé á

14 Cuni johó vaha ndó, ñani mí i, ña cúu cuéntá Jesús. Tá cáchí ndó cándéé ini ndó Jesucristo joo cō cajú ndó ña vaha já queá cō yáhvi toho ñu Ndióxi ña cándéé ini ndó mé á. Ta sahá ña yóho a cúu toho jácacu Ndióxi ndohó.

15 Cúu á tátuhun tá íin in ña cúu cuéntá Jesús ta cámani jáhma candixi na ta cámani ña cuxu na quivi víti.

16 Ta cáchí ndó xihin ña cán já: “Ná coo vahún ta ná candixi vahún ta ná cuxu vahún”, cáchí ndó xihin ná. Joo cō sahan ndó jáhma candixi na ta ni ña cuxu na cō sahan ndó ñu ná ña cán queá cōó chuun cúu ña cáhan ndó xihin ná.

17 Ña cán queá tá cáchí ndó cándéé ini ndó Jesucristo joo cō cúní ndó caja ndó ña vaha, ña cúní Ndióxi caja ndó já queá mé a uun cándúsa ndó Jesucristo.

18 Tá íin in da cúu cuéntá Jesús ta cō cúní da caja da ña cúní Ndióxi já queá cō jánaha da nuú ñayivi ña mé a ndaa cándéé ini da Jesucristo. Tá íin inga da ta cajú tá cajú da ña cúní Ndióxi já queá jánaha da nuú ñayivi ña mé a ndaa cándéé ini da Jesucristo.

19 Tá cándúsa ndó ña íin in talaá cuití Ndióxi já queá vaha cajú ndó. Jári rí quini cándúsa rí ña íin in talaá cuití Ndióxi. Joo cō cándúsa rí caja rí ña cúní Ndióxi ta yíhvi ndivaha rí mé á janda quíji ñinu rí.

20 Á ñacatontó jini ndó. Candehé vaha ndó. Tá cáchí ndó cándéé ini ndó Ndióxi joo cō náha ndó xihin ña cajú ndó ña mé a ndaa cándéé ini ndó mé á já queá cōó saha mé va ña cajú ndó.

21 Á cō ndícuñun ini ndó Abraham, tásáñnu jícó yó. Nandiquehe vaha Ndióxi Abraham sahá ña ñacaja da ta cáchí Ndióxi ña cúu dá ña ndaa ñu mé á jáchí ñacandúsa mé Abraham cahni da Isaac, jahyi da, ña joco ñahá da ñu mé á.

22 Candehé ndó. Tá ñacandúsa Abraham joco da jahyi da ñu Ndióxi já najánaha da nuú ndihi ñayivi ña cándéé ini da Ndióxi. Ta sahá ña ñacaja da já ñaxinu cō da cándéé cáñnu ini da Ndióxi.

23 Jatá ña ñacaja Abraham ñaxinu cō tuhun Ndióxi tá cáchí a já: “Ñacandéé ini Abraham Ndióxi ña cán queá ñandu da ña ndaa ñu mé á”, cáchí tuhun Ndióxi. Ñacachi na sahá Abraham ña cúu dá da ñandique táhan máni xihin Ndióxi.

24 Ña cán queá cándaa vaha ini ña nduu ndaa yó ñu Ndióxi sahá ña cándéé ini Ndióxi anda quiahva cándúsa í cajú í ña cúní mé á.

25 Já ñayaha xihin Rahab, mé ña ñaxica jii sanahá ndivaha. Ñandu ndaa ña ñu Ndióxi sahá ña ñacaja ña xihin ñayivi Israel jáchí ñandiquehe vaha ña java dataa ñachindahá Josué ñuu Jericó. Ta ñachindeé ña da ña ná ndijama da íchi nuú cuñun da.

26 Ña cán queá tá cáchí yó cándúsa í Ndióxi joo cō cajú í ña cúní mé á já queá cúu yó tátuhun ñayivi sa ñaxihi, ña sa cuahan ínima.

3

1 Cuni johó vaha ndó, ñani mí i, ña cúu cuéntá Jesús. A ndúcú cuaha ndó cacuu ndó ña jánaha tuhun Ndióxi nuú ñayivi jáchí cándaa vaha ini ndó ña tá cō jánaha ndó ña ndaa já queá jándoho chága Ndióxi ini ndó a juú ga java ga ñayivi.

2 Tóco ndihí cajú cuaha yó cuachi. Joo ndá ña cuu cahnda chuun ñu yúhu ná ña ná a cáhan quini a já queá cuu cahnda na chuun nuú yiquí cuñu na viti ña ná a cajú na cuachi ta já xinu cō na cacuu na ñayivi ndaa ñu Ndióxi.

3 Á cō ndícuñun ini ndó ndaja chícaan ña in freno yúhu cuáyí ña ná candaca na rí. Vatí loho ndivaha cúu mé freno joo cuu cañehe na rí ñu cúní mé ná cuñun ña.

4 Candehé ndó in barco. Vatí cáñnu ndivaha cúu dó ta vaxi tachí ndeé ndivaha joo mé da ñeñe dó cuu candaca da do xihin in timon loho ta cuu cañehe da do cuñun dó ñu cúní mé dá.

5 Tá quiahva sáñdá ña chuun ñu cuáyí xihin barco quiahva já cajú í xihin yúhu yó. Vatí loho ndivaha cúu mé yúhu yó joo xihin

mé yúhu yó cuu caja cáhnu í mé ví. Candehé ndo ndaja náhnu yúcu jáquihvi ñúhu in titó loho tá ndicava dó nu á ta chícáyí yúcu anda quiahva ndihi sahá.

⁶Tátuhun in ñuhú cáyi cúu yúhu yo. Cúu á in ña núu ndivaha ndacaan tañu yiquí cuñu í ta jativí ndihi a mí. Ta cúu á tátuhun ña sa mé indayá sahan chága ví a ñúhu nu á ña ná caja quini a ta jándihi a saha yo.

⁷Vatí ñayivi candeé na sáhnú na nu tóco ndihi quítí xihín laa xihín coo xihín quítí ñúhu tañuhú ta cúu sáhdá na chuun nu ri.

⁸Joo ni in ñayivi a cuú cahnu na yúhu na jáchi co sájí yo yúhu yo tá cahan quiní sahá ñayivi. Cúu á tá quiahva cája coo tá tñn rí ñayivi chícáan rí veneno rí na já sáhní rí na.

⁹Xihín mé yúhu yo cuahá tañu cája cáhnu í Ndióxi ta sa xihín mé yúhu yo yóho cánahá yo xihín ñayivi, na nacavaha Ndióxi yuhú nu mé á.

¹⁰Ndá tañu cahan vaha í xihín yúhu yo ta java tañu quini cahan yo xihín mé yúhu yo. Candehé ndó, ñani mí i, na cúu cuénta Jesús. Co ndítahan toho caja í ña yóho.

¹¹Jáchi cúu á tátuhun in chicho ho nu cána ticuíf. A cuú cana ticuíf viji xihín ticuíf ova ini in chicho ho.

¹²Ta sa xini vaha ndó, ñani mí i ña in titó ñuhú co sahan dó aceituna jáchi cúu dó titó ñuhú va. Já in yucu uva co sahan toho a titó ñuhú jáchi cúu á yucu mé uva va. Ña cán quea sa xini vaha ndó ña co ñúhu ticuíf viji xihín ticuíf ova ini in chicho ho.

Ndaja ín na ndichí jini cuénta Ndióxi

¹³Tá ín in taa ndichí, da tácu ini tañu ndó já quea ndítahan caja vaha da ta xihín ña yóho jánahá da nuú ñayivi ña cúu dá taa ndichí. Tá co cája lándá da sahá ña cája da já quea jánahá da nuú ñayivi ña mé a ndaa cúu dá taa ndichí.

¹⁴Tá ná ndicutú ndaa ini ndó xihín ña ihvi ini ndó já quea a cáhan ndo cúu ndó na ndichí. Ta tá ná caja ndó ñaha sahá ña cúní ndó ndiñehe jícó ndo mé ndó já quea a cáhan ndo ña cúu ndó na ndichí. Jáchi mé da ndichí co cája cáhnu da mé dá ta co cahan túhún da jáchi mé a ndaa cúu dá taa ndichí.

¹⁵Joo tá cája cáhnu da mé dá já quea cándaa ini ndó ña co ndichí jini dá nu Ndióxi jáchi tuhun cahan da coo naquixi a indiví

nu ín Ndióxi. Cáhan da tuhun ñayivi ñuyíví yóho va ta jini mé va da vaxi a. Ta tuhun cahan da cúu á tuhun núu, ña quixi nuú tiñáhá sacua ha.

¹⁶Jáchi nu ndúu na ihvi ini mé cán ndúu na co cúní táhan ta sa mé cán cáni táhan na ta cája na tóco ndihi nuú cuachi.

¹⁷Joo na ndichí jini cahan na tuhun quixi indiví nu ín Ndióxi. Ndinuhu ña vaha cája na ta co xójo ini na xihín ñayivi. Cája cáhnu ini na sahá ñayivi. Co xixi ini na xihín ñayivi jáchi táhdá ini na saha ná. Cája na ña vaha cuití va. Cáhan na ña ndaa cuití va ta co jándahvi na ñayivi.

¹⁸Vatí cúní ñayivi cáni táhan na xihín na ndichí joo ndúcú na coo vaha ini na xihín ndihi ñayivi ta já cúu ná ñayivi ndaa nu Ndióxi.

4

A cándico toho ndó ichi cuénta na ñuyíví

¹Ndávaha ri cáni táhan ndó ta já quihvi ndó tondóhó tañu ñayivi. Cáni táhan ndó sahá ña ndicají ini ndó caja ndó cuahá nuú cuachi ña xica ínima ndo. Ta cúu á tátuhun cáni táhan ña vaha xihín ña núu ini ínima ndo

²Jáchi xica ini ndó coo cuahá ñaha nu ndo joo a cuú ñehe ndó a. Ña cán quea sáhní ndó ñayivi já ñehe ndó ña cúní ndo. Cáhihvi ini ndó tá xini ndo ñaha inga na ta a cuú ñehe ndó a, ña cán quea cáni táhan ndó xihín ná. Joo co ñehe ndó ña cúní ndo jáchi co xica tahví ndo nu Ndióxi sahá ñaha cámani nu ndo.

³Tá xica ndo ñaha nu Ndióxi ta co sahan mé á ñaha nu ndo já quea cándaa vaha ini ndó ña co ín vaha ínima ndó nu Ndióxi jáchi nasacu ini ndó caja ndó ña cúní mé cuití ndo.

⁴Tá quiahva cája ñañáha tá jándahvi ña yí ña xihín inga dataa quiahva já cája ndó cuachi ña co táhan ini Ndióxi xihín. A co cándaa ini ndó ña tá ná caja í tá quiahva cája ñayivi ñuyíví yóho já quea nduú na co cúní táhan xihín Ndióxi. Ta a cuú ndique táhan máni yó xihín mé á tá ná caja í ña núu ñuyíví yóho.

⁵Jáchi sa xini vaha ndó ña ín saha cahan tuhun Ndióxi tá cáchi a já: “Nachicaan

Ndióxi ínima yii mé á ini in in í jáchi cúni ndivaha mé a mí ta chí táhvi ndivaha ini a saha yo.”

⁶ Joo cája Ndióxi cuahá ga ñamanj xihín yo ta chindeé a mí. Já cáchi tuhun Ndióxi já: “Co táhán ini Ndióxi xihín ñayivi, na ndíñehe jícó mé. Joo chindeé Ndióxi ñayivi vaha, mé na co ndíñehe jícó mé”, cáchi tuhun Ndióxi.

⁷ Ndiquiahva ndó mé ndó ndáha Ndióxi ta chicaji ndó ínima ndo nuú tiñáhá sacuahá ná a cája ndó ña cúnj rj. Anda javí cunu rí cuhun rj.

⁸ Cayati ndó nu Ndióxi ta já cayati Ndióxi nu ndo. Jándicoo ndó cuachi cája ndó ta ndaja vií ndó ínima ndo ña ná candico ndó in túhún íchi cuéntá Jesús cuití va.

⁹ Cajuchú ini ndó ta ndahyi cóhó ndo sahá cuachi cája ndó. Ndiyama ndó ña cájij ini ndó ta ná nduu a ña cacuéha ini ndó sahá cuachi ndó.

¹⁰ A ndíñehe jícó ndo mé ndó nu Ndióxi já queá ndíñehe jícó Ndióxi ndohó.

A cáhan núu ndó saha inga na

¹¹ Candehé ndo, ñani mí j, na cúu cuéntá Jesús. A cáhan núu saha táhan ndó ta a candehé ndaa táhan ndó. Jáchi ndá da cáhan núu sahá inga na já cáhan núu da saha ley Ndióxi ta sáji nuu da nu ley. Co ndítahan nu yo caji nuu í nu ley Ndióxi jáchi tá cája í já já queá quehe núu í ley Ndióxi ta sándehe ndaa í ña. Ña ndítahan nu yo caja í queá candúsa í ña ta caja í ña.

¹² Jáchi in túhún Ndióxi nasahan ley nu yo. Ta mé Ndióxi cúu á juéxe cáhnu nuú ndihi ñayivi ta mé á cuu caja vií a sahá cuachí. Ndióxi cuití va cuu jácacu mí ta sa mé Ndióxi cuu chindahá mí indayá. Ña cán queá co ndítahan nu yo candehé ndaa táhan í.

Tá cáhan í sahá ña caja í itaan

¹³ Ndúu java na tañu ndó ta cáchi na: “Viti á itaan cuhun tá cuhun nde in ñuu cáhnu ta cán canduu nde in cuiá caja chúun nde ta ñehe cuahá nde jjuhún”, já cáchi java na. Tá cáhán ndo já ndítahan cuni johó vaha ndó ña cáhan j xihín ndo.

¹⁴ Co xini toho ndó ndía ndoho ndó itaan. Co xini toho ndó ndá quivi quivi ndó. Cúu

ndó tátuhun in vico ña in tóo loho ta tá nandihí sa coó a.

¹⁵ Vaha chága ná cachi ndó já: “Catacu nde quivi itaan tá cúnj Ndióxi. Ta caja nde ña jan á ña yóho tá cúnj Ndióxi”, já cachi ndó.

¹⁶ Joo cája cáhnu ndó mé ndó tá cáchi ndó ña cándaá ini ndó ndía ndoho ndó quivi itaan. Ta núu ndivaha cája ndó tá cája cáhnu ndó mé ndó.

¹⁷ Cuachi ndacaan nuú na tiahva caja ña vaha ta co cája na ña.

5

Cáhan Santiago nuú na cuicá

¹ Cuni johó vaha ndó na cuicá. Ndítahan nu ndó ndahyi cóhó ndo ta tahnda ini ndó jáchi vaxi quivi ndoho ini ndó.

² Nacasáhá táhyi tóco ndihi ñaha najátaca ndó ta nasaxi ndihi tiquijí jáhma ndo.

³ Nacuju ndihi jjuhun cuáán xihín jjuhun cúxú ña najátaca ndó catacu vaha ndó quivi chága chí nuu. Joo co yáhvi ga viti jáchi vaxi quivi tá naha ña nacajihnda ndivaha ndó xihín jjuhún ndó. Tá quiahva jándihi ñuhú cáyi sahá tutu quiahva já ndihi saha ndó tá chínúu ndó ínima ndó jatá jjuhún ndó.

⁴ Candehé ndó. Mé ndó coó nachahvi ndó mozo ndo tá najácaja chúun ndó na nuú utu ndó. Ta viti sácu cóhó na ndaca na cuéntá nu ndo. Ta tá xíca tahví na nu ndo já queá anda nu Ndióxi, mé á cáhnu ndivaha, xínu coo ña cáhan na xihín ndo.

⁵ Mé ñuyiví yóho ndúu vaha ndó xihín ña cuicá ndo ta cája ndó ña xíca ini cuití va ndó. Xíxáhan vaha ndó ta viti nandaha ndó tátuhun tindiqui, rí najándaha chuun na cahní na.

⁶ Ta chícaan ndó cuachi jatá ñayivi ndaa ta ndá tañu sáhní ndó ñayivi vaha, mé na a cúu chindeé mé.

A candati númí ndó quivi quixi tucu Jesu-cristo

⁷ Candehé ndo, ñani mí j, na cúu cuéntá Jesús. A ndíhi ini ndó ta cuéé coo ini ndó candati ndó quivi quixi tucu Jesucristo, mé a cúu xitoho í. Tá quiahva ndati in dataa jáquee da nuú utu da quiahva já ndítahan candati Jesucristo ña quixi tucu a. Jáchi sa xini ndo ndaja cája in dataa tá ndati da

cuun vaha javi nuú tata ña nachihin da. Joo co ndáti númí dá ña ná jáquee da nu á.

⁸ Quiahva já ndítahan cuéé coo ini ndó candati ndó quiví quixi tucu Jesucristo. Cacu ndacú ndó ínimá ndo jáchi jalóho cuni ndindaa quivi quixi tucu Jesucristo.

⁹ Candehé ndo, ñani mí i. A cáhan cuachi nu táhan ndó ná a jándoho Ndióxi ini ndó. Ta viti jalóho cuni quixi Ndióxi, ña cúu juéxe cáhnu caja vii a sahá cuachi ñayivi.

¹⁰ Á co ndícuhun ini ndó, ñani mí i. Sanahá ndivaha mé na profeta Ndióxi nacahan na tuhun Ndióxi nuú ñayivi. Tá quiahva nasahan ndeé ini na tá nandoho ini na quiahva já ndítahan nu mí quiahva ndeé ini tá ná casaa quiví ndoho ini.

¹¹ Ta ñehe táhvi mé profeta ña cájii ini na viti jáchi nasahan ndeé ini na tá nandoho ini na. Á coó naxini johó ndó saha in da naní Job. Vatí nandoho ndivaha ini da joo nasahan ndeé ini da tá nandoho ini da já quea nacaja cuahá Ndióxi ñamaní xihin dá. Xihin ña yóho cándaq ini ña táhnda ini Ndióxi sahá ñayivi jáchi quíhvi ini a na.

¹² Cuni johó vaha ndo, ñani mí i jáchi cáhnu chága tuhun yóho nuú ndihi tuhun. Co ndítahan tává ndo quiví indiví ni quiví ñuyiví ni quiví inga ñaha. Jáchi ndítahan cahan ndó ña ndaa cuití va. Ta tá ndúcú ñehe ndó tuhun já cáchí ndó já: “ajan”, á tá coó já cáchí ndó: “uhun.” Já cuití va cachi ndó ná a jándoho Ndióxi ini ndó.

¹³ Tá íin in na ndóho ini tañu ndó, ndítahan nu ná caca tahví na nu Ndióxi sahá ña ndóho ini na. Tá íin in na cájii ini tañu ndó, ndítahan nu ná cata na nu Ndióxi já ná caja cáhnu na mé á.

¹⁴ Tá íin in na quíhvi tañu ndó já quea ndítahan nu ná caca na ñamaní nuú na sacuaña veñuhu ña ná quixi na caca tahví na nu Ndióxi saha ná. Ta ná cuyu na síti jini na quíhvi ña ná ndivaha na.

¹⁵ Ndítahan nu ndó candeeé ini ndó Ndióxi tá ná caca tahví ndo nu á sahá na quíhvi já quea ndivaha na quíhvi caja Ndióxi. Ta tá nacaja na cuachi já quea caja cáhnu ini Ndióxi sahá cuachi na.

¹⁶ Ña cán quea ndítahan nu ndó nahma nu táhan ndó cuachi ndó. Ta ndítahan nu ndo caca tahví ndo nu Ndióxi sahá ndaja

táhan ndo já quea ndaja vaha Ndióxi ndohó tá quíhvi ndo. Jáchi chíndeé Ndióxi ñayivi vaha tá xihin ndinuhu ínimá ná xíca tahví na nu mé á.

¹⁷ Á co ndícuhun ini ndó da naní Elías, da nasacuu profeta sanahá. Nasacuu da ñayivi tá tuhun mí. Ta xihin ndinuhu ini da naxíca tahví da nu Ndióxi ña ná a cúun javi. Ña cán quea tañu uní cuia java coó nacun toho javi.

¹⁸ Ta tá nandihí cán naxíca tahví tucu da nu Ndióxi ña ná casahá cuun tucu javi. Ña cán quea nacasahá cúun tucu javi chí nanana ndihí yucu cuí ñundáhyi cán.

¹⁹ Candehé vaha ndó, ñani mí i, na cúu cuéntá Jesús. Tá íin in na tañu ndó ta najándicoo na íchi cuéntá ña ndaa ta tá in ndó najándicó coo ndó na cán ña ná caca tucu na íchi cuéntá Jesús

²⁰ Já quea najáca cu ndó mé na cán ña ná a cúhun toho na indayá. Ta já caja cáhnu ini Ndióxi sahá cuahá cuachi nacaja na.

Cártá nacaḥyí Pedro nu cuítí

Cáḥan Ndióxi Pedro xihín na cúu cuéntá Jesús

¹ Yeḥe cúu Pedro ta cúu u in apóstol cuéntá Jesucristo. Ta chíndahá i Ndióxi coo ndó, na nacaḥi mé á jáchi cúu ndó na tóho ñuu jan sahá ña nataxí ñayivi ndohó ñuu ndó. Ta viti nandicuíta nuu ndó ndúu ndó estado Ponto xihín estado Galacia xihín estado Capadocia xihín estado Asia xihín estado Bitinia.

² Cúu ndó na nacaḥi Ndióxi, tátá yo jáchi janda saḥa nasacu ini mé á caja já xihín ndo. Ta xihín ínimá yii mé á nandaja ndohó ña ná nduu ndó cuéntá mé á já ná caja ndó ña sáhdá a nu ndó caja ndó. Ta nacaḥi a ndohó já ná ndivií ndo xihín nui Jesucristo. Ná caja cuahá ndivaha Ndióxi ñamaní xihín ndo ta ná caja mé á ña ná coo vaha ndivaha ini ndó.

Jácaçu Ndióxi ñayivi

³ Ná caja cáhnu yó Ndióxi, mé á cúu tátá Jesucristo, xitoho í jáchi táhdá ndivaha ini mé á saḥa yo ta nacaḥa ña tácu yó cuéntá mé á viti. Já nacaḥa jáchi nanditacu tucu Jesucristo ta mé a ndaa cándaḥa vaha iní ña jáxinu coo Ndióxi tuhun a nasahan nu yo.

⁴ Ta nasacu ini a quiahva cuahá ndivaha ña vaha ín indiví cán nu ndo. Mé ña vaha ín cán a cuú ndihi sahá ta ni co íchi a ta a cáyatá toho ña. Ta nasacu vaha Ndióxi mé ña vaha ín indiví cán anda tandaa quivi saa ndó cán.

⁵ Cándéé ini ndó Ndióxi sahá ña cán quéa xihín ndéé mé á chindeé a ndohó nuú ña ihvi vaxi nu ndo anda xinu coo quivi nu ndihí. Janda jáví cuni ndó ndá quiahva jácaçu a ndohó.

⁶ Ña cán quéa ndítahan nu ndó cajii ndivaha ini ndó viti vatí vaxi quivi ndoho ini ndó sahá tondohó quixi nu ndo.

⁷ Tá ná candéé cáhnu ini ndó Ndióxi cúu á tátuhun jiihun cuáán. Ta tá quiahva cája in daṭaa tá jáyaha da jiihun cuáán nu ñuhú cáyi ña xito ndojó da ña quiahva já cája ri Ndióxi coto ndojó a ndohó ña ná nahá ña

mé a ndaa cándéé cáhnu ini ndó mé á. Ta ndiyahvi chága ña cándéé ini ndó mé á a juú ga jiihun cuáán, ña ndihi saḥa. Ña cán quéa tá ná quixi tucu Jesucristo já caḥan vaha mé á sahá ña nacaḥa ndó ta já ndaja cáhnu a ndohó jáchi nacaḥeé ini ndó mé á.

⁸ Quíhvi ini ndó Jesucristo ta cándéé ini ndó a vatí a ñaha cuni ndó a. Ña cán quéa nacaḥan ndó cájii ini ndó ta ña yóho cúu á ña cáhnu ndivaha nu mé á. Ta ni co ñéhe ndó tuhun ndá quiahva ndicani ndó ña yóho nuú ñayivi.

⁹ Cájii ini ndó jáchi cándaḥa ini ndó ña jácaçu Ndióxi ndohó sahá ña cándéé ini ndó mé á.

¹⁰ Anda sanahá ndivaha najáyaha na profeta tuhun nacaḥan Ndióxi xihín ná nuú ñayivi. Ta cáchí na ña vaxi quivi caja cuahá Ndióxi ñamaní xihín ñayivi ña jácaçu a na nuú cuachi na. Ta vatí najácuaha na tuhun mé á joo coo nacandaḥa ini na ndaja caja Ndióxi jácaçu a ñayivi.

¹¹ Ta ñúhu ínimá yii Jesucristo ini ínimá na profeta ta nacaḥa mé á ña ná caḥyí na nuú tutu ña nacaḥan mé á xihín ná. Ta nacaḥyí na ña vaxi quivi ndoho ndivaha ini Jesucristo joo tá nandihí já ndicáhnu ndivaha mé á. Ta nanducú na cán candaḥa ini na yo cacuu Jesucristo ta ndá tiempo cacu a.

¹² Nacaḥa Ndióxi ña ná candaḥa ini na profeta ña a yáha yachi toho ña nacaḥyí na nuú tutu jáchi cacuu a ña coo tiempo vaxi chí nuu. Jáchi saḥa mé ndó nacaḥyí na ña nuú tutu ta java ñayivi sa nacaḥi tuhun na mé tuhun vaha saḥa Jesucristo nu ndo. Ta nachindahá Ndióxi mé ínimá yii mé á ña ná quixi a indiví ta nachindeé a na ña ná caḥan na tuhun vaha saḥa Jesucristo nu ndó. Ta janda mé tátó Ndióxi cúni na candaḥa ini na ña yóho.

Ndítahan nu yo caja í tá quiahva cája Ndióxi

¹³ Ña cán quéa caja tiaḥva ndó xíní túni ndo ña ná caja ndó ña cúni Ndióxi. Cahnu ndó xíní túni ndo ta coo tiaḥva ndó candati ndó ná jáxinu coo Ndióxi tuhun a ña caja cuahá mé á ñamaní xihín ndo tá ná xinu quivi quixi tucu Jesucristo.

14 **A** cacuu ndó ñayivi sáá ini jáchi cúu ndó jahyi Ndióxi. Co ndítahan ga cája ndó ña núu ña naxica ini ndó caja ndó tá cámaní candaá ini ndó tũhun Ndióxi.

15 Ña ndítahan caja ndó quéa caja ndó ña cúni Ndióxi xihín ndinuhu ini ndó já ná cacuu ndó ñayivi yii. Jáchi Ndióxi, mé á naçaxi ndohó cúu á ña yii.

16 Jáchi já cáchi tũhun Ndióxi: “Ndítahan cacuu ndó ñayivi yii jáchi yehe cúu u Ndióxi yii.”

17 Ta tá ná cachi ndó “tátá Ndióxi” já ndítahan caja cáhnu ndó a nani ndúu ndó ñuyívi yóho. Jáchi mé á cája vii a sahá ña cája in in ñayivi ta co sáhní toho a mé á ndá ñayivi cúu ná. In nuú cája mé á xihín ndihi ná.

18 Jáchi mé Ndióxi najáçacu a ndohó nuú ndihi ña núu naçaja ndó sanahá. Ta ña yóho cúu ña naçatiahva ndó naçaja tásáhnu jícó ndo. Ta sa cándaá vaha ini ndó ña coo naçahvi Jesucristo sahá cuachi ndó jan xihín jũhun cuáán á xihín jũhun cúxú, ña ndihi saha.

19 Ña naçaja mé á quéa naçahvi a sahá cuachi ndó xihín ñi mé á, dó yahvi ndivaha. Naxita do cán tá naxihi a ndica crúxu vatí coo naçaja mé á cuachi. Najoco a mé á nu Ndióxi sahá cuachi tá quiahva naçaja ñayivi tá najoco na in ndicachi vii nu Ndióxi sanahá sahá cuachi na.

20 Tá cámaní çava sáhá saha ñuyívi já nasacu ini Ndióxi quivi Jesucristo sahá cuachi ñayivi. Tá naxinu tiempo já naquixi a ñuyívi ña ná chindeé a ndohó.

21 Xihín ña naçaja Jesucristo cándéé ini ndó Ndióxi viti, mé á najánditacu a Jesús ta naçaja cáhnu ndivaha Ndióxi Jesús. Sahá ña naçaja Ndióxi cándéé ini ndó mé á ta ndáti ndó xinu quivi quiahva mé á ña vaha, ña ín indivi nu ndó.

22 Ta viti naçasahá ndo cája ndó ña ndaa já nandaja vii ndó ínima ndo ña ná quihvi ini ndó na cúu cuéntá Jesús. Sahá ña cán quéa xíní ñúhú quihvi ini ndó na xihín ndinuhu ini ndó.

23 Cúu á tátũhun naçacu tucu ndó joo a juú ñayivi naçaja ña naçacu tucu ndó. Jáchi cúu á sahá ña cándéé ini ndó tũhun Ndióxi, ña co ndíhi saha anda ama cáa quivi. Sahá

ña cán quéa cúu á tátũhun naçacu tucu ndó naçaja tũhun Ndióxi.

24 Jáchi já cáchi tũhun Ndióxi:

Tóco ndihi ñayivi cúu ná tátũhun yucu cuí ña cáa yúcu ña ndíhi yachi saha.

Ta tóco ndihi ña náhnu cája na cúu á tátũhun in ita cánúu nuú yucu cán.

Jáchi mé yucu cán ichi a ta ndicava ita nu á ta quiahva já ndíhi ri sahá ña cája na cán.

25 Joo tũhun Ndióxi, xitoho í a ndíhi sahá anda ama cáa quivi.

Ta mé tũhun yóho cúu á ña sa naçaxi tũhun i xihín ndo. Ta cúu á tũhun vaha cáhan sahá Jesucristo.

2

1 Xíní ñúhú jándacoo ndó tóco ndihi ña núu cája ndó ta a jándahvi ga ndó ñayivi. Ndítahan cacuu ndó tá quiahva ndaa ndó ta a cáhivvi ga ini ndó ta a cacuu ga ndó ñayivi ndahnda yuhu.

2 Tá quiahva cája na valí ndúcú na chichí na quiahva já ndítahan ndinducú ndó candaá ini ndó tũhun Ndióxi já ná cuu cuahnu ndó xihín á ña ná jáçacu Ndióxi ndohó.

3 Tá ná caja ndó já jánaña ndó ña mé a ndaa táhyi naçandaá ini ndó ña vaha ndivaha ini Ndióxi, xitoho í.

Jesús cúu á tátũhun in yuu cáhnu ndáçan titó vehe

4 Cayati ndó nuú Jesucristo, xitoho í jáchi tácu va mé á ta cúu á tátũhun yuu ndúhu ña naçandají da cávaha vehe. Joo nu Ndióxi cúu Jesucristo tátũhun in yuu vaha ndivaha ña naçaxi a.

5 Ta caja Ndióxi xihín ndohó ña ná cacuu ndó tátũhun yuu tácu ta cavaha Ndióxi veñuhu mé á xihín ndihi ndó. Ta sa cúu ndó jutú yii nu á. Ta sahá ña naçaja Jesucristo xihín ndó cuu joco ndó mé ndó caja ndó ña cúni mé cuití va jáchi ña jan quéa cáji ini Ndióxi xihín.

6 Sahá ña cán quéa cáchi tũhun Ndióxi tá cáhan sahá Jesús já cáchi a já:

Yehe nasacu u in a ñuu Sión ta cúu á tátũhun in yuu ndúhu ta mé yuu yóho cúu á ña naçaxi mí i ta cúu á ña yahvi ndivaha.

Ta ndá na ná candeé ini mé á a cándoο núu toho na caja i, cáchi tūhun Ndióxi.

7 Mé yuu cáhan Ndióxi saha yóho cúu á Jesucristo ta ndiyahvi ndivaha nu mé ndó jáchi candeé ini ndó a. Joo na co candeé ini Jesús na cán cúu na jáxinu nuú tūhun Ndióxi tá naçachi a já:

Mé yuu ndúhu, ña naçandají da cávaha vehe,

nanduu a yuu ña ín chága saha.

8 Ta ín inga tucu nu cáchi a sahá Jesús:

Cúu á tátūhun in yuu cáhnu nuú cachihin saha ná ta jándicava a na, cáchi tūhun Ndióxi.

Ta mé na cán cáchihin saha ná jáchi co cúni na cuni johο na tūhun vaha cáhan saha Jesucristo. Ta janda saha nasacu ini Ndióxi ndoho na.

Ñayivi, na cúu cuénta mé á

9 Joo mé ndó cúu ndó na naçaxi Ndióxi ña ná nduu ndó na vehe mé á. Ta nanduu ndó jutū cuénta mé á ta mé á cúu á rey. Ta cúu ndó in táhnda cáhnu ñayivi yí ndácaan ndó in ñuu ña nandiquehe Ndióxi cacomí a cuénta saha. Ta naçaxi Ndióxi ndóhó ña ná cahan ndó xihín ñayivi ndaja ndaa ña náhnu cája Ndióxi. Mé a naçana ndohó tá nasanduu ndó nuú naá cán já ná quixi ndó nuú ndató ndivaha yéhe nu ín a.

10 Coó nasacuu toho ndó ñayivi cuénta Ndióxi jihna joo viti cúu ndó cuénta mé á. Coó natahvi ini Ndióxi saha ndó jihna joo viti táhvi ini a saha ndo.

Xíni ñúhú caja í ña cúni Ndióxi

11 Candehé ndo, ñani i. Xíca tahvi i nu ndó, na cúu tátūhun na ndúu ñuu tóho jáchi indivi cúu ñuu ndó. Saha ña quihvi ini i ndohó saha ña cán quea xíca i ñamaní nu ndo ña ná a cája ndó ña xíca ini yiquí cuñu ndó caja. Jáchi cúu á tátūhun caní táhan yiquí cuñu ndó xihín ínimā ndo.

12 Mé ndó ndúu ndó tañu ñayivi ñuyiví, na co xíca íchi cuénta Ndióxi. Xíni ñúhú caja vaha ndó já ná cuni na jan ndá quiahva cája ndó. Vatí viti cáhan núu na saha ndo ta cáchi na ña cúu ndó na quini joo tá ná cuni na ña vaha cája ndó já quea caja cáhnu na Ndióxi tá ná xinu quiví caja vií mé á saha tóco ndihi ñayivi.

13 Saha ña cája cáhnu ndó Jesucristo, xitoho í xíni ñúhú coo johο ndó nu sáhnda na jutixia ndúu ñuyiví yóho nu ndo. Coo johο ndó nu cáhan presidente, da ndójo chuun cáhnu chága.

14 Ta coo johο ndó nu sáhnda da cúu gobernador jáchi mé presidente cúu da sáhnda chuun nuú gobernador ña ná caja vií da saha na co cája vaha. Ta ndítahan nu dá cahan vaha da saha na cája vaha.

15 Cúni Ndióxi ña ná caja vaha ndó. Já quea na tóntó jini, na co xíca íchi cuénta Ndióxi cuni na ña vaha cája ndó já ná a ñehe íni na cahan núu na saha ndo.

16 Vatí najani ndó ndáha ley Moisés ña nasacomí cuénta saha ndó jihna joo co cúni cachi a ña núná nu ndó caja ndó ndá cuachi cúni ndo. Jáchi xíni ñúhú ndicuhun ini ndó ña cúu ndó na cája chúun cuénta Ndióxi viti.

17 Xíni ñúhú coo toni ñúhú ndo xihín tóco ndihi ñayivi. Ta ndítahan quihvi ini ndó na cúu cuénta Jesús. Ta ndítahan nu ndó caja cáhnu ndó Ndióxi. Ta ndítahan coo toni ñúhú ndó xihín da cómi chuun ñuyiví yóho.

Coó naçahan núu Jesús xihín na naçaja xíxi xihín á ta quiahva já ndítahan caja ri mé ví

18 Ndóhó, na cómi xitoho cuénta saha xíni ñúhú caja ndó xihín ndinuhu ini ndó ña sáhnda xitoho ndó nu ndo. Ta a ndínehe yúhu ndó nu ná. Coó a caja toho a á cúu ná ñayivi xíxi ini xihín ndo á cúu ná na quihvi ini ndohó, na co jándoho nahá ini ndó.

19 Sa xíni ndó ña cúni Ndióxi caja ndó. Saha ña cán quea caja ndeé ini ndó tá cája xíxi na xihín ndó saha in ñaha coó naçaja ndó. Jáchi saha ña yóho cajii ini Ndióxi xihín ndó.

20 Vatí cája ndeé ini ndó tá ndóho ini ndó saha cuachi naçaja ndó, co ñehe táhvi toho ndó ñamaní nu Ndióxi. Joo tá cája ndeé ini ndó tá ndóho ini ndó saha ña vaha cája ndó já quea cajii ini Ndióxi xihín ndo.

21 Jáchi saha ña yóho naçana mé á ndohó. Ta najánañaha Jesucristo ña yóho nu ndo tá nandoho ini mé á saha ndo vatí coó naçaja mé á cuachi. Ta ña yóho cúu in quiahva nasacu a caja ndó.

22 Ni in túhún toho tañu coó ñacaja mé á cuachi ta ni in túhún tañu coó najándahvi a ñayivi.

23 Tá ñacasáhá ña cánahá quini na xihín á coó ñanducú ñehe mé á tuhun quini nu na. Ta tá najándoho na ini a coó ñasacu ini a caja núu a xihín ña cán. Ña ñacaja mé á quea ñasacu ndihi a ña ndáha Ndióxi, mé a caja vii ndaa saha tóco ndihi ñaha.

24 Mé Jesucristo ñandicojo a cuachi jata yiquí cuñu a cuahan tá ñaxihí a ndica crúxu. Ta cúu á tátuhun ñaxihí yó nuú cuachí ña ná cuu catacú cuéntá mé á tá ná caja í ña vaha cuití va. Najándicuehe ña Jesucristo ña ná cuu ndivaha mé ndó.

25 Jáchi mé ndó ñaxica nuu ndó ñuyivi yóho tá quiahva xica nuu in ndicachi, rí ñandiñuhú nuú xitoho. Joo viti ñandico coo ndó nu Jesucristo ta mé a cán ndáa a ndohó tá quiahva ndáa in dataa ndicachi jana dá. Ta coo jándacoo ndáha mé á ndohó.

3

Ña ndítahan caja na sa natandaha

1 Candehé ndó, najihí, ña ndúu yí. Xíní ñuhú caja ndó ña sáhdá yí ndó nu ndo. Já quea tá coo cándusa da tuhun Ndióxi cuu xinu ini da candúsa da ña sahá ña caja ndó ta a juú ga sahá ña cáhan ndó xihín dá.

2 Jáchi tá ná cuni yí ndó ña caja vaha ndó ta cáhan toni ñuhú ndó xihín dá já quea cuu jáxinu ndó ini da xihín ña caja ndó.

3 A ndíhi nahá ini ndó caja cutú ndó mé ndó xihín ñaha ña cuu canaha lándá ndó xihín, tátuhun ña chuhun lándá ndó yutu jini ndo á tátuhun ña cañuhu lándá jíqui jico ndo. Ta a ndíhi ini ndó cañuhu lándá jéhe ndáha ndo. Ta a ndíhi ini ndó candixi ndó jáhma lándá. A ndíhi ini ndó saha tóco ndihi ña yóho.

4 Ña ndítahan ndihi ini ndó sahá cúu ña ndiyahvi nu Ndióxi. Ta ña yóho cúu in ínima ña ñandicutú xihín ña vaha já ná coo vii ini ndó. Tóco ndihi ña yóho cúu ña coo ndíhi saha.

5 Jáchi quiahva já ñúchí ndivaha ñasacaja najihí yí, ña ñasacuu cuéntá Ndióxi sanahá. Ñacandee ini na Ndióxi ta ñacaja na chuun ñasahnda yí ná nu ná.

6 Quiahva já ñúchí ndivaha ñacaja ña ñasanani Sara tá ñacandúsa ña yí ña, da ñasanani Abraham. Ta mé ña cán ñacachi ña sahá Abraham ña cúu dá xitoho ña. Ta viti mé ndó cúu ndó tátuhun jahyi mé Sara cán tá caja ndó ña vaha ta tá coo yíhví ndo ni in ñaha.

7 Ta jári ndohó va dataa, da íin ñájihí, a caja ndivaha ndó xihín ñájihí ndo. Coo toni ñuhú ndó xihín ña jáchi cúu ña ña chíjín chága nu mé ndó. Ta ñamani, ña ñasacu ini Ndióxi quiahva nu ndohó, dataa, ñasacu ini mé á quiahva ri a nuú ña cán va. Saha ña cán quea ndítahan caja vaha ndó xihín ñájihí ndo já ná cuni johó Ndióxi ña xica tahví ndó nu á.

Ndóho ini java na sahá ña vaha caja na

8 Candehé ndo. In ndítahan cacuu ndihi ndó. Co ndítahan cahnda táhan ndó. Ndítahan quihvi ini táhan ndó tátuhun in cúu tátá ndihi ndó. Ta ndítahan candahví ini ndó ñayivi. Ta coto a ndínehe jico ndo mé ndó.

9 Tá ná caja núu ñayivi xihín ndo a ndíco coo ndó caja ndó já xihín ná. Ta ni tá ná canahá ña xihín ndo a ndíco coo ndó canahá ndó xihín ná. Vaha chága ná caça tahví ndó nu Ndióxi ña ná caja vaha mé á xihín ña cán. Ta ñacana Ndióxi ndohó ña ná caja mé á ñamani xihín ndo.

10 Jáchi já cáchi tuhun Ndióxi já: Ndá ña cuni canduu nahá ñuyivi yóho ta coo cuni ña quixi tondohó nu ná nani íin na yóho,

já quea ndítahan nu ná candaa na yuhu ná já ná a cáhan quini na.

Ta quiahva já ndítahan candaa na yuhu ná já ná a cáhan ña ña tuhún.

11 Ndítahan caxoo na nu tóco ndihi ña núu ta caja na ña vaha cuití va.

Ta ndítahan ndinducú ña ña coo vaha ini na xihín ñayivi ta a jándacoo na caja na ña.

12 Jáchi ndáa Ndióxi ña caja ndaa, ta táa johó a nu cáhan ña tá xica tahví ña nu mé á.

Joo xójo ini a xihín ñayivi caja cuachi, já cáchi tuhun Ndióxi.

13 Ni in ñayivi a cuu ndusa caja xixi xihín ndó tá ná ndihi ini ndó caja ndó ña vaha.

14 Joo tá cája xíxi na xihin ndó vatí cája ndó ña vaha, tahví nahá ñacuu ndó. A cáyihví toho ndó ñayivi ta a ndícani toho ini ndó.

15 Ña ndítahan caja ndó quéa caja cáhnu ndó Jesucristo, xitoho í xihin ndinuhu ínima ndó. Ta xíni ñúhú coo tiahva ndó nducú ñehe víi ndó tuhun nuú ñayivi, na cúní candaa ini sahá ña cándéé ini ndó Jesús. Ta ná coo toñi ñúhú ndó xihin ná ta a ndíñehe jícó ndó mé ndó nani ndícani ndó tuhun Ndióxi nuú na cán.

16 Ndítahan caja ndó ña vaha já ná a cacahan nuu ndó. Ta tá cáhan núu na saha ndó sahá ña cúu ndó cuéntá Jesús já quéa cacahan nuu mé na cán sahá tuhun núu cáhan na saha ndó.

17 Ta tá mé Ndióxi quéa cúní ña ná ndoho ini ndó já quéa vaha chága ná ndoho ini ndó sahá ña vaha cája ndó a juú ga sahá ña núu.

18 Ta in túhún tañu cuití va ñaxihí Jesucristo sahá cuachí. Ni in túhún toho cuachi coó ñacaja mé á joo ñandoho ini a sahá ñayivi quini já ná cuu ndihvi ndihí íchi cuéntá Ndióxi. Ta sahá ña ñasacomí a in yiquí cuñu ñayivi ñaxihí a joo mé á cúu á ña ñaquixi indiví sahá ña cán quéa ñanditacu tucu a ta tácu yíi va ínima mé á.

19 Ta ñasahan ínima mé á nu ndájí ínima ndii ta cán ñacahan mé á tuhun Ndióxi xihin na.

20 Mé ínima ndii cán ñasacuu na na coo ñaxeen cuní johó tuhun Ndióxi sanahá ndivaha. Tá ñasatacu Noé já ñasandatí Ndióxi ña ná cava ini na cán nani cávaha Noé mé barco cáhnu, dó jácacu ñahá. Joo chá cuití ñasacuu na ñacacu. Una víxí laa na ñacacu nuú ticuúí cán.

21 Ta viti tá cándúta yo xihín ticuúí já cacu ínima yó tá quiahva ñacacu na cán ini barco sanahá. Tá cándúta yo xihín ticuúí co ndóo cuachí sahá ña ñandoo yiquí cuñu í xihín ticuúí cán. Ñacacú nuú cuachí jáchi cándéé ini Jesucristo ta cúní yó ña ná ndaja víi mé á ínima yo. Ta náha ña ñacacú nuú indayá tá ñanditacu tucu Jesucristo

22 ta sa ñandaa mé á indiví ta íin a xoo cuáha Ndióxi. Ta sáhdá mé á chuun nuú táto Ndióxi xihín nuú na cómi cuéntá sahá na ndúu indiví.

4

Náha Ndióxi nu yo ndá quiahva ndítahan nu yo caja chúun í ña ná ñeñe táhvi yó nu mé á

1 Tá quiahva ñandoho yiquí cuñu Jesús quiahva já ndítahan canduu tiahva ri ndóhó va ndoho ini ndó. Jáchi ndá na ndóho ini yiquí cuñu, na cán cúu na co cája cuachi ndaja ñacuu.

2 Ta viti co cája ga yiquí cuñu ndó ña núu cuéntá ñuyíví yóho. Ta níi tiempo ndúcú ndó caja ndó ña cúní Ndióxi.

3 Jáchi sa ñayaha ndivaha quiahva ñacaja ndó ña núu jihna tá quiahva cája ñayivi, na co xíni Ndióxi. Mé tiempo tá cámani candaa ini ndó saha íchi cuéntá Jesús já ñasacaja ndó tá nuú ña núu tátuhun ña xíca ini ndó caja ndó xihín yiquí cuñu ndó. Ta ñasacuu ndó ñayivi xihí. Ta ñacatóo ndó cája ndó vicó lánda ndivaha. Ta chí ñajáyaha quini ndivaha ndó ña ñasaxihi ndó. Ta ñacaja cáhnu ndó yoco ña ñacachi Ndióxi co ndítahan caja cáhnu ndó.

4 Ta ñacasahá cáhan núu ñayivi ñasatáhan xihín ndó tá ñasacaja ndó ña núu jihna. Jáchi viti co xíca nuu ga ndó cája ndó tá nuú ña núu xihín ná. Ta viti sa ñacasahá ndíhi ini na ndátí na ndicó coo ndó xihín ná.

5 Joo vaxi quíví cuñun na cán cavíi saha ná nu Ndióxi, mé a íin tiahva caja víi sahá na tácu xihín sahá na sa ñaxihí.

6 Jáchi sa ñaxini johó va ñayivi, na sa ñaxihí cán tuhun vaha sahá Jesús tá ñasatacu na. Ñaxini johó na tuhun vaha sahá Jesús ña ná cuu catacu ínima ná tá quiahva tácu Ndióxi vatí ñacavíi saha ná ñuyíví yóho tá quiahva cávii saha tóco ndihi ñayivi.

7 Jalóho cúní xinu coo quíví ndihi saha tóco ndihi ñaha. Sahá ña cán quéa ndítahan nu ndó coo cáxí táhyí ini ndó ta xihín ndinuhu ini ndó ndítahan caca tahví ndó nu Ndióxi.

8 Ña cúní quéa ná quíhvi ini táhan ndó jáchi tá quíhvi ini táhan ndó já cája cáhnu ini saha táhan ndó tá ná yaha xihín táhan ndó.

9 Ta a cójo ini ndó tá xinu coo ñani táhan ndó xíto nihni na ndohó vehe ndó jáchi ndítahan ndiquehe vaha ndó na.

10 Nasahan Ndióxi nuú in in ndó ña ná ñehe táhvi ndó in in ñamani mé á. Ta ndítahan caja chúun ndó a ña ná chindeé ndó na cúu cuéntá Jesús. Ta ndítahan caja ndó ña tá quiahva sahan Ndióxi ndée ndó caja ndó ña.

11 Ta ndá tūhun ná cahan ndó xihín ñani táhan ndó, ná cacuu a tūhun yji tátūhun ña cahan Ndióxi. Ta ndá ndó cája ñamani xihín inga na, ná caja ndó ña xihín ndée sahan Ndióxi nu ndo. Jáchi tóco ndihi ña cája ndó ndítahan cacuu a ña cuu caja cáhnu í Ndióxi xihín. Ta cája Jesucristo ña ná cuu caja cáhnu í Ndióxi. Cáhnu ndivaha cúu a ta sáhdá a chuun nuú tóco ndihi ñaha anda ama cáa quivi. Já ná coo.

Ndóho ini jáchi cándéé ini Jesús

12 Candehé ndo, ñani i. Coto a catóntó nahá ndo tá quixi tondóhó náhnu nu ndo. A cája ndó tátūhun na co xini quixi tondóhó nuú.

13 Ña ndítahan caja ndó queá cajii ini ndó jáchi xihín ña yóho cándaá ini ndó ndá quiahva nandoho ini Jesús. Ta xihín ña yóho cajii ndivaha ini ndó tá ná cuni ndó ndá quiahva cáhnu cúu mé á tá ná quixi tucu á.

14 Tá cánahá ñayivi xihín ndo sahá ña cándéé ini ndó Jesucristo, táhvi nacuu ndó. Jáchi sa nandicutú ndaa ínimá in in ndó xihín ínimá yji Ndióxi ta mé á cúu á ña cáhnu ndivaha. Mé ñayivi cán cahan nuu na sahá joo mé ndó cája cáhnu ndó a.

15 Tá nacasáhá cája xixi na xihín ndó co ndítahan cacuu a sahá ña cúu ndó taa sáhní ndii. Ta ni co ndítahan cacuu a sahá ña cája cuíhná ndo. Ta ni co ndítahan cacuu a sahá ña a váha toho nacaja ndó. Ta ni co ndítahan cacuu a sahá ña naquihvi nuu ndó nuú co ndítahan nu ndo.

16 Joo tá ndóho ini ndó sahá ña cúu ndó cuéntá Jesucristo co ndítahan cácahan nuu ndo. Ña ndítahan caja ndó queá caja cáhnu ndó Ndióxi jáchi nañehe táhvi ndó cacuu ndó cuéntá Jesús.

17 Viti sa naxinu coo tiempo casáhá Ndióxi caja vii a sahá na cúu cuéntá mé á. Ta jihna mé yó, na cúu cuéntá mé á caja vii a saha. Ta a juú quiahva jándoho a ini java ga ñayivi, na co cuni coo johó nuú ña sáhdá mé á nu ná caja na.

18 Jáchi cáhí tūhun Ndióxi ña janda mí, na cúu ñayivi ndaa nu Ndióxi ta ihvi cáa saha yo jácacu Ndióxi mí. Ndaja ga ví caja Ndióxi xihín ñayivi sáá ini, na co cuni jándacoo cuachi.

19 Sahá ña cán queá tá ndóho ini ndó tá quiahva cuni Ndióxi, ndítahan nu ndó caja vaha ndó. Ta jári ndítahan nu ndó ndiquiahva ndó mé ndó ndáha Ndióxi, mé á nacavaha ndóhó. Ta cája mé Ndióxi ña sahan tūhun a caja.

5

Ndicani Pedro nuú na cúu cuéntá Jesús ndía ndítahan nu ná caja na

1 Ta viti cuni cahan loho i xihín na sacuaḥa nuú na cúu cuéntá Jesús ndúu tañu ndó jan jáchi da sacuaḥa cúu ri yehe va. Ta cúu u in da naxini xihín nuú i tá quiahva nandoho ini Jesucristo. Ta tá quiahva cuni na sacuaḥa ndaja cáhnu cacuu na nu Ndióxi tá cuhun na coo na xihín mé á quiahva já caja ri Ndióxi xihín yehe va tá ná xinu coo quivi nu ndíhí.

2 Xíca táhvi i nu ndó ña ná cacomí vaha ndó cuéntá sahá na cúu cuéntá Jesús. Caja ndó ña xihín ndinuhu ini ndó jáchi mé Ndióxi najándacoo a na ndáha ndo. Sahá ña cán queá xini ñúhú coo cuéntá vaha ndó xihín ná tá quiahva cuni Ndióxi. Ta coto a cája ndó ña xihín ña ndúsa. Ta ni a cája ndó ña sahá jjuhún. Ña ndítahan caja ndó queá cajii ini ndó xihín chuun yóho.

3 Ta co ndítahan cahvi ini ndo ña cúu ndó xitoho na cúu cuéntá Jesús jan jáchi na jan cúu ná na najándacoo Ndióxi nu ndó candaá ndó. Xíni ñúhú caja vaha ndó já ná cuni ri na jan va caja na ña. Jáchi na jan cúu ná tátūhun ndicachi ta ndóhó cúu ndó tátūhun da ndáá ñahá.

4 Ña cán queá tá ná quixi Jesucristo, mé á cúu da sacuaḥa nuú ndihi da ndáá na cúu cuéntá mé á anda já ndiquiahva mé á ña ndítahan ndiquehe ndó sahá chuun nacaja ndó yóho. Ta ña quiahva mé á nu ndó a cacuu toho a in ñaha ña ndihi saha.

5 Ta viti cahan ri xihín ndóhó, da tacú. Xíni ñúhú coo johó ndó nu sáhdá na sacuaḥa nu ndo. Tóco ndihi ndó ndítahan candúsa táhan ndó ta co ndítahan nu ndó

ndiñehe jíco ndo mé ndó jáchi já cáchi tuhun Ndióxi:

Xójo ini Ndióxi xihín na cátóo ndiñehe jíco mé,

joo cája ñamani xihín na jánuu ndáha mé.

⁶ Ña cán quéa ndítahan jánuu ndáha ndó mé ndó nu Ndióxi jáchi sa cándaá ini ndó ña cáhnu ndivaha cúu mé á. Vaxi quivi jándiñehe jíco mé á ndohó sahá ña najánuu ndáha ndó mé ndó.

⁷ Tá ndícani ndivaha ini ndó ndítahan caça tahví ndó nu Ndióxi ña ná chindeé a ndohó jáchi ñúhu ini a sahá ndo.

⁸ Cuéntá coo ndó ta coto a náá ini ndó jáchi tiñáhá sacuaḥa cúu rí rí ihvi yo ta xíca nuu rí tañu mí yóho. Ta tá quiahva cája in león ndáhyi rí ndúcú rí yo caxí rí quiahva já cája tiñáhá sacuaḥa yóho jándicava rí ñayivi nuú cuachi.

⁹ Xíni ñúhú coo ndacú ini ndó ta candeé ndusa ini ndó Ndióxi já cuu quee vaha ndó xihín ri. Ta ndítahan ndicuhun ini ndó ña tá quiahva ndóho ini ndó quiahva já ndóho ri java ga na cúu cuéntá Jesús ndúu ndijáá ñuyívi.

¹⁰ Ta tá sa nayaha chá tiempo ndóho ini ndó anda jávi caja Ndióxi ña ná ndoo cuachi ndó ta jándihvi mé á ndée a ini ínima ndo. Ní tiempo cacuu ndó ñayivi ndacú ini xihín tuhun Ndióxi ta xihín ña yóho candeé ndusa ini ndó Ndióxi. Mé á cán cája cuahá ñamani xihín yo. Ta nacana mé á mí ña ná cohó coo í indiví ña ná ndaja cáhnu Ndióxi mí anda ama cáa quivi sahá ña in nanduú xihín Jesucristo.

¹¹ Cáhnu ná cacuu mé á ta íin ndée a cája tóco ndihi ña cúni a anda ama cáa quivi. Já ná coo.

Ndindayí Pedro na cáhyí da carta nuu cán

¹² Chindeé Silvano yehe cáhyi i carta yóho ta chindahá i ña nu ndo. Ta cája i cuéntá mé Silvano yóho cája chúun da cuéntá Ndióxi xihín ndinuhu ini da. Nacahyi i mé carta loho nu ndo jáchi cúni ndicani i ña ndaa nu ndó ña cája tá cája Ndióxi ñamani xihín ndo. Xíni ñúhú coo ndacú ini ndó ta a ndíndójó ndó tóco ndihi ña nacachi i xihín ndó yóho.

¹³ Na cúu cuéntá Jesús ndúu ñuu Babilonia chindahá na Ndióxi coo ndó. Ta tá quiahva nandacaxi Ndióxi ndohó quiahva

já nandacaxi ri á na cán va. Ta jári Marcos, da cúu tátuhun jahyi i chindahá da Ndióxi coo ndó.

¹⁴ Caḥan Ndióxi xihín táhan ndó ta tatí yúhu sajóho táhan ndó jáchi quiahva já ndítahan caja ndó sahá ña quihvi ini táhan ndó.

Ta ña cúni quéa ná coo vaha ini ndihi ndó, na cúu cuéntá Jesucristo. Já ná coo.

Carta nacahyí Pedro chí ivi

Cáhyí tucu Pedro inga carta nuú na cúu cuéntá Jesús

1 Yehe cúu Simón Pedro ta cája chúun i cuéntá Jesucristo ta cúu u in apóstol nāchindahá mé á ña ná caħan i saħá tuhun a. Cáhyí i carta yóho nu ndóhó, na nañehe táhvi candeé ini Ndióxi tá quiahva candeé ini ndehe mé á. Jáchí cája ndaa Jesucristo tóco ndihi ñaha ta mé á cúu Ndióxi cája cáhnu í. Ta mé á quea jácacu mí.

2 Ña cúni quea ná caja cuaha Ndióxi ñamaní xihín ndo ta ná caja mé á ña ná coo vaħa ini ndó saħá ña xini ndó yo cúu Ndióxi ta saħá ña xini ndo yo cúu Jesús, xitoho í.

Jáxinu Ndióxi ini ña ná caja i ña cúni mé á

3 Xihín ndée Ndióxi nacaja ña ná a ndímaní ñaha nu yo catacú ñuyívi yóho. Ta náha mé á nu yo ndá quiahva caja cáhnu í mé á xihín ña cája í. Jáchí nacaja mé á ña ná candaa ini saħa Jesucristo. Ta xihín ndée mé á ta xihín tóco ndihi ña náhnu cája mé á nacaxi a mí candeé ini mé á.

4 Ta saħá ña yóho nasahan tuhun a nu yo. Ta náhnu ndivaha cúu tuhun nasahan mé á nu yo ta ndiyahvi ndivaha ña. Jáchí xihín tuhun nasahan mé á nu yó já cuu xinu coo í coo í tá quiahva íin mé á. Ta xihín ña yóho cuu caxoo í nuú ña núu xica ini yiquí cuñu í caja ñuyívi yóho.

5 Saħá ña cán quea tá cúni ndó ñehe táhvi ndó ñamaní nu Ndióxi xini ñúhú candeé ini ndó Jesús. Ta vatí sa candeé ini ndó Jesús joo xini ñúhú caja vaħa ndó. Ta vatí sa cája vaħa ndó joo xini ñúhú candaa vaħa ini ndó tuhun Ndióxi.

6 Ta vatí sa candaa ini ndó tuhun Ndióxi joo xini ñúhú cahnú ndó nuú ña núu ña xica ini yiquí cuñu ndó caja. Ta vatí sa saħnu ndó nuú ña xica ini yiquí cuñu ndó caja joo ndítahan coo cáhnu ini ndó. Ta vatí sa íin cáhnu ini ndó joo ndítahan ndinducú ndo caja ndó ña cúni Ndióxi.

7 Ta vatí sa cája ndó ña cúni Ndióxi joo ndítahan quihvi ini ndó ñani táhan ndó, na

cúu cuéntá Jesús. Ta xihín ña yóho cuu quihvi ini ndó tóco ndihi ñayivi.

8 Tá cája ndó tóco ndihi ña yóho ta tá ndíhi ini ndó cuahnu ndó xihín á, a cácuu toho ndó ñayivi coo chúun nu Ndióxi. Ta tá ná xinu coo ndó candaa ini ndó saħa Jesucristo, xitoho í já quea a cácuu a ña uun.

9 Joo ndá na coo cája tóco ndihi ña nacachi i xihín ndo cúu ná tátuhun in na cuaá, in na a cuú candehe vaħa. Jáchí nandindójo na ña najándoo Ndióxi cuachi nacaja na sanahá.

10 Saħá ña cán quea ndítahan nu mé ndó, ñani i, na cúu cuéntá Jesús ndíhi ini ndó náha ndo nuú ñayivi ña mé a ndaa táhyí cúu ndó na nacana Ndióxi cacomí a cuéntá saħa. Jáchí tá ná caja ndó tóco ndihi ña vaħa nacachi i xihín ndo yóho a ndícava toho ndó nuú cuachi.

11 Ta xihín ña yóho núna nu ndó cuħun ndo indivi nu íin Jesucristo, xitoho í, mé á jácacu mí ta cacomí a cuéntá saħa yó anda ama cáa quivi.

12 Saħá ña cán quea caħan tá caħan i saħá ña yóho nu ndo vatí sa xini va ndó ña ta vatí sa candeé ini ndó ña ndaa, ña najánaha i nu ndo yóho.

13 Cája i ña yóho jáchí cáhán i ña ndítahan caja i ña nani tácu u ñuyívi yóho. Jáchí xini ñúhú ndicani i nu ndo ndía quea vaħa ta ndía quea a váha.

14 Jáchí sa nacaja Jesucristo, xitoho í ña ná candaa ini i ña sa nacayati quivi quivi i ta jándacoo i ñuyívi yóho.

15 Joo ndúcú ndée e ndinducú u ndá quiahva caja i já ná a ndindójo ndó saħa tóco ndihi ña yóho tá sa naxihí i.

Ndicani Pedro ña naxini da ndá quiahva cáhnu cúu Jesús

16 Tá najánaha nde ndohó ña íin cuaha ndée Jesucristo, xitoho í ta tá nacachi nde xihín ndo quixi tucu mé á, coo nasacuu a tuhun nacana jini mé nde ña jándahvi nde ndohó vaħa. Jáchí naxini xihín nuu mé nde ndá quiahva cáhnu cúu Jesucristo, xitoho í.

17 Naxini nde xihín nuú nde tá nandaja cáhnu Ndióxi, tátá yo Jesucristo já nandicáhnu ndivaha mé á. Ta ñúhí ndivaha nasahin tá naxini johó nde nacachi Ndióxi já: “Mé a yóho cúu jahyi

maní i ta cájii ndivaha ini i xihín tóco ndihi ña cája”, ñacachi Ndióxi sahá Jesús.

¹⁸ Ta mé nde ñaxini johó nde ñacahan Ndióxi chí indiví jáchi ñasanduu nde xihín Jesús jini mé yúcu yii cán.

¹⁹ Ta ín inga tucu ñaha cáhan ndá quiahva cáhnu cúu Jesús ta ña cán cúu ña ñacahyí ña profeta sanahá. Ta sa xini vaha yó cúu á ña ndaa. Vaha cája ndó táa johó ndó ña ñacahyí ña profeta cán jáchi cúu á tátuhun in lámpara ña jándiyéhe nuú naá janda quiahva ná quixi Jesucristo. Ta mé á cúu á tátuhun quimi cáhnu, rí quéta tá ñativi jáchi jándiyéhe a ínima ñayivi.

²⁰ Joo coto a ndíndójó ndo ña ni in túhún toho na a cuú nducú ñehe ña cáchi túhun Ndióxi nuú inga na sahá ña cána jini mé va na.

²¹ Jáchi ni in profeta coó ñacahyí ña ña ñasacu ini mé ná cahyí. Ña ñacaja na quéa ñandiquiahva na mé ná ndáha ínima yii Ndióxi ta mé Ndióxi ñasahan tóco ndihi ña ñacahan na.

2

Na xica jánaha ña tuhún (Judas 4-13)

¹ Joo mé tiempo já ñasanduu ri profeta túhún tañu ña Israel cán. Quiahva já canduu ri ña jánaha ña tuhún tañu ndóhó. Ta ña cán casahá ña jácahan jehé ña ñayivi sahá ña cáhvi jini mé va na. Joo jáquihvi ndivaha na ñayivi xihín á. Ta xihín ña yóho a ndícuni na ña najácau Jesús ña ta casahá ña cáchan nuu ná sahá ña ñacaja mé á saha ná. Ta ña yóho quéa caja ña ná ndihi yachi chága sahá ña cán.

² Cuahá ndivaha ñayivi casahá candico ña jatá ña cán ta casahá ña cája na ña núu xihín ña. Ta sahá ña núu cája ña cán casahá ñayivi cahan núu na saha túhun vaha cáhan saha Jesús vatí cúu á íchi ndaa.

³ Ta sahá ña catóo ndivaha na jiuhún sahá ña cán quéa nducú ña tavá ña jiuhún xihín ndo xihín mé ña tuhún jánaha ña cán. Ta xini Ndióxi ña cája na ña cán quéa ndihi tá ndihi saha ná. Jáchi sa janda sanahá ñasacu ini mé á taán a ñayivi jan ini indayá.

⁴ Coó ñacaja cáhnu toho ini Ndióxi saha tátó mé á tá ñacaja na cuachi nu mé á. Ña

ñacaja mé á quéa ñachindahá a ña indayá. Ta najándicoo a ña nuú naá ndivaha ta ñacató a ña xihín cadena ndúu na ndáti na xinu coo quivi caja vii Ndióxi saha ná.

⁵ Ta ni coó ñacaja cáhnu ini Ndióxi sahá ñayivi ñasanduu sanahá ndivaha. Ña ñacaja mé á quéa najácuun ndeé ndivaha javi já ñaxihí ndihi ñayivi quini cán. Ta in túhún ña naní Noé xihín ndíhusa ña vehe da najácau a. Najácau Ndióxi Noé jáchi ñacandúsa da mé á ta najácahan ña ñayivi ña ná caja vaha na.

⁶ Ta quiahva já najándihi ri Ndióxi sahá ñayivi ñasanduu ñuu Sodoma xihín ñuu Gomorra. Ñachicaan ñuhu a ña janda quiahva ñanduu na yaa uun. Ñacaja Ndióxi ña yóho já ná cuni ñayivi vaxi chága chí nuu ña quiahva já caja Ndióxi jándihi a sahá ñayivi quini.

⁷ Joo najácau Ndióxi in ña naní Lot jáchi ñasacu da in ña vaha ta mé Lot yóho ñatahvi ndivaha ini da saha tóco ndihi cuachi ñasacaja ñayivi quini ñasanduu tiempo cán.

⁸ Ndijáá ní quivi ñacacuéha ini Lot cán sahá cuachi ñayivi cán jáchi quini ñasacahan ña ta quini ñasacaja na.

⁹ Ta tá quiahva ñacaja Ndióxi xihín Lot quiahva já cuu caja mé á jácau a ñayivi, ña ndíquiahva mé ndáha mé á. Ta chindeé a ña tá casahá ndóho ini na. Joo sácú xoo mé á ñayivi quini já ná canduu xoo na candati na xinu quivi caja vii a sahá cuachi na.

¹⁰ Mé Ndióxi jándoho a ini tóco ndihi na catóo caja ña xica ini yiquí cuñu na jáchi cándají ña caja na ña sáhdá Ndióxi nu ná. Cúu ná ña ñihi ini ta ni co sáhní ña mé ná ta ni co yíhvi ña canahá ña xihín ña ndójo chuun náhnu

¹¹ Jáchi ni mé tátó Ndióxi, ña ndúu nu ín mé á vatí ín chága ndeé ná a juú ga ñayivi, ña canahá xihín mé ña ndójo chuun cán. Joo co sáhan ndeé ini mé tátó Ndióxi chícaan ña cháhan jatá ña náhnu sáhdá chuun cán.

¹² Joo ñayivi quini jan cúu ná tátuhun quíti, rí co xini túni. Ñacacu rí ñuyivi yóho ta tiiñ táhan rí ta sáhní táhan rí. Ta quiahva já cája ña cán jáchi cája na ndá ña xinu ini na caja na ta cáhan núu na sahá ñaha, ña co cánda ini na saha. Ta tá quiahva xihí quíti

já quivi na cán.

13 Tá quiahva jándoho na ini ñayivi quiahva já ndoho ini mé ná. Cáhán na ña ndató ndivaha ndúu na jáchi tá yéhe candii xíca nuu na cája na ña núu. Ta tá ndúu na xihín ndó in víco cátóo na ndítati na, chínuú cácahan nuu ndó quéa cája na. Cájii ndivaha ini na xihín ña cája na joo jándahvi uun na mé ná.

14 Ta tá xíní uun na najihí ivi laá cásahá cáhvi núu ini na xihín ná. Chí co cánaá loho na cája na cuachi. Ta jándahvi na na coo ndacu cuahan íchi cuéntá Ndióxi ta xíní vaha na ndaja caja na quehe na ña cúní na. Na jan cúu ná ñayivi natavi cháhan jata, na cuhun indayá.

15 Mé na jan nandiñuhú na jáchi najándacoo na íchi cuéntá ña ndaa. Cája na tá quiahva nacaja da naní Balaam, jahyi Beor sanahá, da nacacúni ñehe cuahá jihún jata ña núu nacaja da.

16 Joo nanani da sahá cuachi da nacaja in búrró jíhí jáchi tá quiahva cáhan ñayivi quiahva já nacahan rí cán xihín dá ta nasaji nuu rí nu dá ña ná a cája ga da ña núu.

17 Tóco ndihi ta, na jánaha ña tuhún yóho cúu ná tátuhun chicoho nuú co ñúhu ticuú jáchi coo chuun na. Ta cúu ná tátuhun víco jácuico táchi xoo nu cúní a ta viti ña ñehe ná quéa cuhun na coo na nuú naá yávi anda ama cáa quivi.

18 Jáchi tuhún cáhan na cúu á ña jándindita jíco na mé ná xihín joo tóco ndihi ña cáhan na cúu á ña coo saha. Ta xihín ña núu, ña xíca ini yiquí cuñu na caja, xihín ña jan jándahvi na na jacá nacaxoo nuú cuachi.

19 Mé na jánaha ña tuhún yóho jácahan ná ñayivi ña núná nu ná caja na ña cúní mé va na. Joo mé na cán cúu ná tátuhun mozo nuú cuachi jáchi cómí tá cómí cuachi cuéntá saha ná. Núhu ñayivi ndahá ña tén ñahá jáchi sáhdá a chuun nu ná.

20 Ta ndá ñayivi nacaxoo nuú ña núu ñuyíví yóho sahá ña nacandaa ini na yo cúu Jesucristo, xitoho í, mé á jacacu mí joo tá nandihí cásahá tucu na cája na ña núu ta ndíquiahva na mé ná ndáha ña núu cán já quéa ndiquini chága ví na a juú ga tá cámaní ndiquehe na íchi cuéntá Jesús.

21 Janda vaha chága ná a ndíhví na íchi

cuéntá Jesucristo, nduu. Jáchi a váha toho tá sa xíní na ña cúu á ña yíi ña nasahan Ndióxi nu ná ta tá nandihí já jándacoo na ña.

22 Joo xihín ña cája na yóho xínu nuú tuhún ña cáchi: “Ndíco coo tucu tina sáxí rí ña sa nandusa rí. Ta cóchí, rí jacá nandihí najácuchu na ndíco coo tucu rí chiníhni rí mé rí nuú ndahyi.”

3

Vaxi tucu Jesucristo, xitoho í

1 Candehé ndo, ñani máni. Xihín ña yóho xínu carta ivi chindahá i nu ndo. Ta nu ndíví carta ndícani i nu ndo ndá quéa ndítahan caja ndó já ná ndícani ini ndó ndinuhu ña vaha.

2 Ndítahan ndicuhun ini ndó ña nacachi na profeta yíi Ndióxi sanahá ta ndítahan ndicuhun ini ndó ña nacachi Jesucristo, xitoho í, mé á jacacu mí jáchi cúu á ña najánaha na apóstol nu ndo.

3 Nu cuítí cúní ña ná candaa ini ndó ña tá sa nacayati quíví quixi tucu Jesucristo já queta ñayivi ta casahá na cuacu ndaa na tóco ndihi ña yíi cuéntá Ndióxi. Ta caja na tóco ndihi ña núu, ña xíca ini yiquí cuñu na caja.

4 Ta casahá na ndaca tuhún ichi na já cachi na já: “Nasahan Jesucristo tuhún a quixi tucu a ta ndá cuéntá quéa a ñaha quixi a. Jáchi janda tá nasatacu tásahnu jíco yo, tá cáa ñuyíví yóho anda saha já cáa yíi va.”

5 Ta cachi na ña yóho jáchi co cúní na candúsa na ña sa janda sanahá ndivaha va nacahan Ndióxi ta já nacavaha indiví xihín ñuyíví. Ta mé Ndióxi quéa nasahnda chuun ña ná ndinuna ticuú cán já ná canáha nuú ñundáhyi ta ín ticuú tóco ndihi xoo ñundáhyi viti.

6 Ta xihín ticuú najánaa a saha ñayivi ñuyíví sanahá tá najácuun mé á javi quíni.

7 Joo indiví xihín ñuyíví ña ín viti yóho, ndúu a ndátí a xínu quíví chacaan ñúhu Ndióxi ña já ná ndihi sahá. Cája Ndióxi ña yóho já ná ndoho ini ñayivi quini cán ta jándihí a saha ná quíví caja víi Ndióxi sahá ñayivi quini cán.

8 Ta viti candehé ndo, ñani maní i. In quíví cúu á tátuhun in mil cuia nu Ndióxi

ta in mil cuja cúu á tátuhun in quivi nu Ndióxi. A ndíndójó ndó ña yóho.

⁹ A cáhán ndo ña cácuáchi Jesús jáxi nu coo a nuú tuhun a tá nacachi a ña quixi tucu a tá quiahva cáhán java na. Joo a ñaha quixi Jesucristo jáchi táhvi ndivaha ini mé á sahá ñayivi. Ta co cúní mé á ña ná cuhun ni in túhún na indayá ndihi saha ná. Ña cúní mé á queá ná ndicó coo ini na ña ná jándacoo na cuachi cája na.

¹⁰ Mé quivi co cáhán na quixi Jesucristo já quixi mé á. Tá quiahva cája ta cuíhná tá xínu coo da ñuú ta ni in na co xíní na ña xínu da cája cuíhná da ñaha na quiahva já coo nuú quixi ri Jesucristo va. Ta mé quivi cán in cuití cuni johó ñayivi nihi ndivaha indivi ta já casáha ña nditaní a. Ta já cayi ñuyíví yóho xihín tóco ndihi ñaha ín nu á. Ta já cayi ñaha ndúu nu táchi indivi ta ndihi saha tóco ndihi ñaha.

¹¹ Mé a ndaa vaxi quivi coo tóco ndihi ña yóho sahá ña cán queá ndítahan nu ndó caca vaha ndó íchi cuéntá Ndióxi ta caja ndó ña cúní mé á xihín ndinuhu ini ndó.

¹² Candati ndó xínu quivi quixi tucu Jesucristo ñuyíví yóho. Ta nducú ndéé ndo cája chúun ndó cuéntá mé á já ná xínu yachi quivi cán. Tá ná xínu quivi cán já jándihi Ndióxi sahá indivi xihín ñúhu ita. Ta tóco ndihi ñuyíví jándutu mé á ña xihín ñúhu cáyi.

¹³ Joo mí, yó cúu cuéntá Jesús ndátí inga indivi saá xihín in ñuyíví saá jáchi nasahan Ndióxi tuhun a nu yo ña quiahva ña nu yo. Ta cán tóco ndihi ñaha cacuu a ña vaha ta ndinuhu ña ndaa coo cán.

¹⁴ Ñani i, quíhvi ndivaha ini i ndohó sahá ña cán queá cáhan i ña yóho xihín ndo. Nani cámaní xínu quivi caja Ndióxi tóco ndihi ña cán, ndítahan ndihi ini ndó caja ndó ña vaha já queá ná cuni Ndióxi ña ín vaha ini ndó xihín mé á ta já ná cuni a ña coo cuachi ndó.

¹⁵ Ta a ndíndójó ndo ña ndátí yíi Jesucristo quixi tucu a ñuyíví yóho jáchi táhvi ndivaha ini mé á saha yo ta cúní a jácacu a mí. Ta tá quiahva cáhyí yehe nu ndo yóho quiahva já nacahyí ri ñani máni yo, da cúu Pablo carta nachindahá da nu ndo jáchi nacaja Ndióxi ña ná candaa ini da cán ña cúní mé á.

¹⁶ Nu tóco ndihi carta nacahyí Pablo nu ndo cáhan da xihín ndo saha tóco ndihi ña yóho. Java ña yóho cúu á ña yáncá ndivaha cándaá ini saha. Ta na co cándaá ini xihín na co cándeé vaha ini Ndióxi nacasáha ndíjama na ña nacahyí da. Quiahva já cája na ndíjama na java ga ña cáchi tuhun Ndióxi joo ndihi saha tóco ndihi na cán.

¹⁷ Candehé ndo, ñani maní i. Sahá ña sa xíní vaha ndó saha tóco ndihi ña nandicaní i nu ndo yóho, xíní ñúhú candaa vaha ndó mé ndó já ná a jándahvi ñayivi quini ndohó já ná a ndácava ndó nuú cuachi vatí cuahan vaha ndó íchi cuéntá Ndióxi viti.

¹⁸ Xíní ñúhú candaa vaha chága ini ndó yo cúu Jesucristo, xitoho í jáchi mé á queá jácacu mí. Ta xíní ñúhú candaa vaha chága ini ndó ña cája Ndióxi cuahá ñamaní xohó. Cáhnu ná cacuu Jesucristo anda ama cáa quivi. Já ná coo.

Carta nu cuití nacañyí Juan nuú na cúu cuéntá Jesús

Cáxi tuhun Juan nuú ñayivi sahá Jesucristo

¹ Cáhyí nde carta yóho nu ndó sahá Jesucristo, mé á nasahin janda tá cámaní cava sahá saha ñuyiví. Mé nde naxini johó nde ña nacañan mé á ta chí naxini xihín nuú nde mé á. Nasandehé nde a ta nacani ndaa ndahá nde a. Cáhan nde sahá Jesucristo mé á cúu tuhun Ndióxi, ña cája ña ná catacu ñayivi anda ama cáa quivi.

² Najánañha mé á nuú ñayivi ta mé nde naxini nde a sahá ña cán quea cáxi tuhun nde nuú ñayivi saha mé á. Ta ndícani nde nu mé ndó viti saha Jesucristo, mé á sa janda ama cáa quivi ín a xihín Ndióxi, tátá a ta co ndíhi toho sahá. Viti naquixi a najánañha mé á nu yo.

³ Ta cáxi tuhun nde nu ndo ña naxini nde xihín ña naxini johó nde já ná cuu in canduu ndó xihín mé nde. Jáchi in nanduu yó xihín Ndióxi, tátá yo ta xihín Jesucristo, mé a cúu in túhún jiní já jahyi Ndióxi.

⁴ Ta cáhyí nde ña yóho nu ndo já ná ndicutú ndaa ínima yo xihín ña cajii ín yo.

Jándiyehé ndaa Ndióxi nu ín a

⁵ Ña najánañha Jesucristo nuú nde cúu á ña jánañha nde nu ndó viti: Jándiyehé ndaa Ndióxi nu ín a ta ni loho ña naá co ín nu ín mé á.

⁶ Tá ná cachi yó ña in nanduú xihín Jesucristo nani cája í cuachi já quea cúu á tátuhun ndúu yii yó nuú naá jáchi catúhún yo ta co cája í ña ndaa.

⁷ Joo tá ndúu yó nu yéhe tá quiahva ín Ndióxi nuú ña yéhe já quea in nduu ndihí. Ta Jesucristo, mé a cúu in túhún jiní já jahyi Ndióxi jándoo ndihi a cuachí jáchi naxita nii á saha yo tá naxihí a ndica crúxu.

⁸ Ta tá ná cachi yó ña coó toho cuachi cája í já quea jándahví mé ví ta co ndacaan ña ndaa ín.

⁹ Joo tá ná nahma yó cuachí nu Ndióxi já quea cuu candee ín ña cája ndaa Ndióxi

xihín yo jáchi caja cáhnu ini a sahá cuachí ta ndaja vií a mí nu tóco ndihi ña núu.

¹⁰ Joo tá ná cachí ña ni in túhún toho cuachi coo nacaña í já quea ndája túhún yo Ndióxi ta xihín ña yóho náha ña mé a ndaa táhyí coo nandiquehe vaha í tuhun vaha cáhan saha mé á.

2

Jesucristo quea cáhan cuachí a saha yó nu Ndióxi

¹ Candehé ndó. Mé ndó cúu ndó tátuhun jahyi válí i ta cáhyí i ña yóho nu ndo ña ná a cája ndó cuachi. Ta vatí ná caja ndó cuachi joo ín Jesucristo cáhan cuachí a saha yó nu Ndióxi, tátá a. Ta cája mé á ña ndaa cuití va.

² Jáchi nacañvi Jesucristo sahá cuachí tá naxihí a ndica crúxu. Já quea xihín ña yóho cuu caja cáhnu ini Ndióxi sahá cuachí. Ta a juú sahá cuachi mé cuití yo, vaha jáchi naxihí rí a sahá cuachi ndaja táhan na ndúu ñuyiví.

³ Jáchi tá cája í ña sáhdá Ndióxi já quea náha ña mé a ndaa táhyí xini yo mé á.

⁴ Joo tá cachí in na ña xini na Ndióxi nani co cája na ña sáhdá mé á já quea cúu ná na túhún ta co ndacaan ña ndaa ín na.

⁵ Joo na cája ña sáhdá Ndióxi, náha ña mé a ndaa táhyí quihvi ini na mé á ta xihín ña yóho cándañ ini yó ña in nanduu na xihín mé á.

⁶ Ta ndá na cachí ña in nanduu na xihín Ndióxi, xini ñuhú caja na tá quiahva nacaña Jesucristo tá nasahin a ñuyiví yóho.

Sáhdá Ndióxi chuun ña ná quihvi ini táhan í

⁷ Candehé ndó ñani i, na cúu cuéntá Jesús. Co cáhyí i nu ndó in chuun saá ña nasahnda Ndióxi caja ndó. Cúu á mé chuun natahnda nu ndó caja ndó janda mé saha tá nandihvi ndó ichi cuéntá Jesús. Ta cúu á ña sa naxini johó ndó anda mé cán.

⁸ Joo mé a ndaa ña cáhyí i yóho cúu á chuun saá jáchi sáhdá Ndióxi ña ná quihvi ini táhan í. Ta tá cája í ña sáhdá Ndióxi já quea quee ndihi ña naá cuañan ta mé a ndaa jándiyehé Jesucristo ínima yo jáchi quihvi ini táhan í tá quiahva nacaña mé á.

⁹ Ta ndá na ná cachi ña sa nandiyehé ínima ná nacaña Jesucristo nani cándají na

ñani na, na cúu cuénta Jesús já quea cuni cachi a ña ndúu yii ná nuú naá ndivaha.

¹⁰ Ta ndá na quíhvi ndusa ini ñani na já quea cuni cachi a ña mé a ndaa jándiyehé Jesucristo ínimá ná ta ni in ñaha a cúu caja ña ná ndacava na nuú cuachi.

¹¹ Joo ndá na cándají ñani na já quea ndúu na nuú naá ta xica na nuú naá yáve. Ta ni co xini na ndáchí xica na jáchi cúu ná tátuhun na cuaá jáchi ndúu na nuú naá.

¹² Mé ndó cúu ndó tátuhun jahyi i ta cáhyi i carta yóho nu ndo jáchi sahá ña nacaja Jesucristo nacaja cáhnu ini Ndióxi sahá cuachi.

¹³ Ta cáhyi i carta yóho nu ndó, nataa, na cúu tátá jáchi nacandaa ini ndó sahá Jesucristo, mé a sa íin janda tá nacava sahá saha ñuyívi. Ta cáhyi ri carta yóho nu ndó, ta yúta jáchi nacandee ndó nasahnu ndó nuú tiñahá sacuaaha.

Candehé ndo. Mé ndó cúu ndó tátuhun jahyi i ta cáhyi i carta yóho nu ndo jáchi nacandaa ini ndó yo cúu Ndióxi, tátá yo.

¹⁴ Ta cáhyi ri carta yóho nu ndó, na cúu tátá jáchi nacandaa ini ndó sahá Jesucristo, mé a sa íin janda tá nacava sahá saha ñuyívi. Ta cáhyi ri carta yóho nu ndó, ta yúta jáchi sahan ndee ini ndó ta ndacaan tuhun Ndióxi ini ínimá ndo ta nacandee ndó nasahnu ndó nuú tiñahá sacuaaha.

¹⁵ Ta coto a cátóo ndó ña cúu cuénta ñuyívi yóho ta ni a ndiáva ini ndo cacomí ndó ña ndúu ñuyívi yóho. Jáchi ndá na cuni ñaha ñuyívi yóho já quea cuni cachi a ña co cuni na Ndióxi, tátá yo.

¹⁶ Jáchi ni in ña núu ndúu ñuyívi yóho coo vaxi a cuénta Ndióxi, tátá yo. Ta ña yóho cúu á ña a váha toho cáhvi ini ñayivi caja na ta jári ndiáva ini na cacomí na ña xini na xihín nuú ná ta jári ndiñehe jícó ndivaha na mé ná sahá ña cómi na. Ndijáa ña yóho cúu á ña núu quíxi mé ñuyívi yóho.

¹⁷ Vaxi quívi ndihi saha tóco ndihi ña ndiáva ini ñayivi ta janda mé ñuyívi yóho ndihi sahá joo ndá na cája ña sáhdá Ndióxi, na cán cúu na catacu nu íin mé á anda ama cáa quívi.

Na co cuni táhan xihín Jesucristo

¹⁸ Candehé ndo jáchi cúu ndó tátuhun jahyi i. Jalóho cuni ndihi saha ñuyívi ta sa

xini johó ndó sahá in da vaxi caja ihvi xihín Jesucristo. Ta mé tiempo yóho sa naqueta cuahá na co cuni táhan xihín mé á. Sahá ña yóho sa cándaa ini yó ña sa nacayati quívi ndihi sahá ñuyívi yóho.

¹⁹ Mé na co cuni táhan xihín Jesucristo yóho nasañúhu na tañu mí. Joo a juú toho na cuénta mí nasacuu na. Jáchi tá ná cacuu na cuénta mí já canduu na tañu mí, nduu. Joo naqueta na cuahan na já ná ñaha ña mé a ndaa co cúu ná cuénta mí.

²⁰ Joo nu mé ndó nasahan Jesucristo ínimá yii mé á sahá ña cán quea tóco ndihi ndó cúu ndó ñayivi xini ña ndaa.

²¹ Tá cáhyi i carta yóho nu ndo, co cúu á sahá ña co xini ndó ña ndaa. Joo cúu á sahá ña sa xini ndó ña ndaa ta sa xini ndo ña ni in túhún ña tuhún a cúu quíxi tañu ña ndaa.

²² Na tuhún cúu ná na co cuni ndicuni ña cúu Jesucristo mé á nachindahá Ndióxi jácacu a ñayivi. Mé na tuhún yóho cúu ná na co cuni táhan xihín Jesucristo jáchi co cuni na ndicuni na Ndióxi, tátá yo ta ni co cuni na ndicuni na Jesucristo, mé a cúu in túhún jini já jahyi Ndióxi.

²³ Jáchi ndá na chíjehé tuhun ña xini na Jesucristo, jahyi Ndióxi já cuni cachi a ña coo in nanduu na xihín Ndióxi, tátá yo. Joo na cuahan xoo Jesucristo, jahyi Ndióxi in nanduu na xihín Ndióxi, tátá yo.

²⁴ Sahá ña cán quea xini ñuhú cacu vaha ndó tuhun Ndióxi ini ínimá ndó, jáchi cúu á ña naxini johó ndó janda mé saha tá nandiquehe ndó íchi cuénta Jesús. Ta tá mé a ndaa ndicaan ña naxini johó ndó ini ínimá ndo já quea anda ama cáa quívi in nduu ndó xihín Ndióxi, tátá yo ta in nduu ndó xihín Jesucristo, mé a cúu in túhún jini já jahyi Ndióxi.

²⁵ Ta nasahan Jesucristo tuhun a nu yo ña catacu xihín mé á anda ama cáa quívi.

²⁶ Cáhyi i ña yóho nu ndo já ná candaa ini ndó sahá na cuni jándahvi ndohó.

²⁷ Joo ndacaan ínimá yii Ndióxi ini ndó, mé a nasahan Jesucristo nu ndo. Sahá ña cán quea co xini ñuhú toho ndó inga na jánaha na ndohó jáchi mé ínimá yii Ndióxi, ña ndacaan ini ndó jan jánaha tóco ndihi ñaha nu ndo. Ta ña jánaha mé á nu ndó cúu á ña ndaa ta co cúu á ña tuhún. Sahá

ñā cān quēa xíní ñúhú catáhan tuun ndó xihín Jesucristo tá quiahva sácaja ndó jáchi quiahva já najánaḥa ínimā yíi Ndióxi nu ndo.

²⁸ Candehé ndo jáchi cúu ndó tátuhun jahyi i. Xíní ñúhú catáhan tuun í xihín Jesucristo já ná cuu candeeé iní mé á tá ná canáḥa mé á quixi a ta já ná a cácahan nuu yo tá ná cuní mé á.

²⁹ Mé ndó sa cándaḥa ini ndó ñā cája Jesucristo ndinuhu ñā ndaa cuití va. Ta tá cája mé ndó ñā ndaa já quēa jánaḥa ndó ñā mé a ndaa cúu ndó jahyi Ndióxi.

3

Nā cúu jahyi Ndióxi

¹ Candehé ndó. A juú quiahva quíhvi ini Ndióxi, tátá yo mí anda nasahan ñamani nu yo cananí yo jahyi Ndióxi ta mé a ndaa cúu yó jahyi mé á. Joo ñayivi ñuyíví co xíní na Ndióxi sahá ñā cān quēa co ndícuni na ñā cúu yó jahyi mé á.

² Candehé ndo, ñani máni, na cúu cuéntá Jesús. Sa cúu yó jahyi Ndióxi vatí viti ñúhú co cándaḥa iní ndá quiahva nduú. Joo cándaḥa vaha iní ñā tá ná quixi Jesucristo já nduú tá quiahva cáa mé á jáchi cuní mé á tá quiahva cáa tá ín a.

³ Ta tóco ndihi na ndáti nduu na tá quiahva cáa mé á já quēa ndaja vií na mé ná jáchi cuní na coo vií na tá quiahva ín vií Jesucristo.

⁴ Tóco ndihi na cája cuachi sáhnú na nu ley Ndióxi jáchi tóco ndihi ñā núu cúu á cuachi nu ley Ndióxi.

⁵ Mé ndó sa cándaḥa ini ndó ñā naquixi Jesucristo ñuyíví yóho ta naxihí a já ná cuu ndoo cuachi ñayivi. Ta coo ni in túhún toho cuachi mé á.

⁶ Sahá ñā cān quēa tóco ndihi na cātivi tuun xihín mé á co xíca nuu ga na cája na cuachi. Joo na xíca cája cuachi jánaḥa na ñā co xíní toho na mé á ta jánaḥa na ñā co cúu na cuéntá mé á.

⁷ Candehé ndó jáchi cúu ndó tátuhun jahyi i. Cuéntá coo ndó ná a jándahvi ni in na ndohó. Jáchi ñayivi ndaa cája ndaa na tá quiahva cája Jesucristo.

⁸ Joo na xíca nuu cája cuachi cúu ná cuéntá tiñáhá sacuaḥa jáchi janda mé saḥa

nacaja rí cuachi. Sahá ñā cān quēa naxinu Jesucristo ñuyíví yóho, mé á cúu in túhún jini já jahyi Ndióxi ta naquixi a jándihi a sahá ñā núu cája tiñáhá sacuaḥa.

⁹ Ni in túhún toho na cúu jahyi Ndióxi co xíca na cája na cuachi jáchi viti nanduu na tá quiahva ín mé á. Ta co cuní ga na caca nuu na cája na cuachi jáchi cúu ná jahyi Ndióxi.

¹⁰ A íhvi toho ndicuní ndá na cúu jahyi Ndióxi ta ndá na cúu jahyi tiñáhá sacuaḥa. Jáchi na co cája ñā ndaa ta na co quíhvi ini ñani táhan na cān cúu ná jánaḥa ñā co cúu ná cuéntá Ndióxi.

Ndítahan nu yo quíhvi ini táhan í

¹¹ Janda mé saḥa tá nandiquehe ndó íchi cuéntá Jesús já naxini johó ndó ñā cáchí tuhun Ndióxi ñā ndítahan quíhvi ini táhan í.

¹² Co ndítahan cája í tá quiahva nacaja Caín sanahá jáchi nasacuu da cuéntá tiñáhá sacuaḥa. Ta nasahní da ñani da jáchi mé Caín nasacaja da ñā núu cuití va ta nandicuni da ñā vaha cuití va nasacaja ñani da.

¹³ Candehé ndó, ñani mí i, na cúu cuéntá Jesús. A cātontó ndo tá cándají ñayivi ñuyíví ndohó.

¹⁴ Tá quíhvi iní na cúu cuéntá Jesús já quēa sa xíní yo sa najácaacu mé á mí ná a cūhun toho í indayá joo cūhun í coo í nu ín mé á indiví. Joo ndá na co quíhvi ini ñani táhan na, cúu ná tátuhun in ndii.

¹⁵ Ta tóco ndihi na cándají ñani táhan cúu ná tátuhun in na sáhní ndii jáchi sáhní na ñani táhan na iní ínimā na. Ta mé ndó sa cándaḥa ini ndó ñā ni in na sáhní ndii co núná nu ná cūhun na indiví catacu na anda ama cáa quívi.

¹⁶ Mé Jesucristo najánaḥa nu yo ndá quiahva cája ndusa in na quíhvi ini ñani táhan jáchi naxihí a saḥa yo. Quiahva já ndítahan ri nu mí ví coo tiaḥva í quívi sahá ñani táhan í, na cúu cuéntá Jesús.

¹⁷ Joo tá ín in na ta ín cuahá ndivaha ñaha nu ná ta co cuní na chindeeé na na cúu cuéntá Jesús, na ndímaní ñaha nuu já quēa a cuú cachi na ñā quíhvi ini na Ndióxi.

¹⁸ Mé ndó cúu ndó tátuhun jahyi i sahá ñā cān quēa cáhan i xihín ndo ñā xíní ñúhú jánaḥa yó xihín ñā cája í ñā quíhvi ini ñani

táhan í ta a juú xihín yuhú ninu uun í cuití va.

Cō ndítahan cayihví yo Ndióxi tá cája í ña sáhndá a

¹⁹ Tá cája í ña ndaa, ña cúní Ndióxi já quéa cánda a ini ña cúu yó cuéntá mé á ta íin vaha ini xihín mé á.

²⁰ Ta vatí cáhvi ini ña coó nacaja vaha í joo xini vaha chága Ndióxi á mé a ndaa nacaja núu í á coó a jáchi xini mé á tóco ndihi ñaha.

²¹ Candeheé ndó ñani máni, na cúu cuéntá Jesús. Tá xini vaha í ña ndácaan ña vaha ínimá yo já quéa co yihví toho í cahan í xihín á.

²² Ta mé Ndióxi quéa quiahva tóco ndihi ña xica yó nu á jáchi mé a ndaa cája í ña sáhndá a nu yo ta cáji ini mé á xihín ña cája í.

²³ Ta ña sáhndá Ndióxi nu yo cúu á ña ná candeé ini Jesucristo, mé a cúu in túhún jini já jahyi mé á. Ta sáhndá a nu yo ña ná quihvi ini táhan í tá quiahva natahnda chuun nu yó caja í.

²⁴ Ta na cája ña sáhndá Ndióxi in nanduu na xihín mé á ta in nanduu mé á xihín na. Ta sahá ña nasacu Ndióxi ínimá yii mé á ini in in í sahá ña cán quéa náha ña in nanduu yó xihín mé á.

4

Ínimá yii Ndióxi co ndíque táhan xihín ínimá quini ña ndácaan ini na co cúní táhan xihín Jesucristo

¹ Candeheé ndo, ñani mí i, na cúu cuéntá Jesús. A cándusa ndó tóco ndihi na cáchi ña cúu ná cuéntá Ndióxi jáchi cuaha ná cúu ná na túhún. Ña xini ñuhú caja ndó quéa coto ndojó ndó na já ná canda a ini ndó á mé a ndaa ndácaan ínimá yii Ndióxi ini na á coó a. Jáchi cuahá ndivaha na túhún nandicuita nuu na ñuyiví yóho jándahvi na ñayivi vatí cáchi na cahan na cuéntá Ndióxi.

² Xihín ña yóho cuu canda a ini ndó ndá na cúu na ñuhu ínimá yii Ndióxi ini jáchi tóco ndihi na cándusa ña nanduu Jesucristo in ñayivi ñuyiví yóho na cán cúu ná na ñuhu ínimá yii Ndióxi ini.

³ Joo na co cándusa ña nanduu Jesucristo in ñayivi ñuyiví yóho, na cán cúu ná na co

ñuhu ínimá yii Ndióxi ini jáchi ña ndácaan ini na cán cúu ínimá quini, ña co cúní táhan xihín Jesucristo. Sa naxini johó ndó ña quixi tá quixi mé ínimá quini, ña co cúní táhan xihín Jesucristo ta sa íin a ñuyiví yóho viti.

⁴ Candeheé ndo jáchi cúu ndó tátuhun jahyi i ta cúu ndó cuéntá Ndióxi. Nacandeé ndó nasahnu ndó nuú na jána ha ña túhún jan jáchi tóyí chága ínimá yii Ndióxi ndácaan ínimá ndo a juú ga ínimá quini ndácaan ínimá ñayivi ñuyiví.

⁵ Mé na jan cúu ná cuéntá ña núu ñuyiví yóho ta ñaha ñuyiví yóho cuití cahan na saha. Ta ñayivi ñuyiví táa johó na ña cahan na.

⁶ Joo mí cúu yó cuéntá Ndióxi. Sahá ña cán quéa na cúu cuéntá Ndióxi xini johó na ña cahan yo. Joo na co cúu cuéntá Ndióxi co xini johó na ña cahan yo. Ta xihín ña yóho cuu ndicuní ndá na cúu na ndácaan ínimá yii Ndióxi ini ta ndá na cúu na ndácaan ínimá quini ini. Jáchi ña ndaa cúu ínimá yii Ndióxi ta ínimá quini cúu á ña túhún.

Quihvi ini ndusa Ndióxi ñayivi

⁷ Candeheé ndo, ñani máni, na cúu cuéntá Jesús. Xini ñuhú quihvi ini táhan í jáchi ña yóho quixi a cuéntá Ndióxi. Tóco ndihi na quihvi ini ñani táhan cúu ná jahyi Ndióxi ta xini na yo cúu Ndióxi.

⁸ Na co quihvi ini ñani táhan jána ha na ña co xini na Ndióxi jáchi Ndióxi quéa sahan nu yo ña ná quihvi ini táhan í.

⁹ Ta nachindahá Ndióxi Jesucristo, mé in túhún jini já jahyi a ñuyiví yóho ña ná quivi a saha yo já ná catacú anda ama cáa quivi. Xihín ña yóho najána ha Ndióxi ndá quiahva quihvi ini a mí.

¹⁰ Candeheé ndo ndá quiahva quihvi ini Ndióxi mí. A juú jihna ñuhú mí naquihvi ini Ndióxi jáchi jihna ñuhú ga Ndióxi naquihvi ini a mí. Ta nachindahá a Jesucristo, mé in túhún jini já jahyi a ña ná chahvi mé Jesús sahá ndihi cuachí tá naxihi a ndica crúxu.

¹¹ Candeheé ndo, ñani máni, na cúu cuéntá Jesús. Tá ta quiahva johó nacaja Ndióxi sahá ña quihvi ini a mí já quéa ndítahan ri nu mí ví quihvi ini táhan í.

12 Ni in ñayivi coó naxini xihín nuu ná Ndióxi. Joo ñúhú mé á iní tá quíhvi ini táhan í. Ta xihín ña yóho jáxinu coo í ña quíhvi ndusa iní ñani táhan í.

13 Ta sahá ña nasacu Ndióxi ínimá yii mé á ini in in yó sahá ña cán queá náha ña in nanduú xihín mé á ta in nanduú mé á xihín yó.

14 Ta mé nde naxini nde a xihín nuu nde ta cáxi tuhun nde xihín ndaja táhan ñayivi ña nachindahá Ndióxi, tátá yo Jesucristo, mé a cúu in túhún jini já jahyi a ña ná jácacu a ndaja táhan na ndúu ñuyívi.

15 Ndá na cándúsa ña cúu Jesucristo in túhún jini já jahyi Ndióxi, na jan cúu na in nanduú xihín Ndióxi ta in nanduú Ndióxi xihín ná.

16 Ta viti sa nacandaa iní ta cándúsa í ña mé a ndaa quíhvi ini Ndióxi mí. Ta ndá na quíhvi ini Ndióxi já in nanduú na xihín Ndióxi ta in nanduú Ndióxi xihín ná.

17 Ta xihín ña yóho jáxinu coo í ña quíhvi iní ñani táhan í xihín ndinuhu iní. Sahá ña cán queá tá ná xinu coo quívi caja vii Ndióxi sahá ñayivi já queá a cácan nuu yo tá candichí nu Ndióxi. Jáchi tá quiahva nasacaja Jesucristo tá nasahin a ñuyívi yóho quiahva já cája í viti.

18 Mé a ndaa quíhvi ini Ndióxi mí ña cán queá co yíhvi toho í mé á. Jáchi tá ná cahán yo jándoho Ndióxi iní já queá cayihvi yo mé á. Joo tá ná candaa vaha iní ña mé a ndaa quíhvi ndusa ini Ndióxi mí já queá a cáyihvi toho í mé á. Ña cán queá tá yíhvi yo mé á já queá co xini yo ña quíhvi ndusa ini a mí.

19 Quíhvi ini Ndióxi jáchi jihna ñúhú ga mé á naquíhvi ini a mí.

20 Joo tá in in na ta cáchi na quíhvi ini na Ndióxi joo cándají na ñani táhan na já queá jánaha na ña cúu ná na tuhún. Jáchi tá co quíhvi ini na ñani táhan na, da sándehe na xihín nuu ná ndaja caja na cachi na quíhvi ini na Ndióxi, ña a cúu cuni tívi na.

21 Nasahnda Jesucristo chuun yóho nu yo: Ndá na quíhvi ini Ndióxi já ndítahan nu ná quíhvi ri ini na ñani táhan na viti.

5

Ndaja caja í quee vaha í xihín ña núu ndúu ñuyívi yóho

1 Tóco ndihi na cándúsa ña cúu Jesús mé á nachindahá Ndióxi cacomí a cuénta sahá ñayivi, na jan cúu ndusa jahyi Ndióxi. Ta ndá na quíhvi ini Ndióxi, tátá yo, xini ñúhú quíhvi ri ini na tóco ndihi na cúu jahyi mé á.

2 Tá quíhvi ini Ndióxi ta tá cája í ña sáhdá mé á nu yó caja í, xihín ña yóho cándaa cáxi iní ña quíhvi ini na cúu jahyi Ndióxi.

3 Ta na cája ña sáhdá Ndióxi, na cán cúu na jánaha ña mé a ndaa táhyi quíhvi ini na mé á ta chuun sáhdá mé á nu yo co cúu á in ñaha ña a cúu candeé yó xihín.

4 Ta tóco ndihi na cúu ndusa jahyi Ndióxi candeé na sáhnú na nuú ña núu ñuyívi yóho. Sahá ña cán queá tá candeé iní Jesucristo já queá quee vaha í xihín ña núu ndúu ñuyívi yóho.

5 Ndá na cándúsa ña cúu Jesucristo in túhún jini já jahyi Ndióxi, na cán cúu na candeé sáhnú nuú ña núu ndúu ñuyívi yóho.

Sáhan ínimá yii Ndióxi tuhun sahá Jesús ña cúu á in túhún jini já jahyi Ndióxi

6 Tá naquixi Jesucristo ñuyívi yóho já nacandúta mé á xihín ticuí. Ta jári naxita nii á tá naxihí a ndica crúxu saha yo. Nacaja Jesucristo ndívi ña yóho: nacandúta xihín ticuí ta naxita nii á tá naxihí a ndica crúxu. Ta mé ínimá yii Ndióxi sáhan tuhun sahá ña yóho ta ña cáhan mé á cúu á ña ndaa.

7 Ndúu uní testigo indivi ta sáhan tuhun sahá Jesús ña cúu á in túhún jini já jahyi Ndióxi: In testigo cúu Ndióxi, tátá yo ta inga testigo cúu tuhun Ndióxi ta inga testigo cúu ínimá yii Ndióxi. Ta in cúu ndihuni a sáhan tuhun sahá Jesús.

8 Ta ndúu uní testigo ñuyívi yóho. Ta in testigo cúu á ínimá yii Ndióxi ta inga testigo cúu á tá nacandúta Jesús ta testigo cáhuni cúu á tá naxita nii Jesús ndica crúxu. Ta ndihuni testigo yóho sáhan tuhun a sahá Jesús ña cúu á in túhún jini já jahyi Ndióxi.

9 Ín tiaha í cándúsa í ña cáhan ñayivi xihín yo tá sáhan na tuhun sahá in ñaha. Ña cán queá ama ná a cándúsa í ña cáhan Ndióxi xihín yo jáchi ña cája mé á queá sáhan tuhun sahá Jesucristo, jahyi a ta ña yóho cúu á ña ndiyahvi chága a juú ga ña cáhan ñayivi.

¹⁰ Ta tá cándúsa í ña cúu Jesucristo in túhún jini já jahyi Ndióxi já cúu á tátuhun ndiquehe vaha í ña cáchi mé á ini ínimá yo. Joo na co cándúsa ña yóho ndája na ña ná nduu Ndióxi ña tuhún jáchi co cándúsa na ña cáhan mé á sahá Jesucristo, jahyi a.

¹¹ Ta tuhun sahan Ndióxi cúu ña yóho: Nasahan mé á ñamaní catacú anda ama cáa quivi. Ta Jesucristo, jahyi mé á quea caja ña ná catacú indivi anda ama cáa quivi.

¹² Ta ndá na nandiquiahva mé ndáha Jesucristo, mé á cúu in túhún jini já jahyi Ndióxi, na jan cúu na catacu na anda ama cáa quivi nu íin mé á. Joo ndá na coo naxeen ndiquiahva mé ndáha mé á a cúu catacu na anda ama cáa quivi xihin mé á.

Cáhyí chaga Juan sahá ña ndítahan caja í

¹³ Cáhyí í ña yóho nu ndóhó, na cándéé ini Jesucristo, jahyi Ndióxi já ná candaá ini ndó ña catacu ndó indivi anda ama cáa quivi.

¹⁴ Ta co yíhví toho í xíca í nu mé á in ñaha, ña cúní a quiahva nu yo jáchi cándaá cáxí iní ña xini johó a nu cáhan yo.

¹⁵ Ta tá cándaá iní ña xini johó Ndióxi nu cáhan yo já quea cándéé iní ña quiahva tá quiahva mé á ña nu yo.

¹⁶ Tá ná cuni ndó ñani ndó, na cúu cuénta Jesús ta caja na cuachi ña cuu caja cáhnu ini Ndióxi sahá já quea ndítahan caça tahví ndó nu Ndióxi sahá na cán. Ta xihin ña yóho caja cáhnu ini Ndióxi sahá na jan já ná catacu na anda ama cáa quivi. Joo íin cuachi ña cañehe ñahá cuhun indayá ta co ndítahan caça tahví yo nu Ndióxi sahá ña jan.

¹⁷ Tóco ndihi ña núu cája í ñuyiví yóho cúu á cuachi nu Ndióxi joo cuahá ndivaha cuachi cája cáhnu ini Ndióxi saha.

¹⁸ Ta cándaá iní ña tóco ndihi na cúu jahyi Ndióxi co xíca ga na nuú cuachi jáchi ndáa Jesucristo mé ná, mé á cúu in túhún jini já jahyi Ndióxi já ná a caja tiñáhá sacuaḥa ni in ña núu xihin ná.

¹⁹ Cándaa vaha iní ña cómi Ndióxi cuénta saha yo joo tóco ndihi ñayivi cuénta ñuyiví ñuhu na ndahá tiñáhá sacuaḥa ta cómi rí cuénta saha ná.

²⁰ Ta cándaá cáxí iní ña naquixi Jesucristo, mé á cúu jahyi Ndióxi ta najándiyehé a xini túni yo já quea ná candaá iní ña cúu

mé á ña ndaa. Ta viti in nanduú xihin mé á jáchi in nanduú xihin Jesucristo, mé a cúu in túhún jini já jahyi Ndióxi. Mé a yóho cúu ndusa Ndióxi ta cúu á ña cája ña ná catacú anda ama cáa quivi.

²¹ Candehé ndo. Mé ndó cúu ndó tátuhun jahyi í ña cán quea cáhan í ña yóho xihin ndo. Coto a cája cáhnu ndó ni in yoco ta ni a cája cáhnu ndó ni in ñaha tá co cúu á Ndióxi. Já ná coo.

Carta chí ivi nacahyí Juan nuú na cúú cuéntá Jesús

Cáhan Ndióxi Juan xihín na cúú cuéntá Jesús

¹ Yehe cúú ʋ in da sacuahá ta cáhyí i carta yóho nu ndóhó, quiahva i na cúú cuéntá Jesús jáchi nacaxi Ndióxi ndohó. Tá jári cáhyí i carta yóho nuú jahyi ndó jáchi mé a ndaa quíhvi ndivaha ini i ndihi ndó. Ta a juú yehe cuití va jáchi tóco ndihi na nacandaa ini ña ndaa quíhvi ini na ndohó.

² Quíhvi ini i ndohó jáchi ndacaan ña ndaa ini ínimá ndihí ta anda ama cáa quívi coo a xihín yó.

³ Ña cúni quéa ña ná caja Ndióxi, tátá yo xihín Jesucristo, jahyi mé á cuahá ñamani xihín yo. Ta ná tahnda ini mé á saha yó ta ná caja mé á ña ná coo vaha ini. Ta cuu caja mé á ña yóho jáchi cúú á ña ndaa ta quíhvi ini a mí.

⁴ Cáji ndivaha ini i jáchi nanditahan i java jahyi ndó ta cája na ña ndaa tá quiahva nasahnda Ndióxi, tátá yo caja í.

⁵ Candehé ndo quiahva i, na cúú cuéntá Jesús. Xíca tahví i nu ndó ña ná quíhvi ini táhan í. Ta ña cáhyí i yóho coo cúú á chuun saá jáchi cúú á ña sa naxini johó í janda mé saha tá nandiquehé íchi cuéntá Jesús.

⁶ Ta tá mé a ndaa quíhvi ini Ndióxi náha ña mé a ndaa cája í ña sáhnda Ndióxi caja í. Ta ña nasahnda Ndióxi caja í janda mé saha cúú á ña ná quíhvi ini táhan í.

Na xíca nuu jándahvi na cúú cuéntá Jesús

⁷ Níi cúú ñuyíví nandicuíta cuahá na xíca nuu jándahvi na na cúú cuéntá Jesús. Ta na cán coo cúni na ndicuni na ña nanduu Jesucristo in ñayivi ñuyíví yóho. Ta na cán cúú ná na tühún ta cúú ná na coo cúni táhan xihín Jesucristo.

⁸ Cuéntá coo ndó ná a jándahvi na ndohó já ná a tívi chuun nacaja ndó sahá Jesucristo. Xiní ñúhú jáxinu coo ndó chuun cája ndó cuéntá mé á já ná cuu quiahva mé á tóco ndihi ña ndítahan nu ndó ndiquehe ndó sahá mé chuun nacaja ndó.

⁹ Ta ndá na quéta xoo nuú ña najánaḥa Jesucristo ta coo xíca ndacú na íchi cuéntá mé á, na cán náha ña coo in nanduu na xihín Ndióxi. Joo ndá na xíca na cája na ña najánaḥa Jesucristo, na cán cúú na in nanduu xihín Ndióxi, tátá yo ta in nanduu na xihín Jesucristo, jahyi mé á.

¹⁰ Ta ndá na vaxi nu ndo ta coo jánaḥa na ña najánaḥa Jesucristo nu ndo já quéa a ndiquehe ndó na cán vehe ndó ta ni a cáhan Ndióxi ndó xihín ná.

¹¹ Jáchi tá ná jáyaha ndó na cán vehe ndó já quéa in nanduu ri mé ndó xihín na ta catáhan ndó xihín ña núu cája na.

Ndíndayí Juan na cúú cuéntá Jesús

¹² Íin cuahá ndivaha ñaha cúni cáhan i xihín ndo joo coo cúni cáhyí i ña nu ndo. Jáchi ña cúni quéa saá i coto nihni i ndohó já ná cuu nditühún yo ña ná cavatá ndivaha ini ndihí.

¹³ Ta na cúú jahyi quíhvi ndo chíndahá na Ndióxi coo ndó jáchi mé ña cúú ña ña nacaxi Ndióxi viti. Já ná coo.

Carta chí uní naca^hyí Juan nuú na cúu cuéntá Jesús

Cáhan Ndióxi Juan xihín in da naní Gayo

¹ Yehe cúu u in da sacua^hha ta cáhyí i carta yóho nu mún ñani máni, da naní Gayo. Ta mé a ndaa quíhvⁱ ndusa ini i yohó.

² Candehé, ñani máni, da cúu cuéntá Jesús. Xíca tahví i nu Ndióxi ña ná quiahva mé á tá nuú ña vaha nuun. Ta ná caja mé á ña ná a quíhvun ta já coo vaha inún tá quiahva ín vaha inún xihín Ndióxi.

³ A juú quiahva ná cajií ínⁱ i tá naquixi java na cúu cuéntá Jesús yóho ta nandicani na nuú i ña co cáxoun nuú ña ndaa jáchi cája tá cajún ña.

⁴ A juú quiahva cajií ínⁱ i tá ñehé e tuhun ña xíca ndó íchi cuéntá ña ndaa jáchi mé ndó cúu ndó tátuhun jahyi i.

⁵ Candehé, ñani máni. Vaha ndivaha cajún jáchi xihín ndinuhu inún chindeún na cúu cuéntá Jesús tá saa na jan vatí cúu ná na quíxi ñuu tóho.

⁶ Ta nu tóco ndihi na táca veñuhu yóho ndícani mé na tóho ndá quiahva quíhvⁱ ndivaha inún na. Ña cán quéa xíca i ñamaní nu yohó, Gayo ña ná chindeún na tá ná saa tucu na cán ta ná quiahvún ña ndímaní nu ná cañehe na íchi cuhun na jáchi ña yóho cúu á ña cajií ini Ndióxi xihín.

⁷ Ndítahan chindeún na jáchi naqueta na xíca nuu na cája na chuun cuéntá Jesucristo ta co cúni na caça na ñaha catacu na nuú na co cúu cuéntá Jesús.

⁸ Sahá ña cán quéa ndítahan nu mí, na cúu cuéntá Jesús chindeé yó na cán xihín ña ndímaní nu ná. Ta xihín ña yóho in nduu yó xihín ná tá cáhan na ña ndaa xihín ñayivi.

Cuachi cája in da naní Diótfes

⁹ Sa nachindahá i in carta nu tóco ndihi na cúu cuéntá Jesús nduu jan joo Diótfes coó naxeen da cándusa da ña cáchí nde. Jáchi cája cáhnu da mé dá ta cúni da cacuu da jini nu tóco ndihi na cúu cuéntá Jesús nduu jan.

¹⁰ Sahá ña cán quéa tá ná saa i jan caxi tuhun i nuun sahá ña cája da jáchi xíca nuu da cáhan ndivaha da ña tuhún sahá nde. Ta a juú ña yóho cuití cája da, vaha jáchi ni co cúni da ndiquehe da na cúu cuéntá Jesús xínu coo jan. Ta sáji nuu da nuú na cúni ndiquehe vaha ñahá ta janda táxi da na veñuhu.

¹¹ Candehé, ñani máni. A cajún ña núu tá quiahva cája Diótfes jan. Xíni ñúhú cajún ndinuhu ña vaha jáchi da cája ña vaha cúu dá cuéntá Ndióxi joo da cája quini co xíni da Ndióxi.

Ña vaha cája Demetrio

¹² Joo tóco ndihi na cúu cuéntá Jesús cáhan vaha na sahá da naní Demetrio jáchi ña ndaa cuití va cája da. Ta quiahva já cáhan vaha ri ndehe va saha dá ta cándaa inún ña cáhan nde ña ndaa.

Ndíndayí Juan Gayo

¹³ Mé a ndaa ín cuahá ndivaha ñaha cúni cahan i xuhun joo co cúni cáhyí i ña nuú tutu yóho

¹⁴ jáchi cúni cuni yachi i yohó já ná ndituhún yúhu mí i xuhun.

¹⁵ Ña xíca i nu Ndióxi quéa ná caja mé á ña ná coo vaha inún. Na cúu cuéntá Jesús nduu yóho chindahá na Ndióxi coún. Ta cajún ñamaní cahan Ndióxi lohún xihín in in na cúu cuéntá Jesús nduu jan.

Carta nacahyí Judas nuú na cúu cuéntá Jesús

Cáhyí Judas carta nuú na nacaxi Ndióxi cacuu na cuéntá mé á

¹ Yehe cúu Judas, da cajú chúun cuéntá Jesucristo ta cúu u ñani Jacobo. Cáhyí i carta yóho nu ndóhó jáchi cúu ndó na nacana Ndióxi, tátá yo. Cúu ndó na quíhvi ini mé á ta cúu ndó na ndáá Jesucristo jáchi in nanduu ndó xihín mé á.

² Ña xíca tahví i nu Ndióxi quéa ña ná tahnda ndivaha ini mé á saha ndo. Ta ná cajú mé á ña ná coo vaha ndivaha ini ndó. Ta ná chutú ndaa ini ndó xihín ña quíhvi ini a ndohó.

Cáhan Judas sahá na jánaha ña tuhún (2 Pedro 2:1-17)

³ Candehé ndo, ñani mí i, na cúu cuéntá Jesús. A juú quiahva naxinu ini i cáhyí i nu ndo saha nda quiahva najacacu Ndióxi ndihí. Joo viti ndíhi ini i cáhyí i carta yóho nu ndo ná caça tahví i nu ndo ña ná a jándacoo ndó ña candeé ini ndó Jesucristo jáchi ña yóho cúu á ña in tañu cuití va nasahan Ndióxi nu yo, na cúu cuéntá mé á.

⁴ Jáchi java ñayivi nandaja na mé ná tátuhun na cúu cuéntá Jesús ta naquihvi nuu na tañu ndó jan. Mé ñayivi yóho cúu ná na sa cáhan tuhun Ndióxi saha janda jihna ndivaha ta cáchi a ndítahan nu ná cuhun na indayá. Cúu ná ñayivi quini jáchi jánaha na ña tá sa nacaja cáhnu ini Ndióxi sahá cuachi na já cuu cajú na tá nuú cuachi ña cúní mé ná. Ta xihín ña yóho náha ña co xéen na candúsa na Ndióxi, mé á cómí cuéntá saha tóco ndihí ñaha. Ta jári náha ña co cúu ná cuéntá Jesucristo, xitoho í.

⁵ Sa xíni ndo ña nandoho na Israel tá natavá Ndióxi na ñundáhyi Egipto sanahá. Ta viti jándicuhun ini i ndohó ña vatí natavá Ndióxi tóco ndihí na Israel cán Egipto joo tá nandihí najándihí a sahá na coo naxeen candúsa ñahá.

⁶ Ta quiahva já nacaja ri mé á xihín na nasacuu táto mé á jáchi coo naxeen na cajú na ña cúní Ndióxi ta najándacoo na nuú nasanduu na. Sahá ña cán quéa nachicaji

Ndióxi na nu naá ndivaha nu ñúhu na anda ama cúa quívi. Ta ndáti na cán xinu quívi cajú vii mé á saha ná.

⁷ Ta tá quiahva nacaja Ndióxi xihín mé táto cán quiahva já nacaja ri a xihín ñayivi ñuu Sodoma xihín na ñuu Gomorra ta xihín na nanduu ñuu ñehe táhan xihín ndíví ñuu yóho. Najándihí Ndióxi saha ná jáchi nandiquiahva na yiquí cuñu na ña ná cajú na tá nuú cuachi. Ta ndaja táhan mé ta nacaja cuachi xihín táhan da. Sahá ña cán quéa najacuyu Ndióxi ñúhu cáyi jata ná. Ta quiahva já ndoho na anda ama cúa quívi. Ta xihín ña yóho jánaha Ndióxi nu yo ña quiahva já cuu ndoho ri mé ví tá co cajú í ña cúní mé á.

⁸ Tá quiahva nacaja ñayivi sanahá quiahva já cajú ri na jándahvi ndohó viti. Jáchi cúu ná ñayivi quini, na cajú cuachi ta tá xíni na cajú na in cuachi já cuahan na cajú ná ña. Mé na cán cajú na ña núu xihín yiquí cuñu na ta quéhe núu na Ndióxi jáchi co quéhe na cuéntá nu cáhan mé á xihín ná ta co yíhvi na cánahá na xihín táto Ndióxi indiví, mé á in ndée cajú cuahá ñaha.

⁹ Ta janda mé á cúu sacuahá nu tóco ndihí táto Ndióxi naní a Miguel ni coo nacannahá a xihín tiñahá sacuahá. Ta ni co naxeen a cahan núu a xihín rí tá nacani táhan mé á xihín rí sahá yiquí cuñu Moisés. Ña nacachi a xihín rí quéa: “Ndióxi ná jánani a yohó”, nacachi a xihín ri.

¹⁰ Joo ñayivi quini, na xíca jándahvi na cúu cuéntá Jesús yóho, co yíhvi na cánahá na xihín ña co candaá ini na saha. Joo cajú na ña xíca ini yiquí cuñu jáchi cúu ná tátuhun quítí, rí co xíni túni ta ña núu cajú na yóho jándihí a saha ná.

¹¹ Ndáhví ndivaha nacuu na jan jáchi cajú na tá quiahva nacaja Caín, da nasahní ñani sanahá ndivaha. Ta jatá jjuhún cuití va cajú na ñaha tá quiahva nacaja Balaam sanahá. Ta cajú ri na tá quiahva nacaja Coré sanahá tá nandínehe yúhu dá nu Ndióxi. Ta sahá ña yóho ndihí saha ná.

¹² Jáchi na jándahvi ndóhó jan jácacahan na nuu ndo tá táca ndo xíxi ndó xihín java na cúu cuéntá Jesús. Jáchi yáha ndivaha ña xíxi na jan ta coo toní ñúhu na xihín ña cajú na. Ta saha mé cuití va na ndíhi ini na. Cúu ná

tátuhun vico núhú, ña xíca nuu cája tachi ña co ndójo javi. Ta cúu ná tátuhun yíto cuihi, do co cúun ñaha nuu tá ndítahan cuun cuihi nu do. Cúu ná tátuhun yíto, do natuhun na janda yóho dó jáchi coo ñacuun cuihi nu do. Ta cúu ná tátuhun na ñandihi saha chí in ndeé.

13 Ña cája na jan cúu á tátuhun yáco cándo co nuu chíquiñu tañuhú tá ndícojo do jáchi ña cácahan nuu yo cúu ña cája na jan. Cúu ná tátuhun quimi, rí najana ta co ndíñehe rí nuu ñasahíin rí. Ta sahá ña cája na cañuhu na nuu naá ndivaha anda ama cáa quivi caja Ndióxi.

14 Ta janda sanahá da naní Enoc, da ñasacu da usa nuu chíchi Adán najáyaha da tuhun ñacahan Ndióxi sahá ña núu cája na jándahvi ndohó cán. Ta já ñacachi da já: “Candehé ndó. Sa vaxi Jesucristo, xitoho í xihín cuaha mil táto yii mé á

15 ña ná caja vii a saha tóco ndihi na ndúu ñuyiví. Ta jándoho a ini tóco ndihi ñayivi sahá ndihi ña núu ñacaja na. Ta quiahva já jándoho a ini na saha tóco ndihi tuhun ihvi ñacahan na saha mé á”, ñacachi Enoc saha ná.

16 Mé ñayivi quini yóho ni in ñaha co táhan ini na xihín ta cáhan núu na saha tóco ndihi ñaha. Ta níi tiempo cája na ña xíca yiquí cuñu na cuití va. Ta ndíñehe jícó ndivaha na mé ná tá cáhan na nuu ñayivi. Ta cáhan va ha na sahá ñayivi ña ná nuná nuu ná jándahvi ñahá na.

Jácahan Judas na cúu cuénta Jesús ña ná candee cáhnu ini na Ndióxi

17 Candehé ndo, ñani máni, na cúu cuénta Jesús. Xíní ñuhú ndicuhun ini ndó ña ñacachi na apóstol cuénta Jesucristo, xitoho í xihín ndo sanahá.

18 Mé na cán ñacachi na xihín ndó já: “Tá ná cayati quivi ndihi sahá ñuyiví yóho já quea cacu nuu ñayivi cuacu ndaa na Ndióxi. Ta caja na tá nuu ña núu ña xíca ini mé ná caja na”, ñacachi na cán.

19 Mé ñayivi quini yóho cúu ná na xíca sáhdá java táhan na cúu cuénta Jesús. Ta cája na ña núu ña cáhvi ini na caja na ta co ndácaan ínimá yii Ndióxi ini na.

20 Joo mé ndó, ñani máni, na cúu cuénta Jesús xíní ñuhú coo ndacú ini ndo xihín ña

cándeé ini ndó Jesús jáchi ña jan cúu á ña yii ndivaha. Ta xíní ñuhú caça tahvi ndo nu Ndióxi xihín ndeé ña sahan ínimá yii mé á nu ndo.

21 A cáxoo ndó nu Ndióxi jáchi quíhvi ini a ndohó. Ta candati tiahva ndó xinu coo quivi caja Jesucristo, xitoho í ña ná catacú anda ama cáa quivi jáchi mé a ndaa táhvi ini a saha yo.

22 Ta ndítahan candáhvi ini ndó ndá na cáhvi ivi joho ini saha Jesús.

23 Já quea jácacu Ndióxi na ña ná a cuhun toho na indayá. Xíní ñuhú candáhvi ini ndó na. Joo cuénta coo ndó xihín ná já ná a cáshá ndo caja ndó cuachi tá quiahva cája mé ná jáchi na cán cuu jácaquini na ndohó.

Cája cáhnu Judas Ndióxi

24 Mé Ndióxi quea íin tóco ndihi ndeé chindeé a mí ña ná a ndácava í nuu cuachi já ná cuu coo vii yo tá ná xinu coo í nu íin mé á. Ta caja mé á ña ná chutú ndaa yo xihín ña cájii iní tá ná xinu coo í nu íin mé á ta a juu quiahva ndató cáa cán.

25 In túhún jini mé á cúu Ndióxi, mé á jácacu mí sahá ña ñacaja Jesucristo, xitoho í. Cóho caja cáhnu í Ndióxi jáchi yéhe ndivaha mé á ta cáhnu ndivaha cúu á ta íin cuahá ndeé a ta mé á quea cómi cuénta saha tóco ndihi ñaha. Cáhnu cúu mé á viti ta anda saha ta anda ama cáa quivi cáhnu cúu mé á. Já ná coo.

Ña najánaḥa Jesucristo nu Juan

Tá nanaha Jesucristo mé á nu Juan

¹ Ña yóho cúú ña nanaha Ndióxi nuú Jesucristo ña ná cuu jánaḥa mé á ña nuú na cúú cuéntá mé á. Ta nachindahá Jesucristo in tátó mé á nuú yeḥe, da cúú Juan, da cája chúun cuéntá mé á já ná caxi tuhun tátó mé á xihín i ndá a quéa yaha chága chí nuu. Ta cúú á ña sa cáyati vaxi.

² Ta ndícani ndaa ndihi i sahá ña naxini i xihín nuú i ta naçahyí i tóco ndihi ña yóho. Ta nasahan Jesucristo tuhun a nuú i ña cúú á ña ndaa.

³ Cajii ini ñayivi tá cáhvi na ña naçahyí i yóho ta cajii ini na xini johó na ña yóho nani cáhvi inga na ña jáchi cúú á ña naquixi cuéntá Ndióxi. Cajii ini ñayivi tá cája na ña cáchi a jáchi sa naçayati quiví coo tóco ndihi ña yóho.

Cáhyí Juan ña yóho nu ndihusa ñuu nu ndítaca na cúú cuéntá Jesús

⁴ Yeḥe cúú Juan ta cáhyí i carta yóho nuú ndihusa ñuu nu ndúu na cúú cuéntá Jesús estado Asia. Ña cúní quéa ná caja cuaha Ndióxi ñamaní xihin ndó ta ná caja mé á ña ná coo vaha ini ndó. Mé Ndióxi in a viti ta nasahjin a janda tá camaní cava sáhá saḥa ñuyíví ta quixi a ñuyíví yóho. Ta cúní ña ná caja cuahá ínimá yii Ndióxi ñamaní xihin ndó. Mé a cán cáa tátuhun usa ínimá yii ta ndúu na nu Ndióxi, mé nu in coo a cómi a cuéntá sahá indiví cán.

⁵ Ta cúní ña ná caja cuahá Jesucristo ñamaní xihin ndó, mé á cáhan ña ndaa sahá ña naxini a. Ta mé á nasacuu ña nu cuítí nanditacu tañu na sa naxihí. Ta cómi a cuéntá saḥa tóco ndihi rey, na cómi cuéntá sahá ñayivi ñuyíví yóho. Ta quíhvi ini Jesucristo mí ta najándoo a cuachí tá naxita nii á ndica crúxu.

⁶ Ta tóco ndihi mí, na cándee ini mé á najándique táhan mé á mí já ná cacomí a cuéntá saḥa yo. Ta nandaja mé á mí nanduú tátuhun jutú ña ná caja cáhnu yó Ndióxi, mé a cúú tátá Jesucristo. Cáhnu ná

cacuu mé á anda ama cáa quiví jáchi in ndée mé á caja tóco ndihi ñaha anda ama cáa quiví. Já ná coo.

⁷ Sa naçayati quiví quixi Jesucristo tañu vico. Ta tóco ndihi ñayivi cuni ñahá ta janda na nasahní ñahá cán cuni na a. Ta tóco ndihi ñayivi ndúu ndijáá ñuu níí cúú saḥa ñuyíví canduu cuéha ndivaha ini na saḥa mé á. Já ná coo.

⁸ Ta já cáchi Jesucristo, xitoho í saḥa mé á: “Yeḥe cúú mé a nu cuítí ta yeḥe cúú mé a nu ndíhí jáchi janda tá camaní cava sáhá saḥa tóco ndihi ñaha sa in va yeḥe ta coo tá coo i vatí ná ndihi sahá”, cáchi a. Mé a cúú Ndióxi, ña in ndée cája tóco ndihi ñaha. Ta mé á in a viti ta nasahjin a janda tá camaní cava sáhá saḥa ñuyíví ta quixi a ñuyíví yóho.

Náha Jesucristo nu Juan ndá quiahva cáhnu cúú mé á

⁹ Yeḥe cúú Juan ta cúú u ñani ndó, na cúú cuéntá Jesús. Ta sahá ña cándee ini i Jesús sahá ña cán quéa nañeḥe táhvi i xihin mé ndó cacomí Ndióxi cuéntá saḥa ndihí. Ta coo caja toho ña ná ndoho iní ñuyíví yóho jáchi sahan Ndióxi tuhun ndée iní já ná cuu caja ndee iní tá ndóho iní. Natava xoo na yeḥe ta nasahan ñehe na yeḥe isla naní Patmos sahá ña naxica nuu i naçahan i tuhun Ndióxi, ña cúú ña ndaa, ña najánaḥa Jesucristo nuú i.

¹⁰ Ta ndaja coo nandindaa quiví coo ña nasacu ini Jesucristo, xitoho í ta mé tañu já nachutú ndaa ínimá i xihin ínimá yii Ndióxi ta já naxini johó i cáhan cóhó in a chí jatá i ta nasacuu a tátuhun tá tiví na trompeta.

¹¹ Ta mé tuhun naxini johó i cán naçachi a já xihín i:

—Yeḥe cúú mé a nu cuítí ta yeḥe cúú mé a nu ndíhí jáchi janda tá camaní cava sáhá saḥa tóco ndihi ñaha sa in va yeḥe ta coo tá coo i vatí ná ndihi sahá. Tóco ndihi ña ná cunún yóho xini ñuhú çahyún ña nuú in libro. Ta já chindahún ña nuú ndihusa ñuu estado Asia nu ndúu na cúú cuéntá mí i. Chindahún ña nuú na ndúu ñuu Efeso xihín nuú na ndúu ñuu Esmirna xihín nuú na ndúu ñuu Pérgamo xihín nuú na ndúu ñuu Tiatira xihín nuú na ndúu ñuu Sardis xihín nuú na ndúu ñuu Filadelfia xihín nuú na ndúu ñuu Laodicea viti —naçachi a xihín i.

12 Tá naxini johó i ña yóho já nandicoto nihni játá i sándehé e yo cáhan xihín i. Ta já naxini i usa ña jiuñun cuáán nu sándójó ña túñun.

13 Ta tañu ña cán naxini i in a cúni coo tá cúni coo ñayivi ta ndíxi a in jáhma cáni ña janda sahá xinu coo a xihín quiahva cáni á. Ta naxini i ndácaan in cinturón ña jiuñun cuáán tóco á ta cáni a janda yati yicá ndicá a.

14 Ta ijí jini á cúu á ña yaa cachí tátuhun yaa yucú yáhvá. Ta nduchú núu a cúu á tátuhun ñuhu ita.

15 Ta tá quiahva yéhe caa ña jándutu na ini horno quiahva já yéhe sahá. Ta ñihi ndivaha cáhan mé á ta cúu á tátuhun tá xóyo cúyu ticuñi yuta tañu cáva.

16 Ta naxini i ñuhu usa quimi ini ndahá cuáha mé á. Ta ini yúhu a naxini i quéta in yuchú cáni ña jeen ndívi xoo yúhu. Ta naxini i yéhe ndivaha nuu á tá quiahva yéhe candii caxivi ndaa.

17 Tá naxini i mé á já nandicava i sahá tátuhun in ndii. Joo mé á naxinu a ndahá cuáha játá i já nacachi a já xihín i:

—A cáyihví tohún. Yehe cúu mé á nu cuítí ta cúu u mé a nu ndíhí.

18 Táci tá tácu va yehe. Mé a ndaa nasacuu u ndii joo viti tácu u ta catacu u anda ama cáa quivi. Ta yehe naquee vaha i tá nanditacu tucu u tañu ndii ta viti cómi i cuéntá sahá nu ndúu ínima na sa naxihí.

19 Xíní ñuhú cahyún ña naxinún. Ta xíní ñuhú cahyún sahá ña cúu viti ta já cahyún sahá ña coo chága chí nuu.

20 Ña yóho quéa cúni cachi ndíhusa quimi naxinún ñuhu ini ndahá cuáha i xihín ndíhusa ña jiuñun cuáán nu sándójó ña túñun. Ndíhusa quimi cán cúu rí yuhú nuu in in na cómi cuéntá sahá usa veñuhu nu táca na cúu cuéntá Jesús. Ta ndíhusa nu sándójó ña túñun cán cúu á yuhú nuu usa veñuhu. Ta ña yóho coo naxini ñayivi jáchi nasacuu a ña jehé.

2

Ña nacachi Jesús xihín na cúu cuéntá mé á ndúu ñuu Efeso

1 'Cahyún in carta nuu da cómi cuéntá sahá na cúu cuéntá mí i ndúu ñuu Efeso. Ta ña cahyún cúu ña yóho: “Ña yóho cúu tuhun

cáhan Jesús, mé a ñuhu usa quimi ini ndahá cuáha, mé a xíca nuu tañu usa ña jiuñun cuáán nu sándójó ña túñun. Ta ña yóho quéa cáhan Jesús xihín ndó, na ñuu Efeso:

2 Sa cándaa ndihi ini i ndá quiahva cája ndó. Cándaa vaha ini i ña ndúcú ndéé ndó cája chúun ndó cuéntá mí i. Ta co jándacoo ndó chuun cája ndó cuéntá mí i. Ta sa cándaa vaha ini i ña co ndéé ini ndó xihín ña cája ñayivi quini. Ta sa cándaa ini i ña sa naxito ndojó ndó na cáchi cúu apóstol cuéntá Ndióxi joo co cúu toho na apóstol jáchi cúu ná na tuhún cuití va.

3 Ta sa cándaa cáxi ini i ña co jándacoo ndó cája chúun ndó cuéntá mí i. Ta cuahá ndivaha tañu ndóho ini ndó sahá i. Ta co cánaá ndó xihín ña yóho.

4 Joo ín in ñaha cáhan cuachí i nu ndó saha: Ta ña cúni cahan i saha cán quéa co cúni ga ndó yehe tá quiahva nacacúni ndó yehe janda mé saha.

5 Ña cán quéa ndítahan ndicuhun ini ndó ndá quiahva nacacúni ndó yehe jihna. Ta ndítahan nu ndó ndicó coo ini ndó ta caja ndó tá quiahva nacaja ndó janda mé saha. Á tá coo ta xinu yachi i nu ndo ta tavá i ña cándójó, ña túñun nu ndo. Caja i ña yóho xihín ndo tá ná a ndicó coo ini ndó.

6 Joo mé a ndaa cáji ini i xihín ndo jáchi cándají ndó ña núu cája na xíca cuéntá nicolaítas jan. Jáchi co táhan ri ini yehe xihín ña núu cája na jan.

7 Cuni johó vaha ndó, na vaha johó ña cáhan ínima yii Ndióxi xihín na cúu cuéntá mí i, na táca veñuhu: Ndá na ná quee vaha tañu tóco ndihi ña núu ñuyiví yóho, na cán cúu na quiahva i ñamaní nuu caxí cuñhi cúun nu yíto, dó cája ña ná catacu ñayivi anda ama cáa quivi. Mé yíto cán cándichi dó nu ín Ndióxi.”

Carta cuahan nuu na cúu cuéntá Jesús ndúu ñuu Esmirna

8 'Cahyún inga carta cuhun nuu da cómi cuéntá sahá na cúu cuéntá mí i ndúu ñuu Esmirna. Ta ña cahyún nu ná cúu ña yóho: “Ña yóho quéa cáchi Jesús, mé a cúu á nu cuítí ta cúu á nu ndíhí, mé a sa naxihí ta já nanditacu tucu a. Ta já cáchi a já xihín ndó, na ñuu Esmirna:

⁹ Sa xini vaha i ndá quiahva ndóho ini ndó. Ta xini ndá quiahva cándahví ndó. Joo mé a ndaa cúu ndó na cuicá nu Ndióxi. Ta sa xini ndá quiahva cáhan núu na saha ndo jáchi cáchi na cúu ná na Israel joo a juú na. Cúu ná in táhndá na cája cáhnu Satanás, mé tiñáhá sacuaḥa va.

¹⁰ A cáyihví toho ndó sahá ña vaxi nu ndó ndoho ini ndó. Jáchi ñayivi quini, na cúu cuéntá tiñáhá sacuaḥa taán na java ndohó vecaa já coto ndojó na ndohó. Ta tixi uxu quivi ndoho ini ndó. Ta xini ñuhú cándeé tá cándeé ini ndó yehe vatí ná cahni na ndohó ta já ná caja i ña ñehe táhvi ndó catacu ndó anda ama cáa quivi.

¹¹ Cuni johó vaha ndó, na vaha johó ña cáhan ínimá yii Ndióxi xihín na cúu cuéntá mí i, na táca veñuhu: Ndá na ná quee vaha nu tóco ndihi ña núu ñuyívi yóho, na cán cúu na a cūhun toho na ndoho ini na indayá. Jáchi tá ndóho ini ñayivi indayá cúu á tátuhun xihí na chí ivi.”

Carta cuḥan nuú na cúu cuéntá Jesús ndúu ñuu Pérgamo

¹² Cahyún inga carta cuḥun nuú da cómi cuéntá sahá na cúu cuéntá mí i ndúu ñuu Pérgamo. Ta já cachún já nu carta jan: “Jesús, mé a ñehe yúchu cáni ña jeen ndívi xoo yúhu cán quéa cáchi já:

¹³ Sa xini vaha i ña íin ndó ñuu Pérgamo nu cája Satanás, mé tiñáhá sacuaḥa ña cuni mé rí xihín ñayivi. Joo xihín ndinuhu ini ndó cája ndó ña táhan ini i xihín. Ta coo najándacoo ndó ña cándeé ini ndó yehe vatí na xini ndó ndá quiahva nacaja na xihín Antipas, mé da nacandeé cáhnu ini yehe cán. Jáchi nasahní na da mé ñuu jan nu cómi Satanás, mé tiñáhá sacuaḥa cuéntá sahá ñayivi.

¹⁴ Joo íin in ñaha cáhan cuachi i nu ndó saha. Jáchi sahan ndó ñamani nuú java ñayivi cán ña ná candico cáhnu na ña najánaḥa Balaam. Mé Balaam jan cúu dá da najánaḥa Balac ndaja caja da jácahan da na Israel caja na cuachi tátuhun ná cuxu na ña najoco ñayivi nuú yoco ta ná cuju xihín táhan ñayivi vatí co cúu ná yíi ná á ñájihí na.

¹⁵ Ta co íin vaha ini i xihín ndó, na ñuu Pérgamo jáchi sahan ndó ñamani nuú java

ñayivi ña ná candico na jatá na nicolaítas. Ta cándají ndivaha i ña jánaḥa na jan.

¹⁶ Xini ñuhú ndicó coo ini ndó ta caca vaha ndó íchi cuéntá mí i. Á tá coo ta saa yachi nu ndúu ndó jan. Ta xihín tuhun cáhan i cani táhan i xihín na cája cuachi jan. Ta mé tuhun cáhan i cacuu a tátuhun yúchu cáni ña cana yuhú u.

¹⁷ Cuni johó vaha ndó, na vaha johó ña cáhan ínimá yii Ndióxi xihín na cúu cuéntá mí i, na táca veñuhu: Ndá na ná quee vaha nuú ña núu já quéa quiahva i ñamani nu ná cuxu na pan yii, ña cúu tátuhun maná, ña naquixi indiví. Ta ña yóho cúu á ña nasahíin jehé nuú ñayivi. Ta já quiahva ri in yuú yaa nuú in in ñayivi nu ndaa quivi saá na. In túhún na ná ndiquehe yuú yaa cán cúu na xini yo quivi quéa ndaa nu á.”

Carta cuḥan nuú na cúu cuéntá Jesús ndúu ñuu Tiatira

¹⁸ Cahyún inga tucu carta ná cūhun a nuú da cómi cuéntá sahá na cúu cuéntá mí i ndúu ñuu Tiatira. Ta já cachún já xihín ná: “Ña yóho quéa cáchi Jesús, mé a cúu in túhún jiní já jahyi Ndióxi. Ta mé á quéa yehe nduchú núu a tátuhun ñuhú ita ta yehe saha tá quiahva yehe caa, ña jándutu na ini horno. Ta mé á cáchi a já xihín ndóho, na ñuu Tiatira:

¹⁹ Sa xini vaha i tóco ndihi ña cája ndó. Xini vaha i ña cuni ndó yehe. Ta xini vaha i ña cándeé cáhnu ini ndó yehe. Ta sa xini vaha i ña co jándacoo ndó cája ndó ña cáji íni i xihín. Ta sa cándaḥa vaha ini i ña ndíhi chága ini ndó cája chúun ndó cuéntá mí i a juú ga tá nacasáhá ndo cándeé ini ndó yehe.

²⁰ Joo íin in ñaha ña cuni cáhan cuachi i xihín ndó saha. Jáchi co cuni ndó jana ni ndó ña naní Jezabel, ña íin tañu ndó jan. Vatí cáchi ña ña cáhan ña cuéntá Ndióxi joo xihín ña quixi jini mé ña jándahvi ña na cúu cuéntá mí i. Jáchi jácahan ña na ná cuju xihín táhan na, na co cúu yíi ná á ñájihí na. Ta jánaḥa ña na ña ná cuxu na ña najoco ñayivi nuú yoco.

²¹ Sa nasandati ndivaha i ña ná ndicó coo ini ña sahá cuachi cája ña joo co cuni ña jándacoo ña ña quíji ña xihín na co cúu yíi ña.

22 Sahá ña cán quéa caja i ña ná quihvi ndeé ña candúhu ña xito ñá. Ta caja i ña ná ndoho ndivaha ini ndihi da quíji xihín ña tá ná a jándacoo da cuachi cája da xihín ña jáchi ña jan cúu ña najánaḥa ñá nu dá caja da.

23 Ta caja i ña ná quivi ndihi jahyi ñá. Ta xihín tóco ndihi ña yóho cuni na cúu cuéntá mí i, na ndúu ndijáá ñuu ña mé a ndaa xini vaha i ña cáhvi ini ñayivi ta xini ndaja ín ínima ná. Ta quiahva i nuú in in ndó ña ndítahan quehe ndó sahá ña naçaja ndó.

24 Ta viti cuni caḥan i xihín java ga ndó, na cúu cuéntá mí i ndúu ñuu Tiatira jan. Jáchi co ndíco ndo jatá ña jánaḥa ñá cán ta co ndíco ndó jatá ña cáchi ñayivi cúu ña ndíchí ndivaha cuéntá Satanás, mé tiñáhá sacuaḥa. Ña cuni cachi i xihín mé ndó quéa coó ga inga chuun sáhdá i nu ndo.

25 Joo xini ñúhú candita ndacú ndo janda quiahva ná saa i nu ndúu ndó jan.

26 Ta ndá na ná quee vaha nuú ña núu ñuyiví yóho ta cája na ña cuni yehe xihín ndinuhu ini na janda quivi nu ndíhí já quéa caja i ña ná ñeḥe táhvi ná caḥnda na chuun nuú ndijáá ñayivi ndúu ñuyiví.

27 Tá quiahva naçaja Ndióxi, tátá i xihín i tá naṣaḥan mé á ndée á nuú i quiahva já caja i xihín na cándéé ini yehe. Ñeḥe táhvi ná cacomí na cuéntá sahá ñayivi ñuyiví ta cuu caja na tá quiahva cuni mé ná. Ta cuu jándihi na saḥa mé ñayivi ñuyiví tá quiahva cája ñayivi tá táhvi na quiji ndahyi.

28 Ta quiahva ri yehe ñamaní nuú na cúu cuéntá mí i ña ná cacomí na quimi cáhnu, ri quéta tá naṭivi.

29 Cuni johó vaha ndó, na vaha johó ña caḥan ínima yii Ndióxi xihín na cúu cuéntá mí i, na táca veñuhu.”

3

Carta cuḥan nuú na cúu cuéntá Jesús ndúu ñuu Sardis

1 'Cahyún inga tucu carta cuḥun nuú da cómí cuéntá sahá na cúu cuéntá mí i ndúu ñuu Sardis ta já cachún já xihín dá: “Ña yóho quéa cáchi Jesús, mé a ñúhu ínima yii Ndióxi ini, ña cúu ndíhusa yuhú nuú ínima yii mé á. Ta mé á cómí a ndíhusa quimi ta ña yóho quéa cáchi a xihín ndó, na ñuu Sardis jan:

Xini vaha i tóco ndihi ña cája ndó. Ta sa xini vaha i ña cáhan ñayivi ña cája ndó tátuhun ñayivi tácu vatí mé a ndaa cúu ndó tátuhun ndii.

2 Xini ñúhú ndícaxi vaha ini ndó ta a jándacoo ndó ña vaha cája ndó jan jáchi jalóho cuni ndihi sahá. Sándehé vaha i ña co cája ndó ña ndaa nu Ndióxi, tátá i.

3 Xini ñúhú ndicuhun ini ndó ña naçatiaḥva ndó cuéntá mí i ta a jándacoo ndó caja ndó ña. Ta xini ñúhú ndicó coo ndó nu Ndióxi ta ndicáxi vaha ini ndó. Á tá coó ta jonáá cuití xinu coo i nu ndo já caja vii i saḥa ndo. Mé quivi co cáhan ndo xinu coo i nu ndo tá quiahva jonáá xinu da cuihná.

4 Joo mé a ndaa ndúu java ndó mé Sardis jan, na coó naçaja quini mé xihín cuachi. Sahá ña cán quéa cuu candixi na jahmá yaa ta já cuu caca tuun na xihín i jáchi ín sahá caja na já.

5 Jáchi ndá na ná quee vaha nuú ña núu ñuyiví yóho já quéa candixi na jahmá yaa. Ta a jándoo i quivi ná nu libro, mé nu ndaa quivi tóco ndihi na catacu anda ama cáa quivi. Ta nu Ndióxi, tátá i xihín nu tátó mé á caḥan cáxi i ña jivi ndusa cúu ná cuéntá mí i.

6 Cuni johó vaha ndó, na vaha johó ña caḥan ínima yii Ndióxi xihín na cúu cuéntá mí i, na táca veñuhu.”

Carta cuḥan nuú na cúu cuéntá Jesús ndúu ñuu Filadelfia

7 'Cahyún inga tucu carta cuḥun nuú da cómí cuéntá sahá na cúu cuéntá mí i ndúu ñuu Filadelfia ta já cachún já xihín dá: “Ña yóho quéa cáchi Jesús, mé á cúu ña yii ndivaha ta cúu á ña ndaa. Ta nu mé á ín yaví, ña naṣacomí rey Dávid. Ta tá súná mé á in yéhe ni in na a cuú chicaji ña. Ta tá chicaji mé á in yéhe ni in na a cuú cuná ña. Ta ña yóho quéa cáchi a xihín ndó, na ndúu ñuu Filadelfia jan:

8 Xini vaha i tóco ndihi ña cája ndó. Naṣuná i yéhe nu ndo ta ni in túhún na a cuú chicaji ña. Ta cándaḥa vaha ini i ña cája tá cája ndó ña naṣaḥnda i nu ndo caja ndó vatí coo cuḥa ndée ndó. Ta co chíjehé tuhun ndó ña xini ndó yehe.

9 Candehé ndo ña caja i xihín na tuhún, na cája cáhnu Satanás, mé tiñáhá sacuaḥa sahá ña cáchí na cúu ná na Israel joo a juú toho na. Caja i ña ná caxití na nu ndo já ná ndicuni na ña mé a ndaa quíhvi ini i ndohó.

10 Coó najándacoo ndó cája ndó ña nasahnda i nu ndó caja ndó ta nasahan ndeé ini ndó sahá ña cán queá chindeé vi ndohó ná a ndóho toho ndó ña núu vaxi jatá ñayivi ñuyíví yóho. Jáchi tá ná cayati mé hora já casáhá coto ndojó i tóco ndihi ñayivi ndúu ñuyíví.

11 Yachi saa i nu ndo. Ta coto a jándacoo ndó ña cándeé ini ndó yehe já queá ná a ndíquiahva i nuú inga na ña sácú vaha i quíahva i nu mé ndó.

12 Ta ndá na ná quee vaha nu tóco ndihi ña núu ñuyíví yóho, ndaja i na cán ná cacuu na tátuhun jihín, dó cúu ndée veñuhu Ndióxi, tátá i. Ta cán canduu na anda ama cáa quívi. Ta jatá mé ná cahyí i quívi Ndióxi, tátá i. Ta sa mé yóho cahyí i quívi ñuu nu ín Ndióxi. Mé ñuu yóho cúu á inga Jerusalén, ña saá, ña vaxi chí indivi nu ín Ndióxi. Ta jivi jatá mé ná cahyí i inga quívi saá i.

13 Cuni johu vaha ndó, na vaha johu ña cáhan ínimā yíi Ndióxi xihín na cúu cuéntá mí i, na táca veñuhu.”

Carta cuahan nuú na cúu cuéntá Jesús ndúu ñuu Laodicea

14 Cahyún inga tucu carta cuhun nuú da cómi cuéntá sahá na cúu cuéntá mí i ndúu ñuu Laodicea ta já cachún já xihín dá: “Ña yóho queá cáchí Jesús, mé a cúu ña ndaa. Mé a cáhan ña ndaa sahá ña naxini a xihín nuú á ta sáhan tuhun a sahá. Ta mé á cúu á ña nacavaha tóco ndihi ñaha, ña sácú ini Ndióxi coo. Ta ña yóho queá cáchí a xihín ndó, na ñuu Laodicea:

15 Xíni vaha i tóco ndihi ña cája ndó. Ta xíni vaha i ña mé ndó co cúu ndó tátuhun in ñaha ihní ndinuhu. Ta ni co cúu ndó tátuhun in ñaha vixi ndinuhu jáchi co cája cáhnu ndó yehe xihín ndinuhu ini ndó. Vaha ná ndinuhu ña vixi ná cacuu ndó á tá ndinuhu ña ihní ná cacuu ndó.

16 Joo mé ndó ín java uun ndó jáchi in ivi ndácaan ínimā ndo ta sahá ña cán queá tavá xoo i ndohó nuú i.

17 Jáchi mé ndó cáchí ndo ña cúu ndó na cuicá ndivaha. Ta cáchí ndo ña vaha ndivaha quehe ndó jáchi ñehe cuaha ndó jiuḥún. Ta cáchí ndo ña ni in ñaha co ndímaní nu ndo. Joo mé ndó cúu ndó tátuhun na cuáá ndáhvi ndivaha jáchi a ñaha cuni ndó ña co ñehe táhvi ndó nu Ndióxi. Cúu ndó na ndáhvi ndivaha ta cúu ndó tátuhun na cuáá xíca lahla.

18 Sahá ña cán queá cúni jácahan i ndohó ña ná quixi ndó nuú i cueen ndó jiuḥun cuáán nuú i ña sa naxito ndojó na nu ñúhu ita ta já queá ná cacuu ndusa ndó na cuicá. Ta quíahva já ndítahan nu ndo cueen ndó jahmá yaa cachí nuú i candixi ndó já ná chijahví ndó mé ndó jáchi cacahan nuú ndó sahá ña xíca lahla uun va ndó. Ta sa mé nuú yehe ndítahan cueen ndó tata chicaan ndó nduchú núu ndo já queá ná cuu candehé vaha ndó.

19 Jáchi jánani i tóco ndihi ñayivi, na quíhvi ini i ta jándoho i ini na ña ná caja vaha na. Sahá ña cán queá xihín ndinuhu ini ndó ndítahan ndicó coo ini ndó caja ndó ña cúni Ndióxi.

20 Candehé ndo. Yehe cúu u tátuhun in da cándichi cáni ndáha yéhe vehe ndó ta cána i ndohó. Ta ndá na xíni johu nu cáhan i ta súná na yéhe vehe na nuú i já quíhvi i vehe na ta cajíni i xihín ná ta mé ná cajíni na xihín i.

21 Ta ndá na ná quee vaha nu tóco ndihi ña núu ñuyíví yóho, caja i ña ná cuu cacoo na xihín i indivi nuú cacomí i cuéntá saha ná indiví. Jáchi quíahva já naquee vaha i nuú ña núu ta viti ín coo i xihín Ndióxi, tátá i nu ín coo mé á sáhdá chuun indiví.

22 Cuni johu vaha ndó, na vaha johu ña cáhan ínimā yíi Ndióxi xihín na cúu cuéntá mí i, na táca veñuhu” —nacachi a.

4

Tá cája cáhnu na Ndióxi indiví

1 Tá sa nayaha tóco ndihi ña yóho já naxini i núná in yéhe indiví. Ta mé a naxini johu i nu cuítí ña cáhan tátuhun trompeta ta nacahan tucu a jatá i já nacachi a já:

—Cuáhán ndaa xoo chóho já ná ñaha i nuun ndá queá coo chága chí nuu —já nacachi a já xihín i.

² Chí mé hora já nandeta nuu ínima yii Ndióxi ini i. Já naxini i mé indiví cán in nu sác̄o rey ta ín coo in a cán.

³ Ta mé a ín coo cán nasayéhe nuu á tátuhun yéhe in yuu naní jaspe xihín yuu naní cornalina. Ta naxini i nacava nuu in coyánquí nu ín coo a. Ta mé coyánquí cán yéhe ri tá quiahva yéhe yuu cuíi naní esmeralda.

⁴ Ta nu ín coo mé a cán naxini i nacava tiyivi inga oco comi táyi vaha nu sác̄o na cómi chuun. Ta naxini i oco comi na sacuaḥa, in in na ín coo nuú in in táyi vaha cán. Ta ndíhoco comi mé na sacuaḥa cán ndíxi na jahmá yaa çachi. Ta cándójó in tiyivi jiuḥun cuáan jiní in in na cán.

⁵ Ta naxini i ña quéta tasa nu ín coo mé a cán. Ta sa mé cán cáhndi tátuhun tá cána javi ta yati mé cán cáyi usa íti xihín ñuhú ita. Ta ña yóho cúu á ndíhusa yuhú nuu ínima yii Ndióxi.

⁶ Ta yati mé cán naxini i in ñaha ta náha tátuhun in tañuhú, ña yéhe tátuhun in yutátá.

Ta yati jin nu ín coo a cán nacava tiyivi comi ña tácu. Ta chí a juú quiahva cuaha nduchú núu a chí nuu á ta chí jatá.

⁷ Ta in táhan mé ña tácu cán, ña nu cuítí cán cáa tá quiahva cáa in león. Ta ña inga cán ña chí ivi cáa tá quiahva cáa tindiqui. Ta nuú ña cáhuni cán cúni coo a tá quiahva cúni coo nuú ñayivi. Ta ña comi cán cáa tá quiahva cáa in tíyaha tá ndáchí ri.

⁸ Ta in in mé ña tácu yóho nasahin iñu ndíxi a. Ta nuu á ta jatá nachutú ndaa ña xihín nducú núu. Ta ni ñuu ta ni ndiví co jándacoo ndícomi ña cán cáhan já cáchí a já: Yii ndivaha cúu mé ndó, Ndióxi, xitoho nde.

Ta cuu caja ndó tóco ndihi ñaha.

Mé ndó sa já ín va ndó tá nacava sáha saha ñuyiví.

Ta sa já ín ndó viti ta já coo tá coo ndó anda ama cáa quivi —nacachi ndícomi ña tácu cán.

⁹ Ta tá cáhan mé ña tácu cán já cája cáhnu a Ndióxi ta ndíquiahva ndixahvi nu mé a ín coo nu sác̄o rey, mé a tácu anda ama cáa quivi. Ta tá cáhan mé ña tácu cán

¹⁰ já ndícaxítí ndíhoco comi na sacuaḥa cán cája cáhnu na Ndióxi, mé a tácu anda

ama cáa quivi. Ta já tén na tiyivi cándójó jiní na jáxinu na ña nu ín coo Ndióxi cán ta já cáchí na já:

¹¹ Ndióxi maní nde, cúu ndó xitoho nde ta ndítahan nuú nde caja cáhnu nde ndohó jáchi mé ndó ndítahan ndicáhnu ndivaha.

Ín ndée ndo caja ndó tóco ndihi ñaha ta ndítahan caja cáhnu nde ndohó.

Jáchi nacavaḥa ndó tóco ndihi ñaha, ta ndúu ndihi ñaha jáchi cúni mé ndó ña ná canduu a.

Ta ndúu a jáchi cúni mé ndó cavaḥa ndó ña, já nacachi ndíhoco comi na sacuaḥa cán cája cáhnu na Ndióxi.

5

Tá naxini Juan in libro xihín in ndicachi

¹ Tá nandihí já naxini i in libro indiví ini ndáha cuáha mé a ín coo nu sác̄o rey. Ta mé libro cán cúu á tutu nativí tuun a ta nacahyi ndiví xoo nu á. Ta ndájí tuun a xihín usa sello.

² Ta já naxini i in tátó Ndióxi, ña ín ndivaha ndée a. Ta naxini joho i cáhan cóho a ta ndáca tuhún a já cáchí a já:

—Ndá na cúu na ín saha cahnda ndíhusa sello yóho já ná cuná na mé libro ña nativí tuun cán —nacachi mé tátó Ndióxi cán.

³ Joo coó nañeḥe ná ni in na ín saha cahnda ndíhusa sello cán. Ni indiví ni ñuyiví ni nu ndúu na naxihí coó nandíneḥe ná ni in na cuu cahnda ndíhusa sello cán ña ná candehé na ña ndaa nu mé libro cán.

⁴ Ta já nacasáhá sacú ndivaha i jáchi coo nandíneḥe ná ni in tuhún na ín saha cahnda ndíhusa sello cán ña candehé na ini mé libro cán cahvi na ña ndaa nu á.

⁵ Joo in táhan na sacuaḥa cán nacachi a já xihín i:

—A cuácu gaún jáchi Jesús, mé á cúu tátuhun león, ña naquixi chichi Judá ta naquixi a chichi rey David, mé a cán naquee vaha ta nasahnu a nu tóco ndihi ña núu ñuyiví. Saha ña cán quéa cuu cahnda ndíhusa sello ta já cuná mé á libro cán —nacachi a xihín i.

⁶ Ta naxini i cándichi Jesús, mé á cúu tátuhun ndicachi loho tañu na sacuaḥa ta tañu ndícomi ña tácu cán. Ta mé a cúu tátuhun ndicachi loho cán cándichi a nu

sácoo rey ta náha xicá ña najándicuehe na mé á tá nasahní ñahá na. Ta naxini i ín usa ndíqui a xihín usa nduchú núu a. Ta ña yóho cúu á ndíhusa yuhú nuu ínima yii Ndióxi, ña nachindahá mé á níi cúu sahá ñuyívi.

⁷ Ta mé á cúu tátuhun ndicachi loho cán naxinu a ta natiin a mé libro cán ndahá cuáha mé á ín coo nu sácoo rey.

⁸ Ta tá natiin a mé libro ña natívi tuun cán já nandica xítí ndícomi ña tácu cán xihín ndíhoco comí na sacuaḥa cán nu mé a cúu tátuhun ndicachi loho cán. Ta tóco ndihi na cán cáñee arpa ndáha ná jácaha na. Ta cáñee cohó chíñíhmá, ña jiuḥun cuáán ndáha ná ta nachutú ndaa ña xihín jasa támí sahan. Ta ña cán cúu yuhú nuu tuḥun ña xicá tahvi na cúu cuéntá Ndióxi nu á.

⁹ Ta xihín ña saá xíta na cája cáhnu na mé á já cáhí na já:

Nu mé ndó cáni ndiquehe ndó mé libro jan ta cahnda ndó sello ña ná cuná ndó ña.

Jáchí mé ndó naxihí ndó nacaja ñayivi.

Ta tá naxita nui ndo já naxeen ndó ñayivi ná cacuu na cuéntá Ndióxi.

Ta mé ndó nachahvi ndó sahá na naquixi ndijáá chichi xihín na cáhan tá nuu tuḥun xihín na ndúu ndijáá ñuu xihín ndijáá nación.

¹⁰ Ta mé ndó nandaja ndó ñayivi yóho cacuu na tátuhun jutú já ná caja cáhnu na Ndióxi.

Ta mé na cán cacomí na cuéntá sahá ñayívi ndúu ñuyívi, cáhí na cája cáhnu na mé a cúu tátuhun ndicachi loho cán.

¹¹ Tá nandihí já nasandehé tucu u. Anda já naxini johó i cáhan cuahá ndivaha millón táto Ndióxi cája cáhnu na mé á ín coo nu sácoo rey. Nacava tiyivi na ndúu na jatá ndícomi mé ña tácu cán xihín jatá ndíhoco comi na sacuaḥa cán.

¹² Ta já cáhan cóhó tóco ndihi mé táto Ndióxi cán já cáhí na já:

Mé Jesús, mé a cúu tátuhun ndicachi loho, rí naxihí nacaja ñayivi, ín sahá caja tóco ndihi ñaha xihín ndéé á.

Ta ín sahá ndiquehe a tóco ndihi ña cuíca ta ín sahá ndiquehe ndihi a ña ndichí ta ín sahá ndiquehe a tóco ndihi ndéé.

Ta ín sahá ña ná ndiñehe jícó ñayivi mé á.

Ta ín sahá caja cáhnu na mé á ta ín sahá ña ná cata na nu mé á, cáhí tóco ndihi na cán cája cáhnu na mé á.

¹³ Ta quiahva já naxini johó ri cáhan tóco ndihi ñaha ña nacavaha Ndióxi ndúu indiví xihín ña ndúu ñuyívi xihín ña ndúu tixi ñundáhyi ta xihín ña ñúhu ini tañuhú. Tóco ndihi ña nacavaha Ndióxi yóho cája cáhnu a mé á ta já cáhí a já:

Ná ndicáhnu ndivaha Ndióxi, mé á ín coo nu sácoo rey.

Ta ná ndicáhnu ndivaha Jesús, mé á cúu tátuhun ndicachi loho.

Ná caja cáhnu í mé á ta ná ndiñehe jícó ñayivi mé á jáchí mé á quéa ín ndéé caja tóco ndihi ñaha.

Ná caja cáhnu yó mé á anda ama cáa quivi, já cáhí tóco ndihi na cán.

¹⁴ Já nanducú ñehe ndícomi mé ña tácu cán tuḥun já cáhí a já:

—Já ná coo.

Ta tá nacachi a ña yóho já nacaxítí ndíhoco comí na sacuaḥa cán cája cáhnu na Ndióxi, mé á tácu anda ama cáa quivi.

6

Tá nasahnda Jesucristo ndíhusa sello

¹ Tá nandihí já naxini i nasahnda Jesús, mé á cúu tátuhun ndicachi loho cán sello nu cuítí cán, ña cúu táhan ndíhusa sello cán. Ta tá nandihí já naxini johó i cáhan in táhan ndícomi mé ña tácu cán xihín i ta tachí yúhu a cúu á tátuhun tá cána javi. Ta já nacachi a já xihín i:

—Naha quíi, candehún yóho —nacachi a xihín i.

² Anda já nasandehé e ta já naxini i in cuáyí cúxú ta naxini i cánúu in dataa jata ri. Ta ndáha da cán naxini i cáñee in arco. Ta naxini i ña nañehe dá in tiyivi cánúu jiní dá. Ta cájii íní da naqueta da jáchí cúu dá da sa naquee vaha ta ñeñe táhvi dá quee vaha tucu da.

³ Ta anda já naxini i nasahnda Jesús, mé a cúu tátuhun ndicachi loho cán inga sello, ña cáhivi cán. Já naxini johó i ña nacahan inga tucu táhan ndícomi mé a tácu cán xihín i. Já cáhí a já xihín i:

—Naha quíi, candehún yóho —nacachi a xihín i.

⁴ Ta já naxini i naqueta inga cuáyí ta cúu rí rí cuáhá. Ta mé da cánúu jata rí cán nañehe táhvi dá jácani táhan da ñayivi ndúu ñuyíví. Ta nañehe táhvi dá caja da ña ná cahní ndaja táhan mé ñayivi ndúu ñuyíví. Ta naxini i nañehe dá in yuchú cáni ña cáhnu cáñee a ndáha dá.

⁵ Ta tá nasahnda Jesús, mé a cúu tátuhun ndicachi loho inga sello, ña cáhuni já naxini joho i naçahan mé ña tácu, ña cáhuni cán xihín i já naçachi a já:

—Naha qui candehún yóho —naçachi a xihín i.

Ta tá nasandehé e já naxini i in cuáyí ndáhyí tuun ta já naxini i ña cáñee in ña sácuiña ñaha ndáha mé da cánúu jata rí cán.

⁶ Ta tañu ndícomi mé ña tácu cán naxini joho i cáhan in a ta já cáchí a já:

—Ndiví yaa xíní ñuhú caja chúun í já cuu cueén in túhún laá kilo trigo. Ta in quívi ní xíní ñuhú caja chúun í já cuu cueén uní kilo cebada. Joo a quiáhva ndó ñamaní ña ná tiví sítí xihin vino —naçachi a.

⁷ Ta tá nasahnda Jesús, mé a cúu tátuhun ndicachi loho inga sello, ña cácomi cán já naxini joho i naçahan mé ña tácu, ña cácomi cán xihín i já naçachi a já:

—Naha qui candehún yóho —naçachi a xihín i.

⁸ Ta tá nasandehé e já naxini i in cuáyí cuáán joho. Ta da cánúu jata rí cája ña ná quivi ñayivi. Ta jata mé da cán naxini i ndíco da sáhdá chuun sahá nu ndúu ndii. Ta nañehe táhvi ndívi da cavaha da tondóhó ñuyíví já ná caja da ña ná cahní táhan cuahá ndivaha ñayivi ndúu ñuyíví. Ta jári nasahní da na xihín tama ndeé ta xihín cuehe ta xihín ndijáá quití yúcu ndúu ñuyíví janda quiahva naxihí in táhdá nuú comi táhdá ñayivi ndúu ní cúu saha ñuyíví.

⁹ Ta tá nasahnda Jesús, mé a cúu tátuhun ndicachi loho cán inga sello, ña cáhuhun já naxini i in nu náa ta tixi mé cán ndúu ínima ñayivi, na naxihí sahá ña naçaxi tuhun na tuhun Ndióxi nuú ñayivi xihín ndinuhu ini na.

¹⁰ Ta cáyuhú cóhó na já cáchí na já:

—Tátá Ndióxi, mé ndó cúu ndó ña yí ndivaha ta cája ndó ña ndaa cuití va. Ta cuu caja ndó tóco ndihi ñaha. Ndaja cáa

chá quívi caja víi ndó sahá ñayivi ndúu ñuyíví. Ta já caja ndó ña ná chahvi na sahá ña naçaja na nasahní na ndehe —cáchí na ndúu tixi náa cán.

¹¹ Anda já nañehe ná jahmá yaa candixi na ta natahnda chuun nu ná ña ná candati tóo chága na janda quiahva ná xinu coo nuú java ga na cúu cuénta Jesús quivi na caja ñayivi ñuyíví sahá ña cája chúun na cuénta Jesucristo. Ta janda quiahva ná quivi ndihi na yóho já cavií sahá ñayivi naçaja quini xihin ná.

¹² Tá nandihí já naxini i nasahnda Jesús, mé a cúu tátuhun ndicachi loho inga sello, ña cáhiñu cán. Já naxini i nataan ndivaha ta naxini i nanduu tuún candii tátuhun in jáhma tuún sá ndíxi na ndúu ndii. Ta ní cúu yoo naxinu cuáhá ni rí.

¹³ Ta ndijáá quimi naquee rí indiví ta nacuyu rí nu ñuhu. Cúu á tátuhun tá quíji nihni tachí ndeé ndivaha titó ñuhú ta já cuyu cuíhi, rí cuí nu ñuhu.

¹⁴ Nandihí saha indiví ta nandacoo vaha ña tátuhun tá nditívi in yívi ña co xíní ñuhú ga na. Ta tóco ndihi yúcu xihín tóco ndihi isla mahñú tañuhú nandijama ndihi ña ta co ndúu ga ña nuú nasanduu a.

¹⁵ Ta tóco ndihi na cómi cuénta sahá ñuyíví nandacoo jehé na tañu cáva. Ta nachíñee na tañu tóto chí yúcu cuahan na. Ta cán nachijehé ri na sáhdá chuun nu soldado xihin tóco ndihi na cuicá xihin tóco ndihi na ín ndeé cája ña náhnu ñuyíví yóho. Ta jári tóco ndihi na cómi in xitoho cuénta saha xihin tóco ndihi na xíca núná mé nandacoo jehé na tañu cáva xihin tañu tóto cán.

¹⁶ Ta cáchí na cáhan na xihin yúcu ta cáhan na xihin cáva ña ná cuyu a jata ná ta ná chijehé a na ña ná a cúni mé a ín coo nu sácoo rey cán na. Ta yíhvi na Jesús, mé a cúu tátuhun ndicachi loho cán jáchí sa naxojo ini a ta vaxi a jándihí a saha ná.

¹⁷ Jáchí sa naxinu coo quívi jándoho mé á ini na ta ni in na co ndeé ini.

7

Ndíçaxi Ndióxi in táhdá na Israel

¹ Tá sa nayaha tóco ndihi ña yóho já naxini i ndíta comi táto Ndióxi ndícomi xoo nu quíxi tachí nu ndícomi xoo ní cúu saha

ñuyíví. Ta t́ín a t́achí já ná a cuícó ga t́achí jat́a ñuyíví ta ná a cuícó ga t́achí nuú tañuhú ta ni nuú ni in yító.

² Ta já naxini i naquixi inga tátó Ndióxi xoo nu quéta candii. Ta mé tátó Ndióxi yóho naxini i ñéhe a sello Ndióxi, mé á tácu indiví. Ta já naxini johó i nacayuhú mé tátó Ndióxi yóho nuú ndícomi java ga tátó Ndióxi, mé na ñañehe táhvi caja ña núu xihín ñuyíví ta xihín tañuhú viti ta já nacachi a já xihín ná:

³ —Candati ndó. A cajú núu ndó xihín ñuyíví ta ni xihín tañuhú ta ni xihín ni in yító. Jáchi jihna ñúhú xíní ñúhú cacú in sello taan na cúu cuéntá Ndióxi, mé a cajú cáhnu mí —nacachi a.

⁴ Ta naxini johó i cáhan in a ndaja cúu ñayivi nanani sello yóho taan na. Cúu ná in ciento ivi jico comi mil ñayivi Israel ta cúu ná na naquixi ndíhuxu ivi chichi na Israel.

⁵ In táhndá cúu uxu ivi mil na naquixi chichi Judá ta nanani sello taan na cán. Ta inga uxu ivi mil na naquixi chichi Rubén ñaquehe sello taan na. Ta quiahva já naquihvi ri sello taan uxu ivi mil na naquixi chichi Gad

⁶ xihín uxu ivi mil na naquixi chichi Aser xihín uxu ivi mil na naquixi chichi Neftalí xihín uxu ivi mil na naquixi chichi Manasés

⁷ xihín uxu ivi mil na naquixi chichi Simeón xihín uxu ivi mil na naquixi chichi Leví xihín uxu ivi mil na naquixi chichi Isacar

⁸ xihín uxu ivi mil na naquixi chichi Zabulón xihín uxu ivi mil na naquixi chichi José xihín uxu ivi mil na naquixi chichi Bejamín nanani sello taan na.

Tá naxini Juan cuahá ndivaha ñayivi ndíxi jahmá yaa

⁹ Tá nandihí já nasandehé e já naxini i cuahá ndivaha ñayivi. Ta ni in na a cuú cahvi ñahá sahá ña cuahá cúu ná. Ta cúu ná na naquixi ndijáá chichi ñayivi ndúu ñuyíví. Ta cúu ná na cáhan tá nuú tuhun. Ta cúu ná na ndúu ndijáá ñuu xihín ndijáá nación ñuyíví. Ta naxini i ndíta na nu Ndióxi, mé a íin coo nu sácoo rey. Ta ndíta na nu Jesús, mé a cúu tátuhun ndicachi

loho cán. Ta t́ócó ndihi na ndíxi na jahmá yaa cachi ta cáñee ñuu ndáha ná.

¹⁰ Ta t́ócó ndihi na cáyuhú cóhó na já cáchí na já:

Ndióxi, mé a íin coo nu sácoo rey xihín Jesús,

mé a cúu tátuhun ndicachi loho cán najáca a mí, cáchí na.

¹¹ Ta naxini i ndíta t́ócó ndihi tátó Ndióxi cajú cáhnu na mé a íin coo nu sácoo rey. Ta nacava tiyivi na ndúu na jat́a na sacuahá cán xihín jat́a ndícomi mé ña tácu cán. Ta já nacaxítí t́ócó ndihi na janda quiahva nacani ndaa taan na nu ñúhú ta já nacasáhá na cajú cáhnu na Ndióxi.

¹² Já cáchí na já:

Já ná coo. Cajú cáhnu nde ndohó ta ndíñehe jícó nde quivi mé ndó.

Jáchi ndíchí ndivaha jiní ndo ta ndiquiahva nde ndixahvi nu ndo.

Ta ndítahan coo toní ñúhú nde xihín ndo jáchi mé ndó cúu ndó ña íin ndéé cajú t́ócó ndihi ñaha.

Ta já ná coo t́ócó ndihi ña yóho nu mé ndó anda ama cáa quivi. Já ná coo, nacachi na cán cajú cáhnu na Ndióxi.

¹³ Anda já naxinu in táhan na sacuahá cán nuú i já nandaca tuhún na yehe já nacachi na já xihín i:

—Á co xínun ndá na cúu na ndíxi jahmá yaa yóho ta ndá naquixi na —nacachi na xihín i.

¹⁴ Já nanducú ñehe e tuhun nu ná já nacachi i já xihín ná:

—Yehe co xíní toho i joo mé ndó sa xíní vaha ndó ndá na cúu ñayivi yóho —nacachi i xihín ná.

Ta já nacachi na já xihín i:

—Na ndíxi jahmá yaa yóho cúu ná na nayaha nuú cuahá ndivaha tondóhó mé quivi tá nandoho ndivaha ini na. Ta viti sa nandoo cuachi na xihín ni Jesús, mé a cúu tátuhun ndicachi loho.

¹⁵ Sahá ña cán quéa ndíta na nu Ndióxi, mé a íin coo nu sácoo rey. Ta ñuu ta ndiví cajú ndiví na nu mé a ini veñuhu a. Ta mé Ndióxi, mé a íin coo nu sácoo rey cán ndáa vaha mé a na jáchi íin tuun a xihín ná.

16 Ta coó ga joco quixi nu ná ta ni a íchi ga ini na ticuú ta ni a cáyi ga na cája candii ta ni a ndíhi ga ini na sahá ña ihní.

17 Jáchi Jesús, mé a cúu tátuhun ndicachi loho cán ndácaan mahñú nu sácoo rey cán ta candaa mé á na tá quiahva ndáá in pastó ndicachi jana dá. Ta candaca mé á na cuhun na nu cána ticuú, dó cája ña ná catacu na anda ama cáa quivi. Ta yacó Ndióxi ticuú nuu tóco ndihi na sácu —nacachi na sacuahá cán xihín i.

8

Tá nasahnda Jesús, mé a cúu tátuhun ndicachi loho cán inga sello, ña cáhusa

1 Tá nasahnda Jesús, mé a cúu tátuhun ndicachi loho cán inga sello, ña cáhusa já nacatáji nú tóco ndihi ñaha indivi tátuhun tixi java hora.

2 Tá nandihí já naxini i ndíta usa táto Ndióxi nu á. Ta in in mé táto Ndióxi cán nañehe ná in in trompeta.

3 Já naxinu inga táto Ndióxi candichi a nu náa ña ín yati nu ín coo Ndióxi nu sácoo rey cán. Ta cáñee in cohó chíñíhmá ndáha á, ña jiuñun cuáán. Ta nañehe á cuahá ndivaha jusa, ña joco a ña nu náa, ña nacavaha xihín jiuñun cuáán. Ta quiahva já joco ri a nu náa cán ña xíca tahví na cúu cuénta Jesús nu Ndióxi.

4 Ta mé ñihma nacana nuu cohó chíñíhmá cáñee ndáha táto Ndióxi cán nandindita cuahan nu Ndióxi tá quiahva ndíndita ña xíca tahví na cúu cuénta mé á nu á.

5 Anda já natiin táto Ndióxi cán cohó chíñíhmá ta já najácutú a ña xihín tití ñuhu, ña naquehe a nu náa cán. Ta já nacuihna ña jatá ñuyíví. Anda já nacasáha cáhndi tátuhun tá cána javi. Ta jandá johó xójo cúu ta cána tasa ta naquixi in nditáan ndeé ndivaha jatá ñuyíví.

Tá nativí ndíhusa táto Ndióxi trompeta

6 Tá nandihí já nasacanduu tiaha ndíhusa táto Ndióxi tiví na trompeta ña cáñee ndáha na.

7 Ta in táhan ndíhusa táto Ndióxi cán nacasáha nativí a mé trompeta cán. Ta já nacuyu ñuhu cáyi xihín ñí ña nacava táhan xihín nui jatá ñuyíví. Ta chí nacayi in táhnda

nuu uní táhnda ñuyíví yóho ta jári naquihvi ñuhu in táhnda nuu uní táhnda yíto ndíta yucu ta jári yucu cuí nacayi ndihi a.

8 Tá nandihí já nativí táto Ndióxi ña cáhivi cán inga trompeta. Ta naxini i najani tátuhun in yucu cándaha xihín ñuhu cuahan ndicava nuu tañuhú. Ta in táhnda nuu uní táhnda tañuhú cán nanduu dó nui.

9 Ta in táhnda nuu uní táhnda tóco ndihi ñaha ñuhu ini tañuhú naxihí a. Ta quiahva já nandihí saha in táhnda nuu uní táhnda barco nasandojó nuu tañuhú cán.

10 Ta táto Ndióxi ña cáhuni cán nativí a inga trompeta ta já naxini i naquee in quimi cáhnu cándaha xihín ñuhu ita vaxi rí ndícava rí ñuyíví. Naquee rí indivi ta nandicava rí nu ñuhu nuu in táhnda nuu uní táhnda yuta xihín chicoho nu cána ticuú.

11 Ta mé quimi cán naní rí ña ova. Ta nacaja rí ña nacahova in táhnda nuu uní táhnda ticuú. Ta naxihí cuahá ndivaha ñayivi tá naxihi na dó ova cán.

12 Tá nandihí já nativí táto Ndióxi ña cacomi cán inga trompeta já nanaá in táhnda nuu uní táhnda nuu candii cán. Ta quiahva já nacaja ri a xihín yoo ta xihín quimi. Sahá ña cán quéa coo nacuu tuun vaha candii xihín yoo xihín quimi cán. Ña cán quéa nacamaní tátuhun in táhnda nuu uní táhnda tuun candii cán jatá ñuyíví. Ta quiahva já nacamaní tuun yoo xihín quimi ñuu.

13 Tá nandihí já nasandehé e ta já naxini johó i cati ndixi in táto Ndióxi ndáchí a mahñú indivi. Ta cáyuhú cohó a já cáhí a já:

—Ay, ay, ay ndáhví nahá nacuu ñayivi ndúu ñuyíví jáchi ndají ndoho ini na tá ná tiví uní ga táto Ndióxi trompeta —cáhí a.

9

1 Tá nandihí já naxini i nativí táto Ndióxi ña cáhuhun cán inga trompeta. Ta naxini i naquee in quimi indivi ta nandicava rí jatá ñuyíví. Ta nañehe táhvi rí cacomí rí yávi ña cuu cuná ri yávi cuná ndivaha, ña co xínu nu ndíhi nuu.

2 Ta mé quimi nasuná ri yuyéhé mé yávi cuná já nandindita ñihma tátuhun ña ndíndita yuhu horno cáyi. Ta mé ñihma

naçana cân najánaá nuú candii xihín nuú tachí viti.

³ Ta tañu ñihma cân naqueta cuahá ndivaha tica, rí nandicuti nuu ní cúu ñuyíví. Ta ñahehe táhvi rí cacuu rí rí cuehe tá quiahva cuehe líhma.

⁴ Ta natahnda chuun nu rí ña ná a jándihi toho rí sahá yucu ni sahá ñaha cuí ni saha yitó cuí ñuyíví yóho. Jáchi natahnda chuun nu rí ña ná tiin rí ñayivi cuití va, na co cándaa marca Ndióxi taan.

⁵ Joo coó ñahehe rí ñamaní cahní rí na. Ña naçaja rí xihín ná quea ná tiin rí na ña ná cahma na tixi uhun yoo. Ta tá quiahva cáhma na tá tinn líhma na quiahva já cáhma na tiin rí na.

⁶ Mé quivi já nducú ñayivi quivi vaha na joo a cúu quivi na. Vatí cúni quivi na joo a cúu quivi na.

⁷ Mé tica tinn ñahá cân ndáa rí tá quiahva ndáa cuáyí, rí ndúu tiahva cuhun cani táhan. Ta tá quiahva cúni coo tiyivi, ña jjuhun cuáán sándójó jini rey quiahva já cúni coo ña cándójó jini rí cân. Ta tá quiahva cúni coo nuú ñayivi quiahva já cúni coo nuu ri.

⁸ Ta tá quiahva íin íj jini najihí quiahva já íin íj jini ri. Ta tá quiahva ndáa nuhu león quiahva já ndáa nuhu rí.

⁹ Ta jáhvi yicá ndicá mé tica cân xihín jahmá çaa, ña sándixi soldado câni táhan na. Ta tá cáhma cáti ndixi ri cúu á tátuhun tá cáti saha cuaha cuáyí tá ñuhu rí carreta xínu rí cuahan rí cani táhan rí.

¹⁰ Ta íin íñu ndóho ri ña tinn tátuhun ndohó líhma. Ta xihín ña cân ñahehe táhvi rí tiin rí ñayivi ña ná cahma na tixi uhun yoo.

¹¹ Ta mé da cómi cuénta saha mé tica cân naní da Abadón tuhun hebreo ta naní da Apolión tuhun griego. Ta quivi dá cúni cachí a da jándihi saha tóco ndihi ñaha. Ta da cân cúu da cómi cuénta saha yávi, ña co xínu nu ndíhi nuu cân.

¹² Sa nayaha in tondóho cáhnu joo cámani ivi chága ña quixi.

¹³ Tá nandihí já nativí táto Ndióxi ña cáhiñu cân inga trompeta ta já naxini johó i cáhan in a naqueta tañu ndícomí ndíqui quéta in in xoo tito nu náa, ña jjuhun cuáán, ña cándichi nu íin Ndióxi cân.

¹⁴ Ta já naçachi mé a cân já xihín mé táto Ndióxi cáhiñu, ña ñehe trompeta cân:

—Janí ndícomí táto ña ndíco yuhú yuta cáhnu naní Eufrates jan —naçachi a.

¹⁵ Tá nandihí já naxini i najani ndícomí táto nasandíco cân ña ná cahní na in táhnda nuú uní táhnda ñayivi ndúu ñuyíví. Jáchi sa naquee jini va na chuun ña caja na ña yóho. Ta sa xini na ndá hora ta ndá quivi ta ndá yoo ta ndá cuia caja na ña.

¹⁶ Ta naxini johó i cáhan in a ndaja cúu na soldado cándójó cuáyí cuahan cân. Ta cúu ná ivi ciento millón soldado.

¹⁷ Ta cúni ndicani i nu ndo ndaja ndáa cuáyí jana ná, rí naxini i cân. Naxini i ña yóho tátuhun in sani joo co quíi toho i. Ta naxini i mé da cándójó cuáyí cân nachijahvi da yicá ndicá da xihín in çaa, ña cúu á color cuahá ñi xihín color ndíhí ticayí xihín color cuáán ita. Ta ndáa jini cuáyí tá quiahva ndáa jini león ta yuhu ri quéta ñuhu ita xihín ñihma xihín azufre.

¹⁸ Ta in táhnda nuú uní táhnda ñayivi naxihí na naçaja uní nuú tondóho naquixi jatá ñuyíví yóho. Naxihí na xihín ñuhu cáyi ta xihín ñihma ta xihín azufre, ña naqueta yuhú cuáyí.

¹⁹ Jáchi yuhu mé cuáyí cân xihín ndóho ri cúu nu ndáçaan ndée ri. Tá quiahva ndáa coo quiahva já ndáa ndóho ri. Ta xihín mé yiquí jini coo cân cája quini rí xihín ñayivi.

²⁰ Tóco ndihí java ga ñayivi, na coó nandihí saha xihín tondóho naquixi jata ñuyíví, na cân naçaja yii va na ña núu naçajaja na. Ta naçaja cáhnu yii va na ña quini. Ta coó najándacoo na cája cáhnu na yoco, ña naçavaha na xihín jjuhun cuáán ta xihín jjuhun cúxú ta xihín çaa cuáán ta xihín yuu ta janda ña naçavaha na xihín yito viti. Ta mé yoco yóho a cuú candehé a ta ni coo tácu johó a ta ni a cuú caca nuu a. Joo naçaja cáhnu tá naçaja cáhnu na ña.

²¹ Ta ni coó najándacoo na ña sáhní na ndii. Ta ni coó najándacoo na ña tají cája na. Ta ni coó najándacoo na ña ndúu na xihín na coo cúu yí ná á ñájihí na. Ta ni coó najándacoo na ña cája cuíhna na.

10

Tá naxini Juan ña cáñee in libro loho ini

ndáha inga tátō Ndióxi

¹ Anda já naxini i inga tátō Ndióxi, ña íin cuahá ndivaha ndée. Nanuu a indivi naquee a vaxi a tañu in vico ta cánúu in coo yánquí jini á. Ta yéhe nuu á tá quiahva yéhe candii. Ta sahá cúu á tátuhun ivi jihin cándaha xihin ñúhu.

² Ta ini ndáha mé á naxini i cáñee in libro loho ña nativi tátuhun yivi joo nandindica ña. Ta naxinúu mé á saha cuáha nuu tañuhú ta naxinúu a saha íti a nu ñúhu.

³ Ta nacayuhú cóhó a tátuhun tá ndáhyi león. Ta tá nacayuhú a já naxini johó i ña nacahan cóhó usa tasa tá nacana ña.

⁴ Tá nandihí nacahan ndíhusa tasa cán já nanducú u cahyí i ña nacachi a joo naxini johó i cáhan in a naquixi chí indivi ta já cáchí a já xihín i:

—A cáhyún ña nacachi ndíhusa tasa nacana jan. Xíní ñúhú coo jehé a —nacachi mé a cán xihín i.

⁵ Anda já naxini i mé tátō Ndióxi ña cánúu in sahá nuu tañuhú ta inga sahá nu ñúhu cán, nandínehe a ndahá cuáha indivi.

⁶ Ta já nacahan mé á quivi Ndióxi ta já nasahan tuhun a jáchi Ndióxi tácu a anda ama cáa quivi, mé á nacavaha indivi xihin ñuyiví xihín tañuhú xihín tóco ndihí ñaha íin nuu á. Ta já nacachi mé tátō Ndióxi já:

—A cáyancá ga

⁷ jáchi tá ná casahá tiví tátō Ndióxi ña cáhusa cán trompeta já xinú coo nu tóco ndihí ña nasacu ini Ndióxi coo jehé janda sanahá. Jáchi sa nacaxi tuhun mé á xihín profeta cuéntá mé á ña ná cahan na sahá ña yóho nuu ñayivi —cáchí tátō Ndióxi.

⁸ Anda jáví naxini johó i nacahan tucu mé tátō Ndióxi indivi já nacachi a já xihín i:

—Cuáhán quehe libro loho núná nuu cán. Ndi quehe a ndáha tátō Ndióxi, mé a cánúu in saha nuu tañuhú ta inga sahá nu ñúhu jan —nacachi a.

⁹ Tá nasaa i nu tátō Ndióxi cán já naxica i nu á ña ná quiahva libro loho cán nuu i. Ta já nanducú ñehe tátō Ndióxi cán tuhun nuu i já nacachi a já xihín i:

—Yóho íin libro loho joo xíní ñúhú casún ña. Vatí mé a ndaa tá ná casún ña cacuu a tátuhun tá casún ñuñu jáchi caviji ndivaha

yuhun caja ña. Joo tá nandihí nduu a ña ova ini tisún —nacachi a xihín i.

¹⁰ Tá nandihí já natiin i mé libro loho ndáha tátō Ndióxi cán ta já nasaxí i ña. Ta nacaviji yuhú u xihín á tátuhun ñuñu. Joo tá sa nacocó i ña já nacahova ña ini tixi i.

¹¹ Anda já natahnda chuun nuu i já nacachi a já xihín i:

—Ndítahan nuun caxi tuhun tucún xihín ñayivi ña cáhan Ndióxi sahá cuahá ndivaha ñuu xihín cuahá ndivaha nación nu cáhan na ndijáa tuhun. Ta xíní ñúhú caxi tuhún ña nuu ndijáa na cómí cuéntá sahá ñuyiví —nacachi a xihín i.

11*Ivi na cúu testigo*

¹ Tá nandihí já nasahan na in yító vara, dó chiquiahvá nuu i. Ta tá cúni coo ndoo já cúni coo mé vara cán. Ta já nacachi na já xihín i:

—Candichi ta chiquiahvún veñuhu cáhnu Ndióxi. Ta ndítahan chiquiahvún nu náa Ndióxi viti. Ta ndítahan cahvún ndaja cúu na cája cáhnu Ndióxi mé jan.

² Joo coto a chíquiahvún ñundáhyi, ña cáva nuu ndícomí tito yéhe veñuhu cán. Jáchi sa nandíquiahva Ndióxi ña yóho nuu ñayivi tóho ña ná caja tá quiahva cúni mé ná xihín Jerusalén, ña cúu ñuu yii ñaha Ndióxi tixi ivi jico ivi yoo.

³ Ta já chindahá yéhe ivi testigo, na candixi jahmá ndáhyí, ña ndíxi ñayivi tá cándíí ini na. Ta cuhun na cahan na sahá yéhe tixi in mil ivi ciento uní jico quivi —nacachi na.

⁴ Ta naxini i ivi yitó olivo xihín ivi nu sándójó íti, dó cúu yuhú nuu testigo ndíta nu Ndióxi, mé a sáhdá chuun nuu ñuyiví.

⁵ Ta ni in na a cuu caja ni in ñaha xihín ndíví testigo Ndióxi yóho jáchi cuu caja na ña ná cana ñúhu ita ini yuhu ná ta cuu chicao ñúhu na já ná jándihí na sahá na ihvi na. Ta quiahva já quivi ndá na ná nducú caja xixi xihín ná.

⁶ Ndíví mé testigo Ndióxi yóho íin ndée ná chicaji na indivi já ná a cúun javi nani cáhan na cuéntá Ndióxi nuu ñayivi. Ta íin ndée ná ndaja na ticuúí ña ná nduu dó ni. Ta íin ndée ná chicao na ndá cuehe cúni

mé ná chicao na jatá ñuyíví yóho. Ta núná nu ná caja na ña ndaja tañu cúní mé ná.

⁷ Joo tá sa nandihí naçahan ndíví testigo yóho xihín ñayivi janda jáví quixi in quití quini, rí queta tañu yávi, ña co xínu nu ndíhi nuu cán. Ta já caní táhan rí xihín ndíví na cán ta quee vaña rí xihín ná ta cahní rí na.

⁸ Ta já canduu yiquí cuñu ndíví na cán mahñú java ndaa cáyé ñuu Jerusalén nuú nasahní na Jesucristo, mé á cúú xitoho í. Ta mé ñuu Jerusalén yóho cúú á yuhú nuu ñuu Sodoma xihín nación Egipto sahá cuachi cuahá caja ñayivi ndúu cán.

⁹ Ta ñayivi ndúu ndijáá ñuu xihín ndijáá nación xihín na cahan tá nuú tuhun xihín na naquixi ndijáá chichi cuni na yiquí cuñu mé testigo Ndióxi yóho tixi uní quiví java. Ta a quiahva toho na ñamaní jánduxu na ndíví testigo Ndióxi yóho.

¹⁰ Ta ñayivi ndúu ñuyíví cajji ndivaha ini na sahá ña naxihí ndíví testigo Ndióxi yóho. Ta cávatá na janda quiahva jasá ñaha nu táhan johó na sahá ña naxihí ndíví testigo Ndióxi, na najándoho ndivaha ini ñayivi ñuyíví xihín ña naçahan na.

¹¹ Joo tá sa nayaha uní quiví java chí jánditacu Ndióxi ndíví testigo cán já ná ndacoo tucu na. Ta tá ná cuni ñayivi ña yóho casahá quiji ninu na xihín ña yíhvi na.

¹² Anda já cuni johó ndíví testigo cán in a cahan cóhó indiví. Ta já cachi a já xihín ná: —Cuánda ndó chóho —cachi a já xihín ná.

Já ndaa na indiví tañu in vico nuú ndihí na ihvi na.

¹³ Ta mé hora já taan ndeé ndivaha. Ta jándihí a in táhndá nuú uxu táhndá mé ñuu cáhnu cán ta já quivi usa mil ñayivi. Ta na coo naxihí cán chutú ndaa na xihín ña yíhvi na ta já casahá na caja cáhnu na Ndióxi, mé a íin indiví.

¹⁴ Sa nayaha va tondóhó cáhivi. Joo sa cátivi tondóhó cáhuní vaxi a.

Tá nativí tátó Ndióxi trompeta cáhusa

¹⁵ Ta tátó Ndióxi ña cáhusa cán nativí a inga trompeta. Ta tá nativí a do já naxini johó i cahan cóhó cuaha ná indiví. Já cáhí na já:

Ta viti nandindaa hora sáhndá Ndióxi, xitoho í xihín Jesucristo chuun.

Ta mé á quéa nachindahá Ndióxi cacomí a cuéntá sahá ñayivi.

Ta íin ndeé a cahnda chuun nuú ñuyíví yóho anda ama cáa quivi, naçachi cuaha ná mé indiví.

¹⁶ Ta ndíhoco comí na sacuaña, na naçava tñyivi nasanduu coo nu táyi vaña yati nu íin coo Ndióxi cán, naçaxítí na janda quiahva naçani ndaa taan na nu ñúhu ta naçaja cáhnu na Ndióxi.

¹⁷ Já naçachi na já xihín á:

Ndíquiahva nde ndixahvi nu ndóhó, Ndióxi, xitoho nde, mé a íin ndeé caja tóco ndihí ñaha.

Janda tá cámaní cava sahá saha ñuyíví nasahin va mé ndó.

Ta sa já íin ndó viti ta quixi tucu ndó.

Ndáha mé ndó íin ndihí ndeé viti sahá ña cán quéa naçasahá ndo sáhndá ndo chuun nuú ñayivi.

¹⁸ Ta ñayivi ndúu níí cúú ñuyíví naçasahá na xójo ndivaha ini na.

Joo viti naxinu coo quivi caja xíxi ndó xihín na cán.

Ta viti naxinu coo hora caja vií ndó sahá na sa naxihí.

Ta sa naxinu coo hora chahvi ndó nuú na profeta, na cahan cuéntá mé ndó.

Já naxinu coo hora chahvi ndó nuú na cúú cuéntá mé ndó, na caja cáhnu mé ndó,

ta coo caja toho a á cúú ná na náhnu á cúú ná na válí.

Ta naxinu coo hora jándihí ndó sahá ñayivi quini, na caja ña núu xihín ñuyíví yóho, cáhí na cán caja cáhnu na Ndióxi.

¹⁹ Tá nandihí já naxini i nanuna yéhe veñuhu Ndióxi, ña íin indiví. Ta cán tívi ndacaan sato arca ñaha Ndióxi. Ta já naçasahá cána tasa. Ta naxini johó i jandá johó vaá cúú tácu cahan na. Ta naçasahá cána javi ta táan ndeé ndivaha ta cúun ndivaha ñíí.

12

Naxini Juan ña ndúcu in coo quini caja xíxi rí xihín in ñañáha

¹ Tá nandihí já naxini i nayaha in ña xituhún ndivaha indiví. Naçqueta in ñañáha, ña cátivi jáhma ña cúú candii. Ta

cándichi ñá jatá yoo. Ta cánúu in tiyivi jini ñá, ña nacacutú xihín uxu ivi quimi.

² Ta sa víxi ñá cacu jahyi ñá. Ta ndáhví ndáhyi ñá jáchi ndóho ndivaha ini ñá janda quiahva ná cacu jahyi ñá.

³ Tá nandihí já nayaha inga ñaha cáhnu indiví. Naxini i in coo quini, rí cuahá. Ta ín usa jini rí xihín uxu ndíqui rí. Ta cánúu in tiyivi jatá in in yiquí jini rí cán.

⁴ Ta mé coo quini cán nañuhu rí in táhnda nuú uní táhnda quimi ndúu indiví xihín ndóho rí. Ta já najaní rí mé quimi cán jatá ñuyíví. Ta mé coo quini cán nandaca ndichi rí yati nu ín ñáñáha cacu jahyi cán jáchi cúní rí caxí rí jahyi ñá tá ná cacu a.

⁵ Tá nandihí já nacacu in taa jahyi ñá, da cahnda ndeé chuun saha tóco ndihí ñayivi ñuyíví. Joo nasañehe Ndióxi a ninu nu ín coo mé á.

⁶ Ta naxinu ñáñáha cán cuahan ñá chí xoo yucú íchí jáchi mé cán sa nasacu tiahva Ndióxi nuú cuu coo ñá coto ñahá tixi in mil ivi ciento uní jico quivi.

⁷ Tá nandihí já nacasáhá cúu tondóho indiví. Ta naxini i Miguel xihín táto Ndióxi nacani táhan na xihín coo quini cán ta xihín táto mé rí.

⁸ Joo coo nacuu quee vaha coo quini cán xihín táto Ndióxi ña cán quea coo nacuu canduu chaga rí cán indiví.

⁹ Ña cán quea najácana Ndióxi mé rí cán janda ñuyíví yóho. Mé rí nasahin rí janda sanahá ndivaha. Ta naní rí Satanás, mé tiñáhá sacuahá, rí jándahvi tóco ndihí ñayivi ndúu ñuyíví. Mé rí xihín tóco ndihí táto rí ndíco jata rí najácana Ndióxi rí janda ñuyíví yóho.

¹⁰ Tá nandihí já naxini johó i cáhan cóho in a indiví já cáchí a já:

—Sa naxinu coo quivi cacu ndaa ínima ñayivi jáchi cómí Ndióxi cuénta saha ná xihín ndeé mé á. Ta sa naxinu coo quivi cahnda Jesucristo chuun, mé a nachindahá Ndióxi cacomí cuénta saha ñayivi. Saha ña cán quea sa nataxí Ndióxi tiñáhá sacuahá nu ín mé á jáchi ñuú ta ndiví nasahin rí nu mé á chicaan rí cuachi jatá na cúu cuénta Jesús.

¹¹ Mé na cúu cuénta Jesús naquee vaha na xihín rí sahá ña nacaja Jesús, mé a cúu tátuhun ndicachi loho tá naxita nii á ndica

crúxu saha ná. Ta naquee vaha na xihín rí jáchi coo najándacoo na cáhan na ña ndaa sahá Jesús. Ta co yíhví toho na quivi na saha mé á.

¹² Tóco ndihí ndó, na ndúu indiví xini ñuhú caji ini ndó. Joo ndáhví nahá nacuu na ndúu ñuyíví xihín na ndúu ini tañuhú. Jáchi xójo ndivaha ini tiñáhá sacuahá ta nanuu rí caja xíxi rí xihín ndó jáchi cánda vaha ini rí ña sa ja chá cuití cúní ndihí saha rí —nacachi a indiví.

¹³ Tá nacandaa ini mé coo quini cán ña najácana Ndióxi rí ñuyíví já nacasáhá rí ndicuíta ñee rí ñáñáha, ña nacacu jahyi cán.

¹⁴ Joo nañehe ñá ivi ndixi náhnu ndivaha, ña cúu tátuhun ndixi tíyahá. Saha ña cán quea nandachí xíca ña nu mé coo quini cán cuahan ña yucú íchí nuú nasahin ñá. Ta cán coto na ña tixi uní cuia java.

¹⁵ Tá nandihí já nacaja mé coo quini cán ña ná queta cuahá ndivaha ticuifí yúhu rí. Ta já nacavaha rí in yuta jáchi cúní rí jatañu rí mé ñáñáha cán.

¹⁶ Joo nachindeé ñundáhyi ñáñáha cán jáchi nandata ta naxihí ndihí a ticuifí nacana yúhu mé rí cán.

¹⁷ Ta xihín ña yóho ví ga ví naxojo ini coo quini cán xihín ñáñáha. Saha ña cán quea naquee rí cuahan rí caní táhan rí xihín java ga táhan na naquixi chichi mé ñá. Mé na yóho cúu ná na cája ña sáhnda tuhun Ndióxi ta co jándacoo na cája na ña ndaa ña najánaha Jesucristo nu ná.

13

Tá naxini Juan ivi quití quini

¹ Tá cándichi i nuú ñutí yuhú tañuhú já naxini i naqueta in quití quini tañu tañuhú cán. Ta nasahin usa yiquí jini rí xihín uxu ndíqui rí. Ta cánúu in tiyivi jatá in in ndíqui rí. Ta ndaa tuhun ña cánahá xihín Ndióxi nuú in in yiquí jini rí.

² Mé quití quini naxini i yóho, cáa rí tá quiahva cáa ndicaha. Ta saha rí ndaa ña tá quiahva ndaa saha oso. Ta yúhu rí cúu á tátuhun yúhu león. Ta mé coo quini cán nasahan rí ndeé rí nu mé quití quini, rí naqueta ini tañuhú yóho ña ná cuu cacomí rí cuénta sahá ña cómí mé coo quini cán

cuéntá saha. Ta cúu cája rí ña cúu cája mé coo quini.

³ Ta in táhan ndíhusa yiquí jíní mé quití quini cán nandicuehe cáhvi ña. Joo tá nandihí já nandivaha ña. Saha ña cán queá ndaja táhan ñayivi ndúu ñuyíví nacatontó ndivaha na. Ta já nacasáhá na ndíco na jata mé quití quini cán.

⁴ Ta nacaja cáhnu ñayivi coo quini cán jáchi nasahan rí ndée rí nuú quití quini cán. Ta quiahva já nacaja cáhnu na mé quití quini cán já cáhí na já:

—Coó ga inga rí cáhnu chága nu quití quini yóho. Ta ni in rí a cúu quihvi cani táhan xihín rí —cáhí na cája cáhnu na mé quití quini cán.

⁵ Ta mé quití quini cán nañehe rí ñamaní ña ná cahán rí tuhun quini ndivaha, ña jándihíhvi rí Ndióxi. Ta nañehe rí ñamaní cahnda rí chuun tixi ivi jico ivi yoo.

⁶ Saha ña cán queá nacasáhá cahán quini rí saha Ndióxi ta jándihíhvi rí mé á xihín ña núu cahán rí. Ta cahán núu rí saha mé nu ín Ndióxi cán xihín saha tóco ndihí na ndúu indiví.

⁷ Ta nañehe rí ñamaní cani táhan rí xihín na cúu cuéntá Ndióxi janda quiahva quee vaha rí xihín ná. Ta nañehe rí ñamaní cahnda rí chuun sahá ndaja táhan ñayivi naquixi ndijáá chichi xihín na cahán tá nuú tuhun xihín na ndúu ndijáá ñuu xihín ndijáá nación.

⁸ Tóco ndihí ñayivi ñuyíví caja cáhnu na quití quini cán jáchi janda tá camaní cava sahá saha ñuyíví coo nacahyi toho quivi ná nu libro nu ndaa quivi tóco ndihí na catacu anda ama cáa quivi. Mé libro yóho ín a nu Jesús, mé á cúu tátuhun ndicachi loho, rí naxihí ndica crúxu.

⁹ Cuni johó vaha ndó, na vaha johó.

¹⁰ Ndá na ná chican in na vecaa, cahun ri mé va na vecaa. Ta ndá na ná cahní inga na xihín yuchú cáni, xihín yuchú cáni quivi ri mé va na. Saha ña cán queá xíní ñúhú quiahva ndee ini na cúu cuéntá Ndióxi ta xíní ñúhú candeé cáhnu ini na mé á.

¹¹ Tá nandihí já naxini i inga tucu quití quini, rí naqueta nuú ñundáhyi. Ta nasahin ivi ndiquí rí ta ndaa ña tá quiahva ndaa ndiquí ndicachi. Joo cahán rí tátuhun cahán in coo quini.

¹² Ta nacaja chúun rí tóco ndihí ndee mé quití quini nu cuítí cán nu ín mé rí. Nacaja rí ña ná caja cáhnu tóco ndihí ñayivi ndúu ñuyíví mé rí naqueta nu cuítí cán. Jáchi nandicuehe cáhvi jiní rí nu cuítí cán joo nandivaha rí.

¹³ Mé inga quití quini cáhivi cán nacaja cuahá ndivaha rí ñaha xitúhún. Nacaja rí ña ná quixi ñúhu cáyi chí indiví ta naxinu a nacuyu a ñuyíví nu tóco ndihí ñayivi.

¹⁴ Ta najándahvi rí ñayivi ndúu ñuyíví xihín tóco ndihí ña xitúhún, ña nañehe rí ñamaní caja rí yóho nu mé rí nu cuítí cán. Ta nasahnda mé inga rí cán chuun nuú ñayivi ñuyíví ña ná cavaha na in tiníñu yúu quití quini nu cuítí cán. Mé rí nandicuehe quini ndivaha rí xihín yuchú cáni joo nandivaha rí.

¹⁵ Ta mé rí cáhivi cán nañehe rí ñamaní ña jánditacu rí tiníñu yúu mé rí nu cuítí cán já ná cuu cahán rí. Ta já ná cuu cahnda rí chuun ña ná cahní rí ñayivi, na coo cuni caja cáhnu mé rí quini cán.

¹⁶ Ta mé rí cáhivi cán nacaja rí ña ná quihvi marca ndahá cuáha ñayivi á taan na. Ta coo caja toho a á cúu ná na valí á na náhnu, á cúu ná na cuicá á na ndahví. Ta ni coo caja toho a á cúu ná na xíca núná, á cúu ná na cómi xitoho cuéntá saha. Nu tóco ndihí ñayivi naquihvi marca nacaja mé rí cán.

¹⁷ Ta ni in ñayivi a cuú cueen na ñaha ta ni a cuú jicó na ñaha tá coo nanani mé marca cán na. Ta tá coo cándaa quivi mé quití quini, rí nu cuítí cán taan na á tá coo numero mé rí cándaa taan na já queá a cuú cueen na ñaha jáchi numero yóho náha ndaja naní mé rí nu cuítí cán.

¹⁸ Xihín ña yóho cuu candaa ini ndó ndá na cúu na ndíchí jiní. Ndá ndó, na cándaa ini xíní ñúhú jítá ndo cuéntá xihín numero ña cúu quivi mé rí nu cuítí cán jáchi cúu á tátuhun quivi ñayivi. Ta numero yóho cúu á iñu ciento uní jico iñu.

14

Tá xíta in ciento ivi jico comi mil ñayivi cája cáhnu na Ndióxi

¹ Tá nandihí já naxini i Jesús, mé á cúu tátuhun ndicachi loho cándichi a jata yúcu

naní Sión. Ta xihín mé á ndíta in ciento ivi jico comi mil ñayivi, na ndáa quivi Jesu taan, mé a cúu tátuhun ndicachi loho cán. Ta quiahva já ndáa quivi Ndióxi, tátá a taan na.

² Ta naxini joho i in a cáhan chí indivi. Ta tá cáhan mé a cán cúu á tátuhun tá níhi cúyu ticuú tañu tóto. Ta níhi a tátuhun tasa tá cána. Ta tácu a tá quiahva tácu nu jácaha cuahá ndivaha na arpa.

³ Ta naxini joho i ña saá xíta mé in ciento ivi jico comi mil ñayivi nu in coo Ndióxi cán xihín nuú comi mé ña tácu cán xihín nuú na sacuahá cán. Mé na xíta cán cuití va cúu na cuu catiahva cata na ña jáchi cúu ná na ñacaxi Ndióxi jácaacu a tañu ñayivi ndúu ñuyíví.

⁴ Ta na yóho cúu ná na vií, na coó ñacaja quini mé jáchi coó ñasanduu na xihín najihí. Cúu ná na ñasandico ní tiempo jata Jesús, mé a cúu tátuhun ndicachi loho. Cúu ná na ñacaxi Ndióxi jácaacu a nu cuití ña ná joço a na nu mé á xihín nu Jesús, mé a cúu tátuhun ndicachi loho.

⁵ Ta ni in tálaá ña tuhún coó ñacahan na. Ta ni in na coó ñacuu ñehé iní chícáan cuachi jata ná.

Tá cáhan uni táto Ndióxi tuhun vaha saha Jesucristo nuú ñayivi ndúu ñuyíví

⁶ Tá nandihí já naxini i inga táto Ndióxi ndáchí a mahñú ndaa indivi. Ta ñéhe a tuhun vaha sahá Jesucristo ña in anda ama cáa quivi caxi tuhun a ña nuú ñayivi ndúu ñuyíví, mé na ñaquixi ndijáa chichi xihín na cáhan tá nuú tuhun xihín na ndúu ndijáa ñuu xihín ndijáa nación.

⁷ Ta já cáyuhú mé táto Ndióxi cán já cáchi a já:

—Xíní ñúhú cayihví ndó Ndióxi ta xíní ñúhú caja cáhnu ndó mé á jáchi sa naxinu coo quivi caja vií mé á sahá ñayivi. Xíní ñúhú caja cáhnu ndó mé á jáchi mé á queá ñacavaha indivi xihín ñuyíví ta mé á queá ñacavaha tañuhú xihín ndijáa nu cána ticuú —cáchi táto Ndióxi cán.

⁸ Tá nandihí já naxini i inga táto Ndióxi ta já ñacachi a já:

—Ay, ay, sa nandihí va sahá ñuu cáhnu naní Babilonia xihín sahá ñayivi ñasanduu jan. Ta na jan ñasacuu na na najánaña ichí quini nuú ñayivi ndúu ñuyíví já ná caja na

tá nuú ña núu. Joo viti sa nandicava va mé Babilonia —cáchi táto Ndióxi, ña cáhivi cán.

⁹ Tá nandihí já naxini i ñaqueta inga táto Ndióxi, ña cáhuni. Ta ñacasáhá cáyuhú cóhó a já cáchi a já:

—Ndá na ná caja cáhnu quití quini xihín tiniñu yúu ri ta sahan na ñamani ña ná nani marca mé rí cán taan na á ndáha na

¹⁰ já queá ndoho ndivaha ini na caja Ndióxi jáchi xójo ndivaha ini mé á xihín ñayivi quini. Jácana Ndióxi na nu cándaha ñúhu cáyi xihín azufre ta candehé tóco ndihí táto Ndióxi ta candehé Jesús, mé a cúu tátuhun ndicachi loho cán ña ndóho na.

¹¹ Ta cána ñihma ini nu ñúhu mé na ndóho ini cán anda ama cáa quivi. Ta ni ñuú ni ndiví co ndiquehe ndée ná nu ndóho ini na jáchi ñacaja cáhnu na quití quini cán xihín tiniñu yúu ri ta ñasahan na ñamani ña ñanani marca quivi rí cán yiquí cuñu na.

¹² Xíní ñúhú quiahva ndeé ini na cúu cuéntá Ndióxi, mé na cája tóco ndihí ña sáhdá Ndióxi ta co jándacoo na ña cája cáhnu na Jesús —cáchi táto Ndióxi cáhuni.

¹³ Tá nandihí já naxini joho i ñaquixi in a cáhan chí indivi já ñacachi a já xihín i:

—Cahyún ña ná cáhan i xuhun yóho: “Viti ta chí nuu cajji ini na naxihí, na cándéé ini Jesús, xitoho na” —cáchi a.

Ta já cáchi ínima yii Ndióxi já:

—Mé a ndaa cajji ini na cán jáchi ndiquehe ndée ná sahá ña ñacaja chúun vaha na cuéntá mí i. Ta ña vaha ñacaja na cán coo a ní tiempo xihín ná —cáchi ínima yii Ndióxi.

Tá jándoho Ndióxi ini ñayivi

¹⁴ Tá nandihí já ñasandehé e ta já naxini i in vico yaa. Ta cánuu in da cáa tá quiahva cáa in ñayivi jata mé vico. Ta cánuu in tiyivi jjuhun cuáan yiquí jíní da ta cáñe in machiti tojo jeen ndáha dá.

¹⁵ Tá nandihí já ñaqueta inga táto Ndióxi ini veñuhu Ndióxi cán ta já cáyuhú cóhó a já cáchi a já xihín mé da in coo jata vico cán:

—Xíní ñúhú casáhún jáqueún ña in ñuyíví xihín machiti tojo ñéhún jan jáchi sa naxinu coo va hora jáqueún ña in jata ñuyíví jáchi sa ñachichi va viti —ñacachi a.

¹⁶ Anda já naxini i ñacasáhá mé da ñasanúu jata vico cán jáquihvi da machiti

tojo da jatá ñuyíví ta já najáquee da ñaha jatá ñundáhyi.

17 Tá nandihí já naxini i naqueta inga tucu táto Ndióxi ini veñuhu íin indiví cán ta quiahva já cáñee inga machiti tojo jeen ndahá a.

18 Ta nu íin nu náa mé veñuhu cán naqueta inga táto Ndióxi, mé a cómí cuéntá saha ñúhu ita ña cáyi. Ta já nacahan cóhó a xihín mé táto Ndióxi nu cuítí cán, ña cáñee machiti tojo jeen ndáha cán já nacachi a já:

—Xíní ñúhú jáquihvún machiti tojo jeen cáñee ndáhun jan ta casahá cahndún uva cúun nu dó uva ndúu ñuyíví jáchi sa nachichi uva nu do —nacachi a.

19 Anda já jáyaha táto Ndióxi cán machiti tojo nuú ñundáhyi ta já nasahnda ndihí a uva nu tó uva cán ta nataán a uva cán ini in pila cáhnu ña ná cuhni ri. Ta ña yóho náha ndá quiahva quini ndoho ini ñayivi caja Ndióxi jáchi xójo ndivaha ini a xihín ná sahá cuachi cája na.

20 Ta tá nasuhní uva cán ini mé pila cáhnu yuhú ñuu cán já nacana ñii, dó cúu tátuhun yuta cúná janda quiahva cani ndaa dó yati yuhú in cuáyí. Ta tá quiahva cáni xíca dó cuahan do cúu á tátuhun uní ciento kilómetro.

15

Tá xínu coo táto Ndióxi xihín usq chága tondóhó quixi jatá ñuyíví

1 Tá nandihí já naxini i inga tucu ña cáhnu chí indiví ta chí nacatontó i. Ta ña naxini i cúu usq táto Ndióxi ta in in ña yóho ñéhe a chága tondóhó quixi jatá ñuyíví ña ná jándihí a ña xójo ini Ndióxi.

2 Ta naxini i in ñaha ta náha tátuhun in tañuhú ta tá quiahva íin nuú yutátá quiahva já íin nuu do joo cúu dó dó cáva táhan xihín ñúhu cáyi. Ta yati jín mé tañuhú náha tátuhun yutátá cán ndíta ñayivi, na nacandee nasahnu nu tóco ndihí ña núu sahá ña coo nacaja cáhnu na quití quini xihín tñiñu yúu ri. Ta ni coo naquehe na túni ña cúu numero mé rí quini cán. Ta mé na ndíta cán cáñee arpa ndáha na, dó nasahan Ndióxi nu ná.

3 Ta xíta na ña naxita Moisés, mé da nacaja chúun cuéntá Ndióxi. Ta xíta na ña

naxita Jesús, mé a cúu tátuhun ndicachi loho cán ta já cáchí na já:

Cátontó nde tá xíní nde tóco ndihí ña nacavaha mé ndó, Ndióxi, xitoho nde,

jáchi íin ndée ndó caja ndó tóco ndihí ñaha. Íchi cuéntá mé ndó cúu á íchi ndacu ta cúu á íchi cuéntá ña ndaa.

Ta mé ndó cúu ndó ña cómí cuéntá sahá ndaja táhan nación ndúu ñuyíví yóho.

4 Tóco ndihí ñayivi yíhví na ndohó, mé a cúu xitoho nde ta cáhan na ndaja cáhnu cúu mé ndó.

Jáchi in túhún mé ndó cúu ndó Ndióxi yíi. Ta tóco ndihí ñayivi ndúu ndijáá nación xínu na caja cáhnu na mé ndó,

jáchi náha ndá quiahva cája ndó ña ndaa, cáchí na xíta na.

5 Ta tá sa nayaha ña yóho já nasandehé ta naxini i nanuna veñuhu indiví, ña nacavaha na xihín ñii quití. Ta nasañuhu ley Moisés cán.

6 Ta ini mé veñuhu indiví naqueta ndíhusa táto Ndióxi, mé a ñéhe usa nuú tondóhó quixi jatá ñuyíví. Ta ndíxi táto Ndióxi cán jahmá ví, ña lino, ña ndató ndivaha yéhe. Ta ndacaan in cinturón ña jjuhun cuáán tóco á ta cáni a janda yati yicá ndíca a.

7 Ta in táhan ndícomí mé ña tácu cán nasahan in in cóhó, ña jjuhun cuáán nuú in in táhan ndíhusa táto Ndióxi cán. Ta ini in in cóhó cán ñúhu ndaja táhan tondóhó ña vaxi jatá ñayivi ndúu ñuyíví caja Ndióxi, mé a tácu anda ama cáa quívi.

8 Ta nachutú ndaa veñuhu cán xihín ñihma, ña náha ndá quiahva cáhnu cúu Ndióxi xihín ndá quiahva cáhnu cúu ndee mé á. Ta ni in na coo nañehé ñamaní quíhví ini veñuhu cán janda quiahva naxínu ndíhusa tondóhó, ña ñéhe ndíhusa táto Ndióxi cán.

16

Usa coho ña ñúhu usq tondóhó

1 Tá nandihí já naxini joho i nacahan cóhó in a tañu veñuhu indiví cán. Ta já cáchí a xihín ndíhusa táto Ndióxi cán já:

—Cuáhán ndó cuyu ndó ndíhusa coho jan jata ñuyíví. In in a cán cúu á in

tondóhó chindahá Ndióxi jata ñuyiví ta ndoho ndivaha ini ñayivi xihín á —cáchi a.

² Anda já in tátō Ndióxi, mé a nu cuití nasahan nacuyu a ña ñúhu ini cohō ñéhe a cán jata ñuyiví. Ta já naxinu cuehe táhyi, ña ihvi ndivaha yiquí cuñu ñayivi, na ñaquehe marca quití quini cán, mé na ñacaja cáhnu tiniñu yúu ri.

³ Tá nandihí já inga tátō Ndióxi ña cáhivi cán nacuyu a ña ñúhu ini cohō ñéhe a jata tañuhú. Ta tóco ndihí dó nanduu dó ñi tátuhun ñi ndii. Ta tóco ndihí ña tácu ini tañuhú cán naxihí ndihí a.

⁴ Ta tá nandihí já nacuyu tátō Ndióxi ña cáhuni cán ña ñúhu ini cohō ñéhe a jata ndijáá yuta xihín ndijáá nu cána ticuú tá nanduu dó ñi.

⁵ Tá nandihí já naxini johó i cáhan in tátō Ndióxi, mé a cómi cuéntá sahá ticuú cán já cáchi a já:

—Tátá Ndióxi, mé ndó cája ndó ña ndaa jáchi ñacaja vií ndó sahá ñayivi jan. Yii ndivaha cúu ndó ta íin ndó viti ta janda saha nasahin ndó.

⁶ Najándoho ndó ini ñayivi jan jáchi nasata na ñi na cúu cuéntá mé ndó xihín ñi na profeta tá nasahní ñahá na. Joo viti ñacaja ndó xihín ná ña ná cohó na ñi já ná ndoho ini na. Ta quiahva já cáni a coo a — ñacachi tátō Ndióxi cán.

⁷ Tá nandihí já naxini johó i in a cáhan nu náa Ndióxi cán já cáchi a já:

—Tátá Ndióxi, mé ndó cúu ndó xitoho nde ta íin ndée ndó caja ndó tóco ndihí ñaha. Ta ñacaja ndó ña ndaa tá ñacaja vií ndó sahá ñayivi —cáchi a.

⁸ Tá nandihí já naxini i inga tátō Ndióxi ña cácomi cán ta nacuyu a ña ñúhu ini cohō ñéhe a jata candii. Ta xihín ña yóho ñañehé candii cán ndée á chicaan ñuhu a ñayivi xihín ñuhu cáyi.

⁹ Ta já ñacayí quini ndivaha tóco ndihí ñayivi. Joo coó ñaxeen na ndicó coo ini na ta ni coó ñacaja cáhnu na Ndióxi. Ña ñacaja na queá ñacasáhá na cánahá ndivaha na xihín Ndióxi, mé a íin ndée nu tóco ndihí tondóhó quixi jata ñuyiví yóho.

¹⁰ Tá nandihí já naxini i inga tátō Ndióxi, ña cáhuhun cán ta nacuyu a ña ñúhu ini cohō ñéhe a jata táyi nu íin coo quití quini cán. Ta já naxini i ñacanaá yavi mé nu ndúu

na sáhdá ri chuun nu cán. Ta já ñacasáhá mé na cán sáxi yihí na yáa ná jáchi ñacasáhá ndóho ndivaha ini na.

¹¹ Joo coó najándacoo na ña núu cája na. Ta sahá ña ñacahihvi ndivaha yiquí cuñu na cán xihín cuehe ndóho na já ñacanahá ndivaha na xihín Ndióxi, mé a íin indiví.

¹² Tá nandihí já naxini i inga tátō Ndióxi, ña cáhiñu cán ta nacuyu a ña ñúhu ini cohō ñéhe a jata in yuta cáhnu naní Eufrates. Ta já nahíchi ndihí ticuú nasañuhu ini yuta cáhnu cán ta já ñanuná nuú yaha na cúu rey, na ñaquixi chí xoo nu cána candii.

¹³ Tá nandihí já naxini i ñaqueta uní íinima quini. In rí ñaqueta yúhu coo quini ta inga rí ñaqueta yúhu da cúu profeta túhún cán. Ta mé íinima quini cán ndaa tá quiahva ndaa láhva cúhdó.

¹⁴ Ta rí cán cúu íinima rí quini, rí ñacaja ña xitúhún nuú ñayivi. Ta cúu rí rí queta cuahan jataca ndaja táhan rey sáhdá chuun nuú ñayivi ndúu ñuyiví já ná caní táhan na xihín Ndióxi. Jáchi sa ñacayati quiví nahá ndá quiahva cáhnu cúu Ndióxi jáchi mé á queá íin ndée cája tóco ndihí ñaha.

¹⁵ Anda já ñacachi Ndióxi já: “Cuéntá coo ndó jáchi tá quiahva jonáá xinu da cuíhná quiahva já jonáá xinu i nu ndo. Íin saha cáji ini ndá na sa ndátí tiahva saa i jáchi cúu ná tátuhun na nasandíxi tiahva jáhma. Já queá ná a cácahan nuú ná tá ndaa lahla na nuú ñayivi”, cáchi a.

¹⁶ Ta rí quini cán najátaca rí tóco ndihí rey sáhdá chuun nuú ñayivi in nuú naní Armagedón tuhun hebreo.

¹⁷ Tá nandihí já inga tátō Ndióxi ña cáhusa cán nacuyu a ña ñúhu ini cohō ñéhe a nu táchi. Ta já naxini johó i cáhan in a ini veñuhu indiví nu íin coo Ndióxi nu sácoo rey cán. Ta cáhan cóhó á já cáchi a já:

—Sa nayaha tóco ndihí ña ndítahan coo — ñacachi a.

¹⁸ Tá nandihí já naxini i ñacasáhá cána tasa. Ta naxini johó i jandá vaa johó cúu tácu cáhan na. Ta naxini johó i jandá johó cána javi. Ta ñacasáhá quíji ñinu ñundáhyi jáchi ñacasáhá táan ndeé ndivaha. Ta mé nditáan yóho nasacuu a ña ndeé

chága nu tóco ndihi ña táan jáchi janda quivi nasacu Ndióxi ñayivi ñuyívi coo naquixi inga nditáan ndeé tátuhun ña yóho.

¹⁹ Ta mé ñuu cáhnu ndivaha cán nandata uni ña. Ta ndijáa ga ñuu náhnu ndúu ñuyívi nacuyu ndihi a. Ta nandicuhun ini Ndióxi sahá ñuu cáhnu naní Babilonia cán ta najándoho mé á ini na ndúu cán jáchi xójo ndivaha ini a xihín ná. Ta ña ndóho na cúu á tátuhun xíhi na vino cuéntá tondóhó.

²⁰ Ta tóco ndihi isla ñúhu ini tañuhú xihín ndijáa java ga yucu ndúu jata ñundáhyi nandihí sahá.

²¹ Ta naxini i nacuun ñíí náhnu ña vee ndivaha tátuhun ivi jico kilo in in a. Ta janda indivi naquee a nacuyu a jata ñayivi ndúu ñuyívi. Ta nasahá na cáhahá na xihín Ndióxi sahá ña najácuyu a ñíí yóho jata ná. Jáchi mé a ndaa ña yóho nasacu a in tondóhó cáhnu ndivaha naquixi nu ná nacaja Ndióxi.

17

Tá jándihí Ndióxi saha ñá xíca jii

¹ In táhan ndihusa táto Ndióxi ña cáñee in táhan usa cohó ndáha cán naxinu a nuú i já nacachi a já xihín i:

—Naha quí yóho jáchi cúni jánaha i nuun ndá quiahva ndoho ini ñá xíca jii, ñá cáhnu, ñá íin coo nuú cuahá ticuí.

² Tóco ndihi na cúu rey ndúu ñuyívi yóho naquiji na xihín ñá cán. Najáxini ñá tóco ndihi ñayivi ñuyívi xihín ña núu nacaja ñá tá naquiji ñá xihín na coo cúu yí ña — nacachi táto Ndióxi cán xihín i.

³ Anda já nacaja ínima yii Ndióxi xihín i ña ndáca táto Ndióxi yehe nasahan i yucú íchí xihín á. Ta cán naxini i in ñáñáha cánúu jata in quití quini, rí cuahá. Ta níí cúu rí nacacutú xihín tuhun quini ña cáhahá xihín Ndióxi. Ta naxini i íin usa yiquí jíní rí xihín uxu ndíqui rí.

⁴ Ta mé ñá cánúu jata rí cán ndíxi ñá jáhma ndíhí ticayí, ña nacava táhan xihín ña cuahá. Ta nacacutú ña xihín juhun cuáán xihín yuu yáhví ndivaha xihín perla. Ta naxini i cáñee in cohó juhun cuáán ndáha ña. Ta nachutú ndaa cohó cán xihín ña núu ta xihín ña tiquíni nacaja ñá xihín datáa.

⁵ Ta ndaa in tuhun taan ñá, ña coo cándaa ini ñayivi. Ta já cúni cachi mé tuhun cán:

“Ñuu Babilonia cúu ñuu cáhnu ta cúu á tátuhun náná tóco ndihi najihí xíca jii. Ta cúu á tátuhun náná ndaja táhan ga ña núu ndúu ñuyívi yóho.”

⁶ Tá nandihí já náha ña naxini ndivaha mé ñáñáha jáchi naxihí ñá níí na cúu cuéntá Ndióxi, na naxihí sahá ña coo najándacoo na cáhan na saha Jesús. Ta tá naxini i ña yóho já nacatontó ndivaha i.

⁷ Ta já nacachi táto Ndióxi cán já xihín i:

—Ndá cuéntá quéa catontó nahún. Xíní ñúhú cuni johó vahún ña cáhan i xuhun jáchi ndicani i nuun ndía cúni cachi ña íin jehé saha ñáñáha yóho. Ta jári ndicani i nuun ndía cúni cachi quití quini, mé rí cánúu ñá, rí íin usa yiquí jíní xihín uxu ndíqui cán.

⁸ Mé quití quini naxinún yóho nasatacu rí sanahá joo viti coo tácu ga rí. Joo vaxi quivi ndindita rí ta queta rí tañu yávi, ña coo xínu nu ndíhi nuu cán. Ta tá nandihí já cuhun rí ndihi saha rí chí uun. Ta catontó ndivaha tóco ndihi ñayivi ndúu ñuyívi, na coo nacahyi quivi janda tá cámaní cava sahá saha ñuyívi nu libro nu ndaa quivi tóco ndihi na catacu anda ama cáa quivi. Catontó ndivaha na tá ná cuni na mé quití quini yóho, rí nasahjin sanahá ta coo tácu ga rí viti joo nditacu tucu rí nu ná.

⁹ Ta ndá ndó, na ndíhí jini, cuo candaa ini ndó ña yóho: Ndihusa yiquí jíní quití quini cán cúu á yuhú nuú usa yucu nu íin coo mé ñáñáha xíca jii cán.

¹⁰ Ta jári cúu á yuhú nuú usa rey. Ta uhun táhan rey yóho sa nandihí va saha. Ta inga táhan rey yóho sahnda da chuun nuú ñayivi viti ñúhú. Ta inga ga rey ña cáhusa cán cámaní xinu coo. Joo tá ná xinu coo da yóho já a coo nahá toho da cahnda da chuun nuú ñayivi.

¹¹ Ta quití quini, rí nasatacu sanahá ta viti sa coo ga rí, rí cán cúu rí yuhú nuu rey, da cáhuna cán. Vatí cúu dá táhan java ndihusa rey cán joo tá nandihí cahnda da chuun cuhun da ndihi saha dá chí uun.

¹² Ta ndihuxu ndíqui naxinún yóho cúu á yuhú nuú uxu rey, mé na cámaní casahá cahnda chuun nuú ñayivi ndúu ñuyívi. Joo in talaá hora ñehe táhvi na cahnda na

chuun xihin mé quití quini cán nuú ñayivi tátuhun rey.

¹³ Ta ndíhuxu rey yóho jándique táhan na tūhun na ña ná quiahva na ndée ná nu mé quití quini já ná cahnda rí chuun.

¹⁴ Ta cani táhan ndíhuxa na cán xihin Jesús, mé a cúu tátuhun ndicachi loho cán. Joo quee vaha Jesús xihin ná jáchi cúu á xitoho na náhnu ndúu ñuyíví yóho ta cúu á rey nuú ndaja táhan rey. Ta xoo Jesús cán canduu na nacana Ndióxi, mé na nacaxi a cacomí a cuénta saha. Cúu ná na coo najándacoo ña cándéé ini na mé á —nacachi táto Ndióxi xihín i.

¹⁵ Tá nandihí já nacachi tucu táto Ndióxi cán já xihín i:

—Ticuí, dó naxinún nu íin coo ña xica jii jan cúu dó yuhú nu ndijáá ñuu xihín ndijáá nación xihín ndijáá ñayivi, na cahan tá nuú tūhun.

¹⁶ Ta ndíhuxu ndíqui naxinún nuú quití quini jan cúu á yuhú nu mé uxu rey, na candají ña xica jii jan. Ta jándacoo na ña ta já caca lahla ña. Ta caxí ndáá na yiquí cuñu ña. Ta chicaan ñuhu ná ña xihín ñuhu cáyi.

¹⁷ Jáchi jáxinu Ndióxi ini na cán ña ná caja na ña cuni mé á. Ta jándique táhan na cán tūhun na ña ná ndiquiahva na chuun ndójo na nu mé quití quini cán ña ná cacuu rí tátuhun rey janda quiahva ná xinu coo nuú ña nacachi Ndióxi coo.

¹⁸ Ta ñañaña naxinún cán cúu ña yuhú nuú ñuu cáhnu cán ña sáhdá chuun nuú ndaja táhan na cúu rey —cáchi táto Ndióxi cán.

18

Tá jándihí Ndióxi sahá ñuu Babilonia

¹ Tá sa nayaha tóco ndihí ña yóho já naxini i inga táto Ndióxi, ña ndójo chuun cáhnu ta nanuu a chí indiví. Ta chí nandiyihvi ndaa jatá ñuyíví xihín quiahva yéhe mé táto Ndióxi cán.

² Ta já nacasáhá cáyuhú cóhó a já cáchi a já:

—Ay, ay, sa nandihí va sahá ñuu cáhnu Babilonia cán ta nanduu a tátuhun cavá tiñáhá. Cúu á tátuhun nuú nandicutú ndaa ínimá quini ñuhu rí. Ta nanduu a tátuhun in choho nu ñuhu tá nuú laa quini, rí cándají ñayivi.

³ Nandihí sahá ñuu Babilonia yóho, mé a cúu tátuhun in ñañaña xica jii. Jáchi najáxiní ña ndaja táhan ñayivi ndúu ñuyíví ta najácahan ña na ña ná caja na tá nuú ña núu ña xica ini na caja na. Ta mé na ñuu Babilonia jan nasahan na ñamaní ña ná xinu coo ndaja táhan da náhnu sáhdá chuun nuú nación ña ná xinu da ñuu Babilonia jan cuju da xihín ña xica jii jan. Ta na caja ndahvi ndicuicá na xihín tá nuú ña núu caja ña jáchi sátá joho ña ña cuicá ña —cáchi táto Ndióxi cán.

⁴ Tá nandihí já naxini joho i inga cahan chí indiví ta já cáchi a já:

—Ndóhó, na cúu cuénta mí i, cuáqueta ndó jatá ñuu jan já ná a caja ndó cuachi caja na ñuu jan. Ta já ná a xinu coo tondóhó vaxi nuú na ñuu jan jatá ndo.

⁵ Jáchi sa nacacuahá ndivaha cuachi na ta janda indiví xinu coo cuachi na. Ta co ndíndójo Ndióxi sahá cuachi caja na.

⁶ Ta tá quiahva nacaja na jan xihín inga ñayivi quiahva já ndítahan caja ndó xihín ná viti. Ta janda ivi táhdá chága ví ndicó coo ndó caja ndó xihín ná. Ta tá quiahva najácoho na jan inga ñayivi quiahva já ivi táhdá chága ví ndítahan quiahva ndó nu ná coho na.

⁷ Nandínehe jícó ndivaha na mé ná sahá ña cán quéa ndítahan jándoho ndivaha ndó ini na viti. A juú quiahva nanduu cuicá na sahá ña cán quéa ndítahan caja xixi ndó xihín ná viti. Cáhán na ña cahnda na chuun nuú in nación. Ta cáhán na ña a ndóho toho ini na. Ta cáhán na ña coo cúu ná tátuhun in ña cuáan.

⁸ Sahá ña cán quéa tixi in tálaá quivi quixi tá nuú ña núu nu ná. Já casáhá quivi na ta cacuéha ndivaha ini na ta xinu joco nu ná. Ta já chicaan Ndióxi na nu ñuhu cáyi jáchi jándihí Ndióxi, xitoho í saha ná, mé a íin ndée caja tóco ndihí ñaha —cáchi a.

⁹ Ta já casáhá cuacu ndijáá rey, na sáhdá chuun nuú ñayivi ndúu ñuyíví. Ta táhdá ini na tá ná cuni na ñihma cána ñuu Babilonia cán. Jáchi mé na náhnu yóho naquihvi nuu na xihín ña xica jii cán ta najátiví na jihún na xihín ña.

¹⁰ Ta xica xica nasacandichi na jáchi yíhvi na sahá ndá quiahva quini ndóho ini ña

cúu yuhú nuu ñuu Babilonia cán. Ta já casáhá cáchí mé rey cán já:

—Ay, ay, ndáhví nahá ñacuu ndó, ñuu Babilonia jáchí vatí cúu ndó ñuu cáhnu ndivaha joo in too johó naxinu hora ndóho ini ndó —cáchí ña cán.

¹¹ Ta ndijáá ña cája ndahví ndúu ñuyíví cuacu ri ña cán va ta tahnda ndivaha ini na sahá ñuu Babilonia ña jáchí a cóo ga ña cueen ñaha ndójo na xínu coo na.

¹² Ta ña sándojo ña cán quixi na jicó ña cúu jiuhun cuáán xihín jiuhun cúxú xihín yuu yahvi ndivaha xihín perla vaha xihín jahmá vaha ndivaha ña cávaha xihín yahva naní lino xihín jahmá seda xihín jáhma ndíhí ticayí xihín jáhma cuáhá ñi xihín ndijáá nuú yító támi sáhan xihín ñaha cávaha xihín nuhu yócó elefante xihín ndijáá yító yahvi ndivaha xihín ndijáá ñaha cávaha xihín caa cuáán xihín ña cávaha xihín caa uun ta jári ñaha cávaha xihín yuu naní mármol.

¹³ Ta quiahva já sáñehe na canela xínu coo na xihín ndijáá ñaha támi sáhan. Ta ñehe na jusa xihín mirra xihín perfume viti. Ta quiahva já ñehe ri na vino xihín aceite xihín harina vaha xihín trigo. Ta quiahva já sáñehe ri na quití xójo xihín ndicachi xihín cuáyí xihín carreta. Ta janda ñayivi xéen na caja chúun nu ná sáñehe na. Ña yóho sándojo na quixi na joo ni in na a cuéen ga ñaha na.

¹⁴ Ndjáá ña cája ndahví cán cahan ña xihín ñuu Babilonia cán já cachi na já:

—Coó ga cuíhi vaha, rí catóo nahá ndó caxí ndó. Ta viti sa ñandihí saha tóco ndihí ña lándá xihín ña cuicá ñasanduu nu ndó ña —cáchí ña.

¹⁵ Ta ña ñacaja ndahví xihín tóco ndihí ñaha yóho ñandicuícá ndivaha na xihín ndahví ñacaja na xihín ña ñuu Babilonia cán. Ta xicá xicá candita na candehé ña ñuu Babilonia cán jáchí yíhví ña ndóho na tá quiahva ndóho ini ña cán. Ta cuacu ndivaha na ta tahnda ndivaha ini na.

¹⁶ Ta já cáchí ña já:

—Ay, ay, ndáhví nahá ñacuu ñuu cáhnu Babilonia ña. Ndató ndivaha ñasanaha ñuu yóho tátuhun in ñañáha ndíxi jahmá lino vaha ndivaha xihín jahmá ndíhí ticayí xihín jahmá cuáhá ñi. Ta ñacacutú ña

xihín jiuhun cuáán ta xihín yuu yahvi ndivaha ta xihín perla.

¹⁷ Joo in too johó ñandihí saha tóco ndihí ña cuicá ñasacomí mé ñuu Babilonia ña —ñacachi na.

Ta ndijáá ña sáhnda chuun nuú ña ñehe barco, xihín ndijáá ña cándójó xicá xihín ndijáá ña cája chúun ini mé barco cán xihín ndaja táhan na cája ndahví xihín ña quixi chí tañuhú cán ñasandita xicá ña sáñdehé ña.

¹⁸ Ta tá naxini na ndíndita ñihma ña cáyi ñuu cán já ñacayuhú ña já ñacachi na já:

—Ni in túhún toho inga ga ñuu co quee táhan xihín ñuu Babilonia ña cáhnu yóho —ñacachi na.

¹⁹ Ta xihín ña táhnda ini na ñachójó ña ña yacá jiní ná. Ta ñacasáhá sácu ndivaha na já cáyuhú ña já cáchí ña já:

—Ay, ay, ndáhví nahá ñacuu ñayivi ñasanduu ñuu cáhnu ña jáchí xihín ña cuicá ñasacomí ña najácacuícá ña ndijáá ña xicá nuú tañuhú xihín barco. Joo in too johó ñandihí sahá ña ña —cáchí ña cán sácu na.

²⁰ Ta ndítahan cajji ini ña ndúu indiví sahá ña ñandóho ñuu cáhnu yóho. Ta quiahva já ndítahan cajji ri ini ndijáá ña cúu cuéntá Ndióxi xihín ña cúu apóstol xihín ña cúu profeta. Jáchí xihín ña ñacaja Ndióxi xihín ñuu Babilonia yóho ñandiquehe a cuéntá sahá ña núu ñacaja mé ña cán xihín ndó, ña cúu cuéntá Ndióxi.

²¹ Tá ñandihí já naxini i in táto Ndióxi, ña íin cuaha ndé. Ndíñehe a in yuu cáhnu ña cúu á tátuhun in yuu yojó. Ta najácana a ña ini tañuhú ta já ñacachi a já:

—Tá quiahva najácana i yuu yojó yóho ini tañuhú ta ñasacoo a cahá tañuhú cuahan quiahva já yaha ri xihín ñuu Babilonia. Vatí cúu a in ñuu cáhnu ndivaha joo anda ama cáa quivi a ndícó coo ga ñayivi cuni na ña.

²² Ta ni música a tácu ga mé ñuu ña ta ni a cáha ga arpa ni tóyoó ni trompeta. Ta ni in ga ñayivi a cája chúun ga ñuu ña jáchí ni in túhún toho ndahví a cája na. Ta ni a tácu ga yuu yojó ña ndíco najihí.

²³ Ta janda ni in íti loho a túun ga ñuu ña. Ta ni a cáhan ga ñayivi vicó tándaha jáchí coo ga ña ña coo. Jáchí ña najicó ñaha cán ñasacuu na ña náhnu ndúu ñuyíví ta najándahvi na ndaja táhan ñayivi ndúu

ñuyívi xihín ña tají ñacaja na —cáchi táto Ndióxi.

24 Ta ndoho ini na jáchi mé ñayivi ñuu Babilonia jan ñasahní na ña profeta xihín na cúu cuéntá Jesús ta anda cuahá ñayivi ndijáá ñuu ñuyívi ñasahní ñahá na.

19

1 Tá sa ñayaha tóco ndihi ña yóho já ñaxini johó i cáhan cóhó cuahá ndivaha ñayivi indiví ta já cáchi na já:

Cáhnú cúu Ndióxi jáchi in túhún mé á queá jácaçu mí.

Ta ín ndée mé á caja tóco ndihi ñaha ta cáni nu yó caja cáhnú ndivaha í mé á.

2 Jáchi ndaa cája ndihi mé á ñaha tá cája vií a sahá ñayivi.

Ta ndaa ñacaja mé á tá ñasacu ini a jándihi a sahá ñuu Babilonia jan jáchi ñasacuu a túhún ñá xíca jii.

Jáchi xihín tóco ndihi ña núu ñasacaja ñá ña quíji ñá xihín na co cúu yí ña najátivi ndihi ñá ñayivi ndúu ñuyívi.

Sahá ña cán queá najándihi Ndióxi saha ña ta já ñatahnda cuéntá sahá ña ñacaja ñá tá ñasahní ñá na cúu cuéntá Ndióxi, cáchi na cáhan indiví cán.

3 Tá ñandihí já ñacasáhá tucu na cán cáhan na já cáchi na já:

—Cáhnú cúu Ndióxi jáchi ñacaja mé á ña cáyi ñuu cán ta anda ama cáa quívi ndíndita ñihma ña —já cáchi na indiví cán.

4 Ta ndíhoco comí na sacuahá ndúu cán xihín ndícomí mé ña tácu cán ñacaxítí na janda quiahva ñacani ndaa taan na nu ñúhu ta já ñacaja cáhnú na Ndióxi, mé a ín coo nu sácoo rey cán. Ta tá cája cáhnú na Ndióxi já cáchi na já:

—Já ná coo. Cáhnú cúu Ndióxi —cáchi na.

5 Ta janda nu ín coo Ndióxi cán ñaxini johó i cáhan in a ta já ñacachi a já:

—Tóco ndihi ndó, na cája chúun cuéntá mé á xíní ñúhú caja cáhnú ndó Ndióxi, mé a cája cáhnú í. Coó caja toho a á cúu ndó na náhnú a na valí jáchi cája ndó ña sáhdá mé á —cáchi a.

Tá coo víco indiví sahá ña ndiquehe Jesucristo na cúu cuéntá mé á

6 Tá ñandihí já ñaxini johó tucu u ña tácu túhún tá cáhan cuahá ndivaha ñayivi. Ta

tácu ña túhún tá cáha cúu ticuí tañu cáva ta tácu ña túhún tá cána tasa. Ta já cáchi na já:

Cáhnú cúu Ndióxi, xitoho í, mé á cája cáhnú í jáchi sa ñacasáhá mé á cómí a cuéntá sahá ñayivi viti.

Ta ín ndée mé á caja tóco ndihi ñaha.

7 Xíní ñúhú cavatá yo ta xíní ñúhú cajii ndivaha iní caja cáhnú ndivaha í mé á.

Jáchi sa ñaxinu coo quívi ndiquehe Jesucristo, mé a cúu túhún ndicachi loho, na cúu cuéntá mé á.

Cacuu a túhún tándaha Jesucristo xihín na cúu cuéntá mé á, na sa ndúu tiáhva na tándaha na xihín mé á.

8 Ta ñehé táhvi ná candixi na jahmá vaha ndivaha, ña naní lino ta cúu á ña vií ndivaha ta ndató ndíyihvi a, cáchi na.

Jáchi mé jahmá vií ña naní lino cán náha ña ñaxíca vaha na cán íchi cuéntá Ndióxi.

9 Tá ñandihí já ñacachi mé táto Ndióxi já xihín i:

—Cahyún ña yóho. Cajii ini ñayivi, na ñacana Ndióxi chúun indiví tá ná xinu coo quívi ndiquehe Jesucristo, mé a cúu túhún ndicachi loho cán, na cúu cuéntá mé á —ñacachi táto Ndióxi cán xihín i.

Ta ñacachi tucu a já:

—Mé a ndaa ndinuhu túhún Ndióxi cúu ña yóho —ñacachi a xihín i.

10 Anda já ñacaxítí i nu táto Ndióxi cán ña ná caja cáhnú i ña. Joo já ñacachi a já xihín i:

—A cáxítí tohún nuú yehe jáchi ndítahan caja cáhnún Ndióxi. Jáchi yehe cúu u da cája chúun nu Ndióxi tá quiahva cája chúun yóho xihín java ga na cúu cuéntá Jesús, na cúu ñanún, na co jándacoo cáhan ña ndaa, ña najánaha Jesús nuú ñayivi. Caja cáhnún Ndióxi —cáchi a.

Jáchi na cúu profeta cándeé ini na ña jánaha Jesús ña ndaa sahá ña cán queá cáhan na ña nuú ñayivi.

Tá ñaxini Juan in a cánúu cuáyí yaa

11 Tá ñandihí já ñaxini i ñanuna indiví ta ñaqueta in cuáyí yaa. Ta mé a cánúu rí cán naní a: mé a co cáva ivi johó ini. Ta naní tucu a: ña ndaa. Jáchi ndaa cája vií a sahá

ñayivi ta ndaa cája mé á tá quihvi táhan cáni táhan xihín ná.

¹² Ta tá quiahva yéhe nu cándaa ñúhu cáyi quiahva já yéhe nduchú núú a. Ta cándojó cuahá ndivaha tiyivi jini á. Ta ndaa in quivi taan mé á joo in túhún mé á xini ndá quivi quéa ndaa taan.

¹³ Ta nandaxi jáhma mé á xihín nji. Ta nani a: tuhun Ndióxi.

¹⁴ Ta naxini i ndico in táhnda cáhnu soldado cuéntá indivi jatá cuahan na xihín á. Ta ndíxi na jahmá vaha ña nani lino. Ta cúu á jahmá yaa cachi, ña ndató vii ña. Ta in in na cán cánúu cuáyí yaa casahan na xihín á.

¹⁵ Ta yúhu mé á ña cúu tuhun Ndióxi cán quéta in yúchu cáni ña jeen ndivaha. Ta xihín mé yúchu jeen cán jándicuehe quini ndivaha mé á ndijáa ñayivi ndúu ñuyívi. Ta cahnda ndeé mé á chuun saha ná. Ta cája vii a saha ná tá quiahva cája da sáni nihni jatá uva ini pila ña ná cuhni ri. Ta mé Ndióxi cúu á jándoho ndivaha ini ñayivi jáchi xójo ndivaha ini mé á xihín ná ta mé á cúu á Ndióxi ña íin ndeé caja tóco ndihi ñaha.

¹⁶ Ta jatá jáhma ndíxi mé a cán xihín nu jihin a ndaa java tuhun já cáchi ña já: “Yehe cúu rey nuú ndaja táhan rey ta cúu u xitoho nuú na náhnu ndúu ñuyívi”, cáchi a.

¹⁷ Tá nandihí já naxini i in tátó Ndióxi cándichi a jatá candii. Ta já nacayuhú cóhó a nuú ndijáa laa, rí ndáchí nu táchi. Ta já nacachi a já xihín ri:

—Naha ndihi ndó taca ndó cajini ndó ña quiahva Ndióxi nu ndo.

¹⁸ Ta ña caxí ndo cacuu a yiquí cuñu na náhnu, na sáhnda chuun nuú ñayivi. Ta caxí ndo yiquí cuñu na cúu sacuaha nu soldado xihín yiquí cuñu na ndacú. Ta caxí ndó yiquí cuñu cuáyí xihín yiquí cuñu da cándojó jatá ri. Ta caxí ndó yiquí cuñu na xíca núná mé xihín na cómí xitoho cuéntá saha. Ta quiahva já caxí ndó yiquí cuñu na valí xihín na náhnu viti —cáchi a.

¹⁹ Tá nandihí já naxini i rí cúu quití quini cán nataca rí xihín na náhnu, na sáhnda chuun nuú ñayivi ndúu ñuyívi ta xihín soldado na. Nataca na cani táhan na xihín mé a cánúu jatá cuáyí yaa cán xihín soldado mé á.

²⁰ Ta natiin mé á quití quini cán xihín da cúu profeta túhún, mé da nacaja ña xitúhún nu mé rí cúu quití quini cán. Jáchi xihín ña xitúhún nasacaja mé profeta túhún cán najándahvi da ñayivi ta najacahan da na ña ná nani marca mé rí quini cán yiquí cuñu na. Ta já nacaja cáhnu na tiniñu yúu ri. Ta naxini i najacana tácu Ndióxi mé quití quini cán xihín profeta túhún cán ini indayá, ña cúu tátuhun in mini nu cándaha ñúhu cáyi xihín azufre.

²¹ Ta na java ga cán naxihí na xihín yúchu cáni ña naqueta yúhu mé a cánúu jatá cuáyí yaa cán. Ta ndijáa laa nataca ndihi rí caxí rí yiquí cuñu na janda quiahva nandivaha ini rí.

20

Cáhan Juan sahá in mil cuia tá ná candico ndaa tiñáhá sacuaha

¹ Tá nandihí já naxini i nanuu in tátó Ndióxi chí indivi ta ñéhe a yávi ña súná yuhú yávi cúná, ña co xinu nu ndihi nuu cán. Ta cánee in cadena ndeé ndáha á.

² Ta natiin mé á coo quini, rí cúu tiñáhá sacuaha nani Satanas, rí nasahin janda saha. Ta natató a ri xihín cadena cán tixi in mil cuia.

³ Ta najacana a ri ini yávi cúná nuú nachicaji a ri. Ta nasacu a in sello yuhú yéhe nu ndacaan ri já ná a quéta rí jándahvi rí ñayivi ñuyívi janda quiahva ná yaha mé in mil cuia. Ta tá sa nayaha in mil cuia já janí tucu rí caca nuu rí tixi chá tiempo cuítí va.

⁴ Tá nandihí já naxini i ndíta cuaha táyi vaha nu ndúu coo na candojo chuun ña caja vii na sahá ñayivi. Ta quiahva já naxini ri cán ndúu ínima na nachitúhún na yiquí jini na jáchi nacahan na tuhun Ndióxi, ña ndaa najánaha Jesús nuú ñayivi. Ta cúu ná na coo nacaja cáhnu quití quini cán xihín tiniñu yúu ri. Ta ni coo nasahan na ñamaní nani marca ri taan na ni ndáha ná. Ta naxini i nanditacu tucu mé na cán ta anda jávi mé ná xihín Jesús nasacomí na cuéntá sahá ñayivi tixi in mil cuia.

⁵ Ta na yóho cacuu na nu cuítí nditacu tucu. Joo java ga na naxihí cán camaní nditacu na jáchi ndítahan nu ná candati na janda quiahva ná yaha in mil cuia.

6 Cajji ini ñayivi, na nditacu tañu na jánditacu Ndióxi nu cuítí cán jáchi cúu ná na nandicaxi mé á. Jáchi a cùhun toho na indayá nu ndoho ini ñayivi quini. Ña cán cacuu a tátuhun quivi na chí ivi. Ña yaha xihín ná quéa nduu na jutù caja ndívi na nu Ndióxi xihín nuú Jesucristo. Ta xihín mé á cacomí na cuéntá sahá ñayivi tixi in mil cuia.

7 Ta tá sa ná yaha in mil cuia cán já janí Satanás, mé tiñáhá sacuaḥa nu ndácaan rí ndájí rí cán.

8 Ta já queta rí jándahvi rí ndijáá ñayivi ndúu ñuyíví. Ta jándahvi rí ñayivi ndúu ñuu naní Gog xihín ñuu naní Magog ña ná taca na caní táhan na. Ta na soldado taca cán cacuu na tátuhun ñutí ndúu yuhú tañuhú xihín ña cuḥa cúu ná.

9 Ta ndicuítá nuu ñayivi ndijáá ñuu ñuyíví ta cava yivi na jatá tóco ndihi na cúu cuéntá Ndióxi. Ta quiahva já cava yivi na jatá ñuu Jerusalén, mé ñuu ña quíhvi ini Ndióxi. Joo jácuyu Ndióxi ñuhu cáyi indiví ta jándihi a saha ná.

10 Ta mé tiñáhá sacuaḥa, mé rí najándahvi ñahá cán jácana Ndióxi rí ini in mîni nu cándaha ñuhu cáyi xihín azufre. Ta sa mé cán cúu nu jácana mé á quití quini xihín da cúu profeta túhún. Ta cán cañuhu na ndoho ini na ñuu ta ndiví anda ama cáa quivi.

Tá cajú vii Ndióxi sahá ñayivi

11 Tá nandihí já naxini i in táyi cáhnu, dó yaa cachi nu sácco Ndióxi. Ta nuu mé á nandíñuhú tóco ndihi ñuyíví xihín indiví ta chí a vája ga cuu cuní ña.

12 Ta naxini i ndijáá na sa naxihí, na válí xihín na náhnu ndíta na nu ín coo Ndióxi. Tá nandihí já naxini i nanuna nuú java libro. Ta nanuna inga libro nu ndáa quivi tóco ndihi na catacu anda ama cáa quivi. Ta já nacavií sahá ña nacaja in in na sa naxihí cán jáchi ini mé libro cán ndáa tóco ndihi ña nacaja in in ñayivi.

13 Ta nandindita tóco ndihi na naxihí ini tañuhú xihín na nanduxu já ná cajú vii Ndióxi sahá ndihi na tá quiahva cáa nacaja in in na cán.

14 Janda jávi a quíví ga ñayivi ta a cùhun ga ínima na nuú nataca ínima na naxihí. Joo najácana Ndióxi ñayivi quini ini mé mîni

nu cándaha ñuhu cáyi. Mé mîni cán cúu á indayá nuú ndoho ini ñayivi ta cúu á tátuhun quivi na chí ivi.

15 Ta mé cán cúu nuú najácana Ndióxi tóco ndihi na co ndáa quivi nu mé libro nu ndáa quivi ñayivi catacu anda ama cáa quivi.

21

Tá naxini Juan indiví saá xihín ñuyíví saá

1 Tá nandihí já naxini i indiví saá xihín ñuyíví saá. Jáchi sa nandihí va sahá indiví xihín ñuyíví ña nu cuítí cán. Ta jári tañuhú sa coó ga dó ñuhu viti.

2 Ta yehe, da cúu Juan naxini i nanuu ñuu Jerusalén saá, ña yí ta naquixi a chí indiví nu ín Ndióxi. Ta tá quiahva ndató cácutú in ñáñáhá tándahá ndiquehe ña yí ña quiahva já ndató nacacutú ñuu Jerusalén cán.

3 Tá nandihí já naxini johó i nacayuhú cóhó a chí indiví ta já cáchí a já:

—Ndióxi ín a tañu ñayivi viti jáchi cúu ná cuéntá mé á. Ta coo a xihín ná jáchi cúu á Ndióxi, mé á cája cáhnu na.

4 Ta mé á yacó ndihi a ticuítí nuu ná ña nasacu na. Ta a quíví ga na. Ta ni a cuácu ga na. Ta ni a táhnda ga ini na. Ta ni a ndíhvi ga na. Jáchi sa najándihí Ndióxi saha tóco ndihi ña cán, ña nasahin jihna —cáchí a.

5 Ta mé a ín coo nu sácco rey nacahan ta já nacachi a já:

—Candehé. Yehe ndája saá i tóco ndihi ñaha.

Ta já nacachi tucu a já:

—Cahyún tóco ndihi ña cáhan i xuhun yóho jáchi cúu á ña ndaa ta cuu candee ini ndó ña —cáchí a.

6 Tá nandihí já nacachi tucu a já xihín i:

—Sa najáxinu coo i tóco ndihi ñaha. Yehe cúu u nu cuítí ta yehe cúu u nu ndíhí jáchi janda tá cámaní cava sahá saha tóco ndihi ñaha sa ín va yehe ta coo tá coo i vatí ná ndihi sahá. Ta ndá na cúní candaa chága ini sahá yehe já cajú i ña ná cuu candaa ini na sahá i. Ta cúu á tátuhun íchi ini na ticuítí, dó cája ña ná catacu na anda ama cáa quivi. Ta coó toho yahvi quehe e nu ná saha do.

7 Ta ndá na ná cana vaha nu tóco ndihi ña núu ñehe táhvi na ndiquehe na tóco ndihi ña yóho nuú i. Ta yehe cacuu u Ndióxi, mé á cajú cáhnu na ta mé ná cacuu na jahyi i.

8 Joo na láhá xihín na co cúni candúsa tuhun Ndióxi xihín na cándají na cúu cuéntá Ndióxi, mé ná cán cuhun na indayá nu cándaha ñúhu cáyi xihín azufre. Ta cán cuhun ri na sáhní ndii xihín ndijáá na ndúu xihín na co cúu yi á ñájíhi na. Ta cán cuhun ndijáá na cája tá nuú ña tají xihín na cája cáhnu yoco xihín na cáhan ña tuhún. Ña yóho cacuu a tátuhun quivi na chí ivi jáchi ndoho ndivaha ini na ini indayá nu cándaha ñúhu cáyi xihín azufre —cáchi a.

Cáhan Juan sahá ñuu Jerusalén saá

9 Ta ndaja coo in táhan ndíhusa táto Ndióxi ña ñéhe usa coho nu ñúhu usa ña núu quixi jatá ñuyívi naxinu a nuú i ta já nacachi a já xihín i:

—Naha quí yóho candehún. Jáchi jánaha i nuun na cúu cuéntá mé a cúu tátuhun ndicachi loho. Na yóho cúu ná tátuhun in ña tándaha ta Jesucristo cúu á tátuhun yí ña —cáchi a.

10 Anda já nacaja ínima yii Ndióxi xihín i ña ndáca táto Ndióxi yehé já nasahan i in yucu jícó ña cáhnu. Ta cán naxini i ñuu Jerusalén ña yii, ña nanuu chí indivi nu in Ndióxi cán.

11 Ta mé ñuu cán ndató ndivaha yéhe ña jáchi cája mé á ña ná ndiyehé ña. Ta jíñu ña tá quiahva jíñu yuu yahvi ndivaha tátuhun yuu jaspe. Ta cúu á tátuhun yutátá jáchi cuu candehé yó chíhini a janda inga xoo a.

12 Ta jatá mé ñuu cán nacava nuu in náma yuu cáhnu ta jícó ndivaha. Ta nasahin uxu ivi yéhe a nu ndíta in in táto Ndióxi in in yéhe a. Ta ndíca yéhe cán ndáa quívi ndíhuxu ivi táhnda na naquixi chichi Israel.

13 Ta uní yéhe sándehe nu xoo cána candii. Ta uní yéhe sándehe nu xoo chí norte. Ta uní yéhe sándehe nu chí sur. Ta uní yéhe sándehe nu xoo quéta nuu candii.

14 Náma yuu ñuu Jerusalén cán nasahin uxu ivi yuu ndúhu saha. Ta jatá yuu cán ndáa quívi ndíhuxu ivi na apóstol, na naxica tuun xihín Jesús, mé a cúu tátuhun ndicachi loho cán.

15 Mé táto Ndióxi ña cáhan xihín i cán cánee in tóyoó jiihun cuáán ndáha ña ná chiquiahvá mé á ñuu cáhnu xihín yéhe a xihín náma yuu ña ndájí jatá.

16 Ta nachiquiahvá a ña xihín tóyoó cán ta in quiahva ndáa ndícomi xoo mé ñuu cán ta chí in quiahva cáni a ta in quiahva ndíca ña. Ta quiahva ñéhe a cúu á ivi mil ivi ciento kilómetro. Quiahva já cáni ña ta quiahva já jícó ña ta quiahva já ndíca ña.

17 Tá nandihí já nachiquiahvá táto Ndióxi cán náma yuu ndájí jatá ñuu cáhnu cán. Ta quiahva ñéhe a cúu uní jico comi metro. Ta metro cája chúun táto Ndióxi cán cúu dó tátuhun dó chíquiahvá ñayivi ndúu ñuyívi ñaha.

18 Ta mé náma yuu ndájí jatá ñuu cáhnu cán nacava ña xihín yuu jaspe. Ta mé ñuu cáhnu cán nacava ña xihín jiihun cuáán, ña cúu tátuhun yutátá ña ví ndivaha nuu.

19 Ta mé yuu ndúhu ña nacana saha mé náma yuu cán nacacutú a xihín tá nuú yuu yahvi ndivaha. Yuu ndúhu nu cuítí cán nacacutú a xihín yuu naní jaspe. Ta ña cáhivi cán nacacutú a xihín yuu naní zafiro. Ta ña cáhuni cán nacacutú a xihín yuu naní ágata. Ta ña cácomi cán nacacutú a xihín yuu naní esmeralda.

20 Ta ña cáhuhun cán nacacutú a xihín yuu naní ónice. Ta ña cáhiñu cán nacacutú a xihín yuu naní cornalina. Ta ña cáhusa cán nacacutú a xihín yuu naní crisólito. Ta ña cáhuna cán nacacutú a xihín yuu naní berilo. Ta ña cáhin cán nacacutú a xihín yuu naní topacio. Ta ña cáhuxu cán nacacutú a xihín yuu naní crisoprasa. Ta ña cáhuxu in cán nacacutú a xihín yuu naní jacinto. Ta ña cáhuxu ivi cán nacacutú a xihín yuu naní amatista.

21 Ta ndíhuxu ivi yéhe ini ñuu cáhnu cán cúu á uxu ivi perla. Ta tá in tá in yéhe cán nacava xihín in tálaá perla ní. Ta mé cáyé cáhnu ñuu cán cúu á ña nacava xihín ndinuhu jiihun cuáán, ña cúu tátuhun yutátá jáchi janda inga xoo a tívi.

22 Ta ni in túhún veñuhu coó naxini i ini mé ñuu cáhnu cán. Jáchi mé Ndióxi, xitoho í, mé a in ndée cája tóco ndihí ñaha cúu á tátuhun veñuhu na. Ta jári Jesús, mé á cúu tátuhun ndicachi loho cán cúu á tátuhun veñuhu na.

23 Ta mé ñuu cáhnu cán co xini ñuhú toho a candii ni yoo ña ná jándiyehé ñahá jáchi xihín quiahva yéhe Ndióxi cán jándiyehé a

mé ñuu cán. Ta Jesús, mé a cúu tátuhun ndicachi loho cán cúu á tátuhun lámpara jándiyehē a ñuu cán.

²⁴ Ndijáá ñayivi, na naquixi ndijáá nación ñuyívi caca nuu na ini ñuu cáhnu cán xihín quiahva yehē a. Ta ndijáá na sáhdá chuun nuú ñayivi ñuyívi xinu na ñuu cán ta ndiquiahva na tóco ndihi ña cuicá cómi na nu mé ñuu cán.

²⁵ Ta a cándaji toho yehé a tá ndiví ta coó toho ña ñuú coo cán.

²⁶ Ndijáá ña cuicá xihín ña náhnu cuéntá ñayivi ñuyívi yóho cañehe na ña nu mé ñuu cán.

²⁷ Joo ni in túhún ña quini a quíhvi toho ini ñuu cán. Ta ni in na cája ñaha cándají Ndióxi a quíhvi cán. Ta ni na catóo jándahvi ñayivi a quíhvi cán. Na ndihvi cán cuití va cúu ná na ndáa quiví nu libro nu ndáa quiví tóco ndihi na catacu anda ama cáa quiví. Mé libro yóho íin a nuú Jesús, mé á cúu tátuhun ndicachi loho.

22

¹ Tá nandihí já najánaḥa táto Ndióxi cán in yuta vií nuú i nu ñúhu ticuúí, dó cája ña ná catacu ñayivi anda ama cáa quiví. Ta tá quiahva yehē yutátá quiahva já yehē nuú do. Ta cána dó chí xoo nu íin coo Ndióxi xihín Jesús, mé a cúu tátuhun ndicachi loho cán.

² Ta yáha dó mé mañnú ndaa íchi cáhnu mé ñuu cán. Ta in in xoo yuta cán sáhnu yító, dó cája ña ná catacu ñayivi anda ama cáa quiví. Ta tá yoo tá yoo cúun cuíhi nu dó cán. Ta uxu ivi tañu cúun cuíhi nu do nu cuía. Ta ndáha do cája ña ná ndivaha ñayivi ñuyívi.

³ Ta cán ni in ga ñaha a cühun chahan jata. Ta Ndióxi xihín Jesucristo, mé a cúu tátuhun ndicachi loho cán coo a nu sácoo rey mé ñuu cáhnu cán. Ta na cúu cuéntá Ndióxi caha cáhnu na mé a cán.

⁴ Ta cuni táhyí na nuú mé á ta candaa quiví mé á taan na.

⁵ Ta cán coó toho ñuú coo. Ña cán quéa na canduu cán a cúní ñúhú ga na ñúhu lámpara ta ni a cúní ñúhú ga na ña ná yehē candii jáchi mé Ndióxi, xitoho na jándiyehē a nu ná. Ta cahnda na chuun tátuhun rey anda ama cáa quiví.

Sa cáyati quiví quixi Jesucristo

⁶ Tá nandihí já nacachi táto Ndióxi cán já xihín i:

—Tuhun yóho cúu á ña ndaa ta cuu can-deé inún ña. Jáchi mé Ndióxi, xitoho í, mé a cája ña ná cahan profeta, mé a cán quéa nachindahá a táto mé á já ná caxi tuhun a nuú na cúu cuéntá mé á ña yachi quixi tóco ndihi ña yóho —nacachi a.

⁷ Ta já cáchí Jesús já:

—Sa saa yachi va yehē. Cajji ini na cándusa tuhun cahan sahá ña yaha chí nuú, ña ndaa nu libro yóho —cáchí a.

⁸ Yehē, da cúu Juan naxini johó i ta naxini ndihí i ña yóho. Ta tá nandihí naxini johó i ña ta tá nandihí naxini i ña já nacaxítí i nu táto Ndióxi ña caha cáhnu i ña jáchi mé a najánaḥa ña yóho nuú i.

⁹ Joo nacahan táto Ndióxi cán xihín i já nacachi a já:

—A cáxítí tohún nuú yehē jáchi ndítahan caha cáhnún Ndióxi. Jáchi yehē cúu u da cája chúun nu Ndióxi tá quiahva cája chúun mún xihín ñanún, na cúu profeta cuéntá Ndióxi xihín na cándusa ña cahan libro Ndióxi yóho —nacachi táto Ndióxi cán xihín i.

¹⁰ Tá nandihí já nacachi tucu a já xihín i:

—A chíjehé tuhún sahá tuhun Ndióxi, ña ndaa nu libro yóho jáchi sa nacayati tiempo xinu nuú á coo a.

¹¹ Joo ndá da cája quini ná caha quini chága da tá cúní da. Ta ndá da coó vií ná caca tiquíní mé dá tá cúní da. Joo ndá da vaha ná ndihí ini da caha da ña vaha. Ta ndá da ndiquiahva vaha mé ndáha Ndióxi ná ndihí ini da caca ndacú da íchi cuéntá mé á —cáchí táto Ndióxi xihín i.

¹² Ta já nacachi Jesús já xihín i:

—Candehé. Sa saa yachi vi. Ta vaxi i ñéhe e yahvi quehe in in ñayivi. Ta ndiquiahva i nuú in in na ña ndítahan quehe na sahá ña nacaja na.

¹³ Yehē cúu u nu cuití ta yehē cúu u nu ndihí jáchi jándá tá camaní cava sahá saha tóco ndihí ñaha sa íin va yehē ta coo tá coo i vatí ná ndihí sahá —cáchí a.

¹⁴ Cajji ini ñayivi, na nandaja vií ínima jáchi cúu á tátuhun ndícata na jáhma ná já ná cuu ñehē táhvi na caxí na cuíhi nuú yító cuíhi, dó cája ña ná catacu ñayivi anda ama

cáa quivi. Jáchi xihín ña yóho cuu quihvi na chí yéhé ñuu cáhnu cán.

¹⁵ Joo chí jata mé ñuu cán candoo tóco ndihi na ñacaan cája ña núu xihín tóco ndihi na cája ña tají xihín ndijáa na ndúu xihín na co cúu yí ná á ñájíhí na. Ta jata ñuu cán candoo ri na sáhní ndii xihín na cája cáhnu yoco xihín na cáhan ña tuhún xihín na jándahvi ñani táhan.

¹⁶ —Yehe cúu Jesús ta nachindahá i táto mí i já ná caxi tuhun a ña yóho xihín ndijáa na cúu cuénta mí i, na ndítaca ndijáa veñuhu. Yehe ñacaja i ña ñacacu rey David ta ñaquixi i chichi mé David. Cúu utá tuhun quimi cáhnu, rí quéta tá ñatívi —cáchi Jesús.

¹⁷ Mé ínimá yíi Ndióxi xihín na cúu cuénta Jesús cana na Jesús ña ná quixi a ta já cachi na já:

—Naha quíi ndo.

Ta ndá na xini johó ña yóho xini ñúhú cachi ri na cán va:

—Naha quíi ndo.

Ta ndá na íchi ini ticuí, na cúni coho dó ná quixi na nu mé á já quiahva ticuí nu ná,

dó caja ña ná catacu na anda ama cáa quivi. Ta coó toho yahvi quehe mé á nu ná saha do.

¹⁸ Ta ña yóho quéa cúni cachi i xihín tóco ndihi ndó, na xini johó ña ndáa nu libro yóho: Ta ndá na ná chinúu chága tuhun jata ña sa cáhan libro yóho já quéa chinúu ri Ndióxi tondóhó, ña ndáa nu libro yóho jata ná.

¹⁹ Ta ndá na ná tavá tuhun cáhan Ndióxi, ña ndáa nu libro yóho já quéa tavá Ndióxi quivi ná ña ndáa nu libro mé nu ndáa quivi tóco ndihi ñayivi catacu anda ama cáa quivi. Ta mé na cán a cuú quihvi na ñuu yíi ndivaha cán ta ni a quiahva Ndióxi nu ná ñaha cáhan mé libro yóho saha.

²⁰ Ta sáhan Jesús tuhun saha tóco ndihi ña yóho já cáchi a já:

—Mé a ndaa sa saa yachi vi —cáchi a.

Já ná coo. Naha quíi ndó Jesús, xitoho nde.

²¹ Ña cúni quéa ná caja cuahá Jesucristo, xitoho í ñamaní xihín ndihi ndó. Já ná coo.